


El Nuevo Testamento
en mixe de Coatlán



New Testament in Mixe, Coatlán (MX:mco:Mixe, Coatlán)

El Nuevo Testamento en mixe de Coatlán New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files dated 29 Jan 2022
4190de74-18ab-52cf-ba4e-5f99ab05892f

Contents

SAN MATEO	1
SAN MARCOS	62
SAN LUCAS	105
SAN JUAN	167
HECHOS	222
ROMANOS	279
1 CORINTIOS	310
2 CORINTIOS	340
GÁLATAS	360
EFESIOS	372
FILIPENSES	383
COLOSENSES	391
1 TESALONICENSES	398
2 TESALONICENSES	405
1 TIMOTEO	409
2 TIMOTEO	416
TITO	421
FILEMÓN	425
HEBREOS	427
SANTIAGO	448
1 PEDRO	455
2 PEDRO	464
1 JUAN	469
2 JUAN	477
3 JUAN	479
JÚDAS	481
APOCALIPSIS	484

SAN MATEO

Jaayhui'my Jadu'n Nej Jesucristo Ytun Yjajti

Je Jesucristo ymij'ap ymijteedy

¹ Cham ngapxa'ñ nmiydäga'ñich p'in Jesucristo y'ap'ajt yteedy'ajt jadu'n nej yhui'my jaybety. Jesucristo je' oy ap'adyii teedy'adyii David etz Abraham.

² Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³ Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴ Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵ Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶ Isaí oy ung'adyii rey David. Je rey David je' oy ytöxyijc'adyii huidi anajty Urías ytöxyijc'ajtpy. E je' ajcxy y'ung'ajti Salomón.

⁷ Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸ Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹ Uzías oy ung'adyii Jotam. Jotam oy ung'adyii Acáz. Acáz oy ung'adyii Ezequías. ¹⁰ Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹ Josías oy ung'adyii Jeconías müd y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹² Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³ Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. ¹⁴ Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵ Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶ Jacob oy ung'adyii José huidi oy ñäy'adyii María. E je María oy ung'adyii Jesús huidi yxii Cristo.

¹⁷ Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzim yajmajch ma Babilonia y'it, e nañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtin

¹⁸ Jadayab capxy ayuc jadu'n nej ymiñ yja'ty je Jesucristo. Jesús ytaj, huidi anajty yxii María, yi' ti anajty ycapxytungixy co ypiğaangixy müd José; e ma anajty ca'ni ñaybudigiiyigixy, chi María oy y'ungdzimigü müd yi Dios yjihui'ñ ymic'ajt. ¹⁹ José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäyjoty. Hue' janchtiy yhuinma'ñybaty co ixmadza'ñ ayüch ameech ca' p'in yajnejhuühua'ñ. ²⁰ Huin'it ma jadu'n anajty nihuinmayiy, chi Huindzin Dios tüg y'ánel ñayquëxici cumäyjoty ma José, chi ñimaayi:

—José, David y'ap y'oc, ca' mijcäjee mdzachhuinmay nej m'octöxyijc'adiiyb María, com yi' y'ung huidibi yajma'xung'adamy hue' müd Dios yjihui'ñ ymic'ajt ycixpi. ²¹ Yi' ypadamy tüg y'ung e mximöhuipy Jesús. Jadu'n yi' xi'adiiyb com jëgix co yi' yajpocyñihuädzam ñaax ycajp.

²² Tüg'óciy jada ytundaayi yjajtaayi ycijxy yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcaxxiyip ma anajty jadu'n yjaybetyity:

²³ Je töxyjäy huidibi ca' yëydijc müddzinäy hue' je' ung tziimicip. Chi ypadamyb tüg je y'ung hue' je' yxi'adaani Emanuel.

Emanuel hue' yhuimbizimy Dios müd ich ajt.

²⁴ Co José ymäyhuijy, chi cuyduñ jadu'n nej anajty Dios y'ángel ti nimäyii, chi huoy María jadu'n nej jihuüy töxyijc'adyii. ²⁵ Per ni ca' ajcxy jadu'n chinaay jadu'n nej jäy ypicxy chinäy ixti cooni oy María y'ung yajma'xung'aty. Chi yxi'moy Jesús.

2

Madza' ni'ixpiigiyyb oy co'ixiygixy pi'c'ung

¹ Jesús yma'xung'ajty ma tüg cajp huidi yxi Belén, jim ma Judea ñaaxjot, huin'it co anajty Herodes yrey'aty ma yi jimbi naaxjot. Chi huin'it yja'ty ma Jerusalén cajp nijëjity yëydijctijc huidibi anajty ti choñ ma xii ypidzimy, yi huidibi anajty ajcxy xii madza' ti ni'ixpiigiyygixy. ² Chi ajcxy yajtiy:

—¿Ma je judíojäy yrey tiibi yma'xung'aty? Ti ich ajcxy n'ixxi yi' ymadza' jim ma xii ypidzimy, e yi' ich ajcxy ya miñ nhuindzigihuaangixy.

³ Co je rey Herodes jadu'n midooy, chi ooy ytigiiy tajpi maybi müd tüg'óciy cajpjäy jim Jerusalén. ⁴ Huin'it je rey huomujctay tüg'óciy teedytjic huindzindijc huidibi anajty yaj'ixpijcp yi Dios yley, chi yajtiy ma anajty yma'xung'ada'ñ yi Cristo. ⁵ Chi ajcxy y'adzooy:

—Jim Belén ma Judea ñaaxjot, com Dios y'ayucnajtzcaxxiybi jadu'n je' cojaay:

⁶ E müch Belén, mabi Judea ñaaxjot, mij'ajtp mgix'ajtp ca'ydi jac huidi naaxjac huidi cajp, com ma müch chona'ñ tüg Huindzin huidi ane' mam yi israeljäy.

⁷ Huin'it Herodes oy yajhuoyii ameech huidibi anajty ti ijxcixy yi madza'. Chi tiybijcy yajxon mina anajty oga'n ti ijxcixy je madza'. ⁸ E huin'it ajcxy quejxy jim Belén. Chi jadu'n nimay:

—Nixcix jim e ocnidiu ocyajtiugixy je pi'c'anäg; e co anajty ti mbatcixy, miñ müch ajcxy xyajnimáaygixyich jaydëbi ich nicxy nañ jadu'n nhuindzigiyich.

⁹ Co jadu'n rey najtzcaxiyday, chi ajcxy choñ. E je madza' tiibi anajty ijxcixy ma xii ypidzimy, chi ajcxy ijxy jayijp je' anajty ñicxy ma je' ajcxy, ixti coní oy je madza' yhuäcxipy ma anajty je pi'c'anäg yajpaady. ¹⁰ Co je rey ixpijctijc jadu'n ijxy yi madza', chi ajcxy oy janch jotcujc ñayjihuiyii.

¹¹ Co ajcxy ytijctigiiy, chi ajcxy ijxy je pi'c'anäg müd ytaj je María. Chi jada' ajcxy ñaygojxtinaydaaci huindzigiiy ojadajty ajcxy je pi'c'anäg. Chi ajcxy yaj'ahuach yxuomy aguejtucy abijctucy, chi ajcxy yajpidzimy oori, poom, etz tüg tzoy huidi yxi mirra. Chi ajcxy moy je pi'c'anäg. ¹² Chi cumäyjoty ajcxy nimaayi co ca' huaad yhuimbijtcixy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuynicx.

Co José etz María yquegyñicxixy Egipto

¹³ Co je rey ixpijctijc ajcxy yhuimbijtaayni, chi cumäjoty José ijxy tüg Dios y'ángel, chi ñimaayi:

—Pidig, nicx jim Egipto ñaaxjot miid yi pi'c'anäg etz miid yi' ytaj, e jim mhui'mipy ixti cooni ñich miich nimähuipy. Com yi Herodes y'ixtähuamy yi' yi pi'c'anäg e yaj'oga'ñ yi'.

¹⁴ Chi huin'it José ypidigy miid tzoof coodz je pi'c'anäg miid ytaj, chi ajcxy ñicxy jim Egipto. ¹⁵ Jim ajcxy y'ijty ixti cooni oy y'ögy je Herodes. Jada je' jadu'n yajcuydun jadu'n nej Dios anajty ti yminañ ma yi' y'ayucnajtzcaxxiybi: “Jim Egipto ñich n'ung ti nhuoy.”

Herodes pidacy y'ane'min co huen pi'c'anäg yaj'öctäyii ajcxy

¹⁶ Co Herodes oy huinma'ñ yajyöy co ti anajty ooy yhuin'ñiyii je rey ixpicytjic ajcxy co ca' anajty ti ñihuimbidyii, chi ooy yjot'ambijcy, chi ni'ane'mdiy co huen nicxy jim Belén etz majaty cajp mihungon Belén, yaj'öctaaygixy tüg'öciy yi pi'c'anäg huidibi mejtz jimijt etz huidibi ca'ni nigooty mejtz jimijt. ¹⁷ E jadu'n jada yajcuyduñ jadu'n nej anajty Dios y'ayucnajtzcaxxiybi, je Jeremías, anajty ti cojaay:

¹⁸ Jim Ramá yajmidoy co anajty chachjiy chachyäxy jäy ajcxy; yi Raquel tzachjiyb tzachyaaxp miid y'ung ajcxy ycixpi, ca' ajcxy anajty yjotcuyc'aty miid co anajty y'ung ti y'öctäy.

¹⁹ Co oy y'öcni Herodes huin'it jim Egipto, Dios tüg y'ánel ñayguëxi cumäyjoty ma José. Chi ñimayi:

²⁰ —Pidig, miidnicx yi pi'c'anäg etz yi' ytaj jim ma yi Israel ñaaxjot jadügtecy com ti y'öctaayñi yi huidibi anajty yaj'ögam yi pi'c'anäg.

²¹ Huin'it José ypidigy, miid nicxy yi pi'c'anäg etz yi' ytaj jim ma Israel ñaaxjot. ²² Per co José nejhuuy co je Arquelao yi' anajty jim ane'mb jadu'n nej anajty je yteedy Herodes, ooy chigiy nej ñicxiy jim. E co jadu'n anajty ti ycumäy co ca' jim ñicxiy, chi ajcxy ñicxy jim Galilea ñaaxjot. ²³ Co jim yjäty, chi jim chinaydacpijcy ma je cajp huidi yxi Nazaret. Jadayaabi je' jadu'n tun jaji jadu'n nej anajty ycojaayty ma Dios y'ayucnajtzcaxxiybi ñecy co Jesús xi'adiyb Nazareno.

3

Juan el Bautista y'ayuc capxhuäcxy ma tidz naax it

¹ Huin'it tiempo ñañ jadu'n Juan je Bautista (huidibi jäy yajnñbejtpi) ymiñ tüg tigidum ma Judea ñaaxjot capxhuäcx Dios y'ayuc, ² yminañ:

—Jothuimbijtcix ma Dios com yi Dios y'ane'min huingonñ yi'.

³ Jada Juan yi' je' huidibi je profeta Isaías nigapxy yminañ:

Jim mijtigidum yajmidoy tüg ayuc mina'ñ: “Ni'ixiygixy yi mHuindzin ytü'aa, ni'ixiygixy tüg tü'aa tiybi.”

⁴ Je Juan hue' anajty yhuin'ajtpy iyujc nibijc (huidibi jäy ytiypy camello) e hue' anajty yhuinip iyujc ac, e yi' anajty yjicxy'ajtpy mu' etz tijaty iyujc päg jim tüg tigiduum. ⁵ Chi choof jim Jerusalén jäy etz tüg'öciy huidijaty tzinaayb ma Judea ñaaxjot, ñañ jadu'n huidijaty tzinaayb ma Jordán mijñiba', ñicx ajcxy ma Juan amido'íjty yi' y'ayuc. ⁶ Co anajty ajcxy nigapxtaaygixy yi ypocy huidi anajty ti tundigooygixy, huin'it anajty ajcxy Juan yajnñbedyii ma Jordán mijñi.

⁷ Per yi Juan y'ix co may fariseo jäy etz saduceo jäy miñ anajty ajcxy nñbejtcixy, chi ajcxy nimay:

—iMich ajcxy, m'ajuuy m'amigüg ahua'n iyujc! ¿Pin ti xyajni'ixiygixy nej jébi huaad mgöueeccixy yi ayo'n huidibi huingomb? ⁸ Yajxon jäy'ajtcix tiydudägy huen niguëxgy co ti mjothuimbijtcixy. ⁹ Ca' jadu'n

mdzachmīnaangixy co Abraham xy'ap'adyii xy'oc'adyii. Hich miich ajcxy yam ndimnīmaayb co Dios ixti jēbi yi' yaj'ap'adyii yaj'oc'adyii Abraham jada tzaajot ca'ydi miich ajcxy. ¹⁰ Yi jach ni'ixi yi' y'ijtni ma quipy y'ijx, tūg'ócīy quipy huidi ca' oy ytim'aty yajpujxp yi', e chi jada' yajnōgy jīnjoty. ¹¹ Hich, janch yajniibejtpich miid ni, yi' yi' jadu'n nej tūg ixpejt co ti mjothuimbijtcixy; per jacminamb tzojc huidi ajcxy xyajniibedipy miid Dios yjihui'ñ etz miid jīn. Je' ymiid mic'ajtin etz cōtujcin, nīgi ca'ydi hich, ni xycapaadyich nicxy ycīg nyajtecyjendūgyich. ¹² Ymiid mic'ajtin pijc-huācxamy yi jāy jadu'n nej jāy huimbojy moc, abicy pidāga'ñ actz, abicy moc pajc. Yujcpīga'ñ moc pajc ma tze'x ninōgīhua'ñ yi moc actz moc jaam jīnjoty ma je jīn huīdībī nicamīnaaxī ycapīch.

Co Jesús ñibejty

¹³ Huin'it Jesús chooñ ma Galilea ñaaxjot, chi ñicxy ma Jordán mij ni ma anajty Juan yjāyayjñibety, niibedam anajty yi' nañ jadu'n. ¹⁴ Juan ca'jadim'a'ixi, chi nīmay Jesús:

—Hich miich ixipy xyajniibejtpich, ¿e miich mimb ma hich?

¹⁵ Chi Jesús y'adzooy:

—Jadachambi oc'a'ixi jadu'n, com ooy yi' ycopityity co nguycundayim tūg'ócīy tiibi Dios xyaj'ane'mim.

Huin'it Juan a'ixi chi yajniibejty Jesús. ¹⁶ Co Jesús ñibejttay, chi Jesús ijxy Dios yjihui'ñ ñigidāgyii jadu'n nej tūg pi'cmuuxy. ¹⁷ E huin'it yajmīdooy tzajpcixy tūg ayuc ymīna'ñ:

—Jada je' hich n'ung'ajtypich huīdībī ooy ndzocyich huīdībī ooy miid jotcujc nayjihuiyijich.

4

Je mujcu' tuñ ijxta'ni Jesús

¹ Chi Dios yjihui'ñ yajnicxy Jesús mījtigīduum jaydēbi je ca'oybi yjot'ixi yb yhuinma'ñ'ixi yb. ² Jim y'ijty jaygay huixchigui'px xii huixchigui'px tzuum, e huin'itni ooy yibōccodyii. ³ Chi je ca'oybi nīmijhuāgy Jesús ocjot'ixa'ñ oc-huinma'ñ'ixa'ñ, chi nīmay:

⁴ —Pen Dios miich xy'ung'ajtp, nīma' jada tzaa huen naygojyīi tzajcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jāy tzajcaagyti'ajty nitzināhuipy, nañ jadu'n nitzināhuipy tūg'ócīy yi' ayuc huīdībī Dios ycapxp.”

⁵ Chi je ca'oybi mīdnicxy Jesús jim Jerusalén, chi ymīdpejty tzajptjic cōduum. ⁶ Chi nīmay:

—Pen janch co miich Dios xy'ung'adyii, cōdijpnax jīby naaxcīxy, ca' yi' nej mjadipy com jaybety jadu'n ymiñ co jadu'n ymīna'ñ:

Dios yquexyp yi' y'āngeles jigix xycuend'adipy xyhuīdzipy miid yci', ca'ydi ninej mgōnepy ma tzaagop.

⁷ Chi Jesús y'adzooy:

—Nañ jadu'n ymiñ jaybety: “Ca' mjet'ixipy mhuinma'ñ'ixipy yi mhuīndzin Dios.”

⁸ Jadūg'oc je ca'oybi ymīd'ajty Jesús ma tūg copnīcx janch cijxpi, e jim yajni'ixi yday tūg'ócīy naax cajp co ooy mīdity oy'ajtin etz mic'ajt. ⁹ E chi nīmay:

—Hich jada miich nmojdähuiipy tüg'óciy, pen miich cojxtina' xy-huindziğiych xy'ojadatyich.

¹⁰ Huin'it Jesús y'adzooy:

—Huinhuäctutcich miich mujcu', com jadu'n yjaybetyity: “Tügpajc yi mHuindzin Dios yi' mhuindziğiuiipy m'ojadadipy.”

¹¹ Huin'it je ca'oybi huinhuäctucy Jesús, chi Jesús ñimiini ángeles ycuend'ajti.

Jesús ytung yajtzondacy jim Galilea

¹² Co Jesús nejhuuiy co Juan ti anajty yajpidägy pujxtigoty, chi yhuimbijtni jadüg'oc jim Galilea. ¹³ E ni ca' yhui'miyy jim Nazaret, chi ñicxy jim Capernaum, jim ma Zabulón etz Neftalí y'it. ¹⁴ Jada je' jadu'n tuni jajti jadu'n nej Dios y'ayucnajtzcapxñybi Isaías anajty ti cojaay:

¹⁵ Zabulón etz Neftalí ñaaxjot. Je tü'aa huídibi mejypa' huídibi a'oy'amy ma Jordán mij ñi. Jim Galileajäy chinäy huídibi ca' yjudiojäyity.

¹⁶ Yi jäy ajcxy huídibi jim tzinaayb agootztuuby ijxpaty ajcxy tüg tñcxin jajin. Je huídijaty anajty ajcxy tzinaayb ma je jibicpi y'aniciy, chi ajcxy ycodicxñy tügi tñcxin jajin.

¹⁷ Ixti huin'it Jesús ytiğiyy ayuccapxhuäcxp ymíñañ:

—Jothuimbijtcix, yajmingix yajmejtzcix mjot mhuinma'ñ ma Dios, com yi Dios y'ane'min huingonip yi'.

Jesús nimay nimidaax je acxmajtzpi: “Pajamgich”

¹⁸ Jesús tüyöyb anajty ma Galilea mejypa', co ijxpaty metz yëydijc ac tüg quëxpi, hue' anajty yi' je' je Simón, huídibi nañ jadu'n yxi Pedro, e je jadügpi hue' je' anajty Andrés. Acxmadzñ anajty ajcxy yi' ytung'ajty e jim anajty ajcxy yi' tzachnügöhuich y'acxmadzi'ñ. ¹⁹ Chi Jesús nimay ajcxy:

—Pajamgich, ñch miich ajcxy nyajni'ixñuiipy nej jäy myaj'ixpiğiipy je Dios ytiy'ajt.

²⁰ Huin'it je' ajcxy ixmajtztay tüg'óciy yi' y'acxtzaay, chi ajcxy panicxy Jesús.

²¹ Hueeni jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yi' ajcxy ma tüg barco müd yteedy, yi' anajty ajcxy yi' jim chach'adaggiyb yi' huídibi mi'acxmajtzciy. Chi ajcxy Jesús yhuoohui. ²² E huin'it ajcxy ixmajtztay je barco etz yi' yteedy, chi ajcxy panicxy Jesús.

Jesús yaj'ixpiy mayjäy

²³ Huídijttay Jesús ma tüg'óciy Galilea ñaaxjot, yaj'ixpiy jäy majaty je naymujctac cajp cajp. Capxhuäcxy yi' Dios ytiy'ajt etz nañ jadu'n pa'mjäy yajtzocy huen ytimyhuídipá'mity anajty ajcxy ymüid. ²⁴ Chi Jesús oy yajnejhuuiyñi ma tüg'óciy yi' Siria ñaaxjot, e chi ajcxy müidmiñ ma Jesús tüg'óciy huídijaty anajty ajcxy ca'oybi müid, etz huídijaty anajty ajcxy cixuxy tecyxuxy, chi Jesús yajtzocoy. ²⁵ Huin'it Jesús ypanicxi mayjäy huídijaty anajty ajcxy tzinaayb ma Galilea ñaaxjot etz yi' Decapolis jäy, nañ jadu'n Jerusalén jäy etz huídijaty tzinaayb ma Judea ñaaxjot, nañ jadu'n huídijaty anajty ajcxy tzinaayb a'oy'amy ma Jordán mij ñi.

¹ Co Jesús iixy tüg'óciy je mayjäy, chi nicxy ma tüg copnicx, e chi jim y'ixtacy. E huin'it je' y'ixpijcpidijc ajcxy yjübigiyy. ² Chi Jesús ytiigiyy yaj'ixpijcp yminañ jadu'n:

Je pinjaty ajcxy jotcújcip

³ —Janch jotcujc je jäy ajcxy huídibi nejhuiyb co yajmayjajtpy Dios y'oy'ajt, yi' ajcxy paatip Dios y'ane'min.

⁴ Janch jotcujc je jäy ajcxy huídí yajpatp taj may, yi' ajcxy yajmöhüam jotcujc'ajtin.

⁵ Janch jotcujc je jäy ajcxy huídibi yung naxpy jäy'ajtp, yi' ajcxy padaamb tüg'óciy je huídí Dios ti yaj'ahuaníyíi.

⁶ Janch jotcujc je jäy ajcxy huídibi cuydunamb huídibi Dios chojcpy, Dios yi' ajcxy pubedíib.

⁷ Janch jotcujc je jäy ajcxy huídibi pa'ayoob huenyimpinjáyity, Dios nañ jadu'n ajcxy pa'ayohuíib.

⁸ Janch jotcujc je jäy ajcxy huídibi huädz yjot yhuinma'ñ, yi' ajcxy y'ixipy yi' Dios.

⁹ Janch jotcujc je jäy ajcxy huídibi ca' ti tzip tzojccixy, com yi' ajcxy Dios ung'adíib.

¹⁰ Janch jotcujc je jäy ajcxy huídibi yajnixiicp yajnigapxp míid je Dios ytiy'ajt ycixpi. Yi' ajcxy idamb ma Dios y'ane'min.

¹¹ Janch jotcujc miich ajcxy co jäy jibic xytungixy co nigoob xyñihuambejtcixy etz capxcixy huídijaty ca' ytiy'ajtiy míid íich ycixpi.

¹² Xondaaccix jotcuj'ajtcix co mbadaangixy tüg oy'ajtin jiiyby tzajpjoty. Nañ jadu'n ajcxy ixhuídijty pahuídijty je Dios y'ayucnajtcapxiybi jecy'ajty.

Miich ajcxy je tudägyjäy ya naaxhuiñ

¹³ Jadu'n nej caan ca' yajpüch je tzüch jücxxy tím jadu'n miich ajcxy myajpaady ya naaxhuiñ. Pen je caan ca' míid ti xücx'ajtin, ¿nej jébi nya-jtuunim? Ca' y'oc'oyyajtunity, chi yajnajtzxidíyñi, chi yhuaani tembejt hua'cpejt.

¹⁴ Oc'ix tüg je cajp jim copcix, ca' jébi mhuijtzyüdzim mgoyüdzim. ¹⁵ Co tüg jün nyajtoyicim, ca' huaad tu'tz ngöjupim. Hue janchtiy co nyajtiicxim cix, huin'it jébi xycodixtaayim jadu'n nej ajt nyajpaatim ma tijc. ¹⁶ Nañ jadu'n miich ajcxy mdzinaaygixy tudägy ma ajcxy je mayjäy jaydëbi ajcxy ixipy je oybi huídí miich ajcxy mdumyib. Huin'it ajcxy ojadadipy je mDios teedy huídibi jiiyby tzajpjoty.

Jesús yaj'ixpicy nej yi' yi' Dios ycötujcin

¹⁷ Ca' mhuinmay co íich ti nmiñich ya co nbigaanich je Dios y'ayuc je' huídibi anajty ti jaay Moisés etz je profetitijc. Ca' íich nyajmijaagixa'ñ je cötujcin, íich ti nmiñich co nguyduna'ñich jadu'n nej ymiñ jaaybety.

¹⁸ Janch tiy'ajt jadu'n nej nimaaygixy, je huídibi mimb jaaybety jadu'n tundähuam jajtähuam. Ni tüg letra oy mabaad ymúdzity nicxy ycayajcuyduñ. ¹⁹ Je jäy huídibi ca' nimidooy je Dios ytiy'ajt oy yjadim mutzjaty etz yaj'ixpicy jäy jadu'n, je' ajcxy padamb je mutzpi tigiydac ma Dios y'ane'min. Paady je jäy huídibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpicy, je' ajcxy padamb tüg je mijiipí tigiydac ma Dios y'ane'min. ²⁰ Íich miich ajcxy nimaayb, pen ca' miich ajcxy jac'oy

mdúngixy ca'ydi fariseos etz escribas ajcxy, ca' nimina mdigihuiipy ma Dios y'ane'min.

Jesús yaj'ixpicy co ca'p huaad pin yjotmädy

²¹ Miich ajcxy mnejhuuygixy jadu'n nej yi m'ap mdeedy ajcxy ayuc yajhui'my: "Ca' jäy myaj'ögip; e pin anajty jäy yaj'öcp ypaadip je tzaachypi."

²² Hich miich ajcxy jadu'n nimaayb pinjaty ymigügtijc mijotma'tp, je' Dios tiydunaanipy; e pin ymigüg xiidijp tzuudijp, yajtiydunipy je' ma Dios tiyundac; e pin ymigüg tzuudijp locidijp ayo'ndumb, je' y'ity co ñicxip ayoodactuuby.

²³ Pen myajnicxpy miich mhuindzigi'ñ ma Dios ytijc, e pen jim jäymetzgodyi co mmigüg ti xyhuin'innaxy ti xyhuincapxynaxy yinjaty hueenjaty, ²⁴ jim myajhui'm je huindzigi'ñ ma je altar yhuinduu, e nicx jayijp nayyaj'oyihuii müd je migüg, huin'it mhuimbedip e chimgäyecy je mhuindzigi'ñ.

²⁵ Tzojc naygapxjotcidägü müd je midzip, pen yam müd tüyöy nü'am tü'am, ca' jecyity co je midzip xyciyegip ma juez, e je juez xyciyegip ma je policia, e je' nicxy xypidägy pujxtigoty. ²⁶ Janch tiy'ajt ich miich nimäy co ca' jii by mbidzimipy ixti cooni mgüejtähuiipy je meeñ.

Jesús yaj'ixpicy co ca'p ndundigóoyimipy müd huingbi töxyjäy

²⁷ Miich ajcxy mnejhuuyb co jecyip tiy'ajt ymína'ñ: "Ca' mmidundigoyipy huingbi töxyjäy." ²⁸ Hich miich ajcxy nimaayb, pen ji pin huindicxy tüg töxyjäy, e jot'adüyb nejaty, ti je' anajty ñitundigooyñi ma yjot yhuinma'ñ.

²⁹ Pen yi mhuin a'oy'amybi xyajtundigoyamb tim yajpidzim; jac'oy co tüg'idu'mbi mhuin ytigoyipy ca'ydi co cixyca'px mnicxipy jünjoty. ³⁰ E pen yi mgi' a'oy'amybi xyajtundigoyamb tim ixpux etz najtzjibibi' jiguem; jac'oy co tüg mgi' ytigoyipy ca'ydi co mminicxipy metz mgi' jünjoty.

Jesús yaj'ixpicy co jäy ca'p huaad ytöxyijc ixmach mañ'ajtingixy

³¹ Nañ jadu'n ymiñ jaaybety: "Pin ixmajtzp ytöxyijc, huen möhuiipy tüg necy ti ycixpi co ñay'ixmajtzigixy." ³² Hich miich ajcxy nimaayb, pen ji pin ixmach ytöxyijc, e ca' anajty ti ytundigooy müd huingbi yëydijc, je yëydijc anajty nigiydeyiyb ytöxyijc co anajty ytundigooy müd huingbi yëydijc; pin yëydijc pijcp müd je töxyjäy huidibi anajty ti yaj'ixmach, pocytumyb je' anajty.

Jesús yaj'ixpicy nej nguyduunim tübi n'ahuanüyim ma Dios yhuinduu

³³ Miich ajcxy mnejhuuyb nej jecy'ajty m'aptijc mdeedytjic ajcxy yajnimay: "Ca' nigo ti m'ahuanühuiipy, mguydunipy jadu'n nej anajty ti mmina'ñ." ³⁴⁻³⁶ Per ich miich ajcxy nimaayb: ni mga'ibaadip ni mgacapxpaadip; ni mgamina'nip; "y'ijxpy tzajpjotyipi," com yi' Dios chinaydac. E ni mgamina'nip, "y'ijxpy naaxhuiñybi," com Dios yajpatp oy ytimymaajity. E ni mgamina'nip; "y'ijxpy Jerusalén," com jim je' Dios chajptijc; ni mga'ibaadip ni mgacapxpaadip mgohuajc, com ca' mjaty myaj'ahuimbity poob o tzixy tüg cöhuay. ³⁷ Hue' janchty, tiydudägy minangixy: "oy" o "ca'." E pen miich ajcxy anaxy jaccapxp jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nyajhuimbijtim

³⁸ Miich ajcxy mnejhuuyb co jecy'ajty yajmina'ñ: "Pen ji jäy mhuin xyajpidzimi, nañ tim jadu'n yhuin myajpidzimipy; pen ji migüg mdütz

xyajpidzimi, nañ jadu'n myaj'ahuimbidiy." 39 Per ñich miich ajcxy nimaayb: Ca' myaj'ahuimbidiy jibicpi ma migügtijc; pen ji pin xycoxy ma mhuiñyijp tüg adu'mbi, jac tim mo' jadüg adu'm'amybi. 40 Pen ji pin yxxy y xypigaani yi mnijen, najtz'ixi', huen xyajnicxi nañ jadu'n mjocx huit. 41 Pen ji pin adzip tziy xyajminicxa'ñ tüg kilómetro jiguemity, yajnicx jac tim jadüg kilómetro. 42 Pen tijaty xypijctzoohui, mo'. E pen ji pin xyminuucxa'ñ, yajnuucx.

Co ndzojcm nmidzip

43 Jadu'n ymiñ jaaybety nej jecyip Moisés yjay: "Migüg'adii yi' huidibi xymigüg'ajtp, e midzip'adii yi' huidibi xymidzip'ajtp." 44 ñich miich ajcxy nimaayb: Tzoc yi' huidibi ajcxy xymidzip'ajtp, etz mibijctzoohui ma Dios huen y'oy'ajtin paady yi' huidibi xyñigapx xyni'ojiiyb, e nañ mi'oyjäy'at yi' huidibi xyca'ixamb. 45 Huin'it miich ajcxy xy'ung'adiiby yi' Dios tzajpjotyi' huidibi yxi' yajtixcp yajjajp ma oyjäydijc etz ma jibicjäydijc, nañ jadu'n yajtüy ma jibicjäydijc etz ma oyjäydijc. 46 Pen miich ajcxy mdzojcpy je huidibi xychojcp, ¿ti jäygidaacin yi' m'ocpadamyb? Nañ jadu'n yi' ajcxy yja'iditzp yi' pocyjäydijc etz yi' yajcogüeiptidijc. 47 Pen miich ajcxy mgapxocxyp yi' mjugymigüg, ¿ti oybi yi'? Nañ jadu'n ajcxy yi' yja'iditzp yi' huidibi ajcxy ca' Dios nejhuuygixy. 48 Jäy'ajtcix tudägy jadu'n nej ajcxy yi' mdeedy tzajpjotyi' ytudägy.

6

Jesús yaj'ixpicy co nduunim oy yjäy'ajtin

1 Ca' mdungixy je oybi ma jäy y'ixy yhuindicxy müd co mdzachya-jhuindicxaangixy co mdungixy oybi. Pen jadu'n m'iditzcixy mDios Teedy huidi jiiy tzajpjoty tzinaayb, ca' ajcxy xymöhua'ñ je oy'ajtin. 2 Paady co mbubedipy mmigüg, je ayooi jäy huidi yajmayjajtpy tijaty, ca' huaad mnigapxy mnimiydägy o mnaygömayii co anajty ti mmöy tijaty. Yi' jadu'n iditzp je jäy huidi mij cix nayjihuiyiy huidi anidaacp co huen jäy y'ixyii mijpidägyii co anajty jadu'n y'idich. Janch ñich miich ajcxy jadu'n nimaaygix co yi' ti patcixy je oy'ajtin. 3 Co miich mmöhuiy py mmigüg tijaty yajmayjajtpy, hue' janchtiy mdunipy ca' myajnejhuiyipy huidi müd mnaymigüg'adyii. 4 E co miich amoñ m'idipy, mDios Teedy huidi ijxp co amoñ tijaty mduñ, je' xymöhuamb tüg oy'ajtin mayjäyduum.

Jesús yaj'ixpicy nej Dios mmibijctzoohuim

5 Co miich ajcxy Dios mmibijctzoy, ca' jadu'n m'iditzcixy jadu'n nej je jäy huidibi capxtacp ma Dios huin aguy ahuac aguy. Yi' ajcxy capxtacp ma Dios huäctina' jiiy tzajptigoty jaydëbi jäy y'ixiiyb etz ymijpidägyyb. ñich jëyi jadu'n nimaayb, co jadu'n oy'ajtin'adiiby. 6 E co miich Dios mmibijctzoy, nicx tigoty etz m'agihuiy je mdiyc aguu. Huin'it Dios mibijctzou. E je Dios y'ijxpy ymidooyb co jadu'n mmibijctzoy, e je' je m'oy'ajtin xymöhuiy py mayjäyduum.

7 Com Dios mmibijctzoy, ca' m'agapxiyo'cip je huidi anajty ti m'occapxi, jadu'n nej ajcxy y'iditzcixy huidi ca' nejhuuygixy Dios ytiy'ajt. Yi' ajcxy huinma'ñyipydägy co müd ajcxy ymay'ayuc huin'it ajcxy ymidoohuiyb. 8 Ca' jadu'n m'iditzcixy jadu'n nej je' ajcxy; mDios ñejhuiyb ti mich ajcxy myajmayjajtpy ma anajty ca'ni mbijctzooyñi. 9 E jadu'n miich ajcxy Dios mibijctzoohuiy, jadu'n mina'ñip: Dios Teedy, miich huidibi tzajpjoty tzinaayb; huindzigiy miich mxii y'ity.

10 Huen miñ ya miich yí m'ane'mín. Huen mdzojcin yajcuyduñ ma je jāy yjot yhuinma'ñ jadu'n nej yajcuyduñ jiiby tzajpjoty.

11 Mooygich ajcxy ngaayin n'uucin jabom jabom.

12 Méecxibich ajcxy nbocy ngaydey huidibi ich ajcxy ndundigooyb, jadu'n nej ich ajcxy meecxyich huidibi ajcxy xymidundigooybich.

13 Ca' m'a'ixiy co ich ajcxy nhuinma'ñ tigoyipich. Yajnihuaatzcich ajcxy ma yí jibicpi. Co miich yí' mje' je cõtujcin, je mic'ajtin etz je oy'ajtin huinixi huinítiempo. Amén.

14 Pen miich ajcxy mhuinmeecxyp je huidibi xymidundigooygixp, je mDios Teedy huidibi tzajpjoty je' nañ jadu'n xyhuinmeecxip miich ajcxy mbocy. ¹⁵ E pen miich ajcxy ca' pin jāy mhuinmeecxy nej xymidundigooygixy, nañ jadu'n mDios ca' xyhuinmeecxip ajcxy ma ti mdundigooygixy.

Je Jesús yaj'ixpicy nej huaad n'ijtín jaygaay

16 Com ajcxy m'ida'nip jaygaay jay'ügy (mína Dios mmibijctzoogixy), ca' mnybidáaccigixy tajy may, jadu'n nej ajcxy idiitzcixy yí' huidibi ajcxy minamb co Dios mibijccixy e ca' yjanchity. Yí' ajcxy yajtigajchpy yhuñyjiip jigix jāy ajcxy oc'ixiyyb co jaygaay jay'ügy y'ijtixy; jéyi jadu'n oy'ajt'adiyyb. ¹⁷ Miich ajcxy co m'idipy jaygaay jay'ügy jotcuyc naybidägi, caax mgohuajc etz puj mhuiñ mjijp, ¹⁸ ca'ydi myajniguëxig y mayjājoty co m'ity jaygaay jay'ügy, hue' janchity myajniguëxig ma je mDeedy huidibi ca' yaj'ijxy; e je mDeedy huidibi iixp huidibi miich ajcxy ca' mduñ iixna' quëxna' yí' xymöhuipy oy'ajtin mayjājduum.

Je jugy'ajtin tzajpjoty

19 Ca' niği m'adzocy huidibi ya naaxhuiñ, je' co ya huindigooyb oy ytimtijity huidibi yí' huech yajhuindigooyb, huidibi tougaayip etz ma je meetzpi ajcxy meetzcixy pigiccixy tijaty. ²⁰ Je' miich nijot'ajtcixy je' oy'ajt'adidi miich ajcxy Dios xymöhuamb jiiby tzajpjoty ma ca' huech yajhuindigooy ni ti, e nañ ni ycatougaayii ni ti, etz ma je meetzpi ca' ajcxy meetzcixy pigiccixy tijaty. ²¹ Ma miich ajcxy mädity je oy'ajt'adidi jiiby ajcxy mjot mhuinma'ñ pidäg.

Yí' mhuiñ jadu'n yí' nej tüg tücxin

22 Yí' mhuiñ yí' yí' jadu'nip nej tüg tücxin jajin ma mninix, e paady pen ca' miich yí' mhuiñ xyajtundigoy, tüg'ócixy mjot mhuinma'ñ huadz yí'. ²³ Pen miich mhuiñ xyajtundigoyb nañ jadu'n mjot mhuinma'ñ huadi miich mid ca' y'oyity, jadu'n yí' nej coodzpi jac tim niği ca' y'oyity ca'ydi je coodzpi!

Dios etz je comeñ'ajtin

24 Ni tüg pin ca' huaad mid tuñ metz huindzin com mijotma'ti tüg je', e jadügpichogipy; o ixtijipy tüg e jadüg ymigüg'adiyyb. Nañ jadu'n ca' huaad miich ajcxy metz m'ojadajtcixy, Dios etz je meen.

Dios ycuend'ajtpy yí' yjāy

25 Paady ich miich ajcxy nimaaygixy: Ca' mdzachhuinmaaygixy ti ajcxy mnitzinahuipy, ti ajcxy mgayipy m'ügipy o ti ajcxy mhuit'adiyyb mducxy'adiyyb. MDios yí' ti xymooygixy je mjogy'ajtin, e paady ycipi yí' nejhuiyyb ti ajcxy myajmayajtpy. ²⁶ Oc'ix miich ajcxy yí' joon huidi queehuidijtp. Yí' ajcxy ycaniipicy ycatungixy, nañ ni ca' yí' ajcxy yujcipjccixy ma tze'x. Miich ajcxy mDios Teedy huidi tzajpjoty tzinaayb, je' moydaayb

huidi ajcxy yi' yj#cxyp. E miich ajcxy mjactzoobatp ca'ydi yi joon. ²⁷ ¿Pin ji ma miich ajcxy, ooy mij jahuinmay, jëbi tüg nuux yjacyeegyí?

²⁸ ¿E na'amy co miich ajcxy mdzachnidajy mdzachnimay m#id je mhuit mducky ycixpi? Oc'ix miich ajcxy nej yoñ tüg je pijy huidi yajpatp tun n#gap. Ni yi' ycatuñ ni piidy. ²⁹ Per janch t#y'ajt jadu'n nej nimaaygixy, ni je comeeñy#j#y huidi yxii rey Solom#n, ni ycaquipx#y je' yxojxin m#id je pijy. ³⁰ E pen mDios xojxpy jadu'n je aay ujtz cham etz tzojcy yt#tzt#y n#cx#y, jac n#gi miich ajcxy Dios xym#hua'n#ñ huidibi myajmayjajtpy, miich ajcxy huidibi hueeni mmib#jcin. ³¹ Paady ca' n#goobi mdzachhuinmaaygixy ma ajcxy mbaadip ti mgay#py m'#g#py o ti mhuit'ad#y#b mducky'ad#y#b. ³² Yi #y#y ajcxy huidibi ca' mib#cy yi' Dios oy tzach nijot'ajtcixy jadayaabi, per miich mDeedy huidibi tzajpjoty je' ñejhu#y#b ti miich ajcxy myajmayjajtpy. ³³ E pen miich ajcxy mbidacpy Dios jay#j#p ma mjot mhuinma'n#ñ etz mguydun ajcxy yi' y'ane'm#n, huin'it miich ajcxy Dios xym#huipy tijaty myajmayjajtpy. ³⁴ Paady ca' mhuinmaaygixy cham m#id je jabom cixpi, je' co je jabombi ym#m#ñ je tajin may#n. Tzoc mijotcu#j'ajtim je tajin may#n huidi cham nm#n#j#x nyajnajxin.

7

Ca' mbocy icy yi mmig#g

¹ Ca' m'ix'ijxpy mba'ijxpy ti mmig#gt#j#e ytundigooyb, jigix ca' Dios xyt#y#dun#py chaachytun#py. ² Pen miich m'ix'ijxpy mba'ijxpy mmig#gt#j#e ti ytundigooyb, nañ jadu'n miich Dios xyt#y#dun#py xychaachytun#py, e yi' quipx#ñ huidibi miich mhuamyb quipx#ñ, nañ yi' Dios yajtunamyb ma miich. ³ ¿Nej co miich m'ixy huidibi mmig#g ytumy#b e hueeni ytundigooyb, e ca' mnay'ixy#y huidibi miich jac mij mdundigooybi? ⁴ ¿Nej jëbi mmig#g m'ocn#m#y: "Nbubedamybich miich ca'ydi mjacpocytuñ", e miich yam m'ocm#d#p#i jac mij pocy? ⁵ Miich c#m mnayhuin'is#y#i. Nicx jay#j#p mbocy mgaydey ocyajhu#dz, huin'it jëbi mbubety je mmig#g.

⁶ Ca' mm#y yi' j#bic#y#d#j#e huidibi Dios yj#e'ajty co nicx cam#j'ijx cam#j#p#i#da#acc#y#y; ni mgayeg#py Dios y'ayuc yt#y'ajt ma yi' #y#y ajcxy huidibi ca' tzojccixy Dios y'ayuc yt#y'ajt.

Nbijctzoohuim n'amidoohuim Dios

⁷ Mib#jctzoug#x yi' Dios e yi' xym#huipy ajcxy; ixtaaygix, huin'it mb#aat#x#y#y; cogapx#y#y#y#y e ahu#dz#p ajcxy md#j#e aguu. ⁸ Com pin tijaty pijctzoob ypaatp yi'; e pin tijaty ixtaayb ypaatp yi'; e pin cogapx#y#y ma tijc aguu, yaj'ahuaatzip yt#j#e aguu.

⁹ ¿Nej ji jada' miich ajcxy nid#gt#i co m'ung pijtzoohuipy tzajcaagy nej mm#huipy t#g tzaaji? ¹⁰ ¿O pen ypijctzooby t#g acx nej mm#huipy t#g tza'ñi? ¹¹ Miich ajcxy oy mj#bic#y#y#y e m#jajtpy ajcxy nej m'ung m'an#g mm#huipy je oybi. ¡N#gi Dios Teedy tzajpjoty#p#i m#hua'n#ñ je oybi pinjaty pijctzoob!

¹² Tz#naaygix t#y#dud#y#y m#id je mmig#gt#j#e, pen miich ajcxy mdzoj#p#y co je mmig#gt#j#e chin#huipy tud#y#y m#id miich ajcxy; com jadu'n y'ane'my Moisis yley etz yi' Dios y'ayuc najtzcapy#y#y ajcxy ñecy.

Je x#tz#p#i t#u'aa

¹³ Tig#y#y#y#y ma yi' tig#y#y#y#y#y#y x#tz#p#i: yi' tig#y#y#y#y#y#y#y#y etz yi' t#u'aa huidibi ja'tp ca'oydactuuby mij huin yi', e may #y#y ajcxy oy ji ytig#y#y#y#y#y#y. ¹⁴ E janch je

tigiyiydac etz yi tü'aa huidibi ja'tp ma je jugy'ajtin huinixiibi, xüdz je' etz tzip naxiyñi; janch tim hueeni jäy huidibi ji nicxiyb.

Yi jäy yhuinma'n müd ñiquëxiigy pen ojjäy o pen ca'

¹⁵ Nayguend'ajtigix müd yi jäy anijatyipi huidibi ajcxy minamb co Dios ytiy'ajt yaj'ixpijcp, huidibi ajcxy huudijtp janch yung janch naxy ñaybidaaccixy nejhuiy ooy oy huinma'n müdity; nigoobi ajcxy jadu'n ñaybidägyii, ymüd ajcxy jibic-huinma'n. ¹⁶ Miich ajcxy jëbi m'ijxcapy nejaty ajcxy müdity chinaayin yjugy'ajtin; ca' pin caamuxy cha'm tucy ma apy quipy, e nañ jadu'n ca' pin higo tim tucy ma jaam'apy quipy. ¹⁷ Je quipy huidibi ooy y'oyity, oy yi' ytim'aty. Je quipy huidibi ca' y'oyity, ca' yi' oy ytim'aty. ¹⁸ E je oybi quipy ca' huaad ytim'aty jibic. E je quipy huidibi ca' y'oyity ca' ytim'aty oy. ¹⁹ Tüg'óciy je quipy huidi ca' oy ytim'aty, cixy yajpujxp je'. Chi jada' yajnögy. ²⁰ Nañ jadu'n miich ajcxy jëbi mnejhuiy jadu'n nej jäy yjäy'aty co m'ixipy nej chinäy.

Ca' nidüg'óciy jäy ajcxy ytiğihiupy ma Dios

²¹ Ca' nminaanim nidüg'óciy jäy ajcxy ytiğihiupy jiiby tzajpjoty huidibi xyñimaaybich: "Huindzin, Huindzin", jëda'ajty ajcxy tiğihuamb huidibi ycapxymidooyb je Dios chojcin y'ane'min. ²² Mayjäy oy mina'na'n huin'it xii huin'it tiempo: "Huindzin, Huindzin", ti iich ajcxy ngapxhuäcxy miich m'ayuc, e müd miich mxii ti iich ajcxy nyajpdzimy je ca'oybi; etz müd miich mxii ti nduñ iich ajcxy mij huinma'n. ²³ Huin'it nimähiupy: "Caminaabi miich ajcxy ti nga'ixy'adyii; huinhuäctucich miich jibic tumbidijc ajcxy."

Je mejtznajxpi je tiy'ajt cop

²⁴ Nidüg'óciy pinjäy huidibi xymibijcpich etz midooyb jadu'n nej iich n'ane'myich yi' ajcxy quipxyjaty müd je jäy huidibi cohuinma'n huidibi ytiyc ycojp ma yhuingixity. ²⁵ Co ymicpojtüy etz ycomy je mij nii, ca' ypadyii nägom je tijc, je' co anajty cixy je' ycojyity. ²⁶ Per yi' ajcxy huidibi midoob e ca' cuyduñ huidibi ngapxpich, je' jadu'nip nej tüg jäy huidi janch loci huidi ytiyceoj ma pu' jot. ²⁷ Co ymiñ je mic poj tuu, chi ycomy je mij nii. Chi yciday je ytiyc; mij ayo'n oy yjajti.

²⁸ Co Jesús ycapxtay ymiydactay, chi je jäy ooy huinmay jadu'n nej anajty ti yaj'ixpicy. ²⁹ Com je' co Jesús anajty yaj'ixpicy nej tüg huidibi cötujcin müd, ca' yjadu'nity nej je escribas ajcxy.

8

Jesús yajtzögy tüg jibic nibützpa'mmüdpí

¹ Co Jesús oy chooni ma je cögop, chi ypagidaci mayjäy. ² Huin'it ñimiini tüg jäy jibic pützpa'mmüdpí. Chi ycojxtinay'ahuñy ma Jesús yhuinduu. Chi minañ:

—Huindzin, pen m'a'ixiyb jëbi xyajtzögyich.

³ Huin'it Jesús nidooñ je jäy. Chi nimay:

—Ndzojcpyich, jëbi mdzögy.

Co Jesús jadu'n nimay je pa'mjäy huin'ity je ypützpa'm oy ytiigooy. ⁴ Chi Jesús nimay:

—Ca' pin myajnimäy; nicx janchtiy ma je teedy. Minicx tüg huindzigi'n huidi Moisés y'ane'my. Huin'it jëbi yi' jäy ajcxy ixipy co ti m'agidägy.

Jesús yajtzögy tüg capitán romano ymang

⁵ Co Jesús yja'ty jim Capernaum huin'it tüg capitán ñimiini e ycohuaniiy.

⁶ Chi ñimaayi:

—Huindzin, jim ich tüg ndumbi ma ich ndijc huidi tim cöcnaayñip, ca' y'ocyücxni.

⁷ Chi Jesús minañ:

—Ich nicxy nyajtzögy.

⁸ Chi je capitán y'adzooy:

—Huindzin, ca'p ich n'oyjäyity, ca' yhuaadity mdigihuiipy ma ich ndijc, jëyi miich nigoo capxy e ti anajty ich ndumbi chögy. ⁹ Ich nañ jadu'n ane'my n'ityich, e nañ nmüdic soldadtijc c'am. Co ich nimäy: “Nicx”, nicxp; e co ich nimäy: “Min”, mimb; e co n'ane'myich je nbödumbich huen tijaty tun, ytumyb.

¹⁰ Co Jesús jadu'n midooy, chi nigoo: ycijxy ycuejty. Chi ajcxy nimay huidi pahuidijtip:

—Janch tiy'ajt jadu'n nej nimaaygixy, ma Israeljäy ymiñ, ca' jadu'n ti nbaadyich huidi oy mibicy jadu'n nej jadayaabi yëydijc. ¹¹ Ich jadu'n nimaayb co mayjäy oy miinaangixy xüpidzim'y amy xücidägy'amy, chi ixtäga'ñ quipxy müd Abraham, Isaac etz Jacob jüby ma Dios y'ane'min. ¹² Je judiojäy huidibi ixypy ajcxy jëbi yjatzinäy jüby tzajpjoty, je' ajcxy nicxamb agootztuuby, jüby ajcxy yjihuiipy yäxipy etz y tützmúcxipy ytützqueedipy.

¹³ Huin'it Jesús nimay je capitán:

—Nicx ma mdijc. Jadu'n nej miich xymibicyich, ti ich yam nguyduñ.

Chi je tumbi oy chögy tim huin'it hora.

Jesús yajtzögy Pedro ymüd töxyjäybi

¹⁴ Chi Jesús nicxy ma Pedro ytijc. Chi ijxy je Pedro ymüd co jim cijx'am ycöcnäy müd je toyba'm. ¹⁵ Co Jesús cünixajy huin'it je toyba'm ñajxy. Chi pidigy. Chi mic'amy ni'ixiy je caayin uucin.

Jesús yajtzögy mayba'mjäy

¹⁶ Co oy chu'iyñi ycoodzyñi huin'it yajmimiñ ma Jesús may je huidi ca'oybi müd. E müd y' y'ayuc yjëda'ajty ypidzimday je ca'oybi, e huin'it tüg'öciy je pa'mjäy choctay. ¹⁷ Jadayaabi je' ytuni yajti jigix yajcuyduñ jadu'n nej je profeta Isaías minañ: “Yi' c'm ajt nyuu nba'm ti xyajtzoc-taayim etz yi pijcin ixin ti yajnicxtäy.”

Je pinjaty anajty panicxam Jesús

¹⁸ Co Jesús ijxy janch mayjäy anajty ti yjübigiyii, chi nimay co huen nájxcixy jim'amy mejy ninaxy. ¹⁹ Huin'it ñimiini tüg escriba. Chi nimay:

—Huindzin, nbanicxamybich miich oy janch tim ma'amy ma anajty mnicxy.

²⁰ Chi Jesús y'adzooy:

—Je huaax ymüd je' ajcxy yjut, e je joon ymüd je' ajcxy ype'ñ. Per ich, je jäy huidibi tzoon jüby tzajpjoty, ca' nmüdidyich ma nmähuibich ma nböcxibich.

²¹ E jadügpí ydiscípulo yminañ:

—Huindzin, nicx jayjip ndeedyich n'ocyajnaaxtigiyich huin'it nbanicxip.

²² Huin'it Jesús y'adzooy:

—Pamiingich, ixmajtcix yi öcpi huen ymi'öcpi yajnaaxtigiyii.

Jesús jįpcogapxĭy je micpoj etz je mejy co anajty ooy ypidĭgy

²³ Huin'it Jesús oy ybarcotigĭyñi. Chi ypadzooni je ydiscípulos ajcxy. ²⁴ E jim anajty ytüyöy mejyhuingĭxy, huin'it mic poj ñaymĭbidzimi. Janch mic y'ocpidĭcni je mejy jigo jigo je barco cayajnidigoy, pero Jesús anajty chachmaab. ²⁵ Huin'it oy ymĭgapxyii yajmăybidĭgyii je' ydiscípulos ajcxy. Chi ñimaayi:

—¡Huindzin, ocyajtzoogich ajcxy! ¡Cheeby ĩch ajt n'ocquuinim!

²⁶ Huin'it Jesús y'adzooy:

—¿Na'amy co mdzachtzigĭyigixni? ¡Miich ajcxy hueeni mĭdity mĭbjcin!

Huin'it Jesús ypidĭgy. Chi mĭgapxy je poj etz je mejy. Huin'it je mejy etz je poj yhua'cxijptay. ²⁷ E je' ydiscípulos ajcxy nigoobi y'occĭx y'occuejtni chachmĭnaangixy:

—¿Pin yĕydĭjc jada jada', co je mejy je poj ti ycapxymĭdoyii?

Je Gadara jāy ajcxy huĭdibi anajty ca'oybi mĭid

²⁸ Co Jesús yja'ty ma yi ñĭiba' ma yi Gadara ñaax ycajp, chi metz yĕydĭjc, huĭdi anajty ca'oybi mĭid oy yjįpcoyöyĭyii anajty ajcxy, ti chooñ ma je öcpi jut. Yi jāy ajcxy ooy janch ahua'n, e ca' anajty huaad jim ni pin ñaxy ma je tū'aa. ²⁹ E co anajty Jesús jim ñaxy huin'it janch ahua'n ymĭgapxqueeci:

—¿Ti miich mdunamyb mĭid ĩch ajcxy, Jesús, miich Dios y'ung? ¿Nej ti mmiñ jayĭp co xychaachtungĭxich ma ca'ni xĭ tiempo paady?

³⁰ Jiguem ma anajty ajcxy je' yajpaady jim anajty may'idzim y'ojccixy.

³¹ Chi je ca'oybi ymĭnañ:

—Pen miich xyajpidzim ĩch ajcxy, xyaj'adigĭyigixy xyajjottigĭyigixy yi may'idzim.

³² Chi Jesús ñimay yi' ajcxy:

—Ñĭxcxcx.

Huin'it ñĭhuaatzi je yĕydĭjc je ca'oybi. Chi oy ytigĭyigixy je ca'oybi ma je idzim. Huin'it je idzim oy ñĭigöboyĭctăy. Jiiby ajcxy yĭcxtăy.

³³ E je jāy ajcxy huĭdibi anajty idzim ycuend'ajtp, huin'it ajcxy yqueegy mĭid je tzigĭ'ñ. Chi co ajcxy yja'ty cajpjoty, huin'it ajcxy ytigĭy mĭydaacpi jadu'n nej anajty ti ytuñyii ti yjadyii. ³⁴ E huin'it chonday je mayjăy ma je cajp. Chi ajcxy ninĭcxy je Jesús. E co ajcxy ijxpaty, huin'it ajcxy cohuanĭy co huen pidzimni ma je naax je cajp.

9

Jesús yajtzögy tüg jāy cĭmătpi tecymătpi

¹ Chi Jesús ybarcotigĭy. Chi ñĭcxy jim'amy mejyñaxy. Chi oyjăty ma yci'mgajp. ² E jim yajmĭmiñ tüg yĕydĭjc huĭdibi anajty cĭmăt tecymăt. Yajcĭy ymiñ ma'ndzaayjoty. E co Jesús ĩjxy co ymĭid je mĭbjcin, chi ñimay je pa'mjăy:

—Jotcugi' miich, ti je mbocy nhuinmeecxyich.

³ Huin'it nijĕjty je escribas ajcxy, je ley yhuindzin, jot'ajti: “Jadayaabi yĕydĭjc capxtigooyb yi' ma Dios co jadu'n ymĭna'ñ.” ⁴ Com Jesús ñĭjhuiy jadu'n nej anajty ajcxy je jāy tzachjot'ăjtigixy, chi ajcxy ñimay:

—¿Nej co ajcxy jĭbic mdzachtjot'ăjtigixy jotjoty huinma'ñyoty? ⁵ ¿Huĭdibi ca' chipity, co nminá'ñibich: “Ti yi mbocy nhuinmeecxich”, o co nminá'ñibich: “Pidĭg etz tŭyöy”? ⁶ ĩch ndzojcpysich co miich ajcxy mhuinjĭhuihuip co ĩch ti ndzoofnich tzajpjoty e paady nmĭidich je cötuĭcin ya naaxhuĭñ e jĕbi nhuinmĕecxibich pocyjăy ajcxy.

Huin'it Jesús nımay je cımätpi tecymätpi:

—Pidig, huijtzig yi mdögy etz nicxni ma mdijc.

⁷ Chi je cımätpi tecymätpi ypidigy. Chi nicxy ma ytijc. ⁸ E co je mayjäy jadu'n ijxy, huin'it ajcxy ooy jihuiy huinmay. Chi ajcxy ooy ojadaty yi Dios co anajty ti yecy je mic'ajtin ma mayjäy.

Jesús nımay Mateo: “Pajamgich”

⁹ Co Jesús oy chooni jim, huin'it ijxy tög yeydijc, yxi Mateo, huidibi anajty iñaayb ma yajcogüejttac. Chi nımay:

—Pajamgich.

Huin'it Mateo ytinayigy. Chi panicy Jesús.

¹⁰ Jadu'n ytuni yajti co Jesús jim ycay ma Mateo ytijc, e may nañ jadu'n ymiñ yajcogüejtpidijc etz pocyjäydijc. Chi ajcxy jim tú'ciy y'ixtactay müd Jesús etz müd yi' ydiscípulos. ¹¹ Co je fariseos jadu'n ijxy ajcxy, chi nımay ajcxy je' ydiscípulos:

—¿Na'amy co yi mHuindzin ycaymucy müd je yajcogüejtpidijc je pocyjäydijc?

¹² Co Jesús jadu'n midooy huin'it nımay ajcxy:

—Ca' yajmayjaty tzozdumbi huidi ca' ajcxy ypigii, jeyi huidi ajcxy pijcip. ¹³ Nicx ixpijccixy nej ymiñ jaaybety ma Dios ñecy: “İich ndzojcpyich co müch ajcxy müd'adipy je pa'ayo'n, ca'ydi co myajhuindzigiy tijaty iyujc.” Ca' iich ti nmiñich ma je jäy ajcxy huidibi ca' pocy müdity. İich ti nmiñich müd yi pocyjäy ycixpi co huen jothuimbijttaaygixy ma Dios.

Amidoogixy Jesús müd je' ycixpi co jaygay y'ijtcixy

¹⁴ Huin'it ajcxy ymiñ Juan ydiscípulos ma Jesús. Chi je ajcxy nımay Jesús:

—¿Na'amy co iich ajcxy etz fariseo ajcxy ayuu'ijtcixy, e yi' ajcxy huidibi xymüdhuidijtp ca' ajcxy ayuu'ijtcixy?

¹⁵ Huin'it Jesús y'adzooy:

—¿Nej jëbi yaj'ayuu'aty jäy ajcxy huidi yajpaatpi ma je pijcipi yajnixduñyi, pen quipxyi yam yajpaady müd je huidibi pijcip? Minamb je xii je tiempo mina je pijcipi yajtzonıyb, huin'it janchtiy ajcxy jëbi y'ayuu'ajtcixy.

¹⁶ Ni pin Tuc huit ca' agiyiy müd tög pedas jemyhuit, com nigi je Tuc huit ñajtzüdzıy, chi nigi o'ctiy yajtni. ¹⁷ Ca' pin pidägy vino ni ma tucpi cochac, ycüdzip je', e tög'öciy anajty ti y'ayoodäy je vino ni müd ñigochac. Pidägyi ajcxy jemy vino ma jemy cochac, chi jadu'n ca' ayoohuipy je vino, ni huindigoyipy je cochac.

Je Jairo ñix, etz je töxyjäy huidibi Jesús yhuit nıdoni

¹⁸ Ma anajty Jesús jim ycapxy ymiydägy huin'it ymiñ tög mijjäy. Chi ñaygojtinay'ahuıy ma Jesús yhuinduu. Chi yminañ:

—Nniixich ti y'ögy. Nicx ma iich ndijc etz mginıxajipy, jugypigipy ya.

¹⁹ Huin'it Jesús ypidigy. Chi nicxy müd je ydiscípulos ajcxy. ²⁰ Ma anajty ajcxy jim ytüoy huin'it ymiñ jıxcı'py'amy tög töxyjäy huidi yxi ybo' ti mi'ijtiıyñi majmetz jimijt. Chi nıdoni Jesús yhuıtpa'. Huin'it ñajxy je' ypa'm. ²¹⁻²² Jadu'n anajty ti yjot'adyii: “Oy Jesús jëda'ajty yhuıtpa' nıñıdonıbıch, ti iich anajty n'agidäygich.” Huin'it Jesús yhuäc-huimbijty. Chi huındıxpejty je töxyjäy. Chi nımay:

—Jotcuıc'at müch, ti m'agidägy jigix co xymıbıcyıch.

E tim huin'it hora oychögy je pa'mjäy. ²³ Chi Jesús oy yjäty ma je mijjäy ytijc. Chi ijxy je xuuxpidijc miid je ymügügtijc ajcxy huidi chachyaaxcixy co anajty ti y'ögy je töxy'anäg. ²⁴ Huin'it Jesús nimay ajcxy:

—Queccix ya, yi pi'ctöxy'anäg ca' yi' ti y'ögy. Hue' yi' maab.

Huin'it ajcxy nigo nixiicy yajxiicy Jesús. ²⁵ Co anajty je jäy ti ixquejxtäy, chi Jesús ytijctigiy ma anajty je töxy'anäg huijtznäy. Chi majch ma yci'. Chi ypidigy. ²⁶ Chi je jäy oy yajnejhuüydaayñi ma je jimbi naax cajp nej anajty ti ytuñyii ti yjadyii.

Jesús yajtzögy metz jäy huintzpi

²⁷ Ma anajty jim ti choñ huin'it metz jäy huintzpi ypamiini. Chachñimäyii jadu'n:

—iPa'ayoogich ajcxy, miich David y'ap y'oc!

²⁸ Chi Jesús yajpajäty ma anajty ti yjättägy. Co ytigiiy tigoty, chi Jesús yajtiy:

—¿Nej mmibijcpy miich ajcxy co jëbi nyajhuindicxäccixy?

Huin'it je' ajcxy y'adzooy:

—Mibijcy ñich ajcxy, Huindzin.

²⁹ Huin'it Jesús nidoñ je jäy ajcxy huintzpi ma yhuin. Chi nimay ajcxy:

—Jadu'n nej miich ajcxy mmibicy, jadu'n ytunib yjadib.

³⁰ Chi je' ajcxy y'ixägy. Huin'it Jesús y'ane'min pidacy:

—Ca' huaad pin myajnejhuüygyxy.

³¹ Co je' ajcxy ñicxni, chi ajcxy ooy nigapxy nimiydacy co Jesús anajty ti yaj'ixäcigixy.

Jesús yajtzögy tüg jäy uumbi

³² Co anajty je' jim ti chongixy, huin'it ajcxy mimiñ ma Jesús tüg yëydijc huidibi uum huidibi anajty ca'oybi miid. ³³ E co Jesús yajpidzimy je ca'oybi, chi je mayjäy ooy ycixy ycuejty ajcxy. Chi ajcxy minaangixy:

—Ni camina jadu'n ycayaj'ixy ya ma jada Israel naax cajp.

³⁴ Per je fariseos jadu'n yminaangixy co Jesús je' miid je ca'oybi ymic'ajt yajpidzimy ca'oybi ma jäy.

Jesús ymiid pa'ayo'n ma mayjäy

³⁵ Jesús jadu'n yhuidijty cajp cajp yaj'ixpijcy majaty tzejptijc. Yajhuin-gapxiy je jäy Dios y'ayuc. Etz nañ jadu'n yaj'agidacy huen ytim huidi yuu huen ytim huidi pa'mity. ³⁶ Co Jesús jadu'n ijxy je mayjäy, chi oy pa'ayooni co yi' ajcxy ca' miidity ni pin huidibi jëbi ñajtzcapxiy Dios y'ane'min. Yi' ajcxy jadu'n yajpatp nej cöbixy huidi ca' miidity cuend'ajtpi. Ca' nejhuüygyxy pin y'ane'mip e pin ypanicxip. ³⁷ Huin'it Jesús nimay yi' ydiscípulos ajcxy:

—Tiy'ajt yi', janch mij je tung e hueeni je tumbidijc. ³⁸ Paady pijctzou miich ajcxy ma Dios co huen quexy tumbidijc ma yi' ytung.

10

Jesús huin'ixy je majmetz ydiscípulos

¹ Huin'it Jesús huoy je nimajmetz discípulos. Chi moy ajcxy cötujcin jëbi huaad yajñihuäch je huidi ca'oybi miid. Etz nañ jadu'n yaj'agidägip huen ytim huidi yuu huen ytim huidi pa'mity.

² Jada je' je nimajmetzpxi: Simón, huidi nañ jadu'n yajtijp Pedro, etz ymiguëx Andrés; Jacobo etz y'uch Juan, Zebedeo ymang; ³ Felipe,

Bartolomé, Tomás, Mateo, je yajcogüejtpi; Jacobo, Alfeo ymang; Lebeo, huidi nañ jadu'n yajtijp Tadeo; ⁴Simón, je cananista; e Judas Iscariote, je huidi yciyejc Jesús agojix.

Jesús quejxy je' ydiscípulos ajcxy ayuccapxhuäcxpi

⁵ Chi Jesús quejxy yi nimajmetzpi, e jadu'n najtzcapxhiy ajcxy:

—Ca' ajcxy mnicxipy ma je naax cajp ma ajcxy je jäy chinäy huidibi ca' ajcxy Israeljäyity. Ni mgatigihuiipy ajcxy ma Samaria naax cajp. ⁶ Nigi jac'oy co ajcxy mnicxipy ma je Israeljäy huidibi ca' nejhuiy huidibi ca' paduñ Dios ytiy'ajtín. ⁷ Nicx miich ajcxy capxhuäcx Dios y'ayuc co ti yhuingoni Dios y'ane'mín. ⁸ Yaj'agidaaccixy yuujäy pa'mjäy huidijaty pützpa'm ymiid. Myajjuygypijccixy tiibi ögy. Myajnihuädzip huidi ca'oybi ymiid. Ninigoobi miich jada cötujcín ti myajmooygixy, nañ ninigoobi yejccixy.

⁹ Ca' ni ti meeñ mminicxcixy. ¹⁰ Ca' mbijty mminicxcixy tü'amgixpi. Mminicxcixy jëda'ajty yi mhuit huidi miid ma mninixc. Ni mgaminicxip huingbi mgig etz mdajc; com ycopicity co je cajpjäy xyajcáaygixipy xyaj'uuccixipy miich ajcxy.

¹¹ Co anajty mjäty miich ajcxy ma tüg cajp nidüu yajtiü pinjäy jim tudäcyip. Jim ajcxy mhui'mipy ma je' ytiyc ixti cooni ajcxy mdzoonip. ¹² Co anajty miich ajcxy mdigiy tigoty huin'it mgapxpcixixipy je codijc jadu'n nej tzocy. ¹³ E pen je codijc ymihuaad'ajtpy, yejccixy jim iibocxin capxpoocxin. E pen je jäy ca' ytudägyity, ñaadigi'adip huidi anajty ti mgapxcixy. ¹⁴ E pen ca' pin xycöbibaangixy, e ni pin xycamidohuaani ajcxy m'ayuc, pidzimgix jim ma je tiyc o ma je cajp. Chi ajcxy mdecy huinnebipy, je' je' je tiy'ajt co ca' miich ajcxy ti pocy miidity. ¹⁵ Janch tiy'ajt jadu'n nej nimaaygixy co anajty je xü tiempo paady ma anajty yajtiyduna'ñ je naaxhuiñyjäy, jac nigi yajtzaachtuna'ñ yi' ajcxy ca'ydi yi jäy ajcxy huidibi tzinaayb ma Sodoma cajp etz ma Gomorra cajp.

Ixhuidijtin pahuidijtin

¹⁶ ¡Ocmidoogix! Eich yam miich ajcxy nguejxpy majaty yi jäy huidi jibichuinma'ñ miid. Jadu'n nipaady nej iich nguexyich cöbixy ma je lobi. Huijy cujc ajcxy mnaypidägüib jadu'n nej tza'ñ, per yung naxy jadu'n nej muuxy. ¹⁷ Mnayguend'adüib ajcxy je' co yi jäy ajcxy xyciyegaangixy ma ajcxy mjtungmiidpi etz myajhuobaangixy ma je judiojäy ajcxy ñaymujctac, ¹⁸ ixti xyajnicxaangixy ajcxy ma je gobernador etz je reydiyc ajcxy miid iich ycixpi; e jim iich miich ajcxy xyñigapxipy ma je jäy ajcxy yhuinduu, e nañ jadu'n majaty anajty je jäy ajcxy huidibi ca' yjudiojäyity. ¹⁹ Co anajty ajcxy xyajcidigiy je mjtungmiidpi, ca' ajcxy oy mhuinmaayipy nej m'ocnimähuiipy. Co anajty paady je tiempo, huin'it iich miich ajcxy myajnimähuiipy nej ajcxy mgapxipy. ²⁰ E je ayuc huidibi miich anajty ajcxy mgapxpy, ca' miich anajty je' ajcxy m'ayuc'ajtigixy, je Dios Teedy anajty yjihu'ñ, je Espiritu Santo, xyajcapx miich ajcxy.

²¹ Huin'it yi jäy ajcxy ñaygiyegáanigixy miñ xyipy tüg quëxtijc co huen yaj'ögyii. E je ungedeedy ciyega'ñ y'ung; je ung'anäg mibidiga'ñ je ytaj yteedy etz yaj'ócip ajcxy. ²² Tüg'ócay je jäy ajcxy ca' ajcxy xy'ix'anipy yxchoga' nipy miid iich nxü ycixpi. E pin xymibijcpich amumdügot ixti mabaad y'ögy, yi' ajcxy y'alma tzögipy. ²³ E co anajty miich ajcxy jäy xy'ixhuidity xypahuidity ma tüg cajp, nicxcix ma huingbi cajp. Janch

tij'ajt jadu'n nej nimaaygixy co ca'ni anajty mgapxhuäcxtäy ayuc tij'ajt ma tüg'ócay je Israelcajp co nhuimbidityich, ich, je jäy huidibi tzoön tzajpjoty.

²⁴ Tüg yaj'ixpijcp i jac nigi mij'ajtin müidity ca'ydi je huidi ixpijcp, e tüg huindzin jac nigi mij'ajtin müidity ca'ydi je' ytumbi. ²⁵ Jëb jotcuyc idipy je discipulo co jadu'n yajpaadipy jadu'n nej yhuindzin, e je tumbi jotcuyc idipy nej yhuindzin. Pen jäy minamb co ich nmüidich ca'oybi, jac nigi ymina'nañ co miich ajcxy müidity.

Pin jëbi yajtzigiy

²⁶ Ca' ajcxy mdzigiy yi jäy ajcxy. Ca' ji ni ti yüch ity nicx ycaniguëxigy; nañ ni ti ji ycayajtuñ ayüch ameech nicx ycayajnejuüy. ²⁷ Huidi ich miich ajcxy ayüch nyajnimaaayb, capxidzimgix miich yi' mayjäyoty, e huidi ajcxy midooyb ameech, capxidzimgix miich yi' mic ma tüg cögop. ²⁸ Ca' ajcxy mdzigihiip je jäy huidib ninicx yaj'öcp etz ca' huaad yi' ajcxy yaj'ögy je alma. Yi' miich ajcxy mdzigiygixy je Dios huidib pidacp je alma etz je ninicx mijijnjoty.

²⁹ ¿Nej ca' jäy ajcxy toogy metz pi'cjoon müd tügpi pi'cmeñi? Per ca' ni tüg huaad ycäy naaxhuiñ, pen ca' tzocy je mDios Teedy huidi jiiby tzajpjoty. ³⁰ Miich ajcxy mgöhuay ac michoy yi'. ³¹ Paady miich ajcxy ca' mdzigihiipy, jac nigi miich ajcxy mdzoubaady ca'ydi je joon.

Pinjaty ca'p midzöydu'ñ Jesucristo mayjäyoty

³² Yi' jäy ajcxy huidi xymibijcpich etz xyñidiy'ajtyich ma jäy yhuinduu, nañ jadu'n ich yi' nidiy'ajtyich ma ich nDeedy huidibi jiiby tzajpjoty. ³³ Per je jäy ajcxy huidi ich xycoyützpich ma mayjäy ajcxy yhuinduu, nañ jadu'n yi' ngoyützip ma ich nDeedy yhuinduu huidibi jiiby tzajpjoty.

Müid Jesús ycixpi yjiity naymidzip'adi

³⁴ Ca' miich ajcxy mhuinmay co ich ya ti nmiñich müd co nmöhuaangixy jotcuyc'ajtin ya naaxhuiñ. ³⁵ Ich ti nmiñich co nyajtziptunipyich jäy müd yteedy; töxyjäy müd ytaj etz xecy müd yxecy. ³⁶ E jadu'n miich ajcxy mdzip'adiyb mgi'mjuugy mgi'mmigüg.

³⁷ Yi' jäy ajcxy huidibi tzojcp ytaj yteedy jac nigi ca'ydi ich, ca' yi' ypaadyii co njäy'adiybich; e pin ymang o ñix tzojcp nigi ca'ydi ich, ca' ypadyii co njäy'adiybich; ³⁸ e pin ca' yci'mdzojcin y'ixmajtztäy etz ca' ñaybidägyii ycixjot huinjot ma ich, ca' mihuaadity nicx njäy'adiybich. ³⁹ Pin yjugy'ajtin najtztzogiyb, yajtigoyipy yi'; e pin yjugy'ajtin tigooyb müd ich ycixpi, ypaadipy jugy'ajtin huinixi tzajpjoty.

Premio nganar'ajtim

⁴⁰ Pin miich ajcxy xycöbijcp, ich yi' anajty xycöbijcp; e pin ich anajty xycöbijcp, nañ ycöbijcpsy anajty je huidibi ich ti xyquejxyich ya naaxhuiñ. ⁴¹ Je huidibi cöbijcp je jäy huidibi Dios y'ayuc capxhuacxip, je' co yi' ymiñ müd Dios ycixpi, yi' jadu'mbi je oy'ajtin ypaadipy. Nañ jadu'n je huidi cöbijcp je oybi jäy müd co oy yjäyity, yi' jadu'mbi oy'ajtin ypaadipy. ⁴² Je huidi yaj'ucp tüg vaso ni ma huenyimpinjäy müd co xymibicyich, janch ich miich nimaaygixy, ypaadipy oy'ajtin.

11

¹ E co Jesús anajty ti najtzcapxiydäy je tiyy'ajt ma je nimajmetzpi ydiscípulos ajcxy, chi Jesús ñicxy yaj'ixpijcp etz ayuccapxhuäcxp majaty cajp huinduy agonbi.

² E Juan je Bautista hue' je' anajty yajpaady pujxtigoty. E co nejhuiy tijaty mijhuinma'ñ anajty Jesús ytumyb, chi quejxy metz je' ydiscípulos ajcxy ma Jesús yajpaady. ³ Chi Juan ydiscípulos ajcxy y'amidooy Jesús:

—¿Nej miich je' je Cristo huidibi anajty minamb o jëbi ñich ajcxy huingbi n'ahuijxcixy?

⁴ Chi Jesús y'adzooy:

—Ñicxcix miich ajcxy nimaaygix yi Juan, je Bautista, tijaty miich ajcxy m'ixpy mmidooyb co ndumybich. ⁵ Miich ajcxy yajmüdmüydäg je Juan, jadu'n nej je huintzpi nyajhuindicxiyich; je címät tecymät nyajtzoocpyich; je huidibi jibic nibützpa'm ymüd nyajtzoocpyich; je' ajcxy huidibi cönat nyajmüdohuicpyich; je öcpi ajcxy nyajjugypijcpiyich; etz je ayoohtijc, je huidibi yung naxy yjothuinma'ñ nyajmüdmüydacypich Dios y'ayuc. ⁶ Jotcujc yi' ajcxy pinjaty xymibijcpiich amumdügjot etz ca' ni nej yjotmetzci' müd ñich.

⁷ Co Juan je Bautista ydiscípulos ajcxy ñicxni, chi Jesús ytiigüy nimüydaccoty Juan je Bautista ytung ma je mayjäy, chi yminañ:

—¿Ti miich ajcxy oy m'ixy jim mijtigüduum? ¿Tüg nähuaax huidibi poj xijpi? ⁸ ¿Ti ajcxy oy m'ixy? ¿Ti oy m'ixy, tüg jäy huidibi ooy y'oyxöxyity?

⁹ ¿Ti miich ajcxy oy m'ixy? ¿Nej ti m'ixy tüg Dios y'ayucnajtzcapxiybi? Janch co ti m'ixcixy tüg jäy jac mij ca'ydi tüg Dios y'ayucnajtzcapxiybi.

¹⁰ Je' jada je jäy huidibi Dios nigapxy ma ñecy co Dios jadu'n yminañ:

Cham nguexyich ñich nguexyöpp jayjip ma miich. Je' yaj'oyihuij je jäy yjot yhuinma'ñ müd ñich ycixpi, tim jadu'n nipaady nej jihuüy jäy tü'aa yaj'oyiy co rey ymiina'ñ.

¹¹ Co yi jäy ajcxy huidibi ti chinaaygixy ixti chambaad ni pin ti ca' yajpaady mij jadu'n nej Juan je Bautista; per pinjaty ñich xymibijcp, yi' jac mij naxam ma Dios y'ane'my ca'ydi Juan.

¹² Maabi Juan je Bautista ytundiüy, ixti chamni janch mayjäy amumdügjot ñejhuühua'ñ Dios y'ayuc, je' co ajcxy ytiühua'ñ ma Dios y'ane'my. ¹³ Tüg'öciy ajcxy je Dios y'ayucnajtzcapxiybi etz Moisés ycötujcin ñigapxy ajcxy je ané'min ixti cooni Juan oy ymiñ. ¹⁴ Pen miich ajcxy mibijcpi Moisés ycötujcin etz Dios y'ayucnajtzcapxiybi ajcxy, Juan je Bautista je' je' je Elías huidibi anajty miinamb. ¹⁵ Pinjaty mido'n müd huen mido'mbigipy ñich n'ayuc.

¹⁶ Jesús yjacminañ:

—¿Pin müd n'ocyajtügihuiyich yi jäy huidi ajcxy cham tzinaayb? Tim jadu'n yi' ajcxy nej pi'ctijc huidibi ajcxy iyiyb ma mayjäy yjuygixy ytoocxixy, miyaaxcixy müdinaaygixy ymigügtijc: ¹⁷ “Ti njayajxüxyich flauta e ni ca' ti m'ejtzcixy; ti ñich ajcxy öcpi njahuinyäxich, e miich ajcxy ca' ti myäxy.” ¹⁸ Chi Juan, je Bautista, anajty miñ, e je' ca' yca y'ügy. E miich ajcxy minangixy co Juan ca'oybi ymüdity. Jada pi'c'anactijc nipaady nej miich ajcxy. ¹⁹ Chi ñich je' je jäy huidibi tzoon tzajpjoty nmiiñich, e caaybich uucpich, e miich ajcxy minangixy: “Ijxcix, cha tüg yëydijc, janch cax janch vino'ucp huidibi migüg'ajtpy yajcujtpidijc etz pocyjäydijc.” Je Dios tiy'ajt ji je' ñiguëxigy.

Je cajp huidibi ca' ycapxymüdoogixy

²⁰ Chi Jesús ojcoty je maygajpjäy ma anajty may mihuinma'ñ ti tuñ, com je mayjäy ca' anajty yjothuimbidaangixy ma Dios. Chi Jesús ym'inañ:

²¹ —¡Ay miich ayoob ajcxy huidibi tzinaayb jim Corazín! ¡Ay miich ayoob ajcxy huidibi tzinaayb jim Betsaida! Co ixypy ñich ti nduñich jecy'ajty je mihuinma'ñ mïjtzög'ajtin ma je Tiro etz Sidón cajp, jadu'n nej ñich ti nduñich ma miich ajcxy, ti ixypy je Tiro jäy etz Sidón jäy nijothuimbijtcixy etz ñaaygixy saco nïjen nïcuyjam ixcuyjam, je' je tiy'ajt co ooy ytajcixy ymaygixy mïid ypocy ycixpi. ²² Paady miich ajcxy yam nïmaaygixy. Co anajty Dios tiyduna'ñ je naaxhuiñybi jäy, huin'it miich ajcxy Dios xychaachytuna'ñ jac nïgi, ca'ydi je jäy ajcxy huidibi jecy'ajty tzinay jim Tiro etz Sidón.

²³ Miich ajcxy, Capernaum jäy, mnaybidáacigixy jadu'n nej jihuïy mdigihuaangixy jïiby tzajpjoty. Per ca' yjadu'nity. Mdigihuaam miich ajcxy ayoodactuuby. Ayo'n tzaachypi mbadaangixy. Co ixypy ñich ti nduñich jecy'ajty je mihuinma'ñ mïjtzög'ajtin ma Sodoma cajp, jadu'n nej ti nduñich ma miich ajcxy mgajp, chambaad ixypy ity yi jadu'mbi cajp, ca' ixypy Dios cayajtigooy. ²⁴ Paady ñich miich yam nïmaaygixy. Co anajty Dios tiyduna'ñ je naaxhuiñyjäy, huin'it miich ajcxy myajtzaachytuna'ñ jac nïgi, ca'ydi je jäy huidibi jecy'ajty tzinay ma Sodoma ñaaxjot.

Mingixy ma ñich e mbóocxcixipy

²⁵ Chi Jesús ytiñy Dios mïbijctzooyb, ym'inañ:

—Dios Teedy, ñich miich n'ïbaatpich ngapxpaatpich. Miich mïid je mïj cötujcin jïiby tzajpjoty etz ya naaxhuiñ. Com miich ti mnajtzcapxiy yi m'ixpijcin ma je ayoobtiñc huidibi tzinaayb jotxeemy, e ti myüch yi m'ixpijcin ma yi ixpicytjic cohuinma'ñydiy. ²⁶ Jadu'n, Tat, ti mduñ, com jadu'n miich ti mdzocy ti mjäygidägy.

²⁷ Jesús yjacm'inañ:

—Ñich nDeedy ti xyajcïdigiydäyich tüg'óciy mic'ajt oy'ajt. Ni pin ca' ijxcapy pin je' y'ung, jëyi nDeedyich tüg'ajc. Ni pin ca' ijxcapy pin je' nDeedy'ajtpyich, jëyi ñich, je Dios y'ung tüg'ajc, etz jacjadyiñ huidibi ñich, je Dios y'ung, nyajnigüëxigamyich. ²⁸ Min ma ñich nidüg'óciy miich ajcxy huïdijaty taj mayb myajpatp ma mjot mhuinma'ñ, ñich miich ajcxy nmöhuamyb jotcujc'ajtin. ²⁹ Cöbic miich ajcxy ñich n'ane'm'in ñich ngötujcin, jadu'n nej huaj yuub ajcxy cöbicy ycögi'. Ijxpicy ajcxy ñich ndiy'ajt etz cuydun ñich n'ayuc, com ñich nmüidich mecxtujcin etz ca' ñich amij agix nayjihuiñyijich. ³⁰ Ca' ñich n'ane'm'in ymicity, e ñich ndung ca' nimijaaajity.

12

Je discípulos ajcxy moc cojc yajmujcp pocxñduum

¹ Chi tüg xñ Jesús yhuidity mïid ymïgügtjic ma tüg camjot. E hue' anajty sábado xñ, je pocxñ xñ. Chi Jesús ydiscípulos ajcxy oy anajty yubögyi. Chi ajcxy ytiñy trigo tiim nïxajztutp etz yjïcxy ajcxy je y'ajc. ² E co je fariseos ajcxy ijxy nej Jesús ydiscípulos ajcxy y'iditzcixy, chi ajcxy nïmay Jesús:

—Oc'ix nej miich mdiscípulos ajcxy y'idñich. Hue' ajcxy tumyub huidibi ca' huaad ma sábado xñ yajtuñ.

³ Per Jesús m'inañ:

—¿Nej ca' miich ajcxy mgapxyñi ma Dios ñecy, jadu'n nej David etz ymīgūgtijc ajcxy idīch jecy'ajty co yubōccoti? ⁴ Pues yi' ajcxy tigiiy ma Dios ytijc. Chi cay ajcxy je tzajcaagy huidibi anajty jāy ajcxy ti yajhuindzigīy Dios. Je' je tzajcaagy huidibi teedy ajcxy anajty paatip cayipy. ⁵ ¿Nej ca' miich ajcxy ti mgapxyñi Moisés ycōtujcīn necy co je teedy ajcxy jēbi ytuñ ma Dios ytijc sábadō xīi, e ca' nan tundigooyb je' ajcxy?

⁶ Hich miich ajcxy nimaaygixyp, jac nīgi mij cōtūjcīn nmīdidyich, ca'ydi je cōtūjcīn huidibi je teedy ajcxy yajtuñ ma Dios ytijc. ⁷ Pen miich ajcxy ti mhujnjihuīy nej yhuimbīdzimy jada Dios y'ayuc, co Dios jadu'n ymīnañ: “Hich ndzojcpy co miich ajcxy mīd'idīpy pa'ayo'n ca'ydi co ajcxy myegīpy huindzigī'ñ.” Pen miich ajcxy ti mhujnjihuīy jada ayuc, ca' ixypy mbocy'ixy ma hch nmīgūgtijc huidibi ca' ma ti ytundigooy. ⁸ Hich, je jāy huidibi tzoon tzajpjoty, nmīdīch ane'mīn, jaydēbi nīmāyich je jāy ajcxy ti jēbi tungixy sábadō xīi.

Je yēdyjc huīdībī anajty yčītīdzīp

⁹ Chi Jesús choñ jīm, ñicxy ma je judío jāy ñaymujctac. ¹⁰ E jiiby ma je naymujctac anajty tūg yēdyjc huīdībī yčītītz. Je fariseo ajcxy xīhuamyb Jesús, paady ajcxy y'amīdooy, ymīnañ:

—¿Nej jēbi tūg pa'm jāy chōgy sábadō xīijī?

¹¹ Chi Jesús y'adzooy:

—Pen ya ma miich ajcxy jī tūg jāy huīdībī cōbixy yjutcōgāy sábadō xīi, ¿nej ca' je' ñicxy yajpīdzimy mīc'amy? ¹² Nīgi tzobaatp tūg yēdyjc ca'ydi tūg cōbixy, paady Moisés ycōtūjcīn ca' capx'aducy co tūg oy'ajtin nduunim sábadō xīi, je pōocxīn xīi.

¹³ Chi Jesús nīmāy je yēdyjc:

—Xajtiu yi mgi'.

¹⁴ Co xajtiy yci', chi choocy, e huī'my quipxyjaty mīd je yci' oybi. Chi je fariseos ajcxy yjotmātcoty, yhuinma'ñ ixtaaygixy ajcxy nej huaad Jesús ocyaj'o'ccixy.

Tūg ayucnajtzcaxīyīn mīd Jesús yčīxpi

¹⁵ E co Jesús nejhuīy nej yi' ajcxy yhuinma'ñ mīdity, chi jīm choñ. E ooy may jāy ypanīcxi Jesús, Jesús yajtzoocpy anajty tūg'ócīy pīnjaty pa'm mīd. ¹⁶ Jesús ane'my je pa'm jāy ajcxy co ca' huaad nigapxy nīmīydāgy co yi' je' je Cristo. ¹⁷ Jadu'n Jesús ane'my je pa'm jāy jīgīx yčīxīpy yčá'pxīpy je ayuc huīdībī je profeta Isaías yjaay jecy'ajty, co Dios jadu'n ymīnañ:

¹⁸ Jada je' hch ndumbi huīdī ti nhuīn'ixyich. Yi' hch ooy ndzocyich njīhuīyīch etz ooy njotcujcīch mīd yi'. Hich yi' nmōhuamybīch hch njīhuī'ñ mīc'ajt. Yi' capxhuācxīp hch n'ayuc jadu'n nej ndzaachytuna'ñīch naaxhuīñy jāy ajcxy mīd ajcxy ypocy yčīxpi.

¹⁹ Yi' nī ymīgūgtijc ca' oja'ñ, nī yca'yāxa'ñ, nī ycatīnāhua'ñ, nī pīn ca' mīdoohuīpy ma cajp cujc.

²⁰ Ca' yi' tzaachytuna'ñ ayoobītijc etz huīdībī ayoobītijc yco'ōgy'ungdījc yjīp'ījxpy. Jadu'n nej jāy cayajhuīndīgoy tzajcapy huīdī huīdīyīp etz nī cayajpīch je mecha huīdībī uuxy uuxy tīcīxp. Ixti mabaad anajty yajcōpīcy y'ane'mīn tudāgypi.

²¹ E yi' may jāy ooy yjīp'īxa'ñyīi.

Xīgīxy Jesús co mīdity mujcu' ymīc'ajt

22 Chi m̄id m̄iñ ajcxy ma Jesús t̄ug jāy hūidibi hūintz̄ip etz uum. Je' anajty m̄id ca'oybi. Chi Jesús yajtzoogy, e chi y'ijx̄igy etz ycapx̄igy. 23 Co Jesús jadu'n tuñ, chi je mayj̄y ytiḡiy hūinmay'ahūidijt, chi ajcxy ym̄inañ:

—¿Nej jada je', je David y'ap y'oc hūidibi rey'adam?

24 Per co je fariseos ajcxy nejhūiy nej je jāy hūinmay, chi ajcxy ym̄inañ:

—Jadaabi ȳȳdj̄c yajp̄idz̄imy ca'oybi m̄id je mujcu' hūindzin ym̄ic'ajt (ca' y' yj̄j̄ity je Cristo).

25 Per Jesús ñejhūiyb anajty ti je fariseos ajcxy yhūinmaayb, chi ym̄inañ:

—Pen t̄ugp̄icy tungm̄idp̄i ixyipy ñaybijc-hūäcx̄igixy, etz ñaym̄idz̄iptz̄oonigixy ixyipy ac j̄eyi, pues cix̄ipy y' ajcxy y'ane'm̄in. Pen t̄ug cajp o t̄ugp̄icy jugym̄iḡug ixyipy ñaybijc-hūäcx̄igixy, pues ca' ajcxy y'idaangixy t̄ugmucy. 26 Pen Satanás, je ca'oybi hūindzin, yajp̄idz̄imy ixyipy ca'oybi ma je jāy ajcxy, chi c̄im ixyipy je ca'oybi ti ñaybijc-hūäcx̄igixy, e je Satanás ym̄ic'ajt ca' y'ida'ñ. 27 Miich ajcxy m̄inamb co iich nyajp̄idz̄imyich ca'oybi m̄id je ca'oybi hūindzin, je Beelzebú ym̄ic'ajt. Pen t̄iy'ajt jadu'n nej miich ajcxy m̄ina'ñ, je jāy ajcxy hūidibi xym̄ijn̄icxpejt miich ajcxy, ¿nej y' ajcxy paady m̄ic'ajt ma je mujcu' co ajcxy yajp̄idz̄imy ca'oybi ma je pa'm̄ jāy? Pues ca', paady y' ajcxy t̄iy'ajt yejcp co miich ajcxy ti mgapxtigoy co ym̄inaangixy co iich nyajp̄idz̄imyich ca'oybi m̄id Satanás ym̄ic'ajt. 28 Per iich nyajp̄idz̄imyich ca'oybi ma pa'm̄j̄y m̄id Dios yjihui'ñ ym̄ic'ajt. Paady miich ajcxy nejhūiyb co ti ym̄iñ yj̄aty je Dios y'ane'm̄in ma miich ajcxy.

29 (Dios yc̄otujcin jac m̄ic ca'ydi je ca'oybi yc̄otujcin, paady j̄ebi nyajp̄idz̄imyich ca'oybi.) ¿Nej j̄ebi t̄ug jāy ytiḡiy ma t̄ug m̄icp̄i jāy yt̄ijc etz p̄igaani tijaty y' ym̄id, pen ca' jayijp yci' ytecy xojtz̄ity? Pues ca'. Cooni jayijp yci' ytecy xojtz̄ity, hūin'it j̄eb p̄ijcip tijaty ym̄id. 30 P̄injaty ca' xym̄ijn̄icxpeyich, xym̄idz̄ipich y'. P̄injaty ca' tuñ m̄id iich co jāy nyaj'ixp̄icyich, hue' je' ajcxy jāy yajhūinma'ñȳdigooyb.

31 Janch iich miich ajcxy nim̄ay co Dios j̄ebi hūinmecx̄ip t̄ug'óc̄iy pocy hūidibi jāy ytungixp etz t̄ug'óc̄iy j̄ibicp̄i hūidibi jāy ycapxc̄ixp. J̄eyi jancht̄iy co p̄injaty capxtigooyb m̄id je Esp̄iritu Santo, je Dios yjihui'ñ ym̄ic'ajt, ca' Dios hūinmecx̄ip nim̄ina. 32 P̄injaty j̄ibic xyñigapx̄pich xyñim̄iydacc̄pich, je' hūinmecx̄am. Per je hūidibi j̄ibic ñigapx̄py je Esp̄iritu Santo, je' ca' hūinmecxa'ñ ni jadachambi tiempo, etz ni camina x̄i.

Yi quipy y' ytim y' m̄id yaj'ijxcapy

33 Pen miich ajcxy mnejhūihuamy je quipy pen oy quipy, o pen ca', j̄ebi mnejhūihuipy co je quipy n̄icxy ytim'aty. Pen oy je ytim, miich m̄ina'n̄ip co oy je quipy. E pen ca' oy ytim'aty, hūin'it miich ajcxy m̄ina'n̄ip co ca' y'oyity je quipy. 34 J̄ibic jāy miich ajcxy, jadu'n nipaady nej jihuiȳy ahua'n iyujc xy'ung'ajtp. Pen miich ajcxy j̄ibic jāy'ajtp, ¿nej j̄ebi miich ajcxy oybi ayuc mgapx̄ipy? Jadu'n nej jāy ajcxy yjot yhūinma'ñ m̄id̄ity, ac tim jadu'n ajcxy ycapxy. 35 Je jāy hūidibi oy ayuc ycapx̄py, ym̄id oyjot oyhūinma'ñ paady oy ayuc capxy. Je jāy hūidibi j̄ibic ayuc capxp, ym̄id j̄ibic jot j̄ibic hūinma'ñ, paady j̄ibic ayuc capxy. 36 Iich miich ajcxy nim̄ay co anajty paady je x̄i je tiempo m̄ina Dios t̄ȳduna'ñ je naaxhūiñȳj̄y, hūin'it ajcxy y'adzohuipy m̄id huen tim hūidibi ayuc hūidibi anajty ajcxy ti mgapxy. 37 Com nejaty miich anajty ajcxy ti mgapxy je m̄ayuc jadu'n miich

ajcxy Dios xytidyunip. Com müd yi mgi'm ayuc yi' müd m'oybidzimipy mhuätzpidzimipy. E nañ jadu'n müd yi mgi'm ayuc yi' müd mbocycähüpy.

Jibicjäydjic ajcxy pijctzoogixy tüg ijxpejt mijhuinma'ñybi

³⁸ Chi nijëjity fariseos ajcxy etz escribas ajcxy Jesús nimayi:

—Huindzin, n'ixamy ñich ajcxy miich tüg m'ijxpejt.

³⁹ Chi Jesús y'adzooy:

—Yi jibic jäydjic ajcxy etz ajcxy huidibi ca' mibiga'ñ Dios ypijctzooyb tüg ijxpejt huidibi tzomb tzajpjoty. Per Dios ca' yega'ñ jadüg ijxpejt. Ti Dios yecy tüg ijxpejt ma Jonás. ⁴⁰ Com jadu'n nej Jonás jecy'ajty ijxpejt yejcy co y'ijty tugiig xii tugiig tzuum mejyjoty ma acx ymoxac, nañ tim jadu'n ñich, je jäy huidibi tzoon tzajpjoty, nyegamy ijxpejt jadachambi tiempo co n'idipyich tugiig xim etz tugiig tzuum naaxjoty. ⁴¹ Je mayjäy huidibi anajty tzinaayb ma Nínive cajp, ti jothuimbijtcixy etz ti ixmach ajcxy huidijaty jibicpi ajcxy ytumyb co Jonás capxhuäcxy Dios y'ayuc ma yi' ajcxy. Cha ñich ngapxhuäcxyich Dios y'ayuc ma miich ajcxy, etz jac nigü cötujcin nmädidyich, ca'ydi Jonás; e ca' miich ajcxy mjothuimbity. Paady co anajty Dios tyduna'ñ je naaxhuiñyjäy, je Nínive jäy miich ajcxy xyajpocycähüam. ⁴² Nañ jadu'n je töxyjäy reina huidibi tzinaay jecy'ajty ma madza'cruudz ypidzimy, yi' je' xidähüam je jäy ajcxy huidibi tzinaayb jadachambi tiempo, etz yajpocycähüib ajcxy. Je reina tzoon jigüëgy nicxy co amido'ida'ñ je rey Salomón ma capxhuäcxi Dios y'ayuc. Ji naaxhuiñ jadachambi tüg Dios ytiy'ajtmüdpä jac nigü ymijity, ca'ydi Salomón anajty, e ca' je jäy ajcxy mijpidäga'ñ.

Je jibic espíritu co jadüg'oc yhuimbity

⁴³⁻⁴⁴ Yi jäy ajcxy huidibi cham tzinaayb, quipxyjaty ajcxy müd je ca'oybi. Co je ca'oybi ypidzimy ma je jäy, chi je' ñicxy jim mjtigüduum y'ijxtacy. Co ca' paty ypocxtac, huin'it ymína'ñ: “Huimbidaambich ma je jäy yjot yhuinma'ñ ma ñich ti n'octzombi.” Co je ca'oybi yjäty ma anajty ti chinäy, chi paty je jäy yjot yhuinma'ñ ooy yhuätzity etz yajxon ypedigity oy oyduñ. ⁴⁵ Chi je ca'oybi ñicxy oy yajtzoon jahuixtujc ca'oybi jac jibicpi ca'ydi je'. Chi ajcxy ytigüiy ma je jäy yjot yhuinma'ñ, e chinay ajcxy jilby. Huin'it je jäy jac'öctiy oy yjajtni, ca'ydi jadu'n nej anajty jayjip'aty.

Jesús ytaj etz y'uch miguëx ajcxy

⁴⁶ Jesús yaj'ixpijcpy anajty je mayjäy, co oy yja'ty je' ytaj etz y'uch miguëx ajcxy. Hue' ajcxy yhuim'y tiba'y. Je' ajcxy anajty ymígapxamy Jesús. ⁴⁷ Chi jäy yajnimay Jesús:

—Yi mdaj etz m'uch miguëx ajcxy, chiiby ajcxy tiba'y, miich xy-jamígapxamb.

⁴⁸ Jesús y'adzooy, nimay je jäy huidibi ytaj y'ayuc yajnajxi ma yi':

—¿Pin jäy miich ajcxy mdijy co ñich ndaj'adyii etz ñich n'uch'adyii nmigüg'adyii?

⁴⁹ Huin'it Jesús nitziihuüy je' ydiscípulos ajcxy e ymínañ:

—Jada ñich ndiscípulos ajcxy jadu'n nipaady nej ñich ndaj etz ñich n'uch nmiguëx. ⁵⁰ Huen ytimpinity huidibi ytumyb ñich nDeedy chojcin, huidibi jilby tzajpjoty, pues jadu'n yi' ajcxy nipaady nej ñich ndaj etz ñich n'uch miguëx.

13

Je ayuccapxhuäcxpi y'ijxpejt (niipi ijxpejt)

¹ Je huin'it xii Jesús choñ ma je tijc. Chi ñicxy ma je mejypa' jim oy y'iñay'ihuüy. ² E co mayjäy ooy ñaymujci jim ma anajty Jesús iñay, chi Jesús ytiği y barcojoty. Per tüg'ócıy je mayjäy yhuimday ma mejypa'. ³ Jesús ytiği y jäy yaj'ixpijcp miiid jihuimbit ayuc, ymiñañ:

—Tüg jäy chooñ trigotim huijp. ⁴ E ma anajty jim ytiimhuijy, huin'it je ytiim oy naagity ycäy ma tü'aa. Chi jada' je joon ajcxy oy ymiiñ etz ypiihuügy je tiim. ⁵ Nijëjity ytiim ycäy ma tzaanïc x ma anajty hueeni naax. Jada tiim tzojc ymujxy. ⁶ Com hueeni anajty je naax ma je tzaanïc x, chi co oy xii'an ypadyii, chi ytiitztay, com ca' anajty je ytictz yeegity. ⁷ Nijëjity tiim oy ycäy ma ujtz'aayjot ma apyjot, e ujtz'öctay je trigo mang. ⁸ Per je tiim huidibi ca'u ma oy ñaax, je' yon yajxon e tiim'ajt may'amy; tüg ypi'cpajc iipxmajc oy yco'ity, jadüg pi'cpajc tugi'px oy yco'ity, jadüg pi'cpajc migo'px oy yco'ity. ⁹ Pinjaty mido'n miiid huen mido'mbicy jada ayuc.

Ti ycxpi je ijxpejt

¹⁰ Chi je' ydiscípulos ajcxy nimijhua'cy Jesús, chi ajcxy yajtiy:

—¿Na'amy co myajtuñ jihuimbit ayuc co myaj'ixpicy je mayjäy?

¹¹ Chi Jesús y'adzooy, ymiñañ:

—Miich ajcxy jaydëb mnejhuühuüpy huidibi Dios ñigapxyp ñimiydacpy coyüch'amy ma y'ane'min. Jacjadyii jäy ca' ajcxy huinjihuühuüpy. ¹² Pinjaty ymiid yajmöhüip ñigi, pinjaty hueen miiid yajpigipy ñigi, oy ixyipy hueen jadim miiidity. ¹³ Paady jihuimbit'amy nyajniimaayich; jaydëbi pinjaty ijxcıxy, ñipaty nejihuüy ca' ti ijxcıxy; etz co ajcxy midoogıxy, ca' ajcxy huinjihuüy, ñipaty nejihuüy ca' ti midoogıxy. ¹⁴ Jadayaabi ytunyii yjadyii jadu'n nej je profeta Isaías jaaybejty yajhuim'y ma jadu'n ymiñañ:

Miich ajcxy midohuamy, per ca' mhuinjihuühuangıxy. Miich ajcxy m'ixamy, nañ ca' mhuinjihuühuaangıxy huidibi ti m'ijxcıxy.

¹⁵ Com jadayaabi jäy ooy ajcxy yjot yhuinma'ñ ti y'ahuimbity juuñ. Nej ajcxy yjamıdoy, ca' ajcxy ymidohuim'gıxy. Nej ajcxy ja'ıxy, ca' y'ijxhuim'gıxy. Nej ajcxy yjahuinjihuüygıxy, per ca' yhuinjihuüy ma yjot yhuinma'ñ. Yi' ajcxy ca' yjothuimbidaangıxy ma ñch, jaydëb nyajniidzögibich ajcxy.

¹⁶ Per jotcujc miich ajcxy, co miich ajcxy ijxhuim'y miiid mhuin huidibi ndumyibich, e mmido'mbicy ajcxy ñch n'ayuc. ¹⁷ Janch tiy'ajt jadu'n nej ñch miich niimaaygıxy. Janch tiy'ajt co may profetas ajcxy etz tudägy jäy ajcxy huidibi tzinaayb jecy'ajty, ooy ajcxy ja'ıxañ huidibi miich ajcxy m'ijxyp cham, per ca' ajcxy ıxy. E ooy ajcxy jamıdohuañ je ayuc huidibi miich ajcxy midooyb cham, per ca' ajcxy midoy.

Jesús najtzcaxıy je ijxpejt ma je niipi

¹⁸ Amıdo'it miich ajcxy, jadu'n nej yhuimbıdzımy jada jihuimbit ayuc maabi je tiim huijpi. ¹⁹ Je jäy ajcxy huidibi amıdo'ijtp Dios y'ayuc, e mic'amy je ca'oybi yajpidzımy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tiim huidibi cäb tügıj, e je joon ajcxy mic'amy ypiimujctay. ²⁰⁻²¹ Je jäy ajcxy huidibi amıdo'ijtp Dios y'ayuc janch jotcujc, per co agapxıyb paady, co tzaachypi minaxy yajnaxy miiid

Dios y'ayuc ycixpi, chi mic'amy ajcxy ixmajtzní Dios y'ayuc, jadu'n ajcxy nej je trigotim huídibí tí ycäy ma tzaanícx, huídibí ca' oy ytictz mídity. ²² Je jäy ajcxy huídibí amído'íjtp Dios y'ayuc, e co ñicxni, chi jäy digooyñí Dios y'ayuc míd jotcujc'ajtín tznáayín, comeeñ'ajtín etz adzojcin. Jadu'n ajcxy nipaady nej trigotim huídibí tí ycäy ujtzjoty, e ca' ytüm'aty míd co oy y'ujtz'ögy. ²³ Je jäy ajcxy huídibí amído'íjtp etz cöbijcp yajxon Dios y'ayuc amumdügiot etz Dios y'ayuc ytumyb ma ajcxy yjot yhuinma'ñ, jadu'n ajcxy nipaady nej je tím huídibí tí ycäy ma oy ñaax etz tí ytüm'aty may'amy. Tüg pi'cpajc iipx majc oy yco'ity, etz jadüg pi'cpajc tugí'px oy yco'ity, etz jadüg pi'cpajc migo'px oy yco'ity.

Je ijpajt co je jibic ujtz ymuxy ma je trigo cam

²⁴ Chi Jesús yaj'ixpijcy jadüg jihuimbit ayuc, ymíñañ:

—Je Dios y'ane'mín jadu'n nipaady nej tüg yéydijc huídibí trigo tím huíjp ma je' ycam. ²⁵ Per co ajcxy yma'óctay nidüg'óciy je cogam, chi ytigüy tüg ymídzip ma je ycamjot. Chi je mídzip jibic ujtz tím oy huíjy ma je trigo cam. Chi ñicxñí. ²⁶ E co je trigo oy yooñ, chi ypijy. Nañ jadu'n je jibic ujtz oy yooñ. ²⁷ Chi je ytumbidijc oy yhuindzín yajnimay: “Huindzín, ¿nej ca' tí mnípy ac trigotim? ¿Nej co jím nañ jadu'n jibic ujtz yajpaady?” ²⁸ Chi je cogam ymíñañ: “Huen jada' nmídzípich jadu'n tí y'idích.” Chi je tumbidijc y'amídoohuí: “¿Nej mdzojcpy co ñich ajcxy nhuixgíbigich je jibic ujtzi?” ²⁹ Chi je cogam ymíñañ: “Ca'. Pen miich ajcxy mhuijxícpy je jibic ujtz, ca' jecyity co m'ahuixmugípy nañ jadu'n je trigo. ³⁰ Ixmatz, huen je jibic ujtz yeegy tüg mucy míd je trigo, ixti cooní anajty ypidígy je cosecha. Co cosecha paty, huín'it nguexa'ñich je ndumbidijc co huen jayíjp pujxígy je jibic ujtz etz axotzípy etz nögiy. E co yajpidíctay je jibic ujtz, chi yajpidígiy je trigo e pidágiy ma je tze'x.”

Je ijpajt ma je mostazapajc

³¹⁻³² Nañ jadu'n Jesús yaj'ixpijcy jadüg jihuimbit ayuc, ymíñañ:

—Je Dios y'ane'mín jadu'n nipaady nej tüg mostazapajc huídibí tüg jäy ñíip ma je' ycam. E je mostaza ytüm je' jac tím mutz ca'ydi ní huídibí ujtz tím. Per co je mostaza ytüm ymujx etz yooñ, chi y'ahuimbijty jac mij ca'ydi jacjadyí ujtz. E hue' nícxy yjaty janch mij, ixti joon ajcxy oy yqueec miíñ yqueec xijpy jím, pidágy je ype'ñ ma je mostaza y'aacx.

Je ijpajt ma je levadura huídibí ca' y'oyity

³³ Nañ jadu'n Jesús yaj'ixpijcy jadüg jihuimbit ayuc, ymíñañ:

—Je Dios y'ane'mín jadu'n nipaady nej levadura huídibí tüg töxyjäy ypidacpy míd je harina, jigix je harina oy ypidígy.

Nej anajty Jesús yajtuñ je ijpajt

³⁴ Tüg'óciy Jesús yaj'ixpijcy je mayjäy, jihuimbit'amy yaj'ixpijcy, e ní tí ca' jäy yaj'ixpijcy cayajnimäy jihuimbit ayuc. ³⁵ Jadu'n Jesús ytuuñ, jigix yajcuyduñ je ayuc huídibí je profeta Isaías yjaayhuí'm jecy'ajty, co jadu'n ymíñañ:

Ñich ngapxamyích ac tím jihuimbit ayuc. Ñich nigapxamybích tijaty huídibí ca' pín nejhuíy, mabaad Dios oga'n yajcojy je naaxhuíybi.

Jesús capxticxni nej yhuimbídizimy je jibic ujtz ma je trigo cam

³⁶ Chi Jesús capxycijxy m̄id je mayjāy, chi ñicxy ma tūg tijc. Chi ytigiy tigoty m̄id je' ydiscipulos ajcxy. Chi Jesús ydiscipulos ajcxy nimijhua'cy Jesús, yminañ ajcxy:

—Tun may'ajt ñich ajcxy xyajhuinjihuñyig je jihuimbit ayuc co ti mni-gapxy je jibic ujtz ma je trigo cam.

³⁷ Chi Jesús yajnimay:

—Ñich, je jāy huidibi tzoon tzajpjoty, jadu'n ñich nipaady nej je jāy huidibi niip je oybi t̄im ma je ycam. ³⁸ Je cam jadu'n nipaady nej tūg'óciy naaxhuiñyāy. Je oybi t̄im jadu'n nipaady nej je jāy ajcxy huidibi cōbijcp Dios y'ane'm̄in. Je jibic ujtz jadu'n nipaady nej je jāy ajcxy huidibi cōbijcy ajcxy je mujcu' y'ane'm̄in. ³⁹ Je jāy huidibi niipy je jibic ujtz, jadu'n yi' nipaady nej je ca'oybi. Je jibic ujtz cosecha, jadu'n nipaady nej je tiempo co anajty je naaxhuiñ ycixy ytigoy. Je ajcxy huidibi yajpidic je cosecha, nipaady nej je ángeles ajcxy. ⁴⁰ Jadu'n nej je jibic ujtz oy yajpux̄igey etz yajpidacy j̄injoty, nañ tim jadu'n ñicxy yjaty m̄id je jāy ajcxy huidibi cōbijcp je mujcu' y'ane'm̄in co anajty je naaxhuiñ cixy ytigoy. ⁴¹ Co anajty je naaxhuiñ ycixy ytigoy, chi ñich, je jāy huidibi tzoon tzajpjoty, nguexamyich n'ángeles huen yajmujctāy je jāy huidibi je ym̄igūg yajtundigooyb, etz yi' huidibi ajcxy jibic-huinma'ñ tumb. ⁴² Co yajmujctāhuipy je jibicjāydijc, chi ajcxy yajpidāgipy mijj̄injoty, j̄iiby ajcxy yāxa'ñ etz ytiitzmucxy ytiitzqueecy m̄id je ayo'n ycixpi. ⁴³ Per je jāy ajcxy huidibi cuydumb Dios chojcin, idam ajcxy m̄id Dios Teedy j̄iiby tzajpjoty. Ym̄i'idamy ajcxy tūg oy'ajti, jadu'n nipaadip nej je x̄i' ytiicxin yjajin. Pen miich ajcxy m̄ido'n m̄id, m̄ido'mb̄ijc ajcxy ñich n'ayuc.

Je y'ijxpejt je meeñ huidii yūch̄ip

⁴⁴ Je Dios y'ane'm̄in jadu'n nipaady nej meeñ huidibi yūch̄ ijtp ma tūg cam. Per co tūg jāy paady je meeñ, chi mic'amy jadūg'oc yūdz tigach. Chi ooy yxondāgy. Chi ñicxy etz tooctāy tūg'óciy huidibi ym̄id etz juy je naax.

Je y'ijxpejt je perla huidibi tzoohuip

⁴⁵ Nañ jadu'n Dios y'ane'm̄in jadu'n nipaady nej tūg ajuuyb adoocpi huidibi ijx̄taayb tūg oybi perla huidibi tzoobatp. ⁴⁶ E co anajty paady tūg perla huidibi janch tzou, chi ñicxy tooctigoydāy tūg'óciy huidibi ym̄id etz juy je perla.

Je acxmadzi'ñ y'ijxpejt

⁴⁷ E nañ jadu'n Dios y'ané'm̄in jadu'n nipaady nej tūg acxmadzi'ñ huidibi jāy m̄id ycojib̄iiby mejyjoty. Chi j̄iiby ytigiy huen ytim huidibi acxity. ⁴⁸ E co anajty je acxmadzi'ñ y'uch m̄id je acx, chi je jāy ajcxy yajpidzimy ma mejypa'áy. Chi ññay ajcxy jim mejypa'áy etz huin'ijxy ajcxy je oyjatypi acx etz pidaaccixy ma ycach. Je acx huidijaty ca' y'oyity, je' ajcxy y'ix̄bijp. ⁴⁹ Tim jadu'n nej ti yjaty m̄id je acx, nañ jadu'n jada'ñ, co anajty ycixy ytigoy je naaxhuiñ. Huin'it je ángeles ajcxy ñicxa'ñ huindu'my naaxhuiñ huin'ixa'ñ je jibic jāydijc e pidāga'ñ ajcxy abicy, nañ jadu'n huin'ixa'ñ je oy jāydijc, e pidāga'ñ ajcxy nañ jadu'n abicy. ⁵⁰ Chi je ángeles ajcxy pidāga'ñ je jibicjāydijc mij j̄injoty. J̄iiby j̄injoty ajcxy yāxa'ñ ytināhua'ñ etz ytiitzmucxaangixy ytiitzqueedaangixy m̄id je ayo'n m̄id je tzaachypi ycixpi.

Je jāy huidibi jajtp nej oybi etz nej jibicpi yajpidzimity

⁵¹ Chi Jesús y'amidooy ajcxy:

—¿Nej mhujnjuhuyb miich ajcxy tüg'óciy huídibi ñich ti ngapxich?

Chi ajcxy y'adzooy:

—Huindzin, ti nhujnjuhuy ñich ajcxy.

⁵² Chi Jesús ajcxy ñimay:

—Nidüg nidüg escriba co ti ixpicytäy tüg'óciy Dios ytiy'ajt y'ane'min huídibi tzajpjoty tzoon, hue' jadu'n nipaady nej tüg codijc comeñybi huídijaty ymüid yjajty nej yajpidzimipy jemybi etz tucpi.

Jesús yajpaady jim Nazaret

⁵³ Co Jesús yaj'ixpijctay jada jihuimbit ayuc, chi chooñ jim. ⁵⁴ Co Jesús chooñ jim, chi ñicxy ma yci'mnaax yci'mgajp. Chi Jesús ytiñy ma je judio ñaymujctac, e ytiñy yaj'ixpijcp. Chi je mayjäy jiby ooy jihuy huinmay nej yi' yaj'ixpicy, yminañ ajcxy:

—¿Ma jada' jada yëydijc ti paady jada ixpijcin? ¿Ma mic'ajt paady co ooy mijhuinma'ñ tzachtuñ? ⁵⁵ Jadayaabi yëydijc hue' yteedy'ajtpy je tzejtzpi, etz ytaj'ajtpy María. E ñich ajcxy n'ix'ajtpyich je y'uch ajcxy; Jacobo, José, Simón, etz Judas. ⁵⁶ Nañ jadu'n ya chinay ma ñich ajt je' y'uch ajcxy töxyjäy. ¿Ma oy ti paady jada ixpijcin jada mic'ajtin?

⁵⁷ Paady je maycogajpi ajcxy ca' ytunicuend. Paady Jesús ajcxy ñimay:

—Huen ma'amyty tüg'óciy je mayjäy ajcxy ooy yajmij'aty yi jäy ajcxy huídibi najtzcapxiyb Dios y'ayuc, ca'ydi huídibi y'ayucnajtzcapxiyb ma yci'mnaax yci'mgajp yci'mjin yci'ndijc.

⁵⁸ Ma yci'mnaax yci'mgajp Jesús ca' jaty nej mijhuinma'ñ tunip anajty, müid co je jäy ajcxy ca' mijpidägyii.

14

Juan el Bautista co y'ögy

¹ Je huin'it tiempo Herodes huídibi anajty ane'mb jim Galilea tiy'ajt paty nej Jesús ytuñ. ² E yi' ñimay je ymidungmüidpidijc:

—Yjibi jäy huídibi tzachtumb mijhuinma'ñ, yi' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt müid jaydëb mijhuinma'ñ tuñ.

³ Herodes ti anajty ni'ane'mdiy co Juan huen yajmach, e yajpidägyipy pujxtigoty. Jadu'n Herodes tuñ müid Herodías yciixpi. Je Herodías je' anajty müid jayijp'aty ti ypiy Felipe, je Herodes y'ajch, chi ti ixmajch Felipe, chi ypijcy müid Herodes. ⁴ Juan ti anajty ñimäy Herodes co ti ytundigooy co ti picy müid Herodías.

⁵ Je rey Herodes ooy anajty jayaj'öga'ñ yi Juan, per tziñy anajty müid je mayjäy. Com je mayjäy ti anajty mibicy ajcxy co Juan hue' anajty tügi Dios tiy'ajt müidpi, tüg profeta. ⁶ Co Herodes yjimijtpetty, chi anajty ñayñixiñduñyii, e chi Herodías ñix ñicxy ejtzp ma Herodes yhuinduu. Je rey ooy jäygidacy nej anajty Herodías ñix y'eich. Paady Herodes Herodías ñix ñimay:

⁷ —Dios ñich yam ngapxpatpy co nmöhuamyb ti mdimypijctzooyb.

⁸ Chi Herodías ñimay je' ñix co huen pijctzoohui je Juan, je Bautista, ycohuajc ma tüg texy. Chi Herodías ñix je rey ñimay:

—Ndzojycpich co miich xymöhuip Juan, je Bautista, ycohuajc ma tüg texy.

⁹⁻¹⁰ Co jadu'n midooy je rey, chi ytiñy tajp maybi mij cajee. Per co ti anajty Dios capxpaatni, yminaani mayjäy yhuinduu co ymöhuamyb

tijaty ypijctzooyb. Paady ane'my tũg soldado co huen nicxy yajtzoñyii Juan ycohuajc, e möhuipy Herodías ñiix. ¹¹ Huin'it je soldado oy je Juan ycohuajc yajminajci jii by pujxtigoty. Chi moy je töxy'anäg, e je töxy'anäg yejcnajxni ma ytaj.

¹² Huin'it xii je Juan ydiscípulos ajcxy yja'ty. Chi ajcxy oy yajnaaxtigiy je Juan ñinicx. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuüy ti anajty ti ytuñyii ti yjadyii müid Juan, chi ytigüy ma tũg barco naydüg, e nicxni ma tũg it ma ca' pin chinäy. Co je mayjäy nejhuüy co Jesús ti ñicxy, chi ajcxy choday canaag agajp, nicxy ajcxy ma Jesús yajpaady, hue' tecygi'm ajcxy nicxy. ¹⁴ Co Jesús ypidzimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huidibi anajty ajcxy jim ymiid müiñ. ¹⁵ Com ti anajty chuu'ñi, paady je' ydiscípulos ajcxy nimijhua'cy Jesús, e nimay ajcxy:

—Ti chuu'ñi, e ca' ya pin china'y, paady capxcixy müid jada mayjäy ajcxy, jaydeb ajcxy nicxy ixtäy ycaayin y'uucin ma yi mutz cajp ajcxy huingonbi.

¹⁶ Chi Jesús yminañ:

—Ca' ycopicyity co ajcxy nicxy jicxy ixtäy. Müich ajcxy möhuip caayin uucin.

¹⁷ Chi je' ajcxy yminañ:

—Per ñich ajcxy jeyi yeeby nmüidity migoox tzajcaagy etz metz acx.

¹⁸ Chi Jesús yminañ:

—Mimiingix yam'amy.

¹⁹ Chi Jesús nimay je mayjäy co huen iñay'ihuiydaaygixy ma pi'cmüy'ung nicx. Huin'it Jesús je migooxpi tzajcaagy conigy etz je metzpi acx. Chi ypa'tijxy jii by tzajpcixy, e yajnajxy Dioscojuipy. Chi tujc-huäcxy je tzajcaagy etz moy je' ydiscípulos ajcxy, co huen yajhuäcxcixy ma je mayjäy. ²⁰ Nidüg'óciy je mayjäy ajcxy yca'y cüxy. Co je mayjäy yca'yday, chi je discípulos ajcxy yajmujcy je cayduc jicxtuc, e yaj'ujch ajcxy majmetz cach. ²¹ Migoox mil anajty ajcxy je yeydijctijc huidibi cay uuc. E ca' ajcxy michoy je töxyjäydijc ajcxy etz je y'ung y'anäg ajcxy.

Jesús yöy ñihuingixy

²² Chi Jesús ane'my yi' ydiscípulos ajcxy co huen barco tigüygyixy mic'amy, jigix ñicxipy ajcxy jim mejy ñinaxy. Namí yi' ydiscípulos ajcxy choñ barcojoty, Jesús ycapxcijxy müid je mayjäy huen nicxcixni. ²³ Co anajty Jesús ti ycapxcixy müid je mayjäy, chi ñicxy naydüg ma tũg cõgop Dios mibijctzooibi. Co ycoodziñ Jesús naydüg anajty yajpaady. ²⁴ Co ycoodziñ, mejy cujc anajty je barco cujc nicxy. E je ñi ooy anajty ymijjëtzpety ma je barco, je' co ooy anajty mic yjanchojy. ²⁵ E co oy ymoñiy, huin'it Jesús ymijhua'cy ma je' ydiscípulos ajcxy, ñicxy adüyöyb mejyhuingixy. ²⁶ E co je discípulos ajcxy ijxy co Jesús anajty ymiñ mejyhuingixy, chi ajcxy ooy ñay'adzigiyyi. Ooy ajcxy yaaxqueecy yminañ ajcxy:

—Hue' ñich ajt ijxmanüyim.

²⁷ Chi Jesús mic'amy ymigapxy ajcxy etz nimay:

—Huinmic jotmic naybidáacigixy, ñich yi'. Ca' mdzigüygixy.

²⁸ Chi oy Pedro Jesús ymigapxyii, nimaayi:

—Huindzin, pen janch miichity, ane'mgich co huen ich miich ninicxip adüyöyip mejyhuingíxy.

²⁹ Chi Jesús Pedro nimay:

—Min.

Huin'it Pedro yminajcy ma je barco etz ñicx ma Jesús adüyöyip mejyhuingíxy. ³⁰ Per co Pedro jihui'ñybicyjadu'n nej anajty ooy mic yjanchpojy, chi ooy chigiy, chi oy oga'n ytigíyñi quimbi, chi yaaxqueecy, yminañ:

—¡Huindzin, ich yajtzóocigich!

³¹ Huin'it Jesús oy yci' mimajtzi, chi nimay:

—Miich, janch hueeni mmibijcin. ¿Nej co ca' yajxon xymibicyich?

³² Co Pedro etz Jesús ytigíy barcojoty, huin'it je mic poj ñajxy. ³³ Huin'it je' ajcxy jii by barcojoty ycojxtinay'ihuiydaay ma Jesús yhuinduu. Chi yminañ ajcxy:

—Janch tiy'ajt co miich Dios xy'ung'adyii.

Jesús yajtzoctay je pa'mjäy ajcxy jim Genesaret

³⁴ Co ajcxy ymejyñajxtay, chi ajcxy oy ja'ty ma je Genesaret naaxjot. ³⁵ E co je jäy ajcxy nejhuüy co Jesús ti yjäty ma yi' ajcxy naaxjot, chi ajcxy tiy'ajt quejxy ma tüg'óciy cajp etz rancho huinduy agonbi co Jesús yjimity. Chi je mayjäy müd miñ tüg'óciy je pa'mjäy ma Jesús. ³⁶ Chi ajcxy cohuaníy Jesús, pen jeb je pa'mjäy ñidoñyii je yhuit. E tüg'óciy je huidijaty ñidonip je' yhuit, je' ajcxy chooctay y'agidactay.

15

Huidi jäy yaj'ahuimbijty janch jibic

¹ Chi ymiñ ma Jesús nijéjity fariseo jäy ajcxy, je huindzindijc huidibi tzachpadumb judío ycostumbre. Nañ jadu'n miñ nijéjity escribas, je huindzindijc huidibi ajcxy nijaydutr anajty Dios ñecy. Je fariseos etz escribas ajcxy ti choongíxy anajty jim Jerusalén, chi ajcxy y'amidooy Jesús:

² —¿Na'amy co miich mdiscípulos ajcxy ca' cuydungíxy judío ñi'ap costumbre? Yi' ajcxy ycaaygíxy y'uuccíxy, e ca' jayijp ycibujcixy, ca' ixpucixy ixjétcixy ypocy.

³ Chi Jesús y'adzooy, yajtiy:

—¿Na'amy co miich ajcxy mgapxycómiodägy Dios? Mdzachcuydungíxy mgi'mgostumbre ma yjapadyii mguydungíxy ixyipy Dios ycótujcin. ⁴ Com Dios ti y'ane'my ma ycótujcin: “Yajmij'at mdaj mdeedy, e pinjaty jibic nigapxy ni'ojüyb ytaj yteedy, ögipy yi'.” ⁵ Per miich ajcxy minamb co tüg je yéydijc jébi nimäy ytaj yteedy: “Ca' ich miich ajcxy nbubedañ, com ti n'ahuaníyich ma Dios tüg'óciy tijaty nmüdich.”

⁶ Chi huen yimpiníty jadu'n minamb, ca' ocpubedaanip ytaj yteedy, e jadu'n miich ajcxy myajtigoy Dios y'ane'min com tzachtunaangíxy mgi'mgostumbre. ⁷ Miich ajcxy naybidaacip jadu'n nej jihuiy tudägy jäy, e ca' yjanchity. Janch tiy'ajt jadu'n nej jecyip Isaias jaaybejty yajhui'my co Dios jadu'n yminañ:

⁸ Jadayaabi jäy xyajmij'ajtpich ahuac aguy, per ca' ajcxy xyajmij'atyich cixyot huiniot.

⁹ Naadigi' co ajcxy xyhuin'íyigíxyich xyhuinyáaxcixyich. Mnayyaj'ixpijigíxy ayuc tiy'ajt huidibi jäy ajcxy ti cojy ti maacxy.

¹⁰ Huin'it Jesús huomujctay je mayjäy, yminañ:

—Amídoo'ijtcixy ñich n'ayuc etz mhujnjihuüiygixip. ¹¹ Ca' ji ni ti jicxy huidi jäy ypidacpy ma y'ahuac nicxy yajpocycäyü. Yí' janchtiy je jibic ayuc huidibi pidzim ma jäy ajcxy y'ahuac, yí' ajcxy yajpocycähuiib.

¹² Chi ymiin ma Jesús je ydiscípulos ajcxy, chi ajcxy ñimaayí:

—¿Nej miich mnejhuüiyb co je fariseos ajcxy ñijotma'tpy co ajcxy midoy je ayuc jadu'n nej miich minañ?

¹³ Chi Jesús y'adzooy, yminañ:

—Huen tim huidibi ane'min huidibi ca' Dios ti pidägy, Dios yajtigoyam, tim jadu'n nej jäy ajcxy huijxigy ujtz huidibi ca' y'oy'ujtzity. ¹⁴ Ixmajtcix yí fariseos etz escribas ajcxy. Ca' ajcxy huinjihuüiy Dios ytiy'ajt. Jadu'n ajcxy nipaady nej jäy huintzpi, e co tüg huintzpi huijtzhuidity jadüg huintzpi, chi nimetz nicxy yjutcögägy.

¹⁵ Huin'it Pedro ñimay Jesús:

—Yajhuinjihuüiyg ñich ajcxy jada jihuimbit ayuc.

¹⁶ Chi Jesús yminañ:

—¿Nej miich ajcxy nañ jadu'n ca' mhujnjihuüiy jada jihuimbit ayuc?

¹⁷ ¿Nej ca' miich ajcxy mnejhuüiy co tüg'óciy huidibi tigiüyb ma miich ajcxy m'ahuac, je' nicxp ma miich ajcxy mjot etz ypidzimy ma ajcxy mninix?

¹⁸ Per je jäy huidibi jibic capxp, capxp je' je jibic ayuc huidibi ymiid ma yjot yhuinma'ñ. Jada jibic ayuc yajpocychimäp je jäy. ¹⁹ Yí jibicpi huidibi tzomb ma jäy ajcxy yjot yhuinma'ñ, yí' je' jäy'aj'ögüi huinma'ñ, je töxyjäy migapxtigoyüi huinma'ñ, meedzi huinma'ñ, je indägi huinma'ñ, je piitz capx huinma'ñ. ²⁰ Yijadu'mbi jibic-huinma'ñ yajpocycäb jäy ajcxy ma Dios. Per co jäy ajcxy ycaay y'ügy, ma ca'ni ajcxy pocy ixpujicxy jayjip, ca' je' ypocycäy ajcxy ma Dios.

Tüg töxyjäy huidibi ca' judíoäy mibijc Jesús

²¹ Chi Jesús jim choon, nicxy ma je Tiro etz Sidón naaxjot. ²² Jim anajty tüg töxyjäy chinäy. Jada töxyjäy hue' anajty cananeajäy, canan judíoäy. Chi yí' nimiiñ Jesús, chi ñimay:

—Huindzin, David y'ap y'oc, pa'ayoogich. ñich nmüidich tüg nüix huidibi ymiid ca'oybi etz oy tzaachypi paady.

²³ Per ca' ni nej Jesús y'adzoohui. Huin'it je' ydiscípulos ajcxy miiñ ma Jesús, e ycohuanüy, minañ ajcxy:

—Capxcix miiid jada töxyjäy, com nigo xypayaax xypadinaayim.

²⁴ Chi Jesús yminañ:

—Dios ñich ti xyquexyich jëda'ajty ma je israelitasjäy huidibi y'alma tigoyam.

²⁵ Chi je töxyjäy ymijhua'ci ma Jesús, e ycojxtinay'ihuiy ma je yhuinduu, chi yminañ:

—Huindzin, tun may'ajt pubejtcich.

²⁶ Chi Jesús yminañ:

—Ca' jadu'n y'oyity co n'ixmadzipich je israelitasjäy (Dios yjäy), e nbubedipich miich ajcxy. Co jadu'n ndunipich, jadu'n nipaadip nej jäy ajcxy y'idich co ajcxy pijci je ajcxy y'ung ycaagy, e möy je uc.

²⁷ Huin'it je töxyjäy y'adzooy:

—Janch tiy'ajt jadu'n nej miich minañ, per ixti ycaayb je uc je tzajcaagy y'abu'x huidibi cäb ma yhuindzin mesa.

²⁸ Chi Jesús je töxyjäy ñimay:

—Janch mij mmibijcin. ñich ndunaamybich jadu'n nej miich mdzocy.

Huin'it hori je töxyjäy ñïx choocy.

Jesús yajtzögy mayba'mjäy

²⁹ Chi Jesús jim chooñ. Chi ñajxy ma Galilea mejypa'. Chi ypejty ma tüg cögor, jim iñay'ihuiy. ³⁰ E huin'it oy mayjäy müdmüñ pa'mjäy huidibi huintz, uum, címucy tecymucy, etz huen tim huidibi pa'mjäy. Pidacy ajcxy je pa'mjäy ma Jesús yhuinduu, e yí' yajtzoocay. ³¹ E je mayjäy ooy tzachjihuiy tzachhuinmaay ajcxy co anajty je uumbi ti capxígy, je huintzpi ti y'ixígy, je címucpy tecymucpy ti yöyígy. Chi je mayjäy ytiñy ñbaady capxpaady Dios, je Dios huidibi je Israel jäy ym'ijpidacy.

Jesús yajcay mídaax mil jäy

³² Chi Jesús mijhuoy je' ydiscípulos ajcxy, ñimay:

—Ooy nba'ayooyich jadyaab jäy ajcxy. Com cujc müdugiig xii ijtcixy ya müd ñich etz ca' ajcxy müdity ti ycaayipy. Ca' nguexhuimbida'ñich ajcxy ayuu ma ytijc, ca' yjetyity yajpa'mgojip ajcxy tü'am.

³³ Chi je' ydiscípulos ajcxy ñinañ:

—¿Per ma n'ocpatim ti jada jäy ajcxy ycaayipy yñicxipy ya ma jada abac it ma ca' pin chinäy? Co ooy mayjäyity.

³⁴ Chi Jesús yajtñy:

—¿Naag jii by tzajcaagy müich ajcxy mjacmüdity?

Chi ajcxy y'adzooy:

—Jëyi huixtujc tzajcaagy etz hueen acx.

³⁵ Chi Jesús ñimay je mayjäy co huen iñay'ihuiydaaygixy naaxcixy.

³⁶ Chi Jesús conígy je huixtujcpi tzajcaagy etz je hueenip acx, e yajnax Dioscojuyip ma Dios. Chi tujc-hua'cx etz moy je' ydiscípulos ajcxy. E yí' ajcxy yajhua'cx je jicxy picy ma je mayjäy. ³⁷ Chi je mayjäy nidüg'ócíy ycaay cüxi. Jesús ydiscípulos ajcxy yajpidígy huixtujc cach cayduc uuctuc tiibi anajty yconaxy. ³⁸ E je huidibi ajcxy cay hue' anajty naybaatigixy nimídaax mil, abicy je töxyjäydijc etz pi'ctijc ajcxy. ³⁹ Chi Jesús ycapxycixy müd je mayjäy huen ajcxy ñicxicyñi ma ytijc. Chi Jesús ytiñy barcojoty etz ñicxni ma Magdala naax jot.

16

Je fariseos etz je saduceos ajcxy pijctzoogixy tüg ijxpejt mijhuinma'ñybi

¹ Chi je fariseos etz saduceos y'oy ajcxy icy Jesús. Yí' ajcxy ijxta'n octunaangixy müd Jesús, paady ajcxy pijctzoy co Jesús huen yaj'ixyii ajcxy tüg ijxpejt huidibi tzomb tzajpjoty. ² Chi Jesús y'adzooy je' ajcxy:

—Co müich ajcxy m'ixy tzuu yí' tzajp tzaptz, chi müich ajcxy ñinañ com jabom oy tiempo yajpada'ñ. ³ Per co müich ajcxy m'ixy jopy je tzajp tzaptz etz huimbicy, chi ajcxy ñinañ co ca' y'oyity yí' tiempo. Müich ajcxy ooy mnaybidägyii nejihuiy ooy m'ixpicyity ma Dios ytiy'ajt, e ca' yjanchity. Müich ajcxy jëbi yí' tzajp myajcapxy, per ca' mnejhuigixy nej yhuimbizimy yí' mijhuinma'ñ ijxpejt huidibi Dios ytumyb ma jadachambi xii tiempo. ⁴ Yí' jäy ajcxy huidibi cham tzinaayb, ooy yjibicjäyity ajcxy, ca' ajcxy capxymüdoy Dios. Yí' ajcxy chojcpy co nyaj'ixipyich tüg ijxpejt mijhuinma'ñ huidibi tzomb tzajpjoty. Ca' Dios yaj'ixa'ñ ajcxy jadüg mijhuinma'ñ, com müd müich ajcxy jaybetyity je mijhuinma'ñ ijxpejt huidibi Dios ytuun müd Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jāy ajcxy y'ixpijcin

⁵ Co Jesús etz ydiscípulos ajcxy yja'ty ma jadüg niiba', chi je' ajcxy yjädigoy je tzajcaagy. ⁶ Chi Jesús yminañ:

—Naygüend'ájtigix müid yi fariseos etz saduceos ajcxy, ca' mijpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷ Chi Jesús ydiscípulos ñayñimáayigixy miñ xyipy:

—Paady jadu'n yminañ, je' co ti ich ajt je tzajcaagy njäydiagooyim.

⁸ Jesús nejhuiy nej ajcxy nayñimáayigixy miñ xyipy, chi nimay ajcxy:

—¿Na'amy co miich ajcxy mīnaangixy co ca' ajcxy tzajcaagy müidity? Janch hueeni miich ajcxy mmibijcin. ⁹ ¿Nej ca'ni miich ajcxy mhuinjihuüy? ¿Nej ca' mjäymechyii co ich migoox tzajcaagy nyajhuäcxy etz ni migoox mil je yëydijctijc anajty huídibi ajcxy cay? ¿E ni mga'ajihuüyii ajcxy naag cach cayduc uuctuc ti myajpidigy? ¹⁰ ¿E ni mga'ajihuüyii ajcxy co huixtujc tzajcaagy nyajhuäcxyich ma nimidaax mil yëydijc ajcxy huídibi caay etz naag cach cayduc uuctuc myajpidigy ajcxy? ¹¹ ¿Nej co ca' miich ajcxy mhuinjihuüy, co ca' ich yam nigapxy yi' tzajcaagy huídibi miich ajcxy ti mjäydigoy, co ti nyajnímaayigixy je levadura huídibi je fariseos etz saduceos ajcxy ymüid?

¹² Huin'it Jesús ydiscípulos ajcxy huinjihuüy co Jesús ca' anajty je' ti yajnimäyii ajcxy co huen naygüend'ájtigixy müid tzajcaagy levadura. Hue' janchtiy Jesús yajnimay ajcxy co huen naygüend'ájtigixy müid je fariseos etz saduceos ajcxy y'ixpijcin.

Pedro nidiy'aty co Jesús yi' je' je Cristo

¹³ Co Jesús yja'ty ma Cesarea Filipo naaxjot, chi Jesús y'amidooy je' ydiscípulos ajcxy:

—¿Nej jāy ajcxy ymina'ñ, pīnic ich?

¹⁴ Chi ajcxy ymina'ñ:

—Nijëjity jāy ymina'ñ co miich je' Juan je Bautista. Nijëjity jāy ymina'ñ co miich je' Elías, e nijëjity ymina'ñ co miich je' Jeremias o jadüg profeta (huídibi tzinay jecy'ajty).

¹⁵ Chi Jesús yminañ:

—¿E miich ajcxy nej mīnaangixy, pīn ich?

¹⁶ Huin'it Simón Pedro y'adzooy:

—Miich je' je Cristo, je Dios y'ung.

¹⁷ Chi Jesús y'adzooy:

—Jotcujc miich Simón, Jonás y'ung, je' co ni pīn xycayajnimäy jada tiy'ajt, tügpaic je Dios Teedy nDeedyich huídibi jiiiby tzajpjoty, yi' ti xyajnejhuüy jada tiy'ajt. ¹⁸ Ich miich nīmaayb co miich mxii'adhyb Pedro, e hue' yhuimbizimy tzaa (hue' je', je tzaa tija'ñ je ayuc huídibi Simón ycapxy co je Cristo hue' je' anajty Dios), e ma jada tzaa ji ngoja'ñich ich ndzajptijc (hue' yhuimbizimy, ma ich n'ane'min chondäga'ñ), e ni ca' oybi ymic'ajt ycamimadägy. ¹⁹ Ich miich nmöhuamyb je cötujcin jadu'n nipaady nej tüg ahuuast huídibi müid myaj'ahuädzipy Dios y'ayuc ytiy'ajt. Tügóciy huídibi miich mgapx'adujcxy naaxhuiñ, Dios nañ jadu'n capx'adugipy jiiiby tzajpjoty, e huídibi miich ya naaxhuiñ ca' capx'aducy, Dios nañ ca' capx'adugipy jiiiby tzajpjoty.

²⁰ Huin'it Jesús nimay je' ydiscípulos ajcxy, co ca' huaad ni pīn nimäy co yi' je' je Cristo.

Jesús nigapxy je' y'öcin

²¹ Ixti huin'itni Jesús ytiḡiy yajnimay je' ydiscípulos ajcxy co nicxamb jim Jerusalén etz co jim ooy y'ayoohua'ñ. Jim Jerusalén je judío mijjädijc, je teedytjic huidibi tungmädpi, etz yi escribas ajcxy ooy chaachytuna'ñiyi etz yaj'öga'ñiyi. Per coduḡig xii huin'it yjugypiga'ñ jadüg'oc. ²² Huin'it Pedro mädnicxy Jesús ahuingujc, e oy ogy, yminañ:

—Huindzin, ca' Dios tzocy nicx jadu'n mjaty. Mäid miich ca' jëbi jadu'n mjadipy.

²³ Per Jesús yhuäc-huimbijty, chi nimay Pedro:

—Huinhuäctuatcich Pedro, je mujcu' miich jadu'n xyajcapxp. Ca' nigoo xy'adzipyich. Ca' miich mhuinma'ñybidägy nej Dios tzocy. Yi' janchtiy miich mhuinma'ñ'ajtpy nej jäy ajcxy tzocy.

²⁴ Huin'it Jesús je' ydiscípulos ajcxy nimay:

—Pen je pinjaty xypamina'ñich, huen yci'mdzojcin ixmajtztäy etz huen yhuinma'ñypidägy co ayoohuipy mäid iich ycixpi, ixti mabaad y'ögy. ²⁵ Huen pinjäy huidibi ca' ayoohua'ñ mäid iich ycixpi, hue' je' yajtigoyamy yi' yjugy'ajtin. Per pinjaty xypanixpich oy nej ytimyjadipy, hue' je' ypadamyb yjugy'ajtin huidibi ca' ycixipy ytigoyipy nimina. ²⁶ ¿Ti jäyḡidaacin yi' co tüg jäy y'ocnayyapadiyib yi meeñ etz mic'ajtin huindu'my ñaaxhuiñybi, e yjugy'ajtin cixipy tigoyipy tücciy? ¿Jadu'ñyi jëbi jäy y'alma yjugy'ajtin occojuyi? Nigi choohuiti jäy ajcxy y'alma yjugy'ajtin, ca'ydi jac ni ti. ²⁷ Iich, je jäy huidibi tzoon tzajpjoty, minaambich jadüg'oc ya naaxhuiñ mäid je ängeles ajcxy etz mäid nDeedyich y'oy'ajtin. Huin'it micuejtähua'ñ tüg'óciy je jäy nej anajty ti ytuungixy, pen oy, o ca' y'oyity. ²⁸ Janch tiy'ajt jadu'n nej nimaayḡixy co ji ya naagity huidibi ca' y'öga'ñ ixti cooni xy'ixipyich jadüg'oc co iich anajty nmiiñ ane'mbi.

17

Co Jesús ñinixyajtigach

¹ Codudujc xii huin'it Jesús mädnicxy Pedro, Jacobo, etz y'uch Juan ma tüg mijcop, ma tüg cop huidibi ooy ycixity. ² E jim copcíxy Jesús ñinix ñayḡotigajtzi ma Pedro, Jacobo etz Juan ajcxy yhuinduu. Jesús yhuiñyjipp ytiḡiy adücxp nej je xii ytücxin. E Jesús yhuit y'ahuimbijty janch poob jadu'n nej tüg tücxin. ³ E timetiini oy ijxcixy Moisés etz Elías ycapxy miydägy anajty mäid Jesús. ⁴ Chi Pedro nimay Jesús:

—Huindzin, oy y'oyity co iich ajt ya. Pen miich mdzocpy jëbi iich ajcxy nyaj'oyiy tugig tijcquemy. Tüg miich mje', tüg Moisés yje', etz tüg Elías yje'.

⁵ Pedro capxp anajty, tim huin'ity tüg joc yajnidigoyday je' ajcxy huidibi ooy adücxp anajty. E ma je joc yajmidoy tüg ayuc huidibi yminañ:

—Jadayaabi yëdyjc iich je' n'ung'ajtpy huidibi ooy ndzocy njihuñyich etz yi' iich mäid njotcujcity. Amidoo'it miich ajcxy yi' y'ayuc.

⁶ Co Pedro, Jacobo, etz Juan jadu'n midooy je ayuc chooñ jocjoty, chi ajcxy ooy chigiy etz ñayñitziitcidaaci ajcxy.

⁷ Huin'it ajcxy Jesús ñimiini etz nidoñ ajcxy, e yminañ:

—Pidüccix, ca' mdzigiyḡixy.

⁸ E co ajcxy y'ijxigy, ca' anajty jim Elías etz Moisés. Naydügpajc Jesús yjac-hui'my mäid je' ajcxy. ⁹ E co ajcxy yminajcy ma je cop, chi ajcxy Jesús nimay:

—Ca' ni pin miich ajcxy nyajnimähuiipy jadu'n nej ti m'ijxcixy cham, ixti cooni ñich anajty ti njugypicyich jadüg'oc ma anajty ti n'ögich.

¹⁰ Huin'it je' ydiscipulos ajcxy yajtiy Jesús:

—¿Nej co yi escribas, yi' ajcxy huidibi ñjaydutr etz yajñiguejp Dios y'ayuc, yminaangixy co Elías yi' miinaam jayijp etz axam je Cristo?

¹¹ Chi Jesús y'adzooy:

—Janch tiy'ajt co Elías ymiina'ñ etz yaj'oyiydähuamy tüg'óciy mñid Dios ycixpi. ¹² Per ñich miich ajcxy nimaayb co Elías ti y'oy. E je jäy ajcxy ca' nejhuüy pin yi', e ooy jibic tuuñ ajcxy, nej tim tzojccixy. E nañ jadu'n ñich, je jäy huidibi tzoon tzajpjoty ayoohuaambich ma yi' ajcxy.

¹³ Huin'it je' ydiscipulos ajcxy huinjihuüy co Jesús hue' anajty ñigapxyp je Juan, el Bautista.

Jesús yajtzögy tüg jäy mo'tpa'mmñidpi

¹⁴ Co Jesús, Pedro, Jacobo etz Juan yjäty jim ma je mayjäy ajcxy, chi ñimiini tüg jäy. Chi je jäy ycoxtinay'ihuüy ma Jesús yhuinduu, chi ymiinañ:

¹⁵ —Huindzin, ñich nmang pa'ayoohuic. Je' co ymiid mo'tpa'm etz oy yaj'iyooyii. Canaag'oc ti ycäy jünjoty ñijoty. ¹⁶ Paady ñich ti nmñidmiñich ma miich mdiscipulos ajcxy, per ca' ajcxy ymadacy yajtzögipy.

¹⁷ Chi Jesús y'adzooy:

—Miich ajcxy huidibi jugy'ajtp jadachambi xñ tiempo, ca' miich ajcxy mmibiga'ñ Dios, ca' miich ajcxy mgapxymidoohua'ñ Dios. ¿Naag xñ naag tiempo ñich miich ajcxy njacmimexctugipy? Yajmiingix yi yeeg'anäg.

¹⁸ Co je yeeg'anäg yajmñidja'ty ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögy.

¹⁹ Jac co hueeñi, je' ydiscipulos ajcxy mñidmydac Jesús ahuingujc, chi ajcxy yajtiy ma Jesús:

—¿Nej co ñich ajcxy ca' ti nmadägy nicx nyajpidzñimgixyich je ca'oybi ma je yeeg'anäg?

²⁰ Chi Jesús ymiinañ:

—Je' co miich ajcxy hueeni mmibijcin. Janch tiy'ajt jadu'n nej nnimaaygixy, co ixypy miich ajcxy xy'ocmibicyich, ooy ixypy jëda'ajty jadu'n nej je jac mutzpi ujtz tim, huin'it jëbi ixypy mnimäy jadayaabi cop co huen jihuaçy ya etz huen nicxy huingduum, chi ñicxip je cop. Ni ti ji ycatzipity pen janch miich ajcxy mñidity mibijcin. ²¹ Jadayaabi picy ca'oybi pidzimipy co Dios nmibijctzoohuim mictägy etz ayuu'ijt, ca' jac ti huinmañ.

Jesús nigapxy jadüg'oc y'öcin

²²⁻²³ Co anajty ajcxy yhuidity tügmucy jim ma Galilea y'it, chi Jesús nñimay je' ydiscipulos ajcxy:

—Ñich, je jäy huidibi tzoon tzajpjoty, yajcñyegipyich ma jäy. E yi' ajcxy xyaj'ögibich etz codugiig xñ njugypigipyich jadüg'oc. Co je' ydiscipulos ajcxy jadu'n midooy, chi ajcxy ooy yjotmaybaty.

Je cogüejtin ma je tzajptijc

²⁴ Co Jesús yja'ty mñid je' ydiscipulos ajcxy jim ma je Capernaum cajp, chi huidi anajty ajcxy meeñ yajmujcp mñid tzajptijc ycixpi, oy ajcxy ijxcixy je Pedro, chi ajcxy y'amidooy:

—¿Nej miich mhuindzin ycuejcpy meeñ mñid tzajptijc ycixpi?

²⁵ Chi Pedro y'adzooy:

—Cuejtpy.

E huin'it hora co anajty Pedro ytiġy tigoty, chi Jesús jayijp ymġapxy, ñimay:

—Simón, ¿nej mmina'ñ? ¿Pin je rey ajcxy yajcujcxy? ¿Yi' yjāy o huingjāy?

²⁶ Chi Pedro y'adzooy:

—Ma huingjāy huídibi ane'my ijtp.

Chi Jesús y'adzooy:

—Ah, ca'tz yi' yjāy huaad ti cuejtcixy. ²⁷ Per ca' ndzocyich co je cogüejtpi nyajcapxmayiyim, nicx miich ma yi mij laguun e cohuidzi' jiihy mxu'ñ, e je acx huídibi anajty jayijp huomb, je' myajpidzimpy, e ma y'ahuac jiihy mbaadipy tūg meeñ, yajpidzim je meeñ e nicx cuet mād iich ycixpi etz mād miich ycixpi.

18

¿Pin je' jac ñgi mijip?

¹ Je huin'it hora je' ydiscípulos ajcxy ymġhuactay Jesús etz yajtiy:

—¿Pinjāy je'jac ñg ymād je mij'ajtín ma Dios y'ane'my jiihy tzajpjoty?

² Chi Jesús mijhuoy tūg je pi'c'anāg. Chi pidacy je pi'c'anāg cujc'amy ma yi' ajcxy. ³ Chi Jesús ymāñ:

—Janch tiy'ajt iich miich ajcxy ñimāy, pen ca' miich ajcxy jothuimbitcixy etz naybidaaccixy mhuinma'ñ jadu'n nej jada pi'c'anāg huinma'ñ mād, pues ca' mdigihuiipy ma Dios Teedy y'ane'my jiihy tzajpjoty. ⁴ Paady, pinjaty mād yhuinma'ñ yung nax jadu'n nej jada yaabi pi'c'anāg mād yhuinma'ñ yung nax, je' je' je huídib jac ñgi mij'ajtín ymād jiihy ma Dios y'ane'my. ⁵ Hueñpinity huídibi mād iich ycixpi cōbigipy etz tzogipy tūg pi'c'anāg, jadu'n nej jada pi'c'anāg ti ndzocyich ti ngōbicyich, hue' jadu'n nipaady nej jihuīy ti xycōbicyich ti xychocyich.

Je huídibi ooy ycojotmayity co nbocycāhuim

⁶ Hueñpinity huídibi jibic-huinma'ñ ymābidzimy, e yajpocycāy yi jadu'mbi pi'ctijc huídibi ajcxy xymġnicxpejtpich, jac'oy ixypy co yi jadu'mbi jāy ytimyñayyōcxodzīyī tūg paandzaa etz ñayñajtzjibibihuiipy mejjoty. ⁷ Ooy ayo'ñity ooy jibicity co ji naaxhuiñybi yajpaady tijaty huídibi yajtundigooby jāy ajcxy. Ni mīna xī ca' tigoy y'idipy tijaty huídī yajtundigoy je jāy ajcxy. Per mij ayo'n pada'ñ mād yi Dios pinjaty cojp tundigooyī. ⁸ Pen miich mgi' o miich mdecy xyajtundigooyb, jac'oy ixypy co mdīm'ixpuxy etz ixjibipy jiguem. Ñgi oy co mdigihuiipy ciduc tecytuc jiihy tzajpjoty etz ca'ydi co mdigihuiipy mād metz mgi' etz metz mdecy mijjānjoty huídibi ñimīna ycapich. ⁹ E pen yi mhuiin tug xya-jpocycāhuamb, tim yajpidzim etz ixcātz jiguem. Com jac'oy mdigihuiipy mād tūg mhuiin ma jugy'ajtín huinixibi, ca'ydi co mdigihuiipy mād metz mhuiin ma yi jūn huídibi camīna xī ycapich.

Je y'ixpejt, je cōbixy huídibi tigooy

¹⁰ Ca' m'ixtijcixy ñi tūg pi'c'anāg huídibi xymġijcpih. Yi' ajcxy je' y'āngeles tim ijtīb jiihy tzajpjoty ma Dios Teedy, iich nDeedy yhuinduu. ¹¹ Iich je jāy huídibi tzoon tzajpjoty, ti nmiñich ya naaxhuiñ, je' co nyajnitzōga'ñich je jāy ajcxy y'alma huídibi tigoyam. ¹² ¿Nej miich ajcxy mīna'ñ? Pen tūg jāy ymād migo'px cōbixy, etz pen yöydgooyb nidūgti cōbixy, ¿nej ca' jēbi ixmach je ñimāda'px majmocx mīdaax cōbixy etz nicxy ixtāy je jadūgpi huídibi yöydgooy? ¹³ E pen ypatpy je tūgpi huídibi

yöydiigooyb, chi ooy xondägy müid co anajty ti paady huídibi anajty ti ytiigooy, ca' jadu'n yxondägy müid je nimída'px majmocx mídaax huídibi ca' anajty ti yöytiigooygixy. ¹⁴ Tim jadu'n nipaady müid Dios Teedy jiiy tzajpjoty, ca' tzocy co ni tüg jäy y'alma tigoyipy.

Nej huaad tüg mmigüg nhuinmeecxim

¹⁵ Pen miich mmigüg xytuñ jibic, müidmíydac ahuingujc e yajhuinjihui' ma ti ytundiigooy, pen xy'ayuchuinjihuiyb ti anajty mmínaymígügpigiyi je mmigüg. ¹⁶ Pen ca' xy'ayuc-huinjihuiy, chi huoominipy tüg o metz mmigüg huídibi jébi nidiy'ajt'adipy miich m'ayuc. ¹⁷ E pen nañ ca' je' ajcxy ayuc-huinjihuihuañ, müidnícxip ma mibijcpidijc yöymujctac e jim ajcxy myajnaxipy jadu'n nej tüg huídibi ca' Dios mibicy etz jadu'n nej tüg yajcogüejtpi huídibi ooy pocymüidity. ¹⁸ Janch tiy'ajt iich miich ajcxy nimäy, tüg'óciy huídibi miich ajcxy mgapx'aducjpy ya naaxhuiñ, Dios nañ jadu'n capx'adugipy jiiy tzajpjoty, e huídibi miich ajcxy ya naaxhuiñ ca' capx'aducy, Dios nañ ca' capx'adugipy jiiy tzajpjoty. ¹⁹ E nañ jadu'n iich miich ajcxy nimäy, pen ya naaxhuiñ miich ajcxy nimetz mnaygápxigixy co tijaty mmibijctzohuaangixy ma Dios, Dios, iich nDeedy huídibi jiiy tzajpjoty, xymöhuipy huídibi ajcxy mbijctzooyb. ²⁰ Com ma miich ajcxy nimetz o nidugüig naymújigixy, jim iich n'ity cujc'amy ma miich ajcxy.

²¹ Chi Pedro y'amídooy Jesús ymíañ:

—Huindzin, ¿naag'oc huaad nhuinmeecxyich yi' ajcxy huídibi xymídundiigooybich? ¿Nej nméecxibich ixti cooni huixtujc'oci?

²² Chi Jesús y'adzooy:

—Ca' yhuixtujc'ócicy, hue' meecxipy mídaax migo'px jamída'px majmocx mídaax'oc.

Je tumbi y'ijxpejt huídibi ca'p ymigüg huinmeecxy

²³ Dios y'ane'mín jiiy tzajpjoty jadu'n nipaady nej tüg rey huídibi huijtz'oyiyb müid je ytumbidijc jajadu'ñi ajcxy yjacmínucxy'adyii. ²⁴ Je rey ytimyhuijtz'oyiyxondacyñi anajty cuentas, co oy yjädý tüg ytumbi huídibi anajty minuucxy'ajtíp canaag millón. ²⁵ Com je' ytumbi ca' anajty müidity ti müid migüediib je' yhuindzin. Huin'it je huindzin ane'my co huen je' ytumbi yajtoocnax quipxyi müid y'ungdöxyijc etz tüg'ócicy tijaty ymüid, jaydéb ñuucxy y'adujctáhuipy. ²⁶ Huin'it ytumbi ycoxtinay'ihuiy ma yhuindzin yhuinduu etz nimay: “Huindzin, pa'ayoogich, etz iich miich nmigüejtáhuipy.” ²⁷ Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸ E mic'amy co je' ypidzimy pujxtigoty, chi ymínaybati tüg ymigüg huídibi anajty müid quipxyi ti ytuñ. Je' anajty minuucx'ajtíp tim hueeni, chi je' yöcmímadziy je' ymigüg huídibi müid ytuñ, chi nimay: “Cuet huídibi mnuucx'ajtípy ma iich.” ²⁹ Huin'it ymigüg ycojxtinay'ihuiy ma je' yhuinduu. Chi minuucxtaacy nimay: “Pa'ayoogich. Iich miich nmigüejtáhuipy.” ³⁰ Chi je jadügpí ca' mecxtujcín yajtuñ. Chi oy ymigüg pidägy pujxtigoty, ixti cooni anajty micuedyíi. ³¹ Co je jacjadyíi ymídumbidijc oy ixý jadu'n nej ti yajtuñ je' ymigüg, chi ooy ajcxy jihuiy. Chi ajcxy nícx ma je' yhuindzin etz yajnimayday tüg'ócicy nejaty anajty ti ijxcixy. ³² Huin'it je' ajcxy yhuindzin oy yajhuoyíi je huídibi minuucx'ajtíp canaag millón. Chi nimay: “Miich ooy mdzachjibicjäyity. Ti iich miich nhuinmeecxi tüg'ócicy je mnuucxy, müid co miich pa'ayoohuín mbijctzooy ma iich. ³³ E miich

nañ jadu'n ixypy ti mba'ayoy je migüg huidibi müd mmiduñ, huidibi xyminuucxy'ajtp, jadu'n nej ich müch ti nba'ayooy.”³⁴ Chi je huindzin ooy chachjotma'ty, chi pidacy ane'min co huen yajtzaachytuñ je' ytumbi mabaad cuejtây tüg'óciy huidibi ñuucxy'ajtpy.³⁵ Chi Jesús ycapxycíjxni, minañ:

—Tim jadu'n nej jada rey ti tuñ müd je ytumbi, nañ tim jadu'n Dios tunipy müd müch ajcxy, pen ca' nidüg nidügti müch ajcxy ca' mhuinmecxy je mmigügtijc amumdüjot.

19

Jesús yaj'ixpicy müd co jäy ytöxyijc ixmach

¹ E co Jesús capxtay jada ayuc, chi choñ Galilea, chi oy yjädy ma Judea it jim Jordán mij niñ nñaxy. ² Chi ooy mayjäy ypanicxi, e jim yajtzoocy huidijaty anajty yuu müd pa'm müd.

³ Huin'it nijëjity je fariseos ajcxy nimiiñ Jesús co yajmachcähuaangixy anajty. Chi ajcxy y'amidooy:

—¿Nej janch co Dios ti xymooyim cötujcin co jëbi tüg yëydijc ixmadzip ytöxyijc müd tim hueeni ti capxy ti ayuc?

⁴ Chi Jesús y'adzooy:

—¿Nej ca'ni müch ajcxy m'ixy mgapxy ma ymiiñ jaybety ma Dios ñecy co je naaxhuiñybi chondacy, co Dios oga'ñ yajcojy tüg'óciy tijaty huidibi ji'ajtp co “Dios yajcojy tüg yëydijc etz tüg töxyjäy”?⁵ Nañ jadu'n Dios yminañ: “Je yëydijc y'ixmadzip ytaj yteedy etz pudigihuijy je' ytöxyijc. E je yëydijc etz ytöxyijc tú'ciy idaangixy.”⁶ Paady ca' ñimetzity ajcxy, com je yëydijc etz ytöxyijc tügmucy y'idaangixy. Com Dios ti huijtmucy je yëydijc müd je töxyjäy, paady ca' huaadity co jäy ajcxy huijtzhuäcxyp tibi Dios huijtmucy.

⁷ Huin'it je fariseos ajcxy y'amidooy Jesús:

—¿Na'amy co Moisés cötujcin ti yejcy jecy'ajty co tüg yëydijc jëbi huaad ixmach ytöxyijc, e möhuyy ñinecy ñidiy'ajt e jadu'n jëbi ixmach?

⁸ Chi Jesús yminañ:

—Moisés jada cötujcin ti xymooygixy co jëbi m'ixmajtzcixy mdöxyijc müd co müch ajcxy mdzachcöjuuñity, ca' mgapxymidohuaangixy Dios. Per co je naaxhuiñybi chondacy ca' anajty jadu'nity.⁹ Janch tiy'ajt jadu'n nej ich müch ajcxy nimaaygixy co je yëydijc huidibi yajjayhuäcxp müd je ytöxyjäy, e je ytöxyjäy ca' anajty ti ytundigooyb müd huingbi yëydijc, hue' je' yëydijc ytundigooy co ixmach ytöxyijc etz ypijctigach müd huingbi. Nañ tim jadu'n pen tüg yëydijc ypicy müd tüg töxyjäy huidibi ñäy ti y'ixmachyii, hue' tundigooyb anajty je yëydijc.

¹⁰ Co Jesús ydiscípulos ajcxy midooy jada ayuc, chi ajcxy yminañ:

—Pen jadu'n jëdu'n je tiy'ajt co je yëydijc ca' huaad ixmadzip ytoxyjäy, jac'oy co ca' nbijcim.

¹¹ Chi Jesús yminañ:

—Ca' tüg'óciy je jäy huinjihuüy jadayaabi tiy'ajt. Jëyi ajcxy huinjihuüy pin ajcxy Dios pidaaci co huinjihuüy. ¹² Ji canaagnax je ayuc je huinma'ñ nej ca' yjëbity ypigipy je yëydijc. Naagity pi'ctijc yma'xung'aty e ca' yca'pxity ñinicxy, paady ca' picy ajcxy. E nijëjity je yëydijc ca' huaad ypicy, müd jëgixpi co anajty je' ti ymijaapigyii. E nijëjity yëydijc hui'my jaybicy müd jëgixp co ajcxy ytuñ ma Dios ytung, je Dios huidibi ane'myb tzajpjoty. Pinjaty cöbigamy ich n'ayuc huen cöbicy.

Jesús conucxy maybi'ctijc

13 Chi naagity je jāy m̄idnicxy y'ung y'anäg ma Jesús jaydēb yajc̄in̄ixajipy etz Dios m̄ib̄ijctzoy m̄id y'i' ajcxy ycixpi. Chi Jesús ydiscipulos ajcxy ogy je jāy ajcxy huídibi anajty m̄id miimb je y'ung y'anäg, n̄imaaygixy co ca' jadu'n y'oyity. 14 Per Jesús yminañ:

—Huen m̄id miñ ajcxy pi'c'anäg ma ñich, ca' m̄ijjpcogapxiygixy. Com pinjaty ym̄ibijcp ñich ngapxy n'ayuc, jadu'n nej jadyaabi pi'c'anäg ajcxy ym̄ibicy, je' ajcxy tiḡhuam ma Dios y'ane'my jiiby tzajpjoty.

15 Chi Jesús c̄in̄ixajy je pi'c'anäg ajcxy. Chi ñicxni.

Tüg yeeg'anägnip comeeñybi m̄idm̄iydägy Jesús

16 Chi tüg yēydjc oy ixy Jesús. Chi y'amidooy:

—Huindzin, ¿ti jada' co oy ñich ndunipyich jaydēb nbaadibich jugy'ajtin huídibi ca' ycixipy ytigoyipy?

17 Chi Jesús y'adzooy:

—¿Na'amy co xyñim̄ayich co oy huindzin ñich? Dios tūgpajc oyip, ca' jac pin. Pen miich mdzoycpy co mbada'ñ jugy'ajtin huídibi ca' ycixipy ytigoyipy nim̄ina mguydunipy je Dios ycōtujc̄in huídibi Moisés ycojaay jecy'ajty.

18 Chi je yeeg'anäg yajt̄ihuimbijty:

—¿Huídibi cōtujc̄in miich mdiip?

Chi Jesús yminañ:

—Ca' migüg myaj'ögipy. Ca' migüg ytōxyjic migapxtigooyipy. Ca' mmeedzip. Ca' mmigüg mhuin'ñinip. 19 Yajmij'at mdaj mdeedy. Md-zogipy mj̄ihūhuip miich mmigügtijc, tim̄ jadu'n nej miich c̄i'm̄ mnaych-ogyi.

20 Chi je yeeg'anäg Jesús n̄imaayi:

—T̄i nguydund̄ayich jadyaabi cōtujc̄in ajcxy maabi ñich nbi'c'atyich. ¿Ti jada njacyajtigoy'ijtpyich?

21 Chi Jesús jadüg'oc y'adzooy:

—Pen miich m'idam tudägy, nicx toctigoyda' huídijaty miich m̄id, etz mo' je meen' je jāy ajcxy huídijaty ayoob. Co jadu'n mdunipy, chi mbaadipy oy'ajtin jiiby tzajpjoty. Co jadu'n mdoctāhuipy tijaty miich m̄id, chi miinip jadüg'oc ma ñich nyajpaadyich, e pajamgich.

22 Co je yeeg'anäg jadu'n m̄idooy, chi ñicxni taj may com ooy anajty chachcomeeñity.

23 Huin'it Jesús n̄imay je' ydiscipulos ajcxy:

—Janch t̄iy'ajt jadu'n nej n̄imaaygixy co ooy ym̄ijhuinma'ñity co tüg comeeñyjāy ytiḡihuipy ma Dios y'ane'my jiiby tzajpjoty. 24 Jadüg'oc nm̄ina'ñich co ooy chipity co tüg comeeñyjāy tiḡihuipy ma Dios y'ane'my, n̄igi ca' chipity co tüg camello ñaxipy ma tüg xu'ñ'ijx yxutity.

25 Co Jesús ydiscipulos ajcxy jadu'n m̄idooy, chi ajcxy ooy jihuy huinmay. Chi ajcxy ñay'amidoohui miñ xyipy:

—¿Pin jēbi paady je' y'alma n̄idzooc̄in?

26 Chi Jesús ajcxy huind̄icxpejty etz n̄imay:

—Je huídibi jāy ajcxy chipjihuyb, m̄id Dios ca' ni ti chipity.

27 Huin'it Pedro ymina'ñ:

—Huindzin, ñich ajcxy t̄i n'ixmajtzt̄ayich tüg'óciy huídijaty anajty ñich ajcxy nm̄id etz nbanicx ñich ajcxy miich. ¿E ti jada' ñich ajcxy nbaadaamybich?

28 Chi Jesús y'adzooy:

—Janch tiy'ajt nmina'ñich co anajty je xii je tiempo paady mina Dios yajtigajztähuiipy je tzajp etz naaxhuiñybi, co anajty ñich, je jāy huidibi tzoon tzajpjoty, n'ityich ma ngötujctacich oybi jiiiby tzajpjoty, chi miich ajcxy huidi ti xypahuidityich, miich ajcxy mbadamy majmetz cötujctac, e miich ajcxy mdiydunipy je majmetz picypí Israeljäy ajcxy. 29 E tüg'óciy jāy ajcxy huidibi ti ixmajztäy yjñn ytijc, y'uch ymígüg, y'ung ytöxyijc, y'ung y'anäg, ytaj yteedy, o ycam ytu' müid ñich ycixpi, yi' ajcxy ypadamyb migo'px'oc, ca'ydi huidibi ti ixmach. E ypadamy je jugy'ajtin huidibi ca' ycixipy ytigoyipy ni mina. 30 Mayjäy ajcxy huidibi cham ymüid mij'ajtin cötujcin, tzajpjoty ca' ajcxy müid'ada'ñ mij'ajtin cötujcin. E mayjäy huidibi cham ca' müidity ajcxy mij'ajtin cötujcin, tzajpjoty ymüid'adamy ajcxy mij'ajtin cötujcin.

20

Je naymiduniptijc y'ijxpejt

1 Jadu'n Jesús yminañ:

—Je Dios y'ane'min jiiiby tzajpjoty jadu'n nipaady nej tüg cogambi huidibi ooy mij cam müidity. Chi je cogam jopyñi choñ ma oy nicxy ixtäy tumbidijc ajcxy huidibi yajpidigipy yi uva cosecha. 2 Chi ycapxytuñ müid nidüg nidüg ytumbi co mujuya'ñ tüg denario meeñ tüg xübi. Chi quejxy nidüg nidüg ytumbi ma je uva cam. 3 Chi petyxii je cogam ñicxy jadüg'oc tumbi ixtaayb. Chi paty cajp cujc nijëjity tumbi huidibi ca' ti tung müidity. 4 Chi je cogam je tumbi ajcxy nimay: “Ñicx miich ajcxy tuñ ma ñich ngosecha. Cham nmujuyipy jadu'n nej ytiy'ajity.” Chi ñicxy ajcxy midumbi. 5 Chi je cogam ñicxy jadüg'oc cujcxii tumbi ijxtaayb. Nañ jadu'n nicxy jadüg'oc minacyxii. 6 Nañ tim jadu'n tzuu jadüg'oc je cogam ñicxy tumbi ijxtaayb, chi paty nijëjity cajpcujc huidibi ca' ti tung müidity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicyx mdungixy?” 7 Chi je' ajcxy y'adzooy: “Je' co ca' ñich ajcxy pin ti xycapxytuñ.” Chi je cogam ajcxy nimay: “Ñicx miich ajcxy tun ma ñich nnaaxjot. Cham iya nmujuyipy jadu'n nej ypaadyii.” 8 Co oy ycodzuyñi, chi je huindzin nimay je huidibi nigop'ajtp je tung: “Ñicx mijhuoodäy je tumbidijc etz mujuyipy. Mujuy jayijp huidibi ti ymiñ axam tumbi etz jim nicxy myajcogixiy ma huidibi anajty ti miiñ jayijp tumbi.” 9 Chi ajcxy jayijp yajmujuy je tumbi ajcxy huidibi anajty ti ytigiiy tumbi axam. Chi yajmujuy ajcxy jadu'n nej anajty jāy ñaymujuyii je tüg xübi. 10 Co miiñ je tumbi ajcxy je huidibi ajcxy jayijp tigiiy tumb. Chi ajcxy jot'ajti co jac'anaxy yajmujuya'ñ. Per quipxyjaty ajcxy paty tüg meeñ nidüg'óciy je tumbidijc. 11 E co ajcxy quipxyjaty yajmujuy, chi ajcxy ytigiiy jotma'tpi. 12 Chi ajcxy nimay je cam huindzin: “¿Na'amy co quipxyjaty ñich ajcxy ti xymujuyich müid je huidibi ti miiñ axam tumbi? Yi' ajcxy tüg jaxigy ti ytuñ, e ñich ajcxy tüg xii je anbi ti ngöbicyich.” 13 Chi je cam huindzin y'adzooy, nimay nidügti je' ajcxy: “Miich, ñich nmígüg, ca' ñich jibic ti nduñich müid miich. ¿Nej ca' ñich ajt ngapxytuunim co jadu'n nmujuya'ñ tüg denario meeñi? 14 Con yi nmeeñ, e nicxni. Jadu'n ndzocyich co quipxyjaty nmujuya'ñich miich müid huidibi ti ymiñ axam ma je tung. 15 ¿Nej ca' huaad ñich nduñich müid ñich nmeñ nej ndzócyichi? ¿O co xyajca'oy'ixyich, co ñich ooy n'oyjäyity?” 16 E huidibi ajcxy jaccogixiiyb, yi' ajcxy jayijp'adam. E huidibi ajcxy jayijp'ajtp cham,

yí' ajcxy yjaccogixihuamb. May ooy yjayajhuoomiñ e hueeni huidi huin'ixipy.

Jesús capxypidzimy jadüg'oc co y'öga'ñ

17 E co Jesús anajty ñicxy ma Jerusalén tü'aa, chi müid nicxy ahuingujc je nimajmetzpi ydiscípulos. Chi ajcxy nimay:

18 —Jadu'n nej müich ajcxy m'ijxy mnejhuüy cham ñich ajt nba'ttigüym jim Jerusalén. Jim Jerusalén ñich, je jäy huidibi tsoon tzajpjoty, xyajcüyegaamich je teedy mijtungmüdpí etz escribas ajcxy. Nyajtiyduna'ñich etz pidäga'ñ ajcxy ane'min co n'ögibich. 19 E yí' ajcxy xycüyega'ñich ma je huidibi ca' yjudiojäyity, jigix xyñixigibich xyajxigibich, xycoxipich, etz xyajcruutzpedipich ajcxy. E co n'ögibich, chi njugypigipyich codugüig xii.

Huidibi Jacobo etz Juan ytaj ypijctzou

20 Chi je Zebedeo ytöxyjic nimiiñ Jesús müid metz je ymang; Jacobo etz Juan. Huin'it je ungdaj huingoxtinay'ihuüy Jesús, pijctzoy may'ajt. 21 Chi yajtiy Jesús:

—¿Ti mdzojcpy?

Chi je ungdaj y'adzooy:

—Tun may'ajt möhuipy ñich metzpi yí nmang yí jacmijtung ma müich m'ane'min, jaydéb iñahuipy ma müich mmijc, tüg a'oy'amy etz jadüg anajty'amy.

22 Chi Jesús y'adzooy:

—Müich ajcxy ca' mhujnjihuüy ti ajcxy mbijctzooyb. ¿Nej mmínaxa'ñ myajnaxa'ñ müich ajcxy je tzaachypí huidibi ñich nmínaxamy nyajnaxamyich? Jadu'n nej jihüüy m'üga'ñ ajcxy je ta'm nü huidibi ñich n'ügamy e mbaada'ñ je nübejtin huidibi ñich nbadamyb.

Chi je' ajcxy y'adzooy:

—Jébi.

23 Chi Jesús ymína'ñ:

—Janch tiy'ajt nej müich ajcxy mína'ñ co mminájxcixipy myajnájxcixipy je tzaachypí huidibi nnaxa'ñich. Per ca' ñich cötujcin nmüdidyich co ñich müich ajcxy nbidägipy mijtungmüid, co myajpaadip tüg ma ñich nmijc a'oy'amy e jadüg anajty'amy. Hue' janchtiy Dios Teedy ymüid ni'ixi' pinjaty ti huin'ixy jaydéb yajnicxip je mijtung ma ñich n'ane'mdac.

24 Co je nimajcpi ydiscípulos ajcxy nejhuüy jadu'n nej Jacobo etz Juan pijctzooy may'ajt ma Jesús, chi ajcxy ooy mijotma'ty Jacobo etz Juan.

25 Huin'it Jesús mijcapxy je' ydiscípulos ajcxy, chi nimay jadu'n:

—Müich ajcxy mnejhuüy co yí jäy ajcxy huidibi mijtungmüdpí ma je maybi naax cajp, mic ajcxy ane'my je naax cajp. Nañ jadu'n yí' ajcxy huidibi mic'ajt müid ma je maybi naax cajp, mic ajcxy ane'my je jäy ajcxy.

26 Per müich ajcxy ca' mjadu'nity nej je mijtungmüdpí ma je maybi naax cajp. Pinjaty müich ajcxy je mij tung yajnicxip, copicy ñaybidägüyb nej tüg tumbi. 27 Pen ji müich ajcxy nidüg nigohuajc'ada'ñ, copicy ñaybidägüyb nej tüg tumbi. 28 Com ñich nañ jadu'n, je jäy huidibi tsoon tzajpjoty, ti nmüiñich ya naaxhuiñ jaydébí nbubedipyich yí mayjäy ajcxy. E canan yí' ajcxy xypubedipich. Ngüyegaamyich njugy'ajtín ma yí o'cin müid je mayjäy ycixpi, jaydébí ngohua'ñich jäy ajcxy y'alma huidibi tigoyam.

Jesús yajtzoocy metz jay huintzpi

²⁹ E co Jesús etz ydiscípulos ajcxy ycajppidzimy jim Jericó, chi ypanicxi ajcxy mayjäy. ³⁰ E jim anajty iñaay nimetz huintzpi tüba'áy. E co ajcxy nejhuüy co jim anajty ñaxy Jesús, chi ajcxy yaaxpi jojcpi:

—Huindzin, David y'ap y'oc, tun may'ajt iich pa'ayoog.

³¹ Chi je mayjäy ajcxy ojcooty je metzpi jäy huintzpi, nimay ajcxy co huen amofñ. Per je huintzpi nigí minan'idich:

—Huindzin, David y'ap y'oc, tun may'ajt iich pa'ayoog.

³² Huin'it Jesús ytinayxijp, e yminañ:

—Ocmin miich ajcxy ya.

Huin'it yajtüy:

—¿Ti mdzojcpy ndunipyich mïd miich?

³³ Chi ajcxy ñimaayi:

—Huindzin, ndzojcpyich co xyajhuindicxigibich.

³⁴ Huin'it Jesús pa'ayoogoty ajcxy. Chi ajcxy nidoni ma je' yhuin, e mic'amy je huintzpi ajcxy y'ixigü. Chi Jesús ajcxy panicxy.

21

Jesús ytigüy jim Jerusalén

¹ E co anajty Jesús etz je mayjäy ajcxy ti mihuingoni Jerusalén, chi yja'ty ma Betfagé cajp mihuingon je Olivos cögop. E jim Jesús quejxy nimetz ydiscípulos ajcxy. ² Chi ajcxy nimay:

—Nixcix ma je cajp huidibi jim'amy. E jim tüg burro ycoxochity mïd y'ung. Coguejttüdiip ajcxy je burro e yajmiingix ya ma iich. ³ E pen jim pin nej xyñimäy, nima' co je Huindzin yajtunam, e yajhuimbida'ñ mic'amy.

⁴ Jadayaabi oy jadu'n ytuñyii yjadyii ycixy yca'pxy jadu'n nej je profeta jecyip jaay, co jadu'n yminañ:

⁵ Yajnima' je jäy ajcxy huidibi tzinaayb jim Sión (Jerusalén), oc'ixcix, chi miiñ ajcxy je mrey, yung nax yjot yhuinma'ñ mïdity je mrey, etz burrocixy miiñ. Ma tüg burro mang huidibi ytaj tzim yajyöpp.

⁶ Chi je metz ydiscípulos ajcxy cuyduñ nej anajty Jesús ti y'ane'myii. ⁷ Yajja'ty ajcxy je burro mïd ymang. Chi Jesús ydiscípulos ajcxy jibe'ñ je metzpi burro mïd ajcxy yjocxhuit, chi Jesús yaj'iñay je burro mang. ⁸ E je mayjäy ooy yajhuinyëbiy ajcxy je tü'aa mïd yhuit, chi ajcxy oy ypuxy quipy y'aacx. Chi ajcxy pidacy ma je tü'aa. ⁹ E jim ñajxy je burro, e je mayjäy huidibi nixp jayijp, e nañ jadu'n huidibi anajty mimb axam, ooy ajcxy ytigüy huambi jihuüyb, chach minaangixy:

—¡Hosana! ¡Gloria a Dios! ¡Ooy ycömayty Dios! Huen capxpaady idipy jada yëdyjc huidibi mimb ma yi nHuindzin Dios yxii etz mïd ymic'ajt. ¡Gloria a Dios!

¹⁰ Co Jesús ytigüy jim Jerusalén, chi tüg'óciy je mayjäy huinmay'ahuidijty, chi ñay'amidóohuigixy miñ xyipy:

—¿Pin yi' yijiibi jäy?

¹¹ Chi mayjäy y'adzooy:

—Yi' je' je profeta Jesús huidibi tsoon ma Nazaret cajp ma Galilea it.

¹² Huin'it Jesús ytigüy ma Dios ytijc. Chi ixquejxtay tüg'óciy je ajuybi adoocpi huidibi anajty yajpatp jiiy. Chi tijhuimbijttay tüg'óciy je mesa ma anajty jäy jim ymeeñyhuingogongixy, etz nañ jadu'n tijhuimbijttay je muuxytoocpi iñaybejt. ¹³ Chi jadu'n nimay ajcxy:

—Jaaybety jadu'n ymiiñ ma Dios ñecy: “Ñich ndijc je' yí' ma jāy ajcxy Dios mibijctzoy”, per miich ajcxy hue' yí' mhua'ñ meetzpi tijc.

¹⁴ E co anajty jii by tzajtigtoty Jesús, chi jii by ñimiini huidijaty anajty huintz, huidijaty anajty cima'ty tecyma'ty, chi Jesús yajtzooctay. ¹⁵ Per je teedy ajcxy huidibi mijtungmüid etz je escribas ajcxy ooy mijotma'ty Jesús co ajcxy ijxy nejhuüiy jadu'n nej Jesús anajty tuñ mijhuinma'ñ. Etz nañ jadu'n ajcxy ijxy co je pi'c'anäg anajty ajcxy yhuaangixy yjihuygixy jii by tzajtigtoty, ymınaangixy: “¡Huen cōmay'idipy je rey David y'ap y'oc!”

¹⁶ Chi je teedy etz escribas ajcxy Jesús ñimay:

—¿Nej ca' miich mmidooy nej je pi'c'anäg chach mınaangixy?

Chi Jesús y'adzooy:

—Nmidooybich. ¿Nej ca' miich ajcxy mgapxyñi Dios ñecy ma ymiiñ jaaybety co jadu'n ymına'ñiyi?:

Ti myaj'ixpicy iiy ma je pi'ctijc ma'xungdijc jaydēbi ajcxy iibaadip capxpaadip Dios.

¹⁷ Chi Jesús ycapxycijxy müid je teedy etz escribas ajcxy etz chooñ jii by tzajtigtoty. Chi ñicxy ma Betania cajp, e jim yajnajxy je tzumbi.

Jesús capxpojcy je higueri ca'p anajty yt'im'aty

¹⁸ E co yxii miy yt'icxigy, chi Jesús yhuimbijty Jerusalén. E ma anajty tim ytüyöy, jim yuuböccooti. ¹⁹ E jim ijxy ma tüba' tüg cop je higueri quipy. Chi ninicxy. Chi pä't'ijxy, per ca' anajty ni tüg yt'im, jeda'ajty je' y'aay. Chi Jesús ñimay je higueri quipy:

—¡Ni ca mınaa xii md'im'adipy!

E mic micíyí je higueri quipy yt'ich. ²⁰ E co je' ydiscípulos ajcxy jadu'n ijxy, chi ajcxy ooy huinmay. Chi ajcxy y'amidooy Jesús:

—¿Na'amy co yí higueri quipy mic'amy ti yt'ich?

²¹ Chi Jesús y'adzooy:

—Janch tiy'ajt jadu'n nej nnimaaygixy. Pen miich ajcxy müid je mibijcin, etz ca' ajcxy mmibicy aametz jotmetz, jēbi mijhuinma'n mdungixy nej iich ti nduñich. E nañ jadu'n jēbi jac mijpi mijhuinma'ñ mdunipy ajcxy. Jēbi ajcxy tun cop mnimäy: “Quēg ya, tigi' mejyoty” e xycapxymidoohuipy ajcxy je tun je cop. ²² E tūg'óciy tijaty miich ajcxy mbijctzooyb huen yt'imytijyity, pen mmibijcp ajcxy, mbaadip ajcxy.

Jesús ycötujcin

²³ Co Jesús yja'ty Jerusalén, chi ytigüy jadüg'oc ma Dios ytijc. E jii by anajty yaj'ixpicy je mayjäy, chi ñimiini je teedy mijtungmüidpi etz judío mijjädijc ajcxy. Chi ajcxy y'amidoohui:

—¿Ma cötujcin ti mbaady co jadu'n mduñ tzajtigtoty? ¿Pín jada cötujcin ti xymöy?

²⁴ Chi Jesús y'adzooy:

—Nañ jadu'n iich miich ajcxy nyaj'amidoohuamy tūg ayuc. Pen m'adzooyb ajcxy jada ayuc, huin'it iich miich ajcxy nyajnimähuipy ti cötujcin iich müid nduñ huidijaty. ²⁵ ¿Pín quejxy je Juan, je Bautista, yajñibejtpi, Dios o jāy ajcxy?

Chi ajcxy ñayñimáayigixy miñ xyipy:

—Co ixipy ajt n'adzoohuim co Dios Juan quejx, huin'it xy'adzoohuim: “¿Na'amy co miich ajcxy ca' mmibijcy Juan?” ²⁶ Per nañ jadu'n ca' huaad nminaanim co jāy ajcxy yajñibijcy Juan, com nejhuüiyim co yí mayjäy mibijccixy co je' anajty Dios tūg y'ayucnajtzcapxiybi.

²⁷ E paady ajcxy jadu'n adzooy Jesús:

—Ca' ñich ajcxy nejhuñyixy.

Huin'it Jesús ymíñañ:

—Nañ jadu'n ñich ca' nigapxañich pin je' ycötujcin mñid nduñich huídijaty.

Je metzpi ung iixpejt

²⁸ Chi Jesús ymíñañ:

—¿Nej m'oc'ixy m'ocjaygugi' jadayaabi iixpejt? Tüg je yëydijc ymñid anajty metz je' ymang. Chi ñimay je mijpi: “Ñicx cham m'octuñ ma ñich n'uva cam.” ²⁹ Huin'it je' ymang y'adzoohui: “¡Ca' nñicxañich!” Chi jaccohueñyi je' ymang yhuinmaydigajch, chi ñicxy tumbi. ³⁰ Chi je ungedeedy oy ixty je ymang mutzpi. Chi nañ jadu'n nimaay co huen ñicxy tuñ. Chi je' ymang mutzpi y'adzooy: “Oy, cham ñicxibich.” Per ca' ñicxy. ³¹ ¿Huídij je' nidügti ycuýduuñ nej anajty yteedy tzocy?

Chi ajcxy ymíñañ:

—Je' ymang mijpi huídibi jayijp ñimay.

Huin'it Jesús ñimay ajcxy:

—Janch tiy'ajt jadu'n nej nimaaygixy co je huídibi ajcxy yajcogüejtpi etz je töxyjäy ajcxy huídibi tundigooyb mñid yëydijc, je' ajcxy tigíhuamb jayijp ma Dios y'ane'my jiihy tzajpjoty, ca'ydi miich ajcxy. ³² Paady ycixpi oy ymiññ je Juan huídibi jäy ajcxy yajñibejt, Juan yajñi'ixiygixy je mayjäy nej ajcxy jëbi yjothuimbidiy ma Dios. E miich ajcxy ca' mibijcy jadu'n nej Juan ymíñañ. Per je' ajcxy huídibi yajcogüejtp etz je töxyjäydijc huídibi tundigooyb mñid yëydijctijc, ymibijc je' ajcxy Juan. Oy miich ajcxy mja'ijxy, per ca' mjothuimbidaangixy etz ca' mibigaangixy.

Je naymiduuniptijc jibicjäybi ajcxy y'ijxpejt

³³ Chi Jesús ymíñañ:

—Oc'amídooy'ijctix jadayaabi iixpejt. Ji anajty tüg je huídibi ni-huindzin'ajtp mijpi je tundac. Chi je cogam uvas cojy ma je ytundac etz jügajy. Chi yaj'oyñy ma anajty jëbi je uvas ñññ yajñigídägaani. Nañ jadu'n cojy tüg tzaaboch cixpi, jigix jëbi cuend'aty ycam. Co yaj'oyyday, chi je cogam yejcy pijctzoy je ycam ma je jäy ajcxy huídibi naymidunaanip. Chi oy chooni je cogam ñicxy viaje tumbi. ³⁴ Je huin'it tiempo co yhuaad'ajtni je cosecha, chi je cogam quejxy nijëjity ytumbi jim ma huídibi anajty ti yajpijctzoy je ñaax co huen möyii je huídibi yi' paadaanip. ³⁵ Per je jäy huídibi anajty ti naax pijctzoy, chi ajcxy majch je tumbi. Chi ajcxy ooy huinhuojpy jijphuojpy tüg. Chi ajcxy huingäch jijpcäch jadüg. Chi ajcxy je midugüigpi yaj'o'cy. ³⁶ Chi je conaax cogam huingbi ytumbidijc quejxy. E nañ jadu'n ajcxy oy tungixy jadu'n nej anajty ti tungixy je jayijp'atypi. ³⁷ Chi yci'm'ung oy quejx cogixiyñi. Hue' jot'ajti co yajmij'adiyib je' y'ung. ³⁸ Per co ajcxy je tumbidijc iixpaty je cogam je' y'ung, chi ajcxy ñaygapxi: “Tzoc ajt yaj'o'cim je cogam ymang, com yi' je' mihui'mamb je' yteedy je yjugy'ajtin je ypidägy. E co ajt nyaj'o'cim, chi ñich ajt nmihui'mim je cam.” ³⁹ Chi ajcxy majch je cogam ymang. Chi ajcxy huijtzpídzimy ma je tundac. Chi oy yaj'öccixy.

⁴⁰ Huin'it Jesús ymíñañ:

—Co anajty ti miññ je conaax je cogam, ¿ti jada' y'octunipy mñid je tumbidijc ajcxy?

⁴¹ Chi je teedytjic etz mijjäydijc y'adzooy:

—Je cogam yaj'ögipy yjiibi jibicjäydjc, ca' ajcxy pa'ayoohuipy, etz yegipy je uvas cam pijctzoy ma je huingbi jäy huidibi yegipy je pidägy huidibi cogam paatip.

⁴² Chi Jesús yminañ:

—¿Nej ca'ni miich ajcxy mgapxy ma miñ jaaybety ma Dios ñecyi? Jadu'n yminañ:

Je yëydjc huidibi je jäy ajcxy ca' anajty tzocy, Dios ti pidägy mij'ane'mbi.

Tim jadu'n nipaady nej tüg tzaa oybi huidibi je pojtzpidjc ca' ajcxy yajtuna'ñ, e je' je' oy ti yhui'mni ma anajty yjaccopicyity. Je Huindzin Dios jada tung ti tuñ, e ooy oy n'ixim yi' ytung.

⁴³ E paady jadu'n nich miich ajcxy nimäy co miich ajcxy myajpiga'ñ yi m'it mlugar jiby tzajpjoty ma Dios y'ane'my etz yajmöhua'ñ je huingbi jäy je huidibi amuumdügot naygiyecip ma Dios. ⁴⁴ Pinjaty ca' cöbiga'ñ jada mij'ane'mbi, ayo'n ypadaamb, ytimnipatp nej jihuüy jim yciyxiday ma je tzaa nicx, tijhuüdiz yjajtahuipy. O pen je mij'ane'mbi midziptzoñ je jäy, chi ytigoydahuipy ajcxy, tim jadu'n nej jihuüy je tzaa ñigidaagoodyii ajcxy, e janch jaam pux nicxy yjaty.

⁴⁵ Co ajcxy midooy, chi je teedytjc etz je fariseostjc huinjihuüy co yi' ajcxy yajnegapxyp, ⁴⁶ chi Jesús ajcxy jamadzaañ. Per tzigiiyb anajty ajcxy miid je mayjäy, je' co je mayjäy anajty mibijccixy co Jesús najtzcapxiiyb Dios ytiy'ajt.

22

Je ijxpejt ma jäy anajty pijcpidjc nixiduñ

¹ Chi Jesús jadüg'oc ytigiiy capxp miid ijxpejt, yminañ jadu'n:

² —Je Dios y'ane'min jadu'n nipaady nej je rey ymang ocnixiduñ co ti ypcy. ³ Chi je rey quejxhuäcxtay je ytumbi co huen nicxy huoomujc-taaygixy je huidijaty anajty ti yaj'nimaaygixy co miingixipy ma ytuna'ñyii yjada'ñyii je pijcin. Per ca' je' ajcxy ymiina'ñ ma je pijcin nixiduñ. ⁴ Chi quejxnip huingbi ytumbi, nimay ajcxy: “Nimaaygix je tiibi oy jayijp'aty mnimaaygix jadu'n co huen mmiingixy ma yam je caayin uucin ni'ixi' y'ity. Ti je huaj nicxpi nyaj'ögyich. E ni'ixi' ijttaayñi, huen miñ ajcxy ma je pijcin ytuna'ñyii yjada'ñyii.” ⁵ E je' ajcxy tiibi anajty yaj'nimaaygixy, ca' ajcxy je' ytimy tuñ cuendi. Nijëjity ajcxy ñicxy ma ytundac. Nijëjity ajcxy ñicxy toocp yejcp; ⁶ e nijëjity ajcxy majch je rey yquejxyöybi ajcxy, chi ajcxy oy chaachytuñ, chi yaj'o'cy. ⁷ Chi je rey ooy chachjotma'ty. Chi je soldados ajcxy quejxy co huen nicxy yaj'öctäyii je jayyaj'öcp ajcxy etz ytoydhuijp je ycajp. ⁸ Chi je rey nimay je ytumbi ajcxy: “Ni'ixi' ijtäy ma jadyaabi je pijcin yajnixiduna'ñ. Per je huidibi ajcxy ti yajnimäy ca' ajcxy mihuaadity co ymiingixipy. ⁹ Nicx miich ajcxy majaty jäy yjin ytiyc. Nimaaygixy tüg'öciy pinjaty ajcxy mbaty, co huen miingixy ma je pijcpi.” ¹⁰ Chi ñicxy je rey ytumbi ajcxy. Chi ajcxy midmiinday je mayjäy, je oyjäybi etz je jibicjäybi. Chi y'ujztay je rey ytiyc miid je mayjäy. ¹¹ Huin'it je rey ytigiiy mayjäyjoty, ixa'ñ anajty huidijaty ti yajhuomiñ. E jiby tüg yëydjc ti ijxpaty huidibi ca' anajty ti ñayxoxyii, jadu'n nej jäy nayxóxigixy co ajcxy nicxy ma tüg pijcin. ¹² Huin'it je rey minañ: “Migüg, ¿nej ya ti mdigiiy tigoty, e ca' mxojx miidity nej ypaadyii?” E je yëydjc amoñi je' yhui'my. ¹³ Chi je rey nimay huidibi anajty jim pubejtp: “Cixotz tecyotz jada yëydjc etz pidäg agootztuuby. E jiby yjihuipy yäxipy, jiby ytätz

huingueedip miid jotmay.” ¹⁴ Com may je jäy ajcxy huidibi ti yajhuooy, e hueeni ajcxy huidibi ti yajhuin'ixy.

Je cogüejtin ñimiydägy

¹⁵ Je huin'it tiempo je fariseos ajcxy tuuñ quipxycapxy co anajty xihuaangixy nihuambedaangixy Jesús. ¹⁶ E jadu'n ajcxy quejxy ma Jesús yajpaady naagity huidibi minicxpejt je fariseos ajcxy ytiy'ajt etz naagity huidibi mijnicxpejt je Herodes ytiy'ajt. Chi ajcxy Jesús ñimay:

—Huindzin, nejhuuñybich ñich ajcxy co miich mgapxy je tiy'ajt. Tudägy myaj'ixpicy jäy ajcxy jadu'n nej huaad ajcxy cuychinaaangixy Dios ytiy'ajt. E ca' mgüendituñ nej jäy ajcxy yminaangixy. Tú'ciy miich mduñ miid comeñjyätz etz miid ayoobtijc, ca' huin'ixpety myaj'ixpicy. ¹⁷ Nejhuñhuamy ñich ajcxy nej miich minañ pen tiy'ajt jadu'n: ¿Nej ndundigooyim ma Dios ycötujcin, co ngüejtim ma César, je romano mij'ane'mbi?

¹⁸ Per Jesús ñejhuñyb anajty ajcxy yjibic-huinmañ, e chi ajcxy ñimay:

—Ooy miich ajcxy naybidáacigixy nej jihuñy ooy mdudägyity, e ca' yjanchity. ¿Na'amy co ajcxy yxchachjot'ixy yxchachhuinmañ'ixyich?

¹⁹ Yaj'ijxcich tüg meeñ huidi miid migüejtigixy César.

Chi ajcxy mimiñ tüg meeñ. ²⁰ Chi co Jesús y'ijxy je meeñ, chi yajtiy:

—¿Pin y'ahuinax e pin yxi cixjaay ma jada meeñ?

²¹ Chi ajcxy y'adzooy:

—Je romano mij'ane'mbi y'ahuinax etz yi' yxi.

Huin'it Jesús je' ajcxy ñimay:

—Mo' je César huidibi yi' yjé'ajtpy, etz mo' Dios huidibi Dios yjé'ajtpy.

²² E co ajcxy jadu'n midooy, chi ajcxy ooy jihuñy huinmay. Chi ajcxy ixmajch Jesús, e ñicxni ajcxy.

Yaj'amidooy ajcxy je jugypijcin co pin ti y'ögy

²³ Je huin'it xii je saduceos ajcxy oy ixxy Jesús. Yi' ajcxy yminañ co ca' yjugypigañ je öcpi ajcxy. E jadu'n ajcxy huinmañ pidägy, e yminaangixy:

²⁴ —Huindzin, jadu'n miiñ ma Moisés ycötujcin co je yëydijc huidibi ypijychinaayb miid ytöxyijc, e pen öcp je yëydijc, e ca' ni tüg y'ung yajhuñmy, copicy co co'öcytöxyjäy ypijctigadzipy miid je yëydijc ymiguëx.

²⁵ Pues jii ma ñich ajcxy anajty tüg quëx je yëydijc nihiuxtujc. Je ungoob ypijcy, e chi ix'ögy ytöxyijc, e ca' ni tüg y'ung yajhuñmy. Chi je miguëx ypijctigajch miid je töxyjäy. ²⁶ Nañ jadu'n je mimetzpi yëydijc ix'o'cy ytöxyijc. Nañ jadu'n je midugügpi yëydijc ix'o'cy ytöxyijc. E jadu'n oytuñyii yjadyii miid je töxyjäy co ti anajty mïddzinay'abidzimdäy je nihiuxtujcpi yëydijc tüg quëxpi. E je nihiuxtujcpi ajcxy ix'o'cy je töxyjäy, e ca' ni tüg y'ung ajcxy yajhuñmy. ²⁷ Chi nañ jadu'n oy y'öcni je töxyjäy. ²⁸ E co anajty xii tiempo paty, co anajty Dios yajjugypicy yi tiibi ajcxy y'ögy, ¿huidibi jada' ajcxy nidügti je yëydijc töxyijc'adaañ je töxyjäy? Com ti ajcxy jadu'n nihiuxtujcpi mïddzinay'abidzimgingxy.

²⁹ Chi Jesús je' ajcxy y'adzooy:

—Miich ajcxy ca' mhuinjihuñy je tiy'ajt, com ca' mnejhuñygixy Dios y'ayuc ytiy'ajt, e com ni ca' mnejhuñygixy je mic'ajt huidibi Dios ymiid.

³⁰ Pues co anajty yjugypijccixy je jäy tiibi y'öccixy, chi ca' ajcxy ypigañ, e nañ jadu'n ni ca' ajcxy ñaymöhuiyb y'ung huen pijccixy. Hue' ajcxy yjugy'adaangixy chinaaangixy jii by tzajpjoty, tim jadu'n nej je ángeles ajcxy chinaaangixy jugy'ajtcixy. ³¹ Per je tiy'ajt co jäy ajcxy tiibi y'öccixy

yjucypigaangixy jadüg'oc, jëbi mbaatcixy jada tiy'ajt ma Dios ñecy. Dios ci'm jadu'n minañ: ³² “Ich je' je Dios huidibi Abraham, Isaac etz Jacob yDios'ajtpy.” Com yi Dios ca' yi' yDios'aty ma yi' öcpi ajcxy. Yi Dios Dios'ajtp yi' ma yi' juugypi ajcxy.

³³ E co je mayjäy jadu'n midooy, chi ajcxy ooy tzachjihuiy tzachhuinmaay je Jesús y'ixpijcin.

Je ane'min huidibi ooy ycopicyity

³⁴ E co je fariseos ajcxy nejhuüy co Jesús anajty ti yaj'amoñyii je saduceos ajcxy, chi ajcxy ñayyöymujctayä. ³⁵ E jim anajty tüg leyhuindzin huidibi Jesús anajty jot'ixyp huinma'ñ'ixyp, chi y'amidooy:

³⁶ —Huindzin, ¿ma yi' maybi Dios ycotujcin, huidibi yi' jaccopicyip?

³⁷ Chi Jesús y'adzooy:

—Tzoc jihui' etz yajmij'at nHuindzin'ajtm Dios müd tüg'óciy m'aa mjot, etz müd tüg'óciy m'alma, etz müd tüg'óciy mhuinma'ñ. ³⁸ Jada je' jadu'n je Dios ycotujcin huidibi jaccopicyip, etz huidibi tim jayijpip. ³⁹ Je mimetzpi Dios ycotujcin jahueengi tú'ciy ñaybadyii müd je jayijpi, yi' huidibi jadu'n minamb: “Tzojccix jihuiyigix yi' mmigügtijc, tm jadu'n nej mnaychogyii nayjihuiyii ci'm.” ⁴⁰ Jada Dios metzpi ycotujcin jaccopicy jacmic'ajt müd ca' jac huidibi cotujcin huidibi Moisés etz je profetas ajcxy yejc.

¿Pin je' y'ung je Cristo?

⁴¹ E ma anajty jim tügmucy yjac'ijtcixy je fariseos, huin'it Jesús yajtiy:

⁴² —¿Nej müch ajcxy huinmay müd Cristo? ¿Pin je' y'apmang?

Chi ajcxy y'adzooy:

—Je David je' y'apmang.

⁴³ Chi Jesús ajcxy nimay:

—¿Na'amy co David anajty ti ymina'ñ co Cristo hue' je' yi' yhuindzin? Jadu'n ti capxy David anajty müd je Dios yjihui'ñ ymic'ajt, ymina'ñ:

⁴⁴ Je Huindzin Dios nimay ich nHuindzin: “Iña' ma ich n'a'oy'amy, ixti cooni ich müch nyajmimadägip ma je mmidzip ajcxy.”

⁴⁵ ¿Nej jëbi David ymij'ap'adyii je Cristo? Com David ci'm ymina'ñ co Cristo yi' je' yhuindzin.

⁴⁶ E nitüg'aa ajcxy yca'adzohuimbijty. E jadu'n nej je xü tiempo yjacnicx anajty ca' ni pin ocjacyajtiyñi huidijaty ayuc.

23

Jesús xi'y ajcxy je fariseos etz escribas

¹ Chi Jesús nimay je mayjäy etz yi' ydiscípulos ajcxy:

² —Je escribas etz je fariseos ajcxy chachnaygömáayigixy co yi' ajcxy jajtp nej capxti'cxipy je cotujcin huidibi Moisés yjaay jecy'ajty. ³ Oy co ajcxy mguydunipy jadu'n nej yi' ajcxy xyaj'ixpijccixy Dios y'ayuc, capxymidoogix nej xyñmaaygixy per ca' mdungixy huidibi yi' ajcxy ytumb, com yi' ajcxy oy ycapxcixy e ca' ajcxy cuydungixy. ⁴ Yi' ajcxy nigo yajcojixy canaag costumbre hui di je jäy ajcxy ca' mimadäga'ñ, e ca' ajcxy pa'ayoy je jäy, tim jadu'n nipaady nej jihuiy tüg tziy ti mooygixy jemxypí huidibi ca' je jäy ajcxy mimadäga'ñ, e yi' escribas etz fariseos ajcxy ni ca' ycihuax yajpaadaangixy je tziy. ⁵ Tüg'óciy hui di yi' ajcxy ytumyb, je' ajcxy ytumyb co huen jäy ajcxy ixyii, jaydëbi yajcömay ajcxy. Yi' ajcxy yajhuimboc-huiniyigixy etz ñayyajcihuiniyigixy Dios y'ayuc.

Nayxojxcixy m̄id huit yooñjatyp̄i co chachcōmayaangixy. ⁶ Ooy ajcxy tzocy iñaybejt ma je' iñāy je ane'mbi ma jāy ajcxy yx̄iduñ. Ooy ajcxy tzocy ȳi cōdumbi iñaybejt ma je naymuojctac. ⁷ Yi escribas etz fariseos ajcxy oy tzojccixy co ajcxy yajcapxpoocxip huindzigi'ñ'amy mayjāyduum. Etz nañ jadu'n ajcxy tzocy co jāy ajcxy yajmij'adiȳb nej huindzindijc ixpicytjic. ⁸ Miich ajcxy ca' jadu'n m'a'ix̄ihuipy co ajcxy xytij̄ipy huindzin com nidüg'óciy miich ajcxy mnaymigüg'ajt̄igixy, etz tūgpajc je' huidibi miich ajcxy mhuindzin'ajtpy ȳi' je' Cristo. ⁹ E nañ jadu'n miich ajcxy ya naax-huiñ, ca' oy ni p̄in mdeedy'adiȳb co m̄id miich ajcxy tūgpajc je mDeedy, huidibi j̄iiby tzajpjoty. ¹⁰ E nañ ni mganaydij̄iȳb ajcxy mij ane'mbi, com ȳi Cristo je' tūgpajc miich ajcxy mmij'ane'mbi. ¹¹ Je p̄in jaccapxymidoob ymigüḡtjic, je' je' mij'ajtin m̄id ma miich ajcxy. ¹² P̄injaty huidibi c̄i'm naygōmayip, t̄zōydu'nbaadip je', e p̄injaty naybidaacip nicy xeemy, je' je' capxpaady y'idipy.

¹³ ¡Ay miich ayoob ajcxy fariseos etz escribas ajcxy! Miich ajcxy mnaybidáacigixy nej jihūiȳ ooy mdudāgyjāy, e ca' yjanchity. Miich ajcxy mgoyūchpy je Dios yt̄i'ajtin nej huaad jāy ajcxy yt̄iḡiȳ j̄iiby tzajpjoty ma Dios y'ane'my. Ni miich ajcxy mgatiḡiȳgixy, e nañ ni m̄ga'a'ix̄iȳgixy co huingbi yt̄iḡihuip.

¹⁴ ¡Ay miich ayoob ajcxy fariseos etz escribas ajcxy! ¡Miich ajcxy m'aan̄idacp! Miich ajcxy myajcijxtaaȳi ȳi co'ōgy yt̄oxyjāy ypidāgy m̄id ajcxy m'adzojcin, e mdungixy ooy jecy tzajpcapxycapx̄ii, j̄igix capxpaady mbidzimipy. Dios n̄igi chaachytunip miich ajcxy m̄id mbocy ycixpi, ca'ydi jac p̄in jāy.

¹⁵ ¡Ay miich ayoob ajcxy fariseos etz escribas, miich ajcxy naybidaacigixy tudāgy, e ca' yjanchity! Mhuinyōy'abidzimyb miich ajcxy je naaxhuiñybi, co mgapxhuācxa'ñ je m'ix̄pijcin ma je tūgpi jāy. E co ajcxy je' myajmibicy, huin'it mejtz jadu'ñȳi je pocy anajty m̄idity je jāy, ca'ydi miich ajcxy.

¹⁶ ¡Ay miich ayoob ajcxy huidibi jadu'n id̄it̄zp̄ nej tūḡi huintzpi huinhuoy! Miich ajcxy m̄inamb co pen tūḡ jāy tuñ yhuandaacin, e ĩbaati capxpaati Dios yt̄ijc, chi ca' cuyduñ je huandaacin. Per pen ĩbatpy capxpatpy je oori huidibi j̄iiby ma Dios yt̄ijc, huin'it janchity cuyduñ je huandaacin. ¹⁷ Tzuudijc locidijc huidibi ca' huinjihūiȳ je t̄i'y'ajt. ¿Huidibi jaccopicyip: je oori o je Dios yt̄ijc ma je oori yoxy ity?

¹⁸ Nañ jadu'n miich ajcxy mina'ñ: “Pen tūḡ jāy huandaacin tuñ, e capxpaady je altar ma Dios yajhuindzigīy, chi ca' cuyduñ je huandaacin. Per pen capxpaady je huindzigi'ñ t̄zūch ma je altar ma Dios yajhuindzigīy, chi cuyduñ yhuandaacin.” ¹⁹ ¡Tzuudijc locidijc huidibi ca' huinjihūiȳ je t̄i'y'ajt! ¿Huidibi jacmij'ajtin ym̄id je huidibi ti yajyox̄y o je altar? ²⁰ P̄injaty capxpatp je Dios yt̄ijc ma Dios yajhuindzigīy y'agapxmuctaayb anajty huidijaty j̄iiby yajpaatp ma Dios yajhuindzigīy. ²¹ P̄injaty capxpatp je Dios yt̄ijc, ca' anajty j̄eyi capxpaady Dios yt̄ijc, nañ ycapxpatp anajty Dios huidibi j̄iiby tzinaayb. ²² P̄injaty capxpatp je tzajp, nañ capxpatp anajty Dios y'ane'mdac quipxyi m̄id Dios huidi tzinaayb j̄iiby.

²³ ¡Ay miich ayoob ajcxy fariseos etz escribas ajcxy, huidi naybidaacip tudāgy, e ca' yjanchity! Miich ajcxy mooyb Dios je tūgpicy je majcpi huidibi je' paatip, ixti ȳi tzajnimang, ȳi ruda etz je p̄i'c'ujtz'ay ung. Per ca' ajcxy mduñcuenti je cōtujcin huidibi jaccopicyity. Miich ajcxy ca' mdzināy

tiydudägy müid je migügtijc. Miich ajcxy ca' mmüidity pa'ayo'n müid je' ajcxy huidibi ayoob jottigooyb, etz ca' mmüibijccixy Dios. Jada ixypy ajcxy mbaadumyb, e mooygixy Dios je tügpicy je majcpi. ²⁴ ¡Tzuudijc locitijc! Miich ajcxy ti m'anajxyp je uux, e mgojüinnaaxcixy je camello, je mijpi iyujc.

²⁵ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jiiby jotjoty huinma'ñyoty miich ajcxy müidity jibicpi. Miich ajcxy müid je ca'oy'ixü etz je adzojcin. Tim jadu'n nipaady nej jihuüy myajhuächpy ajcxy yi tasi ninicx yi texy ninicx, e chi myajhui'my jibicpi ma tasi jot ma texy jot. ²⁶ ¡Tzuudijc miich ajcxy! Jayijp yajhuädz jüby jotjoty texy tasi, huin'it hui'm nañ jadu'n huädz nügix'amy.

²⁷ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jadu'n miich ajcxy nipaady nej öcpi jut. Je öcpi jut nügix janch oy yquëxigy, per jüby jutjoty ujtz jüby müid je öcpi pajc etz müid jibicpi. ²⁸ Jadu'n ajcxy nguëxigy mayjäyduum nej jihuüy ooy m'oyjäyity, per jüby jotjoty müid jibic-huinma'ñ.

²⁹ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Miich ajcxy mgo'abojtzcixy yajxon je öcpi jut ma profeta ajcxy ñaaxtigüy, etz mxoxy ajcxy müid je pijy ma ñaaxtigüy je tudägy jäy ajcxy, ³⁰ e miich ajcxy nayñimaayigixy miñ xyipy: “Co ixypy anajty n'octzinaayim jecy'ajty ca' ngapubejtim co ajt nmij'ap nmijteedy yaj'ögy je profetas ajcxy etz je tudägy jäy ajcxy.” ³¹ Müid jada ycxipi miich ajcxy nejhuüyb co miich ajcxy m'ap'adyii mdeedy'adyii je jibicjäydijc ajcxy huidibi yaj'öc je profetas. ³² ¡Miich ajcxy yajcixcixy je jibicpi huidibi ajcxy mmij'ap mmijteedy yajtzondac!

³³ ¡Jadu'n miich ajcxy nipaady nej mayxoox! Ca' miich ajcxy madägipy cöguëgipy je tzaachypi jüby ayoodactuuby. ³⁴ E paady nguexaamybich ma miich ajcxy profetas etz huidibi ixpicyip ma Dios y'ayuc, etz huidibi xyaj'ixpigamb ajcxy yi Dios ñecy. Per miich ajcxy myaj'ögamyb myajcruutzpedamyb nijëjity, etz nijëjity mgoxamyb mhuobamyb ajcxy jüby tzajtgoty etz m'ixhuidida'ñ mbahuidida'ñ ajcxy cajp cajp. ³⁵ Je mijpocy xyñigidaccoda'ñ miich ajcxy, jadu'n nej je oyjäy ñi'py temy yojcy jecy'ajty, oga'ñ chondacy müid je oyjäy Abel etz ycogixü müid Zacarías, je Berequías y'ung huidibi miich ajcxy mmij'ap mmijteedy myaj'o'c jüby tzajtgoty ma altar. ³⁶ Janch tiy'ajt jadu'n nej nimaaygixy co je mijpocy ñigidaccoda'ñ je jäy ajcxy huidibi tzinaayb jadachambi tiempo.

Jesús yäxy müid Jerusalén cajp ycxipi

³⁷ ¡Miich ajcxy Jerusalén jäy! ¡Miich ajcxy Jerusalén jäy! Jerusalén jäy huidibi jecy'ajty yaj'ögy je profetitijc etz ycögächpy ajcxy je Dios ycogapxy. Canaag'oc ti njayajtügmujctähua'ñich miich ajcxy, jadu'n nej tzeydaj yajtügmutcäy je' y'ung ma yqueec pä, per miich ca' m'a'ixüygixy. ³⁸ Oc'ix miich ajcxy nej mdijc abac yhuimaangixy. ³⁹ Janch tiy'ajt jadu'n nej nimaaygixy co camina miich ajcxy xy'ixipyich jadüg'oc, ixti cooni paadipy je xü je tiempo co jäy ajcxy ymina'nipy: “Cömay yi huidibi miimb müid nhuindzin Dios yxü etz ymic'ajt.”

24

Jesús ymina'ñ co Dios ytijc yhuindigoyipy

¹ Ma anajty Jesús ti ypidzimni ma Dios ytjic, nicxp anajty, huin'it Jesús ydiscípulos ajcxy ñimijhuäci. Yi' ajcxy anajty yaj'ixiydähuamyb je Dios ytjic, com ooy anajty chachmijtjicity.

² Chi Jesús yminañ:

—Huindix miich ajcxy jada maybi mijjaty ytjic. Miinipy xii tiempo mina tüg'óciy jada tjic nicxy yhui'my taj xit, ca' ma tzaamaxy. Huindigoydähuipy tüg'óciy.

Je tiy'ajt ma ca'ni naaxhuiñybi ycixa'ñyi ytigoya'ñyi

³ Chi oy ñicxni ajcxy ma Olivos cögop. E co anajty jim, Jesús y'iñäy, chi ñimaayi ameech je' ydiscípulos ajcxy:

—Hich ajcxy nejhuñhuamyb mina jëdu'n ytuna'ñyii yjada'ñyii. ¿Ti je' quëxigamb co anajty miich mhuimbida'ñ ya naaxhuiñ, e co anajty je naaxhuiñybi ytigoya'ñ?

⁴ Chi Jesús nimay ajcxy:

—Mnaygüend'adib ajcxy, ca'ydi pin xyhuin'ingixy. ⁵ Ooy mayjäy ñaybidägáanigixy miid ich nxii, naybidägáanigixy co je' ajcxy je Cristo, ymina'na'ñ ajcxy: “Hich je' je Cristo.” ⁶ Co miich ajcxy ayuc midohuipy co jäy ajcxy chachtziptungixy ñayñibidigigixy xi ya, chi ca' ajcxy mdzigüygixip, com ooy ycopicity co jadu'n jayijp ytunuyb yjaduyb. Ca' nan hue' je' anajty tim cijxp tim tigooyb je xii je tiempo. ⁷ Nayñibidigib naax cajp miid huingbi naax huingbi cajp, e gobierno miid huingbi gobierno. E miinip mic'ujx canaag'it etz mij yuu etz mij pa'm xi ya. ⁸ Jada tzaachypi ayo'n oga'ni anajty chondägy huidibi nminaxaanim nyajnaxaanim. ⁹ Huin'it xii huin'it tiempo miich ajcxy myajciyegipy, jigix xychaachtungixipy e xyaj'ögixipy. E tüg'óciy je maynaaxhuiñyäjy xyca'ixáangixipy, miid ich nxii ycixpi. ¹⁰ Je huin'it tiempo may je jäy ajcxy yajtigoya'ñ ymibijcin. E nañ jadu'n ñayca'oy'ixáanigixy etz ñayñigapxáanigixy ñi'ojihuáanigixy miñ xyipy. ¹¹ Ooy may quëxigaangixy aanidaacpidijc mina'naangixy co Dios y'ayuc ytiy' ajt nimiydaci, e mayjäy oy huin'inaangixy. ¹² E je' co ajcxy xii jimijt ñajtzninicxiyñi jac tim ñigi jibicpi tunaangixy, ca' ajcxy y'ocnaychócinipy miñ xyipy. ¹³ Per pinjaty tiydudägy panicxy je mibijcin, je' ajcxy ypaadip y'alma nidzocin. ¹⁴ Copicy co jayijp yajcapxhuäcxa'ñ huindu'ñybi naaxhuiñybi Dios y'ayuc ytiy'ajt jemybi, jaydëbi jäy ajcxy nidüg'ociy nejhuñy Dios ytiy'ajt. Huin'it je naaxhuiñybi ycixni ytigooyñi.

¹⁵⁻¹⁶ Je profeta Daniel jaay jecy'ajty jada ayuc (miich ajcxy pinjaty capx jada necy huinjihuñygyxy) ma minañ: Miich ajcxy co m'ixy pinjaty jibic-huinma'ñ tumb nej ca' ypadyii ma Dios ytjic, huidibi ooy ycodzigijity, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzóocixipy mic'amy ma tungop. ¹⁷ Pinjaty huidibi yajpatp ma ytjicnicx ca' nicxy tijaty yajpidzimy ma ytjic. ¹⁸ Yi jäy ajcxy huidibi yajpatp camjoty, ca' ajcxy huimbidity co yajpidzimipy tijaty ma ytjic. ¹⁹ Huin'it tiempo ayo'n ypadamy je töxyjäy ajcxy huidibi anajty y'ungdzim'ijt, e nañ jadu'n je' ajcxy huidibi miid y'ungma'xung. ²⁰ May'ajt ajcxy mbijctzoohuipy yi Dios co jada jadu'mbi ayo'n ca' ytunuyb yjaduyb ma anajty ytichtiempojity, etz ma anajty pocxinxiyjoty. ²¹ Huin'it oy ayo'n jotmay ytuna'ñyii yjada'ñyii huidibi nicamina ycatuñyii ycajadyiini mabi naaxhuiñybi chondägy e nicamina jadu'n ycactunuyb ycajacjadiyb. ²² Pen ca' Dios capx'aduga'ñ yjiibi ayo'n xii ayo'n tiempo, ni pin ca'

chögipy. Per Dios ycapx'adugamy yjiiibi ayo'n tiempo müid je mibijcpidijc ycipi huídibi Dios ti huin'ixy. ²³ Co yi jadu'mbi xii tiempo anajty ymiiñ, ca' mmibijccixipy, pen ji pinjaty xyñimaaygixy: "Ijcxix, cha yajpaady je Cristo", o "Jim'amy yajpaady je Cristo." Ca' mmibijccixipy. ²⁴ Pues miinip jäy ajcxy huídibi huin'inaangixy ymígügtijc. Ci'm ñayajnaaxánigixy jadu'n nej jihuijy je' yCristity, e ymináangixipy co capxhuäcxy ajcxy Dios y'ayuc, e ca' yjanchity. Ytunip ajcxy mijhuinma'ñ etz mijpi ijxpejt, ixti jëbi jahuin'ingixip je mayjäy huídibi Dios ti yhuin'ixyii. Per ca' Dios a'ixihuiipy co yhuin'iniyb yi' yjäy. ²⁵ Ti ich yi' jayijpni nigapxich. ²⁶ E co pinjaty ajcxy xyñimähuiipy: "Chim je' je Cristo migtigidumb", ca' ajcxy mnicixip. O co pinjaty ajcxy xyñimähuiipy: "Chiiby je' tigoty yhuingoyüch", ca' ajcxy mmibigipy. ²⁷ Ich je' je jäy huídibi tzoon tza-jpjoty, nhuimbidaambich ya naaxhuiñ müid je tücxin je jájin, jadu'n nej je huídizuc huídi tücxp xii bidzimyb ixti xii gidägy. ²⁸ Ma je öcp ninicx yajpaady jim ñimujctähua'ñ je luud ajcxy.

Nejjada' je' Dios y'ung ymiinipy

²⁹ Co anajty ti ñaxy je ayo'n xii ayo'n tiempo, huin'it je xii ycoodziygidäga'ñ, je po' ca' ytücx'a'ñ, je madza' ycädähua'ñ etz janch mic je tzajp yücx'a'ñ. ³⁰ Co yi jadu'mbi ytuniyb yjadiyb, chi quëxiga'ñ tza-jpjoty je ijxpejt co ich, je jäy huídibi tzoon tza-jpjoty, nhuimbidañich ya naaxhuiñ. E chi tüg'óciy je mayjäy tájip máyip yjihuihuipy yäxipy, chi ajcxy ixipy je jäy huídi tzoon tza-jpjoty miñ anajty jocjoty müid ymic'ajt y'oy'ajt. ³¹ Chi nguexipyich ángeles ajcxy co huen mic yajxüxy ajcxy ytrompeta, jigix yöymujctähuiipy tüg'óciy pinjaty huin'ijxyp xi ya ma ajcxy yajpaady ya naaxhuiñ; ma xii pidzimyb, ma xii cidägy, ma jinboj pidzimyb, ma tichpoj pidzimyb.

³² Jim miich ajcxy ijxpejt mbigipy ma je higueri quipy jadu'n nej je xii tiempo ymiiñ cidägy. Co je higueri quipy jadüg'oc pidägyip je' y'aay'ung, huin'it miich ajcxy nejhuihuipy co yhuingoni mina ypottigiyñi. ³³ Tim jadu'n nej tiy'ajt mbijccixy ma je higueri quipy co jada ajcxy jadu'n ixipy nejhuihuipy co yhuingoni anajty je xii je tiempo jin'aguy tijc'aguy. ³⁴ Janch tiy'ajt jadu'n nej nimaaygixy co tüg'óciy ytuna'ñyii yjada'ñyii ma ca'ni anajty je jäy y'öctäy huídibi anajty jactzinaayb huin'it tiempo. ³⁵ Je tzajp etz je naaxhuiñybi cixam tigoyam yi', per ich n'ayuc ca' ycixa'ñ ytigoya'ñ nimina.

³⁶ Ca' ni pin nejhuüy je xii je hora mina nhuimbidañich ya naaxhuiñybi. Ni je ángeles ajcxy canejuüy, ni je Dios y'ung canejuüy. Tüg'pajc je Dios Teedy nejhuüy.

³⁷ Com jadu'n nej yjajty ya naaxhuiñ jecy'ajty, co je Noé chinay, nañ tim jadu'n yjadipy co anajty nhuimbityich, yi jäy huídibi tzoon tza-jpjoty, ya naaxhuiñ. ³⁸ Jecy'ajty co anajty ca'ni je ayo'nduu ymiiñ ya naaxhuiñybi, hue' je' mayjäy ajcxy chinay agujc jotcujc, ycaaygixy y'uuccixy etz yajpijccixy je y'ung y'anäg, ixti cooni paty je xii tzuu co ytigüy Noé barcojoty. ³⁹ Je mayjäy ajcxy ca' ajcxy cuenttuñ co ayo'n miina'ñ anajty, ixti cooni je ayo'nduu miin e öctay ajcxy je jäy nijoty. Jadu'n nej yjajty jecy'ajty müid je mayjäy huídibi tzinaayb anajty quipy müid Noé, nañ tim jadu'n yjada'ñ müid je jäy ajcxy huídibi tzinähuij jac jüini co ich anajty nhuimbityich ya naaxhuiñ jadüg'oc. ⁴⁰ Je huin'it tiempo co nhuimbiditych jadüg'oc ya naaxhuiñ, chi metz yéydijc yajpaadipy

ma ytundac, tög je' yajminicxa'ñ, e tög je' yhui'ma'ñ. ⁴¹ E mejtz töxyjäy yajpaadip anajty yjich, tög je' yajminicxa'ñ, e tög je' yhui'ma'ñ.

⁴² E paady miich ajcxy ni'ixi'ijtcix, xyjijp'ixipyich com ca' mnejhuuygixy mina miich ajcxy je mHuindzin ymiina'ñ. ⁴³ Mnejhuuygixy miich jada co ixypy je ungedeedy nejhuiy ti hora je meetzpi miina'ñ, ca'p je' ymähuipy, e ca'p a'ixihuipy co je meetzpi ytigihuipy tigoty. ⁴⁴ Nañ tim jadu'n miich ajcxy ni'ixi'ijtcix, je' co ich, je jäy huidibi tzoon tzaajpoty, nhuimbida'ñich ma ca' ni pin anajty nejhuiy.

Je tumbi tudägyi etz je huidibi ca'p ytudägyity

⁴⁵ Huidibi tumbi je' ya huidibi tumb miid yhuindzin janch cixyot huinjot huidibi miid xpijcin, huidibi je' yhuindzin mooyipy ane'min ma ytjic, huidibi yajnigidagihuipy ma ymigügtjic caayin uucin mina ypadyii? ⁴⁶ Janch jotcuje je tumbi co yhuimbiditye je' yhuindzin, e je' cuyduñ jadu'n nej je' yhuindzin ti ñimäyii. ⁴⁷ Janch ty'ajt jadu'n nej nimaaygixy co je huindzin ytumbi yajnigohuajc'adyii tög'ociy huidibi ymiid. ⁴⁸ Pen je tumbi jibicjäybi mina'ñ jotjoty huinma'ñjoty: "Huäcxijpni ich je nhuindzin." ⁴⁹ E chi nimajztägip ymigügtjic, e ytigihup caaybi uucpi miid amügyjäydjic; ⁵⁰ chi je tumbi yhuindzin minipy ma ytjic huidi xii mina je tumbi ca' anajty aa'ixy jijp'ixy e ni je hora anajty canejhuiy. ⁵¹ Chi huindzin tzaachtunip je' ytumbi, etz ypidägipy miid je jacjadyii jäy ajcxy yajpaady huidibi naybidäacigixp nej tudägyjäyity e ca' yjanchity. Jüby ayoodactuuby yjihua'ñ yäxa'ñ etz huinmucxa'ñ huingueda'ñ ytütz miid jotmay.

25

Je ijxpejt ma je majcpi töxy'anäg

¹ Co anajty nhuimbityich jadüg'oc ya naaxhuiñybi jadu'n nipaadip nej je nimajcpi töxy'anäg co ñicxy ajcxy ñayjipcobadihuäänigixy miid je yëydjic huidi pigamb. Chi minicxy ajcxy aceite lámpara co yajticxaangixy. ²⁻⁴ Nimigoox je töxy'anäg huidi cohuinma'ñity etz ahuing minicxy jadüg quiig ujtz miid aceite. E nimigoox je töxy'anäg ca'pi ajcxy cohuinma'ñity, e ca' ajcxy ahuing minicxy jadüg quiig aceite. ⁵ E je yëydjic huidibi anajty pigamb huäcxijpni ooy, chi je töxy'anäg ajcxy ooy ytigiiyñi mä'uuybi. ⁶ E mijcuctz ajcxy midoy co tög jäy mic mina'ñ: "Chi miñ je yëydjic huidibi pigamb, nicx jipcobadüyigixy." ⁷ E huin'it je nimajcpi töxy'anäg ajcxy ypidictay. Chi ajcxy yjin ni'ixi'iy nidüg nidüg. ⁸ Chi je nimigooxpi huidibi ca' ycohuinma'ñity nimay je nimigooxpi huidibi cohuinma'ñip: "Ich ajcxy hueeni mooygich yi m'aceite, co pidzaanip ich ajcxy njin." ⁹ Chi y'adzooy je cohuinma'ñybi ajcxy: "Ca' nyega'ñich, je' co ca' ich ajcxy nje' yhuaadihu'a'ñ. Nicx miich ajcxy juy jim ma ytoogyii." ¹⁰ E ti anajty ajcxy ñicxy aceite juuyb je huidibi ajcxy ca' ycohuinma'ñity, co oy yjäty je yëydjic huidibi pigaanip. Chi je cohuinma'ñybi ajcxy miid tigiy tigoty je yëydjic huidibi pigaanip. Chi tijc yaj'agiiy. ¹¹ E com jecyñi oy yhuimbity ajcxy je huidibi ca' ycohuinma'ñity. Chi ajcxy ymiinañ: "¡Huindzin, Huindzin, ocyaj'ahuädz mdijc!" ¹² Chi je' y'adzooy: "Ca' ich miich ajcxy n'ixy'adyii."

¹³ Chi Jesús ymiinañ:

—Nayñi'ixi'iyigix, je' co ca' mnejhu'iyigixy mina' ich nhuimbida'ñich jadüg'oc ya naaxhuiñ.

Je i'xpejt ma je meeñ

¹⁴ Co' ich anajty nhuimbida'ñich jadüg'oc ya naaxhuiñybi, jadu'n ni-paadip nej jadayaabi i'xpejt, co anajty tüg comeeñy'äy chona'ñ viajeltumbi, chi je' ytumbi ajcxy mooy je meeñ co huen cuend'ajtcixy. ¹⁵ Je ymidügpi tumbi moy migoox mil meeñ. Je mimetzpi moy mejt mil. E je ymidügpi moy tüg mil. E jadu'n ajcxy moy nije' nije' nej huad cuend'ajtcixy. Chi choñ je huindzin vajatumbi. ¹⁶ Je tumbi huadibi cidigiyi migoox mil meeñ, ytigiy ajuybi adocpi. Chi je' ymeeñ y'ung'ajty jamigoox mil. ¹⁷ Nañ jadu'n huadibi cidigiy mejt mil, ytigiy tumbi müid je meeñ. Chi je' ymeeñ y'ung'ajty ja mejt mil. ¹⁸ Je huadibi cidigiy tüg mil hue' oy pidägy je meeñ tützjoty. Chi tajiy, e yützi je yhuindzin ymeeñ. ¹⁹ E com jecyñi oy yhuimbity je huindzin. Chi ytigiy cuenta yaj'oy'iyb müid je ytumbi ajcxy. ²⁰ Chi miiñ jayijp je huadibi anajty ti cidigiyii migoox mil meeñ. Chi je tumbi yajcidigiy je' yhuindzin majc mil meeñ. Chi ym'inañ: “Müich ti xymooyich migoox mil meeñ, e' ich ti nyaj'ung'atyich jamigoox mil.”

²¹ Chi je' yhuindzin m'inaañ: “Janch jotcuje' ich cham co jadu'n ti mduñ müid je hueenbi meeñ. Müich ooy mdudägy etz oy ti mduñ, e paady njacmöhuaryb jacmay. Tig' ma' ich, e xondäg müid' ich.” ²² Chi ymiñ je huadibi anajty ti cidigiyii mejt mil meeñ. Chi nimay je yhuindzin: “Müich xymooyich mejt mil meeñ, e ti nyaj'ung'atyich jamejt mil.” ²³ Huin'it je' yhuindzin ñimaayi: “Janch jotcuje' ich cham, co jadu'n oy ti mduñ müid' ich nmeñ, e paady njacmöhuaryb jacmay. Tig' xondäg müid' ich.”

²⁴ E co oy yja'ty je huadibi cidigiyb tüg mil meeñ, chi nimay je' yhuindzin: “Huindzin, hue' ndijyich müich myëdyj'aty janch jibic jäy. Müich cosecha myajpidicpy ma ca' ti mñpy etz müich mgosecha myajpidicpy ma ca' ti ti mhuijy. ²⁵ Paady ooy ndzigiyich co je meeñ ngayaj'ung'adipyich. E co müich mhuimbida'ñ, mdzogamy je mmeñ, e paady je mg' mmeñ ti nyüchich, je' co ndzigiyich co nicxy nyajtigooyich müich mmeñ. Cha je meeñ huadibi ti xymooyich.”

²⁶ Chi je' yhuindzin ñimaayi: “Jibic tumbi müich, ooy mnuuxity. ¿Nej ti mnejhu'iy müich co' ich cosecha nyajpidigyich ma ca' ti ti nñbyich, etz cosecha nyajpidigyich ma ca' ti ti nhuijyich? ²⁷ Oy co ixypy müich je' ich nmeñ ti myejc' anuucxy, e jim ixipy y'ung'at. E cham co ti nhuimbityich cham ixypy je nmeñich xycidigyich müid nimeñ'ung.”

²⁸ Chi je huindzin nimay je jacjadyii tumbidijc: “Pijci ajcxy yi meeñ huadi ymüid, e mooygix yi huadibi majc mil ymüid. ²⁹ Je huadibi oy tumb jacyajmöhuaryb je' anaxy, e ymüid' adamy je' conaxpi. Je' huadibi hueen müid yajpigamb je' huadi ymüid, je' co ca' oy ti ytuñ müid je hueenbi. ³⁰ Yi jibi tumbi huadibi ca' oy ytuñ, pidäg ajcxy agootztuuby ma yjihuipy yäxy, ma yti'izt huinmuucx huinguedip müid jotmay.”

Co anajty naaxhuiñy'äy ajcxy yajtyduñ

³¹ Co' ich, je jäy huadibi tzoon tzajpjoty, nhuimbity ich anajty jadüg'oc ya naaxhuiñybi, huin'it n'ixtäg'a'ñich ma' ich n'ane' mdac etz ane' ma'ñich müid' ich nmij'ajtin etz n'oy'ajtin. ³² Chi tüg'ociy je naaxhuiñy'äy yajtüg'mujctähua'ñ ma' ich. Nhuäxamybich jadüg' jadu'n nej jäy ajcxy huäcxy je cöbixy etz je chiibo ajcxy. ³³ Nbidägamybich a'oy'amy je jäy

ajcxy huidibi oy ti ytungixy müd ñch. E yi' ajcxy jadu'n nipaadip nej cöbixy. Nbidägaamybich anajty'amy yi jäy ajcxy huidibi jibic ti ytungixy müd ñch. E yi' ajcxy jadu'n nipaadip nej chiibi.

³⁴ Chi nnimähuibich yi jäy ajcxy huidibi a'oy'amy: “Miingix miich ajcxy huidibi Dios Teedy ti xyconuucxy ajcxy. Je'ájtigix ane'mdac huidibi ijtp n'ixí müd miich ajcxy ycixpi maabi naaxhuiñybi chondägy. ³⁵ Ma anajty ñch nyuubögyii miich ajcxy ti xyajcaayich; ma anajty ñch ndidziyii, miich ajcxy ti xyajni'ügyich; ma anajty ñch nihuidityich, miich ajcxy jättac ti xymöyich; ³⁶ ma anajty ñch je nhuit ti nyajmayjatyich, miich ajcxy ti xymöyich je huit; ma anajty ñch nbigyijich, miich ajcxy ti xycuend'átyich; etz co anajty ñch pujxtigoty nyajpaady, miich ajcxy ti xycogapxiyich.”

³⁷ Huin'it ymina'na'ñ je jäy ajcxy huidibi oy ti ytungixy müd ñch: “Huindzin, ¿mina ñch miich ajcxy ti n'ixy ayuu, e ti nyajcay? O ¿mina ñch miich ajcxy ti n'ixy co mdidziyii, e ti nyajni'ügy? ³⁸ ¿Mina ñch miich ajcxy ti n'ixy co miich mnihuidity, e ti nmöy jättac? O ¿mina mhuit ti myajmayjaty, e ti nmöy je mhuit? ³⁹ ¿Mina ñch miich ajcxy ti n'ixy, co miich mbigyii, e oy ti ngüend'aty? etz ¿mina ñch miich ajcxy ti n'ixy co pujxtigoty myajpaady, e oy ti ngogapxiy?” ⁴⁰ ñich, je mij'ane'mbi, n'adzohuibidipyich: “Janch tiy'ajt jadu'n nej nnimaaygixy co yi jäy ajcxy huidibi oy ti ytungixy müd pinjaty huidibi xymijnicxpejtpich, nañ jadu'n oy ti ytungixy müd ñch. Ca' ñéjty co jäy ajcxy ymina'ñ co ca' ypinity je jäy huidibi xymijnicxpejtpich.”

⁴¹ Chi ñch, je mij'ane'mbi, nimähuibich je jäy ajcxy huidibi yajpatp: “Huinhuäctuatcich miich ajcxy jibicjäydijc. Nicxy miich ajcxy mijjinjoty, huidibi ijtp n'ixí müd je mujcu' ycixpi etz müd je' y'ángeles ajcxy ycixpi. ⁴² Ma anajty ñch nyuubögyii, ca' miich ajcxy xyajcaayich; ma anajty ñch ndidziyii, ca' miich ajcxy xyajni'ucyich; ⁴³ ma anajty ñch nihuidityich, ca' miich ajcxy xyajjättägyich; ma anajty ñch nhuit xytigoy'íjtigich, ca' miich ajcxy huit xymooyich; etz ma anajty ñch nbigyii e nyajpaadyich pujxtigoty, ca' miich ajcxy xycogapxiyich.” ⁴⁴ E chi je' ajcxy ymina'na'ñ: “Huindzin, ¿mina ñch ajcxy miich ti n'ijxcixy co anajty miich yubögyii tidziyii, o co anajty mnihuidity? ¿Mina ti n'ijxcixy co ca' mhuit müdity, o co mbigyii, o co anajty pujxtigoty myajpaady, e ca' ñch ajcxy miich nbubejty?”

⁴⁵ Chi ñch, je mij'ane'mbi, n'adzohua'ñich: “Janch tiy'ajt jadu'n nej nnimaaygixy. Huen tim pinity huidibi ca' müdity pa'ayo'n müd je' ajcxy huidibi xymijnicxpejtpich, oy jäy yjamina'ñ co ca' ypinity, ñch miich ajcxy anajty jadu'n ti xytuñich.” ⁴⁶ E jada ajcxy nicxip huinixi ayoodac-tuuby, e yi tudägypi ajcxy nicxip ma yi jugy'ajtin huinixiibi.

26

Je huinma'ñ nej anajty Jesús madzaangixy

¹ Co Jesús nigapxtay tüg'ócicy jadaayaabi ayuc, chi nimay yi' ydiscípulos ajcxy:

² —Miich ajcxy mnejhuuyb co huixtic je amayxi, je pascua xi. Pascua xijoty ñch, je jäy huidibi tsoon tzajpjoty, nyajciyega'ñich ma nmidzipich etz xyajcruutzpeda'ñich, xyaj'öga'ñich ajcxy.

³ Je huin'it xii je teedy huídibi tungmüid ajcxy, je escribas, etz je mijjädijc ajcxy ñayöymujctayi ma je' ytíba' je teedy huídi jacmijtungmüid huídi anajty yxii Caifás. ⁴ E jim ma Caifás ytíba' jim ajcxy huinma'ñy'ixtay nej jébi yajmachycägixy Jesús müid anii etz yaj'ögaangixy. ⁵ Chi ajcxy ñayñimaayi miñ xyipy:

—Ca' y'oyity co xiioty nmajtzim Jesús. Ca' jecyity co je mayjáy xymijotma'ttayim etz ytigihuip ajcxy huambi jihuiyibi.

Tüg töxyjäy pidacy aceite ma Jesús ycohuajc

⁶ Jesús anajty yajpaady Betania ma Simón ytijc, je Simón huídibi anajty ymüid je jibic nibüdz pa'm. ⁷ E ma anajty Jesús yca, huin'it ymüid tüg töxyjäy müid tüg quiiig ujtz müid perfume huídibi ooy oy yxuugy, jada perfume ooy anajty choohuity. Chi je töxyjäy yaj'ahuäch je quiiig, e yajcöyogy Jesús je perfume huídibi ooy oy yxuugy. ⁸ Co Jesús ydiscípulos ajcxy jadu'n ijxy, chi ajcxy mijotma'ty je töxyjäy. Chi ajcxy ñayñimaayi miñ xyipy:

—¿Ti co jada perfume huídibi ooy oy xuugy ayoy? ⁹ Tzou ixypy ooy jada yajtoocy, jaydébi ixypy müid yajpubet je ayooobitijc.

¹⁰ E co Jesús nejhuüy nej ajcxy ymínañ, chi nimay:

—¿Na'amy co m'amayiy jadayaabi töxyjäy? Yi' huídibi ti tuñ, je' yi' tüg oybi. ¹¹ Je ayooobitijc ca' ytigoy'idañ ma müich ajcxy nimína. Huen huídibi xii huen huídibi tiempo jébi müich ajcxy mbubedipy ayooobitijc. Hich ca' n'idañich jecy ya müid müich ajcxy. ¹² Jada töxyjäy ti pidägy ma hich nninícx perfume huídibi ooy oy xuugy, jayijp ca'ni nnaaxtigiyich. Jadu'n je' jijp'ijxpy mína nnaaxtigíhuañich. ¹³ E huentimma'amyity je Dios y'ayuc anajty yajcapxhuächy huindu'my naaxhuiñ jim yajni gapxañ jadu'n nej je töxyjäy ti tuñ cham müid hich, e jadu'n je mayjáy jáymedzipy jada töxyjäy.

Judas cüyecy yi Jesús ma ymidzip agojix

¹⁴ Chi nidüg je' ydiscípulos huídibi yxii Judas Iscariote oy nimáy je teedy mijtungmüidpi, ¹⁵ nimay ajcxy:

—¿Ti ajcxy xymöhuibich co ngiyegipyich Jesús?

Chi ajcxy moy iipxmajc plata meñ. ¹⁶ Co ajcxy meñ ymooy, chi mic'amy Judas yhuinma'ñ'ixtay nej jébi cüyecy Jesús ma ymidzip.

Jesús y'adzuu'ajty pascua xiioty

¹⁷ Je ymidügpi xii, je amayxii, je pascua xii ma anajty yajcay je tzajcaagy huídi ca' levadura müidity, huin'it je' ydiscípulos ajcxy nimüid Jesús. Chi ajcxy yajtiy:

—¿Ma mdzocy co hich ajcxy ni'ixihuip huídi mgayamy je pascua xii cixpi?

¹⁸ Chi Jesús y'adzooy:

—Nícx müich ajcxy jim Jerusalén ma tüg jäy ytijc, e mnimähuiip: “Hich nHuindzin jadu'n minamb co yhuingoñ je' yxii yhora, e paady ma müich mdijc yi' tunañ je pascua xii adzu'ajtin müid ydiscípulos ajcxy.”

¹⁹ Huin'it Jesús ydiscípulos ajcxy cuyduñ jadu'n nej Jesús anajty ti ñimäyii. Chi ni'ixiiy ajcxy je pascua adzuu'ibi.

²⁰ E co chu'iiy, chi Jesús y'ixtacy ma je mesa müid je nimajmetzpi ydiscípulos. ²¹ E ma anajty ycaaygixy, huin'it nimay je nimajmetzpi:

—Nidügti müich ajcxy huídibi xyciyegaambich ma nmidzipich.

22 Huin'it ajcxy yjajtay taj may. Chi ajcxy yajtiy:

—Huindzin, ¿nej ñch jada'ji?

23 Chi Jesús y'adzooy:

—Yi huidi miid ndocxmucyich, yi' je' jadu'n xyciyegaambich ma nmidzipich. 24 Janch tiy'ajt co ñch n'öga'ñich, jadu'n nej je profeta jaay jecy'ajty. ¡Ay ayoob je yëdyjc huidi xyciyegaambich! Jac'oy co ca' ycama'xung'aty je huidibi xyciyegaambich.

25 Chi Judas yminañ:

—Huindzin, ¿nej ñch jada'ji?

Chi Jesús y'adzooy:

—Miich jadu'n minamb.

26 E ma anajty ajcxy ycaay, huin'it Jesús tzajcaagy conigy. Chi yajnajxy Dioscojuyip. E chi jada' tujchuäcxy je tzajcaagy. Chi moy je nimajmetzpi ajcxy je tzajcaagy, e yminañ:

—Cay miich ajcxy jadayaabi tzajcaagy, yi' je' ñch je nninïcchich.

27 Huin'it Jesús ciyigy je y'ügy. Chi yajnajxy Dioscojuyip. E huin'it moy je ügy je nimajmetzpi ajcxy, e yminañ:

—Üc miich ajcxy jadayaabi ügy, 28 yi' je' ñch je nni'pyich. Yi' ñigapxy co Dios ti yaj'aducy je jemybi ayuc. E ñch nni'py ytema'ñ yoga'ñ miid je mayjä ycipi, jaydëbi ajcxy paadip je huinmeecxin miid je ypocy ycipi. 29 Janch tiy'ajt jadu'n nej nni'maaygixy, co ca' n'oc'ügaanich jadüg'oc je pas-cua xii ügy, ixti cooni je xii tiempo paadip co ñch ajt n'uucim huinjemybi je pasqua xii ügy ma ñch nDeedy y'ane'min.

Jesús nigapxy co Pedro ycoyütza'ñyii

30 E co ti y'iidäy, chi ajcxy choon'ñicxy ma Olivos cögop. 31 Chi Jesús je' ydiscípulos ajcxy nimay:

—Nidüg'óciy miich ajcxy xy'ixmajztähua'ñich cham coodz. Je' co jaaybejty jadu'n miin ma je Dios ñecy: “Ögip je cuend'ajtpi, huin'it je cöbixy yöyhuäcxtähua'ñ.” 32 E co anajty ñch njugypicyich jadüg'oc ma anajty ti n'ögyich, chi jayijpni nnicxa'ñich ma Galilea, e jim naybaatim nidüg'óciy.

33 Chi Pedro yminañ:

—Oy yi' jacjadyiibi migügtijcch xyjadim'ixmajztäy, per ni camina xii ñch miich n'ixmadzipy.

34 Chi Jesús Pedro nimay:

—Janch tiy'ajt jadu'n nimäyich, cham coodz ca'ni anajty je tzey yaxigy, miich tugüg'oc mina'nip co ca' xy'ixy'adyiijich.

35 Chi Pedro yminañ:

—Oy ñch ndim'ögip miid miich, ni camina ngaminá'nibich co ca' miich n'ix'adyii.

E nidüg'óciy je' ydiscípulos ac tim jadu'n yminañ.

Jesús mibijctzoy Dios jim Getsemaní

36 Chi Jesús ñicxy miid je' ydiscípulos ajcxy, oy yja'tcixy jim Getsemaní. Chi jim Jesús nimay je ydiscípulos ajcxy:

—Ya miich ajcxy oc'iña', miin ñch n'ocnicxyich jim'amy Dios mibijctzoobi.

37 E chi Jesús ñicxy miid Pedro etz nañ jadu'n miid je Zebedeo ymang nimetzpi. E jim Jesús ñayjihuiyi janch tajy may mij cajee. 38 E chi jim yajnimay je nidugügpi discípulos:

—Nayjihuiyibich taj may ma njot nhuinmañ, ixti mabaad anajty n'ogich müd tájin máyin. Hui'm miich ajcxy ya müd ich etz ca' mmaagixy.

³⁹ Huin'it Jesús ñajtzöyiy mijci'm jahui'. Chi jim ñaygojxtinaydací naaxcíxy, e ytiy Dios mibijctzoobi, ymíñañ:

—Dios Teedy, ich nDios, pen jébi jadu'n, mduñ may'ajt píjci'ich jadaayaabi tzaachypi ayo'n, per ca' yjadu'nity nej ich ndzojcin mdunipy, jadu'n mdunipy janchiy nej miich mdzojcin.

⁴⁰ Huin'it Jesús yhuimbijty jim ma anajty ti yajhui'my je nidugigpi. E oy paady ac tim maab anajty ajcxy. Chi nimay je Pedro:

—¿Nej ca' madäga'ñ miich ajcxy co m'idipy juugy tüg hora müd ich ycixpi? ⁴¹ Hui'mi' ya, juugy m'idipy etz mibijctzoo Dios, jaydeb ca' je ca'oybi xymimadägi. Janch tiy'ajt co jotjoty ooy mnijot'ajtcixy com tunaangixy yi oybi. Per yi mninícx ca' ymadäga'ñ nicxy tuñ oybi.

⁴² Chi mímetz'oc Jesús ñicxy oy Dios mibijctzoy, ymíñañ:

—Dios Teedy, pen copicy co ich nbaadibich je ayo'n, huen jadu'n yjaduyb müd ich nej miich mdzojcin.

⁴³ Chi jadüg'oc Jesús huimbijty ma je nidugigpi discípulos, e oy pátnibi maab ajcxy, je' co ca' anajty ajcxy mímadägy máhui. ⁴⁴ Chi yajhui'my ajcxy, e midugig'oc ñicxy Dios mibijctzoobi. E nañ tim jadu'n oy mínaanip jadu'n nej anajty ti y'ocmíamb. ⁴⁵ Chi jadüg'oc huimbijtni jim ma je nidugigpi, chi nimay ajcxy:

—¿Máagixni? Pócxix jadachambi. Ti je tiempo yhuaad'ajtni mina ich, je jáy huidibi tzoon tzajpjoty, nyajc'yega'ñich ma yi jibicjädijc ajcxy. ⁴⁶ Pidíccix, tzoc jámim, chi ymíñ je huidibi xyc'yegaambich ma nmidzipich.

Tzумы mach ajcxy Jesús yajnicxy

⁴⁷ Jesús capxni anajty jim co yjáty je Judas. Judas hue' je' nidügti je majmetzpi discípulos huidibi Jesús yhuin'ijx. E je Judas müd ja'ty mayjáy, je huidibi anajty ti quexy je judío teedy mijtungmídpí etz je mijjädijc. E je mayjáy hue' anajty ajcxy müd ypujx etz quipy. ⁴⁸ Judas, je huidibi anajty c'iyecp Jesús, ti anajty jayijp yecy tüg ijxpejt huidibi müd jébi ajcxy ijxcapy Jesús. Jadu'n jayijp Judas ycapxtuñ müd je' ajcxy, e ymíñañ:

—Je jáy huidibi anajty ndzücxpich, yi' je' Jesús. Májtcix.

⁴⁹ Huin'it Judas nimijhuägy Jesús co capxocxa'ñ, chi ymíñañ:

—¡Huindzin!

Chi tzücx.

⁵⁰ Chi Jesús ñimay:

—Migüg, ¿na'amy co xyñimijhuägyich?

E co jadu'n nimay, chi mic'amy yi' ajcxy majch Jesús. Chi ajcxy yajnicxy tzумы mach.

⁵¹ E huin'it nidüg je Jesús ymigüg, juudy je ypujx. Chi tatzpujxtucy je teedy mijtungmídpí ytumbi. ⁵² Chi Jesús nimay je' ydiscípulo:

—Pidäg yi mbujx ma ytijc. Com pinjaty tziptumb müd pujx, nañ jadu'n y'ogipy müd pujx. ⁵³ ¿Nej ca' mnejhuíy co ich jébi nbijctzooyich cham adzu'x may ángeles, je huidibi xyñihuá'nibich ma nmidzipich? ⁵⁴ ¿Per nej ycixipy yca'pxipy nej miiñ jaaybety, jadu'n nej cham ytuñyí yjadyí müd ich ycixpi?

⁵⁵ Chi Jesús nimay je mayjáy:

—Miich ajcxy ti xyñidzonñyich mñid je pujx mñid je quiipy. ¿Nej mdijy ñich meetzpi o jāy yaj'öcpich? ñich jabom jabom anajty iññayich nyaj'ixpicyich miich ajcxy jiiby ma Dios ytijc. E ca' miich ajcxy xymajchich. ⁵⁶ Huinjihu' miich ajcxy co tüg'öciy yam ytuñyiy iyadyii ca'px tim jadu'n nej je profeta ajcxy cojaay jecy'ajty.

Huin'it nidüg'öciy je' ydiscípulos ajcxy yqueectay. Chi Jesús yhui'my naydügpajc.

Jesús ma naymujcpiidijc yhuinduu

⁵⁷ Je' ajcxy huidibi anajty ti mach Jesús, yajnicx ajcxy jim ma Caifás ytijc. E jim ma Caifás ytijc ma anajty ti ñayyöymujctáayigixy je escribas etz je mijjädijc ajcxy. ⁵⁸ E je Pedro anajty axam nicxy jigüegy jihuñy, ixti cooni yajja'ty ma Caifás ytiba'. Chi jim ytigiy. Chi ixtacy mñid je cuend'ajtpi ajcxy, je' co oc'ixa'ñ ocnejhuñhua'ñ nej Jesús yjada'ñ.

⁵⁹ Je teedy ajcxy mijtungmñidpi etz tüg'öciy je judíojäy mijtungmñidpi ajcxy huinma'ñ ixtaaygixy nej jëbi Jesús yajpocycägixy mñid ajcxy xihuñ, e jadu'n jëbi mooygixy yi o'cin. ⁶⁰ Mayjäy ñihuambejty Jesús mñid añi, per ni pin anajty ca' mñidity tiy'ajt co Jesús anajty ti ytundigooy mñid judíojäy ajcxy ycötujcin. Jac com jecy miin metz testigos mñid aanii. ⁶¹ Je' ajcxy ymñinañ:

—Jadayaabi yëydijc mñinañ co jëbi nyajhuindigooyich Dios ymijtzajptijc, e codugüg xii ti anajty nyaj'oyñyich jadüg'oc.

⁶² Huin'it je teedy mijtungmñidpi ytinayigiy, e ñimay Jesús:

—¿Nej co ca' m'adzooy? ¿Nej janch tiy'ajt nej jadayaabi metzpi testigo ymñina'ñ?

⁶³ Per Jesús ca' y'adzooy. E huin'it je teedy mijtungmñidpi ñimaayi:

—Ñimaayg ñich ajcxy Dios ycixpi, pen janch miich je' je Cristo je Dios y'ung.

⁶⁴ Chi Jesús ymñinañ:

—Miich jadu'n mñinamb. Nañ jadu'n ñich miich ajcxy ñimäy, co ñich je jāy huidibi tzoon tzajpjoty, miich ajcxy xy'ixipyich tzajpjoty ma Dios ymñic a'oy'amy. Nañ jadu'n miich ajcxy xy'ixipyich jocjoty co anajty nhuimbityich jadüg'oc ya naaxhuñ.

⁶⁵ Chi je teedy jacmijtungmñidpi oy yhuit huindzeczxy huinma'ch, chi ymñinañ:

—Jadayaabi yëydijc ti capxtigooy Dios. ¿Ti testigo njac-huaanim? Miich ajcxy ci'm ti mmidoogixy co yi' ti ycapxytigooy ma Dios, e mñinañ: ⁶⁶ ¿Nej miich ajcxy mñinaangixy?

Chi ajcxy ymñinañ:

—Ti ycapxytigooy, copicy co y'ögipy.

⁶⁷ Chi ajcxy huindzujy jijptzujy etz cojxy ajcxy. Chi jacjadyii huingojxy jijpcojxy. ⁶⁸ E chi ajcxy ñimay:

—Pen janch co miich je' je Cristo octiygapx pin ti xycoxy.

Pedro ymñina'ñ co ca'p Jesús icy'adyii

⁶⁹ Je huin'it moñi Pedro anajty iññay tibägujc. Chi ñimiini tüg töxy'anäg tumbi, chi ñimaayi:

—Miich nañ jadu'n ti mhuidity mñid Jesús je Galilea jāy.

⁷⁰ Chi Pedro ymñinañ mayjäyjoty:

—Ca' nhuinjihuñyich ti mgapxpy.

71 Pedro hue' anajty pidzimnɪp co ñimiini huingbi töxy'anäg. Chi je töxy'anäg nimay je' ymügütjɪc:

—Jadayaabi yëydjɪc ti yhuidity nañ jadu'n miid Jesús je Nazaretpɪ.

72 Chi Pedro jadüg'oc coyüch je Jesús cixyjot huiniɪjot yminañ:

—Ca' n'ixy'adyiɪjich yjiibi yëydjɪc.

73 Jac co hueeni, je jāy huidibi anajty ajcxy jimɪp ñimay ajcxy je Pedro:

—Janch co miich nañ jadu'n anajty miid mhuidity yɪ Jesús, com yɪ m'ayuc yɪ' xyajniquëxɪcp.

74 Chi Pedro tigiɪy capxpɪ janch oy ñinej minañ huiniɪjot:

—Ca' n'ix'adyiɪjich yɪ yëydjɪc.

E tim huin'itiy je tzey yaxígy. 75 Chi Pedro jāymejtzcoody jadu'n nej anajty Jesús ti ñimäyɪ: “Ma ca'ni anajty tzey yaxígy cham coodz, miich tugüg'oc xycoyützibich.” Chi Pedro pidzimy tɪba', e jiiby oy yäxy mibaad yjotcidägy.

27

Chi Jesús yajçiyeycy ma Pilato

1 E co oy yxiimiy yticxiy, chi je teedy mɪjtungmiidpɪ etz je mijjäydjɪc ajcxy quipxycapxy co yaj'ögaangixy Jesús. 2 Chi ajcxy yajnicxy cixoch oy ajcxy çiyecy ma Poncio Pilato je gobernador.

Judas ñayyöctiyɪ

3 Co je Judas je huidibi anajty ti çiyecy Jesús, co iɪxy co yaj'ögaanɪp Jesús, chi oy yjotmaybaatni. Chi conhuimbijty je iipxmajcpɪ plata meeñ ma je teedy mɪjtungmiidpɪ etz mijjäydjɪc ajcxy. 4 Chi Judas nimay je teedy mɪjtungmiidpɪ etz je mijjäydjɪc ajcxy:

—Hich ti ndundigooyich co ti ngiyecyich yɪ tudägyjäy ma miich ajcxy.

Chi je' ajcxy y'adzooy:

—Ti hich ajcxy n'occuent. Miich yɪ' mnigixp tiibi mduñ.

5 Huin'it Judas cohuijɪy je meeñ jiiby tzajtɪgoty. Chi ñicxy. Chi ñayyöctiyɪ.

6 Huin'it je teedy mɪjtungmiidpɪ yajpidigy je meeñ. Chi ajcxy ñayñimaayi miñ xyipy:

—Jadayaabi meeñ ca' yjëbity co nbidaacim ma ofrenda ñigidägy. Je' co yɪ' yjëjity je huidi ni'py ti tzoo'adyii.

7 Huin'it je teedy ajcxy tuñ je quipxycapxy co juyaangixy miid je meeñ tüg naax huidibi jāy ytɪp, tütznaax it, ma ajcxy yajnaxtigihuiipy pinjaty ca' ycogajpity jim Jerusalén. 8 Ixti chambaad jadu'n xii'adyii jejimbi it: Ni'py naax. 9 E jadu'n ycɪjx yca'px nej je profeta Jeremías yminañ: “E jadu'n ajcxy je' yajpidigy meeñ iipx majcpɪ plata meeñ (je' choou nej anajty ajcxy Israeljäy ti yajniçödugy), 10 e miid je meeñ ajcxy juy je tütznaax it, jadu'n nej anajty ti xy'ane'myich Dios.”

Pilato y'amidooy Jesús

11 Jesús yajpaady jim anajty ytinäy ma je gobernador Poncio Pilato yhuinduu, chi y'amidoohui:

—¿Nej miich je' judíos jāy xyrey'ajtp?

Chi Jesús y'adzooy:

—Miich jadu'n minamb.

12 Je judío teedy ajcxy huídibi mǎitungmǎidpǎi etz je mijjǎyǎdjǎc tzachxǎgǎixy Jesús ma je gobernador. Ni jadu'ñyǎ Jesús ca' y'adzooy.

13 Chi je Pilato ñimay Jesús:

—¿Nej ca' mmǎidooy nej yǎi' ajcxy yxǎiyǎi'?

14 Per Jesús ni jadu'ñyǎ ca' y'adzooy. E paady je gobernador oy mij huinmay, ni ca' ocnejhuǎiyǎi' ti ycapxǎipy.

Jesús ycǎdujcy y'o'cin

15 Je gobernador jadu'n anajty ycostumbre mǎidǎity co jimǎijt jimǎijt najtzmǎdzǎiy tǎg machyǎy pascua xǎijoty, je huídibi je mayǎy ti ytǎmychojcpy. 16 E jim anajty tǎg je machǎy huídibi anajty ajcxy ixǎy'ajttaayb, e yxǎijǎity Barrabás. 17 E co anajty jim ti ytǎgmujctayǎgǎixy, chi Pilato ajcxy y'amǎidooy:

—¿Pin miich ajcxy mdzojcpy co ñch nnajtzmǎdzǎihuibǎichǎi? ¿Najtzmǎdzǎiyǎich Barrabás o Jesús huídibi jǎy ajcxy ytǎjpy je Cristo? 18 Pilato ñejhuǎiyb anajty co mañ'ájtingǎix anajty ti cǎyǎjccǎixy Jesús.

19 Jimni anajty ñǎy Pilato me je ycǎtǎjctac co je ytǎxyjǎc tǎy'ajt quejxy ma yǎi', ymǎinañ: “Ca' huaad myajtzaachyтуñ yǎi' tudǎgyǎy. Je' co ñch amygoodz ti ngumǎyǎich janch jǎibic mǎid yǎi' ycǎixpi.”

20 Per je teedy ajcxy etz je mijjǎyǎdjǎc ti anajty capxyjotcǎidaccǎixy je mayǎy co huen yajnajtzmǎdzǎiy Barrabás etz huen yaj'ocǎixy Jesús. 21 Paady co jadǎg'oc je gobernador y'amǎidooy je mayǎy:

—¿Huídibi machyǎy mdzojcpy co nnajtzmǎdzǎihuibǎichǎi?

Chi je mayǎy y'adzooy:

—Najtzmǎdzi' Barrabás.

22 Chi Pilato y'amǎidooy je mayǎy:

—¿E nej ndunǎpyǎich yǎi' Jesús, huídibi jǎy ytǎjpy Cristo?

Huin'it ajcxy nidǎg'ócǎy y'adzoday:

—¡Yajcruutzpet yǎi' Jesús!

23 Chi Pilato ymǎinañ:

—Pues, ¿nej ti ytundǎgooy?

Per je mayǎy ñigoob y'adzoday:

—¡Yajcruutzpet! ¡Yajcruutzpet!

24 Pilato yjapubedaan Jesús, per co ijxy nejhuǎiy co je mayǎy ca' ni nej niducy. Hue' ajcxy oy ytǎgǎiy huambǎi jǎhuǎiybǎi, chach ñayñajtztǎjǎyǎgǎixy mǎid jot'an. Huin'it Pilato capxyñǎguejxy je huǎdz ñǎi. Chi ytǎgǎiy cǎbujp ma je mayǎy yhuinduu, e ymǎinañ:

—Ca' ñch ngo'adzohuǎipyǎich jadayaabǎi tudǎgyyǎyǎdjǎc y'o'cin. Miich ajcxy yǎi' mgo'adzoohuǎipy.

25 Chi je mayǎy y'adzoday:

—Ñch ajcxy ngo'adzohuǎipyǎich yǎi' y'o'cin mǎid n'ung anǎg etz n'ap n'oc.

26 Chi Pilato najtzmǎdzǎiy je Barrabás. Per Pilato ane'my co huen Jesús yajhuojp. E co yajhuojptay, chi cǎyǎjcy, co huen yajcruutzpedyǎi. 27 Chi Pilato ysoldados ajcxy yajñǎicxy Jesús ma agujctǎj. E jǎiby tǎg'ócǎy soldadtǎjǎc ñayǎymujcǎi ma Jesús. 28 Chi je soldado ajcxy je' yhuít yajñǎjenducy. Chi ajcxy yajñǎjeniy je tzapx huit huídibi je rey ajcxy yajtuumyǎb. 29 Chi ajcxy tacy tǎg corona mǎid apy. Chi ajcxy yajcǎjeniy ma Jesús. E huin'it ajcxy a'oy'amy yajcǎgabǎiy tǎg je paxy. Chi ajcxy huingojxtǎnay'ahuǎiy. Chi ajcxy ñixǎicy yajxǎicy, e ymǎinaangǎixy:

—¡Ooy ymǎijǎity yǎanchity, je judíos ajcxy yrey!

30 Chi ajcxy huindzujy jįptzujy. Chi ajcxy yajcįgajptucy je paxy, e yajcōhuojpįgy ajcxy. 31 E co ajcxy nįxiictay yajxiictay, chi yajnijenducy je rey yhuıt etz yajnijenįy je yci'm huit. Chi ajcxy yajnicxy ma yajcruutzpedaangįxy.

Co Jesús yajcruutzpejtį

32 E jįm ma anajty hueeni ti ytųyōy, jįm ti paty tųg Cirene yędyįc anajty yxįjity Simón. Chi ajcxy adzįp nįmay Simón co huen jaccapį Jesús ycruudz.

33 E co ajcxy yja'ty ma tųg je it yxįįjįp Gólgota, jadu'n yhuimbįdzįm Ōcpį Cohuajc Cōgop. 34 E jįm ajcxy Jesús jayaj'tųga'ń vino temhuidity mįd tzooy, jįgįx ca' jįhuįhuįp je tzaachypį. Per co uucmajch, chi jįhuį'ńybįc co ca' y'oy'uucnity.

35 E co anajty ajcxy yajcruutzpety Jesús, chi je soldadtįc suerte įjxy, pįn jębi ocję'adyį Jesús yhuıt, chi ycįxy yca'pxy jadu'n nej je profeta cojaay jecy'ajty: “Yajhuäcxįpy ajcxy ĩch nhuit e mįd ĩch nhuit ycįpxį įxįpy ajcxy suerte.” 36 E jįm anajty ajcxy įńaaygįxy cuend'ajtcįxy. 37 Je xįhuįn ayuc huidibį ajcxy yjaay ma Jesús ycōduu jadu'n ymįnań: “Jadayaabi je' Jesús, je judįos ajcxy je yrey.”

38 Quįpxy mįd Jesús ajcxy yajcruutzpejty metz meetzpi. Tųg a'oy'amy, e jadųg anajty'amy. 39 Je mayjįy huidibį ajcxy naxįyb anajty ma Jesús, ooy anajty oy ycōjįgįń, nįxįgy yajxįgy ajcxy Jesús, 40 ymįna'ń ajcxy:

—Bah, mįch huidibį Dios ytįc jįdaanįp, e codugįg xį huingbį myajpįdįga'ń. Mįch ci'm cham naygohuāńńį, e mįnac cruudzćįxy, pen janch mįch Dios xy'ung'adyį.

41 Nań jadu'n je teedy ajcxy huidibį mįjtungmįdpi, etz je escribas, etz je fariseos ajcxy etz je mįjįdyđįc nįxiicy yajxiicy ajcxy Jesús, ńayńmāayįgįxy mįń xyįpy:

42 —Huingbį ti cohua'ń, e ca' jaty nej ci'm ńaygohua'nįyb. Pen janch co yį' jęjity je Cristo je Israel jįy rey, huen mįnacy jadachambį ma cruudz, huin'ıt nmįbįcįm. 43 Yį' ti pidāgy ymįbįcįn ma Dios; huen jadachambį je Dios yajńįdzōgyį, pen janch Dios chogyį; yį' ti ymįna'ń co Dios y'ung'adyį.

44 Nań jadu'n je metzpi meetzpi ajcxy huidibį cruudzpejt quįpxy mįd Jesús nįxiicy yajxiicy ajcxy ooy Jesús.

Jesús y'ōgy cruudzćįxy

45 Co ycuįcxįjįy, chi ycoodzįyday tųg'ōcįy naaxhuińybį. E jadu'n je naaxhuińybį y'įjty coodz, įxti mįnacy yxį. 46 Huin'ıtįy Jesús ycapxyqueecy janch mįc ymįnań:

—Elį, Elį, ¿lama sabactani? —yį jadu'mbį ayuc hue' yhuimbįdzįmy: Dios Teedy, Dios Teedy, ¿ti co ti xy'ixmachįch?

47 Nįjęjity jįy huidibį anajty jįm yajpatp huingon ma Jesús co jadu'n mįdoogįxy Jesús y'ayuc, chi ajcxy ymįnań:

—Jadayaabi yędyįc cham yaaxtaayb je profeta Elįas.

48 Huin'ıt nidųg jįy ńįcxy janch poyįgy etz oy yajtzooń je pixy. Chi je pixy yajxoogy mįd je xun vino. Chi pidacy je pixy ma je paxyjįp. Chi yujctįy ma Jesús y'ahuac co huen ũgy. 49 Huin'ıt nįjęjity ajcxy ymįnań:

—Ixmatz, tzoc ajt oc'įxįm, pen nįmįnįp Elįas, pen janch yajńįdzōgyį.

⁵⁰ Jadüg'oc Jesús yaaxqueegy janch mic. Chi oy y'o'cni. ⁵¹ Co Jesús y'o'cy, tim huin'itiy jim ma Dios ytijc je mapxy yhuít yciitzhua'cxy tinä'amy. E nañ jadu'n je naaxhuiñybi ooy chuyuy müid ujx micpi etz je mijjatychaa oy jiiitzhua'cxy. ⁵² May öcpi jut y'ahuach etz yjugypijcy mayjáy tiibi anajty y'o'ccixy tiibi anajty mibijccixy Dios. ⁵³ Co Jesús yjugypijcy, chi je may'öcpi tiibi anajty jugypijccixy etz tiibi anajty pidzimgixy ma öcpi jut, chi ajcxy ytiigiy ma je Dios ycajp, je Jerusalén. E mayjáy ajcxy ijxy. ⁵⁴ Co je mic ujx oy ñaxy etz jac tijaty anajty ti ytuñyii ti yjadyii, chi je capitán etz müid jadyii ymigiügtijc huídibi anajty cuend'ajtp Jesús ooy ajcxy chigiy yjihuiy, e minaangixy:

—Janch tiy'ajt co yijiibi yëdyjc Dios yi' anajty y'ung.

⁵⁵ May anajty nañ jadu'n töxyjädyjc ymij'ijxcixy jiguem huídibi anajty ajcxy Jesús ti müddzoon jim Galilea. Yi' anajty ajcxy Jesús ypubejtp. ⁵⁶ E ma je' ajcxy jim anajty chooñity, María Magdalena, María huídibi Jacobo etz José ytaj'ajtpy, etz je huídibi Zebedeo y'ung ytaj'ajtpy.

Jesús yajnaaxtigiyi

⁵⁷ Co oy chuu'iiñi ycoodzyñi, huin'it chooñ ma Arimatea tüg comeeñyáy huídibi yxi José. E je' ymijnicxpejty anajty Jesús. ⁵⁸ Chi José ninicxy Pilato oy pijctzou Jesús ñinicx. Huin'it Pilato pidacy y'ane'min co huen möyii. ⁵⁹ Chi José yciigiyi Jesús ñinicx. Chi huinmojch müid tüg poob sábana. ⁶⁰ Chi yajnaaxtigiy ma je yci'm jut jemybi huídibi anajty ti yajtzejtztüty ti yajpáduty ma tüg tzahuingueetz. Chi adiguejctujcy je öcpi jut müid tüg tzaa. ⁶¹ Chi José ñicxni. E jim yhui'my María Magdalena etz je jadügpí María, y'iñáy ajcxy ymihuingon öcpi jut.

Je cuend'ajtpi ajcxy ma Jesús ñaaxtigiyi

⁶² E com jabom ma anajty Jesús ixiiybi ti y'ögy, ma anajty ti ni'ixiydäy müid je sábado xii ycixpi, chi je teedy ajcxy huídibi tungmüid etz je fariseos ajcxy ñayyöymujci ma je Pilato. ⁶³ Chi ajcxy yminañ:

—Huindzin, yi' iich ajcxy njäymejchpyich co je aniidacpi yminañ ma anajty yjuugyity co codugiig xii jugypigañ jadüg'oc co anajty ti y'ögy. ⁶⁴ E paady tunmay'ajt quexipy soldados ajcxy ma Jesús ti ñaaxtigiy huen cuend'ajtcixy ixti cooni tugüg xii bi paadipy. Ca' yjegyity co ñiminib adzuum agoodz je' ajcxy huídibi mijnicxpejtíp etz tzimguëgipy ajcxy Jesús ñinicx. E chi nicxy jäy ymina'ñ: “Ti yjugypicy je öcpi.” Chi anajty jac'anaxy je anii ti yjajtni ca'ydi je jayijpi.

⁶⁵ Chi Pilato ajcxy nimay:

—Miich ajcxy müid tüg picy soldados huídib cuend'ajtp ma miich ajcxy. Níxcix miich ajcxy yaj'adujccixy je öcpi jut, jadu'n nej m'a'ixiiygyxy.

⁶⁶ Chi ajcxy choni ma je Pilato. Chi ajcxy quejxy je tüg picypí soldados ma je öcpi jut. Chi ajcxy pidacy ijxhui'min ma je tzaa huídibi ajcxy je jut yaj'adiguejctujcy.

28

Co Jesús yjugypijcy

¹ E com jabom co yximiy yticxigy je domingo xii, huin'it ñicxy María Magdalena etz je jadügpí María ma Jesús ñaaxtigiy. ² Chi tüg mij ujx ñajxy. Huin'it ycidacy Dios tüg y'ángel huídibi tzomb tzajpjoty. Chi jidigejcy je tzaa ma je öcpi jut aguü. Chi y'ixtacy ma tzaa ñicx. ³ Janch adüicxp je ángel anajty yhuinjijp jadu'n nej huídizuc, e je yhuít janch poob'ögy. ⁴ E co

je soldados ajcxy ijxpaty je ángel, chi ajcxy ooy chuyuygooty. Chi ajcxy yhuim'y jahuengi ógy. ⁵ Huin'it je ángel y'adzooy je metz töxyjäy:

—Ca' miich ajcxy mdzigíy. Hich nejhuiybich co miich ajcxy m'ixtäy Jesús je huidibi ajcxy yajcrudzpejty. ⁶ Per ca' je' cham ya. Ti je' yjugypicy, jadu'n nej ymínañ. Míñ miich ajcxy oc'ix ma ñaaxtigíy. ⁷ Nicx miich ajcxy jottigooyb ma je' ydiscípulos ajcxy e nima': "Ti Jesús yjugypicy jadüg'oc, e yí' ñicxip jim Galilea e jim ajcxy mmídnaybadíyb." Hich miich ajcxy yam nnímaaygíxy.

⁸ Huin'it je töxyjäy ajcxy chooñ janch poyígy ma anajty ti ñaaxtigíy Jesús. Chi ajcxy ñicxy miid tzigi'ñ, per agujc jotcuyc. Poyígy ajcxy oy tiy'ajt yecy ma je discípulos ajcxy. ⁹ E jim anajty je metzpi töxyjäy ytüyóy, timetini Jesús ñayguëxici ma je' ajcxy yhuinduu. Chi Jesús ajcxy capxocxy. Chi je' ajcxy mihuingoñ Jesús etz mineeni je' ytecy. Chi ajcxy huindzigíygyxy. ¹⁰ Jesús mínañ:

—Ca' mdzigíygyxy. Nicx miich ajcxy nima' je nmigügtjicich co huen ajcxy nicxy jim Galilea, e jim naybadíybich miid yí' ajcxy.

Huidibi ajcxy je soldadotijc ñigapx

¹¹ E tüyöybñi anajty je töxyjäy nimetzpi co nijëjity je soldados ajcxy chooñ ma Jesús ñaaxtigíy ñicxy jim Jerusalén, miidmiydäga'ñ je teedy huidibi tungmiidpi nej anajty ti ytuñyíi ti yjadyíi ma Jesús ñaaxtigíy. ¹² E huin'it je teedy ajcxy ñayyóymujctayi miid je mijjäydjic, tunaangixy quipxy capxy. Huin'it je teedy ajcxy etz je mijjäydjic moy ajcxy je soldados may meeñ. ¹³ Chi ajcxy nimay:

—Miich ajcxy mína'nip co maab anajty miich ajcxy mijcoodz co ymiñ Jesús ydiscípulos ajcxy etz tzímgueeci Jesús ñinícx. ¹⁴ Etz pen ymidooyb anajty yí gobernador, ich ajcxy ngapxjotcidägich, jigix ca' nej xytúngixipy.

¹⁵ E huin'it ajcxy je soldados ycidigíyí je meeñ. Chi ajcxy ñicxy cuyduñ jadu'n nej anajty ajcxy ti ñimáyíi. E íxti chambaad jadu'n judíojáy capx je ayuc.

Huidibi Jesús yajnibijc ydiscípulos ajcxy

¹⁶ E jadu'n ajcxy ñicxy je nimajctügpí Jesús ydiscípulos ajcxy jim Galilea. Chi ajcxy ñicxy ma je cógop jadu'n nej anajty Jesús ti ñimáyígyxy. ¹⁷ E co ajcxy ijxpaty Jesús, chi ajcxy oy huindzigíy. Per jim nijëjity huidibi ca' mibijcy co anajty yjëjity. ¹⁸ Huin'it Jesús ymíjhua'cy ma yí' ajcxy, e nimay:

—Hich ti nyajmóyich je cötujcin jüby tzajpjoty etz ya naaxhuiñ. Hich ti nyajmóyich je mij cötujcin, jaydëbi n'ane'myich jüby tzajpjoty etz ya naaxhuiñ. ¹⁹ E paady nicx miich ajcxy huindu'my naaxhuiñ capxhuäcxíx je ayuc, jaydëbi jäy ajcxy xymibigípyich. Tüg'óciy jäy ajcxy huidibi xymibijcpich myajñibedipy ajcxy miid Dios yxí, Dios y'ung yxí, etz miid je Espíritu Santo yxí. ²⁰ Miich ajcxy myaj'ixpigípy je mayjäy co copicy cuydunipy ajcxy ich ngötujcin tüg'óciy jadu'n nej ti n'ane'myich miich ajcxy. E miich ajcxy mnejhuíyb co nmíd'ityich miich ajcxy huinixí huinítiempo, íxti mabaad naaxhuiñybi anajty ycxipi yti gooy. Jibaad ycíxy. Amén.

SAN MARCOS

Jaayhui'my Jadu'n Nej Jesucristo Ytun Yjajti

¹ Jadu'n oga'ñ chondacy je oybi ayuc t'iy'ajt jadu'n nej Jesucristo, je Dios y'ung ytun etz yjajti.

² Je Dios y'ayucnajtzcapx'iybi je Isaías jecy'ajty jayhui'my jadu'n nej Dios nimay je Cristo:

Nguexaamy'ich ñch ngogapxy jayijp ma nidüg nidüg cajp ma miich mñicxa'ñ jac'axam, jigix jëb je cogapxy nimähuipy je jäy ajcxy co huen nayñi'ix'iyigixy ma yjot yhuinma'ñ müd miich ycixpi, jadu'n nipaady nej jihuüy jäy ajcxy ni'ixiy tü'aa co tüg rey yjada'ñ.

³ Nañ jadu'n jadüg it Isaías jayhui'my jada ayuc ma jadu'n yminañ:

Jim m'ijtig'itudum jäy ajcxy midoy co tüg jäy y'ayuccapxhuäcxy, jadu'n yminañ: “Nayñi'ix'iyigix ma mjot mhuinma'ñ ajcxy jaydëb naybaatim müd ajt nHuindzin Dios. Ixmájtzcixy yi mjibicjot mjibichuinma'ñ. Jadu'n nipaady nej jäy ajcxy yajtiy tü'aa huídibi ooy y'adijy y'a'och.”

⁴ Jim m'ijtig'itudum anajty Juan je Bautista miñ e ytig'iy mayjäy yajñibejtpi. Chi Juan capxhuäcxy Dios y'ayuc ma je mayjäy ajcxy huídibi anajty mimb ñibejtp. Juan ayuc capxhuäcx co copicy co jäy ajcxy huen jothuimb'ijtcixy etz ixmájtzcixy ajcxy je yjibichuinma'ñ, etz ñibejtcixy, jigix jëbi Dios yhuinmecx'ib ajcxy ypocy. ⁵ Tüg'óciy je mayjäy ajcxy huídibi anajty tzinaayb jim Judea ñaaxjot etz jim Jerusalén mimb anajty ajcxy ma Juan, e y'amidoo'ijty anajty ajcxy je'y'ayuc. Co je jäy ajcxy capxpiz'my nej anajty ypocytúngixy, chi Juan yajñibejty ajcxy ma je Jordán mijñi.

⁶ Juan hue' anajty yhuít'ajtpy camello ñib'ic, e nañ jëyim anajty müd ñayhuññiyii, e hue' anajty yjicx'ajtpy mu' etz uxpäg. ⁷ Juan ycapxhuäcxyp anajty Dios y'ayuc ma je mayjäy, e yminañ:

—Ñich jayijp ti nmiñich ngapxhuäcxy Dios y'ayuc. Jac'axam minipy tüg jäy huídibi jacñigi mic'ajt müdity ca'ydi ñich, ca' xypaadyich nicxy nguejy'ich yi' ycighuin. ⁸ Ñich ti nyajñibety'ich miich ajcxy müd ñi. Per je jäy huídibi yjacmüd Dios ymic'ajt, ca'ydi ñich. Yi' xyaj'adig'ihuip xyajjotig'ihuip Dios yjihu'ñ ymic'ajt, jadu'n nipaadip nej jihuüy xyajñibedip müd Dios yjihu'ñ ymic'ajt.

Co Jesús ñibejty

⁹ Je huin'it x'ii huin'it tiempo Jesús chooñ ma je cajp huídibi yx'ii Nazaret, jim Galilea ñaaxjot, e ymiñ ma Juan el Bautista anajty yajpaady. Huin'it x'ii Juan yajñibejty Jesús ma je Jordán mijñi. ¹⁰ Pidzimb anajty Jesús ma je mijñi, e tim huin'ityi Jesús iix co je tzajp anajty y'ahuäch, e iix je Espíritu Santo chooñ tzajpjoty, e ycidägy ma yi'. Jadu'n je Espíritu Santo yquëx'igy anajty nej tüg muuxy. ¹¹ Chi Jesús midooy capxy ayuc choñ tzajpjoty, nimäyii:

—Ñich miich n'ung'ajtpy. Ooy ñich miich ndzocy njihuüy. Ooy jotcuyc nayjihuy'ijich müd miich.

Je mujcu' tuñ ijxta'ni ma Jesús

12 Huin'it mic'amy je Espíritu Santo yajnicxy Jesús mǎjtigǎduum. 13 E hue' Jesús yhuimiy jim mǎjtigǎduum huixchiguǎpx xǎi ahua'n iyujc agujc. Huin'it je mujcu' jot'ijxy yhuinma'n'ijxy je Jesús. Chi je ángeles ajcxy miñ ypubejty ypuǎdigǎy je Jesús.

Jesús ytung yajtzondǎgy jim Galilea

14 Ti anajty Juan yajpǎdǎgy pujxtigoty, jac'axam Jesús ñicxy jim Galilea. Jim Galilea Jesús capxhuǎcxy Dios y'ayuc etz yi Dios y'ané'min. 15 Jesús yminañ:

—Ti je xǎi je tiempo yhuaad'ajtni. Ti nigoody je xǎi je tiempo mina Dios pǎdǎga'n yi' y'ané'min ya naaxhuiñ. Jothuimbijtcix ajcxy, etz ixmajtcix ajcxy mjibicjot mjibic-huinma'n. Mibijccix Dios y'ayuc jadu'n nej jǎb ajcxy m'alma ñǎdzǎgipy.

Jesús huodzoñ mǎdaax jǎy huidibi anajty acxmajtzp

16 Jesús huidijtp anajty ma je mejypa' huidib yxǎi Galilea mejy, co oy'ijxpaady Simón etz y'uch Andrés. Simón etz Andrés acxmadzǎi anajty ytung'ajtpy, ytimǎdacy anajty y'acxmadzǎi'n mejyjoty co ajcxy Jesús ijxpaty. 17 Chi Jesús nimay Simón etz Andrés:

—Min mǎid ñch. ñch miich ajcxy huingbi tung nmǎhuipy. Jadu'n mdung nipaadip nej jihuǎy mjǎymǎjtcixipy.

18 Mic'amy Simón etz Andrés ajcxy ixmajch y'acxmadzǎi'n, e ñicxy ajcxy mǎid Jesús.

19 Chi Jesús yjacyǎy anajty hueen, e ijxpaty Jacobo etz y'uch Juan, je Zebedeo ajcxy ymang. Je Jacobo etz Juan tumb anajty barcojoty. Hue' anajty ajcxy yaj'oyǎyb je' y'acxmadzǎi'n. 20 Chi Jesús mijhuooy ajcxy Jacobo etz Juan, e nimay co huen nicxy mǎid yi'. Mic'amy je' ajcxy ixmajch yteedy, je Zebedeo, barcojoty mǎid ytumbi, chi ajcxy ñicxy mǎid Jesús.

Tǎg jǎy huidibi anajty jibic espíritu mǎid

21 Huin'it Jesús mǎid ymigǎgtǎjc yja'ty jim Capernaum. Je huin'it sǎbado, je poocxin xǎi, Jesús ytigǎy ma je judǎojǎy ajcxy ñaymujctac jim Capernaum, chi yjǎyay'ixpijctzondacy. 22 Je mayjǎy ooy ajcxy jihuǎy huinmay je ayuc huidibi Jesús anajty ajcxy yaj'ixpijcp. Com Jesús hue' anajty yaj'ixpicy jadu'n nej jihuǎy yci'm'ané'min mǎidity. Ca' Jesús anajty yaj'ixpicy jadu'n nej je jǎy ajcxy huidibi yaj'ixpijcp anajty Moisés ycǎtǎjcin je jǎcyip. 23 E ma je naymujctac tǎg yǎyǎjic huidibi mǎid anajty ca'oybi. Chi je ca'oybi ooy mic ycapxcoody, e yminañ:

24 —¿Ti co xy'amayǎy ñch ajcxy, Jesús huidibi tzomb jim Nazaret? ¿Nej ti mmiñ co xyajhuindigoyáangixyichí? ñch n'ijxajpy miich, e nejhuiybich co miich je' je Huǎtzpi Dios.

25 Chi Jesús ix'ojy je ca'oybi, e nimay:

—Amon miich, e pǎdzimb ma jada yǎyǎjic.

26 Huin'it je ca'oybi yajyajch yajquǎdy je yǎyǎjic, e mic yaaxqueegy, e ypidzimy ma je yǎyǎjic. 27 Tǎg'ǎcǎy je mayjǎy jǎiby ma je naymujctac ooy ajcxy ñay'adzǎgǎy, e ñayñimaayǎ ajcxy miñ xyipy:

—¿Ti jada' yi'? Jada yǎyǎjic ymǎid jemybi ixpijcin. Yi' mǎid mic'ajt etz ane'm'ajt, paady ycixpi yi' ane'my yi' ca'oybi, e ycapxmidoohuip.

28 Mic'amy je mayjǎy ajcxy huidijaty tzinaayb ma tǎg tǎg cajp jim Galilea nejhuiy ajcxy nej Jesús ytuñ, e cǎmaaygixy Jesús.

Jesús yajtzǎgy Simón Pedro ymǎid tǎxjǎybi

²⁹ Tim huin'ítiiy Jesús ypidzimy ma je naymujctac, chi ñicxy miid Jacobo etz Juan jim ma Simón etz Andrés ytijc. ³⁰ Simón ymíd töxyjäybi píjciip anajty. Cijx'am anajty y'ity, e mic anajty ooy ytoyii. Tim huin'ítiiy Jesús ñimaayi co Simón ymíd ooy mic ypiigyii. ³¹ Chi Jesús nimijhuägy je pa'mjäy. Chi majtzi yci', e huijtzigy. Tim huin'ítiiy yi toyii y'ixmajtzi, e chi yajcay yaj'uucy Jesús etz ymigügtijc.

Jesús yajtzögy may pa'mjäy

³² Co xii oy ycidacni, e chuu'iiyñi, chi je mayjäy miid miñ ajcxy ma Jesús tüg'óciy pa'mjäydijc, etz huidijaty ajcxy ca'oybi ymiid. ³³ Tüg'óciy je mayjäy ajcxy ma je jimbi mij cajp nimujcy je tijc ma Jesús anajty ti yjättägy. ³⁴ Jesús yajtzoctay tüg'óciy je may pa'mjäy huenytimytiibá'mity, etz yajpidzimy may ca'oybi majaty jäy ajcxy. Per Jesús ca' anajty a'ixiy nicxy je ca'oybi ñigapxyii, com y'ixy'ajttaayb anajty ajcxy Jesús.

Jesús y'ayuc tiiy'ajt capxhuäcxy jim Galilea

³⁵ Tim mooñi Jesús ymaybidigy, ca' anajty yximiiyñi, e ypidzimy ma je cajp. Chi ñicxy ma tüg mijtig'iiduum Dios mibiictzoobi. ³⁶ Huin'it je Simón etz je ymigügtijc ooy ajcxy ja'ijxtäy Jesús. ³⁷ Co ajcxy paty je Jesús, chi ajcxy nimay:

—Tüg'óciy je mayjäy xyjadim'ixtäy.

³⁸ Chi Jesús nimay Simón etz je ymigügtijc ajcxy:

—Tzoc ajt jámim ma yi jacjadyii cajp huinduy agonbi, jaydéb ngapxhuäcxibich Dios y'ayuc nañ jadu'n ma yi jäy ajcxy jim. Paady ycixpi ndzooñich tzajpjoty, jigix jébi ngapxhuäcxibich Dios y'ayuc.

³⁹ Jesús nicxp anajty ma nidüg nidüg cajp jim Galilea ycapxhuäcx anajty Dios y'ayuc ma nidüg nidüg judíojäy ñaymujctac, e yajpidzimy anajty ca'oybi majaty jäy.

Jesús yajtzögy tüg jäy nibützpa'mmiidpi

⁴⁰ Tüg jäy huidibi ymiid anajty jibic pützpa'm, je micpi, chi nimijhuägy Jesús, e ycojxtinay'ahuuiy ma Jesús yhuinduu, ymiinañ:

—Pen miich jadu'n tzojcpy, jéb xyajtzögich.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñinicx, e ymiinañ:

—Ndzojcpyich, cham nyajtzögy.

⁴² Co Jesús jadu'n ymiinañ, chi mic'amy je jäy huidibi anajty miid je jibic püdz chögy. ⁴³⁻⁴⁴ Mic'amy Jesús ycapxcijxy miid je jäy huidibi anajty ti chögy, e nimay:

—Ix pin myajnimäy co ti mdzögy. Nicx jayjip jiiyby ma Dios ytijc ma je judío teedy ajcxy, e mo' Dios yhuindzigi'ñ jadu'n nej Moisés ycötújcín ane'my, jigix jébi huädz mbidzimipy ma Dios ycötújcín. Cuydun miich huidibi Moisés ñajtz'ane'miiy jecy'ajty, jigix jébi je mayjäy ajcxy nejhuñhuip co ti mdzögy.

⁴⁵ Per je yëydijc ca' capxymidoy Jesús. Co ñicxy, chi ytiigy capxy yajyöybi jadu'n nej anajty ti yajtzögyii. Com je mayjäy nejhuñyib huidibi anajty Jesús ti tuñ, paady ycixpi Jesús ca' anajty ocjajtni nej ytiñhuipijxna' jigue'xna' majaty cajp. Hue' anajty huidity ma ca' pin chinäy. Per miñ anajty y'oy'ixyii huenytimypinjäyity, chooñ ma nidüg'óciy cajp huinduy agonbi.

2

Jesús yajtzögy tüg jäy cima'tpi tecyma'tpi

¹ Ti anajty xii tiempo ñajtzñin'icxiyñi co Jesús yhuimbijty jadüg'oc jim Capernaum. Je mayjäy ñejhuuyb anajty co Jesús yajpaady ma tüg tijc. ² Chi mic'amy mayjäy ñayyömuyci ma anajty Jesús yajpaady, e ca' anajty tig'ydac ma je tijc, miid co tzach mayjäy anajty ti miingixy. Y'adujtaayb anajty ajcxy je tijc'aguu. E Jesús ycapxhua'xyp anajty Dios y'ayuc. ³ Huin'it xii, midaax yëydijc ciyimiñ cijx'am ma Jesús yajpaady tüg pa'mjäy huidibi yci' ytecy ti yxujxtäy anajty. ⁴ E com ca' anajty ni nej y'oyiy nej yajjadip ajcxy ma Jesús je pa'mjäy, je' co anajty chach újtzity je tijc miid je mayjäy, chi ajcxy yajcöhuaach hueeni je tijcñicx ma anajty Jesús yajpaady. Chi ajcxy cödiyñajxy je pa'mjäy cijx'am. ⁵ Co Jesús ijxy je jäy ajcxy ymibijcin, chi nimay je pa'mjäy:

—Migügich, yi mbocy ti yajhuinmecxtäy.

⁶ Per nijëjity huindzindijc huidibi ajcxy nijaydutr anajty Dios ñecy co ajcxy midoy nej Jesús ymina'ñ, chi ajcxy ymina'ñ jotjoty huinma'ñyoty: ⁷ “¿Nej co jada jäy jadu'n ymina'ñ co ti yajhuinmecxy jada pa'mjäy ypocy? Capxtigooyb yi' miid Dios. Com ca' nipinjäy jëb ypocyhuinmecxy. Tügpaic Dios yi' huidibi jëb ypocyhuinmecxy.” ⁸ Per Jesús ñejhuuyb anajty nej je' ajcxy chachmina'ñ jotjoty huinma'ñyoty, paady mic'amy yminañ:

—¿Na'amy co mdzachhuinmaaygixy? ⁹ ¿Huidibi jada jac'ooy co nnimäyich yi pa'mjäy: “Ti mbocy yajhuinmecxytäyi.” O jac'ooy co nnimähuibich: “Pidig, e yajpidig yi mdögy, e tüyöy?” Tú'ciy yi'.

¹⁰ Chi Jesús yjacminañ:

—Jadachambi janchtiy nyajquëxiga'ñich co ñich, je jäy huidib tzoon tzajpjoty, e huidibi cham yajpaady ya naaxhuiñ, nmüdidich mic'ajt jaydëb nhuinmecxyich jäy ypocy.

Co Jesús jadu'n yminañ, chi nimay je pa'mjäy huidibi yci' ytecy anajty xuxy:

¹¹ —Ñich miich yam jadu'n nimäy: “Tinayig, yajpidig yi mmabejt e nicx ma mdijc.”

¹² E mic'amy je pa'mjäy ypidigy, e yajpidigy ymabejt, chi ytüyöchoñ jiiy ma je mayjäy ajcxy anajty y'ixy yhuindicxy. Paady ycixpi tüg'óciy je mayjäy ooy jihuuy huinmay etz jäymejch ojadajty ajcxy Dios, yminaangixy:

—Niminaabi ajt jadu'n nga'íxim mijhuinma'ñ jadu'n nej cham ti n'íxim.

Jesús nimay je Leví: “Pajamgich”

¹³ Chi jadüg'oc Jesús ycajppidzimy, ñicxy jim ma mejypa'. E co mayjäy ñayömuycy jim ma Jesús anajty yajpaady, chi Jesús yaj'ixpijc je mayjäy. ¹⁴ Co Jesús yjactüyöy anajty, chi ijxpaady Leví je Alfeo ymang. E Leví ññaayb anajty ma je yajcogüejttac jäy yajcogüejtp anajty. Chi Jesús nimay Leví:

—Pajamgich.

Tim huin'itiy Leví ytinayigy, ixmajch ytung, e panicxy Jesús.

¹⁵ Jadu'n yjajti co tüg xii Jesús caayb anajty me Leví ytiyc. Mayjäy huidibi ytung'ajtpy anajty yajcogüedi, etz jacadyii jäy huidibi anajty tundigooyb miid judío jäy ycostumbre y'ñaaygixy ma je caydac quipxy miid Jesús etz je' ydiscípulos ajcxy. Com may jäy anajty ooy Jesús tzach miid huidijtcixy.

16 Jım anajty ma Levı ytıjc nijęıty fariseojäy, je huindzındıjc huıdibi tzach padumb judıojäy ycostumbre. E co je' ajcxy ijxy co Jesús caayb uucp anajty tıgmucy mııd tüg'ócıy je mayjäy ajcxy huıdibi tundıgooyb mııd judıojäy ytıy'ajt ycötújcin, etz yajcogüejtpıdıjc, chi ajcxy nigapxy Jesús ydiscıpusos, je' ajcxy huıdibi mıjnicpejtp anajty Jesús, nımay ajcxy:

—¿Nej co Jesús mııch ajcxy mHuindzin ycaymucy y'ucmucy mııd yı yajcogüejtpıdıjc ajcxy, etz jacjadyıı jäy ajcxy huıdibi tundıgooyb mııd judıojäy ycötújcin?

17 Co Jesús jadu'n mıdoy nej je fariseo jäy nigapxyıı, chi ajcxy nımay:

—Ca' tzocy tzoymbı yı jäy ajcxy huıdibi mıc'ajtp oy'ajtp. Yı' janchtıy yı huıdibi ajcxy yuuba'm ymııd chojcpy ajcxy tzoymbı. Nañ tım jadu'n yı jäy ajcxy huıdibi ca' ypocymıdıty, ca' ajcxy tzocy pocyhuınmeecxin. İch ti nmiñich co nyajjothuımbıdıpyıch pocyjäydıjc. İch ca' ti nmiñich co nyajjothuımbıdıpyıch oyjäydıjc tudägyjäydıjc.

Jesús yaj'amıdoogıxy nej co jäy y'ity jaygay

18 Jadu'n yjajtı tüg tiempo ayuu'ijtp anajty je jäy ajcxy huıdibi mıjnicpejtp anajty Juan je Bautista. Nañ jadu'n ayuu'ajtp anajty je fariseojäy ajcxy. Chi nijęıty ajcxy ymiñ ma Jesús e amıdoy:

—¿Nej co yı jäy ajcxy huıdibi mıjnicpejtp ajcxy Juan etz nañ jadu'n yı fariseojäy ajcxy ayuu'ajtp ajcxy, e je jäy ajcxy huıdib mııch xymıjnicpejtp, ca' y'ayuu'ajtcıxy?

19 Chi Jesús y'adzooy:

—Co ya nyajpaadyıch ya naaxhuiñ, ca' ycopıcity co ĩch ndiscıpusos ajcxy y'ayuu'adıp. Jadu'n nıpaady nej jäy ajcxy huıdibi pıjcin nıxııdumy ca' ajcxy y'ayuu'aty ma yam yı pıjcin nıxııduñ, e penı ca'ni je pıjcpı ymıgügtıjc y'ixmajtztäyıı. Namı je pıjcpı ca'ni choñ, chi ca' pın y'ayuu'adañ huıdibi nıxııdum je pıjcin. 20 E paadıp je xıı je tiempo mına ca' nmiđ'ıdañıch ya naaxhuiñ yı' huıdibi ajcxy xymıjnicpejtpıch, e huın'ıt ajcxy y'ayuu'adaangıxy.

21 Com jemybi Dios y'ayuc nyaj'ıxpıcpyıch, paady ca' ytügyı mııd je jęcyıp ayuc huıdibi je fariseo jäy ajcxy yaj'ıxpıjcpy. Jadu'n nej mııch ajcxy mnejhuıy co ni pın ca' agıyıy tuc huit mııd tüg pedaas jemy huit, con je' co je jemy huit nıımujcp je', e chi nıgı najtzcıdzıhuıp je tuc huit. 22 E nañ ni pın ca' jęb huaad pıdıgy jemy vino ma tuc cochac. Je' co je vino jemybi ycıdzamy je tuc cochac, e chi y'ıxyojtähuıp je vino etz je cochac ñıtıgoydáhuıp. Hue' janchtıy jęb ajcxy pıdıcy jemy vino ma jemy cochac.

Je discıpusos ajcxy yajmújıxy je moc cojc sábado xıı

23 Tüg sábado xıı Jesús mııd ydiscıpusos ajcxy ñaxııy ma tüg trigo cam. E huın'ıtıyı je ydiscıpusos ajcxy ytıgıy je trigo tujcp. 24 Co je fariseo jäy ajcxy ijxy jadu'n nej Jesús ydiscıpusos ajcxy anajty tujcmujc trigo tım, chi ajcxy nımay Jesús:

—İx mııch. ¿Na'amy co mııch mdiscıpusos tıngıxy huıdibi judıo ycötújcin capx'adujcpy sábado xıı?

25 Per Jesús ymınañ:

—¿Nej ca'mııch ajcxy mguendtuñ Dios y'ayuc co mnecycapxy, jadu'n nej David tuñ tügtecy jecy'ajty, co David etz ymıgügtıjc yuu'ogaangıxy anajty? 26 Je huın'ıt tiempo jecy'ajty co je judıo teedy Abıatar mıjtungmıdıpı anajty ma Dios ytıjc, chi David ytıgyı ma Dios ytıjc, e caay

je tzajcaagy huidibi ti anajty yoxy ma Dios yhuinduu. Dios ycötújcin ymínañ co je teedy ajcxy ycaagy'ajtpy jada tzajcaagy, ca' jac'ooyñipin. Nañ jadu'n David moy je tzajcaagy je jāy huidib anajty ajcxy ymíid.

²⁷ Nañ jadu'n Jesús yjacmínañ:

—Hich, je jāy huidibi tzoon tzajpjoty, nmíidich ané'min, jaydëb nimäyich je jāy ajcxy ti jëb túngixy sábado xii. ²⁸ Com Dios ti ixmach je sábado xii, paady ycixpi, hich je jāy huidibi tzoon tzajpjoty, nmíidich ané'min jaydëb nimäyich jāy ajcxy co jëb tijaty tuñ sábado xii.

3

Je yëydijc huidibi anajty yci' tídzip

¹ Jesús ytigiy jadüg'oc ma je judío naymujctac. Jiiby anajty tüg yëydijc huidibi anajty ymíid tüg yci' títz. ² Je fariseojäy jilby ma je naymujctac y'ijx'ijtpy anajty Jesús, co anajty nejhuñhua'n pen Jesús yajtzögamy je pa'mjäy sábado xii, jigix jëbi ajcxy xihuip Jesús co ti ytundigoy míid judíojäy ycötújcin. ³ Jesús nimay je jāy huidibi míid tüg yci' títz:

—Pidig, min ya ma hich.

⁴ Huin'it Jesús y'amídoy je jāy ajcxy e nimay:

—¿Nej miich ajcxy mínaangixy: Nej jëbi jada nduñich je oybi o je jibicpi sábado xii joty? ¿Jëbi nyajtzögich jāy o jëbi nyajtigoyich jugy'ájtín?

Per je jāy amoñ ajcxy ijty, ca' ajcxy je' y'adzooy. ⁵ Huin'it Jesús huindixpejty je jāy ajcxy míid chip y'ahua'n, e míid jotmay, je' co ooy ajcxy jotjuuñity, e chi nimay je yëydijc:

—Xajtiu yi mgi'.

Chi je yëydijc xajty yci', e chi yci' oy chögy. ⁶ Chi je fariseojäy ypidzimday ma je naymujctac, ooy yjotmädy ajcxy, e ñicxy ajcxy ñaymújcip míid je jadügpic judío huindzindijc huidibi ymíjnicxpejt je rey Herodes. Huinma'n ixtaayb anajty ajcxy nej jëb ocyaj'ögip Jesús.

Mayjäy ma tüg nñiba'

⁷ Per Jesús chooñ míid yi' ydiscípulos ajcxy, ñicxy ma mejypa'. E ooy mayjäy huidibi ajcxy tzomb Galilea ñaaxjot etz Judea ñaaxjot panixy ajcxy Jesús. ⁸ Nañ jadu'n mayjäy panix ajcxy Jesús huidibi ajcxy tzomb jim Jerusalén, huidibi ajcxy tzomb jim Idumea ñaaxjot, huidibi ajcxy tzomb jim Jordán mijniñ nñaxy ma xii ypidzimyb, huidibi ajcxy tzomb jim Tiro etz Sidón ñaaxjot. Ñicxtäy je mayjäy ma Jesús yajpaady, com ñejhuñyb anajty ajcxy je mijhuinma'n huidibi Jesús anajty ytumyb. ⁹ Com tzach mayjäy anajty ymíingixy, paady Jesús ni'ane'mdiy ma yi ydiscípulos ajcxy tüg barco ma jëb inñay, ca'ty je mayjäy ooy y'adijyíi y'agodiyíi. ¹⁰ Com Jesús ti anajty yajtzögy may jāy, paady ycixpi tüg'ócíy je pa'mjäy nimujcy Jesús, adzip tzachnidonaangixy. ¹¹ Co je jāy ajcxy huidibi ca'oybi ymíid ijspxty Jesús, chi ajcxy ñayhuíojtaci ma Jesús yhuinduu, e mic ycapxcooty, ymínaangixy:

—Miich je' Dios y'ung.

¹² Per Jesús nimay mictägy je ca'oybi ajcxy co ca' huaad nigapxcixy nimíydaaccixy pin je' anajty.

Jesús huin'ixy majmetzpi discípulos

¹³ Huin'it Jesús ypejty ma tüg cögor, e capxyñiguexy co huen miñ ma yi' je ymígütijc huidibi yhuin'ixamy co ytunam míid yi'. Chi ajcxy ymiñ ma Jesús. ¹⁴ Chi Jesús yhuin'ijx majmetz ajcxy huidibi ymíid'idamy, e huidibi

yquexamy y'ayuccapxhuácxp. ¹⁵ Jesús moy je majmetzpi discípulos ajcxy huídibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶⁻¹⁷ Jada je nima-jmetzpi discípulos ajcxy yxii nidüg: Simón, je huídibi Jesús yximoy Pedro; Jacobo miid y'uch Juan, yi Zebedeo y'ung y'anäg, je huídibi ajcxy Jesús yximoy Boanerges (je ayuc Boanerges jadu'n yhuimbizimy: "Enee ymang"). ¹⁸ E jacjadyii huídib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huídibi Alfeo ymang'ajtpy; Tadeo; e je jadüppi Simón, je cananista. ¹⁹ Nañ jadu'n Jesús huin'ijxy Judas Iscariote, je huídibi agojix c'yejc Jesús ma ymidzip.

Yajnijccixy Jesús co miidity mujcu' ymic'ajt

(Co jadu'n huin'ixtaay je majmetzpi discípulos ajcxy), Jesús ytigüy ma tütjtc miid yi' ajcxy. ²⁰ Huin'ityi tzach mayjäy ñayyöymújcigixy ma je tijc ma Jesús y'ity, ixti Jesús etz ymigügtjtc ca' y'oyiy nej jëb ycaaygixy y'uuccixy. ²¹ Co Jesús y'amigügtjtc jadu'n nejhuüy, chi ajcxy nimiiñ Jesús yajnicxaangixy anajty mach, com hue' anajty t'jtcixy co Jesús ylociib.

²² Nijëjity escribas ajcxy, je huindzindjtc huídibi nijaydutp anajty Dios ñecy, miin ma Jesús co choñ ajcxy Jesusalén, yminaangixy:

—Jada Jesús ymiid Beelzebú, je ca'oybi yhuindzin, ma y'aa yjot. E yi' yajpidzimy je ca'oybi ajcxy ma jäy ajcxy yjothuinma'ñ miid Beelzebú ymic'ajt.

²³ Chi Jesús huoomiñ ma yi' je escribas ajcxy, e yajmiidmiydacy ajcxy tüg jihuimbit ayuc. Chi Jesús yminañ:

—¿Nej tiy'ajt jada nej miich ajcxy minañ co Satanás jëb ci'm ñayyajpidzimyii ma jäy ajcxy y'aa yjot? Ca' tiy'ajt nej miich ajcxy minañ. ²⁴ Pen tügpicy tungmiidpi ixypy ñaybjc-huá'cxigixy, etz ñaymidziptzóonigixy ixypy ac jëyi. Pues cixip yi' ajcxy y'ané'min. ²⁵ Nañ jadu'n pen tügpicy tüg juugy tüg migüg ixypy ñaybjc-huá'cxigixy, ca' ajcxy y'idaangixy tügmyc. ²⁶ Nañ jadu'n pen Satanás ixypy ti ñaybjc-huá'cxixy, e ci'm ixypy ti nayñibidigyii, ca' ixypy yi' ymic'ajt ida'ñ. Hue' janchtiy Satanás cixipy tigoyipy. (Paady ca'tiy'ajtiy nej miich ajcxy yminañ.) ²⁷ Ca' ni pin jëb huaad ytigühuip ma tüg micpi jäy ytjtc etz meedzipy tijaty ymiid, pen ca' jayjip c'ixoch tecyxoch je jäy micpi. Pen ti c'ixoch tecyxoch ixypy je micjäy, huin'it janchtiy mimadägipy, e pijcip tijaty ymiid.

²⁸ Janch iich miich ajcxy nimäy co Dios jëb huinmeecxip tüg'óciy pocy huídibi jäy ytúngixp etz tüg'óciy jibicpi huídibi jäy ycapxp. ²⁹ Jëyi janchtiy co pinjaty capxtigooyb miid je Espíritu Santo, je Dios yjihui'ñ ymic'ajt, ca' Dios huinmecxi nimina. Huinixii y'ida'ñ pocymid.

³⁰ Miid co jäy ajcxy chach yminaangixy co Jesús anajty miidity ca'oybi, paady Jesús jadu'n yminañ.

Jesús ytaj etz y'uch migüëxy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytinaaygixy tiba'y, e chi ajcxy capxñigüejxy Jesús. ³² Je mayjäy huídibi anajty ajcxy iñaayb jühuiditi ma Jesús, yminañ ajcxy:

—Miich mdaj etz m'uch cheeby ajcxy tiba'y miich ixtaayb.

³³ Chi Jesús yminañ:

—¿Pinjäy miich ajcxy mdijy co iich ndaj'adyii etz iich n'uch'adyii?

³⁴ Huin'it Jesús huindicxpejty je jāy ajcxy huidibi anajty iñaayb ajcxy jūhuidity ma je', e ymīnañ:

—Tūg'ócīy jada jāy ya jadu'n ajcxy nipaady nej iich ndaj etz iich n'uch.

³⁵ Huenytimypīnity huidibi ajcxy cuydumb yī Dios chójcīn, yī' je' jadu'n nipaady nej iich n'uch, iich n'ajch, iich ndzi' etz iich ndaj.

4

Je niipi y'ixpejt

¹ Jadūg'oc Jesús ytigīy yaj'ixpijcpī ma mejypa'. E ooy mayjāy ymu-jcpejty ma anajty Jesús yajpaady. Mīd co ooy anajty chachmayjāyity, paady Jesús ytigīy ma tūg barco jahuengi mejyjoty. Jesús iñaayb anajty barcojoty, e je mayjāy iñaayb anajty ajcxy ma mejypa'. ² Huin'it Jesús yaj'ixpijcy je mayjāy mīd canaag jihuimbit ayuc. Co yaj'ixpijcy, chi ymīnañ:

³ —Amīdoo'ijtcīx miich ajcxy iich jada n'ayuc. Tūg jāy chooñ niipi.

⁴ Co je niipi yhuījpy anajty trigo tīm, chi je trigo tīm nijējity oy ycāy tīm tūguj. Chi je joon ajcxy ymīiñ jicxy je trigo tīm huidibi tūguj ti ycāy. ⁵⁻⁶ E nijējity trigo tīm oycāy ma tzaanīcx, ma nihueeñ oyñaax yajpaady. E je trigo tīm ca' tzip mujx je', je'co ca'anajty ooy naax mápxity. E co je xīi ypidzīmy, chi no'cy je trigo mang, com ca' anajty ytictz mīdity naaxjoty, chi ytīch. ⁷ E nijējity trigo tīm oycāy ma apyjot. Co jada trigo tīm ymujxy, chi y'ujtz'ōgtāy je trigo mang, e ca' ytīm'ajty. ⁸ Per jacjadyīi trigo tīm oycāy ma oyñaax, chi ymujxy, e ytīm'ajt may'amy: tūg pi'c pajc iipxmajc oyco'ity, jadūg pi'c pajc tugi'px oyco'ity, jadūg pi'c pajc mīgo'px oyco'ity.

⁹ Co Jesús je mīydāgīi yajmay, chi ymīnañ:

—Pinjaty mīd ytātzac, pin mīdohuamy, huen mīdo'mbicy jada ayuc.

Ti yī' ñīgapxyp yī iixpejt

¹⁰ Co je mayjāy ñīcxni, e Jesús yhuī'my naydūg, chi je nimajmetzpi ydiscīpulos ajcxy etz jacjadyīi huīdib mījnicxpejt Jesús ñīmījhua'cy, e amīdoy nej yhuīmbīdzīmy je jihuimbit ayuc. ¹¹ E Jesús ymīnañ:

—Mīich ajcxy jaydēb mnejhuīhuīpy huīdibi Dios ñīgapxpy ñīmīydacpy coyūch'amy ma y'ané'mīn ycōtūjcīn. Jacjadyīi jāy ajcxy jihuimbit'amy nyajmīdmīydaacyīch. ¹² Jadu'n jihuimbit'amy nyaj'ixpijcpīyīch je mayjāy, jaydēb co pinjaty iixp, ca' ajcxy iixpy; etz pinjaty mīdoob, ca' ajcxy mīdo'mbīgīpy. E jadu'n ca' ajcxy yjothuīmbīdīp, e nañ ni ycayajmeecīpy ajcxy ypocy.

Jesús najtzcapxīy nej yhuīmbīdzīmy je niipi y'ixpejt

¹³ Chi Jesús yjacmīnañ:

—¿Nej ca' mīich ajcxy mhuīnjīhuīy jada jihuimbit ayuc? Pen ca' mīich ajcxy mhuīnjīhuīy jada jihuimbit ayuc, ca' mīich ajcxy mhuīnjīhuīy yī jacjadyīi jihuimbit ayuc. ¹⁴ Je huīdibi capxhuācxp Dios y'ayuc, jadu'n yī' nipaady nej je huīdibi niip trigo tīm. ¹⁵ Je jāy ajcxy huīdibi amīdoo'ijtp Dios y'ayuc, e mīc'amy je ca'oybī yajpidzīmy Dios y'ayuc ma ajcxy yjot yhuīnmañ, jadu'n ajcxy nipaady nej trigo tīm huīdibi cāb tūguj, e je joon ajcxy mīc'amy piimujctay. ¹⁶⁻¹⁷ Je jāy ajcxy huīdibi amīdoo'ijtp Dios y'ayuc janch jotcujc, e mībījccīxy tzojccīx, chi ajcxy ixmajtzi Dios y'ayuc co agapxīyb paady, e co tzaachypī mīnaxy yajnaxy mīd Dios y'ayuc ycīxpi. Jadu'n ajcxy nipaady nej je trigo tīm huīdibi ti ycāy ma

tzaanĭcx. 18-19 Je jāy ajcxy huídibi amídooy'ijtp Dios y'ayuc, e co ñicxni, chi jāy digooyñi Dios y'ayuc miid jotcuyc'ájtin tzinaayin, etz comeeñ'ájtin etz adzójcin. Jadu'n ajcxy nipaady nej trigo tım huídibi ti ycāy ujtzjoty, e ca' ytım'aty miid co oy y'ujtz'ögy. 20 Je jāy ajcxy huídibi amídooy'ijtp etz cöbijcp Dios y'ayuc amumdügjot etz Dios y'ayuc tumb ma ajcxy yjot yhuinma'ñ, jadu'n ajcxy nipaady nej je trigo tım huídibi ti cāb ma oyñaax etz ytım'aty may'amy: tüg pi'cpajc iipxmajc, etz jadüg pi'cpajc tug'px, etz jadüg pi'cpajc migo'px.

Je lámpara ñi'ijxpejt

21 Chi Jesús yjacmínañ:

—Co jāy ajcxy jindicxi'ñ nöctzoy, chi canan ajcxy cöjuypy miid tu'tz, ni ca' ajcxy pidacy cijxpa'tci'py, hue' janchtiy pidaaccixy ma jindicxpejt jaydeb mij ytıxcxy. 22 E nañ ni ca' ni pın ni ti jēb ameech tunıpy, e nicxy ycayajnejhuıy. E ca' ni pın ni ti ayüch tunıpy, e nicxy ycayajnejhuıy. 23 Pinjaty ytātzac ymiid, pın mıdoohuamb, huen mıdo'mbıjccixy ĩch n'ayuc.

24 Nañ jadu'n Jesús ymínañ:

—Cuendtúngxix jada ayuc huídibi miich ajcxy yam mmıdooyb. Yi quıpxi'ñ huídibi ajcxy myajquıpxııyb, nañ jadu'n yi' miid Dios ajcxy xyquıpxyhuımbıdıpy, e ixti jacyajmöhııp ajcxy huıdıjaty mıdoob ĩch n'ayuc. 25 Pinjaty ymiid, yajmöhııp nıgi, pinjaty hueen miid, yajpigıpy nıgi (oy ixıyipy hueen jadım mıdıty).

Je tım huídibi yeecp ñi'ijxpejt

26 Nañ jadu'n Jesús ymínañ:

—Yi Dios y'ané'mın jadu'n yi' nej co tüg jāy nicxy ñıpy ma ycamjot. 27 Chi jada' co ñııptay ñicxni ma ytıjc e ymi'o'cni ymāybidıgnı com jabom, e jadu'n yajnaxy canaag xıı tzuu. E je moc pajc mujxp je' etz yomb. Per je cogam ni ca' nejhuıy nej je moc yoñ, ma mic'ajt paady. 28 Je' co yi naax ci'm mic'ajt mıdıty jaydeb yajyoñ je moc. Jayıjp ypidzımy je moc ung, jac'axam ypidzımy yi moc pijy, e chi jada' ytım'ajtnı. 29 Co je moc ymajaanı, chi je jāy ajcxy nicxy moc tzıjcp, com ti yhuıdıy je moc.

Ijxpejt ma je mostazi pajc

30 Nañ jadu'n Jesús ymínañ:

—¿Nej m'oc'a'ixııygıxy yi Dios y'ané'mın? ¿Ti miid n'ocıyajquıpyxııhuııbıch? 31 Jadu'n Dios y'ané'mın nipaady nej mostaza pajc huídibi tüg jāy nicxy niıpy ma ycam. Yi mostaza pajc jacnıgi ymützıty ca'ydı jacjadyıı ujtzpajc huídibi yajpatp ya naaxhuıñ. 32 E co yajııpy je mostaza pajc, chi yoñ, e chi yeegy ooy janch mij, ca'ydı jacjadyıı ujtz. E janch mij yeegy tüg'ócıy yci' y'aacx, ixti joon ajcxy pe'mb ma je yci'y'aacx y'anicıy.

Nej anajty Jesús yecy je tıy'ajt miid je ijxpejt ycıpxı

33 Jadu'n anajty Jesús yaj'ıxııcy je mayjäy ajcxy Dios ytıy'ajt miid canaag jıhuımbıt ayuc, ixti mıbaad ajcxy jēb huınjıhuıy. 34 Ac jıhuımbıt ayuc Jesús yajnimay je mayjäy. Per miid yı'ydiscıpusos Jesús ycapxtıcxtaayb anajty je jıhuımbıt ayuc.

Jesús capxtıcx nej huımbıdzımy je ijxpejt

35 Je huın'ıt xıı co ycoodzııy, chi Jesús nimay yi ydiscıpusos ajcxy:

—Tzoc ajt jámim jim'amy ahuin ma yi jadügpí mejypa'.

³⁶ Huin'it Jesús ydiscípulos ajcxy ixmajtzta y je mayjäy, e müid tzoón Jesús barcojoty. Nañ jadu'n jacjadyii barco ajcxy choñ quipxy müid Jesús ydiscípulos ajcxy ybarco. ³⁷ Je huin'it coodz tüg poj miiñ janch mic. E je mejy nigoo anajty y'ocpidigni. Janch tigüyb anajty nüi barcojoty, jagoo jagoo yca'ujtzta y barco müid nüi. ³⁸ Jesús maab anajty ma je barco iix ma tüg mabejt. Chi yajmäybidiği, e nimay ajcxy:

—Huindzin, ¿nej ca'mduñcuend co ich ajt yam nguinaanim?

³⁹ Huin'it Jesús ymäybidiği, e jipcogapxty je poj. Etz nimay je mejy:

—¡Amon! ¡Huäcxip!

Chi mic'amy je poj ymongidactay yhuäcxijptay jadu'ñyi. ⁴⁰ Huin'it Jesús ymínañ:

—¿Na'amy co mdzachtzigüygixy ajcxy? ¿Nej ca' mmibijccixy co nmüidich Dios ymic'ajt?

⁴¹ Jesús ydiscípulos ajcxy ooy chigüy, e ñayñimaayi ajcxy miñ xyipy:

—¿Pín jäy jada' jada Jesús? Ooy chachmijhuinma'ñ co yi poj etz je mejy ycapxymidoyii.

5

Je Gadarajäy huidibi anajty ca'oybi müid

¹ Chi Jesús müid ydiscípulos ajcxy oyja'tcixy ma je mejypa' ma je Gadara jäy ñaaxjot. ² Tim mic'amy co Jesús ybarcobidzimy, chi nimiñ tüg jäy huidibi ca'oybi müid anajty. Hue' anajty choñ ma öcpi jut. ³ Je yëydijc, ca'oybimüidpi, tzinaayb anajty ma öcpi jut. E ni pín anajty ycamimadägyii. Ni pín camimadacy nicx cixoch tecyoch jada je ca'oybimüidpi, e ni ca' ajcxy mimadacy müid cadena. ⁴ Canaag'oc ajcxy jacixojch jatecyxojch müid cadena, e ypojtaayb anajty je cadena. Ni pín camihuinma'ñybaady nej jëb ocmimadaaccixy je ca'oybimüidpi. ⁵ Je ca'oybimüidpi xim tzuum anajty yhuuidity tüg yuugjot etz ma öcpi it, janch mic anajty yäxytinäy. E chachnayajtzaachiyii anajty müid tzaa.

⁶ Jiguëgy anajty je ca'oybimüidpi ymiñ, co iixpaty Jesús, chi poyigy ninicxy Jesús, e ycojxtinay'ahuüy ma Jesús yhuinduu. ⁷ Je ca'oybimüidpi mic migapxcooty Jesús, e nimay:

—Jesús, je mijpi Dios y'ung, ¿na'amy co xymidziptzooñich? May'ajt nbijctzooybich ma Dios co ca' ich jëb huaad ychaachytuñich. ⁸ Je ca'oybi jadu'n ymínañ, com Jesús ti anajty nimäy:

—Ca'oybi, pidzimb ma jada yëydijc.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ich nxii hue' je' “ni may”, com ni may ich ajcxy huidibi yajpatp ma jada yëydijc.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyii ma huingbi it lugar. ¹¹ Huingon anajty je cop ma anajty may idzim yjicxcixy. ¹² Chi je ca'oybi ajcxy may'ajt pijctzoy, e nimay ajcxy:

—Najtzquexüyg ma yi may idzim, jigix jëbi n'adigüyich njottigüyich yi may idzim.

¹³ Chi Jesús jadu'n a'ixiy co jëbi adigüyigixy jotigüyigixy je may idzim. Chi je ca'oybi ypidzimday ma je yëydijc, e yajtigiyday je may idzim ajcxy.

Jim anajty yajpaady jahuengi mejtz mil idzim. Chi je idzim ylocjydaay, e ycögänaxtaay ajcxy ma tüg tzajjip, e oy ycädaaygixy nijjoty, e chi ajcxy ñii'ögtay.

¹⁴ Je idzim cuend'ajtp ajcxy ooy ajcxy ñay'adzigiyyi, e nicxtay ajcxy poyigy ma ytjic. E oy nimiydaaccixy cajpjoty etz majaty tundac nej anajty ajcxy y'idzim y'öctaaygixy. Mayjäy ajcxy choñ mic'amy oy ijxcixy nej anajty ti ytunyii ti yjadyii. ¹⁵ Co je mayjäy ajcxy yja'ty ma Jesús yajpaady, chi ajcxy ijxy je yëydijc huudibi anajty mayca'oybi ymüid. Ijxy ajcxy co inäy huit müid etz huijycujc, ti anajty y'oyiy. E huin'it ooy ajcxy je mayjäy ñay'adzigiyyi. ¹⁶ Je jäy ajcxy huudibi anajty huindixp co anajty je ca'oybimüidpi ti y'oyiy, etz ijxcixy nej ti ytunyii ti yjadyii müid je may idzim, chi yajmiydactay je maycajpijäy jadu'n nej anajty ti ijxcixy. ¹⁷ Huin'it ajcxy pijctzoy may'ajt ma je Jesús, co huen tzoñ ma ajcxy je ñaaxjot.

¹⁸ Co Jesús ytigiiy jadüg'oc ma je barco, chi je yëydijc huudibi anajty ca'oybi ti ñibidzimyii ti ycöbidzimyii, pijctzoy may'ajt ma Jesús co huen a'ixiy möhuip co huen müid'idyii Jesús. ¹⁹ Per Jesús ca' a'ixiy co ymüid'idyii, chi nimay:

—Huimbit ma mdijc etz mjugymigüg, e yajmüidmiydäg jada mijpi tung mijpi huinma'ñ huudibi je Huindzin Dios ti tuñ müid müich. Müidmiydägipy jadu'n nej je Huindzin Dios ti xypa'ayoy.

²⁰ Chi je yëydijc yhuimbijtni, e huudijtp anajty cajp cajp jim Decápolis ñaaxjot, e nimiydactay tüg'óciy jadu'n nej Jesús ti yajtzögyii, e tüg'óciy je mayjäy ooy jihuiy huinmay.

Je Jairo ñix etz je töxyjäy huudibi Jesús yhuit nïdoni

²¹ Co Jesús huimbijty barcojoty ma je mejypa' ma anajty ti choñ, chi mayjäy ymüiñ ma Jesús yajpaady, chi Jesús yhuäcxijpy ma je mejypa'. ²² Huin'it Jesús ñija'ti tüg mijtungmüidpi ma yi judíojäy ajcxy ñaymujctac. Je yëydijc hue' anajty xijjity Jairo. Co Jairo ijxpaty Jesús, chi ñayhuijotac ma Jesús yhuinduu. ²³ Jairo may'ajt pijctzoy, ymüinañ:

—Huindzin, ögaanip ich nñix. Tun may'ajt nicxy ma ich ndijc, e mgñixájip ma ich nñix, jigix jëbi myajtzögip, e yjactzinähuip.

²⁴ E Jesús nicxp anajty müid Jairo, e mayjäy panixy anajty Jesús. E je mayjäy ooy anajty tzach'adiji'y tzach'agodi'y Jesús. ²⁵ E ma je mayjäy ymüiñ anajty tüg töxyjäy pa'm müid, jécyiñ anajty ymijtacni. Majmetz jimijt yxi ybo' anajty cujc payöy, ca' anajty y'oc-huäcxijpni je ni'py. ²⁶ Jada töxyjäy ti anajty yajtzoyduñ müid may tzoydumbi, ti anajty ymeeñ yajtundäy ma je tzoydumbi ajcxy. E je'ni anajty ypa'm'ity. Ni ti pubéjtin ti capaady, ixti nigi anajty ypa'm mijhua'ñ.

²⁷ Jada töxyjäy ti anajty ayuc midoy nej Jesús anajty pa'mjäy yajtzögy, paady nimüiñ etz nimijhuägy jixci'py'amy, chi nïdooni Jesús yhuitpa'. ²⁸ Jada töxyjäy nayñimaayj jotjoty huinma'ñjoty: “Co nñidónibich Jesús yhuitpa', müid tim y'i'ndzögibich.” ²⁹ Co je töxyjäy nidoñ Jesús yhuitpa', tim huin'itiy mic'amy yhuäcxijp je ni'py. Huin'it je töxyjäy jihuiy co anajty ti chögy.

³⁰ E Jesús jihuiy co anajty ti yajtzögy tüg jäy müid ymic'ajt, paady ni'ijxhuimbijty je mayjäy huudibi anajty pamünip, y'amidooy ajcxy:

—¿Pin ich nhuit ti xyñidoni?

³¹ Huin'it Jesús ñimaayj ajcxy ydiscípulos:

—Miich m'ixpxy co yi mayjäy xychach'adijy xychach'agodiy, e miich mina'n: “¿Pin ti xyñidónich?”

³² Per Jesús huindixypejty je mayjäy jühuidity ma yi', oc'ixa'n ocne-jhuíhua'n pin anajty ti ñidonyi. ³³ Huin'it je töxyjäy, com ñejhuiyb anajty jadu'n nej Jesús ti yajtzögyi, paady nimijhua'cy Jesús janch tziyuuyb müid tzig'iñ ñayhuijotaci ma yi' yhuinduu. ³⁴ Jesús ymina'n:

—Töxyjäy huidibi ooy ndzócyich, ti mdzógy müid co ti xymibícyich. Nicx agujc jotcujc, ti mba'm ñaxy.

³⁵ Capxp myndacp anajty Jesús müid je töxyjäy co nijjity jäy ñimiini, choñ ma je judío jäy ñaymujctac mijtungmüidpi ytijc, e nimay je töxy'anäg yteedy:

—Yi mniix ti je y'ögy. Ca' huaad mjac'amayy nīg yi Huindzin Jesús.

³⁶ Per Jesús ca' tuñcuend jadu'n nej ajcxy yjamina'n, chi nimay je naymujctac huindzin:

—Ca' mdzigy, mibic nigoda'ajty.

³⁷ E ni ca' jac'a'ixiy nicxy yjacmüidnicxyi jacpinjaty. Jëda'ajty müidnicxy je Pedro, Jacobo etz Juan, je Jacobo y'uch. ³⁸ E co Jesús ytijctigiy ma yi naymujctac huindzin ytijc, chi ijxy jadu'n nej jäy jiiy chachne'mgixy chachiygixy chachyaaxcixy. ³⁹ Co Jesús tijctigiy, chi nimay je jäy ajcxy:

—¿Nej co nigoo ajcxy mdzachne'mni, e mdzachyáaxcixni? Yi pi'c töxy'anäg ca' yi' ti y'ögy, maab yi'.

⁴⁰ Per nigoo ajcxy Jesús nixiicy co jadu'n ymina'n. Huin'it Jesús yajpidzimday tüg'óciy pinjaty anajty jiiy tigoty, e müid tijc tigiy jëda'ajty je ungedeedy etz ungday, e nañ je tugigpi ydiscipulos huidibi anajty ti müid miñ. Chi ajcxy ytigiy jiiy ma anajty je töxy'anäg yajpaady. ⁴¹ Chi Jesús májtzy yi töxy'anäg yci', e chi nimay:

—Talita, cumni —jadayaab ayuc hue' yi' yhuimbizimy: Töxy'anäg, ich miich yam nimaayb, pidig.

⁴² Huin'ity je töxy'anäg, je huidibi anajty majmetz yjimijt, ypidigy e ytüyöchoñ. E tüg'óciy yi mayjäy ooy ajcxy jihuiy huinmay. ⁴³ Huin'it Jesús najtzcapxy co ca' huaad pin yajnimay jadu'n nej je töxy'anäg ti chögy, nañ jadu'n ni'ane'mdy co huen ajcxy yajcay je pi'c töxy'anäg.

6

Jesús yajpaady jim Nazaret

¹ Huin'it Jesús choñ ma je jimbi it lugar, e yhuimbijty ma yci'mgajp. E müid ñicxy yi ydiscipulos ajcxy. ² Sábado xijoty Jesús ytigiy yaj'ixpijcp ma je mayjäy huidibi yöymújccixp ma je judío jäy ñaymujctac. E je mayjäy huidibi amidoo'ijtp anajty ooy jihuiy huinmay ajcxy, e ñayñimaayi ajcxy miñ xyipy:

—¿Ma jada' jadayaab jäy ti ni'ixpigy jadayaab ixpijcin? ¿Ma ti paady jada huijy'ajt cujc'ajt huidibi ymüid? ¿Ma jada' ti paady yi mic'ajt huidibi müid mijhuima'n tumyb? ³ Je' jada je tzejtzpi, yi María y'ung. Yi' y'uch ymigü, yi Jacobo, yi José, yi Judas, etz yi Simón. Nañ jadu'n yi' y'uch töxyjäybi cha ajcxy chinäy quipxy müid ich ajt.

E je mayjäy ca'ajcxy anajty ixa'n cöbiga'n Jesús. ⁴ Huin'it Jesús nimay je mayjäy ajcxy:

—Huenma'amyty tüg'óciy je mayjäy ooy yajmij'aty je jäy ajcxy huidibi najtzcapxyb Dios y'ayuc. Jëyi janchty, ma yci'm naax ma yci'mgajp ca'

je jāy ajcxy yajmij'adyii, etz nañ ytim jadu'n yi' y'amigügtijc etz ymijñn ymidijc.

⁵ Ma yci'm naax yci'm gajp Jesús ca' jaty nej mijhuinma'ñ tunipy miid co ca' ajcxy mijpidägyii. Jëyi yci'pidacy ma nijëjity pa'mjäy etz yajtzoocy. ⁶ Jesús ooy jihuiy huinmay nej je jāy ajcxy ca' ymijpidägyii ma yci'm naax yci'm gajp. Chi Jesús chooñ jim ñicxy ma jacjadyii cajp huinduy agonbi, e yaj'ixpijcy anajty je mayjäy ajcxy.

Jesús quexy ydiscipulos ayuccapxhuäcxp

⁷ Huin'it Jesús mijhuoy je majmetz ydiscipulos ajcxy, e chi quejxhuäcxy nimetz nimetz ma canaag cajp. E chi mooy mic'ajt, jigix jëb yajpidzimy ajcxy ca'oybi ma jāy ajcxy. ⁸ Nañ jadu'n y'ane'my Jesús je' ydiscipulos ajcxy co ca' huaad ti miníxcixy tü'amgixpi, jëyi jëb miníxcixy tüg tajc nidüg nidügti. Ca' huaad miníxcixy ymorral, e ca' huaad miníxcixy ycaagy, e ca' huaad miníxcixy ymeeñ. ⁹ Jëyi je yci'g etz je yhuit huidibi anajty ajcxy ymiid huen miníxcixy. ¹⁰ Chi Jesús yminañ:

—Co anajty ajcxy mjättaccixy ma tüg tijc, jim ajcxy mhui'mipy ixti coon mdzoonip ma yijimbi cajp. ¹¹ Pen mdigüygixp ma tüg cajp, e je jāy ajcxy ca' ajcxy xycöbiga'ñ, ca' ajcxy amido'ida'ñ miich m'ayuc, mbidzimgix ma je cajp, chi mhuihuöjpcixipy mgig. Jada je' je tiy'ajt co ca' ajcxy mjotcüjcity. Janch ñch miich ajcxy nimäy co Dios anajty ytiyduñ jada naaxhuiñ jāy, jacni'gi tzaachypi paada'ñ yi jāy ajcxy huidibi ajcxy anajty ca' xycöbójccixy, ca'yd'i je' ajcxy huidibi tzinaay jecy'aty ma Sodoma etz Gomorra cajp.

¹² Chi je nimajmetzpi ajcxy chon Dios y'ayuccapxhuäcxy co huen jāy ajcxy jothuimbjtcixy, huen ixmajtzaaygixy yi pocytunii. ¹³ Nañ jadu'n ajcxy yajpidzimy ca'oybi majaty jāy, e pidaaccixy aceite majaty pa'mjäy, e yajtzoöccixy anajty.

Co Juan je Bautista y'ögy

¹⁴ Huin'it je rey Herodes nejhuüy co Jesús canaag mijhuinma'ñ tzachytuñ anajty, com tüg'öciy je mayjäy anajty nimiydaaccixy Jesús. Herodes yminañ co Juan je Bautista ti yjugypicy jadüg'oc ma anajty ti y'ögy, paady mic'ajt miidity jaydeb mijhuinma'ñ tuñ. ¹⁵ Nijëjity jāy yminaangixy:

—Jesús yi' je' Elías.

E naagity jāy yminángixy:

—Yi' je' tüg Dios tiy'ajtmädp'i huidibi quipxyñby miid je Dios ytiy'ajtmädp'i huidibi tzinay jecy'ajty.

¹⁶ Co Herodes nejhuüy nej je mayjäy nimiydaaccixy Jesús, chi yminañ:

—Janch jada co Juan ti yjugypicy, je huidibi nni'ane'mdüyich co huen yajminagyii ycohuajc.

¹⁷ Miid Herodías, Herodes ytöxytjic yci'xpi, Herodes n'ane'mdüy co Juan yajmach, e pidägyii pujxtigoty. Jada Herodías jayijp ypijcy miid je rey Herodes y'ajch Felipe, per ti anajty ixmach Felipe, e ypijctigajch miid je ycapy Herodes. ¹⁸ Hue' anajty Juan ti nimay Herodes:

—Ca' jadu'n paadyii co yi m'ajch Felipe ytöxytjic miich miiddzinaayi.

¹⁹ Paady yci'xpi Herodías mijotma'ty Juan, e ytimy yaj'ögamy anajty. Per ca' mic'amy yhuinma'ñybaty nej ocyaj'ögip; ²⁰ com je rey Herodes ñejhuüyb co tudägy jāy huädz jāy anajty je Juan, e tzigüyb anajty miid Juan. Paady yci'xpi anajty je rey Herodes Juan miidity cuend'aty pujxtigoty.

Naag'oc naag'oc anajty Herodes nicxy amido'ity Juan y'ayuc, ooy anajty huinmay nej yhuimbizimy, per jotcuyc anajty amido'ijty.

²¹ Huin'it Herodías ypat huinma'n nej jëb yaj'ögy Juan je huin'it xii co je rey Herodes anajty ñayñixiduñyii. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'óciy yi mic jäydijc huidibi ajcxy tzinaayb naag naag cajp jim Galilea. ²² Xiiduñyoty anajty co Herodías ñix oy y'ech ma je rey anajty yajpaady müd je may jäy huidibi anajty yajcaayb yaj'uucpy. E jadu'n nej je Herodías ñix y'eich, ooy je rey jadu'n jäygidacy, etz tüg'óciy je jäy je huidijaty anajty müd ajcxy ycaaygixy y'uuccixy. Chi je rey nimay je töxy'anäg:

—Pijctzóhuigich ti mdimdzojcpy, ñich miich nmöhuipy.

²³ Je rey ñigi capxcödujcy janch cixyjot huinijot co möhua'n ti ytimy ypijctzooyb, ixti jëb jamöy cujhuäcxy yi' y'ané'min, mibaad anajty ane'my je naaxjot. ²⁴ Chi je töxy'anäg ñicxy ma ytaj oy amidoy, nimay:

—¿Ti nbijctzohuipich?

Chi je' ytaj y'adzooy:

—Pijctzoohui yi Juan je Bautista ycohuajc.

²⁵ Mic'amy je Herodías ñix nihuimbity je rey e yminañ:

—Ndzojcpich co xymöhuibich mic'amy je Juan je Bautista ycohuajc ma tüg'texy.

²⁶ Co jadu'n midoy je rey, chi ytigüy tajp mayb janch mijcajee. Per ti y'octunipy. Com ti anajty jadu'n capxcöducy, ti anajty mayjäy midoy ti anajty ti yaj'ahuanñy je töxy'anäg, ca' y'ayuc yajxiicy. ²⁷ Paady ycixpi je rey mic'amy ane'my tüg soldado, co huen nicxy yajtzoni Juan ycohuajc. ²⁸ Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg'texy, e yajc'idigiy je töxy'anäg, e je töxy'anäg yajc'idigiy ytaj.

²⁹ Co je jäy ajcxy huidibi anajty mijnicxpejtp Juan ñejhuüy ajcxy co je rey ti yaj'ögy Juan, chi ajcxy y'oy e yajpidici Juan ñinicx, e yajnaaxtigüy ajcxy.

Jesús yajcaay migoox mil yëydjc

³⁰ Co je majmetzpi apóstoles ajcxy yhuimbijty huidibi anajty Jesús ti quexy y'ayuccapxhuäcxpi ma canaag cajp, chi ajcxy yajmüdmüydacy Jesús tüg'óciy tijaty anajty ti túngixy, etz tüg'óciy ayuc huidijaty ti yaj'ixpijccixy. ³¹ Huin'it Jesús nimay je nimajmetzpi huidibi anajty ti quexy y'ayuccapxhuäcxpi:

—Tzoc jámim ma tüg it ma ca' pin, jaydëb nbócxim tüg xii metz xii.

Paady ycixpi Jesús jadu'n yminañ, com tzach mayjäy ja'ttüb tzondiib ma Jesús yajpaady, e ca' ajcxy tiempo anajty müdity mina ycaaygixipy y'uuccixipy müd je mayjäy ycixpi. ³² E Jesús müd ydiscípulos ajcxy ñicxy barcojoty ma ca' pin. Ac jëyi ajcxy nicxy ca' jac pin jäy müd nicxy. ³³ E mayjäy ijxy co Jesús ajcxy choñ, e nañ ijxajpy pin anajty tzoñ barcojoty. Paady mayjäy choñ ma canaag cajp tegy'm, ñicxcixy poyigy anajty ma Jesús ñicxa'ñ. Mayjäy oy ya'ty jayijp ca'ydí Jesús ajcxy, e jim ajcxy yöymujctay. ³⁴ Co Jesús ybarcopidzimy, chi ixy janch mayjäy, e Jesús ooy pa'ayoy je mayjäy, com jadu'n anajty ajcxy nej maycöbixy huidibi ca' müdity ycuend'ajtpi. Chi Jesús ytigiy yaj'ixpijcp, canaag nax ixpijcin anajty yecy. ³⁵⁻³⁶ Co anajty ti chu'iiñi, chi Jesús ydiscípulos ajcxy ñimaayi:

—Ca' ni pin chinäy ma jadaayaabi it lugar, e ti chu'hiyñi. Capxycix mïd jada mayjäy ajcxy, jaydëb ñicxcixyñi ma yi cajp huinduy agonbi, huen nïcxy jüygixipy ycaayin y'uucin.

³⁷ Huin'it Jesús y'adzooy yi' ydiscipulos ajcxy:

—Miich ajcxy móoygix jada mayjäy caayin úucin.

Chi ajcxy Jesús y'adzooy:

—¿Huaad iich ajcxy nïcxy njuy mejtz migo'px denario tzajcaagy, jigix ycaayipy y'ügipy jada mayjäy?

³⁸ Chi Jesús y'amidooy ydiscipulos ajcxy:

—¿Naag tzajcaagy miich ajcxy mïdity ya? Nïcxcix.

Co ajcxy ti'y'ajt paty, chi ajcxy Jesús nimay:

—Iich ajcxy nmïd migoox tzajcaagy etz metz acx.

³⁹ Chi Jesús ni'ane'mdïy co je mayjäy huen ixtaaccixy naaxcíxy tügpicyjaty. ⁴⁰ Chi je mayjäy y'ixtactay canaagpicy. Canaagpicy migo'px jatypi, e canaagpicy huixchigüipxmajjatypi.

⁴¹ Chi Jesús conïgy je migooxpi tzajcaagy etz je metzpi acx, e ypa't'ijxy tzajpcíxy, e yajnaxxy Dios cojuyip ma Dios mïd je tzajcaagy etz je acx ycixpi. Huin'it Jesús tujc-huäcxy je migooxpi tzajcaagy, e yajcídigi'y je' ydiscipulos ajcxy, jaydëb ajcxy yajhuäcxip ma je mayjäy. Nañ jadu'n Jesús yajcídigi'y je metzpi acx je' ydiscipulos ajcxy, jaydëb yajhuäcxip ma je mayjäy. ⁴² Nidüg'óciy je mayjäy ajcxy yca'y'uucy cüxyi. ⁴³ Co je mayjäy yca'yday, chi je discipulos ajcxy yajmujcy je cayduc tzütztuc, e yaj'ujch ajcxy majmetz cach. ⁴⁴ Migoox mil anajty ajcxy je yëydijctijc huídibi cay uuc.

Jesús yöy nïhuingíxy

⁴⁵ Huin'it Jesús ane'my je' ydiscipulos ajcxy co huen barcotigiygixy mic'amy. Huen nïcxïcixy jayjip jim Betsaida jim meyy nïnajxy. Co yi discipulos ajcxy ybarcotigiyday, chi Jesús ycapxycíjxy mïd je mayjäy.

⁴⁶ Co anajty Jesús ti ycapxycíxy mïd je mayjäy, chi ñicxy ma tüg cögor Dios mibijctzob. ⁴⁷ Co ycoodziyñi je discipulos ajcxy anajty yajpaady mejyjoty ma je barco. Jesús naydüg anajty yajpaady mejypa'. ⁴⁸ Jesús y'ijx co je'ydiscipulos ajcxy anajty ti y'anucxiygixy mïd mejycabi, je' co je barco anajty chachijpcobojy. E co oy moñiy, chi Jesús ymijhuägy ma je barco. Jesús yöyp anajty mejyhuingíxy, e hue' anajty jüyöyñaxamy je discipulos ajcxy. ⁴⁹ Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co nigo y'ijxmañiygixy. ⁵⁰ Com tüg'óciy yi discipulos ajcxy anajty ti ñicxcixy Jesús, e ooy ajcxy chigiy, paady mic'amy Jesús migapxy je' ydiscipulos ajcxy, e nimay:

—Jotmic naybidäacigixy, ca' mdzigiygixy. Iich yi'.

⁵¹ Huin'it Jesús ybarcotigiy, e mic'amy je poj yxeemy, e je discipulos ajcxy ooy jihuyi huinmay. ⁵² Ooy ajcxy jihuyiygixy huinmaaygixy, com ca' ajcxy huinjhuuygixy anajty nej Jesús je mayjäy yajcay mïd je migooxpi tzajcaagy. Com je'ni anajty ajcxy ooy yjotjuuñity ycöjuuñity.

Jesús yajtzögy pa'mjäy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxojch ajcxy je barco ma mejypa'. ⁵⁴ Co ajcxy ybarcopidzimy, chi mic'amy je mayjäy ajcxy jim ijxcaypy Jesús. ⁵⁵ Poyigy je jäy ajcxy chooñ, e yajyöyñajxtay je cajp ajcxy huinduy agonbi, capxhuäcxcixy co Jesús anajty

ti yjädý jim. E jäy ajcxý yajmiindzondacy may pa'mjäy cijx'am jim ma anajty Jesús yajpaady. ⁵⁶ E hueñytim ma'amyity anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxý pidáccixy pa'mjäy majaty majaty yi mij túba', e cohuaniiygixy Jesús co huen nidoñyii yi yhuitpa', e tüg'ócíy huidijaty anajty ajcxý nidomb, najxp ajcxý anajty je' ypa'm.

7

Huidi jäy yaj'ahuimbijt pocyjayity

¹ Huin'it ymiiñ ma Jesús nijëjity fariseojäy ajcxý, je huindzindijc huidibi tzachpadumb judío ycostumbre. Nañ jadu'n mïd miiñ nijëjity escribas, je huindzindijc huidibi ajcxý nijaydutr anajty Dios ñecy. Hue' je fariseos etz escribas ajcxý anajty ti choongixy Jerusalén. ² Je fariseos etz escribas ajcxý ijxy co Jesús ydiscipulos ajcxý ytigüy caaybi uucpi jaygibujy, ca' anajty cuydúngixy judíojäy ycostumbre. ³ (Com yi fariseojäy etz jacjadyii judíojäy ajcxý cuydumby anajty ajcxý ñi'ap costumbre, e ixpocypújcixy jayijp ma ca'ni ytigüygixy caaybi uucpi. Com yi judíojäy ajcxý co ajcxý ñicxy mayjäyjoty etz yhuimbijtcixy jadüg'oc ma ytijc, ca' ajcxý ycay ixti cooni jayijp ajcxý ycibújcixy canaag'oc. ⁴ Yi judíojäy ymïd canaagnax costumbre huidibi cuydúngixyp jadu'n nej ajcxý yajhuaatzcixy ajcxý ytaasi ytxey ytütz etz ypujxtexy.) ⁵ Chi je fariseos etz escribas ajcxý y'amidooy Jesús, nimaayi:

—¿Na'amy co miich mdiscipulos ajcxý ca' cuydúngixy judíojäy ñi'ap costumbre? ¿Na'amy co ajcxý ycaaygixy y'úccixy, e ca' jayijp ixpújcixy y'ipocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmïdipi Isaías jayhui'my jecy'ajty mïd miich ajcxý ycixpi. Miich ajcxý huidibi naybidaacip jadu'n nej jihuiy ajcxý tudägyjäy, e ca' yjánchezty. Com jadu'n Isaías jaybejty co Dios jadu'n yminañ:

Jada jäy jadu'n ajcxý ycapxcixy ymiydaaccixy jadu'n nej jihuiy xyajmij'atyich. Per ca' ajcxý xyajmij'atyich cixyjot huinjot.

⁷ Naadigí co ajcxý xyhuin'igixich xyhuinyáaxcixich. Ñayyaj'ixpíjcigixy ayuc tiy'ajt huidibi jäy ajcxý ti cojy ti macxy.

⁸ Chi Jesús yminañ:

—Miich ajcxý ti m'ixmájtzcixy Dios ycötújcín, e myajmij'ájtzcixy ayuc huinma'ñ huidibi jäy ci'm ti cojy ti macxy. ⁹ Miich ajcxý ca' mgüendtúngixy Dios ycötújcín Dios ytiy'ajt jigix jëbi cuydúngixy mgi'm costumbre. ¹⁰ Com Moisés je cötújcín ypidac jecy'ajty: “Yajmij'at mdaj mdeedy”, e “Pínjaty jibic nigapx ni'ojnyb ytaj yteedy, copicy y'ögip.” ¹¹ E miich ajcxý minañ co tüg jäy nimahuip ytaj yteedy co ca' pubeda'ñ ajcxý jadu'n nej padyii, mïd co tüg'ócíy tijaty y' ymïd huidibi ytaj yteedy jë'adánip, hue' ti ahuaný nigoo ma Dios. ¹² E pen jadu'n minañ, chi miich ajcxý minaangixy co ca' copícyity mbubéjtcixipy mdaj mdeedy. ¹³ Miich ajcxý midundigooyb Dios ycötújcín mïd mgostumbre huidibi myajnaxyp myajtigüyb, etz jacjadyii jibic-huinma'ñ myaj'ixpíjccixy.

¹⁴ Jadüg'oc Jesús mijhuoy yi mayjäy ajcxý, e chi nimay:

—Mido'mbíjccix miich ajcxý iich n'ayuc, e mhujnihuihuip ajcxý. ¹⁵ Ca' y' yajpocycähuuyb huidibi jäy ajcxý ypidacy ma yhuin y'ahuac.

Yi' janchtiy huídibi pídzim ma jáy ajcxy yjot yhuinma'ñ, yi' yi' ya-jpocycähuüb. ¹⁶ Miich ajcxy mmüd mdätzac, mïdo'mbïjccix ìch n'ayuc.

¹⁷ Co Jesús ixmajch je mayjäy, e ytijctigüy, chi je discípulos ajcxy yaj'amïdoohuï nej yhuimbïdzimý jada ayuc. ¹⁸ Chi Jesús ydiscípulos ajcxy ñimay:

—¿Nej nañ jadu'n miich ajcxy ca' mhuinjihuïy jada ayuc? ¿Nej ca' mhuinjihuïygixy co huídibi tigüy ma yi jáy y'ahuac (yi caayin uucin), ca' yi' yajpocycäy yi jáy? ¹⁹ Yi caayin uucin hue' yi jáy ypidägy ma y'aa ymoox ca' nan ma yjot yhuinma'ñ, e co ñax ma y'aa ymox, chi ypidzimni.

Co Jesús jadu'n ymina'ñ, chi nejhuyim co Dios ca' capx'aducy ni ti caayin ni ti uucin. ²⁰ E Jesús yjacmïnañ:

—Dios yajpocycähuip jáy ajcxy müd huídibi pídzim ma ajcxy yhuinma'ñ. ²¹⁻²² Ma yi jáy ajcxy yhuinma'ñ jii by chooñ jibic-huinma'ñ; jii by chooñ migapxtigoyi töxyjäy yhuinma'ñ; jii by chooñ je tundigooyi yëdyjc müd töxyjäy etz töxyjäy müd yëdyjc huinma'ñ; jii by chooñ jáyyaj'ögü huinma'ñ; jii by chooñ meedzi huinma'ñ; jii by chooñ mügü huídidi huinma'ñ; jii by chooñ jibic-huinma'ñ; jii by chooñ je huin'ñni huinma'ñ; jii by choñ nayca'oy'ixi huinma'ñ; jii by chooñ je piitzcapxi huinma'ñ; jii by chooñ je amij agix huinma'ñ; jii by chooñ je tzuu huinma'ñ je loci huinma'ñ. ²³ Yi jadu'mbi jibicpi jii by chooñ ma jáy ajcxy yjot yhuinma'ñ, paady jibicpi jáy ajcxy túngixy, e ypocycäy ajcxy ma Dios.

Tüg töxyjäy huídï ca' yjudiojäyity mibijc Jesús

²⁴ Chooñ Jesús ma yijimbi it, e ñicxy jim ma Tiro etz Sidón ñaaxjot. Jesús ytigiy ma tüg jáy ytijc, e ca' anajty tzocy co je mayjäy ñejhuïhuïyb ma y'ity. Per ca' jajty ñicx yhuingoyüch. ²⁵ Mïc'amy tüg töxyjäy nejhuyi ma Jesús anajty yajpaady. Hue' je töxyjäy ypi'cnix ymüd anajty ca'oybi. Je töxyjäy ymiñ ma Jesús, e ycojtinay'ahuïy ma yi' yhuinduu. ²⁶ Je töxyjäy hue' anajty ycojápitý Sirofenicia (e hue' anajty griegojäy). Yi töxyjäy may'ajt pijctzoy ma Jesús co huen yajpidzimý je ca'oybi ma ypi'cnix yjot yhuinma'ñ. ²⁷ Chi Jesús je töxyjäy ñimay:

—Ooy ycopícyity co nbudedipyich jayijp Dios yjäy (yi judiojäy). Jadu'n nipaady nej tüg ungedeedy. Tim copicy co je ungedeedy yajcayipy jayijp yci'm ung, e ca' möhuip uc je huídibi y'ung yajjicxaamy.

²⁸ Chi je töxyjäy y'adzooy:

—Huindzin, tiy'ajt nej miich mmina'ñ, per nañ jadu'n yi uc ajcxy yjicxyp je caagy abu'x huídï cáb naaxcíxy ma mesipa't ma je jáy y'ung ajcxy ycaay.

²⁹ Chi Jesús je töxyjäy ñimay:

—Tiy'ajt jadu'n nej ìch miich ti xy'adzooy, paady ycixpi jëb mhuimbidipy ma mdijc jotcujc, je ca'oybi ti ypidzimý ma mñix yjot yhuinma'ñ.

³⁰ Co je töxyjäy huimbijty ma ytijc, chi paty ypi'cnix cijx'am, ti anajty je ca'oybi ñibïdzimýi ycöbïdzimýi.

Jesús yajtzögy tüg jáy huídibi cönat etz ahui'mb

³¹ Chi Jesús jim tzojci chooni Tiro ñaaxjot. Chi chooñ jim ñicxy anajty Galilea, e nicxy ma je tü'aa huídibi najxp Sidón etz je cajp huídibi yajpatp jim Decápolis ñaaxjot, chi yja'ty ma Galilea mij laguunba'. ³² Jim ajcxy müd miñ tüg jáy huídibi cönätip etz aahui'mb. Chi ajcxy may'ajt pijctzoy ma Jesús huen cñixajy je pa'mjäy. ³³ Chi Jesús müdnicxy je pa'mjäy ahuingujc

ma ca' mayjäy, e pidacy ycihua'x ma je pa'mjäy ytätzac. Chi chujy, e huin'it nïdoni je ytoodz. ³⁴ Chi Jesús ypa't'ijxy tzajpcix, e ymicxejy, e chi ymïnañ Aramaico'amy:

—Efata —jada ayuc hue' yhuimbïdzimy: Ahuädz.

³⁵ E mic'amy je jäy cönatpi ytätzac y'ahuaach etz ytoodz yungüy etz ycapxni yajxon. ³⁶ Chi Jesús ane'my je pa'mjäy etz ymigügtijc co ca' huaad ni pin yajmïdmïydägipy jadu'n nej anajty ti chögy. Co Jesús jadu'n mictägy ane'my co ca' huaad ni pin yajmïdmïydägipy je mijhuinmañ huidibi ytumyb, chi nïgi je pa'mjäy etz ymigügtijc mïdmïydaaccixy hueñypinity. ³⁷ Je mayjäy ooy tzachjihuïy huinmay ajcxy, ñayñimaayi ajcxy miñ xyipy:

—Jada Jesús ooy oy chachtuñ. Ymïmadactaayb yi'huenytmïtïjity, ixti yajmïdohuïcipy yi' yi cönatpi etz yajcapxïgy yi uumbi.

8

Jesús yajcay mïdax mil yëydijc

¹ Je huin'it xii je huin'it tiempo mayjäy anajty ti ñaymújicigixy ma Jesús yajpaady, e ca' anajty je mayjäy ajcxy mïdity ti ycaaygixipy y'úuccixipy. Jesús capxyñigüejeje y' ydiscípulos ajcxy, co huen mïingixy ma yi' yajpaady. Co ajcxy ymïiñ, chi nimay:

² —Ooy nba'ayooyich yi mayjäy. Yi' co cham mïdugüig xii maabi ya mïd y'ityich je mayjäy, e ni ca' ajcxy mïdity ti ycaipy. ³ Co ixipy nguexhuimbityich ajcxy ma ytijc ayuu, ca' yjécyity yajpa'mgójipy ajcxy tũ'am, com nijëjity ajcxy jigüëgy ti choongixy.

⁴ Chi je discípulos ajcxy Jesús adzooy:

—¿Ma iich ajt nbaatim je caayin uucin huidibi jëb mïd nyajcaayim nyaj'úucim jada mayjäy? Com mïjtigïduum ya nyajpaatim ma ca' pin chinäy.

⁵ Chi Jesús y'amidooy je' ydiscípulos ajcxy:

—¿Naag tzajcaagy mïich ajcxy mïdity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjäy, co huen iñay'ahuïygixy naaxcixy. Huin'it Jesús conïgy je huixtujc tzajcaagy, e yajnajxy Dioscojuyip ma Dios mïd tzajcaagy ycxipi. Chi tujc-huäcxy je tzajcaagy, e moy je' ydiscípulos ajcxy, e je' ydiscípulos ajcxy yajhuäcxy je tzajcaagy ma je mayjäy. ⁷ Je Jesús ydiscípulos ajcxy ymïd anajty nijëjity pi'c acx. Chi Jesús yajnajxy Dioscojuyip ma Dios mïd je pi'c acx ycxipi, e moy je' ydiscípulos ajcxy huen yajhuäcxtaygixy ma je mayjäy. ⁸ Chi je mayjäy nidüg'ócïy ycaay cüxyi, e co ajcxy ycaayday, chi je Jesús ydiscípulos ajcxy yajpidïgy huixtujc cach cayduc jïcxtuc tïibi anajty yconaxy. ⁹ Jahueeni anajty ycamïdaaxmility je jäy huidibi ajcxy cay uuc cüxyi. Chi Jesús ycapxy yciixy mïd je mayjäy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigïgy mïd ydiscípulos ajcxy, e chi ñicxy ajcxy jim Dalmanuta ñaaxjot.

Yi fariseos ajcxy tüg ijxpejt pijctzoob mijhuinmañybi

¹¹ Nijëjity fariseos ajcxy, je huindzïndijc huidibi padumb judío ycostumbre, ymïiñ ajcxy ma Jesús yajpaady, e ytigïy ajcxy ijxquïpxcixy y'ixpijcin mïd Jesús. Pijctzoogixy co Jesús huen yaj'ixyïi ajcxy tüg ijxpejt

huidibi tzomb tzajpjoty. Ijxta'n octunaangixy müd Jesús. ¹² Chi Jesús tajy may ñayjihuiyí jotjoty huinma'ñyoty, chi ymicxejy, e ymíñañ:

—¿Na'amy co jada jáy ajcxy huidibi jugy'ajtp cham, pijctzoogixy ijx-pejt huidibi tzomb tzajpjoty? Janch íich miich nimaangixy co ca' nyaj'ixaangixy ijxpejt huidibi tzomb tzajpjoty.

¹³ E Jesús ytimycapxycíxy müd je fariseos ajcxy, e chi puyöduuty ajcxy. Chi Jesús ybarcotigíy, e ñicxy müd ydiscípulos ajcxy ma mij laguun ñíñaxy.

Fariseojäy ajcxy yaj'ixpíjcin

¹⁴ Je' ydiscípulos ajcxy ti anajty jaydigoygixy je jicxy pícy co ajcxy ybarcotigíy. Jéyí ajcxy mímíñ tüg pí'c tzajcaagy. ¹⁵ Chi Jesús ane'myb je' ydiscípulos ajcxy, e ymíñañ:

—Ca' mmíjpidaacxíxy yí fariseojäy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huidibi ca' y'óyity.

¹⁶ E je Jesús ydiscípulos ajcxy nimíydaaccíxy Jesús y'ayuc ñayñimáayigixy ajcxy miñ xyípy:

—Je' co ca' íich ajt nmímíñim caayín uucín.

¹⁷ E Jesús ñejhuiyb anajty nej je' ydiscípulos ajcxy ñayñimaayí miñ xyípy, paady ymíñañ:

—¿Na'amy co mdzachnimíydaaccíxy je caayín uucín huidibi ti mjáydigooygixy? ¿Nej ca' mhuinjihuiygixy e ca' mguenditungixy íich n'ayuc? ¿Nej co ajcxy mdzachójuuñity? ¹⁸ Miich ajcxy müd mhuiin: ¿Nej co ca' m'ijxcíxy huidibi ndumybich? Miich ajcxy müd mdädzac: ¿Nej co ca' mmído'mbíjccíxy íich n'ayuc? ¿Nej co ca' mjáyméjtzcíxy ti ti nduñich? ¹⁹ Jayhuin co ndujc-huäcxyich je migooxpí tzajcaagy e nyajcaayich migoox mil jáy: ¿Naag cach cayduc jicxtuc ti ajcxy myajpidígy?

Chi ajcxy y'adzooy:

—Hue' íich ajcxy nyajpidígyich majmetz cach cayduc jicxtuc.

²⁰ Chi Jesús ymíñañ:

—E jayhuin co ndujc-huäcxyich je huixtujcpí tzajcaagy, e nyajcaayich mídaax mil jáy: ¿Naag cach cayduc ti ajcxy myajpidígy?

Chi ajcxy y'adzooy:

—Hue' íich ajcxy nyajpidígyich huixtujc cach cayduc jicxtuc.

²¹ Chi Jesús ymíñañ:

—¿Nej chambaad miich ajcxy ca' mhuinjihuiy?

Jesús yajtzögy tüg jáy huintzpi jim Betsaida

²² Jesús etz ydiscípulos ajcxy oy yjá'tcíxy jim Betsaida. Jim Betsaida nijéjity jáy müd miñ ma Jesús tüg huintzpi, e pijctzoy ajcxy may'ajt co huen nidoñ jigix je huintzpi y'ijxípy. ²³ Huin'it Jesús huijtzooñ je huintzpi ma yci', chi müd cajppidzimy. E chi Jesús yajjaaxy yí chuyñí je huintzpi yhuiin, etz cíníxay, e chi amídoy pen y'ijxpy anajty tigati yinjaty huenjaty. ²⁴ Chi je huintzpi huindicxpejty Jesús, e nimay:

—N'ijxypich yéydíctijc, e jadu'n ajcxy yquëxígy nej quipy, per yöyp ajcxy.

²⁵ E jadüg'oc Jesús yci' pidacy ma je huintzpi yhuiin, e chi je huintzpi yhuindicxpejtpy anajty, e chi yhuiin y'oyíy yajxon, huin'it oy huädz y'ijxy. ²⁶ E Jesús ycapxycíjxy müd je', e quejxhuimbijty ma ytijc. Chi ymíñañ:

—Ca' mǝdǝǝhũip cajpjoty, e ni pǝn jada mgayajmǝdmǝydǝgǝpy.

Pedro capxypǝdzǝmy co Jesús yǝ' je' je Cristo

²⁷ Chi Jesús ñǝcxy mǝd ydiscǝpulos ajcxy jim ma nijǝjty mutz cajp mǝhuingon je mǝj cajp Cesarea Filipino. E tũ'am Jesús amǝdoy ajcxy ydiscǝpulos, ñǝmay:

—¿Nej jǝy ymǝnaangǝxy pǝn ñǝch?

²⁸ Chi ajcxy je' ydiscǝpulos y'adzooy:

—Nijǝjty jǝy ymǝnaangǝxy co miich je' je Juan, je Bautista. E nijǝjty ymǝnaangǝxy co miich je' je Elías. E jacjadyǝ ymǝnaangǝxy co miich je' tũg Dios y'ayucnajtzcaxǝybi hũidibi tũgǝyb mǝd nijǝjty Dios yty'ajtmǝdǝpǝ hũidibi tzǝnaay jecy'ajty.

²⁹ Jesús y'amǝdooy je' ydiscǝpulos ajcxy:

—Miich ajcxy, ¿nej miich mmǝnaangǝxy pǝn ñǝch?

Chi Pedro y'adzooy:

—Miich je' je Cristo.

³⁰ Chi Jesús ñǝmay je' ydiscǝpulos ajcxy co ca' huaad ni pǝn ñǝmaayǝxy, co yǝ' je' je Cristo.

Jesús capxypǝdzǝmy co y'õga'ñ

³¹ Chi Jesús jacyaj'ixpǝjcy je' ydiscǝpulos ajcxy, e ymǝnañ:

—Copǝcy co ñǝch, je jǝy hũidi tzoon tzajpjoty, nyajnaǝpyǝch mǝj tzaachpyǝ etz mǝj ayo'n. Yǝ mǝjjǝyǝdjǝ ajcxy, yǝ judío teedy mǝjtungmǝdǝpǝ, etz yǝ escribas, je huindzǝndǝjǝ hũidibi ñǝjayduutǝxyp Dios necy, ca' ajcxy xy'ixa'ñǝch, e xyaj'õga'ñ ajcxy, e codugǝg xǝ ñǝjugypǝgǝpyǝch jadũg'oc co ñǝch anajty tǝ n'õgy. ³² Co Jesús jadu'n ñǝgapxy ñǝmǝydacy huǝdz huǝdz nej yjada'ñyǝ anajty, chi Pedro huobǝbzǝmy Jesús ahuingujc, chi ooy ojy.

³³ Chi Jesús ñǝ'ixxhuimbǝjty ydiscǝpulos ajcxy, e ojy je Pedro, ñǝmay:

—Huǝnhuǝctuatcǝch, miich Satanás. Com miich ca' mhuǝnma'ñ mbǝdǝgy nej Dios tzocy. Yǝ' janchty miich mhuǝnma'ñ'ajtpy nej jǝy ajcxy tzocy.

³⁴ Huǝn'it Jesús huoomǝñ yǝ' ydiscǝpulos ajcxy etz yǝ mayjǝy, e chi ñǝmay:

—Pen ji pǝnjaty xypanǝcxa'ñǝch, huen jǝyǝgoydǝy yǝ'mdzǝjǝcin etz huen xypanǝcǝch jabom jabom. Oy nej ytmǝjadǝpy ytmǝ'yaoohũipy. Jadu'n ñǝpaady nej jǝhũyǝ ajcxy anajty mgruudz mgabǝccǝxy, etz nayǝjǝjǝgǝxy ma yǝ ó'cin huen ytmǝñǝjty mǝd ñǝch yǝxǝpǝ. ³⁵ Huenpǝnjǝy hũidibi ca' yega'ñ yǝ yjugy'ǝjtǝn ma yǝ ó'cin mǝd ñǝch yǝxǝpǝ, hue' je' yajtgoyamy yǝ'yjugy'ǝjtǝn. E huenpǝnjǝy hũidibi yegamy yjugy'ǝjtǝn ma yǝ ó'cin mǝd ñǝch yǝxǝpǝ etz ñǝch y'ayuc oybi yǝxǝpǝ, hue' je' ypadamyb yǝ jugy'ǝjtǝn hũidibi ca' cǝxǝpy tǝgoyǝpy ñǝ mǝnaa. ³⁶ ¿Tǝ oy'ǝjtǝn yǝ' co tũg jǝy y'ocnayǝpadǝybi yǝ meeñ etz mǝc'ǝjtǝn (hũidi yajpaatp ya ñǝaxhũiñybi) e y'alma yjugy'ǝjtǝn cǝxǝpy tǝgoyǝpy tũgǝy? ³⁷ ¿Jadu'ñyǝ jǝb jǝy y'alma yjugy'ǝjtǝn occojuyǝ? Ñǝgǝ tzoohũin mǝdity jǝy ajcxy y'alma yjugy'ǝjtǝn, ca' jac tǝ. ³⁸ Huentǝmpǝnity yǝ hũidibi xymǝdzo'ydũnǝbǝch yǝ n'ayucǝch ndǝy'ǝjtǝch ma yǝ pocyjǝyǝdjǝ yhuǝnduu hũidibi tzǝnaayb cham ma jada naaxhũiñybi. Pues ñǝñ jadu'n ñǝch, je jǝy hũidibi tzoon tzajpjoty, ñǝmǝdzo'ydũnǝbǝch yǝ jadu'mbi jǝy co ñǝch anajty ñhuimbity ya naaxhũiñybi mǝd ñǝch nDeedy, je Dios Teedy, ymǝc'ajt y'oy'ajt etz mǝd tũg'õcy yǝ may'ǝngeles ajcxy tudǝgǝpy.

9

¹ Jadu'n Jesús yjacmīnañ:

—Janch tīy'ajt jadu'n nej ñich miich ajcxy cham nimäy, co nijëjity miich ajcxy huidibi cham ma ñich nhuinduu, ca' m'ögaangixy, ixti cooni ajcxy jayjip m'ixipy je Dios y'ané'min etz ymic'ajt.

Co Jesús ñinīcx yajtigajch

² Co tuctujc xii naxy, chi Jesús miid tzoof Pedro, Santiago etz Juan, e mīdpa'ttigīy ma tūg mijcop ma tūg it ooy ycīxity. E jim copcīxy Jesús ñinīcx naygojtīgajtzni ma Pedro ajcxy yhuinduu. ³ Chi Jesús yhuīt oy y'ahuimbity janch poob, e janch adīcxp. E ni pin jadu'n yhuīt cayajhuāch janch poob jadu'n nej je' anajty yhuīt mīdity. ⁴ E chi oy nayguëxīgyii ma ajcxy yhuindu Elías etz Moisés. Elías etz Moisés mīydacp anajty ajcxy mīd Jesús. ⁵ Huin'it Pedro nimay Jesús:

—Huindzin, janch oy jadu'n co ñich nyáajity. N'occojyich ajcxy tugīg tijcquemy: tūg miich mje'; tūg Moisés yje'; etz tūg Elías yje'.

⁶ Com Pedro, Jacobo etz Juan ooy anajty chīgīyīgīxy, paady Pedro ca' anajty nejhuīy ti ycapxyp. ⁷ Tim huin'itīy tūg joc yajnidīgoy je' ajcxy, e mīdooy ajcxy ayuc jocjoty, e je ayuc ymīnañ:

—Jada je' ñich n'ung, huidibi ooy ndzocyich. Mīdo'mbic miich ajcxy Jesús y'ayuc.

⁸ E tim huin'itīy Pedro, Jacobo etz Juan ajcxy yujc'ijxy, e yja'ijxhuidijty ajcxy, e ca' ni pin ma ocjac'ijxni, jēda'ajty Jesús naydügpajc.

⁹⁻¹⁰ Tī anajty choongīxy copcīxy, e cidacp anajty ajcxy, co Jesús nimay Pedro, Jacobo etz Juan, co ca' huaad yajmīdmiydaaccīxy pinjaty huidibi ajcxy anajty ti ijxcīxy, ixti cooni ñich, je jāy huidibi tzoon tza-jpjoty, n'ögībīch etz njugypīgīpyīch jadüg'oc. Pedro, Jacobo, etz Juan ca' yjacmīydägy mīd jacpinjaty huidibi anajty ti ijxcīxy. Per ooy ajcxy huinmay etz naymīdmiydaacīgīxy miñ xyipy ti Jesús ytūjamy co ymīnañ: "N'ögībīch etz njugypīgīpyīch jadüg'oc." ¹¹ Huin'it ajcxy Jesús y'amīdooy:

—¿Na'amy co yī escribas ymīnañ co yī Elías huidibi chinay jecy'ajty jayjip miinañ ca'ydī je Cristo?

¹² Chi Jesús y'adzooy:

—Tīy'ajt jadu'n co miñ jaybety ma Dios ñecy jecy'ajty co Elías yhuimbidity jacjayjip ca'ydī je Cristo, e yaj'oyīydāhuīpy huinjemybī tūg'ócīy mīd Dios ycīxpi. E nañ tīy'ajt jadu'n co jaybety ymīñ ma Dios ñecy co je Cristo, je jāy huidib tzoon tza-jpjoty, yajnaxa'ñ ayo'n etz tzaachypī etz mayjāy ca' y'ixa'nūby. ¹³ ñich miich ajcxy nīmaayb co je Elías ti je' yhuimbity ya naaxhuīñ, e je mayjāy ti tūngīxy mīd Elías nej anajty tim tzójcīxy. E cuyduñ ajcxy nej jaybety mīñ ma Dios ñecy mīd Elías ycīxpi.

Jesús yajtzōgy tūg mutz'anäg huidibi ca'oybī mīd

¹⁴ Co Jesús, Pedro, Jacobo etz Juan yhuimbity ma je jacjadyii Jesús ydiscīpulos ajcxy anajty ti yhuī'mīy, chi ajcxy ijxy mayjāy jūhuidity ma Jesús ydiscīpulos ajcxy. Etz ijxy ajcxy nijëjity escribas huidibi ayuc tzachyajtzībīyib mīd Jesús ydiscīpulos ajcxy. ¹⁵ E co je mayjāy ijxcīxy nejhuīyīgīxy co Jesús ti yhuimbity anajty, chi mic'amy ajcxy ninīcxīy Jesús poyīgīy, e capxpooxcīxy, e may je' ajcxy ooy jihūiy huinmay. ¹⁶ Chi Jesús y'amīdooy je mayjāy, nimay:

—¿Tī ayuc miich ajcxy mdzachyayjomyb mīd ñich ndiscīpulos ajcxy?

¹⁷ Chi nidüg je jāy ajcxy y'adzooy:

—Huindzin, ti nm̄dmiiñ ñch nmang huidibi ym̄id ca'oybi, e je ca'oybi ti yaj'um̄iyii. ¹⁸ E janam jadojoc je ca'oybi yajyachyii yajqūidyii ñch nmang, e oy cāy naaxc̄ixy, e ooy y'aa'opy ypidzimy, e nañ jadu'n oy yt̄itz queety etz ñin̄icx janch ögy yhui'my. Ti nb̄ijctzoyich may'ajt m̄id miich mdisc̄ipulos ajcxy co huen yajpidzim̄gixy je ca'oybi ma ñch nmang, e ca'ajcxy ymadacy nicxy yajpidzim̄gixy.

¹⁹ Jesús nimay je mayjāy:

—Miich ajcxy huidibi jugy'ajtp jadachambi xii tiempo huidibi ca' mijpidāgy Dios y'ayuc, ¿naag xii naag po' ñch njac-hui'mm̄h̄uibich m̄id miich ajcxy? ¿Naag xii naag po' n'ocm̄imecxtuguipeich miich ajcxy? M̄idmiin yi mmang ya ma ñch nhuinduu.

²⁰ Chi ajcxy m̄idmiñ je pa'mjāy ma Jesús yhuinduu. E co je ca'oybi ijxpaady Jesús, chi mic'amy yajyajch yajqūidy je pa'mjāy, e chi oy ciday naaxc̄ixy, e ooy yajch yqūidy, yajpidzimy ooy y'aa'opy ma y'ahuac.

²¹⁻²² Jesús y'amidooy je pa'mjāy yteedy:

—¿Minaag jim̄jt cujc yōy maabi mmang ypa'mbety?

Chi je ungedeedy y'adzooy:

—Ma'xung anajty co pa'mbedyii. Canaag'oc je ca'oybi yajyachyii yajqūidyii ñch nmang, ixti ti oy ycogidahūy j̄injoty etz n̄ijoty. Je ca'oybi canaag'oc jayaj'ögy ñch nmang. Pen miich m̄id tzöc'ajt mic'ajt jaydēb xypubed̄ipyich, tun may'ajt pa'ayoogich etz pubejtcich.

²³ Chi Jesús y'adzooy nimay je pa'mjāy yteedy:

—Pen miich m̄ibijcp̄i, ca' ti chípity ma pin m̄ibijcp̄.

²⁴ Mic'amy je pa'mjāy yteedy mic ycapxy yminañ:

—Nm̄ibijcyich, pubejtcich nej huaad jacm̄ij nm̄ibicyich.

²⁵ E co Jesús ijxy co n̄iḡi mayjāy chach ym̄iñ poȳigy ma yi', chi ix'ojoy je ca'oybi, e yminañ:

—Miich ca'oybi huidib ti yajhui'my jada pi'c'anāg uum etz nat, ñch miich yam n'ane'myb: “Pidzim ma yi pa'mjāy, e ca' m̄jactiḡihuipy ma yi' yjot yhuinma'ñ jadüg'oc.”

²⁶ Jayijp je ca'oybi yaaxqueecy janch mic, yajyajch yajqūidy je pa'mjāy. Co jadu'n tuñ, chi ypidzimy. Je pa'mjāy oy ñin̄icx yhui'my nej jihūy ti y'o'cni. Je mayjāy huidibi anajty ajcxy jim huind̄icxp yminaangixy:

—Ti ayoob y'ögy.

²⁷ Chi Jesús majtz je pa'mjāy yci', e yajpid̄igy e huin'it je pa'mjāy ytinaȳigy mic oy.

²⁸ Co Jesús ytiḡiy ma t̄üg t̄ijc, chi je' ydisc̄ipulos ajcxy y'amidou ameech, minañ ajcxy:

—¿Na'amy co ñch ajcxy ca' ti nmadāgyich nej nyajpidzim̄ip ñch ajcxy yi ca'oybi?

²⁹ Chi Jesús y'adzooy:

—Yij̄ibi ca'oybi ca' yi' huaad ypidzimy jadu'ñyi. Hue' janchty copicy m̄ibijctzou Dios mictāgy, e huin'it ypidzimipy je ca'oybi ma je pa'mjāy. Ca' jac ni nej huaad ypidzimy yi jadu'mbi ca'oybi, j̄eyi co Dios nm̄ibijctzoohuim n'j̄tim ayuu.

Jesús capxpidzim̄ip jadüg'oc co y'öga'ñ

³⁰ Chi Jesús m̄id yi' ydisc̄ipulos ajcxy choñ ma je jimbi it, e yajyöyñajxtay ajcxy Galilea naaxjot. Jesús ca' anajty tzocy co je mayjāy ñejhūih̄uyb ma yi' ñicxy. ³¹ Com Jesús hue' anajty yaj'ixpicy yi' ydisc̄ipulos ajcxy, co ooy

ycopícyity co yí jáy huídibi tzoon tzajpjoty, yajcíyegípy ma yí ymidzip, etz yaj'ögíyib, e co anajty ti y'ögy codugíig xíí jadüg'oc yjugypígyípy. ³² Jesús ydiscípulos ajcxy ca' huinjihuíy anajty Jesús y'ayuc, e nañ jadu'n tzigíyib anajty ajcxy co Jesús yaj'ójip, paady ca' ajcxy amidoy nej huimbízimy yijíibi ayuc.

¿Pín je' nígí jacmíjip?

³³ E Jesús míid ydiscípulos ajcxy oyjáty jim Capernaum. Co ajcxy ytíctigíy, chi Jesús yaj'amidoy ydiscípulos ajcxy, nimay:

—¿Ti ayuc miich ajcxy naymíidmíydáacígíxy jim ma anajty mdüyögyíxy?

³⁴ Per amonday ajcxy, com jégíxpi co anajty ajcxy ooy ti ñaymíidmíydáacígíxy tüyöyjoty co pín jada' ajcxy nidügti ocjaccopícyip.

³⁵ Huin'it Jesús y'ixtacy, e chi mǐjhuoy je nimajmetzpi ydiscípulos ajcxy, chi ajcxy nimay:

—Pín nayyajnaxaaníp mǐj, huen ity nej jíhuíy ca' ytiíjity e huen capxmíidoy ymígügtíj.

³⁶ Chi Jesús tzenígy tüg pí'c'anäg, e chi pídacý cujc'amy ma yí' ydiscípulos ajcxy. Chi tzenígy jadüg'oc, e nimay ajcxy:

³⁷ —Pín cöbǐc tügǐajc pí'c'anäg jadu'n nej jada pí'c'anäg míid íich nxíi ycǐxpi, íich yí' anajty tí xycöbǐcyíich, e pín íich xycöbǐjcpíich, ca nan íich anajty naydüǐajc tí xycöbǐjcyíich, nañ jadu'n anajty tí cöbǐcy huídí tí xyquejxíich.

Pín íich ajt xycamídzíp'ájtm, íich ajt je' míid y'ity

³⁸ Juan Jesús nimay:

—Huindzin, tí íich ajcxy n'íjxpaady tüg jáy co ca'oybí yajpídzimy míid miích mxíí, e tí ngapx'aducyíich míid co ca' yí' íich ajt xypahuídíjtm.

³⁹ Per Jesús ymíinañ:

—Ca' mgapx'adugípy yí jadu'mbí jáy, com huenpínity huídibi mǐjhuinma'ñ tumb míid íich nxíí, ca' yí' jíbic xyñígapxíich. ⁴⁰ Com yí huídibi ajt ca' xymídzíp'ájtm, yí' yí' míid íich ajt nbídzímim. ⁴¹ Janch janch íich miích ajcxy jadu'n nímáy co huenpínjáy huídibi íxyípy miích ajcxy xyajnií'uucp tüg vaso níí míid co miích ajcxy tí mmíjncxpety je Cristo, yí jadu'mbí jáy ypadamy yí' y'oy'ájtín ma Dios.

Je huídibi ooy ycojotmáyity co nícxý nbocycáhuím

⁴² Huenpínity huídibi jíbic-huinma'ñ mǐbídzim, e yajpocycäy yí jadu'mbí pí'ctíj huídibi ajcxy xymíjncxpéjtpíich, jac'oy íxyípy co yí jadu'mbí jáy ytímyñayyájöcxodzíyíi tüg paandzaa etz ñayñajtzjibííhuíyib mejyjoty. ⁴³ Pen miích mǐgí' xyajtundígoyamb jac'oy co mdím'ixpuxípy, com jac'oy co mdígíhuípy ma yí jugy'ájtín huíníxííbi cídud, ca'ydí co Dios xypídägíp míid metz mǐgí' jíiby jíinjoty ca'oydactuuby, ma yí jíin ní camína ycapíich. ⁴⁴ Jíiby ca'oydactuuby yí ucxyting ca' y'ögy etz ní jíin ycapíich nícamínaaxíí. ⁴⁵ E pen miích yí mdecy xyajpocycáhuamb, íxpux, com jac'oy co mdígíhuíp ma yí jugy'ájtín huíníxííbi tecytuc ca'ydí co mdígíhuíp míid metz mdecy jíiby ca'oydactuuby, ma yí jíin ní camína ycapíich. ⁴⁶ Jíiby ca'oydactuuby yí ucxyting ca' y'ögy etz ní jíin ycapíich ní camínaxíí. ⁴⁷ E pen yí mhuíin tüg xyajpocycáhuamb, tím yajpídzím, jac'oy yí' co mdígíhuíp ma yí Dios y'ane'mdac míid tügǐajc mhuíin, ca'ydí

co mdig'ihuiꝑ ca'oydactuuby m̄id metz mhuiin. ⁴⁸ Ma yí ucxyt'ing ni caminaxii yca'ogy etz yí j̄in ni caminaxii ycap'ich, ⁴⁹ e ma nidüg'óciy ñi'cägooda'ñ j̄in xut j̄in ye'n tim jadu'n nej jāy tzüch caan xiducy. ⁵⁰ Yi caan ooy yí' y'óyity, pen ym̄id xücx'ájtin. Co je caan ytigoy yxücx'ájtin, ca' ji ni ti huidibi jēb m̄id nyajxücxiiyim. M̄id'ájt'icx iich n'ayuc ma m̄jot mhuiinma'ñ, jadu'n iich n'ayuc nipaady nej caan, e tzina' miich ajcxy jotcujc m̄id mmigügt'ic nidüg nidüg.

10

Jesús yaj'ixpiꝑy m̄id co jāy ytöxyijc ixmach

¹ Chi Jesús chooñ j̄im Capernaum, nicxy j̄im Judea ñaaxjot ma je it lugar Jordán mijñii ninaxy xii ypidzimy'amy. E mayjāy ooy ñayyöymujci ma Jesús anajty yajpaady. E Jesús yaj'ixpiꝑy je mayjāy jadu'n nej anajty yaj'ixpiꝑy'adyii. ² Chi nijējity fariseos ajcxy ñicxy ma Jesús anajty yajpaady. Hue' ajcxy yhuinma'ñ pidaaccixy co anajty Jesús tzu'ixaangixy. Chi ajcxy y'amidooy, pen huaad tūg yēydijc ixmach ytöxyijc. ³ Chi Jesús y'adzooy, ym̄inañ:

—¿Nej Moisés ym̄ina'ñ ma yí' ycötújcín ñecy?

⁴ Chi je fariseos ajcxy Jesús y'adzooy:

—Moisés cötújcín yecy co tūg yēydijc jēb huaad ixmach ytöxyijc, e möhuiꝑy ñinecy ñidiy'ajt co nej ñay'ixm̄ájtzigixy, e jadu'n anajty ti y'oyiy nej jēb yí' ytöxyijc ixmach.

⁵ Chi Jesús ym̄inañ:

—Moisés cojaay jada ycötújcín m̄id miich ajcxy ycixpi, co ooy miich ajcxy mdzachcapxycōmidodaaccixy ca' mgapxym̄idohuaangixy Dios. ⁶ Per co je naaxhuiñybi chondacy, co Dios oga'n yajcojy tūg'óciy tijaty huidi ji'ajtp, chi Dios yajcojy yēydijc etz tōxyjāy. ⁷ E je yēydijc ixmadziꝑy ytaj yteedy etz pudig'ihuiꝑy yí' ytöxyijc. ⁸ E je yēydijc etz ytöxyijc tú'ciy idaangixy. Paady je yēydijc tūgmucy yajpaady m̄id ytöxyijc. ⁹ Com yí' huidibi Dios ti huijtzmucy, ca' ni p̄in huaad huijtzhuāgy.

¹⁰ Co Jesús m̄id ydiscípulos ajcxy yhuimbijt ma anajty ti yjättáccixy, chi Jesús ydiscípulos ajcxy yajtihuimbijtcixy je ayuc huidibi anajty ti yaj'ixpiꝑy ma je p̄ijcín. ¹¹ Chi Jesús ym̄inañ:

—Je yēydijc huidibi ti ixmach yí' ytöxyijc, e piꝑy m̄id huingbi, hue' yí' anajty ym̄idundigooyb yí' ytöxyijc huidibi m̄id jayijꝑ ypiꝑy. ¹² Nañ tim jadu'n co tūg tōxyjāy ixmach je yēydijc huidibi m̄id ti ypiꝑy jayijꝑ, e ypiꝑy'igach m̄id huingbi yēydijc, hue' ym̄idundigooyb je yēydijc huidibi m̄id ti ypiꝑy jayijꝑ.

Jesús conucxy pi'ctijc

¹³ Je huin'it tiempo jāy ajcxy m̄id miñ pi'ctijc ma Jesús, jaydēb cñixajy etz conuucxip. Co Jesús ydiscípulos ajcxy jadu'n ijxy co jāy ajcxy nimijhuāgy Jesús m̄id ajcxy ypi'c'ung, chi je' ydiscípulos ajcxy ix'oꝑy je jāy ajcxy. ¹⁴ Co Jesús jadu'n ijxy nejhuñy nej yí' ydiscípulos ajcxy y'id'ich, chi oꝑy ajcxy, ym̄inañ:

—Ooy y'óyity co je pi'ctijc ajcxy xyñimijhuāgy'ich, ca' miich ajcxy mgapx'aducy. Com yí' jāy ajcxy huidibi yajpatꝑ ma Dios y'ané'min, jadu'n ajcxy nipaady nej pi'ctijc. ¹⁵ Janch iich miich ajcxy nimāy co p̄injaty huidibi ca' cōbiga'ñ Dios y'ané'min, jadu'n nej pi'ctijc cōbijccixy Dios y'ané'min, hue' yí' jadu'mbi jāy ajcxy ca' ytig'ihua'ñ ma yí' Dios y'it lugar.

16 Chi Jesús aminenmujctay je pi'ctijc ajcxy, e chi cñixajiy etz conu-ucxcixy.

Tüg mutz'anäg comeeñybi ymiydägy müd Jesús

17 Co Jesús chooñ jadüg'oc, chi ñimiini poyigy tüg yëydijc, yco-jxtinay'ahuyi ma Jesús yhuinduu, e ymínañ:

—Miich, oybi Huindzin, ¿ti huaad ndunipyich jigix jëbi nbadipyich jugy'ájtín huídibi ca' ycixipy ytigoyipy?

18 Chi Jesús ymínañ:

—¿Na'amy co xyñimäyich co oy huindzin ñich? Dios tügpajc óyip, ca' jac ni pin. 19 Miich mnejhuiyb Dios ycötújcín huídibi jadu'n mínaam: “Ca' mmigapxtigoyip töxyjäydijc; ca' mjäy'aj'ögipy; ca' mmeedzip; ca' m'ñndaacip; ca' pin mhuin'ñip; etz myajmij'adip mdaj mdeedy.”

20 Chi je jäy Jesús ñimay:

—Huindzin, ti nguýdündäyich jadyaab cötújcín ajcxy maabi ñich nbi'c'atyich.

21 Chi Jesús huindixpejty je yëydijc müd tzójcín jihuiyín, e chi ñimay:

—Per jactigoy'ijtni jadügnax. Nícx toog tüg'óciy huídijaty miich mmüd, etz mo' yi ayoobtijc. Co jadu'n mdunipy, chi mbaadipy oy'ájtín jibby tzajpjoty. Co jadu'n mdoctáhuipy tijaty miich müd, chi minip jadüg'oc ma nyajpaadyich, e xypaníxibich, e mnaybidägüib cixyjot huinjot oy nej mdimyjadipy müd ñich ycixpi.

22 Co jadu'n je yëydijc midoy nej anajty Jesús ti ñimäyíi, chi yhui'my taj may e co ñícxni, chi ooy ytajy ymay, com hue' je' anajty ooy ycomeeñity.

23 Co Jesús jadu'n ixty co je comeeñybi taj may yhuimbijtni, chi huindixpejty je' ydiscípulos ajcxy huídibi tinaayb júhuídity ma yi', e ymínañ:

—Ooy chachtzípity co tüg comeeñybi ytigíhuipy ma Dios y'it lugar.

24 Jesús ydiscípulos ajcxy ooy tzachhuinmay'ahuidity müd jada ayuc nej Jesús anajty ti ymínañ. Paady Jesús yjacmínañ jadüg'oc:

—Miich ajcxy migügtijc huídibi ooy ndzocyich, ooy chachtzípity co ytigíhuip ma Dios y'ane'mdac tüg comeeñyjäy huídibi tzachnijot'ajt ycomeeñ'adii. 25 Nigi chípity co tüg comeeñ jäy ytigíhuip ma Dios y'ane'my, ca'ydi co tüg camello ñaxipy ma tüg xu'ñ'íjx yxütity.

26 Co jadu'n ajcxy midoy nej Jesús ymínañ, chi ooy ajcxy yhuinmay'ahuidijty, e nayñimáayigixy miñ xyipy:

—Pen janch tiy'ajt jadu'n, ¿pinjäy jada' huaad jëb y'alma ñídzögipy?

27 Je huídibi jäy ajcxy ca' ni minaxii huaad ca' yaj'oyíy, Dios yi' yaj'oyíhuip, com müd Dios ca' yi' ni ti chípity.

28 Chi Pedro ymínañ:

—Huindzin, occuendtun, ñich ajcxy ti n'ixmajtztäyich tüg'óciy tijaty anajty nmüdich, e ñich ajcxy nbanícxpích miich.

29-30 Chi Jesús y'adzooy, mínañ:

—Janch tiy'ajt nej ñich miich ajcxy ñimäy co huenpínity huídibi müd ñich ycixpi ti íxmach ytijc, ti íxmach y'uch ymigüg ajcxy etz ytaj yteedy, etz ytöxyijc, etz y'ung ajcxy, etz nañ jadu'n ti íxmach ycam ñich ycixpi, etz ñich n'ayucích etz müd Dios ytiy'ajt ycixpi, yi' ypadamy nígi oy'ájtín ya naaxhuiñ, íxti ypadamy migo'px jadu'ñiyi ytijc ajcxy, y'uch ajcxy, ytaj ajcxy, y'ung ajcxy, etz ypadamy nígi ymij cam, müd tzaachypí müd ayo'n müd ñich n'ayuc ycixpi. Etz nañ jadu'n ma je xii tiempo huídibi mím

cidacpi ypadamy jugy'ájtín huídibi ca' ycixipy ytigoyipy. ³¹ Ji yajpaady ya naaxhuiñ nijëjity jáy huídibi cómay ijtp, e co yjáty ajcxy tzajpjoty, chi ca' ajcxy cómay ida'ñ. Nañ jadu'n ji yajpaady ya naaxhuiñ nijëjity huídibi ca' cómay y'ity, e co ajcxy yjadípy tzajpjoty, chi jiiby ajcxy cómay y'idipy.

Jadüg'oc Jesús capxpídzímnip co y'öga'ñ

³² Jesús m'iid ydiscípulos tüyöyp anajty ajcxy, hue' anajty ypättigiygixy jim Jerusalén. Jesús jayijp anajty ñicxy, e je' ydiscípulos ajcxy etz nañ jadu'n mayjáy panícxy anajty ajcxy Jesús. Je Jesús ydiscípulos ajcxy ooy chachhuinmay'ahuidítcixy, e jacjadyii jáy huídibi anajty ypanícxy Jesús ooy ajcxy chigiygixy. Chi Jesús huodzooñ abícy je majmetzpi ajcxy, e yajm'iidm'iydactay je' ajcxy jadu'n nej ytuna'ñyii yjada'ñyii jim Jerusalén co anajty ajcxy jim yja'tcixy. ³³ Jesús je nimajmetzpi nimay:

—Miich ajcxy m'ijxpy mnejhuíyb co nnícxim cham jim Jerusalén. E jim Jerusalén, iich je jáy huídibi tzoon tzajpjoty, nyajcüyega'ñich mach ma yi Teedy m'ijtungm'iidpi, etz ma yi escribas ajcxy. E chi ajcxy ane'min pídag'a'ñ co huen xyaj'öcixich. Nañ jadu'n xycüyegaangixich mach ma yi' ajcxy huídibi ca' yjudiojáyity. ³⁴ Yi' ajcxy xyñixigipy xyajxigibych, xyhuobipyich ajcxy m'iid coochac, xyhuindzuj xyjijptzújibich ajcxy, e xyaj'ögibich ajcxy. Codugüg xií maabi anajty xyaj'öccixyich, chi njugypigipyich jadüg'oc.

Jacobo etz Juan pijctzóogixy tüg may'ajt

³⁵ Huin'it Jacobo etz Juan, yi Zebedeo ajcxy ymang, nimijhuägy Jesús, nimay:

—Huindzin, ndzojcpyich ajcxy co mdunipy may'ajt jadu'n nej yam nimaaygixy.

³⁶ E Jesús yminañ:

—¿Ti mdzojcpy co ndunipich m'iid miich ajcxy ycixpi?

³⁷ Chi ajcxy yminañ:

—Tun may'ajt co anajty mbaady yi m'ané'min etz m'oy'ájtín, xymöhuibich yi mij tung ma m'ané'min jaydéb n'ñähuibich ma miich mmijc. Nidügti iich ajcxy n'ñähuiipy a'oy'amy ma miich etz jadüg anajty'amy.

³⁸ Chi Jesús nimay Jacobo etz Juan:

—Ca' miich ajcxy mnejhuíy ti ti mbijctzoogixy. ¿Nej myajnaxamyb miich ajcxy je tzaachypi ayo'n huídibi nyajnaxaamybich, jadu'n nej jihuíy m'üga'ñ ajcxy iich n'ügy e mbaada'ñ ajcxy iich nnibéjtín?

³⁹ Jacobo etz Juan y'adzooy:

—Iich ajcxy nmimadägibich minaxipyich nyajnaxipyich ajcxy yi tzaachypi huídibi mminaxamyb myajnaxamyb.

Chi Jesús yminañ:

—Janch tiy'ajt jadu'n nej miich ajcxy m'ina'ñ co mminaxaangixy myajnaxaangixy yi tzaachypi jadu'n nej iich mminaxaamyich nyajnaxaamyich yi tzaachypi, tim jadu'n nej jihuíy m'ügaangixy iich n'ügy, e mbadaangixy iich nnibéjtín. ⁴⁰ Per ca' iich cötújcín nm'iididyich co iich miich ajcxy nbidägipy tungm'iid, co myajpaadip tüg ma iich mmijc a'oy'amy, e jadüg anajty'amy. Hue' janchtiy Dios Teedy ym'iid ni'ixi' pinjaty ti huin'ixy jaydéb yajnícxip je m'ijtung ma iich n'ané'min.

⁴¹ Co je jacjadyii Jesús ydiscípulos ajcxy nejhuñy jadu'n nej Jacobo etz Juan may'ajt pijctzoy ma Jesús, chi ajcxy ooy mijotmäty Jacobo etz Juan.
⁴² Per Jesús huomiñ yí jacjadyii ydiscípulos ajcxy, e ymíñañ:

—Jadu'n nej miich ajcxy mnejhuñygyxy, yí jāy ajcxy huídibi mįtungmı̄d ma je maybı̄ naax cajp, mic ajcxy ane'my je naax cajp. Nañ jadu'n yí' ajcxy huídibi mic'ajt mı̄d ma je maybı̄ naax cajp, mic ajcxy ane'my je jāy ajcxy. ⁴³ Per miich ajcxy ca' mjadu'nı̄ty nej mįtungmı̄dpi ma je maybı̄ naax cajp. Pınjaty ma miich ajcxy mįtung yajnicxaamb, copı̄cy ñaybidägı̄yb nej tüg tumbı̄. ⁴⁴ Pınjaty miich ajcxy huídibi nigohuajc'ajtp, copı̄cy ñaybidägı̄yb nej tüg tumbı̄. ⁴⁵ Com ĩch nañ jadu'n, je jāy huídibi tzoon tzajpjoty, ti nmiññich ya naaxhuñ jaydėb nbubedı̄pyı̄ch yí mayjāy ajcxy, e ca' nan yí mayjāy ĩch xypubedı̄py. Ti nmiññich jaydėb nyegı̄pyı̄ch njugy'ajtın ma yí o'cın. E co jadu'n nyegı̄pyı̄ch njugy'ajtın ma yí o'cın, chi ngohua'naññich yí jāy ajcxy y'alma.

Jesús yajtzōgy Bartimeo huı̄di anajty huı̄ntzpi

⁴⁶ Chi oy jāty Jesús mı̄d ydiscípulos ajcxy jim Jericó. E co Jesús tzoofñ Jericó ytübı̄jcy jadüg'oc, chi yí' ydiscípulos ajcxy etz janch mayjāy ñı̄cxcı̄y anajty mı̄d Jesús. Co ajcxy ycajp pidzı̄my, chi tūba'ay anajty yajpaady tüg huı̄ntzpi huídibi limosna anajty ypijctzooyb jabom jabom. Hue' anajty yxı̄ Bartimeo, e Timeo anajty xı̄jı̄ty yí' yteedy. ⁴⁷ Co Bartimeo nejhuñy co Jesús je Nazaretpı̄ najxp anajty ma je tū'aa, chi mic yaaxqueegy ymíñañ:

—Jesús, David y'ap y'oc, tun may'ajt ĩch pa'ayoog.

⁴⁸ Chi je mayjāy ajcxy ogy je huı̄ntzpi, nı̄may ajcxy co huen amoñ. Per je huı̄ntzpi nı̄gi ymı̄nan'ı̄dı̄ch:

—Miich, David y'ap y'oc, tun may'ajt ĩch pa'ayoog.

⁴⁹ Chi Jesús ytınayxı̄jpy, e ymíñañ:

—Huomiñgı̄x yí huı̄ntzpi.

Chi je jāy ajcxy oy yajtzoongı̄xy je huı̄ntzpi, nı̄maaygı̄xy:

—Jotcugi', e pidı̄g, com Jesús xyaaxtzoob.

⁵⁰ Chi mic'amy je huı̄ntzpi, najtz'oxı̄y je ñı̄be'ñ, chi ypidı̄gy, e ninı̄cxy Jesús. ⁵¹ Chi Jesús je huı̄ntzpi y'amı̄dooy:

—¿Ti mdzojcpy ndunı̄pyı̄ch mı̄d miich ycı̄xpı̄?

Chi je huı̄ntzpi ymíñañ:

—Huı̄ndzın, ndzójcpyı̄ch co xyajhuı̄ndı̄cxı̄gı̄bı̄ch.

⁵² Chi Jesús je huı̄ntzpi nı̄may:

—Jėb mnicxy ma mdı̄c. Com ti xymı̄bı̄cyı̄ch, paady ti mhuı̄ndı̄cxı̄gy.

Tim huın'ıt je huı̄ntzpi yhuın'oyı̄y, e yhuı̄ndı̄cxı̄gy, e panı̄cxy Jesús co ytübı̄jcy jadüg'oc.

11

Jesús ytı̄gı̄y jim Jerusalén

¹ Co Jesús etz je mayjāy oyjá'tcı̄xy huı̄ngon ma je Jerusalén cajp ma yajpaady meı̄tz mutz cajp huı̄di xı̄jı̄py Betfagé etz Betania, huı̄ngon ma je cop huídibi xı̄jı̄p Olivos, chi Jesús quejxy metz ydiscípulos huen nı̄cxy jayı̄p. ² Jesús nı̄may je metzpi ydiscípulos:

—Nı̄cx miich ajcxy ma yı̄jı̄mbı̄ cajp huı̄ngonbı̄. Co jim mjādı̄py, chi mic'amy mbaadp tüg burro ycoxóchı̄ty huídibi ca' pın yaj'ı̄ñayñı̄ chambaad. Cogueı̄tuutcı̄x je burro e yajmiñgı̄x ya ma ĩch. ³ Pen jim pınjaty xy'amı̄doogı̄xy: “¿Na'amy co mmı̄dzonaangı̄xy yı̄ burro?” Chi miich ajcxy

mnimähuiipy: “Je Huindzin (Jesús) yajtunamyb tzojc, e yajhuimbidamy mic'amy.”

⁴ Chi je metzpi ydiscípulos ñicxy ma je cajp huingonbi, e oypaatcixy tüg burro ycoxóchity huingon ma tüg tijc'aguu. Chi ajcxy coguejtuuty je burro.

⁵ Ycoguejtuutyp anajty ajcxy je burro co nijëjity jäy jim huingon yminañ:

—¿Ti mdungixyp? ¿Na'amy co mgoguejtuutcixy yi burro?

⁶ Chi je metzpi Jesús ydiscípulos je jäy ajcxy yajmüdmüydacy Jesús y'ayuc nej anajty ti ñimäyii. Je jäy ajcxy yminaangixy co jëb yajñicxcixy je burro.

⁷ Mic'amy ajcxy mija'ty je burro ma Jesús yajpaady. Je Jesús ydiscípulos ajcxy jibe'ñ je burro ajcxy müd yjocxhuit, chi Jesús yaj'iñay je burro.

⁸ Mayjäy ajcxy ooy yëby yhuit tügüjc ma Jesús anajty ñaxa'ñ, e jacjadyii jäy pujxy ajcxy quipy'aacx, e pidaaccixy tügüjc.

⁹ Je mayjäy huidibi anajty ajcxy nicxp jayijp etz axam ma Jesús, chi ajcxy ytigüy capxp mic, yminaangixy:

—¡Hosana! ¡Gloria a Dios, ooy ycomáyity Dios! Huen capxpaady y'idipy jada yëydijc huidibi mimb müd yi nHuindzin Dios yxi etz ymic'ajt.

¹⁰ Huen capxpaady y'idipy je ané'min huidibi jada Jesús yajtzondacp cham. Jada je' je ané'min huidibi nmij'ap nmijteedy David anajty ymüd. Hosana, huen je tzajpjoty tzinaayb ajcxy iibaatcixy capxpaatcixy jada mij'ane'mbi.

¹¹ E jadu'ñyi Jesús ycajptigüy jim Jerusalén, e ytigüy tigoty ma Dios ytijc. Co huindicxtay tüg'óciy tijaty jii by tzajtigoty, chi chooñ jii by, e ñicxy jim ma je cajp huidibi yxi Betania. Chi Jesús je majmetz ydiscípulos ajcxy müdnicxy.

Jesús capxpocy je higueri ca'pi anajty ytiim

¹² Je com jabom co ajcxy chooñ jim Betania, chi Jesús yuböcooti. ¹³ Chi Jesús ijxpaty jigüegy tüg higueri ooy anajty yco'aayity. Chi Jesús ñicxy ma je higueri yajpaady, ixa'ñ pen ymüd ytiim. Co Jesús ymech ma je higueri, chi ijxy co je higueri ca' anajty ytiim müdity, jëyi müdity anajty y'aay, com ca' anajty ni tiempity mina higo ytiim'aty. ¹⁴ Chi Jesús migapxy je higueri nimay:

—Jadu'n nej tiempo yjacnicxni, ni pin cajacpaadipy higo tiim ma miich. Chi Jesús ydiscípulos ajcxy midoy nej Jesús nimay je higueri.

Jesús quejxpídzimday ajuuybi adoocpi ma Dios ytijc

¹⁵ Co ajcxy oy yjädy jim Jerusalén, co Jesús ytigüy jadüg'oc jii by ma Dios ytijc, chi Jesús yajpídzimday je ajuuybi adoocpi ajcxy jii by tzajptigoty. Chi Jesús tijhuimbijtay je mesa ajcxy me je meeñ yajhuäcxpi ytuñ ajcxy. Nañ jadu'n tijhuimbijty je jäy ajcxy iñaybejt huidibi muuxy toocp. ¹⁶ Jesús ca' anajty tzocy co pinjaty midigihuiipy juydoogy ma Dios ytijc. ¹⁷ Jesús yaj'ixpjcpy anajty je mayjäy, e yminañ:

—Ma Dios y'ayuc necy Dios jadu'n yminañ: “Íich ndijc hue' je' tza-jpcapxcapxtac ma tüg'óciy jäy ajcxy chooñ ma nidüg'óciy naax cajp ymingixy Dios ojadajtp”, per miich ajcxy hue' yi' mhua'ñ meetzpitijc.

¹⁸ Co ajcxy je teedy mijtungmüdp etz je escribas nejhuüy nej anajty Jesús ti y'idich jii by ma Dios ytijc, chi ajcxy ooy ijxtaaygixy nej ajcxy jëb yaj'ögüpy Jesús. Per ca' ajcxy yhuinma'nybaady mic'amy nej yaj'ögüpy,

tzigiñyb ajcxy mñid je mayjäy com je mayjäy ooy tzachjñhuiy huinmay jadu'n nej Jesús yaj'ixpñjicigixy. ¹⁹ Co oycoodzyñi, chi Jesús ycajppidzimy.

Je higueri ytñtzni

²⁰ Je com jabom Jesús mñid ydiscípulos ajcxy najxp anajty tim jopyñi ma je higueri anajty ytinäy. E je higueri ti anajty ytñtzay mabaad ytictz.

²¹ Huin'it Pedro jäymejtzcooty nej Jesús nimay je higueri, chi Pedro Jesús nimay:

—Huindzin, ix jada higueri huídibi ñxiy mgapxpojç, ti yi' ytñch.

²² Chi Jesús Pedro nimay:

—Mibic yi Dios. ²³ Janch ñch miich ajcxy nimäy, co ixyipy pin migapxy jada huingtonbi cop, e nimäy ixyipy: “Miich cop pidig, e nicx cidäg mejjyoty”, pen ca' ti mijotmetzcñy, e mibicy co jadaanip nej yi' ti ane'my je cop, chi jadu'n ytunñyb yjadñyb. ²⁴ Paady ñch miich ajcxy nimäy co tüg'ócay tijaty miich ajcxy mbjctzooyb ma Dios, chi Dios xymöhuipy ajcxy huídibi ti mbjctzoogixy. Pen janch miich ajcxy mibicy co Dios ti xymoogixy ajcxy je huídibi ti mbjctzooyb. ²⁵ Co miich ajcxy mgapxtaaccixy, pen ca' oy m'ity ajcxy mñid tüg jäy, huinméxcix yi mmidzip tim jayñp, jigix jëbi Dios Teedy huídib jñby tzajpjoty xyhuinmeecñp miich ajcxy ma ti mduñgoogixy. ²⁶ Pen ca' miich ajcxy mhuinmecxy yi mmidzip huídibi ti xymidundigoogixy, ca' miich ajcxy xyhuinmecxañ Dios Teedy huídibi yajpatp tzajpjoty.

Jesús je' ycötújin

²⁷⁻²⁸ Je huin'it tiempo Jesús mñid je' ydiscípulos ajcxy yhuimbijty jim Jerusalén. E co Jesús anajty yhuídity tzajtigoty, chi nijëjity huindzindijc huídibi nigohuajc'ajtp anajty je teedytjç etz escribas ajcxy huídibi nijayduutpi Dios ñecy, nimññ ajcxy Jesús, e ymñañ ajcxy:

—¿Pin cötújin ti xymöy huídibi ti mduñ ya tzajtigoty? ¿Ma cötújin ti mbaady co jëb m'ane'my ya tzajtigoty?

²⁹⁻³⁰ Chi Jesús ymñañ:

—Ñch miich ajcxy nañ jadu'n nyaj'amidohuamyb tüg ayuc. E pen mñi'adzooyb ajcxy, huin'it ajcxy nyajnimähuiy ma ñch ti nbaady yi mñc'ajt etz yi cötújin, co jadu'n nduñich jñby tigoty ma Dios ytjç. ¿Pin yajñbñjç Juan, je Bautista, co huen jäy yajññbety? ¿Dios, o naaxhuiñyäjy? Adzoogich ajcxy.

³¹ Chi ajcxy ytigñy huinmay'ahuídijtpi, ñayñimáayigixy miñ xyipy:

—Pen mñaanim co Dios tzajpjotyti ti yajññbicy Juan, chi Jesús xyñimáayimipy: “¿Nej co ca' miich ajcxy mibñjç Juan y'ayuc?” ³² Nañ ni ca' jëbi ñch ajt mñaanim co jäy ajcxy ti quejxy Juan.

Com chigñyb anajty jäy com ñejhuiy anajty ajcxy co Juan je Bautista Dios anajty ytiy'ajt ymñid. ³³ Chi ajcxy Jesús nimay:

—Ca' ñch ajcxy nejhuiy pin ti yajññbicy Juan.

Chi Jesús ymñañ:

—Ñch nañ jadu'n ca' nnigapxa'ñich pin ti xycötujcmöyich co jëb nduñich huídibi ndumybich.

12

Je naymidúniptjç jibicjäybi ajcxy y'ijxpejt

¹ Je huin'it xñ Jesús jacmñgapxy je mayjäy mñid jñhuimbit ayuc, ymñañ:

—Ji yajpaady tüg yëydjic huídibi camuuxy ti cojy ma ycam, e ti co'aguemy je camuuxy cam, e yaj'oyi'y tugi tang ma huinmíxcxa'ñ je camuuxy. Nañ jadu'n je yëydjic tüg poch yajpidígy ma ycamuuxy yaj'ixíhua'ñ co cuent'aty. Co anajty ti ni'ixídäy ti a'ixídäy, chi ycamuuxy cam quejy ajuyducy ma nijëjity tumbidjic. Chi chooñ viaje tumbi jigüëgy it. ² Je huin'it tiempo co yhuaad'ajtni je cosechi, chi je cogam quejxy tüg ytumbi jim ma je' ycam yajpaady, co hueen je tumbidjic yéjccixy je cosechi, jadu'n nej anajty ti ycapxytuñ müd je' ajcxy. ³ Chi je cam tumbidjic ajcxy majch je cogam yquexyöyp, chi huinhuojpy jiphuojpy ajcxy. Chi ajcxy quejxhuimbijty jadu'ñyi, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidjic ajcxy tzaagäch je mimetzpi quexyöyp etz yajtzachiy ajcxy ma ycohuajc, chi ajcxy ooy oyy oyñinej. ⁵ Chi je cogam jacquejxy jadüg ytumbi e ajcxy tumbidjic yaj'o'cy je midugügpi quexyöpy. Chi je cogam jac tim quejxy jadyi ytumbi. Chi je tumbidjic ajcxy je cogam ytumbi huinhuojpi jiphuojpi nijëjity, e nijëjity ajcxy yaj'o'cy.

⁶ Je cogam ymüd anajty tügpajc ymang huídibi anajty ooy tzocy jihuuy. Je' oy quejxcogixiy ma je ycam yajpaady. Je cogam huinmay jadu'n co je tumbidjic ajcxy yajmij'adiyb je' ymang. ⁷ Chi je tumbidjic ajcxy ñayñimaayi miñ xyipy: “Jada yëydjic je cogam jada ymang huídibi jé'adaanip je yteedy ypidägy. Tzoc yaj'o'cim, e jadu'n je cam njé'ajtim.” ⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajjixci'py.

⁹ Co Jesús jadu'n miydactay je jihuimbit ayuc, chi ymínañ:

—¿Ti ytunamyb je cogam müd je tumbidjic ajcxy? Hue' min ci'm ma je' ycam, e yaj'öctáhuipy je tumbidjic ajcxy huídibi tundigoy. E yegipy pijtzoj je' ycam müd huingbi jäy ajcxy.

¹⁰ ¿Nej ca'ni müch ajcxy mgapxy yi Dios ñecy ma jadu'n ymínañ? Je yëydjic huídibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tzaa oyjatypi huídibi je pojtzpidjic ca' ajcxy yajtuna'ñ, e je' oy ti yhu'i'mni ma anajty yjaccopícyity.

¹¹ Jada tung je Huindzin Dios ti tuñ, e ooy oy n'íxim njäygidaacim.

¹² E huin'it je judíojäy ajcxy ytungmüdpí ooy jamadzaañ anajty Jesús, com ñejhuuyb anajty ajcxy co Jesús ñigapxyii yi' ajcxy. Com tzigüyb anajty ajcxy müd je mayjäy, chi ajcxy tim huinyöyducy, chi ñíxcixni.

Yajnidüygixy pen jëbi cogüéjtin yajyecy o pen ca'

¹³ Jac'axam je judíojäy ajcxy ytungmüdpí quejxy ajcxy ma Jesús yajpaady mejtzcipy ixpícytjic. Tügpícy anajty ñaygomájtzigixy müd yi fariseos ajcxy, etz jadügpícy ma je rey Herodes. Hue' anajty ajcxy huinma'ñ ixtaayb nej ajcxy ocxíhuipy Jesús. ¹⁴ Jada mejtzcipícyi ixpícytjic ñíxcy ajcxy ma Jesús, e ymínañ ajcxy:

—Huindzin, ích ajcxy nejhuuyb co myaj'ixpícy je tíy'ajt, ca' jäy mdzigüy, com ca' huin'ixpety myaj'ixpícy. Tú'cíy müch mduñ müd mic jäy, müd comeeñyjäy, etz müd ayoob jäy. Tudägy jäy ajcxy myaj'ixpícy jadu'n nej huaad ajcxy cuychínaaygixy Dios ytíy'ajt. Nejhuíhuaamybich ajcxy nej müch yaj'ixpícpícy je mayjäy. ¿Nej tundigooyim müd yi Dios ycötújcin co nmigüéjtim César, je romano jäy mij'ane'mbi, o ca'ji? ¿Nej jëb nmigüéjtim, o ca'ji?

¹⁵ Per Jesús ñejhuuyb anajty ajcxy yjibic-huinma'ñ, e chi ajcxy nimay:

—¿Na'amy co miich ajcxy xyjot'ixy xyhuinma'ñ'íxyich? Yajmiingix tüg meeñ jigix n'oc'ixipyich.

¹⁶ Chi ajcxy mimiñ tüg meeñ e co Jesús ijxy je meeñ, chi yminañ:

—¿Pin y'ahuanax etz pin yxi ijtp ma jada meeñ?

Chi ajcxy y'adzooy:

—Hue' yi' César.

¹⁷ Chi Jesús yminañ:

—Mo' je César huidibi yi' yjé'ajtpy, e mo' Dios huidibi Dios yjé'ajtpy.

Chi ajcxy ooy jihuüy huinmay jadu'n nej anajty Jesús ti y'adzooy.

Yajnidüygixy pen je tiibi öccixy jugypigipy jadüg'oc

¹⁸ Je huin'ti tiempo nijëjity saduceos ajcxy ymiñ ma Jesús. Yi saduceos ajcxy yminaangixy co ca' pin yjugypiga'ñ tiibi y'o'ccixy. ¹⁹ Chi je saduceos ajcxy Jesús nimay:

—Huindzin, Moisés jayhui'my je cötújcín co tüg yëydijc y'ögy, e co'ögy yhui'my je ytöxyijc e ca'ni ytöxyijc ung'ixy. Pues copicy je co'ögy ytöxyjäy ypigipy müd ña'y y'uch yëydijcpi jigix jëbi je töxyjäy y'ung'ixipy huidibi hui'mihuip jadu'n nej codijc cobidägy ma je yteedy y'ajch ypidägy. ²⁰ Pues jim ma tüg cajp anajty chinäy huixtujc yëydijc tüg que'x. E ungoob ypijcy, e chi ix'o'cy ytöxyijc, e ca' ni tüg y'ung yajhui'my. ²¹ Je mimetzpi yëydijc ypijcy müd je co'ögytöxyjäy, e nañ jadu'n ix'o'cy ytöxyijc e ca' ni tüg ung yajhui'my. E nañ jadu'n je midugügpí müd ypijcy je töxyjäy, e nañ jadu'n ix'o'cy je ytöxyijc, e ca' ni tüg y'ung yajhui'my. ²² E jadu'n oytuñyii yjadyii müd je töxyjäy co ti anajty müddzinay'abidzimdäy je nihuixtujcpi yëydijc tüg que'xpi. E je nihuixtujcpi ix'o'cy ajcxy je töxyjäy, e ca' ni tüg y'ung ajcxy yajhui'my. E chi je töxyjäy oy y'öcni. ²³ E co anajty xi tiempo paaty, co anajty Dios yajjugypicy yi tiibi ajcxy y'ögy, ¿huidibi jada' ajcxy nidücti je yëydijc töxyijc'adaanip je töxyjäy? Com ti ajcxy jadu'n nihuixtujcpi müd tzinay'abidzimgixy.

²⁴ Chi Jesús je saduceos ajcxy nimay:

—Miich ajcxy ca' mhuinjihuüy je tiy'ajt, com ca' mhuinjihuüy Dios y'ayuc ytiy'ajt, e com ni ca' mnejhuüy je mic'ajt huidibi Dios ymüd.

²⁵ Pues co anajty yjugypijccixy je jäy tiibi y'ó'ccixy, chi ca' ajcxy ypiga'ñ, e nañ jadu'n ni ca' ajcxy ñaymöhuüy y'ung huen pijccixy. Hue' ajcxy yjugy'adaangixy chinähuaangixy jilby tzajpjoty, tim jadu'n nej je ángel ajcxy chinaangixy yjugy'ajtcixy. ²⁶ Per je tiy'ajt co jäy ajcxy tiibi y'o'ccixy yjugypigaangixy, ¿nej ca'ni mgapxyni Moisés ytiy'ajt ma anajty Dios ymigaxyii co je aay ujt anajty chachtoy? Chi yminañ: “ñich je' je Dios huidib Abraham, Isaac etz Jacob yDios'ajtpy.” ²⁷ Com yi Dios ca' yi' yDios'aty ma yi öcpi ajcxy huidibi y'alma ti ycixy ti ytigoy. Yi Dios Dios'ajtp yi' ma yi juugypi ajcxy. Paady miich ajcxy ooy mij mdundigoogyixy co ca' mhuinjihuüy Dios ytiy'ajt.

Je ané'min huidibi ooy niqi ycopicyity

²⁸ Nañ jadu'n je huin'ti tiempo nimiiñ Jesús tüg escriba. E yi' anajty y'amido'ijtpy co Jesús adzooy je jäy huidibi ca' mibicy co yi öcpi yjugypigipy ajcxy jadüg'oc. Jada escriba ñejhuüy co Jesús ooy oy ti y'adzooy je saduceos ajcxy, paady yi' Jesús amidooyi:

—¿Huidibi je' Dios y'ané'min jacmijpi?

²⁹ Chi Jesús y'adzooy:

—Yi Dios ycötújcín huídibi jaccopicyip, yi' je' huídibi minamb: “Midoogix Israel jäy, je Huindzin Dios huídibi nDios'ájtím, yi' je' ajt nHuindzin Dios tügpajcpi. ³⁰ Tzoc jihu'i' etz yajmij'at mHuindzin Dios müid tüg'óciy m'aa mjet etz müid tüg'óciy m'alma, etz müid tüg'óciy mhuinma'ñ, etz müid tüg'óciy mmic'ajt.” Jada je' je jaccopicyip ané'mín. ³¹ Je mimetzpi Dios ycötújcín jahueengi tú'ciy ñaybadyii müid je jayijpi, yi' huídibi jadu'n minamb: “Tzojccix jihui'yigix yi mmigügtijc tim jadu'n nej mnaychogyii mnayjihuiyii ci'm.” Jada metz Dios ycötújcín jaccopicy jacmic'ajt müid ca'ydi jac huídibi cötújcín.

³² Chi je escriba yminañ:

—Ooy oy ti m'adzooy. Janch tñy'ajt jadu'n nej miich mina'ñ, co ji yajpaady tügpajcpi Dios, e ca' ji jadüg Dios mic'ajt müidpi. ³³ E janch tñy'ajt co copicy nmijpidaacim nyajmij'ájtím Dios cixyjet huinijot müid tüg'óciy ajt nhuinma'ñ, müid tüg'óciy ajt n'alma, etz müid tüg'óciy ajt nmic'ajt. E copicy ndzójcim njihuiyim nmigügtijc tim jadu'n nej naychójcim nayjihuiyim ci'm. Jactzoobatp jada ca'ydi co tüg'óciy yi huindzigi'ñ huídibi anajty yajno'cpi müid Dios ycixpi.

³⁴ Co Jesús ijxy jadu'n nej je escriba tñydudägy anajty ti y'adzoyii, chi yminañ:

—Jahuenjaty miich mmibíjcín ytigoy'ityñi jaydeb mdigihuiy ma Dios y'ane'my.

Co Jesús anajty jadu'n ti y'adzooy je escriba, chi ca' jac pin ti ayuc yjacyaj'amidoohui.

¿Pin je' y'ung je Cristo?

³⁵ Jesús yaj'ixpijcpy anajty je mayjäy jiihy ma Dios ytijc, e yminañ:

—¿Na'amy co yi escribas ajcxy yminaangixy co Cristo hue' je' David y'ap y'oc? ³⁶ Com je Espíritu Santo ymoy David jada ayuc huídibi jaybety ma je Salmo necy ma jadu'n yminañ:

Yi Huindzin Dios nimay iich nHuindzin: “Iña' ya a'oy'amy ma iich nmijc, ixti cooni anajty miich mmidzip ti nmimadactäyich, jadu'n nipaadipy nej jihuiy ti nbidägyich miich mmidzip jadu'n nej tüg tinaybejt.”

³⁷ ¿Per nej co yjadu'nity co jäy ajcxy yminaangixy co je Cristo David je' y'ap y'oc? ¿E David ci'm yminañ co je Cristo yi' yHuindzin'ajtpy?

Jotcujc anajty je mayjäy amidoo'ijti Jesús y'ayuc.

Jesús ca'p jäygidaci leyhuindzin ajcxy yhuinma'ñ

³⁸ Jesús yaj'ixpijcpy anajty je mayjäy, e yminañ:

—Naycuend'ájtigix müid yi escribas ajcxy. Com yi escribas ajcxy ooy jotcujc co nayxóxigixy müid yhuít oyjatypí yoñjatypí. Ooy ajcxy tzocy co yajcaxpócxixipy huindzigi'ñ'amy mayjäyduum. ³⁹ Yi escribas ooy ajcxy tzójcixy yi cödumbi iñaybejt ma je naymujctac, etz ooy ajcxy tzójcixy iñaybejt ma yi cömaybi jäy iñay ma jäy ajcxy yxiiđuñ. ⁴⁰ Yi escribas ajcxy yajcixtaayipy yi co'ögy ytöxyjäy ypidägy müid ajcxy y'adzójcín. Yi' ajcxy ooy túngixy jecy tzajpcapxycapxii jigix ajcxy capxpaady idipy. Dios nigi tzaachytunipy yi escribas ajcxy müid ypocy ycixpi, ca'ydi jac ni pin.

Je ayoobi töxyjäy y'ofrendi

⁴¹ Tüg xii anajty Jesús iñay jiihy tigoty ma Dios ytijc. Iñaayb anajty ma je limosna caja huinduu. Jesús yhuindicxyp anajty je jäy ajcxy huídibi

meeñ pidaaccixp ma je ofrenda caja. E maycomeeñyäjy ooy ymeeñ pidaaccixy janch may. ⁴² Tim huin'ítiy yja'ty tüg co'ögy töxyjäy janch ayooß pidacy metz pi'c meeñyhuäcxy, huidibi ca' ooy choobaady. ⁴³ Chi Jesús huoomujcy je' ydiscípulos, e nimay ajcxy:

—Janch tiy'ajt jadu'n nimaaygixy co jada co'ögy ytöxyjäy ayooß jac'anaxy jada ti pidägy ofrenda, ca'ydi jac ni pin. ⁴⁴ Tüg'óciy comeeñydijc ajcxy ypidacpy ma y'ofrenda yi meeñ huidibi yajconajxyp. Jadayaabi co'ögytöxyjäy ti pidacy tüg'óciy huidibi anajty ymüid, je meeñ tüg'óciy huidibi anajty ñigayamy yi' ymooyb Dios.

Jesús ymina'ñ co Dios ytijc yhuindigoopy

13

¹ Co Jesús ypidzimy ma Dios ytijc, chi nidügti ydiscípulos ñimayi:

—Huindzin, ix jada maychaa mijjatypi etz jada maybi tijc ooy y'oy'oydúñity.

² Per Jesús y'adzooy, ymina'ñ:

—Huindix miich ajcxy jada maybi mijjaty ytijc. Minip tiempo mina tüg'óciy jada tijc nicxy yhui'my taj xit, ca' ma tzaa macxy. Huindigoydähuiß tüg'óciy.

Je tiy'ajt ma ca'ni naaxhuiñybi ycixa'ñi ytigoya'ñi

³ Jesús müid ydiscípulos ajcxy ñicxy ma je cop huidibi xiijp Olivos. Jim ajcxy co'ijxnaxy je Dios ytijc. Iñaayb anajty Jesús jim copcixy co Pedro, Jacob, Juan etz Andrés ameech migapxy Jesús, yminaangixy:

⁴ —Tun may'ajt ich ajcxy yajñimaayg mina jada ytuna'ñyii yjada'ñyii co huindigoydähuiß Jerusalén cajp. ¿Ti ijxpejt'adam co anajty jadayaabi jadu'n ytuna'ñyii yjada'ñyii?

⁵ Chi Jesús y'adzooy ajcxy je' ydiscípulos ymina'ñ:

—Ix pinjaty xyhuin'ñngixy. ⁶ Ooy jäy may ymiinañ müid ich nxü. Ñaydiáanigixy co je' ajcxy je' je Cristo, ymina'na'ñ ajcxy: “Ich je' je Cristo.” E ooy jäy may huin'ñaangixy.

⁷ Co miich ajcxy ayuc mmidohuißy co jäy chachchiptúngixy xü ya, ca' mdziñygyixip, com ooy ycopicyity co jada jadu'n jayjip ytunüyb yjadüyb. Ca' nan hue' je' anajty tim cijxp tim tigooyb je xü je tiempo. ⁸ Nayñibidigüß tüg naax cajp müid huingbi naax cajp, e gobierno müid huingbi gobierno. E minipy mic ujx canaag'it etz mij yuu mijpa'm xü ya. E jäy ajcxy ooy yhuänipy yjihuüipy ycanaymijotcuje'ajtigixipy. Jada tzaachypi ayo'n tzondacni yi' anajty.

⁹ Chi Jesús yjacmina'ñ:

—Nayguend'ajtigix miich ajcxy, com yi mmidzip ajcxy xymájtzcixip, e xyciyéccixip ma tungmüdpidijc, e ychachytúngixip xyhuójpçixip ma yi judíojäy ñaymujtac ajcxy. Xyajñicxixip mach ma rey etz ma gobernador ajcxy yhuinduu müid ich ycixpi com miich ajcxy xymibicyich. E miich ajcxy tiy'ajt myegipy müid ich ycixpi, ixti ma rey ajcxy etz ma gobernador ajcxy yhuinduu. ¹⁰ Ca' anajty xü tiempo paady mina ycixa'ñ naaxhuiñybi, chi ajcxy capxhuäcxtähuißy ich n'ayuc huindu'myb ñaaxhuiñ ma tüg'óciy naax cajp. ¹¹ Co jäy ajcxy xyajñicxip mach ma codungdijc co xytüdüngixipy, chi ca' ni nej mjot'adüyb, ni ca' mhuinmayipy nej m'adzooigixipy. Mgápxcixipy je ayuc huidibi Dios xymóoygixipy, com je ayuc huidibi mgápxcixip, ca' nan miich je' anajty ajcxy m'ayuc. Hue' je' je

Espíritu Santo xymóoygixipy capxy ayuc. ¹² Yéydijc ajcxy ycíyegamyb ma tungmíidpi yci'm y'uch ajcxy co huen yaj'ogyii. E nañ jadu'n je ungedeedy ycíyegamy yci'm y'ung ajcxy ma tungmíidpi. Nañ jadu'n yi' y'ung ajcxy cíyegipy yci'mdeedy co huen yaj'ogyii. ¹³ May naaxhuiñjáy ca' xychogipy xyjihuihuipy miich ajcxy míid íich ycixpi. Pen miich ajcxy mmictinaayb ma mmibíjcin, ypaadip miich ajcxy m'alma nízoozin.

¹⁴ Chi Jesús yjacmínañ:

—Co anajty m'íjxcixy je huídibi Daniel ñimíydac jecy'ajty, co pinjaty jibic-huinma'ñ tumb ma ca' ypadyii ma Dios ytíjc, huídibi ooy ycodzígíity. Miich ajcxy huídibi tzinaayb jim Judea, co jadu'n m'íjxcixipy, chi nicx mgueectzoocix ma tungop. ¹⁵ Yi jáy ajcxy huídibi yajpatp ma ytíjcnícx ca' ñícxity tigoty ma ytíjc. E ni ti jíiby cayajpidzimípy. ¹⁶ Yi jáy ajcxy huídibi yajpatp camjoty, ca' ajcxy nihuimbíidipy je' yjocxy huit huídibi ymíid. ¹⁷ Huin'it xii huin'it tiempo ayo'n pada'ñ je töxyjáy huídibi anajty ti y'ungtzimígy, e nañ jadu'n yi' ajcxy huídib míid y'ung ma'xung yajtzítzp. ¹⁸ May'ajt ajcxy mbíjctzoohipy ma Dios, co jada jadu'mbi ayo'n ca' ytuníyb yjadíyb ma anajty ytíich tiémpity. ¹⁹ Yi jadu'mbi xii tiempo jáy ajcxy ayo'n tzaachypí minaxípy yajnaxípy. Ni camínaaxii jáy jadu'n tzaachypí mijcajee ti minaxy ti yajnaxy maabi Dios cojy naaxhuiñybi oga'n, íxti chambaad. E camínaaxii jadüg'oc ycajadíyb jadu'n. ²⁰ Pen ca' Dios capx'aduga'ñ yjíibi ayo'n xii ayo'n tiempo, ca' ni pin chögípy. Per Dios ycapx'adugamyb yjíibi ayo'n tiempo míid je mibíjcpíidíjc ycixpi huídibi Dios ti huin'ixy.

²¹ Co yi jadu'mbi xii tiempo anajty ymíiñ, ca' mmibígípy, pen ji pinjaty xyñímaaygíxy: “Íjxcix, cha yajpaady je Cristo”, o “jim'amy yajpaady je Cristo.” Ca' mmibíjccixípy jáy y'ayuc. ²² Miníp jáy ajcxy huídibi ñayajnaxáanígíxy nej Cristo, e ymínaangixípy co capxhuácxí ajcxy Dios y'ayuc, e ca' yjánchezity. Ytunípy ajcxy mij huinma'ñ etz mijpi íjxpejt, íxti jahuin'íina'ñ je mayjáy ajcxy huídibi Dios ti yhuin'ixyíi. ²³ Nayquend'ájtígix míid yi jadu'mbi jáy ajcxy, com jayíjp íich miich ajcxy yi' ti nyajmíidmíydágy.

Nejjada' je Dios y'ung yminípy jadüg'oc

²⁴ Chi Jesús yjacmínañ:

—Co anajty yi jadu'mbi ayo'n tiempo ti ñaxy, ycoodzíhua'ñ etz je po' ca' y'ana'ñ. ²⁵ Maymadza' ycáhuip, e nañ yúcxip huídijaty mic'ajt míid tzajpjoty. ²⁶ Je huin'it xii je huin'it tiempo co jadu'n anajty ytuníy yjadyíi, huin'it ajcxy m'ixípy, íich je jáy huídibi tzoon tzajpjoty, co íich anajty nmíiñich jocjoty míid tüg'óciy nmic'ajt n'oy'ajtich. ²⁷ Co jadu'n anajty nmíiñich, chi mic'amy nguexípyíich íich n'ángeles ajcxy ma xii ypidzimy, ma xii ycidágy, ma jimboj ypidzimy etz ma tíchpoj ypidzimy. N'ángeles ajcxy yajmuga'ñ tüg'óciy íich njáy, huídibi ti nhuin'ixyíich, xim yam ma ajcxy yajpaady ya naaxhuiñ, etz jíiby tzajpjoty.

²⁸ Chi Jesús yjacmínañ:

—Jéb miich ajcxy tíy'ajt mbígípy ma yi hígueri jadu'n nej je xii je tiempo mimb cídaacni. Co je hígueri jadüg'oc ñíhuamíy, chi miich ajcxy mnejhuíy co ti yhuingoni mína ypottígíyíi. ²⁹ Nañ tim jadu'n co m'ixípy tuníyb yjadíyb tüg'óciy íjxpejt nej ti nmímaaygíxy, chi mnejhuíhuip co ti yhuingoni je tiempo mína nhuimbíidípyíich jadüg'oc ya naaxhuiñybi.

³⁰ Janch ñich miich ajcxy nimäy co jada huidibi ti nnimiydacyich tunñb jadñb ca'ni anajty y'óctay je jäy ajcxy huidibi jacjugy'ajtp jadachambi xii jadachambi tiempo. ³¹ Je tzejp etz je naaxhuiñybi cixipy tigoyipy. ñich n'ayuc huidibi ngapxyich, ca' ycixipy ytigoyipy ni caminaxii. ³² Ca' ni pin nejhuiy je xii je tiempo mina ytuna'ñyii yjada'ñyii jadu'n nej ti ñich miich ajcxy nnimaaygixy. Ni je ángeles ajcxy jilby tzejpjoty ca' nejhuiyigixy, nañ ni ñich, Dios y'ung', ca' nejhuiyich. Jeyi Dios Teedy tügpajc nejhuiy.

³³ Ni'ixi' ahuijxcix. Mibijctzoogix Dios jabom jabom, com ca' mnejhuuyigixy mina anajty ytuna'ñyii yjada'ñyii yi huidibi ti nyajniimaaygixy. ³⁴ Yi xii yi tiempo huidibi minip jadu'n nipaady nej tüg comeññyäjy huidibi ñicxa'ñ ma tüg it lugar huidibi jigüegy yajpatp. Jayijp ca'ni anajty chooñ, chi yajnibijcy je ytumbi ajcxy nidüg nidüg je' ytung. E nimay je' ytumbi huidibi cuend'ajtp je tijc'aguu co huen ni'ixi' y'idipy ma tijc'aguu. ³⁵ Ni'ixi' m'idipy miich ajcxy. Com ca' mnejhuuyigixy mina je codijc yhuimbida'ñ ma ytijc, pen namgodzïy, o mij coodz, o moñi, o ma anajty ti yximñyñi. ³⁶ Ca' jécyity co yjadipy timetiini, e xyayöybéjtcixipy anajty mdzachmaagixy. ³⁷ Yi huidibi ñich miich ajcxy ti nyajniimaaygixy, nañ jadu'n nimäyich tüg'óciy jäy co huen ajcxy nidüg'óciy ahuijxcixip ni'ixi' je xii je tiempo mina nhuimbidiyich jadüg'oc ya naaxhuiñ.

14

Xicmujccixy capxmujccixy co Jesús madzaangixy

¹ Tigoy'ijtni anajty mejtz xii co judíojäy ajcxy nixiiduna'ñ je pascua xii, mina ajcxy tzajcaagy cay huidibi ca' levadura m'idity. Je judío teedy ajcxy huidibi jacmijtungm'id etz je escribas ajcxy huinma'ñ'ixtaaygixy nej jëb ameech májtzcixipy Jesús, e yaj'ógaangixy, ca'ydi je mayjäy nejhuiy. ² Chi ajcxy ñayñimayi miñ xyipy:

—Ca' y'óyity co nmájtzm Jesús xijoty. Com ca' yjécyity co je mayjäy yjotmätcottähuiy, e ytigihuiy huambi jihuiyb ajcxy.

Tüg töxyjäy pidacy aceite ma Jesús ycohuajc

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huidibi anajty ym'id nibüdz pa'm. Jesús ññaayb anajty ma caydac co ymiñ tüg töxyjäy m'id tüg tzaadüdz quiig ujt m'id perfume huidibi ooy oy yxuugy. Jada perfume ooy anajty chóohuity. Chi je töxyjäy yaj'ahuäch je quiig, e yajcöyogy Jesús je perfume huidibi ooy oy yxuugy. ⁴ E nijéjity jäy ajcxy huidibi anajty jim, ca' anajty ajcxy yjotcújcity m'id huidibi je töxyjäy ti tuñ, e ñayñimayi ajcxy miñ xyipy:

—¿Nej jada co ocyaj'ayooni yi perfume huidibi ooy oy yxuugy? ⁵ Jac'oy co ixipy yajtoogy yi perfume tugüg migo'px peexy, jigix yajpubedipy ayoobtijc.

E ca' jadu'n ajcxy tim jäygidacy nej je töxyjäy ytuuñ m'id Jesús, chi ix'o'y ajcxy je töxyjäy ayoob.

⁶ Chi Jesús yminañ:

—Ixmajtzcix jada töxyjäy. ¿Nej co m'amayñyigixy? Yi huidibi ti tuñ m'id ñich, ooy yi' y'óyity. ⁷ Je ayoobtijc ca' ytigoy'idipy ma miich ajcxy nimina. Huen huidibi xii huen huidibi tiempo jëb mbubedip ajcxy ayoobtijc. Per ñich ca' n'ida'ñich ya jecy m'id miich ajcxy. ⁸ Jada töxyjäy ti tuñ m'id ñich jadu'n nej ti ymadägy. Yi' ti pidägy ma ñich nninixc perfume huidibi ooy oy yxuugy. Yi' jijp'ijxpy mina naaxtigihua'ñich. ⁹ Janch ñich

miich ajcxy nimaaygixy co huen yma'ámyity ya naaxhuiñ ma anajty yaj'ihuäcxy yajcapxhuäcxy jada ayuc jada tiy'ajt huídibi nídzoocin mïd, yajnimiydägipy huídi jada töxyjäy ti tuñ, jigix capxpaady y'idipy.

Judas cïyecy yi Jesús ma yimidzip

¹⁰ Huin'it tiempo je Judas Iscariote, nidüg je nimajmetzpi huídibi Jesús anajty ti huin'ixy, oy mïd ñaygapxyii je teedy mijtungmïdipi nej jëb cïyeycy Jesús ma yi teedy ajcxy. ¹¹ Co je teedy mijtungmïdipi ajcxy jadu'n midoy, co je Judas cïyega'ñ Jesús ma yi' ajcxy, chi ajcxy ooy yjotcugiiy. Chi ajcxy Judas meeñ yajhuinhuaniiy. Chi Judas yhuinma'ñ'ixtay nej jëb occïyecy Jesús ma yi' ajcxy.

Co Jesús y'adzu'ajty pascua xijoty

¹² Chi paty je mij xii mina je xii'ajtpidijc tzajcaagy cay huídibi ca'p levadura mïdity, e yaj'öccixy je cöbixy huídibi ajcxy yajhuindzigiiyb anajty Dios. Chi ydiscípulos ajcxy y'amidooy Jesús:

—¿Ma'amy mdzocy co ni'ixiiyim je pascua xii adzu'ájtin?

¹³ Chi Jesús quejxy metz ydiscípulos ajcxy cajpjoty, chi nimay:

—Jim mïd mnaybadiiyb tüg yëydijc huídibi nii tzimnicxp ma tüg majt. Miich ajcxy mbanicxiiyb je yëydijc. ¹⁴ Mbanicxipy ajcxy je yëydijc, ixti coon mbajädipy ma ytijc. E miich ajcxy mnimähuiipy je codijc: “Je Huindzin Jesús ñejhuñhuam ma miich mïdity tüg cuarto ma je Huindzin Jesús mïd ydiscípulos ajcxy jëb caaygixy yi pascua xii adzu'ájtin.” ¹⁵ Je codijc c'm xyajni'ixiiygixyip tüg cuarto mijpi ma je mïmetz piso huídibi ti yajni'ixiiy. Ma yijimbi cuarto miich ajcxy mni'ixiihuiipy yi pascua xii adzu'ájtin.

¹⁶ Chi je metz Jesús ydiscípulos ajcxy tütöychooñ. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayijp ymíñañ. E jim ajcxy ni'ixiiy je pascua xii adzu'íbi.

¹⁷ Nam coodziiyñi anajty co Jesús yja'ty ma je cuarto mïd jacjadyii ydiscípulos ajcxy. ¹⁸ Co anajty jim ycaaygixy ma je caydac, chi Jesús ymíñañ:

—Janch ñch miich ajcxy nimay co nidüg miich ajcxy huídibi cham caayb mïd ñch, xycïyegaambich ma nmidzipich.

¹⁹ Co je Jesús ydiscípulos jadu'n midooy, chi ooy ytigiiy tajpi maybi ajcxy, e ñay'amidóohuigixy miñ xyipy, e tüg ymíñañ:

—¿Nej ñch jada'ji?

E jadüg ymíñañ:

—¿Nej ñch jada'ji?

²⁰ Chi Jesús ymíñañ:

—Yi' yi' nidügti yi nimajmetzpi huídibi tocxmujcp mïd ñch ma tügpi txy. ²¹ Pues janch ñch je', je jäy huídibi tzoön tzajpjoty, nbadaamybich tzaachypi ayo'n jadu'n nej yjaybétyity ma yi Dios ñecy. Per mij ayo'n pada'ñ je jäy huídibi xycïyegaamich ma ñch nmidzip. Jac'oy co ca'y cadimma'xung'ajty jada yëydijc.

²² Caayb ajcxy anajty, co Jesús conigy tüg tzajcaagy, e jayijp yajnajx Dioscojuyip ma Dios, e chi tujc-huäcxy je tzajcaagy, moy je' ydiscípulos ajcxy. E co Jesús jadu'n tuñ, chi ymíñañ:

—Caaygix jada tzajcaagy. Jada tzajcaagy ñch jada nninïcx.

23 Chi Jesús conígy je ügy vaso, e co Dioscojuyip yajnaxy, chi moyday ajcxy je ügy, e nidüg'óciy ajcxy uucy je ügy. 24 Chi Jesús ymíñañ:

—Jada ügy ñich nni'py'ajtpy huidibi temamb yogamb. Je' jada jemybi Dios ycótújcín huidibi Dios yejc müd jáy ajcxy ycixpi. 25 Janch tiy'ajt jadu'n nej ñich müich ajcxy nimaaygixy, co ca' jadüg'oc n'üga'ñich vino ñi, ixti cooni anajty njádyich tzajpjoty ma yi Dios y'ane'my.

Jesús capxpídzimy co Pedro ymína'na'ñ co ca' y'ixy'adyii

26 E co Jesús etz ydiscípulos ajcxy ñy tüg himno, chi ñicxy ajcxy ma je cop huidibi xíjip Olivos. 27 Chi Jesús ymíñañ:

—Cham coodz xycöguëgaambich müich ajcxy, com jaybety jadu'n ma Dios ñecy ma jadu'n ymíñañ: “Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuiip.” 28 Per co ñich anajty njugypícyich jadüg'oc, co ñich anajty ti n'ögyich, nícxibich jim Galilea jacjayjip, ca'ydi müich ajcxy.

29 Chi Pedro Jesús nimaayi:

—Oy ixypy yi jacjadyii müich mdiscípulos ajcxy xycöguectäy, per ñich ca' müich ngöguëga'ñ.

30 Per Jesús nimay Pedro:

—Janch tiy'ajt jadu'n nej yam nimäy, jadachambi coodz ma ca'ni anajty tzeyyaxígy mejtz'oc müich xycoyüdz'a'ñich tugí'oc, mína'na'ñ co müich ca' xy'ixy'adyiijich.

31 E Pedro ca' anajty cöbiga'ñ nej Jesús ymíñañ, chi mictägy mínañ:

—Ca' ñich müich ngoyüdz'a'ñ, oy ixypy ndim'o'c'ich quipxy müd müich.

E ñañ actim jadu'n jacjadyii Jesús ydiscípulos ajcxy ymíñañ nej Pedro ti ymíñañ.

Jesús mibijctzoy Dios jim Getsemani

32 Jesús müd ydiscípulos ajcxy oyja'ty ma tüg it huidibi xíjip Getsemani, chi Jesús je ydiscípulos ajcxy nimay:

—Ñña' müich ajcxy ya, nami n'ocñicxyich jim'amy Dios mibijctzoob.

33 Chi Jesús müd nicxy jéda'ajty Pedro, Jacobo etz Juan ma tüg it ahuin-gujc. Chi Jesús ytigíy tajpi maybi jihuiy jotmay. 34 Chi Jesús ymíñañ:

—Njihuiyibich tüg jotmay nej n'öga'ñich. Huí'ngix müich ajcxy ya etz juugy m'íjtcixipy, ca' mmáagixipy.

35 Chi Jesús ñicxy jac'amijci'm, Dios mibijctzoy, e may'ajt pijctzoy co ixypy ca' minaxy yajnaxy je tzaachypi huidi anajty ypadamy je huin'it hora. 36 E Jesús anajty Dios mibijctzoy ymíña'ñ:

—Dios, müd müich ca' ni ti chípity. Píjcigich jadyaabi tzaachypi ayo'n, per ca' yjadúnity nej ñich ndzójcín, huen tuñyí jadu'n nej müich mdzójcín.

37 Co Jesús nihuimbijty Pedro, Juan, etz Jacobo, chi oy ajcxy paady ti anajty ymi'ó'ccixy. Chi Jesús Pedro nimay:

—Simón, ¿nej ti mmi'ögy? ¿Nej ca' mmadäga'ñ m'idipy juugy tüg hora?

38 Jugy'íjtcix, e mibijctzoogix Dios ca'ydi jibictuuyb mdigíygyixy. Janch tiy'ajt co jotjoty ooy mnijot'ájtcixy mdunaangixy yi oybi. Per yi mninícx oy amaayty.

39 Chi Jesús jadüg'oc huinhuäctuuty je' ydiscípulos ajcxy, e jadüg'oc ñicxy Dios mibijctzoob. May'ajt pijctzoy tim jadu'n nej je jayjip'atypí anajty ti ymíña'ñ. 40 Chi Jesús yhuimbijty ma anajty ajcxy ydiscípulos yajpaady, e jadüg'oc oy pátcixy ti anajty ymi'öccixy, com ca' ajcxy mimadägy máhuí,

e ni ca' ajcxy jajty nej adzohuipy Jesús. ⁴¹ Midugüg'oc Jesús ñicxy ma je' ydiscípulos ajcxy, e ymínañ:

—¿Nej ya mjacmáagixp mjacpooxcixp? Maagix pooxcix jadachambi. Ti mïid jadu'ñyi. Ti je tiempo huaad'ájtñi mína ñich, je jáy huidibi tzoon tzajpjoty, xycíyegipy ajcxy ma yi jibic jáydijc. ⁴² Maybidígicx, tzoc jámim. Chi ymiñ je jáy huidibi xycíyegaambich ma nmídzípich.

Mach ajcxy Jesús yajñicxicy

⁴³ Capxp anajty Jesús, co Judas oyjáty ma Jesús yajpaady. Judas hue' je' nidügti je majmetzpi huidibi Jesús yhuin'íjx. Judas mïid miñ mayjáy huidibi ajcxy mïid pujx etz quipy. Je teedy mïjtungmïdipi, je escribas ajcxy, etz je mïjjáydijc ajcxy ti anajty quexy je mayjáy huidibi anajty madzamb Jesús. ⁴⁴ Judas, je huidibi anajty cíyegamb Jesús, hue' anajty jajyp ti moy je mayjáy tüg íjxpejt huidibi mïid jëb ajcxy íjxcabip Jesús. Jadu'n jajyp Judas ycapxytuñ mïid yi' ajcxy, e ymínañ:

—Je jáy huidibi anajty ndzücxypich, yi' je' anajty Jesús. Madzipy ajcxy, e myajñicxip miich ajcxy yajxon cuend'aty.

⁴⁵ Mic'amy co Judas oyjáty ma Jesús yajpaady, chi nimíjhua'cy, e nimay: —Huindzin, Huindzin.

E co jadu'n ymínañ, chi Judas Jesús tzücx. ⁴⁶ Chi mic'amy je mayjáy Jesús mach, e yajñicxy ajcxy mach.

⁴⁷ Per nidügti Jesús ydiscípulos juudy ypujxy ma ytíj, chi je teedy mïjtungmïdipi tüg ytumbi yajtzaachñyi, quejtzpujxi tüg ytátzac. ⁴⁸ Chi Jesús je mayjáy nimay:

—¿Ti co miich ajcxy xyñimíñich mïid pujx etz quipy, jadu'n nej jihuñy ñich tüg meetzpi? ⁴⁹ Jabom jabom nyaj'íxpíjcyich jáy jii by ma Dios ytíj ma miich ajcxy myajpaady, e ni ca' miich ajcxy xymajchich. Paady jadu'n ytunyí yjadyí jigix yi' yajcuydumb nej ity jaybety ma Dios ñecy.

⁵⁰ Chi je' ydiscípulos ajcxy yajhui'my Jesús naydügpajc. Chi je' ajcxy yqueegy.

Je jáy mutz'anágnip huidibi quectzög

⁵¹ Per tüg yujcyeeg anág huidibi anajty payöy Jesús nímóchity anajty mïid tüg sávana. Chi Jesús ymídzip ajcxy majch je yujcyeegpi. ⁵² Chi je yujcyeegpi cíqueegtuty je mayjáy, yajhui'my ysávana, e yquecytzögy níhuädz íxhuädz.

Jesús mij juntijoty

⁵³ Chi ajcxy yajñicxy Jesús mach ma je teedy mïjtungmïdipi yajpaady. Chi mic'amy ñaymujci tüg'óciy teedy ajcxy huidibi mïjtungmïdip, e tüg'óciy mïjjáydijc, etz tüg'óciy escribas ajcxy. ⁵⁴ Chi Pedro jiguëgy anajty panícx je mayjáy ajcxy íxti oy yja'ty ma je teedy mïjtungmïdipi ytíba'. E jim íxtacy quipxy mïid policía ajcxy aguic, yxaamgíxy anajty ma jünba'.

⁵⁵ Je teedy ajcxy mïjtungmïdipi etz tüg'óciy je judíojáy ytungmïdipi ajcxy yhuinma'ñ'íxtaaygíxy nej ajcxy jëb Jesús yajpocya' mïid ajcxy yxíhuin, e jadu'n jëb mooygíxy yi' ócin. Per ca' ajcxy paady huinma'ñ. ⁵⁶ Mayjáy níhuambejty Jesús mïid aní, e ca' ajcxy y'ayuc ytügy. ⁵⁷ Nijëjity jáy ytinayígy juntajoty, e níhuambety ajcxy Jesús, ymínaangíxy:

⁵⁸ —ñich ajcxy amído'íjt Jesús y'ayuc tüg tecy, co jadu'n ymínañ: “Njidaamybich jada Dios ytíj huidibi jáy ti cójicxy, e codugüg xii gojtigadzípich huingbi huidibi ca' jáy cojy.”

⁵⁹ Per ni ca' ytügiy ajcxy y'ayuc nej ajcxy Jesús ni huambejty, ac tigachjaty nidüg nidüg ymïnañ ajcxy.

⁶⁰ Chi je teedy huïdibi je jacmïjtungmïd ytïnayïgy juntajoty, chi y'amïdooy Jesús e nimay:

—Jesús, ¿ca' nej m'adzohua'ñiyi? ¿Ca' mmïdooy nej xychachxïgïxy?

⁶¹ Per Jesús amoñ y'ïjty. Ca' ti ayuc adzohuimbijty. Chi je teedy jadüg'oc migapxy Jesús nimay:

—¿Nej miich je' je Cristo, je Dios y'ung?

⁶² Chi Jesús ymïnañ:

—Janch jadu'n, iich je' je Cristo, je jây huïdibi tzoon tzajpjoty, e miich ajcxy xy'ixipïch iñâyich ma je mïjpi Dios ymïc a'oy'amy. Nañ jadu'n xy'ixipïch miich ajcxy jocjoty co anajty nhuimbityich jadüg'oc ya naax-huïñ.

⁶³ Chi je teedy huïndzech huïnhuocy yci'm y huit, je' je' tiy'ájtïp co ca' anajty yjotcújcïty mïd Jesús y'ayuc, chi ymïnañ:

—¿Ti testigo njac-huaanim? ⁶⁴ Miich ajcxy ci'm ti mmïdoogïxy y'ayuc, jadu'n nej ycapxtïgoy mïd Dios. ¿Nej miich ajcxy mïnaangïxy?

Chi nidüg'ócïy ajcxy ymïnañ co janch jadu'n Jesús mïj oy ti ycapxtïgoy mïd Dios ytïy'ajt, paady huaad mooygïxy yï o'cïn.

⁶⁵ Chi nijëjty jây yhuïndzujïgy Jesús. Chi ajcxy huïngoxodzy, cójxcïxy, e chi ajcxy nimay:

—Octïygapx. ¿Pïn ti xycojxy?

E je policiatïc ajcxy cojxy Jesús ma yhuïñyjïp.

Pedro ycoyüch Jesús

⁶⁶ Pedro tibây anajty y'ahuixy. Chi ñimïjhuäci tüg tumbi töxyjäybi huïdibi anajty tumb ma je teedy ytïc. ⁶⁷ Co je töxyjäy ijxpaty Pedro iñây anajty jïnba'áy, yxaamb anajty. Chi huïndïcxpejty Pedro, e nimay:

—Miich nañ mïdhuïdijtpy anajty je Jesús yï Nazaretpi.

⁶⁸ Per Pedro ca' cöbïjcy je töxyjäy y'ayuc, e ymïnañ:

—Ca' n'ixy'adyïjïch jada Jesús. Ni ca' nhuïnjïhuïyïch ti miich nimïydacpy.

E mic'amy Pedro ypidzïmy jïiby, e tim huïn'ïtiy tüg tzeyñi'aa oy yaaxïgy.

⁶⁹ Chi jadüg'oc je tumbi töxyjäybi huïndïcxpejty Pedro, e nimay je jây ajcxy huïdibi jim yajpatp huïngon, e ymïnañ:

—Jada je' nidügti huïdi anajty mïd huïdity Jesús.

⁷⁰ Chi Pedro jadüg'oc ymïnañ co ca' ix'adyïi. Co hueeñi, je jây ajcxy jadüg'oc Pedro nimay:

—Janch co miich je' nidügti ma Jesús yjây miñ, Galileo jây miich, com nmïdooybïch miich m'ayuc nej Galileo jây ycapxcïxy.

⁷¹ Co ajcxy jadu'n ymïnañ, chi Pedro mïctägy ñaygogapxi co ca' yï mïdhuïdity Jesús, ymïnañ:

—Dios y'ïjxpy ñejhuïyïb co tiy'ajt ngapxyïch, co ca' n'ixy'adyïjïch yï Jesús huïdibi miich ajcxy mnïgapxyp.

⁷² Co Pedro ycapxymaayï tim huïn'ïtiy tüg tzeyñi'aa yaaxïgy mïmejtz'ocpi. Huïn'it Pedro jâymetzcoody nej Jesús ñimäyïi: “Cham coodz jayïp ca'ni anajty tzeyñi'aa yaaxïgy metz'oc, ti anajty miich mïnañ tugïg'oc co ca' xy'ix'adyïjïch.” Co Pedro jadu'n jâymejtzcoody Jesús y'ayuc, chi tajy may ñayjïhuïyï, e ytïgiy yaaxpi.

15

Jesús ma Pilato yhuinduu

¹ Co yximíy, chi je teedy ajcxy huídibi mij tung mîd, je mijjâydijc, je escribas ajcxy, etz tûg'óciy judíoJay huídibi mij tung mîd yóymujctay ajcxy. Chi nidûg'óciy ajcxy yajnicxcixy Jesús cîxoch ma Pilato, je gobernador.

² Pilato Jesús y'amidooy, nimay:

—¿Nej miich rey'ajtp ma yi judíoJay ajcxyi?

Chi Jesús ymînañ:

—Miich jadu'n mînamb.

³ Je judío teedy ajcxy huídibi mijtungmîdipi mictâgy tzachxîgixy Jesús mîd canagnax xîhuin. ⁴ Chi Pilato jadûg'oc Jesús y'amidooy, nimay:

—¿Ca' nej m'adzohua'ñi? Ix nej yi mmîdzip ajcxy yxhachxîgixy.

⁵ Chi Jesús ca' ni nej y'adzooy. E Pilato ooy chachhuinmay'ahuídijty.

Jesús yajmoy ysentencia co y'ôgîpy

⁶ Com xîjoty anajty, je gobernador Pilato najtzmazîy tûg machyJâ, je huídibi je mayJâ anajty ypijctzoogixyp. ⁷ Pujxtijc îñaayb anajty jim Jerusalén tûg machyJâ huídibi anajty yxî Barrabás. Barrabás pujxtijc îñaayb anajty quipxy mîd jacjadyîi Jâ huídibi anajty ti mîdziptzoon je gobierno romano, e ti anajty yJâyaj'ó'ccixy. ⁸⁻⁹ Co anajty je may yxî'ajtpidijc may'ajt pijctzoogixy ma Pilato co najtzmazîhuip tûg machyJâ, chi Pilato ymînañ:

—¿Nej mdzojccixyp co nnajtzmazîhuibich je judíoJay ajcxy yrey?

¹⁰ Pilato ñejhuîyb anajty co mañ'ajtingîxy anajty ajcxy je teedy mijtungmîdipi ti cîyejccixy Jesús. ¹¹ Per co Pilato jadu'n ymînañ, chi je teedy ajcxy mijtungmîdipi ooy ajcxy yajhuamgoty yajjihuîygoty je mayJâ co huen je Pilato najtzmazîy je Barrabás. ¹² Chi Pilato y'amidooy je mayJâ jadûg'oc:

—¿Nej miich ajcxy mdzocy ndunîpyich mîd jada yêydijc huídibi Jâ ajcxy ytijpy co yrey'aty ma yi judíoJay ajcxy?

¹³ Chi je mayJâ mic ymînangottay:

—Yajcruutzpet.

¹⁴ Chi Pilato ymînañ:

—Per ¿ti yi' ti tundigoy?

Huin'it je mayJâ nîgi mic ymînañ:

—¡Yajcruutzpet!

¹⁵ Co jadu'n je mayJâ ajcxy mictâgy ymînanday, chi Pilato anajty yajjotcujc'adaangixy je mayJâ, chi najtzmazîy je Barrabás. E co yajcî'ajttay yi Jesús, chi cîyejcnî co huen yajcruutzpedyîi.

¹⁶ Chi je soldados ajcxy yajnicxy Jesús ma je agujctijc tîba', e jim ñaymujci tûg'óciy soldados ajcxy huídibi yajpatp anajty jim Jerusalén. ¹⁷ Chi ajcxy yajñîjenîy je Jesús tûg rey yhuít, color ucypî e yajcojenîy ajcxy apy corona. ¹⁸ Chi je soldados ajcxy ymînañ:

—¡Viva jada judío rey!

¹⁹ Chi je soldados ajcxy huojpy Jesús ma ycohuajc mîd paxy, e huindzuj jîjptzujcixy ooy, e huingoxtînay'ahuîygyxîy janch ypaad nej jihuîy ooy huindzigîygyxîy. ²⁰ Co je soldados ajcxy nîxiictay yajxiictay Jesús, chi ajcxy jeenî je yreyhuít color ucypî, e yajñîjenîy ajcxy yci'm yhuít jadûg'oc. Chi ajcxy Jesús mîdcajppîdzîmy co anajty yajcruutzpedaangixy.

Co Jesús yajcruutzpejti

²¹ Tü'am ajcxy tüg jäy müdnaybati, hue' anajty yxii, Simón, ycocájpity jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jaccajpi Jesús ycruudz.

²² Chi ajcxy yajnicxy Jesús ma tüg it lugar huidibi yxii Gólgota, je ayuc Gólgota jadu'n yhuimbizimiy o'cpi cohuajc. ²³ Chi ajcxy moy Jesús vino huen ügy tem huidity müd mirra tzoy. Per ca' Jesús cöbijcy je vino nii. ²⁴ Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuít yajhuäcxaani, oc'ixaangixy pin anajty ocjé'ájtíp.

²⁵ Petyxii anajty co ajcxy yajcruutzpejty Jesús. ²⁶ Je ayuc huidibi ajcxy yjaay ma Jesús cruudz, jadu'n yminañ:

—Je judíojäy ajcxy yRey. ²⁷ Quipxy müd Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ymijc, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n yminañ: “Yaj'amichoomujc je Cristo müd je pocyjäy ajcxy.”

²⁹⁻³⁰ Je mayjäy huidibi ajcxy naxiyb anajty ma Jesús yajpaady cruutzcíxy, ooy anajty ajcxy ycöjigiiyñ, nixiicy yajxiicy ajcxy Jesús, yminañ ajcxy:

—Bah, miich huidibi Dios ytijc mjidaanip, e codugig xii huingbi myajpidiga'ñ, miich ci'm cham naygohuaani, e minac cruutzcíxy.

³¹⁻³² Nañ jadu'n je teedy ajcxy mijtungmüdpí etz je escribas ajcxy nixiicy yajxiicy ajcxy Jesús ñayñimayi miñ xyipy:

—Jada Jesús ti cohua'ñ jacjadyii jäy, e ca' jaty nej ci'm ñaygohua'niiyb. Pen janch, co jada Jesús yjéjity je Cristo huidibi rey'adamb ma yi judíojäy ajcxy, ymüd ixypy mic'ajt jaydéb ci'm yminagipy cruutzcíxy. Co jadu'n ixypy n'íjxim co ci'm ti yminacy cruutzcíxy, huin'it mibíjcm co janch jada jéjity je Cristo huidibi rey'ajtp ma yi Israel jäy.

Nañ jadu'n je metz meetzpi ajcxy huidibi cruutzpejt quipxy müd Jesús nixiicy yajxiicy ajcxy je Jesús.

Co Jesús y'ögy

³³ Co ycuycxiiy, chi ycoodzygiday tüg'óciy naaxhuiñ. E jadu'n je naaxhuiñ y'ijty coodz ixti minacyxii. ³⁴ Minacyxii Jesús mic yminañ müd aramaico ayuc:

—Eloi, Eloi, ¿lama sabactani? —yi jadu'mbi ayuc hue' yhuimbizimiy: Tat Dios. Tat Dios. ¿Na'amy co ti xy'ix'ixyich?

³⁵ Nijéjity jäy huidibi anajty jim yajpatp huingon ma Jesús, co müdo jadu'n ajcxy Jesús y'ayuc, chi ajcxy yminañ:

—Midoogix, Elías yi' yaaxtaayb.

³⁶ Chi nidügti ajcxy ninicxy Jesús poyígy, ti anajty yajxoogy pixy müd vinonii ta'mbi, e yajjijpxodziy je pixy ma tüg paxy, e jadu'n yajja'ty je vino nii ta'mbi ma Jesús y'ahuac, huen muucip je vino nii ta'mbi. Co jadu'n tuñ, chi yminañ:

—Tzoc oc'ahuíxim pen mimb Elías, e miñ yajminagyii ma yi cruudz.

³⁷ Chi Jesús mic ycapxqueegy, chi y'o'cy. ³⁸ Co Jesús y'o'cy, chi je mapxhuít yciitzhua'cxy tiná'amy huidibi anajty müd y'adiydútyity je Dios ycuarto ma je teedy mijtungmüdpí ytigíy tüg tecypajc jimijt jimijt. ³⁹ Je soldado huindzin huidibi anajty tinaayb ma Jesús yhuinduu, co jadu'n müdo nej Jesús mic yaaxqueegy, e ijxy nej y'ögy, chi yminañ:

—Janch co jada yaabi yéydijc anajty Dios ung'adyii.

40 Nañ jim anajty nijëjity töxyjäydijc ymij'ljxcixy jiguëgy. Jim anajty yajpaady María Magdalena, etz je jadügpí María, Jacobo je mutz'anägnip ytaj, etz José ytaj. Nañ jim anajty yajpaady Salomé. 41 Jadayaabi töxyjäy ajcxy müdhuidijt Jesús, e ti anajty pubéjtjixy taabi anajty Jesús yajpaady jim Galilea ñaaxjot. Nañ jadu'n anajty jim yajpaady jacnaagity töxyjäydijc ajcxy huidibi anajty ti ycoody jim Jerusalén quipxy müd Jesús.

Jesús yajnaaxtigiyii

42-43 Paady co chu'iyñi hue' anajty viernes mina judíojäy ñayajpocyñihuáatzigixy, jaydëb anajty amay'adaangixy je sábado xii je com jabom. Chi José huidibi anajty cogajp Arimatea yjotmictuñ, chi ytigüy ma je gobernador Pilato, pijctzooy may'ajt co yajnaaxtigihuaani Jesús ñinícx. E hue' je' José anajty tungmüid ma yi judíojäy ajcxy. José yjijp'ijxpy anajty mina Dios pidäga'ñ yi' y'ané'min ya naaxhuiñ. 44 Pilato ooy tzachhuinmay co Jesús tim mic'amy ti y'ögy anajty, paady huodzooy je soldado huindzin, e tiy'ajt pijctzoy pen janch co Jesús ti anajty y'ögy. 45 Co je soldado huindzin tiy'ajt yejcy co Jesús ti anajty y'ögy, chi nimay José co huen yajnaxtigihuijy Jesús. 46 Chi José juy poob huit, e co yajminajcy Jesús ñinícx, chi mo'ñ müd je poob huit, e chi pidacy ma tüg tzaajut huidibi anajty ti yajtzejtztüdy ti yajpadüdy ma tüg tzaahuingueetz. E chi yaj'adujcy je öcpi jut müd tüg mij tzaa. 47 E je metzpi töxyjäy María Magdalena etz je jadügpí María huidibi José ytaj'ajtpy huindícxp anajty ajcxy co Jesús ñaaxtigüy.

16

Jesús yjugypijcy jadüg'oc

1 Com jabom jopy, domingo, chi je tugüig töxyjäy ajcxy María Magdalena, María Jacobo ytaj etz Salomé juy ajcxy tzoy huidibi ooy oy xuugy, pidägaangixy anajty ma Jesús ñinícx. 2 Je tugügpí töxyjäy choon domingo, semaan ixtigi', tim jopyñi. Ti anajty ypidzimni je xii co ajcxy oojädy ma je öcpi jut. 3 Chi je tugügpí töxyjäy ajcxy nayñimaayi miñ xyipy:

—¿Pín xy'ocpubéjtím jigihuijy je mij tzaa huidibi müd agüyity je öcpi jut?

4 Per co ajcxy ijxy je öcpi jut, chi ajcxy ijxy ahuingujc je mij tzaa anajty ytiguejcnäy huidibi je öcpi jut anajty agüydujcp. 5 Chi ajcxy ytigüy jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymüid. Co ajcxy jadu'n ijxy je yeeg'anäg jiiiby jutjoty, chi je töxyjäy ajcxy ooy chigüy. 6 Chi je yeeg'anäg nimay je töxyjäy ajcxy:

—Ca' ooy mdzigüygixy. Miich ajcxy je' m'ijxtaaygixp je Jesús huidibi cogajp Nazaret, je huidibi jäy ajcxy yajcruutzpejt. Ti je' yjugypicy. Ca' je' ya. Oc'ljxcix ya ma ajcxy pidaacci. 7 Níxcix, nimaaygix Pedro etz yi jacjadyii Jesús ydiscípulos ajcxy co Jesús nícxip jayijp jim Galilea, e jim Galilea ñaybadüyb ajcxy müd Jesús, jadu'n nej ajcxy ñimaayi jayijp'aty.

8 Chi je töxyjäy ajcxy jim yqueegy ma je öcpi jut, com ti anajty ooy chigüygixy. Ooy anajty ajcxy chiyuy müd tzigüñ. E ni ca' ajcxy nimay ni pín nej anajty ti ljxcixy, com ooy anajty chigüygixy.

Jesús ñaygue'xici ma María Magdalena

⁹ Je domingo, semana ixtigi', co Jesús yjugypicy, chi ñayguëxici jayijp ma María Magdalena, je' je' je töxyjäy huidibi anajty Jesús ti yajpidzimi huixtucj ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huidibi müid yhuidijty, e nimaaygixy nej anajty yi' ti icy Jesús co ti yjugypicy jadüg'oc. E Jesús ydiscípulos ajcxy ooy anajty ytáycixy ymáygixy etz yaaxcixy. ¹¹ E co ajcxy midoohui je María y'ayuc, co anajty ti icy Jesús juugy, chi ca' ajcxy mijpidaaci y'ayuc.

Jesús nayguëxici ma metz ydiscípulos

¹² Co hueeñi, Jesús ñayguëxici nañ jadu'n ma metz je' ydiscípulos huidibi ñicxp anajty ajcxy camjoty. ¹³ Chi je metzpi discípulos ñicxy ajcxy mic'amy oy nimaaygixy je jacjadyii discípulos ajcxy co ti ijxcixy Jesús. E je jacjadyii discípulos ca' ajcxy mijpidaaci je metzpi discípulos y'ayuc.

Huidi Jesús ydiscípulos yajnibijc

¹⁴ Jac com jecy, Jesús ñayguëxici ma je majctügpi discípulos ajcxy ma anajty y'ñaaygixy ma caydac. Chi Jesús ooy ajcxy co ca' ajcxy mibijccixy co ooy ajcxy yjot yjuuñity, ca' ajcxy mijpidägy jacjadyii pin anajty ti y'ijxcixy Jesús. ¹⁵ Jesús je' ydiscípulos ajcxy nimay:

—Ñicxcix miich ajcxy ma tüg'óciy naaxhuiñyjäy, ma tüg'óciy naax cajp, e capxhuäccix ajcxy je oybi ayuc nej jäy ajcxy jëb y'almanidzögipy. ¹⁶ Pinjaty mibijc etz ñiibejtixy, ypaadip ajcxy y'almanidzoocin. Per, pinjaty ca' mijpidägy tiy'ajt hue' ajcxy y'alma tigoyip müid ypocy ycixpi. ¹⁷ Yi jäy ajcxy huidibi mibijcp, ooy ajcxy ijxpejt túngixipy. Müid ñch nxñ ñch nmic'ajt yajpidzimipy ajcxy ca'oybi ma jäy ajcxy yjot yhuinma'ñ. Nañ jadu'n ycápxgixipy huingbi ayuc. ¹⁸ Ymadzipy ajcxy tza'ñ, e ca' nej yjajtixipy. E co ajcxy veneno ügip, ca' ajcxy ypa'mdunib. E co ajcxy cñixájipy pa'mjäy, tzögip je pa'mjäy.

Jesús ypätigüyñi tzajpjoty

¹⁹ E co je Huindzin Jesús ycapxy ycixy müid je' ydiscípulos ajcxy, chi ypätigüyñi tzajpjoty. Jiiby tzajpjoty Jesús yajpaady ma Dios ymijc a'oy'amy, müid mij'ane'min. ²⁰ Chi Jesús ydiscípulos ajcxy chooñ ñicxcixy cajp cajp capxhuäccy ajcxy Jesús y'ayuc ma nidüg'óciy naax cajp. E je Huindzin Jesús ooy ajcxy ypubejti ypudigüy, mic'ajt moy je' ajcxy müid je ijxpejt je mijhuinma'ñ huidibi ajcxy tumyb. Jadu'ñyi jadu'n. Amén.

SAN LUCAS

Jaayhui'my Jadu'n Nej Jesucristo Ytun Yjajti

¹ Mayjäy ti cojaay je ayuc je tiy'ajt huidi ñich ajt nejhuuiyim co janch ytiy'ájtity, tüg'óciy jadu'n nej Jesús chondacy yjugy'ájtin ya naaxhuiñ ixti mabaad ycocigixiiy. ² Tüg'óciy je tiy'ajt jadu'n nej ajt xyñimaayim huidi ci'm iix midou nej chondacy ixti mabaad ycocigixiiy, je' ajcxy huidibi capxhuäcxy Jesús y'ayuc ytiy'ajt. ³ ñich nañ jadu'n ti nyajciyöyich ti nya-jtecyöyich yajxon je tiy'ajt nej Jesús chondacy je' chinaayin ya naaxhuiñ ixti mabaad ycocigixiiy. Paady ycixpi ñich nhuinma'ñ pidägy co ñich miich nyajnijayihua'ñ tüg'óciy je tiy'ajt, miich oyjäybi, Teófilo. ⁴ Jigix miich nañ jadu'n mnejhuuihuipy yajxon je tiy'ajt, jadu'n nej miich ti m'ixpicy.

Tüg ángel nigapxy co Juan el Bautista ypi'c'ada'ñ

⁵ Jadu'n ytuni yjajti co anajty Herodes yrey'aty ma Judea naax cajp, jim anajty tüg judío teedy hue' anajty yxii Zacarías. Je' anajty semandumb müd Abías y'ajugytijc y'amigügtijc. Je Zacarías ypijcy müd Aarón y'ocniix, hue' je' anajty yxii Elisabet. ⁶ Dios y'ijxyp ñejhuuiyb co je' anajty ajcxy ytudägyjäyiti nimetz. Je' ajcxy ycuydumyb tüg'óciy yi Huindzin Dios ycapxy y'ané'min. ⁷ Je' ca'p anajty ajcxy y'ung ni tüg, e jadu'n ajcxy ymijäyñ nimetz.

⁸ Chi tügtecy Zacarías müd y'ajugy y'amigüg yteedy'ájticy anajty ma Dios ytijc. ⁹ Jadu'n nej teedy ajcxy ycostumbre müdity, chi ñigooti tung je Zacarías mina ypoomjogipy jüby ma yi Huindzin Dios ytijc. ¹⁰ Tüg'óciy je mayjäy ooy anajty Dios mübijctzoogixy tiba'y. Yam Zacarías tzajtigoty ypoomjocy, ¹¹ co ñayquëxici Huindzin Dios y'ángel tüg ytinäy a'oy'amy ma je poomjotac. ¹² Co Zacarías ijxy je ángel, chi ooy chigiiy. ¹³ Chi je ángel nimaay Zacarías:

—Ca' mdzigíy, ti Dios midooy yi mjuydácin mnucxtácin. Yi mdöxyijc Elisabet ypaadipy tüg ung yëydijcpi, e mximöhuipy Juan. ¹⁴ Mjotcujc'adip mxondägip miich etz mdöxyijc, nañ may yi jäy yjotcugihuiipy co anajty m'ung ti ypi'c'aty. ¹⁵ Chi yi m'ung ycomay'ida'ñ ma Dios. Ni ca' ügipy vino ni jocni. Ma ca'ni anajty yma'xung'aty ymüid'adipy yi Dios yjihui'ñ ymic'ajt. ¹⁶ Yi' yajjothuimbidip may Israel jäy ma yi' ajcxy yHuindzin Dios. ¹⁷ Je' nicxy ycocapxy'aty ma yi jäy ajcxy huinmic jotmic müd Dios yjihui'ñ ymic'ajt, tim jadu'n nej Elías jecy'ajty ycocapxy'ajty huinmic jotmic müd Dios yjihui'ñ ymic'ajt. Je' m'ung yajjothuimbidipy je ungedeedy ajcxy huidibi ca' y'ung ixaangixy, nañ yajjothuimbidipy je jäy ajcxy huidibi ca' capxycöbicy yi Dios, jigix ajcxy paadipy oyjot oyhuinma'ñ. Nañ m'ung ñimähuipy je jäy ajcxy huen nayñ'i'ixiiyigixy müd yHuindzin Dios ycixpi.

¹⁸ Chi Zacarías nimay je ángel:

—¿Nej jada ñich nejhuuihuipy peni janch huidibi xyajnimaa'ybich? Ti nmijjäyñich, cham ndöxyijcich nañ ti ymijjäyñi.

¹⁹ Chi je ángel y'adzooy:

—Ñich Gabriel, ma Dios yhuinduu ni'ixi' n'ityich. Dios ti xyquexyich cocapxy'ajtpi ma miich co nyajnimähuipy jada oybi ayuc. ²⁰ Jadachambi

müich mhuí'müpy uum, ni ca' m'ocájtnip nej mgápüpy, müid co ca' mmüicy jada üch n'ayuc hüidibi yajcuydunip co anajty tiempo patni.

²¹ Yam je mayjäy ooy ja'ahuíjxcixy Zacarías, ooy anajty ajcxy tzachhuin-maaygixy ti co chachhuäcxipy jiiy ma Dios ytijc. ²² Co Zacarías ypidzimy, chi ca' anajty y'ocapxni. Chi je jäy ajcxy huinjihuüy co ti anajty icy tijaty jiiy ma Dios ytijc. Hue' je' yjacmiydacy a'ixiy'amy, e oyhuí'müy uum.

²³ Co je semandung yajmay, chi Zacarías ñicxni ma ytijc. ²⁴⁻²⁵ Co jadu'n yjajty, chi Elisabet jihuiy co ti anajty y'ung tzimügy cüy gy. Chi yüch'ijty mügoox po', e ymíñañ: "Jadu'n yi Huindzin Dios ti ytuñ müid üch jadachambi tiempo, ti xyjäy mechich ti yajquëgy üch ndzöydu'n ma yi mayjäy ajcxy."

Tüg ángel nigapxy co Jesús ypi'c'ada'ñ

²⁶ Co tudujc po' maabi Elisabet anajty y'ungtzimügy, chi Dios quejxy je' y'ángel Gabriel jim Galilea naaxjot ma je cajp hüidi anajty yxii Nazaret.

²⁷ Chi Dios quejxy Gabriel ma anajty tüg töxy'anäg y'ity hüidibi anajty ca'ni müdzinäy yëydijc. Je töxy'anäg ti anajty co'adzoy co piga'ñ müid tüg yëydijc hüidi yxii José. José hue' anajty David y'ap y'oc. Je töxy'anäg hue' anajty yxiiyty María. ²⁸ Co je ángel ytigüy ma anajty María, chi nimay:

—María, Dios ti xy'ijxtiy, je Huindzin Dios y'oy'ajt müid müich. Müich je' cömay y'idip ma tüg'ócy töxyjäydijc.

²⁹ Chi María co y'ijxy je ángel, chi chigüy müid je' y'ayuc, chi huinmay ooy müid jada copxpócxin nej co yjadú'ñity. ³⁰ Chi je ángel ymíñañ:

—María, ca' mdzigüy, müich Dios ti xy'ijxtiy. ³¹ Jadachambi, m'ungdzimügip, myajpi'c'adipy tüg mang, hüidibi mximöhüipy JESUS. ³² Je Jesús müj y'idipy, hue' je' yajtjüpy Dios tzajpjoty' y'ung. Chi je Huindzin Dios möhuüyb je ané'min hüidi y' ymij'ap ymijteedy David ymüid anajty. ³³ Je Jesús ané'mip huinixii ma yi Jacob y'ap y'oc. Je' y'ané'min camina ycixipy.

³⁴ Chi María je ángel nimaaay:

—¿Nej jada co yjadú'ñity? Üch ca'ni nyëydijc müid tzinäy.

³⁵ Chi je ángel y'adzooy:

—Je Dios yjihui'ñ ymic'ajt minip ma müich, je Dios tzajpjoty' ymic'ájtin xyajnidujttähup, je oyjäybi jäy hüidi pi'c'adam, hue' yajtjüpy Dios y'ung.

³⁶ E cham Elisabet müich m'amigüg nañ jadu'n yajpi'c'adamy tüg mang ma ti ymijjäyüyñi. Cham midudujc po'bi maabi y'ung tzimügy je hüidibi jäy ytijpy ca' y'ung'ixaani, ³⁷ com müidi Dios ca'ni ti chípity.

³⁸ Chi María ymíñañ:

—Jotcujc nguydunipyich yi Huindzin Dios chójcín, huen jadu'n tuñyüi jadyüi ma üch jadu'n nej müich m'ayuc xymöyich.

Chi je ángel ñicxni.

María y'oy cogapxy Elisabet

³⁹ Huin'it xii María choñ, ñicxy jottigoy ma yugjot, ma tüg cajp jim Judea naaxjot. ⁴⁰ Chi ytigüy ma Zacarías ytijc, e capxpocxy Elisabet. ⁴¹ Chi jadu'n yjajty co Elisabet müdoohui María ycapxpócxin, chi jihuiy co y'ung yücxy ma yjot. E chi je Elisabet ooy yjotcugüy müid je Dios yjihui'ñ ymic'ajt.

⁴² Chi ymíñañ janch mic:

—Cömay müich ma tüg'ócy töxyjäydijc, e cömay y'ida'ñ m'ung hüidibi pi'c'adamb. ⁴³ ¿Nej üch jada co jadu'n ti n'ahuägüy co nHuindzinich ytaj

miñ xycó'ixi'yich? ⁴⁴ Co ti nmidooyich yi mgapxpócxin, ti ñich n'ung yücxyma ñich njot co chachjotcúcity. ⁴⁵ Jotcuje'adip pinjaty ti ymibicy, co cuyduñ y'ida'ñ je ayuc mñid je Huindzin Dios ycixpi. ⁴⁶ Chi María ymíñañ: Ooy mij n'ojadatyich yi Huindzin Dios.

⁴⁷ Ooy nxondágyich mñid Dios ycixpi, ñich nnihuambi nyajtzoocpi,

⁴⁸ co yi' ti xyñ'i'jxcidágyich, co ñich ayoobi xytumbi'adyiijich. Jadachambi etz jacnicxp xii tiempo, tüg'óciy jäy ajcxyma mñina'ñip co jotcuje'ájtpech.

⁴⁹ Yi Dios tügpaic mñijip, tiibi tun mñid ñich, ooy yi' yxii ymíjity.

⁵⁰ Dios ypa'ayooyb hueñypínity huidibi huindziñiyip jadachambi etz jacnicxnii xii tiempo.

⁵¹ Dios ti ooy tuñ mñijpi huinma'ñ, ti jñibicy pinjaty amij agix nayjihuiyip ma yjot yhuinma'ñ.

⁵² Dios ti yajpidzimy yi mñijpi rey ma y'ane'my, ti mij'ajt möy ayoobidijc.

⁵³ Pinjaty ayuu'ijtp anajty ymooy ti mñid yjotcuje'adip, etz yi comeeñyjäydijc ajcxyma ti ixmach ca' ni ti.

⁵⁴ Dios ti pubety yi Israel jäy, yi' ajcxyma ytumbi, mñid co anajty ti pa'ayogoty je' ajcxyma,

⁵⁵ jadu'n nej jecy'ajty Dios yajnimay je' n'ap ndeedy, je Abraham etz je'y'ap y'oc, co tunamb mñid je' ajcxyma huinixii.

⁵⁶ Chi María tügüg po' jim y'ijty mñid Elisabet, chi yhuimbijtni ma ytijc.

Juan el Bautista co ypi'c'ajty

⁵⁷ Co je Elisabet oy yajhuaad'ajtni xii tiempo, chi yajpi'c'ajty tüg ymang.

⁵⁸ Chi ayuc mñidooy ajcxyma je ymijñin ymidijc etz y'ajugy y'amigüg jadu'n nej Dios may'ajt ti tuñ mñid Elisabet. Chi ajcxyma ooy yjotcugiy mñid je' ycixpi.

⁵⁹ Chi jadu'n yjajty coductujc xii je ymijñin ymidijc etz y'ajugy y'amigüg miñ ma Zacarías ytijc co anajty tiy'ajttihuaangixy je pi'c'anäg. Chi ajcxyma yajxi'ada'ñyii anajty jadu'n nej yteedy yxii Zacarías. ⁶⁰ Chi ytaj ymíñañ:

—Ca' xii'adiyb Zacarías, hue' yi' huen xii'adyii Juan.

⁶¹ Chi je' ymígügtijc ajcxyma ymíñañ:

—¿Na'amy? Ni tüg miich m'amigüg jadu'n ca' xii'ijity.

⁶² Chi ajcxyma y'amidoohui je' yteedy jadu'n a'ixi'y'amy, nej yi' yajxi'ada'ñyii. ⁶³ Chi Zacarías pijctzoy tüg necy, e jaay jadu'n: “Juan huen xii'adyii.” Chi je ymígügtijc ajcxyma nidüg'óciy ooy jihuiy huinmaay. ⁶⁴ Chi mic'amy Zacarías y'ahuac ahua'cxyma e ytoodz yungüy, chi oy ycapxiy e jäymejch cömay yi Dios. ⁶⁵ Chi tüg'óciy ymijñin ymidijc ooy chigüy. Chi ajcxyma nimydactay nej Zacarías ti yjaty ma tüg'óciy jäy huidibi tzinaayb Judea yuugjotypi tzinaaydac. ⁶⁶ Tüg'óciy pinjaty anajty mñidoob je ayuc, chi jäymejtzhui' m'ajcxyma ma yjot yhuinma'ñ, chi ñayñimáayigixy:

—¿Ti jada' y'tunamyb jada pi'c'anäg?

Com je Huindzin Dios je' mñid y'ity.

Je Zacarías y'iy

⁶⁷ Chi je ungedeedy Zacarías mñid je Dios yjihui'ñ ymic'ajt Dios y'ayuc najtzcaxiiyi ymíñañ:

⁶⁸ Cömay yi Israel jäy yHuindzin Dios, co ti ni'ijxcidágy, ti cohua'ñ yi' ñaax ycajp,

⁶⁹ Dios ti quexy tüg mij nihuaambi yajtzoocpi, ma yi' ytumbi, David y'ap y'oc ajcxyma.

- 70 Com Dios jadu'n ymīnañ jecy'ajty mīd yī y'ayuc najtzcapxīyib huīdibi huätzjäyīp;
- 71 je' xyñihuānaanim ma īch ajt nmīdzip, nañ xypubedaanim xy-pudigīhuaanim ca'ydi xycīgāhuīyīm huīdibi ca' xy'ixaanīm xy-chogaanim.
- 72 Jaydēbi pa'ayoohuīpy īch ajt nmīj'ap nmījteedy, etz jāymedzīyib jadu'n nej ayuc ahuanīy mīd je' ajcxy.
- 73 Jadu'n nej Dios janch huīnījot y'ayuc ahuanīy mīd īch ajt nmīj'ap nmījteedy Abraham jecy'ajty huīdi anajty xymōhuaanim.
- 74 Co nihuätzīctūtīm ma nmīdzip, huīn'it jaydēbi mīyaaxīm n'ojadājtim ca' ma tzīgī'ñ jīhui'ñ,
- 75 mīd huätzhuīnma'ñ etz tudāgy huīnma'ñ ma yī yhuīnduu jabom jabom ixti mībaad ndzīnaayīm.
- 76 Mīich ma'xung, jāy hue' myajtijīp mījpi Dios y'ayucnajtzcapxīyibi. Mīich nīcxīp cogapxy, nīcx yajni'ixī jāy mīd Huīndzīn Dios ycxīpi.
- 77 Yajni'ixī' yī cajpjāy jadu'n nej huaad ajcxy y'alma paadīpy nihuāanīm yajniđzoocīn, etz jadu'n nej huaad ajcxy ypocy huīnmeccīyib.
- 78 Jadu'n nej Dios īch ajt tī xypa'ayoohuīm co tī xyñī'ljxcīdaacīm etz xymooyīm tīcxīn jājīn huīdibi tzomb tzajpjoty,
- 79 jaydēbi yajmōhuīpy jāy ajcxy Dios ytiy'ajt huīdibi ajcxy tzīnaayb agootztuum etz o'c jījp'am, jīgīx ajcxy xytūmooyīm ma je tudāgy pī tū'aa.
- 80 Je pī'c'anāg yeeg yjodīy huīnmīc jotmīc mīd yī Dios yjīhui'ñ ymīc'ajt. Chi chīnaay adūgtuum ma ca' pīn, ixti coonī xī tiempo paty mīna nīcxīpy cogapxy ma Israeljāy ajcxy.

2

Jesús yma'xung'ajty

¹ Huīn'it xī Augusto César pīdacy y'ané'mīn huen tūg'ócīy jāy nīcxy necypejttaaygīxy. ² Je jāyījp'atypī padrōn hue' je'yaj'oyīy Cirenio huīdibi anajty gobernador'ajtp jīm Siria nīaaxjot. ³ Chi jāy ajcxy nidūg'ócīy nīcxtay yajcojayīybi nidūg nidūg ma yci'mgajp. ⁴ Chi José choōñ jīm Galilea naaxjot ma je cajp huīdi yxī Nazaret, nīcxy ajcxy jīm Judea naaxjot ma je David ycajp, huīdi yxī Belén. Yī José nīcxy jīm Belén com ymīj'ap'ajtpy ymījteedy'ajtpy je David. ⁵ Chi José yajcojayīy padrōnjoty mīd María, je tōxyjāy huīdibi anajty ymīd capxytuñ, huīdi anajty ung tzm'ījtp. ⁶ Chi jadu'n yjajty co ajcxy anajty yjīmīty Belén, chi oyhuaad'aty co María paadīpy y'ung. ⁷ Chi yma'xung'ajty je ungoob, e chi nībe'ñ nīmūxy mīd ymotz, e chi agōgīy ma īyujc pēcxi'ñ, co ca' anajty tī paady jāttac.

Je ángeles ajcxy etz je cōbixyucund'ajtpī ajcxy

⁸ Chi mīhuīngon je cajp anajty jāy ycōbixyucund'aty. Hue' anajty ajcxy yhuīn'īñayb huīntzuumnajxyp je' ycōbixy ajcxy. ⁹ Chi Huīndzīn Dios tūg y'ángel nīgīdaaci je' ajcxy, e yī Huīndzīn Dios y'oy'ājtin y'adīcxcoody jūhuīdity ma je' anajty ajcxy ymījc, chi ajcxy ooy chīgīy. ¹⁰ Huīn'it je ángel ymīnañ:

—Ca' mdzīgīyīgīxy, cham īch mīich nyajni'maaygīxy oybi ayuc huīdibi yajjotcugīhuīpy tūg'ócīy naax cajp. ¹¹ Mīd mīich ajcxy ycxīpi tī ypi'c'aty cham ma je David ycajp tūg jāy huīdibi mīich ajcxy xyñihuānaam xy-cohuānaam ma ajcxy mmīdzip. Hue' je' je CRISTO, je Huīndzīn Dios.

12 Yi' je' i'xpéjtíp huidi m̄id m'ijxcabipy. Mbáadi'py ajcxy je ung ma'xung ñimóchity m̄id ymotz, ycōcnāy ma iyujc pēcxi'ñ.

13 Chi janch mic'amy ñayguēxici m̄id je ángel may yi' tzejpjtotychinaaybi, chach Dios ojadájticy ymínāangixy:

14 ¡Ooy ycōmáyity ooy ym̄jity yi' Dios tzejpjtoty, ji naaxhuiñ jotcu'ajt m̄id jāy ajcxy ycixpi huidibi Dios yjāygidacpy!

15 Jadu'n yjajty co je ángel ajcxy ñicxtay tzejpjtoty, chi je cōbixy cuend'ajtpi ajcxy ñayñimayi:

—Tzoc jámim jim Belén, jaydēbi n'ijxim ti ti ytunyii ti yjadyii huidibi nHuindzin'ájtīm Dios ti xyajnimáayim.

16 Chi ajcxy ñicxy jottigoy, chi oy pátcixy María, José etz je ung ma'xung y'agōḡiyity ma je iyujc pēcxi'ñ. 17 Co ajcxy ijxy je María etz je ung ma'xung, huin'it ajcxy nigapxtay nimiydactay jadu'n nej je ángel ajcxy ñimayi m̄id je pi'c'anāg ycixpi. 18 Tüg'óciy jāy huidi midou ooy jihuiy huinmay jadu'n nej je cōbixycuend'ajtpi ajcxy ymínāñ. 19 Chi María mido'mbijctay, e yajhui'my ma yjot yhuinma'ñ. 20 Chi yhuimbijty je cōbixycuend'ajtpi ajcxy cōmay jāymech ajcxy yi' Dios, etz ooy alabanza ajcxy ñy m̄id Dios ycixpi m̄id tüg'óciy jadu'n nej anajty ti l̄jxcixy ti midóogixy, etz jadu'n nej anajty ti ñimāayigixy.

Pi'c Jesús yajcapxquēxiḡy ma Dios ytijc

21 Coductujc xii maabi anajty yma'xung'aty, huin'it je' ajcxy tiy'ajttiy je ung ma'xung. Chi ajcxy yx̄imoy JESUS, jadu'n nej je ángel anajty jayijp ti ymína'ñ ca'ni anajty chim̄gyii yciȳgyii.

22 Co je xii oypaatni m̄ina je María anajty yhuätzpidzimaamni, jadu'n nej Moisés ycōtūjc̄in je jécyp ymínāñ. Chi ajcxy m̄idñicxy je ung ma'xung jim Jerusalén capxquēxiḡaangixy ma yi' Huindzin Dios yhuinduu. 23 Com jadu'n anajty yjaybétyity ma Huindzin Dios ñecy:

Tüg'óciy ungoob yēydi'cpi huidi ma'xung'ajtp, abicy yhuí'mipy m̄id je Huindzin Dios ycixpi.

24 José etz María oy yéjccixy huindzigi'ñ jadu'n nej Huindzin Dios ñecy ymína'ñ co jēbi yecy metzc jam muuxy o pajctza'm muuxy.

25 Jim Jerusalén anajty chināy tüg jāy huidi anajty yx̄ii Simeón, tudāgyjāy je', etz ooy Dios jāymech. Simeón y'ahuijxyp anajty m̄ina Dios miñ yajjotcu'ada'ñ Israeljāy ajcxy, e m̄id je' anajty Dios yjihui'ñ ymic'ajt. 26 Dios yjihui'ñ ymic'ajt ti anajty yajnejhuiyii co ca' chojc ōga'ñ, jayijpni oc'ixipy je Huindzin Dios yCristo. 27 Je Dios yjihui'ñ ymic'ajt yajmin yajmejtzi Simeón yhuinma'ñ huen nicxy ma Dios ytijc; huin'it Jesús ytaj yteedy ym̄idñicxi ma Dios ytijc, cuyduñ ajcxy jadu'n nej Dios ñecy y'ane'my. 28 Chi Simeón tzendzoy etz capxpaady je ung ma'xung, e chi Dios m̄ibijctzoy m̄id je' ycixpi, chi ymínāñ:

29 Jadachambi capxcix jotcu'c, Huindzin Dios, m̄id ñch miich mdumbi, com ti mguyduñ jadu'n nej ti xyñimāyich co n'ixipyich je Cristo.

30 Cham ti n'ixyich je nihuambi cohuambi,

31 huidibi ti mni'ixiy ma tüg'óciy jāy ajcxy yhuinduu.

32 Jada ung ma'xung ytiy'ajt yegip ma yi' jāy ajcxy huidi ca' yjudiojāyity. Jadu'n yi' nipaady nej tüg j̄in huidi codūc̄xp je jāy. Cōmay y'idipy yi' Israel jāy m̄id yi' ycixpi.

33 José etz Jesús ytaj ooy jihuiy huinmaay jadu'n nej Simeón ñigapxy je pi'c ma'xung. 34-35 Chi Simeón conuucx yi' ajcxy, e ñimay María, Jesús ytaj:

—Jadayaabi pi'c'anäg hue' jada aminïy co may Israel jäy yjothuinma'nñ yaj'oyïhuipy müd yi Dios etz nañ jadu'n may Israel jäy yjothuinma'nñ ca' yaj'oyïhuipy müd yi Dios. Yi' je' tüg ijsxpejt co ca' jäy y'ixa'nñiyb choga'nñiyb, e jadu'n tüg'óciy yajnejhuïhuipy nej ajcxy nidüg nidüg yjothuinma'nñ müdity. E müch m'idipy jotmaymüid jadu'n nejihuïy tüg espada ti xyajtzaachïy.

³⁶⁻³⁷ Nañ jim Jerusalén anajty tüg töxyjäy huidibi anajty yxii Ana, Dios je' anajty y'ayucnajtzcapxiiybi. Fanuel anajty yteedy'ajtpy, hue' je' Aser y'ap y'oc, mij jäy anajty ooy. Janch mutz'anägñi ypijcy e jéyi huixtujc jimijt chinay müd yña'y, mada'px midaaax jimijt anajty cujc co'ógy chinäy, e ca' anajty ytigoy'ity ma Dios ytijc. Ana ytumb anajty tzajtigoty xim tzuum jopy ayuu anajty ycapxtägy. ³⁸ Chi Ana nimiñ José etz María jiiyby ma Dios ytijc, e quipxy müd ajcxy huingapxtacy je Huindzin Dios. Chi je Ana nimiydacy je pi'c Jesús müd tüg'óciy jäy jim Jerusalén huidi anajty ajcxy jijp'ijxp mina Dios cohua'na'nñ Jerusalén ma ymidzip.

Co ajcxy nicxni jim Nazaret

³⁹ Co oy yajcuydundäy tüg'óciy jadu'n nej je Huindzin Dios ñecy ymïna'nñ, chi José etz María ñicxcixni jim Galilea ma ajcxy yci'mgajp Nazaret. ⁴⁰ Je pi'c Jesús anajty yeegy mic ooy müd huijy'ajt cujc'ajt, etz ymüid je' Dios ymay'ájtïn y'oy'ájtïn.

Je pi'c Jesús yajpaady ma Dios ytijc

⁴¹ Jimijt jimijt yi ungdaj ungedeey ñicxy anajty ajcxy jim Jerusalén co anajty je Pascua xii paady. ⁴² Co Jesús anajty ymajmetzjimijt'ajty, chi ajcxy ypättigiiy jim Jerusalén jadu'n anajty ajcxy costumbre müdity co xii paady. ⁴³ Co je xii ñaxtäy, chi ajcxy huimbjïtcixni, e Jesús yhui'miiy je' jim Jerusalén. Ca' José etz ytaj nejhuïy ajcxy co ti anajty yhui'miy. ⁴⁴ Hue' ajcxy anajty tijy je' ymiñ axaam müd ymigügtijc. Co tüg xii yöygiixni, chi ajcxy ichtay je' y'ung ma y'amigügtijc ajcxy, etz huidi müd ñay'ixy'adyii ñaymigü'g'adyii. ⁴⁵ Co ca' ajcxy y'ung paady, chi yhuimbjïtcixni jim Jerusalén ung ixtaaybi.

⁴⁶ Chi jadu'n yjajty codugüig xii oypaatcixy jim ma Dios ytijc, Jesús y'iñäy anajty agujc'amy ma je huindzindijc. Yi' anajty y'amido'ijtyp yi huindzindijc y'ayuc, e nañ yaj'amidooy anajty tijaty. ⁴⁷ Tüg'óciy je huindzindijc huidibi midou Jesús y'ayuc, chi ooy ajcxy huinmay etz jihuiy jadu'n nej je Jesús huinjihuïdyäy etz jadu'n nej anajty tiydudägy y'adzooy. ⁴⁸ Co Jesús ytaj yteedy y'ijxpati, chi ooy ajcxy tzachjihuiy. Chi ungdaj ymïnañ:

—Aay ung, ¿nej co müch jadu'n xytúngixyich? Yi' mdeedy etz iich yam tzachjottigooyb nay'adzigiïyijich n'ixtáaygixich müch.

⁴⁹ Chi Jesús y'adzooy:

—¿Na'amy co müch xy'ixtáaygixyich? ¿Ca' mnejhuïygyixy co copity n'ida'ñich ma nDéedyich ytung?

⁵⁰ Chi ajcxy ca' huinjihuïyi Jesús y'ayuc huidibi ycapxy.

⁵¹ Chi Jesús müd nicxy je' ajcxy jim Nazaret. Chi Jesús capxymidooy ytaj yteedy. Chi yi' ytaj yajhui'mday ma yjot yhuinma'nñ tüg'óciy nej ytunyii yjadyii. ⁵² Chi Jesús ixpijc'aditzp anajty ooy, etz yeegy yjäygojy huijycujc. E yi Dios etz jäy ajcxy ooy anajty jäygidaaccixy.

3

Juan el Bautista y'ayuccapxhuäcxy mïjtig'iduum

¹ Ma anajty je Tiberio César yjimïjtjoty, mimajmocx jimïjt anajty maabi y'ane'mtigïy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je' y'uch Felipe anajty rey'ajtp jim Iturea etz jim Traconite ñaaxjot. Chi Lisaniás anajty rey'ajtp jim Abilina.

² Chi je Anás etz Caifás je' ajcxy anajty teedy mïjtungmïid ma Dios ytïjc. Je huin'it tiempo Dios y'ayuc yja'ty ma je Juan, Zacarías ymang, huidibi anajty tzinaayb mïjtig'iduum. ³ Chi Juan choñ ñicxy ma tüg'ócïy cajp mihuingon je Jordán mïjnï, capxhuijy je jäy ajcxy, co huen jothuimbi-jttaaygïxy etz huen ñibejtïcïxy jigïx ajcxy ypocy vajhuinmeecxp. ⁴ Jada jadu'n tuni jajti nej je ayucnajtzcapxïybi Isaías anajty ti cojaay:

Jim mïjtig'iduum yajmïdooy tüg jäy mina'ñ: "Yaj'oyïygïxy yï Dios ytü'aa, tim jadu'n nej jäy ajcxy yaj'oyïygïxy yï jïbic tü'aa co tüg rey mina'ñ."

Yajtïyïgïxy yï tü'aa huidibi ooy y'adijy y'a'och.

⁵ Tüg'ócïy anï ahuoc huen joyïydäy, tüg'ócïy tungop huen nañ jadu'n joyïydäy. Tüg'ócïy ñï'aa tü'aa huidibi tijmin tijxïjp huen tïydäy. Yï tü'aa huidibi ca' quipxyjátyity huen quipxyjaty tïydäy.

⁶ Tüg'ócïy yï jäy ajcxy ixïpy ñehuihïpy nej Dios yega'ñ je nihuambi cohuambi.

⁷ Chi Juan ojy ajcxy je jäy pïnjaty anajty mïimb ñibejtïpi, ymïnañ:

—ïMiich ajcxy tza'ñ ajcxy y'ajugy y'amïgü! ¿Pïn miich ajcxy ti xynimäy quëg ma yï ayo'n huidibi Dios yquexaamy? ⁸ Túngïx oybi, jothuimbïjtïcïx, ca' ajcxy mïnaangïxy mïñ xyïpy: "Abraham ñich ajcxy n'ap'ajtpy ndeedy'ajtpy". ñich miich ajcxy nïmaayb co Dios ixti jëbi yï' yaj'ung'adyïi yaj'anäg'adyïi Abraham jada tzaa ca'ydi miich ajcxy. ⁹ Dios nï'ixï y'ity jaydëbi yajcödïgoyïpy jäy ajcxy y'alma huidibi jïbic-huinma'ñ mïid. Tim jadu'n nipaady nej jäy nï'ixï y'ity mïid jacha co pujxïga'ñ tüg quipy huïdi ca' oy ytïm'aty, etz yajnögtähua'ñ.

¹⁰ Chi je mayjäy ajcxy y'amïdooy je Juan:

—¿Ti ñich ajcxy jëbi nduñ?

¹¹ Chi je Juan y'adzooy, ymïnañ:

—Pïnjaty yhuït mïid metz, jaydëbi möy pïn ca' mïidity ni tüg. Etz pïnjaty caagy mïid nañ jadu'n möhuïpy pïnjaty ca' mïidity.

¹² Chi mïiñ jadyïi yajcogüejtpï co anajty ñïbedaangïxy, ymïnañ ajcxy:

—¿Ti huaad ñich ajcxy nduñ (jigïx Dios xymïjotcujc'adïpyïch)?

¹³ Chi Juan y'adzooy:

—Ca' ñïgï anaxy myajcogüety jadu'n nej je cötújcïn y'ane'my.

¹⁴ Chi soldado ajcxy ymïnañ:

—¿Ti ñich ajcxy ndunïpy (jigïx Dios xymïjotcujc'adïpyïch)?

Chi Juan y'adzooy:

—Ni pïn ajcxy ti mgapïjcïpy, ni mganïhuambedïpy ajcxy. Nañ jadu'n mïjotcujc'ajtcïxy nej myajmujuuygïxy.

¹⁵ Je mayjäy yjïjp'ïjxyp anajty ajcxy ooy, etz ooy jihuiy huïnmaay nejhuïhuaangïxy pen yï Juan je' anajty Cristo. ¹⁶ Chi Juan nïmay ajcxy nidüg'ócïy:

—ñich janch nyajñïbéjtypïch jäy mïid ñï. Mïimb je' axaam huidibi jacmïj ca'ydi ñich, ca' huaad yï' ycïghuïn ngejïch. Je' miich ajcxy xyajñïbedïpy mïidi Dios yjihui'ñ ymïc'ajt etz mïidi jïin. ¹⁷ Je Cristo nï'ixï'

y'ity co oybi möhua'nñ je jäy hu'idibi ajcxy oyhuinma'nñ m'iid, etz ymöhuaamy tzaachypi je jäy ajcxy hu'idibi j'ibic-huinma'nñ m'iid, tzaachypi hu'idibi nicamina ycixipy. Tim jadu'n nipaady nej tüg jäy ni'ixi' y'ity co ymoc-huimboja'n, e chi je oybi mocpajc pidäga'nñ ma che'x, etz je mocjaam ninögihua'nñ, e caminaxii ycapidza'nñ je j'iin.

¹⁸ Je Juan ooy jäy capxhuijy, etz canaagnax oybi ayuc capxhuäcxy. ¹⁹ Chi yi' oiy je rey Herodes, co y'uch Felipe ytöxyijc Herodías m'iid tzinaayi, etz jacjaydiybi j'ibic-huinma'nñ t'ibi Herodes anajty tuñ. ²⁰ Chi je rey Herodes nig'i pocytuñ co Juan pidacy pujxtigoty.

Je Jesús ñ'ibejtin

²¹⁻²² Chi jadu'n yjajty co jadu'n tüg'óciy jäy ñ'ibejtay nañ jadu'n Jesús ñ'ibejty. Yam anajty Jesús ycapxtägy co je tzejp y'ahuaach, etz je Dios yjihui'nñ ymic'ajt yminajcy ma Jesús ycöduu m'iid ñ'inicx jadu'n nej muuxy ñ'inicx. Nañ jadu'n yajmidoy tüg ayuc choñ tzejpjoty yminañ:

—Miich n'ung'ajtpy, ooy iich miich ndzocy ooy njihuüy, ooy njotcújcidyich m'iid miich.

Jesús ymij'ap ymijteedy

²³ Jesús hue' anajty yjimijt oy ni iipxmajc co ytungtigüy. Hue' je' anajty jadu'n jäy tijy José ymang, José yteedy hue' je' Elí, ²⁴ Elí yteedy hue' je' Matat, Matat yteedy hue' je' Leví, je Leví yteedy hue' je' Melqui, je Melqui yteedy hue' je' Jana, je Jana yteedy hue' je' José, ²⁵ Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, ²⁶ je Nagai yteedy hue' je' Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Leví, je Leví yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isaí, je Isaí yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram, je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴ je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham, je Abraham yteedy hue' je' Taré, je Taré yteedy hue' je' Nacor, ³⁵ je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶ je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé yteedy hue' je' Lamec, ³⁷ je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je' Mahalaleel,

je Mahalaleel yteedy hue' je' Cainán, ³⁸ je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

4

Je mujcu' tuñ ijxta'ni ma Jesús

¹ Jesús ymïd'ajtpy anajty je Dios yjihui'ñ ymic'ajt. Co Jesús jim choñ ma Jordán mij niï, chi je Dios yjihui'ñ ymic'ajt yajnicxi mïjtig'ïduum. ² Jesús y'ijty huixchigui'px xiï jim mïjtig'ïduum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xiï ñajxni, chi oy yuuböccodyi. ³ Chi je mujcu' nimay:

—Peni janch miich Dios xy'ung'adyi, nimay jada tzaa huen ahuimbity tzajcaagy.

⁴ Chi Jesús y'adzooy:

—Jaybety ity ma Dios ñecy co ca'nan mïd tzajcaagy ti'ajty jäy ajcxy yjugy'aty, nañ jadu'n tzocy tüg'óciy Dios y'ayuc.

⁵ Chi je mujcu' mïdpejty Jesús ma tüg cop janch cixpi, chi tüg jaxigy yajni'ixiïy tüg'óciy je naax cajp huïdi jii naaxhuïñbi. ⁶ Chi je mujcu' ymïnañ:

—Hich miich möhuipy tüg'óciy mic'ájtïn ané'mïn etz oy'ájtïn, com ñich ngi'am y'ity tüg'óciy, e nmöhuibich hueñyimpïñity. ⁷ Pen xyhuin-goxtinaaybich xy'ojadajtpich miich, ac miich jada mje' tüg'óciy.

⁸ Chi Jesús y'adzooy, ymïnañ:

—Huïnhuägtuutcïch miich mujcu', com jadu'n jaybéty y'ity: “Co yi Huïndzin miich mDios mhuïngoxtinähuipy m'ojadadipy, etz yi' je' tüg pajc myajmïj'adipy.”

⁹ Chi je mujcu' mïdnicxy Jesús jim Jerusalén, chi mïd pejty ma Dios ytïc coduu, e nimay:

—Pen Dios miich xy'ung'ajtp cödiïpnax naaxcíxy, ¹⁰ com jaybety jadu'n y'ity ma Dios ñecy co quexipy Dios yi' y'áñgeles ajcxy e xycuend'adipy.

¹¹ Cigíxy ajcxy xyhuïdzipy, ca'ydï mdzaachïy ma tzaajot.

¹² Chi Jesús ymïnañ:

—Ji Dios y'ayuc huïdi jadu'n mïnam co ca' mjot'ixipy mhuiñma'ñ'ixipy yi mHuïndzin Dios.

¹³ Co je mujcu' yajcijxy jadu'n nej anajty jot'ixa'ñ huinma'ñ'ixa'ñ Jesús, chi huïnhuägtuuty tüg tiempo.

Jesús yajtzondägy je' ytung jim Galilea

¹⁴ Chi Jesús nicxy jim Galilea, e Jesús mïd'ajtpy je Dios yjihui'ñ ymic'ajt. Chi Jesús ooy cömay y'ijty ma tüg'óciy cajp huïnduy agonbi. ¹⁵ Hue' Jesús anajty yaj'ixpicy majaty je' ajcxy naymujctac. Chi je jäy ajcxy tüg'óciy ooy cömay Jesús.

Jesús yajpaady jim Nazaret

¹⁶ Chi Jesús ymïñ Nazaret ma anajty ti yeegy. Chi Jesús ytigiy ma naymujctac, jadu'n nej costumbre anajty mïdity pocxxïduum. Chi ytinaay'ahuïy, chi ytigïy necycapxpi. ¹⁷ Chi ajcxy mooy je necy huïdibi je Dios y'ayucnajtzcaxïybi Isaías yjaay. Chi cïyhuäcxy je necy, paty jïiby tüg it ma anajty yjaybétyity jadu'n:

¹⁸ Je Huïndzin Dios yjihui'ñ ymic'ajt xymïd'ajtpich, co xyajniñbicyich co nyajnimähuibich ayoobitïc je oybi ayuc. Ti xyquexyich

co nyajjotcugihuibich je jäy ajcxy huidi jotmay ymüd, etz nhuinnéecxibich huidibi ajcxy pujxtigótyip, nañ jadu'n ajcxy je huidibi huiintzip nyajhuindicxigibich, e nbidägibich ahuatztuum huidibi vajtzaachtumb.

19 Ti xyquexyich co ngapxhuäcxibich je tiempo mina Huindzin Dios may'ajt oy'ajt tuna'n müd je jäy ajcxy ycixpi.

20 Chi jada' Jesús abidiyty je ñecy, yajcidiğy je tungmüdpi, huin'it y'ixtacy. Chi tüg'óciy mayjäy jiiiby ma naymujctac ooy ajcxy huindicxy je Jesús. 21 Chi Jesús yminandacy:

—Cham yajcuydun je' huidi jaybety ma Dios ñecy jadu'n nej miich ajcxy cham ti mmidooy.

22 Chi nidüg'óciy ajcxy ooy jäygidacy nej Jesús mina'n, etz huinmay ajcxy ooy je ayuc huidibi Jesús ycapxy, chi ñayñimáayigixy:

—¿Nej ca'y José jada jada' y'ung?

23 Chi Jesús ymīnaañ:

—Ca' yjécyty miich ajcxy xyajnimähuibich jada ayuc: “Tzoydumbi naychoyihuüi c'i'm. Tüg'óciy jadu'n nej ich ajcxy nmidooyich ti mduñ jim Capernaum, nañ jadu'n miich octun ma mgi'mgajp.”

24 Chi Jesús yjacmīnañ:

—Janch ich miich ajcxy nnimäy co ni tüg jäy huidibi Dios y'ayucnajtzcaxiıyb ca' jäy ajcxy cöbicy ma yci'mgajp. 25 Janch ich miich ajcxy nimäy co ooy anajty may co'ögy ytöxyjäy ya Israel jecy'ajty co Elías chinaay, co je tzajp adujcy tugig jimijt jatudujc po', co oy yuu miñ ma tüg'óciy naax cajp. 26 E Dios ca' quejxy je Elías ma y' Israeljäy co'ögy töxyjäy ajcxy. Hue' janch quejxy huinduum jim Sarepta ma Sidón naaxjot ma tüg co'ögy töxyjäy huidi jim. 27 Nañ jadu'n anajty ooy mayjäy püdz pa'm müdity ya Israel jecy'ajty co je Dios y'ayucnajtzcaxiıyb Eliseo chinay. Chi ni tüg jäy huin'it catzoocy, jeyi tügpajc choocy pa'mjäy huidibi anajty yxi Naamán huidi tsoon Siria naaxjot.

28 Huin'it tüg'óciy jäy huidi anajty jiiiby ma naymujctac ooy yjotma'tcoty co jadaaab ayuc ajcxy midooy. 29 Chi je mayjäy ajcxy nibidiğy Jesús etz yajpidzimy ma je cajp. Chi ajcxy yajnicxy jim ma je tzaahuingueetz, co je cajp pocixy anajty yajpaady, e jim anajty cödiğpnaxaangixy. 30 Chi Jesús ñajxy cujc'amy ma je' ajcxy, chi ñicxni.

Tüg yëydijc huidibi anajty müd jibic espíritu

31 Chi Jesús y'idacy jim Capernaum, tüg cajp jim Galilea naaxjot, chi Jesús jäy ajcxy yaj'ixpiıcy pocxhiduum. 32 Huinmay ooy ajcxy jadu'n nej je' yaj'ixpiıcy. Ñayñimáayigixy co je Jesús yaj'ixpiıcy nejihuiy mijtung mij'ané'min müdity.

33 Jiiiby ma je naymujctac jiiiby anajty tüg yëydijc huidibi müd tüg ca'oybi, chi je ca'oybi mic yaaxqueecy ymīnañ:

34 —Ixmajtzcich ajcxy, çti mdunamy müd ich ajcxy Jesús je nazaretpi? ¿Nej ti mmiñ co xyajhuindigoyáanigixyich? Ich miich n'ijxcapy co miich je' je Huätzpi Dios.

35 Chi Jesús je ca'oybi ooy, nimay:

—Amon, pidzim ma y' jäy.

Chi je ca'oybi najtztijıy je yëydijc agujc'amy ma je jäy ajcxy, huin'it ypidzimy, e ca' ni nej jactuuñ. 36 Tüg'óciy jäy jim ooy ajcxy ñay'adzigııy miñ xyıpy yjanayñimáayigixy:

—¿Ti ayuc jada' yi'? Co miid y'ané'min etz mic'ajt ane'my ca'oybi etz yajpidzimy ma jāy.

³⁷ Chi Jesús capxpaady y'ijty ma tūg'óciy cajp huidi huinduy agónip.

Jesús yajtzoocy Pedro ymiid töxyjäybi

³⁸ Chi Jesús ypidiğy choñ ma naymujctac, ytiğiiy ma Simón ytiç. Jadu'n anajty Simón ymiid töxyjäybi mic ytoyii. Chi ajcxy cohuaniiy Jesús miid je' ycixpi. ³⁹ Chi Jesús yhuindacy ma je' yhuinduu, ix'ojoy je toyii, e jadu'ñi ñajxy. Chi je' mic'amy ypidiğy, yajcay yaj'uucy ajcxy.

Jesús yajtzoocy mayba'mjäy

⁴⁰ Tzuu tzuu anajty jāy ajcxy yajnicxy tūg'óciy jāy ajcxy pa'mmiidpi ma Jesús. Chi Jesús cñixajy nidüg nidüg, e jadu'n anajty ajcxy chögy. ⁴¹ Chi nañ jadu'n je' ca'oybi yajpidzimy ma mayjäy, mic je' ca'oybi anajty yhua'ñ yjihuiy, ymiina'ñ:

—Miich je' Dios xy'ung'ajtp.

Chi Jesús niği ix'ojoy, ca' anajty yajhuäcxipy nicxy yjaccapxy, com ti anajty nejhuüygixy co yi' je' je' Cristo.

Jesús y'ayuccapxhuäcxy jim Galilea

⁴² Co yximiiy, chi chooñ Jesús, ñicxy mijiğiduum. Ooy jāy yja'ixtäyii, chi ajcxy oy paatcixy, yajhuäcxijpy ajcxy ooy, ca' anajty oc'ixmadzáangixni. ⁴³ Chi Jesús ymiina'ñ:

—Ooy jada chachcopiçyity co canaag agajp iich jada ngapxhuäcxibich je' oybi ayuc jadu'n nej Dios y'ane'my. Paady Dios ti xyquexyich ya naaxhuiñ.

⁴⁴ Jadu'n anajty je' capxhuäcxy majaty jāy ñaymujctac jim Galilea.

5

Je acxmajtzin mijhuinma'ñybi

¹ Tūgtecy jadu'n yajti, jim anajty Jesús ma je' Genesaret mejypa', co jāy ñimiini janch ñay'adiiyy ñay'agodiyyigixy, tzach'amidohuaangixy Dios y'ayuc. ² Chi yi' ijxpaty mejtz barco jahueengi mejypa'áy. Je acxmajtzpidiç ti anajty ypidzimigixy ma je' barco, jim anajty y'acxxuumy pūccixy. ³ Chi Jesús yajtiğiiy tūg'óciy huidi Simón anajty je'ajtpy. Chi may'ajt piçtzooy co huen yajjihuağy hueeni yi' barco mejypa'áy. Chi Jesús y'ixtacy barcojoty, e jadu'n yaj'ixpiçy je' mayjäy ajcxy. ⁴ Co ycapxymaayi, chi Jesús Simón nimay:

—Nix pidäg m'acxmadzi'ñ mejyjoty, jaydēbi mājtzciçipy acx.

⁵ Chi Simón y'adzooy:

—Huindzin, ti iich ajcxy ooy njatuñ tūg' tzuu, ni ti ti ngapáatcixyich. Per miid miich m'ayuc ycixpi yi' acxmadzi'ñ nbiđäğibich mejyjoty.

⁶ Co ajcxy pidacy je' acxmadzi'ñ mejyjoty, chi yajco'adujcy ooy may acx, jahueeni acxmadzi'ñ ycaciich miid je' may acx ycixpi. ⁷ Chi Pedro yemi ymiğütiç huidi anajty jim ma je' jadügp̄i barco, huen miñ ajcxy pubedyii. Chi ajcxy ymiñ pubejtp, yaj'ujch ajcxy metzpi barco miid may acx, jagoo jagoo ycaquiñ je' barco miid may acx ycixpi. ⁸ Co Simón Pedro ijxy jadu'n, chi ycojxtinaay'ahuüy ma Jesús yhuinduu, nimay:

—Huinhuaçtútcich, Huindzin, com iich pocyjāy iich.

⁹ Com Pedro janch tziğiiyb anajty, etz nañ tziğiiyb tūg'óciy huidi anajty miid ti ytuñ, co anajty ooy may acx tzachyajniñbējtciçy. ¹⁰ Nañ jadu'n

tzigiꞑyb anajty je Jacobo etz Juan je Zebedeo ymang ajcxy huidibi Simón anajty ti pubety. Chi Jesús ñimay Simón:

—Ca' mdzigiꞑy, jadachambi etz jacnicxni xñi tiempo mdunipy jáymadzi.

¹¹ Co je barco yajmejpidzimy, chi ajcxy y'ixmajch tüg'óciy, chi ajcxy panicy Jesús.

Jesús yajtzögy tüg jáy nibützpa'mmiidpi

¹² Chi jadu'n yjajti co anajty Jesús yjimity ma tüg cajp, co ñimiini tüg yéydijc ymüd anajty pützpa'm. Co je pa'mjäy ijxy Jesús, chi nihuindacy ma yhuinduu, minucxtacy, ñimay:

—Huindzin, pen mdzojcpy jëbi xyajtzögibich.

¹³ Chi Jesús yci' najtxajꞑy nïdooñ, ñimay:

—Ndzojcpiych, hui'm huädz.

Chi mic'amy je jáy choocy. ¹⁴ Chi Jesús ane'my, ñimay:

—Ca' ni pin myajnimähuiꞑy, nicx janchtiꞑy nayguëxiꞑib ma teedy, jaydëbi möhuiꞑy Dios huindzigi'ñ, jadu'n nej Moisés ycötújcin je jécyꞑp y'ane'my, müd yí' ycixpi co ti mhuätzpidzimy, jaydëbi jáy ajcxy nejhühuiꞑy co ti mdzögy.

¹⁵ Je capxy'ayuc ñigi y'oc-huäcx'adüztzni, e janch mayjäy y'ocnimújcin, jim pin ayuc midohuaam, e jim huidi tzögaam. ¹⁶ Jesús ycögueecpy anajty je mayjäy, ñicxy anajty mjitigüduum Dios ojadajtpi.

Jesús yajtzögy tüg jáy cixuxypi tecyxuxypi

¹⁷ Tüg teci yjajti, Jesús anajty yaj'ixpiꞑcp, e jim anajty ajcxy iñäy ma Jesús yhuinduu fariseojäy ajcxy, etz huidi jáy yaj'ixpiꞑcp Dios ñecy huidijaty anajty ti choongixy canaag agajp ma Galilea naaxjot Judea naaxjot, etz cham huidijaty anajty ti chooñ Jerusalén. E Jesús ymüd anajty Huindzin Dios ymic'ajt co jáy yajtzögipy. ¹⁸ Chi nijëjty jáy yajja'ty cijx'am tüg pa'mjäy yéydijcpi huidi ca' anajty yci' ytecy yücxxy. Chi ajcxy ixtaay ma yajtijctigihuiꞑy pidäga'ñ anajty ajcxy je pa'mjäy ma Jesús yhuinduu. ¹⁹ Com ca' anajty ni ma tigiyiydac müd co je tijc anajty ooy y'újtzy müd mayjäy. Chi ajcxy müdpejty tijc ñigixy, chi ajcxy tijc yajcöhuach, e chi ajcxy códiyñajxy cijx'am je pa'mjäy ma Jesús yhuinduu.

²⁰ Co Jesús ijxy jadu'n nej je' ajcxy ymibicy, chi ñimay:

—Yéydijc, yajmeecp mbocy.

²¹ Chi je' ajcxy huidi yaj'ixpiꞑcpi Dios ñecy etz je judío ixpicytijc huidi naydíjigixp fariseojäy huinmaygoty, ñayñimáayigixy: “Jada Jesús ooy ycapxtigoy müd Dios. Ni pin yéydijc huaad ca' ti pocymeecxy. TügpaꞑcnHuindzin'ájtım Dios huidi pocyhuinmeecp.”

²² Jesús ñejhuiꞑy je' ajcxy yjot yhuinma'ñ, paady ajcxy ñimay:

—¿Ti mdzachhuinmaayb ajcxy ma mjot mhuinma'ñ? ²³ ¿Ti jactzip co minaanım co ti mbocy yajmeecxy o minaanım: “Pidig etz nicxni?” ²⁴ Jaydëbi müich ajcxy mnejhühuiꞑy co iich je' je jáy huidi tzoon tzajpjoty, nmüidich ané'min etz mic'ajt ya naaxhuiñ jëbi jáy nbocyhuinmeecxyich, paady cham nnimäyich yí pa'mjäy: “Pidig etz yajpidig mmaabejt, nicx ma mdijc.”

²⁵ Chi mic'amy je pa'mjäy ytinayigyy ma je jáy ajcxy yhuinduu, etz yajpidigy je' ymaabejt ma anajty ycögnäy. Chi ñicxni ma ytijc, chi ooy cömay jáymejch Dios. ²⁶ Huin'it nidüg'óciy je mayjäy ooy ajcxy jihuiꞑy, e chi ajcxy ooy cömay etz jáymejch Dios. Chi ajcxy ooy chigiꞑyigixy, ymınaangixy:

—Cham janchtiy n'íjxim mijhuinma'ñ.

Jesús huodzoñ je Leví

²⁷ Co jadu'n ytuni yjajti, chi Jesús jim choñ, chi ijxy tüg yajcogüejtpi huidi anajty yxii Leví. Leví jim anajty iñäy ma yajgogüejttac. Chi Jesús nimay je Leví:

—Pajaamgich.

²⁸ Chi je Leví ixmajtztay huidi anajty ytuumyb etz padzoñ je Jesús.

²⁹ Chi Leví mayjäy yajcay yaj'uucy ma ytijc, cham may yajcogüejtpi ajcxy etz jacjadyii jäy huidi iñaayb ma yi mesa müd Jesús etz yi' ydiscípulos ajcxy. ³⁰ Chi je' ajcxy huidibi yaj'ixpijcp Dios ñecy etz je ixpicytije huidi naydíjigixp fariseojäy tzachni'ameechycápxcixy ni'ojiiygixy je Jesús ydiscípulos ajcxy, ymínaangixy:

—¿Na'amy co mгааyгixy m'uuccixy müd yajcogüejtpi etz müd pocyjäy ajcxy?

³¹ Chi Jesús ymínañ:

—Ca' yajmayjaty tzoydumbi huidibi ca' ajcxy ypiyüi, jëyi huidi ajcxy pijcip. ³² Ca' iich ti nmiñich ma je jäy ajcxy huidibi ca' pocy müdity. Ich ti nmiñich müd yi pocyjäy ycixpi co huen jothuimbijttaaygixy ma Dios.

Yaj'amidooy ajcxy Jesús ti co jäy ajcxy y'ayunas'ájtixy

³³ Chi je mayjäy ajcxy Jesús nimay:

—Nej co yi' (Juan) ydiscípulos ajcxy janam jadzojc jaygay y'íjtixy etz ycapxtáccixy, nañ jadu'n je fariseojäy ydiscípulos ajcxy janam jadzojc jaygay y'íjtixy. Chi müich mdiscípulos ajcxy ca' ajcxy jaygay y'íjtixy, caaby uucp ajcxy jabom jabom.

³⁴ Chi Jesús ymínañ:

—¿Nej jëbi yaj'ayuu'aty jäy ajcxy huidi yajpatpi ma je pijcpi yajnixiduñ, pen quipxyi yam yajpaady müd je huidibi pijcp? ³⁵ Mínamb je xii je tiempo mína je pijcpi yajtzonüyb, huin'it janchtiy ajcxy jëbi y'ayuu'ájtixy.

³⁶ Nañ jadu'n ajcxy yajnimay tüg jihuimbit ayuc:

—Ni pin ca' huaad agiyiyi tüc-huit müd jemyhuit, canaan jëyi yciidzip yi jemybi, nañ jadu'n je tucpi ca' oy yhui'ma'ñ müd je jemyhuit agiyi'ñ.

³⁷ Ni pin ca' pidägy jemy vino ma je tucpi cochac, pen janch jadu'n octuñ, je vino jemybi yciidzip je tucpi cochac, chi y'ixyojctähüipy je vino etz je cochac ñitigoydähüipy. ³⁸ Pidägipy ajcxy jemy vino ma tüg jemybi cochac, chi jadu'n ca' ytigoyipy je vino ni je cochac. ³⁹ Ca' ni pin tzocy vino jemybi, pen ti anajty ügy vino tübi yjejni, co jadu'n ymínañ co jac oy je tübi yjejni.

6

Je discípulos ajcxy yajmújccixy trigo cojc pocxxiiduum

¹ Chi jadu'n yjajti tüg pocxxiiduum co Jesús oy ñaxy ma tüg trigo cam, e yi' ydiscípulos ajcxy oy anajty yajmínájccixy trigo tüm, chi ajcxy nixajztüdy, e chi ajcxy jicxy. ² Chi nidügti fariseojäy ymínañ:

—¿Ti co ajcxy jadu'n mdundiгооy co mdúngixy huidi ca' ñigodúcyity ajcxy mdunipy pocxin xiiduum?

³ Chi Jesús ymínañ:

—¿Nej ca'ni müich ajcxy mgapxy Dios ñecy nijadu'ñyi? ¿Nej ca' mne-jhuüygixy ti David ytuun co anajty yuubögyii etz nañ co ymigügtijc anajty

yuubögyii? ⁴ David ytigiiy ma Dios ytiyc, chi conigy je tzajcaagy huidibi anajty jii by ma Dios yhuinduu, chi caay, nañ jadu'n moy je ymügügtijc ajcxy. Je' tzajcaagy ca' anajty ypadyii nicxy je' ajcxy cay. Teedy je' anajty ajcxy paatip cáaygixip.

⁵ Chi Jesús yjacminañ:

—Iich je' je jäy huidibi tsoon tzajpjoty, jëbi nnimäyich je jäy ajcxy ti jëbi huaad yúngixy sábado xii.

Je yëydijc huidibi anajty yci' tãdzip

⁶ Chi jadügtecy yjajti tüg pocxxiiduum, co Jesús ytigiiy ma tüg naymujctac, chi jäy yaj'ixpijcy. Jii by anajty tüg yëydijc huidi y'a'oygi' anajty tãdzip. ⁷ Chi huidi ajcxy yaj'ixpijcp Dios ñecy etz fariseojäy ajcxy ix'ixxy pa'ijxcixy Jesús nej pen jäy yajtzögam pocxxiiduum, e je' ajcxy anajty miid ycixpi xihua'ñ. ⁸ Jesús ñejhuuyb je' anajty ajcxy yjot yhuinma'ñ. Chi Jesús nimay je yëydijc huidibi anajty yci' tãdzip:

—Pidig, tinayig mayjäy'agujc.

Chi je' ytinaayigy. ⁹ Chi Jesús yminañ:

—Nyaj'amidohuaamybich miich ajcxy tüg ayuc. ¿Nej Dios ñecy ymina'ñ, jëbi oybi nduunim pocxxiiduum o jëbi jibicpi nduunim, nyajtzocim jäy o nyajtigooyim jäy yjugy'ajt?

¹⁰ Chi Jesús ajcxy huindixpejtay nidüg'óciy, chi nimay je pa'mjäy:

—Xajtiu mgi'.

Chi je' yci' xajtiy, huin'it je' yci' choocy. ¹¹ Chi je' ajcxy huidi yaj'ixpijcp Dios ñecy etz je ixpijctijc huidi ajcxy mijpidacp judío ycostumbre ooy ajcxy yjot'ambijcy, ñayñimáayigixy miñ xyipy:

—¿Nej ajt n'octuunim jada Jesús?

Jesús huin'ixy je majmetzpi discípulos ajcxy

¹² Jadu'n yjajti huin'it xii Jesús ñicxy mijtigãdium Dios ojadajtpi. Tüg tzuum ooy Dios miibijctzooy. ¹³ Co yximiiy, chi Jesús huoomiñ y' ydiscípulos ajcxy. Chi huin'ixy je majmetzpi, etz yximoy ajcxy, apóstoles. ¹⁴⁻¹⁶ Chi Jesús yhuin'ixy je Simón huidi yximoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huidi jäy ytijpy Zelote; Judas, Jacobo y'uch; etz Judas Iscariote huidibi nañ jadu'n Jesús cïyejc ma ymidzip.

Jesús yaj'ixpijcy mayjäy

¹⁷ Chi Jesús miid'idacy je discípulos ajcxy, chi oy yhuäcxipy ma tüg ajoy miid ydiscípulos ajcxy etz mayjäy huidi anajty ti choongixy Judea naaxjot, etz Jerusalén, etz ma mejypa' jim Tiro etz Sidón. Ymiñ ajcxy je mayjäy co amidoo'idáani Jesús y'ayuc etz nañ chögaangixy je pa'm huidi ajcxy ymiid. ¹⁸ Cham je huidi anajty ayo'n tzachpaatp miid ca'oybi, nañ tzoocp je' anajty ajcxy. ¹⁹ Chi tüg'óciy je jäy ajcxy janch ñidonamy anajty ajcxy je Jesús, co ymiid mic'ajt co jäy tüg'óciy yajtzög.

Je jotcuyc'ajt etz je cajotcuyc'ajt

²⁰ Chi Jesús huindixpejtay je mayjäy huidi ajcxy ixpigaam y' y'ayuc, e yminañ:

—Jotcuyc miich ajcxy ayoobtijc, com miich ajcxy cham xypaat Dios y'ané'min.

21 Jotcujc miich ajcxy huidi cham yuubó'cip, co mgüx#b miich ajcxy. Jotcujc miich ajcxy huidi cham jotmay müid, co y'páadip xii tiempo mina mxondáaccixipy.

22 Jotcujc miich ajcxy mina anajty jäy ca' xy'ixáangixy, co pin xy'ixáangixy, e co jäy ajcxy jibic xyñigapxa'ñ xyñixiga'ñ müid ich ycixpi, je jäy huidi tsoon tzajpjoty. 23 Mxondäg miich ajcxy huin'it xii, etz mjotcugüygixip, com ooy chachmüjity huidi ajcxy mbadaamy tzajpjoty. Com jadu'n anajty jecy'ajty miich mmij'ap mmijteedy ca' ixangixy je huidi anajty Dios y'ayucnajtzcaxiipy.

24 Miich ayoob ajcxy comeñyjäy, com ca' ti jotcujc'ajtín mjacpadaangixy huin'it xii (co Dios tiydunip je naaxhuñyjäy).

25 Miich ayoob ajcxy huidi cham oc'agujc'ajtp ocjotcujc'ajtp, ayo'n jotmay ajcxy mbaadip, e myajmayjadipy miich ajcxy tijaty.

26 Miich ayoob ajcxy co ajcxy myajnigapxiipy myajnimiydägipy, com jadu'n jecy'ajty miich ajcxy mmij'ap mmijteedy nimay je jäy ajcxy co ooy y'oyjäy huidi ajcxy anajty najtzcaxiipy ayuc huidibi ca' ytiy yjanchity.

Nej huaad nmigüg ndzójim

27 Chi Jesús yjacminañ:

—Miich ajcxy huidi cham amido'ijtp ich n'ayuc, ich miich ajcxy nimaayb: Tzójccix mmidzip, mi'oyjäy'ajtcix huidijaty ca' xy'ixangixy. 28 Migapx je jäy ajcxy müid ojyot oyhuinma'ñ huidi ajcxy jibic xyñigapxp xyñi'ojiiyb. Mibijctzoogixy yi Dios müid je' ajcxy ycixpi huidibi xyñigapxp xyñi'ojiiyb. 29 Pen ji pin xycojxy ma yi mhuiñijp, mo' jadüg adu'm'amy ahuiñ hueñ coxy. Pen ji pin xypigaani yi mjocxhuit, jactimmo' mnijen huen yajnicx. 30 Pin xypijctzohuip tijaty, mo'. Pin xypijcip huidi miich mjé'ajtpy, ca' mbijctzohuipy jadüg'oc. 31 Nej mdzocy tunipy jäy müid miich ajcxy, nañ jadu'n miich ajcxy mdunipy müid yi' ajcxy.

32 Pen miich ajcxy jäyi mdzojccixpy pinjaty xychojccixp, ¿ti oyjäy'ajtín jada' miich ajcxy m'ocpaadipy? Nañ jadu'n je pocyjäy ajcxy chojcpy pinjaty yi' ajcxy tzójcip. 33 Pen mdumyib oybi huidijaty müid ooy mnaymigüg'adyii. ¿Ti oyjäy'ajtín jada' miich ajcxy m'ocpáadip? Nañ jadu'n je pocyjäy ajcxy tuñ oybi müid ymigügtijc. 34 Pen myejcpijctzou müid je jäy huidibi miich ajcxy mijp'ijxpy co nañ jadu'n xymöhuipy tigatii, ¿ti oyjäy'ajtín miich ajcxy mdumyib? Nañ jadu'n yi jibic jäydijc jayejcpí tijaty pijctzoy co nañ jadu'n jijp'ijxcixy co ymöhuiipy tigatii. 35 Miich ajcxy, tzójccix mmidzip, mi'oyjäy'ajtcix mmidzip, yajpíjctzoogix tijaty, e ca' ni ti mijp'ijxcixipy co ajcxy jac mij mbaadip. Jadu'n miich ajcxy mij mbaadip oy'ajtín e mnaydijiiyb ajcxy je mijpí Dios y'ung. Com Dios pa'ayoodaayb tüg'ócíy yi jäy ajcxy huidibi ca' ti jäygidägy, etz huidi jibicjäy. 36 Miich ajcxy pa'ayoo migügtijc ajcxy, jadu'n nej mDios Teedy tzajpjotyipi ypa'ayoooy huenyimpinity.

Ca' mmigüg ni ti myaj'ix'ixipy myajpa'ixipy

37 Ca' mmigüg ni ti myaj'ix'ixipy myajpa'ixipy, huin'it ca' pin xy'ix'ixipy xypa'ixipy. Ca' mmigüg mboc'y'ixipy, e huin'it ca' pin xypoc'y'ixipy. Huinmecx mmigüg, e huin'it nañ jadu'n Dios myajhuinmecxip. 38 Mo' mmigüg etz huin'it miich ajcxy Dios xymöhuiipy quipxy ooy tijtäch etz janch yajxon y'újtzity cödinaayb. Com yi quipxi'ñ tiibi myajquipxiy, nañ yi' müid xyquipxhuimbidity.

39 Chi Jesús yajnimay je mayjäy tüg jihuimbit ayuc:

—¿Nej jëbi tüg jäy huintzpi ymigüg huintzpi huijtzyöyñi? ¿Nej ca' mdijy nimetz yjutcögäixipy? 40 Ca' ji ni tüg ixpijcpí huidi nīgi ixpícyip ca'ydi yhuindzin, pen ji pin huädz yjadim'ixpicy najtzpadihuipy yhuindzin.

41 ¿Na'amy co mic'amy mbocy'ixy mmigüg co hueeni ytundigoy, e miich jac mij ooy mdundigoy, e ca' mjihu'iñybicy? Tim jadu'n nipaady nej jihuüy ti m'ixy pi'cpüx ma mmigüg yhuuin, e ma miich mgi'mhuuin jac jiiby mij quipy, e ca' m'ixy je quipy ma mgi'mhuuin. 42 Ca' huaad mmimähuiipy mmigüg: “Nayyegii miñich püx n'ocyajpidzim maabi mhuuin”, e miich ca' m'ixy mij quipy ma mgi'mhuuin. Jibicjäy miich. Jayijp miich myajhuädzip mjot mhuinmañ, huin'it jëbi mmigüg m'ihuüjip mgapx-huüjip, jadu'n nipaady nej jihuüy ti myajpidzimy je quipy maabi mhuuin, jachuädz m'ljxigipy e chi jëbi yi pi'cpüx myajpidzimipy maabi mmigüg yhuuin.

Je quipy je ytim, yi' müd ycixpi yaj'ijxcapy

43 Ca' yi' y'oyjäyity huidi jibic tuumb, nañ jadu'n ca' jibicjäy huidi oy tuum, tim jadu'n nipaady nej tüg quipy. Ca' ji yi' oyguipy huidi jibic tim'ajt, nañ jadu'n ni ca' yjibicquipyity huidi oy tim'ajtp. 44 Com ni je' quipy yaj'ijxcajp müd ytim ycixpi. Ca' pin higeri tim tucy ma quipy apymüdpi. Nañ ni pin ca' uvas cha'm piiy ma aadz apymüdpi. 45 Je jäy oyjäybi ma yjot yhuinmañ yajpidzimy oybi. Je jibicjäybi ma yjot yhuinmañ yajpidzimy jibicpi. Huidibi yhuinmaayb jotjoty huinmañyoty yi' ycapxyp.

Je mejtnajxpi poch y'ijx

46 Chi Jesús yjacmínañ:

—¿Nej co nigo minangixy: “Huindzin, Huindzin”, ni ca' ajcxy mdúngixy huidi nyajnimaaaygixy? 47 Tüg'óciy jäy huidi xyñimimbich etz xymidoohui ñich n'ayuc etz cuyduñ, ñich nyajni'ixihuipy pin je' ymidügnax. 48 Quipxyñyb tüg yëydjic huidibi ytijccoyp ma tzaa nícxy, chi nidajy ooy cücy, chi pidägy poch'ijx tzaa nigixy, co mijñi ycomy nimiñ je tijc, müd tüg'óciy ymijaa jayajpidígañ je tijc, e ni ca' jadu'ñyi yajyücx, com tzaagixy anajty ypojtztoofity. 49 Yi jäy huidi midoob ñich n'ayuc e ca' cuyduñ, müdquipxñy jadu'n yi' nej tüg yëydjic co ti ytijccoyp. Ni ca' poch cücy ypojtztoofity, jëyi naaxhuingixy nidajy hueeni. Co je mijñi ymiñ müd ymijaa, chi yajpidígy je tijc, chi oy yhuindigoydäy.

7

Jesús yajtzögy tüg mijtungmüdpi Romano ytumbi

1 Co Jesús ycapxtaay ymydactaay müd je mayjäy huidi anajty jim amido'ijtp, chi ytigüy jim Capernaum. 2 Jim anajty tüg Capitán tüg ytumbi hue' anajty píjcp, janch tim ögaanip anajty, e je soldado huindzin ooy anajty tzocy je ytumbi. 3 Co je capitán ayuc midooy jadu'n nej Jesús ytuñ, chi quejxy judío mijjäydjic, huen nícxy minuucxtaaccixy Jesús co je' yminipy ma ytijc yajtzögñyb je' ytumbi. 4-5 Chi je mijjäydjic ajcxy ymiñ ma Jesús, chi ajcxy cohuanñy ooy, píjctzou may'ajt, nimay:

—Jadayaabi capitán ymihuaad co mbubedipy, com yajmij'ajtpy ñich ajcxy ngajp, ti cojy ñich ajt naymujctac.

⁶ Chi Jesús ñicxy m̄id je' ajcxy. Co ajcxy m̄ihuingooñ je tijc, chi je capitán quejxy ym̄igüg huen ñicxy j̄jpcobad̄y Jesús, ñim̄ahuipy:

—Huindz̄in, ca' nej mnayjihuiȳii, ca' ñch m̄ihuaad̄ity co md̄iḡihuipy ma ñch nd̄ijc. ⁷ E paady ca' ñch njot ti m̄ictuñ co ñch miich c̄'m ñicx n'ixt̄äy. J̄eda'ajty miich ñigoo capx, e ti anajty ndumbich ch̄ögy. ⁸ Nañ jadu'n ñch nm̄idich soldados ajcxy hūidi ajcxy xycapxc̄öb̄jcpich. Ñim̄äyich t̄üg: “Ñicx”, e ñicxp; ñim̄äyich jad̄üg: “Min”, e mimb; ñim̄äyich ndumbi: “Tun jada”, e ytumyb.

⁹ Co Jesús midoy nej je capitán ym̄inañ, chi jihuiy ooy, chi ni'ijxhuimb̄ijty ñimay ajcxy hūidi pamiin̄ip:

—Ñch miich ȳim ñimaayḡixyp co ca' nbaadyich Israel jäy hūidibi xym̄ib̄jcpich jadu'n nej jadayaab agatz jäy.

¹⁰ Co ajcxy je quexyöybi yhuimb̄jtc̄ixni ma je tijc, chi oy páatc̄ixni je tumbi ti anajty y'agid̄ägy.

Jesús yajjugyp̄ijcy t̄üg co'ögyt̄öxyjäy y'ung t̄übi anajty y'ögy

¹¹ Chi jadu'n yjajty huin'it xī co Jesús anajty ñicxy ma t̄üg cajp hūidi anajty yxī Nañ. M̄id anajty ñicxy jadyii ydisc̄ipulos ajcxy etz mayjäy.

¹² Co yhuingooñ ma anajty ycajp tiḡihuaani, chi minaybaati jäy ajcxy, ñicxy anajty ajcxy t̄üg öcpi yajnaaxtiḡiyyḡixy, hūidi anajty ungdaj t̄ügpaic y'ung'ajtpy. Hue' je' anajty co'ögy je t̄öxyjäy, e m̄id anajty ñicxy maycaj̄p̄jäy. ¹³ Co je Huindz̄in Jesús ijxy, chi pa'ayogoty je t̄öxyjäy, chi ñimay:

—Ca' myäxy.

¹⁴ Chi Jesús ym̄ijhua'cy, n̄idoñ je öcpi cajón. Chi ajcxy ytinayx̄iipy je hūidi anajty ajcxy öcpi c̄iyñicxp. Chi Jesús ym̄inañ:

—Ȳeyd̄ijc, ñch miich yam ñimaayb, pid̄iḡ.

¹⁵ Chi je ȳeyd̄ijc ññaȳigy hūidi anajty ti y'ögy, e ytiḡiyy m̄iydaacp. Chi Jesús yajc̄id̄iḡiyyñi je' ytaj. ¹⁶ Chi ajcxy nidüg'óciy ooy ñay'adz̄iḡiygoti, e Dios jäymejch c̄ömay, ym̄inaanḡixy:

—T̄üg m̄ijpi Dios tiy'ajtm̄it̄pi cham yajpatp ma ñch ajt.

Nañ jadu'n ajcxy ym̄inaanḡixy:

—Ti Dios ni'ijxcid̄ägy yi yñaa xcajp.

¹⁷ Ooy Jesús yajc̄ömay ma t̄üg'óciy Judea naaxjot, etz ma t̄üg'óciy jac huinduy agonbi naax cajp.

Je Juan je Bautista yquexyöybi

¹⁸⁻¹⁹ Chi je jäy ajcxy hūidi anajty Juan je Bautista yaj'ixp̄ijc̄py ñim̄ydactay jadu'n nej m̄id ytun̄i yjajti Jesús. Chi Juan huooy metz yi' ydisc̄ipulos ajcxy, e quejxy ma Jesús yajpaady. Chi Juan ñimay co huen ñicxy am̄idooḡixy Jesús, pen yi' je' je Cristo hūidi anajty miinaam, o pen n'ahūjx̄py ajcxy huingbi. ²⁰ Chi je Juan yquejxyöybi miñ ma Jesús ñimay:

—Yi Juan je Bautista ñch ajcxy ti xyqūéyich ma miich am̄idohua'ñ pen miich je' je Cristo hūidi minaamb, o ¿n'ahūjx̄p̄ich ajcxy huingbi?

²¹ Tim huin'it̄iy Jesús ooy mayba'm̄jäy yajtzoocy. Yajtzoocy nañ jadu'n hūidi anajty ajcxy ooy mij yuu mij pa'm yaj'ayoyii, etz nañ yajtzoocy p̄injaty anajty ca'oybi m̄id ma yjot yhuinma'ñ. ²² Chi Jesús je Juan yquejxyöybi ñimaaybi:

—Ñicx ñimaayḡix je Juan jadu'n nej ti m'ijxcixy ti mm̄idooḡixy, co yi huint̄pi ti yhuindic̄iḡy, yi tecyma't̄pi ti yöyiḡy, yi ñib̄ützpa'm̄mid̄pi ti ch̄ögy, je c̄önat̄pi ti ymidohūicc̄ixy, je öcpi ajcxy ti yjugyp̄ijcy, e

ngapxhuäcxyich oybi ayuc ma ayoobtijc. ²³ Jotcuyc yi' ajcxy huidi ca' huinma'ñyitigooygixy müid ñich ycixpi.

²⁴ Co je Juan yquexyyöybi yhuimbijttay, chi Jesús nimiydaccoty je Juan ma je mayjäy ajcxy, yminañ:

—Co ajcxy ti m'oy mǎjtigǎduum, ¿ti ti m'ǎjxcixy? ¿Nej ti m'ǎjxcixy tüg jäy ametz jotmetz, jadu'n nejhüüy tüg nähuaax huidi pojmiimb pojxijp? ²⁵ Chi jada', ¿ti oy ti m'ǎjxcixy? ¿Tüg yëydijc huidi müid oy yhuif yxöxyity? Yi jäy ajcxy oy yxoixyp; huidi agujc jotcuyc tzinaaygixp hue' ajcxy yajpaady ma yi rey ytijc. ²⁶ ¿Ti ajcxy ti m'ixy jim mǎjtigǎduum? ¿Tüg jäy huidi Dios ytiy'ajt müid? Janch ti m'ǎjxcixy tüg Dios ytiy'ajtmüidpi, etz jacnigi ymǎjity je' ca'ydi Dios y'ayucnajtzcaxixybi huidi jecy'ajty tzinay. ²⁷ Je' jada je jäy huidi Dios ñigapxyp ma ñecy ma Dios jadu'n yminañ:

Cham nguejxyich ñich nguexyöybi jayijp ma müich, je' yaj'oyihuip je jäy ajcxy yjot yhuinma'ñ müid ñich ycixp, tim jadu'n nipaady nej jihuüy jäy tü'aa yaj'oyiy co rey ymina'ñ yjada'ñ.

²⁸ Hich müich ajcxy yam nimaayb co huidijaty ajcxy töxyjäydijc yajpi'c'ajtpy, ca' ji ni tüg Dios y'ayucnajtzcaxixybi huidibi jacnigi ymǎjity ca'ydi Juan, je Bautista. Chi jada' je jac mutzpi huidi jüiby tzajpjoty yajpaatp ma Dios y'ane'my, jacmij je' ca'ydi Juan.

²⁹ Co ajcxy je mayjäy jadu'n midoy nañ jadu'n je yajcogüejtpidijc ajcxy huidi anajty niibéjtcixy ma Juan, chi ajcxy minañ co Dios ytudägvyty. ³⁰ E je fariseos ajcxy etz je escribas ajcxy huidi anajty ca' niibéjtcixy ma Juan, ca' ajcxy mǎjpidacy huidi anajty Dios ytunamy müid je' ajcxy ycixpi. ³¹ Chi je Huindzin Jesús yminañ:

—¿Ti müid nyajquipxihuibich jadayaabi jäy huidi tzinayb ma jadachambi tiempo? ¿Huidi müid nyajtügihuibich? ³² Jadu'n nej pi'ctijc huidi ajcxy iyüyb ma jäy yjuygixy ytooccixy. Mihuan mijjihüiygixy ymǎgügtijc: “Ti njayaxüxich flauta e ni ca' ti m'éjtcixy; ti nja'ñhui ajcxy ñy jotmaymüidpi, e ca' ti myaaxcixy.” ³³ Chi Juan je Bautista ymiñ, e je' ca' anajty cay, ni ca' vino ügy, chi müich ajcxy minaangixy co Juan ymüid ca'oybi. ³⁴ Chi ñich, je jäy huidi tzoön tzajpjoty, nmiñich, chi caaybich uucpich, e müich ajcxy minaangixy: “Ijxcix, cha tüg yëydijc janch cax janch vino uucp, huidi migüg'ajtpy yajcuéjtpidijc etz pocyjäydijc.” ³⁵ Je tiy'ajt ji je' ñigüéxigy ma je pinjaty nigapxp nimiydaacp tiy'ajt.

Jesús ma Simón je fariseojäy ytijc

³⁶ Chi tüg fariseojäy may'ajt pijctzoy, co Jesús anajty müid ycaya'ñ. Chi Jesús ytiüy ma je fariseojäy ytijc, chi ñay'ahuüy ma mesa. ³⁷ Chi jim anajty tüg töxyjäy huidibi anajty jibic tzinaayb jibic jugy'ajtp ma je jimbi cajp. Co je' nejhüüy jüiby Jesús ma fariseojäy ytijc ññäy ma mesa, chi mǎmiñ tüg quiig aceite huidibi ooy oy xuugy, chi midigüy tigoty. ³⁸ Chi ypiguetz'ahuüy ma Jesús ytecy ymijc, e chi yajxooci Jesús ytecy müid huinnñ e yajpöt müid ycöhuay, chi yajjaaxy je aceite huidi ooy oy xuugy. ³⁹ Co jadu'n ijxy je fariseojäy, je' huidibi anajty ti huoy Jesús, chi jot'ajti yminañ:

—Co ixypy jada Jesús y'ocjéjity Dios ytiy'ajtmüidpi, y'ijxcajpy ixypy pin jäy nejpy jäy yi töxyjäy huidibi nidoonip co yi' yjibictzinäy yjibicjugy'aty.

⁴⁰ Chi Jesús yminañ:

—Simón, cham ñich tüg ayuc nmüididyich huidi nyajnimähuamy.

Chi je' y'adzooy:

—Yajnimaaaygich, Huindzin.

41 Chi Jesús ymíñañ:

—Tüg comeefñjáy ymíid anajty metz jáy huídi ti ñuucxy. Tüg jáy anuucxy migoox migo'px denario meefñ, e je jadügpí anuucxy huixchigui'px majc. 42 Com je' ajcxy ca' anajty míidity ti míid cuedip, chi je comeefñjáy huinmecxy nimetz. Míich ocnímaaygich, ¿je metzpi jáy huídi nuucxy, huídibi je' ñigi chojpy?

43 Chi Simón y'adzooy:

—Hue' n'a'ixñiyich je tñibi huinmecxy jac'anaxy.

Chi Jesús ymíñañ:

—Ti mdiygapxy.

44 Chi Jesús ni'ixxhuimbijty je töxyjäy, e nimay Simón:

—¿Nej m'ixxyp jadayaabi töxyjäyi? Co ndigñiyich ma mdiyc, ca' míich ñí xymooyich co ndecy nbújibich. Jadayaabi töxyjäy ñich ndecy ti xypújip míid yhuinní, e ti xyméexyich ndecy míid ycóhuay. 45 Ca' ñich míich ti xychücxý. Jada töxyjäy jadu'n nej ti ytíjc tígíy, xychücxñiyb ñich ndecy. 46 ñich míich ca' aceite mbidägy ma ñich ngohuajc. Jada töxyjäy ti xyajjaaxi ndecyich aceite huídi ooy oy xuugy. 47 Paady ñich míich nyajnimäy co jada töxyjäy huinmecxi yi' ymaybocy, co tñibi oyhuinmañ yajtuñ cixyot huinijot. Pinjaty hueeni ypocy yajhuinmecxi, hueeni yi' chójcín yajñiquëxígy.

48 Chi Jesús je töxyjäy nimay:

—Ti míich mbocy yajhuinmecxtäy.

49 Pinjaty anajty íñaayb ma je mesa ñayñimáayigixy miñ xyípy:

—¿Pin jáy jada jada' co ñañ yhuinmeecxípy jáy ypocy?

50 Chi Jesús nimay je töxyjäy:

—Ti m'alma ñídzögy co ti xymíbicýich. Nicx jotcujc.

8

Töxyjäydíjc huídibi anajty Jesús pubejty

1 Co jadu'n yjajti, chi Jesús ñicxy ma tüg'ócíy je mij cajp etz mutz cajp, capxhuäcxy je oybi ayuc maabi Dios y'ané'mín. Je nimajmetzpi ydiscípulos ajcxy míid ñicxy. 2-3 Etz ñañ ymíidñicx nijéjity töxyjäydíjc huídi anajty Jesús ti yajtzögy huídi ca'oybi anajty ymíid etz jac tijaty pa'm. Hue' je' ajcxy anajty je María je töxyjäy huídi anajty xñijip Magdalena, je huídibi Jesús yajpidzimi huixtucj ca'oybi ma je'; etz Juana, je huídibi ññay anajty xñijip Chuza, e je Chuza hue' je' je rey Herodes ytungmíidpi; etz Susana, etz jacjadyii ajcxy huídi anajty ajcxy pubejt Jesús míid tijaty anajty ajcxy ymíid.

Je niipi y'ixpejt

4 Co mayjäy ooy ñayyöymujc ma Jesús yhuinduu huídi tsoon ma tüg tüg cajp, chi Jesús nimay je mayjäy ajcxy:

5 —Cha tüg ayuc nyajnimähuaangixy. Jadu'n jáy tüg choñ niipi, ñicxy trigo tím huíjpi. Co je trigo tím huíjy, chi nijéjity ypajc oy ycäy mñjtügujc, chi je jáy ajcxy yajhuägpejty, e huídi ca' yajhuägpejty, chi joon piíhuígy. 6 Chi nijéjity trigo pajc oycäy ma tzaa ñicx. Co ymujxy chi je' ytíich, je' co anajty naax ca' yxoogity. 7 Chi nijéjity trigo pajc oycäy ma apyjot, chi ymujxy quipxy míid apy'ung, chi y'ujtz'o'ctay. 8 Chi nijéjity trigo pajc

oycäy ma je naax oybi huinnätzujc, chi ymujxy, chi yeectzooñ, ytiim'ajty oyjaty, tüg trigo pajc miço'px oyco'ity.

Co Jesús je miydägi yajmay chi yjactimcapxcoty, yminañ:

—Pin midohuamb jada ayuc, huen midooy.

Nej yhuimbidezimy je niipi y'ixpejt

⁹ Chi je discípulos ajcxy y'amidooy:

—¿Nej jada jadu'mbi jihuimbit ayuc yhuimbidezimy?

¹⁰ Chi Jesús yminañ:

—Miich ajcxy jaydēbi mnejhuñhuipy huidi Dios ñigapxy ñimiydacpy coyüch'amy ma y'ané'min ycötújcín. Jacjadyiibi jāy jihuimbit'amy nyajnimayich, jaydēbi pinjaty huidi ixp ca' ajcxy y'ixipy, etz pinjaty midoob, ca' ajcxy mido'mbigipy.

Jesús capxticxy je niipi y'ixpejt

¹¹ Jadu'n je jihuimbit ayuc yhuimbidezimy: Je trigo pajc Dios je' y'ayuc.

¹² Je trigo pajc tibi tūguc ycäy, je' je' jadu'n nej jāy huidi midoob Dios y'ayuc, chi mic'amy ñiminyii je ca'oybi, e piibidezimdäy je Dios y'ayuc ma yjot yhuinma'ñ, ca'ydi mibic etz ca'ydi y'alma yajnidzögyii. ¹³ Je trigopajc huidi cāhui ma tzaajot, je' yi' ajcxy huidi je ayuc midoob, chi cōbicy jotcujc, chi je' ca' ytictztigiy, tzojccixy y'ocmibicy, co agapxiyb paaty chi ixmajtzní. ¹⁴ Je trigo pajc huidi ti cāhui apy'agujc, je' je' ajcxy huidibi midoob, chi co ñicxni jāydigooyñi Dios y'ayuc miid jotcujc'ajtín tzinaayin etz jugy'ajtín etz comeen'ajtín, e chi ca' Dios y'ayuc yhuim'y ma yjot yhuinma'ñ. ¹⁵ Je trigo pajc huidi cāhui ma oyñaax huinnätzujc, je' ajcxy huidi oy etz tudägy yjot yhuinma'ñ mūdity. Chi je Dios y'ayuc midohui'my, e oñdägy'amy Dios y'ayuc ymayiy ma yjot yhuinma'ñ.

Je lámpara ñi'ixpejt

¹⁶ Co jāy ajcxy jündicxi'ñ nöctzoy, chi ca' ajcxy cōjupy miid tu'tz, nañ ca' huaad pidägy cijx pātci'py, hue' janchtiy pidaaccixy ma jündicxpejt, co pin ytiigiy jēbi icy je jin. ¹⁷ Ca' ni pin ayüch tunipy e nicxy ycayajnejhuíy, ca' ni pin ti tunipy ameech e nicxy ycaniquēxigy. ¹⁸ Paady miich ajcxy midoogix yajxon co pin tijaty miid, jacyajmōhuip yí'. Pin ti camiid, yajpigipy je' huidi anajty yjamid.

Jesús ytaj etz je jugymigüg

¹⁹ Chi Jesús ytaj etz y'uch ajcxy ñimiini, ca' ajcxy nimejch Jesús yajxon miid mayjāy ycixpi. ²⁰ Chi Jesús yñimaayi:

—Cheeby mdaj etz m'uch ajcxy tiba'y, miich ajcxy xyjamigapxam.

²¹ Chi Jesús yminañ:

—Yi jāy ajcxy huidibi Dios ayuc midoohuipy etz cuyduunip, yi' hich ndaj'ajtypich etz n'uch'ajtypich.

Jesús yajxemy je poj etz je ni co anajty chachpidigy

²² Chi tüg tecy yjajti Jesús ytiigiy ma tüg barco miid ydiscípulos ajcxy, chi Jesús yminañ:

—Tzoc jim'amy ñinaxy nájxim.

Chi ajcxy chooñ. ²³ Chi ñigujc anajty nícxcixy co Jesús ymi'ögy. Chi tüg mic poj miñ ma je meyy. Chi je barco ñi yajtiigyiyi, janch yinjaty jahueen-jaty ycaquiñ. ²⁴ Chi ajcxy Jesús nimijhuägy, tijyücxxy ajcxy nimaagyixy:

—¡Huindzin! ¡Huindzin! Cham ajt n'ocquiinim.

Co Jesús oy ymäyhuijy, chi jip̄cogap̄x̄īy je poj etz je mejy co anajty chachm̄ij̄etz̄pety ma barco. Chi je poj yhuäcx̄ij̄ptay, y'amoonday. ²⁵ Chi Jesús ym̄inañ:

—¿Ma miich ajcxy je mm̄ib̄j̄c̄in?

Chi ajcxy yjanchch̄iḡiygoty janch yhuinmay ajcxy ñayñ̄im̄áayiḡixy miñ xȳipy:

—Pin yēyd̄ijc jada jada' co je poj etz nīi j̄īguexy, etz yajhuäcx̄ipy, etz ycap̄xyc̄öbiḡiyi.

Je Gadarañy hūidibi anajty ca'oybi m̄id

²⁶ Chi ajcxy ymejch ma je gadarenos naaxjot, hūidi hūi'm̄ jim'amy ñ̄inaxy ma je Galilea m̄ij̄laguunba'. ²⁷ Co Jesús ñ̄ib̄id̄iz̄imy, chi jip̄cobadiy t̄üḡyēyd̄ijc hūidi anajty ti choñ ma je Gadara cajp. Je' anajty ym̄id ca'oybi, ti anajty yjejc̄ni maabi ypadyyi. Ca' je' anajty huit yajtuñ, nañ ni ca' anajty chinäy ma yt̄ijc, öcp̄ijut anajty yajtz̄in̄äh̄ūiyb. ²⁸ Co je' ixpaty Jesús, chi yaaxqueecy, e ycoxt̄inay'ahūiy ma Jesús yhuinduu, ym̄inañ janch mic:

—¿Ti ñ̄ich miich co xyñ̄imiñ̄ich, Jesús, t̄üḡpajc m̄ij̄pi Dios y'ung? Tun may'ajt ca' nijot yxchachaachyt̄uñ̄ich.

²⁹ Jadu'n m̄inañ com co anajty Jesús ixquexy je ca'oybi ma je jäy, ti anajty yjejc̄ni ma je ca'oybi anajty tzach'ane'my je jäy. Coxoch anajty ym̄iḡügt̄ijc ym̄id'adyi m̄id cadena. Janch ypojtpy cadena, chi ca'oybi anajty yajnicxyi m̄ij̄tiḡiduum. ³⁰ Chi Jesús y'am̄idooy je loc̄ijäy:

—¿Ti miich mx̄i?

Chi je ca'oybi ym̄inañ:

—ñ̄ich nx̄i Legión (hue' yhuimb̄id̄iz̄imy nimay).

Jadu'n m̄inañ com nimay anajty ca'oybi ti yt̄iḡiyḡixy ma je jäy. ³¹ Chi je ca'oybi may'ajt pijctzoy ma Jesús co ca'ydi yquexyi ma ayoodactuuby.

³² Jim anajty t̄üḡ quepy idzim chachj̄ic̄xc̄ixy ma je ujt̄zjot. Chi je ca'oybi may'ajt pijctzoy co huen yajtiḡiȳihūipy je' idzim. Chi Jesús ni'adzooy.

³³ Co je ca'oybi ypidz̄imy ma je jäy, chi yt̄iḡiy ma je may'idzim. Huin'it je may'idzim ñayñ̄ajtz̄j̄ib̄ibydaaȳi ajcxy ma t̄üḡ ahuoc, chi oy ajcxy ycädäy n̄ijoty, chi y'ögtay.

³⁴ Chi je idzim cuend'ajtp̄i ajcxy co ix̄y jadu'n nej ti yjadyi m̄id ajcxy y'idzim, chi ajcxy yqueecy, oy nim̄iydaacc̄ixy cajp̄joty etz majaty tundac.

³⁵ Chi mayjäy ajcxy choñ oy ñ̄j̄xc̄ixy jadu'n nej anajty ti ytunyii ti jadyii, oyja'tc̄ixy ma Jesús. Chi je mayjäy ajcxy paty je yēyd̄ijc, tībi anajty ca'oybi ñ̄ib̄id̄iz̄imyii ycöb̄id̄iz̄imyii, ñ̄äy ma Jesús yhuinduu, huit m̄id etz huijy quejy, chi ooy je jäy ajcxy ch̄iḡiy.

³⁶ Chi pinjaty ajcxy ījx m̄id m̄iydacy jadu'n nej ȳi' choocy, je jäy hūidi anajty ca'oybi m̄id. ³⁷ Huin'it t̄üḡ'óciy je mayjäy ma gadarenos naaxjot etz jadyii cajp huinduy agonbi, chi ajcxy may'ajt pijctzoy ma Jesús co huen j̄ihuägy ma je' ajcxy, co anajty ooy ch̄iḡiyḡixy. Chi Jesús yt̄iḡiyñ̄i barcojoty yhuimb̄ij̄t̄ni.

³⁸ Chi je jäy tībi anajty ca'oybi ñ̄ib̄id̄iz̄imyii ycöb̄id̄iz̄imyii pijctzoy may'ajt co m̄id'idan Jesús. Chi Jesús m̄id cap̄xyc̄ijxy, nimay:

³⁹ —Nihuim̄bit md̄ijc, etz nim̄iydäg jada m̄ij̄pi tung hūidibi Dios ti tuñ m̄id miich yc̄ixpi.

Chi je' ñ̄icxy cap̄xhuäcx̄y je tiy'ajt cajp cajp jadu'n nej anajty m̄ijhuinmañ Jesús ti tuñ m̄id je' yc̄ixpi.

Je Jairo ñ̄ix etz je töxyjäy hūidibi Jesús yhuitpa' n̄idoni

40 Jadu'n yjajti co Jesús yhuimbijty co chooñ Galilea, chi je jāy ajcxy cōbījcy Jesús janch agujc jotcujc, com nidüg'óciy anajty ooy jīp'ljxcīxy. 41 Chi tūg yēydīc huidi anajty yxī Jairo huidibi anajty mījtungmīd ma judiojāy ñaymujctac ymiñ ma Jesús, chi minucxacy Jesús pijctzoy may'ajt co huen ñicxy ma je' ytījc. 42 Jairo ymīd anajty tūgpajc ñīx, hue' anajty yjimījt majmetz, janch tim ōgaanip anajty. Co Jesús ñicxy mīd je', chi janch mayjāy anajty chach'adijīyīi chach'agodīyīi.

43 Chi tūg tōxyjāy huidi anajty yxī ybo', ca' anajty y'oc-huācxījpnī, mīmajmetz jimījt anajty cujc jadu'n mī'ījtnī. Tī anajty ymeeñ yajtundāy ma je tzoydumbī ajcxy, etz ni pin anajty ycayajtzōgyīi. 44 Chi je tōxyjāy nīmījhuāgy je Jesús, chi nīdonī yhuitpā. Janch mic mic je yxī ybo' oy yhuācxīpy.

45 Chi Jesús ymīnañ:

—¿Pin xyñidoñ īch nhuit?

Chi ajcxy y'adzooy co ca' pin. Chi Pedro etz tūg'óciy mīd je' ymīnañ:

—Huindzīn, jāy tī xy'adijīy tī xy'abodīy etz mīich mīna'ñ: “¿Pin tī xyñidoñīch?”

46 Chi Jesús ymīnañ:

—Nidūgtī tī xyñidoñīch. Nnejhuīybīch co mīd nmic'ājctīch tī nya-
jtzōgyīch pīnjaty.

47 Co je tōxyjāy jīhuīy co ca' coyūch yhuī'ma'ñ, chi nīmīñ janch tziyuuyb. Chi yhuindacy ma Jesús yhuinduu, chi capxpīdzīmy mayjāy'agujc tī ycīxpi anajty co tī nīdooni Jesús yhuitpā', e co anajty mic'amy tī chōgy. 48 Chi Jesús nīmāy je tōxyjāy:

—Tōxyjāy, tī mdzōgy co tī xymībīcyīch, ñīcx jotcujc.

49 Yam Jesús anajty ycapxpy, co ymiñ tūg jāy huidi anajty tī chooñ ma Jairo ytījc; je Jairo nihuindzīn'ajtp anajty je judiojāy naymujctac, chi nīmāyī:

—Tī y'ōgy mīich mñīx, ca' mjac'amayīy nīgi yī Huindzīn Jesús.

50 Co Jesús jadu'n midooy, chi ymīnañ:

—Ca' mdzīgīy, mībījcīch janchtīy, etz tzōgīp yī mñīx.

51 Co Jesús ytīgīy ma je tījc, chi ca' a'īxīy ñīcxy ytīgīy hueñypīnīty mīd je'. Jēyī Pedro, Jacobo, Juan etz je tōxy'anāg ytaj yteedy ytīgīy mīd Jesús. 52 Chi tūg'óciy je mayjāy ajcxy janch yaaxp, janch ñé'mgīxy mīd je tōxy'anāg ycīxpi. Chi Jesús ymīnañ:

—Ca' myaaxcīxy, ca' yī' ōgīty, maab yī'.

53 Chi nīgoob ajcxy nīxīicy com tī anajty nejhuīygyīxy co tī y'ōgnī. 54 Chi Jesús majch je tōxy'anāg ma yci', chi mīgapxy mic, ymīnañ:

—Tōxy'anāg pīdīg.

55 Chi je' yjugypījcy, e mic'amy ypidīgīy. Chi Jesús ymīnañ co huen yajcaaygīxy yaj'uuccīxy. 56 Chi ytaj yteedy ajcxy ooy chīgīy yjīhuīy. Chi Jesús nīmāy co ca' huaad pīnjaty mīdmīydāgīpy jadu'n nej tī ytuñyīi yjadyīi.

9

Jesús quejxy ayuccapxhuācxp je nīmajmetzpi ydiscīpulos ajcxy

1 Co Jesús yajyōymujctay je ni majmetzpi ydiscīpulos ajcxy, chi moy je mic'ajt jaydēbī yajtzōgīpy pa'mjāy, etz moy ajcxy nañ jadu'n cōtūjcīn co

ajcxy ixquexipy je ca'oybi. ² Chi quejxy je' ajcxy ñicxy capxhuäcxixy jadu'n nej Dios y'ane'my, etz yajtzooccixy pa'mjäy. ³ Chi Jesús ymíñañ:

—Ca' ni ti tü'amgixpi mminíxcixy; ni mgaminíxcixp mdajc, ni mmorraal, ni mgaagy, ni meeñ, e ni mgaminíxcixipy ajcxy metz mhuit. ⁴ Huen tim huidi tijc ma anajty mdigíygyixy, jim ajcxy huí'mgixipy, e jim ajcxy nayyöyhuäcxíyb. ⁵ Hueñyama'amyity ma ca' jäy xycöbíjccixy, co ajcxy mbidzímgyixy ma je' cajp mhuinnéjpcixipy mhujnáaxcixipy je naaxjoc ma mdecy. Jada je' tiy'ájtíp co Dios tzaachytunipy yi jadu'mbi jäy ajcxy.

⁶ Chi ajcxy ñayyöyhuäcxtaayi, ñicxy ajcxy cajp cajp capxhuäcxixy je oybi ayuc, etz yajtzooccixy pa'mjäy hueñytímma'ámyity.

Co Juan el Bautista y'ögy

⁷ Je rey Herodes co nejhuíy jadu'n nej Jesús anajty mijhuinma'ñ tuñ, chi ooy anajty tzachnejhuíhua'ñ pin je' anajty. Com nijéjity jäy anajty ymíñaangixy co ti Juan jugypicy. ⁸ Chi jacnaagity ymíñaangixy co Elías ti ñayguëxígyi, e jacnaagity ymíñaangixy co tüg Dios y'ayucnajtzcaxíybi je' ti yjugypicy huidi jecy'ajty octzinaybi. ⁹ Chi Herodes ymíñañ:

—Ích yi' ni'ane'mdiy co huen ajcxy Juan ycohuajc yajmíñajci. ¿Pin jada jada' huidi ích nmídooybich co tzachnimíydaaccixy?

Herodes ooy anajty ja'ixa'ñ Jesús.

Jesús yajcay mígoox mil jäy

¹⁰ Co je apóstoles ajcxy yhuimbijty, chi yajmídmíydactay ajcxy Jesús tüg'óciy tíbi anajty túngixy. Chi ac jéyi ydiscípulos míd'ajty Jesús mjtígíduum huingon ma tüg cajp huidi yxí Betsaida. ¹¹ Co je mayjäy ajcxy nejhuíy, chi ajcxy paníxcy Jesús. Chi Jesús je mayjäy cöbíjctay etz yajmídmíydacy ajcxy Dios y'ayuc ytiy'ajt nej ané'mín cötújcín mídity. Jesús nañ yajtzópy anajty huídijaty yajtzoíhuuam.

¹² Co oy chu'íyñi, chi ymíjhuägy je nimajmetzpi ydiscípulos ajcxy ma Jesús, chi ajcxy nimay:

—Capxycíjxni míd jadayaabi mayjäy ajcxy, jaydëbi ajcxy ñicxipy ma yi cajp huidi huinduy agon yajpaatpi, huen nicxy ixtaagyixy jättac etz jim ajcxy paadipy caayín uucín. Com hue' jada it ma ích ajt yam nyajpaatím mjtígíduum.

¹³ Chi Jesús ymíñañ:

—Mooygix míich yi' ajcxy ycaayín y'uucín.

Chi je' ajcxy y'adzooy:

—Jéyi ích ajcxy nmídidíyich mígoox tzajcaagy e mejtz acx, nígo co ca' ích ajcxy njuy caayín uucín míd jadayaab mayjäy.

¹⁴ Hue' anajty oy nimígoox mil je jäy. Chi Jesús nimay je discípulos:

—Yaj'ixtaaccix ajcxy yi mayjäy.

¹⁵ Chi ajcxy jadu'n cuyduuñ, yaj'ixtactay ajcxy je mayjäy. ¹⁶ Chi Jesús conígy je mígooxpi tzajcaagy, etz je metzpi acx, chi ypa't'ijxy tzajpcíxy conuucxy je tzajcaagy etz acx, huín'it tujc-huäcxymoy je' ydiscípulos ajcxy, huen yajhuäcxixy ma tüg'óciy mayjäy. ¹⁷ Chi ajcxy ycaayí, huín'it ajcxy yajmujcy je tzajcaagy yconaxy etz je acx yconaxy majmetz cach.

Pedro capxpidzimy co Jesús yi' je' je Cristo

¹⁸ Chi jadu'n yjajti co Jesús anajty ycapxtägy ahuingujc míd je' ydiscípulos ajcxy, chi Jesús je' ajcxy y'amídoy:

—¿Pín ñich jáy xytijy?

¹⁹ Chi ajcxy y'adzooy:

—Nijéjity jáy xytijy co miich je Juan je Bautista; nijéjity ymínaangixy co miich je' Dios y'ayucnajtzcaxpñybi huidi jecy'ajty tzinay e ti yjugypicy.

²⁰ Chi Jesús ymínañ:

—¿Miich ajcxy, pín ñich miich ajcxy xytíjicixy?

Chi Pedro y'adzooy:

—Dios yCristo.

Jesús capxypidzimy co y'ögañ

²¹ Chi Jesús pidacy ané'mín etz cötújcín co ca' ajcxy ni pín yajnimáhuip co yí' je' Cristo. ²² Chi Jesús ymínañ:

—Ooy ycopícyty co ñich, je jáy huidi tzoon tzajpjoty, canaag nax ayo'n nbáadibich, ca' xymñpidägibich je mijjädijc, je teedy tungmüdpi, etz je' ajcxy huidi yaj'ixpicy Dios ñecy, e co n'ögip njugypigípyich codugüg xñ.

²³ Chi Jesús nimay ajcxy nidüg'óciy:

—Pen ji pín xypanícxañich, huen jáydigoydäy yci'm tzójcín etz huen xypanícxych jabom jabom, oy nej ytimyjadípy ytimy'ayoohuipy, tím nipaady nej jihuüy ti cabígy mgruudz jabom jabom etz pajamgích.

²⁴ Huen pinjáy huidibi ca' yegañ yí yjugy'ájtín ma yí o'cín müd ñich ycixpi, hue' je' yajtigoyamy yí yjugy'ájtín. E huen pinjáy huidibi yegamy yjugy'ájtín ma yí o'cín müd ñich ycixpi hue' je' ypadamy yí jugy'ájtín.

²⁵ ¿Ti tüg jáy ypatpy, pen ti paady tüg'óciy cohuit'ájtín comeñ'ájtín ya naaxhuiñ e nayyajtigoyii, etz ca' y'alma yajñdzögy? ²⁶ Yí jáy ajcxy pinjaty xymídzöydúñibich n'ayuc, ñich je' je jáy huidi tzoon tzajpjoty, nañ nmídzöydúñibich je' ajcxy co anajty nhuimbityich ya naaxhuiñ, müd ñich n'ané'mín etz nmic'ajtich etz nDéedyich y'ane'm'ajt, etz ymic'ajt, etz müd je ángeles ajcxy ymic'ajt huidibi huädz yjot yhuinma'ñ. ²⁷ Janch ñich miich ajcxy nimäy co ji jáy ma miich ajcxy huidibi ixipy Dios y'ané'mín jayijp ca'ni anajty y'ögy.

Jesús yajtigach je ñinícx

²⁸ Chi miductujc xñbi maabi anajty jada ayuc jadu'n capxy, Jesús huodzooñ Pedro, Juan etz Jacobo, chi müd'ajtpy jim ma tüg copjijp Dios mibijctzoo. ²⁹ Yam anajty Dios ooy mibijctzoy, co Jesús yhuifñyjijp oytigach, e je yhuit yjajty janch poob janch adícxp. ³⁰ Chi metz jáy ñayguëxíci, müdgarpxy müdmíydägy Jesús, Moisés je' anajty etz Elías. ³¹ Huidi ajcxy naygëxíci janch jühuidityi anajty ajcxy je tícxín jájin müdity, nigapxcixy nimíydaaccixy je o'cín huidi Jesús ypadamy jim Jerusalén. ³² Pedro, Jacobo etz Juan ooy anajty ajcxy chachmähuaní, chi ajcxy mi'ögtigooy. Co oy ymäyhuijicixy, ijxy ajcxy Jesús y'adícxín y'ajajín, etz nañ jadu'n ijxy ajcxy je nimetzpi jáy ajcxy huidi anajty Jesús müdmíydäcpy. ³³ Jadu'n yjajty co yí jáy ajcxy puyöyduutni Jesús. Chi Pedro Jesús nimay:

—Huidzín, jotcujc ñich ajt ya. Tzoc tugüg tíjc yaj'oyíyím, tüg miich mjëdíby, jadüg Moisés jëdíby, etz jadüg yí Elías jëdíby.

Pedro ca' anajty nejhuüy ti ycapxy. ³⁴ Yam nigí anajty ycapxy co joc ñaaxcidacy huidi yajñidigoy je' ajcxy. Chi ajcxy ooy chigíy co oy joc yajñidigoydáayigixy. ³⁵ Chi tüg ayuc yajmidooy ma je joc ymínañ:

—Hich jada n'ung'ajtpy, ooy ndzocyich njihuiyich. Amido'ijti miich ajcxy yi' y'ayuc.

³⁶ Co je ayuc y'amoñ, chi ajcxy ijxy Jesús naydüg yhui'my, chi ajcxy nañ jadu'n amoñ. Huin'it xii ni ca' ajcxy miydacy müid ni pin jadu'n nej anajty ti y'ijxcixy ti ymidoogixy.

Jesús yajtzögy tüg yeegy'anäg huidibi anajty ca'oybi müid

³⁷ Com jabom co Jesús, Pedro, Jacobo etz Juan ajcxy yminajcy ma je copjijp, chi ooy mayjäy chooñ oyjijpcobadäyüi. ³⁸ Chi nidügti jäy ycapxy janch mic, yminañ:

—Huindzin tun may'ajt ix hich n'ung, yi' hich tügpaic n'ung'ajtpy. ³⁹ Huen mináajity ca'oybi ymachyüi, chi timetiini yaaxquëgy yajyachyüi yajquidyüi, etz yajpidzimy oy yhuin'opy y'aa'opy e adzaach y'ixmachyüi. ⁴⁰ Ti hich may'ajt nbijctzooyich ma yi mdiscípulos ajcxy, co huen yajpidzimy je ca'oybi, per ca' yi' ajcxy ti mimadägy.

⁴¹ Chi Jesús yminañ:

—Miich jäy ajcxy huidibi ca' mibijcp ca' ajcxy mmijpidägañ yi tiy'ajt! ¿Naag xii hich njac'idipy ma miich ajcxy nmimecxtüjccixipy? Mimin m'ung ya.

⁴² Co anajty yhuingoñ, chi je ca'oybi yajcidaay je yeeg'anäg, chi ooy yajyatzcooti. Chi Jesús ix'ojoy je ca'oybi, e yajtzoocy je yeeg'anäg, chi yteedy yajcidigüyüi. ⁴³ Chi tüg'óciy je mayjäy ajcxy ooy chigüy müid je mijhuinmañ huidi Dios ytuun.

Jesús capxpizimy jadüg'oc co y'ögañ

Jesús ydiscípulos ajcxy ooy jihuiyigixy huinmaaygixy co Jesús jadu'n yminañ:

⁴⁴ —Miich ajcxy yajxon mido'mbájccix jada ayuc. Hich je' je jäy huidi tzoon tzajpjoty, hue' nyajcüyegañich ma pocyjäydijc ajcxy yci'am.

⁴⁵ Je' ydiscípulos ajcxy ni ca' anajty huinjihuiyigixy, tzigüyb anajty ajcxy, paady ca' ajcxy jaty nej yaj'amidóogixipy.

¿Pin je' nigijacmijip?

⁴⁶ Chi Jesús ydiscípulos ajcxy ytigüy huinmay'ahuidijtp, nejhuühuaangixy pin je' jacmij'idam. ⁴⁷ Jesús nejhuüy je' ajcxy yjot yhuinmañ huidi nayyajmüidmiydáacip ajcxy, chi tüg pi'c'anäg huijtzigy, ypidacy ma ymijc. ⁴⁸ Chi Jesús yminañ:

—Pinjaty xycöbicyich jadu'n nej jada pi'c'anäg xycöbicyich müid hich nxii ycixpi, hich yi' anajty ti xycöbicyich; je huidibi hich xycöbicyich, cöbigüib je huidi ti xyquexyich ya naaxhuiñ. Yi' huidibi jacmützip ma miich ajcxy, yi' je' jacmijpi.

Pin hich ajt ca'p xymijotma'tim, je' ajt xymijnicxpejtim

⁴⁹ Chi Juan yminañ:

—Huindzin, ti hich ajcxy n'ijxcixy co tüg jäy ti yajpidzimy ca'oybi müid miich mxii miich mmic'ajt. Ti hich ajcxy yi' nyaj'ojoyich com ca' yi' hich ajt xypahuidijtim.

⁵⁰ Chi Jesús yminañ:

—Ca' myaj'ójcixy yi'; pinjaty ca' xymidzip'ajtim, hich ajt yi' nmüid.

Jesús jijpcogapxüy Jacobo etz Juan

⁵¹ Jadu'n yjajti co tiempo yhuingoni mina Jesús ñícxip tzajpjoty, chi yhuinma'ñ pidacy co nicxa'ñ jim Jerusalén. ⁵² Chi Jesús quejxy cogapxy jayijp jättac pijctzoobi. Chi je cogapxy'ajtpi ñícxxy ytigiy ma je samaritano jäy ajcxy ycajp, jättac pijctzoobi. ⁵³ Chi je' samaritano jäy ajcxy ca' yega'ñ jättac, com ñejhuiygixyp co Jesús etz ymigügtijc ñícxxy anajty ajcxy jim Jerusalén. ⁵⁴ Co jadu'n Jesús ymigüg ajcxy nejhuüy co je samaritano jäy ca' jättac yega'ñ, chi Jacobo etz Juan nimay Jesús:

—Huindzin, ¿nej m'a'ixiyyb ñch ajcxy n'ocni'ane'mdiyich huen jin cäy huidibi tzomb tzajpjoty, jigix yi samaritano jäy ajcxy ycixtähuipy jadu'n nej je profeta Elías ytuuñ jecy'ajty?

⁵⁵ Chi Jesús y'ijxhuimbijty, ogy Jacobo etz Juan, nimay:

—Miich ajcxy ca' mnejhuiygixy ti jot ti huinma'ñ miich ajcxy müid. ⁵⁶ ñich, je jäy huidi tsoon tzajpjoty, ca' ti nmíñich ya naaxhuiñ co jäy yjugy'ajt miñ nyajtigooyich, hue' jánchtiy ti nmiñich co jäy yjugy'ajt nyajtzogibich.

Chi ajcxy ñícxni huingbi cajp jättacp.

Je pinjaty anajty Jesús panícxam

⁵⁷ Jadu'n yjajti co anajty ñícxixy ma tüg tü'aa, chi tüg jäy Jesús nimay:

—Huindzin, ñch miich nbanícxamy oy tim ma'amy miich mñícxxy.

⁵⁸ Chi Jesús y'adzooy:

—Yi huaax ymüid yi' ajcxy yjut, etz yi' joon ajcxy ymüid ajcxy ype'ñ, ñch je jäy huidi tsoon tzajpjoty ca' nmüididyich ma nmähuibich ma nbócxibich.

⁵⁹ Chi Jesús nimay jadüg jäy:

—Pajamgich.

Chi je jäy y'adzooy:

—Huindzin, jayijp ñch ndeedy n'ocyajnaaxtigihuiipy.

⁶⁰ Chi Jesús ymíñañ:

—Jebi yajnaaxtigihuiipy huidibi ca' xypanícxañich. Nicx miich capx-huäcxi Dios y'ayuc y'ané'min.

⁶¹ Chi jadüg jäy ymíñañ:

—Huindzin, nbanícxamy yam. Tun may'ajt ocnaajtmadzhiygich nicxy n'ocmüidcapxycixyich njuogy nmigügich huidi jim ma ñch ndijc.

⁶² Chi Jesús ymíñañ:

—Pinjaty yhuinma'ñ ti pidägy co Dios ytung tunaani, ca' huaad ixmach je tung, tim jadu'n nipaady nejhuüy tüg jäy ti ytigiy naaxjidziptzpi müid arado, e ca' huaad y'ijxhuimbity com co huinduum arado nicxihiipy.

10

Jesús quejxhuäcxy je nidugi'pxmajcpí

¹ Huin'it co jada jadu'n ti ñaxy, chi je Huindzin Jesús huin'ijxy jatugi'pxmajc y'ixpijcpidijc, chi quejxgy cogapxy metz metz ma tüg tüg cajp majaty ñícxañ. ² Chi Jesús nimay yi' ajcxy:

—Janch co cosecha ooy ti yhuindiiy, yi midumbi janchtiy hueeni. Chojcxy co nbijctzóohuim ma nHuindzin Dios co huen quexy ytumbidijc ma yi cosecha. ³ Nicxcix, ñch miich ajcxy nguejpxy jadu'n nej cöbixy y'ung yhuidity pa'uc agujc. ⁴ Ca' mminícxixy mbijty, ni mxäcxuumy, ni mgig, e ni pin ca' mgapxrócxixipy tü'am. ⁵ Co ajcxy mdigihuiipy huenytmítijcity, jayijp ajcxy mináangixipy: “Ji jotcuje'ájtín ma jada

tijc.” ⁶ Pen yung naxy je' ajcxy yajpaady, miich ajcxy je mgapxpooocxin jotcujc'ajt myegipy ma je' ajcxy; pen ca' ajcxy yjadú'nity, naadigi'adip huidi anajty ti mgápxcixy. ⁷ Nañ hui'mgix ma je tijc, chi ajcxy mgayipy m'ügipy huidi je jāy anajty ajcxy xymooyb, com je tumbi paatip je' je ymuju'ñ. Ca' ajcxy mhuididipy jayjñin jaydijc. ⁸ Huenytmihuidi cájpity ma anajty mdigi'ygixy, pen je jāy ajcxy xycöbicip, caaygix uuccix huidi anajty jāy ajcxy xymooyb. ⁹ Yajtzóoccix yuujäy pa'mjäy huidijaty jim ma je' ajcxy yajpaady, etz yajnimaaaygix: “Je Dios y'ané'min huingóniñ yi' ma miich ajcxy.” ¹⁰⁻¹¹ Huenytmihuidicájpity ma anajty mdigi'ygixy, e ca' anajty jāy xycöbigaangixy, co ajcxy mdzonaanip, nimaaygix: “Yi mgajp naaxjoc huidi ti ypety ma iich ndecy nhuinnebáamyich, yi' je' iixpejt co Dios ajcxy xychaachytunipy. Chi nejhuüygiç miich ajcxy jada co je Dios y'ané'min ti ymihuingoni.” ¹² Iich miich ajcxy nimayb co huin'it xi co anajty yajhuaad'aty, Dios ñigi tzaachytunaangixy je jāy huidi ajcxy ca' miich ajcxy xycöbiga'ñ, ca'ydi Sodoma cajpjäy.

Je cajp huidijaty ca'p ycapxymidooy

¹³ Chi Jesús yjacmñañ:

—Miich ayoob ajcxy Corozín jāy! ¡Miich ayoob ajcxy Betsaida jāy! Co jim ma je Tiro cajp etz Sidón cajp caytuni cayjajti je Dios ymijhuinma'ñ huidi ti ytunyii ti yjadyii ma miich ajcxy, jécyp ixypipy ajcxy yjothuimbijtni, etz ti yajniquëxícixy ixypipy müd je yhuít iñaaygixy saci ñjen ñicuyjam ixuyjam (je' je tiy'ajt co ooy ytajcixy ymaygixy müd ypocy ycixpi). ¹⁴ Janch jadu'n yjadipy co anajty Dios yajniögödugi, ñigi o'ctiy miich ajcxy ayo'n mbaadüyb ca'ydi jadu'n nej Tiro jāy etz Sidón jāy. ¹⁵ E miich ajcxy Capernaum jāy ajcxy, ¿nej mmñinaangixy mjätcixipy tzajpjoty? Hue' m'idaaccixyp miich ajcxy ma yi ayoodactuuby.

¹⁶ Je jāy ajcxy huidi miich ajcxy m'ayuc xymidoohuip, nañ xymidoohuib yi' ajcxy iich n'ayuc. Je jāy ajcxy huidibi miich ajcxy ca' xy'ixa'ñ, nañ ca' je' ajcxy xy'ixa'ñich; e pinjaty ca' xy'ixa'ñich, nañ ni ca' yi' ixaangixy je Dios je huidi ti xyquexyich ya naaxhuñ.

Chi ajcxy je nidugi'pxmajcpi yhuimbijtcixni

¹⁷ Chi je nidugi'pxmajcpi huidi Jesús yquejx ayuccapxhuäcpxi yhuimbijttay ajcxy janch jotcujc, ymñinaangixy:

—Ixti je ca'oybi ti iich ajcxy xycapxycöbicipcixy müd miich mxii.

¹⁸ Chi Jesús ymñañ:

—Ti n'ixyich nej je ca'oybi yhuindzin ti ycäy, jadu'n nej jihuüy ti ycäy ti ycödigi'y tzajpcixy, jadu'n nej tüg huidzuc. ¹⁹ Iich miich ajcxy mic'ájtñ ti nmooygixy, jaydebí ca'oybi ca' xymimadáaccixipy, tim jadu'n nipaady nej jihuüy tza'ñ etz ca'ty myajhuäcpéjtcixy e ca' nej mjätcixy. ²⁰ Ñigi miich ajcxy jotcujc'ájtix co ajcxy mxii y'íjtcixy cojay jibby tzajpjoty, ca'ydi co ajcxy ca'oybi xycapxymidoogixy.

Chi ooy Jesús yjotcugiy

²¹ Huin'it Jesús yjotcugiy müd je Dios yjihui'ñ ymic'ajt, ymñañ:

—Nyajnajxypich Dioscojuyip ma miich, Dios Teedy, tzajpjotyti Huindzin etz je naaxhuiñybi Huindzin, co ti myüch jada mjhuinma'ñ ma yi cohuinma'ñ jāydijc, etz ti myajnejhuüy je jāy huidi ca' y'ixpicyity. Dios Teedy, jadu'n miich ti mduñ com jadu'n miich ti mjäygidacy.

²² Ndéedyich ti xyajcǐdǐgǐydäyich tüg'óciy tijaty mic'ajt oy'ajt. Ni pin ca' ijxcajp pin je' Dios y'ung'ajtpy, jëyi ndéedyich tügpajci pin xy'ijxcajpich. Ni pin ca' ijxcapy pin je' ndéedy'ájtypich, jëyi je Dios ung tügpajci huidi ijxcajp, etz jacjadyii ma je ung yajniguëxiga'ñ.

²³ Chi Jesús ni'ijxhuimbijty yi' ydiscípulos ajcxy, ahuingujc ajcxy nimay: —Jotcujc ajcxy je jáy ajcxy huidi ijxcixp jadu'n nej miich ajcxy ti m'íjxcixy. ²⁴ Hich miich ajcxy nimayb co ooy may Dios y'ayucnajtzcaxpiyb etz rey ajcxy ja'ixa'ñ huidibi miich ajcxy m'ijxpy, e ni ca' ajcxy icy; etz jamidoo'ida'ñ huidi miich ajcxy midooyb, e ni ca' ajcxy midooy.

Ijxpejt ma tüg samaritano oyjäybi

²⁵ Chi tüg jáy huidi yaj'ixpijcp Dios ñecy ytinaay'ahuüy jot'ixy huinma'ñ'ixy Jesús, chi y'amidooy:

—Huindzin, ¿ti huaad ndunipich co ñich jugy'ajtin huinixibi nbáadibich?

²⁶ Chi Jesús y'adzooy:

—¿Ti jaybétyip ma yi Dios ñecy? ¿Nej mhuinjihuüy co mnecycapxy?

²⁷ Chi je ley huindzin y'adzooy:

—Mdzogipy mjihuühuüpy mHuindzin Dios m'id tüg'óciy m'aa mjot, m'id tüg'óciy m'alma, m'id tüg'óciy mmijaa, etz m'id tüg'óciy mjot mhuinma'ñ, e mdzogipy yi mijin midijc jadu'n nej miich ci'm naychogyii.

²⁸ Chi Jesús y'adzooy:

—Ti ooy yajxon m'adzooy. Tun yi', e mdzinähuiip huinixii.

²⁹ E je' nañ jadu'n tim tiy ñejhuühua'ñ, nimay Jesús:

—¿Pin ñich nmidijc'ajtpy?

³⁰ Chi Jesús y'adzooy:

—Tüg jáy choñ jim Jerusalén ycidägy anajty jim Jericó, chi oy meetzpi minaybadyii. Chi ajcxy tüg'óciy yhuüt e tijaty yi' anajty ym'id pijtaayi. Chi ajcxy ooy huinhuojpy jijphuojpy huingojxy jijpcojxy, chi ajcxy ixmach jahueengi ögy, chi ajcxy ñicxni. ³¹ Tüg judío teedy yminagüiy ma je jimbi tü'aa. Co y'ijxy je tzaachijäy, chi jüyöyñajxy. ³² Nañ jadu'n yminagüiy ma je jimbi tü'aa tüg levita jáy huidi tuumb ma Dios ytijc, co jim yjaty mihuingon je tzaachijäy, co oy icy, nañ chi jüyöyñajxy (ca' pa'ayooy). ³³ Chi tüg samaritano jáy anajty jim naxiy, co mihuingoñ je tzaachijäy, co oy icy, huin'it ooy pa'ayogooty je tzaachijäy. ³⁴ Chi je' nimijhuägy, chi puji e xojtzi je chaachi'au, nañ tzoüyiyi chaachi'au m'id aceite etz vino. Chi yaj'iyujcpety, e yajnicxy jim ma yjättac, e jim cuend'ajty. ³⁵ Com jabom co anajty ñicxaani, chi yajpidzimy mejtz denario meeñ, moy je codijc nimay: “Cuend'at jadyaabi tzaachijäy, jadu'n nej anajty mjacmeeñajytuñ, co ñich anajty nhuimbityich huin'it nmigüedipy.” ³⁶ ¿Ma je nidugügpi jáy pin je oybi ti tuñ m'id je jáy huidi anajty je meetzpi ti ymeechyii ti yajtzaachiyii?

³⁷ Chi je jáy huidi Dios ñecy yaj'ixpijcp Jesús y'adzooy:

—Je huidi ti yajtuñ je pa'ayo'ñ.

Chi Jesús yminañ:

—Nicx miich, e tun nañ jadu'n pa'ayo'n.

Jesús yajpaady ma Marta etz María ytijc

³⁸ Chi jadu'n yjajty co Jesús anajty ytüyöy, chi ytigüiy ma tüg mutz cajp. Jim anajty tüg töxyjäy huidi anajty yxii Marta, yi' yajjättaci ma ytijc. ³⁹ Je Marta ym'id anajty tüg y'uch töxyjäybi huidi anajty yxii María, chi je' y'ixtacy ma Jesús ymijc, amidoo'ijti je' y'ayuc. ⁴⁰ Chi je Marta ooy anajty

jim chachjottigoy tuñ anajty tigatii ma ytijc, chi nimijhua'cy je Jesús nimay:

—Huindzin, ¿ca' nej mnayjihuiyijii co ñich naydüg yam tzach nayyaj-tuñyijichí? Nima' yi María co huen xypubétyich.

⁴¹ Chi Jesús ymíñañ:

—Marta, Marta, yi maytung miich mdzachmijottigooyb. ⁴² Tügpaic ji, huídibi ooy ycopícyip. Yi María ti yi' huin'ixy je oybi huídí ni pin ca' ypigíyib.

11

Jesús yaj'ixpijc nej jēbi mibijctzoohuim Dios

¹ Jadu'n yjajti co Jesús anajty Dios mibijctzoy ma tüg it lugar, co yajmay, chí tüg discípulo ñimaay:

—Huindzin, yajni'ixíyigich ajcxy tzajcapxycapxí, jadu'n nej Juan yajni'ixíy y' ydiscípulos ajcxy.

² Chi Jesús ymíñañ:

—Co ajcxy Dios mmibijctzohuípy, jadu'n mináangixipy: Dios Teedy, miich huídí tzajpjoty tzínaayb, huindzigíy miich mxí y'ity. Huen miñ ya miich y' m'ané'min. Huen mdzójcín yajcuyduñ ma je jāy yjot yhuinma'ñ jadu'n nej yajcuyduñ jilby tzajpjoty.

³ Mooygich ajcxy ngaayin n'uucin jabom jabom.

⁴ Méecxibich ajcxy nbocy ngaydey huídibi ñich ajcxy ndundigooyb, jadu'n nej ñich ajcxy nmecxyich huídibi ajcxy xymidundigooybich. Ca' m'a'ixíy co ñich ajcxy huinma'ñ tigoyipich. Yajnihuaatzcich ajcxy ma yi jibicpi.

⁵ Chi Jesús yjacmíñañ:

—Pinjaty ji ma miich ajcxy huídí tüg ymígüg mād, co ninícxipy mijcoodz e mnimāhuípy: “Mígüg, tun may'ajt yajpijctzoogich tugüg mdzajcaagy. ⁶ Tüg ñich nmígüg ti xyñimiñich huídí tüyöyp, etz ca' nmídidyich ti nmöhuibich.” ⁷ Chi je jāy y'adzooy jilby tigoty, ymíñañ: “Ca' xy'amayíyich. Ti ñich ndijc n'agíyñi, etz n'ungich yam nmídidich cijx'am; ca' njatyich nej nbidígibich etz nmöhuípy huídí mbijctzooyb.” ⁸ ñich miich nimaayb, oy ca' tzojc nipidíga'ñ ymöhuamy huídí pijctzou co mígüg'adyii, hue' ymöhuamy jaydēbi ca'ydi yjac'amayíyii, chi yegípy tüg'óciy huídí yajmay-jajtpy. ⁹ ñich miich ajcxy nimaayb: Pijctzóogix, e myajmöhuípy ajcxy. Ixtaaygix, e mbaadipy ajcxy; cogapxíygix, ahuädzip ajcxy mdijc'aguu. ¹⁰ Tüg'óciy je' pin pijctzoob tijaty ma Dios, cidígihuíb; pin y'ixtaayb, ypaadipy; pin cogapxíyib, yaj'ahuatzíib ytijc'aguu.

¹¹ ¿Pin ungedeey ji ma miich ajcxy pen y'ung ypijctzoob tzajcaagy, nej mmöhuípy tüg tzaají? ¿E pin ypijctzooyb acx, nej jēbi mmöhuípy tüg tza'ñi?

¹² ¿Pen ypijctzoyb tzeydüty, nej jēbi mmöhuípy ca'ty? ¹³ Pen miich jibicjāy ajcxy mnejhuíyib nej oybi m'ung móoygixipy, ¿nej ca' mdijy yjānchity co mDios Teedy tzajpjotyipi xymóoygixipy je Espíritu Santo, pen miich ajcxy mmibijctzohuípy?

Yajníbjccixy Jesús co mādity mujcu' ymic'ajt

¹⁴ Chi Jesús anajty yajpidzimy tüg ca'oybi ma tüg jāy huídí anajty uumip. Jadu'n yjajty co je ca'oybi ypidzimy, chí je uum ycapxígy. Chi je mayjāy ooy jihuíy huinmay. ¹⁵ Nijjity jāy ymíñaangixy:

—Jesús mijhuinma'ñ ytumyb m̄id je Beelzebú ymic'ajt, je ca'oybi yhuindzin, paady ca'oybi yajpidzimdäy.

¹⁶ Jacjaydiibi jäy ajcxy co jot'ixaangixy huinma'ñ'ixaangixy Jesús, pijctzooy ajcxy Dios tüg ymijhuinma'ñ. ¹⁷ Co Jesús nejhuñy nej je' ajcxy jot'adyi huinma'ñ'adyii, chi nimay:

—Co tüg gobierno ñaybijc-huäcxyii, chi ñaychiptúnigixy miñ xyipy; ñayyajcixigixy ñayyajtigóoyigixy; co tüg quëx jäy ñaybijc-huäcxyii, nañ jadu'n je' ñayyajcixigixy ñayyajtigóoyigixy. ¹⁸ Pen je mujcu' ajcxy ñaybijc-huäcxip, ¿nej jada je mujcu' y'ané'min yjac'idipy? Miich ajcxy minamb co ñich m̄id ndúñich je Beelzebú ymic'ajt co ñich ca'oybi nyajpidzimy. ¹⁹ Pen jadu'n yí, ¿pin je mic'ajt mooyb huidi miich ajcxy xypahuidijtp co yajpidzimy je ca'oybi? Paady yí ajcxy c'm yajniquëxcip co miich ajcxy m̄undigooyigixy mgapxtigooyigixy. ²⁰ Pen ñich m̄id Dios y'ané'min nyajpidzimyich ca'oybi, janch jada co Dios y'ané'min ti yjätý ma miich ajcxy.

²¹ Co tüg micjäybi m̄idity maydujt, e ñaycuend'adyii yajxon, ca' je' ytigoyipy tijaty ym̄id. ²² Co yjätý jadüg jäy jacmicpi ca'ydi je', chi ym̄imadägyii, e ypijtäyii tüg'ócý ytujt huidi anajty ooy jot'amij'adyii, e yajhuäcxipy tijaty anajty ym̄id.

²³ Pinjaty ca' xymijnicxpétyich, nm̄idzipich yí. Pinjaty ca' ytuñ m̄id ñich co jäy nyaj'ixpicýich Dios yti'ajt, hue' je' ajcxy jäy yajhuinma'ñydigooyb.

Je ca'oybi co jadüg'oc yhuimbijty

²⁴ Co je ca'oybi ypidzimy ma je jäy, chi je' ñicxy jim titznaax ixtägy co ypocxa'ñ. Co ca' paty ypocxtac, huin'it ym̄ina'ñ: “Huimbidaambich ma je jäy yjot yhuinma'ñ ma ñich ti n'octzombi.” ²⁵ Co je ca'oybi yja'ty ma anajty ti chinäy, chi paady je jäy yhuinma'ñ janch yhuädzity janch ooy jadu'n nej tüg tijc huidi janch huädz pedigity. ²⁶ Chi je ca'oybi ñicxy, e m̄id miñ jahuixtujc ca'oybi jacjibicpi ca'ydi je'; chi ajcxy ytigüy ma je jäy yjot yhuinma'ñ, e chinay ajcxy jibby; huin'it je jäy jac'o'ctiy oy yjajtni ca'ydi jadu'n nej anajty jajijp'aty.

Huidi ajcxy janch jotcújcip

²⁷ Co Jesús jadu'n anajty ym̄ina'ñ, chi tüg töxyjäy mayjäy agujc mic ym̄ina'ñ:

—Jotcujc je töxyjäy huidi ti xyajpi'c'aty etz huidi xyajyeegy.

²⁸ Chi Jesús ym̄ina'ñ:

—Je' jacjotcujc pinjaty Dios y'ayuc m̄idoohuip etz cuyduunip.

Jibicjäydic pijctzoogixy tüg tñ'ajt mijhuinma'ñybi

²⁹ Co je mayjäy ajcxy jübigüy, chi Jesús yminandacy:

—Jadachambi jäy ooy ajcxy yjibicjäyity, ypijctzooyb ajcxy mijhuinma'ñ ijxpejt. Ni camina Dios ajcxy ycamöhuñyb ijxpejt, jëyí tügpajc Jonás y'ijxpejt yajmöhuiip. ³⁰ Com jadu'n nej je Jonás jecy'ajty ijxpejt yejcy ma je Nínive jäy, nañ jadu'n ñich, je jäy huidi tzoön tzajpjoty, nyegaamyich ijxpejt jadachambi tiempo m̄id jäy ycixpi. ³¹ Je töxyjäy reina huidi tzinay jecy'ajty ma madzäcruudz ypidzimy, yí je' xidähuaam jadachambi tiempo jäy co anajty Dios tiyduna'ñ mayjäy, etz yajpocycähuiipy ajcxy. Ixti ma naaxhuiñybi ycocigixy jim je reina chooñ co anajty amido'idani je rey Salomón ycapxy y'ayuc. Ji naaxhuiñ jadachambi tüg Dios yti'ajtm̄idpi jacnigi ym̄ijity ca'ydi Salomón anajty. ³² Co anajty Dios tiyduna'ñ yí

may naaxhuiñjyá, chi je jáy ajcxy huidibi anajty cogajpíp jim Nínive pidígaangixy etz yajpocycáhuaangixy jadachambi naaxhuiñjyá. Com je Nínive jáy jothuimbijt je' ajcxy co Jonás Dios y'ayucnajtzcaxxiyi. Ji jadachambi tüg Dios y'ayucnajtzcaxxiybi jacnigi ymájtity ca'ydi jadu'n nej anajty je Jonás.

Je tiy'ajt huidibi nipaady nej lámpara ma ajt nninícx

³³ Ni pin ca' yüch je jün huidi ti nögpity, ni ca' pidägy jilby cajón pa'tci'py, jéyi janchtiy pidägy je jün ma jündicxpejt, jaydēbi co pinjaty ytiñhuipy tigoty, codicxiib je jün. ³⁴ Je jün ma miich ajcxy mninícx je' yi' miich ajcxy mhuiin. Pen oy miich ajcxy mhuiin, nañ jadu'n tüg'óciy miich ajcxy mninícx ymüid yi' tucxin. Pen ca' y'óyity mhuiin, nañ jadu'n ajcxy yi mninícx yajpaty agootztuum. ³⁵ Cuend'ájtix yi tiy'ajt huidi miich ajcxy müid, ca' mgoyützcixy, com co jadu'n nicxy y'ahuimbity nej cootzpi. ³⁶ Pen miich mdiy'ajt codicxxy y'ity müid Dios ytiy'ajt, tüg'óciy quēxigtähua'ñ janch huädz.

Jesús ca'p jáygidaci je fariseos etz je escribas ajcxy yhuinma'ñ

³⁷ Co Jesús ycapxtay, chi tüg fariseojäy may'ajt pijctzoy huen nicxy müid cayii. Co Jesús ytiçtigixy, chi y'ixtacy ma je caybejt. ³⁸ Co je fariseojäy iixy jadu'n nej Jesús ytuñ, chi ooy huinmay nej co Jesús ca' ñayajpocyhuächyüi müid nñ jayijpni ma anajty ca'ni ycaayñi. ³⁹ Chi je Huindzin Jesús ymínañ:

—Miich ajcxy fariseojäy, ooy mnaybidaaccixy tudägyjyá ma jáy ajcxy yhuinduu e ca' yjáñchity; chi jada' ma mjot mhuiinma'ñ miich ajcxy ooy m'adzocy, etz müid ajcxy jibic-huinma'ñ; tim jadu'n nipaady nej myajhuäch ajcxy yi tasi ninícx, yi texyñinícx e chi ajcxy yajhu'ngixy jibicpi je tasijoty je texyjoty. ⁴⁰ ¡Miich ajcxy ca' Dios y'ayuc huinjihuüybi! ¿Ca' mnejhuüygixy co yi pin ti texyñinícx yajcojy nañ ti yajcojy texyjot? ⁴¹ Tun miich ajcxy oojyá'ájtín, huin'it janchtiy anajty ajcxy mhüädzity ma mjot mhuiinma'ñ.

⁴² ¡Ay miich ayooobi ajcxy fariseojäy! Com mbidaaccixy abicy tüg pícy je majcpi müid yi Dios ycixpi ixti yi tzajnimang, yi ruda, etz tüg'óciy aay ujtz. Chi jada' ca' mduñ je oojyá'ájtín etz tiy'ájtín jadu'n nej Dios tzocy. Hue' je' oy mduñ co tijaty abicy mbidägy müid Dios ycixpi, nañ jadu'n copicy oojyá'ájtín mdunipy etz Dios ytiy'ajt mguydunipy.

⁴³ ¡Ay miich ayooobi fariseojäy ajcxy! Co ooy m'adzójccixy je ñaybejt huidi códuum ma naymujctac, etz ooy m'adzójccixy co huen jáy ajcxy xycapxpoocxixy oy huindzigiy mayjäy agujc.

⁴⁴ ¡Ay miich ayooobi ajcxy huidi yaj'ixpijcp Dios yley etz miich fariseojäy ajcxy! Oy mjanaybidaacigixy oojyá e ca' yjáñchity, ca' mguydungixy Dios ytiy'ajt, jadu'n nipaady miich ajcxy nej öcpi jut huidi ca' yquēxigy, chi jáy yöy nīgix, com co ca' ñiguēxigy.

⁴⁵ Chi tüg jáy huidibi yaj'ixpijcp Dios y'ayuc ymínañ:

—Huindzin, co jadu'n miich mína'ñ, nañ jadu'n iich ajcxy ooy jibic nayjihüüygixy.

⁴⁶ Chi Jesús ymínañ:

—¡Ay ayooob miich ajcxy Dios y'ayuc huindzin! Miich ajcxy mgójccixyp canaag costumbre huidi je jáy ajcxy ca' mimadäga'ñ, e ca' ajcxy mba'ayoogixy, tim jadu'n nipaady nej jihüüy tüg tzimiy ti mmooygixy

jemxypi huidi ca' je jäy ajcxy mimadäga'ñ, e miich ajcxy ni ca' mgïhuäx jëda'ajty mgayajpadaangixy je tzimy.

⁴⁷ ¡Ay miich ayoob ajcxy! com myajcojcixy je ögpi jut ma je Dios ayucnajtzcaxiïybi naaxtigiy, je huidi m'ap mdeedy ajcxy yaj'o'c. ⁴⁸ Jadu'n yajhuinjihuïy nej jihuiy miich ajcxy ooy mjäygidägy jadu'n nej ajcxy m'ap mdeedy ytundigoy. Janch yi' ajcxy yaj'ögy Dios y'ayucnajtzcaxiïybi, e miich ajcxy myajcoj je öcpi jut ma ajcxy je' ñaaxtigiiy.

⁴⁹ Paady yi' Dios jadu'n huinmay, e minañ: Nyajniguexipyich miich ajcxy profetas etz y'ayuccapxhuäcxpi, e miich ajcxy myaj'ögip nijëjity, etz jacnaagity mbahuidijttäccixipy. ⁵⁰ Dios yajcomidohuipy jadachambi tiempo jäy ajcxy je ypocy huidi y'ap yteedy ajcxy ytuñ, com maabi naaxhuñ chondägy, yi' ajcxy yaj'ögy Dios ytiy'ajtmüdp. ⁵¹ Janch nimaaybich miich ajcxy co Dios yajcomidohuipy jadachambi tiempo jäy ajcxy je y'ap yteedy ypocy co ajcxy yaj'o'cy Dios ytiy'ajtmüdp chondägy ma Abel, ixti Zacarías huidi jäy yaj'o'c ma Dios ytiyc tiba'gujc.

⁵² ¡Ay miich ayoob ajcxy Dios y'ayuc huindzin! Ca' miich ajcxy m'ixpiga'ñ Dios ytiy'ajt, nañ ca' mdzocy co yi' jäy ajcxy ixpiçipy; tim jadu'n nipaady nejjihuïy ti mbicy je tijc ahuaast e ca' miich ajcxy mdigïhua'ñ, e ni mgatzojccixy co huingbi nicxy ytiçiy.

⁵³ Co Jesús anajy jadayaab ayuc yajnimaygixy, chi je Dios y'ayuc huindzin etz yi' fariseojäy ajcxy jotmätcooty chi yaj'amidogoty ajcxy may ayuc. ⁵⁴ Ñayñimáayigixy miñ xyipy co huen amido'ijt Jesús y'ayuc, jigix jëb páatcixipy huidi jëb müd xigixipy.

12

Jesús yaj'ixpicy co ca' huaad pinjaty naybidaaci oyjäy pen ca' yjanchity

¹ Chi je mayjäy ooy nimujcy Jesús, janch jadu'n ñay'adijy ñay'agodiiygixy, chi Jesús nimaydacy je' ydiscípulos jayijp:

—Nigüendi müd yi' fariseojäy ajcxy nej ajcxy yjäyay'ixpiçcixy. Yajxon yi' ajcxy ycapxy ymiydägy, chi ca' cuydungixy. ² Ca' ji ti huidi ijtp ayüch nicxy ycajajnejhuïy, nañ ni ca' ji ti huidi ijtp ameech nicxy ycanigüëxigy. ³ Huen huidi ayuc miich ajcxy ameech mgapxy, yajnejhuïhuip yi'. Huen huidibi ayuc huidi ti mnayyajnimáayigixy ameech jüby tigoty, mic yajcapxhuäcxip tijc nigixy.

Pin jëbi huaad ndzigiiyim

⁴ Chi Jesús yjacminañ:

—Miich ajcxy nmigügtijc, ñch miich ajcxy nimaayb co ca' mdzigiiygixy yi' jäy ajcxy huidibi ninïcx yaj'o'cp, com ca' jac ni ti ajcxy tunipy. ⁵ Ich miich ajcxy nyajni'ixihuipy pin huaad jëbi mdzigiiygixy. Yi' janch mdzigiiygixy yi' Dios huidibi jugy'ajt pijcp, e huin'it müd je' ymic'ajt jëbi quexipy m'alma ma je mij jün. Yi' janch mdzigiiygixy yi'.

⁶ ¿Nej ca' jäy ajcxy ytoogyii migoox joon müd metz pi'cmeen? Dios ni tüg yi' ajcxy ca' jäy digooyity. ⁷ Ixti mgöhuay ajcxy ac michoy Dios müdity. Ca' mdzigiiygixy, jactzou ñgi miich ajcxy ma Dios ca'ydi pi'cjoon ajcxy.

Je pinjaty ca'p midzöyduñyii Jesús mayjäyoty

⁸ Ich miich ajcxy nimaayb co pinjaty ma miich ajcxy huidi capxidzimp mayjäyoty co xymibicyich xymijpidägyich, ñch, je jäy huidi tzoon tzajpjoty, ngapxidzimipyich co ti ngöbicyich jadu'mbi jäy ma Dios

y'ángeles ajcxy yhuinduu. ⁹ Pínjaty ca' xycöbicyich mayjäy'agujc, nañ jadu'n ñich yí' ca' ngöbigípyich jii by ma Dios y'ángeles ajcxy yhuinduu.

¹⁰ Tüg'óciy jäy huídi jadu'n ñich, je jäy huídi tzoon tzajpjoty, xyñigapxp xyñí'ojñiybich Dios huinmecxiib. Chi jada' pínjaty nigapxp ni'ojñiyb je' Dios yjihui'ñ (je Espíritu Santo), yí' janchtiy Dios ca' yhuinmecxiiyb.

¹¹ Co mmídzíp ajcxy xyajnícxíp ma naymujctac, ma codungdíjc, etz tungmíidpí yhuinduu, ca' mdájíp mmáyíp nej m'adzógixípy, e ca' mhuinmayípy nej ajcxy m'adzohuípy. ¹² Com je Dios yjihui'ñ huin'ítíy ajcxy xyajní'ixíhuíp nej huaad m'adzoogíxy.

Naygüend'ajtígíxy ca'p adzojccíxy comeeñ' adí

¹³ Chi nidügti je mayjäy ymínañ:

—Huindzin, nima' n'ajchich co huen yajhuäcxy míid ñich huídi ndaj ndeedyich ñidungíy.

¹⁴ Chi Jesús ymínañ:

—Yéydíjc, ca' ñich ni pín tí xypídägyích ane'mbí ma miich ajcxy etz yajhuäcxpi.

¹⁵ Chi Jesús nímaj je jäy ajcxy:

—Íjxcix naygüend'ajtígíx, ca' m'adzojccíxy comeeñ' adí, com je m'alma yjugy'ájtín ca' je' ndzoocín'adyí huídíjaty miich ajcxy míid.

¹⁶ Chi ajcxy yajnimay tüg ayuc, ymínañ:

—Jim anajty tüg comeeñyjäy huídíbi anajty ooy mij ypidägy yajpidígy. ¹⁷ Je comeeñyjäy anajty ooy cí'm huinmay ma yjot yhuinma'ñ, ymínañ: “¿Tí n'octunípích com ca' nmídidíyich ma nyajnígidägíbi yí tíibi y'ity?”

¹⁸ Chi ymínañ jotjoty huinma'ñyoty: “Nyajpidícníbi ndzëx, e ngójíbi jactmípi, chí tüg'óciy jii by nbíactähuíbi tíibi y'ity.” ¹⁹ Co jadu'n ndunípyich, chí jébi jotcujc ndzinähuíbi, com ooy anajty nmídidíyich pídagy yujcpiy, jébi canaag jimíjt niboocxyích etz jébi ngay n'ügyích jotcujc. ²⁰ Chi Dios nímaj je comeeñyjäy: “Ooy jíbíc-huinma'ñ miich míidíty. Cham coodz ñich miich nibíjctzohuíhuaaníy yí m'alma (m'ögíp), e co anajty tí m'ögy yí huídíbi tí myujcpiy, ¿pín yí' je'adíib?” ²¹ Jadu'n yjajty yí' ajcxy huídíbi ymeeñ'ídi'ñ cí'm yujcpijcp, ca' yí' ajcxy jii by ycomeeñyíty ma Dios yhuinduu.

Dios ycuend'ajtpy y'ung y'anäg

²² Chi Jesús nímaj je y'ixpijcpídjic:

—Paady ajcxy nimaagyíxy co ca' huaad mjottígoogyíxy ma yí mdzináayín yí mjogy'ájtín, huídi mjíxcxípy mgáaygíxy, huídi míid mnínícx mxójcxípy. ²³ Yí jugy'ajt jactnígí tzou yí', ca'ydi yí caayín uucín, etz je mnínícx jactnígí choohuíty ca'ydi huit. ²⁴ Íjxcix yí joogy ni ca' ñípy, ni ca' chíjccíxy, ni ca' míidíty ytíjc ní chëx, e Dios yí' ajcxy mooyípy huídi yjíxcxíyp, ¿nej cayjactnígí miich ajcxy mdzoohuíty ca'ydi joon ajcxy? ²⁵ Ca' jí ni pín ma miich ajcxy pín jadípy nej ñayjíptzomíhuíib jadüg cínúux. ²⁶ Pen ca' mjaítcíxy nej mdúngíxy huídi huen huinma'ñ, ¿nej co mdzachimíjottígoogyíxy yí tzínaayín yí comeeñ'ájtín?

²⁷ Íjxcix yí aaybíjy nej xóyíty, ca' ytaaccíxy ní ca' yxuuygíxy. Ích miich ajcxy nimaayb, co ní je rey Salomón míid tüg'óciy ymeeñ' ca' ñayxojí jadu'n nej jada aaybíjy ujtzpijy. ²⁸ Pen jadu'n Dios xoxy yí aay yí ujtz

huidibi cham jajtíp ma yí tungop, e com jabom tí anajty ñiicxni, Dios xypubedipy xypudigihuiipy nígi miich ajcxy huídí hueen mibijcp. ²⁹ Ca' miich ajcxy mhuinmay'ahuídítcixipy ajcxy tí mgáaygixipy m'úuccixipy. ³⁰ Yí naaxhuíñyáy ajcxy ymijottigoyb anaxy tūg'óciy caayin uucín, huit etz tijaty. Miich ajcxy huídí mijpidacp Dios, Dios Teedy ñejhuíyib co copicy ajcxy miid'adipy caayin uucín etz huit tucxy. ³¹ Jayijp mijottigooygix Dios y'ayuc ytiy'ajt, chí jada' tūg'óciy huídí ajcxy myajmayjajty mbáatcixipy yí.

Jugy'ájtín mijpi jiiyby tzajpjoty

³² Chí Jesús yjacmínaañ:

—Ca' miich ajcxy mdzígíygyxy, miich ajcxy mnihueeñity, per mDios Teedy yega'ñ ane'mdac tzajpjoty miid miich ajcxy ycixpi. ³³ Toocix tijaty miich ajcxy miid, nimooygix ayoobitjc. Yaj'oyíygyx meeñ'idi'ñ huídí ca' y'amijihuiipy ní camina. Yaj'oyíygyx tūg pidägy, janch mij e janch oy, jiiyby tzajpjoty huídí ca' ycixipy ytigoyipy, ma ca' meetzpi huaad ytigíy, ní ucxyting ca' yajhuindigoyipy. ³⁴ Pen miich ajcxy miid mgomeeñ'ájtín ya naaxhuíñ, yaayí je mjot mhuinma'ñ ajcxy. Pen mdzojcpy ajcxy je oybí huídí Dios yegamy, nañ miid'ájticy jim jabom jabom mjot mhuinma'ñ ajcxy ma Dios.

Tzoc íjtín ní'ixí'

³⁵ Chí Jesús yjacmínaañ:

—Ní'ixíygyx mjot mhuinma'ñ jadu'n nej jihuíy mhuit myujc'ameetcixy co mdunaangixy, etz jadu'n nej jihuíy lámpara mnögpjccixy co mdzumnaxaangixy m'ahuixaangixy je huindzín. ³⁶ Ní'ixí'íjtcix jadu'n nej jáy huídí yhuindzín ahuijxp, co anajty yhuimbity co anajty tí y'oy ma jáy tí ypicy, chí co anajty minipy ycogapxíy, mic'amy myaj'ahuädzity ytijc. ³⁷ Jotcuyc ajcxy je tumbi co je yhuindzín anajty yjädý, e paady chumnajx juugy. Janch nimaaybich miich ajcxy co je tumbi ajcxy yhuindzín anajty yjädý, chí yhuit yujc'ameedipy, chí ajcxy yaj'ixtägipy ma caybejt, yajcayipy yaj'ügipy. ³⁸ Oy miinipy je huindzín mijcoodz o moñyi, e páadip je tumbidíjc ajcxy jim chumnájxcixy juugy, jotcuyc je' ajcxy je jadu'mbi tumbidíjc. ³⁹ Nejhuíygyx jada co je codíjc ixipy nejhuíhuipy tí hora ymina'ñ je meetzpi, chí juugy ixipy chumnaxa'ñ, e ca' cíyegipy ytijc níxcy jáy tigoty ymeech. ⁴⁰ Miich ajcxy nañ jadu'n íjtcixy ní'ixí', mína anajty ca' tí mhuinmaaygixy, huín'it mína'ñich íich, je jáy huídí tzoon tzajpjoty.

Je tumbi tudägypí etz je tumbi ca'pí ytudägyity

⁴¹ Chí Pedro Jesús nímay:

—¿Pín jada tí myajnímaayb jada ayuc huídí tí mgapxy, íich ajcxy, o nidüg'óciy jáy?

⁴² Chí je Huindzín Jesús yminaañ:

—Huídíbi tumbi je' ya huídí tumb miid yhuindzín janch cixyjot huínijot huídí miid yhuíjy'ajt ycuyc'ajt huídí je yhuindzín mooyip ané'mín ma ytijc, huídí yajnígidägíyib tumbidíjc nej ypaadyii. ⁴³ Jotcuyc je tumbi co anajty je' yhuindzín yhuimbity e padíyib tí cuyduñ jadu'n nej anajty tí ñimäyíi. ⁴⁴ Janch íich miich ajcxy nímäy co je tumbi huindzín yajmihuí'mdähuiipy jada ytumbi tūg'óciy pidägy huídí ymiid. ⁴⁵ Pen je tumbi yhuinmaayb jotjoty huinma'ñyoty co je yhuindzín yhuäcxijpni mína ymiina'ñ, chí midziptzooni jacjadyii tumbidíjc ajcxy, huojpni, cojxni, nañ ytigíyñi

caayb uucp anaxy etz ymügyii. ⁴⁶ Chi je tumbi yhuindzin miinipy ma je xii hora anajty ca' jipp'ixy e ni canejhuüy anajty, e huin'it ooy tzaachytunipy yi tumbi e chi pidägyipy ma je huidi ajcxy ca' ytudägyity.

⁴⁷ Je tumbi huidi nejhuiyb nej yhuindzin chójcin, e ca' cuyduñ, ni ca' ycapxymidooy, ni ca' ni'ixi' ity co yhuindzin anajty yhuimbity, je' je' nīgi yajtzaachytunip. ⁴⁸ Je tumbi huidi ca' yajxon huinjihuüy nejjihuüy yhuindzin chójcin, hueeni je' yajtzaachytunipy. Huenpínity huidi may yajmooyb, may yi' yajmibijctzohuiyb; etz huenpínity huidi ti mihui'my ooy, yajmibijctzohuiib nīgi.

Jesús ycixpi ñaybijc-huäcxyii jäy

⁴⁹ Chi Jesús yjacmínañ:

—Hich ti nmiiñich ya naaxhuiñ co jün nbidägyibich. ¡Ooy njadzocyich ji ixypy ñitooyñi! ⁵⁰ Nyajnapyich tüg tzaachypi, e ¡ooy ndajy nmayich ixti mabaad yajcuyduñ! ⁵¹ ¿Nej miich ajcxy mdijy co ti nmiiñich ya naaxhuiñ co nyajcixipyich je tzipi? Hich miich ajcxy nimaayb co ca'. Hue' janchtiy nyajnaybijc-huäcxáanibich jäy ajcxy. ⁵² Jadaachambi etz yjacnícxni xii tiempo ji migoox tüg quëxjäydijc huidibi ajcxy ñaybijc-huäcxíib, tugüg müid je metzpi, e metzpi müid je tugügpi. ⁵³ Je ungededy tziptunip müid ymang etz je mang müid yteedy. Nañ je ungdaj tziptunip müid yñix etz je nix müid ytaj. Nañ jadu'n je xecy tziptunip müid yxecy.

Je xii tiempo ytiy'ajt

⁵⁴ Chi Jesús nimay je mayjäy ajcxy:

—Co ajcxy m'ixy je joc ypidigy ma xii ycidägy, chi mīnaangixy co tühuaam, e janch jadu'n yjadyii. ⁵⁵ Co ymiñ je jünboj, chi miich ajcxy mīnaangixy co ambigaamb, chi janch jadu'n yjadyii. ⁵⁶ ¡Miich jibic jäy ajcxy! Ooy mjajtciy nej myajcapxcixy yi xii tiempo huidi ajcxy m'ijxpy tzajpcixy etz ya naaxhuiñ: ¿Nej co ca' mjajtciy nej myajcápxcixipy xii tiempo ymiñ ycidägy?

Naymi'oyihui müid midzip

⁵⁷ ¿Nej co miich ajcxy ca' c'm mneydiydúunigixy nej ytudägyity je tiy'ajt? ⁵⁸ Co mnícxipy ma yi codung müid yi mmidzip jac'oy co mnayyaj'oyihuiipy müid yi mmidzip tü'am, ca'ydi müid mjädiy ma yi codung, e chi je codung xyciyegipy ma je xueetz, e je xueetz xypidägyip pujxtigoty. ⁵⁹ Hich miich nimaayb co ca' jüiby mbidzimipy, ixti cooni mgüejttähuiipy tüg'óciy.

13

Ooy ycopícyity nyajtigajtzim nhuinma'ñ

¹ Huin'it jäy müidmīydacy Jesús jadu'n nej je gobernador Pilato yaj'ögy nijëjity jäy jim Galilea, chi tem huidijti ajcxy ñi'py müid iyuc ñi'py huidi je' ajcxy müid huindzigi'ñ tuuñ. ² Chi Jesús y'adzooy nimay ajcxy:

—¿Nej mdijy, nīgi anajty ypocymidity je galileojäy ajcxy huidi jadu'n ayo'n patp, ca'ydi nidüg'óciy galileojäy? ³ Hich miich ajcxy nimaayb co ca'. Pen miich ajcxy ca' mjothuimbijtcixy ma Dios etz nay'adzigiiyigixy ma Dios, nidüg'óciy miich ajcxy mgijxtähuiip mdigoydähuiip. ⁴ E je' ajcxy je majmocxtugügpi huidi je mjtijc jim Siloé nigidaagootti, yaj'óci ajcxy. ¿Nej mdijy nīgi ajcxy ypocymidity, ca'ydi nidüg'óciy je jäy huidi tzinayb

jim Jerusalén? ⁵ Hich miich ajcxy nimaayb co ca'. Pen miich ajcxy ca' mjothuimbijtcixy, nañ mgijxtähuiþ mdigoydähuiþ miich ajcxy nidüg'óciy, jadu'n nej je' ajcxy.

Ijxpejt ma je higueri ca'pi anajty ytüm'aty

⁶ Chi Jesús yajnimay ajcxy jada ayuc:

—Tüg jäy anajty müdity higueri cojy ma y'aguemy, chi ñicxy jiiby ma y'aguemy higueri tüm ijxtaaybi, ni ca' paty. ⁷ Chi nimay je' ytumbi: “Cham midugüg jimijt müñich ya higueri tüm ijxtayb ma jada higueri cop, ni tüg ngapaadyich. Huen yajpujxciday jada higueri cop, nej co nigooþi ñaaxnihua'ñ.” ⁸ Chi je' ytumbi y'adzooy: “Huindzin, oc'ixmatz. Huen jaduñ jimijt jëyi ocjactinây, octajyich jayijp yi naax jühuidityi, etz oc'abonijiyich. ⁹ Pen tüm'ajt ca' nyajpuxipy, pen ca' ytüm'aty jëbi nbújxigipy.”

Jesús yajtzögy pocxx#duum tüg töxyjäy jigoojpy

¹⁰ Chi Jesús anajty yaj'ixpicy ma tüg naymujctac pocxx#duum.

¹¹ Jim anajty tüg töxyjäy huidi anajty mimajmocxtugüg jimijt cujc mi'ijtni yj#bojpa'm, agojojy anajty yöy, ni nej anajty yca'oyiy nej ytinaygugihuiþy. ¹² Co Jesús ijxy, chi yaaxi, e nimay:

—Töxyjäy, ti mdzögy.

¹³ Chi yci' cijxxajy ma je töxyjäy yj#x, e chi je' yj#x ytüy, huin'it ytiügü Dios ojadajþi. ¹⁴ Huin'it je naymujctac huindzin ooy yjotmäty müd co anajty Jesús jäy ti tzoyiy pocxx#duum. Chi je naymujctac huindzin nimay ajcxy je mayjäy:

—Jëyi tudujc x# jäy huaad ytuñ, huen miñ semaanjoty þin yajtzoyihuam, ca' ypocxx#duumity.

¹⁵ Chi je huindzin Jesús ym#nañ:

—iMiich ajcxy naybidaacip nej tudägyjäy, e ca' yjanchity! ¿Nej ca'miich ajcxy mmigüejiy mhuaajuubi, etz mburro ma ypëcxtac pocxx#duum, e myajnicxy ajcxy ni'ucpi? ¹⁶ E jada Abraham y'ap y'oc huidi Satanás ca' y'ixmachii majmocxtugüg jimijt, ¿nej ca' ypadyii nyajtzögibich pocxx#duum?

¹⁷ Co Jesús jadu'n y'adzoy, chi yajtzöyduñ ymidzip. Chi tüg'óciy cajpjäy oy ajcxy yjotcugügyixy müd je oybi huidi Jesús ytuun.

Ijxpejt ma je mostaza pájc

¹⁸ Chi Jesús ym#nañ:

—¿Nej m'oc'a'ix#ygyixy yi Dios y'ané'min? ¿Huidi müd n'ocyajquipxihuibich? ¹⁹ Jadu'n Dios y'ané'min nipaady nej mostaza pajc huidibi tüg jäy ñiip ma y'aguemy, chi ymujxy etz yeegy ooy janch mij, chi je joon ajcxy oy ype'ñ þidaaccixy ma je mostaza quipy aacxy.

Ijxpejt ma je levadura ca'p óyity

²⁰ Chi Jesús jadüg'oc ym#nañ:

—¿Huídibi müd n'ocyajquipxihuibich yi Dios y'ané'min? ²¹ Jadu'n Dios y'ané'min ni paady nej levadura huidi tüg töxyjäy ytijhuidijt müd tugüg quipxi'ñ harina ixti cooni yajxunday je harina.

Je tü'aa xützpi

²² Co Jesús anajty ñicxy jim Jerusalén, chi yaj'ixpicy anajty Dios y'ayuc ytiy'ajt cajp cajp majaty ñaxy. ²³ Chi tüg jäy Jesús amidoy:

—Huindzin, ¿nej hueeni yi jäy ajcxy huidi y'alma nïdzögip?

Chi Jesús y'adzooy:

²⁴ —Mijpidaaccix Dios ytiy'ajt amuumdügjet, jëbi ajcxy m'alma nïdzögipy, jadu'n nipaady nej jäy ajcxy ñaymic'ijxigixy co ytigihuaangixy ma je tijc aguu xützpi. Jadu'n ñich miich nïmaayb co mayjäy ooy ja'a'ixiy ytigihuaangixy ma Dios y'ane'my e ca' ajcxy jadipy nej ytigiiygixipy. ²⁵ Co je codijc ypidigipy etz agiiñip ytiyc, huin'it miich ajcxy pinjaty tibäy hui'm, chi jiiyby tibäy miich ajcxy mminandägipy: “Huindzin, yaj'ahuädz”, e chi je tijc huindzin miich ajcxy xy'adzohuipy: “Ca' ñich miich ajcxy nejhuüyich ma miich ajcxy mdzoongixy.” ²⁶ Chi huin'it miich ajcxy minandägipy: “Miid ñich ajcxy miich ti nmüdgaaygixy ti nmüd'uuccixy, e miich ti myaj'ixpicy ma ñich ajcxy ngajp.” ²⁷ Chi je Huindzin y'adzohuipy ajcxy: “Ñich miich ajcxy nïmayb co ca' nnejhuüyich ma miich ajcxy mdzoongixy. Jihuäccix ma ñich nhuinduu, miich ajcxy pocy ytumbi.” ²⁸ Chi miich ajcxy jim ooy mdäjcixipy mmäygixipy, myäaxcixipy mdiitzquéetcixipy, co miich ajcxy m'ixipy Abraham, Isaac, Jacob etz tüg'ócay yi Dios y'ayucnajtzcaxiyybi jiiyby ma Dios y'ane'my, e miich ajcxy tibäy anajty ti mhui'mgixy. ²⁹ Minip yi jäy ajcxy huidibi tzoomb ma xii ypidzimy, ma xii ycidägy, ma jayhuixtujc ypidzimy, etz cham ma madzäcruudz ytinaay'ahuüy, chi y'ixtäaccixipy ma je caydac jiiyby ma Dios y'ane'my. ³⁰ Paady ji jäy ajcxy huidi cham axam'ajtp, je' ajcxy jayjip'adip, etz ji jäy ajcxy huidibi cham jayjip'ajtp, etz je' ajcxy axam'adip.

Jesús taj may miid Jerusalén ycixpi

³¹ Chi nijëjity fariseojäy nïmay Jesús:

—Quëg ya com yi rey Herodes xyaj'ögaam.

³² Chi Jesús y'adzooy:

—Nïcx nïmaaygix yijiiibi huaax co nyajpidzimybich ca'oybi etz nyajt-zoocypich jäy cham etz jabom, codugüg xii ti ndung mayijich. ³³ Ooy ycopyity co ñich njactüoyibich cham, jabom etz huixtic. Com ypaadyii co Dios y'ayuccaxhuäcxpi y'ögip ajcxy jim Jerusalén.

Chi Jesús yjacmïnaañ:

³⁴ —¡Jerusalén jáy! ¡Jerusalén jäy! huidibi yaj'o'cp Dios y'ayucnajtzcaxiyyb ajcxy, etz ycögädz ajcxy je jäy huidibi Dios ti xyajnigüéx ajcxy. Janch canaag'oc ñich miich ajcxy njahuijtzmuga'ñ jadu'n nej tzeydaj y'ung yajmucy queecpätäpy, chi ni ca' jadu'n ti m'a'ixiiygixy. ³⁵ Chi jada' ijxcix cuenditungix, com jadachambi mgajp yhui'my najtz'ixi'. Ñich miich ajcxy nïmayb co ca' xy'ixipyich jadügtecy, ixti cooni anajty tiempo paaty mina mminäangixipy: “Caxpaaty je' huidi miimb miid Huindzin'ajtïn Dios ycixpi.”

14

Jesús yajtzögy tüg yëydijc quixpa'mmiidpi

¹ Chi jadu'n yjajti co tüg pocxxiïduum Jesús ytigiy ycaya'ñ anajty ma tüg fariseojäy ytiyc, hue' anajty judío tungmiidpi. Chi yi judío ixpicytijc ajcxy tzach'ix'ijtcixy Jesús, amidoo'ijtcixy Jesús y'ayuc. ² Huin'it tüg jäy huidibi ymiid anajty quixpa'm miin ma Jesús yhuinduu. ³ Chi Jesús ymiigapxi je' ajcxy huidibi yaj'ixpijc Dios ñecy etz yi fariseojäy ajcxy, nïmay:

—¿Nej je Dios ytiy'ajt ymīnañ? ¿Huaad o ca' huaad chögy jäy pocxxi#duum?

⁴ Chi ajcxy y'amonday. Huin'it Jesús cīnīxajīy je pa'm jäy, chi yajtzoocy.

⁵ Chi Jesús nīmay je fariseos ajcxy:

—¿Nej miich ajcxy pen nījutcögāp ajcxy mhuaajuubi o mburro pocxxi#duum, nej ca' mic'amy nīcxy yajpidzimgīxy oy y pocxxi#duumi?

⁶ Chi ca' ajcxy jajty nej y'adzohuimbījt cīxīpy.

Je pīnjaty huodzoōñyīp ma je pījcpī yajnīxī#duñyī

⁷ Co Jesús ijxy jadu'n nej yī' ajcxy jac'oybī iñaybejt huin'ijxcīxy jīm ma je caybejt, chi ajcxy tūg ayuc yajnīmaayī, je tībī anajty yajhuomiingīxy:

⁸ —Co miich myajhuoohuīpy ma pījcpī yajnīxī#duñ, ca' m'ixtāgīpy ma je iñaybejt cōdumbī, ca' jēcyty co yajhuoomīñ huīdi je' iñaybejt ymīhuaad.

⁹ Chi jada' xyñīmāhuīpy je huīdībī anajty tī xyhuoomīñ: “Mo' jada mīgūg jada iñaybejt cōdumbī.” Chi miich tzōydu'n mīd mñīcxy ma je' iñaybejt axambī.

¹⁰ Co jāy xyhuoohuīpy ma je pījcin yajnīxī#duñ, jīm m'ixtāgīp ma je axambī iñaybejt, e co ymīnīpy je huīdībī anajty tī xyhuomīñ, chī xyñīmāhuīpy: “Mīgūg, nax ma yī iñaybejt cōdumbī.”

Huin'it capxpaady m'idīpy ma je' ajcxy huīdībī anajty iñayb ma caybejthuīnduu mīd miich.

¹¹ Pīnjaty cī'm naygōmāyīp, tzōydu'nbaadīp je'. Pīnjaty naybīdaacīp nīcy xeemy je' je' capxpaady y'idīp.

¹² Chi Jesús nīmay pīnjaty huīdi anajty tī yhuoomīñyī:

—Co miich mxī#duunīpy ca' mhuoohuīpy je jāy ajcxy huīdībī ooy mīd mnaymīgūg'ājtgīxy, nī mmīdūgquēx, nī m'ajuugy m'amīgūg, nī mmīdījc comeēñyī, ca' jēcyty co nañ jadu'n xyhuoohuīpy, e chī anajty jac mīj yejc-huimbījty.

¹³ Co mxī#duunīpy, chī huoohuīpy ayoobītījc, tzaachījāy ajcxy, tecymātpī ajcxy, etz jāy huiintzpi. ¹⁴ Huin'it miich mjotcuje'adīpy co yī' ajcxy ca' jadīpy nej yejc-huimbīdīpy. Jiīnī Dios xymīgūedīpy co anajty yajjugypīcy je tudāgypī jāy ajcxy.

Je ijxpejt ma tūg adzūu'ājtin mījpi

¹⁵ Tūg jāy huīdi anajty iñayb mīd Jesús ma caybejt huīnduu co mīdooy nej Jesús ymīnañ, chī nīmay Jesús:

—Jotcuje je jāy ajcxy huīdi cayīp jīlby ma Dios y'ane'my.

¹⁶ Chi Jesús y'adzooy:

—Tūg jāy may anajty jāy yaj'adzu'ada'ñ, chī jayījpnī oy mayjāy nīmay co anajty yaj'adzu'ada'ñ.

¹⁷ Co je adzūu'ībī paty, chī quejxy tūg cogapxy huen nīcxy huooogīxy je tībī anajty ajcxy yajnīmāy, nīmay ajcxy: “Jāmgīx, tī jīm yajnī'ixīy je caayīn uucīn.”

¹⁸ Chi ajcxy nidūg'ócy ymīnandacy: “Tun may'ajt meecxcīch, ca' y'oyīy nej nyajnīcxībīch.”

Chi je' jayījpnī jāy y'adzoy: “Tī njuyīch tūg rancho je' copīcy jayījpnī nīcxy n'ixyīch, paady ca' nīcxa'ñīch; tun may'ajt meecxcīch.”

¹⁹ Chi jadūg jāy ymīnañ: “Tī njuyīch mīgoox par huaj yuubi, nīcxy n'oc'ijxmadza'ñīch jayījpnī, paady ca' y'oyīy nej nīcxībyīch, tun may'ajt meecxcīch.”

²⁰ Chi jadūg jāy ymīnañ: “Tīm chamnī nbīcyīch, paady ca' oyīy nej nīcxībyīch.”

²¹ Co je cogapxy yhuimbījty, chī yajnīmay je' yhuīndzīn jadu'n nej je jāy ajcxy y'adzooy huīdi anajty oy tī huoy. Huin'it je huīndzīn ooy yjotmātcoty, chī nīmay je ytumbī: “Nīcx tzojcyī cajpjoty ma yī jāy ajcxy yōygīxy ñajxcīxy etz ma yī mīj tū, e chī huomīnīpy pīn mdīmypaayp ayoobītījc, yī tzaachījāy etz huiintzpi.”

²² Chi je' ytumbī ymīnañ: “Huīndzīn, tī nduñīch jadu'n nej tī

xyñimäyich, etz jac chiini ñaybejt.” ²³ Chi je huindzin nimay je' ytumbi: “Ñicx ma yi mij ni mij tü yajmin je jäy ajcxy adzip, huen ñch ndijc uch. ²⁴ Chi ñch miich nimäy co ni tüg yi jäy ajcxy huidi jayijp yajnimay, ca' ajcxy y'adzuu'adipy miid ñch.”

Nej ooy chípity co Cristo nbanicim

²⁵ Chi may anajty jäy ñicxy miid Jesús, chi Jesús yhuäc-huimbijty, nimay ajcxy:

²⁶—Pen ji pin xypamiñich, e ooy ñigi tzocy yi' ytaj yteedy, yi' ytöxyijc, yi' y'ung, y'ajch o chi', etz nañ ooy ñigi tzocy yi' yjugy'ájtín, ca' ñch yi' huaad ndiscípulo'adyiijch. ²⁷ Yi jäy ajcxy huidi xypamiimbich huidi ñch ndiscípulo'adaañp, copicy yajnaxipy ajcxy ayo'n, jadu'n nipaady nejjiñhuüy ycrudtz ti cabiccixy e nicxy yajcrudtzpeda'ñyii. ²⁸ Co miich ajcxy mmijtjic mgoja'ñ, chi miich ajcxy jayijp m'ixtaaccixy e m'a'ixiygixy jadu'ñyi meeñydunaangixy, nej pen miid ajcxy huidi jébi miid myaj-maaygixy je mmijtjic, o peni ca'. ²⁹ Ca' yjécyity co anajty je tijc ti yajpo-jtzigy, chi anajty ca' m'ocjajtni nej myajmayipy, e pinjaty anajty ti xy'ixy, chi ooy xyñixigipy xyajxigipy. ³⁰ Chi jäy ajcxy ymina'ñp: “Jadayaabi yéydijc ñgoo ti yajtzondägy tijc poch, e ca' ti ocyajmaayñi.” ³¹ O huidi rey ji co chona'ñ tziptumbi miid huingbi rey, ¿ca' jayijp huinmayipy pen jébi chíptuñ miid majc mil jäy, pen je ymidzip miimb miid iipx mil jäy? ³² Ca' yjécyity co je tügpi rey jiguemni anajty miñ, chi quexipy tüg huingapxpi pijctzohuipy may'ajt ca'ydi yi tzip yjadyi. ³³ Hueñypínity ma miich ajcxy pen ca' m'ixmájtzcixy tüg'óciy tijaty miich ajcxy mmid, ca' ñch yi' huaad ndiscípulo'adyii.

Co je caan ytamtz'ajt ytigooyñi

³⁴ Yi caan ooy yi' y'óyity pen ymiid ytamtz'ájtín. Co je caan ytigoy ytamtz'ájtín ca' ji ni ti xücx'ájtín yegipy. ³⁵ Yi caan huidi ti ytigoy ytamtz'ájtín ni ca' y'oybidágnity ma je naax, ni ma je püx huidi aboon'ajtp. Hue' janchtiy yaj'ixjidejtp tibäy. Pinjaty ñch n'ayuc xymidohuaañp huen mido'mbicy.

15

Ijxpejt ma je cöbixy huidibi tigooy

¹ Chi ajcxy je yajcuetpídijc etz pocyjäydijc nimijhuágtay ajcxy Jesús tzach'amído'idaani ajcxy je' y'ayuc. ² Chi ajcxy huidi ooy tzachmijpídägy judíojäy ytiy'ajt etz huidi ajcxy yaj'ixpijc Dios ñecy ameech nigapxcixy ni'ojüygyixy je Jesús, chi ajcxy yminañ:

—Yi Jesús pocyjäydijc ajcxy ymígüg'ajtpy, e yi' miid ycaaygixy.

³⁻⁴ Chi Jesús jadayaabi ayuc ajcxy yajnimay:

—Huidi jäy ji ma miich ajcxy pen ymiid migo'px cöbixy co ytigoy nidügti, ¿nej ca' yajhuimipy je mada'px majmocx midaxpi jim ma chinaaydac, chi nicxy ixtäy huidi anajty ti ytigoy ixti cooni paadip? ⁵ Co paadip, chi mic'amy pidägip ma quejycop janch jotcuic. ⁶ Co yajjädip ma ytijc, chi huomucy ymígügtijc etz ymijñn ymidijc, nimähuiipy ajcxy: “Jotcugiygix miid ñch, ti ñch ngöbixy nbaady huidi anajty ti ytigooy.” ⁷ ñch miich ajcxy nimaayb co nañ jadu'n tzejpjoty ooy jotcuic'ájtín ñigi miid co tüg pocyjäy yjothuimbity, ca'ydi miid mada'px majmocx madaax tudägypi jäy huidi ca' ytundigoy.

Ijxpejt ma je meeñ huidibi tigoy

⁸ Chi Jesús yjacmīnañ:

—¿Huidi töxyjäy ji pen ymīd majc ymeeñ, co ytigooy tūg meeñ, nej ca' jīn nōctzohuipy, e ytiġihuipy pedġipī ixtāhuipy ymeeñ oñydāgy ixti cooni paadipy? ⁹ Co paady, chi huomucy ymġġgtijc etz ymijīn ymīdijc, e chi nīmāhuipy: “Xondaaccix mīd ġich, ti ġich nmeeñ nbaty huidibi ġich anajty ti nyajtigoy.” ¹⁰ Jadu'n ġich miich ajcxy nīmāy co nañ jadu'n Dios y'āngeles ajcxy ooy yjotcūjcity co yjothuimbity tūg pocyjäy.

Ijxpejt ma je ung huidibi ymeeñ yajtiġxtay

¹¹ Nañ jadu'n Jesús yjacmīnañ:

—Tūg yēydijc ymīd anajty metz ymang. ¹² Chi je jacmutzpi nīmay yteedy: “Tat, mooyġich yī pīdāgy huidi xypaatpich.” Chi je' yteedy je pīdāgy yajhuācxy. ¹³ Hueeni anajty xī tzuu cujc ñicxy, co je' ymang mutzpi yajmujctay tūg'óciy huidi yī yjē'ajtpy, chi chooñ ñicxy huingnaax huingġajp. Chi jīm mic'amy yajtunday yajtigoyday tūg'óciy huidi anajty ymīd. ¹⁴ Co anajty ymeeñ tūg'óciy yajtundāy, chi mīiñ tūg mij yuu ma je cajp. Chi ooy je mang mutzpi caayin uucin huit meeñ jayajmayajtni. ¹⁵ Chi je' ninicxy tūg jāy ma je jimbī naaxjot ymīduna'ñ anajty. Chi yquejxi ma yrancho idzim cuend'ajtpi. ¹⁶ Ooy anajty janijot'aty ycūxa'ñyī mīd je pētztīm huidi anajty idzim y'ojcpy. Chi ni pīn anajty ni ti ycamōyī. ¹⁷ Co yhuinma'ñ yajmejch, chi ymīnañ ma yjot yhuinma'ñ: “Jīm janch maytumbi ma ġich ndeedy ytijc, ymīd ajcxy jīcxy pīcy janch may'amy. ġich ya tzach'ayoob mīd yuu xī. ¹⁸ Tzonaambich ya, nīcxa'ñich ma ġich ndeedy, nīmāhuibich: Tat, ti ndundigōyich mīd Dios tzajpjotypi etz mīd miich. ¹⁹ Cham ca' ypadyīi miich mīna'nīp co miich xy'ung'adyījich. Yajtungich jadu'n nej mdumbidijc.” ²⁰ Chi je' choñ, ñicxy ma yteedy. Jeguēgyñi anajty ymīñ co yteedy y'ijxpaati. Chi yteedy ypa'ayogoti, e ñicxy poyġy oy jīpcobadiy. Chi yōgmīnennajxy etz tzūcxy. ²¹ Chi je ung ymīnañ: “Tat, ti ndundigooyich mīd Dios tzajpjotypi etz mīd miich. Cham ca' ypadyīi nīcxy miich mīna'ñ co ġich miich xy'ung'adyīi.” ²² Chi je ungdeedy nīmay je' ytumbi: “Yajpīdzim je huit oybi, mic'amy yajnjēniyġix jada n'ungich, chi mooyġix yī cījiitz etz ycġ. ²³ Nīcxy yajtzoongix yī huaj mang nīcxi, yaj'ōccix, chi ngaayim n'uucim e nxīduunim. ²⁴ Jada n'ungich jadu'n nīpaady nejjihuīy anajty ti y'ōgy, e chi ti yjugypicy. Tigooy yī' anajty e ti yjādy.” Chi ajcxy ooy yjotcugīy.

²⁵ Chi je ymang mijpi camjoty je' anajty. Co yja'ty mīhuingon je ytijc, chi mīdoy co jāy ooy yxūxy etz y'ech. ²⁶ Chi yaaxi tūg ytumbi y'amīdooy: “¿Ti yī' tūnīp jājtīp?” ²⁷ Chi je tumbi y'adzooy: “Ti yjādy m'uch, ti mdeedy yaj'ōgy tūg huaj nīcxi, co ymang ti huimbity juugy.” ²⁸ Chi je unġgoob ooy yjotmāty, ca' anajty ytiġīhua'ñ tigoty. Huin'it je yteedy ñībīdzīmi, ycohuanīyī co huen tiġīy tigoty. ²⁹ Chi je' y'adzooy, nīmay yteedy: “Janch mīcanaag jīmjt ġich miich mīd nduñ, ni ca' ngapxhuimbityich. Ca' chambaad miich ni xycamooyich tūg pī'ccōbixy jaydēb njotcuġ'adipyich nxīidunīpyich mīd nmġġgtijcich. ³⁰ Per co yī mmang ti yjādy huidi oy ti yajtundāy yī ymeeñ mīd jībīc-huinma'ñ mīd jībīc töxyjäydijc ajcxy, chi ti myaj'ōgy huaj mang nīcxi mīd yī' ycīcxi.” ³¹ Chi je ungdeedy nīmay je' ymang: “Miich ung huinīxī ya mīd n'ity. Tūg'óciy huidi nmīdich miich yī' mje'. ³² Ooy ycopīcyity co nxīduunim etz njotcugīyim, co yī m'uch

jadu'n anajty nej ti y'ogni, e jadachambi ti yjugypicy, ti anajty ytigoy, e cham ti yajpaady."

16

Je ijxpejt ma je mayordomo huidibi ca' yhuindzin miduñ tudägy

¹ Nañ jadu'n Jesús nimay yi' ydiscípulos:

—Jim anajty tügjäy comeeñybi, ymüid tüg ytumbi huidi yi' ypidägy cuend'ájtíp. Chi oy nimäyüi co tüg je ytumbi nigoo anajty tzachyajtüñ je meeñ ma ycapaadyüi. ² Chi je huindzin oy yajhuoyüi je' ytumbi, chi nimay: "¿Nej jada co ñch jadu'n nimäyüijich müid müich ycxipi? Ya yi' cuenti cimoydaaygich nej ti mduñ, etz ca' ñch miich n'ocjactumbi'adaanin." ³ Chi je pidägy cuend'ajtpi jot'ajti: "¿Ti ndunipich? co yi' nhuindzin xyajpidzima'ñich ma yi' ytung. Juttajüi ca' njatyich, je limosna nbijctzohuipyich tzöydümbich. ⁴ Nejhuüybich ti ndunipich jaydéb jäy ajcxy xycöbigipyich ma ajcxy ytiç." ⁵ Chi tüg tüg huoy pin anajty minuucx'ajtp je' yhuindzin; chi y'amidooy je jayjipi: "¿Jadu'ñyi müich minuucxy'adyüi ñch nhuindzin?" ⁶ Chi je' y'adzooy: "Migo'px garafón aceite." Chi nimay: "Matz mnecy, ñña' mic'amy, e cojayi' huixchigüipxmajc." ⁷ Chi jadüg nimay: "¿Müich jadu'ñi mminuucxy'adyüi?" Chi je' y'adzooy: "Migo'px quipxi'ñ trigo." Chi nimay: "Matz mnecy, cojayi' mida'px." ⁸ Chi je pidägy huindzin capxpaaty je jibicjäybi huidi cuend'ajtp yi' ypidägy co oy yhuinma'ñybaady mij; co jadachambi naaxhuiñyäjy huidi ca' mibicy Dios, nügi ajcxy ypegyity müid yhuinma'ñ, ca'ydi yi' jäy ajcxy huidi huinjhuüyb Dios ytiy'ajt.

⁹ ñch müich ajcxy yam nimaayb migüg'ájtigixy yi' jäy ajcxy müid yi' meeñ huidibi ca' ytimyüity, jigix co je meeñ anajty myajmayajtcixy ji pin müich ajcxy xycöbigip ma jugy'ajttac huinxiñbi.

¹⁰ Je' jäy ajcxy huidibi yajxon cuydunam je ané'min huidi hueeni, nañ yucuydunamy je ané'min huidibi mijip. Je jäy ajcxy huidibi ca' cuydunaangixy je ané'min huidi hueeni, nañ ca' cuydunaangixy je mijpi ané'min. ¹¹ Pen ca' mjajtixy nej mgüend'ájtixipy yi' jugy'ajtin huidibi ya naaxhuiñ yajpatp, çpin müich ajcxy m'ocyajmihui'mamy je jugy'ajtin je riqueza oybi janchypi? ¹² Pen ca' mjajtixy nej mgüend'ájtixipy tübi mihuí'ngixy huidi huingjäy yje'ajtpy, çpin müich ajcxy xymöhuip huidibi ajcxy yje'ajtpy?

¹³ Ni tüg tumbi ca' jébi ytuñ müid metz yhuindzin; com tüg je' ix-tijipy etz jadüg mijnicxpedipy; o tüg huidi ycapxycöbigipy, etz jadüg ca'. Müich ajcxy ca' huaad mijpidägipy Dios etz nañ jadu'n mijpidägipy yi' comeeñ'ajtin.

¹⁴ Nañ jadu'n midooy jada ayuc yi' fariseojäy ajcxy, com ooy anajty ajcxy meeñ adzóccixy. Chi ajcxy ooy nixiici yajxiici Jesús y'ayuc. ¹⁵ Chi Jesús ymíñañ:

—Müich ajcxy fariseojäy jadu'n mnaybidáacigixy ma jäy ajcxy yhuinduu nejjuüiy ajcxy ooy m'oyjäyity. Dios ñejhuüйдаayb co müich ajcxy müid jibicpi ma mjot mhuinma'ñ. Tijaty huinma'ñ huidi jäy ya naaxhuiñ y'oy'ixyp, Dios ca' yi' oy'ixy.

Je Dios ycötüjcin etz je Dios y'ane'mdac

¹⁶ Chi Jesús yjacmíñañ:

—Je taabi je Juan anajty yjiiity, jii'ajtp anajty Moisés ycotújcin etz je y'ayucnajtzcaxiíybi ajcxy y'ixpijcin. Huin'it tiempo etz ixti jadachambi jadu'n yajnajtzcaxiíy je Dios y'ane'min, e mayjäy ooy ñaybidáacigixy co ytigihuaangixy ma Dios y'ane'my.

¹⁷ Ca'chípity co je tzajp etz naaxhuiñybi ñajxtähuiipy, pero je Dios ycu-
dudähuaamy tüg'ócíy jadu'n nej ñecy ymina'ñ. Ni tügi letra oy mabaad
ymúdzity nicxy ycayajcuyduñ.

Jesús capxticxy nej ypöcyity co jäy ytöxyjic ixmach

¹⁸ Chi Jesús yjacminañ:

—Huenpinjäyity co ytöxyjic ixmach etz ypicy müid huingbi töxyjäy, ooy
anajty mij pocy tuñ. Nañ huenpinjäyity huídibi pijcp müid je töxyjäy huídí
ñäy ti y'ixmachyíi, nañ mij anajty ypocytuñ.

Je comeeñyjäy etz je Lázaro

¹⁹ Chi Jesús yjacminañ:

—Ji anajty tüg jäy comeeñybi ñayxoxyíi anajty janch ooy müid oyjatypi
huit, etz janch oy ycaj y'ügy jabom jabom. ²⁰ Nañ ji anajty tüg ayoobi
jäy huídí limosna pijtzoob, hue' anajty yxii Lázaro. Lázaro jabom jabom
anajty ycögnäy ma je comeeñyjäy ytijc'aguu, janch nibutzp anajty ooy.
²¹ Lázaro ooy anajty jani'ixy caya'ñ je cayduc tzütztuc huídibi cáb ma
je comeeñyjäy ycajbejt. Oy uc anajty ymiiñ yhueyíi je ñibüdz. ²² Chi
jadu'n yjajti co oy y'o'cni je jäy huídí limosna pijtzoob, chi je ángeles
ajcxy yajnicxy Lázaro ma je Abraham yajpaady. Chi je comeeñybi nañ
jadu'n y'o'cni, e oy yajnaaxtigíyíi. ²³ Chi je comeeñybi jiiiby ca'oydactuuby
tzaachypi anajty jihuiy, chi mij'ijxy jigüegy je Abraham etz je Lázaro.
²⁴ Chi je comeeñybi ycapxy janch mic, yminañ: “Apteedy Abraham, ñich
pa'ayoog. Tun may'ajt quex Lázaro, huen yi' ycihuax yajxoogy müid
ñii etz xyajtíjtzbich ndootz, co ñich ooy ayo'n nbaadyich ma jada mij
jiiin.” ²⁵ Chi Abraham y'adzooy: “Oc'ungich, ajihuihuí co ti mdzinäy ti
mjygy'aty müid mhuit mmeeñ agujc jotcujc, e yi' Lázaro ooy ayo'n paty.
Jadachambi Lázaro yjotcujc'aty, etz müich jiiiby mbatpy tzaachypi. ²⁶ E
jadügnax, ji tüg mij huoc ma ñich ajcxy etz müich ajcxy. Pen ñich jim'amy
janaxam ma müich, ca' njadipyich, nañ jadu'n müich ajcxy ni pin ca'
jadipy nej ñaxipy ma ñich nyajpaadyich.” ²⁷ Chi je comeeñybi jacnimay
Abraham: “Apteedy Abraham, tun may'ajt quex yi' Lázaro ma ñich ndeedy
ytijc. ²⁸ Jim ma ñich ndeedy ytijc jim migoox migüex nmüididyich, huen
nicxy yajmüidmíydaaccixy, ca'ydi je' ajcxy nañ jadu'n ya minipy ma jada
ayoodac.” ²⁹ Chi Abraham y'adzooy: “Yi' ajcxy ymüid necy huídibi
Moisés etz Dios y'ayucnajtzcaxiíybi ycojaay, huen cuydungixy.” ³⁰ Chi
je comeeñybi yminañ: “Janch jadu'n apteedy Abraham. Pen nidüg yi' ögpi
ñicxy ma je' ajcxy, jothuimbidip yi' ajcxy.” ³¹ Chi Abraham yminañ: “Pen
ca' je' ajcxy mijpidägy Moisés y'ayuc je jécyip etz huídí ajcxy jecy'ajt Dios
y'ayucnajtzcaxiíy, nañ ni ca' mibíjccixipy pen nidüg ögpi yjugypicy.”

17

Huídibi ooy ycodzigíjity co n'agánáxim ma pocy

¹ Chi Jesús nimay yi' ydiscípulos:

—Janch tiy'ajt jadu'n co yminip jäy ajcxy huídí yajhuinma'ñyidigoyip
yi' mayjäy ajcxy müid aanií. ¡Ay yi' ayoob ajcxy! pinjaty jäy ajcxy

yajhuinma'ñydigoyaangixy. ² Nigi y'óyity co ixypy yajyo'cxodzïyii tüg tzaa janch mijpi, e chi yajcöjibijpnaxipy mejyoty, ca'ydi co yajhuinma'ñydigoyipy jada jäy ajcxy huidibi xpijcin hueeni müd ma Dios ytiy'ajt. ³ Naygüend'ájtigix müch ajcxy co ca' mgapxtigóoyixipy.

Co m'uch xymidundigooyipy, e chi mgapxhuijip, e pen jothuimbijit, chi mbocymeecxipy. ⁴ Pen m'uch huixtujc'oc xymidundigooyi tüg xiibi, nañ huixtujc'oc xyñimiñ tüg xiibi, e ymína'nipy: "Ti njothuimbityich", huinmeecxipy müch yi', chi jada' müch huixtujc'oc mbocymeecxip.

Je mibíjcin ymic'ajt

⁵ Chi je apóstoles ajcxy nimay je Huindzin Jesús:

—Yajyeeg ich ajcxy nmibíjcin.

⁶ Chi je Huindzin Jesús y'adzooy:

—Co ixypy müch ajcxy mmibicy Dios jadu'n nej tüg pi'c mostaza pajc, e mníma' ixypy jada paadzim quipy: "Nayyajpidigii, nicx tina' mejyoty, e xycapxymidohuip yi'."

Ti huaad tuñ je pin yajcaayb yaj'uuc

⁷ Pen ji müch ajcxy nidüg pin ymüid tüg ytumbi huidi tumb ñaaxjidzitzii o yhuaj cuend'aty, co yjaty ma mdijc, ¿nej jëbi nimay: "Tigi', ixtäg ma mesa etz adzu'at?" ⁸ Hue' janchtiy mnimähuiipy: "Yaj'oyiiyigich n'adzuu'ibi, co'amedí' mhuit, e xymooygich ngaayin n'uucin. E huin'it müch mgayipy m'ügipy." ⁹ ¿Nej yajnaxipy je' Dioscojuypy müd co je' anajty ti tuñ huidibi yaj'ane'my? Ich minamb co ca'. ¹⁰ Nañ jadu'n müch ajcxy co ti mguydungixy tüg'óciy tiibi Dios xyaj'ane'mgixy, chi mmináangixipy: "Je' ich ajcxy je tumbi huidibi ca'p ycapxpaadyity, jëyi ti ndungixich huidibi ich ajcxy huaad ndungixy."

Jesús yajtzögy majc jäy jibic pützpa'mmüdpi

¹¹ Nicxp jim Jerusalén anajty Jesús, chi ñaxiy ma Samaria etz Galilea ñaymidziba'n'ájtigixy. ¹² Co anajty mihuingoñ tüg cajp, chi jipcoyöyiy majc jäy pützpa'mmüdpi. Chi ajcxy yhuäcxijpy jigügyñi. ¹³ Chi ajcxy mic ycapxcoody ymínaangixy:

—Huindzin Jesús, pa'ayoog ich ajcxy.

¹⁴ Co Jesús je' ajcxy ijxy, chi nimay ajcxy:

—Nicx nayguëx'icigix ma yi teedy ajcxy.

Chi jadu'n yjaiti, co ajcxy ñicxy, chi tüyöyjoty oy choocxixy. ¹⁵ Nidügti je' ajcxy co ñay'ijxi co ti anajty chögy, chi nihuimbijty Jesús, ooy Dios jäymech cömay janch cixyjot huinijot. ¹⁶ Chi je' ycojxtinay'ahuüy ma Jesús ytecymijc, chi pidacpy yhuiñyjip naaxcixy yajnaxy Dioscojuypy. Samaritanojäy je' anajty. ¹⁷ Chi Jesús ymínañ:

—¿Nej ca' nimajc müch ajcxy huidi ti mdzoocxixy? ¿Ma ajcxy je' janidaxtujcpi? ¹⁸ ¿Nej ca' pin jac yhuimbijty müñ jäymedza'ñ cömaya'ñ Dios, jëyi tügpaic ti yhuimbity jada samaritanojäy?

¹⁹ Chi Jesús nimay je jäy:

—Pidig, nicxni. Yi mmibíjcin ti xyajtzögy.

Nej je' yminipy Dios y'ané'min

²⁰ Chi je fariseojäy ajcxy y'amidooy Jesús mina anajty yi Dios ya miñ ya naaxhuiñ y'ane'mañ. Chi Jesús y'adzooy:

—Je Dios y'ané'min ca' je' yminipy jadu'n nej ti yaj'ixy o yajmidoy. ²¹ Ni mgaminángixipy co cha je' o jim'amy je'. Dios y'ané'min ya je' cham ma miich ajcxy.

²² Chi Jesús nimay yi' ydiscípulos ajcxy:

—Miim je xii je tiempo ma miich ajcxy anajty ooy xyjamid'idángixich tüg xii, e ca' iich miich ajcxy xy'ixipy, iich je jäy huidi tsoon tzajpjoty. ²³ Chi jäy ajcxy yminá'nip: “Chaa'amy je', je Cristo”, o “Chim'amy je'.” Ca' miich ajcxy yi' mniníxcixipy, e ni mgabaníxcixipy. ²⁴ Co anajty nmiñich jadügtecy ya naaxhuiñ, iich, je jäy huidi tsoon tzajpjoty, co iich anajty nmiñich n'ané'min, jadu'n je' yjadipy nej huizuc co y'aa'an ma tüg tzajp'ijx e nañ jadu'n y'aa'an jadüg tzajp'ijx. ²⁵ Nañ ooy ycopícyty co jayijp ocpáadibich ayo'n, e chi jada xyca'ixa'nibich xycatzoga'nibich yi' jäy ajcxy huidi tzinaayb jugy'ajtp jadachambi tiempo. ²⁶ Com jadu'n nej yjajti jecy'ajty, co je Noé chinaay, nañ jadu'n yjadipy co anajty iich, je jäy huidi tsoon tzajpjoty, co anajty nxii ndiempo paty mina anajty nmiñich ane'mbi. ²⁷ Janch caayb janch uucp anajty je jäy ajcxy agujc jotcujc co je Noé ytigüy ma ymijcajoon. Chi je ayo'nduu ymiñ huidi cijx yaj'ögtigoydäy je mayjäy. ²⁸ Nañ jadu'n yjajti jecy'ajty co Lot chinaay. Je jäy ajcxy jim Sodoma etz Gomorra ycaaygixy y'uuccixy yjuuygixy ytooccixy, etz ytiijcojcojcy. ²⁹ Huin'it xii co Lot chooni jim Sodoma, chi ycäy tzajpjoty jin etz huidi jindzaa mid conhuidity ytoy, chi cajp ytigoyday. ³⁰ Jadu'n nej ayo'n yjajti taabi chinaay Noé etz Lot ya naaxhuiñ, nañ jadu'n yjadipy ayo'n co anajty nmiñich jadüg'oc ya naaxhuiñ, iich je jäy huidi tsoon tzajpjoty.

³¹ Je huin'it xii huin'it tiempo pin anajty iñaayb ma ytiijcop, e ymid anajty ypidägy jilby tigoty, ca' nimiragipy nicxy ti yajpidzimy, e huidi jäy anajty jim camjoty nañ ni ca' yhuimbidipy ma ytiic. ³² Ajihuuygix jadu'n nej Lot ytöxyijc ayo'n paty. ³³ Tüg'ócy jäy ajcxy pinjaty yjugy'ajt tzögam, tigoyipy yjugy'ajt. Tüg'ócy jäy ajcxy pinjaty yjugy'ajt tigooyb (mid iich ycipi), hue' je' yjugy'ajt ypaadipy chögyy.

³⁴ Iich miich ajcxy nimaayb co je huin'it coodz nimetz jäy anajty ajcxy ma cijx, tüg yajnicxiyb etz jadüg yajhui'miyyb. ³⁵ Nimetz töxyjäy anajty yjitzcojcy, tüg yajnicxiyb, etz jadüg yajhui'miyyb. ³⁶ Nimetz yëydijc anajty ytungixy camjoty, tüg yajnicxiyb etz jadüg yajhui'miyyb.

³⁷ Chi je jäy ajcxy huidi ixpijcp Jesús y'ayuc yminañ ajcxy:

—¿Ma jadu'n yjadipy nej miich ti mina'n, Huindzin?

Chi Jesús yminañ:

—Ma anajty je ögpi yajpaady, jim yi' luud ajcxy ñimuga'n.

18

Je ijxpejt ma je ayoobitöxyjäy etz je juez

¹ Chi Jesús yajnimay ajcxy tüg ayuc huidijaty ixpijcp ma yi' co ooy ycopícyty Dios nmiñictzoohuim jabom jabom, ni ca' nmidziipim. ² Chi Jesús yminañ:

—Ji anajty tüg juez ma tüg cajp, ni Dios anajty ca' tzigüy, etz ni jäy ajcxy anajty ca' huindziigüy. ³ Nañ ma je cajp jim anajty tüg co'ögy ytöxyjäy. Je' anajty yminög janam jadzojc ma je juez, nimäy anajty: “Nihuaangich ma je nmidzipich.” ⁴⁻⁵ Chi je codung ca' co'adzoy ca' a'ixiy tzojc. Chi je juez jot'ajti, yminañ jotjoty huinma'nyjoty: “Oy Dios ca' ndzigüyich, ni jäy ca'

nhuindzigyich, per com jada co'ögytöxyjäy nigí xychach'amayyich, miñ n'ocnihua'ñich, ca'ydi jadüg'oc ymiñ e xyajcijxich anajty nmechtújcin."

⁶ Chi je Huindzin Jesús ymínañ:

—Mido'mbic miich ajcxy nej je juez jibicjäybi ti nihuañ je töxyjäy co anajty ti yajtzibiyi. ⁷ ¿Nej ca' Dios ñihuaanip yi huidibi ti huin'ixy, huidibi mibijctzooob xim tzuum? ¿Huäcxibip, nicx ca' tzojc adzooyi? ⁸ Hich miich ajcxy nimaayb co Dios ñihuänamy mic'amy yi' yjäy. Co anajty nhuimbity ya naaxhuiñ, ñich, je jäy huidi tzoon tzajpjoty, ¿nej nbáadibich mibijcin ya naaxhuiñ?

Je ijxpejt ma je fariseo etz ma je yajcogüejtpi

⁹ Jesús ñimiydac je jäy ajcxy huidi ci'm ooy ñaygömayyii co ooy y'oyjäyity, etz pejxy yi jacjadyiibi jäy ajcxy, chi yajnimay ajcxy tüg jihuimbit ayuc:

¹⁰ —Mejtz jäy ajcxy ytigüy ma Dios ytijc capxtacpi. Tüg hue' je' fariseojäy, e jadüg yajcogüejtpi. ¹¹ Chi je fariseojäy ytínay'ahuüy ycapxtägy, chachmína'ñ jadu'n: "Dios Teedy, Dioscojuyip yajnaxpich com co ca' ñich nbocytuñich jadu'n nej jacjadyiibi jäy ypcotyngixy, ca' nmeechich, ca' njibicjäyidyich, ca' nmigapxich huingjäy ytöxyijc, ca' nbocytuñich jadu'n nej jada yajcogüejtpi. ¹² Mejtz xii n'ityich jaygay tügpi semaan. Chi huen ytim ti nmíidich ngüejtpyich ma Dios majcjaty."

¹³ Per je yajcogüejtpi jiguem ytínay'ahuüy, ni ycapät'ixy tzajpcijx, jëyi ycaachtzachcoxy ymínañ: "Dios Teedy, pa'ayoogich, ñich pocyjäyich."

¹⁴ Hich miich ajcxy nimaayb co jada yajcogüejtpi y'idacy ma ytijc ti anajty yajhuinmecxy ypcocy, e je fariseojäy ca' yajpocyhuinmecxy. Huenpínity huidi ci'm naygömayipy, Dios yajtzöyduñib, e pinjaty ca' ñaygömayyii ci'm, Dios ycömayib.

Jesús conucxy je pi'ctijc ajcxy

¹⁵ Chi jäy ajcxy míidmiñ pi'c'anäg ma Jesús huen nidoñyii. Co je' ydiscípulos ajcxy ijxy, chi ajcxy ojoy ungdaj. ¹⁶ Chi Jesús yaaxi ymígügtijc nimay ajcxy:

—Ixmatz, huen yi pi'ctijc xyñimíñich, ca' ajcxy mjijpcogapxüygixy, com yi jäy ajcxy huidibi yajpatp ma Dios y'ané'min, jadu'n ajcxy nipaady nej pi'ctijc. ¹⁷ Janch ñich miich ajcxy nimäy co hueñypínity huidi ca' cöbijci yi Dios y'ayuc ytíy'ajt jadu'n nej yi pi'ctijc ajcxy cöbijcy Dios y'ayuc ytíy'ajt, ca' yi' ajcxy ytigíhuipy ma Dios y'ané'min.

Tüg comeeñ'anäg ymíydägy míid Jesús

¹⁸ Chi tüg micjäy y'amidooy Jesús, nimay:

—Miich ojäybi Huindzin, ¿ti huaad nduñich co ñich n'alma nüzooocin paadipy?

¹⁹ Chi Jesús y'adzooy:

—¿Nej co xytíjich ojäy? Ni pin ya yca'oyjäyity, je'yi Dios tügpaic y'oyjäyity. ²⁰ Miich mnejhuüyb yi Dios ycötújcin. Ca' mmigapxtigoyipy huingbi töxyjäy, ca' jäyyaj'ögipy, ca' mmeedzip, ca' mmigüg ñihuambedipy, yajmij'at mdaj mdeedy.

²¹ Chi je' y'adzooy:

—Ti tüg'öciy nguydundäyich jada cötújcin maabi nyeeepidzimyich.

²² Co Jesús jadu'n midooy, chi nimay:

—Tigoy'ijtni ja tög huidi ca' mduñi. Toocta' tög'óciy tijaty miich miiid, e mo' je meeñ ayoobtijc, huin'it mgomeeñ'adipy jiiyby tzajpjoty; miin, e pajamgich.

²³ Co je comeeñybi jadu'n ayuc midoy, chi ooy yjottigoygoty com ooy anajty ycomeeñity. ²⁴ Co Jesús ijxy co je comeeñybi anajty ti yjotmaybicy, chi minañ:

—Ooy chachchípity ytiñihuipy tög comeeñyjäy ma Dios y'ané'min. ²⁵ Jac ca' chípity co ñaxipy tög camello ma yi xu'ñ yxútity, ca'ydi co tög comeeñyjäy ytiñihuipy ma Dios y'ané'min.

²⁶ Chi je jäy ajcxy anajty tiibi ajcxy midoogixy Jesús y'ayuc, yminaangixy:

—¿Pin jada' jëbi y'alma paadipy nidoocin?

²⁷ Chi Jesús y'adzooy:

—Huidibi naaxhuiñyjäy ajcxy ca' jaty nej yaj'oyihuipy, Dios jëbi yaj'oyi.

²⁸ Chi Pedro yminañ:

—Ich ajcxy ti nidiägy n'ixmajtzaaygixy, co nbanicxaangixy.

²⁹⁻³⁰ Chi Jesús y'adzooy:

—Janch iich miich ajcxy nnimaaygixy co yi jäy ajcxy huidi ytijc ixmajtz etz ytaj yteedy, ymiguëx, etz y'ung y'anäg miiid Dios y'ané'min ycixpi, ypaadipy ajcxy ya naaxhuiñ nigi oy'ájin, etz ypaadipy ajcxy tzajpjoty tzinaayin huidi ca' ycixipy ytigoyipy nimina.

Jesús capxypidzimy jadüg'oc co y'öga'ñ

³¹ Chi Jesús huodzon je nimajmetzpi, nimay ajcxy:

—Jadachambi tzoc jámim jim Jerusalén. Ngyudunaamyich tög'óciy jadu'n nej yi Dios y'ayucnajtzcaxiyybi ajcxy jaybejty jecy'ajty miiid iich ycixpi, iich, je jäy huidi tsoon tzajpjoty. ³² Chi nyajciyega'ñich ma je romano gobernador, xycamiñ'ixipy xycamiñpidägibich ajcxy. Xy'ójibich xyhuindzújibich xyjiptzújibich ajcxy. ³³ Xychaachtunipyich ajcxy, xyaj'ögibich ajcxy, e codugig xii njugypigipyich jadüg'oc.

³⁴ Chi yi majmetzpi ajcxy ni jadu'ñyi ca' huinjihuuy ajcxy nej yhuimbizimy Jesús y'ayuc. Yüch anajty jada ayuc miiid yi' ajcxy ycixpi, paady ca' huinjihuuy nej anajty yajnimaaaygixy.

Jesús yajhuindicxigy tög huintzpi jim Jericó

³⁵ Chi jadu'n yjajti co Jesús mihuingoñ je cajp huidi yxii Jericó, chi tög huintzpi anajty iñäy tüba'áy pijctzoy anajty limosna. ³⁶ Co midooy mayjäy ñaxy, chi je' yajtiy:

—¿Pin yi' ñajxp?

³⁷ Chi ajcxy nimay co Jesús nazareno najxp. ³⁸ Huin'it je huintzpi mic yminañ:

—Jesús, David y'ap y'oc, iich pa'ayoog.

³⁹ Je jäy ajcxy huidi anajty jayijp nicxp ooy ogy je huintzpi, nimay co huen amoñ. E je' nigi mic yminan'idich:

—David y'ap y'oc, iich pa'ayoog.

⁴⁰ Chi Jesús ytinayxijpy oy yajhuoyii. Co je' jim ymejch, chi amidoy, nimay:

⁴¹ —¿Ti mdzocpy ndunipyich miiid miich?

Chi je' y'adzooy:

—Huindzin, yajhuindicxíccich.

⁴² Chi Jesús minañ:

—Huindicxǵ, yi mmibǵjcin ti xyajtzögy.

⁴³ Chi je huintzpi mic'amy yhuin y'ijxǵy, chi panicxy Jesús, chi ooy jāymejch cōmay yi Dios. Cham tǵg'óciy je cajp jāy co ajcxy jadu'n ijxy, nañ ycōmay yjāymejtz yi ajcxy Dios.

19

Jesús müid Zaqueo

¹ Co Jesús ytiǵiy jim Jericó, ñajxy cajpcujc anajty. ² Chi jadu'n yjajty jim anajty tǵg jāy hue' anajty yxi Zaqueo. Hue' je' anajty yajcogǵejtpi huindzin, e comeeñ anajty. ³ Ooy yi' anajty tzach'ixa'ñ Jesús, nejhuñhua'ñ pin jāy je', chi ca' jajty nej ixǵpy, je' co anajty ñaxity, etz co anajty ooy mayjāy jim. ⁴ Chi je' ñicxy poyǵy jayǵp, chi ypejty ma tǵg sicómoro quipy, yco'ijxnaxa'ñ co anajty Jesús jim ñaxy. ⁵ Co Jesús jim ymejch, chi pāt'ijxy je Zaqueo, e nimay:

—Zaqueo, tzojc minac, com copicy co nicxy njättäga'ñich ma mdijc.

⁶ Chi je' yminajty janch jottigoy, e jotcujc cōbijcy Jesús. ⁷ Co jadu'n ijxy, chi je mayjāy ajcxy nigapxy ni'ojǵyǵixy Jesús, yminaangixy:

—Ti ñicxy jättacpi ma tǵg pocyjāy ytiyc.

⁸ Chi Zaqueo ytinayǵy, nimay Jesús:

—Huindzin Jesús, cha je' je njugy'ajtich huidi cup nbijc-huäcxaamyich nmöhua'ñich ayoobitjic. Pen ti ñich nyajcujcñaxy, nyajhuimbidiipyich midaaax jadu'ñyi.

⁹ Chi Jesús yminañ:

—Jadachambi jada jāy ma jadayaabi tijc ti y'alma ñǵdzögy, com co yi' nañ jadu'n Abraham y'ap'adyii y'oc'adyii. ¹⁰ ñich, je jāy huidi tzoon tzajpjoty, ti nmiñich ya naaxhuiñ co n'ixtāhuibich etz nyajñǵdzögibich tiñi anajty ytiǵooy.

Je ijxpejt ma je majci meeñ

¹¹ Co je jāy ajcxy midooy jadu'n, chi Jesús jacyajnimay ajcxy tǵg ayuc, com ytimymihuingónip anajty Jerusalén, etz je jāy ajcxy tzach-huinmaayǵixy co Jesús mic'amy anajty pidäga'ñ y'ané'min. ¹² Chi Jesús yminañ:

—Tǵg micjāy, comeeñyāy anajty, ñicxy ma tǵg naaxjot jiguembi, nicxy anajty ytungbicy co yrey'ada'ñ, e chi anajty yhuimbidaani. ¹³ Chi je micjāy mijhuooy nimajc ytumbi, chi moy ajcxy majc meeñ nidǵg nidǵg, chi ajcxy nimay: “Meeñ yaj'ung'ajtcix ji ixti cooni ñich anajty nhuimbityich.” ¹⁴ Chi je ymǵogajp ajcxy ca' anajty ixa'ñyii ajcxy je comeeñybi, chi ajcxy yajpaguejxy huingapxpi ma anajty je comeeñybi ñicxy, chi je huingapxpi yminañ: “Ca' ñich ajcxy ndzocy co jada comeeñyāy rey'adipy ma ñich ajcxy.” ¹⁵ Chi jadu'n yjajty co je comeeñyāy yhuimbijty ti anajty yreytiǵy. Chi oy yajhuoyii je ytumbi ajcxy, je huidi anajty je meeñ ti yajmihui'mǵixy, nejhuñhua'ñ anajty jadu'ñi ti yaj'ung'ajtcixy je meeñ nidǵg nidǵg. ¹⁶ Chi tǵg jayǵp ymiñ yminañ: “Huindzin, yi meeñ majcjadu'ñi ti nyaj'ung'atyich.” ¹⁷ Chi je rey y'adzooy: “Ooy miich oy mduñ. Jadu'n nej ti mgapxycōbicy müid huidi hueeni, cham m'ané'mipy majc ciudad.” ¹⁸ Chi je mimetzpi ymiñ, yminañ: “Huindzin, yi mmeeñ mǵoox jadu'ñyi ti nyaj'ung'atyich.” ¹⁹ Chi je rey nimay je mimetzpi: “Cham m'ane'mipy mǵoox ciudad.” ²⁰⁻²¹ Chi je midugǵgpi ymiñ, yminañ: “Huindzin, cha je mmeeñ huidi ti nmi'ityich, ti nyujpcicyich ma tǵg

paayi. Ndzigiibich miich co miich mjä'yaty ahua'ñ, myajpidigtäy huidi ca' mjë'adyii, nañ mdziicpy huidi ca' ti mnipy.”²² Chi je rey ymïnañ: “Miich jibic ti mduñ, cham ndiyduna'ñ müid mgi'm'ayuc ycixpi. Miich mnejhuiyb co nyajpidigiyich huidi ca' një'adyiijich, e ndzicyich huidi ca' ti nnibych.”²³ ¿Nej co ca' ti mbidägy ñich nmeen ma je banco, jigix co ixypy nhuimbityich, may meen ixypy xycidigiyich müid meen'ung?”²⁴ Chi je rey nimay huidi anajty ajcxy jimip: “Pijci ajcxy yi' ymeen, etz mooygixy yi' tiibi meen yaj'ung'aty majc jadu'nyi.”²⁵ Chi je jäy ajcxy y'adzooy: “Huindzin, ymüid yi' cham majc jadu'nyi meen.”²⁶ Chi je rey y'adzooy: “Ñich mïnaam co tüg'óciy pinjaty müid, jacyajmóhuip; e huidi ca' ti müidity, oy jamüidity yajpijctáhuip huidi ymüid.”²⁷ Nañ jadu'n ajcxy je nmüdzipich huidi ca' anajty tzojccixy co ñich nrey'adipyich ma yi' ajcxy, yajmiingix ya, yo'cpujxtutaaygix ma ñich nhuinduu.”

Jesús ytigiy Jerusalén

²⁸ Co Jesús jadu'n ymïnanday, chi choñ jim, ñicxy Jerusalén. Jesús jayjip anajty ytüyöy ma je mayjäy.²⁹⁻³⁰ Jadu'n yjajty co jim yja'ty mihuingon Betfage etz Betania ma je cop huidi yxii Olivos, chi Jesús quejxy metz ydiscípulos, nimay ajcxy:

—Ñicxcix ma yjiibi cajp huidi ji huingon. Co ajcxy mgajptugíhuip mbáatcixipy tüg burro mang ycoxochity, huidi ca' ni pin yaj'ñaayñi. Mgoguejtúutcixipy, etz mmimíingixipy.³¹ Pen jim pin xy'amidoogixy, ¿nej co yi burro mgoguejtüdy? Chi ajcxy jadu'n m'adzohuipy: “Je nhuindzinich jim tzojcp.”

³² Chi je' ajcxy ñicxy huidi Jesús yquejx. Chi ajcxy paty je burro jadu'n nej Jesús anajty ajcxy ti ñimäyii.³³ Jim anajty ajcxy je burro mang coguejtúutcixy, co ñihuindzin ñimaayi ajcxy:

—¿Nej co yi burro mang mgoguejtúutcixy?

³⁴ Chi je' ajcxy y'adzooy:

—Je nhuindzinich jim tzojcp.

³⁵ Chi ajcxy huijtz miñ je burro ma Jesús. Chi ajcxy jibe'ñ müid yhuít, chi ajcxy Jesús yajburripejty.³⁶ Co Jesús anajty ytüyöy, chi je mayjäy ajcxy yhuít yé'pcixy tügüj. ³⁷ Co ajcxy mihuingoñ je minac ma je cop huidi yxii Olivos, chi tüg'óciy je mayjäy yjotcugiyday, e ytigiy ajcxy ooy alabanza ñibi Dios ojadajtpi müid je mij huinma'ñ ycixpi co anajty ti íjxcixy huidi anajty Jesús ti tuñ.³⁸ Chachmïnaangixy:

—iCapxpaady je rey huidi miimb müid Huindzin Dios yxii ycixpi! jJotcujc'ajt jiiy tzajpjoty etz cömáyin ma Dios!

³⁹ Huin'it nijëjity fariseojäy huidi anajty ajcxy jiiy jäy agujc nimay ajcxy je Jesús:

—Oj yi mjäy ajcxy.

⁴⁰ Chi Jesús y'adzooy:

—Ñich miich ajcxy nïmaayb pen yi' ajcxy amomb, yi tzaa tigíhuip mic capxp.

⁴¹ Co Jesús yja'ty jim mihuingon Jerusalén cajp, e co ijxy, chi yaaxy müid je cajpjäy ycixpi.⁴² Chi Jesús ymïnañ:

—iPen mhuiñjihuuyb ixypy miich ajcxy nej mbáatcixipy mjotcujc'ájtin jadachambí xii tiempo! Yüch jada tiy'ajt cham ity ma miich ajcxy, ca' huaad m'íjxcixy.⁴³ Minip je xii je tiempo ma miich ajcxy je mmüdzip ajcxy xyajjüdügipy mgajp müid tzaamacxy, e tziptunipy ajcxy müid miich,

yajxon xyajco'adugipy ajcxy jühuidity ma je mgajp. ⁴⁴ Xyñigidaagoodip mdzaaboch ni'ung ni'anäg, ni ca' yhuimip tzaagop tzaamacxy, jadu'n yjadipy com miich ajcxy ca' mnejhuüy je tiempo mina je Dios xyñigidägy.

Jesús yajpidzimy je jibicjädyjc ma Dios ytijc

⁴⁵ Chi Jesús ytigüy ma Dios ytijc yajpidzimday tüg'óciy jäy huidi anajty jiiyby ajuuyb adoocp. ⁴⁶ Chi Jesús nimay je jäy ajcxy:

—Jadu'n mina'n ma jaybétyity: “Hich ndijci tzajpcapxycapxtägi'n yi'.” E miich ajcxy hue' mhuaangixy jadu'n nej meetzpi y'ang.

⁴⁷ Jesús anajty yaj'ixpijc jabom jabom ma Dios ytijc, chi je teedy tungmüdpí, etz huidi ajcxy yaj'ixpijcp anajty Dios ñecy, etz mijjädyjc ajcxy nihuinmayyigixy co yaj'ögaangixy Jesús. ⁴⁸ Chi ajcxy ca' ni nej mihuinmañybaty nej yaj'öccixy, com tüg'óciy jäy anajty ooy tzach'amidoo'ijt Jesús y'ayuc.

20

Jesús ycötújcín

¹ Chi jadu'n yajty tüg xñ anajty Jesús yaj'ixpicy je cajpjäy ma Dios ytijc, capxhuäcxy anajty oybi ayuc. Chi ñimiini je teedy tungmüdpí ajcxy etz huidi ajcxy yaj'ixpijc Dios ñecy etz mijjädyjc ajcxy. ² Chi ajcxy migapxy Jesús nimay:

—Yajnimaaagich, ¿ma cötújcín ti mbaady co jäy myaj'ixpicy ya ma Dios ytijc? ¿Pin je' tiibi xycötujc möy?

³ Chi Jesús y'adzooy:

—Hich nañ jadu'n nyaj'amidohuamy ñch miich ajcxy tüg ayuc, e m'adzógixip. ⁴ Co Juan (je Bautista) jäy yajniñbejty, ¿pin je' cötújcín moy, je Dios tzajpjoty pi o jäy ajcxy?

⁵ Chi ajcxy ytigüy huinmay'ahuidijtpi ñayñimáayigixy miñ xyipy:

—Pen minaanim co tzajpjoty choñ je Juan ycötújcín, Jesús xyñimaayimip ya: “¿Nej co ca' miich ajcxy mijpidacy yi' y'ayuc?” ⁶ Pen minaanim ajt co jäy cötújcín moy je Juan, chi tüg'óciy cajpjäy tzojc xycögädzim, com ymibijcpy ajcxy co yi' Juan, Dios yi' y'ayucnajtzcaxiybi.

⁷ Chi ajcxy y'adzooy co ca' ajcxy nejhuüyigixy pin Juan ti quexyii. ⁸ Chi Jesús nimay je' ajcxy:

—Hich nañ jadu'n ca' nigapxa'ñich pin ti xycötujcmöyich.

Je ijxpejt ma je tumbidijc ajcxy jibicjäybi

⁹ Chi Jesús yminandacy yajnimay tüg'óciy je jäy ajcxy tüg ayuc, ymíñañ:

—Tüg jäy pidacy tüg camuuxy ycam, chi yajpijctzoy ytumbidijc, co anajty chona'n ñicxa'n jiguem jecy jecy. ¹⁰ Co cosecha paty, chi quejxy tüg ytumbi ma je ytumbidijc, huen címöyii huidibi je' anajty paatip. Chi je ytumbidijc huinhuojpy jiphuojpy je quejxyöybi yajhuimbijty ca' ni ti mooy. ¹¹ Chi huingbi ytumbi quejxy, nañ jadu'n ajcxy je' tuñ, huin'ojy jip'ojy ajcxy, yajhuimbijty ajcxy, ca' ajcxy ni ti mooy. ¹² Chi midugügpi ytumbi quejxy, nañ jadu'n ajcxy je' yajtzaachiy etz yajhuimbijty ajcxy.

¹³ Huin'it je camuuxycam huindzin ymíñañ: “¿Ti ndunipyich? Ocquejxyich nmang huidibi ooy ndzocyich. Ca' jécyity co ajcxy ixipy nmangich, yajmij'adipy ajcxy.” ¹⁴ Chi je ytumbidijc co ajcxy ijxy je' yhuindzin ymang, chi ajcxy huinmaygoty nayñimáayigixy miñ xyipy: “Ti ymiñ je cogam ymang, yi' je' jada cam jëdaanip. Tzoc yaj'o'cim jigix ñch ajt jada

cam një'ajtım.” ¹⁵ Chi ajcxy je cogam ymang yajpidzımi camjoty, chi ajcxy yaj'o'cy.

Chi Jesús y'amıdooy:

—¿Ti jada' ytunıpy je cam huındzın? ¹⁶ Minıp je', mıñ yajtıgoydäy je ytumbıdıjc ajcxy, e chi je' je ycam yegıpy mıid huıngbı tumbı.

Co je jäy ajcxy jadu'n mıdooy, chi ajcxy ymınañ:

—Ni catzogıpy Dios, nıcxı jadu'n njajtım.

¹⁷ Chi Jesús huındıcxpejty je mayjäy nımay ajcxy:

—¿Ti tıjamy huıdı yjaybétyıp ma Dios ñecy?

Jadu'n:

Je yëydıjc huıdı je jäy ajcxy ca' anajty tzocy, tı Dios pidacy mıj'ane'mbı.

Tım jadu'n nıpaady nejıhuıy je tzaa oyjatypı huıdıbı je pojtzpidıjc ajcxy ca' yajtuna'ñ, je' oy tı yhuı'mnı ma anajty yjaccopıcyıty.

¹⁸ Pınjaty ca' cöbıga'ñ jada mıj'ane'mbı, ayo'n ypadamy, tım jadu'n nıpaady nejıhuıy jım ycıjxcıday ma je tzaa nıcx e tıjhuıtız yjajtähuıpy; e pen je tzaa nıgdıdagoty, je' ajcxy janch jaam püx nıcxı yjajtcıxy.

Yajnidıygıxy pen jëbı cogüéjtin yajyecy o pen ca'

¹⁹ Je teedy tungmıdıpı etz huıdı ajcxy yaj'ıxpıjc Dios ñecy ooy anajty nıhuınmayıygıxy madzaangıxy je Jesús mıc'amy, co ajcxy huınjıhuıy co Jesús nımıydáacıgıxy mıid je jıhuımbıt ayuc, e chıgııyb anajty ajcxy je cajp jäy. ²⁰ Chi ajcxy chachhuınma'ñ'ıxtaaygıxy nej huaad xıgıxy Jesús, chı quejxy ajcxy ıjx'ıjtpı ma Jesús yajpaady huıdı naybıdaacıp janch ypaat tudägyjäy; chı amıdoo'ıjtcıxy Jesús y'ayuc huıdı mıid xıhuaangıxy, chı cıyegaangıxy ma je gobernador. ²¹ Chi je ıjx'ıjtpı ajcxy y'amıdooy Jesús nımay ajcxy:

—Huındzın, nejhuııyb ıch ajcxy co mııch m'ayuc ooy y'óyıty, etz myaj'ıxpıcy yajxon, ca' huın'ıxpety jäy myaj'ıxpıcy, etz myaj'ıxpıcy Dios ytıy'ajt nej jäy jëbı huaad chınaaygıxy. ²² ¿Nej copıcy ıch ajcxy mıgüedıpy je César je romanojäy mıj'ane'mbı, o ca'ıjı?

²³ Chi Jesús huınjıhuıy yı' ajcxy yjıbıc-huınma'ñ, paady ajcxy nımay:

—¿Ti co mııch ajcxy xyjot'ıxy xyhuınma'ñ'ıxyıch? ²⁴ Yaj'ıjxcıch tüg meeñ. ¿Pın y'ahuınax etz pın yxı mımb ma jada meeñ?

Chi ajcxy y'adzooy:

—Yı César;

²⁵ Chi Jesús nımay ajcxy:

—Cuet ma César huıdı César paatıp, e ma Dios huıdı Dios paatıp.

²⁶ Ca' mımadacy ajcxy nej tzu'ıjxcıxy ma mayjäy yhuınduu. Chi ajcxy ooy huınmaay jadu'n nej anajty Jesús tı y'adzóohıgıxy, chı ajcxy amoñı.

Yajnidıygıxy je jugy'ájtın ycıxpı

²⁷ Chi ñıja'ttı Jesús tüg saduceojäy, e yı saduceojäy ajcxy ymınañ co jäy ögy ca' y'ocjuıycnı. Chi je' yajtıy:

²⁸ —Huındzın, Moısés jaybety ma yı' ñecy, je jécıyp, co tüg yëydıjc ytöxyıjc yajhuı'my ıx'ögp, e ca' ymang tı paatcıxy. Jëbı je yëydıjc y'uch mııdtzınäy je töxyjäy jaydëbı yaj'ung'ıxıp mıid y'ajch ycıxpı. ²⁹ Jadu'n anajty tügpıcy jäy, nıhuıxtujc ajcxy ytügquëx'ájtıcy, ac yëydıjc ajcxy. Je mıjıpı mııdtzınay töxyjäy, chı ıx'o'cy, e ca' ymang paty. ³⁰ Chi je mımetzpı ypıjcy mıid je töxyjäy, e nı ca' ajcxy ung paty. ³¹ Chi je mıdugıgpı ypıjcy mıid je töxyjäy, e jadu'n je nıhuıxtujcpı mııdtzınay ajcxy je töxyjäy, ıx'o'cy ajcxy, nı ca' ajcxy ung paty. ³² Chi nañ jadu'n je töxyjäy y'ögni. ³³ Co anajty

je nihiuxtujcpi jugypijccixy, ¿huidi jada' octöxijc'adñiyb je töxyjäy? Com nihiuxtujc ajcxy ti töxyjic'ájtigixy.

³⁴ Chi Jesús y'adzooy:

—Jadachambi jäy pijccixp, ñaymooyigixy y'ung huen pijccixy. ³⁵ Je jäy ajcxy huidibi paatip anajty chinähuiip ma je tiempo huidi mimb co ögpi yjugypijccixipy, ni ca' ajcxy ypigipy, ni ca' ajcxy ñaymóoyigixipy y'ung huen pijccixy. ³⁶ Co jäy ajcxy yjugypicy, chi ca' huaad y'ögcixy jadüg'oc, quipxyjaty ajcxy müid je ángeles ajcxy, e Dios yi' ajcxy ung'adñib co yjugypigipy müid jemybi jugy'ájtin. ³⁷ Janch co yi' ögpi yjugypigipy, jëbi mbaadip je tiy'ajt ma Moisés ñecy ma jadu'n yjaybétyity, je taab anajty aay'ujtz ytoy, co je Huindzin Dios migapxy Moisés, nimay: “ñich Abraham yDios, Isaac yDios, Jacob yDios.” ³⁸ Je ögpi ca' müidity Dios. Je jäy ajcxy huidi juugyip janchtiy ajcxy ymüid Dios, com co müid Dios ycixpi tüg'óciy jäy ajcxy ymüid yjugy'ajt.

³⁹ Chi jäy ajcxy huidi yaj'ixpijcp Dios ñecy nimay Jesús:

—Oy ti m'adzoy, Huindzin.

⁴⁰ Ca' ajcxy ocjajtni nej jac nimáaygixipy.

Pin je' y'ung je Cristo

⁴¹ Chi Jesús je' ajcxy nimay:

—¿Nej co müich ajcxy mīna'ñ co Cristo David y'ap y'oc? ⁴² David ci'm mīna'ñ ma je Salmo necy:

Yi Huindzin Dios nimay ñich nHuindzin: “Iña' ya a'oy'amy ma ñich.

⁴³ Ixti cooni anajty müich mmidzip ti nmimadactäyich, jadu'n nej jihuüy ti nbidägyich yi mmidzip ma müich mdécypocxpejt.”

⁴⁴ Co David yximoy Cristo ñich nHuindzin, ¿nejtz yi' co y'ap'adyii y'oc'adyii?

Jesús xiy je escribas ajcxy

⁴⁵ Chi tüg'óciy cajpjäy jim anajty y'amido'ijtcixy co Jesús nimay je' ydiscípulos ajcxy:

⁴⁶ —Naygüend'ájtigix müid yi' escribas ajcxy ydiscípulos, co ajcxy ooy tzojccixy yhuídaangixy müid yhuit oyjatypi, ooy ajcxy tzojccixy co huen capxpcxyii ma jäy y'amugiy, e ooy ajcxy tzojccixy yi cödumbi ññaybejt ma naymujctac, etz ooy ajcxy tzojccixy cödumbi ññaybejt ma jäy ajcxy yxüidungixy. ⁴⁷ Chi ajcxy yajcijxtayi yi' co'ögytöxyjäy ypidägy, e tungixy ooy jecy tzajpcapxycapxii ma jäy yhuinduu. Yi jadu'mbi jäy ajcxy ñigi ajcxy Dios chaachytunñiyb müid ypocy ycixpi ca'ydi jacnipin.

21

Je ayoobitöxyjäy co'ögyy y'ofrenda

¹ Jiiby anajty Jesús ma Dios ytjic co ijxy comeñyjäy may'amy ofrenda pidaaccixy ma meeñygaax. ² E nañ ijxy co tüg co'ögytöxyjäy pidägy anajty metz pi'cmeñ. ³ Chi Jesús ymīnañ:

—Janch ñich müich ajcxy nimäy co jadayaabi co'ögytöxyjäy ayoob jac anaxy jada, ti pidägy ofrenda ca'ydi jacnipin. ⁴ Tüg'óciy comeñydijc ajcxy ypidacyp ma ofrenda je meeñ huidi conajxp. Jadayaabi co'ögytöxyjäy ti pidägy huidi anajty ñigayamy.

Jesús ymīnañ co je Dios ytjic yhuindigoya'ñ

⁵ Nijējity jāy co ytiģiyy ma Dios ytiċ nimiydacy ajcxy co Dios ytiċ ooy chach'oy'oydúñity miiđ tzaa oyjatpyi, e miiđ tiibi jiiyy yojxcixy. Chi Jesús ymínañ:

⁶ —Tüg'óciy jada huidi ajcxy m'ijxpy ma Dios ytiċ, minip xii tiempo mina jada niċxy yhui'my taj xit jada tzaa, ca' ma pochycop.

Je tiy'ajt ma ca'ni naaxhuiñybi ycixa'ñi ytiċgoya'ñi

⁷ Chi ajcxy y'amidooy Jesús:

—Huindzin, ģmina jada jadu'n ytuniiyb yjadiiyb nej miich ti mmínañ? ģTi tiy'ajt ji yaj'ixip co jada anajty jadu'n ytuna'ñyii yjada'ñyii?

⁸ Chi Jesús y'adzooy:

—Ix mgayajhuin'iingix. Ooy mayjäy ymina'ñ ñaybidägáanigixy co je' ajcxy je Cristo, ymina'ñ ajcxy: “Ĥich je' je Cristo; huingóniñ anajty je xii je tiempo mina je naaxhuiñybi ycixa'ñ ytiċgoya'ñ.” Ca' ajcxy axam mbanicxipy. ⁹ Co miich ajcxy ayuc midohuipy co jāy chachchiptungixy, e ñayñibidicigixy, ca' mdziģiyygixipy, com ooy ycopicyity co jada jadu'n jayijp ytuniiyb yjadiiyb, ca'nan hue' je' anajty tim cijxp tim tiċooyb (je naaxhuiñybi).

¹⁰ Chi Jesús yjacmínañ:

—Nayñibidäģiib naax cajp miiđ huingbi naax huingbi cajp. ¹¹ E minip miċ'ujx, etz mij yuu mij pa'm xii yaa. E jadiib mij'adzigi'ñ, etz ooy iixpejt huidi qüexigip tzajpcixy.

¹² Ma ca'ni anajty jadu'n jadyii, xypahuidijtcóotcixipy jāy, xymájtzcixipy, xyciyéjicixipy ma judíoĵäy ñaymujctac. Chi jāy ajcxy xypidäģipy pujxtigoty, xyajniċxcixipy mach ma rey etz ma gobernador ajcxy yhuinduu. Jadu'n jāy ajcxy jibic xytunipy miiđ miich ajcxy com co anajty ti xymijpidäaccixyich. ¹³ Miich ajcxy tiy'ajt myegipy miiđ iich nxii yciċpi. ¹⁴ Co jāy ajcxy yxiĥuipy ma codungdiċ, ca' ni nej ajcxy mjot'adziyb, ni ca' ajcxy mhuinmayipy nej m'adzóogixipy. ¹⁵ Nyegipyich ayuc etz tiy'ajt nej huaad mmidzip m'adzoogixy. Ca' mmidzip ajcxy jadipy nej xy'adzóogixipy, e nej xyjacxiģigixipy. ¹⁶ Miich ajcxy mgi'mdeedy, mgi'm'uch, mgi'm'ajch, etz mgi'm'ajuugy amigüg xyciyéjicixipy ma cõtujctac. Nijējity miich ajcxy m'ögipy miiđ co anajty ti mmijpidaaccixy iich n'ayuc. ¹⁷ Mayjäy ajcxy ca' xy'ixaanipy xychogaanipy miiđ co anajty ti mmijpidaaccixy iich nxii. ¹⁸ Ni tüģ miich ajcxy mgöhuay ca' ytiċgoyipy. ¹⁹ Pen ooy ajcxy mmecxtucy, chi m'alma ñidzögipy huinixi.

²⁰ Co ajcxy m'ixipy Jerusalén anajty ti ñaducy miiđ ymidzip, huin'it ajcxy mnejhuĥuipy co huingon je'anajty ma yhuindigoyaani. ²¹ Huin'it tiempo je jāy ajcxy huidi jim Judea naaxjot yquéeccixipy ñicxcixipy ajcxy yuugjoty, etz je jāy ajcxy huidi jim Jerusalén queegipy ajcxy, etz je jāy ajcxy huidi camjoty ca' huaad y'occajptigiyyñi ma je Jerusalén cajp. ²² Je tiempo mina yjadiiyb ayo'n miiđ co anajty judío jāy ti ytundigooygixy, je' jada yajcuydundaayb jadu'n nej yjaaybétyity ma Dios ñecy. ²³ ģAyoob yi tőxyjäy ajcxy huidi anajty ung tzi'm'ijtp huin'it xii, etz huidi anajty miiđ y'ungma'xung! Ooy jadiib mij ayo'n ya naaxhuin etz tzip éċin ma jada cajp. ²⁴ Nijējity ajcxy y'ögipy tzijoty, e nijējity yajniċxip tzumy mach ma huingbi cajp huingbi naax. E Jerusalén naxmiĥuäģiydähuĥiib yi jāy huidi ca' yjudioĵäyity, minipy je tiempo mina anajty Dios yajcixaani yajtiċgoyaani yi' ajcxy y'ané'min.

Nej jada' yminiipy je Dios y'ung

²⁵ Huin'it xii huin'it tiempo quëxiigip ijxpejt ma xii po' etz ma yi madza', ya naaxhuiñ ooy jäy ajcxy jotmay mii'idipy. Je jäy ajcxy ooy chigihuipy yjihuihuipy yhuinmay'ahuididipy ajcxy ooy, müid je meyy ycixpi co anajty chachpidigy chachnögy chachmina'ñ. ²⁶ Yi jäy ajcxy anucxi'ñ yajcidahuiñ co anajty ajcxy icy nej yjadyii huindu'mybi naaxhuiñ; e huidijaty mic'ajt yajpatp jii by tzajpjoty yüxtähuipy yi'. ²⁷ Huin'it müich ajcxy xy'ixipyich, iich je jäy huidi tzoön tzajpjoty, nmiinich jocjoty müid je nmic'ajtich, nmiinich müid iich ngötüjcin etz iich n'oy'ájtin mijpi. ²⁸ Co je ayo'n tiempo jadu'n yjatzondägy, chi mba't'ijxcixipy com huingoniñ anajty mina Dios xyñihuáangixipy xycohuáangixipy.

²⁹ Chi Jesús yajnimay ajcxy tüg ayuc, yminañ:

—Ijxcix yi higueri etz tüg'óciy quipy, ³⁰ co yhuamigy huin'it müich ajcxy nejhuüy co ti yhuingoni mina ypottigiiyi. ³¹ Tim jadu'n nej müich ajcxy ijxpejt mbicy ma higueri quipy co pottitempo ytigiiyi, nañ jadu'n co müich ajcxy m'ixipy je ijxpejt tzajpcixy jadu'n nej yam nyajnimaaigy, mnejhuihuipy ajcxy co huingónip je tiempo mina Dios y'ane'mañ ya naaxhuiñ.

³² Janch nimaaybich müich ajcxy co jadu'n yjadiiyb ytuniiyb jayijp, ca' anajty o'ctäy je jäy ajcxy huidibi tzinaayb jugy'ájticy jadachambi xii tiempo. ³³ Yi tzajp etz naaxhuiñybi naxip tigoyip yi'. Iich n'ayuc ca' ñaxipy ytigoyipy ni camina.

³⁴ Naygüend'ájtigix müich ajcxy ca' mnijot'ájticy yi jocni yi mügi, etz yi tzinaayin jugy'ájtin, jigix ca' ajcxy xyniminipy jotcömoñyi je ayo'n xii je ayo'n tiempo. ³⁵ Timetiini minipy je ayo'n tiempo müid jäy ajcxy ycixpi huidi ya tzinaayb ma tüg'óciy naaxhuiñybi. Tim jadu'n nej tüg iyujc ayo'nbaady co timetiini yajtüxuuch. ³⁶ Ni'ixi' ijtcix, mibijctzoogix Dios, ca'ydí ayo'n ajcxy mbaatcixy huidi jadaanip, jigix jii by myajpáatcixipy tzajpjoty ma iich nhuinduu, iich, je jäy huidi tzoön tzajpjoty.

³⁷ Xii anajty Jesús yaj'ixpicy ma Dios ytijc, e coodz anajty chooñ ñicxy jim ma cögor huidi yxii Olivos. ³⁸ Jabom jabom jopy jopy ñiminyii tüg'óciy cajpjäy jii by ma Dios ytijc tibäy co y'amído'idaani ajcxy Jesús y'ayuc.

22

Xiicyögyixy capxyögyixy nej huaad Jesús májtcixy

¹ Huingon anajty je xii mina jäy tzajcaagy caagyixy huidi ca' ylevadura müidity, huidi jäy ytijpy pascua xii. ² Chi je teedy mjtungmüdpí etz je escribas yhuinma'ñ'ixtaagyixy nej ajcxy ocyaj'ögipy Jesús. Chigiiyb anajty ajcxy je cajpjäy.

³ Chi je mujcu' ytigiiy ma Judas yjot yhuinma'ñ. Je Judas hue' anajty ymimetz xii Iscariote, je' nidügti je majmetzpi discípulos. ⁴ Chi Judas ñicxy oy migapxy je teedy mjtungmüdpí etz tzajptijc soldado huindzin, e ycapxytuñ müid je' ajcxy nej jëbi ciiyey Jesús. ⁵ Huin'it je Jesús ymidzip ooy ajcxy yxoondaccottay. Chi ajcxy ñaygapxi co meen möhuangixy je Judas. ⁶ Chi Judas cöbijcy je meen, chi yhuinma'ñ'ixtay nej jëbi ciiyegipy Jesús ma ca'p mayjäy y'ixyii yhuindicxyii.

Je huindzin Dios y'adzu'ájtin

⁷ Chi paty je xii mina jäy cay je tzajcaagy huیدی ca' ylevadura müdity com huin'it anajty ajcxy yaj'ögy cöbixy ymang pascua xiiğixp. ⁸ Chi Jesús quejxy Pedro etz Juan, nimay:

—Nıcx miich ajcxy yaj'oyi' je pascua adzu'ibi, jaydëbi ajt ngaayım.

⁹ Chi ajcxy y'amıdooy:

—¿Ma mdzocy co nyaj'oyi'huıbıch ajcxy?

¹⁰ Chi Jesús ymınañ:

—Co mdıgıhuıpy ajcxy cajpjoty, mbaadıpy tög yëydıjc huیدی yajnicxp tög majt nıi. Mbanıcxyp ajcxy je yëydıjc cooni yjadıpy ma ytıjc. ¹¹ Co miich ajcxy mjädıpy ma je jäy ytıjc, chi ajcxy mnımähuıpy je codıjc: “Nhuındzinıch jadu'n mınaam: ¿Ma yaj'ahuädz yajpaady ma ngayıpyıch je pascua adzu'ibi müd iich ndiscıpulotıjı?” ¹² Je codıjc miich ajcxy xyajni'ixıhuıpy tög cuarto ma mımejtzpi piso. Ni'ixı' jım je adzu'ibi. ¹³ Chi Pedro etz Juan nıcxı, chi paty jadu'n nej anajty ti nımäyii, e jım ajcxy ni'ixıy je pascua caayın uucın.

¹⁴ Co je hora paty, chi Jesús y'ıxtacy ma je mesa müd je y'discıpulos ajcxy.

¹⁵ Chi Jesús ymınañ:

—Ti ooy nıjot'atyıch co nmııdgayaangıxy jada pascua adzu'ibi ma ca'ni n'ögyñıch. ¹⁶ İich miich ajcxy jadu'n nımaayb co iich ni mina ca' njaccayıpyıch jadög'oc je pascua adzu'ibi, ıxtı cooni yajcuydundähuıpy je pascua xii ytiy'ajt ma Dios y'ané'mın.

¹⁷ Chi Jesús conıgy je ügy co Dioscojüyıy yajnaxy, huin'it ymınañ:

—Uccıx jada ügy, naymööyigıxy miich ajcxy. ¹⁸ Cham iich miich ajcxy nımäy co jadu'n nej yjacnicxa'ñ xii tiempo ca' vino nıi üga'ñıch ıxtı cooni Dios y'ané'mın ymıııpy ya naaxhuıñ.

¹⁹ Nañ yconıgy Jesús tög tzajcaagy co mıbijtzooy Dios, huin'it tujc-huäcxy moy discıpulos ajcxy, e chi ajcxy nimay:

—Jada tzajcaagy iich nnınıcx'ajtpyıch huیدی ngıyejcpyıch ma yi o'cın müd miich ajcxy mboç ycıxpı. Jada ıjxpejt miich ajcxy müıdıpy oy jäymeç müd iich ycıxpı.

²⁰ Co anajty ti ycaйдаaygıxy, chi Jesús conıgy je ügy jadög'oc, chi ymınañ:

—Jada vino je' jada Dios y'ayuc ytiy'ajt jemybi jadu'n yi' nej iich nni'py huیدی temam yogam müd miich ajcxy ycıxpı.

²¹ Jadachambi yi jäy huیدی xycıyegaambıch ma nmıdzipıch, ya je' cham müd'ıñäyıch ma jada mesa. ²² Janch jadu'n njada'ñ n'ayoohua'ñıch jadu'n nej ti nyajnıgodugıyııjıch. ¡Ayo'n padamy je jäy ayoob huیدی xycıyegaamyıch ma nmıdzipıch!

²³ Chi je nımajmetzpi ajcxy ñayñımaayı miñ xyıpy:

—¿Pın jada' yi' ma iich ajt huیدی jadu'n tundıgoyam?

Yajcapxcójcıxy pın jada' jacnıgi ymıjıty

²⁴ Chi je nımajmetzpi huیدی Jesús anajty ti huin'ıxy ca' ajcxy ñay'ayuc-huınjıhuııy pın jada' jac mıjpi oc'ıdıpy. ²⁵ Chi Jesús nimay ajcxy:

—Yı reyes ajcxy y'ane'myb ajcxy naax cajp jadu'n nej tög huındzın, yi' ajcxy huıdıbı ane'mb yajtıjycıxy co ooy oytuungıxy. ²⁶ Müd miich ajcxy ca'ydı yjadu'nıty. Hue' janchtıy je mıjpi ma miich ajcxy huen ñaybidägyii nej jıhuıy ymútzıty. E je huیدی nıgohuajc'ajtp huen ñaybidägyii nej jıhuıy je' je' je tumbı. ²⁷ ¿Pın je' jacmıjıp? ¿Huیدی ıñaybı ma mesa, o huیدی ni'ixııyb

a'ixi:yb caayin uucin? Yi' je' jacmíjip huidi ññaayb ma mesa. Per ñich ijtpich müd miich ajcxy jadu'n nej huidi ni'ixi:yb aa'ixi:yb caayin uucin.

²⁸ Míich ajcxy ti m'íjtcixy müd ñich ma anajty ayo'n ti nyajnaxyich. ²⁹ Paady ñich miich ajcxy tüg ané'min nmooyb, jadu'n nej ñich ndeedy ti xymöyich. ³⁰ Jaydëbi müich ajcxy mgáaygixipy m'uuccixipy ma ñich nmesa jibby ma ñich n'ané'min e m'ñähuiipy ajcxy ma je ane'mdac, e mdiydúngixipy m'ané'mgixipy je nimajmetz picy Israel ñaax ycajp.

Jesús capxpídzimy co Pedro ymina'nañ co ca'p Jesús icy'adyi

³¹ Nañ jadu'n je huindzin Jesús yminañ:

—Simón, Simón, jadachambi je mujcu' xyjot'ixaangixy xyhuinmañ'ixaangixy jadu'n nej jāy trigo huimbojy co yajhuätzaangixy.

³² Per ñich Dios nmibijctzooyich müd miich ycixpi, jigix miich ca'ydi mmibíjcin ytigoy'ity. Mina anajty miich ti mjothuimbity, jotmic migápxipy yi mmigügtijc ajcxy.

³³ Chi Pedro yminañ:

—Huindzin, jotcujc ñich nnicxa'ñich müd miich oy pujxtigótyity, etz oy ndim'y'ögibich müd miich.

³⁴ Huin'it Jesús nimay Pedro:

—Ñich müich nimaayb co ca'ni anajty tzey yaxigy jabom jopy co müich miná'nip tugü'oc co müich ca' xy'ix'adyiijich.

Huingomb hori ma Jesús y'ocyaj'ijxmadzañ

³⁵ Chi Jesús nimay ydiscípulos ajcxy:

—Co ñich müich ajcxy jayhuin nguejxy, ni mmoral, ni ca' mmeefnydijc, ni mgig ti mmi'oygixy, ¿nej myajtigoy'ijt ajcxy ti jatyi?

Chi ajcxy y'adzooy:

—Ni ti.

³⁶ Chi Jesús yminañ:

—Jadachambi pin ymeeñydijc etz ymorral müd, huen minicx; nañ pin ca' müdity y'espada, huen toogy yjocx huit, chi juyipy y'espada. ³⁷ ñich müich ajcxy nimaayb co copicy jada yajcuydunipy huídibi mimb jaybety müd ñich ycixpi ma Dios ñecy ma jadu'n yminañ: “Yaj'amichomujc (je Cristo) müd yi' ajcxy huidi jibicjäyip.” Tüg'óciy mimb jaybéty ma Dios ñecy müd ñich ycixpi, yajcuydunipy yi'.

³⁸ Chi Jesús ydiscípulos ajcxy yminañ:

—Huindzin, cha metz espada.

Chi Jesús y'adzooy:

—Huen müd yi'yi.

Jesús Dios mibijctzoy jim Getsemaní

³⁹ Chi Jesús jim choñ ñicxy ma je cop huidi yxñ Olivos, com jim anajty nicxy coodz coodz, chi je' ydiscípulos ajcxy ypanicxi. ⁴⁰ Co ajcxy yja'ty ma je cop, chi Jesús yminañ:

—Mibijctzoogix Dios huen xypubedipy xypudigíhuipy ajcxy ca'ydi mdigüygixy jibic tuum.

⁴¹ Chi Jesús huinhuäctuty je discípulos ajcxy tüg tzaagäch yjiguëgyity, chi ycoxtinay'ahuüy ytigüy Dios mibijctzoob. ⁴² Chi Jesús yminañ:

—Dios Teedy, pen müich m'a'ixi:yb píjcgich jada tzaachypi, ca' ñich huaad nyajnaxyich, per ca' ñich huaad ngi'mdzójcin nguyduñich, müich mdzójcin huen yajcuyduñ.

⁴³ Chi ñayguëx'ici tüg ángel tzajpjoty chooñ, jotmic miğapxy je Jesús.
⁴⁴ Yam anajty Jesús ooy ytaj ymay, chi Dios miñijctzooyb jacmictägy. E je yxibitniñ ypidzimy janch jadu'n yi' anajty nej ni'py janch mijjaty y'ocnajtza'cxiiñi.

⁴⁵ Co ypidigy ma anajty Dios miñijctzoy, chi nihuimbijty je' ydiscipulos ajcxy, chi oy paatcixy maab anajty ajcxy miid jotmay. ⁴⁶ Chi Jesús nimay ymiğügtijc ajcxy:

—¿Ti co mdzachmaagixy? Pidiccix miñijctzoogix Dios, ca'ydi jibic tuum mdiñiygixy.

Yajnicxcixy mach je Jesús

⁴⁷ Jim Jesús anajty ymiğügtijc ajcxy miidcapxy miidmiydägy, co je mayjäy oy yjäty. Jayijp anajty ymiñ je huidi anajty xiijip Judas, yi' je' anajty nidügti ma je nimajmetzpi Jesús ydiscipulos ajcxy. Chi Judas miñingooñ Jesús co anajty tzücx'a'ñ. ⁴⁸ Chi Jesús ymiñañ:

—Judas, ¿nej miid tüg tzücx'in mg'eyecy ma ymiidzip, je jäy huidi tzoon tzajpjoty?

⁴⁹ E je' ajcxy huidi anajty Jesús ymiid, co ajcxy ijxy jadu'n nej ytuñyii yjadyii, chi ajcxy ymiñañ:

—Huindzin, ¿tzoc ajt miñiimbijtim?

⁵⁰ Chi nidüg je' ajcxy yajtzaach'iyi je teedy mijtungmiidpi tüg ytumbi, quejtzpujxi tüg ytätz'ac a'oy'amybi. ⁵¹ Huin'it Jesús ymiñañ:

—Ixmajtzcix, huen jadu'ñyi.

Chi ñidoni je jäy ytätz'ac, e jadu'n yajtzoocy. ⁵² Chi Jesús nimay ajcxy huidi nimiini, yi teedy tungmiidpi ajcxy, yi Dios ytijc policia huindzin etz mijjäydijc:

—¿Nej co xyñimíngixyich miid pujx etz mguipyijpxu'ñ jadu'n nej jihuiy iich tüg meetzpi? ⁵³ Jiiby iich anajty jabom jabom ma Dios ytijc, e ca' miich ajcxy ti ti mduñ miid iich. Per cham jëdu'n je tiempo miina miich ajcxy xy'ane'myich etz je jibicpi xymimadägyich.

Pedro ymiñañ co ca' ixy'adyii Jesús

⁵⁴ Chi ajcxy majch je Jesús, yajnicxy ajcxy, e pidacy ma teedy mijtungmiidpi ytijc. Je Pedro jiguëgyjihui' anajty ypanicxyii. ⁵⁵ Jim ajcxy jin yajmijiy tibägujc chi ajcxy y'ixtactay nidüg'óc'iy. Pedro y'ixtacy nañ jadu'n ma je jäy ajcxy. ⁵⁶ Huin'it tüg pödumbi ijxy Pedro iñäy ma jimba', chi huindixpejty nimay:

—Jada yëydijc nañ ymiid anajty Jesús.

⁵⁷ Chi Pedro ca' cöbijcy, ymiñañ:

—Töxyjäy, ca' iich yi' n'ixy'adyii.

⁵⁸ Nañ jahueengi huin'it jadüg jäy Pedro yhuindixpejti, ñimaayi:

—Miich, yi Jesús ajcxy anajty miid m'ity.

Chi Pedro ymiñañ:

—Ca' n'ichity.

⁵⁹ Ti anajty tüg hori ninaxni co oy huingbi ymiñandägy:

—Janch co jada yëydijc yi' anajty miid y'ity Jesús. Com nañ galileojäy yi'.

⁶⁰ Chi Pedro ymiñañ:

—Ca' iich nhuinjihuiy nej miich mm'ina'ñ.

Capxni anajty je Pedro co tzey oy yaaxigy. ⁶¹ Chi je Huindzin Jesús ni'ijxhuimbijty je Pedro. Huin'it Pedro jäymetzcootti je' ayuc nej anajty

yHuindzin Jesús ti ñimäyii: “Ni ca'ni anajty tzey yaaxig'y cham coodz co miich tugig'oc xycoyüdzibych.” ⁶² Chi Pedro ypidzimy tibäy, oy jibby yäxy müid tájin máyin.

Nixiiccixy yajxiiccixy yi Jesús

⁶³ Je jäy ajcxy huidi anajty Jesús cuend'ajtp, ooy ajcxy nixiicy niyaaxy, etz nañ ooy ajcxy huingojxy jipcojxy. ⁶⁴ Chi ajcxy huingoxodziy, e cojxy ajcxy ma yhuiñyjip, nimaaygixy:

—Octiygapx, ¿pin ti xycoxy?

⁶⁵ E ooy anajty müid yjibic ayuc cixy cuety nimaaygixy.

Jesús mijjuntajoty yajpaady

⁶⁶ Co yxiimäiy, chi yöymujcy yi teedy mjtungmüdp'i ajcxy, yi mijjäydijc ajcxy, etz yi escribas ajcxy, chi ajcxy y'amidooy:

⁶⁷ —Nimaaygich ajcxy ¿nej müich je' je Cristo?

Chi Jesús y'adzooy:

—Co ixyipy nnigapxich, ca' müich ajcxy mibigipy. ⁶⁸ E pen ich müich ajcxy n'amidooyb, ca' müich ajcxy xy'adzohuipyich, etz canan huin'it xyñajtmadzihuibich müich ajcxy. ⁶⁹ Jadachambi e ñicxa'ñi ich, je jäy huidi tzoon tzajpjoty, n'ixtága'ñich a'oy'amy ma Dios mic'ajtmüdp'i.

⁷⁰ Chi nidüg'óciy je' ajcxy y'amidooy:

—¿Nej janch co müich Dios xy'ung'adyii?

Chi Jesús y'adzooy:

—Müich ajcxy jadu'n minamb co ich njëjity.

⁷¹ Chi ajcxy ymínañ:

—¿Ti ajt njac-huáanim testigo? Ti ajt yam ci'm nmidoohuim nej mína'ñ.

23

Jesús ma Pilato yhuinduu

¹ Chi tüg'óciy je mayjäy ajcxy ypidigy, chi yajnicxy ajcxy Jesús ma je gobernador Pilato. ² Chi ajcxy ytigüiy xibi ymínaangixy:

—Jada jäy naax cajp yaj'ixp'icp huidi ca' ytiy'ájtity. Yi' adujctáhuam co ca' huaad nmigüéjtim César, e ymína'ñ ci'm co yi' je' je Cristo huidi rey'ajtpi.

³ Chi Pilato y'amidooy Jesús:

—¿Nej müich je' judío jäy xyrey'ajtp?

Chi Jesús y'adzooy:

—Müich jadu'n minamb.

⁴ Chi Pilato nimay je teedy tungmüdp'i ajcxy etz je mayjäy:

—Ca' ich ti pocy nbaadyich ma jadyaabi yëydijc.

⁵ Chi Jesús ymidzip nig'i anajty ajcxy yminan'adütcixy:

—Jada Jesús naax cajp tzachyajqueec-huäcxtaayb je judíojäy müid yi' y'ayuc. Yajtzondacy Galilea, e jadachambi ya Judea jadu'n idich.

Jesús ma Herodes yhuinduu

⁶ Co Pilato midoy Jesús ymidzip ajcxy nigapxy Galilea, chi y'amidooy pen galileojäy je Jesús anajty. ⁷ Chi mic'amy huinjihuüy co yi' jim anajty yajpaady ma Herodes y'ane'my, chi jim quejxy ma Herodes huidi nañ jadu'n anajty yajpatp jim Jerusalén huin'it xii. ⁸ Co Herodes ijxy Jesús, chi oy jotcugüiy com tiyüp anajty ooy ja'ixa'ñ, ti anajty may ayuc midoohui, e ahuixy anajty co mijhuinma'ñ tunipy. ⁹ Janch may ayuc ooy jayaj'amidooy,

e Jesús ni tüg'aa ca' y'adzooy. ¹⁰ Jim anajty teedy mįjtungmįdpi etz je escribas ajcxy, tzachnįgįbįjtcixy mįctągy. ¹¹ Chi Herodes mįd yjįy ooy nįxiicy yajxiicy Jesús, ca' mį'įjxy mįjpidacy. Chi xojxy mįd oyhuit etz quejxhuimbįjty jim ma Pilato. ¹² Huin'it xįi Herodes etz Pilato ajcxy řaymįgųgįjci, com naimįjotma'tip anajty ajcxy huin'it tiempo.

Jesús yajmoy ysentencia co y'ogįpy

¹³ Chi Pilato huomųjcy yį teedy mįjtungmįdpi, yį cajptungmįdpi, etz yį naax cajp. ¹⁴ Chi ajcxy nįmay:

—Ti miich ajcxy xyajnimįngįxyich jadayaabi yęydįj, jadu'n miich ajcxy mįnamb co ooy jįy yajqueec-huęcxtay. Ti iich yį' jatiyduńich ma miich ajcxy mhuintu, ca' iich yį' ni ma ypocy ti nbaati, jadu'n nej miich ajcxy mįxįgįxy. ¹⁵ Nań ni ca' Herodes ti pocy ti paady ma jada jįy, com ti njaya-jniquexyich, ni ti pocy jada Jesús ca' ti tuń huidi huaad nyajco'ogįyich. ¹⁶ Miń n'octzaachytuńich, jaydębi nįajtzmadzįhuibich.

¹⁷ Jadu'n je gobernador anajty costumbre mįdity co najtzmadzįy tųg machyįy mįjxiįjoty. ¹⁸ Chi je mayjįy tųgmųcy ajcxy ymįnaandacy:

—įYaj'og jadayaab Jesús! įNajtzmadzį' yį Barrabás!

¹⁹ Je Barrabás anajty pujxtįgoty ti ypidągyii co anajty ti nibidįgy je gobierno, nań ti anajty yjįyyaj'ogįy. ²⁰ Chi Pilato nįmay ajcxy jadųg'oc co najtzmadzįhua'ń Jesús. ²¹ Chi je mayjįy janch mįc ymįnań:

—įYajcruudzpet miich yį'! įYajcruudzpet miich yį'!

²² Chi Pilato ymįnań je midugįg'ocpi:

—ęTi Jesús ti tundįgoy? Ca' yį' ma ypocy nbaatich. Miń n'octzaachytuńich, e najtzmadzįhuibich.

²³ Je jįy ajcxy nįgi anajty ymįnaan'adįtzcixy janch mįc, co huen yajcruudzpejty. Chi ajcxy jadu'n mįmadacy Jesús co chachne'mgįxy je teedy tungmįdpi, etz je cajpjįy ajcxy. ²⁴ Chi jada' Pilato cuyduń jadu'n nej je jįy ajcxy anajty piįctzoy. ²⁵ Chi Pilato najtzmadzįy je Barrabás huidi anajty pujxtįgųtyip, co anajty chach jįy yajqueec-huęcxy, etz yjįyyaj'ogįy, je' huidi yį jįy ajcxy ypiįctzou. Chi Pilato cįyejcy Jesús ma yį' ajcxy huen tungįxy nej tzojccixy.

Jesús yajcruudzpejti

²⁶ Chi je judįojįy ajcxy yajnicxy Jesús. Jim tų'am ajcxy mįnaybaati tųg jįy huidi anajty ti chooń camjoty, huidi anajty yxįi Simón, e ycogįjpity anajty Cirene. Chi adzip ajcxy Simón yajquejcycaįy Jesús ycruudz, e yajpanįcxy ajcxy Jesús.

²⁷ Jac'axam anajty naax cajp panįxcixy, etz nań may tųxyjįydįj ajcxy chachyaaxcixy mįd jotmay mįd yį' ycįxpi. ²⁸ Chi Jesús ni'įjxhuimbįjty je tųxyjįydįj ajcxy, chi nįmay ajcxy:

—Miich Jerusalén tųxyjįydįj ajcxy, ca' xyńiýaaxcįxich. Nayńiýaaxįgįx miich ajcxy ci'm etz m'ung ajcxy ycįxpi. ²⁹ Chi ypaadįpy tiempo co jįy ajcxy ymįna'nįpy: “Jotcųj je tųxyjįy ajcxy huidi ca' y'ung įxy, huidi ca' ti y'ungtzimįgy, etz huidi ca' ti y'ung yajtżtzcixy.” ³⁰ Chi je jįy ajcxy nįmaydągįpy mįjtun mįjcop: “Nįgidagųtcįch ajcxy”; etz je mutztun mutzcop: “Yajtįgooygįch ajcxy.” ³¹ Pen jįy ajcxy tzaachypi ayo'n mooyb Dios y'ung, nįgi ajcxy jacįińi ytundįgoya'ń mįd Dios yjįy, tim jadu'n nįpaady nej pin puxam tzuxy quipy nań puxamy quipy tįtzpi.

32 Nañ jim anajty yajnicxcixy müid Jesús jametz pocyjäy. Tú'ciy müid Jesús anajty yaj'ögaangixy. 33 Co ajcxy oyjäty jim ma tüg it huidi jäy ytiy py ögpí cohuaic, chi ajcxy jim Jesús yajcruudzpejty müid metz pocyjäy: tüg pocyjäy a'oy'amy, jadüg anajty'amy. 34 Chi Jesús ymínañ:

—Dios Teedy, mecxi ajcxy ypocy, com ca' nejhuiygyxy ti ytungixyp.

Co je soldados anajty ajcxy yajhuäcxaani ac je'y Jesús yhuit, chi ajcxy ijxy suerte pin ocjédib. 35 Jim je cajpjäy anajty yhuindicxcixy, yam je tungmüidpi nixigy yajxigy Jesús, ymínañ ajcxy:

—Jada Jesús huingjäy ti yajtzögy, huen cham ci'm nayyajtzögyii, pen yi' je' je Cristo, je huidi Dios ti huin'ixyi.

36 Nañ jadu'n je soldados ajcxy nixiiccixy yajxiiccixy Jesús, nimijhuägy ajcxy möhuaangixy anajty vino ta'mbi. 37 Chi je soldados ajcxy ymínañ:

—Pen müich Rey'ajt ma yi judíojäy ajcxy, nayñihuäni ci'm.

38 Ma Jesús ycödu jim anajty yjaayity griego'amy, latin'amy, etz hebreo'amy: JADA JE' YI JUDIOJÄY AJCXY YREY.

39 Chi tüg pocyjäy huidi anajty cruudzcixy ooy nixiicy yajxiicy Jesús ymínañ:

—Pen müich je' je Cristo, naygohuäni ci'm, e cohuaangich ich ajcxy nañ jadu'n.

40 Chi je jadügpí pocyjäy oy y'adzooy, ogy ymügü, nimay:

—¿Nej ca' müich Dios mdzigü. Ca' m'ixy co tú'ciy ti nbóccyähüim?

41 Ich ajt janch paatip jadu'n, co jadu'n jada ngöbícim tzaachypí je tüibi ndundigooyim. Jadayaabi Jesús janch ni ti jibicpi jada ti catuñ.

42 Chi je pocyjäy nimay Jesús:

—Tun may'ajt xyjäy medzipich co anajty mjäty jii by ma m'ane'mdac.

43 Chi Jesús oy y'adzooy:

—Janch ich müich yam nimäy co cham ich müich müid'íjtnipy ma je oybi it.

Jesús y'o'cni

44 Co cujcxüibi paty, chi oy ycoodzäy tüg'óciy naaxhuiñ ixti minacyxüini.

45 Chi xü ca' y'oc'ani. Chi je huit oy ycützhuäcxy huidi anajty adüydujcp je Dios y'it jii by ma Dios ytijc. 46 Huin'it Jesús mic ypätcapxy ymínañ:

—Dios Teedy, cham nyajcüdügü ich n'alma.

Co Jesús jadu'n ymínañ chi y'ögy.

47 Co je soldado huindzin ijxy jadu'n nej anajty ti ytunyü ti yjadyü, chi ooy jäymejch yi Dios ymínañ:

—Janch co jadayaabi yëydijc anajty tudägy yjäyity.

48 Chi je mayjäy tüibi anajty jim yöymüjccixy yhuindicxcixy, co ajcxy ijxy jadu'n nej ytuuni yjajti, chi ajcxy huimbijttaayñi cajpjoty yam ycaach tzachójcixy müid jotmay ycixpi. 49 Cham tüg'óciy Jesús ymügügtijc ajcxy huidi anajty müid ñay'ixy'adyü, etz töxyjäydijc ajcxy huidi anajty Jesús ti ypadzonyü jim Galilea, jigügy je' anajty ajcxy yhuindicxcixy.

Yajnaaxtiügü ajcxy Jesús

50 Jim anajty tüg yëydijc huidi anajty yxü José, hue' anajty ycogájpity Arimatea ma Judea naaxjot. Je' anajty judío müitungmüidpi, e je' ooy anajty chach'oyjäyity etz ytudägyjäyity. 51 Je' nañ yjijp'ijxy anajty co yminipy je Dios y'ané'min, e ca' je' anajty jijptigiyü müid jacnaagity müitungmüidpi co ajcxy yaj'ögy Jesús. 52 Chi José ñicxy ma Pilato oy

píjctzooñi Jesús ñiniçx. ⁵³ Chi yajmínajcy ma cruudz, e mo'ñ mñd tüg sávana, chi pidacy ma ögpi jut, ma tüg tzaahuinguetzmijc ma ca'ni anajty ni tüg ögpi jii by yajpidägyp. ⁵⁴ Je' anajty ajcxy ni'ixiib a'ixiib je pascua xii e je' anajty tim tzondägan je pócxin xii.

⁵⁵ Chi je töxyjäydijc huidi anajty ti ypadzoñyii Jesús jim Galilea, panicy ajcxy je José axam. Chi ajcxy nañ jadu'n ixy je ögpi jut, etz je ninicx jadu'n nej jii by yajpidacy. ⁵⁶ Chi ajcxy yhuimbijttay cajpjoty. Chi ajcxy yaj'oyiib ujtz xuucpi, tzoj, etz unguento, chi amay'ajty je pocxin xii, jadu'n nej anajty cötújin y'ane'my.

24

Co Jesús y'ögy chi yjugypijcy

¹ Co je seamaan y'ixtigüy janch tim ticxícj je töxyjäydijc ajcxy ymiñ ma je o'cpi jut, chi mimiñ ajcxy ujtz xuucpi, etz tzoj huidibi anajty ti yaj'oyiigyxy. Nañ jadu'n midjadyii töxyjäydijc miñ. ² Chi ajcxy paty je tzaa ti anajty yjidiguegyii ma je o'cpi jut'aguu. ³ Co ajcxy ytiigiij jutjoty, chi ca' ajcxy paty je Huindzin Jesús ñiniçx. ⁴ Chi jadu'n yjajty, jii by anajty ajcxy jutjoty huinmaagyxy, co ñayguëxiigi ma ajcxy ymijc metz yëydijc janch adicxp anajty yhuít. ⁵ Chi ajcxy ooy chigiy, chi ajcxy yhuindactay, chi je metzpi yëydijc ymiñañ:

—¿Na'amy co m'ixtaagyxy yi jugypí ma yi tiibi y'ögy? ⁶⁻⁷ Ca' je' ya, ti je' yjugypicy. Jäymejtzcix jadu'n nej miñañ jim Galilea, co ymiñañ:

—Ooy ycopicyty co iich, je jäy huidi tzoon tzajpjoty, nyajcäyegipy pocyjäy c'am. Yi' ajcxy xyajcruudzpedipyich, chi njugypigipyich cudugiig xii.

⁸ Chi ajcxy oy jäymejtzcooty nej anajty Jesús ti ymiñañ. ⁹ Chi je töxyjäydijc ajcxy yhuimbijttay ma o'cpi jut. Chi ajcxy yajmñdmidactay jadu'n nej anajty ti iixcixy ti midoogixy mñd Jesús ydiscipulos ajcxy je nimajmetzpi etz jacjadyii jäy huidi yajpaatp ma je' ajcxy. ¹⁰ Je töxyjäy ajcxy huidi ooy ma Jesús ñaaxtigüy, je' je' anajty ajcxy: María Magdalena, Juana, etz María Jacobo ytaj, e cham jacnaagity ymidöxyjäydijc. ¹¹ Chi Jesús ydiscipulos ca' ajcxy tim mijpidacy je töxyjäydijc ajcxy ayuc, hue' ajcxy tijy ni go y'occapxcixy y'ocmiydaaccix, paady ca' ajcxy miñijcy.

¹² Chi Pedro ypidigy ñicxy poiyiyi ma anajty Jesús ti ñaaxtigüy. Chi Pedro yco'ixiib ma je o'cpi jut, chi ixy co ca' jii by ni ti, jëyi Jesús yhuít abicy y'ooxnäy. Chi Pedro yhuimbijty ma ytijc jihuiiy ooy jadu'n nej ti ytuñyii yjadyii.

Ma Emaús tü'aa

¹³ Huin'it xii metz Jesús ydiscipulos ajcxy ñicxy ma tüg cajp mutzpi hue' anajty yxii je cajp Emaús, hue' yjiguemyty mñd Jerusalén tug'px estadios (majmetz kilómetro). ¹⁴ Chi amiydaacip anajty ajcxy ñicxy. Nigapxcixy niñiydaaccixy nej Jesús ti yjaty ti y'ayoy. ¹⁵ E jadu'n yjaty ma anajty ycapxcixy ymiñdaaccixy je nimetzpi, chi Jesús ci'm niñijhua'cy je metzpi, chi mñd ñicxy ajcxy yquixy. ¹⁶ Oy anajty ja'iixcixy, ca' ajcxy tuñcuend pin je' anajty. ¹⁷ Chi Jesús y'amidooy je' ajcxy:

—¿Ti miich ajcxy miydacpy ma yam mdüyögyxy? ¿Nej co mdájcyxymmägyxy?

¹⁸ Chi tüg huidi anajty yxii Cleofas y'adzooy:

—Janch tũg'óciy mayjäy nejhuiydäy je ayo'n ti ytunyii ti yjadyii. ¿E miich naydũg jim jättac Jerusalén, e jadu'n tijy ca' mnejhuũy?

¹⁹ Chi Jesús je' ajcxy nimay:

—¿Ti ti ytuñyii ti yjadyii?

Chi je' ajcxy ymínañ:

—Jesús Nazaretpi, huidi Dios y'ayucnajtzcaxiyp, yi' anajty mij jánchíp ma yi' ayuc etz huinma'ñ ma Dios yhuinduu, etz cham ma tũg'óciy naax cajp. ²⁰ Chi yi' ajcxy je teedy mjtungmídpí etz ích ajt ndungmídpí Jesús yajcídigiñy je gobernador co huen yaj'ögyii. Chi ajcxy yajcruudzpejty. ²¹ Hue' ích ajcxy anajty ndzách'ahuijxyp co yi' je' huidi Israeljäy ajcxy cohuánaam ma ymídzíp. Jadachambi jada' ymídugígxí ma jadu'n ti ytunyii ti yjadyii. ²² Cham ích ajcxy ndöxyjäydíj ajcxy ooy xy'adzígíygíxyich. Ti y'oygíxy janch ticxícp ma o'cpi jut. ²³ E com ca' ajcxy paaty je ñaaxnícx, chí ajcxy yhuimbijtni ymínaangíxy co ti íjxcíxy yi' ángeles ajcxy, hue' je ángeles ajcxy ymínañ co Jesús yjuugyity. ²⁴ Huin'it nijéjity nmígügtíjcih ooy ma o'cpi jut, paty ajcxy janch jadu'n nej tóxyjäydíj anajty ymínaangíxy. Ca' je' ajcxy íjxy Jesús.

²⁵ Chi Jesús ymínañ:

—¡Miich jäy ajcxy ooy ajcxy m'aajuuñity mjtójuuñity, ca' ajcxy ti mdzocmíbíjccíxy co ajcxy mjamíbígá'níp huídibi y'ayuc najtzcaxiypí ajcxy ycapxy! ²⁶ ¿Nej ca' anajty ycopícyity co je Cristo ayo'n paadíp, e huin'it ytigíhuíp tzajpjoty ma yi' y'it oybí?

²⁷ Chi Jesús yajnímaay ajcxy Dios ytiy'ajt, chondägy ma Moisés ñecy, etz tũg'óciy jacjadyii necy huidi Dios y'ayucnajtzcaxiypí yjaay, yajxon ajcxy yajní'íxiyday jadu'n nej yjaybétyity míid je Cristo ycíxpi.

²⁸ Chi ajcxy mihuingoñ je mutz cajp ma anajty ñíxcíxy, je Jesús jadu'n ñaybidaaci jadu'n nej jihuũy jacjiguem ñícxxy. ²⁹ Huin'it ajcxy nimay adzíp:

—Hui'm miich míid ích ajcxy, nīgi jada chuu'íy'adích.

Chi Jesús ytigíy cajpjoty yhui'my míid je' ajcxy. ³⁰ Chi jadu'n yjajty co anajty ti y'ixtaaccíxy caaybí, chí Jesús tũg tzajcaagy conígy, e yajnajxy Dios cojuyip, huin'it tujc-huäcxy moy ajcxy. ³¹ Huin'it ajcxy íjxcajpy Jesús. Chi Jesús mic mícíy yaj'íjxtigoy. ³² Chi ajcxy ñayñímaayi:

—¿Nej ca' yjánchity co ích ajt ooy njihuũyím jótjoty huinma'ñjoty co anajty ajt jim xymídmíydacím tũ'am, etz co ajt xyñajtzcaxiypím je huidi jaybety ma Dios ñecy?

³³ E tím huin'ítíy ajcxy túbíjccíxy, chí ajcxy níxcíxni jim Jerusalén. Ni'amugi' ajcxy paty je majctũgpi Jesús ydiscípulos ajcxy e jacjadyii jäy ajcxy. ³⁴ Chi ajcxy mínaangíxy:

—Janch yi' co ti yjugypícy je Huindzin Jesús, com ti oy ñayguëxígyii ma Simón.

³⁵ Chi Cleofas nimíydacy jadu'n nej tũ'ay anajty ajcxy ti ñaybátigíxy míid Jesús, etz jadu'n nej ajcxy Jesús íjxcajpy co tzajcaagy ti tujc-huäcxy.

Jesús ñayguëxíci ma je' ydiscípulos ajcxy

³⁶ Jiiby anajty ajcxy tzachnimíydaaccíxy co Jesús oy ñayguëxígyii ma je' ajcxy. Chi ytinay'ahuñy cujc'amy ma je' ajcxy, chí ymínañ:

—Jotcugi' miich ajcxy.

³⁷ Chi je' ajcxy ooy ñay'adzígíyí ooy huinmaaygíxy, hue' ajcxy tijy íjxmañíyby. ³⁸ Chi Jesús nimay je' ajcxy:

—¿Na'amy co mjet mhuinma'ñ ti ytigoydaaygixy? ¿Nej co m'aa'ájtigixy mjet'ájtigixy pin ñich? ³⁹ Ijxcix miich ajcxy ñich ngi' ñich ndecy, ñich jëni ñich. Nídongich etz Ijxcich ajcxy. Tüg espíritu ca' mñidity chüch ni ypacj, jadu'n nej m'ijxcixy ñich nmñidity.

⁴⁰ Co Jesús jadu'n ymínañ, chi ajcxy yaj'ijxy yci' ytecy. ⁴¹ Per ca'ni ajcxy mñibjcy mñid co anajty ajcxy chachjotcújcity, chi Jesús ajcxy nimaay:

—¿Mñid ajcxy ti ii mgayipy?

⁴² Chi ajcxy moy Jesús acxtzäy, etz tüg jñdy serpäg. ⁴³ Chi cöbicy, chi ycaay y'uucy jim ma je' ajcxy yhuinduu. ⁴⁴ Huin'it Jesús ymínañ:

—Huidi m'ijxyp cham je' je' huidi nyajnimay jayhuin, co ñich miich ajcxy anajty mñid'ijtcixy, co copicy nguydundähuiñich jadu'n nej yjaybétyity ma je Moisés ñecy je jëcyip, etz jacjadyii Dios y'ayucnajtzcapxñybi ñecy, etz yi salmo necy.

⁴⁵ Huin'it je' ajcxy yjet yhuinma'ñ ymiiñ ymejch, jaydëbi huinjñhuñygixipy huidi jaybétyip. ⁴⁶ Chi Jesús yjacmínañ:

—Jadu'n jaybety y'ity ma Dios ñecy co copicy co je Cristo paadip ayo'n e yjugypigipy codugig xii, maabi anajty y'ögy. ⁴⁷ Huen ajcxy yajcapxhuäcxy Dios yti'ajt huindu'my naaxhuiñ, chondägip Jerusalén, co ooyycopícyity huen jäy ajcxy jothuimbijtcix jaydëbi ajcxy paadip pocyhuinmeecxin. ⁴⁸ Miich ajcxy nidiy'ajt'adipy tüg'ócicy jadu'n nej cham ti m'ijxcixy ti mnejhuñygixy. ⁴⁹ Jadachambi nguexipyich ma miich ajcxy je huidi nDeedyich ti xyaj'ahuanñygixy. Hui'mgix ya Jerusalén ixti cooni ajcxy xyñidigihuip xycödighuip je Dios yjñhui'ñ ymic'ajt huidi tzonam tzajpjoty.

Jesús ypa'ttigñyñ tzajpjoty

⁵⁰ Huin'it xii Jesús mñid tzoñ je' ydiscípulos ajcxy, chi ajcxy ycajppidzimy, ñicxy ajcxy mñihungon je Betania. Chi Jesús xajhuäcxy yci' mñibjctzoy Dios mñid je ymigügtjic ajcxy ycixpi. ⁵¹ Chi jadu'n yjayty ma anajty Dios mñibjctzoy mñid yi' ajcxy ycixpi, chi abicy yajhui'mni je' ajcxy e je' ypättigñyñi jilby tzajpjoty. ⁵² Chi yi' ajcxy jim yjac-huäcxijpy Dios ojadjtcixy. Chi ajcxy yhuimbijttaayñi jim Jerusalén janch jotcujc. ⁵³ Chi ajcxy jabom jabom anajty ñicxcixy ma Dios yti'ic chajpcapxycapxcixy, ojadjtcixy jäymejtzcixy yi' Dios, Janch jadu'n jada. Amén.

SAN JUAN

Jaayhui'my Jadu'n Nej Jesucristo Ytun Yjajti

Dios y'ung huidibi y'oy ya naaxhuiñ yejci Dios y'ayuc tiy'ajt

¹ Co naaxhuiñybi oga'n chondacy jiiyim anajty Dios y'ung, e yi' yajne-jhuiy jäy ajcxy Dios y'ayuc ytiy'ajt. Dios y'ung tú'ciy anajty yajpaady ma Dios. ² Je' tim oga'n'aty anajty yajpatp ma Dios. ³ Tüg'óciy huidijaty yaj'ijxp yajpatp ya naaxhuiñ, yi' yaj'oyiday yajcojtay. Tüg'óciy huidijaty Dios yajcojy, tú'ciy ytuñ mïd y'ung. ⁴ Dios y'ung yi' jugy'ajtyejtaayb ma tüg'óciy naaxhuiñyjäy. Mïd co jugy'ajtyejtäy ma tüg'óciy naaxhuiñyjäy, je' je' tiy'ajt co Dios y'ung ymïd Dios ymic'ajt. Jadu'n nipaady nej tüg jïin huidibi jäy codïcxp. ⁵ Ya naaxhuiñ yajpaady anïi. Yi anïi jadu'n yi' nej coodzpi. Yi Dios y'ung ti mïmiñ ya naaxhuiñ Dios y'ayuc ytiy'ajt. Jadu'n Dios y'ayuc ytiy'ajt ma jäy yjot yhuinma'ñ nej tüg jïin ytiçxy agoodztuuyb. Yi anïi ca' ñaygodigïyïi mïd Dios ytiy'ajt.

⁶ Ma'xung'ajt tüg yëdydïc huidibi Dios anajty ti yajñibicy. Hue' anajty yxii Juan. ⁷ Yi' oga'n tiy'ajt yejci co Dios ymic'ajt etz ytiy'ajt yajpaady ma Dios y'ung, jigix tüg'óciy je jäy ajcxy camïbijctähuipy je Dios y'ung. Dios y'ung jadu'n nipaady nej tüg jïin huidibi codïcxp ma jäy ytüyöy. ⁸ Je Juan ca' je' anajty yjëjty je Cristo, je huidibi capxhuäc xp Dios y'ayuc ytiy'ajt. Hue' janchtiy je Juan ñidiy'ajt'ajt je Cristo. ⁹ Je Dios y'ung hue' je' ma'xung'ajty ya naaxhuiñ. Je' je' anajty je Dios ymic'ajt etz ytiy'ajt ymïd, je janchypi, ma jëb tüg'óciy jäy ya naaxhuiñ patcixy Dios ytiy'ajt.

¹⁰ Je Dios y'ung ya anajty yhuidity naaxhuiñygiçy. E jada naaxhuiñ yi' yaj'oyiday. E may je naaxhuiñyjäy ca' ajcxy ijxcaypy. ¹¹ Je ymigügtijc, je judiojäy, je' ajcxy nimiini, e may ajcxy je ymigügtijc ca' ajcxy ycöbijci. ¹² Tüg'óciy je jäy ajcxy pinjaty mijpidac yi' yxii yi' ymic'ajt, yi' ajcxy yajmoy Dios ymic'ajt, e jadu'n nipaty nejjihuiy ajcxy Dios y'ung'adyii. ¹³ Canan hue' je' co naydijïyb Dios y'ung co ti yma'xung'aty jadu'n nej jäy ajcxy y'ocma'xung'aty. Nañ ni ca' yjadu'nity nej jäy tijy, nej jäy jïjp'ixy, ni canan jäy jadu'n ti huinmay. Hue' janchtiy Dios jadu'n ti huinmay.

¹⁴ Je Dios y'ung ya naaxhuiñ je' yma'xung'ajty mïd ñinïcx etz chinay mïd naaxhuiñyjäy. E ïch ajcxy n'ijxich yi' y'oy'ajt etz ymic'ajt, jadu'n nej Dios Teedy y'ung tüg'pajc oy'ajt etz mic'ajt mïdity. ¹⁵ Juan ñidiy'ajt'ajt je Dios y'ung, e chi capxyidzïmy, e jadu'n ymïnañ:

—Jada je' je jäy huidibi ïch jadu'n nimydaacich ma miich ajcxy. Je huidibi miimb jac'axam ma ïch, jac mic'ajt mïd y' ca'ydi ïch, com jacjayïjp yi' jugy'ajt paty ca'ydi ïch.

¹⁶ Je Dios y'ung oy xychojçim xyjihuiyïm mijcajee, paady je' tuuñ may'ajt oy'ajt mijcajee mïd ïch ajt ycixpi. ¹⁷ Com Dios y'ané'min ycötujçin micpi hue' Dios yajniguejx je Moisés. Co Dios quejxy Jesucristo ya naaxhuiñ, chi may'ajt oy'ajt tuñ mïd je jäy ajcxy ycixpi, e nañ je' ytiy'ajt yajniguejx je Jesucristo. ¹⁸ Je Dios ni camïnaabi pin ca'ixyñi, je y'ung tüg'pajci yajpatp ma Dios Teedy ity. Je Dios y'ung ti xyajnejhuiyïm nej Dios yajpaady.

Juan el Bautista je' tiy'ajt yejci co Jesús je' anajty Dios y'ung

¹⁹ Jadaabi je' je tɨy'ajt huiðibi Juan yejc, co judío jāy ajcxy quejxy nijėjity teedytɨjc etz tzajptɨjc tungmɨɨdɨpi. Jim ajcxy chooñ Jerusalén nɨcxy ma anajty Juan yajpaady, chi ajcxy y'amidooy:

—¿Mbin miich? ¿Nej miich je' je Cristo huiðibi Dios yquexamy?

²⁰ Je' ñigapx je tɨy'ajt, ca' ñaygoyützi, chi yminañ:

—Ca' ñich njėjity je Cristo.

²¹ Chi ajcxy jac'amidooy:

—¿E pin miich mnaydijyii? Pen ca' mjėjity je Cristo. ¿Nej miich je' je Elías?

Chi Juan y'adzooy:

—Ca' je' n'ñichity.

Chi ajcxy jac'amidooy:

—¿Nej miich je' je Dios y'ayuccapxhuäcxpi, je huiðibi ñigapxy ma Dios ñecy co ymiinañ ya naaxhuiñ?

Chi Juan y'adzooy:

—Ca'.

²² Chi y'amidooy ajcxy jadüg'loc:

—¿Mbin miich? Jigix ñich ajcxy tɨy'ajt nyajñicxibich ma yi tɨbi ñich ajcxy xyquexyich. ¿Ti miich nayxñigoyäxyii?

²³ Chi Juan yminañ:

—Ñich je' je jāy huiðibi Dios y'ayuccapxhuäcxip ma tüg mɨjtigɨduum, tim jadu'n nej jii by jaybety ymiñ ma Isaías ñecy, nañ tim jadu'n ñich nmına'ñich co copɨcy nayñi'ixñiyigix ma yi mjot yi mhuinma'ñ, jèbi naybáatigixy mɨd mHuindzin Dios. Jadu'n nej jāy ixypy tü'aa yaj'oyty co tüg huindzin ymiina'ñ.

²⁴ Je teedytɨjc etz tzajptɨjc tungmɨɨdɨpi huiðibi oy migapxy Juan, hue' anajty ajcxy fariseojäy ti yquexyii. ²⁵ Chi ajcxy jactim'amidooy Juan:

—¿Ti miich co mjäyayñibety? Peni ca' miich mjėjity je Cristo, ni mgajėjity je Elías, ni mgajėjity huiðibi Dios y'ayuc najtzcapxñyip.

²⁶⁻²⁷ Chi Juan y'adzooy:

—Ñich hue' jāy nyajñibetyich mɨd ñi. Ya naaxhuiñ ji tüg jāy huiðibi miich ajcxy ca' m'ixy'adyii. Je' huiðibi jac'axam mimb ma ñich, je huiðibi ca' mihuaadity nɨcxy yi' xytumbi'adyiijich, nɨcxyich ycğhuin nguejich.

²⁸ Jadu'n ytuni yjajti jim Betábara, jim'amy ahuin ma Jordán jim ñi, jim anajty Juan jāy yajñibety. Juan tɨy'ajt yejc co Jesús je' anajty yjugy'ajt yegam mɨd ñich ajt nbocy ycixpi.

Jesús nayyajhuindzigihuaanip ma Dios mɨd jāy ajcxy ypocy ycixpi

²⁹ Chi je com jabom co ijxy Jesús anajty ñimiñyii, chi Juan nɨmay je jāy ajcxy:

—Cha je' ymiñ je Dios yjāy huiðibi Dios nayyajhuindzigihuaanip mɨd naaxhuiñyājy ajcxy ypocy ycixpi. Tim jadu'n nej judío jāy ajcxy Dios huindzigiy mɨd ypocy ycixpi. ³⁰ Jada je' huiðibi ñich nnigapxypich co jac'axam ymiina'ñ ma ñich tüg yēdyjc huiðibi ñigi Dios ymic'ajt y'oy'ajt mɨdity ca'ydi ñich. Com jiiyim anajty yi' yjugy'aty co oga'n naaxhuiñybi chondacy. ³¹ Oy ñich anajty ca' yi' n'ixy'adyiijich huingixy jipcixy, nyajñibetich jāy, jigix yi judío jāy nejhuihuip ajcxy co ji yajpaady je Cristo je huiðibi Dios ymic'ajt mɨd.

³² Chi Juan nigodiy'ajt'ajty je Cristo co ymina'ñ:

—Hich ti n'ixyich yi Espíritu Santo jii by choñ tzajpjoty, jadu'n yquëxígy nej tüg muuxy, e chi y'ixtacy ma Jesucristo. ³³ Tiydudägy ca' hich anajty n'ixy'adyiijich. Je Dios huidibi xyquejxich jäy yajñibejtpi, je' hich anajty jadu'n ti xyñimäyich co je jäy ma anajty n'ixyich je Espíritu Santo ñigidägyii anajty etz yhui'my ma je'. Je' je' jadu'n anajty huidibi y'adigihuiipy yjottigihuiipy Dios yjihui'ñ ymic'ajt ma je jäy ajcxy. ³⁴ Cham nnägapxpetyich co hich ti n'ixyich je jäy, e nyejcpyich t'iy'ajt co je' je' je Dios y'ung.

Jesús yhuin'ijx nijëjty jäy huidibi anajty ydiscípulo'andaanipy

³⁵ Chi je com jabom jopy jim anajty Juan yajpaady m'iid metz jäy huidibi ixpijcp ma yi'. ³⁶ Chi anajty ajcxy tzachhuindicxy Jesús co anajty jim ñaxy, chi Juan nimay je metzpi jäy:

—Oc'ijxcix ocnejhuiygyx, cha je jäy huidibi Dios nayya-jhuindzigihuaanip m'iid naaxhuiñyjäy ypocy ycixpi.

³⁷ E je metzpi jäy huidibi anajty ajcxy ixpijcp ma Juan, co jadu'n ajcxy midoy nej Juan yminañ, chi ajcxy Jesús padzooñ. ³⁸ Chi Jesús y'ijxhuimbijty, chi ijxy co anajty ajcxy ypanicxyii, chi jada' nimay ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tiiyi ti mja'ttägy?

³⁹ Chi Jesús y'adzooy:

—Miingix, jigix ajcxy m'ixipy ma ti nja'ttägyich.

Chi jada' ajcxy panicxy, e chi ajcxy ijxy ma anajty ti yja'ttägy. Je huin'it xiiimbí chi jim je' m'iid yhui'miy, com mijminacyxii anajty co ajcxy jim ymejch.

⁴⁰ Andrés, je Simón Pedro ymiguëx, je' anajty tüg tzoonip huidibi nimetz ajcxy midou jadu'n nej Juan yminañ, etz je' anajty ajcxy ti padzooñ Jesús.

⁴¹ Chi jada' Andrés oy ixtäy y'uch Simón tim jayijp, chi nimay:

—Ti hich ajcxy nbaady je Mesías —jadu'n je ayuc Mesías yhuimbizima'ñ Cristo.

⁴² Chi Andrés m'iidnicxy Simón ma Jesús, e chi Jesús huindicxpejty, nimay:

—Miich je' Simón, Jonás miich xy'ung'ajtp. Miich je' mxii'adiiyb Cefas —huidibi ayuc'amy huimbizimb tzaa.

Jesús je' yhuin'ijx Felipe etz Natanael

⁴³ Chi com jabom Jesús chooñ ñicxy jim Galilea, chi minaybaati Felipe, chi jadu'n nimay:

—Pajamgich.

⁴⁴ Felipe jim anajty ycogajpity Betsaida, nañ je' je' je cajp ma anajty ajcxy ycogajpity Andrés etz Pedro. ⁴⁵ Chi Felipe minaybaati je jäy huidibiyxii Natanael, chi jadu'n nimay:

—Ti hich ajcxy je' nbaadyich je jäy huidibi yajñigapxp yajnimiydacp ma Moisés ñecy, etz yi Dios y'ayucnajtzcaxiiybi ñecy. Yi' je' je Jesús, José y'ung huidibi cogajpip jim Nazaret.

⁴⁶ Chi Natanael y'adzohuimbijty:

—¿Nej jim Nazaret ti choñ tüg oyyäyi? Com ac jadu'n jäy yminañ co ac jibicjäydijc jim tzinaayb.

Chi Felipe yminañ:

—Jam ci'm octim'ix.

47 Co Jesús ijxy co Natanael ñimiñyii, chi jadu'n ymíñañ:

—Cha tüg judíoñy huiðibi ca' pín huin'ñinípy.

48 Chi Natanael ymíñañ:

—¿Nej miich ti xy'ijxcapyich pín jáy ñich?

Chi Jesús nimay Natanael:

—Ca'ni anajty Felipe xyñimaayñi: “Jam íxim je Jesús” co anajty miich jiiiby'emy ma je higueri quipypa't, huin'it ñich miich ti n'ijxcapy.

49 Chi Natanael y'adzooy:

—Huindzin, miich je' Dios y'ung. Miich je' Rey'adam ma je judíoñy ajcxy.

50 Chi Jesús y'adzooy:

—Míid co ti nnimäy co jiiiby'emy anajty miich ma je higueri quipypa't co ñich miich ti n'ijxcapy. ¿E ti mdimjanimibicy? Jactimmijhuinma'ñ etz jactimmij'oy'ajt m'ixamyb mbadamyb.

51 Chi Jesús jadu'n ymíñañ:

—Janch tím tiy ñich miich ajcxy yam jadu'n nimäy co m'ixipy ajcxy yi tzejp y'ahuäch etz Dios y'áñeles ajcxy chooñ tzejpjoty xyñigidägyich, e ypa'ttiigiygixy jadüg'oc tzejpjoty. Choongixy yja'tcixy ma ñich je jáy huiðibi tzoon tzejpjoty.

2

Jesús y'oy ma anajty jáy nix#duñ tüg pijcin jim Caná

1 Midugígxíibi anajty maabi ajcxy Jesús minaymigápaxigixy, ma je cajp huiðibi yxi Caná ma je Galilea naaxjot jim anajty huinxíidungixy tüg jáy huiðibi anajty ti ypicy. E jim anajty nañ jadu'n Jesús ytaj. 2 Chi Jesús míid je' ydiscípulos ajcxy yajhuooy jim ma je xi anajty ytuñyii yjadyii. 3 Ti anajty vino ycijxtaayñi, huin'it Jesús ytaj ñimayñi:

—Ca'p ajcxy míidiñ vino.

4 Chi Jesús y'adzooy ytaj nimay:

—Ca' ti jotmay nmíididyich míid miich töxyäy. ñich nhorí ca'ni paady mína jáy ajcxy nyajnejhuíhuíbiich pín ñich.

5 Chi je ytaj nimay je tumbidijc ajcxy:

—Mdúngxipy nej anajty ajcxy Jesús xyñimaaygixy.

6 Jim anajty tudujc tzaadu'tz ma anajty nií y'ity. Je nií anajty ajcxy yajtumy co anajty ajcxy ycíbuycixy jadu'n nej ypocy íxpujcixy, jadu'n anajty ajcxy judíoñy costumbre míidity. Tügpí tzaadu'tz ymíid anajty yjot metz majt tugíig majt nií. 7 Chi Jesús nimay je tumbidijc ajcxy:

—Yaj'ujtzcix yi tzaadu'tz míid nií.

E chi ajcxy yaj'ujztay mabaat y'a'ujtznaxy je tzaadu'tz. 8 Chi Jesús ymíñañ:

—Yajpidzimgix cham yi nií, e yajnicxcix jiiiby ma huiðibi ane'mb ma yi caydac uuctac.

Chi ajcxy yajnicxy je nií. 9 Co jada' je ane'mbi jihuíymajch je nií ti anajty yvinocojy, chi mijhuoy je yéydijc huiðibi anajty ti ypicy. Je ane'mbi ca' anajty nejhuíy ma anajty je vino ti choñ. Jéyi anajty je ytumbidijc ñejhuíyb co nií anajty ajcxy yajpidzimgixy ma je tzaadu'tz. 10 Chi je ane'mbi nimay je huiðibi anajty ti ypicy:

—Tüg'óciy jáy ajcxy huiðibi xiídumb, hue' ajcxy yajtumy jayijp je vino oybi. E co jáy ajcxy ooy yxondaacni, chi oyñihuiðibi vino nií jacyajtungixy. Miich janchtiy, ti m'amay'aty yi vinoní oybi ixti chamni myajtuñ.

11 Je' je' je oga'nibi mǎjhuinma'n̄n huidibi Jesús ytuun jim Caná ma Galilea ñaaxjot. Chi yajniguëxǎgy je ymic'ajt etz y'oyjǎy'ajt. E je huidibi anajty ajcxy yaj'ixpijcpy, chi ajcxy ooy mǎbijcy mǎjpidacy je Jesús.

12 Co jadu'n tǔg'ócǎy ytuni yjajti, chi Jesús y'idacy jim ma je cajp huidi yxǎ Capernaum mǎid ytaj etz y'uch ajcxy, etz huidibi anajty yaj'ixpijcpy. Jim ajcxy yhuäcxijpy tǔg xǎi mejtz xǎi.

Jesús yajpidzim ajuuybi adoocpi ma Dios ytijc

13 Tim huingon anajty je pascua xǎi huidibi judío ajcxy ytumy jim Jerusalén, paady Jesús ñicxy jim. 14 Jim ma Dios ytijc Jesús paty je' huidibi anajty ajcxy ajuuybi adoocpi, jadu'n nej ma ymiñ huaj, borregi, etz muuxy (huidibi jǎy ajcxy Dios yajhuindzigǎiyb). Nañ jim meeñyhuingogombidijc anajty ajcxy y'ñaaygǎxy ma ymesa. 15 Chi Jesús yaj'oyǎy tǔg cochac huojp. E chi ixhuojppidzimday je ajuuybi adoocpi ajcxy ma Dios ytijc ñihuaj etz ñiborrego. Chi yǎ meeñyhuingogombidijc ymeeñ cǔxijtnajxtayǎ, e chi ymesa tijhuimbijttaayǎ. 16 Chi ñimay je muuxy-toocpidijc ajcxy:

—Yajpidzimǎgǎx jada muuxy ya. Ca' ñich nDeedy ytijc yhuaanǎ ajcxy ajuydac adoocac.

17 Je' ajcxy huidibi anajty Jesús yaj'ixpijcpy chi ajihuiygootǎ ajcxy je ayuc, jadu'n nej jaybety ymiñ ma Dios ñecy: “Ooy ndzocy njihuiyǎich Dios ytijc, paady ooy nnijottǎigoyǎich Dios ytijc.”

18 Chi je judío ixpicytijc ajcxy y'amidooy Jesús:

—¿Ti mǎjhuinma'n̄n miich xy'ocyaj'ixambich ajcxy nej tǔg ijxpejt, pen janch mǎidity cǔtujcin co m'ixhuojppidzimdǎy yǎ ajuuybi adoocpi ajcxy?

19 Chi Jesús y'adzooy:

—Yajhuindigooyǎx jada Dios ytijc, e codugǎg xǎi ñich yǎ jadǔg'oc nyajpidǎgǎpy.

20 Chi jada' je judío ixpicytijc ajcxy y'adzooy:

—Huixchǎguǎpx tudujc jimǎjt yhuäcxijpy co jǎy cojy jada Dios ytijc. ¿E miich tijy myajpidǎgamy codugǎgxiǎji?

21 Per ca' je' anajty nigapxy je Dios ytijc. Hue' je' anajty cǎ'm ñayñǎgapxyii co anajty y'öga'n̄, etz co yjugypǎgǎpy jadǔg'oc codugǎg xǎi. 22 Chi jada' co Jesús yjugypǎjcy codugǎg xǎi maabi anajty y'ögy, je huidibi anajty ajcxy ti yaj'ixpicy, ajihuiygootǎ ajcxy huidibi Jesús anajty ti yajnimǎyǎigǎxy. Chi jada' ajcxy mǎbijcy ooy jadu'n nej anajty ycojaayǎy ma Dios ylibro, etz com nañ jadu'n anajty Jesús ti ymǎna'n̄.

Jesús ñejhuiy nej jǎy ajcxy yjot yhuinma'n̄n mǎidity

23 Co anajty Jesús yjimity Jerusalén pascua xǎijoty, mayjǎy ooy ymǎbijci co ajcxy ijxy je mǎjhuinma'n̄n huidibi anajty ytumyb. 24 Jesús ca' anajty yjaty ñayǎyegyii ma je mayjǎy ajcxy (hue' anajty ajcxy chachyajrey'adamy). 25 Com Jesús ñejhuiydaayb anajty nej jǎy ajcxy nidǔg nidǔg yjot yhuinma'n̄n mǎidity ca' tzocy pǎn yajnimǎhuiyǎy ti anajty ajcxy ytunamy, com ñejhuiydaayb nej jǎy ajcxy yjot yhuinma'n̄n mǎidity.

3

Nicodemo oy ytǎy'ajtpicy ma Jesús

1 Jim anajty tǔg yëydijc, fariseojǎy y'ixpijcin anajty yajtuunipy. Hue' anajty yxǎ Nicodemo. Je' anajty ñǎgohuajc'ajtyp ma je judiojǎy ajcxy ymiñ.

2 Chi jada' Nicodemo ymiñ coodz ma Jesús anajty y'ity, chi ñimay:

—Huindzin, nejhuuyb ich ajcxy co miich tög huindzin huidibi tzomb ma Dios. Com ca' ni pin jaty nej tunipy je mijhuinma'n huidibi miich mdumyb, pen ca' Dios ymic'ajt mädity.

³ Chi Jesús y'adzooy:

—Janch janch ich miich yam jadu'n nimäy, co ca' ni pin ixipy Dios y'it, pen ca' jadüg'oc yma'xung'ajttigach.

⁴ Chi Nicodemo yajtiy:

—Per, ¿nej tög jäy tibi ymij'anäcciyñi y'ocnima'xung'ajttigájtzpity jadüg'oc? ¿Nej jëbi jadüg'oc ytigiy ma ytaj y'aa yjot, e chi yma'xung'adity jadüg'oc?

⁵ Chi Jesús y'adzooy:

—Janch janch ich miich yam jadu'n nimäy pen ca' jäy yjothuimbity etz ñibety, pen ca' Dios yjihui'n ymic'ajt y'adigiyi yjottigiyi, ca' jëbi ytigiy ma Dios chinäy. ⁶ Je jäy huidibi ajcxy ma'xung'ajtp ma töxyjäy, ymüid ajcxy ñinix yjugy'ajtin. Je jäy ajcxy huidibi Dios yjihui'n ymic'ajt adigiyipy jottigiyipy ymüid ajcxy Dios yjugy'ajtin. ⁷ Ca' nej mnayjihuihuuyb co ti nnimäy co copicy mma'xung'adipy huinjemy, co Dios yjihui'n ymic'ajt xy'adigihuiipy xyjottigihuiipy. ⁸ Com je poj miinuyb hueñtyma'amyty, e nmidoohuim co y'a'ich, e ca' nnejhuuyim ma choñ e ma ñicxy. Jadu'n nej je poj ypoxy e nganejuuyim ma choñ, nañ tim jadu'n yjaty müid je Espiritu Santo, ca' nejhuuyim nej yjaty co adigiy jottigiy jäy.

⁹ Chi Nicodemo yajtihuimbity:

—¿Nej tiy co yjadu'nity? Ca' nhuinjihuuyich.

¹⁰ Chi Jesús y'adzooy:

—Miich huindzin'ajtp ma yi judiojyäy, ¿ti co ca' mhuinjihuuyi jada yaabi tiy'ajt? ¹¹ Janch janch ich miich yam jadu'n nnimäy co ich etz nDeedich ngapxyp yi huidibi nejhuuyigixypich, e nyejcpyich ajcxy tiy'ajt yi huidijaty ich ti n'ixcixyich. Miich ajcxy judio ixpicytije ca' ajcxy mgöbjccixy ich ajcxy ndiy'ajt. ¹² Pen ca' miich ajcxy mibijccixy jada tiy'ajt huidibi njanimiydacypich huidibi yajpatp ya naaxhuiñ, ca' ajcxy mmibigipy co njanimiydägibich yi tiy'ajt huidibi tzajpjoty yajpatp.

¹³ Ca' ni pin ti y'oy tzajpjoty, ich je jäy tügpajc huidibi ti ndzoñich tzajpjoty, ti ngidägyich ya naaxhuiñ. ¹⁴ Jadu'n nej Moisés yaj'oyiy je pujx tza'n, e chi yajcruudzpety jim migtig'duum jigix chögipy je jäy ajcxy ma je ahua'n iyujc chüchy. Nañ tim jadu'n jäy ajcxy xyajcruudzpeda'ñich. ¹⁵ E tög'óciy jäy ajcxy pinjaty xymijpidaacpich, ca' yi' jugy'ajtin ycixy ytiгоoy ni mina.

Dios ooy mijcajee tzocy jihuuyi yi naaxhuiñyjäy

¹⁶ Ooy mijcajee Dios tzocy jihuuyi yi naaxhuiñyjäy co yecy y'ung tügpajcpi müid jäy ajcxy ypocy ycixpi. Paady pinjaty mibijcp mijpidacp yi' y'ung, ca' yjugy'ajtin ycixipy ytigoyipy tücci'yi. Hue' janchtiy y'alma ypaadipy tög jugy'ajtin huidibi ca' ni mina ycixipy ytigoyipy. ¹⁷ Dios ca' quejxy y'ung ya naaxhuiñ co tzaachytunipy yi naaxhuiñyjäy ajcxy müid ypocy ycixpi. Paady y'ung quejxy co yajpocyñihuáatzcixipy.

¹⁸ Je jäy ajcxy pinjaty mibijcp mijpidacp Dios y'ung, ca' ajcxy Dios chaachytunipy müid ypocy ycixpi. Je jäy ajcxy pinjaty ca' mibicy ca' mijpidägy Dios y'ung, pocycähuiipy ajcxy ma Dios, co ca' mijpidaci ajcxy Dios y'ung tügpajcpi. ¹⁹ Paady ycixpi Dios tzaachytuna'n mayjäy müid ypocy ycixpi, com co Dios quejxy y'ung müid ytiy'ajt ya naaxhuiñ, e ca'

ajcxy mibijcy Dios y'ung, jadu'n je' anajty nej tüg jün huidi codicxip jäy ajcxy ma chinaayin yjugy'ajtin. Per ca'p ajcxy je naaxhuiñjyäy mijpidacy je jün, jadu'n nej jihuïy ajcxy anajty yjacotcujcity co chinaaygixy agoodtuuyb, com je' co nigi tzachnijot'ajtcixy jibic-huinma'ñ. ²⁰ Com je jäy ajcxy huidibi jibic-huinma'ñ tzach nijot'ajtcixp, ca' ajcxy tzojci Dios ytiy'ajt, jadu'n nej jihuïy ca' chinähuaangixy ma jün ytiicxin. Ca' ajcxy y'amidoo'idani Dios y'ayuc, ca'ydi ñiguëxigy je jibicpi huidibi ajcxy ytumyb. ²¹ Je jäy ajcxy huidibi cuydumb Dios ytiy'ajt, je' ajcxy ñiminipy Dios y'ung ytiy'ajt, jadu'n nej jihuïy jün nimiingixy ma ytiicxy, huen jatymy niguëxigy co oy ytungixy etz co Dios ytiy'ajt ajcxy müidity ma yjot yhuinma'ñ.

Juan (el Bautista) tiy'ajt yejc ma jäy ajcxy müid Jesús ycxipi

²² Co jadu'n ytuni yjajti, chi Jesús ñicxy jim Judea naaxjot müid ydiscipulos ajcxy. Chi ajcxy jim yhuäcxijpy. Jim ajcxy jäy yajniibety. ²³ Nañ jadu'n Juan anajty yjäyayniibety jim Enón, com jim anajty ooy comni, e jim anajty jäy ymingixy etz ñiibejtcixy. ²⁴ Hue' jada jadu'n ytuni yjajti ca'ni anajty je Juan pidaaccixy pujxtigoty.

²⁵ Ca' ajcxy ñay'ayuc-huinjihuiyi nijëjity huidibi anajty Juan yaj'ixpijcy etz tüg jäy nej jëbi huaad ypocy ñayajnihuädziyb ajcxy. ²⁶ Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jäy huidibi anajty miich jim müid jim'amy Jordán mijniinaxy, je huidibi miich anajty mnidiy'ajt'ajtpy co je' je' je Cristo, nañ ooy chachjäyayniibety. E janch mayjäy y'ocnimujcin.

²⁷ Chi Juan y'adzooy:

—Ca' ni pin ni ti mic'ajt müidity, pen ca' Dios ni ti mic'ajt ymöyii. ²⁸ Miich ajcxy mnejhuïyb co nminaañich co ñich ca' njëjity je Cristo. Hue' janchtiy Dios xyquejxich jayijp co nnidiy'ajt'adipyich je Cristo. ²⁹ Co jäy ypcy je yëydijc je' je' müid'idam je ytöxyijc. E je töxycapxi huidibi ti yaj'oyiy je pijcin, ca' je' müid'ida'ñ je töxyjäy, jëyi co yjotcugiy co yöcmidoohui je töxyjäy ñäy co yjädy ma je' ytiyc co ypigaani. Cristo jadu'n je' nipaady nej tüg töxyjäy ñäy, e je töxyjäy jadu'n je' nipaady nej Dios yjäy. Je Cristo ymüid'idaaniy Dios yjäy. Jadu'n ñich nipaady nej tüg töxycapxi, ti Dios yjäy nyajni'ixiyich jigix mijpidáaccixipy je Cristo. Jotcujcich cham co je Cristo ti ymiñ, e ñicxy yi jäy ajcxy ma yi'. ³⁰ Ooy ytimycopicity co Jesús ymij'ajt paatniy, e ñich ndung ycijxnipy ymayñipy.

Dios y'ung tzoon jüby ma Dios

³¹ Chi Juan yjacminañ:

—Je Cristo huidibi jüby tzoon ma Dios jacmij ixpijcin müidity ca'ydi naaxhuiñjyäy ajcxy. Je jäy ajcxy huidibi ya naaxhuiñ ijtp, yminaaxhuiñjyäy ti yaj'ixpijigixy, e je' ajcxy ñidiy'ajt'ajtpy je naaxhuiñjyäy y'ixpijcin. Je Cristo tzoon jüby tzajpjoty, jacmijcajee yi' ma y'ayuc ytiy'ajt ca'dy pin. ³² Je Cristo ñigapxyp huidibi ti ixyc e ti midooy, e yi'y'ayuc ytiy'ajt ca' jäy ajcxy cöbigaangixy. ³³ Je jäy ajcxy huidibi cöbijcp Dios y'ung y'ayuc ytiy'ajt, je' ajcxy ñigapxpejtyp co Dios ytiy'ajt janch yi'. ³⁴ Je Jesús huidibi Dios yquejx, ca'pxy Dios ytiy'ajt ñigapxpejti, com Dios ti möy yi' y'ung yi' yjihui'ñ ymicc'ajt mijcajee. ³⁵ Dios Teedy chojcy yjihuiyb y'ung, e tüg'óciy ymicc'ajt ytiy'ajt yi'ti yajmigo'ixiydäy. ³⁶ Je jäy ajcxy pinjaty mibijcp Dios y'ung, ymüid'ajtpy ajcxy y'alma je jugy'ajtin

huidibi ca' ycixy ytigooy. Je jāy ajcxy pinjaty ca' capxymidooy Dios y'ung, ca' ajcxy y'alma miid'adipy je jugy'ajtin huidibi ca' ycixy ytigooy. Je'yi ypaadipy ajcxy Dios chip y'ejin.

4

Jesús ñaybaati miid tūg tōxyjāy jim Samaria

¹ Chi je Huindzin Jesús ayuc midoy jadu'n nej anajty je fariseojāy ajcxy ycapxcixy ymiydaaccixy co je Jesús jacmayjāy anajty yaj'ixpicy etz yajniibety ca'ydi Juan. ² Oy Jesús ca' anajty jāy yajniibety ci'm. Hue' janchtiy je' ydiscipulos anajty ajcxy jāy yajniibejtp. ³ E co Jesús jada nejhuüy, chi jim Judea choni, yhuimbijtni jim Galilea.

⁴ Co yhuimbijty, hue' anajty yjatytimyñaxihuañ jim Samaria. ⁵ Chi jada' yja'ty huingon ma je mij cajp huidi xiijip Samaria, jim ma anajty tūg pi'ccajp huidi xiijip Sicar, mihuingon je naax huidibi Jacob anajty ti möy y'ung José. ⁶ Jim anajty Jesús yajpaady ma je Jacob ñigondac. Com ti anajty Jesús y'anucxiyñi miid je tūyōyñ, chi y'ijxtacy jim ma je ñigondac anajty. Hue' anajty xi jim cugihuaanip. ⁷ Chi jim yja'ty ñigombi tūg tōxyjāy. Chi Jesús yminañ:

—Ich yajni'uucc. ⁸ Com je' ydiscipulos ajcxy huidibi anajty Jesús yjajm'ad'ajtip, ti anajty ñicxcixy cajpjoty juuyb pijcp.

⁹ Chi je tōxyjāy y'adzooy huidibi anajty cogajpip Samaria:

—¿Na'amy co ich ñi xypijctzoohuich? com miich hue' miich judío jāy, e samaria jāy ich.

(Co yi judío jāy etz samaria jāy ca' ajcxy ñaygodig'iyigixy.)

¹⁰ Huin'it Jesús y'adzooy:

—Co ixypiy m'ocnejhuüy je oybi huidibi Dios yejcy m'ad miich ycixpi, e m'ocnejhuüy ixypiy nañ jadu'n pin xypijctzoohuipy yi ñi, janch co miich ixypiy xyñimāyich: “Ich yajni'uucc”. E ich miich ixypiy nmooyb ñi huidibi jugy'ajt yegipy huinixi.

¹¹ Chi je tōxyjāy y'adzooy nimay Jesús:

—Huindzin, miich ca' m'adity ti miid myajpidzimipy yi ñi, e yi ñijut cicy y' ooy. ¿Ma tity m'ocpadañ yi ñi huidibi yajjugy'ajtp? ¹² ¿Nej jacnigi tity miich mij mnayyajnaxyii, ca'ydi ich ajt n'ap ndeedy Jacob? Je'je' huidibi jada ñigop yaj'oyñy. Jacob etz y'ung y'anäg ñi'uuc ma jada ñigop, e nañ jadu'n yajni'uucy yhuaj y'iyujc ajcxy ya.

¹³ Chi Jesús y'adzooy nimay je tōxyjāy:

—Tüg'ociy pinjaty ñi'uucp ma jada ñigop tidzi huüb ajcxy jadüg'oc.

¹⁴ Yi jāy ajcxy pinjaty ñi'uucp huidibi nmooybich, ca' ni mina ytidzihuüy, com hue' yi ñi huidibi nyejcy pich, ahuimbidity ma je jāy jadu'n nej tūg ñigop huidibi yegam jugy'ajtin huidibi ni ca' ycixy ytigoy.

¹⁵ Chi je tōxyjāy y'adzooy:

—Huindzin, ich mooyg yi ñi, ca'ydi jabom jabom ndidziyijich, e ca'ydi n'ocjacm'iniibich ma jada ñigop ñi yajpidzimbi.

¹⁶ Chi Jesús y'adzooy:

—Nix yajtzon mñay, e miid miin.

¹⁷ Chi je tōxyjāy y'adzooy:

—Ca' nm'ididyich ñäyich.

Chi Jesús y'adzooy:

—Janch tiy'ajt jadu'n nej miich mina'nñ, co ca' mmüidity mñäy. ¹⁸ Com ti mïddzinäy migoox yëdyjc, e huïdibi cham mmïd, ca' mñäy'adyii. Janch tiy'ajt jadu'n nej ti m'adzooy.

¹⁹ Chi je töxyjäy ymïnañ:

—Huïndzin, cham nhuïnjuhüiyich co miich je' tüg huïdibi Dios yhuij'ajt ycuje'ajt müd. ²⁰ Hich ajcxy n'ap ndeedyich hue' je' ymïnañ co jëbi ya huaad hich ajcxy nDios'ojadajtcixyich ma jadayaabi huingombi copjiip. E miich ajcxy judíojäy ymïnaangixy co jim Jerusalén je' ma huaad jëbi nDios'ojadajtim, ca' jac ma.

²¹ Chi Jesús y'adzooy nimay je töxyjäy:

—Töxyjäy mïpïdäg hich n'ayuc. Co ypadamy je xii je tiempo co ni ya ma miich ajcxy mDios'ojadajttac, e ni jim Jerusalén jäy ca' ojadadipy ajcxy yi Dios Teedy. ²² Miich ajcxy ca' tiy'ajt mnejhuüygixy nej jëbi huaad mDios'ojadajtcixipy. Hich ajcxy judíojäy nejhüiybich ajcxy je tiy'ajt nej jëbi huaad nDios'ojadajtim. Com tüg judíojäy je huïdibi yajnidzooctähuam je jäy ajcxy y'alma ma Dios. ²³ Ypadamy je xii je tiempo, e jada jëdu'n je tiempo co je huïdibi ajcxy tiydudägy Dios ojadajtp, y'ojadadipy ajcxy Dios müd oyjot oyhuinma'nñ etz müd Dios ytiy'ajt. Com yi Dios Teedy y'ixtaayb yi jadu'mbi jäy huïdibi ojadadim müd oyjot oyhuinma'nñ. ²⁴ Dios ca' ñinïcx müdity, jadu'n je' nej poj ca' yaj'ixy. Je jäy ajcxy pinjaty ojadajtp Dios, copicy co huen ojadajtcixy müd tudägyjot tudägyhuinma'nñ, etz müd Dios ytiy'ajt.

²⁵ Chi je töxyjäy ymïnañ:

—Hich nejhüiyb co je Mesías ymïna'nñ huïdibi naydijaanip Cristo, co je' ymïnipy, huin'it xyajni'ixihuaanim tüg'óciy tiy'ajt.

²⁶ Chi Jesús y'adzooy:

—Hich jëdu'n je Cristo huïdibi miich müdmïydacyp.

²⁷ Chi jada' yja'ty ajcxy Jesús ydiscípulos ajcxy. Chi ajcxy ooy jihüiy ti anajty co Jesús je töxyjäy müdmïydägy, e ni pin ca' yaj'amidooy ti anajty chojcyp ti anajty yñimïydacyp müd yi töxyjäy. ²⁸ Chi je töxyjäy jim ymajt ixmajch, chi ñicxy cajpjoty oy mayjäy nimay:

²⁹ —Mingix, jam tüg yëdyjc iixim. Ti hich yi' xyajnimaydäyich tüg'óciy tijaty ti nduñich. ¿Nej ca' jada' yi' jëjity je Cristo?

³⁰ Chi choñ ooy mayjäy cajpjoty, ninicxy ajcxy Jesús. ³¹ Yam anajty ajcxy Jesús ydiscípulos chachnimäyii adzip:

—Huïndzin, occaay.

³² Chi Jesús y'adzooy:

—Hich nmïdich tüg caayin uucin huïdibi miich ajcxy ca' mnejhuüygixy.

³³ Paady je' ydiscípulos ajcxy tzachhuinmay, ac jëyi ajcxy, nayñimayigixy miñ xipy:

—¿Nej ti pinjaty yajcayyii yaj'ügyii?

³⁴ Chi Jesús ymïnañ:

—Jotcuje nayjihüiyiiich co ti nguydunich Dios chojcïn. Com yi' ti xyquexyich ya naaxhuiñ, e nguydüunibich yi' y'ané'mïn. ³⁵ Miich ajcxy mïnaangixp co jactigoy'ijtni jamïdaax po' mïna cosecha nyajpidïcim. Oc-huinmay miich ajcxy, hich nmïna'nñich, jëbi nyajpidïcim yi cosecha cham cham. Huïndicxcix yi mayjäy huïdibi xyñigïdaacim choñ cajpjoty. Ni'ixi yi' ajcxy y'ity co amido'idaangixy Dios y'ayuc. Jadu'n ajcxy nipaty nej tugi cosecha huïdibi ti ymïjaani, jëbi nyajpidïcim. ³⁶ E pinjaty cosecha

yajpidǽp ypaatyp ajcxy ymuju'n. Nañ tim jadu'n miich ajcxy huídibi myajmibijcy yi jāy ajcxy co ñich je' je Cristo, mbaadipy ajcxy jotcujc'ajtin, etz huídibi ajcxy xymibijcpich xymijpidaacpich ypadamy ajcxy y'alma jugy'ajtin huídibi ca' ycixy ytiigooy. Tim jadu'n nej je jāy ajcxy huídibi niip etz huídibi cosecha yajpidǽp yjotcugiygixy miid co je cosecha ti y'ity, nañ tim jadu'n je jāy ajcxy huídidi cojaay jecy'ajty jada Dios y'ayuc etz miich ajcxy jotcugiygixy aguipxy co yi jāy ajcxy xymijpidägyich. ³⁷ Paady tity'ajt je ayuc huídibi minam: "Tüg jāy niip etz jadüg jāy cosecha yajpidǽp." ³⁸ Ñich ti nguexyich miich ajcxy myajmibigipy jāy huídibi ti paady Cristo ytity'ajt ma Dios ñecy. Yi Dios y'ayuc ycojaaybi ti möy je jāy Dios ytity'ajt, e miich ajcxy je' mbubedipy co myajmibigipy co ñich je' je Cristo.

³⁹ Mayjāy huídibi cogajpíp jim Samaria ymijpidac ajcxy je Jesús co je' je' je Cristo, miid co je töxyjāy anajty ti ymina'ñ: "Ti yi' xyajnimaydāyich tijaty ñich ti nduñich." ⁴⁰ Co je samariajāy ajcxy yjādy ma Jesús yhuinduu, chi ajcxy cohuanñy huen hui'my. Chi Jesús jim yhuimñy mejtz xiñ. ⁴¹ Janch mayjāy ooy ñigí mibijcy mijpidacy Jesús, co je' je' je Cristo co ajcxy ci'm midomiydacy je Jesús. ⁴² Chi ajcxy nimay je töxyjāy:

—Canan jēyi co miich ti xyajnimāy ñich ajcxy, paady ycixpi ñich ajcxy yam nmibicyich. Nañ ti ñich ajcxy yam ci'm n'amido'ityich, paady ñich ajcxy nejhuñy co janch jada yjējity je Cristo huídibi yajñidzögam yi naax-huñjāy ajcxy y'alma ma Dios.

Jesús yajtzooç tüg gobierno mijtungmüdpí ymang

⁴³ Mímejtz xiñbi anajty co Jesús chooñ jim, ñicxy jim Galilea. ⁴⁴ Jesús ci'm anajty ti ymina'ñ:

—Co jāy ajcxy huídibi miid Dios yhuñj'ajt ycuyc'ajt yajpaady ma yci'mgajp, ca' pin yajmij'adyii. ⁴⁵ Co Jesús yja'ty jim Galilea naaxjot, huídidi anajty ajcxy jimip agujc jotcujc ajcxy cöbijcy Jesús, com ti anajty ajcxy ijxcixy tijaty mijhuinma'ñ anajty ti tuñ jim Jerusalén xiñjoty, com nañ ti je' anajty ajcxy jim y'oygixy xiñ'ajtpi.

⁴⁶ Chi yhuimbijty Jesús jadüg'oc jim Caná ma Galilea ñaaxjot, ma je ñi yajvinocojy. Jim Capernaum anajty tüg rey mijtungmüdpí huídibi anajty y'ung píjcp. ⁴⁷ Co je' nejhuñy co Jesús anajty ti yhuimbity Galilea co anajty ti y'oy Judea, chi ñicxy, e chi cohuanñy co Jesús huen ñicxy y'ung tzoyiyii huídibi anajty ögaanip. ⁴⁸ Huin'it Jesús ymina'ñ:

—Pen ca' ixypiy ti m'ixy mijhuinma'ñ etz tijaty ijxpejt, ca' ixypiy mmibicy.

⁴⁹ Chi y'adzoy je rey ymijtungmüdpí:

—Huindzin, tun may'ajt ñicx ñich n'ung ma ca'ni y'o'cyñi.

⁵⁰ Chi Jesús ymina'ñ:

—Huimbit ma mdijc, je m'ung jugy'ajtni je'.

Chi je yēdyjc mibijcy Jesús nej anajty ti ñimāyii, chi ñicxy jadüg'oc ma ytijc. ⁵¹ Ñicxñip anajty co ytumbi ajcxy oy yjijpcobadyii, e chi ñimaayí co je' y'ung ti anajty y'agidägy.

⁵² Chi yaj'amidooy ajcxy ti hora anajty ti yhuaadñihuñy, chi ajcxy y'adzooy:

—Ixiiy cujc yxiñ naxy je toyii y'ixmajtzní.

⁵³ Paady je ungedeedy jihui'ñybijcy co huin'it je' jada' je tiampo co anajty Jesús ti ñimāyii: "Je m'ung jugy'ajtni je'." Chi jada' mibijcy mijpidacy Jesús miid tüg'óciy jāy huídijaty anajty yajpat ma yñin ytijc.

⁵⁴ Je' je' je mîmetzpi mijhuinma'ñ mij'oy'ajt huidibi Jesús ytun co chooñ jim Judea ñicxy jim Galilea ñaaxjot.

5

Jesús yajtzooc tûg jây huidibi anajty yci' ytecy xuuxy

¹ Co jadu'n ytuni yjati jim Jerusalén anajty ajcxy judíoJay tungixy tûg mijxi. Huin'it Jesús jim ñicxy jim Jerusalén. ² E jim Jerusalén jim anajty nîi abojtzîg y'ity, mîhuingon je poch aguu huidi xiijip puerta de las ovejas. Je it hue' anajty yajtijy hebreo'amy Betesda, e ymîd anajty migoox it yhuinguembetpa't. ³ Ma je huinguembetpa't mayba'mjây anajty jim chachcöгнаaygixy; je huintzpi, ciducp tecytucpi, cîxuxy tecyxuxypi, huidibi anajty ajcxy jim tzach'ahuijxp mina je nîi y'ocpu'xhuimbity. ⁴ Com tûg ángel anajty yhuimbety y'adijy ma je nîi abojtzîg y'ity, chi je nîi yajyücxxy. E je jây pinjaty anajty jayijp jiiyby nîijoty tigîyib co je nîi yücxxy, huin'it anajty ajcxy choocxxy, oy ixxyipy ti pa'm ajcxy tim mîdity. ⁵ Jim anajty tûg yéydijc hue' anajty ti ypa'mgögnây iipx majmocx tugîg jimijt. ⁶ Co Jesús ijxy jim ycögnây, ijxajpy co anajty je' jecyip chachmijtacni, chi nimay:

—¿Nej mdzögambi?

⁷ Chi je pa'mjây y'adzooy:

—Huindzin, ca' nmîdidyich tûg yéydijc pin ñich xypîdägîpy jiiyby nîijoty co anajty nîi y'ahuidijtcoty. E paady ycîxpi co oy ñich jim njamechich ma yi nîi, ti huingbi ñitigîyîi.

⁸ Chi Jesús ymînañ:

—Pidîg, yajpidîg yi mmaabejt, etz tûyöychon.

⁹ Chi mic'amy choocy, chi je' ymaabejt yajpidîgy ytigîy yöybi najxpi janch mic oy. Hue' anajty tûg sábadó xîi co choocy. ¹⁰ Paady je judíoJay ixpicytîjç ajcxy nimay je huidibi anajty ti chögy:

—Hue' yam sábadó xîi, paady ca' jadu'n ñigo'aducyity jadu'n nej m'idîch co mmaabejt mdzimhuidity.

¹¹ Chi y'adzooy je':

—Je jây tîibi ñich xyajtzögy, yi' ñich jadu'n ti xyñimây: “Yajpidîg yi mmaabejt etz tûyöychoon.”

¹² Chi ajcxy y'amîdooy:

—¿Pin miich jadu'n ti xyñimây: “Yajpidî yi mmaabejt etz tûyöychoon?”

¹³ Per je tîibi anajty chögy, ca' anajty je' nejhuîy pin je' anajty. Com ti anajty Jesús niyöydigooyñi ma je mayjây huidibi anajty ajcxy jim tzachajtîp ma je it. ¹⁴ Chi jada' jaccomjçy minaybaatti Jesús jim ma Dios ytîjç, e chi Jesús ymînañ:

—Cuentîpic nej ti mdzögy, ca' ni ti bocy mjactunîpy. Co pocy mjactunîpy ca' yjçyity co tim nîgi jibic ñicxy mjaty.

¹⁵ Chi je yéydijc ñicxy oy je' yajnimây je judío ixpicytîjç co hue' je' anajty Jesús, je huidibi anajty ti yajtzögyii. ¹⁶ Paady ycîxpi je judío ixpicytîjç anajty tzach'ixhuidijtcîxy tzachpahuidijtcîxy je Jesús, e yaj'ögaangixy mîd co anajty jây ti yajtzögy sábadó xîi. ¹⁷ Chi Jesús ymînañ:

—Ñich nDeedy tumb je' cham, ca' ypoocxy, paady ycîxp ñich nañ jadu'n nduñich cham ma miich ajcxy sábadó xîi.

¹⁸ Co Jesús jadu'n ymînañ, paady ycîxpi je judío y'ixpicytîjç ajcxy nîgi yjactotma'tcoty, ytimy yaj'ögamy anajty aj y Jesús. Ca' ajcxy

jadu'n yjotcujcity co anajty Jesús ca' cuyduñ judíojäy ajcxy ytiy'ajt nej ajcxy sábado xii yajmij'ajtcixy, etz co jadu'n yminañ: "Dios yi' nDeedy'ajtypich." Paady ycixpi ajcxy judío y'ixpicityjc yminañ co Jesús ci'm anajty ytüghua'ñ müid Dios.

Dios ymooye y'ung ymic'ajt

¹⁹ Chi Jesús yminañ:

—Janch janch ñich müich ajcxy yam jadu'n nimaaygixy co ñich Dios nDeedy'ajtypich. Ca' huaad ti nduñich müid ngi'mjot ngi'mhuinma'ñich. Jébi janchtiy nduñich huidibi n'ijxpyich Dios Teedy ytumy. Huidibi Dios Teedy ytumyb, ndumybich com Dios yi' nDeedy'ajtypich. ²⁰ Com yi' Dios Teedy ooy yi' tzocy jihuü yci'm'ung, paady xyajni'ixiydaaybich tüg'óciy yi' huidibi ytumyb. E nañ xyajni'ixihuaambich jacmijjatypí mijhuinma'ñ, ca'ydí jada yaabi mijhuinma'ñ nej ajcxy ti m'ijxycixy nej jada pa'mjäy ti chögy, paady ycixpi nägi mhuinmayipy ajcxy. ²¹ Jadu'n nej Dios Teedy yajjugypicy yi' o'cpi, e chi yajtzinäy jadüg'oc. Nañ jadu'n ñich anajty ndimymöhuamyb. ²² Com je Dios Teedy ca' je' ci'm ocyajciyöyaani ocyajtecyöyaani jäy ajcxy ypocy. Hue' tüg'óciy je ymic'ajt xyajciyöyaayich co ñich ndiydunipyich tüg'óciy naaxhuiñjäy, com Dios nDeedy'ajtypich. ²³ Hue' tüg'óciy je ymic'ajt xyajciyöyaayich, jigix tüg'óciy jäy xyajmij'adipyich. Je jäy ajcxy huidibi ca' xyajmij'ada'ñich, nañ ca' ajcxy yajmij'ada'ñ Dios Teedy huidibi xyquejxich ya naaxhuiñ.

²⁴ Janch janch ñich müich ajcxy yam jadu'n nimaaygixy: Co hueñypinjäyity, pinjaty xy'amido'jtibich n'ayuc, e ymibijcyp ymijpidacyp je tübi xyquejxich ya naaxhuiñ, ymüid je'je y'alma jugy'ajtin huidibi ca'ycixipy ytigoyipy, e ca' Dios Teedy chaachytuna'ñyii müid ypocy ycixpi. Hue' janchtiy co y'ögipy, chi janchtiy jadügtecy yjugypigipy. ²⁵ Janch janch ñich müich ajcxy jadu'n nimaaygixy co yi' xii tiempo paatnipy, e cham jédu'n ti paady, co yi' jäy ajcxy tübi y'o'ccixy ymidohuipy yi' n'ayucich, co anajty ngapxyich, com Dios yi' nDeedy'ajtpyich. Pin jäy anajty midoob n'ayucich jugypigip jadüg'oc ajcxy. ²⁶ Com yi' Dios Teedy mic'ajt müid jébi yajjugypicy jäy tübi y'o'ccixy. Nañ Dios ti xymöyich ymic'ajt jébi huaad nyajjugypicyich jäy tübi y'o'ccixy, com Dios ñich nDeedy'ajtypich. ²⁷ Ti Dios xymöyich ymic'ajt jébi ndiyduñich je jäy ajcxy müid ypocy ycixpi, com ñich je' je jäy huidibi tzoön tzajpjoty. ²⁸ Ca' ooy jada ayuc tiy'ajt mhuinmaaygixy. Com ypaadipy je xii je tiempo co je huidijaty ajcxy yajpatp ma naaxtigiydac, ymidohuipy ajcxy n'ayucich co ñich anajty nmigapxyich ajcxy. ²⁹ Chi ypidzimipy ajcxy ma ñaaxtigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachypi müid ypocy ycixpi.

Dios tiy'ajt yejc co Jesús ymüid anajty mic'ajt

³⁰ Ca' ni ti huaad nduñich müid ngi'mmic'ajtich ngi'm'ayucich. Je ayuc tiy'ajt huidibi nmidooybich ma Dios Teedy, jada ayuc tiy'ajt müid nyajciyöya'ñich nyajtecyöya'ñich jäy ajcxy ypocy. Jadu'n tiydudägy nduna'ñich, com ca' ñich nduñich ngi'mdzójcinich. Yi' ñich ndumyb nej Dios Teedy tzocy, yi' huidibi xyquejxich ya naaxhuiñ. ³¹ Co ixypy ñich ci'm nayñigodiy'ajt'adyiijich, ca' ixypy müich ajcxy mmijpidägy n'ayuc ndiy'ajtich. ³² Com huingbi yi' huidi xyñigodiy'ajt'ajtpich co ñich Dios ymic'ajt nmüididyich, e nejhuiybich co janch yi' huidibi

xyñigodiy'ajt'ajtpich. ³³ Miich ajcxy ti mguexy je migügtijc ajcxy tiy'ajtpijcpi ma Juan. E je' yejc tiydudägy ayuc tiy'ajt janchypi pin ñich. ³⁴ Co jadu'n nmına'ñich co Juan xyajnidiy'ajt'atyich co ñich je' je Cristo, ca' jadu'n nmına'ñich co ooy ycopicyty co tüg jäy xyñidiy'ajt'adipyich. Com Dios ci'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nidzoocin paadipy ma Dios. ³⁵ Je Juan mictägy ooy Dios y'ayuc najtzcaxiyyi, jadu'n je' anajty nej tüg jün huidibi tücxp jajp, e miich ajcxy tüg jaxigyi ti mxondaaccixy müd yi' y'ayuc ytiy'ajt. ³⁶ Nigi ñich Dios y'ayuc ytiy'ajt nmüdidyich ca'ydí Juan. Yi mijhuinma'ñ huidibi ndumybich müd Dios Teedy ymic'ajt. yi' xyajnigüexigibich co ñich ya naaxhuiñ Dios Teedy xyquejxich. ³⁷ Yi Dios Teedy tübi xyquexyich, yi' ci'm yejc tiy'ajt co ñich je' je Cristo. E ni caminaabi miich ajcxy yi' mgamidoohui ycapxin, nañ ni caminaabi miich ajcxy Dios Teedy yhuñyijp maga'ijxi. ³⁸ Ni ca' miich ajcxy mmüditý yi' y'ayuc ma mjot mhuinma'ñ, müd co miich ajcxy ca' xymijpidägyich co ñich je' je jäy huidibi Dios ti quexy ya naaxhuiñ. ³⁹ Ijxtaaygixy jada tiy'ajt ma Dios ylibro, com jüby mdijy miich ajcxy mbaadipy tiy'ajt nej jëbi ajcxy mjogy'adipy co anajty ti m'o'ccixy, e yi Dios ylibro nañ ñich yi' xyñigapxp. ⁴⁰ E ca' miich ajcxy mgöbigaangixy ñich n'ayuc ñich ndiy'ajt, jigix ajcxy jugy'ajti mbaadipy huidibi ca' ycixy ytigooy.

⁴¹ Dios xycömayipyich, ca' ngöbigipyich co naaxhuiñjäy ajcxy xycömayipyich. ⁴² Nnejhuñyibich, nej miich ajcxy mjot mhuinma'ñ mmüditý, co ca' ajcxy Dios ytiy'ajt mguyduuni. Ca' ajcxy migüg mdzojccixy mjihuñyigixy jadu'n nej Dios tzocy jihuñy jäy ajcxy. ⁴³ ñich ti nmüñich müd nDeedyich ymic'ajt. Miich ajcxy ni ca' xycöbicyich. Pen ji huingbi jäy ymüñ müd yci'mmic'ajt, ca' müditý Dios ymic'ajt, je' janchtiy miich ajcxy ooy mijpidägaangixy. ⁴⁴ Ca' mjájtciixy nej ñich miich ajcxy xymijpidägibich, müd co ajcxy ci'm mdzachnaygömayáanigixy ac miich ajcxy jëyi. E co ixypy miich ajcxy xycöbiga'ñich, huin'it ajcxy Dios xycömayipy. ⁴⁵ Ca ajcxy mmına'nipy co ñich miich ajcxy nxihuaamy ma Dios Teedy yhuinduu. Je Moisés miich ajcxy yxihuaam ma Dios, je huidibi miich ajcxy mdzachmijpidaacip ytiy'ajt. ⁴⁶ Pen mmijpidaacyp ixypy ajcxy je Moisés y'ayuc ytiy'ajt, nañ jadu'n ixypy ñich miich ajcxy xymijpidägyich. Com Moisés ñich yi' xychachñimiydaacich ma yi' ñecy. ⁴⁷ Pen ca' mmijpidaaccixy Moisés ñecy, ca' mjájtciixy nej ajcxy mijpidäaccixy ñich n'ayuc.

6

Jesús ymoy jäy jicxy picy migoox mil

¹ Co jadu'n ytuni yjajti, chi Jesús ñicxy jim Galilea mejy ninaxy, huidibi nañ jadu'n xijip Tiberias mejy. ² Janch mayjäy anajty Jesús ypanicxyii axam co anajty ajcxy ixy je mijhuinma'ñ tijaty anajty Jesús ytumyb ma mayba'mjäy. ³ Chi Jesús ypejty ma tüg cögor, chi jim y'ixtacy müd je' ydiscípulos ajcxy. ⁴ Tim huingonip anajty je pascuaxii huidibi anajty judiojäy ajcxy ytumyb. ⁵ Chi Jesús ijxy co janch mayjäy ti ypamiinyii, chi nimay Felipe:

—¿Ma jada' caayin uucin n'ocjuyim, ti nyajcaayim jada mayjäy huidibi ti xypamiinim?

⁶ Hue' anajty y'oc'ijxmadzamy nej Felipe y'oc'adzooy. Jesús anajty ñejhuuyb yajxon ti anajty ytunamy. ⁷ Chi Felipe y'adzooy:

—Ni yachuaadihuip mejtz mil peso meeñ, co ixypy ajt n'ocjuyaanim caayin uucin, e nmöhuaanim cijp tüg'aa cijp mejtz'aa jëyi.

⁸ Tüg Jesús ydiscípulo, hue' anajty yxi Andrés, Simón Pedro y'uch, je' jadu'n nimay Jesús:

⁹ —Cha tüg pi'c'anäg huidibi miid migoox cebada tzajcaagy, e mejtz acx ung. E ni ycatijty yi' yi migooxpi tzajcaagy, etz mejtz acx ung miid jada mayjäy.

¹⁰ Chi Jesús nimay je' ydiscípulos ajcxy:

—Yaj'ixtacta' yi mayjäy.

Miijjot anajty ooy ma je it.

Chi ajcxy y'ixtactay. Hue' jada' anajty ajcxy ñaybadyii migoox mil ac yëydijctijc, abicy yi töxyjäydijc etz y'ung y'anäg ajcxy. ¹¹ Chi Jesús je tzajcaagy conigy, chi yajnajxy Dioscojuyip, chi yajniigidagiiyday je jäy ajcxy huidijaty anajty jim iñaayb, mooy jadu'n nej pin tim tzocy je tzajcaagy etz je acx. ¹² Co je mayjäy cayday, chi Jesús nimay je' ydiscípulos ajcxy:

—Yajmujcta' ajcxy yi cayduc, ca'ydi huaad ni ti y'iyoy.

¹³ Chi ajcxy yajmujctay je cayduc, e yaj'ujch ajcxy majmetz mijjaty cach miid je tiibi anajty yconaxy je migooxpi tzajcaagy. Je' anajty jadu'n ti yjacconaxy. ¹⁴ Co ajcxy y'ijxy je mijhuinma'ñ huidibi anajty Jesús ti tuñ, chi je jäy ajcxy ymiñañ:

—Janch jëdim jada je yëydijc huidibi Dios y'oy'ajt ymic'ajt miid, je huidibi anajty miinam ya naaxhuiñ.

¹⁵ Co Jesús nejhuuy co ajcxy anajty yajrey'ada'ñyii, chi jada' jadüg'oc huinhuäctuttay je mayjäy. Chi ñicxy naydüg ma tüg yuugjot.

Jesús yöy ñihuingíxy

¹⁶ Co oy chu'iiyñi, chi Jesús ydiscípulos ajcxy y'idaacni ma mejypa'. ¹⁷ Chi ajcxy ybarcotigiiy, ñicxy ajcxy jim Capernaum jadügpi mejypa'. E ti anajty ycodziyñi, e ca'ni anajty Jesús ajcxy ñihuibidyini. ¹⁸ Chi tüg mijpoj ymiñ, chi je meji ytigiiy oy yücxi. ¹⁹ Ti anajty ajcxy ytüyöy oy migoox tudujc kilómetro co ajcxy ijxy Jesús yhuingoñ ma je barco, hue' anajty ytüyöy mejyhuingíxy. Chi ajcxy ooy ñay'adzigiiy. ²⁰ Chi Jesús ymiñañ:

—Hich yi', ca' mdzigiiygixy.

²¹ Chi ajcxy jotcuje Jesús yajbarcotigiiy. Chi tim mic'amy ajcxy ymejch jim ma mejypa' ma anajty ajcxy ñicxcixy.

Mayjäy ixtaay Jesús

²² Je mayjäy huidibi anajty ajcxy ti yhui'miy jim'amy y'ahuin, y'ijx ajcxy co ac jëyi Jesús ydiscípulos ajcxy ytigiiy ma tüg barco, e Jesús ca' anajty ti ytigiiy barcojoty miid je' ajcxy. Ac jëyi anajty ajcxy ti choongixy barcojoty. ²³ Je com jabom nijejity barco huidibi anajty jim tzomb Tiberias, ti anajty yjädy mihuingon ma je it, ma anajty Jesús ti yajcaaygixy je mayjäy miid je Huindzin Dios ymic'ajt, huin'it co Dios mibijctzoy. ²⁴ Chi je mayjäy ajcxy ijxy co ca' anajty jim Jesús, ni ca' anajty jim je' ydiscípulos ajcxy. Chi ajcxy ybarcotigiiyday, chi ajcxy oy ixtaaygixy Jesús jim Capernaum.

Jesús ymöhuaamy jäy ajcxy jugy'ajtin huidibi ca' ycixipy ytigoyipy

²⁵ Co ajcxy minaybaati Jesús meju ñinaxy, chi ajcxy nimay:

—Huindzin, ¿mina miich ya ti mmiñ?

²⁶ Chi Jesús y'adzooy nimay je mayjäy ajcxy:

—Janch janch co ñich miich ajcxy yam jadu'n nimaaygixy co miich ajcxy xy'ixtaaybich, canan yi' ycixpi co ajcxy ti m'oc'ixy yi mijhuinmañ hidibi ti nduñich, paady ycixpi miich ajcxy xy'ixtäyich co ajcxy nyajcay cüxyi müd tzajcaagy.

²⁷ Chi Jesús yjacminañ:

—Ca' myajjotmaygojcixy yi jüxcy picy hidibi cijxp tigooyb. Yi' janchtiy mijjotigooygixy yi jüxcy picy hidibi xymöhuiipy yi jugy'ajtin hidibi ca' ycixipy ytigoyipy tücci'yi. ñich miich ajcxy je jugy'ajtin nmöhuiibich hidibi ca' ycixipy ytigoyipy tücci'yi, com ñich je' je jäy hidibi tsoon tzajpjoty, e Dios Teedy xymic'ajtmooyich, jëbi ñich miich ajcxy nmöy jugy'ajtin hidibi ca' ycixipy ytigoyipy tücci'yi.

²⁸ Chi ajcxy nimay Jesús:

—¿Ti ñich ajcxy jëbi huaad nduñ, nej jëbi ñich ajcxy Dios xymijotcujc'aty?

²⁹ Chi Jesús y'adzooy:

—Dios chojcpy co miich ajcxy xymibicyich, com Dios xyquejxich ya naaxhuiñ.

³⁰ Chi ajcxy nimay Jesús:

—¿Ti ijxpejt mdunamy müd ñich ajcxy, jëbi ñich ajcxy n'ixipy Dios ymic'ajt etz ñich ajcxy nmibigipy co miich je' je Cristo? ¿Ti mijhuinmañ mdunamy? ³¹ ñich ajt nmij'ap nmijteedy ajcxy jecy'ajty yjüxcy pijc ajcxy je maná jim ma titznaax'it. Jadu'n ymiñ jaybety ma jadu'n yminañ: “Dios yejcpy jüxcy picy hidibi tsoon tzajpjoty.”

³² Chi Jesús y'adzooy:

—Janch janch ñich miich ajcxy yam jadu'n nimaaygixy co canan je' je' je Moisés hidibi miich ajcxy xymooyb je jüxcy picy janchypí hidibi tzomb tzajpjoty. ³³ Je jüxcy picy hidibi Dios yejcyp hidibi tzomb tzajpjoty, je' je' hidibi jugy'ajtin moy je naaxhuiñy-jäy hidibi ca' ycixipy ytigoyipy tücci'yi.

³⁴ Chi ajcxy nimay Jesús:

—Huindzin, ñich ajcxy mooyg je jüxcy picy janchypí jabom jabom huinixi.

³⁵ Chi Jesús yminañ:

—Ñich jëdu'n je jüxcy picy hidibi miich ajcxy xymöhuiip jugy'ajtin hidibi ca' ycixipy ytigoyipy tücci'yi. Co jäy ajcxy xyñimiinich, e xymijpidägyich, huin'it ca' yi' ajcxy yuböccodañyii niminaxi, e co jäy ajcxy xymibicyich, ca' yi' ajcxy ytidzihuañyii niminaxi. ³⁶ Com ti ñich miich ajcxy nimäy, oy ñich miich ajcxy ti xyja'ijxcixy, per ca' mibijccixy.

³⁷ Tüg'óciy pinjaty ñich nDeedy yquexyp ma ñich, xyñimimbich yi' ajcxy. E pinjaty xyñimimbich etz xymijpidaacpich, ca' ñich yi' ajcxy n'ixtijy.

³⁸ Canan paady ycixpi ñich ti ndzoñ tzajpjoty ngidägich ya naaxhuiñ co ndunañich ngi'mhuinmañ. Hue' janchtiy yi' ndunaamyich nDeedyich y'ayuc ytiy'ajt, com yi' xyquejxich ya naaxhuiñ. ³⁹ Yi' jadu'n tzojcp ñich nDeedy hidibi xyquejxich ya, co ñich ca' ni pin nyajtigoyipyich, yi hidijaty xymooybich. Hue' janchtiy yi' ajcxy nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁰ Dios Teedy ti xyquexyich ya naaxhuiñ e yi' jadu'n tzojcp co pin jäy ñich anajty xy'ijxpich, e xymijpidaacpich, ymüd'adipy je' ajcxy jugy'ajtin hidibi ca'

tücc'i'y ycixipy ytigoyipy. Hue' janchtiy nyajjugypigipyich ajcxy jadüg'oc co anajty je naaxhuiñbyi ti yhuaad'ajtni mina anajty ytigadza'ñ.

⁴¹ Chi je judío'yä ajcxy ooy yajtzibiiy yajcapxiiy co anajty Jesús jadu'n ti ymina'ñ: "ñich je' je jüicxy picy huidibi tzoon tzajpjoty." ⁴² Jadu'n anajty ajcxy chachmina'ñ:

—¿Nej ca' je' yjadaajty je Jesús, je José y'ung, je huidibi ajt ytaj yteedy n'ixy'ajtm? ¿Nej co jadu'n ymina'ñ: "ñich ti ndzooñich tzajpjoty"?

⁴³ Chi Jesús y'adzooy:

—Ca' myajtzibiiygixy myajcapxiiygixy ac miichiy ajcxy. ⁴⁴ Ni pin jäy xycaniminipyich, pen ca' jayijp Dios Teedy huinma'ñ ymöyii co xymijpidägibich. E co xymijpidägibich, chi nyajjugypigipyich jadüg'oc co anajty naaxhuiñbyi ti yhuaad'ajtni mina ytigadzipy. ⁴⁵ Com jadu'n ymiin jaybety ma Dios ñecy huidibi je jäy ajcxy anajty Dios ytiy'ajt miid huidibi jecy'ajty yjaay co Dios yaj'ixpigamy je jäy ajcxy tüg'óciy. Paady ycixpi tüg'óciy jäy huidibi midoob Dios y'ayuc etz y'ixpijcy Dios ytiy'ajt xymijpidägibich ajcxy.

⁴⁶ Ca' ni tüg jäy ti ixxy yí Dios Teedy. Jëyi je jäy tügpajc huidibi ti choñ ma Dios, yí' je' ti ixxy yí Dios. ⁴⁷ Janch janch ñich miich ajcxy yam jadu'n nimaaygixy co pinjaty xymibijcpich xymijpidaacpich, ymiid yí' ajcxy yjugy'ajtni huidibi ca' ycixipy ytigoyipy tücc'i'yi. ⁴⁸ ñich jëdu'n je jüicxy picy huidibi jugy'ajt mooyb je jäy huidibi ca' ycixipy ytigoyipy tücc'i'yi. ⁴⁹ Miich ajcxy mmij'ap mmijteedy yjüicxy'ajti ycaagy'ajti ajcxy je maná jim títznaaxtuum'it jecy'ajty. E chi ajcxy y'o'ctay. E ni ca' ajcxy jugy'ajtni paty huinixibi. ⁵⁰ Je jüicxy picy huidibi nnigapxypich huidibi tzoon tzajpjoty, co jäy ajcxy jüicxipy, ymiid'adipy ajcxy je jugy'ajtni huidibi ca' ycixipy ytigoyipy tücc'i'yi. ⁵¹ ñich jëdu'n je jüicxy picy huidibi ti chooñ tzajpjoty, etz ti ycidägy ya naaxhuiñ huidibi jugy'ajtni yejcp. Co jäy ajcxy jüicxyp je jüicxy picy, ymiid'adipy ajcxy je jugy'ajtni huidibi ca' ycixipy ytigoyipy tücc'i'yi. Je jüicxy picy huidibi nyegaamyich miid naaxhuiñjäy ajcxy ycixpi, je' je' je' nninixich.

⁵² Chi je judío y'ixpiyitjc ajcxy ooy yaj'ayucyooñ yajcapxyooñ, ac je'yí ajcxy ñayñimáayigixy:

—¿Nej jada yéydijc tijy yí' ñinix njüicxy'ajtm?

⁵³ Chi Jesús ymina'ñ:

—Janch janch co ñich miich ajcxy yam jadu'n nimaaygixy, pen ca' miich ajcxy mdzüdzcixy ñich nninix, e pen ca' m'uuccixy ñich nni'py, ñich je jäy tügpajc huidibi tzoon tzajpjoty, ca' miich ajcxy miid'adipy yí Dios yjugy'ajtni. ⁵⁴ Com pinjaty ñich nninix xychu'tzíp etz ñich nni'py xy'uucibich, ca' je ajcxy yjugy'ajtni ycixipy ytigoyipy tücc'i'yi, oy ajcxy yja'o'ccixy. Nyajjugypigipyich je' ajcxy jadüg'oc co anajty naaxhuiñbyi ti yhuaad'ajtni mina ytigadzipy. ⁵⁵ ñich nninix janchypi jüicxy picy yí', etz ñich nni'py janchypi ügy yí'. ⁵⁶ Co yí jäy ajcxy xymibicyich xymijpidägých jadu'n ni paady nej jihuiy ñich nninix xychüdzí, etz ñich nni'py xy'uuci. Chi y'idipy ajcxy huinixi ma ñich, etz ñich n'idipyich huinixi ma je' ajcxy. ⁵⁷ Dios Teedy huidibi xyquejxich ya naaxhuiñ ymiid jugy'ajtni huidibi ca' ycixy ytiigooy. ñich ti nbaadyich ma Dios Teedy je jugy'ajt huidibi ca' ycixy ytiigooy ma ñich. Co miich ajcxy xymijpidägýchich, jadu'n anajty nipaady nej jihuiy mjüicxy'ajtigixy ñich nninix. ⁵⁸ Je jüicxy huidibi tzoon tzajpjoty, e ycidacy ya naaxhuiñ co jäy ajcxy jüicxy'adyi, yajtzinähuiib je ajcxy, ca'

ajcxy yjugy'ajtín ycixipy ytigoyipy tüccí'yi. Yi mmij'ap mmijteedy huídibí jicx'ájtigixy je maná jecy'ajty, o'ctay ajcxy, ca' ajcxy paty je jugy'ajtín huínixíibi.

⁵⁹ Jadu'n Jesús ymiydacy jim ma je judíojäy ajcxy ñaymujctac jim Capernaum co anajty jim yaj'ixpicy.

Mayjäy ca' mijotcujc'ajty Jesús y'ayuc

⁶⁰ Co ajcxy Jesús y'ayuc midodaayi, nigujc-huäcxy je huídibí anajty ixpijcp ma Jesús. Chi ajcxy capxidzimy, e jadu'n ajcxy ymínañ:

—Ooy chachchipyte je Jesús y'ayuc. Ca' huaad ji pin huínjihuiyday.

⁶¹ Com Jesús ñejhuíyb nej ajcxy anajty yajtzibíy yajcapxíy, chi ymínañ:

—¿Nej ca' miich ajcxy mijotcujc'aty je tzip ayuc jadu'n nej cham ajcxy tí nyajnimäy? ⁶² ¿Nej xymijpidägibich ajcxy, pen m'ixpxy ixipy ajcxy co anajty nba'ttigíyich jadüg'oc jibíy tzajpjoty ma ndzooñich? Com ích je' je jäy huídibí tzoon tzajpjoty. ⁶³ Je jäy ajcxy yjihuí'ñ, yí' je' ñinícx yajjugy'ajtip, e je jäy ajcxy ninícx ca' yí' ni ma chobaady, pen ca' müdíty yjihuí'ñ. Co miich ajcxy mgöbigípy yí ayuc tíibi ngapxyich, huín'it ajcxy mbaadípy Dios yjihuí'ñ (je Espiritu Santo), etz mbaadípy ajcxy jugy'ajtín huídibí ca' tüccí'yi ycixy ytigoooy, oy mja'o'ccixy. ⁶⁴ Per nigujc-huäcxy ma miich ajcxy pinjaty ca' mibicy ích n'ayuc.

Com Jesús ñejhuíyb anajty jayijpni pinjaty ca' ymíbígyii y'ayuc, etz pinjaty anajty cýegaanip ma ymidzip. ⁶⁵ Chi Jesús yjacmínañ:

—Paady ycixpi jayijp tí nmína'ñich, co ca' ni pin jébi ích xymijpidägy, pen ca' Dios Teedy jayijp yhuinma'ñ ymöyí co cöbígá'ñ ymöyí co cöbígá'ñ ích n'ayuc.

⁶⁶ Huín'it mayjäy ajcxy, je huídibí anajty ixpijcp ma Jesús, chi ajcxy huínhuäctut íxmajtzni ajcxy Jesús. Ca' ajcxy y'ocjacpanicxni. ⁶⁷ Chi jada' Jesús nimay je nimajmetz discípulos ajcxy:

—¿Nej nañ xy'ixmadzaambich miich ajcxyí?

⁶⁸ Chi y'adzooy Simón Pedro:

—Huindzin, ca' jac ni pin ích ajcxy jébi huaad nmijpidägyich, com miich tügpajc müd je ayuc huídibí xyajni'ixíyich ajcxy nej jébi huaad ích ajcxy nbaadípy jugy'ajtín huídibí ca' ycixipy ytigoyipy tüccí'yi. ⁶⁹ Ích ajcxy nmíbicypich e nnejhuíybich co miich je' je jäy huídibí tzoon ma Dios huídibí huädz yhuinma'ñ ymíid.

⁷⁰ Chi Jesús ymínañ:

—Miich ajcxy je' tí nhuín'ixyich nimajmetzpi, e nidügtí miich ajcxy mujcu' huínma'ñ mmíidity.

⁷¹ Je Judas Iscariote, Simón ymang, anajty ytiippy. Com je' je' anajty cýegam Jesús ma ymidzip, oy je' anajty yjajéjity nidüg ma je nima-jmetzpi.

7

Jesús y'uch ajcxy nañ ca' anajty jaty mijpidaaci Jesús y'ayuc

¹ Co jadu'n ytundaayi yjajtaayi, jim anajty Jesús yhuídity Galilea naaxjot, ca' anajty ñicxa'ñ jim Judea naaxjot, co anajty yí judíojäy ajcxy huídibí midzip'ajtip yaj'öga'ñiyii. ² Tim huingon anajty je judíojäy yxíí, hue' anajty ajcxy yxígoyäxy Tabernáculo xíí. ³ Chi Jesús ñímaayi y'amígüg y'uch yéydijcpi:

—Tzon miich ya, nicx jim Judea naaxjot nayguëxigii mayjäyjoty. ⁴ Com huenpinity huidibi nayguëxigaañip mayjäyjoty, ca' ajcxy naygoyüchyii. Mduñipy miich mijhuinma'ñ xiijoty, jigix je mayjäy xycōmayipy.

⁵ Ni Jesús y'amigüg ajcxy ca' anajty yjaty ymijpidağyii y'ayuc. ⁶ Paady Jesús y'adzooy:

—Ich nxii ndiempo ca'ni paty mina ndigihua'ñich jim Jerusalén jadu'n nej je Mesías. Janch miich ajcxy oytimyminaajity jëbi mneyguëxigixy ma je mayjäy ajcxy. ⁷ Ca' huaad jëbi miich ajcxy, naaxhuiñyäjy ajcxy, xymidziptzoñ. Janch ich xymidzip'ajtpich ajcxy yi', je' co ngapxpizimiyich yi' yjibic-huinma'ñ huidibi ajcxy ytumyb. ⁸ Nicx miich ajcxy jim ma xii yjadyii. Ich ca' nnicxa'ñich cham, com ca'ni ich ndiempo yhuaad'aty mina ndigihuiybyich jim Jerusalén jadu'n nej je Mesías.

⁹ Jadu'ñydi jëda'ajty ymīnañ, chi yhui'miiy jim Galilea.

Jesús ñicxy jim Jerusalén xiijoty

¹⁰ Co Jesús y'amigügtijc ajcxy jayijp ñicxtay xii'ajtpi jim Jerusalén, chi Jesús nicxy nañ jadu'n ayüch ameech ma anajty xii' yjadyii. ¹¹ Xiijoty je judíojäy ooy ajcxy ja'ixtay Jesús, e chi ajcxy ymīnañ:

—¿Ma jada' je Jesús?

¹² Ma je mayjäy ajcxy may anajty ajcxy tzachnigapxcixy tzachnimiydaaccixy Jesús. Nijëjity anajty ymīnaangixy: “Tüg yëydijc oyjäybi yi'”; e nañ nijëjity ymīnaangixy: “Ca'p yi' y'oyjäyity, nigo jäy tzachhuin'ñii.”

¹³ E ni pin anajty ca' capxpizimiy mayjäyjoty co y'oyjäyity anajty Jesús, mñid co anajty ajcxy je judío ixpicytijc ajcxy tzachtzigiygixy.

¹⁴ E mijxiijoty Jesús ñicxy jim ma Dios ytijc, chi jim ytigiiy yaj'ixpijipi. ¹⁵ Je judío y'ixpicytijc tzachmaañhuindicxcixy anajty je Jesús, chachmīnaangixy anajty:

—¿Nej jada' tijy jada chach'ixpicity? e ca' ni ma ti y'escuel'aty.

¹⁶ Chi Jesús y'adzooy:

—Jada ixpijcin ca' ich jada një'adyii. Yi' jada yje' je huidibi xyquejxich ya naaxhuiñ. ¹⁷ E pen ji pinjaty cuydunaanii yi' ytiy'ajt je huidibi xyquejxich, huinjihuñipy yi' jada ixpijcin, pen janch Dios yi' ytiy'ajt, o pen ich yi' ngi'm ayuc huidibi ngapxypich. ¹⁸ Je jäy huidibi yci'm'ayuc yci'mdiy'ajt mñid yaj'ixpicy, ci'm je' ñaygōmaya'ñyii. Janch pinjaty tzojcp co ycōmayiiyb je' yhuindzin huidibi ti yquexyii, tiydudägy je', ca' je' y'aniijity.

¹⁹ Janch co Moisés miich ajcxy xymoy Dios ytiy'ajt. E ni tüg miich ajcxy mgacuydungixy je tiy'ajt. ¿Ti ycixpī co miich ajcxy xyaj'ōga'ñich?

²⁰ Chi je jäy ajcxy y'adzooy:

—Mujcu' miich mñid ma mjot mhuinma'ñ. ¿Pin miich yam xyaj'ōgam?

²¹ Chi je' ajcxy nimay:

—Mñid tügpaic mijhuinma'ñ tibi nduñich sábado xii, yi' miich ajcxy mij mdzachjihuñyb mdzachhuinmaayb. ²² Moisés miich ajcxy xyajna-jtz'ane'miiy je cōtujcin co ajcxy m'ung mdiy'ajttiiygixy (oy je' ca' yajtzondac, miich janchtiy ajcxy mmij'ap mmijteedy Abraham yajtzondac), e paady ycixpī miich ajcxy m'ung mdiy'ajttiiygixy oy yjapocxxiidumity. ²³ E chi jada' ca'ydi miich ajcxy Moisés ytiy'ajt mñixiici myajxiici, paady ajcxy m'ung mdiy'ajttiiygixy oy sábado xiijoty. ¿Ti miich ajcxy co xymijotma'tcixich co tüg jäy ti nyajtzögyich sábado xiijoty? ²⁴ Ca'

m'ix'ijxcixy mba'ijxcixy mmigüg mïid anii. Yajçiyöyi yajtecyöyi miich ajcxy jäy ypocy mïid tiy'ajt.

Ooy ajcxy tzachhuinmay je jäy, peni Jesús je' je' anajty je Cristo

²⁵ Chi ajcxy nijëjity Jerusalénjäy ymïnañ:

—¿Nej ca' jada jada' yjëjity je huïdibi ajcxy yjayaj'ögamyi? ²⁶ Oc'ix ajcxy, ta ycapxy ymiydägy ijxna' que'xna', e ca' ajcxy huam nimäy. ¿Nej ti jada ajcxy ijxcajpcixy yajxon tungmïdpi ajcxy co jada yjëjity je Mesías? ²⁷ Hich ajt nnejhuïyim ma jada yëydijc chooñ. Per je Cristo co anajty je' ymiñ, ni pin je' canejhuïhuïpy ma je' anajty choñ ma ycocajpity.

²⁸ Co Jesús jadu'n mïdooy, co anajty yaj'ixpicy ma Dios ytiç, huin'it Jesús mic ymïnañ:

—Mnejhuïyb miich ajcxy pin ïch, e ma ndzooñich. Per ca'p ïch ti nmiñich ya naaxhuïñ mïd ïch ngi'mdzojcin. Yi huïdibi ïch ti xyquexyich, tiydudägy yi' ytuñ, e ca' miich ajcxy yi' m'ixy'ájtigixy. ²⁹ Hich janchtiy n'ixy'ajtypich je'. Je' co jim ndzooñich ma je', e je' ïch xyquejxich.

³⁰ Huin'it ajcxy jamadzaañ, per ca' ni pin çin'axajiy, com ca'ni anajty paady je xii je tiempo mina ñaygyegïyb ma ymidzip ajcxy. ³¹ Per mayjäy ooy mibijcy je Jesús y'ayuc, e ymïnañ ajcxy:

—Co anajty je Cristo ymiñ, ca' jada' nïgi mijhuinmañ tunañ ca'ydi jada yaabi yëydijc.

Je teedy mijtungmïdpi yquejx ajcxy soldadotijc huen majtcixy Jesús

³² Co je fariseojäy ajcxy ayuc mïdooy co jäy chachmïnaangixy jadu'n co je Jesús je' je' je Cristo, chi ajcxy quejxy tungmïdpi huen Jesús yajmach.

³³ Paady Jesús ymïnañ:

—Hich jac-huäcxijpich hueeni ma miich ajcxy, chi nnicxa'ñich jadüg'oc jii by tzajpjoty ma huïdibi xyquejxich. ³⁴ Xy'ixtãhuïbich miich ajcxy, e ca' ïch miich ajcxy xypaadipy. Ma anajty ïch nnicxyich, miich ajcxy ca' jaydëbi jii by mnicxcixy.

³⁵ Huin'it je judíojäy ixpicytjic acjëyi ajcxy ñay'amïdoohui:

—¿Ma jada jada' y'ocnicxa'ñ, e nicxy ïch ajt ngapaatim? ¿Nej nicxïb jada' ma je judíojäy ajcxy huïdibi yajpaatcixy yxii yaa ma yi griegojäy ajcxy, e yaj'ixpigaangixy yi griegos ajcxyi? ³⁶ ¿Nej jada' yajhuimbizimiy? co ymïnañ: “Xy'ixtãhuïbich miich ajcxy, e ca' xypaadibich, e ma anajty ïch nyajpaady, ca' miich ajcxy jaydëbi jii by mnicxcixy.”

Je nï huïdibi jugy'ajt yejcp huïdibi ca' ycixy ytigoy

³⁷ Co je mijxii ycodïicxni, chi Jesús ytinay'ahuïy, chi mic ymïnañ:

—Pen ji pinjaty tiy'ajt nejhuïhuañ jadu'n nej ixypy jäy ytidziyii tzocy yi nï, huen xyñimiñich, etz nmöhuïbich tiy'ajt. ³⁸ Je jäy ajcxy pinjaty xymibijcpich xymijpidaacpich, ytunipy ajcxy jadu'n nej Dios ñecy ymïnañ ma jadu'n yjaybetyity: “Ycapxypidzimipy je' ajcxy Dios ytiy'ajt, etz mayjäy jotcuç'ajtïn etz jugy'ajtïn padañ huinixii, ytimyñipaaty jadu'n nej nï ypidzimy janch com ma tüg nïgop.”

³⁹ Je' anajty jadu'n Jesús ytiyyp pinjaty je' anajty mibijcip, je' anajty ajcxy adigihuaanip jottigihuaanip je Espíritu Santo. Ca' ni anajty je Espíritu ymini ma je discípulos ajcxy com ca'ni anajty Jesús yhuimbityñi tzajpjoty.

Jäy ajcxy ca' ñay'ayuc-huinjihuïyi mïd Jesús ycixpi

⁴⁰ Je mayjäy ajcxy huidibi anajty ti midooy nej Jesús anajty ti ymína'ñ, nidüg nimetz ymínañ:

—Jadaabi je' je tydudägypi jäy huidibi Dios y'ayuc najtzcapxiyip.

⁴¹ Jacjadyii ymínañ ajcxy:

—Je' yi' je Mesías.

Per nijëjity ajcxy huidibi ca' ymibijccixy chachminaangixy:

—Ca' jim Galilea naaxjot chona'ñ je Mesías. ⁴² Com jadu'n yjaybetyity ma Dios ñecy co je Mesías jim chona'ñ ma David y'ap y'oc, jim ma je cajp huidi xiijip Belén ma David ycogajpity.

⁴³ Je mayjäy ca' anajty ajcxy ñay'ayuc-huinjihuiyigixy müd Jesús ycixpi.

⁴⁴ Nijëjity anajty ajcxy ytimymadzamy Jesús, per ca' ni pin ymajtzi.

Judío ixpicytjic ca' ajcxy mijpidacy Jesús

⁴⁵ Chi ajcxy policías huidibi tumb ma tzajptjic nihuimbijty ajcxy je teedy mjtungmüdpí etz je fariseojäy ajcxy, chi ajcxy ñimaayí:

—¿Nej ajcxy co ca' ti mmajtzcíxy je Jesús?

⁴⁶ Chi ajcxy je' y'adzooy:

—Nicamínaaxi tüg yëydjic jadu'n ti ymiydägy jadu'n nej yijibi yëydjic.

⁴⁷ Chi je fariseojäy ajcxy ymínañ:

—¿Nej nañ ti müich ajcxy myajhuin'íinigixy? ⁴⁸ Ca' nmínaanim ti ajcxy teedy mjtungmüdpí o fariseojäy ajcxy mibijccixy Jesús. ⁴⁹ Je mayjäy huidibi mijpidaaci Jesús y'ayuc, ca' ajcxy y'ixpicyty ma Dios ycötujcin. Dios yi' ajcxy tzaachytunib.

⁵⁰ Nidügti ajcxy je' anajty je Nicodemo huidibi oga'n'aty ni'oy Jesús coodz, je' ymigügtjic jadu'n nimay:

⁵¹ —Jadu'n ich ajt ngötujcin xy'ane'mim co ca' huaad ndzaachytuunim pinjäy, pen ca'p jayjip n'ixyöyim nbayöyim ti anajty ti tuñ.

⁵² Chi ajcxy ymigügtjic y'adzohuimbijty oyñinej:

—¿Nej müich nañ jadu'n galileojäy? Ixta' yajxon ma Dios ñecy, com jüiby mnejhuihuipy co jim Galilea ca' jim chona'ñ pinjäy huidibi Dios y'ayucnajtzcapxiyip.

⁵³ Chi ajcxy ñixtay nidüg nidüg ma yjin ydjic.

8

¹ Chi Jesús ypa'ttigiy ma je cögop huidibi xiijip Olivos. ² Com jabom jopyñi Jesús yquidacy jadüg'oc ma Dios ytjic. Chi mayjäy ñimiini. Chi y'ixtacy, e chi ytigiy yaj'ixpijcpí. ³ Je jäy ajcxy huidibi Dios ycötujcin yaj'ixpijcp etz je fariseojäy ajcxy müdmüñ tüg töxyjäy ma Jesús huidibi anajty ti ytundigooy müd huingbi yëydjic. Chi ajcxy pidacy cujc'amy ma je mayjäy. ⁴ Chi ajcxy nimay Jesús:

—Huindzin, jadaaabi töxyjäy huingbi yëydjic müd ti ytundigoy.

⁵ Moisés ytiy'ajt ich ajcxy xyñajtz'ane'miy jecy'ajty co yajtzaagögädziy jada jadu'mbi töxyjäy. ¿Nej müich m'ocminambi?

⁶ Jadu'n ajcxy nimay co anajty ajcxy oc-huinma'ñ'ixa'ñ. Hue' anajty ajcxy ixtaayb nej jëbi huaad yajpocycäy Jesús. Chi Jesús yhuindacy, chi jada' ytigiy jaaybi müd ycihuax naaxcíxy. ⁷ Com je' anajty ajcxy chachyaj'amidooyb, chi Jesús ytinayígy. Chi ajcxy nimay:

—Pin jäy ji ma müich ajcxy ca' ti pocy müdity, huen yi' jayjip tzaagäch jada töxyjäy.

⁸ Chi Jesús yhuindacy jadüg'oc. Chi ytigüiy jaaybi jadüg'oc naaxcixy. ⁹ Co ajcxy jadu'n ayuc yajhuinjihuیداای, chi ajcxy ooy chöyduñ, com yjihuiy ajcxy ypocy. Chi ajcxy yjihuaçtay. Chi je mijjäydijc ajcxy ñaybattzundayi. Jesús yhui'miyy nimetz müid je töxyjäy huidibi jim anajty tinaayb huingon.

¹⁰ Chi Jesús yhuäccugiy jadüg'oc nimay je töxyjäy jada':

—¿Ma ajcxy je jäy? ¿Ca' ni pin ti xychaachytuñ müid mbocy ycixpi?

¹¹ Chi je töxyjäy y'adzooy:

—Huindzin, ca' ni pin.

Chi Jesús yminañ:

—Ni ñich müich ngatzaachytunipy müid mbocy ycixpi. Nicx, e ca' m'ocjacpocytuunip.

Jesús jadu'n nipaady nej tüg jin huidibi tücxpi

¹² Chi jadüg'oc Jesús yjactigiy miydacp yminañ:

—Ñich je tüy'ajt nmüid ya ma naaxhuiñyjäy, jadu'n ñich nipaady nej tüg jin huidibi tücxp ma jäy ajcxy. Pinjäy xymijpidaacpich ymüid tüy'ajt nej jëbi huaad tudägy chinähuiy, jadu'n nipaady nej jihuüy ytüyöy ma jin ytiçxin.

¹³ Chi je fariseojäy ajcxy nimay Jesús:

—Müich ci'm nayñidiy'ajtip co müich je' je Cristo, e ca' mdiy'ajt chobaady.

¹⁴ Chi Jesús y'adzooy:

—Janch co ñich ci'm nayñidiy'ajt'adyiijich co ñich je' je Cristo. E ñich ndiy'ajt janch yí'. Com nnejhuüyibich ma ti ndzooñich, e ma nnicxa'ñich. E müich ajcxy ca' mnejhuüyigixy ma ndzooñich, e ma nnicxa'ñich.

¹⁵ Müich ajcxy mmigüg mbocy'ijxyp müid mgi'mhuinmañ. Ca' ni pin nbocy'ixyich müid ngi'mhuinmañich. ¹⁶ Pen ñich anajty nyajcüyöybich nyajtecyöybich jäy ypocy, tiydudägy anajty jadu'n nduñich. Com ñich ca' nyajpaadyich naydüg. Je' xymüid'ijtpich je Dios Teedy huidibi ti xyquexyich. ¹⁷ Com cojaay jadu'n y'ity ma müich ajcxy mgötujcin ñecy: “Pen nimetz jäy nigodi'y'ajt'aty huentiijty, tzoobatp ajcxy y'ayuc.” ¹⁸ Ñich ci'm ñayñidiy'ajt'adyiijich co ndzooñich tzajpjoty, etz nDeedyich nañ jadu'n xyñidiy'ajt'ajtpich, co je' ya ti xyquexyich.

¹⁹ Chi ajcxy y'amidooy:

—¿Ma müich mdeedy yajpaady?

Chi Jesús y'adzooy:

—Com co ca' ñich müich ajcxy xy'ijxcapy co ñich je' je Cristo, nañ ca' ajcxy m'ixy'adyii ñich nDeedy. Co ixypy ajcxy xy'ijxcapyich, nañ jaydëbi ixypy ajcxy nejhuüy pin ñich nDeedy'ajtyp.

²⁰ Jim jadu'n Jesús ycapxy ymiydacy ma je meen'ijttac, co anajty yjäy yaj'ixpicy ma Dios ytijc. E ca' ni pin ymajtzi. Com ca'ni anajty yxi yhora anajty paadyñi mina ñayg'yegüiyb ma ymidzip.

Jesús ñimay ymügügtijc co ca' huaad ñicxy ma je' anajty ñicxy

²¹ Chi Jesús yjacnimaayi ajcxy:

—Ñich nnicxaanip ñich, müich ajcxy xy'ixtähuibich. Müid ajcxy mbocy ycixpi m'ögaangixy, com ma nnicxa'ñich ca' huaad müich ajcxy jëbi mnicxcixy müid mbocy ycixpi.

²² Huin'it je judfojäy ajcxy ac jëyi ñayñimaayi:

—¿Nej nicxy jada' ci'm ñayyaj'öga'ñiyiji? Com jadu'n yminañ co ma yí' ñicxy, ca' huaad ñich ajt jëbi nnicxim.

²³ E Jesús ñigi ñimay'idich anajty:

—Miich ajcxy ya naaxhuiñ mmidity mdiy'ajtcop. Hich tzajpjoty nmididyich ndiy'ajtcopich. Miich ajcxy naaxhuiñyäjy ajcxy ytiy'ajt mmijpidaacyy. Hich ca' nmijpidägyich naaxhuiñyäjy ytiy'ajt. ²⁴ Hich miich ajcxy jadu'n nimaayb co m'ogam miich ajcxy, e ca' ajcxy Dios mbocy xyhuinmeecxp. Copicy ajcxy m'ögipy, e ca' Dios mbocy ajcxy xyhuinmeecxp, pen ca' xymibigängixyich co ich je' je huidibi jëbi mbocy ajcxy xyhuinmeecxp.

²⁵ Chi ajcxy ñimay Jesús:

—¿E miich, pin miich?

Chi Jesús y'adzooy:

—Ti ajcxy nyajnimaaagyxy pin ich, co oga'n ndigüyich jäy yaj'ixpijcp. Cham jadüg'oc nyajnimaaagyxy. ²⁶ May ooy tijaty ayuc nyajnimähuaangixy nej ti mdundigooygixy ma Dios ytiy'ajt. Cham ca' ajcxy nyajnimaydähuiy. Je huidibi ti xyquexyich ya naaxhuiñ je' tüg'óciy tiy'ajt muid. E ngapxpizimiyich je ayuc je tiy'ajt jëyi huidibi ti nmidooyich ma je'.

²⁷ Je jäy ca' ajcxy huinjihuuy co Dios Teedy anajty Jesús ñigapxyp. ²⁸ Paady Jesús ñimay ajcxy:

—Co anajty miich ajcxy ti xyajcruudzpetyich, ich je jäy huidibi tzoon tzajpjoty, huin'it miich ajcxy mnejhuñhuip co ich je' je Cristo. E co ich ca' ngi'mhuinmañ nduñich. Yi' ich ya nmiydacypich huidibi Dios Teedy ti xyaj'ane'myich. ²⁹ Je Dios Teedy huidibi ti xyquexyich, yi' ich muid n'ityich. Ca' ich yi' xy'ixmachich. Com co ich njatytimyumbich jabom jabom huidibi yi' chojcyp.

³⁰ Co Jesús jadu'n yminañ, chi mayjäy ooy ymibijcy.

Jäy huidibi mibijcp Jesús ycuychinaayipy yi' ytiy'ajt

³¹ Chi Jesús ñimay je judiojäy ajcxy huidijaty anajty ti ymibicy:

—Pen mmibijc ajcxy cixyot huinjot tüg'óciy ich n'ayuc, e ca' m'ijxmadzipy ajcxy ich n'ayuc, huin'it ich miich ajcxy jëbi njäy'adyii.

³² Huin'it jëbi ajcxy mnejhuñhuipy Dios ytiy'ajt. E. Dios ytiy'ajt xyñihuaängixip ma je mjibic-huinmañ ooy xy'ané'mgixy.

³³ Chi ajcxy y'adzooy:

—Abraham ich ajcxy nmij'ap nmijteedy'ajtpy. Ca' ich ajcxy huaad ni pinjäy xyjac'ane'my. ¿Nej co miich jadu'n minañ: “Dios ajcxy xyñihua'nip ma yi' mjibic-huinmañ xy'ane'mgixy”?

³⁴ Chi Jesús y'adzooy:

—Janch janch ich miich ajcxy jadu'n nimaagyxy co tüg'óciy pinjaty pocy ytundiib, jibicp yi' ane'mip. Tim jadu'n nipaady nej tüg tumbi huidi codoogü y ijtp, yi' yhuindzin jatytimy'ane'mip. ³⁵ Yi' tumbi huidibi codoogü ijtp, ca' yhui'mañ ma je jäy ytijc huinixii. Yi' jäy y'ung janchtiy hui'mam huinixii ma yteedy ytijc. ³⁶ Pen Dios y'ung miich ajcxy xyajpidzimgixp ma je jibicpi xy'ane'mgixy, janch huinixii m'idaangixy, ca' ma ti jibicpi xy'oc'ané'mgixnipy. Tim jadu'n nej Dios y'ung y'ity, ca' ti jibicpi y'ane'myii. ³⁷ Nejhuñybich co miich ajcxy Abraham mmij'ap'adyii nmijteedy'adyii. Per miich ajcxy chachyaj'ogaambich. Je' co ca' mijpidaaccixy ich n'ayuc huidibi njayajnimaaagyxyp. ³⁸ Hich miich ajcxy nyajmuidmidaacyy tiibi n'ixyich huidibi ndeedyich ytumyb. E miich ajcxy yi' mdumyb nej m'ap mdeedy ti xyajnimaaagyxy.

³⁹ Chi ajcxy y'adzooy:

—Hue' ñich ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

—Pen janch ajcxy Abraham mmij'ap'adyii mmijteedy'adyii, yi' ixypiy ajcxy mdungixyp jadu'n nej Abraham tuuñ. ⁴⁰ Janch ñich miich ajcxy xychachyaj'ogáangixyich, e ti ajcxy njayajnimây je huidibi ñich ti nmidooyich ma Dios. Ca' Abraham yaj'ögy je jäy ajcxy huidijaty anajty Dios ytiy'ajt mñid, jadu'n nej miich ajcxy m'iditzaangixy. ⁴¹ Miich ajcxy jibic-huinma'ñ mdungixyp, tim jadu'n nej m'ap mdeedy jibic huinma'ñ ajcxy tuñ jecy'ajty.

Chi ajcxy Jesús adzooy:

—Ca'ñich ajcxy ndigoy'ungity. Je' tügpajc ñich ajcxy ndeedy'ajtyp Dios Teedy.

⁴² Chi Jesús ymïnañ:

—Peni Dios ixypiy ajcxy mdeedy'ajtyp, xychojcpich xymijpidaacpich ixypiy ajcxy. Com Dios ti xyquexyich ya naaxhuiñ, e jiby ndzooñich ma Dios. Ca'ñich ngi'mdzojcïn ycixpi nmiññich ya naaxhuiñ. Yi' je' jadu'n tzojcp pin ti xyquexyich. ⁴³ ¿Ti co ca' miich ajcxy mhuinjihuñ ñich n'ayuc? Je' co ca' ajcxy midohuaangixy ñich n'ayuc. ⁴⁴ Je' miich ajcxy mdeedy'ajtyp je mujcu'. Mñid mgi'mdzojcïn mguydungixy je mujcu' chójcïn. Je' mujcu'yaj'öctiïyb yi' jäy maabi naaxhuiñybi chondägy. Je' mujcu' ca' je' ñaani Dios ytiy'ajt. Ca' ni ti tiy'ajt yajpaady ma je', com je' mujcu' ñindaacp je', chi ci'm ooy nijot y'idich. Je' ooy ñdac, e je' oga'n anñi yajtzondac. ⁴⁵ Com miich ajcxy mujcu' yhuinma'ñ mñid, paady miich ajcxy ca' xymibijci xymijpidaaci n'ayucich co ñich tiy'ajt njamiydägy. ⁴⁶ Ni pin miich ajcxy xycayajpocycähuiy. Peni tiy'ajt ñich miich ajcxy nyajnimaaayb, ¿ti co ca' mmijpidaaccixy ñich n'ayuc? ⁴⁷ Je' jäy ajcxy huidibi yajpatp ma Dios, y'amido'ijtyp ajcxy Dios y'ayuc. Paady miich ajcxy ca' m'amido'ijtcixy Dios y'ayuc, com ca' ajcxy Dios mDeedy'ajtigixy.

Jesús jiiyim anajty yjugy'aty ca'ydi Abraham

⁴⁸ Chi je judío ixpicytjic ajcxy y'adzooy:

—Ti ñich ajcxy yajxon nmïna'ñ co miich mgogajpity jim Samaria, e mujcu' miich mñid ma mjot mhuinma'ñ.

⁴⁹ Chi Jesús y'adzooy:

—Ca' ñich mujcu' nmñidity ma njot nhuinma'ñ, com nyajmij'ajtypich nDeedy, e miich ajcxy xy'ixtjipich. ⁵⁰ ñich ca' ci'm naygömayiijich. Dios Teedy ñich xycömaayb, com yi' je' huidibi ixjöyp payöyp jäy ajcxy ypocy. ⁵¹ Janch janch ñich miich ajcxy nimaagyixy co ji nijëjity jäy huidibi ñich n'ayuc cuydumb, e ca' yi' ajcxy yjugy'ajtin ycixipy ytigoyipy tücci'yi co y'ó'ccixipy.

⁵² Chi je judío ixpicytjic ajcxy y'adzooy:

—Cham ñich ajcxy janchtiy ti nnejhuñyich tiydudägy co miich mujcu' mñidity ma mjot mhuinma'ñ. Abraham o'c je', nañ jadu'n o'c ajcxy je' huidibi anajty Dios ytiy'ajt capxhuäcxip, e miich mmïna'ñ co pen ji pinjaty miich m'ayuc xymibijcip xymijpidaacip, ca' je' y'ögipy. ⁵³ ¿Nej mjacmñid miich mic'ajt, ca'ydi Abraham, ñich ajt nmij'ap nmijteedy huidibi o'ci? ¿Nej mjacmñid miich mic'ajt, ca'ydi ajcxy huidibi Dios y'ayucnajtzcaxiïy, huidibi ajcxy o'ci? ¿Pin miich mdimnaydijyii?

⁵⁴ Chi Jesús y'adzooy:

—Pen ñich nñaygõmayibich ci'm, ca' n'ayucich chobaadipy. ñich nDeedy yi' xycõmayipich, je huídibi miich ajcxy mdijpy co ajcxy mDios'adyii.
⁵⁵ Per miich ajcxy ca' Dios m'ixy'adyii. ñich janchtiy n'ixy'ajtypich Dios. E co ixypy nmina'ñich co ca' ñich Dios n'ixy'adyii, ñindaacpich ixypy, jadu'n nej miich ajcxy m'indaaccixy. Janch ñich n'ixy'ich Dios, e nguydumybiçh yi' y'ayuc. ⁵⁶ Je Abraham, miich ajcxy mmij'ap mmij'teedy, jotcuje ooy ñayjihuiy co anajty ixa'ñ ñich nxii ndiempo ya naaxhuiñ. E co ijxy co ñich nmiiñich, chi ooy yjotcugiiy.

⁵⁷ Chi je judío ixpicytije ajcxy nimay Jesús:

—Ni mgamñidity huixchigui'px majc jimijt, e ¿mmina'ñ co m'ijxy Abraham? (Ca' m'ixy'ajti je Abraham, naxy tüg mil jimijt maabi je' y'o'cni.)

⁵⁸ Chi Jesús y'adzooy:

—Janch janch ñich miich ajcxy jadu'n nimäy co ji anajty ñich co ca'ni anajty Abraham yma'xung'aty.

⁵⁹ Chi ajcxy tzaa conigy tzaagäda'ñ anajty ajcxy. Chi Jesús yhuin-goyüch, e ypidzimy ma Dios ytijc.

9

Jesús yajtzooc tüg huintzpi

¹ Hue' anajty Jesús huídijtp co ijxy tüg huintz, jadu'n anajty huintz ti yma'xung'aty. ² Chi ydiscípulos ajcxy y'amidoohui:

—Huindzin, ¿pin pocy ytuun, jada huintzpi o ytaj yteedy, co huintz yma'xung'aty?

³ Chi Jesús y'adzooy:

—Ca' yi' ypocytuuñ, ni ytaj yteedy, hue' janchtiy paady ycixp jadu'n yjajty, jigix Dios ymic'ajt ñiguéxigity ma yi'. ⁴ Copicy njactúunibich yi' ytung huídibi ti xyquexyich ya naaxhuiñ. Miinip je xii tiempo ma ca' pin Dios y'ayuc tunaani. Jadu'n nej jihuiy ixypy je xämbi ti ñaxy etz je coodzpi ti ymiñ. ⁵ Jadu'n nej n'ityich ya naaxhuiñ nmñidich Dios ytiy'ajt, jadu'n ñich nipaady nej tüg jin huídibi codñicxp yi' naaxhuiñyäjy.

⁶ Co Jesús jadu'n ymñanday, chi nidzujiiy naax, chi mo'ntz yaj'oyiiy mñid chujni, chi jada' yajjaaxi je jäy yhuin mñid je mo'ntz. ⁷ Chi nimay jada':

—Nixc quejtzpuj yi' mo'ntz jim ma yi' Siloé nii y'abojtzigity —je ayuc Siloé jadu'n yhuimbizimy: quexyöybi.

Chi je jäy huintzpi ñicxy jim, chi oy quejtz puje je mo'ntz, chi oy huimbity ti anajty yhuindicxigy. ⁸ Je ymñin ymñidic ajcxy etz tüg'ócüy huídijaty anajty ajcxy ti ixu je huintzpi co jabom jabom ññay limosna yajmucy, chi ajcxy ñay'amidoohui miñ xyipy:

—¿Nej ca' jada yjējity je huintzpi huídibi anajty jabom jabom limosna yajmujcpi?

⁹ Nijējity ajcxy ymñañ:

—Je' yi'.

E jacjadyii ajcxy ymñañ:

—Huingbi yi', ni goob jadu'n yquéxigy nej je'.

E je' ymñañ ci'm:

—Ñich jēdu'n huídibi anajty huintz.

¹⁰ Jadu'n anajty ajcxy tzach'amidooy:

—¿Nej yi' mhuin ti ñay'ahuäcxyii?

¹¹ E je' anajty y'adzooy:

—Yi yëdyjc huidibi ajcxy ytiyyp Jesús, yi' mo'ntz yaj'oyiyy xyajjaaxich nhuiin, e chi xyñiimaayich: “Nícx quejtzpuj ma yi Siloé nñi.” Chi nñicxyich, e oy nguejtzpujyich, e chi nhuindicxi'cyich.

¹² Chi ajcxy je' nimay:

—¿Ma je' je yëdyjc?

Chi je huintzpi y'adzooy:

—Ca' nnejhuüyich.

Fariseojäy tiy'ajt pijcy nej je huintzpi anajty ti chögy

¹³ Chi ajcxy yajnicxy ma fariseojäy ajcxy yhuinduu, je huidibi anajty huintz yajpatp. ¹⁴ Hue' anajty tüg sábado xii (judíojäy ajcxy amayxi) co Jesús mo'ntz yaj'oyiyy, e yajhuindicxiy je huintzpi. ¹⁵ Chi je fariseojäy ajcxy jadüg'oc yajtiy nej anajty je jäy ti yhuindicxiy. Chi je jäy y'adzooy:

—Mo'ntz ti pidägy ma iich nhuiin, chi iich ti nguejtzpujy, e cham n'ijxnibich.

¹⁶ Nijëjity fariseojäy ajcxy ymíañ:

—Yi yëdyjc huidibi jada jadu'n ti tuñ, ca' yi' Dios ytiy'ajt mñidity, com ca' yi' amay'aty sábado xii.

Chi ajcxy jacjadyii y'adzooy:

—¿Nej tiy jada mijhuinmañ octuñ, pen hue' yi' pocyjäy?

Ca' ajcxy nay'ayuc-huinjihuiyigixy. ¹⁷ Chi ajcxy jadüg'oc nimay je jäy huidibi anajty ti y'ijxiy:

—E miich, ¿nej m'ocmíambí? ¿Pín jäy yi' tiibi xyajhuindicxiy?

Chi je jäy y'adzooy:

—Tüg jäy huidibi Dios y'ayuc etz ymic'ajt mñid.

¹⁸ Chi je judío ixpicytjic ajcxy ca' anajty tím mibigaangixy co je yëdyjc anajty huintz yajpaady, e co anajty ti yhuindicxiy, ixti cooni ajcxy ytaj yteedy mijhuoohui. ¹⁹ Chi ajcxy amidoohui ytaj yteedy:

—¿Nej je' jada miich ajcxy m'ung huidibi huintz ma'xung'ajti? ¿Nej jada ti yhuindicxiy?

²⁰ Chi je' ytaj yteedy ajcxy y'adzooy:

—Iich ajcxy nnejhuüyib co iich ajcxy yi' n'ung, e co yma'xung'ajty hu-intz. ²¹ Per jadu'n nej cham ti yhuindicxiy, e pín yi' yhuin ti yajhuäcxyii, ca' iich ajcxy yi' nnejhuüyigixy. Amídoo miich ajcxy yi' ci'm. Mij'anäciñ yi', ñigapxyi yi' ci'm.

²² Jadu'n ajcxy ytaj yteedy y'adzooy, mñid co ajcxy tzachtzigiyigixy je judío ixpicytjic ajcxy. Com je judío ixpicytjic ajcxy ti anajty ñaygäpxiyigixy co anajty yajpidzimaangixy ma ajcxy ñaymujctac je jäy ajcxy pínjaty anajty mibijcp co Jesús anajty yjëjity je Cristo. ²³ Paady ajcxy ytaj yteedy ymíañ:

—Mij'anäciñ yi', amídoogix miich ajcxy yi' ci'm.

²⁴ Chi ajcxy y'amídooy mñimejtz'oc je yëdyjc huidibi anajty ti y'ijxiy, e chi ajcxy nimay:

—Cömay capxpat yi' Dios co ti mdzögy. Ca' mgömay mgapxpaady je Jesús. Com iich ajcxy nejhuüyib co yi' Jesús, tüg yi' pocytumbi. Ca' yi' Dios y'ayuc ytiy'ajt mñidity.

²⁵ Chi je jäy y'adzooy:

—Pen tüg pocytumbi yi' Jesús, ca' nejhuüyich. Huidibi janchtiy nnejhuüyibich, co anajty iich nhuintzity etz co cham huindicxnibich.

²⁶ Chi ajcxy y'amídooy jadüg'oc:

—¿Nej ti xytuñ? ¿Ti ti tuñ co ti xyaj'ijxici yi mhuiin?

²⁷ Chi je' y'adzooy:

—Ti ajcxy nyajnimaaгыixy, e ca' ajcxy ti m'amido'idaangixy. ¿Nej nañ ixpigaangixy miich ajcxy ma yi'ji?

²⁸ Chi ajcxy je' ogy, nimay ajcxy jadu'n:

—Miich ixpijc ma yi', iich ajcxy n'ixpijcpich ma Moisés ytiy'ajt. ²⁹ Iich ajcxy nejhuuyb co Dios Moisés migapxy. Janch yi Jesús ca' iich ajcxy nnejhuuyгыixy ma yi' chooñ (ma mic'ajt ti paady).

³⁰ Chi je jäy y'adzooy:

—Ooy yi' y'oychigiñity y'oyhuinma'ñity co miich ajcxy ca' mnejhuuyгыixy ma yi' chooñ (ma mic'ajt ti paady), e ti iich yi' xya-jhuindixгыич. ³¹ Yajxon yajnejhuuy co Dios ca' yi' midoohui pocyjäydijc y'ayuc. Pen oy jäy iich ajt, e nguyduunim Dios ytiy'ajt, huin'it ajt Dios n'ayuc xymidoohuim. ³² Ni caminaaxi ycayajmidoy, co pinjäy tüg huintzpi ti yaj'ijxigy huidibi jadu'n ti yma'xung'aty huintz. ³³ Co ixypy je Jesús ca' jiihy chooñ ma Dios, ca' ixypy jaty nej ti tunipy.

³⁴ Huin'it ajcxy y'adzooy:

—Miich jadu'n ti mma'xung'aty pocymid. Ca' miich huaad ti xyaj'ixpijccixyich.

E chi ajcxy yajpidzimy tibäy'tücci'yi (ma ajcxy ñaymujctac etz ma Dios ytiyc).

Je jäy ajcxy huidibi ca' cöbijccixy Dios ytiy'ajt jadu'n nipaady ajcxy nej jihuuy huintzity

³⁵ Chi Jesús nejhuuy jadu'n co anajty ti yajpidzimy tiba'y tücci'yi ma Dios ytiyc. Co minaaabaati chi nimay:

—¿Nej mmibijcyp mijpidaacyp miich je jäy huidibi tzoon tzajpjoty?

³⁶ Chi je' y'adzooy:

—Huindzin, nimaaгыич pin je', jigix nmibicyich.

³⁷ Chi Jesús je' y'adzooy:

—M'ijxyp yi'du'n yam. Yi je' je huidibi xymidmiydacp.

³⁸ Chi jada' huingoxtinay'ahuuy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹ Chi jada' Jesús yminañ:

—Iich ti nmiñ ya naaxhuiñ co n'ixyöyaanich nbayöyaanich jäy ypocy, jigix nyajpocycähuibich pin ca' ypocymidity, etz nyajpocyñhuadzibich pin ypocy mid. Jadu'n nej jihuuy nyajhuindziyich je jäy huidibi iixp, etz jadu'n nej jihuuy nyajhuindixгыич yi huintzpi.

⁴⁰ Chi nijëjity fariseojäy huidibi anajty jim ma Jesús ymijc jadu'n midoy nej Jesús yminañ, chi ajcxy nimay Jesús:

—¿Nej nañ jadu'n miich mdiyy iich ajcxy ca' Dios ytiy'ajt nejhuuyich, jadu'n nej jihuuy iich ajcxy nhuintzity?

⁴¹ Chi Jesús y'adzooy:

—Co ixypy miich ajcxy janch janch ca' mnejhuuyгыixy Dios ytiy'ajt, ca' ixypy ti pocy ajcxy mmidity. Per miich ajcxy minam co Dios ytiy'ajt nguyduuniy, e ca' yjanchity. Paady ajcxy mbocymidity. Nipaatype jadu'n nej jihuuy miich ajcxy mhuintzity, e mminaangixy co m'ijxcixy.

10

Jesús yaj'ixpijc jihuimbit ayuc

¹ Chi Jesús jacnımay je judıo y'ixpıcytıc, je fariseojäy ajcxy:

—Janch janch ñich miich ajcxy yam jadu'n nımaaygıxy co je jäy ajcxy huıdibi ca' ytıgıhuaangıxy ma borregi agaj aguu (ma je cuend'ajtpı ycuend'aty), huıdibi huıngduum ameech tzach tıgıhuaam ma yborregi agaj, je' je' je meetzpi huıdibi meedzam je borregi ajcxy ameech. ² Je jäy huıdibi tıgıhuam ma yborregi agaj aguu, je' je' je borregi cuend'ajtpı. ³ Co je borregi cuend'ajtpı ymiñ ma agaj aguu, chi je agaj aguu cuend'ajtpı yaj'ahuäch je agaj aguu. Chi yborregi ajcxy yöcmıdoyii, chi je' migapxy xıibety xıibety, chi yajpidzimy ajcxy. ⁴ Co ajcxy yajpidzımdäy, ac je' yje', chi jayıp ñıxcy, e axam ajcxy ypanıxcyii, com je' co yöcmıdoyii. ⁵ Ca' je borregi ajcxy jėbi panıxcy tüg huıngjäy. Nıgı ajcxy cöguęy, com yöcmıdooyb ajcxy co yhuıngjäyıtı.

⁶ Jadu'n Jesús mayjäy yaj'ixpijcy jihuimbit'amy, jaygue' ajcxy ca' huaad huınjıhuıy nej anajty Jesús yjamınäna'ñ.

Jesús je oybi cuend'ajtpı

⁷ Chi ajcxy Jesús jadüg'oc ñımaayi:

—Janch janch ñich miich ajcxy yam jadu'n nımaaygıxy, co je Dios nDeedy'ajtypıch. Jėbi jäy ajcxy paady Dios ytıy'ajt ma ñich, e huınıt ytıgıygyıpy ma Dios y'ıt. Jadu'n nıpaady nej jıhuıy ñich je agaj aguu ma borregi ajcxy ytıgıygyıxy. ⁸ Tüg'ócy je huındzındıjc huıdibi ajcxy miın jayıp ca'ni ñich anajty nmiñıch, e ymınaangıxy anajty co ajcxy mııd'ajtı Dios ytıy'ajt, jadu'n je' anajty ajcxy nej meetzpi huıdibi meedzaanıp Dios yjäy. Per je Dios yjäy ca'p je' ajcxy tuuñ cuendi, jadu'n nej je borregi ca' yöcmıdoogıxy je meetzpi. ⁹ Jadu'n nej je borregi ajcxy ytıgıygyıxy ma agaj aguu, nañ tım jadu'n jäy ajcxy paady Dios ytıy'ajt ma ñich. Je jäy ajcxy huıdibi ypaatyp Dios ytıy'ajt ma ñich, nañ ypadaamy jugy'ajtıñ huıdibi ca' ycıxıpy ytıgoyıpy tüccı'yı. E huıdibi je' ajcxy yajmayajıtyp ma yı çınaayın, nmöhuıbyıch. Tım jadu'n nej borregi ajcxy jabom jabom ypidzimgıxy ma agaj aguu nıxcıxy mııy'ojcpi, etz yhuımbıjtıcy tzuu tzuu.

¹⁰ Yı meetzpi ajcxy mımb co ymeedzaangıxy yaj'ögaangıxy yajhuındıgıyaaangıxy. ñıch tı nmiñıch, jıgıx miich ajcxy mbáatcıxıpy jugy'ajtıñ mıjcajee huıdibi ca' tüccı'yı ycıxıpy ytıgoyıpy.

¹¹ Chi Jesús yjacmınañ:

—Ñıch jadu'n nıpaady nej tüg borregi cuend'ajtpı oybi. Je oybi borregi cuend'ajtpı ycıyejcy yı' yjugy'ajt ma yı o'cın mııd yborregi ycıxpi. ¹² Je borregi cuend'ajtpı huıdibi mujuy tumb, huıdibi ca' ycı'mborregi cuend'aty, nı ycajėıtıy je borregi yhuındzın, co ıxy caa ymiñ, chi cöguęy je borregi, e yajqueec-huächıtäy. ¹³ Com je' co mujuy ytuñ, paady cöguęy je borregi ajcxy, ca' tzocy jıhuıy borregi.

¹⁴ Tım jadu'n nej je oybi borregi cuend'ajtpı ıjxajptäy je' yborregi, nañ tım jadu'n ñıch n'ıjxajptäy je njäyıch (huıdibi xymıjpidaacpıch), etz je' ajcxy xy'ıxy'ajtpıch. ¹⁵ Tım jadu'n nej Dios Teedy xy'ıxy'adyııjıch, nañ tım jadu'n n'ıxy'adyııjıch Dios Teedy. Tım jadu'n je' nej je oybi borregi cuend'ajtpı ycıyegamy yjugy'ajtıñ mııd yborregi ycıxpi. Nañ tım jadu'n ñıch ngıyegamyıch njugy'ajtıñ mııd ñıch njäy ajcxy ycıxpi. ¹⁶ Nmııdıch jadügıpy jäy, ca' ajcxy yjudıojäyıtıy, je' ajcxy nañ jadu'n nmııd'ıdaamyıch tügııcy (mııd je judıo jäy ajcxy huıdibi xymıjpidaacpıch). Tım jadu'n

nej je cuend'ajtpi ymüid'ajtyp je' yborregi ajcxy tügmucy. E je' ajcxy y'amidoo'idaamy üich n'ayuc, tim jadu'n nej borregi ajcxy yöcmidoogixy yhuindzin. Ji y'idipy tügmucy jäy (huidibi xymijpidägibich), etz tüg cuend'ajtpi (üich jëdu'n).

¹⁷ Chi Jesús yjacmínañ:

—Paady ycixp Dios Teedy ooy xychocyich xyjihüiyich, co ngüyegaamyich njugy'ajtin ma yi ó'cin (müid jäy ajcxy ypocy ycixpi), etz njugypigipyich jadüg'oc. ¹⁸ Ca' ni pin xypijcibich yi njugy'ajtin, üich yi' ci'm ngüyegamy. Nmüidich mic'ajt nej ngüyegipyich njugy'ajtin, etz nañ nmüidich mic'ajt nej njugypigipyich jadüg'oc. Jadu'n nDeedyich ti xy'ane'myich co jadu'n ndunipyich, n'ögibich, njugypigipyich jadüg'oc.

¹⁹ Chi jadüg'oc ajcxy ca' nay'ayuc-huinjihüiyi je judíojäy ajcxy müid Jesús y'ayuc ycixpi. ²⁰ Mayjäy ymínañ:

—Ca'oybi yi' ymüid, locjüyb yi', ¿nej co ajt n'amido'ijtim y'ayuc?

²¹ E jacjadyii ajcxy ymínaangixy:

—Jadayaabi tiy'ajt etz mic'ajt ca' yajpaady ma tüg jäy huidibi mujcu' ymüid. Ca' jëbi tüg mujcu' jäy huintzpi yaj'ixigy.

May judíojäy ajcxy ca' cöbijcy Jesús

²² Jim Jerusalén anajty xii yjadyii, je' anajty ajcxy ñixüidumyib jimijt Dios ytijc. ²³ E hue' anajty tüich tiempo. Chi jim anajty Jesús yhuidity ma Dios ytijc, ma je Salomón ytijc-huinduu. ²⁴ Chi ajcxy je judío y'ixpicytijc nimujcy ooy Jesús, nimay ajcxy:

—¿Ixti mínaani müich üich ajcxy tiydudägy xyajhuinjihüihüaangixyich pen müich je' je Cristo? Yajhuinjihüiygich ajcxy tiydudägy.

²⁵ Chi Jesús y'adzooy:

—Ti ajcxy nyajnimaaagyixy, e ca' müich ajcxy ti nmüibjccixy. Je mijhuinma'ñ huidibi ndumyibich nmüidich nDeedy ymic'ajt, yi' je' nidiy'ajt'ajtp co üich je' je Cristo. ²⁶ Paady ycixp müich ajcxy ca' nmüibjccixy, com ca' müich ajcxy njäy'adyiijich. ²⁷ Hich njäy ajcxy ymijpidaacyb üich n'ayuc, e n'ijxajpich ajcxy je', e je' ajcxy xypanicxpich. Tim jadu'n nej je borregi ajcxy yöcmidooy je yhuindzin, jadu'n nej je huindzin ijxcapy je' yborregi, e jadu'n nej yi yborregi ypanicxyii. ²⁸ Hich njäy ajcxy nmooybich yi jugy'ajtin huidibi ca' tücci'yi ycixa'ñ ytigoya'ñ. Ca' je' ajcxy yjugy'ajtin ytigoyipy ni camina, e ni pin ca' huaad je' ajcxy xypijcich. Je' ajcxy ci'am nmüididyich. ²⁹ Yi Dios Teedy huidibi üich njäy ti xymöy, tügpajc yi' ymijity, e ni pin huaad ni ti capijcyi huidibi Dios Teedy ymüid ci'am. ³⁰ Dios Teedy etz üich tú'ciy üich ajcxy.

³¹ Chi je judíojäy ajcxy jadüg'oc tzaa conig cädzaangixy anajty ajcxy.

³² Chi Jesús je' ajcxy nimay:

—Ti üich ooy mij oybi nduñich ma müich mhuinduu müid je nDeedyich ymic'ajt ycixpi. ¿Huidi ycixpi müich ajcxy xychaagädzáangixyich?

³³ Chi je judío ixpicytijc ajcxy y'adzooy:

—Ca' nmínaaním paady üich ajcxy müich ndzaagädzaangixy müid je oybi tüibi mduñ, hue' janchtiy ycixpi ndzaagädzaangixy müid co ooy Dios myajjotmädy. Com müich nañ jäy, e mnayajnaxyii Dios.

³⁴ Huin'it Jesús je' ajcxy nimay:

—Jadu'n ycojaayity ma yi judíojäy ajcxy ytiy'ajtnecy, ma Dios jadu'n ymína'ñ: “Jadu'n nej dios müich ajcxy.” ³⁵ Paady ca' ngapxtigooyich, com Dios ci'm jadu'n minamb ma ñecy, co jadu'n nej Dios je' ajcxy

huidibi Dios y'ayuc cöbijcip (e ca' huaad pinjäy ymīna'ñ co Dios ñeey ca' yjanchity). ³⁶ Dios ti xyajñibicyich jada tung, e xyquejxyich ya naaxhuiñ. ¿Nej co mmīnaangixy co ñich ngapxtigooyich co nmīna'ñich co Dios xy'ung'adyiijich? ³⁷ Pen ca' nduñich nDeedyich ytung, ca' ñich ajcxy huaad n'ayuc xymibijcich. ³⁸ E pen ndumybich nDeedyich ytung, oy ixyipy miich ajcxy ca' xymijpidaacich n'ayuc, jēbi ixyipy mijpidägy ajcxy je mijhuinma'ñ huidibi ndumybich. E chi mnejhuñhuiipy miich ajcxy, etz mmijpidägyipy miich ajcxy co je Dios Teedy yajpaady ma ñich, e ñich nyajpaadyich ma Dios Teedy.

³⁹ Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰ Chi Jesús ñicxy jadüg'oc jim Jordán mij ñiñ nīnaxy ma Juan yjāy yajñibejty oga'n'aty, chi jim yhui'miyy. ⁴¹ Mayjäy Jesús ooy ñimujci, e ymīnañ ajcxy:

—Je Juan el Bautista ca' jadu'n ooy mijhuinma'ñ tuuñ, per tüg'óciy yi tiy'ajt jadu'n nej nimiydactay jada Jesús, janch tiy'ajt je'.

⁴² E janch mayjäy ooy mibijcy Jesús jim ma je jimbi it.

11

Co Lázaro y'o'cy

¹ Jim Betania anajty tüg pa'mjäy, hue' anajty yxñ Lázaro. Hue' je' anajty chinäy ma María etz Marta ycogajpity. ² María je' anajty huidibi je Huindzin Jesús anajty ti yajjaxy je ujtzipijyññiñ huidibi ooy oy yxuugy, etz po'ti Jesús ytecy mīid ycöhuay. Hue' je' anajty María etz Marta ymidügquēx Lázaro huidibi anajty pijcip. ³ Chi Lázaro ymidügquēx ajcxy ycapxyquejxy ma je Huindzin Jesús anajty yajpaady, e chi oy yajñimāyii:

—Je mmigüg huidibi ooy mdzocy, pijcip je'.

⁴ Co Jesús jadu'n midooy, chi ymīnañ:

—Je' ypa'm ca' yaj'ōga'ñyii tücc'i yi. Je' ypa'm hue' yajñiguēxigamy Dios ymic'ajt, jaydēb Dios ycōmaybidzimipy, e nañ ñich nyajcōmayipyich, ñich je jāy huidibi tzoon tzajpjoty.

⁵ Jesús ooy anajty tzocy jihuñy je Marta, María etz je Lázaro. ⁶ Oy jadu'n Jesús nejhuñy co anajty Lázaro ypiyyii, jamejtz xii jim yjacxñnajxy ma anajty yajpaady. ⁷ Huin'it Jesús nimay ydiscípulos ajcxy:

—Tzoc jamim jim Judea naaxjot.

⁸ Chi je' ydiscípulos ajcxy y'adzooy:

—Huindzin, namni jāy ajcxy jim Judea ti xy'ocjaccögädzambi, e ¿mnicxaanip jim jadüg'oci'?

⁹ Chi Jesús y'adzooy:

—Majmetz hora tüg xñmbi mīidity. Pinjäy mīid Dios ytiy'ajt, ca' ayo'n pada'ñ, tim jadu'n nej jihuñy yhuidity xñm, e ca' ycōnepy, com co xñ codiicxy jada naaxhuiñybi. ¹⁰ Pinjäy ca' mīidity Dios ytiy'ajt, ca' je' nejhuñy ti anajty jadaanip, chi ayo'n pada'ñ, tim jadu'n nej jāy ycoodzhuidity, e chi ycōnepy mīid co ca' anajty ixy ma ñicxy.

¹¹ Huin'it Jesús je' ajcxy nimay:

—ñich ajt nmigüg Lázaro maab je', ñicxy nyajpidäga'ñich.

¹² Chi je' ydiscípulos ajcxy y'adzooy:

—Huindzin, pen maab, huaadjihuñjihuip yi', ci'm yi' ymāyhuijipy.

¹³ Je' Jesús anajty ñimiydaacyp je o'cin, e je' ajcxy tijy Jesús ñimiydaacyp je māhuñi. ¹⁴ Chi Jesús yajñimiydacy ajcxy tiydudägy, ymīnañ:

—Lázaro ti je' y'o'cy. ¹⁵ E ooy njotcújcidyich miiid miich ajcxy ycixpi co anajty iich ca' njimity, jigix ajcxy mmibigipy co Dios ymic'ajt nmididyich. Tzoc ajt jamim jim Betania.

¹⁶ Tomás huidibi anajty ajcxy yxiigoyaaaxyp Dídimó, huidi ayuc-huimbidzin: cuate, nimay jacjadyii Jesús ydiscípulos ajcxy:

—Tzoc ajt nañ jadu'n jamim, huen jäy jim xyaj'o'cim quipxy miiid Jesús.

Jesús yajjugypigipy je jäy ajcxy etz möhuipy ajcxy jugy'ajtin

¹⁷ Co ajcxy jim yja'ty, chi ajcxy paty tiy'ajt co mimidaaxxiibi anajty maabi Lázaro ñaaxtigíy. ¹⁸ Betania ca' anajty ooy yjiguëgyity miiid Jerusalén, jëyi jada' anajty miiidity tugüig kilómetro. ¹⁹ May judíojäy ajcxy anajty ti ymiingixy ma Marta etz María, yajjotcugíhua'ñ ajcxy miiid je' ymiguëx ycixpi co anajty ti y'ögy. ²⁰ Co nehuíy Marta co Jesús anajty jim ymiñ, chi nidzoofñ oy jijpcobađiy. E María jim yhuimíy ma ytijc, tigoty anajty iñäy. ²¹ Chi Marta Jesús nimay:

—Huindzin, co ixypy miich ya anajty myajpaady, ca' ixypy ti y'ögy nmiguëxich. ²² Per nnejhuíybich co miich cham jëbi Dios mmibijctzoy, e xymöhuip ti mdimdzojcyp.

²³ Chi Jesús y'adzooy:

—Je mmiguëx jugypigip jadüg'oc.

²⁴ Chi Marta y'adzooy:

—Nnejhuíybich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadza'ñ.

²⁵ Per huin'it Jesús y'adzooy:

—Iich je' nyajjugypigipyich je jäy ajcxy, e nmöhuíybich ajcxy jugy'ajtin. Pinjäy ajcxy xymibijcpich xymijpidaacpich, oy anajty yja'ögy ajcxy, jugy'ajtcixip ajcxy jadüg'oc. ²⁶ E tüg'óciy pinjaty ajcxy xymibijcp xymijpidaacpich juugyñi, ca' y'ögipy ajcxy túcci'yi. ¿Nej mibijcyp miich jadaaji?

²⁷ Chi Marta y'adzooy:

—Nmibijcypich, Huindzin. Nmibijcypich co miich je' je Cristo, Dios y'ung, huidibi anajty miinam ya naaxhuiñ.

Jesús taj may ooy miiid Lázaro ycixpi

²⁸ Co Marta jadu'n ymínañ, chi jada' oy huoy y'uch María, e yajnimay ameech:

—Je Huindzin chiiby je', e miich jüby xymiidmíydägamb.

²⁹ Co María jadu'n midooy, chi ypidígy mic'amy, e chi ñicxy ma Jesús.

³⁰ Ca'ni anajty Jesús yja'ty cajpjoty. Jimni anajty yhuäcxijp ma anajty Marta ti yjijpcobaadíyii. ³¹ Co ajcxy ijxy co María ypidígy, e ypidzímmy janch mic'amy, je judíojäy huidibi anajty ajcxy jim ma je tijc miiid je', hue' ajcxy tijy María ñicxy yaaxpi ma anajty ti ñaaxtigíy je Lázaro. Chi ajcxy panicxy.

³² Co yjädy María ma je it ma anajty Jesús, co ijxpaty, chi ycojxtinaay'ahuíy ma Jesús yhuinduu, chi nimay:

—Huindzin, co ixypy miich anajty m'ocyaajity, iich n'ay ca' je' ixypy y'ögy.

³³ Co Jesús ijxy yäxy je María etz je judíojäy ajcxy huidibi anajty yjaymiiid'ajtip, chi ooy jihuíy etz ytaj ymaay. ³⁴ Chi jada' Jesús yajtiy:

—¿Ma ajcxy Lázaro ti myajnaaxtigí?

Chi ajcxy nimay:

—Huindzin, jam iixim.

³⁵ Chi Jesús yaaxy. ³⁶ Chi judíojaý ajcxy ñayñimaayi miñ xyipy:

—Ooydim anajty tzocy je Lázaro.

³⁷ Per nijëjity ajcxy ymínañ:

—Jadayaabi jáy huídibi huintzjáy yajhuindicxígy, ¿nej ca' jada' ixyipy mic'ajt muidity jëbi ixyipy ti yajtzögy je Lázaro, e ca'ydi ixyipy ti y'ögy?

Jesús yajjugypijc Lázaro

³⁸ Chi Jesús jadüg'oc yjotmaybaty, chi ymíjhuágy ma je o'cpi jut. Hue' je' anajty tüg ang müid tüg mij tzaa y'agiyducyity je jut aguu. ³⁹ Chi Jesús ymínañ:

—Jüigi' ajcxy jada tzaa.

E chi Marta je o'cpi y'uch y'adzooy:

—Huindzin, xuucníp yi', com cham yi' mimidaaxxiibiñ maabi ñaaxtigíy.

⁴⁰ Chi Jesús ymínañ:

—¿Nej cay ti jadu'n nnimäyi? Pen xymibíjicibich yi' n'ayuc, m'ixipy Dios ymic'ajt y'oy'ajt.

⁴¹ Chi ajcxy je tzaa jüigíy, chi Jesús cix ypa't'ijxy, ymínañ:

—Dios Teedy, jáygi daacin nyajnajxypich ma müich, co müich xymidoohui n'ayucich ⁴² Yajxon nnejhuíyich co müich xy'amido'ijtpich jabom jabom, paady ycixp müich jadu'n ti nnimäy müid jadayaabi jáy ajcxy ycixpi ma iich nhuinduu, huen ajcxy mibicy co müich xyquejxich ya naaxhuiñ.

⁴³ Co Jesús jadu'n ymínañ, chi jada' mic ycapxy:

—Lázaro, pidzim tibäy.

⁴⁴ Hue' je o'cpi mic'amy ypidzimy ymo'nity yajxon tüg'óciy ñinícx etz huingoyebíyity müid huit, chi Jesús ymínañ:

—Huimbidiyttuutcixy, e najtzmazíygyix, huen yöychooñ.

Judío ixpicytijc ymadzamy anajty Jesús

⁴⁵ May je judíojaý ajcxy ymibijcy huídibi anajty María yjaymüid'ajtyp, co ajcxy ijxy je huídibi anajty Jesús ti tuñ. ⁴⁶ Per jadyii judíojaý ajcxy oy ittäy je fariseojäy ajcxy, chi ajcxy yajmüidmíydacy huídibi anajty Jesús ti tuñ. ⁴⁷ Je teedy tungmüidpi ajcxy, etz je fariseojäy ajcxy, chi ajcxy ñayhuoomujctayi je tungmüidpi ajcxy nidüg'óciy, chi ajcxy ymínañ:

—¿Nej ajt Jesús n'octuunim? Yjiiibi yëydijc ooy yi' mijhuinma'ñ tzachtuuni. ⁴⁸ Pen nnajtz'ixíyim jadu'ñyi, tüg'óciy jáy mibíjctähua'ñ yi'. Chi ajcxy ymiinípy je Romano tungmüidpi huídibi ajt xy'ané'mim, e chi yajhuindigoyipy iich ajt nDios y'it, e nañ yajhuindigoyipy iich ajt ndzinaayin njugy'ajtin.

⁴⁹ Nidügti ajcxy je jáy, hue' anajty yxii Caifás, hue' anajty migtungmüid, je' anajty teedy huindzin, je' jadu'n jáy nímday:

—Müich ajcxy ca' ti mhujinjuíygyixy. ⁵⁰ Ca' ajcxy mnejhuíy co jac'oy nyaj'o'cim je Jesús tügpaic, huen yi' codinaydáhuip naax cajp, jigix ca'ydi iich ajt nnaax ngajp yhuindiooyim.

⁵¹ Canan yci'mhujinma'ñ jadu'n ycixpi ymínañ je'. Hue' janchtiy com je' anajty ymigtungmüidity je huin'it jimíjt ma teedy ajcxy ymiñ, paady Dios huinma'ñ jadu'n yejcy, co jadu'n najtzcaxpiy co Jesús anajty y'öga'ñ müid tüg'óciy ajcxy naax cajp ycixpi. ⁵² E ca' nminaanim müid jëda'ajty müid je judío ajcxy ñaax ycajp ycixpi, nañ jëgíx co huoomujctähua'ñ tüg'óciy

Dios y'ung huidijaty anajty ajcxy yajpatp xii ya. ⁵³ Huin'it oga'n ajcxy je tungmüdpí yajnigodugiiy co yaj'ögaangixy Jesús.

⁵⁴ Jesús ca' anajty ma y'ocyaj'ijxni mayjäyoty ma je judíojäy ajcxy. Chi jada' ñicy jiguem mihuingon ma je títznaax'it, ma anajty tüg cajp xiiyity Efraín. Chi jim yhuimiy müd ydiscípulos ajcxy.

⁵⁵ Huingoonip anajty je pascua xii huidibi anajty judíojäy ytumyb. Ti anajty may judíojäy ajcxy ñinicxni jim Jerusalén xii'ajtp huidibi anajty jiguëgyjaty tzomb. Jayijpni ajcxy ñicy ca' anajty xii paady, co anajty ajcxy ñayyajpocyñihuädza'ñyii. ⁵⁶ Ooy anajty jäy ajcxy ijxtäy Jesús huin'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuüy ma Dios ytijc, jadu'n ajcxy yminañ:

—¿Nej m'ocminaangixy? ¿Minipy jada' Jesús xii'ijxpi, o ca'ji?

⁵⁷ Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpinity huidibi anajty nejhuüyb ma je Jesús, huen nigapxy jigix ajcxy madzipy.

12

María yajjaax aceite Jesús ytecy

¹ Jatudujcxiiini anajty pascuaxii ca' paady, co Jesús ñicy jim Betania, jim ma anajty Lázaro yajpaady, je huidi anajty ti yajjugypicy jadüg'oc.

² Chi ajcxy jim yaj'oyiiy tüg adzu'ibi. Marta anajty jim yajcaayb yaj'uucp je jäy ajcxy. Lázaro anajty müd Jesús iñäy ma je mesi. ³ Chi María conigy tüg libra ujtzpijyñii huidibi anajty ooy oy yxuugy. Tzou je' anajty ooy, je' müd Jesús ytecy yajjaaxtaayi. Chi jada' müd ycöhuay po'ttich. Chi ac ujtzpijyñii yxuugitay tigoty. ⁴ Huin'it je Judas Iscariote je Simón ymang huidibi anajty yhuindzin cïyegam ma ymidzip, je' jadu'n yminañ:

⁵ —Jac'oy co ixypy ti ndoocim jada ujtzpijyñii oy migo'pxpeexyti jadüüb ixypy ajt ayoobitjc nbubejtím.

⁶ Canan paady Judas jadu'n yminañ co ayoobitjc tzachpa'ayoy. Paady jadu'n yminañ co ajcxy chachmeedzañ. Com je' anajty meeñybijty cuend'ajtp, e chachpuugomyb huidijaty anajty jüby ajcxy yjapidaacy.

⁷ Chi Jesús nımay je Judas:

—Ixmatz müch yi', hue' yi' yi' María ti yujcpicy jada ujtzpijyñii co yajtunañ co anajty naaxtigiyich. ⁸ Com yi' ayoobitjc ajcxy huinixii yi' müch ajcxy müd'idipy. Janch ich ca' ich müch ajcxy müd'n'idipy huinixii (ya naaxhuiñ).

Judío ixpicytjic yaj'ögamy anajty Lázaro

⁹ Co ajcxy nejhuüy may judíojäy ajcxy co anajty Jesús yjımitıy Betania, chi ajcxy nimiiñ. E canan müd Jesús ycıxpi jeda'ajty, je' anajty ajcxy nañ jadu'n chach'ixaamy je Lázaro huidibi anajty ti jugypicy jadüg'oc.

¹⁰ Chi je teedy ajcxy yhuindzindijc ñaygapxi, co yaj'ögaangixy Jesús etz nañ jadu'n je Lázaro, ¹¹ com may judíojäy ajcxy anajty ñayjübijcin, etz tzachmıbijccixni Jesús.

Jesús tigiy Jerusalén jadu'n nej tüg rey

¹² Je com jabom je mayjäy huidibi anajty ajcxy ti ymiingixy xii'ajtpi ñejhuüy ajcxy co Jesús anajty yminañ jim Jerusalén. ¹³ Chi ajcxy cabıgy may ytıixy y'aacx, chi ajcxy nidzooñ Jesús, chachminaangixy:

—¡Dios ajt xyñihuaanim xyajtzoocim! Mimb tüg jäy huidibi Dios ti yconucxyii. Ymüd yi' Dios ymic'ajtp, je' je' je' judíojäy yrey.

14 Co Jesús paty tüg burro mang huidibi ca' ni pin yaj'iñaayñi, chi yajpejty, chi cuyduuñ jadu'n nej anajty jaybety y'ity ma Dios ñecy co jadu'n ymíñañ:

15 —Ca' mdzigíy miich ajcxy huidibi tzinaayb ma Sión cajp (Jerusalén).
Cha je mrey ymiñ y'iñäy ma tüg burro mang.

16 Je huidibi anajty ajcxy Jesús discípulo'ajtyp, ca' anajty ajcxy huinjihuigixy ixti cooni Jesús paty jadüg'oc yi' y'oy'ajtin ymij'ajtin jilby tzajpjoty. Huin'it ajcxy ajihuigooti co jadu'n anajty ycojaayity miid Jesús ycixpi, e nañ co je' anajty Jesús ti yajtunyü ti yajjadyü jadu'n nej jaybety ymiñ.

17 Je jäy ajcxy huidibi anajty ajcxy ymiid Jesús, huin'it co Lázaro ypidzimy ma yajnaaxtigíy, e yajjugypijci jadüg'oc, chachyejcy anajty ajcxy tiy'ajt nañ jadu'n huidibi anajty ajcxy ti ijxcixy. 18 Nañ paady ycixpi je mayjäy oy nañ jadu'n yjijpcobadiyü, co ajcxy nejhuý je mijhuinma'ñ huidibi anajty Jesús ytumy. 19 Paady je fariseojäy ajcxy ñayñimaay miñ xyipy:

—Ix ajcxy, ca' jada' ninej nmimadaacim Jesús, com tüg'óciy yi mayjäy axam ajcxy je' panicxcixy.

Nijëjty anajty griegojäy miidmiydägaangixy Jesús

20 Nijëjty griegojäy nañ ti anajty ñicxcixy jim Jerusalén Dios ojadajtpi xijoty. 21 Chi jada' je griegojäy ajcxy nimijhuägy Felipe, huidibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtcih, Jesús ich ajcxy nja'ixamy.

22 Chi Felipe oy yajnimay Andrés, chi ajcxy Felipe etz Andrés oy Jesús yajnimay. 23 Chi Jesús ymíñañ:

—Ti je tiempo paady co ich je jäy huidibi tzoon tzajpjoty nya-jcömayipyich. 24 Janch janch ich miich ajcxy jadu'n nimaaygixy co jäy nily tüg mocpajc, e co je mocpajc ymuxe, huin'it yhuindigoy, e chi ytim'ajtni may'amy. Pen ca' ni pin nily jada mocpajc, ca' ytim'adañ. Jadu'n ich nipaady nej je mocpajc. Copicy n'ögibyich, huin'it mayjäy jugy'ajtin paadaangixy huidibi ca' ycixipy ytigoyipy ni mina. 25 Je jäy huidibi ooy nigi nixondägy yi chinaayin ya naaxhuiñ, yajtigoyamy je' yjugy'ajtin tücci'yi. Per je pin ca'p ooy nijot'aty je chinaayin ya naaxhuiñ, e nixondaaci ooy nigi Dios y'ayuc, je' y'alma nidzoocin paadip ma Dios. 26 Pen ji jäy huidibi naybidaacip ma ich, copicy ajcxy xypanicxibich. Ma ich nyajpaady, nañ jim yi' yajpaadipy nañ jadu'n. Yi jäy pinjaty naybidaacip ma ich, Dios Teedy yi' cömayiib.

Jesús capxpídzimy co y'ögañ

27 Chi Jesús yjacmíñañ:

—Tájñibich mayñibich cham jotjoty huinma'ñjoty. ¿Nej nmimähuibich nDeedyich? ¿Nihuaangich ma jada ayo'n tzaachypí huidibi ti yhuaad'ajtni? Ca' yjadu'nity. Com paady ycixp ti nmiñich ma jada xii tiempo, jëbi ayo'n nyajnajxich miid jäy ajcxy ypocy ycixpi. 28 Dios Teedy tun huidibi copicy, jëbi jäy ajcxy ijxcixy miich mmic'ajt etz miich m'oy'ajt.

Huin'it je jäy ajcxy huidi anajty jim ma Jesús yajpaady midooy tüg ayuc choñ tzajpjoty ymíñañ:

—Ti nduñich mijhuinmañ, e ti jāy icy ñich nmic'ajt n'oy'ajt. E nañ jadüg'oc ndunipyich mijhuinmañ, jigix jāy ajcxy íjxcixipy jadüg'oc ñich nmic'ajt ñich n'oy'ajt (jadu'n Dios y'adzooy y'ung Jesús).

²⁹ Je mayjäy huidibi anajty ajcxy jim, je tiibi anajty ajcxy midoogixy je ayuc huidibi tzoon tzajpjoty, yminañ ajcxy:

—Enee yi' ti yjidity.

Jacjadyii ajcxy yminañ:

—Tüg ángel ti ymígapxyii.

³⁰ Chi Jesús nimay je mayjäy ajcxy:

—Ca' nminaanim miid ñich ycixpi jadu'n ti yajmidoy jadyaabi ayuc huidibi ti choon tzajpjoty. ³¹ Jadachambi jada' Dios yajpocycähuañ naaxhuiñjyāy, e nañ ypígaanipy je mujcu' ymic'ajt huidibi ane'mb naaxhuiñjyāy ajcxy. ³² Co ñich anajty jāy ti xyajcruudzpetyich, e co ñich anajty ti njugypicyich jadügtecy, e co ñich anajty ti nhuimbityich tzajpjoty, huin'it tüg'óciy jāy ajcxy huidibi xymibijcpich, nyajpa'ttigihuibich jiiy tzajpjoty ma nyajpaadyich.

³³ Paady jadu'n Jesús yminañ, jēbi huaad tüg'óciy jāy ajcxy huinjihuñyib ti o'cin anajty ypadamy. ³⁴ Chi je mayjäy ajcxy yminañ:

—Ma Dios ñecy jiiy jadu'n ymiñ jaybety co je Cristo huinixi je' y'idañ. E ¿nej miich co cham jadu'n minañ co copicy co yi jāy huidibi tzoon tzajpjoty, huimbiam jadügtecy tzajpjoty? ¿Pin jēdu'n mdijyp huidibi tzomb tzajpjoty?

³⁵ Chi Jesús nimay je jāy ajcxy:

—Jahueeni xi tiempo njac'idañich miid miich ajcxy. Jadu'n ñich ndiy'ajt nej tüg jin huidibi codicxp jāy co ytüöy. Cuychināy ñich ndiy'ajt, co tzoj nhuimbidañich tzajpjoty, e miich ajcxy mhui'mañ jadu'n nej jāy huidibi ca' jin miidity. Je jāy ajcxy huidibi ca' cuychinaaygixy ñich ndiy'ajt, ca' ajcxy nejhuyigixy ma ñicxcixy. Jadu'n ajcxy nej jihuñy yöygixy coodz, e ca' íjxcixy ma ñicxcixy. ³⁶ Com occhaani ñich ma miich ajcxy, nyaj'ixpicyp ñich miich ajcxy Dios ytiy'ajt. Pen xymibijccixpich, m'íjtcixip íxcipy ma Dios ytiy'ajtin.

Co Jesús jadu'n je jāy ajcxy nimayday, huin'it Jesús je' ajcxy puhua'ctuutni, chi ñicxni, e ca' ma y'ocjac'ixin.

Je judío jāy ca' mibigañ Jesús

³⁷ Ooy anajty canaag mijhuinmañ Jesús ti jatuuñ ma jāy ajcxy yhuindu, e ca' anajty ajcxy ni ti tim mibijccixy. ³⁸ Huidibi Jesús ytun ycapx, jiiy anajty jadu'n ycojayity ma je Dios y'ayuc necy, je Isaías ñecy, co Isaías jadu'n yminañ:

Huindzin, ca' ni pin ajt n'ayuc ndiy'ajt ti xymibijcim. Ca' ni pin huidibi huinjihuñyib je Huindzin Dios ymic'ajt.

³⁹ Ca' anajty ajcxy huaad ymibijccixy, com nañ ti anajty jadu'n Isaías jay ma jadu'n yminañ:

⁴⁰ Jadu'n yi' ajcxy nej jihuñy Dios ti yajhuindziygixy, e ti yajjotjuniygixy, jigix ca' y'íjxcixipy miid yhuin, e miid yjot yhuinmañ ca' huinjihuñyigixyipy, ni ycajothuimbijtcixipy nej jēbi Cristo yajtzóociygixy.

⁴¹ Paady jadu'n Isaías yminañ je' co anajty ti íjxi Cristo y'oy'ajt, e chi cojay nej anajty ti icy.

⁴² Ca' nidüg'óciy judío ixpicytjic mijotmädy anajty Jesús. Jim anajty nijëjity huindzindijc huidibi mibijcp Jesús. Per müd je fariseojäy ycixpi co chachjotma'tcixy, paady anajty ajcxy ca' capxpädzimigixy co mijpidaaccixy Jesús. Je' co chigüygixy co jim yajpidzimüyb ajcxy tücci'yi ma Dios ytjic, etz ma yi judío ñaymujctac. ⁴³ Jacnägi anajty tzojccixy co huen jäy cömáayigixy, ca'ydi co ajcxy Dios ycömayiib.

Dios yajpocycähuiip je mayjäy müd Jesús y'ayuc

⁴⁴ Chi jada' Jesús yminañ mic:

—Je jäy ajcxy huidibi xymibijcpich xymijpidaacpich, caminaanim iich naydüg xymibijcpich xymijpidaacpich, nañ ymibijcyp ymijpidacyp ajcxy je tüibi iich ya naaxhuiñ xyquexyich. ⁴⁵ E je jäy huidibi xy'ijxpich, tim jadu'n nipaady nej jihuüy ti icy je huidibi ti xyquexyich. ⁴⁶ Iich ti nmimiiñich ya naaxhuiñ Dios ytiy'ajt, jadu'n iich nipaady nej jihuüy tüg jin huidibi codücx je jäy ajcxy. Je jäy ajcxy huidibi xymibijcpich ca' ajcxy yhuimüpy jibictuuby, jadu'n nej jihuüy ca' ajcxy chinaaygixy agootztuuby. ⁴⁷ Je jäy ajcxy huidibi midoob iich n'ayuc, e ca' cuydungixy, ca'p je' iich je' ypocy ajcxy n'ixyöyaani nbayöyaani cham. Ca'p iich ti nmiiñich ya naaxhuiñ müd co jäy ajcxy ndzaachtunipüyich müd ypocy ycixpi. Paady iich ti nmiiñich ya naaxhuiñ co nyajpocyñhuädzañich yi jäy ajcxy. ⁴⁸ Je jäy ajcxy huidibi xycapxhuimbjütibich n'ayuc, e ca' xycöbigañich, ymüd ajcxy huidibi yajpocycähuiib. Yi ayuc huidibi ti ngapxyich, yi' yajpocycähuiib ajcxy co anajty naaxhuiñybi ti yhuaad'ajtni co Dios anajty yajtigatzaani. ⁴⁹ Com iich ca' ngi'm'ayuc ngapxhuäcxxyich. Je' je' Dios Teedy y'ayuc, je huidibi ti xyquexyich, yi' ngapxhuäcxibich y'ayuc. Je huidibi ti xyquexyich ya naaxhuiñ ti xyñajtzcapxiyich yi' y'ayuc, jada ayuc ngapxhuäcxypich nyajnimaaaygixyp. ⁵⁰ E nejhuüybich co Dios y'ayuc ytiy'ajt ymimimybi' tzinaayin jugy'ajtin huidibi ca' tücci'yi ycixy ytigoy. Paady ycix je ayuc huidibi ajcxy nyajmüdmüydacyp, jadu'n nyajmüdmüydaaccixy nej Dios Teedy ti xyajnajtz'ane'müyich.

13

Jesús ypuji ydiscípulos ajcxy ytecy

¹ Ca'ni anajty xii paady, pascuaxii anajty ajcxy tijy. Chi Jesús ñejhuüyb co anajty yxi ytiempo yhuaad'ajtni mina chonaani ya naaxhuiñ yhuimbidaani ma Dios Teedy. E Jesús ooy anajty tzocy jihuüy ymigügtjic ajcxy huidibi ya naaxhuiñ anajty ajcxy hui'mañ. Jadu'n tzocy jihuüy huinixii.

² Chi jada' Jesús etz ymigügtjic ytigüy ajcxy adzua'ajtp (je pascuaxii adzua'ajtin). Ti anajty je mujcu' huinmañmöy Judas Iscariote, Simón ymang, co anajty Jesús cüyegañ ma ymidzip ajcxy. ³ Ñejhuüyb anajty Jesús co je Dios Teedy ti yajcüdigiüi tüg'óciy ymic'ajt, e Jesús nañ ñejhuüyb anajty co je' ti choon ma Dios y'it, e nañ jüby anajty jadüg'oc yhuimbidañ. ⁴ Chi ypidigy ma mesi, chi je yoñybi yhuit ñayajniñenduutti. Chi hujtzigy tüg huit huidibi müd ñaymextiützi nayböttiützi, ñayajmijxojtzpejti yhuindüy. ⁵ Co jadu'n ñayñi'ixüyi, chi pidacy nii ma tüg cibujüñyoc. Chi nihuägüyi ydiscípulos ajcxy ytecy. Chi yajtzondacy tecypüjii tüg tüg, e mextiich pöttich müd je huit huidibi anajty ti ñayajhuindiyüi.

⁶ Co nihuägüyi Simón Pedro ytecy, chi Pedro yminañ:

—Huindzin, ca' huaad miich ndecy xypujich.

⁷ Chi Jesús y'adzooy:

—Huidibi ïch ndumyb ca' yi' miich ajcxy mhuinjihuïygixy jadachambi, jaccomjegy miich ajcxy mhuinjihuïhuipy.

⁸ Chi Pedro y'adzooy:

—Miich ca' huaad ïch ndecy xypujich ni caminaabi.

Chi Jesús y'adzohuimbijty:

—Pen ca' mdecy nbuji, ca' ïch miich jëbi njäy'adyii.

⁹ E huin'it Pedro nimay Jesús:

—Huindzin, ca' ïch jëda'ajty ndecy xypújibich, hue' janchtiy tüg'óciy ngijich etz ngohuajcich.

¹⁰ Chi Jesús nimay Pedro:

—Com tïbi mjet mhuinma'ñ yajhuäch, ca' yi' ocjactzocjni yajhuädzi py mjet mhuinma'ñ jadügtecy. Tïm jadu'n nej jihuïy naamni chi y, e cham ca' tzojcnï yajtzihuïbyich jadügtecy. Jëda'ajty mdecy nbujich cham. Miich ajcxy huädz mjet mhuinma'ñ ajcxy mmïidiñ, oy ca' miich ajcxy nidüg'óciy.

¹¹ Com Jesús ñejhuïyb anajty pinjäy cïyegaanip ma ymidzip, e paady jadu'n ymïnañ:

—Ca' ni tüg'óciy miich ajcxy mjet mhuinma'ñ yhuädzi ty.

¹² Chi jada' co yajtecyputay, chi jada' yoñyhuit yajtigïy jadüg'oc. Y'ixtacy ma mesi, e chi jada' nimay ajcxy:

—¿Nej mhuinjihuïyb ajcxy ti ïch ti nduñich müd miich ajcxy? ¹³ Miich ajcxy jadu'n minamb co ïch miich ajcxy myaj'ixpijcy, etz ïch miich xyhuindzin'ajtpich. E tiydudägy miich ajcxy minañ com ïch jëdu'n miich ajcxy mHuindzin. ¹⁴ Pen ïch miich ajcxy nyaj'ixpijcy etz xyhuindzin'ajtpich, e ti ïch miich ajcxy nyajtecyputay, nañ jadu'n miich ajcxy myajtecyputay miñ xyipy. ¹⁵ Hich miich ajcxy ti nmöy tüg'ixpejt, jigix ajcxy jadu'n mdunipy jadu'n nej ti nduñich, e huin'it ca' amij agix nayjihuihuïyb ajcxy. ¹⁶ Janch janch ïch miich ajcxy yam jadu'n nmïmäy co je huindzin jac mij je' ca'ydï yi' ytumbi. E nañ je' huidibi yajquejxyöyb jac mij je' ca'ydï huidibi quejxyöyb. ¹⁷ Co ajcxy tïy'ajt mnejhuïhuipy, chi jotcuyc ajcxy m'idi py, pen mbadumyb ajcxy jadu'n nej nduñich.

¹⁸ Ca' nmïnañich co nidüg'óciy miich ajcxy mbocymïdity. Ti ïch yi' nnejhuïy pin ti nhuin'ixyich. Ti nhuin'ixyich tüg'uidibi pocymïd, jigix cuyduunip nej anajty yjaybetyty ma Dios ñecy ma je Cristo jadu'n ymïnañ: “Yi' huidibi caymujcp müd ïch, ti ïch yi' xymïbidïgy.” ¹⁹ Ti ïch yam miich ajcxy jayijp nyajnimaaagyixy, jigix co anajty jadu'n ytunyii yjadyii, mmïbigipy ajcxy co ïch jëdu'n je Cristo. ²⁰ Janch janch yam ajcxy jadu'n nmïmaagyixy co je jäy ajcxy huidibi cöbijcp je huidibi anajty nguejxypich, tim jadu'n nipaady jadu'n nej ïch anajty xycöbijcyich. E je jäy ajcxy huidibi xycöbijcpich, je' ajcxy anajty ycöbijcyp je' huidibi xyquejxich ya naaxhuïñ.

Jesús ñimay ymïgügtijc co je Judas anajty cïyegaanip ma ymidzip

²¹ Co jadu'n Jesús ymïnañ, chi tajnip mayñip anajty ooy jotjoty huinma'ñyoty, chi capxypidzïmy:

—Janch janch ïch miich ajcxy yam jadu'n nmïmäy co nidügti miich ajcxy xycïyegañich ma nmïdzipich.

²² Chi Jesús ydiscipulos ajcxy ñayhuindixpejttaayi nidüg'nidüg. Ca' anajty ajcxy nejhuïy pin anajty jëdu'n Jesús ytijyp. ²³ Nidügti je' ajcxy huidibi anajty Jesús ooy müd ñaychogyii ññäy anajty ma mesi tim huington

ma Jesús yhuinduu. ²⁴ Chi Simón Pedro yci' yaj'ijxy yajhuinjihuuy co huen yaj'amidooy Jesús pin anajty jadu'n ytiyyp. ²⁵ Chi je discipulos ajcxy huidibi anajty ñaayb ma Jesús yhuinduu ñimay yhuindzin:

—¿Pin jadu'n mdijyp?

²⁶ Chi Jesús y'adzooy:

—Yi' je' pin anajty ñich nmooybich yi tzajcaagy huidibi anajty nyajx-oocpyich ma je ügy.

Chi yajxoogy tüg pedasi tzajcaagy, chi moy je Judas, je Simón Iscariote ymang. ²⁷ Tim huin'ítíy co Judas je tzajcaagy cöbijcy, chi je mujcu' ytiñy ma je' y'ay yjot. Chi Jesús ñimay Judas:

—Yi huidibi mdunamyb, tungo jadu'n mic'amy.

²⁸ Huidijaty anajty ajcxy jim caayb, ni pin cahuinjihuuy je ayuc huidibi Jesús yajñimay Judas, nej je ayuc yhuimbizimy. ²⁹ Com je Judas anajty müd je meeñybijty, paady ajcxy nijéjity huinjihuuy co anajty tity ñimäyii:

—Ñicx juy yi huidibi ajt nyajmayjajtim yi xiigixpi.

Jacjadyii ajcxy anajty tity ñimäyii:

—Mo' tigatii ayoobitijc. ³⁰ Tim huin'ítíy co je tzajcaagy cayday, chi ypidzimy Judas tiba'y, e ti anajty ycoodzñyñi.

Jesús ñajtz'ane'miy jemybi cötujcin

³¹ Co Judas ypidzimy, chi Jesús ymíñañ:

—Cham je jäy ajcxy ixa'ñ ñich nmic'ajt ñich n'oy'ajt, ñich je jäy huidibi tsoon tzajpjoty. Etz nañ ma ñich je jäy ajcxy ixa'ñ Dios ymic'ajt Dios y'oy'ajt. ³² Jadu'n nej je jäy ajcxy ti ijxcixy Dios ymic'ajt ma ñich, nañ tim jadu'n Dios yajñiguëxigipy yi nmic'ajtich n'oy'ajtich tim mic'amy. ³³ Migügtijc huidibi ooy ndzocy njihuuyich, ca' n'ochuäcxibaanich jecy müd miich ajcxy. Xy'ixtähuibich miich ajcxy. Jadu'n nej ti ñimäyigixyich yi jacjadyii judíojäy ajcxy, nañ jadu'n ñich miich ajcxy yam njacñimaaygixy co ma ñnicxa'ñich, ca' huaad miich ajcxy jiby mñicxixy. ³⁴ Cham ajcxy nmöhua'ñ tüg ané'min huinjemybi. Cham miich ajcxy nyajñajtz'ane'mihuaangixy jadüg'oc jadayaabi tiy'ajt: Naychójcigix nayjihuíyigix ajcxy nidüg nidüg, tim jadu'n nej ñich miich ajcxy ti ndzocy ti njihuuy. Naychójcigix nayjihuíyigix aguipxyi. ³⁵ Müd jada ycixpi ñejhuíhuipy tüg'óciy jäy co ñich miich ajcxy ti nyaj'ixpijccixy co ajcxy nidüg nidüg mnaychogñyib mnayjihuíhuuyb.

Jesús ñimay ymigügtijc co je Pedro anajty coyüdzaanip

³⁶ Chi Pedro ñimay:

—Huindzin, ¿ma miich mñicxa'ñ?

Huin'it Jesús y'adzooy:

—Ma ñich mñicxa'ñich miich ca' huaad xypanicxyich. Jac'axam xypanicxyibych.

³⁷ Chi Pedro ymíñañ:

—E ¿nej co ca' huaad jëbi ñich miich nbanicxy? com ñich ngiyegamyich njugy'ajtín ma yi o'cin müd miich ycixpi.

³⁸ Chi jada' Jesús y'adzooy:

—¿Nej janch co mgíyega'ñ yi mjugy'ajtín ma yi o'cin müd ñich ycixpi? Janch janch ñich miich ajcxy yam jadu'n ñimäy, co ni ca'ni anajty jabom tugüg'oc tzey yaaxigy, co ñich miich anajty tugüg'oc ti xycoyüchich.

14

Pinjaty mibijcp Jesús nicxip ma Dios Teedy yajpaady

¹ Chi Jesús yjacminañ:

—Ca' ajcxy jotmay mjihuïy ma m'aa mjot müd jada ayuc. Mibic ajcxy Dios etz ñich nañ jadu'n mibijccich. ² Jiiby ma ñich nDeedy chinäy, jiiby mäjtiğiydac. Co ixypy ca' yjadu'nity, ca' ixypy ti nnimaaygixy co nnicxyich ma nDeedyich n'ocni'ixiy tzinaaydac müd miich ajcxy ycixpi. ³ E co ñich anajty ti nba'ttiğiyich, e ti ni'ixiyich tzinaaydac jayijp müd miich ajcxy ycixpi, huin'it ajcxy nihuimbidiy, jëbi ñich ajt naydügmujcim, jigix ma anajty n'ityich, nañ jiiby miich ajcxy m'idipy. ⁴ Miich ajcxy mnejhuïyb nej jëbi ajcxy mjädip ma nnicxyich oyduuby.

⁵ Chi Tomás yminañ:

—Huindzin, ca' ñich ajcxy nejhuïygyxy ma miich mnicxa'ñ, e ca' ñich ajcxy nnejhuïygyxy nej jëbi njá'tcixibyich jiiby.

⁶ Chi Jesús y'adzooy:

—Jadu'n nej ti ndzinäyich jada je' je ijxpejt nej Dios tzocy co miich ajcxy mdzinähuipy. Nyejcpyich je tiy'ajt huidibi jëbi huaad mguychinaaygyxy. Co jadu'n mguydundäygyxipy ñich ndiy'ajt, chi mjá'tcixipy ma Dios. Nyejcpyich je jugy'ajtin huidibi ca' tücci'yi ycixy ytigoy. Ca' ni pinjäy yjadipy ma Dios Teedy, peni ca' cuydundäy ñich ndiy'ajt. ⁷ Jadachambi etz nej xii tiempo yjacnicxa'ñ miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸ Chi Felipe y'adzoy:

—Huindzin, ñich ajcxy yi Dios Teedy yaj'ijxcich cham cham, e müd tim yi'yi jotcujc'adipyich ajcxy.

⁹ Paady Jesús nimay je Felipe:

—Cham xii jimijt ñicxni maabi ñich nja'ityich müd miich ajcxy, e ¿ca'ni miich xytimy'ijxhui'myich Felipe? Yi jäy ajcxy tiibi xy'ijxcixyich, nañ y'ijxyp ajcxy yi' Dios Teedy. E chi jada', ¿nej miich co jadu'n xyñimäyich: “Yaj'ijxcich je Dios Teedy?” ¹⁰ ¿Nej ca' mmibicy co ñich n'ity ma Dios Teedy, e Dios Teedy ijtp ma ñich? Yi ayuc huidibi ngapxhuäcxypich, ca' yi' ngi'm'ayuc'adyiijich ngi'mdiy'ajt'adyiijich. Yi mijhuinma'ñ huidibi ajcxy m'ijxyp ndumybich, yi Dios Teedy huidibi ijt ma ñich, yi' jadu'n tumb. ¹¹ Mibijccich ajcxy co ñich n'ityich ma Dios Teedy, e Dios Teedy ijtp ma ñich. Peni ca' mdimmibigaangixy, mibic ajcxy müd je mijhuinma'ñ ycixpi huidibi ti nduñich. ¹² Janch janch ñich miich ajcxy jadu'n nimaaygyxy co je jäy ajcxy huidibi xymibijcpich, nañ ytunipy ajcxy nañ jadu'n yi mijhuinma'ñ huidibi ti nduñich. Jac tim nigi tunipy mijhuinma'ñ, com ñich nnicxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy müd ñich nxii, ndunipyich yi'. Dios Teedy huidibi nDeedy'ajtypich, je cömay y'idip müd huidibi miich anajty ajcxy mdumyb müd ñich nmic'ajt. ¹⁴ Co myajmibijctzohuipy tijaty, xycapxpáatibich nxii, huin'it nguydunipyich huidibi anajty ti mbijctzoogyxy.

Jesús yquexamy Dios yjihui'ñ ymic'ajt

¹⁵ Peni xychojcpich miich ajcxy, cuydünigich ajcxy tüg'óciy n'ayuc ndiy'ajt, jadu'n nej anajty ti nnajtz'ane'mäyich. ¹⁶ E co ndzóonibyich, chi nbijctzóohuibyich yi Dios Teedy jadüg yjaymüd huidibi ajcxy xyjaymüd'adiib. Dios ajcxy xymöhuipy jadüg jaymüd huidibi ajcxy xycapxhuijip, je huidibi ajcxy mjot'amij'adiiyb, e je' xymüd'idipy ajcxy huiniixii.

17 Je huídibi xycapxhuijip, je' jada'ajty Dios yjihui'ñ ymic'ajt, je Espíritu Santo. Je' Dios ytiy'ajt ymüd. Dios yjihui'ñ ymic'ajt ca' adigihua'ñ yí naaxhuiñjáy huídibi ca' xymibicyich. Com ca' ajcxy icy, e nañ ca' ajcxy icy'adyii je Espíritu Santo. Miich ajcxy m'ixy'ajty je Espíritu Santo, com je' tzinaayb ma miich ajcxy, e nañ xy'adigihuiy xyjottigihuiy ajcxy. 18 Ca' miich ajcxy nyajhui'maangixy naydüg jadu'n nej co'ögy'ung. Nnihuimbidityich miich ajcxy jadügtecy. 19 Tim huingónip yí xii tiempo mina yí jacjadyii naaxhuiñjáy ajcxy ca' xy'ocjac'íjxnibich. Com jadu'n nej ich njactzinähua'ñ, ca' ich njugy'ajtin ycixipy ytigoyipy tücc'i'yí. Nañ jadu'n miich ajcxy mjactzinähua'ñ, ca' mjugy'ajtin ajcxy ycixipy ytigoyipy tücc'i'yí. 20 Co anajty Dios yjihui'ñ ymic'ajt ajcxy xy'adigiy xyjottigiy, huiñ'it ajcxy mnejhuihuipy co nyajpaadyich ma nDeedyich, yí Dios Teedy, e miich ajcxy myajpaady ma ich, e ich nañ jadu'n yajpatpich ma miich ajcxy. 21 Je jáy ajcxy huídibi ich n'ayuc ndiy'ajtich xycöbicip, e cuydungixy, je' je' jadu'n xychojcpich, e tzogüb je' ich nDeedy. E ich nañ jadu'n ndzogipy njihuihuibyich je' ajcxy, e nnayajniguëxigübyich ma je' ajcxy.

22 Je jadügpí Judas, ca' nmīnaanīm Judas Iscariote, nīmay Jesús:

—Huindzin, ¿nej co nnayajniguëxiga'ñyii ma ich ajcxy, e ca' nnayaj-niguëxiga'ñyii ma je jáy ajcxy huídibi ca' xymijpidägy?

23 Chi Jesús je' y'adzooy:

—Yí jáy ajcxy huídibi xychojcpich xyajmij'ajtpich, xycuydüunibich yí ajcxy ich n'ayuc ndiy'ajt. E huiñ'it yí ajcxy chogüyb ich nDeedy. Je nDeedyich etz ich miinip ich ajcxy ma je jáy ajcxy huídibi xycuyduunip ich ndiy'ajt, e tzinaydacpigipyich ma yí ajcxy yjot yhuinma'ñ. 24 Je jáy ajcxy pinjaty ca' xychoyich, nañ ca' ajcxy ich n'ayuc xycuyduunich. Paady ca' nnayajniguëxiga'ñyijich ma je' ajcxy. Com yí ayuc huídibich miich ajcxy nyaj'amido'ijtyp, ca' yí ich ngi'm'ayuc'adyii. Yí je' Dios Teedy y'ayuc ytiy'ajt, com yí ich ya naaxhuiñ xyquejxich.

25 Jadayaabi ayuc ajcxy cham jadu'n njacyajnimaayb, jadu'n nej njacyaányich ya naaxhuiñ müd miich ajcxy, ma ca'ni ndzooñich. 26 Per je Espíritu Santo huídí miinam, je' ajcxy xycapxhuijip. Dios Teedy yquexamy je Espíritu Santo müd ich nxi. Je Espíritu Santo xyajnejhuiydähuiy miich ajcxy tüg'óciy tiy'ajt, e nañ xyaj'ajihuihuüb tüg'óciy jadu'n nej ich miich ajcxy nnimaaygixy.

27 Ich miich ajcxy nyajmihui'my jotcuyc'ajtin. Jadu'n nej ich njotcuyc'atyich, nañ nyajjotcuyc'adipyich miich ajcxy. Yí jotcuyc'ajtin huídibi nyajmihui'maamyich miich ajcxy, ca' yí yjadu'nity nej je jotcuyc'ajtin huídibi yajpaatp ya naaxhuiñ. Ca' mdajcixy maygixy, nañ ca' mdzigüygixy. 28 Ti ich miich ajcxy nnimaaygixy jayjip'aty co ndzona'ñich ma miich ajcxy, e nhuimbida'ñich jadü'oc ma miich ajcxy. Peni xychojcpich miich ajcxy, mxondägipy ajcxy co nnicxa'ñich ma Dios Teedy, com yí Dios Teedy jac mij yí ca'ydi ich. 29 Ti ich jada tiy'ajt jayjip nimidyägyich ma ca'ni ndzooñich, jigix co anajty je tiempo paady mina jadayaabi ytunüyb yjadüyb, huiñ'it ajcxy nmibigipy ich n'ayuc.

30 E ca' ich miich ajcxy mijcajee ooy njacmüdmidyägaangixy yam. Com tim huingónip mina je mujcu' huídibi ane'mb ya naaxhuiñ xyñimina'ñich. Ca' ich yí huaad jébi xymimadägyich. 31 Per copicy yí nguydunipyich

Dios Teedy y'ayuc nej xyajnajtz'ane'miyyich, jigix je naaxhuiñjáy ne-jhuñhuipy co nyajmij'atyich yi Dios Teedy. Pidiccix, tzoc'ajt huingduum jamim.

15

Je camuuxy'aadz etz y'aacx

¹ Chi Jesús jacnimay ydiscipulos ajcxy:

—Jadu'n ñch nipaady nej camuux'aadz ma tüg muuxy'aadz cam. ñch nDeedy, yi Dios Teedy, jadu'n yi' nipaady nej je muuxy'aadz cam cuend'ajtpi. ² Tüg'óciy jáy jadu'n ajcxy nipaady nej muuxy'aadz y'aacx. Je jáy ajcxy huidibi ca' cuychinây ñch ndiy'ajt, yi Dios Teedy yajcödigoyiib, jadu'n nej je muuxy'aadz cam cuend'ajtpi quejtzpuxy je muuxy'aadz y'aacx huidibi ca' ytñm'aty. Je jáy ajcxy huidibi cuydundaayb ñch ndiy'ajt, Dios yaj'oyñb je' ajcxy yjot yhuinma'ñ, jëbi oybi tuñ, jadu'n nej je muuxy'aadz cam cuend'ajtpi huijtz'oyiy je muuxy'aadz y'aacx, jigix jëbi nigi ytñm'aty. ³ Yi ayuc huidibi ti nyajnimaaigyxy, yi' ti yajhuäch yi jibicpi ma miich ajcxy mjot mhuinma'ñ. ⁴ Mibijccich ajcxy, panícxigich ajcxy ndiy'ajt huinixñ. Co ajcxy jadu'n mdunipy, ñch miich ajcxy mñd'idipy huinixñ. Jadu'n nej ixypy camuuxy'aadz y'aacx co ca' ytñm'aty co ahu-inggujc y'ity, e ca' mic'ajt paady ma ycop. Nañ tim jadu'n miich ajcxy pen ca' mmic'ajt mbaadipy ma ñch, ca' mmimadáaccixipy mgyuchináagyixipy ñch ndiy'ajt.

⁵ Jadu'n ñch nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jáy ajcxy huidibi yajpatp ma ñch, e ñch nyajpaady ma je' ajcxy, je' ajcxy oyhuinma'ñ tunam mij cajee, tim jadu'n nej camuuxy'aadz huidibi tñm'ajtp may'amy. Co ixypy ñch ca' nyajpaady ma miich ajcxy, ca' miich ajcxy huaad ti mdungixy. ⁶ Co jáy ajcxy ndiy'ajt xy'ixmájtzibich, Dios ajcxy yajcödigoyiib, tim jadu'n nej jáy yajcödigoy mñd jñn yi muuxy'aadz y'aacx huidibi ymibuxñyb co ca' ytñm'ajtni. Co je y'aacx ytñdzity, chi ajcxy yajmucy, e pidaaccixy jñnjoty, e jadu'n jiiby ññdoyiy jñnjoty.

⁷ Co miich ajcxy m'ijtcixy ma ñch, e co ñch n'ayuc nañ jadu'n ijtp ma miich ajcxy mjot mhuinma'ñ, jëbi mbijctzoogixy ti ajcxy mdzojcp ma Dios, e nguydunipyich mñd miich ajcxy ycixpi. ⁸ Chi je jáy ajcxy cōmayipy Dios co miich ajcxy mgyudunipy ñch ndiy'ajt tiydudägy, tim jadu'n nej camuuxy'aadz y'aacx ytñm'aty may'amy. Co je jáy ajcxy ixipy nej tudägy mgyudungixy ñch ndiy'ajt, chi je jáy ajcxy tiydudägy nejhuihuipy co ti nyaj'ixpicyich miich ajcxy. ⁹ Jadu'n nej Dios Teedy xychocyich xyjihuiyich, nañ tim jadu'n ñch miich ajcxy ti ndzocy ti njihuiyich. Ndzogipy njihuihuibyich miich ajcxy huinixñ co ca' ajcxy xy'ixmájtzibyich ndiy'ajtich. ¹⁰ Co mgyudundähuipy ajcxy jadu'n nej nyajnajtz'ane'miyyigyxy, ndzogipyich njihuihuibyich miich ajcxy huinixñ. Tim jadu'n nej nguyduñich yi huidibi Dios Teedy xyajnajtz'ane'miyyibich, e yi' xychojcpiich xyjihuiyibich huinixñ.

¹¹ Cham jadayaabi ayuc nyajnajtz'ane'miyyigyxy, jigix jotcuje m'ijtcixipy. Jadu'n nej jotcuje ti n'ityich, e nañ jadu'n miich ajcxy mjotcuje'adipy anaxy. ¹² Jadaabi ayuc ñch miich ajcxy nyajnajtz'ane'miyyibich co naychójcigix nayjihuiyigix nidüg nidüg, tim jadu'n nej ñch miich ajcxy ndzocy njihuiy. ¹³ Je tiy'ajt jac'oybi co migügtijc ajcxy naychogñyb

nayjihuihuıyb, co tög jäy cıyegıpy yjugy'ajtin müd ymıgügtıjc ycıxpi. ¹⁴ Hıch müich ajcxy mıgüg'ajtyp, pen mguydumyb nej ajcxy nyajna-jtz'ane'mııygıxy. ¹⁵ Jadu'n nej xıı tiempo yjacnıcxan, ca' müich ajcxy n'ocnaydınıp ııch ndumbı. Com je tumbı ca' huınjihuiıy huıdibı yhuındın ytumyb. Hue' müich ajcxy nyajnaxyıch nmıgügtıjcıch, com tög'ócıy tıy'ajt tüıbı nmıdooyıch ma ııch nDeedy, yı Dios Teedy, tı ııch müich ajcxy nnımaaygıxy. ¹⁶ Ca' nmınaanım ııch müich ajcxy tı xyhuın'ıxy. Hıch müich janchtıy ajcxy tı nhuın'ıxy. E tı ııch müich ajcxy nyajnıbcıy co nıcxıy mgapxhuäcxıcy ııch n'ayuc. E nañ mayjäy mıjpidägıpy je ayuc huıdibı müich ajcxy mgapxhuäcxıpy. E nañ ııch n'ayuc, huıdibı müich ajcxy mgapxhuäcxıpy, y'ıdıpy ma je jäy ajcxy yjot yhuınma'n huınıxıı. Paady ycıx tög'ócıy tıjaty müich ajcxy mbıjctzooyb ma Dios Teedy müid ııch nıxıı, yı' ajcxy xymöhıpy. ¹⁷ Jada ayuc ajcxy yam nyajnajtz'ane'mııyb co ajcxy mnaychogıyb mnayjihuihuıyb mıñ xyıpy.

Je maybı naaxhuiñyjäy ca' ajcxy ıxaangıxy Jesús etz cham je' yjäy

¹⁸ Co je may naaxhuiñyjäy ca' xy'ıxaangıxy müich ajcxy, ca' ajcxy ooy mhuınmayıpy, com mnejhuıyb ajcxy co ııch nañ jadu'n jac jayıp ca' yı' ajcxy tı xy'ıxaangıxyıch. ¹⁹ Co ıxyıpy ytügıy müich ajcxy m'ayuc mdıy'ajt müid je jacjadyıı naaxhuiñyjäy y'ayuc ytıy'ajt, huın'ıt ıxyıpy ajcxy xychojccıxy xyjihuiıygıxy, com tú'cıy müich ajcxy mhuınma'n ıxyıpy müid yı' ajcxy yhuınma'n. Janch com co ca' ytügıy müich ajcxy m'ayuc mdıy'ajt müid je jacjadyıı naaxhuiñyjäy y'ayuc ytıy'ajt, paady je jacjadyıı naaxhuiñyjäy ca' ajcxy xy'ıxa'nıp. Com ııch müich ajcxy tı nyajjıphuijtzüdy, jadu'n nej yı' jacjadyıı naaxhuiñyjäy ajcxy chınaaygıxy yjugy'ajtcıxy. ²⁰ M'ajıhuıhuııb ajcxy jadu'n nej tı nnımaaygıxy co ııch müich ajcxy xyhuındın'ajtpıch, paady jac mıj ııch ca'ydı müich ajcxy. Jadu'n nej naaxhuiñyjäy ajcxy tı xy'ıxhuıdıtyıch tı xypahuıdıtyıch, nañ jadu'n müich ajcxy yı' xy'ıxhuıdıda'n xypahuıdıda'n. Nañ may je jäy huıdibı ca' tı xycapxymıdooyıch, nañ jadu'n may je jäy huıdibı müich ajcxy ca' xycapxymıdohuaangıxy. ²¹ Nıjot ajcxy y'ıdıtzaangıxy müid müich ajcxy ycıxpi, com ca' ajcxy ıxy'adyıı Dios Teedy huıdibı xyquejxyıch ya naaxhuiñ.

²² Co ıxyıpy ca' tı nmııñıch ya naaxhuiñ nyajnımäyıch je jäy ajcxy Dios ytıy'ajt, ca' ıxyıpy ajcxy pocy müidity. Per com tı nmııñıch ya naaxhuiñ, paady cham ypocy ajcxy müidity co ca' ajcxy xy'ıxa'nıch. ²³ Je jäy ajcxy huıdibı ca' xy'ıxa'nıch, jadu'n nıpaady nej ııch nDeedy ca' ajcxy ıxaangıxy. ²⁴ Co ıxyıpy ııch ca' tı nduñıch ma yı' ajcxy yhuınduu mıjhuınma'n, huıdibı ca' nı pın jäy tuñı, ca' ıxyıpy ajcxy pocy müidity. E janch tı ajcxy ooy ja'ıjxcıxy je mıjhuınma'n, e ca' ııch yı' ajcxy xy'ıxa'n, e nañ ca' ıxaangıxy ııch nDeedy. ²⁵ Paady jada jadu'n ytuñyıı yjadyıı, jıgıx yajcuydunıpy jadu'n nej ycojaayıty ma yı' judıojäy ajcxy ley ñey, ma jadu'n ymına'n: "Nı tı tıy'ajt ycaca'ty, co ııch yı' ajcxy ca' xy'ıxa'nıch."

²⁶ E co anajty xyñıgıdaaccıxy yı' Espıritu Santo, yı huıdibı xycapxhuiıp ajcxy, je huıdibı müich ajcxy nyajnıguexam, chon ma Dios Teedy, je huıdibı Dios ytıy'ajt müid. Yı' xyñıdıy'ajt'adaambıch co Dios ytıy'ajt nmııdıdyıch. ²⁷ E müich ajcxy nañ jadu'n xyñıdıy'ajt'adıpıch co Dios ytıy'ajt nmııdıdyıch. Com ııch müich ajcxy jayıp nyaj'ıxpıjctzondac Dios y'ayuc ytıy'ajt.

16

1 Ti ajcxy yam tiy'ajt njacyajnimaaaygixy, jigix ca' ajcxy m'ixtigihuaägipy. 2 Com judiojäy ajcxy xy'ixhuidzipy ajcxy ma ajcxy yi' ñaymujctac. Ypadaamy yi xii tiempo co miich ajcxy jäy xyaj'ögipy, hue' ajcxy tijipy co Dios anajty ooy jadu'n jäygidägy tiibi anajty ajcxy tuñ. 3 Paady ajcxy jadu'n xytunipy jibic, je' co ajcxy ca' ix'y'adyii yi Dios Teedy, etz nañ jadu'n ca' xy'ixy'adyiijich. 4 Paady iich miich ajcxy jadachambi jadu'n nnimaaygixy, jigix co anajty je xii tiempo paady, chi m'ajihuñhuñyb ajcxy co ti anajty jayijp nnimaaygixy co ayo'n tzaachyp: mñinaxa'ñ myajnaxa'ñ ajcxy.

Dios yjihui'ñ ymic'ajt tunam ma jäy yjot yhuinma'ñ

Ca' anajty ajcxy jada ti nyajnimäy müd jëgix nmüd'ity ajcxy. 5 E cham janchtiy nnicxáanibich ma yi huidibi ti xyquexyich ya naaxhuiñ. E ni tüg miich ajcxy xyca'amidooyich: “¿Ma mñicxa'ñ?” 6 Paady miich ajcxy mdajy mmay ma m'aa mjot, co ajcxy cham jadu'n jada ayuc ti nya-jhuinjihuñyigixy. 7 Oy ixypy miich ajcxy cham mjatajy mjamay, tiy'ajt nej nmñina'ñich co jac'oy müd miich ajcxy ycixpi co nhuimbidityich ma Dios Teedy. Co ixypy ca' jiiby nnicxa'ñich tzajpjoty, ca' ixypy xyñiminaangixy Dios yjihui'ñ ymic'ajt, je Espíritu Santo, je huidibi ajcxy xycapxhuijip. Per co iich anajty tzajpjoty ti nhuimbity, huin'it iich yi' miich ajcxy nyajniguexipy. 8 E co anajty je Espíritu Santo miñ ya naaxhuiñ, huin'it yi' yajjihui'ñybigipy jäy ajcxy ypocy. E nañ yajni'ixihuipy je jäy ajcxy co Dios tiydunib müd ypocy ycixpi. 9 Yi Espíritu Santo yajjihui'ñybigipy jäy ajcxy ypocy, co iich ca' ajcxy ti xymibicy ca' ajcxy ti xymiipidägyich. 10 Je Espíritu Santo yajnejhuñhuipy jäy ajcxy nej huaad cuychinaaygixy Dios y'ayuc ytiy'ajt. Com co iich nba'ttigihua'ñich ma Dios Teedy, e miich ajcxy ca' xy'ocjac'ijxñibich. 11 Je Espíritu Santo yajhuinjihuñhuip je jäy ajcxy co Dios tiydunib ajcxy müd ypocy ycixpi huidibi ajcxy ca' tiydudägy chinaaygixy. Com yi Dios ti yi' mujcu' tiyduñ müd ypocy ycixpi.

12 Ooy may ayuc iich nmüdity huidibi njayajnimähuaamyich ajcxy per ca' miich ajcxy mhuinjihuñhuipy cham. 13 Jaciini mhuinjihuñhuipy ajcxy je ayuc huidibi njayajnimähuaamy ajcxy, co Dios quexipy je Espíritu Santo ya naaxhuiñ huidibi tiy'ajt müd. Yi' je' miich ajcxy xyajhuinjihuñhuipy tüg'ócy Dios ytiy'ajt. Com yi' ca' yci'mhuinma'ñ tunipy. Yi' janchtiy ñigapxtähuiipy tüg'ócy ayuc tiy'ajt huidijaty anajty ymidooyb ma Dios Teedy, e nañ yajniguexictähuiipy tüg'ócy tiy'ajt huidibi mimb cidaacp. 14 Je Espíritu Santo iich yi' capxpaady xyaj'idipyich, com yi' iich ndiy'ajt miich ajcxy xyajhuinjihuñhuaam. 15 Tüg'ócy huidibi Dios Teedy ymüd, nañ njé'ajtypich yi', paady jadu'n ti nmñina'ñich co je Espíritu Santo xyajhuinjihuñhuidyäyigixy ajcxy iich yi' n'ayuc yi' ndiy'ajtich.

Jesús ñimay ymigügtijc co ajcxy yjotmay ahuimbidity jotcujc'ajtñ

16 Tim huaad'ajtp xii tiempo, co iich miich ajcxy ca' xy'ocjac'ijxip. Chi co xii tiempo yjacnajtznñicxiñhuip, huin'it iich miich ajcxy xyjac'ixipy jadüg'oc.

17 E huin'it ajcxy nijëjity Jesús ydiscípulos ajcxy ñayñimaayi miñ xyipy ac jëyi:

—¿Ti jadu'n ytiyyp? Co jadu'n ymñina'ñ, co tim huaad'ajtnip xii tiempo mñina iich miich ajcxy ca' xy'ocjac'ijxñibiyich, e co yjacnajtznñicxiñhuip xii

tiempo, huin'it miich ajcxy xyjac'ixipyich jadüg'oc, com nnicxaamich ma Dios Teedy. ¹⁸ Chi ajcxy jadu'n ñayñimaayi miñ xyipy:

—¿Ti jadu'n ytijamy? Co jadu'n ymina'ñ co tim huaad'ajtnip xii tiempo. Ca' ñich ajt nhuinjihuuyim ti jadu'n ytijamy.

¹⁹ Com Jesús ñehuiyib anajty nej ajcxy yja'amidoohua'ñyii, chi nimay ajcxy:

—Yi' miich ajcxy ooy mjayajtihua'ñ. ¿Nej co jadu'n ti nmina'ñich? Tim huaad'ajtnip xii tiempo co ñich miich ajcxy ca' xy'ocjac'ixnipy. E chi yjacnajtzninixihuiip xii tiempo, e chi miich ajcxy xyjac'ixipyich jadüg'oc. ²⁰ Janch janch ñich miich yam nnimaaygixy co mjetmaybaadip ajcxy, e nañ myäxip ajcxy müd jotmay. Chi je naaxhuiñyäjy ajcxy huidibi ca' xymijpidägyich, xondägam ajcxy, e miich ajcxy nañ mjetmaybaadip. Per yi mjetmay ajcxy ahuimbidity tüg xondaacin. ²¹ Jadu'n ajcxy mjada'ñ jadu'n nej tüg töxyjäy tzaachypi jihuüy co y'ung yma'xung'ada'ñ. E co ti yma'xung'aty ypi'c'ung, chi jäydgoy yi tzaachypi müd xondaacin co tüg jäy ti ymiñ ya naaxhuiñ. ²² Tim jadu'n nej yjaty müd je töxyjäy, nañ jadu'n yjada'ñ müd miich ajcxy. Cham ajcxy jotmay mjihuüy ma m'aa mjet, e chi co xy'ixipyich jadüg'oc miich ajcxy, huin'it ajcxy m'aa mjet yxondäga'ñ. E ni pin huaad mxondaacin ajcxy xycapicityp.

²³ Je huin'it ximbi (co anajty je Espíritu Santo ti ymiñ ya naaxhuiñ) ca' ñich miich ajcxy ni ti xyjacyajmbijctzohuuyich, com janch ñich miich ajcxy yam jadu'n nimaaygixy co tüg'óciy huidijaty myajmayajtcixyp, chi ajcxy mbijctzohuuyi ma Dios Teedy müd ñich nxii, e xymöhuipy ajcxy yi'. ²⁴ Chambaadni ca'ni ni ti ajcxy mbijctzoy ma Dios müd ñich nxii. Pijctzoogix, e xymöhuipy ajcxy yi', jigix mjetcugihuiip ajcxy anaxy.

Jesucristo ymimadac je jibic-huinma'ñ ya naaxhuiñ

²⁵ Tüg'óciy jada ayuc tiy'ajt ac jihuimbit miich ajcxy ti nyajnimäy. Huingomb xii tiempo mina tiydudägy ajcxy nyajmüdmüydactähuipy yi Dios Teedy y'ayuc ytiy'ajt yajxon, e ca' y'ocjihuimbitiñ. ²⁶ Je huin'it xii co anajty ñich ti nhuimbityich ma Dios Teedy, jëbi miich ajcxy mbijctzoogixy ma Dios Teedy tijaty ajcxy myajmayajtyr. Co ti mbijctzoogixipy müd ñich nxii, xymóoygixipy yi Dios Teedy. Ca' ycopicity co ñich yi' nmibijctzohuuyi müd miich ajcxy ycipi. ²⁷ Com yi Dios Teedy nañ xychojcp xyjihuiyib yi' miich ajcxy. Com miich ajcxy jayjip ti xychocyich ti xyjihuiyich, e ti nmibicy ajcxy co ti ndzooñich ma Dios Teedy, paady Dios miich ajcxy xymöhuipy tijaty anajty myajmbijctzooyb. ²⁸ Jiiby ñich ndzooñ ma Dios Teedy yajpaady, co nmiñich ya naaxhuiñ, per jadachambi n'ixmájtznibyich jada naaxhuiñybi, e nhuimbijtnich ma Dios Teedy.

²⁹ Huin'it je' ydiscípulos ajcxy yminañ:

—Cham janchtiy tudägy müdägy, ca' m'ocyajtuuni jihuimbit ayuc. ³⁰ Cham ñich ajcxy nnejhuüy co miich mnejhuüyday tüg'óciy tiy'ajt. E ti xyajnimaydäyich co anajty ca' ti tiy'ajt ñich ajcxy nmibicy co miich mdzooñ ma Dios.

³¹ Chi Jesús y'adzooy:

—¿Nej nmibijcyp cham jada ayuc jadu'n nej ti nnimáaygixy? ³² Jihuññybijccix co huingonip je xii tiempo, e ti tim paady mina miich ajcxy mgueec-huäcxtáaygixipy nidüg nidüg ma pin timdzocy, e xyajhui'mgixich naydüg. Per ca'p ñich nnaydügity, com yi Dios Teedy

yi' ijtp m̄id ñch. ³³ Miich ajcxy yam jada ayuc nyajñimaayb, jigix ajcxy jotcuje'ajtin mbaadip ma ñch. Ya naaxhuiñ mbadamy ajcxy ayo'n etz tzaachypi. Jotcugñygix, ca' mdajcixy maygixy, com ti nm̄madägyich yi' jibicpi ya naaxhuiñ.

17

Jesús ym̄ibijctzou Dios m̄id ydiscípulos ajcxy ycixpi

¹ Co Jesús jadu'n ym̄inañ jayijp, chi ypa't'ijxy tzajpcixy, chi Dios Teedy pa'tcapxy nimay:

—Dios Teedy, ti hora paady m̄ina ayo'n nyajnaxa'ñich jadu'n nej miich jayijp'aty myajñihuimayñy. Yajñiguëxig ñch nm̄ic'ajt ñch n'oy'ajt, com ñch miich nDeedy'ajtypich, jigix ñch nañ jadu'n nyajñiguëxigibych miich mm̄ic'ajt m'oy'ajt ma yi' jäy ajcxy. ² Com miich ti xymöyich mic'ajt ma tüg'óciy jäy, jëbi nmöyich ajcxy jugy'ajtin huidibi ca' ycixipy ytigoyipy. Nmöhuibych jada jugy'ajtin tüg'óciy jäy ajcxy huidibi miich ti xymöyich. ³ Je jäy ajcxy huidibi ix'y'ajtp je Dios janchypi, je Dios tügpaicpi etz y'ixy'ajtyp nañ jadu'n Jesucristo huidibi ti mguexy ya naaxhuiñ, ym̄id ajcxy jugy'ajtin huidibi ca'ycixipy ytigoyipy niminaa.

⁴ Ti ñch nyajñiguëxigych miich ajcxy yi' nm̄ic'ajt ya naaxhuiñ, co ñch ti nduñ yi' mdung huidibi miich xyajñibicich. ⁵ Jadachambi Dios Teedy yajm̄ijtiñygyich miich, m̄id je mic'ajtin huidibi anajty nm̄idich ma miich mhuinduu co anajty ca'ni naaxhuiñybi chondacyñi.

⁶ Ti ñch miich ya naaxhuiñ nyajñiguëxici yi' nm̄ic'ajt ma yi' jäy ajcxy huidibi miich xymooyich, huidibi miich mhuin'ijx ma naaxhuiñyjäy ajcxy. Miich yi' ajcxy mjäy, e miich ti xymöyich, e ti ajcxy miich m'ayuc cuydungixy. ⁷ Jadachambi ñejhuñyñip yi' ajcxy, co tüg'óciy tijaty t'y'ajt ñch miich yi' xymooyb, jiiby yi' choñ tzajpjoty ma miich. ⁸ Com yi' ayuc huidibi miich ti xymöyich, ti ñch yi' ajcxy nyajñimaydäy, e ti yi' ajcxy cöbijccixy. E nañ ti ajcxy huinjihuñygyixy tydudägy co ñch jiiby ndzooñich ma miich, e nañ ti ajcxy m̄ibijccixy co miich ya naaxhuiñ xyqueyich.

⁹ M̄id yi' ycixpi ajcxy miich Dios Teedy nm̄ibijctzooy, ca' nm̄inaanim m̄id jacjadyi naaxhuiñyjäy ajcxy ycixpi nm̄ibijctzoy. M̄id y'da'ajty ycixpi ajcxy huidibi miich ti xymöyich, com nañ mjë'ajtyp miich yi' ajcxy. ¹⁰ Tüg'óciy tijaty ñch një'ajtyp, nañ mjë'ajtyp miich yi', e tijaty miich mjë'ajtyp nañ një'ajtyp ñch yi'; e ñch nm̄ic'ajt niguëxi'cp yi' ma yi' ajcxy chinaayin yjugy'ajtin.

¹¹ E ca' n'ocjacyajpadaanich ya naaxhuiñ. ñch njäy ajcxy jacyajpadam ya naaxhuiñ. Nñicxnibich jiiby tzajpjoty ma miich. Dios Teedy, cuend'at ñch ndiscípulos ajcxy m̄id miich mm̄ic'ajt huidibi miich ti xymöyich, jigix yi' ajcxy tú'ciy yjot yhuinma'ñ yajpaadipy ma miich, tim jadu'n nej ñch ajt tú'ciy njot yhuinma'ñ nyajpaatim. ¹² Co anajty ñch njac'yaajity naaxhuiñ m̄id ñch njäy ajcxy, ti ngüend'atyich anajty ajcxy m̄id je mic'ajt huidibi miich xymooyich. E ni tüg ajcxy ca' yhuinma'ñydiigooy. Abicy ñch n'octimpidägy je huidibi nayyajhuinma'ñydiigooyi (je Judas Iscariote), co yi' anajty jadu'n yajcuydunam jadu'n nej jaybety ymiñ m̄id yi' ycixpi etz m̄id ñch ycixpi.

¹³ Cham ñch miich niba'ttigiñhuaani jada'. Miich m'ayuc md'y'ajt nyajñimaaybich jada naaxhuiñyjäy ajcxy huidibi nyaj'ixpicycypich, jigix agujc jotcuje yhui'mip ajcxy. ¹⁴ Ti ñch ajcxy yi' nyajñimaydäyich miich

m'ayuc mdiy'ajt. E ca' ajcxy y'ixa'ñyii yi naaxhuiñjāy ajcxy huidibi ca' xymijpidāgyich. Com je' co ajcxy yjot yhuinma'ñ ti yajtigach, ca' ytügiy müd yi jacjadyii naaxhuiñjāy yjot yhuinma'ñ. Jadu'n nej ñch ca' ytügiy njot nhuinma'ñ müd naaxhuiñjāy ajcxy yjot yhuinma'ñ. ¹⁵ Ca' ñch cham müch nmibijctzoy co myajpidzimipy ñch ndiscípulos ajcxy ma jada naaxhuiñybi. Hue' janchtiy tun may'ajt cuend'at ajcxy ma yi ca'oybi ymiiñ. ¹⁶ Yi' ajcxy yjot yhuinma'ñ ca' ytügiy müd yi jacjadyii naaxhuiñjāy ajcxy yjot yhuinma'ñ. Tim jadu'n nej ñch ca' ytügiy njot nhuinma'ñ müd yi jacjadyii naaxhuiñjāy ajcxy yjot yhuinma'ñ. ¹⁷ Yajhuaatzí ajcxy yjot yhuinma'ñ müd müch m'ayuc, com yi m'ayuc yi' je' tiy'ajt müd. ¹⁸ Jadu'n nej müch xyquejxyich ya naaxhuiñ, nañ jadu'n ñch yi' ajcxy nguejxhuäcxyich ya naaxhuiñ. ¹⁹ Müd yi' ajcxy ycixpi ti nnaygiyegyiijich amuumdügijot ma müch, jigix yi' ajcxy nañ jadu'n ñaygiyegiyb amuumdügijot ma müch, co ajcxy cuydunipy müch m'ayuc mdiy'ajt.

²⁰ E ca' ñch jada'ajty ajcxy nibijctzohuiyich. Hue' ñch janchtiy nibijctzohuiydaaybich tüg'óciy jāy ajcxy huidibi xymibíjciyich xymijpidāgibich müd yi ayuc huidibi ñch ndiscípulos ajcxy ycapxhuäcxiy. ²¹ Huen ajcxy nidüg'óciy yjot yhuinma'ñ yajtügüy, jadu'n nej müch Dios Teedy mjot mhuinma'ñ yajpaady ma ñch, e ñch njot nhuinma'ñ yajpaady ma müch. Co yi' ajcxy yjot yhuinma'ñ yajtügühuipy müd ñch ajt njot nhuinma'ñ, huin'it jacjadyii naaxhuiñjāy ajcxy mibigipy co müch xyquejxyich ya naaxhuiñ. ²² Ti ñch ajcxy nmöyich je tiy'ajt etz je oy'ajt huidibi ñch müch ti xymöy, jigix ajcxy yjot yhuinma'ñ jatymy yajtügühuipy ajcxy, jadu'n nej ñch ajt njot nhuinma'ñ yajpaatim tú'ciy. ²³ ñch yajpatpich ma ñch njāy, e müch nañ myajpatp ma ñch, jigix tiydudāgy ajcxy tügimucy y'idipy, e nañ jigix naaxhuiñjāy ajcxy jatymy nejhuñhuipy co müch xyquejxyich ya naaxhuiñ, e nañ co yi' ajcxy ti mdzocy ti mjihuñy jadu'n nej ñch müch xychocy xyjihuiyich.

²⁴ Dios Teedy ndzojpcyich co yi jāy ajcxy huidibi müch ti xymöyich y'idipy ajcxy nañ jadu'n ma anajty n'ityich jibby tzajpjoty, jaydebi ajcxy ixipy ñch nmic'ajt ñch n'oy'ajt huidibi müch ti xymöyich. Com müch ti xychocy ti xyjihuiyich jacjayjip ca'ni anajty naaxhuiñybi myajcojyñi. ²⁵ Dios Teedy, müch ooy mmijity mjanchity, e yi jacjadyii naaxhuiñjāy ca' ajcxy yi' xy'ixy'ajtyp. ñch müch n'ixy'ajtyp. ñch njāy ajcxy ti mibicy ti mijpidāgy co müch xyquejxyich ya naaxhuiñ. ²⁶ Ti nyajnimaaayich yi' ajcxy pin müch, co müch je' Diosip. E njacyajnimāhuaamyich yi' ajcxy tiydudāgy, jigix yi' ajcxy nañ jadu'n ñaychogiyb ñayjihuihuñybidüg nidüg, jadu'n nej müch xychocyich xyjihuiyich, e nañ jadu'n jigix ñch ndiy'ajt yajpaadipy ma yi' ajcxy yjot yhuinma'ñ.

18

Ymajtz ajcxy Jesús

¹ Co jadu'n Jesús ycapxymiydacy jayjip, chi jada' ñicxy müd je jāy ajcxy huidibi anajty ajcxy yaj'ixpijcy. ñicxy ajcxy jim'amy huoc ninaxy, je huoc hue' anajty xiijity Cedrón. ñicxy ajcxy jim ma anajty tüg aguemy. Chi Jesús ytiy ma je aguemy müd ydiscípulos ajcxy. ² Judas huidibi anajty ciyegam Jesús, ñejhuñy anajty ma je it ma anajty müd'oy canaag'oc

je' ydiscípulos ajcxy. ³ Chi jada' Judas m̄iddzooñ soldados ajcxy etz jacjadyii tungm̄idpi huidibi je teedy yhuindzin ajcxy etz fariseojäy ajcxy yquejx. Chi ajcxy yja'ty ma je it ma anajty Jesús yajpaady, ym̄id ajcxy linterna, ym̄id ajcxy chinjiin etz canaagnax tijaty huidibi anajty ajcxy m̄id chiptuñ. ⁴ E Jesús com ñejhuiydaayb anajty tüg'óciy nej anajty yjada'ñ y'ayohua'ñ, chi jipcohuäḡiy je ymaym̄idzip ajcxy, e nimay:

—¿Pin ajcxy m'ijxtaayb?

⁵ Chi je' ym̄idzip ajcxy y'adzooy:

—Yi' ñich ajcxy n'ixtaayb je Jesús, je Nazaret jäy.

Chi Jesús ym̄inañ:

—Ñich jëdu'n.

Je Judas huidibi anajty c̄ijeycp Jesús, jim anajty ytinäy m̄id Jesús ym̄idzip. ⁶ Co Jesús jadu'n ym̄inañ: “Ñich jëdu'n.” Chi ajcxy yëphuibijtay jadu'ñyi. ⁷ Chi Jesús jadüg'oc y'amidooy ajcxy:

—¿Pin ajcxy m'ijxtaayb?

Chi ajcxy jadüg'oc y'adzooy:

—Yi Jesús, je Nazaret jäy. ⁸ Chi Jesús ym̄inañ:

—Ti ajcxy njanimäy co ñich jëdu'n. Pen janch ñich miich ajcxy xy'ijxtaayb, najtzmadziydäy jadaayaab ñich nmigügtijc ajcxy, huen ñicxcixy.

⁹ E jadu'n yajcuyduñ je ayuc co anajty Jesús ci'm ti ym̄ina'ñ: “Tüg'óciy jäy huidibi nDeedy ti xymöyich, ca' ni tüg jëbi huaad ytigooy.” ¹⁰ Chi jada' je Simón Pedro huidibi anajty m̄id tüg espada, juudy je y'espada ma ñidijc, e chi yajtzaach̄iyi je Teedy m̄itungm̄idpi ytumbi, tüg yta'tz'ac aa'oy'amybi yajminájiy. Je tumbi hue' anajty x̄ijity Malco. ¹¹ Chi Jesús nimay Pedro:

—Pidäg m'espada ma ñidijc. Ca' mnejhuiy co copicy nyajnaxipyich je tzaachypi je ayo'n huidibi Dios Teedy ti xyajnigo'aduḡiyich. Min n'ocminaxy n'ocyajnaxyich jada tzaachypi jadu'n nej ixyp̄y tüg tasi ta'm'ujtzn̄i ngo'uucnaxyich.

Jesús ma je Teedy m̄itungm̄idpi yhuinduu

¹² Chi je soldados ajcxy, je soldado yhuindzin etz judíojäy ajcxy ytungm̄idpi huingohuäḡiy ajcxy Jesús. Chi ajcxy majch, e chi ajcxy c̄íxojch. ¹³ Chi ajcxy jayijp yajnicxy Jesús ma Anás yajpaady, je' anajty Caifás ym̄id'ajtyp, je huidibi anajty m̄itungm̄id ma teedyt̄ijc ajcxy ymiñ je huin'it jimijt. ¹⁴ Je Caifás je' anajty ti yecy je capxhuijin ma yi judíojäy ajcxy co tügtecy ym̄inañ: jac'oy co tüg jäy y'öḡipy m̄id tüg'óciy naax cajp ycixpi.

Pedro ym̄inañ co ca' ix'y'adyii Jesús

¹⁵ Simón Pedro m̄id jadügp̄i ydiscípulo ypanicx ajcxy Jesús (co je ym̄idzip yajnicxi mach). E je jadügp̄i ydiscípulo ix'y'ajtip anajty yajxon je teedy m̄itungm̄idpi, paady ytiḡiy axam huin'it co Jesús ym̄idzip yajtiḡiyi ma je teedy m̄itungm̄idpi ytijc. ¹⁶ E je Pedro jiiyby je' yhu'i'm̄iy ma tijc aguu. E je jadügp̄i ydiscípulo co anajty ajcxy ñay'ix'y'adyii m̄id je teedy m̄itungm̄idpi, chi yp̄idz̄imy migapxy je tijc aguu adinaayb, chi Pedro ajcxy yajtiḡiy jiiyby tigoty. ¹⁷ Chi jada' je töxy'anäg huidibi anajty tijc'aguu adinaayb, nimay je Pedro:

—¿Nej ca' miich nañ jadu'n Jesús xydiscípulo'adyii?

Chi Pedro y'adzooy:

—Ca'.

¹⁸ Je tumbidijc ajcxy etz je soldadtijc ajcxy ti anajty ajcxy oy jijn yajmijiygixy co anajty chachtichity, e Pedro nañ jim anajty nañ jadu'n mid xamy ajcxy.

Je teedy mjtungmidpi yajcomidou Jesús yopocy

¹⁹ Chi je teedy mjtungmidpi y'amidooy Jesús pinjaty anajty ti yaj'ixpicy etz tijaty anajty ti yaj'ixpicy. ²⁰ Chi Jesús y'adzooy:

—Ti ich oy njacapxy njamiydägy mayjäyoty. E ti ich njatyimy nyaj'ixpicyich ma miich ajcxy mnaymujctacin etz ma Dios ytijc, ma yi judiojäy ajcxy nidüg'óciy ñaymugyii. Ca' ni ti ameech ti nnigapxyich. ²¹ ¿Na'amy co xyjactim'amidooyich ti anajty ti nyaj'ixpicyich? Yi' ajcxy amidou pinjaty ti xy'amido'ijtich n'ayucich, yi' ajcxy nejhuiyb ti ich jadu'n ti nyaj'ixpicyich. Yi' ajcxy tüg'óciy ñejhuiydaayb nejjaty ich ti mñinañich.

²² Co jadu'n y'adzooy Jesús, huin'it tüg judío tungmidpi huidibi anajty jim huington tinaayb ma Jesús, chi tüg ci' acojxigy Jesús, chi mñañ:

—¿Nej co jadu'n jibic m'adzooy yi teedy mjtungmidpi?

²³ Chi Jesús y'adzooy:

—Pen jibic ich ti n'adzooy yec tiy'ajt nej co yjibicity. Pen oy ich ti n'adzooy, ¿nej co xycoxyich?

²⁴ Chi Anás nimay soldadtijc co huen Jesús yajnicxy cixoch jim ma yi Caifás ytijc, je teedy mjtungmidpi.

Chi Pedro jadüg'oc ymñañ co ca' ixy'adyii Jesús

²⁵ Simón Pedro jimni anajty ytinäy ma jimba' yxamy anajty, chi ajcxy amidoy jadüg'oc:

—¿Nej cay yi' miich xyaj'ixpijcp nañ jadu'n?

Chi Pedro jadüg'oc coyüch Jesús ymñañ:

—Ca' je' n'ichity.

²⁶ Nidügti ajcxy je teedy mjtungmidpi ytumbi, je' anajty y'amigüg yi Malco, huidibi Pedro yta'tz'ac quejtzpujxi, chi jadu'n ymñañ:

—¿Nej ca' mdijy n'ijxyi jim ma je aguemy mid Jesús?

²⁷ Chi Pedro midugüg'oc oy coyüch yhuindzin, e tim huin'itiy tzey oy yaaxigy.

Jesús ma je gobernador yhuinduu

²⁸ Chi ajcxy jim yajtzoñ Jesús ma Caifás ytijc yajnicxy ajcxy ma agujctijc, tim jopyñi anajty. Chi je judiojäy ca' ajcxy ytigüy ma agujctijc, com ca' anajty ytundigoyaangixy mid judiojäy ycostumbre. Ca' ajcxy ytigihuañ anajty ma je romanojäy gobernador ytijc amayxijoty, e ca' anajty ajcxy ñayyajjibicçihuañyii. Com co jadu'n ycanayyajjibicçiyi ajcxy, e huin'it ca' ajcxy ycacaay ma je pascua xi adzuu'ajtñ. ²⁹ Co ca' ajcxy ytigihuañ anajty ma je agujctijc, chi je gobernador Pilato nibidzimy ajcxy tiba'y ma anajty ajcxy midity Jesús cuend'aty. Chi Pilato ymñañ:

—¿Ti xihuin ajcxy mmid, mid jadayaabi yëdyjic?

³⁰ Chi ajcxy y'adzooy:

—Co ixypy ca' ti jibicpi tuñ, ca' ixypy ich ajcxy ya yi' nyajmiñ ma miich.

³¹ Chi Pilato ymñañ:

—Yajnicxix miich ajcxy. Nicx tiyduxix jadu'n nej miich ajcxy mley y'ané'my.

Chi je judíojäy ajcxy y'adzooy:

—Ich ajcxy ca' ni ti mic'ajt nmüidity nicxy ich ajcxy njäyyaj'ögy.

³² Co jadu'n ajcxy ymínañ, chi jadu'n ajcxy cuyduñ je Jesús yci'm'ayuc jadu'n nej anajty ti ymína'ñ ti o'cin anajty ypadamy. ³³ Chi Pilato jadüg'oc ytigüy jüby agujctigoty, chi coyaaxüy Jesús, chi nimay:

—¿Nej miich je' rey'ajtp ma yi judíojäy ajcxy?

³⁴ Chi Jesús y'adzooy:

—¿Nej mgi'mhuinma'ñ müid xy'amüdooyich pen ich nrey'ajtpich, o huingjäy ti xyajnimäy co nrey'atyich?

³⁵ Chi jada' Pilato y'adzooy:

—¿Nej nañ judíojäy jada' ichi? Mgi'mnaax mgi'mgajp etz je teedy müjtungmüdpí ti xycüyecy ma ich. ¿Ti ti mdundügooy?

³⁶ Chi Jesús y'adzooy:

—Ich ca' n'ane'myich ya naaxhuiñ. Huingduum ich n'ane'min nmüdidyich. Co ixypy ya naaxhuiñ n'oc'ane'myich, tüg'óciy ich nmügügtic ajcxy ti ixypy ajcxy tziptungixy, ti ixypy ajcxy xyñihua'ñich. E ca' ixypy ti naygüyegyüijich ma yi judíojäy tungmüdpí ajcxy. Per janch ich ca' ich ya naaxhuiñ n'ane'myich.

³⁷ Chi Pilato y'adzooy:

—¿Nej mrey miichi?

Chi Jesús ymínañ:

—Miich jadu'n xytijypich co nrey'atyich. Paady ti nmiñich ya naaxhuiñ, e ti nma'xung'atyich, jigix nyecyich tiy'ajt tiydudägy. Tüg'óciy yi jäy pinjaty tiy'ajt cuydumb xy'amüdo'jtibich yi' n'ayucich.

Pilato y'ane'my huen Jesús yaj'ögyii

³⁸ Chi Pilato y'adzooy:

—¿Ti jadu'n mdiy tiy'ajt tiydudägypí?

Jadu'ñyi je' jada'ajty yjacmínañ, chi pidzimy jadüg'oc tiba'y ma anajty je judíojäy ajcxy. Chi ajcxy nimay:

—Ca' ich ni ti bocy nbaadyich ma jada jäy ma yi romanojäy yley. ³⁹ E com miich ajcxy müid tüg costumbre co tüg nnajtzmadziyim machyjäy müid jada pascua xü ycipí, ¿nej mdzojcyp ajcxy co nnajtzmadzihuiyich jada judíojäy reyí?

⁴⁰ Chi ajcxy nidüg'óciy minanday:

—Jadayaabi jäy ca' mnajtzmadzihuiy, yi' janchtiy mnajtzmadzi' yi Barrabás.

Barrabás hue' je' anajty tüg meetzpi.

19

¹ Chi jada' Pilato ané'min pidacy co huen ajcxy Jesús huinhuopy jijphuopy. ² Chi jada' je soldados ajcxy yaj'oyüy tüg corona mij'apy pa'apy, chi ajcxy yajcojeniy Jesús. Chi ajcxy yajñjeniy tüg rey yhuit ucypí ycolor. ³ Chi soldados ajcxy huingohüägüy jadüg'oc capxpoocxcixy yajxigü'yamy, nimaaygixy:

—¡Viva miich judíojäy rey!

Chi ajcxy ooy huingojxy jijpcjxy.

⁴ Chi Pilato jadüg'oc ypidzimy tiba'y. Chi nimay je mayjäy:

—Cham ajcxy nyajpidzimy tiba'y jada Jesús, jigix ajcxy mnejhuihuiy co ca' ni ti pocy ti nbaadyich ma yi'.

⁵ Co Jesús ypidzimy tıba'y mıid je apy corona ma ycohuajc etz je rey yhuıt ucypı ycolor. Huın'ıt Pilato ymınañ:

—İjxcıx, cha je yëydıjc.

⁶ Co je teedy tungmııdpı etz je judıojäy ajcxy ijxy, chi ajcxy ymınanday nidüg'óciy aguıpxyjatıy:

—Yajcruudzpet, yajcruudzpet.

Chi Pilato ymınañ:

—Yajcruudzpejtcıx mııch ajcxy, janch ııch ca' ni ti tıy'ajt nbaadyıch nej ııch yı' nyajcruudzpedıpy.

⁷ Chi je judıojäy ajcxy y'adzooy:

—İıch ajcxy mıid tüg cötujcın, jëbi y'ögy mıid ııch ajcxy ngötujcın ycıxpi, com ti ycapxtıgooy co ymına'ñ co yı Dios yteedy'ajtyp.

⁸ Co jada ayuc mıdooy Pilato, chi nıgi chıgıygoty. ⁹ Chi ytıgıy jadüg'oc ma je cötujctac mıid Jesús, chi nımay:

—¿Ma mııch tııyı mgogajpıty?

E Jesús ca' y'adzooy.

¹⁰ Paady Pilato ymınañ:

—¿İıch mııch ca' xy'adzohua'ñ? ¿Ca' mnejhuıy co nmııdıdyıch mıc'ajt jëbi nıajtzmazıy etz nañ jëbi nyajcruudzpety?

¹¹ Chi Jesús y'adzooy:

—Ni ti mıc'ajt ıxyıpy mgamııdıty ma ııch, pen ca' ıxyıpy mıc'ajt ti xymöyıch yı huıdıbı ane'mb jııby tzajpjoty. E paady ycıxpi yı tııbı ııch xycıyecyıch nıgi yı' pocy mııdıty ca'ydı mııch.

¹² E huın'ıt Pilato ooy yjahuinma'ñ ıxtay nej huaad ca' jëbi ocıajtzmazıy Jesús. E je judıojäy, je Jesús ymıdzip, nıgi anajty ajcxy chachxı'ıdıch:

—Pen mııch mıajtzmazıyb jada Jesús, huın'ıt ca' m'ocıacıaymıgüg'ajtınyıpy mıid yı mhuındzın je César huıdıbı ane'mın ti xymöy. Com tüg'óciy pınjaty naydıjıy rey, ca' yı' mıid nay'ıxa'nyıı je César.

¹³ Co Pilato jadu'n ayuc mıdooy, chi yajpidzimy Jesús tıba'y. Chi Pilato y'ıxtacy jım ma je' y'ane'mdac ycötujctac, jım ma je it huıdıbı anajty xııjıy Empedrado, hebreo'amy xııjıty Gabata. ¹⁴ Hue' tım cujcxıı anajty, e chi com jabom anajty je pascuaxıı ycodıcxnı, co Pilato jadu'n nımay judıojäy ajcxy:

—Cha ajcxy jada mrey.

¹⁵ E je' ajcxy y'adzooy:

—Huen ögy, huen ögy. Yajcruudzpet.

Chi Pilato ymınañ:

—Mııch ajcxy mrey, ¿mıñ n'ocıyajcruudzpeıtyıchı?

Chi je teedy tungmııdpı ajcxy y'adzooy:

—İıch ajcxy ca' ııch ajcxy huıngbı rey nmııdıty, jëyi César ııch ajt nrey'ajtım.

¹⁶ Chi Pilato cıyeycy Jesús ma je judıojäy ajcxy, huen ajcxy cı'm yajcruudzpety. Huın'ıt ajcxy Jesús nıhuägıy. Chi ajcxy yajtzoofı.

Yajcruudzpeıty ajcxy Jesús

¹⁷ Chi ajcxy je cruudz Jesús cı'm yajquejcyıcabıy. Mıid nıcx ajcxy ma je it xııjıty o'cpı cohuajc, hebreo'amy xııjıty Gólgota. ¹⁸ Jım ajcxy yajcruudzpeıty quıpxyı mıid jameıy jıy, tüg anajty'amy, jadüg a'oy'amy etz Jesús cujcy'amy. ¹⁹ Chi Pilato ane'my huen cıjıyay ayuc ma je cruudz, e

jadu'n je ayuc ajcxy jay: "Jesús, Nazaret jäy, je judíojäy ajcxy yrey." ²⁰ May ajcxy ooy je judíojäy capxy je ayuc huidibi anajty cijxjay ma je cruudz. Com je it ma anajty ajcxy Jesús ti yajcruudzpejticy mihuingon anajty Jerusalén. Hue' anajty yjayity: hebreo'amy, latin'amy etz griego'amy. ²¹ Chi je teedy mjtungmüdpí ajcxy nimay je Pilato:

—Ca' ixypy jadu'n ti mjay: "Judíojäy yrey". Hue' ixypy ti mjay: "Yi' jadu'n naydijip ñich judíojäy xyrey'ajtpich."

²² Chi Pilato y'adzooy:

—Yi' tibi njaayich, ti ñich yi' njaay, ca' nyajtigadza'ñich.

²³ Co soldados ajcxy yajcruudzpejtay je Jesús, huin'it je' yhuít ajcxy huijtzi'ci. Chi ajcxy je huit yajhuäcxy mídaaxpicy. Chi soldados ajcxy cijptüg cichypicy. Yi' yjocxhuit jadu'n nej anajty ytügjipxuyity. ²⁴ Chi ajcxy ñayñimayí ac jëyi soldadtijc:

—Ca' huaad ajt n'agüdzim jada jocxhuit. Tzoc ajt suerte n'oc'ixim, jigix ajt nnejhuiyim pin anajty suerte'ajtip.

E jadu'n ajcxy cuyduñ nej anajty ycojaayity ma Dios ñecy, ma Cristo jadu'n ymíñañ: "Yajhuäc ajcxy ñich nhuit, e ma ñich njocxnijen jim ajcxy suerte ijxy." Je' je' huidibi soldadtijc ajcxy ycuuduun.

²⁵ Jim ma Jesús ycrudzmijc, jim anajty ajcxy ytinäy: Jesús ytaj, je ytaj chi', je María (Cleofas ytöxyic), etz María Magdalena. ²⁶ Co Jesús ijxpaty ytaj etz je ydiscípulo huidibi anajty ooy nigí tzocy ma ytaj ymijc, chi nimay ytaj:

—Nan, ñich nmigüg huidibi tinaayb ma miich mmijc, yi' xycuend'adip jadu'n nej jihuüy miich yi' xytaj'adyii.

²⁷ Chi Jesús nimay je' ydiscípulo:

—Ñich ndaj miich mgüend'adipy, jadu'n nej ixypy mgi'mdaj'adyii.

Jadu'n nej xii tiempo jac ñicxni Jesús ytaj tzinaydapticy ma jada discípulo ytijc.

O'c Jesús

²⁸ Co jadu'n ytundaayi yajtaayi, chi Jesús nejhuüy co ti anajty tüg'óciy ytundäyí yajtäyí jadu'n nej Dios tzocy. Huin'it jadu'n ymíñañ:

—Tidziyinibich.

Co jadu'n ymíñañ, je' anajty ycuydundaayb nej anajty ycojayity ma Dios ñecy müd yi' ycixpi.

²⁹ Jim anajty tüg pi'c uugi'ñ ymüid anajty vinoxunni. Chi ajcxy je' yajxoogy tüg esponja (jadu'n yi' nej po't) müid vinoxunni, e chi yajjijp'eedziy tüg paxyijp, je' müid yajjädy je vinoxunni ma Jesús y'ahuac. ³⁰ Co jada' Jesús co'uucnajxy je vinoxunni, huin'it jadu'n ymíñañ:

—Ti tüg'óciy nguydündäyich.

Chi ñaax'ijxy, e chi y'o'cni.

Tüg soldado cumy Jesús ma ycaachyijp

³¹ Com jabom anajty je pascua mijxi (amayxi ooy), e ñañ sábado xii anajty. Paady copicy anajty co ajcxy yajmínajcipy ajcxy je jäy ninicx je tibi anajty yajcruudzpejticy. Müid je' ycixpi je judíojäy ajcxy ñicxy ma Pilato pijtzooy may'ajt co huen ane'my yi' soldados ajcxy, co huen ñicxy yajtijy je jäy ytecy ajcxy huidibi ti yajcruudzpey. ³² E chi ajcxy je soldados yja'ty ma je it ma ajcxy yajcruudzpejty Jesús. E je metzpi jäy ajcxy ytecy tiji huidibi ajcxy yajcruudzpejt tú'ciy müid Jesús. ³³ Co je soldados ajcxy

ymijhuägy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴ Chi tüg soldado cumy Jesús ma ycaachyjijp müd quipy jijpxu'ñybi. E huin'it tim mic'amy ni'py etz nü ypidzimy. ³⁵ Tüg jäy jim anajty icy nej ytuni yjajti, e nañ yejc tiy'ajt. E je' ytiy'ajt janch je', e je' nejhuüyb co yjanchity. Müd je tiy'ajt ycixpi jëbi müch ajcxy nañ jadu'n mmibijctähuip. ³⁶ Paady je' jadu'n ytuni yjajti, co jadu'n anajty yajcuyduna'ñ jadu'n nej yjaybetyity ma Dios ñecy, co jadu'n ymînañ: "Ca' huaad ni tüg ypajc yajtijy." ³⁷ E jadüg'it anajty ycojaayity ma Dios ñecy, ma jadu'n ymînañ: "Y'ixipy ajcxy je jäy huidibi ajcxy ycuum."

Yajnaaxtigüy Jesús

³⁸ Jim anajty José huidibi anajty cogájpip Arimatea. Yi' je' huidibi anajty mijpidacp Jesús, oy anajty ca' capxpídzimy, müd co anajty chigüy müd je judíojäy ajcxy huidibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jëbi ñicxy yajtzooni Jesús ñaaxnicx ma anajty ti yajcruudzpedyüi. Co Pilato a'ixiy, chi José ñicxy jim oy yajminajci je Jesús ñaaxnicx, e chi yajnicxy. ³⁹ Nañ müd ñicxy José je Nicodemo, je huidibi anajty jayijp ti ni'oy Jesús coodz. Nicodemo yminicx oy nimigo'px libra mirra etz áloes tzooy huidibi ooy oy yxuugy. ⁴⁰ Chi ajcxy yajpidici Jesús ñaaxnicx, chi ajcxy mo'ñ müd poob huit, chi tzooyiy ajcxy müd mirra etz áloes tzooy, jadu'n nej je judíojäy ajcxy ycostumbre müdity co o'cpi yajnaaxtigüygixy. ⁴¹ Huington ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg o'cpi jut jemybi ma anajty ca'ni pin ñaaxtigüy. ⁴² Jim ajcxy Jesús ñaaxnicx yajnaaxtigüyüi, co anajty jim yjac-huingtonity, e janch jottigooy ajcxy yajnaaxtigüy, müd co anajty ti chu'iyüñi, e je judíojäy ajcxy tzachni'ixüyüñi tzach'a'ixüyüñi co je amayxiü anajty chondägaani com jabom.

20

Jesús jugypijc jadüg'oc co anajty ti y'oc'o'cni

¹ Tim seman ixtigi', moñiyi anajty, ca' anajty oy ximüyüñi. Huin'it María Magdalena ñicxy ma Jesús anajty ti ñaaxtigüy. E chi jim ijxy co je tzaa ti anajty jim yajjüdiguecy ma je jut aguu. ² Co ajcxy ijxy je jut ahuädz, chi jada' mic'amy poyigüyüi ninicxy Simón Pedro, etz je jadügpi ydiscípulo huidibi anajty Jesús müd ooy naychogyüi, chi nimay:

—Ti yajtzoongixy iich ajt nHuindzin ñaaxnicx ma ajcxy yajnaaxtigüy, e ca' nejhuüyüm ma ajcxy ti pidaaccixy.

³ Huin'it ajcxy nimetz chooñ poyigüyüi Pedro etz je jadügpi discípulo, ñicxy ajcxy ma je o'cpi anajty ñaaxtigüy. ⁴ Poyigüyüi ajcxy ñicxy nimetz, per je jadügpi discípulo jayijp ñajxy, e jayijp jim oya'ty ma je naaxtigüydac. ⁵ Chi yco'ixüy jutjoty, huin'it jim oy icy je mo'nhuit jüby jutjoty y'ooxnäy, per ca' yi' jüby ytigüy jutjoty. ⁶ Simón Pedro co ymiñ jac'axam, tim janitigüy jutjoty, chi ijxy je mo'nhuit y'ooxnäy jüby jutjoty. ⁷ E chi ijxy je cöxotz, je huidibi anajty müd ycohuajc yxochity, abicy je' anajty, ca' anajty tú'cay y'ooxnäy müd ymo'nhuit. Y'ijx ajcxy je cöxotz yajxon y'anëgyity abicy. ⁸ Huin'it ytigüy jutjoty je jadügpi discípulo huidibi jacjayijp ja't. Chi ijxy, e huin'it mibijcy co Jesús ñaaxnicx ca' anajty jüby. ⁹ Ca'ni anajty ajcxy yajxon huinjüüy co anajty jadu'n ycojaayity ma Dios ñecy, co anajty je Cristo yjugypiga'ñ. ¹⁰ Chi je metzpi ajcxy ydiscípulos yhuimbijty ma ytijc.

Jesús nayguëxici ma María Magdalena

¹¹ E je María jim yhu'i'miy ma je o'cpi jut ayaaxip. Chi ayaaxip yco'ixiy ma je jut. ¹² E chi ijxy metz ángel, poob huit ajcxy ymíid, y'iñaaygixy jiiy ma je Jesús ñaaxnicx anajty yhuijtznäy, y'iñaaygixy tüg cöduy, jadüg tecy ixaay. ¹³ Chi je ángel ajcxy nimay je María:

—¿Miich töxyjäy na'amy co myäxy?

Chi je María y'adzooy:

—Ti ajcxy nHuindzin ñaaxnicx yajnicxi, e ca' nnejhuiyich ma ajcxy ti pidägy.

¹⁴ Jadu'n anajty ymínañ, co ñayji'ijxi, chi ijxy Jesús ytinäy ma yjiix, e ca' ijxcajpy pen Jesús je' anajty. ¹⁵ Chi Jesús ymínañ:

—Töxyjäy, ¿ti co myäxy? ¿Pin m'ixtaayb?

María hue' anajty tijy je aguemy cuend'ajtpi migapxip, paady jadu'n ymínañ:

—Huindzin, pen ti myajnicxy Jesús ñaaxnicx, nigapx ma ti mbidägy, e iich nicxy nyajtzoñich.

¹⁶ Chi Jesús ymínañ:

—María.

Chi jada' María yhuäg-huimbijty, chi yajxon huindicxpejty, chi nimay:

—¡Raboni! —jada hebreo ayuc yhuimbizimy Huindzin.

¹⁷ Chi Jesús nimay María Magdalena:

—Ca' xyñidooñich, com ca'ni iich nba'ttigiy ma Dios Teedy yajpaady. Nicx miich ixta' nmigügtijcich, e nima' co nnicxaamich ma Dios Teedy, iich nDeedy etz miich ajcxy mDeedy, iich nDios, etz miich ajcxy mDios nañ jadu'n.

¹⁸ Chi María Magdalena oy yajnimäy je discípulos ajcxy, chi jadu'n nimay:

—Ti n'ixyich je Huindzin Jesús, e jadu'n yi' ti ycapxymöyich co nyajnimähuiybyich miich ajcxy.

Jesús nayguëxici ma ydiscípulos ajcxy

¹⁹ Co je huin'it ximbi chuu'iy seman ixtigi', aducy anajty tijc'aguu y'ity ma anajty je discípulos ajcxy yajpatcixy, míid co anajty ajcxy tzigiy je judíojäy ajcxy huídibi anajty midzip'ajtp Jesús. Chi Jesús ytigiy cujc'amy ma je' ajcxy, e chi jada' capxpocxy ajcxy, nimay:

—Jotcugi' miich ajcxy.

²⁰ Yam jadu'n anajty ymínañ, chi ajcxy yaj'ijxy je' yci' ma je clavo ytigiy, etz ycaachyjip ma anajty jäy ti ycumyíi. Chi yjotcugiy ajcxy co ajcxy ijxy je yHuindzin. ²¹ Chi jada' Jesús jadüg'oc capxpocx, nimay ajcxy:

—Jotcugi' miich ajcxy. Jadu'n nej iich nDeedy xyquejxyich ya naax-huiñ, nañ jadu'n iich miich ajcxy yam nguejxhuäcxy míid iich n'ayuc.

²² Co Jesús jadu'n ymínañ, chi jada' ajcxy nübuxuy cöbuxuy nimay:

—Huen Dios yjihui'ñ ymic'ajt xy'adigiy xyjottigiy ajcxy.

²³ Huenpinjäyity huídibi miich ajcxy mbocyhuinmeecxyp, nañ ypocyhuinmeecxipy Dios Teedy. Huenpinjäyity huídibi miich ajcxy ca' ypocy mhuinmeecxaani, nañ jadu'n Dios Teedy ca' yi' ypocyhuinmeecxañyíi.

Tomás ymibijc co yHuindzin yjugypijcy

²⁴ Tomás je' huidibi anajty miid majmetz yca'pxy Jesús ydiscípulos ajcxy, je huidibi anajty yajtijp Dídimó, ca' je' anajty jim choonity co Jesús ymiñ oga'n. ²⁵ Chi je jacjadyii ajcxy ymiñgüg ñimaayi:

—Ti ñich ajcxy n'ixy je Huindzin Jesús.

E chi je' y'adzooy:

—Pen ca' n'ixyich ma yi' yci' je clavo'au, e pen ca' ngihuäxich ngodijiyich ma clavo'au, e ngi' nbidägyich ma ycaachyjijp ma anajty ycumyity, ca' nmibigipyich co yjanchity.

²⁶ Chi jacoductujc xii ajcxy jadüg'oc anajty yajpaady tigoty nidüg'óciy je discípulos ajcxy. Tzooñ anajty Tomás nañ jadu'n. Chi Jesús ymiñ. Agiy anajty tijc co Jesús ytinay'ahuüy cujc'amy ma je' ajcxy. Huin'it ycapxocxy, chi ñimay:

—Jotcugi' miich ajcxy.

²⁷ Chi jada' ñimay je Tomás:

—Pidäg ya mgihuäx ma clavo'au ma ngijich. Najtzaxi' mgi' etz pidäg ma ñich ngaach ma jäy xycumyich, e mibic yajxon tiydudägy.

²⁸ Chi Tomás y'adzooy:

—Ñich miich nHuindzin'ajtyp etz ñich miich nDios'ajtyp.

²⁹ Chi Jesús Tomás ñimay:

—Miid co miich ti xy'ixyich, paady miich ti mmibicy. Jotcujc yi' ajcxy huidibi ca' xy'ixyich, e ti ymibicy co ti njugypicyich co n'o'gyich.

Jada ayuc ngojaaybich majada necy, jigix miich ajcxy mmibigipy co Jesús je' yi' je Cristo, je Dios y'ung

³⁰ Ti anajty Jesús ooy tuñ mijhuinma'ñ ma ydiscípulos ajcxy yhuinduu huidibi ca' ycojaayity ma jadayaabi necy. ³¹ Paady ycix jada ngojaayich jigix ajcxy mmibigipy co Jesús je' yi' je Cristo je Dios y'ung. E co miich ajcxy mmibigipy, huin'it mbaadip jugy'ajtin huidibi ca' tücci'yi ycixipy ytiogoyipy miid Jesucristo yxi ycixpi.

21

Jesús ñayguëxigyii ma ydiscípulos ajcxy nihuixtujcpi

¹ Co jadu'n jayijp ytuni yjajti, huin'it jadüg'oc Jesús ñayguëxici ma je' ydiscípulos ajcxy jim ma mejypa', je huidibi anajty xijip Tiberias mejy. E jadu'n ñayguëxici: ² Jim anajty ajcxy Simón Pedro miid Tomás huidibi jäy ytijyp Dídimó. Nañ jim Natanael huidibi anajty cogajp jim Caná Galilea naaxjot. E nañ jim anajty je Zebedeo ymang ajcxy etz jametz discípulos ajcxy. ³ Chi Simón Pedro yminañ:

—Ñicxy n'oc'acxmachich.

Chi ymiñgütijc ajcxy yminañ:

—Tzoc ajt jámim.

Chi ajcxy ytiñy ma tüg barco. E je huin'it tzuu ca' ni ti ajcxy majch. ⁴ Co yjobiy jim Jesús anajty ytinäy ma mejypa'. Je' ydiscípulos ajcxy ca' anajty ajcxy nejhuüy co Jesús je' anajty.

⁵ Chi Jesús yminañ:

—Migügtijc, ¿nej ca' ajcxy mbaadyñi acxi?

Chi ajcxy y'adzooy:

—Ca' ni ti.

⁶ Chi Jesús yminañ:

—Pidaaccix ajcxy je huídibi m̄id m'acxmajtz̄cixy aa'oy'amy ma yí barco, e huin'it ajcxy mbaadipy acx.

Chi ajcxy pidacy je acxmadzi'ñ aa'oy'amy, e huin'it janch adzaach ajcxy yajpidzimy, co janch may acx anajty ti ytiḡy. ⁷ Je ym̄iḡüḡ huídibi m̄id Jesús ooy anajty ñaychogyii, chi ñimay Pedro:

—Je' yí, ñich ajt nHuindzin.

Co jadu'n m̄idooy Simón Pedro co anajty yj̄jity je Huindzin Jesús, huin'it yhuít yajtiḡy. Com ti anajty yhuít jeñ, com jadu'n anajty jac'oy ytuñ. Chi ytiḡy mejyoty huitm̄id. ⁸ Jacjadyii ajcxy ym̄iḡüḡt̄j̄c yj̄ady ma mejypa' m̄id je barco, pahuich pajugucy ajcxy je y'acxmadzi'ñ janch ujtz m̄id acx. Hue' anajty ca' ooy yj̄iguemyity ma mejypa', j̄eyi anajty m̄igo'px metro yj̄iguemyity. ⁹ E co ajcxy ymejch ma mejypa', chi ajcxy ijxy co jim anajty j̄imbajc y'ity ni'ixi', e jim anajty acx j̄imbajc ñiḡix huídibi yajtzaayb, e ñañ jim anajty tzajcaagy. ¹⁰ Chi Jesús ñimay je' ydiscípulos ajcxy:

—Yajmiinḡix yí acx t̄ibi ajcxy mmajtz̄cixy.

¹¹ Chi Simón Pedro ypejty barcojoty, chi yajpidzimy huind̄itzuum y'acxmadzi'ñ ujtz m̄id may'acx. Chi ajcxy michoy m̄igo'px jahuixchigi'px majctuḡiḡ acx mijatypi, e jadu'n ca' je acxmadzi'ñ yc̄ich m̄id tzachmay'acx. ¹² Chi Jesús ñimay ajcxy:

—Min ajop'ajtcix.

E ni t̄üḡ ydiscípulos ajcxy ca' y'am̄idoohui:

—¿P̄in miich?

Com ñejhūȳb anajty ajcxy co je' anajty Huindzin Jesús. ¹³ Chi Jesús ym̄ijhūagy ma je acx c̄i' etz tzajcaagy anajty y'ity, e chi yajhūacxy, chi moyday ym̄iḡüḡt̄j̄c ajcxy.

¹⁴ E je' je' anajty je m̄iduḡiḡ'ocpi co Jesús ñaygūex̄ici ma je' ydiscípulos ajcxy, huin'it co yjugypijcy co y'o'cy.

Jesús yajni'ix̄iy Simón Pedro ti ytunipy

¹⁵ Co ajcxy y'ajop'ajttay, chi Jesús ñimay je Simón Pedro:

—Simón, Jonás y'ung, ¿nej xyjactzojcpich miich, ca'ydi jada jacjadyii ndiscípulo'ichi?

Chi y'adzooy Pedro:

—Huindzin mnejhūȳb miich co ndzojcpich ñjihūȳbich miich.

Chi Jesús ñimay:

—Cuend'at ñich nj̄ay, jadu'n nej jihūȳ borregi cuend'ajtpi yaj'ocy yí yborregi.

¹⁶ Chi Jesús m̄imejtz'oc ym̄inañ:

—Simón, Jonás y'ung, ¿nej xychojcpich xyjih̄ūȳbich miich?

Chi Simón y'adzooy:

—Huindzin, mnejhūȳb miich co ndzojcpich ñjihūȳbich miich.

Chi Jesús ñimay:

—Cuend'ajtiḡich nj̄ay, jadu'n nej yí borregi cuend'ajtpi cuend'aty yborregi.

¹⁷ Co m̄iduḡiḡ'ocpi oy y'am̄idooy:

—Simón, Jonás y'ung, ¿nej xychojcpich xyjih̄ūȳbich?

Chi Pedro yjotmaybjcni co m̄iduḡiḡ'ocpi y'am̄idoohui: “¿Nej xychojcpich xyjih̄ūȳbich?”

Chi Simón yjac'adzooy:

—Huindzin, miich mnejhuídaayb tüg'óciy, e nañ mnejhuídaayb co ñich ndzocyp njihuídaaybich miich.

Chi Jesús jacnimay:

—Cuend'ájtigich njäy, jadu'n nej borregi cuend'ajtpi cuend'aty ybor-regi. ¹⁸ Janch janch ñich miich yam jadu'n nimäy: “Co anajty miich mjac'anägnity, ci'm anajty mhuit nayyajñjeniyii, e mnicxp anajty ma mdimdzocy. E co mjacmijjähuiipy, huin'it mgi' mnajtzxähuiipy, e huingbi mhuit xyajñjenihuiipy, e xyajnicxyipy ma anajty ca' mdzocy.”

¹⁹ Co Jesús jadu'n ymínañ, chi Pedro yajhuinjihuídaayb jadu'n nej anajty jäy ajcxy yaj'óga'ñyii mñid Jesús y'ayuc ytiy'ajt ycixpi, e nañ ma yi y'o'cin tiy'ajt yegipy co ymñid Dios ytiy'ajt.

Je discípulo huídaayb anajty Jesús ooy tzocy jihuíy

²⁰ Chi Pedro ñayji'ijxi, chi ijxy co anajty tú'ciy anajty ymiingixy je' ydiscípulo huídaayb anajty Jesús ooy tzocy jihuíy je huídaayb anajty iñaayb huingon ma Jesús ma je mesa co anajty y'adzuu'ajtcixy. Je huídaayb nimay je' yHuindzin:

—Huindzin, ¿pín miich yi' xyciyegam ma yi mmidzip? ²¹ Co Pedro ijxy je jadügpí discípulo axam Jesús ypanicxyii, chi ymínañ:

—Huindzin, e jadayaabi migüg, ¿ti yi' jadaanip?

²² Chi Jesús y'adzooy:

—Co ixipy ndzocyich co yi' huen jugy'aty ixti mabaad nhuimbityich, ca' miich xypaady mnejhuídaayb ti yi' jadam. Panicxcich miich.

²³ Paady ycixp huinjihuídaayb je ymígügtijc ajcxy co je ymígüg huídaayb Jesús ooy tzocy jihuíy ca' anajty y'óga'ñ. Per Jesús canan je' anajty jadu'n ytiyyp co ca' y'óga'ñ. Hue' anajty ti ymína'ñ janchtiy:

—Pen ndzocypich ixipy co jada migüg yhuimípy ixti mabaad nhuimbityich, ca' miich xypaady mnejhuídaayb ti yi' ytunamy.

²⁴ Je' je' je' Jesús ydiscípulo huídaayb tiy'ajt yejcp jadu'n nej Jesús ytuñ y'ayoy etz yjaty y'ayoy, e nañ yi' je' huídaayb cojay nej Jesús ytuñ y'ayoy, yjaty y'ayoy. E ñich ajt nejhuídaayb co janch yi' je' tiy'ajt huídaayb ti yecy.

²⁵ May ooy tijaty mij huinma'ñ Jesús jactuñ. Co ixipy yajcojaydäy tüg'óciy, ca' yi' naaxhuídaayb ixipy yhuaadäy mñid maylibro tzachpidägipy. Jadu'n n'aa'ixiyich.

LOS HECHOS

Jadu'n Nej Jesús Y'ayuccapxhuäcxpi Ytuun Yjajti

1-2 Ma je jayijp'atypi necy, migüg Teófilo, ti nyajnijayiy tüg'óciy jadu'n nej Jesús ytuun etz jadu'n nej yaj'ixpijctzondacy oga'n'aty, ixti cooni ypättigiy tzajpjoty. Ca'ni Jesús anajty ypättigiy tzajpjoty co huin'ijxy je' yjáy huidibi yi' y'ayuc ytiy'ajt capxhuäcxhib, e chi müd je Espíritu Santo najztzunay najtz'ane'müy nej huaad ajcxy ytunipy. ³ Co anajty Jesús y'ögy, chi ñayguëxici canaag'oc ma je' ydiscípulos ajcxy, e huixchiguüpx xii ñayquëxigo'ci ma je' ajcxy, yajniquëxigy huädz co anajty yjuugyity, etz nañ yajmüdmüydacy je' yjáy je Dios y'ayuc etz Dios y'ané'min.

⁴ Co anajty jim ijtcixy tügmucy müd Jesús, chi Jesús je' ydiscípulos ajcxy ane'my co ca' huaad jim choongixy jim Jerusalén. Chi ajcxy nimay:

—Ahuixcix tibi Dios nDeedy ahuanüy ma miich ajcxy, je huidibi miich ajcxy nyajmüdmüydägy. ⁵ Janch Juan je Bautista jäy yajniibejt müd ni, tzojc miich ajcxy xy'adigihuiipy xyjottigihuiipy yi Espíritu Santo.

Jesús ypättigiyñi tzajpjoty

⁶ Ni'amugi anajty ajcxy jim müd Jesús, chi ajcxy yajtiy:

—¿Huindzin, nej myajcödigoyamy je Israeljäy ymidzip jadachambi?

⁷ Chi Jesús y'adzooy:

—Ca' xypaatcixy mnejhuüygixy je xii je tiempo mina anajty ti yhuaad'ajtni, mina Dios Teedy tuna'n tijaty, je' tügpajc müd cötújcín tijaty ytunamy. ⁸ Co anajty je Espíritu Santo chinaydacpiy ma ajcxy mjot mhuinma'ñ mbaatcixp mic'ajt. E chi mdzoongixp ayuc capxhuäcxpi müd iich ycixpi ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuiñybi.

⁹ Ti jada ajcxy jadu'n yajnimäy, jim anajty ajcxy yhuindüxcixy, chi Jesús chajppejtni. Chi miñ joc yeeg huidi Jesús yajnidigoyday, chi ajcxy ca' ocjac'ijxni. ¹⁰ Jadu'n anajty ajcxy chachpät'ijxcixy tzajpcixy, co Jesús ypättigiy. Huin'it mejtz yëydijc ñayguëxici ma je' ajcxy ymijc, poob huit müd, ¹¹ chi ajcxy ñimaayi:

—Galilea jäy ajcxy, ¿nej co mdzachpät'ijxcixy tzajpcixy? Yi Jesús huidibi ti chajppetey, ti choon ma miich ajcxy, minaamb jadüg'oc jadu'n nej ti m'ijxcixy co ti ypättigiy.

Matías yajhuin'ijxy co Judas ytung jijptunüyipy

¹² Huin'it Jesús ydiscípulos ajcxy chooni ma je cögor huidi xiiip Olivos, yhuimbijtcixni jim Jerusalén, ca' ooy yjiguëgyity, jëbi yajyöy sábado xii, jadu'n nej Moisés ycötújcín y'ane'my. ¹³ Co ajcxy yja'ty ma je cajp, chi ajcxy ypejty ma je cuarto mimetz nhuijtzpetypi ma ajcxy anajty müdity yjättac. Jim yi' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymiguëx. ¹⁴ Tüg'óciy anajty ajcxy y'ijtcixy tügmucy Dios mibijctzoogixy chajpcapxycapxcixy. Ymüd ajcxy anajty Jesús y'uch etz María Jesús ytaj, etz jacjadyii töxyjäydijc.

¹⁵ Huin'it xii Pedro ytinauygy agujc'amy ma je ymügügtijc ajcxy huidibi yajmij'ajtp Jesús, huidi anajty ajcxy naybaatip migo'px ja'üpxti jäy, chi nimay ajcxy:

16 —Migügtijc, copicy co jada yajcuydúnipy nej Dios ymínañ ma ñey huidi jaybety ijtp, ma David jaay Dios y'ayuc, ma Dios nigapxy Judas. Je'huidi coduu'ajt taabi je judíojäy ajcxy majch Jesús. 17 Je Judas yaj'amichomujcp je' anajty müd ñch ajt, paatip anajty Dios ytung tú'ciy müd ñch ajt. 18 Chi Judas ñicxy juy tüg naax müd je muju'ñ huidibi anajty ti paady müd yjibic-huinma'ñ. Chi jim mic'amy ycäy tzuxcödeefñ, chi ytopxy ymooxac, e chi ytiinch ypidzimday. 19 Je jäy ajcxy huidibi anajty tzinaayb jim Jerusalén, co nejhuiy, chi ajcxy yximoy je naax Acéldama, hue' je' yhuimbizimy ma je' ajcxy ayuc, ni'py ñaaxjot. 20 Jada je' je ayuc huidibi David yjaay ma je Salmo necy:

Hui'mip najtz'ixiy yí chinaaydac. E ca' pin yajtunipy.

Nañ jadu'n ymína'ñ:

Huingbi huen yajnicxyii je' ytung.

21-22 Copicy co tüg yéydijc huidibi müd ti yhuidity nHuindzin Jesús quipxy müd ñch ajt, huen tunipy je tung huidibi Judas anajty ytumyb, maab Juan yajniibety ixti taabi xypuyöduutim co pättigiy tzajpjot, tüg jébi testig'aty müd ñch ajt co Jesús yjugypijcy.

23 Chi Jesús ydiscípulos ajcxy huin'ijxy mejtz jäy: tüg jäy huidi anajty yxii José, huidi yxii anajty yajtijy Barsabás etz nañ jadu'n anajty yajtijy Justo. E huin'ijxy ajcxy nañ jadu'n Matías. 24-25 Chi Jesús ydiscípulos ajcxy Dios mibijctzoy, ymínañ ajcxy:

—Huindzin Dios, m'ijxyp mnejhuiyb tüg'ócüy jäy yjot yhuinma'ñ, yajni'ixiiygich jada metzpi jäy huidibi müch nidügti ti nhuin'ixy, je huidibi jébi jijptigiyiy müch mdung tú'ciy müd ñch ajcxy, etz huidibi apóstol'adip. Huen jada jäy jijptigiyiy je tung huidibi Judas ti yajtigooy, co ytundigooy e ñicxy ma ypaadyii.

26 Chi ajcxy suerte ijxy, e je suerte ñibizimni je Matías. E huin'ítüy je Matías oy ymicho'ndigiy ma je nimajtügpi ajcxy huidi ycapxhuäcxy Jesús y'ayuc.

2

Co je Espiritu Santo ycidacy choñ tzajpjoty

1 Co oy je Pentecostés xii paady, jim anajty Jesús ydiscípulos ajcxy ni'amugi' tú'ciy ijtcixy. 2 Huin'it janch timitiini yajmidoy tüg ne'min, choñ tzajpjoty, jadu'n nej poj micpi. Chi yaj'ujtzaay je tigot ma anajty iñaaygixy. 3 Chi nigidaaci nidüg nidügti toodz jadu'n nej jinye'n. 4 Chi je Espiritu Santo nidüg nidügti ajcxy y'adigiyi yjottigiyi. Chi ytigiyixni capxy miydaacp nije' nije' ayuc jadu'n nej je Espiritu ajcxy yajcapxyii.

5 Jim Jerusalén anajty je huin'it xii may judíojäy ajcxy huidibi tzoomb canaag agajp. Hue' ajcxy chachcuydumb judíojäy ycostumbre. 6 Co je cajpjäy ajcxy midooy je ne'min, chi ajcxy ooy yöymujcy. Chi je mayjäy ooy yhuinmay'ahuidijty, co ajcxy midooy chachcapxcixy chachmiydaaccixy ma yci'm'ayuc. 7 Je mayjäy ajcxy ooy chigiyi jihuiy, chi ajcxy ñayñimaayi miñ xyipy:

—Ix ¿nej cay Galilea jäy jada ajcxy nidüg'ócüy huidibi jadu'n tzachcapxcixy tzachmiydaaccixy ñch ajt ngi'm'ayuc? 8 ¿Nej ñch ajt co nmido'mbícim co tzachmiydaaccixy ñch ajt n'ayuc huidibi ti nmibi'c'ajtim? 9 Ya anajty ajcxy Partia jäy, Media jäy, Elam jäy, Mesopotamia jäy, Judea jäy, Capadocia jäy, Ponto jäy, etz cham huidi

tzinaayb ajcxy jim Asia ñaaxjot, ¹⁰ etz huidibi ajcxy tzomb jim Frigia, etz Panfilia, huidibi tzomb jim Egipto, etz huidibi tzomb jim ma yi Africa ñaaxjot Cirene ninaxy. Nañ jadu'n jim romanojäy huidibi ya adzinaayb. May ajcxy jim huidibi judiojäy etz nijëjity huidibi ca' yjudiojäyity huidibi judiojäy ycostumbre ajcxy ti yjijptigiyyi. ¹¹ Ya nañ jadu'n Creta jäy etz Arabia jäy; e ñich ajt tüg'óciy nmidoohuim jada jäy ajcxy nigapxcixy nimiydaaccixy huidi Dios ti tuñ mijcajee ma ñich ajt ngi'm'ayuc.

¹² Nidüg'óciy ajcxy ooy jihuüi, e chi ajcxy ooy yhuinmay'ahuidijty, miñ xyipy ñay'amidóohuigixy:

—¿Nej jada yhuimbizima'ñ?

¹³ E nijëjity jäy jëyi nixigy yajxigy, yminaangixy:

—Muucip jada yi' ajcxy.

Pedro yaj'ixpijcy je mayjäy

¹⁴ Huin'it Pedro ytinayigy miid je nimajctügpi apóstoles, e ytigiiy capxpi mic yminañ:

—Yëydijctijc ajcxy huidibi tzinaayb Judea etz tüg'óciy huidibi tzinaayb ya Jerusalén, nejhuñhuipy miich ajcxy jada e midou ajcxy yajxon huidibi ajcxy nyajnimähuamyb. ¹⁵ Jada jäy ajcxy ca' ajcxy ymügyii jadu'n nej miich ajcxy minaangixy. Tim petyxiini jada cham. ¹⁶ Jada je' huidibi ñigapxy je Joel, Dios y'ayuc najtcapxiiybi, co jadu'n mina'ñ:

¹⁷ Je huin'it xii mina anajty je naaxhuiñybi cixa'ñ, jadu'n Dios mina'ñ, nyajhuäcxtähuibich je nEspíritu ma tüg'óciy naaxhuiñyjäy. Miich mnix etz mmang ajcxy capxhuäcxip ñich n'ayuc ndiy'ajt, e je yujcyecpidijc ajcxy yhuin'ixipy ooy mijhuinma'ñ, e je mijjäydijc cumähuipy ajcxy.

¹⁸ Nyajhuäcxtähuip ñich je nEspíritu huin'it xii ma ñich ndumbi yëydijcpi töxyjäybi, e yi' ajcxy capxhuäcxip ñich n'ayuc ndiy'ajt.

¹⁹ Nyajquëxiigibich tzajpcixy huidijaty oy chigiiyñi, e ya naaxhuiñ nyegipyich tiy'ajt: ni'py, jün etz jünjoc.

²⁰ Yi xii ahuimbidity coodz, etz je po' ahuimbidity nej ni'py, ma anajty ca' miñ je xii je tiempo mina anajty mina'ñ je Huindzin Dios. Mij ayo'n ji tunaanip jadaanip ijxna' quëxna'.

²¹ E tüg'óciy jäy huidi miyaaxp ojadajtp je Huindzin Dios, Dios ajcxy yajnïdzögiiib y'alma.

²² Chi Pedro yjacminañ:

—Amido'ijtcix, miich judiojäy ajcxy, jadu'n nej cham nmina'na'ñich. Je Jesús huidibi tzoon jim Nazaret ti xyaj'ijxcixy Dios ymic'ajt, mijhuinma'ñ, etz ijxpejt, jadu'n nej miich ajcxy ti m'ijxcixy ti mnejhuüygixy. ²³ Jada yajcïyejc ma miich ajcxy, jadu'n nej anajty Dios ti yajniögügy, e ti huinmay. Ajcxy mmajch je Jesús e myaj'ögy ajcxy, chi ajcxy myajcruudzpejty miid jibic jäydijc y'ané'min. ²⁴ Chi Dios yajjugypijcy yajnihuädzictuty ma yi ócin, ca' huaad yhui'my ögy huinixii. ²⁵ Je David ñimiydac Jesús chi yminañ:

Nejhuüybich co je nHuindzin Dios y'ity ma ñich nhuinduu. Yi' ijt ma ñich n'a'oy, jigix ca'ydi pin xy'adzigi'yich xyajhuinma'ñyidigooyich.

²⁶ Paady ti njotcugiyich, e ti ngapxypidzimyich co ooy njotucjich. Paady co oy n'ögibich etz ninicx ñaaxtigihuipy, ca' ndajy mayich.

27 Co miich Dios ca' myajhui'ma'n̄ ñich n'alma ma ñaaxtigiydac. Ni mga'aa'ix̄ihuipy, co miich mdumbi huidibi ooy mdzocy, co ñicxy ñin̄icx̄ ñaaxhuindigoydäy.

28 Miich Dios, ti xyajni'ix̄iyich yi tzinaayin huidibi ym̄id jugy'ajt̄in huinix̄ibi. Xyajjotcuḡihuibich m̄id co xym̄id'idipyich.

29 Chi Pedro yjacm̄inañ:

—Miḡügt̄ic, huädz miich mnejhūiygixy co ñich ajt nm̄ij'ap David y'o'cy etz yajnaaxtiḡiyyi. E ma ñaaxtiḡiyy nm̄idni jē'ajt chambaad. ³⁰ Je David hue' je' anajty Dios y'ayuc ñajtzcapx̄iyybi, e ñejhūiyb anajty co ti Dios yajnim̄äyii huidibi ca' y'an̄ijity. David ñejhūiyb anajty co ma y'ap y'oc ma'xung'adipy Cristo, jaydēbi ané'm̄ipy ma David y'ane'mdac. ³¹ Jadu'n co David jecy'ajty huinj̄ihūiy e nejhūiy etz nigapxy jadu'n nej yjugypiga'n̄ je Cristo co anajty ti y'ögy. E ym̄inañ co ca' yi' y'alma yhūi'm̄ipy jutjoty etz ñin̄icx̄ ca' yp̄üdzipy. ³² Dios yajjugypijcy je Jesús co y'o'cy. Jada tiy'ajt ñich ajcxy nidüg'óciy nidiy'ajt'ajtpy. ³³ Jadu'n Dios Jesús mooy m̄ij'ajt jii by tzajpjoty, chi yajcidiḡiyyi je Esp̄iritu Santo huidibi Dios Teedy y'ahuan̄iy e tüg'óciy huidibi miich ajcxy ti m'ijxcixy ti mm̄idoogixy jii by yi' chooñ ma yi'. ³⁴ Com David ca' je' chajppejty, je David ci'm ym̄inañ:

Je Huindzin Dios nimay ñich nHuindzin: “ñña' ma ñich a'oy'amy,

³⁵ ixti cooni nm̄imadact̄ahuibich yi m̄midzip, jadu'n anajty nipaady nej jihuiy mdecypocxpejt'adyii.”

36 Chi Pedro yjacm̄inañ:

—Ñejhūihuipy nidüg'óciy yi Israel jäy ajcxy co janch janch co je Jesús huidibi miich ajcxy myajcruudzpejt, Dios yajnībijc co yhuindzin'adipy ma miich ajcxy, etz Cristo huidibi xyñihua'nipy xyajtzögipy ajcxy.

³⁷ Co je mayjäy ajcxy jadu'n midoy, chi ajcxy yjotyunḡiyy, e amidoy ajcxy je Pedro etz jacjadyii jäy huidi Jesús y'ayuc capxhuäcxi anajty, chi ajcxy ym̄inañ:

—Miḡügt̄ic, ¿ti ñich ajcxy jēbi huaad nduñ?

38 Huin'it Pedro y'adzooy:

—Jothuimbijtcix e ñibejtcix nidüg nidüg m̄id Jesucristo yx̄i, jigix Dios miich ajcxy mbocy xyhuinmeecxipy. E jadu'n Dios xym̄ohuipy je Esp̄iritu Santo. ³⁹ Huidibi Dios y'ahuan̄iy miich yi' ajcxy mje' etz m'ung ajcxy, etz m'ap m'oc ajcxy, etz nañ jadu'n je jäy ajcxy huidi jigüémip, etz jacjadyii jäy ajcxy huidi Dios huin'ixamy.

⁴⁰ M̄id jadayaab ayuc etz jacjadyii ayuc Pedro yajnimay capxhuijy je mayjäy ym̄inañ:

—Ca' mm̄ijpidiaccix je jäy ajcxy y'ayuc huidibi ca' capxym̄idoy Dios.

⁴¹ Jadu'n yjajti, je jäy ajcxy huidijaty m̄ibijc Pedro y'ayuc, chi ajcxy ñibejttay huin'it x̄i. Ñimayiy ajcxy huidibi m̄ijpidac Jesús y'ayuc oy niduḡiig mildi jäy. ⁴² Tüg'óciy ajcxy anajty panicxcixy yi ixp̄ijcin jadu'n nej yi Jesús y'apóstoles ajcxy yaj'ixp̄ijcy. Chinaaygixy yquipxyjot yquipxy-huinma'n̄. Etz Dios m̄ibijctzoogixy e ñayyöym̄ijcigixy co anajty ajcxy chajcaagy tujc-huäcxaangixy.

Jadu'n nej je m̄ibijpidi chinaaygixy jugy'ajtcixy

⁴³ Nidüg'óciy ajcxy anajty ooy mijcajee jihuiy. E Jesús y'apóstoles ajcxy ijxpejt etz m̄ijhuinma'n̄ ooy anajty tungixy. ⁴⁴ Nidüg'óciy je jäy ajcxy huidibi anajty ti ym̄ibijccixy ijtp anajty ajcxy tüg mucy, e yajhuäcxcixy

tijaty ajcxy anajty ymüid, mooygixy ymigügtijc. ⁴⁵ Ytoocpy anajty ajcxy yi' ypidägy huidibi anajty ymüid, e chi anajty yajhuäcxciy yi' meen' nije' nije' nej pin ti yajmayjaty. ⁴⁶ Jabom jabom anajty ajcxy ñayyöymugyii ma Dios ytijc, etz nañ ñayyöymugyii ajcxy ma ytijc tzajcaagy tujc-huäcxciy etz ycaaygixy y'uuccixy ni'amugi' jotcuyc müid ajcxy y'oyjot y'oyhuinmañ. ⁴⁷ Ñi'üigixy niyaacxiy yi' Dios, e tüg'óciy jäy nayyajmij'ájtíp anajty ajcxy. Chi je Huindzin Dios yajmayiy jabom jabom yi' mibijcpidijc, yi' huidibi anajty patp nidzoocin.

3

Tüg tecyma'tpi chögy

¹ Tüg xii Pedro etz Juan ypättigiy ajcxy tú'ciy ma Dios ytijc, mijminacy xii anajty, je' je' anajty je hori mina ajcxy Dios mibijctzoogixy. ² Jabom jabom anajty jäy yajnicxcixy ma je Dios ytijc'aguu tüg tecyma'tpi, jadu'n je' anajty ti yma'xung'aty. Chi ajcxy pidägy je tecyma'tpi ma je Dios ytijc'aguu huidi anajty yxii la Hermosa, jigix jim pijctzohuipy meen' ma je jäy ajcxy huidibi tigiiyb ma Dios ytijc. ³ Co je jäy tecyma'tpi ijxy Pedro etz Juan ytigihuaangixy anajty ma Dios ytijc, chi pijctzoy meen'. ⁴ Co Pedro etz Juan ijxy je tecyma'tpi, chi Pedro yminañ:

—Huindixpejtich.

⁵ Chi je jäy huindixpejty, yjijp'ijxpy anajty ti möhuaanip. ⁶ Chi Pedro je tecyma'tpi nimay:

—Ca' nmüididyich plata, oori, huidibi janchtiy nmüidich je' nmöhuip. Müid Jesucristo je Nazaretpi ymic'ajt iich müich nimaayb: Tinaayig etz yöy.

⁷ Huin'it Pedro majch je tecyma'tpi ma a'oygi', e yajtinaygugiiy. Huin'itiy y'oyiiy ymicpijcy je ytecy etz ytecyöy. ⁸ Chi je tecyma'tpi ytinaygugiiy etz chi ñajztibiiy. Chi jada' yöychoñ e ytigiiy ma Dios ytijc müid Pedro etz Juan yöyñip ñidijcni yujctijcni, yam Dios ooy jäymeçh. ⁹ Tüg'óciy je mayjäy ijxy co anajty yöyñip etz jäymeçh yi' Dios. ¹⁰ Je jäy ajcxy y'ijxy'ajtpy anajty ajcxy je tecyma'tpi e ñejhuiyigixyp co je' anajty je' huidibi pijctzohuo'cp pi'c meen' ma Dios ytijc'aguu huidi anajty yxii la Hermosa. Paady je jäy ajcxy ooy chigiiy jihuiiy, co ajcxy ijxy nej anajty yam ti ytunyii ti jyadyii.

Pedro nimidyacy nej anajty je tecyma't ti chögy

¹¹ Je tecyma'tpi huidibi anajty ti chögy ca' anajty ixmach Pedro etz Juan, e tüg'óciy yi' jäy anajty ooy jihuiiygixy huinmaaygixy. Chi mic'amy mayjäy nimujcy Pedro etz Juan jim ma yi' Dios ytijc huinduu huidibi jäy ytiijpy Salomón. ¹² Pedro co jadu'n ijxy je mayjay, chi yminañ:

—Judío yëdyijctijc, ¿nej co mdzachhuinmaaygixy mijcajee? ¿Nej co iich müich ajcxy ychachhuindücxciy jadu'n nej jihuiiy iich ajcxy jada jäy ti nyajtzögyich ti nyajyöychooñich müid ngümmic'ajtich, o müid co iich ajcxy ooy nDios'ojadaty? ¹³ Iich'ajt nDios, je Dios huidi nmij'ap nmijteedy, je Abraham, je Isaac, etz je Jacob y'ojadajt, yi' ti yajtzögy jada tecyma'tpi, jigix yajcömayipy yi' y'ung Jesús huidibi müich ajcxy mgäyeyc ma je tungmüidpi. E co je gobernador Pilato je' najtzmazihuañ, müich ajcxy ca' m'aa'axiiy. ¹⁴ Ma yjapadyii ajcxy mgapijctzoy co huen yajnajtzmaziy, je huidi anajty yajpaatp huädz etz tudägy, chi müich ajcxy mbijctzoy co huen yajnajtzmaziy tüg jäy huidibi anajty ti yjäyay'o'cy. ¹⁵ Jadu'n je jäy ajcxy yaj'o'cy je' huidibi anajty jugy'ajt yejcp. Je huidibi Dios yajjugypijcy ma

anajty ti y'ögy e jada tiy'ajt ñich ajcxy nidiy'ajt'ajtpyich. ¹⁶ Mïid co ti mibicy Jesús yxñ, je mïjhuintma'ñ huidibi Jesús ymïc'ajt ti tuñ mïid jada pa'mjäy huidibi miich ajcxy m'ijxyp mnejhuïyb. Com ti mibicy Jesús paady ti chögy janch yajxondicni, jadu'n nej miich ajcxy nidüg'öciy ti m'ijxcixy.

¹⁷ Chi Pedro yjacmïnañ:

—Nmïgütgïjich, nejhuiybich co miich ajcxy etz mhuindzindijc yaj'o'cy Jesús, mïid co anajty mganejhuïygixy ti anajty ajcxy mduungixy. ¹⁸ Jadu'n cham Dios ti cuyduñ jadu'n nej Dios y'ayucnajtzcaxïybi ymïna'ñ co copicy co yi Cristo yajnaxipy ayo'n. ¹⁹ Paady játyim jothuimbijtcix miich ajcxy ma Dios, jigix ajcxy mbocy yajjötztähuiy. Huin'it je Huindzin Dios xyajniguexipy ajcxy jotcujc'ájtïn huinixñ, ²⁰ e yí' quexamb je Jesús, je Cristo, je huidibi Dios jayijp'aty yhuin'ijx co quexa'ñ ma miich ajcxy. ²¹ Oy jadachambi Jesucristo y'oc-huï'mipy jïlby tzajpjoty ixti cooni Dios anajty yaj'oyïydäy tijaty, co jadu'n yjaay yí' y'ayucnajtzcaxïybi huidibi mïid huädz yjot yhuinma'ñ huidibi ajcxy jecy'ajty tzïnay. ²² Jadu'n Moisés nimay ñich ajt nmïj'ap nmïjteedy jecy'ajty: “Je Huindzin Dios xyajniguxaan miich ajcxy tüg yí' y'ayucnajtzcaxïybi, huidibi pidzimamyb ma miich ajcxy mjuugy nmïgüg jadu'n nej ñich yí' xyguejxy. M'amïdo'idipy miich ajcxy yí' y'ayuc. ²³ Jadu'n yjadipy co tüg'öciy jäy huidibi anajty ca' capxymïdooy je Dios y'ayucnajtzcaxïybi, huädz ajcxy ytïgoydähuiy, e tüg jïbicy ajcxy idipy ma judíojäy ajcxy yajpaady.”

²⁴ Chi Pedro yjacmïnañ:

—Jadu'n jada tüg'öciy Dios y'ayucnajtzcaxïybi, chondacy ma Samuel ixti ma jacjadyïni ajcxy, ñïgapxtay ajcxy jadu'n nej cham ytuñyï yjadyï. ²⁵ Yi Dios y'ayucnajtzcaxïybi ajcxy, miich je' anajty ajcxy mmïj'ap mmïjteedy. E je ayuc huidibi Dios yajnimay Abraham ycuydunaamyb mïid miich ajcxy co jadu'n ymïnañ: “Ngonúucxibich tüg'öciy naax-huïñyjäy mïid tüg miich m'ap m'oc.” ²⁶ Co Dios y'ung y'o'cy, chi Dios yajjügypïjcy jadüg'oc, e quejxy jayijp ma miich ajcxy, jigix xyconúucxïy, etz jigix nidüg'öciy miich ajcxy m'ixmadzipy yi mïjibichuinma'ñ.

4

Pedro etz Juan ma tungmïdpy yhuinduu

¹ Pedro etz Juan jimni anajty tzachmïdmïydaaccixy je mayjäy ajcxy, co oy miingixy je judío teedy ajcxy, mïid je soldado huindzin, je tza-jptijc cuend'ajtpi etz mïid saduceojäy. ² Ooy ajcxy anajty yjotmätcixy co Pedro etz Juan yaj'ixpijccixy anajty je mayjäy etz nïmaaygixy co yi öcpi jugypigipy yí' ajcxy, com co Jesús yjugypicy co y'o'cy. ³ Chi je tungmïdpy ajcxy majch Pedro etz Juan, e chi ajcxy pidacy pujxtïgoty ixti com jabomni, com ti anajty chu'ñ. ⁴ Mayjäy ajcxy huidibi anajty ti amïdo'ijtcixy je Pedro y'ayuc ymïbïjç ajcxy. E hue' je mïbïjçpidijc, ac yëydijctijcpi, yajmïchomujcy jahueen ycamïgoox mïlity.

⁵ Je com jabom ajcxy ñaymújccï jim Jerusalén judíojäy tungmïdpy, je mïjjäydijc etz yi escribas. ⁶ Nañ jadu'n jim anajty Anás huidibi anajty ane'mb je teedy ajcxy, etz je Caifás, je Juan, je Alejandro, etz tüg'öciy teedy mïjtungmïdpy yjugymïgüg. ⁷ Chi ajcxy pidacy Pedro etz Juan cujc'amy ma anajty ajcxy ñaymugyï, chi ajcxy y'amïdooy:

—¿Pïn miich ajcxy ti xymöy cötujcïn co jada jadu'n ti mdungixy?

8 Huin'it Pedro ymïd anajty Espíritu Santo ma yjot yhuinma'ñ, chi ymïnañ:

—Miich ajcxy tungmïdipi etz judíojaý mijjãdyjc, ⁹ yi' ñich miich ajcxy cham xyaj'amidoob yi oybi tibi yajtuñ ma tũg pa'mjãy e nejhuïhuaangixy nej ti chõgy. ¹⁰ Cham nimïydactãyich ma miich ajcxy mhuinduu, jaydëbi ajcxy nejhuïydãhuïpy tũg'ócïy judíojaý, co jadayaabi jãy huïdibi anajty tecyma'tpi, cham yajpaady ya ma miich ajcxy mhuinduu mic oy, miid je mic'ajt huïdibi Jesucristo je Nazaretpi yejcpy, je jãy huïdibi miich ajcxy myajcruudzpejt, huïdibi Dios yajjugypijc co y'o'cy. ¹¹ Yi Jesús jadu'n nipaady nej tũg tzaa oybi, huïdibi ajcxy potzpidijc, ca' yajtũngixy co ytijcojcxïy. Jesús cham ti paady mijtung ma Dios, jadu'n yi' ni paady nej tũg mij tzaa huïdibi ytungbaatp ma poch ytaatz. ¹² Ca' jac ni pin huïdibi jëbi xyajñdzoocim ajt n'alma. Jesucristo yi' je' tũgpajc huïdibi Dios yejc ma jãy ya naaxhuiñ huïdibi jëbi xyajñdzoocim ajt n'alma.

¹³ Co je mijtungmïdipi ajcxy ijxy midoy jadu'n nej Pedro etz Juan ajcxy huïnmic jotmic ycapxcïy, etz nejhuïy co ca' ajcxy y'ixpicïyãyity, chi ajcxy ooy jihuïy huïnmay. Nañ yi' ijxajp ajcxy co je' anajty huïdibi ajcxy ti miid huïdity Jesús. ¹⁴ Cha co yjactimjãmity anajty je jãy huïdibi anajty ti chõgy ytïnãy miid Pedro etz Juan, paady ajcxy ca'jajty nej midzïptzoonipy. ¹⁵ Chi je tungmïdipi ni'ane'mdiy huen yajpidzimyi Pedro etz Juan ma je mayjãy anajty ñaymugyï, jigix ac jëyi tungmïdipiãy ñyõyaangixy capxyõyaangixy Pedro etz Juan ypocy. ¹⁶ Chi ajcxy ymïnañ:

—¿Ti cham nduunim miid yjiibi jãy ajcxy? Com tũg'ócïy jãy huïdibi tzïnaayb ya Jerusalén ñejhuïyb ajcxy co ti tũngixy mijhuïnma'ñ, e ca' huaad ñich ajt nmïnaanim co ca' yjanchity. ¹⁷ Tzoc capx'adujcim co ca' huaad ajcxy jacnimïydãgipy Jesús jadachambi etz jacnicxpi xii tiempo.

¹⁸ Chi ajcxy mijhuoy Pedro etz Juan, chi ajcxy nimay co ca' huaad ajcxy ni nej ocnimïydaacnïp, ni ca' jacyaj'ixpigipy miid Jesús yxii. ¹⁹ Huin'it Pedro etz Juan y'adzooy:

—Huinmaaygix miich ajcxy ci'm pen tiy'ajt jada ma Dios co ñich miich ajcxy ngapxycõbigipy jayijp, ca'ydi yi' Dios. ²⁰ Com ñich ajcxy ca' nni'amonaangixy jadu'n nej ñich ajcxy ti n'ixy ti nmïdoy.

²¹ Huin'it je tungmïdipi ajcxy adzigi'ñ migapxy Pedro etz Juan, e najtzmazhïy ajcxy. Ca' ajcxy mihuïnma'ñybaty nej tzaachytunipy Pedro etz Juan. Com tũg'ócïy jãy yjãymejchpy ycõmaayb anajty yi' Dios jadu'n nej anajty ti ytuñyï ti yjadyï. ²² Je jãy tecyma'tpi huïdibi tzooc co Dios mijhuïnma'ñ ytuñ, ymïd anajty yjimijt huïxchiguiãpx naxy.

Je miijcpidijc ajcxy pijctzoogixy ma Dios jotmic'ajt

²³ Chi Pedro etz Juan co yajnajtzmazhïy, chi ajcxy ñicxy ma ymigũgtijc anajty, yajmïdmïydactay tũg'ócïy jadu'n nej teedy huïndzin etz mijjãdyjc anajty ti ñimãayigixy. ²⁴ Co jada ayuc ajcxy midoy nidũg'ócïy ajcxy tũ'cïy yjot yhuïnma'ñ pidacy, chi ajcxy Dios miijctzoy ymïnañ ajcxy:

—Huïndzin Dios, miich je' ti m'oyduñ je tzajp, je naaxhuiñybi, je mejy etz tũg'ócïy tijaty. ²⁵ Miich miid mEspíritu je David myajcapxy, e yi' jadu'n ymïnañ:

¿Nej co jada naaxhuiñybi jãy chachhuaangixy chachjihuïygixy, e yi' jãy ajcxy huïnmaaygixy huïdibi ca' ytimytiijity?

²⁶ Yi reydiyjc ya naaxhuiñybi midziptzooñ ajcxy yi Dios. Etz je tungm#dipi cajp cajp ñaymujci ajcxy, midziptzooñ ajcxy Huindzin Dios, etz midziptzooñ ajcxy Cristo.

²⁷ Com janch co je rey Herodes etz yi gobernador Poncio Pilato ñaymujci ya ma jada cajp miid huidibi ca' yjudiojáyity ajcxy etz miid judiojáy ajcxy, midziptzooñ ajcxy yi m'ung Jesús huidi anajty ti mhuin'ixy. ²⁸ Yi' ajcxy ti cuydungixy tüg'óciy jadu'n nej miich, Huindzin Dios, ti myajnigödugiy jadu'n nej ytuniiyb yjadiiyb. ²⁹ Jadachambi Huindzin Dios, ix jadu'n nej yi tungm#dipi xychachmijotmá'tcixyich. Mo' yi mdumbi ajcxy jotmic'ájtín, jigix m'ayuc ajcxy capxhuäcxipy amic jotmic, ³⁰ e miid miich mmic'ájtín chögipy pa'mjäydiyjc, tunipy ajcxy tijaty iixpejt etz mijhuinma'ñ miid yi m'ung Jesús yxií, huidibi miid huadz yjot yhuinma'ñ.

³¹ Co ajcxy mibijctoday, chi je naax chuyuuy ma anajty ajcxy tügmuycy yajpaatcixy, etz nidüg'óciy yi' ajcxy ymic'ajt mooyi je Espíritu Santo, e yi Dios y'ayuc capxhuäcxicy anajty amic jotmic.

Je mibijcpidijc tú'ciy anajty ajcxy yjot yhuinma'ñ

³² Je mayjäy huidibi anajty ti mibicy, tú'ciy ajcxy yjot yhuinma'ñ. Ni pin anajty ycamina'ñ co naydüg jè'adyii. Hue' anajty ymínaangixy co tú'ciy jè'ájtigixy. ³³ Je majmetzpi Jesús y'ayuccapxhuäcxpi amic jotmic capxhuäcxpy je tiy'ajt jadu'n nej je Huindzin Jesús yjugypijcy co y'o'cy. E mij ajcxy Dios ypubejti. ³⁴ Ma je' ajcxy ca' ni ti yajmayjajtcixy, com tüg'óciy tijaty anajty ajcxy ymiid ñaax o ytijc ytoocpy anajty ajcxy, e yejccixy anajty meen. ³⁵ Chi je meen yajc'idigiiygixy je apóstoles ajcxy e yi' ajcxy moy nidüg nidüg pinjaty yajmayjajtp. ³⁶ Jim anajty miid je' ajcxy tüg levita jäy huidi anajty yxií José, huidibi ma'xung'ajt ma yi ñaaxjot meyy agujc huidibi yxií Chipre, je huidibi je majmetzpi Jesús y'ayuccapxhuäcxpi, yxií moy Bernabé, huidibi huimbizim je yajjotcuje'ajtpi. ³⁷ Je Bernabé tocy ytundac huidibi anajty ymiid, e chi mimiin je meen, e yajc'idigiy je apóstoles ajcxy.

5

Je Ananías etz Safira ajcxy Dios midundigoy

¹ Chi jadüg yédyjc, huidi anajty yxií Ananías, miid ytöxyijc, Safira, toogy ajcxy tüg it ytundac. ² Ananías ñayyajnihui'mi jac'anaxy je meen, e yajninicxy Jesús y'apóstoles ajcxy je jac-hueenip, jadu'n nej jihuüy yejctay tüg'óciy, etz yi' ytöxyijc ñejhuüyb anajty. ³ Chi Pedro nimay Ananías:

—Ananías, ¿nej co myajtuñ je mujcu' yhuinma'ñ, e mhuin'íña'ñ je Espíritu Santo, e ti mbugoñ jac'anaxypí meen nej ti tzoo'adyii yi pidägy tiibi mdoogy? ⁴ ¿Nej ca' anajty yi' miich mdundac'adyii? E co ti mdoogy, ¿nej ca' anajty je' miich mmeeñ'adyii? ¿Nej co jadu'n ti mdundigooy? Dios ti mhuin'íñ, canan jäy.

⁵ Co jadu'n midoy, jimiiy Ananías yciday, e chi y'o'cy. E tüg'óciy jäy ajcxy huidijaty nejhuüy, ooy ajcxy chigiiy. ⁶ Huin'it ymiin jadyii yujcyecp#dijc, chi ajcxy mo'ñ Ananías ñinicx, e oy ajcxy yajnaaxtigiy.

⁷ Codugig hori naxy, oy ytiigiy je Ananías ytöxyijc, e ni ca' nejhuüy anajty ti ti ytuñyii ti yjadyii je ñäy. ⁸ Pedro y'amidoohui:

—Yajniimaaygich, ¿nej janch jadu'n ti mdoocixy yi mdundac jadu'n nej ti mgapxcixy?

Chi je töxyjäy y'adzooy:

—Janch jadu'n ti ndoogyich.

⁹ Chi Pedro ymīnañ:

—¿Nej co ti mneygápxigixy mhuin'inañ yí Espíritu Santo? Cha ma tijc'aguu je jāy ajcxy ytināy huidi oy ti yajnaaxtigiy mñāy, e jadachambi miich ajcxy xyajnicxaam nañ jadu'n.

¹⁰ Tim huin'itiy Ananías ytōxijc yciday, e chi y'o'cy. E chi oy ycidāgy ma Pedro ytecymijc. Co je yujcyecpidijc ytigīy, chi ajcxy je' paaty ōgy. Chi ajcxy yajpidzimy etz oy yajnaaxtigiy ma ñāy ymijc. ¹¹ Chi tūg'óciy je jāy ajcxy huidibi Jesús mibijcp etz tūg'óciy huidibi midou jada nej ti yjadyii ti ytunyii, chi ajcxy ooy chigiy.

Canaag mij'ixpejt etz tiy'ajt

¹² Je majmetzpi Jesús y'ayuccapxhuācxpi ooy anajty ajcxy Dios ymic'ajt yajniguēxici etz iixpejt yejccixy ma yí jāy ajcxy. E tūg'óciy jāy ajcxy huidibi Jesús mibijc jabom jabom anajty ñayyōmújicigixy ma Dios ytiyc huinduu huidibi yxi Salomón. ¹³ Ca' jac ni pin anajty mijnicxpedañ mijyōypedañ je' ajcxy. E je jāy ajcxy yjacyajmij'ajtpy huidi Jesús anajty ooy mibijccixyp. ¹⁴ Mayjāy oy mibijcni Jesús y'ayuc, yēydijctijc etz tōxyjāydijc. ¹⁵ Etz ixti pa'mjāydijc anajty ajcxy yajnicxy mījtūgujic cijx'aam pidaaccixy, jigix co Pedro ñaxipy jim ycadimjegyity co nicxy y'aa'ap yjāty ma je pa'mjāy. ¹⁶ Nañ jadu'n mayjāy chooñ anajty huidijaty huington ycajp, ymiingixy Jerusalén, mīdmiingixy pa'mjāy, etz huidibi ca'oybi mīd ma yjot yhuinmañ, e tūg'óciy yajzooctaayb anajty ajcxy.

Pedro etz Juan yaj'ixhuidijtcixy yajpahuidijtcixy

¹⁷ Huin'it je teedy mījtungmīdipi etz huidibi saduceo iixpījcīn ymījpidacp ooy ajcxy yajca'oy'ixy, ¹⁸ e co ajcxy majch je apóstoles ajcxy, chi ajcxy pidacy ma je mijpujxtijc. ¹⁹ Chi Huindzīn Dios tūg y'āngel je huin'it coodz yaj'ahuach je pujxtijc aguu, yajpidzimy ajcxy, chi ajcxy nīmay:

²⁰ —Nīxcix, tinay'ahuīyigix tzajtīgoty, yajmīdmiydaaccix yí mayjāy ajcxy Jesucristo ytiy'ajt nej jēbi jāy ajcxy paadīpy jugy'ājtīn jemybi.

²¹ Co jadu'n midoy, chi com jabom ytigīy ajcxy jopyñi tzajtīgoty. Jiiby je' ajcxy anajty ñiyaj'ixpijcco'ni.

Chi je teedy mījtungmīdipi etz jacpīnjaty mīd, chi ajcxy capxyñiguejy yí judío jāy ymījjāydijc etz ixpicytījc co huen junta jadyii. Chi ajcxy capxyñiguejy huen nicxy yajpidzimy yí jiiby pujxtīgoty yí apóstoles ajcxy. ²² Co je policīas ajcxy ymejch ma je pujxtijc, ca' ajcxy paady je apóstoles ajcxy. Chi ajcxy huimbijtni mīd tiy'ajt, ²³ chi ajcxy nīmay:

—Hue' iich ajcxy ti nbaadcixy yí pujxtijc aducy, etz je soldadtijc jim tijc aguuy yjacuend'ajtcixy. Chi co iich ajcxy nyaj'ahuāch je pujxtijc, ca' iich ajcxy ni pin ti nbaatyich jiiby pujxtīgoty.

²⁴ Co jadu'n ajcxy midoy, je teedy mījtungmīdipi etz je soldado huindzīn, etz jacjadyii teedy huindzīn ajcxy, chi ajcxy ooy huinmay nej jada y'ocogixīhuip. ²⁵ Huin'it tūg jāy mīñ huidibi nīmaayī ajcxy:

—Je jāy huidibi miich ajcxy mīdac pujxtīgoty, chim je' ajcxy tzajtīgoty yaj'ixpijccixy yí mayjāy.

²⁶ Chi je soldado huindzīn mīd soldadtijc ñicxy ma yí apóstoles ajcxy jāy yaj'ixpijccixy, chi ajcxy yajnicxy oy'amy, com tzigīyib anajty ajcxy co je mayjāy chaagādzīyb. ²⁷ Co ajcxy yajmīñ, chi ajcxy pidacy ma je

maytungmüdpí yhuinduu. Chi je teedy mijtungmüdpí je apóstoles ajcxy nimay:

²⁸ —Hich ajcxy tí ngapx'aducy co ca' huaad m'ocjacyaj'ixpíjccixni ma Jesús yxii. E ¿tí tí mdungixy? Tí myajhuäcxtaaygixy yí m'ixpíjcin ma Jerusaléngajp, e hich ajcxy müich pocy xyjátyim yajmihui'mam co Jesús y'o'cy.

²⁹ Chi Pedro etz jacjadyii apóstoles ajcxy y'adzooy:

—Copicy hich ajcxy ngapxycöbigipyich yí Dios jayijp ca'ydi jäy. ³⁰ Je Dios huidibi hich ajt nmij'ap nmijteedy y'ojadajt, yí' yajjugypijc je Jesús huidibi müich ajcxy myaj'öc cruudcixy. ³¹ Je Dios Teedy jadachambi hue' Jesús müidity aa'oy'amy jilby tzajpjoty, e tí pidägy ane'mbi etz yajnidoocpi jigix yí judío jäy ajcxy yjothuimbidity e yajhuinmeecxipy ajcxy upocy. ³² Hich ajcxy tíy'ajt nyejcpy müid jada ycixpi, etz nañ jadu'n je Espíritu Santo huidibi Dios ymooyb pinjaty capxymidoohuip.

³³ Co je jäy ajcxy jadu'n midoy, chi ajcxy ooy yjotmätcoty, chi ajcxy jayaj'ögañ. ³⁴ Huin'it ytinayigy ma je naymujctac tüg fariseojäy, hue' anajty yxii Gamaliel, hue' je' anajty Moisés yley ñihuindzin'ájtíp. E jäy ajcxy ooy anajty yajmij'ajtcixy je Gamaliel. Chi je' ni'ane'mdüy co huen yajpidzimyíi tzojcyi jilby tiba'y je apóstoles ajcxy. ³⁵ Chi Gamaliel nimay yí tungmüdpí ajcxy:

—Judío yëydijctijc ajcxy, íxcim tí mdungixy müid jada jäy ajcxy. ³⁶ Jäy Metz müich ajcxy co jecy'ajty je Teudas ypidigy yminañ co je' ymijity yjanchity, e chi ypanicxi oy nimidaax migo'pxti yëydijc. Chi ajcxy yaj'o'ci, chi tüg'öciy huidibi anajty tí ypanicxyii yöyhuäcxtay, e jadu'ñyi je' ajcxy ñitigoyday. ³⁷ Jacnamni je huin'it xii mina cajpjäy anajty ñecypejtcixy, ypidigy Judas huidibi tzon Galilea. Mayjäy ypanicxi; nañ jadu'n ajcxy yaj'o'cy, e tüg'öciy jäy huidibi panicxy jadu'ñyi ajcxy yöyhuäcxtay. ³⁸ Paady hich müich ajcxy jadu'n nimaaygixy, ixmajtzcix yí apóstoles ajcxy, e ca' mmijyöybejtcixy. Peni jäy yí y'ayuc ytiy'ajt huidibi ajcxy ymüid, cixip tigoyip yí. ³⁹ Pen Dios y'ayuc ytiy'ajt yí' ajcxy ymüid, ca' ajcxy mjadipy nej myajcödigöoygixyipy. Jaty nayguend'ájtigixy, ca' jecyity co Dios anajty müid mdziptungixy.

⁴⁰ Nidüg'öciy ajcxy jäygidacy Gamaliel ycapxhuíjin. Huin'it ajcxy mijhuoy yí apóstoles ajcxy. Chi ajcxy tzaachytuñ, chi ajcxy c'ajty, etz capx'adujcy co ca' huaad Jesús y'ayuc jaccapxhuäcxip. Huin'it ajcxy najtzmadziy. ⁴¹ Je apóstoles ajcxy ypidizimy ajcxy ma tungmüdpí ajcxy yhuinduu ooy yjotcujcity co Dios jadu'n tí aa'ixiy co huen tzaachytuñyíi müid Jesús yxii ycixpi. ⁴² E ooy ajcxy yaj'ixpíjccixy etz nimiydaaccixy Jesucristo jabom jabom jadu'n tzajtigoty nañ jadu'n majaty tijc.

6

Chi ajcxy yajñibejty huixtujc mutztungmüdpí

¹ Je huin'it xii ajcxy huidibi ixpíjcp Jesús y'ayuc ñigi anajty ñimayiy'adiitcixy. E huidibi anajty capxp griego ayuc ytigiiy nayñigápxip müid huidibi judío y'ayuc capxp. Yminaangixy co yí griegojäy co'ögy töxyjädjic, ca' anajty ajcxy paady quipxyjaty müid je judíojäy co'ögy töxyjädjic caayin uucin jabom jabom. ² Huin'it yí majmetzpi apóstoles ajcxy yajnaymujctaayi je jäy huidibi Jesús mübijcp, chi ajcxy yminañ:

—Ca' huaad ñich ajcxy Dios y'ayuccapxhuäcxin n'ijxmajch, e nicxyich caayin uucin yajhuäcxixy. ³ Paady miich ajcxy migügtijc nayhuin'ijxigix huixtujc yëdyictijc huídibi oy yajmij'ajtni Dios, huídibi huädz oy yhuinmañ ymüid, huídibi je Dios yjihuiñ ymic'ajt müid, e huen ajcxy tung'adüib jada tung. ⁴ ñich ajcxy njacmibijctzohuamy Dios, etz ñich ajcxy njacyaj'ixpigamy Dios y'ayuc.

⁵ Tüg'óciy ajcxy jäygidacy je' ayuc. Chi je mayjäy huin'ijxy Esteban huídibi ymüid ooy ymüibjcin, etz ymüid Espíritu Santo. Nañ huin'ijxy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudíojäyity. Hue' je' anajty chooñ jim Antioquía, jécyip anajty jipptigiyñi judíojäy ytiy'ajt. ⁶ Chi ajcxy yajnicxy je jäy ma je apóstoles ajcxy. Chi ajcxy je apóstoles Dios mibijctzoy e cñixajy ajcxy.

⁷ Je Huindzin Jesús y'ayuc nigí anajty jäy tzachnejhuñi. E je mibijcpidijc nigí anajty ajcxy chachnimayñi jim Jerusalén, ixti may judío teedy ajcxy ymüibjcy.

Majch ajcxy Esteban

⁸ Je Esteban ymüid anajty Dios ymic'ajt etz y'oy'ajt e oy mijhuinmañ tuuñ, etz yejcy ijxpejt ma jäy ajcxy. ⁹ Huin'it xiñ nijëjity ixpicytjic ooy ñay'ijxquixigixy y'ixpijcin müid Esteban jim ma judíojäy ajcxy ñaymujctac huídí anajty yxiñ Libertados. E jim anajty Cirene jäy, Alejandria jäy, Cilicia jäy, etz huídibi tzomb jim Asia ñaaxjot. ¹⁰ Ca' ajcxy mimadacy Esteban com hue' je' anajty ycapxy müid yhuijy'ajt ycuje'ajt huídibi je Espíritu Santo anajty mooyip. ¹¹ Chi Esteban ymüidzip ajcxy mujuy jäy huídibi jëbi ñihuambety Esteban, co ti anajty ooy ycapxtigooy etz ni'ojy Moisés etz Dios. ¹² Jadu'n ajcxy yajyuümügy yaj'oxígy yi jäy mijjäydic, etz huídibi ajcxy yaj'ixpijcp Moisés yley. Chi ajcxy mimadacy majch ajcxy Esteban, yajnicxy ajcxy ma je judíojäy ymüitungmüidpi etz ixpicytjic ñaymüjicigixy. ¹³ Chi ajcxy ixtaayi jäy huídibi ñihuambediib, chi ajcxy yminañ:

—Jada Esteban jibic nigapxy yi Dios ytijc etz Moisés ytiy'ajt. ¹⁴ Ti ñich ajcxy midoy co yminañ co Jesús je Nazaretpi yjidamy je Dios ytijc, e yajtigadzañ Dios ytiy'ajt jadu'n nej Moisés ajt xymooyim.

¹⁵ Huin'it je judíojäy tungmüidpi e tüg'óciy jäy nej anajty ajcxy jim ñaaygixy huindixpejty ajcxy Esteban. E chi ajcxy ijxi yhuiñyijp jadu'n anajty quëxígy nej y'ángel yhuiñyijp.

7

Esteban ñaygohuaani ma tungmüidpi yhuinduu

¹ Huin'it je teedy müitungmüidpi yaj'amidooy Esteban:

—¿Nej janch jadaji?

² Chi Esteban y'adzooy:

—Migügtijc ajcxy etz mijjäydic ocmidoogix. ñich ajt nDios mijpi janchypí nayquëxici ma ñich ajt nmij'ap nmijteedy Abraham jecy'ajty co anajty jim ity Mesopotamia ñaaxjot, ca'ni anajty chinaydacpiy jim Harán. ³ Chi Abraham Dios ñimaayi: “Ixmatz mnaax mgajp etz tüg'óciy m'amigügtijc, e nicx ma yi naaxjot huídibi myajniñihuamyb.” ⁴ Chi Abraham chooñ ma yi Caldea ñaaxjot, e nicxy tzinaydacpijcpí jim Harán. Co yteedy oy y'o'cni, chi Dios Abraham yajmiñ ma jada naaxjot ma miich ajcxy cham mdzináy. ⁵ E ca' Dios moy Abraham jada naaxjot ya, ni ca' ma yhuäcxtagipy. Hue' je' janchtiy yaj'ahuaníy co möhuañiy y'ap y'oc, e

co anajty je' ajcxy jëdiib. Oyñi anajty Abraham ca' y'ung müidity co Dios ymígapxi. ⁶ Nímaayi Dios co y'ap y'oc y'adzínahuípy ajcxy ma huingjáy ñaaxjot, etz chi ajcxy ytumbi'adiiyb etz chaachytuníyb mídaax mígo'px jimíjt. ⁷ Nañ jadu'n Dios nímay Abraham: “Ndzaachytunípyich je naax cajp ma yí m'ap m'oc anajty ytumbi'adyii. Chi chooníp ajcxy jim, e chi xymíduunípyich ma jadayaabi it.” ⁸ Dios ytuun tüg capxytuunín müid Abraham, co huen ajcxy yajtiy'ajttíhuip. Paady co Abraham y'ung Isaac yma'xung'ajty coductujc xí ajcxy oy tíy'ajttíy. Nañ jadu'n Isaac ymang Jacob, e Jacob yí ymang nímajmetzpi ajcxy, huídibi ajcxy ñi'ap'ajty yí nímajmetzpicypí Israel ycajp.

⁹ Chi Esteban yjacmínañ:

—Je' ajcxy Jacob ymang, ích ajt nmíj'ap nmíjteedy, ymí'íjxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios müid anajty y'ity José, ¹⁰ etz nihuaañ yajzoocy ma ayo'n jotmay. Chi Dios moy íxpíjcin jigix cómay ypidzimípy ma Faraón, je Egipto jáy yrey. Chi je rey José tung moy huen ane'my je Egipto naaxjot etz ane'mípy je rey ytíj.

¹¹ Huin'it xí ymíñ míjyuu míj'ayo'n jim Egipto etz jim Canaán ñaaxjot. Je huin'it xí ích ajt nmíj'ap nmíjteedy ca' anajty ajcxy paady ti ycayipy. ¹² Co Jacob oy nejhúy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huídibi ích ajt nmíj'ap'ajtm nmíjteedy'ajtm. Chi ajcxy y'oy tügtecy trigo juuyb. ¹³ Je mímejtz'ocpi co ajcxy oy trigo juy, huin'it José ñayñígapxi ma y'ajch ajcxy. E chi je rey nejhúy píñjáy je' anajty je José. ¹⁴ Chi José capxyñiguejxy huen cidaaccíxy jim Egipto yí yteedy Jacob müid tüg'óciy yjuugy ymígüg. Hue' anajty ajcxy ñaybaattáayígíxy nídugi'px majmoxc jáy. ¹⁵ E jadu'n yajty co Jacobo oy chinaydacpícy jim Egipto. Jim oy comjey y'o'cni. Nañ jadu'n jim ajcxy y'o'cy may ích ajt nmíj'ap nmíjteedy. ¹⁶ E chi Jacob yjuugy ymígüg com jey yajpídzimy Jacob ypajc ma ñaaxtigíy, e chi ajcxy yajnicxy jim Siquem, oy pídaaccíxy ma je o'cpi jut huídibi Abraham anajty ti juy meeñyígíxy ma Hamor ymang jim Siquem.

¹⁷ Chi Esteban yjacmínañ:

—Ytimypadaanípy anajty tiempo nej anajty Dios tí yaj'ahuaníy Abraham. Tí anajty yí judíoáy ooy ymayíyñi jim Egipto. ¹⁸ Chi oy jadüg rey ytígíy ane'mbi huídibi ca' íxy'adyii José. ¹⁹ Je rey yhuin'íñ ích ajt nmíj'ap nmíjteedy, e oy ajcxy chaachytuun. E chi ane'my co huen y'ung ajcxy níguecytaayígíxy huídibi anajty ajcxy ma'xung'ajtp, jigix y'ó'ccíxípy. ²⁰ Huin'it tiempo oy yma'xung'ajty Moisés, je huídibi ooy Dios jáygidacy. Chi Moisés ytaj yteedy tugüg po' yajyeeci ma ytíj. ²¹ Co ajcxy yajnígueeci, chi je rey ñíx je' agondígíy, e yajyeegy jadu'n nej yci'm'ung. ²² Paady Moisés íxpíjcy tüg'óciy jadu'n nej Egipto jáy anajty ajcxy y'íxpícyty, e ooy ymadacy müid y'ayuc etz müid ytung.

²³ Co Moisés anajty müidity huixchíguípx jimíjt, chi pídac yhuinma'ñ co níxxy íxa'ñ je' y'amígügtíj je Israel y'ap y'oc. ²⁴ Chi Moisés íjxy co tüg egípicioáy chaachytuñyí tüg je' y'amígüg. Chi Moisés yaj'o'cy je egípicioáy, yaj'ahuimbíjty nej anajty y'amígüg yajzaachytuñ. ²⁵ Hue' Moisés tíjy co je' y'amígügtíj ajcxy huen nejhúy huinjíhuíy co Dios níhua'naaníp ma ymídzíp müid Moisés ycíxpi. Chi ajcxy ca' huinjíhuíy co Moisés níhua'naaníp. ²⁶ Com jabom Moisés paty mejtz Israel jáy

chachtziptungixy. Chi Moisés jayajxemaañ je tzip, chi ñimay: “Miich ajcxy nay'amigüg'ajtip, ¿nej co mdziptungixy miich ajcxy miñ xyipy?”²⁷ Je huidibi anajty ymígüg tzaachytuumb huin'it najtztijy Moisés, ñimay: “¿Pin ti xypidägy huindzin etz tydumbi ma ñich ajcxy?”²⁸ ¿Nej xyaj'ögaamich jadu'n nej axiy myaj'o'cy yi egipciojáy?”²⁹ Co Moisés jadu'n midoy, chi yqueegy, ñicxy jim ma Madián naaxjot. Moisés jecy y'adzinaay jim Madián naaxjot, e jim oy ypicxy. Chi ytöxyijc paty metz ymang.

³⁰ Huixchigüipx jimijt naxy, huin'it jim adügtuum ma je cop huidibi yxñ Sinaí, ñayguëxici tüg ángel jinjoty ma tüg quipymang huidibi anajty tzachtooyb. ³¹ Chi Moisés ooy jihuiy huinmaay müd je' ycixpi huidibi anajty y'ijxyp. Co oy mihuingoñ, chi midoy co je Huindzin Dios ñimäyii: ³² “Ñich Dios huidibi mmij'ap mmijteedy ajcxy Abraham, Isaac etz Jacobo Dios'ajtpy.” Chi Moisés chiyuygoty, ca' anajty ocjac-huindicxpedaani. ³³ E je Huindzin Dios ñimaayi: “Jen mgíg, com je it ma miich mdinäy, Dios yi' y'it. ³⁴ Ñich ti n'ixyich njäyich nej tzaachypi paatcixy jim Egipto. Ti nmidooyich co yi'ajcxy yäxy ytinäy müd je tzaachypi ycixpi. Ti ngidägyich co ajcxy ngohuaanip. Ñich miich nguexamyb jim Egipto ma yi Israel jäy ajcxy.”

³⁵ Chi Esteban yjacminañ:

—Co Moisés oga'n ñicxy ma ñich ajt nmij'ap nmijteedy ca' ajcxy cöbijcy huen y'ane'mäyib, chi ajcxy yminañ: “¿Pin ti xyñimäy co ñich miich ajcxy nhuindzin'adüyb?” Co ñimetz'ocpi Moisés ñicxy ma yi Israel jäy, je taabi anajty je ángel ti ymígapxyii jinye'ñ agujc, chi ajcxy cöbijcy. ³⁶ Je Moisés je' yajpidzim ñich ajt nmij'ap nmijteedy jecy'ajty jim Egipto. Moisés ytuun oy mijhuinma'ñ etz ijxpejt huixchigüipx jimijt jim Egipto, jim ma tzaptz mejy, etz jim ma migtigüduum. ³⁷ Je Moisés huidibi jecy'ajty ñimay je Israel jäy: “Dios y'ijxtihuiy tüg jäy ma miich ajcxy m'ap m'oc huidibi najtzcapxihuiy yi' y'ayuc, jadu'n nej ti xy'ijxtüyich ma miich ajcxy. M'amido'ijtip ajcxy yi' y'ayuc.” ³⁸ Je Moisés jim je' anajty migtigüduum müd je mayjäy. Chi jim je Dios y'ángel müd mïydacy ma je cop huidi yxñ Sinaí, etz Moisés yajnax Dios y'ayuc ma ñich ajt nmij'ap nmijteedy. Moisés ycöbijc Dios y'ayuc huidibi jugy'ajtin huinixñibi müd, etz jayhui'my müd ñich ajt ycixpi.

³⁹ Chi ñich ajt nmij'ap nmijteedy ajcxy jecy'ajtpy ca' anajty ajcxy capxcöbigeangixy Moisés, ca' anajty cöbijccixy je' y'ané'min, chachhuimbidaangixy jim Egipto. ⁴⁰ Chi ajcxy Aarón ñimay: “Ndzojycpich ajcxy co miich oyduñ tüg Dios huidibi ñich ajcxy xyhuinhuoohuip, com ca' nnejhuüyim ti jada' ti yjadyii je Moisés huidibi ajt xyajtzoonim Egipto ñaaxjot.” ⁴¹ Chi oyduñ ajcxy tüg huajmang. Chi huindzigüy ajcxy je huajmang huidibi anajty ti yajcojixy, e ooy ajcxy mijotcuyc'ajty huidibi ci'm anajty ti yajcojy. ⁴² Huin'it xñ ajcxy Dios y'ixmajtzi, huen ajcxy ojadaty yi xñ, yi po' etz madza'. Com jadu'n Dios y'ayuc cojaaybi cojaay co Dios jadu'n yminañ:

Israel jäy ajcxy canan ñich je' huidibi ti mhuindzigüygixy jim migtigüduum huixchigüipx jimijt.

⁴³ Ti mgüynicxixy Moloc ytijc etz yi Renfán ymadza', tzadzech, quipychech etz oori oyduñ huidibi miich ajcxy ci'm myajcoj huidibi anajty ajcxy m'ojadadamy. Paady ñich miich ajcxy nyajpidzimaangixy ma yi mnaaxjot, e nguexaangixy jiguem jim Babilonia ñinaxy.

44 Chi Esteban yjacminañ:

—Jim miñtigüduum ñich ajt nmij'ap nmijteedy ymiid anajty cochactijc ma anajty ajcxy Dios huindzigüy. Jiiby anajty ajcxy yujccüy je tzaa ma Dios ytiy'ajt ycojaayity. Je cochactijc ajcxy ycoj jadu'n nej anajty ti yaj'ane'myii Moisés, e nej anajty yajni'ixiyii nej tunipy. ⁴⁵ ñich ajt nmij'ap nmijteedy mihui'm je cochactijc, e ñich ajt nmij'ap nmijteedy huidibi miññ ma jada naaxjot miid Josué, chi mimiññ ajcxy je cochactijc je taab ajcxy mimadacy je ymidzip canaag'agajp. Dios yajpidzim je' ajcxy ymidzip ma je naaxjot, jigix yajcidiñhuiñ ñich ajt nmij'ap nmijteedy. Yajtuuñ ajcxy je cochactijc, ixti cooni David ytiñy ane'mbi. ⁴⁶ Dios yjäygiidaac je rey David, e David yjacojañ anajty tüg tijc oyduñ ma jëbi yaj'ojadaty yajhuindzigüy Dios, je Dios huidi Jacob mijpidac jecy'ajty. ⁴⁷ Per Salomón je' oy cojy Dios ytiñc. ⁴⁸ Oy yi Dios tzajpjoty pi ca' chinäy ma yi tijc tiibi jäy cojy. Jadu'n nej je Dios y'ayucnajtzcaxiñybi jecy'ajty jaybety co Dios jadu'n yminañ:

⁴⁹ Je tzajp hue' je' ñich n'ane'mdac, jada naaxhuiñybi ñich ndecypocxtac. ¿Ti tijc ñich miich ajcxy xycojaanip? ¿Ma je it huidibi it ma ñich jëbi nbocxy?

⁵⁰ ¿Nej cay ñich ti n'oydundäy tüg'óciy?

⁵¹ Miich ajcxy ooy mjetjuuñity, ca' mgapxymidoy Dios. Jadu'n Esteban yjacminañ:

—Jadu'n miich ajcxy mjet mhuinmañ miidity jadu'n nej jäy ajcxy huidibi ca' Dios ytiy'ajt nejhuiñy. Miich ajcxy jatyim midzip'ajtpy je Espiritu Santo. Mdügüyb ajcxy miid mmij'ap mmijteedy. ⁵² Miich ajcxy mmij'ap mmijteedy chaachytuun tüg'óciy Dios y'ayucnajtzcaxiñybi. Yi' ajcxy yaj'o'c Dios y'ayucnajtzcaxiñybi huidibi jayijp'aty najtzcaxiñy co yminañ tüg jäy huidibi tudägyip. E co je tudägy jäy ymiññ, chi miich ajcxy agojix myaj'o'cy. ⁵³ Je Dios y'ángel miich ajcxy xymooy je Dios ytiy'ajt, e ca' ajcxy mgöbijcy.

Yajtzaagögätzcixy Esteban

⁵⁴ Co je mayjäy midoy jadu'n nej Esteban yminañ, chi ajcxy mijotmätcoty Esteban, chi ytiñy ajcxy tiitzmucxpi tiitzqueetpi. ⁵⁵ E chi je Esteban jihuñy je Espiritu Santo ma yjot yhuinmañ, chi chajp'ijxy, e ijxy yi Dios y'oy'ajtin etz ijxy Jesús ytinäy a'oy'amy ma Dios Teedy. ⁵⁶ Chi Esteban nimay je mayjäy:

—¡Ijxcix! N'ijxypich yi tzajp ahuädz, e n'ijxypich je jäy huidibi tzoon tzajpjoty ytinäy a'oy'amy ma Dios Teedy.

⁵⁷ E chi je mayjäy ajcxy ytätz'ac amo'cxy, chi ajcxy ytiñy huambi jihuñybi, e chi ajcxy nimujcy yajmujcy Esteban. ⁵⁸ Chi ajcxy yajpidzimy Esteban cajppa', je' oy cögätzcixy. Je tiy'ajt yejcpí huidibi jadu'n idüitz, chi yjocxhuit ajcxy yajmihui'my tüg yeeg'anäg huidibi anajty yxi Saulo. ⁵⁹ Jim anajty ajcxy Esteban tzachcätzcixy. Chi Esteban Dios miñijctzoy, yminañ:

—Huindzin Jesús, cöbijcigich n'alma.

⁶⁰ Huin'it ycoxtinay'ahuñy, e chi yaaxqueegy mic yminañ:

—Huindzin, ca' mbocy ixipy nej ajcxy xytuñich.

Co jadu'n Esteban yminanday, chi oy y'ögy.

8

Saulo pahuidijttägy ooy miñijcpidijc

¹ Saulo ytuun quipxycapxy müd huidibi ajcxy yaj'o'c Esteban.

Huin'it xii yaj'ixhuidijt yajpahuidijt pinjaty anajty Jesús mibijcp jim Jerusalén. Tüg'óciy je jäy ajcxy huidibi Jesús mibijcp anajty yqueec-huäcxtay, ñicxy ajcxy jim Judea ñaaxjot etz Samaria ñaaxjot. Jëyi je majmetzpi apóstoles ajcxy jac-hui'müy. ² Nijëjity yëydijc huidibi Dios huindzigiiyb oy yajnaxtigiy Esteban. E ooy ajcxy jotmay jihuiy, yaaxy ajcxy müd je' ycixpi. ³ Chi Saulo ooy ixhuidijtcoty pahuidijtcoty huidijaty Jesús mibijcp etz tijc tijc anajty yajpidzimy pahuich pajuguty yëydijctijc etz töxyjäydijc, e pidaaccixy anajty pujxtigoty.

Jim Samaria ajcxy capxhuäcxy Dios y'ayuc

⁴ Je huidi ajcxy queec-huäcxtay ycapxhuäcxy anajty ajcxy Jesús y'ayuc huen tim ma'amy huidijtcixy. ⁵ Nidügti huidibi anajty yxii Felipe ñicxy jim Samaria, ytigiiy y'ayuccapxhuäcxi, yajnimay ajcxy Cristo ytiy'ajt. ⁶ E je jäy ajcxy ñayyöymujci nidüg'óciy ajcxy y'amido'ijtcixy janch amoñyi jadu'n nej Felipe anajty ymiydägy e ijxyp anajty ajcxy je mijhuinma'ñ huidibi Felipe anajty ytumyb. ⁷ Com may anajty jäy jim huidibi müd ca'oybi ma yjot yhuinma'ñ, e tzoocp anajty ajcxy. E co je ca'oybi anajty ypidzimy ma je jäy, chi je jäy ooy yjacyaaxqueecy. Etz nañ mayjäy anajty chögy huidibi ca' yci' ytecy yücxy etz tecyma'tpi. ⁸ E jadu'n je mayjäy ajcxy anajty jim ooy yjotcujcity.

⁹ Jim anajty tüg yëydijc huidibi anajty yxii Simón huidibi anajty ti ni'ixpigiy huijyjäy huinma'ñ, e ooy anajty may Samaria jäy huin'iiñ, ymina'ñ co je' anajty ymijity yjanchity. ¹⁰ Tüg'óciy jäy anajty oy amido'ijtcixy Simón y'ayuc, pi'ctijc etz mij'anäctijc, e yminaangixy:

—Jadayaabi yëydijc ymüd jada Dios ymic'ajt.

¹¹ Ooy anajty je jäy ajcxy Simón mijnicxpejtcixy, com müd je mañ'ajt anajty jecy ti chachhuin'iniigixy. ¹² Co je Samaria jäy mibijcy je ayuc jadu'n nej Felipe ñimiydacy Dios y'ané'min etz Jesucristo, chi ajcxy ñiibejty yëydijctijc etz töxyjäydijc. ¹³ Etz je Simón, je huijyjäy, nañ jadu'n mibijcy e ñiibejty. Chi Simón puyöyiy Felipe, ooy jihuiy huinmaay jadu'n nej je mijhuinma'ñ huidibi anajty Felipe ytumyb etz jadu'n nej anajty Dios ymic'ajt ijxi.

¹⁴ Co ajcxy je majmetzpi apóstoles ajcxy, huidi anajty jim Jerusalén, nejhuuy co je Samaria jäy anajty ti cöbijccixy Dios y'ayuc, chi ajcxy quejxy jim je Pedro etz Juan. ¹⁵ Co Pedro etz Juan yja'ty jim Samaria, chi ajcxy Dios mibijctzoy müd je mibijcpidijc ycixpi, jigix ajcxy ymöhuiiyb je Espiritu Santo. ¹⁶ Com ca'ni anajty je' ajcxy ñicidägyii, jëyi anajty ti ñiibejtcixy ma Huindzin Jesús yxii. ¹⁷ Huin'it Pedro etz Juan ciniixajy ajcxy, e chi je Espiritu Santo y'adigiy yjottigiy ajcxy.

¹⁸⁻¹⁹ Co Simón ijxy co je Espiritu Santo y'adigiyii yjottigiyii co yi apóstoles ajcxy yciniixajy, chi Simón yaj'ahuaniiy je' ajcxy meen, yminañ:

—Mooygich nañ jadu'n yi mic'ajt jigix co nginiixajibich hueñypinity nañ jadu'n jëbi ajcxy je Espiritu Santo y'adigiyii yjottigiyii.

²⁰ Chi Pedro nimay Simón:

—Mi'ögihuiy miich mmeen, müd co mhuinma'ñ ti mbidägy co meenygix mbada'ñ je huidibi Dios ñiyejcp. ²¹ Com miich ca' xypaady jadayaabi tung, com miich mjot mhuinma'ñ ca' ytudägyty ma Dios. ²² Jothuimbit e ixmatz yi mjibic-huinma'ñ, e mibijctzou Dios, ca' jécyity

xyhuinmeecxipy jadu'n nej jibic mjet mhuinma'nñ mm#idity. ²³ Com janch ta'm miich mjet mhuinma'nñ, e yi jibicpi hue' xym#idity mach.

²⁴ Chi Simón y'adzooy:

—Mibijctzou je Huindzin Dios m#id #ich ycixpi, jigix ca' ti xyjadipyich jadu'n nej miich ti xyñimäyich.

²⁵ Co Pedro etz Juan tiy'ajt yejcy etz capxhuäcxy Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñax#iy jim Samaria ñaaxjot, e capxhuäcxy Dios y'ayuc nej ajcxy y'alma n#dzoocin paadipy.

Felipe m#id je Etiopía jäy

²⁶ Huin'it x#i Huindzin Dios y'ángel migapxy je Felipe, n#may:

—Tzoon ya, nicx ma madzäcruudz ypidzimy, ma je tü'aa hu#di tzomb jim Jerusalén hu#dibi nicxp jim Gaza.

Je' je' je tü'aa hu#dibi adügtuum najxp. ²⁷ Felipe tim janitzon e ñicxy, e tü'am naybaatti m#id tüg Etiopía jäy. Hue' je' anajty eunuco, m#jtungm#id jim Etiopía. Yi' je' tesorero'ajt anajty ma je töxyjäy hu#dibi anajty yx#i Candace hu#dibi anajty ane'mb jim. Je eunuco jim anajty ti y'oy Jerusalén Dios ojadajtp. ²⁸ E chi yhuimbijtni anajty ma ycajp, iñaayb anajty carretijoty yam chachnecycapxy. Hue' anajty chachcapxyp je Dios y'ayuc hu#dibi Isaías ycojaay. ²⁹ Chi je Espíritu ñ#may Felipe co huen nicxy najtzpad#y je carreti ma je eunuco anajty y'iñäy.

³⁰ Co Felipe m#huingoñ je carreti, chi m#doy co je jäy anajty capxy je necy hu#di Isaías yjaay, chi y'am#dooy:

—¿Nej mhuinjihu#iyb hu#dibi mgapxyp?

³¹ Chi je jäy y'adzooy:

—¿Nej #ich nhuinjihu#iipy pen ca' pin xyajnimäyich?

Chi je eunuco n#may je Felipe co huen m#id iñäy#i carretijoty.

³² Je hu#dibi anajty je eunuco chachcapxyp jadu'n je' anajty ym#ina'nñ: Jadu'n ajcxy nicxy yaj'ögy nej jäy borregi nicxy yaj'ögy. Je' amoñ'ijty jadu'n nej borregi amoñ'ity co jäy n#me'pxy. Ni tüg'aa huam ycaminañ.

³³ Ti jäy yajtzöyduñy#i, ca' ajcxy a'ix#iy co yjanayñ#gapxtüdaani. Ni y'ap y'oc ycaca'ty pin ocnigapxtü#ib. Co yaj'öci, chi chooni ya naaxhuñ.

³⁴ Chi je eunuco y'am#dooy Felipe:

—Tunmay'ajt yajnimaa#y#ich pin jada ayucnajtzcapx#iybi ñ#m#ydacpy, ¿ci'm ñayñ#m#dyägy#i o ji jada hu#ngbi pin n#m#ydacpy?

³⁵ Chi Felipe yajtzondacy je ayuc capxt#icxin ma jada#y#abi Dios y'ayucco#y#abi ñecy. Chi yajm#dm#ydaaci nej Jesús yajty y'ayoy. ³⁶ Co ajcxy ñajx ma tüg n#i, chi je eunuco ym#inañ:

—Cha n#i, ¿nej ca' #ich j#bi huaad n#i#bety#i?

³⁷ Chi Felipe y'adzooy:

—Pen m#m#ijc#y Jesús m#id tüg'óciy yi mjet mhuinma'nñ j#bi m#i#bety.

Chi je jäy y'adzooy:

—Nm#ijc#y#ich co Jesucristo Dios yi' y'ung.

³⁸ Chi je eunuco n#may je carreti huindzin co huen yajtinayx#ipy je' carreti. Chi nimetz ajcxy ñicxy ma n#i, e chi Felipe yajnim#bejty je eunuco.

³⁹ Co ajcxy ñ#i#idzimy, chi je eunuco ijxtigoy je Felipe. Jadu'ñyi je Huindzin Dios y'Espíritu yajnicxi. E chi je eunuco ytü yajyöyñi jotcu#j.

40 Felipe yajpaty jim Azoto, chi ñajxy cajp cajp capxhuäcxi Jesucristo y'ayuc ixti yja'ty jim Cesarea.

9

Saulo yjothuimbijty

1 Ooy Saulo tzach'ixhuidijty pahuidijty Jesús yjäy, y'ahuändacy ooy, e yaj'öga'ñ anajty ajcxy. Paady oy ixty je teedy mijtungmüidpi, 2 pijctzoy cötüjcin, co anajty ñicxa'ñ jim Damasco ma yi judíojäy ajcxy ñaymujctac, madza'ñ pinjaty Jesús y'ayuc mibíjci. Saulo yajmiina'ñ anajty ajcxy mach jim Jerusalén huen yëydijctíjcity huen töxyjäydíjcity. 3 Jim anajty Saulo ñicxy mihuingoñ je Damasco cajp. Huin'it jotcömoñyi je tücxin huidi tzomb tzajpjoty, ñigidaaci jühuidity je Saulo. 4 Huin'it Saulo yciday, e midoy co ñimäyii:

—Saulo, Saulo, ¿na'amy co xychachpahuidijttägyich?

5 Chi Saulo yajty:

—¿Mbin miich, Huindzin?

Chi midoy co y'adzoyii:

—Ich je' Jesús, je huidibi miich mdzachpahuidijttacpy, ci'm nayyajtza-achytunyii jadu'n nej huajyuub co jipconebi'y huidi müid ñuumygyumyii.

6 Chi Saulo chiyuygoty chachchigüy, e ymínañ:

—Huindzin, ¿ti mdzocpy ndunipyich?

Chi je Huindzin Jesús ñimaayi:

—Pidig etz nicx cajpjoty, e jim nyajnimähuipy ti jëbi mduñ.

7 Je yëydijctijc huidibi anajty Saulo ymüid ooy ajcxy ñay'adzigiüyi, co midoy je' ajcxy ayuc e ca' ajcxy ni pin ma y'ijxy. 8 Chi Saulo ypidigy, e co huindicxíni ca' pin ma oc'ixni. Chi ajcxy majch Saulo ma yci', e chi ajcxy huijtznicxy jim Damasco. 9 Tugig xii Pablo jim y'ijty huiintz, ca' ycaay y'uucy.

10 Jim Damasco anajty tüg yëydijc chinäy huidibi Jesús y'ayuc mibíjci, huidi anajty yxii Ananías, cumäyjoty Dios ñimaayi:

—¡Ananías!

E chi je' y'adzooy:

—Cha ich, Huindzin Dios.

11-12 Chi je Huindzin Dios ñimaayi:

—Pidig, nicx ma je tü huidibi yxii Derecha, e jim ma Judas ytijc yajtiü tüg Tarso jäy, huidi yxii Saulo. Dios mibijctzoob je' jim cham, cumäyjoty ti huin'ijxy tüg yëydijc huidi yxii Ananías, co oy ñimiñyüi, e yciníxajüy jigix y'ijxigip jadüg'oc.

13 Chi Ananías y'adzooy:

—Huindzin Jesús, mayjäy ti xyajmüidmüydägyich ajcxy jadu'n nej yi Saulo jibic y'idích jim Jerusalén müid miich mjäy ajcxy. 14 Jadachambi ti mimíñ ya je necy, ma teedy mijtungmüidpi ti ycötujcmöyüi, co huen majtztäy je jäy, e yajnicxtähüipy jim Jerusalén, tüg'óciy pinjaty ojadajtp müich mxii.

15 Chi je Huindzin Jesús nimay Ananías:

—Nicx, com ti ich nhuin'ixy yijüibi yëydijc, jigix ich nxii etz n'ayucich capxhuäcxiy ma tüg'óciy naax cajp huidi ca' yjudíojäyity, etz ma yi reydiic, etz nañ jadu'n ma yi judíojäy ajcxy. 16 Ich yi' nyajnimähuipy tüg'óciy, nej ayo'n yajnaxipy müid ich nxii yciixpi.

17 Chi Ananías ñicxy ma Saulo anajty ti yjättägy, co ytigüy tigoty, chi cññxajy Saulo, e chi ñimay:

—Migüg Saulo, je Huindzin Jesús huidibi nayguëxici jim tü'am ma miich anajty miiñ, yi' ti xyquexyich jigix m'ijxigipy jadüg'oc, etz je Espíritu Santo xyñidigihuiip xycödigihiip.

18 Mic'amy ycäy ma Saulo yhuin jadu'n nej acx ñimeeñ, chi y'ijxigy. Huin'it Saulo ypidigy e chi yajñibejti. 19 Chi Saulo ycaay y'uucy, e chi ymic'pijcy jadüg'oc. Chi jim müid'ijty jecy huidibi ajcxy ixpijci Jesús y'ayuc jim Damasco.

Saulo capxhuäcxy Dios y'ayuc jim Damasco

20 Chi janch mic'amy Saulo ytigüy Dios y'ayuccapxhuäcxp ma je judíojäy ajcxy ñaymujctac jim Damasco, yminañ co je Jesús hue' je' Dios y'ung. 21 Tüg'óciy pinjaty anajty midoohuiip Saulo y'ayuc, ooy ajcxy jihuiiy huinmaay, etz ñayñimáayigixy:

—¿Nej ca' jada' yjējty je huidibi tzachyajcödigoyam yi jāy ajcxy huidibi Jesús yxñ miyaax ojadájtíp jim Jerusalén? ¿Nej ca' jada' yjējty huidi anajty ti ymiñ ya jāy ymajtzpi, e ñicxy cýega'ñ ma teedy mijtungmüdpí?

22 Je Saulo capxhuacxip anajty Jesús y'ayuc huinmic jotmic, e nigapxtäy co Jesús hue' je' je Cristo, chi yi judíojäy ajcxy huidi anajty jim tzinaayb Damasco cijx ajcxy yhuinma'ñ tigoydäy.

Saulo yqueecy ma judíojäy ajcxy

23 Ti anajty hueeni xñ tiempo ñajtzñicxñyñi, chi je judíojäy ajcxy ñaygapxi co yaj'ögaangixy je Saulo. 24 Saulo ñejhuiy co anajty yaj'öga'ñyii. Chi jim anajty ajcxy y'ahuixyii xñm tzuum ma je poch aguu cajppäbi, jim anajty yaj'öga'ñyii. 25 E je jāy ajcxy huidibi anajty ymijpidacpy Jesús, chi je' ajcxy codiññajxy je Saulo mijcachjoty ma je pochycop huidi je cajp müid jübojtz'ahuidityity, e jadu'n je' choocy.

Saulo yajpaady jim Jerusalén

26 Co Saulo yja'ty jim Jerusalén, oy japuyöyñhuaañ je mibijcpidijc ajcxy. Nidüg'óciy anajty ajcxy ooy tzigüygixy anajty com ca' anajty mibijccixy co je Saulo ti anajty yjothuimbity. 27 Chi Bernabé yajñicxy Saulo ma je nimajmetzp apóstoles ajcxy yajpaady, e chi yajmüidmiydactay nej Saulo anajty ti icy je Huindzin Jesús tü'am, e nej anajty Saulo Jesús y'ayuc ti capxhuäcxi huinmic jotmic jim Damasco. 28 Huin'it Saulo yhui'my jim Jerusalén, e müid huidity anajty ajcxy. 29 Aamic jotmic capxhuäcxy je Huindzin Jesús y'ayuc, etz müid miydaaccixy e ñaymicmigápzigixy müid je judíojäy huidibi griego ayuc caxp. E je' ajcxy niñuinmayñyb co yaj'ögaangixy. 30 Co je mibijcpidijc nejhuiy, chi ajcxy yajñicxy je Saulo jim Cesarea, e chi ajcxy quejñajxy huen ñicxy jim Tarso.

31 Huin'it tiempo je' ajcxy huidijaty mijpidacp Jesús, jotcuje anajty chinaaygixy, e ñigi anajty ixpijcidich Dios y'ayuc ytiy'ajt, jadu'n nej yi huidibi ajcxy tzinaayb ma yi Judea ñaaxjot, Galilea ñaaxjot, etz Samaria ñaaxjot. Chi ajcxy ooy yajmij'ajtcixy je Huindzin Jesús, e müid je Espíritu Santo ypubéjtñ, ñigi anajty yjacmayñygixy.

Pedro yajtzoocy Eneas

32 Co anajty Pedro yhuidijty cogapxiy cajp cajp je mibijcpidijc ajcxy, y'oy nañ jadu'n ma je mibijcpidijc ajcxy huidibi tzinaayb jim Lida. 33 Jim minaybaatti tüg yëydijc huidibi anajty yxñ Eneas, huidibi anajty ti

ypa'm'ijtni tuctujc jimijt, hue' je' anajty yčixuxy ytecyxuxy. ³⁴ Chi Pedro nimay:

—Eneas, Jesucristo xyajtzoocp, pidig, etz yajpidig yi mmaabejt.

Chi Eneas mic'amy ypidigy. ³⁵ Chi ijxy tüg'óciy jáy huidibi tzinaayb jim Lida etz Sarón. Chi ajcxy yjothuimbijttay nidüg'óciy, ixmajtztay tüg'óciy yi ñi'ap huinmañ e jiptigiyiy yi Huindzin Jesús y'ixpijcin.

Co Dorcas y'o'cy, chi yjugypijcy jadüg'oc

³⁶ Je huin'it tiempo jim Jope, jim anajty tüg töxyjäy chinäy huidibi mibijcp Jesús, hue' anajty yxii Tabita, je' huidi griegojäy ytiyyp Dorcas. E je Dorcas oy xii tiempo anajty yajnaxy mi'oyjä'aty yi jáy ajcxy. ³⁷ Jadu'n yjajti huin'it tiempo Dorcas ypa'mbejty, e chi ytimy'o'cy. Co ajcxy yajtziday, chi ajcxy je öcpi yajnicxy ma je tijc mimejtznihuijtzpetypí. ³⁸ Je Jope cajp naymihuingon'ájtíp anajty meid Lida cajp ma anajty Pedro yajpaady, co mibijcpidijc ajcxy anajty nejhuuy co je' anajty yjímity, chi ajcxy mejtz yéydijc quejxy co huen nimäyii:

—Min tzojc ya Jope.

³⁹ Huin'it Pedro ñicxy meid je' ajcxy. Co jim yja'ty, chi ajcxy yajnicxy ma je tijc mimejtznihuijtzpetypí, e jim anajty ajcxy je co'ögy töxyjäydijc ajcxy ytinayjühuidityi ma je öcpi, chachyaaxcixy. Chi ajcxy Pedro yaj'ijxy je huit nijen huidibi Dorcas anajty ti yaj'oyiy co anajty yjogy'atyñi. ⁴⁰ Mic'amy je Pedro quejxpídzimday je jáy ajcxy. Chi ycoxtinay'ahuuy, e Dios mibijctzoy. Chi huindicxpejty je öcpi, nimay:

—Tabita, pidig.

Huin'it Tabita yhuindicxigy, e ijxy je Pedro, chi ñnaygugiy. ⁴¹ Chi Pedro majtzi yci', e chi huijtzigy. Chi yaaxi ymigügtijc etz co'ögytöxyjäydijc ajcxy, chi ajcxy yajcidiigy juugy. ⁴² Tüg'óciy jáy ajcxy jim Jope nejhuuyday co Pedro yajjugypijcy je Dorcas. E mayjäy mibijcy je Huindzin Jesús. ⁴³ Jadu'n yjajty co Pedro y'ijty jim Jope canaag xii ma je coodzpi ytiyc huidi anajty yxii Simón.

10

Pedro etz Cornelio

¹ Jim Cesarea anajty tüg tungmeidpi huidi anajty yxii Cornelio, hue' je' anajty capitán'ajtp ma tüg batallón soldado ajcxy yxiijp, la Italiana.

² Je Cornelio ooy anajty ytudägyity, etz je' meid tüg'óciy y'ung ytöxyijc ooy anajty yajmij'ajtcixy Dios. Je Cornelio nañ jadu'n ypübety meid meeñ je judíojäy ayoobtijc, e je' Dios ojadajt anajty jabom jabom. ³ Tüg xii, minacyxii anajty, Cornelio huin'ijxy janch huädz Dios tüg y'ánel ñigidaaci, e ñimaayi:

—¡Cornelio!

⁴ Chi Cornelio huindicxpejty je ánel janch tzigiyb anajty, e chi yajtiy:

—¿Ti Huindzin?

Huin'it je ánel y'adzooy:

—Jadu'n nej mDios'ojadaty etz jadu'n nej mbübety ayoobtijc ti Dios jäygidägy. ⁵ Quex mjäy jim Jope, huen nicxy yajtzoñ Simón, huidibi nañ jadu'n yajtijp Pedro. ⁶ Jim je' yja'ttacy ma jadügpí Simón, je cootzpi huidi ytiyc mihuingon mejypa'. Je Pedro xyajnimähuiipy ti mdunipy.

⁷ Co je ánel ñicxni huidi anajty ti ymigapxyii, chi Cornelio yaaxi mejtz ytumbi, etz tüg soldado huidi Dios capxymidoob, etz huidibi je Cornelio

ooy ymijnicxpedyii. ⁸ Chi yajm̄dm̄ydactay nej je ángel ñ̄maayi, chi ajcxy quejxy jim Jope.

⁹ Com jabom jim anajty je quejxyöybi ajcxy ñ̄icxy m̄huingon Jope, cujc yx̄i anajty, e chi Pedro ypejty ma t̄jcn̄icx Dios ojadajtp. ¹⁰⁻¹¹ Ooy Pedro anajty yuubögyii, e ooy jacaya'ñ̄, jimni anajty yj̄icxy yaj'oȳiyii. Chi Pedro huin'ixy je tzajp ahuädz, e huin'it ijxy quidägy jadu'n nej poob huit m̄ijpi yxóchity majaty ytaatz. ¹² Jiiby ma je poob huit, jiiby anajty canaagnax iyujc huidijaty m̄idaax yci' ytecy etz tza'ñ̄ etz joon. ¹³ Huin'it Pedro midoy co anajty ñ̄imäyii:

—Pedro, pid̄ig nicxy yaj'öḡ ȳi iyujc etz tzüd̄z.

¹⁴ Chi Pedro y'adzooy:

—Ca', Huindzin, caminaabi ñ̄ich ti nj̄icxy huidibi jib̄ic̄ip etz huidibi ca' ñ̄igödúcyity nicxy judíoj̄äy j̄icxcixy.

¹⁵ Huin'it jadüg'oc ayuc midoy ñ̄imäyii:

—Huidibi Dios yajhuäch ca' huaad mdijy co ȳi' yjib̄icity.

¹⁶ Tuḡig'oc jadu'n yjajti, chi je poob huit ypättiḡiyñ̄i tzajpjoty. ¹⁷ Jim anajty Pedro tzachhuinmay nej anajty yhuimbizim̄y je t̄ibi ixy co yja'ty ma t̄jic aguu je Cornelio yquexyöybi huidi ajcxy anajty nid̄ihuip yajt̄ihuip je Simón ytījc. ¹⁸ Chi ajcxy m̄ic ycogapx̄iy yajt̄iy pen jim anajty yjättägy Simón huidibi anajty nañ̄ jadu'n yajt̄ijp Pedro. ¹⁹ E je Pedro je' anajty chachhuinmaayb̄ t̄ibi ixy, chi je Esp̄iritu Santo Pedro ñ̄imaayi:

—Tuḡiḡ yēyd̄ijc̄ ji xy'ixt̄äy. ²⁰ Pid̄iḡ e m̄inac, nicx m̄id̄ je' ajcxy, e ca' ti mhuinmay, com ñ̄ich jadu'n ti n̄imäy co huen xy'ixt̄äy.

²¹ Huin'it Pedro ym̄inajcy ma je' ajcxy, je Cornelio quexyöybi, ñ̄imay ajcxy:

—Ñ̄ich je' huidibi miich ajcxy m'ixtaayb, ¿ti ycixpi co ti m̄miingixy?

²² Chi ajcxy y'adzooy:

—Ȳi' ñ̄ich ajcxy ti xyquexȳich ȳi Cornelio huidibi capitán'ajtpi, je' tudägy j̄äy huidibi Dios yajm̄ij'ajtp, je huidibi t̄üg'óciy judíoj̄äy ooy tzóccixy, etz cōmaaygixy. Huindzin Dios t̄üg' y'ángel ñ̄imay Cornelio co miich miñ̄ nyajhuoy, jiḡix m̄n̄icx̄ip ma ȳi' ytījc, e y'amido'ida'ñ̄ ajcxy nej miich myaj'ixpiga'ñ̄.

²³ Chi Pedro yajt̄ijctiḡiy je' ajcxy. Chi ajcxy jim ymaahu'i'my. Com jabom Pedro ñ̄icxy m̄id̄ je' ajcxy, e chi nij̄jity ypan̄icxi huidibi m̄ijpidacp Jesús huidi anajty ajcxy tzinaayb̄ jim Jope.

²⁴ Com jabom ajcxy yja'ty jim Cesarea ma Cornelio anajty y'ahuixy t̄ügmucy m̄id̄ yjugym̄iḡüḡ, etz nij̄jity pin ooy m̄id̄ ñ̄aymiḡüg'adyii, huidijaty anajty ajcxy jaȳj̄p ti ñ̄imäy. ²⁵ Co Pedro oyj̄äty ma je t̄jic, chi Cornelio yt̄jcp̄id̄zim̄y oy yj̄jpcobad̄iy je Pedro, e chi ycoxt̄inay'ahuñ̄iy yajm̄ij'ada'ñ̄ anajty je Pedro. ²⁶ Chi Pedro huijtz̄tinaȳiḡy je Cornelio, e ñ̄imay:

—Tinaȳiḡ, ca' xyajm̄ij'ida'ñ̄ich, nañ̄ jadu'n ñ̄ich nj̄äyity nej miich.

²⁷ M̄id̄ anajty ycapxy ym̄iydägy co yt̄jctiḡiy, jiiby anajty mayj̄äy ni'amuḡi'ahuix̄icixy. ²⁸ Chi Pedro ñ̄imay ajcxy:

—Miich ajcxy m̄nejhuñ̄iyb̄ co ȳi judíoj̄äy ycostumbre capx'aducy ca' huaad judíoj̄äy yöymucy m̄id̄ huidibi ca' yjudíoj̄äyity, ca' huaad yt̄iḡiygixy ma ajcxy yt̄jic. Per Dios ti xyajni'ix̄iyich co ca' huaad nm̄ina'ñ̄ich ca' oyj̄äyity huädz̄j̄äyity pinjaty. ²⁹ Paady co oy ti xyajhuoyiij̄ich ti nm̄iñ̄ich,

ni ca' huam ti nmına'ñich. Nnejhuñhuaamyich na'amy co oy ti xya-jhuoyiijich.

³⁰ Chi Cornelio y'adzooy:

—Cham ymimidaaxxiijy, jadu'n nej jadachambi hora, ya ñich anajty ma ndjicich, jaygay jay'ügy nDios'ojadatyich. Com hue' anajty mijminacy xii mina judíoJay ajcxy ycapxtaaccixy, co tüg ñayguëxici jadu'n nej jäy müd ypoob huit janch adixcp. ³¹ E je ángel xyñimaayich: “Cornelio, Dios ti xymidoohui m'oración e ti jadu'n jäygidägy jadu'n nej mbubety yi ayoobtijc ajcxy. ³² Quex mdumbi jim Jope, huen nicxy yajtzoñ Simón huidi nañ jadu'n yajtijp Pedro. Jim Pedro yja'ttägy ma je cotzpi ytijc huidibi yxi Simón, huidibi tzinaayb mihuingon mejypa'. Co je' ymiinipy, chi xymidmiydägy.” ³³ Paady nguejxyich janch mic'amy huen nicxy xy'ijxtäy. E ti may'ajt mduñ co ti mmiñ. Jadachambi cha ñich ajcxy nidüg'óciy ma Dios yhuinduu. E n'amido'idängixyich tüg'óciy je y'ayuc huidibi je Huindzin Dios ti xyaj'ane'my jëbi xyajñimaaygixy.

Pedro Dios ytiy'ajt nigapxy nimiydacy ma Cornelio ytijc

³⁴ Huin'it Pedro ytiigy y'ayuccapxhuäcxpi, nimay ajcxy:

—Jadachambi huinjhuñybich, co yi Dios ca' ni tüg ix'yixy jäy, y'actzojtaayb hueñypinity. ³⁵ Dios ycöbijcpy hueñypinjäyity huidibi tzinaayb huen huidibi naax huen huidibi cajpity, pen chigüyb ajcxy Dios, pen tumyb oybi. ³⁶ Dios ti quexy yi' ytiy'ajt ma yi Israel jäy ajcxy, yajñimay co ji cham jotcujc'ájtin müd Jesucristo ñich ajt nHuindzin. ³⁷ Müich ajcxy mnejhuñyb yajxon nej ti ytunyii ti yjadyii ma judíoJay ajcxy ñaax ycajp chondacy jim Galilea, Juan el Bautista ti anajty capxhuäcx Dios y'ayuc ytiy'ajt etz yjäyajnñibety. ³⁸ E mnejhuñyb müich ajcxy co Dios yejc je Jesús je Nazaretpi je Espíritu Santo, e nej Jesús yhuidijty e tuuñ oy'ájtin, etz mñihuinmañ, jadu'n nej yajtzocy je jäy ajcxy huidi anajty ane'm'ijtp ma yi mujcu'. Com Dios anajty müd y'ity je Jesús. ³⁹ ñich ajcxy je tiy'ajt nmüidich tüg'óciy jadu'n nej Jesús yjajty y'ayoy jim Judea naaxjot etz jim Jerusalén. Huin'it ajcxy Jesús yaj'o'cy cruudzcíxy. ⁴⁰ E Dios yajjugypijcy codugüg xii, e chi yajnayguëxici ma ñich ajcxy. ⁴¹ Ca' ti yajnayguëxigyii ma tüg'óciy jäy, jëyi ma ñich ajcxy huidi jayijp Dios yhuin'ijx jigix tiy'ajt nyegipyich. ñich ajcxy caaymujc uucmujc huin'it co yjugypijcy ma y'o'cy. ⁴² Ti xyquexy ñich ajcxy ayuc ngapxhuäcxpi ma mayjäy ajcxy etz nidiy'ajt'adipyich ajcxy co Dios Jesús ti pidägy mij'ane'mbi ma yi juugypy etz ma yi ögypi. ⁴³ Nañ jadu'n jecy'ajty tüg'óciy Dios y'ayucnajtzcapxñybi ñimiydac ajcxy Jesús, e ymınañ ajcxy co tüg'óciy je jäy ajcxy pinjaty mñibijc je Cristo, Dios huinmecñib ajcxy yopocy.

Je Espíritu Santo ycidacy ma je ca'pi ajcxy yjudíoJayity

⁴⁴ Yam anajty Pedro ycapxyñi co je Espíritu Santo ñidigüyi ycödigiüyi ajcxy nidüg'óciy huidijaty y'amido'ijt Pedro y'ayuc. ⁴⁵ E je judío mñibijcpidijc ajcxy tübi anajty müñ müd Pedro, ooy ajcxy jihuy huinmay co Dios quejx Espíritu Santo ma je jäy ajcxy huidibi ca' yjudíoJayity, ⁴⁶ co midoy ycapxcixy müd huingbi ayuc, etz cömaygixy jäymejtcixy Dios. ⁴⁷ Chi Pedro ymınañ:

—¿Nej ca' jada' y'óyity co ññibedipy ajcxy huidibi Dios ti ymóoyigixy je yEspíritu Santo jadu'n nej ñich ajt xymooyim?

⁴⁸ Chi Pedro ni'ane'mdiiny huen ññibejtcixy ma Huindzin Jesucristo yxi. Huin'it ajcxy Pedro cohuaniy huen huñmy tüg xii mejtz xii müd je' ajcxy.

11

Pedro yajm̄dm̄ydacy jim Jerusalén nej anajty ti ytuñyii ti yjadyii

¹ Je apóstoles ajcxy etz je m̄ib̄jcp̄id̄j̄c ajcxy huidi anajty ajcxy jim Judea, m̄ido y ajcxy ayuc co nij̄j̄ity jāy huidi ca' yjud̄ío jāȳity ti anajty ajcxy cōb̄j̄c̄y Dios y'ayuc. ² E co Pedro yhuimb̄ijty Jerusalén, chi nij̄j̄ity jud̄ío jāy ajcxy o y Pedro, je' ajcxy huidibi tzachm̄j̄p̄idaacc̄xp̄ jud̄ío jāy ycostumbre jadu'n nej ajcxy tiy'ajtt̄iyḡixy ymang. ³ Je' ajcxy n̄imay Pedro:

—¿Na'amy co oy ti mgo'ix̄iy jāy ajcxy huidi ca' yjud̄ío jāȳity, etz ti mgay m'ūgy m̄id je' ajcxy?

⁴ Chi Pedro n̄im̄ydactay tūg'óc̄y jadu'n nej anajty ti yjaty, chi ym̄inañ:

⁵ —Jim̄ ñch anajty Jope nDios'ojadatyich. Chi nhuin'ijxyich jadu'n nej tūg mij poob huit chooñ tzajpjoty, cidāgy ma ñch nhuinduu, xóchity anajty ma m̄idaax ytaatz. ⁶ Co nnim̄ijhuāgyich n'ixa'ñich ti jilby, chi n'ijxyich may iyujc, jilby iyujc m̄idaaxpi yci' ytecy, jilby ahua'nbi iyujc, jilby tza'ñ, etz joon. ⁷ Chi n̄m̄idooyich tūg ayuc huidibi xyñimaaybich: “Pedro, p̄id̄ig, yaj'öḡ ȳi iyujc etz tzūd̄z.” ⁸ Chi n'adzooyich: “Ca' Huindzin, com caminaabi ndzūchich iyujc huidibi ca' ñigo'adūcyity jud̄ío jāy ajcxy tzūd̄z̄ipy.” ⁹ Chi m̄imetz'ocpi tūg ayuc tzajpc̄ixy xyñim̄ayich: “Huidi Dios ti yajhuāch, ca' huaad mdijy co ca' y'oychú'tzn̄ity.” ¹⁰ Tuḡig'oc jadu'n yjajti, chi je poob huit yp̄ätt̄iḡyñi tzajpjoty. ¹¹ Huin'it xyñimiñich je quexyōybi niduḡig, chooñ ajcxy jim Cesarea. ¹² Chi je Esp̄iritu xyñimaayich, co min n'ocn̄ic̄xich m̄id je' ajcxy, ca' ma ni ti nhuinmayipyich. M̄id n̄icxyich niduḡig n̄miḡūgt̄j̄c̄ich. Chi ñch ajcxy ndiḡiy ma je jāy ytiyc. ¹³ Je codijc xyajm̄dm̄ydaac̄ich co je' anajty ti huin'ixy tūg āngel ma ytiyc, ñm̄aȳii: “Quex mdumbi ajcxy jim Jope huen n̄icxy yajtzoongixy Simón huidibi jāy ytiyp̄ Pedro, ¹⁴ e je' xyajnim̄ahuip̄ nej jēbi Dios m'alma xyajnidzooc̄ip, miich etz tūg'óc̄y m̄j̄in md̄ijc m̄juogy-m̄iḡūg.” ¹⁵ Co Jesús y'ayuc ngapxhuācxtzondaac̄ich, chi je Esp̄iritu Santo ñ̄id̄iḡiȳi ycōd̄iḡiȳi je' ajcxy. Tim̄ jadu'n nej xyñid̄iḡiȳim xycōd̄iḡiȳim je jayj̄p'atypi. ¹⁶ Huin'it nj̄aymejt̄coodyich nej je Huindzin Jesús ym̄inañ: “Janch Juan, je Bautista, jāy yajnībejt̄ m̄id ñi, e Dios jāy ajcxy y'adiḡihūiyb̄ yjottiḡihūiyb̄ je Esp̄iritu Santo.” ¹⁷ Pen Dios ti ym̄ōȳii je jāy ajcxy huidibi ca' yjud̄ío jāȳity tú'c̄y m̄id huidibi ñch ajt ti xymooyim co n̄m̄ib̄j̄c̄im Jesucristo. ¿Ocjactim̄ p̄in ñch co Dios n̄midz̄ip'ad̄īȳbich?

¹⁸ Je m̄ib̄jcp̄id̄j̄c ajcxy jim Jerusalén, co ajcxy m̄ido y Pedro y'ayuc, chi ajcxy y'amonday. Chi ajcxy Dios jāymejch cōmay, chi ajcxy ym̄inaanḡixy: “Dios jadu'n ti ym̄ina'ñ co je' ajcxy huidibi ca' yjud̄ío jāȳity jēbi yjothuim̄bijtc̄ixy, jiḡix Dios ym̄ōhūiyb̄ jugy'ājtin huinix̄ibi.”

Antioquía jāy ym̄idoo ajcxy Dios y'ayuc

¹⁹ Taabi jāy yaj'o'cy Esteban, chi jāy ajcxy ooy ixhuidijtcoty pahuidijtcoty Jesús yjāy jim Jerusalén. Chi nij̄j̄ity ajcxy yqueecy, n̄icxy ajcxy jim Fenicia ñaaxjot, etz jim Chipre, etz jim Antioquía. E capxhuācxy ajcxy je oybi ayuc ma jadyii jud̄ío jāy, ca' ajcxy jac ni p̄in yajnimay. ²⁰ E nij̄j̄ity m̄ib̄jcp̄id̄j̄c huidibi jim anajty ajcxy yconaax̄ip̄ ycoc̄ḡj̄p̄ip̄ Chipre etz Cirene, chi ajcxy ñ̄icxy jim Antioquía. Chi yajm̄dm̄ydacy ajcxy je Huindzin Jesús y'ayuc m̄id griego jāy ajcxy. ²¹ E je Huindzin Dios ooy ypubejt̄i je' ajcxy, e ooy mayjāy ixmajch je j̄ib̄ic-huinma'ñ etz m̄j̄p̄idaacc̄ixy ȳi Huindzin Jesús ytiy'ajt.

²² Co je mibijcpidijc ajcxy jim Jerusalén midoogixy jada ayuc, chi ajcxy quejxy Bernabé jim Antioquía. ²³ Co Bernabé jim yja'ty, chi ijxy jadu'n nej Dios anajty oy'ájtín ti tuñ, chi oy yjotcugiiy je Bernabé. Chi capxhuijy tüg'óciy co huen ajcxy janch cixyjot huinijot cuyduuni yi Huindzin Jesús y'ayuc ytiy'ajt. ²⁴ Com Bernabé ojjäy je' anajty, e ooy mijpidägy Dios y'ayuc etz ooy müdity je Espíritu Santo jotjoty huinmañyjoty. Ymüid je' ycapxhuijin ooy mayjäy mijpidacy Jesús y'ayuc ytiy'ajt.

²⁵ Co jadu'n yjajti, chi Bernabé oy ixtay Saulo jim Tarso, e co paty, chi müdmüñ Antioquía. ²⁶ Jadu'n yjajty jim ajcxy y'ijty tüg jimijt, yaj'ixpijccixy je mayjäy huidibi ajcxy jijptigiyiiy je Jesús y'ixpijcin. Jim Antioquía oga'n yximoy cristiano, je jäy ajcxy huidibi mijpidacp Jesús.

²⁷ Huin'it tiempo nijējity tiy'ajtnajtcapxiiybi chooñ Jerusalén ñicxy ajcxy jim Antioquía. ²⁸ Tüg huidi anajty yxi Agabo ytinay'ahuiiy mayjäyjoty, e chi je Espíritu Santo yajcapxi, e yminañ co mijyuu anajty ñaxcidäga'ñ huindu'ñybi naaxhuiñ. E janch jadu'n yjajti taab anajty Claudio y'ane'my. ²⁹ Huin'it je mibijcpidijc ajcxy jim Antioquía pidacy ajcxy yhuinmañ co quexaangixy pubéjtín ma ymüggtijc ajcxy huidi tzinaayb jim Judea, jadu'n nej pubéjtín pin tim yega'ñ. ³⁰ E jadu'n ajcxy tuuñ. E je meeñ tübi anajty ymucy yajmiguejxy ajcxy je Bernabé etz Saulo ma je mibijcpidijc tungmüdpi jim Judea.

12

Co Jacobo y'o'cy etz co Pedro yajpujxtijctigiiyi

¹ Huin'it tiempo je rey Herodes yajmajtzí nijējity Jesús yjäy, e chi yajtza-achytuuni. ² Chi ni'ane'mdiy huen yaj'ögyii müid espada je Jacobo, je Juan y'uch. ³ Co je rey nejhuüy co je judíojäy ajcxy jadu'n ooy jäygidaaacixy, chi ymajtzí Pedro nañ jadu'n. Hue' jadu'n yjajti xijoty, je xii mina tzajcaagy caaygixy huidi ca'pi ylevadura müdity. ⁴ Co Pedro yajmajch, chi yajpidacy pujxtigoty. E chi je rey ane'my co huen midaaaxpicy soldado ajcxy cuend'adyii, tügpicyjaty midaaax soldado ajcxy. Hue' anajty je rey ti huinmay xinaxy anajty tiydunañ Pedro mayjäy agujc. ⁵ Pedro jiiyb anajty pujxtigoty janch oy cuend'aty. E je mibijcpidijc janch Dios mibijctzodiiib anajty ajcxy müid Pedro ycixpi.

Dios y'ángel yajpidzimy Pedro pujxtigoty

⁶ Huin'it coodz ma ca'ni anajty yxiimiy, ma je Herodes anajty tiydunañ Pedro mayjäyjoty com jabom, Pedro maab anajty, e soldado agujc ajcxy cíxoch tecyxoch anajty müid cadena, e jadügpicy soldado ajcxy pujxtijc'aguy anajty ajcxy ycuend'aty. ⁷ Chi janch timetiini yHuindzin Dios tüg y'ángel ñayguéxici ytinäy ma Pedro yhuinduu, e je pujxtijc yaj'anayday. E chi je ángel tijyücx y Pedro ma ycaach, chi yajmäyhuijy, e nimay:

—Pidig mic'amy.

Chi je cadena ycäday ma Pedro yci'. ⁸ Chi je ángel nimay Pedro:

—Ñayhuini, yajtigi' mgig.

Co Pedro yajtigiyday ycig, chi je ángel ñimaayí:

—Yajtigi' mjocxhuit, e pajamgich.

⁹ Chi Pedro pujxtijc pidzimy axam ma je ángel, ni ca' nejhuüy pen janch anajty huidibi je ángel tumyb, hue' jihuiy jadu'n nej ycumäy. ¹⁰ Chi ñajxy ajcxy ma tügpicy cuend'ajtpi, mic'amy ajcxy mimetzpi ninajxy. Co ajcxy yjaty ma mijpujxtijc aguu, ma mijtüba', chi je' ci'm'ahuaach. Chi ajcxy

ypidzimy. Ti anajty mijyöygiñni co je ángel ixmajtzní Pedro. ¹¹ Huin'it Pedro yhuinma'ñymejch, chí ymínañ:

—Jadachambi njihuñybich co janch jada' co je Huindzin Dios ti quexy y'ángel, e yí' ti xyñihua'ñich ma Herodes, etz jadu'n nej tüg'ócíy judíoñjáy ajcxy anajty xytuna'ñich.

¹² Co Pedro yjot yhuinma'ñ ymejch, chí ñicxy ma María ytíj, je Juan ytaj, je Juan huídi jáy ytíjpy Marcos, ma anajty ajcxy jim mayjáy tüg'mucy y'íjtcíxy Dios mibíjctzoogíxy. ¹³ Co Pedro tíj'aguu cojxnojcy, je tiba'y'amybi, chí tüg töxy'anäg ypidzimy huídi anajty yxíi Rode, íxa'ñ pín je' tíj'aguu cojxnojcy. ¹⁴ Co oy yögmidoy co Pedro je' anajty, chí ca' ytíj'aguu yaj'ahuaach. Jéyi co poyígy ñicxy tígoty co anajty tzachjotcújcity, nígapxy co Pedro je' anajty ma tíj'aguu.

¹⁵ Chí je jáy ajcxy nímay Roda:

—Mloocjñyb jada' miich.

Chí je töxy'anäg y'adzooy co janch je' anajty. E je jáy ajcxy ymínaangíxy co ca' yí' yjéjity, hue' jada' Pedro y'ángel.

¹⁶ Yam Pedro anajty tíj'aguu tzachcojxnocy co ajcxy yaj'ahuaach, chí ajcxy íjxy, chí ajcxy ooy chígy yjihuñy. ¹⁷ Pedro címíid ytiy'ajtyejcy co huen amoñ ajcxy. Chí yajmíidmíydacy nej je Huindzin Dios anajty ti yajpidzimyíi pujxtígoty. E nímay ajcxy co huen nícxy yajmíidmíydágy jada je Jacobo etz jacjadyíi mibíjcpídíj.

Chí Pedro ñicxy huíngbí cajp.

¹⁸ Co yxíimíy, huin'it soldadtíj ajcxy ooy ytígy huambi jíhuñybi huinmay'ahuídíjty, com ca' nejhuñygy nej je' anajty ti ytunyíi ti yjadyíi míid Pedro ycíxpi. ¹⁹ Chí Herodes ní'ane'mdíy huen nícxy yaj'íxtáy Pedro. E co ca' yajpaty, chí píjctzoy tíy'ajt ma soldado ajcxy huídi anajty Pedro ti ycuend'adyíi. Chí ní'ane'mdíy huen ajcxy nícxy yaj'ögyíi. Chí Herodes chooñ jim Judea, chí oy chínaydacpícy jim Cesarea.

Herodes y'ögy

²⁰ Herodes janch ymíjotmätpy anajty je jáy huídíbi tzínaayb jim Tiro etz Sidón. Chí je Tiro etz Sidón jáy ajcxy ñaygapxi nej jébi huíngohuägíhuaangíxy je rey. E ymímadac ajcxy co mígapxy je Blasto je míjtungmíidpi maabi rey Herodes ytíj. E chí ajcxy píjctzoy co huen tzíp cíxy naxy, com co ajcxy xíj mooc jim anajty yajtzoongíxy ma rey ñaaxjot. ²¹ Chí Herodes agapxtujcy tüg xíi, chí je reyhuit yajtígy, chí íñaydac paty ma ycötujctac, chí mígapxy ajcxy je jáy. ²² Chí je mayjáy ajcxy ytígy míc capxp míydaacp, chí ajcxy ymínaangíxy:

—Jada jáy huídíbi capxp, ca' jada yjáyity, jadu'n yí' nej tüg díos!

²³ E huin'ítíy Huindzin Dios y'ángel yajpa'mbejty Herodes, com ca' anajty huíndzígy cōmay je Díos. Chí y'o'cy, tíng je' tzütztaayi.

²⁴ Je Huindzin Dios y'ayuc mibíj'ídíchpy anajty jáy, e yajcapxhuäcxp anajty hueñytímma'ámyity.

²⁵ Co Bernabé etz Saulo ajcxy ytungmay jim Jerusalén, huin'it chooni ajcxy jim ymíidnícxy huídíbi anajty yxíi Marcos.

13

Bernabé etz Saulo yajtzondaaccíxy ytung huídíbi ajcxy pátip

¹ Ma je' ajcxy huídi míjpidacp Jesús jim Antioquía, jim anajty jadyíi huídi Díos y'ayuc yaj'íxpíjcp anajty, etz nañ huídíbi tíy'ajt najtzcapxñyb.

Jim anajty Bernabé etz Simón, huidi anajty ajcxy ytijpy el Negro, etz Lucio huidi tsoon Cirene ñaaxjot, etz Manaén huidi tüg yeectac miid Herodes, huidibi ane'm jim Galilea, etz Saulo. ² Tüg xii ajcxy ñayyöymújicigixy jaygay jay'ügy Dios ojadajtcixy. E chi je Espiritu Santo ñimaayi:

—Huen pidáacigich ajcxy Bernabé etz Saulo ahuing jigix ajcxy ytunipy ma je tung tüibi nyajnihuohuiyich.

³ Chi ajcxy yjac Dios ojadajty etz yjac ayuu'ajty, e chi je jäy ajcxy ciniñajy Bernabé etz Saulo, e chi ycapxcijxy miid je' ajcxy.

Je apóstoles ajcxy capxhuäcxixy Dios y'ayuc jim Chipre

⁴ Chi jada' je Espiritu Santo yquejxi Bernabé etz Saulo huen nicxy Seleucia, e jim ajcxy ybarcotigüy nicxy ajcxy jim Chipre mejy agujcpi.

⁵ Co jim ajcxy yja'ty ma barco yjättac huidi yxi Salamina, chi ytigüy Jesús y'ayuccapxhuäcxp ma je judíoñy ajcxy naymujctac. Tzooñ je Juan anajty nañ jadu'n je' anajty Bernabé etz Saulo pubéjtíp. ⁶ Huidijttay ajcxy ma je naax mejy agujcpi, e yja'ty ajcxy ma je cajp huidi yxi Pafos. Jim ajcxy paty tüg judíoñy huidi anajty yxi Barjesús, hue' je' anajty huijyñy, e ñaydiyii anajty co Dios ytiy'ajt najtzcaxüyi, e ca' anajty yjanchity. ⁷ Je huijyñy ooy miid ñaymigüg'adyii anajty je huidibi ane'm jim, hue' anajty yxi Sergio Paulo. Je Sergio Paulo ooy anajty ycohuinma'ñity, ooy y'ixpicyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty midoohuaani je Dios y'ayuc. ⁸ Je huijyñy, huidi nañ jadu'n yajtijp Elimas, midziptzoñ Pablo etz Bernabé, e tücci'y capxaduga'ñ ca'ydi je gobernador ymibicy. ⁹⁻¹⁰ Chi Saulo, huidibi nañ jadu'n yajtijpy Pablo, miid je Espiritu Santo huindixpejty je huijy jäy, e ñimay:

—¡Ooy mjibicjäyity miich, ooy m'aniñjity, mujcu' miich xy'ung'ajtp, ooy mmidzip'aty pinjaty oyjot oyhuinma'ñ miid! ¿Mina m'ixmadza'ñ nej mdzachyajtigoya'ñ je Huindzin Dios ytiy'ajt? ¹¹ Jadachambi je Huindzin Jesús xychachytunaamb, e mhuí'mip huiintz, etz ni ca' je ximbi tzojc m'ixipy.

Chi je huijyñy mic'amy yhui'my huiintz coodz, chi ixtay pin oc-huijtznicxiib com ca' anajty y'oc'ijxni. ¹² Co je gobernador jadu'n ijxy, chi mijpidacy Jesús y'ayuc, e chi ooy jihuiy huinmaay nej Pablo nimiydägy je Huindzin Jesús y'ayuc ytiy'ajt.

Pablo etz Bernabé yajpátcixy jim Antioquía etz Pisidia

¹³ Chi Pablo etz ymigügtjc ajcxy miid ybarcotigüy, chi ajcxy ñicxy Perge ma Panfilia ñaaxjot. Chi Juan puyöyduutni Pablo etz Bernabé, e chi ñicxni Jerusalén. ¹⁴ Pablo etz Bernabé ñajxy jim Perge oyja'tcixy jim Antioquía ma Pisidia naaxjot. Sábado xii ajcxy ytigüy ma je judíoñy ajcxy ñaymujctac, chi ajcxy ixtactay. ¹⁵ Co ñecycapxtay ma Moisés ñecy etz Dios y'ayucnajtzcaxüybi ñecy, chi je naymujctac huindzin quejxy ayuc ma Pablo ajcxy, ñimaayi:

—Migügtjc, pen mmid ayuc tiy'ajt miid jäy ycixpi jëbi cham myajnimäy ajcxy.

¹⁶ Chi Pablo ytinayigy, yci' miid ytiy'ajt yecy co huen amoongixy, e ñimay ajcxy:

—Midoogix, miich Israel jäy ajcxy, etz huidibi Dios yajmij'ajtp. ¹⁷ Je Israel jäy Dios huin'ijxy ñich'ajt nmij'ap nmijteedy jecy'ajty etz yajyu-jcejt ajcxy micho'n co anajty ajcxy jim yjactzinäy Egipto ñaaxjot. Chi ajcxy yajpidzñmni müid Dios ymic'ajt. ¹⁸ Dios je' ajcxy mihuindinay huixchigüipx jimijt jim mjtigüduum. ¹⁹ Je Dios huixtujc ti naax cajp yajtigoy huidi anajty jim tzinaayb Canaán ñaaxjot, etz yajmoy je naax ñich'ajt nmij'ap nmijteedy jecy'ajty jigix ajcxy jim chinähuiipy. ²⁰ Midaax migo'px jahuixchigüipx majc jimijt Dios mic'ajt mooy juez ajcxy huen ane'myii Israel jäy ixti mabaad Samuel je Dios y'ayucnajtzcaxñiyb ytungbijcy. ²¹ Huin'it ajcxy tüg rey pijctzoy huidi ane'mñib ajcxy. Chi Dios yajreytigüiy Saul huidi tuun huixchigüipx jimijt. Je Saul yteedy hue' je' anajty yxi Cis, hue' je' anajty Benjamín y'ap y'oc. ²² Chi Dios tungbijcy Saul e yajreytigüiy David, chi Dios yminañ: “Ti nbaadyich David, Isaí ymang, tüg yëdyjc huidibi cuydundähuiipy nej ndimdzocyich.” ²³ Ma David y'ap y'oc Dios yajnibijcy Jesús, jigix nihuänipy yajnödögipy je Israel jäy ajcxy, jadu'n nej anajty jécyip Dios yaj'ahuanñiy ajcxy. ²⁴ Ca'ni anajty Jesús miñ co Juan, je Bautista, capxhuäcxy Dios y'ayuc ma je Israel jäy ajcxy, nimaaygix co copicy huen jothuimbijtcixy ma Dios, e huin'it jëbi ññibéjtcixipy. ²⁵ Co anajty Juan y'o'cin huingon, chi yminañ: “Ca' ñich njëjity je Cristo, jadu'n nej mminaangixy. Jayijp ti nmüñich, jac'axam miinañ je Cristo; jacmic'ajt müid je' ca'ydi ñich. Ca' xypaadyich ñicxy yí' yc'ghuin nguejich.”

²⁶ Chi Pablo yjacminañ:

—Migügtijc, Abraham y'ijx y'oc etz pinjaty yajmij'ajtp Dios, Dios ti xyajniguexy jada ayuc nej ajcxy jëbi m'alma nüdzoocin paady. ²⁷ Je jäy ajcxy huidi anajty ajcxy tzinaayb jim Jerusalén etz tungmüdpí ajcxy, ca' ajcxy nejhuiy pin je' anajty je Jesús, ni ca' anajty huinjihuñyigixy y'ayucnajtzcaxñiybi ajcxy y'ayuc huidibi anajty yajcaxp ma ajcxy ñaymujctac huindüg sábado. E je' ajcxy ci'm yajpocycäy Jesús, e cuyduñ nej anajty ajcxy yjaybetyity ma Dios ñecy. ²⁸ Oy ajcxy ca' paty pocy nej yaj'öccixipy Jesús, chi ajcxy nibijctzohuñy ma Pilato co huen ñicxy yaj'ögyii. ²⁹ Co je jäy ajcxy cuydunday jadu'n nej anajty yjaybetyity ma Dios y'ayuc müid je' ycixpi, chi ajcxy yajminajcy cruudzcixy, etz oy yajnaaxtigüiygixy. ³⁰ E Dios je Jesús yajjugypijc co anajty ti y'ögy. ³¹ Chi canaag'oc ñayguëxigo'ci ma ymigügtijc huidi anajty ti ymñdhuididyii co chooñ Galilea ñicxy Jerusalén. Jadachambi yí' je' ajcxy huidi tiy'ajt yejcpy ma je jäy ajcxy.

³² Je oybi ayuc ñich miich ajcxy nyajmñdmíydacpy cham, huidi Dios yajnimay ñich'ajt nmij'ap nmijteedy jecy'ajty. ³³ Je oybi ayuc ti Dios cuyduñ cham ma ñich'ajt co yajjugypijcy Jesús co y'o'cy. Jadu'n yí' Dios y'ayuccojaaybi jaay jecy'ajty ma je Salmo necy mimetzpi ma Dios jadu'n yminañ: “N'ungich cham ti nyajjuugypicyich.” ³⁴ Müid jadayaabi ycixpi co Dios ti yajjugypicy Jesús co y'o'cy, jigix ñinñcx ca yhuindigoopyy jadu'n anajty jaybetyity ma Dios ñecy ma Dios jadu'n yminañ: “Nmöhuaamyich miich ajcxy je conúcñin huidibi nyajnimaaayich je David.” ³⁵ Paady nañ jadu'n Dios y'ayuccojaaybi jaay jadüg'it, ma yminañ: “Ca' Dios a'ixiy ñicxy y'ung ñinñcx yhuindigooy, je y'ung huidibi müid huädz jot huinmañ.” ³⁶ Com janch co je David Dios huin'ijxy, jigix ane'mipy yí' yjuugy ymigüg ajcxy. E co ytung yajmay, chi y'o'cy, e je' y'alma

ñaybaatti m̄id je y'ap yteedy y'alma, e je' ñin̄icx huindigooy je'. ³⁷ Je Jesús huidibi Dios yajjugyp̄ijc ca' je' ñin̄icx yhuindigooy. ³⁸ Migũgt̄ijc, jēbi mne-jhūiyḡixy, co je pocyhuinmeec̄xin yaj'ihūāc̄xy yajcapxhūāc̄xy m̄id Jesús yc̄ixpi. ³⁹ M̄id je' yc̄ixpi p̄injaty m̄ib̄ijcp̄ ti ypocyyajhuinmeec̄xc̄xy huidibi Moisés yley anajty ca' pocyhuinmeec̄xin yecy. ⁴⁰ Nayguend'ajt̄iḡix, ix xyajcidacejtc̄ix je m̄ij ayo'n jadu'n nej Dios y'ayuc̄cojaaybi jaay jecy'ajty co Dios jadu'n yminañ:

⁴¹ Midoogix ñich n'ayuc, miich ajcxy nīxiicpi yajxiicpi, nay'adzigīiyḡixy, ix m'alma myajtigooyḡixy. Com ñich Dios ndumybich tũg m̄ijhuinma'ñ ma miich ajcxy mx̄ī mdiempo. May miich ajcxy ca' mm̄ib̄iḡipy, oy p̄in xyjayajm̄idm̄iyd̄āacc̄ix̄ipy.

⁴² Co Pablo ajcxy ypidzimy ma yi judíōj̄äy ñaymujctac, chi je jāy huidibi ca' yjudíōj̄äyity nimay je Pablo co huen nañ jadu'n yajm̄idm̄iyd̄äḡiyb ma je jadũḡpi s̄ábado. ⁴³ Co ajcxy yõyhūāc̄xn̄i ma nayyõymujctac may judíōj̄äy etz mayj̄äy huidi ca' yjudíōj̄äyity huidibi j̄ijpt̄iḡiȳiy je judíōj̄äy y'ixp̄ijc̄in, pan̄ic̄xy ajcxy je Pablo etz Bernabé. Pablo etz Bernabé capxhuijy ajcxy co huen pan̄ic̄xc̄ixy je tiy'ajt jadu'n nej Dios t̄ībi tuñ may'ajt m̄id jāy yc̄ixpi, e ca' ajcxy ixmadz̄ipy.

⁴⁴ Co s̄ábado yx̄ī paty, chi jāy ñayyõymujci jahuenjaty cajp jāy ycanicxtay co anajty tzachmidoohuaanḡixy Dios y'ayuc. ⁴⁵ Ca' anajty ajcxy yjotcũjcity co je judíōj̄äy ajcxy ijxy je mayj̄äy. Chi ajcxy ooy yjot'amb̄ijccoty ni'oj̄iyḡixy etz nīmaayḡixy oy ni nej Pablo. ⁴⁶ Chi Pablo etz Bernabé ytīḡiy miccapxpi yminañ ajcxy:

—Copic̄y anajty co ñich miich nyajnim̄āhuipy Dios y'ayuc jayijp. Com ca' mgõbigaanḡixy Dios y'ayuc, e co ca' m̄naybid̄āac̄iḡixy tud̄ägy ma jugy'ajt̄in m̄id huin̄ix̄ibi, nic̄xyich n'ocyajnim̄äy ajcxy Dios y'ayuc huidibi ca' yjudíōj̄äyity. ⁴⁷ Com jadu'n xy'ane'mȳich ajcxy yi Huindzin Jesús, e xyñ̄imaaȳich ajcxy:

Ti ñich miich nb̄id̄ägy jadu'n nej tũg t̄īc̄xn̄i jajin ma tũg'óciy naax-huiñybi jāy jiḡix myajnejhūīhuipy ajcxy je n̄idzooc̄in jiḡuembraad huindu'my naaxhuiñ.

⁴⁸ Co ajcxy jadu'n midoy huidibi ca' yjudíōj̄äyity, chi ajcxy ooy n̄iḡi yjotcuḡiy, e chi ajcxy ym̄inandacy co je Huindzin Jesús y'ayuc ooy anajty y'óyity. E may ajcxy m̄ib̄ijcy huidibi anajty Dios ti yajnīḡodunḡiy co paatip jugy'ajt̄in huin̄ix̄ibi. ⁴⁹ E jadu'n jim yajcapxhūāc̄xy Jesús y'ayuc ma je jimbi naax cajp. ⁵⁰ E je judíōj̄äy ajcxy m̄inaygapxi nīj̄ējity t̄oxyj̄äyd̄ijc ajcxy tud̄äḡyp̄i huidibi Dios yajm̄ij'ajtp, etz je m̄ijj̄äyd̄ijc, e je' ajcxy m̄id m̄ib̄id̄iḡy Pablo etz Bernabé co pahuojpquēgaanḡixy ma jejimb̄i naaxjot. ⁵¹ Chi Pablo etz Bernabé yc̄iḡ huinhuojpy, je' je' tiy'ajtp co ca' jāyḡidacy ajcxy nej jāy anajty ytunḡixy. Chi ajcxy ñic̄xn̄i jim Iconio. ⁵² E je' ajcxy huidibi m̄ijp̄idaacp Jesús ooy anajty ajcxy yjotcujcity. E ym̄id anajty ajcxy je Esp̄iritu Santo ma yjot yhuinma'ñ.

14

Pablo m̄id Bernabé jim Iconio

¹ Jim Iconio Pablo etz Bernabé ytīḡiy ajcxy yquipxy; ma je judíōj̄äy ñaymujctac, e oy yajxon ajcxy capxhūāc̄xy Jesús y'ayuc. E may judíō etz griegoj̄äy ajcxy ym̄ib̄ijcy. ² Je judíōj̄äy ajcxy huidibi anajty ca' ym̄ib̄ijcc̄ixy nigapxcoty ni'oj̄iygoty ajcxy huidibi ca' yjudíōj̄äyity huen je cajp jāy ajcxy

mijotmädiipy je mibijcpidijc. ³ Müd jada ycixpi Pablo etz Bernabé yhu'i' my je' ajcxy jecy etz capxhuäxcixy ajcxy Dios y'ayuc huinmic jotmic etz je Huindzin mijotcuyc'ajtcixy ooy, e mooyi ajcxy je mic'ajt jëbi ajcxy pa'mjäy yajtzögipy etz mihuinma'n tungixy huidibi ijxpejt'ajtp ma Dios ymic'ajt. ⁴ E je cajpjäy mejtzpicy je' anajty ajcxy, nijëjity ymijpidacpy ajcxy yi judíojäy, etz nijëjity ymijpidacpy ajcxy je Dios y'ayuccapxhuäcxpi. ⁵ Chi nijëjity judíojäy etz huidibi ca' yjudíojäyity ñaygapxi müd tungmüdpí co mijotmätcodaangixy etz tim tzaagögäzdaangixy Pablo etz Bernabé. ⁶ Co Pablo etz Bernabé nejhuiy, chi ajcxy yqueecy ñicxy ajcxy jim Listra etz Derbe jim Licaonia, e majaty naax cajp huidi huinduy'agonbi. ⁷ Jim ajcxy capxhuäcxy Jesucristo ytiy'ajt nej jëbi ajcxy huaad y'alma nüdzoozin paatcixy majaty cajp huingonbi.

Tzaagätzcixy Pablo jim Listra

⁸ Jim Listra anajty tüg yëydijc iñäy tecyma'tpi, caminaabi anajty yöy, com jadu'n anajty yma'xung'aty. ⁹ Je tecyma'tpi amido'ijtpy anajty Pablo y'ayuc, e Pablo ijxpy anajty co ymüd mibijcin nej jëbi chögy. ¹⁰ Chi Pablo mic nimay:

—Tinaayig.

Chi je tecyma'tpi tüg tipy ytinaygugiy, e chi ytigiy yöyb. ¹¹ Co je mayjäy ajcxy ijxy nej Pablo anajty pa'mjäy ti yajtzögy, huin'it ajcxy ytigiy huambi jihuiybi müd Licaonia ayuc chachminaangixy:

—¡Dios ajcxy jadu'n nej jäy ti ycidaaccixy ma ich ajt!

¹² Yminaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³ E je Júpiter teedy huidibi anajty tumb jim ma je Júpiter chajptijc cajppäbi, mimiñ toro ajcxy etz pijy. E je teedy müd je jäy ajcxy yhuindzigihuaangixy etz ojadadaangixy anajty Pablo etz Bernabé, yaj'ögaangixy je toro ajcxy. ¹⁴ Co Pablo etz Bernabé nejhuiy, ca' ajcxy jäygidacy nej jäy anajty ajcxy y'ididzaangixy, chi ajcxy ci'm yhuít agiidjäy, e ytigiy ajcxy mayjäy'agujc yam chachminaangixy:

¹⁵ —¡Yëydijctijc ajcxy! ¿Nej co jada jadu'n m'idüztzcixy? Nañ jadu'n ich ajcxy jäyity, jadu'n nej müich ajcxy. Paady ich ajcxy ti nmingixy ma müich ajcxy mgajp jigix ajcxy m'ixmadzipy jada jadu'mbi huinma'n huidibi ca' choobaady ma Dios. E mijpidaaccixp je Dios juugypí huidi oyduñ tzajp etz naaxhuiñybi, je meyy etz tüg'ócxy tijaty ya n'ijxim. ¹⁶ Jecy'ajty Dios ixmajch je jäy ajcxy huen túngixy nej tzojccixy. ¹⁷ Oy Dios anajty jayecy tiy'ajt co je' Diosity, jatuñ jadu'n yi oybi müd müich ajcxy ycixpi. Dios yi' yajtuub etz yecy oybi cosecha e xymooyim mijcajee huidi ngaayim n'uucim e xyajjotcugiyim.

¹⁸ Oy anajty Pablo jadu'n jadim tzachnimaaygixy, ca'p ajcxy mimadacy co yi jäy ajcxy ca'p yaj'ó'ccixipy je toro co anajty yhuindzigihuaangixy.

¹⁹ Huin'it xi nijëjity judíojäy yja'ty, chooñ jim Antioquía etz Iconio. Chi ajcxy yajnimay je mayjäy co huen midziptzoongixy Pablo etz Bernabé. Chi mic'amy je mayjäy midziptzooñ Pablo etz cögäch ajcxy. Hue' ajcxy tijy ti anajty yaj'öccixy. Chi ajcxy oy ixjugucy cajppa'. ²⁰ Chi je apóstoles ajcxy jübigiyy je Pablo, chi je' ypidigy, e ñicxy jadüg'oc cajpjoty. Com jabom Pablo etz Bernabé chooñ, ñicxy ajcxy jim Derbe.

²¹ Co Pablo etz Bernabé jadu'n capxhuäcxy je Jesucristo y'ayuc oybi jim Derbe, chi mayjäy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio, etz Antioquía. ²² Jim ajcxy jotmicmigapxy

je mibijcpidijc ajcxy, e capxhuijy huen tügjijp mibijccixy Dios y'ayuc, nimaangixy:

—Co ndigihuaanim ma Dios y'ane'my copicy co nyajnáxim may ayo'n. ²³ Cajp cajp majaty mibijcpidijc yajpaady jim Pablo etz Bernabé yajnbijcy nijëjity yëdijctijc huen nigohuajc'ajtcixy je jäy ajcxy huidibi mijpidacp Jesús. Co anajty ti yajnbicy je' ajcxy huidibi nigohuajc'adipy, chi jaygay ajcxy y'ijty etz Dios mibijctzoy müid je' ajcxy ycixpi.

Pablo müid Bernabé yhuimbijtcixy Antioquía jim Siria naaxjot

²⁴ Pablo etz Bernabé ñajxy ajcxy Pisidia oy ajcxy yja'ty jim Panflia. ²⁵ Chi Pablo etz Bernabé Jesús y'ayuc capxhuäcxi jim Perge, chi ajcxy ñicxy jim Atalia. ²⁶ Chi ajcxy jim ybarcotigüy ñicxcixy jadügtecy jim Antioquía ma anajty ajcxy ti yajnbigyüi Dios hójcin müid je tung huidibi anajty ti yajcixcixy. ²⁷ Co ajcxy yja'ty jim Antioquía, chi ajcxy huoomujcy je jäy ajcxy huidibi anajty mijpidaacp Jesús, e yajmüidmydactay tüg'ócüy nej anajty Dios ti ytuñ müid je' ajcxy ycixpi, nej anajty Dios ti yaj'ahuäch je tü'aa nej huaad mibicy ajcxy je huidibi ca' yjudíojäyity. ²⁸ Pablo etz Bernabé ijt ajcxy ooy jim jecy müid je mibijcpidijc ajcxy.

15

Mibijcpidijc ñayyöymujci ajcxy jim Jerusalén

¹ Je huin'it tiempo nijëjity jäy huidi tzoon Judea yja'ty ajcxy jim Antioquía, e ytigüy yaj'ixpijcp ma ajcxy je huidibi mijpidaacp Jesús, ymínaangixy: “Pen myajnidzögamy ajcxy yi m'alma, copicy co ajcxy myajtiy'ajttihuijy jadu'n nej Moisés y'ane'my.” ² Chi Pablo etz Bernabé ñaymidziptzongooti ajcxy müid huidi anajty ajcxy tzomb jim Judea, e ca' ajcxy ñay'ayuc-huinjihuijy. Chi jada' yajnbijti Pablo etz Bernabé etz jacjadyüi mibijcpidijc huen nicxy ajcxy Jerusalén yajtiydigüy ma je apóstoles ajcxy etz huidibi ajcxy nigohuajc'ajt je mibijcpidijc jim Jerusalén.

³ Je mibijcpidijc huidibi anajty ajcxy jim Antioquía oy ajcxy tüjijphuohuüy Pablo etz je' ajcxy huidi nicx müid Pablo. Chi Pablo etz müid yjajmüidtijc ajcxy ñicxy, e ñajxy ajcxy Fenicia ñaaxjot etz Samaria ñaaxjot. Yajmüidmydaaccixy je mibijcpidijc cajp cajp jadu'n nej jäy ajcxy huidibi ca' yjudíojäyity ti yjothuimbijtcixy etz yajmij'adaangixy Dios. E tüg'ócüy mibijcpidijc ooy ajcxy jäygidacy je Pablo y'ayuc.

⁴ Co Pablo etz Bernabé ajcxy yja'ty jim Jerusalén, chi je mibijcpidijc ajcxy cöbijci je apóstoles ajcxy, etz je' ajcxy huidi nigohuajc'ajtp anajty je mibijcpidijc. Chi Pablo yajmüidmydactay nej anajty Dios ti ytuñ müid je' ajcxy. ⁵ Chi nijëjity fariseojäy, tüibi anajty mibijccixy Jesús, ytinayigy ajcxy juntijoty, e ymínañ ajcxy:

—Copicy co huen yajtiy'ajttiy je jäy huidibi mibijcp Jesús huidi ca' yjudíojäyity, e copicy nyaj'ané'mim co huen ajcxy Moisés ycötújcin cuyduuni.

⁶ Chi ñayyöymujci je apóstoles ajcxy etz huidi ajcxy nigohuajc'ajtp je mibijcpidijc, co capxyöyaangixy je fariseojäy y'ayuc nej yhuimip. ⁷ Ca' ajcxy tzojc ñay'ayuc-huinjihuijy, chi Pedro ytinayigy ymínañ:

—Migügtijc, mnejhuüyb ajcxy co jayhuin Dios ti xyhuin'ixyich ma mich ajcxy, jigix nyajnimáhuibich jäy ajcxy huidibi ca' yjudíojäyity je Jesús ytiy'ajt oybi nej ajcxy y'alma nidzocin paadipy. ⁸ E Dios huidi nejhuüyb jäy yjot yhuinmañ xyaj'ixxich je tiy'ajt co yejcy Espíritu Santo ma yi' ajcxy

nañ tim jadu'n nej ytuuñ ma ñch ajt. ⁹ Dios tú'ciy ytuuñ mñid ñch ajt etz mñid yí' ajcxy, mñid co yí' ajcxy mibicy Jesús paady Dios yajhuaatzí ajcxy yjot yhuinma'ñ. ¹⁰ Jadachambi, ¿nej co ca' mhuinjihuñhuaangixy mibigaangixy nej Dios ytuuñ mñid huidibi ca' yjudíoñyity? ¿Nej co adzip myajñihuidzaangixy je costumbre huidi ni ñch ajt ni n'ap ndeedy ca' ti mñid mādäy nicyx cuydundaaygixy? ¹¹ Janch ñch ajt nmibijcim co mñid je may'ajt huidi Jesús ti tuñ mñid ñch ajt yciñpi ti nbaatim n'alma ñidzoocin. Nañ tim jadu'n je' ajcxy huidi mibijc Jesús huidi ca' yjudíoñyity ypaat y'alma ñidzoocin mñid je may'ajt huidi Jesús ti tuñ.

¹² Huin'it je jāy ajcxy y'amonday, y'amido'ijtcixy nej Bernabé etz Pablo nimiydaaccixy nej anajty Dios ti tuñ mñid yí' ajcxy, jadu'n nej ajcxy ti yajtzögy pa'mjāy mñid Dios ymic'ajt, etz jac tijaty mijhuinma'ñ huidi ti tuñ ma yí jāy ajcxy huidi ca' yjudíoñyity. ¹³ Co Pablo etz Bernabé ajcxy miydactay, chi Jacobo yminañ:

—Migügtijc mido'mbñijcigich ajcxy ñch n'ayuc. ¹⁴ Simón Pedro ti xyajmñidmiydaacim nej Dios may'ajt ti tuñ oga'n ma huidibi ca' yjudíoñyity, co huin'ijxy huidi yí' yjāy'adaañip ma yí' ajcxy. ¹⁵ Quipxy jada ñaybadyii mñid huidi je Dios y'ayucnajtzcaxñiybi jecy'ajty ycojaj, ¹⁶ co jadu'n yminañ:

Co anajty jadu'n ti y'ocjadyii, chi nhuimbidipyich ya naaxhuiñ. Nyaj'oyñhuibich jadüg'oc je naax cajp huidi David anajty y'ane'myb huidi anajty ti y'octigooybi jadu'n nej tüg tijc huidi ti yciday. Ma David y'ap y'oc nyaj'a'oyñhuibich jadüg naax cajp, jadu'n nej jāy ytijc cojy huinjemybi.

¹⁷ Jigix jacjadyii jāy y'ojadadipy ajcxy yí Dios. Nañ jadu'n je' ajcxy huidi ca' yjudíoñyity, huidi ñch njāy'adaañip.

¹⁸ Jadu'n je Huindzin Dios jécyip jada tiy'ajt jadu'n yejcy.

¹⁹ Chi Jacobo yjacminañ:

—Paady ñch jadu'n nmina'ñich co ca' huaad n'amayñiyim ajcxy huidi ca' yjudíoñyity huidi ajcxy ti mijpidägy Dios. ²⁰ Hue' janchtiy tzoc nijayñiyim co ajcxy ca' tzüdzipy huidi jāy yajhuindzigiñiyb ídolos, etz ni ca' huaad migapxcixy huingbi tóxyjāy, etz ni ca' huaad tzützcixy iyujc huidijaty jāy yōc-huiidypi, etz ni ca' huaad jñcxcixy tijaty iyujc ni'py. ²¹ Jecy'ajty ixti chamni tüg tüg cajp, ji pin ñhua'cxp capxhua'cxp Moisés yley majaty nanyöymujctac naag naag pocxinxi.

²² Chi je apóstoles ajcxy etz je huidi nigohuajc'ajt yí mibijcpñidijc, mñid tüg'ócay Jesús yjāy pidacy ajcxy yhuinma'ñ co huin'ixaangixy nijējity jāy ma je' ajcxy etz quexaangixy jim Antioquía quipxyi mñid Pablo etz Bernabé. Chi ajcxy yajnibejty Judas, huidi nañ jadu'n yajtijpy Barsabás, etz mñid Silas, yēydijctijc huidi ajcxy capxpaadip. ²³ E je' ajcxy yajmiguejxy necy nej anajty ti jaay: “Ñch ajcxy apóstoldijc, etz huidi nigohuajc'ajt yí mibijcpñidijc, etz nidüg'ócay mibijcpñidijc, cham ñch ajcxy nguexy capxpocxin ma ajcxy mibijcpñidijc huidi ca' yjudíoñyity huidi ajcxy tzinaayb jim Antioquía, etz huidi ajcxy tzinaayb Siria etz Cilicia ñaaxjot. ²⁴ Ti ñch ajcxy nejhuñyich co nijējity jāy ti xyñinicxcixy, choñ ma ñch ajcxy, ca' ñch ajcxy ngötujcin mooy, e xy'amayñiygixy jim mñid y'ayuc, e xyajhuinma'ñytigoya'ñ ajcxy, co ajcxy xyñimaaygixy co copicy co myajty'ajttñhuip ajcxy m'ung, etz mbayöyipy ajcxy je Moisés ycötújin. ²⁵ Paady ñch ajcxy ti nnyagápñigixy nidüg'ócay co nyajñibedipyich nijējity

jäy huidi yajpaatp ma ïch ajcxy co huen nicxy xy'ïjxcixy niguipxyi mïd nmïgügtijcïch huidi ooy ndzocyïch, je Bernabé etz je Pablo. ²⁶ Je huidi ajcxy yjugy'ajt ti yoxy ti toogy mïd ajt nHuindzin Jesucristo ycïxpi. ²⁷ E jadu'n yam nguexyïch ajcxy Judas etz Silas, e yi' ajcxy ci'm xyajmïdmiydägiy tüg'óciy ïch ajcxy n'ayuc. ²⁸ Ti je Espíritu Santo huinma'ñ pidägy ma ïch ajcxy nhuinma'ñ etz ïch ajcxy ti nhuinma'ñ nbidägyïch, co ca' nyajniëigipy ajcxy tijaty ayuc tzaachypï, jëyi janchtiy je huidi copícyip. ²⁹ Copícy co ca' ajcxy mdzüdzipy huidi jäy yajhuindzigïyb ídolos, ca' ajcxy ni'py mjïcxcixipy, ni ca' ajcxy mdzüdzipy iyujc huidi yöc-huiiti ti y'ögy, e ca' ajcxy mmïgapxtigooygïxipy huingbi töxyjäy. Pen mguydundaayb ajcxy jada ané'mïn, oy anajty mdungixy. E Dios ajcxy xypubedipy xypudigïhuipy.”

³⁰ Jadu'n je' ajcxy huidi ti yajquexy nicxy ajcxy jim Antioquía. Jim ajcxy huomujcy je mïbijcpidijc, e yajcïdigïy ajcxy je necy. ³¹ Co je mïbijcpidijc je necy capxy, chi ajcxy ooy yjotcugïy mïd je oybi ayuc tiibi anajty ajcxy yajniëuexyïi. ³² Com Judas etz Silas hue' je' anajty Dios y'ayucnajtcapxïybi, paady ajcxy yajjotcugïy jot'amij moy je mïbijcpidijc mïd je ayuc. ³³ Jecy ajcxy jim yhuäcxijpy, chi je mïbijcpidijc mïd ajcxy ycapxycïjxy, yajmïhuanïy ajcxy Dios, chi ajcxy yhuimbijtni ma anajty ti choongixy. ³⁴ Chi Silas yhuinma'ñypidacy co anajty yhuï'ma'ñ. ³⁵ Nañ jadu'n Pablo etz Bernabé ijt ajcxy jim Antioquía, etz mïd jac nijëjity ymïgügtijc yaj'ixpijc'idïtzcixy etz capxhuäcx'idïtzcixy je Huindzin Jesús y'ayuc ytiy'ajt.

Pablo mïmetz viaje

³⁶ Ti xii tiempo anajty ñajtznïnicxïyñi co Pablo nimay Bernabé:

—Jam'ajt nmïgügtijc co'ixïyïm cajp cajp majaty ti ngapxhuäcxïm Huindzin Jesús y'ayuc. Ooy njanejhuïhua'ñïch nej ajcxy yajpaady. ³⁷ Bernabé ymïd nicxaamy anajty je Juan huidi yajtïjp Marcos. ³⁸ E je Pablo ca' a'ixïy co mïd nicxp Juan, com ti anajty y'ocpuyöyduütibi jim Panfilia, e ca' anajty ti yjacmïdyajtüyöyïi je tung. ³⁹ E ca' ajcxy ñay'ayuc-huinjihuïyi miñ xyipy. Chi Bernabé mïdnicxy Marcos e ybarcotigïy ajcxy, chi ajcxy ñicxy jim Chipre. ⁴⁰ E je Pablo abicy huin'ïjxy Silas huidi anajty mïd ñicxa'ñ. Chi je mïbijcpidijc mïd ycapxycïjxy, chi chooni ti anajty je mïbijcpidijc yajmïhuanïyïi Dios, ⁴¹ chi ñajxy jim Siria ñaaxjot etz Cilicia ñaaxjot jot'amijmooy je mïbijcpidijc.

16

Timoteo mïjhuäcpejty je Pablo etz Silas

¹ Chi Pablo etz Silas yja'ty ajcxy jim Derbe etz Listra. Jim ajcxy paty tüg jäy huidi anajty yxii Timoteo huidi anajty mïjpidaacp Jesús. Judíojäy anajty yta'ajtpy, e griegojäy anajty yteedy'ajtpy. Je' ytaj nañ ymïbijcipy anajty Jesús. ² Je jäy ajcxy huidi yajmïj'ajtp Jesús jim Listra etz jim Iconio ooy anajty oy nimïydaaccixy Timoteo. ³ Pablo ooy jatzojcy co Timoteo ycajäymïd'ajti. Chi Pablo yajtiy'ajttiyyi Timoteo, jigix ca' ymïjotmädïyb je judíojäy huidi anajty ajcxy jim tzinaayb, com tüg'óciy ajcxy nejhuïy co griegojäy teedy'adyïi. ⁴ Cajp cajp ma anajty ajcxy ñaxy yajmïdmiydaaccixy ajcxy je mïbijcpidijc je cötujcïn huidi je apóstoles ajcxy, etz huidi nigohuajc'ajt je mïbijcpidijc jim Jerusalén. ⁵ Je' ajcxy huidi

yajmij'ajtp Jesús cajp cajp ñigi anajty yjotmicipijccixy, etz mijpidaaccixy Dios y'ayuc, etz ñimayiy'iditczixy jabom jabom.

Pablo yhuin'ijx tüg Macedonia jäy

⁶ Je Espíritu Santo ca' a'ixiy nicx capxhuäcxixy Dios y'ayuc jim Asia ñaaxjot. Paady ajcxy huingduum ñicxy yajyöyñajxy ajcxy Frigia ñaaxjot etz Galacia ñaaxjot. ⁷ Chi ajcxy jim yja'ty ma Misia ñaaxtziba'n. Chi huinmay co ñicxa'ñ ajcxy Bitinia ñaaxjot. E je Espíritu yajnejhuñy ajcxy co ca' y' tzocy co jim nicxcixipy. ⁸ Chi ajcxy jüyöyñajxy Misia ñaaxjot, chi ajcxy y'idacy jim Troas. ⁹ Chi Pablo cumäyjoty huin'ijxy tüg yëydijc, huidibi yconaaxity anajty Macedonia, ytinay'ahuñy ma Pablo yhuindu, e ycohuanñy, ñimäyii: "Tun may'ajt nicx jim Macedonia, e jim xypubedipy ñich ajcxy." ¹⁰ Co Pablo jadu'n huin'ijxy cumäyjoty, chi ñich ajcxy n'ixtay barco huidi nicxamb jim Macedonia. Nhuinjihuñy ñich ajcxy co jim Dios xyquéjxcixyich jigix jim ngapxhuäcxibich Jesucristo ytiy'ajt je oybi nej jëbi ajcxy alma ñidzoocin paadipy.

Pablo etz Silas jim Filipos

¹¹ Chi ñich ajcxy nbarcotigñy jim Troas nicxy ñich ajcxy tñiyi ma naax mejy'agujcpi huidibi anajty yxi Samotracia. Chi com jabom ajcxy nja'tyich jim Neápolis. ¹² Co ñich ajcxy jim ndzooñ, chi ñich ajcxy nicxy jim Filipos. Filipos hue' je' romanojäy ycajp. Je' je cajp jac mijpi ma je Macedonia ñaaxpa'. Jim ñich ajcxy nhuäcxijpy jecy. ¹³ Tüg sábado nicxy ñich ajcxy cajppa', mihuingon tüg mijñi, ma anajty judíojäy ajcxy mñidty Dios ojadajttac. Chi ñich ajcxy n'ixtacy jim, e ngapxhuäcxich ajcxy Jesús y'ayuc ma je töxyjäydijc ajcxy huidi jim anajty ajcxy ti yöymujccixy. ¹⁴ Je Lidia anajty y'amido'ijtp. Hue' je' anajty Lidia ycocajpity jim Tiatira, e ytocpy anajty ucy huit oy jatypi. Lidia yajmij'ajtpy anajty Dios, e je Huindzin Dios yajyungñy yjot yhuinma'ñ, jigix amido'idipy nej Pablo Dios y'ayuc capxhuäcxí. ¹⁵ Je Lidia ñibejt mñid tüg'ócay yjuugy ymigüg, chi ñich ajcxy xycohuanñy, e xyñimáaygixich:

—Pen minamb ajcxy co nmibicyich je Huindzin Jesús, miin jättaaccix ma ñich ndijc.

Chi ooy xycohuanñy ñich ajcxy, ixti cooni jim xyajhui'myich ajcxy.

¹⁶ Jadu'n yjajti tüg tecy co ñich ajcxy anajty ñicxy ma Dios ojadajttac, chi ñich ajcxy nbaty tüg tumbi töxy'anäg mañ'ajt mñidpi huidi ooy ytiygapxy. Ymñid anajty yhuindzin ma ytuñ, e je' yhuindzin ooy anajty ymeeñybaaty co je töxy'anäg ytiygapxy. ¹⁷ Je töxy'anäg ypanicxy chach yam Pablo etz ñich ajcxy ymñañ:

—Jada yëydijc Dios tzajpjotypi ajcxy ymidumyb. Capxhuäcxí ajcxy Dios y'ayuc jadu'n nej jëbi ñich ajt n'alma ñidzoocin paady.

¹⁸ Canaag xi jadu'n ñich ajcxy xychach'amayñy. Co Pablo chiipin, chi yhuäc-huimbijty ñimay je mañ'ajtmñidpi:

—Mñid Jesucristo yxi n'ane'myich, pidzim ma jada töxy'anäg.

Tim huin'itñy je ca'oybi yajyöyduuty je töxy'anäg.

¹⁹ Co je töxy'anäg yhuindzin jadu'n ijxy co ca' y'ocmeeñybadaani, chi mñid je' ycixpi ajcxy majch Pablo etz Silas, e yajnicxy ajcxy ma je tungmñidpi ma je' ajcxy y'agujctijc. ²⁰ Co ajcxy jilby mñidja'ty ma je tungmñidpi, chi ymñañ:

—Jada yëydijc ajcxy judíoájy jada, nigoo ajcxy ñaax yajmätý ycajp yajmätý, ²¹ etz yaj'ixpicy ajcxy costumbre huidi ca' huaad ñich ajt ngöbïjcim, e nihuaad ngatuunim, com hue' ñich ajt romanoájy.

²² Chi je mayjáy ajcxy müddziptzoon Pablo etz Silas, e je tungmüdpï ni'ane'mdiy co huen ajcxy yajnïjeñ yaj'ixjeñ huen yajhuojpcixy müd matz. ²³ Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon. ²⁴ Co je pujxtijc huindzin ypaati je cötujcin, chi pidacy Pablo etz Silas jac jilby öc'am, e chi ajcxy ixmajch co'adzity ytecy ma je quipy huidi yxi cepo.

²⁵ Chi jadu'n yjajty mijcuctz anajty, co Pablo etz Silas chach Dios ojada-jtcixy chach huin'igixy yi Dios, e jacjadyii machyjäy chach amidoo'ijtcixy.

²⁶ Chi timitiini uyx huinxijty pujxtijc poch. Chi y'ahuaatztay je pujxtijc agi', e y'adzittuttay je cadena ma tüg'óciy machyjäy. ²⁷ Chi oy ymahuijy je pujxtijc huindzin. Co jadu'n ijxy ac'ahuädz pujxtijc aguu, chi yajpidzimy y'espada ñayyaj'öga'ñyii anajty. Com hue' anajty tijy ti je machyjäy yqueectäy. ²⁸ Huin'it Pablo mic'amy migapxy je pujxtijc huindzin nimay:

—Ix nej mnyduuni, cheeby ajcxy nidüg'óciy.

²⁹ Chi je pujxtijc huindzin pijctzoy jin, e ytigiiy poyigy pujxtigoty, janch tziyuuyb müd tzigi'ñ. Chi ycoxtinay'ahuuiy ma Pablo etz Silas ajcxy yhuinduu. ³⁰ Chi yajpidzimy Pablo etz Silas, e yaj'amidooy:

—Huindzin, ¿ti ñich jëbi nduñ jigix nïdzoocin nbáadibich?

³¹ Chi je' ajcxy minañ:

—Mibic Huindzin Jesús etz mbaadipy nïdzoocin, miich etz m'ungdöxyjic.

³² Chi ajcxy yajnimay je Huindzin Jesús y'ayuc tüg'óciy pinjaty anajty jim ma je pujxtijc huindzin ytijc. ³³ Mijcuctz je pujxtijc huindzin puji je Pablo ajcxy chaachi'au, e chi je pujxtijc huindzin ñiibejtay ajcxy müd y'ung ytöxyjic. ³⁴ Chi je pujxtijc huindzin yajnicxy Pablo etz Silas ma ytijc, yajcaay yaj'uucy ajcxy. Ooy anajty ajcxy yjotcujcity nidüg'óciy, com ti anajty mibijccixy Dios.

³⁵ Com jabom je mijtungmüdpï quejxy mutztungmüdpï jim ma pujxtijc huindzin müd cötujcin huen najtzmadzïygixy Pablo etz Silas. ³⁶ Chi je pujxtijc huindzin nimay Pablo:

—Ti je tungmüdpï quexy cötujcin co jëbi nnajtzmadzïyich miich ajcxy. Nïxcix jotcujc.

³⁷ Chi Pablo migapxy je mutztungmüdpï, e chi nimay:

—Romanojäy ñich ajcxy. Yi cajptungmüdpï ti xyhuopyich müd matz mayjäy agujc, ni ca' jayijp ti xytyduñich, e ti xypidägyich pujxtigoty. ¿Nej co jadachambi xyñajtzmadzïhua'ñich ameechi? Ca' jadu'n y'óyity. Huen mijtungmüdpï ci'm miin xyajpidzimgixich ñich ajcxy.

³⁸ Chi je mutztungmüdpï cijx nimiydactäy ma mijtungmüdpï tüg'óciy Pablo y'ayuc. Chi ajcxy ñay'adzigiïyi co nejhuiy co Pablo etz Silas hue' je' anajty ajcxy romanoájy. ³⁹ Chi je mijtungmüdpï ñicxy ci'm oy capxjotcidägy je Pablo etz Silas. Chi yajpidzimy pujxtigoty, e pijctzoy may'ajt huen huingduum nïxcixni. ⁴⁰ Co Pablo etz Silas ypujxtijcpidzimy, chi ajcxy ñicxy ma Lidia ytijc. Jim ajcxy jadu'n ijxy mibijcpidijc, e jot'amijmoy ajcxy. Chi ñïxcixni.

17

Jim Tesalónica yjajti ooy capxy ayuc, ca' nay'ayuc-huinjihuñhuñ

¹ Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judíoñäy ajcxy tüg ñaymujctac. ² Com jadu'n anajty costumbre müidity, Pablo nicxp anajty ma judíoñäy ajcxy ñaymujctac sábado xii. E tugüig sábado xii jim capxy miydacy müid je' jim Tesalónica. ³ Hue' anajty müid miydaaccixy jadu'n nej jaybecyity ma Dios ñecy co Cristo copicy ayo'n yajnaxtähuiñ, e chi y'ögipy, huin'it yjugypigipy. Chi Pablo yminañ:

—Je Jesús huidibi y'ayuc ngapxhuäcxibich, je' je' je Cristo.

⁴ Nijëjity judíoñäy ymibijc ajcxy e mijyöybejty ajcxy Pablo etz Silas. Nañ jadu'n may griegoñäy huidi anajty Dios yajmij'ajtp, etz maytöxyjäydijc huidijaty oy ymijpidacni ymijnicxpejt etz mibijc ajcxy Pablo etz Silas y'ayuc. ⁵ Je judíoñäy huidi anajty ca' ymibicy, yjotmätcoty ajcxy. Huomujcy ajcxy amügy jäydijc etz jibic jäydijc, etz naax cajp yajmättay, anejptuuti agojxtuuti ajcxy Jasón ytijc'aguu tzach'ixtaaygixy Pablo etz Silas. ⁶ E co ca' ajcxy paty Pablo etz Silas, chi ajcxy majch Jasón etz jacjadyii mibijcpidijc. Adzip ajcxy yajnicxy pahuijch pajugujcy ajcxy jim ma cajp tungmüidpi. Yam chachminaangixy mic:

—Jada jäy ajcxy je' huidi tzachyahuinma'ñydiñooyb tüg'óciy naax cajp, nañ iyabaad ajcxy ti ymiingixy. ⁷ Jada Jasón ti Pablo etz Silas jim yajjättägy ma ytijc, tüg'óciy ajcxy müiddzip'adyii je César huidi ane'mb, yminaangixy co ji jadüg rey, je' je' je Jesús.

⁸ Co jadu'n midoy, chi ajcxy ooy yajyumügy yaj'oxügy cajpjäy etz je tungmüidpi ajcxy. ⁹ Chi Jasón etz ymigügtijc yajmeeñeyjcy, chi najtzmadzhy ajcxy.

Pablo etz Silas jim Berea

¹⁰ Co oy ycodziy mic'amy yi mibijcpidijc yajpidzimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judíoñäy ñaymujctac. ¹¹ Jim Berea judíoñäy ajcxy yjacmüid oyjot oyhuinma'ñ, ca'ydi judíoñäy ajcxy jim Tesalónica. Je Berea jäy ajcxy ycöbijc ajcxy Jesús y'ayuc ymüid oyjot oyhuinma'ñ. Jabom jabom ixtaaygixy ma yjaybetyity ma Dios y'ayuc pen janch jadu'n ymina'ñ nej Pablo yaj'ixpicy. ¹² May judíoñäy ymibijcy etz may griegoñäy huidibi ooy ymijpidaacni nañ jadu'n ymibijcy, töxyjäydijc etz yëydijctijc. ¹³ Co yi judíoñäy jim Tesalónica nejhuñy co Pablo nañ jadu'n Dios y'ayuc capxhuäcxí jim Berea, chi ajcxy jim ñicxy, etz yajyumügy yaj'oxügy je cajp jäy ajcxy. ¹⁴ Mic'amy ajcxy, je mijpidaacpi Jesús, yquejx Pablo mic'amy, huen nicxy jim ma mejypa'. Chi Timoteo etz Silas yjac-hui'my ajcxy jim Berea. ¹⁵ Je huidibi ajcxy Pablo jaymüid'ajt ymüidnicxy, müid ñicxy ajcxy ixti cooni yja'ty jim Atenas. Huin'it ajcxy yhuimbijty müid tüg ayuc co huen Timoteo etz Silas nicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

¹⁶ Co anajty Pablo ahuijxy je Silas etz Timoteo jim Atenas, ooy anajty ytajy ymay co ijxy nejhuñy co je cajp müid ooy may quipychech, tzaadzech, etz oori oyduñ huidi ajcxy dios'ajtpy. ¹⁷ Paady Pablo nimiydacy Jesús ma yi judíoñäy ñaymujctac müid je judíoñäy etz jacjadyii jäy huidi Dios miyaaxp ojadajtp. E jabom jabom müid miydaaccixy pinjaty y'oymujcp cajp cujc. ¹⁸ Nijëjity ixpicytijc ñay'ijxquípxigixy y'ixpijcin müid Pablo. Jim

huidibi ni'ixpiḡiyb epicúreo ixpijcin, etz cham huidi ni'ixpiḡiyb estoico ixpijcin. Chi ajcxy nijējity ymīnaangixy:

—¿Ti jada jada' ajt xyajniḡaayim jada yēydijc capxyḡaaybi?

Chi jadyii ymīnaangixy:

—Hue' jada ycapxhuācxyp huingbi dios y'ayuc.

Jadu'n ajcxy ymīnañ co Pablo nimīydacy Jesús etz jadu'n nej jāy yjugypicy huīdjaty ti y'ōccixyp. ¹⁹ Chi ajcxy mīdnicxy Pablo ma je it ma je ixpijciyjc ḡaymugyii huīdi anajty yxii Areópago, chi ajcxy Pablo nimay:

—¿Nej jēbi njájtciyich jada jemybi ixpijcin huīdi miich mmimimb? ²⁰ Com ti ḡch miich xyajniḡaayḡich ayuc ca'pi yhuinjihuḡyñity, e nejhūhūaamyich ajcxy nej yhuimbīdzimy tūg'óciy jada ayuc.

²¹ Tūg'óciy Atenas jāy etz nañ jadu'n huīdi ajcxy jim adzinaayb, ca' anajty ni ti tungixy, jēyi nigoobi amido'ijtcixy etz miydaaccixy jemybi ayuc tiy'ajt.

²² Huin'it Pablo ytīnayḡy mayjāy agujc jim Areópago, e ymīnañ:

—Atenas jāy, n'ixypich co miich ajcxy ooy myajmīj'ajtcixy canaagnax huīdibi miich ajcxy mdios'ajtpy. ²³ Com ti xii ya n'ixyich canaagnax huīdi ajcxy m'ojadajtpy, chi ti nbaatyich tūg altar ma jadu'n yjaayity: “Je Dios huīdi ca' pin ix'y'adyii.” Je Dios huīdi miich ajcxy m'ojadajtpy, e ca' ajcxy m'ix'y'adyii, jada je' huīdi nyajniḡaayb ajcxy.

²⁴ Je Dios huīdi oyduñ naaxhuiñybi etz tzajp etz jac tijaty, yi' je' nihuīdzin'ajttayb tūg'óciy. Je Dios ca' chināy ma tzajptijc huīdi jāy ajcxy cojpy. ²⁵ Dios ca' ni ti yajtgoy'ity huīdi naaxhuiñyājy jamōhuaanip. Dios yi' jejcp jugy'ajtin etz huīdibi nxejim, etz tūg'óciy tijaty.

²⁶ E tūgpi ni'py tūgpi jot ti yaj'oyīy tūg'óciy yi jāy, jigix huen tzinaaygixy huīdu'my naaxhuiñ. Dios tiy'ajt jejcp nej xii tiempo yōyipy, e ma jāy jēbi huaad chinaaygixy, ²⁷ jigix ixtāaygixipy Dios, jadu'n nej jihuīy ixtāaygixy tondāy xajtāy, com ca' je' jiguemity ma ḡch ajt nidūg nidūg. ²⁸ Dios yciḡpi ḡch ajt ndzinaayim nyūcxim etz nji'ajtim, com jadu'n mīnañ miich ajcxy mboeta, huīdibi ḡy yajcojpy: “Dios ḡch ajt xy'ung'ajtim xy'anāg'ajtim.” ²⁹ Pen Dios ḡch ajt xy'ap'ajt xy'oc'ajtim ca' huaad nhuīnma'ñ nbdacim co Dios yjadu'ñity nej oorī oyduñ, plata oyduñ, etz tzaadzech quipychech huīdi jāy ti yaj'oyīy mīd yci'mhuīnma'ñ. ³⁰ Dios ca' mīdity jotcōduuyb je jāy chuuhuinma'ñ tiibi ḡajxni. Jadachambi ane'mb Dios hueñytimma'amyity huen jāy ajcxy jothuimbijtcixy. ³¹ Com ti Dios yajnihuīnmayīy tūg xii mīna tiyduna'ñ yi naaxhuiñybi jāy mīd je yēydijc huīdibi ti huīn'ixy, jada tiy'ajt Dios ti yaj'ixy yajnejhuīy tūg'óciy jāy co ti yajjugypicy Jesús co y'o'cy.

³² Co ajcxy jadu'n mīdoy co yi'ōcpi yjugypigipy, chi nijējity ytiḡy niḡicpi yajxiicpi. Chi jacjadyii ymīnaangixy:

—Huaad ḡch ajcxy n'amido'idipyich miich m'ayuc mīna anajty jadūg'oc.

³³ Chi Pablo jim chooni ma je' anajty ajcxy. ³⁴ Chi nijējity jāy ypadzooni huīdi anajty ti mībicy Pablo y'ayuc. Ma je' ajcxy jim anajty tūg jāy huīdibi anajty yxii Dionisio, yi' je' anajty tungmīd jim Areópago. Nañ jadu'n tūg tōxyjāy huīdi anajty yxii Dámaris ypadzooni, etz jacjadyii jāy.

18

Chi Pablo ḡicxy jim Corinto

¹ Co jada jadu'n ytuni yjajti, chi Pablo chooni jim Atenas, ñicxi jim Corinto. ² Jim minaybaati tüg judíojäy huidi anajty yxii Aquila, Ponto anajty ycojajpity, namja'tni anajty miid ytöxyijc Priscila. Jim anajty ti chongixy Italia ñaaxjot, jëgixpi co je mij'ane'mbi, Claudio, pidacy cötujcin co huen tüg'óciy judíojäy pidzimdaaygixy jim Roma. Chi Pablo oy cogapxiy Aquila. ³ Aquila etz Priscila ytung'ajtpy anajty cochactijcxuyii, com nañ cochactijcxuuyb anajty Pablo, paady Pablo jim yhu'i'my miid je' ajcxy. Chi ajcxy tú'ciy ytuuñ. ⁴ Tüg tüg sábado xii Pablo ñicxy ma je judíojäy ajcxy ñaymujctac yajmiidmiydaaccixy Jesús y'ayuc ytiy'ajt etz capxjotcidaaccixy judíojäy etz nañ huidi ca' yjudíojäyity.

⁵ Co ajcxy Silas etz Timoteo yja'ty jim Corinto, choon ajcxy Macedonia, chi Pablo adügiijp ytigiiy ayuccapxhuäcxpi ma judíojäy ajcxy co Jesús je' je' je Cristo huidi je' ajcxy chach'ahuijxyp. ⁶ E je judíojäy ajcxy ytigiiy jotma'tpi, tzipcaxpi ahua'ngapxpi. Chi Pablo yhuít huinxijty, je' je' je tiy'ajt co puyöydüdaani ajcxy, e chi Pablo ymínañ:

—Miich ajcxy miid mgi'mbocy ajcxy myajtigoya'ñ yi m'alma. Hich ca' ti pocy nmüdidyich ma miich ajcxy. Cham nicxy Dios y'ayuc ngapxhuäcxich ma huidi ca' yjudíojäyity ajcxy.

⁷ Chi Pablo yöybojtni ma judíojäy naymujctac, chi ñicxy ma Justo ytijc. Justo ooy anajty Dios miyáxy ojadaty, e ymiid anajty ytijc mihuington je judíojäy ñaymujctac. ⁸ E Crispo, je judíojäy ñaymujctac huindzin, ymibijc je' je Huindzin Jesús y'ayuc ytiy'ajt, miid tüg'óciy y'ung y'anäg, yjuugy ymigüg. Nañ jadu'n nijëjity Corinto jäy co midoy Jesús y'ayuc, chi mibijcy e ñiibejty ajcxy. ⁹ Chi je Huindzin Dios nimay Pablo cumäyjoty:

—Ca' mdzigí, capxhuäcx'aditz n'ayucich, e ca' mni'amoñ. ¹⁰ Com ich miich nbubedipy, ca' pin jot miid'adipy nicxy nejaty xytuñy. Hich may ich ya nmüdity jäy ma jada cajp.

¹¹ Chi Pablo yhu'i'my jim Corinto tüg jimijt jacup, yaj'ixpijcy jäy je Huindzin Dios y'ayuc ytiy'ajt.

¹² Huin'it tiempo co Galión ygobernador'ajty jim Acaya ñaaxjot, chi judíojäy ajcxy midziptzoñ je Pablo, yajnicxy ajcxy ma cötujctac. ¹³ Chi ajcxy nimay je gobernador:

—Jada yëydijc tzach jäy yaj'ixpijcp co ca' ycopicyity yajcuydunipy Moisés ycötujcin huidi jaybety ijtp.

¹⁴ Pablo capxamb anajty co oy yi Galión nimäy ajcxy je judíojäy:

—Pen yi Pablo ti ytundigooy o mijpocy ti tuñ, huin'it nmijpidägibich miich ajcxy m'ayuc, miich ajcxy judíojäy. ¹⁵ Pen je Cristo y'ayuc etz miich ajcxy mgötujcin myajtzibiyb myajcapxyiyb, ca' ich huaad nyajtigiyiyich yijilbi huinma'ñ.

¹⁶ Chi je gobernador y'ané'min pidacy co huen judíojäy ajcxy yajpidzimdäyii ma je cötujctac. ¹⁷ Huin'it tüg'óciy griegojäy ma je cötujctac huijtzpidzimyib je Sóstenes, yi judíojäy naymujctac huindzin, e chi ajcxy cuy jibijpy huingojxy jipcojxy ma gobernador yhuinduu, e Galión ca' tuñycuenti.

Pablo yhuimbijtni Antioquía, e yajtzondacy midugügpi viaje

¹⁸ Jac-huäcxijp Pablo jecy jim Corinto. Chi yhuinma'ñpidacy co chonaani. Chi ycapxycijxni miid je mibijcpidijc, e chi ybarcotigiiyñi ñicxni jim Siria ñaaxjot. Ñicxni quipxyi miid Priscila etz Aquila. Jim Cencrea, ca'ni anajty ybarcotigiiyi, Pablo yajcöme'px cödza'm co anajty cuyduñ

yhuandaacin. ¹⁹ Co ajcxy yja'ty jim Efeso, chi Pablo ñay'ixmajtz ajcxy m̄id Priscila etz Aquila, e ñicxy ma je judíoñäy ajcxy ñaymujctac. Chi m̄idmiydacy je judíoñäy ajcxy huidi jim anajty ti ñayöymújcgixy. ²⁰ Chi je judíoñäy ajcxy jim Efeso cohuanñy co huen jac-hui'my, e Pablo ca' a'ixñy co yhui'mipy. ²¹ Chi Pablo ycapxycijñi m̄id je Efeso jäy, chi yminañ:

—Copicy co jim xii nyajnaxa'ñyich Jerusalén, e nhuimbidiptyich jadüg'oc ma miich ajcxy, pen Dios jadu'n tzojcp.

Chi Pablo ybarcotigñy chooni jim Efeso. ²² Co anajty ti ypättigñy jim Cesarea, Pablo nicxy Jerusalén co anajty capxrocxaangixy je mibijcpidijc, chi mic'amy idaacni jim Antioquia. ²³ Jim hueeni yhuäcxñy, chi choñ jadüg'oc ñicxy cajp cajp ma Galacia ñaaxjot etz Frigia ñaaxjot jotmicmigapxcixy tüg'óciy yi mibijcpidijc.

Apolos Dios y'ayuc capxhuäcxi jim Efeso

²⁴ Huin'it tiempo yja'ty jim Efeso tüg jäy huidi anajty yxiñ Apolos, hue' anajty ycojápiy Alejandria. Ooy anajty oy ayuc capxhuäcxy. E yajxon nejhuidäy Dios y'ayuc huidi jaybety ijtp. ²⁵ Apolos ooy anajty ixpicyity ma Huindzin Jesús y'ayuc e ooy yjotmiccapxy, oy anajty yaj'ixpicy nej je Huindzin Jesús yja'ty y'ayuc. Oy jeda'ajty anajty janejhuñy nej Juan, je Bautista, jäy ajcxy yajñibejty. ²⁶ Chi Apolos ytiñy capxpi miydaacpi ma je judíoñäy ajcxy ñaymujctac janch ni ca' chigñy chöyduñ. Chi co Priscila etz Aquila ajcxy m̄idooy Apolos y'ayuc, chi ajcxy yajnicxy ahuingujc, chi ajcxy oy yajm̄idmiydägy jac-huädz Dios y'ayuc yti'yajt. ²⁷ Chi co Apolos anajty ñicxa'ñ jim Acaya ñaaxjot, chi je mibijcpidijc jotmicmigapxy, e pubejty ajcxy. Chi ajcxy nijayñy je mibijcpidijc huidi ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸ Chi je Apolos oy capxpizimiy mayjäy agujc co ca' yjanchity nej anajty ajcxy judíoñäy yhuinma'ñ m̄idity, co Jesús ca' je' yjēity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huidi anajty ajcxy y'ahuixyp.

19

Pablo may mibijcpidijc minaybaati jim Efeso

¹ Jim Corinto anajty Apolos, co Pablo tegyi'm yajyöyñajxy mijyuugjot, chi oy yja'ty jim Efeso. Chi jim paty may mibijcpidijc. ² Chi Pablo y'amidooy je mibijcpidijc:

—¿Nej ti xy'adigñy xyjottigñy je Espíritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi ñich ajcxy pen ji Espíritu Santo.

³ Chi Pablo y'amidooy ajcxy:

—¿Ti ñibejtin miich ajcxy mbaad?

Chi je' ajcxy y'adzooy:

—Je Juan, je Bautista, ñibejtin.

⁴ Chi Pablo yminañ:

—Juan jäy yajñibejt je', je' je' je' tiy'ajt co huen jothuimbijtcixy. E nimaaygixy anajty co huen ajcxy mibigipy je Cristo huidi jacmiinamni. Je' je' je' Jesús, je Cristo.

⁵ Co jada ajcxy jadu'n midoy, chi ajcxy oy ñibety mïd je Huindzin Jesús yxii. ⁶ E co Pablo cñixajy ajcxy, huin'it je Espiritu Santo y'adigiy yjottigiy ajcxy. Chi ajcxy ytigiiy capxpi miydaacpi tigachyaty ayuc, e capxhuäcxy anajty ajcxy Dios y'ayuc. ⁷ Jëyi anajty nimajmetz yëdjictijc huidibi ajcxy ñibejt.

⁸ Tugüig po' Pablo jim yhuäcxijpy, e yöydïb anajty ma judíojäy ajcxy ñaymujctac capxhuäcxy Dios ytiy'ajt janch huinmic jotmic. Chi capxjotcidägy mayjäy mïd Dios ytiy'ajt. ⁹ Nijëjity jotjuuñydijc ca' ajcxy ymibijcy, jëyi ajcxy jibic tzachnigapxy Jesús ytiy'ajt ma jäy ajcxy yhuindu. Chi Pablo puyöydútcixni. Chi abicy yajnicxy je mibijcpidijc ma tüg escueltijc. Hue' je' je escuela huindzin anajty yxii Tirano, e jim Pablo Dios y'ayuc anajty capxhuäcxi jabom jabom. ¹⁰ Mejtz jimijt jadu'n jim chachyaj'ixpijcy, e tüg'óciy jäy ma je Asia ñaaxjot ymidoday ajcxy je Huindzin Jesús y'ayuc, je judíojäy etz huidi ca' yjudíojäyity. ¹¹ E Pablo mayba'mjäy yajtzoocy mïd Dios ymic'ajt etz ooy mïjhuinma'ñ ytuñ. ¹² Ixti yajnicxy anajty ajcxy yhuít etz ypaayi huidi Pablo ñinicx anajty ti ypadyii, e yajpaatcixy anajty pa'mjäy, e je' anajty mïd choocciy, e nañ je' anajty mïd ca'oybi ypidzimy ma jäy ajcxy y'ay yjot.

¹³ Chi nijëjity judíojäy huidi anajty huídijtp tzooydumbi, huídibi anajty yajpidzimgixyp ajcxy ca'oybi, jayajtzógaan tüg pa'mjäy mïd je Huindzin Jesús yxii co huen yajyöydüdyii je ca'oybi. Chi ajcxy nimaygixy je ca'oybi:

—Ñich miich yam nimaayb mïd Jesús yxii, je huidi Pablo ycapxhuäcxp, yajyöydüt jada jäy.

¹⁴ Jadu'n anajty y'iditczixy je Esceva ymang ajcxy, je nihuixtucjpi ajcxy. Je Esceva hue' je' anajty judíojäy etz nihuindzin'aty teedy'adii. ¹⁵ Co je Esceva ymang ajcxy migapx je ca'oybi, chi je ca'oybi y'adzooy:

—N'ix'atypich je Jesús, e nnejhuüybich pin je' Pablo, e miich ajcxy, ¿mbin miich ajcxy?

¹⁶ Chi je yëdjic huidi ca'oybi anajty mïd, ytiycpïgy tüg ma je' ajcxy, ymimadactay je nihuixtucjpi, e yqueectay ajcxy ma je tijc ñihuädz ixhuädz etz tzaachi. ¹⁷ Tüg'óciy jäy ajcxy huidi anajty tzinaayb jim Efeso, judíojäy etz huidi ca' yjudíojäyity nejhuyday ajcxy, chi ooy ajcxy chigiy e nimiydaaccixy e cömaaygixy je Huindzin Jesús yxii.

¹⁸ E mayjäy huidi mibijc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'ijtcixy. ¹⁹ E mayjäy tiibi anajty capxy je mañ'ajt necy yajminday tüg'óciy e no'ctay je necy ma jäy ajcxy yhuindu. E co ajcxy maymujcy je libro tzou, chi naybaati jada' huixchigüipx majc mil plata meeñ (moneda mexicana naybaati jacnaxy jahueenjaty ycatüg migo'px jamajcmocx tüg mil). ²⁰ E je Huindzin Jesús y'ayuc ñigi anajty yhuäcx'idich, ñigi ymijtgigy'idich.

²¹ Co anajty jadu'n ti ytuñyii ti yjadyii, chi Pablo yhuinma'ñypidacy co nicxy cogapxihua'ñ je mibijcpidijc jim Macedonia etz Acaya. Chi anajty yjacnicxa'ñ Jerusalén e jadu'n yminañ co jim chondäga'ñ jadügtecy e ñicxa'ñ jim Roma. ²² Chi quejxy jim Macedonia mejtz je ypubejtpi, Timoteo etz Erasto. Chi Pablo je' yjac-hu'i my jecy jim Asia.

Canay'ayuc-huinjihuühuü jim Efeso mïd Dios y'ayuc ycxipï

²³ Huin'it tiempo tzip oy pidicni jäy y'ocumigni y'oc'oxigni mïd Huindzin Jesús y'ayuc ycxipi. ²⁴ Co je', je plateri huidi anajty yxii Demetrio, yaj'oyiy anajty ac plata Diana chajptijc'ung, e jadu'n anajty

Demetrio etz jacjadyii jäy oy ymeeñybaatcixy müid je ytung. ²⁵ Chi Demetrio huomujcy ymügütjic je huidi jadu'mbi tung tumb, nimay ajcxy:

—Migügtjic, mnejhuüyb ajcxy co müid jadayaabi tung huidi ich ajt nduunim, jada müid jotcuyc ndzinaayim njugy'ajtim. ²⁶ E müich ajcxy m'ixpxy mnejhuüyb co je Pablo chach yaj'ixpxicy co ca' yi' diosity huidi jäy ajcxy yajcojpy. E Pablo ti ooy mayjäy capxjotcidägy, canan yaayi Efeso, nañ jadu'n ma tüg'óciy Asia naaxjot. ²⁷ Mij jada xyajtigoyaanim ma ich ajt n'adogii e nañ jadu'n je mijpi dios, je Diana, ytigoyipy, ca' ni pin occapxpaatniipy, je huidi cham mayjäy y'ojadajtpy tüg'óciy ya Asia ñaaxjot etz huindu'my naaxhuiñybi.

²⁸ Co jadu'n ajcxy midoy, chi ajcxy ooy yjotmätcooty, chi ytigüiy ajcxy huambi jihuiyib, chachmüinaangixy:

—¡Cömay jada Diana, yi efesiojäy ydiosa!

²⁹ Chi ajcxy yajhuinmäñydigoyday je cajp jäy e majch ajcxy je Gayo etz Aristarco, huidi tsoon Macedonia, metz yëydjic, huidi Pablo anajty ajcxy ymüid huidijtpy. Chi je cajpjäy ooy pahuijch pajugujcy ajcxy je Gayo etz Aristarco, yajnicxy ajcxy ma agujctjic huinduu ma jäy ñaymugyii. ³⁰ Chi Pablo yjatigihuaañ jäy agujc, müidcapxa'ñ müidmüydäga'ñ anajty je mayjäy. E je mibijcpidijc ca' ajcxy a'ixüiy nicxy jiiiby ytigüiy. ³¹ Nañ jadu'n nijëjity Asia mijtungmüidpi huidi anajty Pablo müid ñaymigüg'adyii, yajnigüejxy ayuc, co ca' huaad ñicxy ma jäy ñaymüjcgixy. ³² Je mayjäy tügmucy anajty jtcixy, ooy anajty yhuaangixy yjihuiyigixy, ca' anajty ajcxy ñay'ayuc-huinjihuiyigixy. E je jacmaaybi ni ca' anajty nejhuüygixy ti co chachnaymüjcgixy. ³³ Nijëjity jäy huidibi anajty ajcxy mayjäy agujc, je ajcxy yajmüidmüydactay je Alejandro ti anajty tuunip jajtjip. Chi je judío jäy ajcxy tijpidzimy je Alejandro ma mayjäy agujc. Chi Alejandro címüid tiy'ajt yejcy co huen amongixy. Je' anajty ñigapxtüdamy judíojäy ajcxy. ³⁴ Co je mayjäy nejhuüiy co je' je' yjudíojäyity, chi ajcxy ytigüiy huaambi jihuiyibi jahuenjaty ycamejtzhority, ymüinaangixy:

—¡Cömay ooy yi Diana, yi Efeso jäy ydiosa!

³⁵ Chi je cajp jaaybi co anajty je jäy ti yaj'amoongixy hueeni, chi ajcxy nimay:

—Efeso jäy, tüg'óciy yi naaxhuiñyjäy nejhuüiy co jada Efeso cajp yi' cuend'ajtp yi Diana chajptjic, je' Diana huidi ooy ti yajcömay, etz yi Diana ñinüicx huidi cá'u tzajpcixy. ³⁶ Ca' huaad ni pin ymüina'ñ co ca' yjánchezty. Amongix, ca' ti mdúngixipy pen ca' jayjyp yajxon mhuinmaaygixy. ³⁷ Com jada yëydjic ajcxy tüibi myajmüingixy, ca' ma ytundigooygixy, ca' yi' ma ajcxy jibic capxcixy ma müich ajcxy mdiosa Diana. ³⁸ Pen Demetrio etz huidijaty müid ytuñ pen ymüid xihuin müid pinjaty, paady tungmüidpi etz tydundac jiijity. Jëbi nigapxy ma tungmüidpi, jëbi miñ xyipy ñayñigapxtüutigixy. ³⁹ E pen huingbi ayuc huidi müich ajcxy mbijctzooyb, copity jada y'oyihuiipy ma jäy naymugyii. ⁴⁰ Ymüid jada ayo'n co nicxy nayyajxihuum co jäy cham ñaymüihuididyii müid jada ycxipi nej yam ytunyii yjadyii e ni ti tiy'ajt ich ajt nganejhuüyim nej nmüinaanim pen ji anajty xyaj'amüidoohuum müid co jäy cham chachhuaangixy chachjihuiyigixy.

⁴¹ Co jadu'n müydactay, chi ycapxycijxy müid je naymujcpidijc.

20

Pablo ñicxy jim Macedonia etz Grecia

¹ Co je cajp jây ycapxy'ayuc xeemy, chi Pablo huoomujcy je mibijcpidijc, e jaccapxhuijy ajcxy chi ycapxycijxni, chi chooni Efeso ñicxy jim Macedonia ñaaxjot. ² Cajp cajp Pablo oy co'ixiy je mibijcpidijc jaccapxhuijy ajcxy. Chi Pablo yja'ty jim Grecia ñaaxjot. ³ Chi Pablo yhuäcxijpy jim tugig po'. Jim Grecia Pablo anajty ybarcotigihua'ñ ñicxa'ñ Siria. Co Pablo oy nejhuüy co judíoJay ajcxy ti yajnihuinmayiyii yaj'öga'ñyii barcojoty, chi yhuinma'ñybaty co huimbida'ñ tegyi'm, ñaxa'ñ jadüg'oc Macedonia. ⁴ Pablo mayjây müid ñicxy, müidnicxy je Sópater huidi anajty cogajp Berea, etz Aristarco, etz Segundo huidi anajty cogajp Tesalónica, etz Gayo huidi anajty cogajp Derbe, etz Timoteo, etz nañ jadu'n Tíquico, etz Trófimo huidi tzoon jim Asia ñaaxjot. ⁵ Co jada mibijcpidijc ajcxy ñicxy jayijp, chi ajcxy xy'ahuijxyich jim ma je cajp huidi xii Troas. ⁶ Co xii ñajxtay mina yajcaay je tzajcaagy je huidi ca' müidity levadura, chi ñich ajcxy ndzooni jim Filipos barcojoty. Co migoox xini, oy ñich ajcxy naybátigixy jim Troas. Jim ñich ajcxy yhuäcxijpy huixtujc xii.

Pablo co'ixiy je mibijcpidijc jim Troas

⁷ Domingo xii ajcxy ñayyöymujci je mibijcpidijc chajcaagy ytujuhuäcxaangixy, e Pablo anajty ymigügtijc yjacyaj'ixpijcpy. Je' co anajty com jabom chonaani, paady oy ayuc jacyajyoñ ixti ycuju-hua'cxchumüy. ⁸ Jiiby anajty canaag lámpara ytüicxy ma ajcxy anajty ti yöymujccixy ma tüg cuarto huidi anajty oy ycixity. ⁹ E tüg yeeg'anäg huidi anajty yxii Eutico, ma ventana aguu anajty y'iñäy. Com Pablo jecy oy yaj'ixpijcy, chi je yeeg'anäg ymäymajtzi, e tugig nihuijtzpety anajty ycixity je tijc ma ycäy. Chi ajcxy yajpidigy ögy. ¹⁰ Co Pablo yminajcy, chi ñaygijxnajaji amineenmujcy je yeeg'anäg huidi anajty ti ycäy. Chi Pablo nimay ymigügtijc:

—Ca' mdzigüygixy, juugy jada.

¹¹ Chi Pablo jadüg'oc ypejty ma je cuarto cixpi, chi chajcaagy tujuhuäcxy e yajcaay ajcxy, e jadu'n Pablo yjacmüydacy co oy ximüiyñ. Chi ycapxycijxni müid je' ajcxy, chi ñicxni. ¹² E je yeeg'anäg huidi anajty ti ycäy, chi ajcxy yajnicxy juugy, e ooy ajcxy yjotcugiy nidüg'öciy.

Choñ ajcxy Troas ñicxcixy Mileto

¹³ Chi ñich ajcxy jayijp nicxügy barcojoty jim Asón co anajty jim nya-tzonáangixich Pablo, com ti anajty jadu'n müidnayñimáayigixich co je' tegyi'm anajty ñicxa'ñ. ¹⁴ Co ñich ajcxy naybaatti jim Asón, chi Pablo ybarcotigüy müid ñich ajcxy. Chi ñich ajcxy ñicxy jim Mitilene. ¹⁵ Chi ñich ajcxy jim ndzoñ, chi com jabom ñich ajcxy najxy mihuington Quío, comaax ñich ajcxy nja'ty jim ma barco jättac huidi anajty yxii Samos. Jim Trogilio ñich ajcxy nbocxy, com jabom ñich ajcxy nja'ty jim Mileto. ¹⁶ Chi Pablo ca' ñicxa'ñ jim Efeso co ca' yhuäcxiba'ñ jim Asia ñaaxjot, com tzojc anajty yjada'ñ Jerusalén, com jim anajty yajnaxa'ñ Pentecostés xii.

Pablo yajmüidmüydacy je huidibi ajcxy ane'mb je mibijcpidijc

¹⁷ Jim Mileto anajty Pablo, chi capxyñigüejejy huidi ajcxy nigohuajc'ajtp je mibijcpidijc huidi ajcxy jim Efeso. ¹⁸ E co ajcxy müiñ, chi Pablo ymüinañ: —Miich ajcxy mnejhuüiyb jadu'n nej ñich ti njäy'atyich ma miich ajcxy tüg'öciy je xii je tiempo nej oga'n nja'tyich ya Asia. ¹⁹ Jecy ñich ooy

ti n'ityich mïid miich ajcxy, nduñich ma nHuindzin Jesús ytung mïid yung naxy njot nhuinma'ñich, etz mïid huinni jotmay, etz ti may ayon nyajnaaxyich ma yi judíoJay ajcxy. ²⁰ Ca' ti n'ixmachich je ngapx'ayuc huidi oyip mïid miich ajcxy ycixpi. Ti nyaj'ixpicyich mayJay'agujc etz tijc tijc. ²¹ Ti ndiy'ajt yecyich ma judíoJay etz cham ma huidi ca' yjudíoJayity. Nnimaydaayich co huen jothuimbijtcixy ma Dios, etz huen mibijccixy ïich ajt nHuindzin Jesucristo. ²² Jadachambi nicxpich jim Jerusalén; adzip je Espíritu Santo xyquexyich e ni nganejhuïyich ti ïich jim xyjadamy. ²³ Co ïich cajp cajp ma nnicxyich, je Espíritu Santo xyajnejhuïybich co jim Jerusalén Jay ajcxy xypidaga'ñich pujxtigoty etz jim ajcxy xychaachytuna'ñich. ²⁴ Yi jadu'mbi ayuc ca' ïich nduñich cuendi, jada njugy'ajtich ca' ti tzoohuity. Jëyi janchtiy co nyajcixipyich jada tung jotcujc, e nguydunipyich je Huindzin Jesús y'ayuc, je tibi xyajñibicyich jada tung. Ngapxhuäcxibich yi oybi Jesucristo y'ayuc ytiy'ajt jadu'n nej Dios may'ajt ti tuñ mïid Jay ajcxy ycixpi.

²⁵ E jadachambi nnejhuïybich co miich ajcxy ma ti ngapxhuäcxych Dios y'ayuc, ca' miich ajcxy xy'ocjac'íxcixni jadügtecy. ²⁶ Paady cham nnimäyich miich ajcxy, ca' ni ti ngo'adzohuipyich mïid miich ajcxy ycixpi. ²⁷ Com ti ngapxhuäcxych ma miich ajcxy tüg'óciy je Dios y'ayuc je Dios yhuinma'ñ. Ni ti ayuc ni ti ytiy'ajt ti ngacoyüchich ma miich ajcxy. ²⁸ Naycuend'ájtigixy ci'm etz cuend'ajtcixy tüg'óciy Jay ajcxy huidi yajmij'ajtp je Huindzin Jesús, jadu'n ajcxy nipaady nej tügpicy cöbixy, etz miich ajcxy huidi nigohuajc'ajt je mibijcpidijc jadu'n miich ajcxy nipaady nej cöbixy cuend'ajtpi. Je Espíritu Santo ti xyajñibijccixy co mgüend'adipy ajcxy yi Jesús yJay, huidi ti cojuuy ajcxy ypocy mïid yci'mni'py co y'o'cy.

²⁹ Chi Pablo yjacmínañ:

—Nejhuybich co ya ndzóonibich miinip huingbi Jay huidi yajhuinma'ñydigoyam mibijcpidijc, jadu'n nej ahua'n iyujc huidi cöbixy tzüdzip. ³⁰ Ji ma miich ajcxy ji Jay yaj'ixpigam anii ma yjapadyi yaj'ixpigipy tiy'ajt oybi jigix yi mibijcpidijc ypanicxiyb. ³¹ Naygüend'ájtigix, mjäymedziyb ajcxy jadu'n nej ïich tugig jimijt ti nyaj'ixpicyich xim tzuum jabom jabom, mïid huinni jotmay ti nyaj'ixbijccixy miich ajcxy nidüg nidüg.

³² Jadachambi ïich, nmigügtjicich ajcxy, Dios miich ajcxy nyajpuhuanïyb, nyajmihui'maamyich miich ajcxy Dios y'ayuc jadu'n nej Dios ajt xychojcm xyjihuiyim. Ma Dios y'ayuc miich ajcxy mbaadipy mic'ajt ma yi mibijcin, e mbaadipy ajcxy it lugar ma Dios quipxyi mïid ajcxy nidüg'óciy tibi yajhuäch yjot yhuinma'ñ. ³³ Ni ti ïich ti nga'adzocy, ni pin yhuít ymeen huidibi n'ocjediybich. ³⁴ Miich ajcxy mnejhuïyb co ti nduñich, mïid ngi'mgijich ci'm ti nnaymöyijich huidi nyajmayajtpyich etz nañ jadu'n ti nbubetyich nmigügtjicich huidi ïich anajty nmïid. ³⁵ Ich miich ajcxy ti nyajni'ixyigixy nej jëbi mdungixy, nej jëbi mbubéjtcixy migügtjic huidi pa'm'ijtp, etz huidi tijaty yajmayajtp. Jäymedzi ajcxy je Huindzin Dios y'ayuc co ymínañ: “Jacjotcujc je' huidi yejcp, ca'ydi huidibi yajmooyb.”

³⁶ Co jadu'n ycapxtay, chi Pablo ycoxtinay'ahuïy mïid je' ajcxy, e mibijctzoy ajcxy Dios. ³⁷ Ytigüy ajcxy yaaxpi nidüg'óciy, e mineeñ ajcxy Pablo etz tzücx. ³⁸ Ooy ajcxy jihuiy nej anajty ti ñimáayigixy ajcxy co ca' yjac'ixiyb ajcxy jadügtecy. Chi ajcxy oy najtzhuhuiy jim ma barco.

21

Pablo ñicxy jim Jerusalén

¹ Co ñich ajcxy ngapxycíjxy mïd je mibijcpidijc, chi ñich ajcxy nbarcotigiïy, tïiyi ñicxy ñich ajcxy jim Cos. Com jabom ndzooñich Cos ñicxy ñich ajcxy jim Rodas. Chi ñich ajcxy ndzooñ Rodas ñicx ñich ajcxy jim Pátara. ² Jim Pátara ñich ajcxy nbaaty tüg barco huïdi anajty najxp Fenicia ñaaxjot. Jim ñich ajcxy nbarcotigiïy jadüg'oc, chi ñich ajcxy nnicxni. ³ Chi ñich ajcxy mmij'ijxy Chipre je naax mejy'agujcpi, anajty'amy je' yhuï'my. Jacnicxy ñich ajcxy Siria ñaaxjot, chi je barco ytigïy ma yjättac jim Tiro co jim anajty chimydajc yajhuïma'ñ. ⁴ Jim ñich ajcxy nbaty jäy huïdi anajty yajmij'ajtp Jesús, chi nmïdhuäcxijpich ajcxy huixtujc xii. Je' ajcxy je Espiritu Santo yajnejhuïyi co Pablo ayo'n pada'ñ Jerusalén, paady ajcxy ñimay Pablo co ca' huaad jim ñicxy. ⁵ Co huixtujc xii bi yca'pxy, chi ñich ajcxy ndzooni. E tüg'ócïy mibijcpidijc mïd y'ung ytóxyijc oy xytüjijphuohuïygixyich cajppa'. Jim ma mejypa' ngoxtinay'ahuïy ñich ajcxy, chi ñich ajcxy nmibijctzoy Dios. ⁶ Huin'it ñich ajcxy ngapxycíjxni, chi nbarcotigiïyñi ñich ajcxy e je mibijcpidijc yhuimbijtni ajcxy ma ytijc.

⁷ Co ñich ajcxy ndzooñ Tiro, chi ñicxy ñich ajcxy Tolemaida. Jim ñich ajcxy ngapxocxich je huïdi anajty ajcxy mijpidaacp Jesús, e nmïdhuï'my ñich ajcxy jim tüg xii. ⁸ Com jabom ñich ajcxy ndzooñ Tolemaida mïd Pablo etz pinjaty ñich ajcxy anajty nmïd. Chi ñich ajcxy nja'ty jim Cesarea. E chi ñich ajcxy ñicx ma Felipe ytijc, je huïdibi anajty capxhuäcxy Jesucristo yti'ajt je oybi. Je' je' huïdi tuun je nihuixtujcpi taabi ajcxy caayin uucïn yajhuäcxy jim Jerusalén oga'n. Chi ñich ajcxy nhuï'my mïd je'. ⁹ Felipe mïdaax anajty ñiix mïdity, ca'ni anajty ajcxy ypijccixy. E je' ñiix ajcxy anajty Dios y'ayucnajtzcaxïyipy. ¹⁰ Ti anajty ñich ajcxy jim nhuäcxiipy canaag xii co oy yjäty tüg ayucnajtzcaxïyibi huïdi anajty yxii Agabo, jim anajty ti chooñ Judea. ¹¹ Chi Agabo y'oy xycogapxïygixy ma ñich ajcxy njättac. Chi Agabo Pablo yhuïin huijtzïcci, e je' mïd ñaygïxojtz ñaydecyxojtzi, chi ymanañ:

—Je Espiritu Santo jadu'n minamb co jim Jerusalén jadu'n judiojäy ajcxy cïxodza'ñ tecyxodza'ñ jada huïin yhuindzin, e nañ cïyega'ñ ajcxy ma huïdi ca' yjudiojäyity.

¹² Co jadu'n yajmïdoy, ñich ajcxy etz je Cesarea jäy ngohuanïy ñich ajcxy Pablo co ca' huaad ñicxy jim Jerusalén. ¹³ Huin'it Pablo y'adzooy:

—¿Nej co myaaxcixy mïd ñich ycixpi? ¿Nej ñich miich ajcxy co njot nhuinma'ñ xyaj'amutzcïyiy? Hich nayyéjicbich mïd naygïxodziï naydecyxoodziï, nañ jëbi n'ogïbich jim Jerusalén mïd je Huindzin Jesús ycixpi.

¹⁴ Co ca' ñich ajcxy mimadacy ñicxy nyajhuï'mgixyich Pablo, chi ñich ajcxy n'amooni, chi ñich ajcxy ñayñïmaayi:

—Huen cuyduñ je Huindzin Jesús chojcin.

¹⁵ Co jadu'n yjajti, chi ñich ajcxy ndzonï ni'ixïy e chi ñich ajcxy ñicxy jim Jerusalén. ¹⁶ Mïd ñicxy ñich ajcxy nijëjity mibijcpidijc huïdi tzoon Cesarea, e nañ tzooñ anajty tüg Chipre jäy huïdi anajty yxii Mnasón, jecyïp anajty jijptigiyyïñi jada mibijcin e je' ñich ajcxy ñicxy xyajjättägaangixy.

Pablo oy cogapxiy Jacobo

¹⁷ Co ñich ajcxy nja'ty jim Jerusalén, chi je mibijcpidijc ñich ajcxy xycöbijcy janch jotcujc. ¹⁸ Com jabom ñich ajcxy ñicxy mïd Pablo, y'oy

hich ajcxy ngogapx̄y Jacobo, e jim anajty t̄üg'óc̄y huidi nigohuajc'ajtp je m̄ibijcp̄idijc. ¹⁹ Chi Pablo ym̄iḡügt̄ijc capxpcocy, e yajm̄idm̄iydacy ti anajty Dios ti tuñ m̄id yí' ma yí jāy ajcxy huidi ca' yjudío jāyity. ²⁰ Co ajcxy jadu'n m̄idooy, chi ajcxy huin'̄iyy jāymejch yí Dios, chi ajcxy Pablo n̄imay:

—Miḡüg Pablo, miich mnejhūiyyb co ya canaag mil jāy ti m̄ibicy Jesús, e yjact̄im̄ina'ñ ajcxy co copicy nguyduunim Moisés yc̄öt̄ujcin je jecyip. ²¹ Ti ajcxy yajm̄idm̄iyd̄ägyii co miich mdzachj̄äyyaj'ixpicy ma t̄üg'óc̄y judío jāy huidi ajcxy jiḡügy adz̄inaayb co ca' huaad tuñycuenti Moisés yc̄öt̄ujcin je jecyip, etz ca' ycopicyity co tiy'ajtt̄iyygix̄ipy y'ung, etz ni ca' ycopicyity payöyipy hich ajt ngostumbre. ²² ¿Ti huaad nduunim? Jotm̄adam ajcxy co nejhūihuiipy co ya miich ti mj̄äty. ²³ Hue' jancht̄iy jadu'n miich mdunipy: cha m̄idaax ȳȳdijc huidi cuydunamy t̄üg huan-daacin. ²⁴ M̄idnicxy je' ajcxy, nicx nayyajpocyñ̄ihuaatzi m̄id yí' ajcxy, e miich mgojuydayipy nej anajty ajcxy ypadyii je meeñyduñi. E chi ajcxy myajc̄ome'px̄ipy c̄özam, e jadu'n je jāy ajcxy huinj̄ihuiyd̄ähuipy co ca' yjanchity jadu'n nej xyñ̄im̄iydaaccixy, j̄eyi co miich nañ jadu'n mguydun je Moisés yc̄öt̄ujcin je jecyip. ²⁵ Huidibi jancht̄iy jadu'n nej yí huidibi ajcxy ca' yjudío jāyity, e ti m̄ijpidaaccixy Jesús, ti hich yí' ajcxy nijaȳiyygix̄ich co ca' t̄üngx̄ipy cuenti jada jadu'mbi judío jāy ycostumbre. Je' jancht̄iy co ca' huaad tz̄ütz̄cix̄ipy je t̄iibi jāy yajhuindziḡiy ídolos, ni ca' huaad j̄icxcix̄ipy n̄i'py, etz ni ca' ajcxy tz̄üdz̄ipy huidi yo'c-huiddy ti y'ögy, etz ca' ajcxy huingbi t̄öxyj̄ay migapxt̄iḡöoygix̄ipy.

Chi ajcxy majch je Pablo ma Dios yt̄ijc

²⁶ Chi Pablo m̄id nicxy je nim̄idaaxpi ȳȳdijc, com jabom ajcxy nayyajpocyñ̄ihuaatzi ajcxy, chi ajcxy yt̄iḡiyy ma Dios yt̄ijc, e chi ajcxy yt̄iy'ajt yejcy ma judío teedy ti x̄i yc̄ixa'ñ je nayyajpocyñ̄ihuaadz̄i, etz ti x̄i huindziḡi'ñ iyyuc c̄yegaanḡixy nidüg nidüg.

²⁷ Ma anajty yca'pxaani je m̄ihuixt̄ujcx̄iibi nij̄j̄ity judío jāy, chooñ jim Asia, chi ajcxy ijxy Pablo ma Dios yt̄ijc. Huin'ti ajcxy je mayj̄äy majch Pablo, yajhuangoty yajj̄ihuiygoty, ²⁸ chi ajcxy yam chachm̄inaangixy:

—Israel jāy ajcxy, pubejtcich hich ajcxy! Jada je' je ȳȳdijc huidi xi ya tzach nigapxp̄ ni'oj̄iyyb judío jāy ycostumbre, Moisés yc̄öt̄ujcin, etz nDios yt̄ijc. E jadüg nax ti yajtiḡiyygix̄y griegoj̄äy ma Dios yt̄ijc, yajj̄ibic̄iyygix̄y jada it lugar huätzpi. (Com ca' ñigödúcyity nicxy griegoj̄äy yt̄iḡiyy ma Dios yt̄ijc.)

²⁹ Paady anajty jadu'n ym̄inaangixy je huidi ajcxy majtz je Pablo, com co ijxy ajcxy Pablo m̄idhuidity cajpjoty je Trófimo, huidi anajty cogajp Efeso. Hue' anajty t̄ijcixy co Pablo ti m̄idtiḡiy Trófimo tzajtigoty.

³⁰ T̄üg'óc̄y je cajpj̄äy yjotm̄ätcottay, miñ ajcxy poȳgy majch ajcxy je Pablo yajp̄idzimy tzajtigoty pahuijch pajugujcy. Chi ajcxy mic'amy aḡiyy Dios yt̄ijc. ³¹ Yaj'ögamyb anajty ajcxy Pablo. Chi je soldado huindzin ayuc m̄idoy co t̄üg'óc̄y je cajp jāy ajcxy ti chachhuaangixy chachj̄ihuiygyx̄y.

³² Je soldado huindzin huodzonday ysoldado ajcxy, e chi ajcxy ñicxy poȳgy ma je mayj̄äy yhuaangixy yj̄ihuiygyx̄y. Co je mayj̄äy ajcxy ijxy miñ soldado ajcxy m̄id yhuindzin, chi ajcxy ixmajch Pablo ca' ocjacc̄ój̄cix̄ni.

³³ Co je soldado huindzin jim ja'ty, chi yajmajtzi je Pablo, ni'an̄em̄diy co huen c̄ixochyii m̄id mejtz cadena. Chi yajtiyy pin je' anajty, e ti ti tuñ. ³⁴ Chi je mayj̄äy ajcxy yt̄iḡiyy huaambi j̄ihuiybi, e jadu'n je soldado huindzin ca' ni nej huinj̄ihuiyy m̄id je ne'mbi. Chi ni'ane'm̄diy co huen

Pablo yajnicxyii ma cuartel. ³⁵ Co jim yja'ty ma cuartel pediydac, chi je soldado ajcxy ciyigy Pablo, co anajty je mayjy chachjottigoyñajxcixy tzachyaj'ogaangixy anajty Pablo. ³⁶ Tüg'óciy je mayjy pamiingixy axam je soldado ajcxy, yam chachminaangixy:

—¡Huen ögy!

Pablo ñaygohuaani ma je mayjy

³⁷ Co anajty yajtigihua'ñyii cuartel tigoty, chi Pablo migapxy je soldado huindzin müid griego ayuc, yminañ:

—¿Nej jëbi ii nmüidmiydägy tüg'aa metz'aaji?

Chi je soldado huindzin y'adzooy:

—¿Nej mjaity miich griego y'ayuc? ³⁸ ¿Nej ca' jada' miich jëity je egipcio jäy huidi namni tzip yajpidicp, e huobidzimy mîdaax mil jäy yaj'öcpî, müid nicxy ajcxy jim mijtigiduum?

³⁹ Chi Pablo nimay je soldado huindzin:

—Ich judíojäy ich, jim ngogájpidyich Tarso, tüg mijcajp huidi yajpatpi jim Cilicia ñaaxjot. Tun may'ajt miñ mayjy n'ocmigapxich.

⁴⁰ Co je soldado huindzin a'ixiy, chi Pablo ytinay'ahuüy ma je cuartel pediydac, e cümüid ytiy'ajt yejcy co huen amoongixy. Co je mayjy ajcxy y'amoday, chi migapxcoty müid hebreo ayuc yminañ:

22

¹ —Migügtjc etz mij'anäctjc, midoogixy jadu'n nej ich yam nnayñigapxtüdyii.

² Co je mayjy ajcxy midoy co ymigápxigixy müid hebreo y'ayuc, chi ajcxy y'amoday, chi Pablo yminañ:

³ —Judíojäy ich. Jim Tarso nma'xung'ajtyich, Cilicia ñaaxjot. E ya Jerusalén ti nyeegyich. Ixpjicich ya ma Gamaliel, etz yajxon Gamaliel ti xyaj'ixpicyich ajt nmij'ap nmijteedy ytiy'ajt etz ycötújcín. Njatyim nyajmij'ajtpyich Dios jadu'n nej miich ajcxy Dios myajmij'ajtcixy cham.

⁴ Jecy ti n'ixhuidity ti nbahuidityich je jäy ajcxy huidi anajty mijpidaacp Jesús y'ayuc, nyaj'öctähuaamyich anajty, e nyajnicxpyich anajty mach yëydjctjc etz töxyjädyjc, nbidägyich anajty ajcxy pujxtigoty. ⁵ Je teedy mijtungmüdpî etz tüg'óciy mij'anäctjc ymüid tiy'ajt, co ich ajcxy xy-mooyich cötujcín, e nnicxyich anajty jim Damasco ma nmigügtjcich yi judío jäy ajcxy. N'ixtäyich anajty je jäy ajcxy huidi Jesús y'ayuc mijpidaacp, madza'ñich anajty ajcxy, e nyajmiina'ñich anajty ajcxy ya Jerusalén huen yajzaachytungixy.

Pablo nimäydacy nej yjothuimbijty

⁶ Co ich anajty ndüyöyich mihuingon Damasco, cujc yxi anajty, chi janch timitiini ytücxigy jühuidity jadu'n nej jin ma ich, hue' anajty choon tzajpjoty. ⁷ Chi jim ngidaayich, huin'it nmidooyich tüg ayuc xyñimäyich: “Saulo, Saulo, ¿ti co xypahuidijttägyich?” ⁸ Huin'it n'amidooyich: “¿Mbin miich, Huindzin?” Chi xy'adzooyich: “Ich je' je Jesús je huidi cogajp jim Nazaret, je huidi miich mdzachpahuidijttacpy.” ⁹ Pinjaty ich anajty nmüid y'ijx je' ajcxy je tücxin, chi ajcxy ooy chigüy, e ca' ajcxy huinjihuüy je ayuc huidi anajty nmigapxyiijich. ¹⁰ Huin'it nniimaayich: “¿Ti jëbi nduñich, Huindzin?” Chi je Huindzin Jesús xy'adzooyich: “Pidig e yajjöy mdu', nicxy jim Damasco, jim myajnimähuiyb tüg'óciy ti jëbi

mduñ.” ¹¹ Je t̄icx̄in hue' je' xy'ixmajchich huiintz. E chi je nmigügt̄ijc̄ich xyhuijzoon̄ich ajcxy c̄iḡixy, xyajja'tyich ajcxy jim Damasco.

¹² Jim Damasco anajty chinäy t̄üg ȳeyd̄ijc̄ huidi anajty yx̄i Ananías, je huidi anajty ooy cuyduñ Moisés yc̄ot̄ujc̄in je j̄ecȳip. E judíōj̄äy ajcxy huidi jim tzinaayb ooy c̄omaayḡixy co ooy y'oyj̄äȳity. ¹³ Chi Ananías ymiiñ ma nj̄ättaac̄ich, e ytinay'ihūīy ma ñich nmijc, chi xyñimaayich: “Migüg Saulo, ījx̄iḡich jadüg'oc huinjemy.” Tim huin'it̄iy n'ijx̄iḡyich. ¹⁴ Chi Ananías xyñimaayich: “Je Dios huidi ajt nmij'ap nmijteedy ojadajt, je' ti xyhuin'ixy jigix mnejhūihūipy Dios yhuinmañ, etz m'ixipy je tudäcyp̄i j̄äy, e mm̄idohūipy yci'm ayuc huidi ycapxpy. ¹⁵ Dios ti xyhuin'ixy jigix n̄icxy m̄diy'ajt yecy ma t̄üg'óc̄iy naaxhūiñȳj̄äy, etz mnim̄iyd̄äḡipy nej ti m'ixy ti mm̄idoy. ¹⁶ Jadachambi, ¿nej co mhuācxipy? Pid̄ig etz n̄ibet. Mib̄ijctzou Dios jigix mbocy ñihūädzipy.”

Pablo nim̄iydacy nej oy yajquexy ma je huidibi anajty ajcxy ca'p yjudíōj̄äȳity

¹⁷ Co n̄icxn̄ich jadüg'oc Jerusalén, chi n̄icx̄ich ma Dios yt̄ijc, oy Dios nm̄ib̄ijctzooyich. Chi ñich j̄iiby tzajt̄igoty n'ixmañȳīyich. ¹⁸ N'ijxyich je Huindzin Jesús e xyñimaayich: “Pidzim ya Jerusalén mic'amy, ca' je Jerusalén j̄äy ajcxy c̄ob̄iḡipy miich m'ayuc jadu'n nej xyñigapxa'ñich.” ¹⁹ Huin'it n'adzooyich: “Huindzin Jesús, ȳi j̄äy ajcxy ñejhūīyb co ñich anajty n̄icx̄ich huen huidi judíōj̄äy naymujctac n'ixt̄äyich ȳi j̄äy ajcxy huidi miich m'ayuc xym̄ib̄ijc̄ip, ti n̄bid̄ägyich anajty ajcxy pujxt̄igoty, ooy ñich ajcxy ȳi' ti ndzaachytuñ ti nga'oyduñich. ²⁰ Co ajcxy yaj'ögy je Esteban, miich mdumbi, huidi miich m'ayuc xycapxhūäcxip, jim ñich anajty nañ jadu'n yajpaady. E ooy nj̄äyḡidacyich co ajcxy yaj'o'cy, ixti ngüend'ajtich je' ajcxy yjocxhuit huidi Esteban yaj'o'c.” ²¹ Chi ñich nHuindzin Jesús xyñimay: “Cham ñich miich nguexy jigüegy it ma ȳi j̄äy ajcxy huidi ca' yjudíōj̄äȳity.”

Pablo, ma je comandante yci'am

²² E yabaad je mayj̄äy y'amido'ijty Pablo y'ayuc, chi yt̄iḡīy ajcxy huambi jihuīybi chachm̄inaangixy:

—¡Huen öc yj̄iibi ȳeyd̄ijc! ¡Ca' huaad yjactzinäy!

²³ Yam yhuaangixy yjihuīygyixy, yam yjocxhuit tzachjengixy, etz naaxhuaay tzachyujc-huicixy. ²⁴ Chi je soldado huindzin ni'ane'm̄diy co huen Pablo yajnicxyii cuartel tigoty, e ni'ane'm̄diy co huen ci'adyii jigix nigapxip ti ti tuñ co je j̄äy ti ym̄ib̄id̄igyii. ²⁵ Ti anajty ajcxy c̄ixojtc̄ixy, e chi anajty ajcxy tzaachytunaangixy co Pablo nimay je capitán huidi anajty huinduy:

—¿Ti c̄ot̄ujc̄in miich ajcxy m̄id co mdzaachytunañ t̄üg romanoj̄äy, ni ca' ajcxy jayijp m̄diyduñ?

²⁶ Co jadu'n m̄idooy je capitán, chi ñicxy oy yajnim̄äy je comandante:

—Ixcim nej mduñ ȳi j̄äy, com hue' ȳi romanoj̄äy.

²⁷ Huin'it je comandante ym̄ijhūägy ma je Pablo, chi y'amidooy:

—¿Nej janch co miich mromanoj̄äȳity?

Chi Pablo y'adzooy:

—Janch.

²⁸ Huin'it je comandante nimay Pablo:

—Meeñȳḡixy ñich jada nbaaty co naydijyijich romanoj̄äy.

E chi Pablo y'adzooy:

—Hich ti nm#bi'c'ajtich yí'.

²⁹ M#id j#yí, je hu#dibi anajty ajcxy c#'adam je Pablo, chi puy#y#d#ut#c#xni. Na# jadu'n je comandante ooy #ay'adzig#yí, m#id co c#xojch Pablo m#id cadena.

Pablo ma je jud#oj#y ajcxy yjuntitung#xy

³⁰ Com jabom je comandante co anajty nejhu#hua'n# ti yc#xpi co ti yx#y#i je Pablo y# jud#oj#y, huen yajm#nag#y#i cadena ma Pablo yci'. Chi ane'my co yajhuomujci je teedy tungm#d#pi etz je jud#o mij'an#ct#j#c. Huin'it je comandante yajn#x#y Pablo ma je huindzind#j#c etz ixp#cyt#j#c anajty ti #aym#j#ci#g#xy.

23

¹ Huin'it Pablo yaj'ix#pejty je may#j#y hu#di anajty ti n#y#y#m#j#ci#g#xy, e chi ajcxy n#may:

—Mig#gt#j#c, Dios y'ix#py #ejhu#y#b nej #ich ti ndu# maabi n#y#e#c#p#d#z#m#y#i, tud#y n'ity#ich ixti chambaadni.

² Huin'it je Anan#s, je teedy m#jtungm#d#pi, ni'ane'md#y Pablo co huen yaj'accoj#y. ³ Chi Pablo ym#na#:

—Dios xychaachtun#py m#ich hu#dibi m#ay#b#da#c#p nej jihuy# ooy mdud#y#j#y#ity, e ca' yjanchity! Paady m#ich m'#n#y ma c#t#j#t#c j#g#x nyajt#y#dun#py#ich nej je ley y'ane'my. Chi mm#idund#gooy je ley co ti xyajcojxy#j#ich.

⁴ Je j#y ajcxy hu#di anajty j#m m#na#:

—¿Jadu'n m#ich m#igapxt#igoy y# Dios ym#jtungm#d#pi?

⁵ Chi Pablo ym#na#:

—Mig#gt#j#c, #ich ca' anajty nejhu#y#ich, pen y# je' Dios ym#jtungm#d#pi. Com j#ybety jadu'n ma Dios #ncy: “Ca' huaad j#bic m#n#gap#x#py hu#di tungm#d# jtp ma m#ich m#j#y.”

⁶ Huin'it Pablo ix#y nejhu#y co j#m junti'joty mejt#p#cy ixp#cyt#j#c anajty j#m, j#m hu#di saduceo y'ix#p#cin ym#j#p#d#c#p etz na# jadu'n j#m hu#di fariseo y'ix#p#cin ym#j#p#d#c#p, chi Pablo ym#na# m#c:

—Mig#gt#j#c#ich, fariseoj#y #ich, na# jadu'n ndeedy#ich fariseoj#y je'. Cham nyajt#y#du#ich m#id j#g#xpi co nm#b#cy#ich co Dios yajjugyp#g#py j#y t#ibi y'#cc#xy.

⁷ Co Pablo jadu'n ym#nanday, chi fariseoj#y etz saduceoj#y m#n# xy#py ajcxy ca' #ay'ayuc-huin#hu#y#i. Chi je naymujc#p#d#j#c ajcxy #ay#j#ic-hu#cx#i.

⁸ Je' co je saduceoj#y ym#naang#xy co o'c#i ca' yjugyp#g#py, ni ca' j#i #ngel ajcxy, na# ca' j#y y'alma, na# ca' j#i je Esp#ritu Santo, etz ni ca' j#i mujcu' ajcxy. Je fariseoj#y ym#b#j#cp#y je' ajcxy co y#j#j#y #ngel ajcxy, co #c#i jugyp#gaang#xy, co je Esp#ritu Santo y#j#j#y, co j#y ajcxy m#dity y'alma, etz co mujcu' ajcxy y#j#j#y. ⁹ T#g'#cy j#y ajcxy ma je naymujt#c yt#g#y huambi jihuy#y#i. Chi nij#j#y fariseoj#y hu#di nihuindzin'ajtpy je Moiss#s yc#t#j#cin n#gapxtuty Pablo ym#na#:

—Jadayaabi j#y ca' ti pocy ti tu#. Ca' yj#cyty ti jada' ym#gapxy#i t#g esp#ritu o t#g #ngel.

¹⁰ Chi je may#j#y anajty ooy m#c ti #ayy#jot'amb#j#ci#g#xy. Je soldado huindzin tzig#y#b anajty co Pablo y'ahuoon#hu#y#y y'agidzihu#y#y, paady

ni'ane'mdiy huen yi soldado ajcxy yajpidzimgixy juntijoty e yajnicxixipy yi Pablo jadüg'oc ma cuartel.

¹¹ Huin'it coodz ñayguëxici je Huindzin Jesús ma Pablo ymijc, nimaayi: —Jotmicpic Pablo, com jadu'n nej ya Jerusalén ti xyñigodiy'ajt'átyich, nañ jadu'n xyñigodiy'ajt'adipyich jim Roma.

Ixtaaygixy huinmañ nej huaad Pablo yaj'öccixy

¹² Com jabom nijëjity judíojäy ñaygapxi co yaj'ögaangixy Pablo. E chi ajcxy capxycödujcy ñay'ibojci ñaygapxpojci co ca' ycayaangixy y'ügaangixy ixti cooni ajcxy yaj'öccixipy Pablo. ¹³ Nihuixchiguipx naxy anajty yëydijctijc huidi ajcxy jadu'n naygapxi. ¹⁴ Chi ajcxy ninicxy je teedy ajcxy huidibi mijtungmüd etz judío mij'anäctijc, nimay ajcxy:

—Ich ajcxy ti ngapxycödujccixy co ca' ngayáangixyich n'ügaangixyich ixti cooni ich ajcxy nyaj'öcip Pablo. ¹⁵ Jadachambi miich ajcxy, etz jacjadyii ixpicytijc mij'anäctijc nidungiygixy ma je soldado huindzin, co huen jabom yajminyii Pablo jadügtecy ma miich ajcxy. E aanidaaccixy co jacyajxon yajtyduna'ñ, e ni'ixi ich ajcxy anajty n'ijtcixy co Pablo nyaj'ögibich ca'ni anajty yjäty ma naymujctac.

¹⁶ Pablo chi' ymang nejhuiy nej je' anajty ti ñaygápaxigixy, chi ñicxy ma cuartel oy Pablo yajnimäy. ¹⁷ Huin'it Pablo yaaxi tüg soldado huindzin, e chi nimay:

—Yajnicx jada yeeg'anäg ma je comandante, ymüd yi' ayuc ti nigapxaamy.

¹⁸ Chi je soldado huindzin yajnicxy je yeeg'anäg ma je comandante, e chi nimay:

—Pablo, je machyjäy, ti xyaaxyich, ti xyñimäyich co nmüdmünipyich jada yeeg'anäg, ymüd yi' ayuc huidi ñigapxaamy ma miich.

¹⁹ Chi je comandante majch je yeeg'anäg ma yci', e yajnicxy abicy, chi yaj'amidooy:

—¿Ti xyajnimähuaamyich?

²⁰ Chi je yeeg'anäg yminañ:

—Yi judíojäy ajcxy ti ñaygápaxigixy co xyñimähuaangixy co jabom Pablo myajnicxipy jim ma ñayyöymugáangixy, y'aanidägaangixy co jacyajxon tiydunaangixy. ²¹ Ca' miich yi' mmibigipy; com nihuixchiguipx naxy yëydijctijc jim yi' ajcxy ahuixy yüch. Ti capxycödujccixy co ca' ajcxy ycayañ y'ügañ ixti cooni ajcxy yaj'ögipy je Pablo. Jadachambi ni'ixi jim y'ijtcixy, jëyi miich m'ayuc ajcxy xyjamidohuaani, pen mni'adzooyb.

²² Chi je comandante ycapxycijxy müd je yeeg'anäg. Chi nimay co ca' huaad ymiydägy müd jacpinjaty jadu'n nej anajty ti ymiydaaccixy.

Yajnicxy ajcxy Pablo ma je gobernador Félix

²³ Chi je comandante yaaxi metz capitán moy cötújcín huen nayñ'ixiiygixy nimejtzmigo'px soldado huidi nicxip tegy'm, etz tug'pxmajc huidi nicxip cohuaaygixy, etz mejtz migo'px quipyjipxu'ñmüdpi, huen nicxcixy jim Cesarea mijcoodz. ²⁴ Nañ ni'ane'mdiy co huen cohuy ni'ixi pidägyii huidi Pablo yaj'ñähuiipy, e moy cötújcín co huen oy yajxon ajcxy Pablo yajjädipy ma je gobernador Félix. ²⁵ Chi yajmiguejxy tüg necy yjaayity jadu'n:

²⁶ “Ich comandante, Claudio Lisias, cham nguejxyich jada necy ma miich, mijpi gobernador Félix, e nguejxpyich capxpooxin. ²⁷ Je judíojäy ajcxy ti anajty majtcixy jadayaabi yëydijc, yaj'ögamy anajty ajcxy co

hich oy nejhuüy co je' yromanojãÿity, chi nninicxich mïd soldadtijc etz nnihuaañich. ²⁸ Co hich ooy anajty nejhuühuañich ti anajty co ti xigixy, chi nyajnicxich ma anajty ajcxy tungmïdpi etz mij'anãctijc ti ñayöymújigixy. ²⁹ Hue' anajty yí' ycixpi ti yajxÿy co anajty ti ytundigooy ma yí' ajcxy ycötújcïn. Ca' anajty ytiy'ãjtity co yaj'öccixipy, e ni ca' huaad ymach'ïñãÿ. ³⁰ Co hich oy nejhuüy co yí' judíoÿãÿ anajty ti nihuinmaynygixy co yaj'ögaangixy, cham hich miich yí' nyajnigüexy. E ti hich nañ jadu'n nimay huïdi ti yxÿyïi huen nicxcixy ma miich, e jëbi ajcxy jim nigapxy ti ycixpi co midzip'ajtcixy. Ji naybaatim."

³¹ Je soldadtijc nej anajty ti ycötújcïn möyïi tim huin'ítty mïd tzoon je Pablo mijcoodz ixti yajja'ty ajcxy Antípatris. ³² Je soldadtijc huïdi ajcxy tegyí'm nicxp, com jabom huimbjtcixni, chi yjá'tcixni ma cuartel. E je soldadtijc cohuaygixpi jacnicxy je' ajcxy mïd Pablo. ³³ Co je' ajcxy yja'ty jim Cesarea, chi ajcxy je gobernador necy yajcídigiïy, chi ajcxy nañ jadu'n yajquëxigÿy je Pablo ma je' yhuinduu. ³⁴ Co ñecy capxtay, chi je gobernador y'amidooy Pablo ma anajty yconaaxity. Co nejhuüy co yCilicijãÿity, ³⁵ chi nimay:

—Jiini nejhuühuïbich je tiy'ajt co anajty miingixy huïdi ti yxigixy. Huin'it ni'ane'mdïy co huen cuend'adyïi ma je Herodes ymijtijc.

24

Pablo ñaygohua'ñyïi ma je gobernador Félix yhuinduu

¹ Co migoox xii Ananías je teedy ajcxy ymijtungmïdpi yja'ty jim Cesarea mïd judío mij'anãctijc ajcxy etz mïd tüg huingapxpi huïdi anajty yxii Tértulo, chi ajcxy ñayguëxici ma gobernador co xihuaangixy Pablo. ² Co ajcxy Pablo yajmiñ, chi Tértulo ytiigiïy xibi, nimay Félix:

—Mïd miich ycixpi jotcujc je naaxcajp y'ijty, ca' ma tzip, je' co yaxxon m'ane'mdãÿ mïd oyhuinma'ñ. ³ Tüg'ócïy hich ajcxy njãÿgidacpyich hueñyima'ãmyity, miich mijtungmïdpi Félix. ⁴ Ca'ydi mdiempo nyajtigooyi mij, tun may'ajt amïdo'ijtigich n'ayuc tüg jaxigÿy. ⁵ Com ti nnejhuüyigixich co jada Pablo, ooy ayo'n yecy hueñytimma'ãmyity. Xi ya judíoÿãÿ tzach pijc-huãcxy mïd y'ayuc huïdi ymïd. Yí' je' nigohuajc'ajtp tüg picy jãÿ huïdi jãÿ ytiïpy Nazaret jãÿ. ⁶ Com tundigoy ma hich ajcxy nDios ytiïc nej ca' ypadyïi, chi hich ajcxy nmajch, e chi hich ajcxy njatyidunaañich jadu'n nej hich ajcxy ngötújcïn y'ane'my. ⁷ Per je comandante Lisias je' yajtiigiïy mictãÿy, chi hich ajcxy xypijci jada Pablo. ⁸ E Lisias yminañ co pinjaty anajty ti yxÿyïi huen miñ ma miich. Miich ci'm jëbi myajtiïy, e mnejhuühuip tüg'ócïy je tiy'ajt jadu'n nej hich ajcxy yí' ti nxïy.

⁹ E je judíoÿãÿ ajcxy huïdi anajty jim gobernador yhuinduu, ac jadu'n ajcxy ymïnaangixy co yjanchity jadu'n nej Tértulo ymïnañ. ¹⁰ Huin'it je gobernador tiy'ajt moy Pablo cimïd co huen capxy, chi Pablo ymïnañ:

—Janch jotcujc jëbi nayñigapxtüdyïijich ma miich Félix, com nejhuüybich co miich mijtungmïd ma jada naax cajp cham xii jimijt ñicxni. ¹¹ Miich ci'm jëb mnejhuüy je tiy'ajt, jëyi anajty ñimajcmetzxiiïÿy maabi anajty nbättigÿyich jim Jerusalén Dios ojadaïtpi. ¹² Ca' hich yí' ajcxy xypaty ndzïpcapxy n'ahua'ngapxyich mïd pinjaty. E ni hich ngajãÿ'axiigÿy ngajãÿ'agapxÿy ma Dios ytiïc, etz ni ma naymujctac etz ni ma Jerusalén cajp. ¹³ Jada jãÿ ajcxy ca' ajcxy mïdity pinjaty tiy'ajt yegipy nej hich yí' ajcxy yxÿy. ¹⁴ Huïdi janch ngapxypidzïmybich ma miich jadu'n

nej je tzinaayin, je jemybi ixpijcin huidibi yi' ajcxy ytiypy ca' y'óyity, je' je' je ixpijcin huidi ich muid n'ojadajtpich Dios, je Dios huidi ich ajcxy nmij'ap nmijteedy y'ojadajt. Nmibijcpyich tüg'óciy jadu'n nej yjaybetyity ma Moisés ñecy, etz je Dios y'ayucnajtzcaxiyyi ñecy. ¹⁵ Nañ nmibijcpich co Dios yajjugypigipy pinjaty ti y'ögy, tiibi oybi tuñ etz tiibi jibicpi tuñ. ¹⁶ Paady ycixpi naymijottigoyijich co njothuinma'ñich huadz ooy nmuid'idipyich ma Dios etz ma jäy.

¹⁷ Canaag jimijt ich anajty ti nhuidityich huingduum, chi nhuimbityich ma ich ngajp limosna cuejtp etz nhuindzigihua'ñich anajty Dios. ¹⁸ Jadu'n ich anajty nduñ co nijëjty judíojäy xypatyich ma Dios ytiyc huidi anajty tzoomb Asia ñaaxjot. Ti anajty naybocyñihuächyijich, ti anajty nguyduñich costumbre, ca' anajty mayjäy pin yhua'ñ yjihuíy. ¹⁹ Je jäy ajcxy huidi xy'ijxyich ma Dios ytiyc, je' ajcxy ixypy ti ymiingixy ya tiy'ajt yejcp. ²⁰ Co ca' ajcxy ti miñ, huen jada jäy ajcxy huidi ya nigapxcixy pen ypaat ajcxy nbocyich je taabi ajcxy xytidyduñich ma judío jäy tungmuidpi etz huinmij'anäctijc ajcxy ñaymujci. ²¹ Jëyi co ich mic ngapxyich juntijoty, chi nminaañich: “Xytidyduñich miich ajcxy cham muid co nmibicyich co Dios yajjugypigipy pinjaty ti y'o'cy.”

²² Co Félix jadu'n midodaay, com ñejhuiydaayb anajty nej tüyöy je mibijcpidijc y'ayuc yhuinma'ñ, chi capxhui'my je ayuc, nimay ajcxy:

—Co anajty miñ je comandante Lisias, huin'it njacnejhuiydähuibich nyajtydigihuibich miich ajcxy m'ayuc.

²³ Huin'it Félix ane'mdiy je capitán co huen yajcuend'aty yi Pablo, e huen a'ixihuip co pidzim tibiñ tibäy e pen ji ymügügtijc miñ co'ixihuañyii, huen möyii huidi yajmayjajtpy.

²⁴ Ti anajty xiñ ñajtnñicxiyñi co Félix jadüg'oc miñ muid ytöxyijc Drusila. Je Drusila judíojäy je' anajty. Chi Félix capxyñiguejxy Pablo huen miñ muidmüydägyii nej jäy mibicy Jesucristo. ²⁵ E co Pablo yajnimay je tiy'ajt nej Dios tzocy co huen jäy tudägy tzinäy, etz yajnimay jadu'n nej Dios jini jäy tiyduna'ñ tüg'óciy, chi Félix ñay'adzigiyi, ymínañ:

—Nícx miich jadachambi, co ich anajty xyñbadiiyigixy huin'it nícx nyajhuooyii.

²⁶ Nañ jadu'n Félix y'ahuijxpy anajty mina Pablo y'ocmeeñmöyii, e huin'it anajty najtzmazihua'ñ. Paady anajty janam jadojzc nícx yajhuoyii, e muid müydägy anajty. ²⁷ Mejtz jimijt jadu'n yjajty, huin'it Félix ygobernadorbidzimy. Chi Porcio Festo ygobernadortigiiy ma Félix anajty ytuñ. Co Félix anajty nayyajhui'ma'ñyii ooy muid je judíojäy ajcxy, paady ixmajch Pablo mach.

25

Pablo ma Festo yhuinduu

¹ Jadu'n yjajty co Festo anajty ti ygobernador tigiiy, chi codugig xiñ choñ Cesarea, ypättigiiy Jerusalén. ² E jim Jerusalén je teedy migtungmuidpi etz nijëjty huinmij'anäctijc jactimxiy Pablo ma Festo. ³ Chi ajcxy may'ajt pijctzoy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ögaangixy tü'am. ⁴ Chi Festo y'adzooy co Pablo cuend'aty anajty y'ity Cesarea, e je' anajty nícxañ janch tim tzojc jim. ⁵ Chi ajcxy nimay:

—Jëbi nijëjity miich ajcxy mdungm#dp#idijc etz huinmij'anäctijc quipxy n#icxibich müid #ch. Pen ti je Pablo ytundigooy jëbi miich ajcxy mx#iy jim Cesarea.

⁶ Festo jëyi jim y'ijty tuctujc x#i taxtujc x#i Jerusalén, chi yhuimbijtni Cesarea. Com jabom #icxy ma tiyundac, huin'tit capxy#iguejxy Pablo co huen yajminy#i. ⁷ Co Pablo ytig#iy ma tiyundac, chi mic'amy je judiój#y ajcxy yj#übig#iyd#y huidi anajty ti choong#ixy jim Jerusalén. Chi ajcxy oyx#iy Pablo co mij anajty ti ytundigooy. E ca' ni ti tiy'ajt ajcxy miguëx#igy. ⁸ Chi Pablo #aygogapxi ym#ina#i:

—#ich ca' ni ti ndundigooyich, ni ngamidundigooyich yi judío j#y ycöt#ujc#in, etz ni ngamidundigooyich Dios yt#ijc, etz ni ngamidundigooyich je mij'ane'mbi jim Roma.

⁹ Co Festo anajty jatyt#imyajc#maya'#i ma judiój#y ajcxy, chi y'amidooy Pablo:

—¿Nej mn#icxam jim Jerusalén, jig#ix jim ndiydun#ip#iy?

¹⁰ Chi Pablo y'adzooy:

—Cha #ich cham ma je cötujctac huidi je romano codung y'ane'myb e ma jëbi yajtiydu#ich. Yajxon miich mnejhu#iy co ca' ti ti ndundigooyich ma yi judiój#y ajcxy. ¹¹ Pen ti ndundigooyich huidi jëbi co'ög#iyich, ca' nminá'n#ibich co #ich ca' n'öga'#i. Pen ca' ji ni ti tiy'ajt jadu'n nej yi' ajcxy ti xyx#iyich, ni pin cöt#ujc#in cam#iidity n#icxy xyc#iyecyich ma yi' ajcxy. #ich nbijctzoy co nyajtiydu#ich ma César, je emperador, jim Roma.

¹² Co Festo capxy#oyday müid ymidungm#d#pi, chi nimay Pablo:

—Pen miich jadu'n minamb co jim n#icxy myajtiyduna'#i ma je César ycötujctac, nguex#ipyich miich jim. Müich ti mbijctzoy co je emperador xytiyduna'#i. Pis jim mn#icx#ipy miich.

Pablo ma je rey Agripa yhuinduu

¹³ Chi yi x#i tiempo #ajztzn#icx#iy#i co je rey Agripa etz Berenice ycidacy Cesarea, cogapx#hua'#i anajty Festo. ¹⁴ Co ajcxy jim yhuäcx#ipy canaag x#i, chi Festo yajm#idm#iydacy je rey Agripa je Pablo ayo'n, e nimay:

—Ji t#ug yëyd#ijc huidi Félix y'ixmajtz mach. ¹⁵ Co n'oyich jim Jerusalén, chi je teedy m#jtungm#d#pi etz judío mij'anäctijc xym#ix#iyich, nibijctzohu#iy co Pablo nyaj'ög#ibich. ¹⁶ Chi n'adzooyich co romanoj#y ca' cöt#ujc#in jadu'n m#idity n#icxy yaj'ögy yi machyj#y ma ca'ni #ayhuindináayig#ixy müid je huidi müid #ayx#iy#i, jig#ix #aygogapxiyb nej anajty ti yx#iy#i. ¹⁷ Paady co je judiój#y ajcxy y'oy ya ca' nigoob tiempo nyajtigooyich com jabom mn#icxich ma ngötujctaacich, e nni'ane'md#iyich co huen yajm#iny#i je Pablo. ¹⁸ Co ajcxy #ayguëxi'ci, je huidi anajty ti x#iy, ca' jac ni ti ayuc anajty ajcxy m#idity jadu'n nej #ich anajty ti ndijyich. ¹⁹ Jëyi janchtiy co jadu'n anajty ym#inaang#ixy co Pablo ti ytundigooy ma yi' ajcxy ycostumbre huinma'#i, etz Pablo capxhuäcx#y co je Jesús huidi o'c, juugy#i je'. ²⁰ Com #ich ca' nnejhu#iy nej ndun#ipich müid jada jadu'mbi huinma'#i, chi n'amidooyich Pablo, pen n#icxam anajty Jerusalén, jig#ix jim ngatiydu#ich müid jada yabi ycx#ipi. ²¹ Pablo ci'm m#ina#i co nig#i oy yajtiydun#ipy jim ma je emperador huidi ane'm jim Roma. Chi nni'ane'md#iyich co huen jacmach'#i#y, ixti cooni nguex#ipyich jim Roma ma César.

²² Chi je rey Agripa ym#ina#i:

—Na#i ooy #ich nja'amido'idaani Pablo y'ayuc.

Chi Festo y'adzooy:

—Jabom jëbi ayuc midohuipy.

²³ Com jabom miñ Agripa etz Berenice miid mayjäy etz xuuxpidijc, chi ytigüy ajcxy ma tydundac miid je soldado huindzin ajcxy, etz huinmij'anäctijc. Chi Festo capxyñiguejxy co huen Pablo nicxy yajtzonyii.

²⁴ Chi Festo yminañ:

—Rey Agripa, etz tüg'óciy mij'anäctijc huindzindijc huidi ya ti mnayyöymújcigixy miid ñch ajcxy, cha je' je yëydijc huidi oy yi judíojäy ti yxiyii ma ñch. Xymixiyich jim Jerusalén, e nañ ya Cesarea, e jatyimyminaangixy co jëbi y'ögy. ²⁵ Ca' ti ti tundigooy, paady ca' huaad nyaj'ögyich. Com ti ci'm ñayñibjctzohuüyii co jim yajtyiduna'ñ ma je emperador jim Roma, paady ti n'a'ixiyich co nguexaañich. ²⁶ E com ca' ni ti tiy'ajt nej nijayihuibich nhuindzinich, je emperador César, miid yi' ycixpi, paady nyajmiñich ma miich ajcxy, etz tim jayjip ma miich mhuinduu, rey Agripa, jigix jëbi m'amidohuipy e nmüid'idipyich ti ii njáayibich. ²⁷ Ca' jadu'n y'óyity nicxy nguexyich tüg machyjäy jim ma je mij'ane'mbi e ca' ni ti tiy'ajt müidity nej ti yxiyii.

26

Pablo nimüydägy nej anajty yjatyin ma je rey Agripa

¹ Chi je rey Agripa nimay Pablo:

—Jëbi ci'm mnayñimüydägyii.

Chi Pablo yujcxaay yci' e ytigüy nayñigapxtuutip, yminañ:

² —Jotcujc nayjihuüyijich, co jëbi nmüydägyich ma miich, rey Agripa, jigix nayñigapxtüdüybich tüg'óciy jadu'n nej judío jäy ti yxyiyich. ³ Com miich mnejhuüyib yajxon nej judíojäy ajcxy yhuinma'ñ müidity, etz tijaty tzip yi' ajcxy ymiid, etz jadu'n nej yi' ajcxy y'ixpijcin oy ñay'ijxquüipxigixy.

Pablo nigapxy nej anajty chinäy ma anajty ca'ni yjothuimbity

⁴ Tüg'óciy judíojäy ñejhuüyib nej ti ndzinäyich ma yi' ajcxy jim ma nnaaxjotich etz jim Jerusalén maabi nyeecpidzimyich. ⁵ E yi' ajcxy ñejhuüyib nañ jadu'n, e jëbi nigapxcixy jadu'n nej ti nyujcyeecpi'atyich. Hue' naydijyijich anajty fariseojäy, je tügpicyi jäy huidi mictägy je judío jäy ycostumbre etz ycötújcin payöyip. ⁶ E jadachambi xtytyduñich miid co njijp'ixyich co Dios yajjugypiga'ñ yi jäy ajcxy tübi y'o'ccixy, jadu'n nej Dios yajnimay nmij'ap nmijteedy jecy'ajty. ⁷ Je majmetzpicypí Israel emang y'ap y'oc y'ahuijxpy mina Dios cuyduna'ñ nej anajty ti yajnimäyii je' ajcxy ymij'ap ymijteedy. Paady ajcxy Dios ojadaty huindzigüy xim tzuum. Miich, rey Agripa, nmibicyich co Dios yajjugypigipy je jäy tübi y'öccixy, paady ycixpi yi judíojäy yxyiyich. ⁸ ¿Na'amy co ca' miich ajcxy mibiga'ñ co jëbi Dios yajjugypicy je tübi ajcxy y'ögy?

Nej anajty Pablo jayjip'aty mibijcpidijc ixhuidity pahuidity

⁹ Jecyip ñch hue' ndijyich oy nduñich co anajty ndzachmidzip'adyijich je Jesús je Nazaretpi. ¹⁰ E jadu'n nduñich jim Jerusalén. Miid je teedy mijtungmiidpi ycötújcin nbidaacich Jesús yjäy may pujxtigoty. E co ajcxy yaj'o'cy, nañ nigapxpejt ñch co huen yaj'öccixy. ¹¹ E nnicxyich anajty majaty judío ñaymujctac jim ndzaachytuñich huidi ajcxy mijpidacp anajty Jesús, jigix ajcxy y'ixmadzipy je' ymibijcin co Jesús je' je' je Cristo. Nigi anajty nmijotmätcootyich ixti nbahuidijttacyich huingnaax huinggajp.

Pablo nimüydägy jadüg'oc nej yjothuimbity

¹² Miiid yi jadu'mbi huinma'n̄ nicxyich anajty jim Damasco. Je teedy mįjtungmiiidpi anajty xyquejxpich, e xymöyich anajty cötújcın. ¹³ E tü'am, señor rey, ñich anajty nicxy, cujc xii anajty co n'ijxyich tügi tıicxin jacmic ca'ydı xii ytıicxin choon' tzejpjoty, xyñigidacyich etz nañ jadu'n huıdı anajty ajcxy xymiiidnicxich. ¹⁴ Huin'it nidüg'ócıy ñich ajcxy ngıdaday, e nmıdooyıch tüg ayuc xymıgapxich miiid hebreo y'ayuc, xyñimäyich: "Saulo, Saulo, ¿nej co chach xypahuıdıjttägyich? Cı'm nayyajtzaachıyii jadu'n nej huaj yuub co jįjpconebıy huıdı miiid ñumygyumyii." ¹⁵ Huin'it n'adzooyıch, nnımaayıch: "¿Mbin miıch Huındzın?" E je Huındzın xyñımaayıch: "Ñich je' Jesús je huıdı miıch mdzachpahuıdıjttacpy. ¹⁶ Pıdđıg e tınaaygugı', com ti nnayguëxıgyııjich ma miıch jigıx xymıdunıpyıch etz mgodıy'ajt'adıpy jadu'n nej cham ti nyajnimäy ti nyajnejhuıy, etz jadu'n nej jiini njacyaj'ıxa'n̄ njacyajnejhuıhua'n̄. ¹⁷ Ñich miıch nnıhuänıp nyajtzögıp ma yi judıojäy, etz nañ ma huıdı ca' yjudıojäyity. Ñich miıch jim nguejppy ma huıdı ca' yjudıojäyity. ¹⁸ Nicx jim myajhuınjihuiygyıxıy ñich ndıy'ajt, huen ixmach ajcxy yi jıbic-huinma'n̄ e jadu'n ypidzimıpy ajcxy ma je mujcu' y'ané'mıgıxıy, etz mijnicxpedıpy ajcxy Dios ytıy'ajt. Co ajcxy mıbıgıpy mijpidägıpy ñich ndıy'ajt huın'it nmöhıubıch tıgyıdac tzejpjoty ma yi oyjäyđıjc ity tııbi Dios yajpocyñıhuächyii."

Pablo cuyduñ nej anajty ti y'ıjxmañıyın

¹⁹ Rey Agrıpa, jadu'n ti ngapxymıdooyıch huıdı n'ıjxıch nmıdoohuıch tzoon tzejpjoty. ²⁰ Jayıjp ngapxhuäcxıch Dios y'ayuc jim Damasco, chi ngapxhuäcxıch jim Jerusalén etz tüg'ócıy Judea ñaaxjot, etz cham ngapxhuäcxıch Dios y'ayuc ma huıdı ca' yjudıojäyity. Nyajnimäygyıxyıch huen jothuımbıjtcıxy, huen mıbıjccıxy Dios y'ayuc ytıy'ajt, etz huen yajtungıxy oyjot oyhuınma'n̄ jigıx ñıguëxıgıpy co ti yjothuımbıjtcıxy. ²¹ Miiid jada ycıxpi xymajchıch ajcxy je judıojäy ajcxy ma Dios ytıjc, e xyaj'ögängıxyıch anajty. ²² Miiid co Dios ti xypubety ti xypudıgıyıch cha nyajpaadyıch juegy. Ngapxhuäcxıyich Dios y'ayuc ytıy'ajt ma tüg'ócıy ayoobtıjc etz ıxpicıytıjc. Tüg'ócıy huıdı ngapxpyıch je Dios y'ayucnajtzcapxıybi jaay jecy'ajty, etz je Moısés nañ jadu'n jaay jecy'ajty co jadu'n ytuna'ñyii yjada'ñyii. ²³ Hue' yajmına'n̄ co je Cristo copıcy ayo'n tzaachypı yajnaxıpy, e y'ögıpy e huın'it jugypıgıpy, e je' je' je jayıjp jäy huıdı jugypıgıpy co anajty ti y'ögy. E yajcapxhuäcxıp je ayuc ytıy'ajt ma ñich ajcxy judıojäy, etz ma huıdı ca' yjudıojäyity.

Pablo jahueeni cayajjothuımbıjty Agrıpa

²⁴ Co Pablo jadu'n ymınañ ma anajty ñayñıgapxtüdyii, chi Festo mic mınañ:

—ıMlocjıyib miıch Pablo! Miiid je ıxpıjcın nıgi m'ahuımbıty locı.

²⁵ Chi Pablo y'adzooy:

—Ca' ñich nlocjıy, miıch mįjtungmiiidpi Festo. Yi huıdı ñich ngapxpyıch je' je' tıy'ajtıp etz janchıp. ²⁶ Yi rey Agrıpa ñejhuıydaayb yi' tüg'ócıy jada, paady nmıydägıch aamic jotmic ma yi' yhuınduu; com nnejhuıyıbıch co yi' ñejhuıydaayb jada tüg'ócıy, com canan hue' jada yajtuun yajmıydacy ayüchytuum. ²⁷ ¿Ney mmıbıjcpı, miıch rey Agrıpa, jadu'n nej ajcxy ymınañ yi' Dios y'ayuccojaaybi? Nnejhuıyıbıch co miıch mmıbıcy.

²⁸ Chi je rey Agrıpa y'adzooy, ymınañ:

—Janch tim jayınjatıy jahuenjatıy miıch xycayajmıbıcyıch Jesucristo.

²⁹ Chi Pablo ymınañ:

—Oy yjainjaty yjahuenjatyity ooy mijcajee mgamibicy, chojcpy Dios co miich mmibigipy Jesucristo etz nañ jadu'n tüg'óciy jäy huidi cham xy'amidoo'íjtíp ñich n'ayuc. Dios chojcpy co mmibigipy Jesucristo jadu'n nej ñich nmibicyich, jëyi janchtiy co ca' mmach'idipy jadu'n nej ñich nmach'ityich.

³⁰ Co je Pablo ymiydactay, chi je rey etz gobernador ytinayigy quipxyi miid Berenice etz jacjadyii huidi anajty ajcxy jim. ³¹ Chi ajcxy ahuingujc oy capxyöyigixy Pablo ypocy, ñayñimáayigixy miñ xyipy:

—Jada yëydijc ca' jada ti tundigoy, ca' ypadyii nicxy y'ögy, ni ca' ypadyii nicxy ymach'inäy pujxtigoty.

³² Chi Agripa nimay Festo:

—Jëbi ixypy nnajtzmadziyim Pablo co ca' ci'm ycanayñibijctzohuiyi co huen tiydunyii je emperador César jim Roma.

27

Pablo yajnicxi jim Roma

¹ Co ajcxy yajnihuinmayiyy co xyquexáangixyich jim Italia, chi Pablo yajciyejc miid jacjadyii machyjäy ma tüg capitán huidi anajty yxi Julio, je' huidi nihuindzin'ajtp tügpicy soldadtijc huidi anajty yxi batallón Augusto. ² Chi ñich ajcxy ndigiy ma tüg barco huidi yhuindzin cogajpip jim Adramitio. Je barco hue' anajty ñicxa'ñ ma nijëjty barco jättac jim Asia ñaaxjot. Chi ñich ajcxy ndzooni. Miid ñich anajty ajcxy Aristarco huidi anajty cogajpip Tesalónica jim Macedonia. ³ Com jabom ñich ajcxy nja'ty ma barco jättac jim Sidón. Jim je Julio pa'ayoy Pablo, e ahuaatzi ytu' co huen nicxy co'ixiy ymigügtijc, etz huen je' ajcxy yajcayyii yaj'ügüii. ⁴ Co ñich ajcxy ndzooñ jim Sidón, chi je naax mejy'agujcpi yhui'mni anajty'amy huidi yxi Chipre, miid co je poj anajty jipcobojjy je barco. ⁵ Chi je barco huinyöyñajxy je Cilicia ñaaxjot etz Panfilia ñaaxjot, oy njädyich ajcxy jim Mira, tüg cajp jim Licia ñaaxjot.

⁶ Jim je capitán paty tüg Alejandría ybarco hue' anajty ñicxy jim Italia. Chi je capitán ñich ajcxy xyajbarcotigüii. ⁷ Canaag xii ñich nyöy janch oñdägy, adzaach ñich ajcxy nja'ty mihuingon je Gnido co anajty je poj tzach jipcobojjy je barco. Najx ñich ajcxy mihuingon Salmón, etz njüyöy'ahuidiijtyich ajcxy Creta je mejy'agujcpi naax. ⁸ Adzaach ñich ajcxy nja'ty ma barco jättac huidi anajty yxi Buenos Puertos, mihuingon Lasea.

⁹ Ti ñich ajcxy ooy anajty nxidigoy, e ooy anajty ycodzigijity je barco yajyöyü. Ti anajty je ayuuxii ñajxni, e ti mihuingon anajty je poj tuu tiempo huidi jäy ytiypy invierno. Paady Pablo je soldado huindzin jaccapxhuijy, ¹⁰ chi Pablo yminañ:

—Huindzindijc, jadu'n nej yam codzigi' jada ooy co njacnicxim barcojoty, ca' yjegyity co nicxy ndigooyim miid barco etz miid ñidzimy etz n'o'ctaayim.

¹¹ E je soldado huindzin yjacmijpidac oy je barco yajyöybi y'ayuc etz je barco capitán y'ayuc, ca'ydi Pablo y'ayuc. ¹² Com je' co je barco yjättac ca' anajty y'óyity, nicxy jim yajnajxcixy je poj tuu tiempo, chi je jacmaybi ajcxy yhuinma'ñypidacy, co jëbi barco yjacyöy, oc'ixaangixy pen yjätcixy jim Fenice ma Creta ñaaxjot. Jim ma tüg barco yjättac huidi y'aguu najtz'ixiyyb ma xii pidzimy, e jim anajty je poj tuu tiempo yajnaxaangixy.

Je mijpoj mijtigoy ma je mejy

13 Jadu'n yjajty co je jünboj hueeni ypidzimy, huin'it huinmay ajcxy co jëbi yjactüyöy je barco. Chi ajcxy yajpidigy je mij pujx huidi barco yajtinayxijp, e yajyöychooñ je barco. Chi ñicxy je barco mejypa' mejypa' ma Creta ñaaxjot. 14 Huin'it hueeni tiempo ñajx, chi je micpoj miin ma tiichpoj pidzimy, huidi jäy ytijpy Euroclidón, jadu'n yhuimbizim, Noreste. 15 Chi je mic poj yajtütigajch je barco, e com ca' anajty ndimdüyöyigixni müd je poj ycixpi, chi je mic poj ñich ajcxy xyajnicxy adzip ma anajty tzocy. 16 Najx ñich ajcxy mihuingon tüg naax mutzpi mejy agujcpi huidi yxi Claudia, e adzaach ñich ajcxy nyujcjugujcy je mutz barco huidi anajty miimb ixhodziy ma je mijpi. 17 Co ajcxy jugujcpidzimy je mutz barco, chi ajcxy yajtuuñ maychaay e xojtzmuicy je barco aguu. Chi ajcxy yajminajcy je huit huidi anajty poj mic tzach ymajchyp. Je' co chigiyyigixy co chimnicxiyb je barco jim ma mejy huidi ca' y'agomity, ma püjot huidi yxi Sirte. Chi ajcxy ñayyejci huen poj yajnicxigixy. 18 Com jabom, com ooy mic anajty je poj, chi ajcxy je chimy mejy cöjibijptaayi. 19 Je midugüg xibi, chi ñich ajcxy nmejycöjibijptay je tungbejt huidi yajtumyb ma je barco. 20 Ti anajty canaagxi ñajxni e ñich ajcxy ca' ma xi madza' n'oc'ijxcixni, müd je mij poj ycixpi huidi anajty ñich ajcxy xychachyajtüyöyp. Hue' ñich ajcxy ndijcixy co ti ndigöoyigixyich, ca' ndijy ñich ajcxy ndzögiy.

21 Ti anajty xi tiempo ñich ajcxy nyajnajxcixy jaygay, chi Pablo ytinayigy, nimay je jäy ajcxy:

—Yëydijctijc, co ñich miich ajcxy xycacapxymidooy co' ngatzoonim jim Creta ñaaxjot, e ca' ixxyipy jada ayo'n yam jadu'n nbaatim. 22 Jadachambi ca' mdajcixy mmaygixy, ca' ni pin ytigoyañ, oy je barco yjatigoy. 23 Amygoodz je nHuindzin Dios tüg y'ángel ti ñayguëxigyii ma ñich, je Dios huidi ñich ngapxymidooybich, yi' ti quexy. 24 Je ángel ti xyñimäyich: “Ca' mdzigy, Pablo, copicy co mjatyjadipy ma je mij'ane'mbi, je César yhuinduu. Müd miich ycixpi, Dios ñihuänamy yajtzögamy tüg'óciy huidi ji barcojoty, ca' ni tüg y'ögipy.” 25 Paady nayjot'amijmóoyigix, yëydijctijc, nmibijcpiych Dios co jadu'n yjadañ jadu'n nej yi' y'ángel ti xyñimäyich. 26 Ooy ycopicyity nicxy nmijpojpejtim ma tüg naax mejy agujcpi.

27 Majmactz xi je mic poj anajty yajyöyii je barco oyñinej jim ma je mejy huidi yxi Adria, chi mijcutz je barco yajyöybi jihui'ñybijcy co anajty ti mihuingoñ naax. 28 Chi ajcxy quipxy je ni jadu'ni anajty ycicyity, e hue' ajcxy quipxy iipx xap ycicyity. Jahuengi huin'it jadüg'oc ajcxy quipxy je ni, e hue' oy quipxcixy majmocx xap ycicyity. 29 E co anajty chigiyyigixy co tijy je barco jipcobonihuipy ma tzaagop, chi ajcxy pidacy niijoty midaaax pujx ma barco y'ijx, je huidi yxijip anclas, janch tzigiyb anajty ajcxy y'ahuijxcixy cooni ximihuipy. 30 Chi je' ajcxy huidi anajty barco yajyöyp yhuinmañybaty co yquëga'ñ ameech. Chi ajcxy pidacy niihuigixy je mutz barco. Chi ajcxy ñaybidaaci jadu'n nej jihuiy je ancla jac yajminagaangixy jim ma barco yhuinduu. 31 Huin'it Pablo nimay je soldado huindzin etz je soldadtijc:

—Pen ca' jada hui'mgixy ma barco, ca' miich ajcxy mejy ypidzimipy.

32 Huin'it ajcxy tzujctujcy je tzaay huidi je mutz barco anajty müd ycoxochity, chi ajcxy yajcäy je mutz barco niijoty, e chi je mejy yajnicxyi.

33 Moñyi Pablo migapxy je jäy ajcxy, chi ajcxy nimay co huen huin-gayñajxcixy, chi Pablo yminañ:

—Cham majmactz xii ma miich ajcxy ca' mmaagixy, e ni ca' mgaaygixy m'uuccixy. ³⁴ Tun may'ajt caaygixy oy jadu'ñyi, copicy jada co njatyñidzoocotáhuuanim, ni tüg ngöhuay ca' ytigoyaanim.

³⁵ Co Pablo jadu'n yminanday, chi tüg tzajcaagy conigy, chi jayijp Dioscojuyip yajnajxy mayjäy agujc, chi tujc-huäcxy etz ytigiiy ajcxy caaybi. ³⁶ Mic'amy je jäy ajcxy yjotmigiyday nidüg'ócay, e chi ajcxy ytigiiy caaybi. ³⁷ Hue' anajty ñaybaatigixy barcojoty mejtz migo'px jatugi'px majmocxtüg jäy. ³⁸ Co ajcxy ycayday, chi jacnügöjibijpy je trigo, jigix huen cöminacy je barco chimy.

Chi barco tüg yquiiñ

³⁹ Co yxiimiiy, chi je barco yajyöybi ca' ijxcapy je naax, e y'ijxpaty tüg it ma mejy huen ycoguegiiy, e jim anajty püjot. Chi ajcxy yhuinma'ñybaty co'ixaangixy pen jëbi jim yjäty je barco. ⁴⁰ Chi ajcxy tzujctujcy je tzaay huidi anajty meid yxochity je anclas, e chi anclas yhui'mni niijoty, huin'it ajcxy miguejiiy je niigaap huidi tumb co tümöy je barco. Chi huit jadüg'oc ajcxy pidacy huidibi pojmajtzp. Chi je barco ytigiiy yöyb, tüy ajcxy yajnicxy ma püjot. ⁴¹ E chi oy minaybadyii ma anajty je mejy mejtz it oy mic ycujiin, chi oy yjëpxy püjoty. Je barco jijp oy ytigiiy tätzpcy ca' huaad y'ocyücnii, e je barco ijx oy ytigiiyñ aguejthuäcxi ymüid je mejy püjoty ymijaa. ⁴² Chi je soldado yjayaj'ögaañ je machyjäy ca'ydi yqueeccixy ayaahuip. ⁴³ Je soldado huindzin ca' a'ixiiy nicxy yaj'ögyii Pablo, chi nimay soldado ajcxy co huen ixmajtcixy yi machyjäy. Chi je soldado huindzin nimay je jäy ajcxy co huen niidigiiygixy pinjaty jajtp yau. ⁴⁴ E huidi ca' jajtcixy yau jaydëbi niidigiiygixy müid pu'y etz müid barco pedasi. Jadu'n ajcxy nidüg'ócay ymejy ypidzimday.

28

Pablo yjädy ma tüg naax mejy'agujcpi huidibi yxii Malta

¹ Co iich ajcxy niibidzimday, chi iich ajcxy nejhuüy co je naax mejy agujcpi hue' anajty yxii Malta. ² Je conaax ajcxy ooy oyjäy'ajtin tuuñ müid iich ajcxy, chi ajcxy yajmijiiy jün mij, müid co anajty ooy ytiichity, etz co anajty ooy ytuubojoy. Chi xyñimay iich ajcxy co müin n'ocxaamgixyich. ³ Chi Pablo ytigiiy jäxycajpmujcpi, e chi pidacy jünjoty. Chi tüg ahua'n iyujc pidzimy, yquëgy anajty müid je anbi, chi Pablo ymajtzii ma yci'. ⁴ Co je cogajp ajcxy ijxy je ahua'n iyujc ytiyñäy ma Pablo yci', chi ajcxy ñayñimaayi miñ xyipy:

—Jadayaabi yëdyjc, jäy yaj'öcpi jada. Oy ca' ti y'ögy mejyjoty, je tiydumbi tzajpjoty pi ca' a'ixiiy nicxy yjactzinäy.

⁵ Chi Pablo yci' huinxidicxy, e jünjoty oy ycäy je ahua'n iyujc, e ca' Pablo ni nej yjajty. ⁶ E tüg'ócay je jäy tzach'ahuijxcixy mina anajty y'ocquixigy, o mina anajty y'oc'ögy. Ti anajty ooy y'ahuijxcixy jecy; co ajcxy ijxy ca' ni nej yjaty, chi ajcxy yhuinma'ñ yajtigajch. Yminañ ajcxy co Pablo hue' jada' yi' tüg dios.

⁷ E mihuingon anajty je Publio ytijc, je huidi nigohuajc'ajty je jimbi naax mejy'agujcpi. Je Publio xyajjättacich ajcxy, e xyajcaay xyaj'uucich iich ajcxy yajxon tugiig xii. ⁸ Jadu'n yjajti co je Publio anajty yteedy ypigyii müid tooy gohuajc etz müidity anajty ni'pypa'm. Chi Pablo oy icy je pa'mjäy. Chi Pablo Dios miijctzoy, e chi cinixajy, e yajtzoocy. ⁹ Müid jadaay miñ ajcxy niijëjity pa'mjäy huidi anajty ajcxy tzinaayb ma je naax

mejy'agujcpi e chi ajcxy chooctäy. ¹⁰ Mïid jada ycixpi nyajcömay ñch ajcxy, e nyajmooyich ñch ajcxy tijaty huïdi ñch ajcxy nidüyöyipy barcojoty.

Chi Pablo oy yjädy jim Roma

¹¹ Tugüig po' ñch ajcxy anajty ti n'ijtni jim. Chi ñch ajcxy nbarcotigüy ma tüg barco huïdi anajty je tuuboj tiempo ti yajnaxy jim Malta. E je barco capitán jim anajty ycogajpity Alejandría. E je barco ymïd anajty ahuinax huïdi anajty yxii Cástor etz Pólux huïdi ajcxy dios'ajtpy. ¹² Chi ñch ajcxy oy njäty ma je barco jättac huïdi anajty yxii Siracusa. E jim ñch ajcxy nhuï'müy tugüig xii. ¹³ Ndzoñich ajcxy Siracusa barcojoty, nicxy ñch ajcxy mejypa' mejypa', ixti nja'tyich ajcxy jim Regio. Com jabom oy ypidzimy jinboj, chi co maax oy nja'ty ñch ajcxy Puteoli. ¹⁴ E jim ñch ajcxy nbaaty nijëjity jäy huïdi anajty mijpidaacp Jesús. Je' ajcxy xycohuanüyich co ñch ajcxy jim huï'mipy tüg seamaan. Chi ñch ajcxy jadüg'oc ndzoñ, nnicxyich ajcxy jim Roma. ¹⁵ Je mibijcpidijc ajcxy huïdi anajty jim Roma ymidou ajcxy ayuc co ñch anajty ajcxy jim nicxy, chi ajcxy chooñ nijëjity oy xyjijpcobadüygixyich ma je cajp mercado müid huïdi anajty yxii Foro de Apio. Jacjadyii mibijcpidijc oy xyjijpcobadüyich ma tüg jättac huïdi anajty yxii, Tres Tabernas. Co Pablo jïjpc'o'ixüy je mibijcpidijc ajcxy, chi Dioscojuyip yajnaxy etz ñayjihüüyi janch jotcujc. ¹⁶ Co ñch ajcxy nja'ty jim Roma, chi je soldado huindzin cïyejcy je machyjäy ma je comandante, per a'ixüyb co Pablo tzinäy ahuingujc ma tüg pjictzojdijc, jëyi anajty tüg soldado ycuend'adyii.

Chi Pablo Dios y'ayuc capxhuäcxi jim Roma

¹⁷ Tugüig xii maabi Pablo anajty yjäty jim Roma co capxyñiguejcy je judío huinmij'anäctijc huïdi anajty ajcxy tzinaayb jim Roma. E co ajcxy ñaymujci, chi Pablo yminañ:

—Migügtijc ajcxy, oy ñch ca' ti ndundigooyich müidi judío jäy ajcxy etz müid ajt nmij'ap nmijteedy ycötüjcin, chi je judíojäy ajcxy xymajchich etz xycïyejcich ma romano tungmüdpï jim Jerusalén. ¹⁸ Co je romano tungmüdpï ajcxy xy'amidooyich, huin'it ajcxy xyjanajtzmadzihuaañich, ca' ti ajcxy paaty ma ñch huïdi ajcxy xyajco'ögühuibich. ¹⁹ Co je judíojäy yjotmätcoty ajcxy, ca' ajcxy a'ixüy co nyajnajtzmadzihuibich, chi nayñibijctzohüyich co nyajtiydunipyich ma je mij'ane'mbi ya Roma, oy ñch ca' ti xïhuin nmüidity müid ñch nmigonaax nmigogajpich. ²⁰ Paady ti ngapxyñiguejxcixy co nyajmüidmüydäga'ñ ajcxy tigix co nmach'ityich. Müid co ñch ajt n'ahuixim co Dios nihuäna'ñ yajnüdzoğa'ñ yi Israel jäy etz yajjugypiga'ñ je jäy tiibi y'öccixy. Paady jadachambi nyajpaadyich mach.

²¹ Chi ajcxy y'adzooy:

—Ca'ni ñch ajcxy ni ti necy xyñijäty huïdi tzoomb jim Judea müid müich ycixpi. E ni tüg ajt nmigügtijc ca' jibic xyñimüydägy. ²² Nja'amido'idaamyich jadu'n nej müich mmüydägy, com nnejhuüybich co huen yma'ámyity jäy ymidzip'ajty je jemybi y'ijxpjcin.

²³ Chi tüg xii ajcxy agapxtujcy. Co oy paady mina anajty ti agapxtujccixy, chi mayjäy ñayyöymujci ma je Pablo anajty jättac müidity. Jopy ajcxy yajtzondacy capxi müydägi ixti ycootztzuu'üy, jadu'n Pablo tzachyajnimaagyixy je Dios y'ayuc nej Dios yhuinma'ñ müidity. E yajjothuimbidaangixy anajty ma je Jesús müid co capxticxy je Moisés ycötujcin nej anajty yjaybetyity, etz jacjadyii ayuc cojaaybi ñecy. ²⁴ Nijëjity

cöbïjc ajcxy nej Pablo anajty ymîna'ñ, etz nijëjity ca' ajcxy mibïjcy. ²⁵ Co ca' anajty ajcxy miñ xyipy yajtügïiy yhuinma'ñ, chi ajcxy icy ca'ixy yöychóongixni. Chi Pablo ymînañ:

—Tiytudägy je Espîritu Santo nimay je nmïj'ap nmïjteedy ajt co yajcapxy je profeta Isaías co ymînañ:

²⁶ Nicx nîma' je jäy ajcxy: Miich ajcxy oy mjamîdohuipy n'ayucich, per ca' ajcxy mhujnjihuihuip; oy mjahuindîcxcixipy, e ca' ajcxy mhujnjihuihuipy.

²⁷ Com jada jäy ajcxy hue' yjot'ahuimbijtcixy janch juuñ, e ymîdoogixy oyñinej, jadu'n nej jihuiy yhuimbîdz'ijtcixy, e ni ca' y'oc'ïjxcixy mîd yhuin e ni ca' ocmîdoogixy mîd yta'tz'ac, ni ca' huinjihuiygyxy mîd yjot yhuinma'ñ, ni ca' minipy ajcxy ma ïch jigix myajtzögibich.

²⁸ Nejhuïygyxy miich ajcxy co jadachambi etz jacnicxpi xii tiempo Dios y'ahuanïyb y'ayuc ytiy'ajt nej jëbi jäy y'alma ajcxy yajnîdzögipy ma je jäy ajcxy huidi ca' yjudíojäyity, e je' ajcxy y'amîdo'idipy.

²⁹ Co Pablo jadu'n nimay ajcxy, chi ajcxy ñicxtáaygixni chach ñayhuin'ïbëjtigixy ñayhuingapxpéjtigixy miñ xyipy.

³⁰ Pablo mejtz jimïjt jim chinay ma je pijctzoydïjc jim Roma, e yajxon xiic'adzoy capx'adzoy pin miñ ycogapxyii. ³¹ Janch agujc jotcuje anajty capxhuäcxy je Dios y'ané'min, e yaj'ixpicy je Huindzin Jesús ytiy'ajt, e ni pin ma ycapx'adugyii.

ROMANOS

Yi Necy Huidi San Pablo Yajniguejx Je Mibijcpidijc Jim Roma

¹ Hich Pablo tumbich ma Jesucristo ytung. Jesucristo ti xyajñibicyich co nduna'ñich ma yi' ytung quipxy müd yi' y'apóstol ajcxy. Ti xypidägyich ma jada tung tügjijp co ngapxhuäcxibich Dios y'ayuc ytiy'ajt oybi.

² Dios jecy'ajty y'ayuc yajhui'my cojay ma yi' y'ayucnajtzcaxpiybi ñecy co quexañ anajty je Cristo ya naaxhuiñ. ³ Ngapxhuäcxich jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' yi' ñinix paty ma ytaj. E yi' ytaj je rey David je' ymij'ap'ajti ymijteedy'ajti. ⁴ Per Jesucristo ti paady ma Dios yi' yjihui'ñ ymic'ajt. Co Dios yajjugypijcy y'ung ma anajty ti y'ögy müd yjihui'ñ ymic'ajt, chi ti yajnejhuiy anajty je naaxhuiñyäjy co Jesucristo hue' je' Dios y'ung, huidibi müd huadz yjot huadz yhuinma'ñ, etz nañ ymüid Dios yjihui'ñ ymic'ajt. ⁵ Co Dios yajjugypijcy Jesucristo ma anajty ti y'ögy, chi mijmay'ajt tuñ müd ich ajt ycixpi. E nañ müd Jesucristo ycixpi Dios ti xyajñibicyich co ngapxhuäcxibich yi' y'ayuc ytiy'ajt ma yi mayjäy ajcxy ma tüg'óciy naax cajp, jigix jëbi mayjäy mibijccixy e nañ capxymidoogixy Jesucristo. ⁶ E müich ajcxy huidibi tzinaayb jim ma yi cajp huidibi xijip Roma, nañ jadu'n Dios müich ajcxy ti xyhuin'ijxcixy jëbi ajcxy Jesucristo xyjäy'adyii.

⁷ Jada necy nguejxypich ma müich ajcxy nidüg'óciy huidibi jim yajpatcixp ma yi cajp huidibi xijip Roma. Dios müich xychojccixp xyjihuiyigixp, e nañ Dios ti xyhuin'ijxcixy jaydëbi yi' xyjäy'adyii, etz nañ jaydëbi mdzinaaygixy müd huadz mjot huadz mhuinma'ñ. Huen ich ajt nDios Teedy etz ajt nHuindzin Jesucristo may'ajt oy'ajt tunipy müd müich ajcxy etz nañ xyajjotcugihuiip ajcxy.

Pablo nicxy mibijcpidijc cogapxihua'ñ jim Roma

⁸ Tim jayijp nyajnajxpich jäygidaacin ma Dios, müd Jesucristo yxii, co müich ajcxy ti mmibijccixy Jesucristo. Mayjäy ma nidüg'óciy naax cajp ti nejhuiyigixy jadu'n nej müich ajcxy ti mmijpidaaccixy Jesucristo. ⁹ Hich tumbich cixyjot huinijot ma Dios ytung, co ngapxhuäcxich Dios y'ayuc ytiy'ajt müd Jesucristo ycixpi. Dios yi' tiy'ajt yegip jadu'n nej jabom jabom Dios nmibijctzooyich müd müich ajcxy ycixpi. ¹⁰ Dios nmibijctzooybich pen yi' jadu'n tzojcp co jëbi nnicxyich cham tiempo jim ma müich ajcxy myajpaady. Canaag'oc ich müich ajcxy nicxy nja'ixaangixy, e ca' y'oyiy nej nicxibich. ¹¹ Ooy njanijot'atyich co ich müich ajcxy nicxy n'ixaangixy, jaydëbi ngapxhuäcxibich Dios y'ayuc ma müich ajcxy müd Dios yjihui'ñ ymic'ajt, e nañ ngapxhuäcxibich Dios y'ayuc ma müich ajcxy jaydëbi tiydudägy mmibigipy ajcxy Jesucristo. ¹² Pen oyiyb nej nicxibich ma müich ajcxy myajpaady, chi jëbi njotcugihuiyich co anajty n'ixyich nej müich ajcxy mibijccixy Jesucristo, e nañ jaydëbi njotcugihuiipy müich ajcxy co anajty m'ijxcixy nej ich nmibicyich Jesucristo, e jadu'n nayyajjotcugiyim miñ xyipy.

¹³ Ndzojypich co müich ajcxy mnejhuihuipy co canaag'oc ti njapidägyich nhuinma'ñich co anajty nnicxa'ñich ma müich ajcxy

myajpaady, e ca' y'oyi'y nej n'icxi'byi'ch. Njijp'ijxyp'ich co oy'huip jadachambi tiempo jadu'n nej j'ebi nn'icxi'byi'ch jim ma mi'ich ajcxy. Com njacyaj'ixpigaamyb'ich mi'ich ajcxy, e nañ njacyajmi'bigaamyb'ich ajcxy Dios y'ayuc. Tim jadu'n nej nduñ'ich canaag agajp ma chinaaygixy yi' jacjadyi' j'ay huidibi' ajcxy ca' yjud'ioj'ayity. ¹⁴ Dios jadu'n xyajni'bijc'ich jada tung, paady copicy co ngapxhuäcxamyb'ich yi' y'ayuc ma t'üg'óci'y j'äy, etz majaty naax cajp. Ngapxhuäcxamyb'ich Dios y'ayuc ma yi' j'äy ajcxy huidibi' griego ayuc cápxc'ixp, etz ñan ma yi' j'äy ajcxy huidibi' ca' griego y'ayuc capxc'ixy. Ngapxhuäcxamyb'ich Dios y'ayuc ma yi' ixp'icy j'äy ajcxy, etz nañ ma yi' j'äy ajcxy huidibi' ca' y'ixp'icyity. ¹⁵ Paady ycixpi' ooy ndzachcapxhuäcxa'ñ'ich Dios y'ayuc ma mi'ich ajcxy huidibi' yajpatp jim Roma nañ jadu'n.

Je ayuc tiy'ajt oybi

¹⁶ Ca' nm'idzo'ydu'nyij'ich Cristo y'ayuc ytiy'ajt. Com je' jada je oybi ayuc huidibi' tzo'on ma Dios, ym'id yi' Dios ym'ic'ajt jigix j'ebi t'üg'óci'y j'äy ajcxy paadi'py pocy huinmeecxin, pinjaty c'obigaamb Cristo y'ayuc. Tim jayijp ti ngapxhuäcxy Jesucristo y'ayuc ytiy'ajt ma yi' jud'ioj'äy ajcxy, e jac'axam ma yi' huidibi' ajcxy ca' yjud'ioj'äyity. ¹⁷ Jesucristo ytiy'ajt xyajnejhu'iyim co nm'ibijc'im co Cristo ti j'öch ajt nbocy etz nx'ihu'in, chi Dios xyc'ob'igaa'nim jadu'n nej j'ihu'iy tudägyj'äy. Ca' ji jad'üg huinma'ñ nej Dios j'ebi xyc'ob'ijc'im jadu'n nej j'ihu'iy tudägyj'äy. Com jadu'n jaybety y'ity ma Dios ñecy ma jadu'n ym'inañ: "Pinjaty tudägy'ajtin ti paady m'id co ti mijpidägy Dios y'ayuc, hue' je' tzinähuip, ca' yjugy'ajtin ycixipy ytigoyipy."

Je naaxhuiñj'äy ajcxy ypocy

¹⁸ Cop'icy nbaatim tudägy'ajtin ma Dios, com je Dios huidibi' tzinaayb tzajp'joty ti xyajnejhu'iyim co yi' tzaachytuna'ñ mictägy t'üg'óci'y j'äy ajcxy huidibi' midundigooyb yi' ytiy'ajt, t'üg'óci'y huidijaty j'ib'ic huinma'ñ ym'id, t'üg'óci'y yi' ajcxy huidibi' yajtigooyb Dios ytiy'ajt m'id je j'ib'icpi' huidibi' ajcxy ytumyb. ¹⁹ Com yi' j'äy ajcxy huidibi' j'ib'icjot j'ib'ic-huinma'ñ m'id, y'ijxpy ñejhu'iyb ajcxy Dios ytiy'ajt, com Dios ti pidägy yi' ytiy'ajt ma yi' ajcxy yjot yhuinma'ñ. ²⁰ Ñejhu'iyb j'äy ajcxy Dios ytiy'ajt, com mabaad oga'n Dios yajcojy naaxhuiñybi'ixti chambaad, quëx'icp ya naaxhuiñ Dios ym'ic'ajt y'ijxpejt, oy ca' pin Dios ixy, huidibi' Dios ti cojy ti macxy yejc'py ijxpejt co Dios yji'ijity, etz Dios ym'ic'ajt huinixi' huin'it'empo ijtp yi', ca' ycixipy ytigoyipy nim'ina. Co anajty Dios tzaachytuna'ñ yi' pocyj'äy ajcxy, ca' ajcxy ni' ti ayuc m'id huaad adzohuimbidip Dios m'id ajcxy ypocy ycixpi'. ²¹ Com ñejhu'iyb ajcxy co ji Dios yajpaady, e ca' ajcxy ojada'jtcixy ca' ajcxy huindzig'iygixy Dios. E nañ ni' ca' ajcxy yajnaxy Dioscojuyip ma Dios. E nañ jadu'n ajcxy ñaybi'da'acigixy amij agix, yhuinma'ñ ixtaaygixy huidibi' ca' ytiy'ajtity. Yajtigooyi' ajcxy Dios ytiy'ajt ma ajcxy yjot yhuinma'ñ, e nañ m'id'ajtcixy tzuuhuinma'ñ. ²² Yi' jadu'mbi' j'äy ajcxy hue' yhuinma'ñ pidaaccixy co ajcxy ooy yco-huinma'ñity, co ajcxy ooy y'ixp'icyity, e ca' yjanchity, tzuu huinma'ñ ajcxy ym'id. ²³ Ma yjapadyi' ojadajtcixipy huindzig'iygixipy Dios huidibi' ym'ic'ajtin y'oy'ajtin ca' ycixipy ytigoyipy nim'ina. Chi ajcxy yajtigach yjot yhuinma'ñ, e huindzig'iygixy j'äy y'ahuinax e j'äy ajcxy yjugy'ajtin etz y'oy'ajtin cixaamb tigoyaamb. Ixti mijpidaaccixy nañ jadu'n joon y'ahuinax, iyujc y'ahuinax etz tza'ñ y'ahuinax.

24 Co jāy ajcxy jadu'n ytundigoy, paady Dios ñajtz'ixiyyin ajcxy, huen tundigooygixy nej anajty ci'm jibichuinma'ñ nijot'ajtcixy. Ñaymidundigóoyigixy ñinicx miñ xyipy huídibi janch oy midzo'yduuni. 25 Ma yjapadyii ixipy mijpidaaccixy je tiy'ajt tiydudägypí nej Dios ti yecy, huin'it ajcxy mijpidaaccixy añi huídijaty jāy ti cojy ti macxy. Ma yjapadyii ixipy huindzigiiygixy Dios, huídibi ci'm ti yajcojtáy tüg'óciy tijaty ji yajpaatp, huin'it ajcxy huindzigiiygixy jāy y'ahuinax joon y'ahuinax, etz iyujc y'ahuinax huídijaty ca' ti mic'ajt miiđity. Copicy n'ojadajtm ngömaayim Dios huinixii huini'tiempo. Amén.

26 Miiđ co jāy ajcxy tzachhuindzigiiygixy jāy y'ahuinax etz jactijaty ahuinax, paady ycixpi Dios ajcxy ñajtz'ixiyyii, chi ajcxy tungixy yi jibic-huinma'ñ huídibi ci'm ñijot'ajtcixyp huídibi oy ymidzo'yduuni. Töxyjāy ajcxy ma yjapadyii chinaaygixipy tudāgy miiđ ñāy, chi ajcxy ñaymiđtznāayigixy e ñaymiđtundigóoyigixy actöxyjāydijc. 27 Yēydijctijc ajcxy nañ jadu'n ñaymiđtundigóoyigixy miñ xyipy. Ñaymiđdzināayigixy ma yjapadyii ixipy chinaaygixy miiđ töxyjāy ajcxy, huin'it ytundigooygixy ma Dios ytiy'ajt. Ci'm nijot'ajtcixy jibic-huinma'ñ huídibi oymidzo'yduuni, ypátcixipy ma ajcxy ñinicx je tzaachypí huídibi Dios ypidacpy miiđ yi' ajcxy ypocy ycixpi.

28 Co yi jāy ajcxy jadu'n ci'm yhuinma'ñ ti pidaaccixy co ca' yajmij'ada'ñ Dios, paady ycixpi Dios ñajtz'ixiyyii ajcxy. Huen tim tungixy huídibi ajcxy ci'm ñijot'ajtpy, huídibi Dios ca' jāygidāgy. 29 Jāy ajcxy ooy mij jibic-huinma'ñ canaagnax nijot'ajtcixy; yēydijctijc ooy ajcxy jibic-huinma'ñ tungixy; ooy ajcxy miğapxtigoy töxyjāy ajcxy; ooy ajcxy adzojccixy comeeñ'ajtin; ooy mi'ijxtinaaygixy ymiğügtijc; ca' ajcxy ymiğüg ixaangixy; ooy ajcxy yjāyyaj'öccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymiğüg huin'ingixy; ooy ajcxy ypiitz-capxcixy; ca'p ajcxy ymiğüg ixaangixy. 30 Jāy ajcxy ooy nigapxy ni'ojjy ymiğügtijc; ca' ajcxy ixaangixy Dios; ca' ti jāygidaccixy; ooy ajcxy amij agix ñayjihuiiyigixy; ooy ajcxy ci'm ñaygömaayigixy; ooy ajcxy cojy macxy jibic-huinma'ñ, ca' ajcxy capxymidoogixy ytaj yteedy. 31 Jāy ajcxy ca' y'ayuc-huinjihuiiyigixy; ca' ajcxy cuydungixy yci'm'ayuc; ca' ajcxy ni pin tzojccixy jihuiiyigixy; ca' ajcxy ni pin pa'ayoogixy. 32 Jadayaabi jāy ajcxy ñejhuuiyb co Dios ti cojy ti macxy ycötujcin co pinjaty tundigooyb jadu'n miiđ Dios ytiy'ajt, tigooyip ajcxy yjugy'ajtin. Oy ixixpy yi jāy ajcxy janejhuiiyigixy co padaangixy y'o'cin, huin'it ajcxy jactimtungixy jibic-huinma'ñ, e nañ jadu'n jotcuyc ajcxy co jac pinjaty jibic-huinma'ñ tungixy.

2

Dios tiydumb jadu'n nej yi' tzocy

1 Paady co miich miğüg m'ix'ixy mba'ixy ti ytumyib, ti miğüg ycapxyp ti anajty pocy mnaymōyii, oy ixixpy ypinjāy ñejpyjāyity. Miich ooy ti pocy m'ixy ma huing jāy, e nañ jadu'n miich ooy mij mdundigoy, tim jadu'n nej yi' ajcxy ytundigooygixy. 2 Nejhuuiyim co Dios tudāgy ytuñ co tzaachytuñ tüg'óciy pinjaty tundigooyb. 3 E miich co miğüg m'ix'ixy mba'ixy ti ytumyib ti miğüg ycapxyp, nañ jadu'n miich Dios xychaachytuna'ñ. ¿Nej mdiy mdzögip co anajty Dios xytyiduna'ñ? 4 ¿Nej ca' mjāygidāgy nej Dios mij ooy may'ajt oy'ajt ti tuñ miiđ miich, nej ooy mij ti xypa'ayoy, mij ti xymimecxtucy? ¿Nej ca' mnejhuuiy co Dios mij ooy

xypa'ayoy xymimecxtucy, jigix mjothuimbidipy nej mdundigoy ma Dios ytiy'ajt? ⁵ Miid co ooy mjtouuñity mgöjuuñity, ca' ajcxy mjothuimbida'ñ, ca' ajcxy m'ixmadza'ñ nej ajcxy mdundigooygixy. Paady ycixpi Dios huidibi tudägy tumb nigü miich yi' ooy mij xychaachytuna'ñ co anajty xii tiempo ycixy ytigoy, e Dios chaachytunamyb jäy ajcxy miid ypocy ycixpi. ⁶ Co anajty Dios tiyduñ yi naaxhuiñ jäy, chi yajnidagihua'ñ nidüg nidüg nej anajty ti chinäy. ⁷ Nijëjity jäy ajcxy oyjot oyhuinma'ñ tungixy jabom jabom, yjijp'ijxpy ajcxy co Dios oybi ymöhuaanigixy, nañ yjijp'ijxpy ajcxy co Dios ycömayiib, yjijp'ijxyp ajcxy yjugy'ajtin huidibi ca' ycixipy ytigoyipy nimina. Yi jadu'mbi jäy Dios ymöhuaamyb jugy'ajtin huidibi ca' ycixipy ytigoyipy nimina. ⁸ Per Dios chaachytunamyb mijcajee yi jäy ajcxy huidibi ca' ycapxymidohuaangixy, huidibi ca' cuydungixy Dios ytiy'ajt, huidibi ajcxy tumb jibic-huinma'ñ. ⁹ Ayo'n tzaachypi ypadamyb tüg'óciy jäy ajcxy huidibi jibic-huinma'ñ ti tuñ. Nañ jadu'n miich judíojäy ajcxy tim jayijp mbadaangixy tzaachypi, pen mdundigooygixp, e chiini yi jacjadyii jäy padaangixy tzaachypi, pen tundigooygixp. ¹⁰ Tüg'óciy pinjaty oyjot oyhuinma'ñ tungixp, Dios ymöhuaamyb yi' ajcxy oy'ajtin, nañ cömayaanip yi' ajcxy Dios, etz nañ yajjotcugihuib ajcxy. Tim jayijp yi judíojäy pada'ñ ajcxy oybi, etz jac'axam yi jacjadyii jäy ajcxy.

¹¹ Dios ca' tyduna'ñ jäy ajcxy huin'ijxpety, quipxyjaty tyduna'ñ nidüg'óciy jäy ajcxy. ¹² Nidüg'óciy jäy ajcxy huidibi tundigooygixp, Dios yajtigoyaanip ajcxy yjugy'ajtin. Yi jäy ajcxy huidibi ca' miidity Dios ycötujcin huidibi cojaayip, Dios yajpocycähuaanip ajcxy, com ymiid ajcxy Dios ytiy'ajt ma yjot yhuinma'ñ. Yi jäy ajcxy huidibi miid Dios ycötujcin cojay, Dios yajpocycähuaanip ajcxy miid yi' ycötujcin huidibi cojaayip. ¹³ Yi jäy ajcxy huidibi nigooob amido'ijtp co yajcapxy Dios ycötujcin, e ca' ycapxymidoogixy, ca' ycöbiga'ñyii Dios jadu'n nej jihuüy ytudägyjäyity. Yi jäy ajcxy huidibi capxymidoob Dios ycötujcin, Dios cöbigaanip co ajcxy ytudägyjäyity. ¹⁴ Yi jäy ajcxy huidibi ca' miidity Dios ycötujcin huidibi cojayip, co ajcxy nijot'ajtcixy oyjot oyhuinma'ñ jadu'n nej Dios tzocy, jadu'n nipaady nej jihuüy ajcxy miidity Dios ycötujcin. ¹⁵ Co je jäy ajcxy oyjot oyhuinma'ñ tungixy, huin'it yajnigüëxiccixy co ajcxy ymiid Dios ycötujcin ma ajcxy yjot yhuinma'ñ. E co paatcixy jibic jot jibic-huinma'ñ, huin'it jibic ñayjihuiyigixy. E co patcixy oyjot oyhuinma'ñ, huin'it ooy oy ñayjihuiyigixy. ¹⁶ Jada je'du'n je jemybi oybi ayuc huidibi ngapxhuäcxypich co miinip je xii je tiempo co Jesucristo, miid Dios ycötujcin, tydunip tüg'óciy jäy ajcxy nej anajty yjot yhuinma'ñ ajcxy miidity, tüg'óciy pinjaty ti tuñ ayüch ameech tijaty.

Je Dios ycötujcin huidibi Moisés yjay jecy'ajty

¹⁷ Miich ajcxy huidibi minamb co mjudiojäyity, miich ajcxy mmijpidaaccixyp Dios ycötujcin, je jecyip huidibi jaybetyip. Miich ajcxy mnaygömääyigixy co miich ajcxy Dios xyjäy'adyii. ¹⁸ Miich ajcxy mnejhuuyb nej Dios tzocy nej huaad mjäy'ajtcixy. E nañ ti m'ixpicy Dios ycötujcin huidibi ti xyajnejhuuyigixy huidibi tiy'ajt jac'oyip. ¹⁹ Miich ajcxy minamb co janch janch co miich ajcxy Dios ytiy'ajt myejci ma yi jäy ajcxy huidibi ca' Dios ytiy'ajt miidity, jadu'n nipaady nej jihuüy tüg huintzpi mhuijtzöy, e nañ jadu'n nipaady nej jihuüy mgodixy je jäy ajcxy huidibi agootztuum tzinaayb. ²⁰ Miich ajcxy judíojäy myaj'ixpijcpy yi jäy ajcxy huidibi ayooob, huidibi ca' ti tiy'ajt nejhuuyigixy, e mgapxhuijy

yi jāy ajcxy huídibi ca' yhuinma'ñymejtzcixy. Miich ajcxy minamb co m'ayuc etz mdiy'ajt mbaatcixy ma Dios ycötujcin huídibi jaybetyip. ²¹ Miich ajcxy myaj'ixpijcpy jacjadyii jāy ajcxy Dios ytiy'ajt. ¿Nej co ca' ci'm mguydungixy nej ti myaj'ixpijccixy? Myaj'ixpijcpy ajcxy jacjadyii jāy co ca' huaad ymeetzxcixy, e miich ci'm ajcxy meetz. ²² Miich ajcxy myaj'ixpijcpy jacjadyii jāy co ca' huaad migapxtigoy töxyjāy ajcxy, e ¿miich ajcxy nej co mmigapxtigooygixy töxyjāy ajcxy? Miich ajcxy ci'm minamb co ca' huaad yajhuindziğiŷy tzaaboch quipychech, e miich ajcxy ci'm mdzachmeech je meeñ ma je tzajptijc ma je quipychech y'ity. ²³ Miich ajcxy mdzachnaygömaayigixy co mguydungixy Dios ycötujcin. Miich ajcxy m'ixtijy Dios miid co ca' ajcxy mguyduni yi' ytiy'ajt. ²⁴ Paady jadu'n jaybety miñ ma Dios ñecy, ma jadu'n ymina'ñ: "Com co miich ajcxy mdundigooygixy, paady ycixpi yi jacjadyii jāy ajcxy nigapxy ni'ojjy Dios yxi."

²⁵ Co ajcxy mguyduunip Dios ycötujcin, huin'it Dios xytunipcuendi co miich ajcxy miidity je tiy'ajt ma mninix co Dios xyjāy'adyii. Co ca' ajcxy mguyduunip Dios ycötujcin, huin'it Dios ca' xytunipcuendi co miich miidity je tiy'ajt ma mninix co Dios xyjāy'adyii. Jadu'n nipaady nej jihuŷy ca' mdiy'ajttiyity. ²⁶ Co yi jacjadyii jāy ajcxy huídibi ca' miidity tiy'ajt ma ñinix, e cuyduni ajcxy Dios ytiy'ajt, jadu'n nej ajcxy ytiy'ajttiyity. ²⁷ Yi jacjadyii jāy co ajcxy cuyduñ Dios ytiy'ajt, yi' ajcxy capxpaady'idipy ma Dios. E miich ajcxy judíoŷy mbocycāhuip miich ajcxy, oy miich ajcxy mjamidity ixipy Dios ycötujcin huídi cojaayip, pen ca' mguydungixy. ²⁸ Je iixpejt janchypi co pinjaty Dios yjāy'ajtyp, canan je' je iixpejt huídibi ymiid ma ninix. E nañ jadu'n canan je' je tiy'ajttihuñ cötujcin huídibi jāy cuydun jecy'ajty. ²⁹ Je iixpejt janchypi co pinjaty Dios yjāy'ajtyp, je' je' je iixpejt huídibi ymiid ma yjot yhuinma'ñ, je oyjot oyhuinma'ñ huídibi ymiid, je iixpejt co je Espíritu Santo ti yajhuächyii yjot yhuinma'ñ, canan je' je tiy'ajt co ti cuyduñ je jecyip cötujcin huídibi cojay ijtp. Yi jadu'mbi jāy ajcxy cōmay'idipy ma Dios, e ca' ycōmay'ida'ñ ma jāy ajcxy.

3

¹ Pen tiy'ajt jadu'n nej nmina'ñich, ¿ti jāygiidaacin yi judíoŷy ajcxy ymiid ma Dios huídibi yi jacjadyii jāy ajcxy ca' miidity? ¿Ti jāygiidaacin ajcxy ypatpy co ajcxy miidity tiy'ajt ma ñinix co Dios yjāy'adyii? ² Yi judíoŷy ooy canaagnax oy'ajtin jamidity. Tim jayijp Dios yajnibjci ajcxy yi' ycötujcin yi' y'ayuc huídibi cojaayip. ³ ¿Nej mdiy co Dios ca' cuyduna'ñ yi' y'ayuc miid yi judíoŷy ajcxy miid co nijejity judíoŷy ca' cuyduñ yi' ycötujcin? ⁴ Dios ca' jadu'n huinma'ñ miidity nej jāy ajcxy huinma'ñ miidity. Oy ixipy nidüg'óciy jāy y'aníidaaccixy, Dios ca' y'aníidaga'ñ nimina. Paady jadu'n jaybety miñ ma Dios y'ayuc co David jadu'n ymina'ñ:

Ñejhuñhuipy jāy ajcxy co miich, Huindzin Dios, tudägy mguyduñ yi m'ayuc. Ca' huaad pinjaty ymina'nip co ca' miich mguyduñ yi m'ayuc.

⁵ Pen Dios cōmaybidzimipy miid ajt nbocy ycixpi, ¿nej tiy'ajt jadu'n nej jāy yminaangixy co Dios ca' oy ytuñ, co xychaachytuunim miid ajt nbocy ycixpi? ⁶ Ca' yjadu'nity. Co ixipy yjadu'nity, Dios ca' yi' tiydunipy naaxhuñjāy miid ajcxy ypocy ycixpi.

⁷ Co ixipy ytiy'ajity jadu'n nej jāy yminaangixy co Dios ooy yjotcujcity co ca' xychaachytuunipych miid nbocyich ycixpi, jac'oy co ixipy

ndundigooyich, jigix Dios janch ycomaybidzimipy. ⁸ Jac'oy ixypy nminaanim: "Tzoc tundigooyim jigix jebi Dios comay pidzimipy." Ixti nijejity jay ti xyñihuambetyich co ñich jadu'n ti nminañich. Ca' jadu'n nminañich co Dios jay tzaachytunipy ninigoob. Dios chaachytunipy pocyjäy ajcxy, com paatip ajcxy jadu'n yi tzaachyipi.

Nidüg'óciy ñich ajt nbocymidity

⁹ ¿Nej janch jadu'n co ñich ajcxy huidibi judíojäy, jac'oyjäy ñich ajcxy ca'ydi yi jacjadyii jäy ajcxy? Ca' yjadu'nity, ca' ñich ajcxy njac'oyjäyity. Com ti jayijp nyaj'ixpicyich co tüg'óciy jäy ajcxy yajpaady pocymid, yi judíojäy, etz nañ jadu'n jacjadyii jäy ajcxy. ¹⁰ Com jadu'n jaybety miiñ ma Dios ñecy ma jadu'n yminañ:

Ca' ji ni tüg jäy tudäcpy, ni tüg.

¹¹ Ca' ji ni pin huidibi huinjihuñyb Dios ytiy'ajt. Ni pin huidibi ixtaayb Dios ytiy'ajt.

¹² Nidüg'óciy jäy ti ixmajtcixy Dios ytiy'ajt. Quipxy ycapxy ajcxy ytumyb co ytundigoogyixy. Ca' ji ni pin, pin huadz oy yjot oy yhuinmañ tumb, ca' ji ni tüg.

¹³ Yi jäy ajcxy ooy ycapxtigoogyixy, oy ajcxy yhuin'ññ mid y'ayuc. Jadu'n ajcxy yöcäc nipaady nej tüg öcpi jut huidibi ahuadz. Ooy ajcxy yajtzachiy mid y'ayuc jadu'n nej jihuiy tzañ chüch.

¹⁴ Ooy ajcxy ycapxtigoogyixy. Ooy ajcxy jibic ayuc capxcixy.

¹⁵ Mid yinjaty huenjatypi ayuc, mic'amy ymigüg yaj'o'ccixy.

¹⁶ Ma ajcxy yhuidity ooy midundigoogyixy ymigüg, e nañ yecy ajcxy tajin mayin.

¹⁷ Ca' ajcxy nejhuuygixy nej huaad chinaaygixy jotcuic, ca' ma ti tzip ti capxy.

¹⁸ Ni cahuinmaaygixy nej Dios tzigiygixipy.

¹⁹ Tüg'óciy ayuc ycojaayity ma Dios ycötujcin necy, mic'ajt miidpi mid yi jäy ajcxy huidibi yajmij'ajtp je cötujcin. Dios ti pidägy yi' ycötujcin, jaydebi pinjaty tundigooyb, huaad ca' ti anii tuñ ma Dios. Dios ytiydunipy tüg'óciy jäy ajcxy mid yi' ycötujcin. ²⁰ Dios ca' capxpada'ñ co ytudägyity, mid co ti cuydunyii ycötujcin. Dios ti pidägy ycötujcin jaydebi nejhuuyim co ajt nbocymidity.

Yi alma nidzoocin, hue' yajpaady mid mibijcin

²¹ Jadachambi Dios xyajnejhuuyim jemybi tiy'ajt jadu'n nej tudägy'ajtin jeb nbaatim ma yi', e jada jemybi tudägy'ajtin tiy'ajt, ca' yi' yjadu'nity nej yi tiy'ajt huidibi yajpatp ma Dios ycötujcin jecy'ajtpyi. Per yi Dios y'ayucnajtzcapxiybi ñecy etz Dios ycötujcin necy yejc tiy'ajt jecy'ajty co Dios xymöhuaanim tudägy'ajtin. ²² Jadu'n Dios yaj'ahuimbidaangixy tudägy tüg'óciy jäy huidibi mibijcp Jesucristo, ca' ñejity pinjäy ajcxy, pen judíojäy o pen ca' judíojäy ajcxy. ²³ Com nidüg'óciy naaxhuiñjäy ti ytundigoogyixy. Ni tüg jäy yhuadz'ajtin ycanaybadyii mid Dios yhuadz'ajtin y'oy'ajtin. ²⁴ (Mid co nidüg'óciy jäy ytundigoogyixy), paady ycipi Dios mijmay'ajt mij'oy'ajt tuñ ninigoob mid tüg'óciy jäy ajcxy, e Jesucristo ti cojuydäy tüg'óciy ajcxy ypocy, e jadu'n yaj'ahuimbity tudägy nidüg'óciy jäy ajcxy huidijaty mibijccixp Jesucristo. ²⁵ Dios yquejx y'ung ya naaxhuiñ, jaydebi huinmeecixp jäy ajcxy ypocy, mid co Jesucristo ti y'ögy mid ajcxy ypocy ycipi. Dios yhuinmeecixp jäy ajcxy ypocy co ajcxy mibigipy Jesucristo. Jayijp ca'ni anajty Jesucristo miiñ ya naaxhuiñ, Dios

ooy mímecxtujcy jáy ajcxy, ca' anajty miiđity jotcöduuyb jáy ajcxy ypocy. ²⁶ Jadachambi xii tiempo Dios ti yaj'oyiy jadu'n nej jëb huinmeecxipy jáy ajcxy ypocy, e jadu'n yaj'ahuimbip ajcxy tudägy ma yi' yhuinduu. Jadu'n Dios tuñ jigix ñiguëxigipy co Dios tudägy yi', e tudägy'adaamni yi', co cöbicy jáy, yi pinjaty mibijcp Jesucristo.

²⁷ ¿Ti huaad jáy ajcxy tungixy huidibi jëbi miiđ ñaygömayiyb ma Dios? Ca' ni ti. ¿Na'amy co yjadu'nity? ¿Nej jëbi ajcxy ñaygömayiyb miiđ co yajmij'ajtcixy Dios ycötujcin? Ca' yjadu'nity. Ca' huaad ñaygömayiygixy ci'm, com Dios ti yaj'ahuimbity jáy ajcxy tudägy huidibi mijpidacp Jesús. ²⁸ Paady nmína'ñich co jáy ajcxy y'ahuimbity tudägy co ajcxy mibicy Jesucristo, e canan co janch ypaad jacuydungixy canaag cötujcin.

²⁹ ¿Nej miich ajcxy mdijcixy Dios ytuñ miiđ ac yi'yi judíojäy ajcxy, e ca' jacmiiđ pinjaty? Ca' yjadu'nity. Dios tuumb miiđ janch nidüg'óciy jáy ajcxy. ³⁰ Ji tügpajc Dios, e yi' tú'ciy ytuñ miiđ judíojäy, etz nañ jadu'n jacjadyii jáy ajcxy. Dios yaj'ahuimbijtaayb tudägy nidüg'óciy jáy ajcxy co ajcxy mibijcixy Jesucristo. ³¹ Co jadu'n nbaatim ndudägy'ajtin miiđ co nmibijcim Jesucristo, ca' nmínaaním Dios anajty yi' ycötujcin je jecyip nyajcödi gooyim. Hue' janchtiy ñigi anajty nmic'ajtmooym Dios ycötujcin.

4

Je ijxpejt huidi Abraham yejc

¹ ¿Nej n'ocmínaaním? ¿Ti oybi ti paady ma Dios je Abraham iich ajt nmij'ap nmijteedy? ² Co ixypy Dios Abraham tudägy ti ixy, miiđ co oybi ti tuñ, jëbi Abraham ixypy ñaygömayii. Per ca' huaad ci'm ñaygömayii ma Dios. ³ Jadu'n jaybety ymiiñ ma Dios ñecy ma jadu'n ymína'ñ: "Abraham ymijpidaaci Dios, e paady Dios jadu'n cöbijcy Abraham jadu'n nej tüg tudägyjäy." ⁴ Je jáy huidibi ymuju'ñ patp miiđ ytung ycixpi, jada meefñ huidibi ymuju'ñ'ajtpy ca' nigoo ñimöyii, hue' tim paatip jadu'n miiđ ytung ycixpi. ⁵ Yi jáy huidibi ca' jijp'ixy co tudägy'ajtin padañ ma Dios miiđ oy'ajtin ycixpi huidibi ytumy, jëyi ymibijcipy ymijpidacpy co Dios yaj'ahuimbida'ñyii tudägy. Yi jadu'mbi jáy tudägy'ajtin ypadamy miiđ ymibijcin ycixpi. ⁶ Jaybety ymiñ ma Dios ñecy co je David jecy'ajty nimiydacy tüg jáy huidibi ooy anajty jotcujc ñayjihuiyii miiđ co Dios ti y'ixyii jadu'n nej jihuüy ytudägyjayity miiđ ymibijcin ycixpi, e ca' nmínaaním miiđ oyjäy'ajtin ycixpi huidibi ytumy.

⁷ David jadu'n ymínañ:

Jotcujc je jáy ajcxy huidibi ypocy ti yhuinmecxyii, huidibi ypocy ti yajtögoyii.

⁸ Jotcujc je jáy huidibi Dios cöbijcip jadu'n nej jihuüy ca' ypocy ymiiđity.

⁹ ¿Nej janch tiy'ajt jadu'n co jada jotcujc'ajtin huidibi David ñimiydac jecy'ajty, co ac yi' judíojäy yi' ajcxy padaamb huidijaty miiđ tiy'ajt ma ñinícx co Dios yjáy'adyii? Ca' yjadu'nity, yi' jacjadyii jáy nañ jadu'n yi' ajcxy padañ jotcujc'ajtin. Ti nmínaangixyich co Abraham ymibijci Dios, e Dios ycöbijci jadu'n nej jihuüy ytudägyity. ¹⁰ ¿Nej mdijy Dios ycöbijci Abraham jayijp ca' anajty yajtiy'ajttíyñi? o ¿ti anajty yajtiy'ajttíy? Dios ycöbijc Abraham jadu'n nej jihuüy ytudägyjäyity ca'ni anajty pidacy tiy'ajt ma ñinícx co Dios yjáy'adyii. ¹¹ Jayijp anajty Abraham ti mibicy Dios, e ti anajty Dios ycöbigyii. Jac'axam Dios Abraham je cötujcin mooy co huen tiy'ajttíhuipy y'ung etz y'ap y'oc. Je' je' ijxpejt'ajtp co Dios anajty jayijp ti ycöbigyii

jadu'n nej jihuïy ytuðägyjäyity, ca'ni anajty ymöyii cötujcïn. Co Dios jadu'n ytuñ mïd Abraham jadu'n nipaady nej jihuïy Abraham nmijteedy'ajtim ïch ajt nidüg'óciy huïdibi cham mïbijcp Jesús. ¹² Abraham nañ jadu'n ñimijteedy'ajtyp yi judíojäy huïdibi mïbijcp mijpidacp Dios tim jadu'n nej yi' mibicy anajty Dios, jayijp ca'ni anajty mïdity tiy'ajt ma ñinicx co Dios yjäy'adyii. Jadu'n nipaady nej jihuïy Abraham ca' nimijteedy'aty yi judíojäy huïdibi ca' mibicy Dios.

Je huïdibi Dios ti xyaj'ahuanïyim ti ycixy yca'px mïd je mïbijcïn

¹³ Mïd co Abraham etz y'ap y'oc ymïbijcpy ymijpidacpy anajty ajcxy Dios, e paady anajty Dios yaj'ahuimbidaänigixy tudägy, e paady Dios nimay Abraham co yi naaxhuïñybi yi' ajcxy je' adaanip. Canan jadu'n ajcxy Dios ñimayi co ymöhuäänigixy je naaxhuïñybi mïd co anajty nidüg'óciy ajcxy ti cuydungixy Dios ycötujcïn. ¹⁴ Co Abraham etz y'ap y'oc padaangixy je naaxhuïñybi huïdibi yaj'ahuanïyi, mïd co ajcxy ti cuydundaayï Dios ycötujcïn, paady naadigï'ajtp ixypy co nmïbijcim co Dios xyaj'ahuimbidaänim tudägy. E nañ naadigï'ajtp ixypy co Dios je Abraham nimay: “Je naaxhuïñybi miich je' mje'adaanip, com ti xymibicyich.” ¹⁵ Je pinjaty mijpidaacp Dios ycötujcïn je jecyïp, Dios yi' tzaachytunaanip, com ca' cuydundaaygixy. Pinjaty ca' mïdity Dios ycötujcïn huïdibi jaybetyïp, ca' yi' midundigooygixy jadayaabi cötujcïn.

¹⁶ Mïd co Abraham anajty Dios ti mibicy, paady ycixpi Dios ñimaayï co je naaxhuïñybi yi' je'adaanip. Jadu'n Dios may'ajt tuñ mïd Abraham, jaydëbi tüg'óciy pinjaty mïbijcp Dios, tim jadu'n nej Abraham mïbijcï Dios, jëbi ajcxy paatcixy yi' oy'ajtin huïdibi Dios yajnimay Abraham co möhua'ñ je oy'ajtin huïdibi yegamyb ninigoobi. Dios ycuydunamyb yi' y'ayuc mïd tüg'óciy jäy huïdibi mïbijcp Dios, tim jadu'n nej Abraham anajty mibicy Dios, canan yï'yi judíojäy ajcxy padam oy'ajtin, com Abraham ixpejt yejc ma tüg'óciy jäy ajcxy. ¹⁷ Ma Dios yhuinduu jadu'n nipaady nej jihuïy Abraham ïch ajt nmij'ap'ajtim nmijteedy'ajtim nidüg'óciy huïdibi mïbijcp Dios, com Abraham nañ jadu'n ymïbijcpy anajty Dios. Com jadu'n jaybety ymiñ ma Dios ñecy co Dios jecy'ajty jadu'n nimay Abraham: “ïch miich nyajñibijcpy co miich mnimij'ap'adamyb mnimijteedy'adamyb tüg'óciy je mayjäy huindu'mybi naax huindu'mybi cajp.” E Dios ycuydunipy yi' y'ayuc com mic'ajt mïd, ixti jaydëbi yajjuygypigipy jadüg'oc jäy tiibi y'ó'ccixy. E nañ mic'ajt mïd jaydëbi ane'mïn pidägy co huen yjii'adipy huïdijaty ca' ca'tni.

¹⁸ Mïd co Dios anajty ti ñimäyï co ymïd'adamyb may y'ap y'oc, paady ycixpi Abraham ti jïjp'ixy anajty co Sara anajty y'ung'ixa'ñ. Canaag jimijt anajty jajïjp'ixy co huen y'ung paadip. Ti anajty tiempo ñajxnï mina y'ung'ixipy. Hue' Abraham ymïbijc huïdibi anajty Dios ti yajnimäyï co yi' mïd'idamyb may'amy y'ap y'oc. Paady ti ni'ap'aty ti nideedy'aty may'amy y'ap y'oc. ¹⁹ Abraham ti anajty ymic'ajt ycïjxnï com ti anajty ymïjäyïñi. Ymïd anajty mïgo'px jimijt, e nañ yi' ytöxyïc Sara ni tüg anajty ti yca'ung'ixy, per Abraham yjacmïbijcyp anajty co Dios cuyduna'ñ y'ayuc mïd yi'. ²⁰ Abraham ca' anajty ixmach yi ymïbijcïn jadu'n nej anajty Dios ymïdity ymic'ajt jaydëbi cuydunip yi' y'ayuc. Chi Abraham ïбаты capxpaty Dios. ²¹ Com Abraham ti anajty huinma'ñ ypidägy ma Dios co yi' ymïd ymic'ajt jaydëbi ycuydunïyb yi' y'ayuc huïdibi yaj'ahuanïy. ²² Com

Abraham ymijpidaacip anajty Dios y'ayuc, paady Dios anajty ti cöbicy Abraham, e jadu'n anajty ti yajnaxy nej jihuiy ytudägyjäyity.

²³ Dios ymoy Abraham jada y'ayuc huidibi jaybety, canan jêda'ajty Abraham yajmoy, nañ yajmoyday mayjây. ²⁴ Nañ jadu'n jaybety miñ jada ayuc miid ich ajt ycixpi. Dios nañ xycöbigaanim jadu'n nej jihuiy ajt ndudägyjäyity miid co nmibijcim Dios huidibi ti yajjugypijcy anajty jadüg'oc ajt nHuindzin Jesucristo. ²⁵ Dios ycïyejc Jesús huen yaj'ögyii miid ajt nbocy ycixpi. E nañ Dios yajjugypijc Jesús jadüg'oc jaydëbi xyaj'ahuimbijtim tudägy ma Dios.

Je nej yhuimbizimni co Dios xycöbijcim tudägyjäy

5

¹ Miid co nmibijcim nmijpidaacim ajt nHuindzin Jesucristo, paady Dios ti xyaj'ahuimbijtim tudägy. E miid co Dios ti xyaj'ahuimbijtim tudägy, paady jotcuje n'ijtim miid Dios. ² Co nmibijcim nmijpidaacim Cristo, chi nbaatim je may'ajt je oy'ajt huidibi Dios ytumyb miid ich ajt, e jadu'n oy n'ijtim miid Dios, ca' ma ti tzip. Nañ ooy njotcugiiyim, miid co njijp'ijxim co nbadaanim Dios y'oy'ajtin. ³ Canan jêda'ajty nmijotcuje'ajtim co nbadaanim Dios y'oy'ajtin, nañ jadu'n tzoc mijotcuje'ajtim ayo'n tzaachypi. Com nejhuuiyim co nminajxim nyajnajxim tzaachypi, huin'it jëbi nyajtunim mecxtujcin. ⁴ E co nyajtunim mecxtujcin, cömay najxim ma Dios, e co anajty cömay ti nnajxim, chi njijp'ijxim co nbadaanim oy'ajtin ma Dios. ⁵ Com njijp'ijxim co nbadaanim Dios y'oy'ajtin, chi ca' ndajim nmayim com Dios ti yi' yEspiritu Santo xy'adigiiyim xyjottigiiyim huidibi xyajnejhuuiyim jadu'n nej Dios xychojcin xyjihuiiim.

⁶ Jecy'ajty co anajty ca'ni Jesucristo ymiñ, je naaxhuiñjây ca' anajty mic'ajt müdity nej ci'm y'ahuimbijtcixipy tudägy. Co yhuaad'ajtni je xii je tiemp huidibi Dios ti yaj'ixtâgy, huin'it Cristo y'o'cy miid ich ajt nbocy ycixpi miid co ndigooyim miid Dios ytiy'ajt. ⁷ Co ixipy n'ijxtaayim pinjaty codinähuiip tüg jäy tudägyipi ma yi o'cin, ca' ni pin nbaatim. Co ixipy n'ijxtaayim pinjaty codinähuaamyb tüg jäy huidibi ooy ycömayity ma yi o'cin, ca' yjecyity co nbaatim tüg metz. ⁸ Per Dios yajniquëx'icyp jadu'n nej xychojcin xyjihuiiim mijcajee co quejxy Cristo huen o'cy miid ajt nbocy ycixpi, oy anajty ich ajt ooy njacpocytuunim. ⁹ Cristo ti xyaj'ahuimbijtim tudägy co ñi'py ti temy ti yocy miid ajt nbocy ycixpi, e nañ Cristo ñgi may'ajt tuna'ñ miid ich ajt ycixpi co anajty xyajnidzögaanim ajt n'alma, jadu'n nej Dios tzaachytuna'ñ naaxhuiñjây miid ajcxy ypocy ycixpi. ¹⁰ Co anajty ca' Cristo ymiñi ya naaxhuiñ, huin'it anajty nmidzip'ajtim Dios. Je tzip capxy ti Dios yaj'oyiy co quejxy y'ung ya naaxhuiñ, e y'o'cy miid ajt nbocy ycixpi. Miid co Cristo xycodinaayim ma yi o'cin, paady ñgi xypubejtim xypudigiiyim cham co yajpaady juogy. ¹¹ Canan jada'ajty co Jesucristo xyajnidzögaanim ajt n'alma, nañ jadu'n tzoc xondaacim miid co n'ijtim miid Dios, miid je may'ajt huidibi ajt nHuindzin Jesucristo ti tuñ miid ich ajt ycixpi co yaj'oyiy je tzip nej anajty Dios nmidzip'ajtim, jëbi jotcuje n'ijtim miid Dios.

Adán etz Cristo

¹² Miid jada ycixpi co yi pocytunü chondacy jecy'ajty ya naaxhuiñ miid tügpi jäy. E co jäy ytundigoy oga'n miid Dios, paady ycixpi je o'cin ytiigiy ya naaxhuiñ. Miid co tüg'öciy jäy midundigoogyxixy Dios, paady tüg'öciy

jäy patcixy yi o'cin. ¹³ Janch tıy'ajt jadu'n co jäy ajcxy ytundıgooy jecy'ajty jayıjp ca'ni anajty Dios yecy yi' ycötujcin cojaaybi, e co ca' jäy anajty ajcxy cötujcin müdity jecy'ajty, paady ca'pin tıyduñ ajcxy nej ajcxy ytundıgooy. ¹⁴ Ca' ñejıty, oy ajcxy anajty ca' müdity Dios ycötujcin, nañ jadu'n y'o'ctay ajcxy, chondacy müd Adán, ixtı yja'ty ma Moisés yxı ytiempo. Nañ o'ctay jäy ajcxy huidibi tigachjaty tundıgooy, ca' yjadu'nıty nej Adán oga'n ytundıgooy. İch ajt nninıcx ymıd je jıbicpi huidibi nbaatım ma Adán. Per ajt njemyjot njemyhuinma'ñ nbaatım ma Cristo.

¹⁵ Je pocytunıı huidibi Adán yajtzondac, ca' naybadyıı müd je tudägy'ajtin huidibi Dios ti xyñımooyım. Müd je pocytunıı ycıxpi huidibi tüg jäy ti yajtzondägy, tüg'óciy jäy ócin ti paady. Dios müd tüg yëydıjc, je Jesucristo, mıjmay'ajt tuñ müd jäy ajcxy ycıxpi co yaj'ahuimbıjtcıxy tudägy, chi mayjäy tudägy'ajtin ti paady. ¹⁶ Per je tudägy'ajtin huidibi Dios xyñımooyım, ca' jadu'n naybadyıı müd huidibi Adán ytuun. Müd co Adán ytundıgoy tügtecy müd Dios, paady ycıxpi mayjäy o'cin ti paady müd tüg pocy ycıxpi. Müd co Dios ti xyñımooyım tudägy'ajtin müd Jesucristo, paady mayjäy tudägy'ajtin y'oy'ajtin ti patcixy huidibi mıbıjcp Cristo. ¹⁷ Müd co tüg jäy capxycómıdodacy Dios, paady tüg'óciy jäy ti patcixy yi o'cin. Müd co tüg jäy, je Jesucristo, may'ajt oy'ajt tuñ co xyaj'ahuimbıjtım tudägy, paady tüg'óciy jäy ajcxy huidibi mıbıjcp Jesucristo ypadaangıxyp jotcujc'ajtin etz nañ chinähuaangıxy jııby tzajpjoty ma Jesús y'ane'my.

¹⁸ Müd co tüg jäy ytundıgoy oga'n, paady nidüg'óciy je mayjäy ypocycäy ajcxy, e patcixy yi o'cin. Nañ tım jadu'n müd tüg jäy huidibi ti chinäy tudägy, Dios mayjäy yaj'ahuimbıjty ajcxy tudägy, e ti patcixy yjagy'ajtin huidibi ca' ycıxıpy ytıgoyıpy nımına xıı. ¹⁹ Müd co tüg jäy capxycómıdodacy Dios, paady tüg'óciy jäy ti patcixy je pocy. Nañ müd co tügpi jäy capxymıdoy Dios, paady je mayjäy tudägy'ajtin ti patcixy huidibi mıbıjcpı Jesucristo.

²⁰ Co Dios moy jäy ajcxy yi' ycötujcin huidibi cojaayıp, chi nıgi jäy ajcxy nejhuııygıxy co ypocytungıxy. Je may'ajt oy'ajt huidibi Dios ytumyb, nıgi yi' y'oyıty, ca'ydı je mıjppocy huidibi jäy ajcxy ytungıxyp. ²¹ Tım jadu'n nej co jäy ypocytungıxy, huın'ıt ajcxy pocymıd chinaaygıxy, ixtı mabaad anajty y'óccıxy müd ypocxy ycıxpi. Nañ tım jadu'n co Dios may'ajt tuñ co yaj'ahuimbıty jäy ajcxy tudägy, huın'ıt Dios ane'my yi' ajcxy chinaayın müd tudägy huınma'ñ, etz nañ xymöhuaanım jagy'ajtin huidibi ca' ycıxıpy ytıgoyıpy nımına, co nmıjıpıdaacım ajt nHuındzin Jesucristo huidibi yjagy'ajtin yejc müd ajt nbocy ycıxpi.

O'cy müd yi pocy ycıxpi, jagy'aty müd Cristo ycıxpi

6

¹ ¿Nej n'ocmınaanım? ¿Tzoc ooy nıgi tundıgooyım jıgıx Dios nıgi may'ajt tunıpy müd İch ajt? ² Ca' jadu'n ytıy'ajtıty, ca' huaad njacpocytuunım. Co nmıbıjcm Jesucristo, chi jadu'n nıpaady nejıhuııy ti n'o'cim, e cham ca' n'ıjtım pocymıd. ³ ¿Nej ca' mnejhuııygıxy jada tıy'ajt? Co nnıbejtım müd Jesucristo yxıı, chi n'ıjtım müd Jesucristo. Jadu'n nıpaady nej jıhuııy ti n'o'cim quıpxy müd Cristo co yi' y'o'cy müd ajt nbocy ycıxpi. ⁴ Co İch ajt nnıbejtım jadu'n nıpaady nej jıhuııy ti n'o'cim, e ti nnaaxtıgııyım quıpxy müd Jesucristo. Dios Teedy müd ymıc'ajtin oybi yajıgıypıjcy Cristo co anajty ti y'ögy, chi Cristo paty jemybi jagy'ajtin, nañ jadu'n İch ajt ti

nbaatim jemybi jugy'ajtin quipxy mïid yi', paady copicy ndzinaayim mïid jemybi jot jemybi huinma'n.

⁵ Co nmïbijcim Jesucristo, chi n'ijtim mïid yi', co yi' ti y'ögy, jadu'n nipaady nej jihuïy ti n'o'cim quipxy mïid yi'. Co Jesucristo yjugypijcy mïid jemybi yjugy'ajtin, nañ jadu'n ïch ajt nbaatim jemybi jugy'ajtin quipxy mïid yi'. ⁶ Nejhuïyim ïch ajt nej anajty jibic-jot jibic-huinma'n nmïid'ajtim jayijp'aty ca'ni anajty nmïbijcim. Jadu'n nipaady nej jihuïy ajt njibicjot njibic-huinma'n ti y'ögy quipxy mïid Cristo co yi' y'o'cy cruudzéixy. Cristo ti y'ögy mïid ajt nbocy ycixpi, jigix jëbi n'ijxmajtzim pocytunï huinma'n, etz jigix jëbi je pocytunï ca' xyjac'ane'mim ajt njot nhuinma'n. ⁷ Com pinjaty ti y'ögy, yi' ypocytunï ca' ti mic'ajt jacmïidity ma yjot yhuinma'n. ⁸ Pen jadu'n nipaady nej jihuïy ti n'o'cim quipxy mïid Cristo, paady ndzinähuaanim njugy'adaanim quipxy mïid yi'. ⁹ Nejhuïyim co Cristo ti yjugypijcy co y'o'cy, e ca' yi' y'öga'n jadüg'oc. Yi' o'cin ca' ti mic'ajt jacmïidity ma Jesucristo. ¹⁰ Co Cristo ti y'o'cy mïid jäy ypocy ycixpi, chi y'ögy tüg tecypajc mïid nidüg'óciy jäy ajcxy ycixpi. Co Jesucristo yjugypijcy, chi tüg'óciy huidibi yi' ytumyb ma yi' chinaydac yjugy'ajttac, yi' ytumyb mïid Dios ycixpi. ¹¹ Nañ jadu'n miich ajcxy mhuinma'ñyidaaccix jadu'n nej jihuïy ti m'öccixy, e yi' ypocytunï ca' ti mic'ajt jacmïidity ma miich ajcxy mdzinaayin. E jadachambi xï tiempo tzinaaygix mïid Dios ycixpi quipxy mïid Jesucristo ïch ajt nHuindzin.

¹² Paady ycixpi ca' huaad xy'ane'mgixy je jibic-huinma'n huidibi ajcxy mninicx yjanijot'ajtpy. ¹³ Ca' huaad mgïyējccixy yi' mninicx ma pocytunï. Naygïyējcgix ma Dios, ixmajtcix yi' pocytunï. Jadu'n nipaady nej jihuïy ti m'öccixy, e ti mjugypijccixy jadüg'oc. Hue' janchtiy çiyējccix yi' mninicx ma Dios, jaydëbi mdzináaygixipy mïid ajcxy tudägy mjot mhuinma'n, e cuydungix Dios chojcïn. ¹⁴ Jadachambi xï tiempo ca' miich ajcxy mdzinaaygixy pocymïid, jadu'n nej jecy'ajty ajcxy mdzinaaygixy co anajty ajcxy mguydungixy Dios ycötujcïn je jecyip. Hue' janchtiy tzinaaygix mïid Dios ycixpi, com Dios mij may'ajt ti tuñ mïid miich ajcxy.

Tüg ijxpejt huidibi yajpatp ma n'ijtim yajtuñ

¹⁵ ¿Ti huaad nduunim? ¿Nej jëbi huaad njacpocytuunim? Com Dios mijmay'ajt ti tuñ co ti jöch ajt nbocy etz nxihuïn, e Dios ycötujcïn, je jecyip, ca' xyjacyajpocycähuim. Ca' huaad njacpocytuunim. ¹⁶ ¿Mnejhuïyb miich ajcxy jada tiy'ajt? Co ixypy pinjaty ñaygïyegyii co ytuna'n mïid tüg huindzin huidibi mic yajtumb, copicy co je tumbi capxymïdohuipy je yhuindzin. Nañ tim jadu'n nipaady mïid pocytunï. Pen mnaygïyējcip mïid pocytunï, huin'it anajty pocy xy'ane'my ma mdzinaayin, ixti mabaad anajty m'ögy mïid mbocy ycixpi. Co mnaygïyējcixipy ma Dios, huin'it ajcxy mgapxymïdohuipy Dios, e mdzinähuij ajcxy tudägy. ¹⁷ Jecy'ajty miich ajcxy anajty pocy xy'ane'mgixy, co jibic-huinma'n mdungixy. Nyajnaxpyich jäyğdaacin ma Dios co jadachambi tiempo ti mgöbijccixy cixy'ot huinijot Dios ytiy'ajt huidibi xyaj'ixpijccixp, e mgapxymïdoogixy Dios. ¹⁸ Cristo ti xyaj'a'oyi'yi ajcxy mjot mhuinma'n, ca'ydï mjactzinaaygixy pocymïid. Ti mhuinma'n mbidaaccixy co mgapxymïdohuaangixy Dios e mdzinähuaangixy tudägy. ¹⁹ (Ngapxhuijpyich miich ajcxy cham mïid naaxhuifñyây y'ayuc ytiy'ajt, com ca' yajxon mhuinjhuïygixy Dios y'ayuc ytiy'ajt.) Jadu'n nej jecy'ajty co ca' anajty nmïbijccixy Cristo, ooy anajty mnaygïyējcixy

xii ya ma jibic-huinma'ñ, e mdundi-gooygixy xii ya miiid mnin'icx. Ooy miich anajty ajcxy miiidity jibicpi ma mjoyt mhuinma'ñ, ooy anajty mdundi-gooygixy. Jadachambi xii tiempo naygiyéjigix ma Jesucristo, jigix jébi huaad mdungixy miiid tudágy jot tudágy huinma'ñ, etz jigix jébi huaad mdzinaaygixy miiid huádz jot huádz huinma'ñ.

²⁰ Co anajty yi jibic jot jibic-huinma'ñ xy'ane'mgixy, chi ca' je oyjot oyhuinma'ñ anajty xy'oc'ané'mgixni. ²¹ ¿Ti jotcuje'ajtin miich ajcxy ti mbaatcixy co jibic jot jibic-huinma'ñ mdungixy huídibi jadachambi tiempo mdzöydu'n'ajtip ajcxy? Yi jibic jot jibic-huinma'ñ xyyajnicxp ajcxy ma yi o'cin. ²² Jadachambi xii tiempo Dios ti yaj'oyíy nej jébi m'ixmájtzcixipy yi pocytuní, ca' huaad mjactzinaaygixy pocymiid. Ti m'ahuimbijtcixy Dios ytumbi, jadaayaabi tzinaayin xymóhuip ajcxy mjotcuje'ajtin. Tiydudágy cham tzinaaygix miiid Dios ycixpi, e mbaadip ajcxy jugy'ajtin huídibi ca' ycixipy ytigoyipy nimina. ²³ Yi pocytuní ycoju'ñ yi' je' yi o'cin. Per je huídibi Dios xyñimooyim, hue' je' je jugy'ajtin huídibi ni camínaxí ycixipy ytigoyipy co n'ijtim miiid ajt nHuindzin Jesucristo.

7

Tüg ijxpejt huídibi yajpatp ma picychinaayin

¹ Miich ajcxy miigügtijc huídibi ti m'ixpicy Dios ycötujcin huídibi Moisés yjaay, mnejhuíyib miich ajcxy co yi naaxhuiñyáy ycötujcin ymiiid mic'ajt ma ajt ndzinaayin, ixti mabaad anajty n'o'cim. ² Paady co tüg töxyjáy ycivilbicy miiid tüg yéydijc, ca' huaad ixmach ñáy mabaad china'y yjugy'aty. Co janchtiy anajty je töxyjáy ñiyéydijc ti y'öcni, huin'it anajty ca' ocmiiidñ ñáy y'ane'min. ³ Ooy anajty mij ytundigoy je töxyjáy co ypiigipy miiid huingbi yéydijc pen jugy'ajtni je ñáy. Cooni janchtiy anajty ñiyéydijc ti y'ögy, huin'itni janchtiy jébi ypicy miiid huingbi yéydijc, e ca'p je' anajty ytundigoy.

⁴ Miich ajcxy nmigügtijcich, judíojáy huídibi mibijcp Cristo, jayijp co anajty ca'ni mmibijccixy Cristo, je Dios ycötujcin huídibi Moisés yjaay xy'ane'mgixp anajty ma mdzinaayin. Jadachambi xii tiempo yi jadu'mbi cötujcin ca' yi xyjac'ané'mgixni. Jadachambi Cristo ytiy'ajt xy'ane'mgixp, je Cristo huídibi Dios yajjugypijc jadüg'oc co y'o'cy. Jadu'n miich ajcxy nipaady nej je töxyjáy huídibi ñiyéydijc ti y'ögy, e ti ypijctigach. Cristo miich ajcxy xyñigohuajc'ajtp, jigix jébi mdzinaaygixy miiid Dios ycixpi. ⁵ Jayijp ca'ni anajty nmibijcim Jesucristo ooy anajty nguyduunim huídibi ajt nnin'icx ñijot'ajt. Je huin'it tiempo anajty je jibic-huinma'ñ xy'ane'mim ma ajt ndzinaayin. Je' je' je jibic-huinma'ñ huídibi Dios xycapx'adujcim miiid ycötujcin. Miiid co jibic-huinma'ñ xy'ane'mim anajty ajt ma ndzinaayin etz xyajnicxaanim anajty ma yi o'cin. ⁶ Jadachambi xii tiempo Dios ycötujcin huídibi Moisés xymooyim, ca' ti mic'ajt miiidity ma iich ajt, ti n'ixmajtzim. Jadu'n nipaady nejihuíy ti n'o'cim, e njugypijcim jadüg'oc. Paady nguyduunim je jemybi tiy'ajt huídibi je Espíritu Santo xyajnejhuíyim. Canan je' anajty nguyduunim je jecy'ajtpy cötujcin.

Je pocy huídibi ijtp ma iich

⁷ ¿Nej n'ocmínaanim? ¿Nej janch co je cötujcin huídibi Moisés xymooyim xyajpocytuunim anajty? Ca' yjadu'nity. Co ixypiy ca' anajty nmiiididyich Moisés ycötujcin, ca' ixypiy iich ti nnejhuíyich co ti

ndundigooyich ma Dios yti'ajt. Co ixypy anajty ca' n'ocnejhuüyich Moisés ycötujcin ma jadu'n ymāñ: "Ca' mmigüg ni ti m'adzojczy." Ti ixypy ndundigooyich, e ca' ixypy nejhuüyich ma ti ndundigooyich. ⁸ Mūd co ïch jecy'ajty ooy anajty nnijot'atyich pocytoni, paady ycixpi ïch anajty ooy ndundigooyich. E jadu'n anajty nigi ooy n'adzocyich, e jaminam anajty Dios ycötujcin co ca' migüg ni ti m'adzojczy. Co ixypy Dios ca' jadu'n cötujcin ti pidägy, ni ca' ixypy njihui'ñybicyich co ndundigooyich. ⁹ Jayjy co ca'ni anajty nhuinjihuüyich Dios ycötujcin, huin'it tiempo ca' anajty njihui'ñybicyich nbocy. E co nbatyich Dios ycötujcin, chi njihui'nybjicyich nbocy, e nañ ti nejhuüyich co tigoyaamich njugy'ajtin. ¹⁰ Dios ypidac ycötujcin jaydēbi nbāadibich jugy'ajtin huidibi ca' ycixpy ytigoyipy. Per ca' jadu'n ti oyiy mūd ïch. Yi cötujcin ti xya-jpocycāyich anajty, e jadu'n tigoyaambich anajty njugy'ajtin. ¹¹ Jadu'n anajty huinma'ñ nmūdidyich co nguydundāhuaamybich Dios ycötujcin huidibi Moisés yjayhuim. Pero com ca' njatyich nej nguydundāhuibyich, chi nbocycāyich ma Dios. Je pocytoni ti xyhuin'ñich, e mūd je' ycixpi nbadaamybich anajty yi o'cin.

¹² Tüg'óciy Dios yley etz Dios ycötujcin huidibi cojay ijtp, huadz yi', tudägy yi', ooy yi'. ¹³ ¿Nej tigoyaambich anajty njugy'ajtin mūd co anajty nmi'ityich Dios oybi cötujcin? Ca' yjadu'nity. ¿Nej je Dios ycötujcin je oybi ti huimbizimy jibic mūd ïch co xyajtigoyaanich anajty njugy'ajtin? Ca' yjadu'nity. Nicxpich anajty ma yi o'cin mūd nbocycāyich ycixpi. Je Dios ycötujcin xyajnejhuüyich co o'cin nbadaamybich mūd nbocycāyich ycixpi. Jadu'n Dios pidacy ycötujcin ya naaxhuiñ, jigix jēbi jāy ajcxy nejhuihuipy co mij ajcxy ooy tundigooy mūd Dios.

¹⁴ Nejhuüyim co yi Dios ycötujcin huidibi Moisés xymooyim, jiiby yi' choon ma Dios, paady yi' ooy y'oyity. ïch nninix yi' je' huidibi nijot'ajtp yi' pocytoni, paady ndzināyich pocyñid. ¹⁵ Ca' nhuinjihuüyich huidibi ndumybich. Yi oybi huidibi njatunaamybich, ca' njatyich nej ndunipyich. Yi jibicpi huidibi ca' y'oychojcnity, yi' ndumybich. ¹⁶ Co nduñich huidibi ca' ndzocyich, jadu'n niquēxigy co Dios ycötujcin ooy oy yi', tudägy yi'. ¹⁷ Canan jotcujc ïch jadu'n co nbocytuñich. Yi pocy'adzojcin huidibi nmūdich ma njot nhuinma'ñ, yi' yi' xyajtundigooybich. ¹⁸ Nejhuüyibich co ca' ti oybi yajpaady ma ïch nninix. Ooy njatzocyich co oybi njatuna'ñich, per ca' njatyich nej oybi ndunipyich. ¹⁹ Je oybi huidibi njatunaamybich, ca' njaty nej ndunipyich. Je jibicpi huidibi ca' ndzocyich, je' ndumybich. ²⁰ Co yi' nduñich huidibi ca' ndzocyich, yi' je' je pocytoni huidijaty njot'ajtibich nhuinma'ñ'ajtibich, yi' xyajtundigooybich.

²¹ Nbaatypich tüg tiy'ajt, co njatunaamybich oyhuinma'ñ, jiipy jibicpi nbaadyich ma njot nhuinma'ñich. ²² Jotjoty huinma'ñjoty ooy nmixondägyich Dios ycötujcin. ²³ E nañ mūdich jotjoty huinma'ñjoty yi' jibicpi huidibi mi'ijxtinaayb je oybi. Yi tundigoyi yajpatp ma ïch nninix. Yi nninixich yajpatp pocyñid.

²⁴ Paady ca' njotcūjcygyich. ¿Pāñ jēbi xyñihua'ñich xyajñidzögibich ma jadaaab nninixich huidibi xyajnicxpich ma yi o'cin? ²⁵ Dioscojuyip nya-jnajxypich ma Dios co Dios, mūd ajt nHuindzin Jesucristo, xyñihuaanīm ma jada jibicpi huidibi ajt nninix xyñi'jot'ajtim. Paady mūd n'oyjot n'oyhuinma'ñ nguyduñich Dios ycötujcin. Mūd nninixich nijot'atyich pocytoni.

8

Je jugy'ajt mïid je Dios yjihui'ñ ymic'ajt ycixpi

¹ Jadachambi tiempo janchtiy Dios ca' tzaachytuna'ñ yí jäy ajcxy huidijaty tú'ciy ijtp mïid Cristo Jesús, huidibi ajcxy cuydumb Espíritu Santo chojcín, e ca' ajcxy tungixy nej je ninícx nijot'ajtcixy. ² Je Espíritu Santo ti xyyajpidzimim ma yí pocytuníi etz ma yí o'cin huidibi yí jecy'ajty cötujcín ti xymooyim. Je Espíritu Santo xyajtzinaayim huinixíi, ñich ajt huidibi ijtp tú'ciy mïid Jesucristo. ³ Mïid co ñich ajt ooy ninícx ñijot'aty jibicpi, paady Dios xymooyim ycötujcín jecy'ajty jaybety. Per je naaxhuiñyjäy yajtigoy ajcxy je cötujcín ymajaa, e ca' ymadacy nicxy xyajtzinaayim mïid tudägy jot huinma'ñ. Paady Dios yquejxy yci'm'ung huidi ti chinäy ya naaxhuiñ mïid ñinícx jadu'n nej ñich ajt nmüidity nninícx, jigix jëbi ndzinaayim mïid huädz jot huinma'ñ. Jadu'n Dios y'ung chinay mïid ñinícx, per ca' ni ti bocy anajty mïidity. E yí ti y'ögy mïid ajt nbocy ycixpi, e jadu'n yajtigoy je pocy huidibi ajt nigix'ajtim. ⁴ Jadu'n Dios ytuuñ jigix jëbi xyajtzinaayim mïid tudägyjot tudägyhuinma'ñ jadu'n nej yí ycötujcín y'ane'my. Mïid co nmïid'ajtim Dios yjihui'ñ ymic'ajt ma ajt njot nhuinma'ñ, paady jëbi huaad ndzinaayim mïid tudägy-jot tudägyhuinma'ñ.

⁵ Yí jäy ajcxy huidibi ca' mïidity Dios yjihui'ñ ymic'ajt ma yjot yhuinma'ñ, hue' ajcxy ycapxymidooyb je jibicpi huidibi ajcxy ñinícx ñijot'ajtpy. Yí jäy ajcxy huidibi tzinaayb mïid Dios yjihui'n ymic'ajt ma yjot yhuinma'ñ, hue' ajcxy ycapxymidooyb je Espíritu Santo. ⁶ Yí jäy ajcxy huidibi capxymidoob je jibicpi huidibi ajcxy ñinícx ñijot'ajtpy, hue' ajcxy ypadaangixyp o'cin. Yí jäy ajcxy huidibi capxymidoob je Espíritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcujc'ajtin. ⁷ Yí jäy ajcxy huidibi capxymidoob je jibicpi huidibi ajcxy ñinícx ñijot'ajtpy, hue' ajcxy Dios ymidzip'ajtpy, ca' capxymidohuaangixy Dios ycötujcín. Ni ca' jajtcixy nej ajcxy capxymidogixipy Dios ycötujcín. ⁸ Ca' Dios jäygidägy yí ajcxy chinaayin huidibi ajcxy capxymidoob je jibicpi huidibi ajcxy ñinícx ñijot'ajtpy.

⁹ Per miich ajcxy ca' mgapxymidoogixy je jibicpi huidibi mninícx nijot'ajtpy. Com miich ajcxy mmïid Dios yjihui'ñ ymic'ajt ma mjot mhuinma'ñ, e mguydungixpy je Espíritu Santo chojcín. Huenpinity huidibi ca' mïidity Cristo yjihui'ñ ymic'ajt ma yjot yhuinma'ñ, ca' yí y'ity mïid Cristo. ¹⁰ Pen miich ajcxy ijtp mïid Cristo, yí mjogy'ajtin ajcxy ca' ycixipy ytigoyipy nimina, mïid co Cristo ti xyaj'ahuimbijtcixy tudägy ma Dios yhuinduu. Yí mnaaxnícx cixamb tigoyamb yí. ¹¹ Pen ijtp ma miich ajcxy mjot mhuinma'ñ je yjihui'ñ ymic'ajt je huidibi yajjugypjic jadüg'oc je Cristo co y'o'cy. Nañ jadu'n miich ajcxy Dios xyajjugypigaangixy jadüg'oc, co anajty ti m'öccixy, mïid yí yjihui'ñ ymic'ajt huidi yajpaatp ma miich ajcxy mjot mhuinma'ñ.

¹² Mïid co nmïid'ajtim Dios yjihui'ñ ymic'ajt paady ycixpi, miich ajcxy migügtijc, copicy ngapxymidoohuim je Espíritu Santo, e ca' huaad ngapxymidoohuim je jibicpi huidibi ajt nninícx ñijot'ajtpy. ¹³ Pen ooy ajcxy xytim'y'ane'mgixy je jibicpi huidibi ajcxy mninícx ñijot'ajtpy, co m'öccixipy, yí mjogy'ajtin cixip tigoyip yí. Per pen mïid Dios yjihui'ñ ymic'ajt miich ajcxy myajtigoy je jibicpi huidibi mninícx ñijot'ajtpy, co m'öccixipy, yí mjogy'ajtin ajcxy ca' yí ycixipy ytigoyipy.

14 Tüg'óciy pínjaty ajcxy capxymidoob je Espíritu Santo, Dios yí' ung'ajtip ajcxy. 15 Je Espíritu Santo huídibi miich ajcxy xy'adigüygixp xyjottigüygixp, ca' xychaachtungixy e nañ ni ca' mdzinähuaangixy müid tzigí'ñ jihui'ñ. Ca' miich ajcxy jadu'n paady nej tumbidijc huídibi ooy tzigüygixy yhuindzin. Co je Espíritu Santo yajpaady ma ajcxy njot mhuinma'ñ, jadu'n nipaady nejihuüy miich ajcxy Dios xy'ung'adyi. E com nmüid'ajtim Dios yjihui'ñ ymic'ajt, je' jadu'n xyajminaanim: "¡Dios Teedy!" 16 Je Espíritu Santo tiy'ajt yejcp ma ajt njot mhuinma'ñ, je' jadu'n xyajminaanim co Dios xy'ung'ajtim. 17 Pen ñch ajt Dios xy'ung'ajtim, chi nbadaanim it lugar quipxyi müid Cristo jüby tzajpjoty ma Dios yajpaady. Pen nminajxim nyajnajxim tzaachypi jadu'n nej Cristo minajxy yajnajxy tzaachypi, chi nbadaanim Dios y'oy'ajtin quipxyi müid Cristo.

18 N'a'ixüybich co yi tzaachypi yi ayo'n huídibi nminajxim nyajnajxim ya naaxhuiñ, ca' yí' ytim ytiijity, ca' ninej yquipxyjatytiy je oy'ajtin etz mijjotcujc'ajtin huídibi Dios xyaj'ixaanim je huin'it xü co Cristo anajty ymiñ jadüg'oc. 19 Tüg'óciy tijaty ya naaxhuiñ huídibi Dios ti yajcojy yaj'oyüy, y'aa'ixpxy yjüj'ixpxy ajcxy mina Dios ymöhuaanigixy y'oy'ajtin ymiñ'ajtin yi jäy ajcxy huídibi ajcxy Dios ung'ajtip. 20 Tüg'óciy tijaty Dios ti yajcojy yaj'oyüy ya naaxhuiñ, hue' je' yjugy'ajtin cixamb tigoyamb, ögam tidzam. E canan ci'm jadu'n tzocy, hue' je' Dios jadu'n ti yajnidügüy. Per ca' yjugy'ajtin ycixipy ytigoyipy tu'ciyi hue' ajcxy y'aa'ixpxy yjüj'ixpxy co padaangixy oy'ajtin jadüg'oc. 21 Co anajty Dios yaj'oyüy nej jébi ajcxy chinaaygixy, e ca' y'öccixipy, ca' ytiitzcixipy, etz ca' ypügixipy, chi ajcxy padaangixy oy'ajtin etz jotcujc'ajtin quipxyi müid je jäy ajcxy huídibi Dios ung'ajtip. 22 Com nejhuüyim co ixti chambaad tüg'óciy huídijaty Dios yajcojy yaj'oyüy ya naaxhuiñ yjihüyb tzaachypi, e ca' yjotcujc'ajtcixy. Tim jadu'n nipaady nej tüg töxyjäy paady tzaachypi co yhuaad'ajtni mina y'ung yajma'xung'ada'ñ. 23 Canan yi naaxhuiñybi huídidi Dios yaj'oyüy yi'yi tzaachypi jihüyb, nañ jadu'n ñch ajt huídijaty müid'ajtp Dios yjihui'ñ ymic'ajt, huídibi Dios xymooyim jayjip'aty ca'ni anajty nyajtigajtzim nninücx. Nañ ñch ajt tajim mayim njüyim nyaaxim ixti cooni anajty Dios xyajtigadzaanim ajt nninücx etz xycöbiganim ma yi' y'it jüby tzajpjoty, e xymüid'idaanim ajt jadu'n nej yci'm'ung. 24 Müid co n'aa'ixxim njüj'ixxim co Dios xyajnidzögaanim ajt n'alma, paady ti nbaatim jugy'ajtin huídibi ca' ycixipy ytigoyipy. Co ixypy ti nbaatim huídibi anajty njüj'ixxim, ca' ixypy njacjüj'ixxim co nbadaanimni. Com ca' pin jacjüj'ixxni co padaanip je huídibi ti ocpatpi. 25 Per co njüj'ixxim co nbadaanim huídibi ca' nmüid'ajtim, huin'it n'ahuixxim müid mecxtujcin cooni nbaatim.

26 Tim jadu'n nej jotcujc'ajtin nbadaanim co njüj'ixxim huídibi Dios xymöhuaanim, nañ tim jadu'n je Espíritu Santo xypubejtim xy-pudigüyim co njotmetzcüyim, com ca' njajtim nej jébi huaad Dios nmibijctzoohuim nej ypadyi. Paady je Espíritu Santo xycodinaayim ma Dios, ymibijctzooyb je Dios mictägy müid ñch ajt ycixpi müid jüyin yaaxin, huídidi ca' huaad yajcapxpizimy müid müydacin. 27 Dios ñejhuüyb ti jot ti huinma'ñ jäy ajcxy ymüid. E Dios nañ huinjihuüyb tüg'óciy ayuc huídibi je Espíritu Santo yajnajxyp ma yi'. Je Espíritu Santo ypijctzooyb may'ajt jabom jabom ma Dios müid tüg'óciy je mibijcpidijc ycixpi. Nañ jadu'n pijctzoy jadu'n nej Dios tzocy jäygidägy.

Mij madaacin ma mibijcin

²⁸ Yi jäy ajcxy huídibi mijpidacp Dios, huídibi ajcxy Dios ti huin'ixy, jébi chinaaygixy jadu'n nej Dios jäygidägy ajcxy chinaayin. Nejhuüiyim co huentitüijity huídibi yi' ajcxy yminajxpy yajnaxpy, pen jibicpi o pen oybi, Dios jadu'n ti a'ixiy co huen minajxcixy yajnaxcixy müd yi' ajcxy y'oy'ajtin ycixpi. ²⁹ Je' yi' ajcxy huídibi Dios ti yhuin'ixyüi, je' yi' ajcxy huídibi Dios ñejhuüiy jayijpni co ymibiga'ñyüi y'ayuc. Dios jadu'n tumb ma yi' ajcxy yjot yhuinma'ñ jaydëbi yquipxyjatyty ajcxy yjot yhuinma'ñ müd Dios y'ung, jadu'n nej yi' yjot yhuinma'ñ müdity. ³⁰ Yi mayjäy huídibi Dios yajniögödugüiy ca'ni anajty naaxhuiñybi chondacy co ytuna'ñ müd yi', yi' ajcxy Dios huin'ijxi. Yi mayjäy huídibi Dios ti yhuin'ijxigixy, nañ Dios yi' ajcxy yaj'ahuimbijtip tudägy. E yi' mayjäy huídibi Dios ti yaj'ahuimbity tudägy, nañ Dios yi' yajquipxyjatytihuaanip ajcxy y'oy'ajtin müd yi' y'ung y'oy'ajtin.

³¹ ¿Ti jada' njacjijp'ijxim ti jada' njactzojcm? Ca' ni ti. Pen Dios ñich ajt xypubejtim xypudigüiyim, ¿pin ñich ajt jébi xymimadaacim? Janch ni ca pin. ³² Dios ixti yci'm'ung ti yecy müd ñich ajt ycixpi, co oy y'o'cy müd ñich ajt ycixpi, co oy y'o'cy ma yi' cruudz müd nidüg'óciy ajt nbocy ycixpi. Paady janch janch co Dios xymöhuaanim tüg'óciy oybi quipxyjaty müd yi' y'ung, Jesucristo. ³³ ¿Pin jada' jébi ocxiy je jäy ajcxy huídibi Dios ti huin'ixy? Ca' ni pin. Com Dios ci'm yi' ti yaj'ahuimbijttäy tudägy. ³⁴ ¿Pin yi' ajcxy jébi ocyajpocycäy? Ca' ni pin. Com Cristo o'c je' müd ajt nbocy ycixpi, etz yjugypijcy jadüg'oc, e jadachambi xü tiempo yajpaady a'oy'amy ma Dios ymijc, e yi' ane'mdaayb tüg'óciy. E Cristo ñich ajt xyñibijctzohüiyim, ypijctzooyb may'ajt ma Dios müd ñich ajt ycixpi. ³⁵ Com Cristo ooy xychojcm xyjihüiyim, paady ni nej ca' xy'ixmadzaanim. Huen ti ndimpaatim ca' xy'ixmadzaanim. Oy ixypy tzaachypi ayo'n nminajxim nyajnaxim, oy ixypy tajin mayin nbaatim; oy ixypy jäy xy'ixhuídijtim xypahuídijtim; oy ixypy yuu ayo'n nbaatim; oy ixypy huit tucxy nyajmayjajtim; oy ixypy tzigüñ nyajnaxim; oy ixypy jäy xytimyyaj'o'cim. Oy ti ayo'n ndimbaatim, Cristo ca' xy'ixmadzaanim. ³⁶ Com jadu'n ymiñ jaybety ma Dios ñecy ma jadu'n yminañ:

Müd müch, Huindzin Dios ycixpi, je nmidzipich xyjatytimyyaj'ögaambich xim tzuum. Jadu'n ñich ajcxy nej cöbixy huídibi yajnicxip ma yaj'öctac co yaj'öga'ñyüi.

³⁷ Ca' ti ayo'n nbadaanim. Nmimadactähuaanim tüg'óciy ayo'n, müd co Cristo xychojcm xyjihüiyim. ³⁸⁻³⁹ Janch nejhuüybich tiydudägy co Dios xychojcm xyjihüiyim. Ca' ji ni pin jébi huaad xypijc-huäcxim ma Dios chójcin, oy ixypy nja'o'cim; oy ixypy njajugy'ajtim; oy ixypy xymidzip'ajtim ángel ajcxy etz jacjadyüi huídibi mic'ajt müd jilby tza-jpoty. Ca' ajcxy jébi huaad xypijc-huäcxim ma Dios, ni ti huídibi ji ijtp cham, ni je huídibi mimb cidacp, ni yi' jébi xycapijc-huäcxim ma Dios chojcin. Ajt nHuindzin Jesucristo ti xyajnejhuüiyim jadu'n nej Dios xchojcm xyjihüiyim co y'o'cy ma yi' cruudz müd ajt nbocy ycixpi.

9

Dios ti huin'ixy yi Israel jäy ajcxy

¹⁻² Nmüdich je Cristo ytiy'ajt, nyajnijayüybich müch ajcxy yi' ytiy'ajt, ca' n'indägyich, co ooy ndajy nmayich müd n'amigügtijcch ycixpi je Israel jäy co ajcxy ca' cöbiga'ñ je Cristo. Nañ Dios yjihui'ñ, je Espíritu Santo, tiy'ajt

yejcp ma ñich njot nhuinma'ñ co jadu'n tajin mayin njihuïyich miid yi' ajcxy ycixpi. ³ Com tajy may nayjihuiyijich miid ñich n'amigügtijc, ñich nmigogajp, ixti njaccodinähuaamybich ajcxy ma Dios miid ypocy ycixpi, ixti jébi ixypy Cristo nja'ixmachich miid yi' ajcxy ycixpi, ixti jébi ixypy Dios xychaachytuñich miid yi' ajcxy ypocy ycixpi, co ixypy jébi Dios pocyhuinmecxy ajcxy. ⁴ Com hue' je' ajcxy Israel y'ap'ajtip y'oc'ajtip, Israel jäy ajcxy. Hue' anajty ajcxy Dios ti ycöbigyii jadu'n nej jihuiy yci'm'ung, Dios anajty ajcxy ti ñi'ijxcidägyii, y'ijx ajcxy Dios y'oy'ajtin. Dios nimay ajcxy co ycuend'adip. Dios ajcxy jadu'n yajni'ixiyi nidüg'óciy tiy'ajt nej ajcxy jébi huaad Dios huindzigiý, e Dios yajhuinhuaniiy Israel jäy ajcxy je Cristo. ⁵ Nañ hue' ajcxy ymij'ap'ajtip ymijteedy'ajtip ñich ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, yi' tüg'óciy ane'mdaayb jüby tzajpjoty etz ya naaxhuiñ. Je Cristo capxpaady y'idipy huinixii.

⁶ Co jadu'n mina'ñich co may ajcxy Israel jäy ca' ajcxy Dios yjäy'adyii tiydudägyi, ca' jadu'n mina'na'ñich co Dios ca' cuyduñ yi' y'ayuc huidibi yajhuinhuaniiy Abraham etz Moisés. ⁷ Canan nidüg'óciy Abraham y'ap y'oc pada'ñ je oy'ajt huidibi yajhuinhuaniiy Abraham, com jadu'n yjaybetyity ma Dios ñecy. Dios jadu'n nimay Abraham: “Yi mmang, Isaac, ti nhuin'ixyich jébi y'ap y'oc paady je oy'ajt huidibi ti nyajhuinhuaniiy.” ⁸ Co Dios jadu'n nimay Abraham, paady ycixpi nejhuüyim co ca' nidüg'óciy Abraham y'ap y'oc jébi naydijyii Dios y'ung. Jéyi Isaac y'ap y'oc jébi ñaydijyii Dios y'ung com Dios yajhuinhuaniiy co may'ajt tuna'ñ miid yi' ajcxy. ⁹ Com jadu'n yjaybetyity ma Dios ñecy co Dios nimay Abraham: “Nihuibidaamybich ma je tiempo huidibi ti n'agapxtucyich, e huin'it mdöxyijc Sara y'ungbaadip.”

¹⁰ Ji jadüg tiy'ajt. ñich ajt nmij'ap Isaac ytöxyijc Rebeca metz ymang paty. ¹¹ Dios yhuin'ijx je jacmutzpi ca'ni anajty yma'xung'aty, e ca'ni anajty ñiguëxigy ti huinma'ñ ymiid, oyhuinma'ñ o jibic-huinma'ñ. Dios ninigoob anajty jayjipni ti huin'ixy je jacmutzpi. ¹² Com Dios ñimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³ Tim jadu'n nej jaybetyity ymiñ ma Dios ñecy, Dios jadu'n minañ: “Jac nigí ti ndzocyich Jacob, ca'ydi Esaú.”

¹⁴ ¿Nej n'ocminaanim? ¿Dios ca' tüybi tuñyi? Ca' yjadu'nity. Dios tiydudägy ytuñ. ¹⁵ Com jadu'n Dios nimay Moisés: “Nba'ayohuiipyich ninigoobi pinjaty ndzojcpyich.” ¹⁶ Co Dios jadu'n nimay Moisés paady nejhuüyim co canan paady ycixpi Dios pa'ayohua'ñ jay miid co ajcxy chachñaymija'ijxigixy co tunaangixy oyhuinma'ñ. Hue' je' Dios pa'ayo'n tuñ miid jäy ajcxy ninigoob co jadu'n tzocy. ¹⁷ Com jadu'n jaybetyity ymiñ ma Dios ñecy co Dios jadu'n nimay je Egipto rey:

ñich miich ti nmöy m'ane'min, jigix jébi jäy ajcxy ixipy je mij ayo'n huidibi ndunaamybich ma miich mnaax mgajp, huin'it jäy ajcxy capxpaady xyaj'idipy huindu'ñybi ñaaxhuiñ.

¹⁸ Dios ypa'ayooyb je' pinjaty chojcpy, e nañ jadu'n yjot yajjuuni pin jadu'n yajmidzojcpy.

¹⁹ Huin'it miich ajcxy xyñimähuiibich: “Peni janch yjadu'nity, ¿ti co Dios jadu'n jadüg'oc pocy'ixy jäy? ¿Pin jada' occapxhuimbidi nej yi' tzocy?” ²⁰ Miich jäy, ¿mbin miich co ti myajcapxycoja'ñ myaj'ayuccoja'ñ miid Dios? ¿Nej jébi pochytüdz nimäy je pin anajty ti yajcojyii? “¿Nej co jadu'n ti xyajcojyich?” ²¹ Tüdzyajcojpi yi' yaj'oyiib je mo'ntz nej tim tzocy.

Pen yajcojamyb tüz oybi tzoopatyi, yajcojpy je'. Peni yajcojamyb tüz huidibi ca' oyjatyity, yajcojpy je'.

²²⁻²⁴ Tim jadu'n nej je tüz yajcojpi yaj'oyiïy mo'ntz nej tzocy, nañ jadu'n Dios tuñ müd jäy nej tzocy. Dios ti yajcoj jäy, e müd ymic'ajt jëb tzaachytuñ müd ypocy ycixpi. E co jadu'n tzaachytunipy, chi ñiguëxigipy yi' ymic'ajt. Dios ooy jecy ti jamimecxtucy ajcxy huidibi paatip co Dios chaachytunïyb ajcxy. Com Dios ti yajcoj jäy paady jëb nañ jadu'n pa'ayoohuipy etz may'ajt tunipy müd yi' ajcxy, jëbi ajcxy paadip yi' y'oy'ajtin. Dios iich ajt ti xyhuin'ijxim nijëjity judíojäy, etz nijëjity huidibi ca' yjudíojäyity, jëbi ajt n'alma nidzoocin paady. ²⁵ Com jadu'n jaybety ymiñ ma Oseas ñecy ma Dios jadu'n yminañ:

Yi jäy ajcxy huidibi iich ca' anajty njäy'adyii, njäy'adäänibich cham. Yi jäy huidibi ca' anajty ndzocyich, ndzogäänibich cham.

²⁶ E nañ jadu'n jadüg'it Oseas cojay: "E je jäy ajcxy huidibi anajty tzinaayb ma canaag naax cajp huidibi anajty ca' Dios yjäy'adyii, jëb ñaydiyii Dios yjäy, je Dios huidibi huinixii tzinaayb."

²⁷ Nañ jotmay müd co Isaías jada tiy'ajt ycojay ma ñecy ma jadu'n yminañ: "Oy ixipy ajcxy ti yjamayïy jadu'n nej tzaa'ung yajpaady ma meyy ypa', nihueeñ ajcxy y'alma ñidzoocin padañ. ²⁸ Com Dios mic ooy cötujcin müdity, e ca' mimecxtugipy jäy ajcxy ypocytunï huinixii. E mic'amy tzaachypi möhuañ naaxhuinjäy müd ypocy ycixpi co anajty xii tiempo paatni mabaad agapxtujcy." ²⁹ Isaías ñajtzcapxiiy jadu'n jecy'ajty:

Pen ca' ixipy je Huindzin Dios huidibi ane'mdaayb jii by tzajpjoty etz ya naaxhuiñ, capubejty yi' Israel jäy, co ca' ycajacyajtzooci nijëjity ajcxy, ycacödigojday yi' ajcxy, tim jadu'n nej je jäy ajcxy yjajty jim ma Sodomo cajp etz Gomorra cajp, cödigojday ajcxy.

Yi judíojäy ajcxy etz Jesucristo y'ayuc ytiy'ajt

³⁰ Jadu'n jëbi mhujnjihuygixy huidibi ti nyajnijayïygixy jadu'n nej Dios ytun müd jäy ajcxy. Yi jäy ajcxy huidibi ca' yjudíojäyity, huidibi ca' cuyduñ Dios ycötujcin je jecyïp, co ajcxy mijpidägy je Cristo, chi ajcxy paady tudägy'ajtin ma Dios. ³¹ Per yi judíojäy ajcxy huidibi jijp'ijxp co tudägy'ajtin padaangixy müd co tzachcuydungixy Dios ycötujcin je jecyïp, ni ca' ajcxy mimadägy cuydundähuipy, e ca' ajcxy tudägy'ajtin paady ma Dios. ³² ¿Na'amy co ca' ajcxy mimadägy cuydundäy Dios cötujcin? Je' co ajcxy ca' mijpidägy huidibi Dios ti tuñ müd yi' ajcxy ycixpi. Hue' ajcxy tijy co tudägy'ajtin padaangixy ma Dios müd co tzachcuydungixy Dios ycötujcin je jecyïp. Hue' ajcxy ayo'n ypadamyb co ca' Cristo cöbijccixy, tim jadu'n nej jäy ayo'n paady co ycönepy ma tüg tzaa. ³³ Com jadu'n jaybety ymiñ ma Dios ñecy, ma Dios jadu'n yminañ:

Nguexaamybich jim Jerusalén tüg jäy. Mayjäy ca' mijpidägañ je jäy, e ayo'n ajcxy ypadamyb ma iich. Tim jadu'n nej ixipy ti nbidägyich tüg tzaa ma jäy ajcxy huaad ycönejpcixy, e chi yciday ajcxy. Tüg'öciy jäy pinjaty mijpidaacp je jäy huidibi nbidägaamybich jim Jerusalén, hue' ajcxy yi' ca' ayo'n padañ ma iich, nbocyhuinmecx-aamybich yi' ajcxy.

10

¹ Miich ajcxy nmigügtijcich, ooy ndzocyich cixyjt huinjot co yi' Israel jäy nidüg'öciy padañ y'alma ñidzoocin. Ooy iich niği Dios nmibijctzoy müd yi' ajcxy ycixpi. ² Jëbi ndiy'ajt yecyich co yi' Israel jäy ooy ajcxy

Dios jayajmij'ajtcixy. Hue' janchtiy ca' ajcxy huinjihuüyi Dios ytiy'ajt. ³ Com nejhuiyby ajcxy co Dios yajpocyñihuädzamyb jäy ajcxy, hue' ajcxy ca' huinjihuüy nej Dios yhuinma'ñ müidity. Ci'm anajty chachhuinma'ñ ixtaaygixy nej ajcxy jëbi ñayyajpocyñihuädzigixipy. Ca' anajty ajcxy cöbicy Dios ytiy'ajt nej jëbi huaad ñayyajpocyñihuädziyb.

⁴⁻⁵ Yi judíojäy ajcxy ca' huinjihuüygixy co je Cristo y'oy ya naaxhuiñ, e chi yajtigooyi Dios ycötujcin ymic'ajt huidibi Moisés yjay, jigix jëbi tüg'óciy jäy pinjaty mijpidacp Cristo ytiy'ajt, huin'it ajcxy paadip tudägy'ajtin. Moisés yjayhui'm ma jadu'n ymïna'ñ: "Je pinjaty cuydumb je Dios ytiy'ajt, jim mic'ajt paadipy müid chinaayin ycixpi." ⁶⁻⁷ Per yi jäy ajcxy huidibi mijpidaacp Cristo etz cuyduni yi' ytiy'ajt, yi' ajcxy ymïna'ñ: "Ca' huaad judíojäy ajcxy ymïnaangixy jotjoty huinma'ñjoty: ¿Pin ocpättigihuij tzajpjoty nicx je Cristo yajtzoñ? o ¿Pin nicxamb ca'oydactuuby ma ajcxy öcpidijc y'ity e yajjugypigaanip je Cristo?" ⁸ ¿Nej Dios y'ayuc ymïna'ñ? Jadu'n Dios y'ayuc ymïna'ñ: "Ti mmïdoy müich ajcxy Dios y'ayuc ytiy'ajt ma mgi'm'ayuc, ti jäy ajcxy capxhuäcxy ma müich, ti mmïdo'mbijccixy." Pues jada je' je y'ayuc tiy'ajt nej jëb mijpidaaccixy Cristo, huidibi tiy'ajt iich ajcxy ngapxhuäcxp. ⁹ Pen müich mgapxypidzimyb mayjäy agujc co müich ajcxy Jesús mHuindzin'adyii, etz mmïbijcipy ajcxy ma mjot mhuinma'ñ co Dios ti yajjugypijcy Jesús co y'o'cy, huin'it m'alma paadip ñidzoocin ma Dios. ¹⁰ Co mmïpidägipy Jesús cixyoty huinjot huin'it Dios xyajpocyñihuädziy. Co mgapxypidzimipy mayjäy agujc co müich mijpidägy Cristo Jesús, huin'it yi' m'alma ñidzoocin pada'ñ.

¹¹ Com jaybety jadu'n müiñ ma Dios ñecy, ma jadu'n ymïna'ñ: "Nidüg'óciy jäy huidijaty mijpidacp je Cristo, ca' ajcxy ayo'n pada'ñ ma Dios." ¹² Jëbi nidüg'óciy jäy mijpidägy je Cristo Jesús com Dios tú'ciy yajhuinhuaniy pocyñihuaatzin ma yi judíojäy etz ma huidi ca' yjudíojäyity. Ji tüg Huindzin je Jesucristo huidibi niHuindzin'ajttaayb. Jesucristo may'ajt oy'ajt tunam mijcajee müid huentimpinjäyity pinjaty pijczoob pubejtin ma Dios müid yi' yxii. ¹³ Com jadu'n jaybety ymüiñ ma Dios ñecy, ma jadu'n ymïna'ñ: "Nidüg'óciy jäy pinjaty Dios mübijctzoob müid Huindzin Jesucristo yxii, yi' ajcxy y'alma paadip ñidzoocin." ¹⁴ ¿Nej jëbi jäy ajcxy occohuanïy Jesucristo co huen y'alma ñidzögy, pen ca' anajty ti mübijci je ytiy'ajt? Pues ca' yjadu'nity. ¿Nej jëbi jäy mübicy Jesucristo peni ca'ni ajcxy amïdo'ijti y'ayuc? Pues ca' yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxy ma yi' ajcxy? ¹⁵ ¿Nej jëbi jäy ajcxy capxhuäcxy Jesucristo y'ayuc ytiy'ajt, pen ca' pin yquexyüi ayuccapxhuäcxpi? Com jaybety jadu'n ymüiñ ma Dios ñecy, ma jadu'n ymïna'ñ: "Ooy oy jäy ñayjihuiyüi co pinjaty mimimb mija'tp oybi tiy'ajt, pinjaty capxhuäcxp oybi tiy'ajt ma yi' ajcxy."

¹⁶ Per ca' nidüg'óciy jäy mübicy je oybi tiy'ajt, com Isaías jadu'n coy jay ma ñecy ma jadu'n ymïna'ñ: "Huindzin Dios, ¿pin ti mijpidägy iich ajcxy n'ayuc?" ¹⁷ Cooni jäy ajcxy capxhuäcxy Jesucristo ytiy'ajt ma jäy chinaaygixy, huin'it ajcxy ymübijccixy com ti amïdo'ijtcixy je tiy'ajt.

¹⁸ Per n'amïdooybich müich ajcxy: ¿Nej ca' jada' yi judíojäy ajcxy midoy Dios ytiy'ajt? Janch jadu'n ti ajcxy jamïdoy, com jaybety jadu'n ymüiñ ma Dios ñecy ma jadu'n ymïna'ñ:

Ti capxhuäcxy ajcxy Dios y'ayuc ytiy'ajt huindu'mybi naaxhuiñ. Ti ajcxy Dios y'ayuc midodaayi huindu'mybi naaxhuiñ.

19 Jadüg'oc n'amidoogixy: ¿Nej ca' Israel jäy jada' ajcxy nejhuÿy Dios ytiy'ajt? Ñejhuÿyb ajcxy. Com jecy'ajty Moisés ycojay ma ñecy ma Dios jadu'n ymíñañ:

Nyajpocynñihuaatztähuÿbyich yi jäy ajcxy huídibi ca' ñch njäy'adyii, e huin'it miich ajcxy cohuindoyñ mjihuÿhuÿpy mñid yi' ajcxy ycixpi. Ndunipyich may'ajt mñid yi' ajcxy, e huin'it miich yi' ajcxy mmijotmädip.

20 Jadu'n jadüg'it Isaías cojay ma yi' ñecy, ma Dios jadu'n ymíñañ:

Yi jäy ajcxy huídibi ca' xy'ixtäyich, ti xypaadyich ajcxy. Ti nyaj-nigüexigüyich ndiy'ajt ma yi' jäy huídibi ca' xyñidiy xyajtñyich.

21 Com jadu'n jaybety ymiñ ma Dios ñecy, ma Dios jadu'n nigapxy yi' Israel jäy co jadu'n ymíñañ:

Jabom jabom ti njamimecxtucyich yi' Israel jäy ajcxy. Ti njayajnimäyich ñch ndiy'ajt, e ca' ajcxy mijpidägy. Hue' ajcxy ca' xycapxymidooyich, xymijotmij'öcpich ajcxy.

11

Yi Israel jäy ajcxy huídibi ti ypcynñihuaatzcixy

¹ Paady n'amidoogixy: ¿Nej ti jada' Dios ix'ijxni ixtijni yi' Israel jäy ajcxy? Pues ca' yjadu'nity, Dios ca' yi' ixmachñi Israel jäy ajcxy. Com nañ Israel jäy ñch. Abraham nmij'ap'ajtibich nmijteedy'ajtibich e nañ jim ngogápidyich ma anajty Benjamín ycogajpity. ²⁻³ Dios ca' ixmach yi' yjäy huídibi yhuin'ijx jecy'ajty co jäy'ada'ñyii jigix jébi may'ajt oy'ajt tunipy mñid yi' ajcxy. ¿Nej ca' ajcxy mnejhuÿy nej jaybety ymiñ ma Dios ñecy jadu'n nej Elías nigapxy yi' Israel jäy ma Dios? Jadu'n ymíñañ:

Huindzin Dios, ti yi' Israel jäy ajcxy yaj'öctäy huídibi anajty miich m'ayuc xycapxhuäcxip. Ti ajcxy yajhuindigoydäy je tzaa macxy ma anajty jäy xyhuindzigüy. Naydügpajc ñch ti njachui'myich njaccapxhuäcxych miich m'ayuc, e nañ xyaj'ögaamich jäy ajcxy.

⁴ E chi Dios y'adzooy nımay Elías:

Ca' mim naydügity, ji ñch ahuing nmñididyich yujcpicy jahuixtuje mil yëydijc huídı xy'ojadajtpich xyhuindzigüybich chambaad, huídibi ca'ni huingoxtinäy yi' Baal, yi' dios falso, ca'pi ti mic'ajt mñidity ni ti tzöc'ajt ca mñidity.

⁵ Tim jadu'n nej Dios mñidity anajty huixtuje mil yëydijctijc jecy'ajty co anajty Elías yjugy'aty, nañ tim jadu'n cham ma ñch ajt nxñ ndiempo Dios ymñid nijëjity judíojäy huídibi ti pa'ayoy, e paady ycixpi ti yhuin'ixyii jébi yi' jäy'adyii. ⁶ Com co ixypy ajcxy yajxon cuyduni Dios ycötujcin, ca'p ni ti pa'ayo'n Dios jactunaani mñid yi' ajcxy, com co ti anajty jim Dios y'ayuc ycuundäyii.

⁷ ¿Ti ti ytunyii ti yjadyii mñid yi' Israel jäy ajcxy? May ajcxy ca' may'ajtin oy'ajtin paady ma Dios jadu'n nej ajcxy jıjp'ijxcixy. Jëyi ajcxy huídı Dios huin'ijxi ti ajcxy paatcixy oy'ajt ma Dios. Yi' jacjadyii Israel jäy ajcxy Dios nıg ooy yajjotmij'öccixy. ⁸ Com jadu'n jaybety ymiñ ma Dios ñecy jadu'n nej Dios yajjotmij'ögy yi' Israel jäy, ma jadu'n ymíñañ:

Tim jadu'n ajcxy nıpaady nej jäy ajcxy huídibi ti ymi'öctıgooyñi, jadu'n nıpaady nej jäy huídibi huıntzıp, jadu'n nıpaady nej huídibi cönatıp.

⁹ David nañ jadu'n ycojay jecy'ajty ma ñecy, ma jadu'n ymíñañ:

Huindzin Dios, cham je jäy tzachnixondägy yi tzinaayin yi jugy'ajtin, ca' ajcxy xyjäymech. Timitiini ajcxy ayo'n möhuipy; tim jadu'n nej iyujc ayo'n paady co yajtūxuuch o co yjut cōgäy.

¹⁰ Yajma'ti ajcxy yjot yhuinma'ñ, huen ahuimbijtcixy jadu'n nej jäy huintzpi. Mō ajcxy tzaachypī huinixi huinītiempo, tim jadu'n nej jäy ajcxy tzaachypī jihuüy huidibi jemxypī tzimiccixp.

Yi ypocyhuinmeecxin huidibi ajcxy ca'p yjudiojäyity

¹¹ Co jadu'n yi maybi Israel jäy ca' cōbijccixy Dios ytiy'ajt, znej mdijy, ti Dios y'ixmachyī ajcxy tücci'yi, e yajtigoya'ñ ajcxy? Pues ca' yjadu'nity, ca' Dios ixmach yi Israel jäy ajcxy tücci'yi. Co yi Israel jäy ca' cōbijccixy Dios ytiy'ajt nej Cristo y'o'cy mūd yi' ajcxy ypocy ycixpi, paady cōbicy yi huidibi ca' yjudiojäyity, jēbi ajcxy y'alma nīdzoocin paady. Jadu'n Dios ytuñ jigix jēbi yi judiojäy ajcxy cohuindoyi jihuūhuipy, e chi nañ jadu'n mijpidägipy ajcxy Jesucristo. ¹² Pen yi mayjäy ajcxy huidijaty ca' y'israeljäyity mij'oy'ajtin mijjotcujc'ajtin ti paady, mūd co yi jacmaybi Israel jäy ca' cōbijccixy Jesucristo, chi nīgi oy'ajtin jotcuje'ajtin pada'ñ yi naaxhuñjyāy ajcxy co anajty nidüg'óciy Israel jäy yjothuimbijttaaygixy etz cōbijctaaygixy je Cristo.

¹³ Cham nijayiygixy miich ajcxy huidi ca' yjudiojäyity, com Dios ti xyquexyich ngapxhuäcxich yi' y'ayuc ma yi jäy ajcxy huidibi ca' yjudiojäyity. Ooy nyajcopyich jada ndungich, jigix jēbi judiojäy oy'ajtin paady nañ jadu'n. ¹⁴ Ca' jecyity co iich n'amīgügtijc, yi judiojäy ajcxy, cohuindoyi ajcxy jihuūhuipy, co anajty mayjäy huidi ca' yjudiojäyity mijpidägy iich n'ayuc. Co jadu'n ajcxy cohuindoyi jihuūhuipy, chi ajcxy nañ jadu'ñ mijpidägipy Jesucristo. ¹⁵ Com pen je naaxhuñjyāy huidibi ca' yjudiojäyity, huidibi Dios jecy'ajty ca' jäygidaci ajcxy chinaayin, pen ti ajcxy cōbijci Dios ytiy'ajt, pen ti ajcxy oy'ajtin paady ma Dios, mūd co Dios ti ixmach yi Israel jäy huidibi ca' cōbicy yi' ytiy'ajt, chi yi Israel jäy co ajcxy jadüg'oc yjothuimbidipy etz cōbigipy Dios ytiy'ajt, nañ jadu'n ooy yjotcugūhuipy ajcxy, jadu'n nejjihuüy ti ajcxy y'ōgy etz nej jihuüy ajcxy ti yjugypicy jadüg'oc. ¹⁶ Com co Abraham, Isaac etz Israel Dios anajty jäy'ajtip, paady nañ jadu'n tüg'óciy Israel jäy Dios jäy'adyi, mūd co Israel y'ap'ajtip y'oc'ajtip ajcxy. Tim jadu'n nejjihuüy judiojäy ajcxy tzajcaagy puuducy möy Dios, nañ jadu'n je ytujtuc huidibi jac-hui'm nañ Dios je' yje', e nañ tim jadu'n nej co jäy ajcxy möy Dios quipy ytictz, tüg'óciy je' Dios je'ajtäyī quipy y'aacxy.

¹⁷ Hue' je' nijēity Israel jäy ca' mijpidägy Dios ytiy'ajt, paady ñajtz'ixiyyi, e may'ajt oy'ajt tuñ mūd huingbi jäy huidi ca' israeljäyity. Tim jadu'n nej jihuüy tüg oyguipy huidi tim'ajtp yajpubuxy y'aacx, e je ma ti yajjijppujxtüty, je' yjijp yajpidägy ma huingbi quipy y'aacx. Miich ajcxy huidi ca' yjudiojäyity huidibi ti mibicy je Cristo, ti mbaady Dios y'oy'ajt tim jadu'n nej judiojäy ajcxy jecy'ajty müdity Dios y'oy'ajt. ¹⁸ Ca' huaad amij agix mnayjihuiygyx, e ni ca' huaad m'ixtjicixy yi judiojäy huidibi ca' mijpidaaccixy je Cristo. Miich ajcxy yi m'oy'ajt ti mbaady ma Dios, tim jadu'n nej je quipy y'aacx mic'ajt paady ma yi quipy ytictz.

¹⁹ Ca' yjecyity co miich ajcxy mina'naangixy co Dios najtz'ixiyy yi judiojäy huidibi ca' mibicy Cristo, jaydēbi miich ajcxy mnaydijyī co Dios xyjäy'adyi. ²⁰ Tiy'ajt jadu'n nej miich mina'ñ. Dios ñajtz'ixiyy yi maybi judiojäy mūd co ajcxy ca' mibicy Jesucristo. E Dios miich ti xycōbicy mūd

co ti mmibicy Jesucristo. Per ca' huaad miich amij agix mnayjihuiyii müd co Dios ti xycöbicy. Naygüend'adii yajxon ma Dios ytiy'ajt, tzi'gi' Dios. ²¹ Com Dios ñajtz'ixiy yi judíoäy ajcxy müd co ca' ymijpidägyii yi' ytiy'ajt. Nañ jadu'n miich ajcxy yi' xyñajtz'ixihua'ñ, pen ca' mmijpidaaccixy yajxon yi' ytiy'ajt. ²² Cuentipic jadu'n nej Dios may'ajt oy'ajt tuñ müd nijëjity jäy, etz mic tzaachytuñ nijëjity jäy. Dios mic tzaachytuñ je judíoäy huidibi ca' ycapxymidooy, etz may'ajt oy'ajt tuñ müd miich ajcxy huidi capxymidoob. Jaccuydun yajxon Dios ytiy'ajt, e nigi' Dios may'ajt oy'ajt xytuunipy, pen ca' mguyduni yi' ytiy'ajt, huin'it Dios xyñajtz'ixihuiy. ²³ E nañ jadu'n yi judíoäy ajcxy huidi ca' mibijccixy Jesús, co ajcxy yhuinma'ñ yajtigadzipy, e mijpidägy Jesús, huin'it Dios ycöbigiyy jadüg'oc, etz Dios müd ymic'ajt jëbi may'ajt oy'ajt tunipy müd yi' ajcxy. ²⁴ Com pen miich ajcxy huidi ca' yjudíoäyity huidibi jecy'ajty anajty ca' Dios jäy'adyii, pen miich ajcxy Dios mic'amy ti xycöbicy, nañ jadu'n jactzojc cöbiga'ñ huidibi ajcxy judíoäyip, pen ycöbicy ajcxy.

Jadu'n nej Dios yajnidzoocogixihua'ñ Israel jäy ajcxy

²⁵ Miich ajcxy nmigügtjich, nyajnijayiyb ajcxy jadu'n nej Dios tuna'ñ müd yi Israel jäy, jaydëbi ca' miich ajcxy amij agix mnayjihuihuuyb, etz jaydëbi mnejhuihuipy jada tiy'ajt huidibi ca' pin nejhuuy, co yi Israel jäy ajcxy ooy ajcxy y'aamijity yjotmijity, ca' ajcxy capxymidooy Dios. E jadu'n ajcxy y'ida'ñ mabaad anajty yca'pxy je mayjäy, ca'pi y'israeljäyity je huidibi mijpidägam Jesucristo ytiy'ajt. ²⁶ Nejhuuyim co Dios may'ajt oy'ajt tunamb jadüg'oc müd tüg'óciy Israel jäy ajcxy, com jadu'n jaybety ymiñ ma Dios ñecy ma Dios jadu'n ymina'ñ:

Jacjiini tüg Israel jäy ymina'ñ huidibi yajnidzögamb ajcxy ma yi' ypocy. Yi' yajtigoyaanip Israel jäy ypocy.

²⁷ Jadüg'it jaybety ymiñ ma Dios jadu'n ymina'ñ: Jadu'n nyajhuin-huaniiyich yi Israel jäy co yi' ajcxy ypocy nyajtigooybich.

²⁸ Co yi Israel jäy ca' mijpidaaccixy Jesucristo ytiy'ajt, chi Dios ajcxy ñajtz'ixiyyi. E co ñajtz'ixiyyi ajcxy, paady ycixpi miich ajcxy Dios ti yxcöbicy, co ti mmijpidaaccixy Jesucristo. Per chambaad Dios jactzojctay yi Israel jäy müd co Dios huin'ixy yi Abraham, Isaac etz Jacob jecy'ajty jëbi yi' yjäy'adyii. ²⁹ Dios ti huin'ixy yi Israel jäy ajcxy jëbi yi' yjäy'adyii, etz tüg'óciy huidi yajhuinhuaniiy co möhua'ñ, co may'ajt tuna'ñ müd yi' ajcxy ycixpi. Ymöhuiy yi', ytunipy yi'. Dios ca' y'ayuc yajxigy. ³⁰ Miich ajcxy huidi ca' yjudíoäyity jecy'ajty ca' anajty mmijpidaaccixy Dios. Jadachambi xii tiempo Dios miich ajcxy ti xypa'ayoy, müd co yi Israel jäy ca' mijpidägy Cristo ytiy'ajt. ³¹ Yi judíoäy jadachambi xii tiempo ca' mijpidaaccixy Dios ytiy'ajt, tim jadu'n nej jecy'ajty miich ajcxy ca' anajty mmijpidaaccixy Dios ytiy'ajt. Jacjiini Dios pa'ayoohuin tuna'ñ jadüg'oc müd yi judíoäy ajcxy tim jadu'n nej ytuñ müd miich ajcxy jadachambi xii tiempo. ³² Com Dios anajty ti yajpocycädäy tüg'óciy jäy co ajcxy ycapxycömidodacy, yi judíoäy etz nañ huidi ca' yjudíoäyity, paady ycixpi Dios pa'ayo'n tuñ müd nidüg'óciy jäy, judíoäy etz nañ huidi ca' yjudíoäyity, tüg'óciy pin mijpidacp yi' ytiy'ajt.

³³ ¡Ooy ycodzigijity Dios! Dios ooy mijcajee may'ajt oy'ajt tuñ müd jäy ajcxy ycixpi. Dios ooy mijcajee mijhuinma'ñ ti tuñ müd jäy ajcxy ycixpi. Dios ooy mijcajee ycohuinma'ñity. Ca' ni pin jëbi huinjihuidäy je ayuc huinma'ñ huidi Dios ymüd. Etz nañ ca' ni pin jëbi huinjihuidäy

huidibi Dios ytumyb. ³⁴ Com jaybety jadu'n miiñ ma Dios ñecy ma jadu'n ymına'ñ:

Ca' ni pin jëbi huinjihuıydäy nej Dios yhuinma'ñ müidity. Ca' ji ni pinjäy huidi ti capxhuijy Dios.

³⁵ Ca' ji ni pinjäy huidi tijaty ti ocmooybi Dios. Dios ca' ni ti nuucxy müidity müid ni pinjäy.

³⁶ Tüg'óciy huıdıjaty ñich ajt ya nbaatim, ac jiıby choondäy ma Dios. Yi' tüg'óciy ti yaj'oyıydäy, e yi' je'ajttaayip tüg'óciy. ¡Tzoc Dios capxpaatim ojadajtim huinixi huiniitiempo! Jadu'n jadu'n. Amén.

12

Je jugy'ajtin cıxyjot ma Dios

¹ E jadu'n nmıgügtıjıch, cham ñich müich ajcxy nımaaygıxy müctägy, com co Dios ti xypa'ayoogıxy, paady ycıxpı nay'ayéjıgıx naygıyéjıgıx amuumdügjot ma Dios. Cuychinayı yi' ytiy'ajt yajxon jabom jabom. Tzınaaygıx müid huädz mjot mhuinma'ñ, jadu'n nej Dios jëbi jäygidägy yi' mdzınaayın. Jada je tiy'ajt nej jëbi Dios m'ojadajtcıxy tiydudägy. ² Ca' ajcxy mguydungıxy mguychinaygıxy yi' naaxhuıñyjäy ajcxy yjıbicjot yjıbic-huinma'ñ huidibi tzınaaygıxp jadachambi xıı jadachambi tiempo. Com Dios ti xymooygıxy jemybi mjot jemybi mhuinma'ñ, paady mguydunıpy ajcxy yi' ytiy'ajt. Ixpıjccıx Dios ytiy'ajt, jıgıx ajcxy mnejhuıñhuıpy huidibi tiy'ajt Dios chojcyp mguydunıpy, etz jıgıx mhuinjihuıñhuıpy je oyhuinma'ñ, je tudägyı huinma'ñ huidibi Dios yjäygidacpy, je huinma'ñ huidi huädzip cap'xyıp.

³ Com Dios may'ajt oy'ajt ti tuñ müid ñich etz ti xymöyich jada tung co ngapxhuäcxıch yi' y'ayuc, paady ñich müich ajcxy nımäy nidüg'óciy co ca' huaad amıj agıx mnayjihuıñyıgıxy, ca' huaad nıgi anaxy mnaygómáayıgıxy cı'm. Nidüg nidüg cı'm huinmaaygıxy yajxon huidi tung jëbi myajnicxcıxy, jadu'n nej Dios huıjy'ajt cujc'ajt ti xymooygıxy. ⁴ Jadu'n nej ñich ajt nninıcx ymıid yhuin y'ahuac etz ycı' ytecy, je ninıcx abıcy ytung müidity, je huıin abıcy ytung müidity, je y'ahuac abıcy ytung müidity, etz je cı' tıcy abıcy ytung müidity. ⁵ Nañ tım jadu'n ñich ajt huidi mıjpidacp Cristo, e ni may ñich ajt, e tügpıcy jäy ñich ajt com tú'cıy nmıbjıcm. E nıje' nıje' Dios huıjy'ajt cujc'ajt ti xymooyım abıcyjaty, nej jëbi nıje' nıje' Dios ytung nyajnicxım.

⁶ Com abıcyjaty Dios ti xymooyım huıjy'ajt cujc'ajt, paady copıcy nyajtuunım nıje' nıje' je huıjy'ajt cujc'ajt huidi Dios ti xymooyım. Pen Dios ti xymooyım huıjy'ajt cujc'ajt jëbi ngapxhuäcxım yi' y'ayuc, copıcy ngapxhuäcxım mıbaad ixpıjcin nmıd'ajtim. ⁷ Pen Dios huıjy'ajt cujc'ajt ti xymooyım co jëbi nbubejtim nmıgügtıjı, copıcy nmıgügtıjı nbubejtim. Pen Dios huıjy'ajt cujc'ajt ti xymooyım jëbi nyaj'ixpıjcin nmıgügtıjı, copıcy ndung'ajtim yaj'ixpıgıı. ⁸ Pen Dios huıjy'ajt cujc'ajt ti xymooyım co jëbi ngapxhuıjım nmıgügtıjı, co jëbi njot'amıjmooyım nmıgügtıjı, copıcy ngapxhuıjım nmıgügtıjı, etz njot'amıjmooyım nmıgügtıjı agıjıc jıtcıjıc. Pen nyejım tijaty ma nmıgügtıjı, copıcy agıjıc jıtcıjıc nyejım. Je huidi ajcxy nıgohıajc'ajtp mıbjıcpıdıjı copıcy yajxon y'ané'mgıxıpy. Pen Dios huıjy'ajt cujc'ajt ti xymooyım co jëbi nbubejtim jäy ajcxy huidibi ayo'n müid jıtmay müid, copıcy agıjıc jıtcıjıc nbubejtim pinjaty ayo'n müid jıtmay müid.

Nej mibijcpidijc huaad jugy'ajtcixy chinaygixy

⁹ Naychójcigixy nayjihuiyigixy miñ xyipy amuumdügjot, ca' y'ametz yjotmetzity. Ca' mnijot'ajtcixy jibic jot jibic-huinma'ñ. Nijot'ajtcix nigi oyjot oyhuinma'ñ. ¹⁰ Naychójcigix nayjihuiyigix amuumdügjot, jadu'n nej ypanyi mnaymigüg'ájtigixipy ma Jesucristo. Nayyajmij'ájtigix nigi nidüg nidüg miich ajcxy.

¹¹ Naymic'íjxigix cixyjot huinijot, ca' mnuux'ajtcix. Tungix amuumdügjot miid mHuindzin Jesucristo ycixpi.

¹² Tzinaaygix agujc jotcujc, com mnejhuiyb ajcxy co mbada'ñ oy'ajtin ma Dios. Mecxtujccix yi tzaachypi ayo'n huidibi mminajxyp myajnajxyp. Mibijctzoogix Dios jabom jabom.

¹³ Naybubéjtigix miñ xyipy, pen yajmayajtpy migüg tijaty. Nayyajjättácigix miñ xyipy oy yajxon.

¹⁴ Nibijctzohui' ma Dios huidibi ajcxy xy'ixhuidijtp xypahuidijtp. Nibijctzohui' mmidzip huen Dios may'ajt oy'ajt tuñ miid yi' ycixpi. E ca' mnibijctzohuiy co huen ayo'n paadipy.

¹⁵ Tzoc jotcujc nayjihuiyim co ajt nmigügtijc jotcujc ñayjihuiyii. Tzoc miidtajim miidmayim nmigügtijc pen tajp mayb.

¹⁶ Ooy yajxon nayyaj'íjtigix naygodigíyigix. Ca' amij agix mnayjihuiyigixy. Migüg'adiyb yi mmigüg huidi ayoob. Yung naxy miid'at mjot mhuinma'ñ, ca' mnaygömáayigixy.

¹⁷ Co jäy xymidundigóoygixipy, ca' huaad jibic myaj'ahuimbijtcixy. Hue' janchtiy oybi ajcxy mdunipy jadu'n nej jäy jëbi jäygidägy. ¹⁸ Oy nayyaj'íjtigix miid nidüg'óciy jäy mabaad mmadägy. ¹⁹ Miich ajcxy migügtijc, co jäy jibic xymidundigóoygixipy, ca' nañ jadu'n ajcxy myaj'ahuimbidity, mímecxtugipy ajcxy, com Dios yi' tzaachytunip yi jäy ajcxy huidi anajty xymidundigóoygixp. Com jaybety jadu'n ymiñ ma Dios ñecy jadu'n ymiñañ: "Íich nyaj'ahuimbidityich nej anajty jäy xymidundigooygixy." ²⁰ Co jäy xymidundigóoygixipy myaj'ahuimbidity ajcxy oybi, com jaybety jadu'n ymiñ ma Dios ñecy, ma jadu'n ymiña'ñ: Pen yi mmidzip yubo'cip, myajcayipy myaj'ügipy, pen yi mmidzip tidziyipy, myajni'ügipy. Co jadu'n mdunipy miid mmidzip huin'it tzöydu'n jihuihuipy.

²¹ Pen myaj'ahuimbijtpy jibic co jäy xymidundigoy, ti anajty jibic-huinma'ñ xymimadägy. Hue' janchtiy yajtun mecxtujcin etz oyhuinma'ñ, e jadu'n jibicpi mímadägipy miid oybi.

13

¹ Copicy co nidüg'óciy jäy capxymidóogixipy yi cajp tungmiidpi etz yi gobierno tungmiidpi. Ca' ji ni tüg tungmiidpi huidibi jëbi y'ane'my pen Dios ca' a'ixiy. Com Dios jadu'n cötujcin ti yajhui'my co huen jii'aty tungmiidpidijc, paady ycixpi tungmiidpidijc nidüg'óciy jim mic'ajt paady ma Dios. ² Paady jäy ajcxy pinjaty ca' ycapxymidoy ma tungmiidpidijc, hue' tundigooyb ma Dios e tzaachypi ajcxy ypadaamyb. ³ Yi miltungmiidpi ca' yi' ajcxy adzigíy yi jäy huidijaty oyhuinma'ñ miid. Hue' janchtiy yi' ajcxy chaachytunipy yi jäy huidi jibic-huinma'ñ miid. Pen mdzojcy co ca' tzaachypi mbaadipy ma yi tungmiidpi, hue' janchtiy oybi mdunipy, e huin'it m'idipy jotcujc. ⁴ Com Dios ti pidägy jada tungmiidpi miid miich ajcxy ycixpi, jigix jëbi jotcujc ajcxy

mdzinaaygixy. Pen mdundigooyb huiñ'ti je tungmüdpü mdzigiñhuipy, com yi' ymüid mic'ajt jëbi tzaachytuñ jäy ajcxy huiñ'dibi tundigooyb. Com Dios ytung ytuunipy etz ycuynuunipy Dios ycötujcin jadu'n nej Dios xyñajtz'ane'müiyim, copicy co tzaachytuñ je jäy ajcxy huiñ'dibi tundigooyb. ⁵ Paady ycixp copicy mgapxymidohuipy tungmüdpüdjic, jigix ca' müich ajcxy Dios xychaachytunipy e nañ jotcuje mnayjihuiñhuipy co ca' anajty ti ti mdundigoy. ⁶ Yi tungmüdpüdjic Dios ycixpi ajcxy ytuñ, e ymüid ajcxy ycötujcin, paady ycixpi copicy mmigüedipy ajcxy.

⁷ Mgüedipy ma yi tungmüdpüdjic huiñ'dibi xypaatp. Co ajcxy cajp meñ yajmucy, migüedipy. Co je gobierno tungmüdpü pidägy impuestos, migüedipy. Jäy ajcxy huiñ'dijaty tungmüid myajmüj'adipy, etz huiñ'di müjtungmüid mgömayipy. ⁸ Ca' pin minuucxy'adiyib. Tzoc jihui' mmigügtijc, e mgüedipy oy'amy huiñ'dibi mnuucxyp. Co yi mmigügtijc mdzogüpy müjihuiñhuipy ti anajty mguydundäy Dios ycötujcin. ⁹ Jadu'n Dios ycötujcin jaybety ymüiñ, ma jadu'n ymüina'ñ: "Ca' mmigapxtigoyipy huingbi töxyjäy. Ca' mmigüg mmeedzipy. Ca' mjäyay'ögüpy. Ca' mmigüg m'adzojipy ti ymüid." Pen mdzojcpy müjihuiñhuipy migüg nej müich ci'm mnaychogyii ti anajty mguydundaayi Dios y'ane'mün ycötujcin. ¹⁰ Je naychojcin je nayjihuiñhuipyin ca'p je' ti jibicpi ti tzaachypi tuñ ma je migüg, co jadu'n jada mguydundähuipy ti anajty Dios ycötujcin mguydundaayi.

¹¹ Com müich ajcxy mnejhuipy co huingon je xü je tiempo müna Jesucristo müna'ñ jadüg'oc ya naaxhuiñ, paady ycixpi jüjp'ijxcix ajt nHuindzin Jesucristo co tzojc ymüinipy. E jadachambi ti yjac-huingoni müna müina'ñ müich ajt nHuindzin Jesucristo, ca'ydi co oga'n müibijcim. ¹² Canaag jimüjt jäy ajcxy ahuijxy jüjp'ijxpy co Dios yajñdzöga'ñyüi ajcxy y'alma, jadachambi ti yhuingoni je xü je tiempo müna n'alma ajt müdzoojin padaanim. Paady ycixp tzoc ixmajtzim yi jibic-huinma'ñ yi huiñ'dibi jäy ycuydumyib huiñ'dibi ca' Dios ytiy'ajt nejhuipy. Tzoc cuychinaayim cuyjy'ajtim Dios ytiy'ajt. ¹³ Tzoc tzinaayim juy'ajtim tudägy. Tzoc cuyduunim Dios ytiy'ajt. Ca' huaad jadu'n ndzinaayim amügyjäy. Ca' huaad n'agootzhuidijim xiicyaax xiictinaayim. Ca' huaad ndundigooyim müid huingbi töxyjäy. Ni ca' huaad ndziptuunim ahua'nduunim. Ni ca' huaad nmigüg nmi'ixtinaayim. ¹⁴ Tzoc cuychinaayim cuyjy'ajtim Jesucristo ytiy'ajt. Tzoc tzinaayim tüydudägy jadu'n nej Jesucristo tüydudägy ti chinäy ya naaxhuiñ. Ca' nguyduunim ti jibicpi ajt n'aa njot yja'adzojcpy.

14

Ca' migüg mbocy'ixy

¹ Müich ajcxy nmigügtijcic, copicy mgöbigüpy agujc jotcuje ma müich mnayyöymüjicigixy ajcxy yi migügtijc huiñ'dibi mübijcp je Cristo, per ca' tüydudägy huiñ'jhuipy je Cristo ytiy'ajt. Mgöbigüpy per ca' mhuingapxpedipy, ca' ti myaj'ayucyoony müid yi' ajcxy. ² Ti migügtijc huiñ'dibi müinamb co Dios ca' ti jüicy capx'aducy, etz jëbi ajcxy jüicy huenytim ti jüicyity. Etz nañ ji migügtijc huiñ'dibi müinamb co Dios ti capx'aducy tzüch, paady ajcxy jüicy'adyii je'jada'ajty aay ujtz. ³ Yi migüg huiñ'dibi tzüch tzützp ca' huaad ixtijy je ymüigüg huiñ'dibi yjüicxpy je'jada'ajty aay ujtz. E nañ ni yi migüg huiñ'dibi jüicxp aay ujtz ca' huaad ixtijy yi migüg huiñ'dibi tzüch tzu'tzp, com Dios ycöbijctaayb je jäy ajcxy huiñ'dibi ti müibicy Jesucristo. ⁴ Ca' huaad müich ajcxy mnämähuiipy yi mmigüg co ca' oytuñ, tim jadu'n nipaady nej co tüg jäy nümähuiipy huingbi jäy ytumbi co ca' oy ytuñ. Dios ci'm nümähuiip

huidi ajcxy mibijcp Jesucristo, pen oytuñ o ca' oytuñ. Dios ypubejtyp pinjaty mibijcp, paady madaacp ajcxy ma chinaayin.

⁵ Nijëjity ajt nmigügtijc ymîna'ñ co ooy ycopicyity n'amay'ajtim nijëjity xii, jacjadyii jäy ymîna'ñ co ca' ycopicyity n'amay'ajtim jada xii. Huen nidüg nidüg yci'mhuinma'ñ yajtuñ pen y'amay'adamyb, o pen ca' amay'ada'ñ nije' nije' xii. ⁶ Ich ajt nmigügtijc huidi amay'ajtp nijëjity xii, hue' ajcxy tijy co Dios jadu'n tzojcp. E nañ ich ajt nmigügtijc huidi tzüch tzu'tzp, hue' ajcxy tijy co Dios jadu'n tzojcp, etz nañ yajnajxyp Dioscojuyip ma Dios müid yjicxy ypic ycipi. Nañ tim jadu'n ajt nmigügtijc huidi ca' tzüch tzüdz'a'ñ, hue' tijy co Dios jadu'n tzojcp, etz nañ yajnajxyp Dioscojuyip müid yjicxy ypic ycipi.

⁷ Ca' ich ajt nayyajtzinaayim amidzooci'm, nañ jadu'n ca' ich ajt ci'm ndzojcin co n'o'cim. ⁸ Pen njactzinaayim hue' anajty nguyduunim ajt nHuindzin Jesucristo chojcin. Pen n'o'cim yi' anajty jadu'n ti yajcöduy. Pen njactzinaayim, o pen n'o'cim, tú'ciy nipaady, com Jesucristo nHuindzin'ajtim ma yi tzaayin etz ma yi o'cin. ⁹ Paady ycipi Cristo y'o'cy etz yjugypijcy jadüg'oc jigix jëb nihuindzin'ajttäy yi' yjäy huidibi jactzinaayb jacjugy'ajtp, etz jigix jëb nihuindzin'aty yi tibi y'ögy.

¹⁰ ¿Na'amy co mmigüg mdzachpocy'ixy? o ¿Nej co mmigüg mdzach'ixtijy? Ca' jadu'n y'oyity co ajcxy jadu'n m'idich. Com nidüg'óciy ajt njadaanim ma Dios ytiydundac. ¹¹ Com jadu'n jaybety ymiñ ma Dios ñecy, ma jadu'n ymîna'ñ:

Janch janch co ich, je tügpaicpi Dios, jadu'n nmîna'ñich co tüg'óciy naaxhuiñyjäy xyhuingoxtinähuibich xyhuindzigühuibich, etz nañ tüg'óciy naaxhuiñyjay xycapxpaadibich co ich je' tügpaicpi je Dios.

¹² Com Dios nhuindzin'ajtim, paady ycipi nidüg'óciy ich ajt nayguëxctähuaanim ma Dios yhuinduu, chi Dios xy'amidohuaanim nej ti ndzinaayim ti njugy'ajtim nidüg nidüg.

Ca' migüg myajhuinma'ñyidigoogyixy

¹³ Paady ycipi ca' huaad naynixiic naynigapxim miñ xyipy. Hue' janchtiy miich pidaaccix mhuinma'ñ co ca' ti mdungixipy huidi nmigügtijc ca' jäygidägy, huidi mmigüg yajpocycähuib. ¹⁴ Nnejhuuybich tiydudägy co ajt nHuindzin Jesucristo ytiy'ajtp xyajnejhuuyim co jëbi njicxim huen tim huidi jicxy tim huidi picy. Je jicxy je picy ca' ma ycobocy. Per pen tüg migüg yhuinma'ñ pidacp co Dios ca' jäygidägy co yi' yjicxpy nijëjity jicxy picy, pues ca' yhuaadity co yi' jadu'mbi jäy jicxy huidi yi' ytiy co ca' huaad njicxim. ¹⁵ Pen ca' m'oy'ity müid tüg migüg co ti mjicxy je jicx picy huidibi yi' ytiy co Dios ca' jadu'n yajcöduy, chi ca' anajty mdzocy mjihuuy yi mmigüg nej ypadyi. Com nañ Cristo ti y'ögy müid yi mmigüg ypocy ycipi, paady ca' huaad myajtigoy yi mmigüg, müid co mjicxy huidi yi' ca' jäygidägy. ¹⁶ Ca' ajcxy m'a'ixiygixipy co jibic yajnigapx yajnimyidägyipy huidibi miich ajcxy myajnajxp co y'oyity. Oy miich mjahuinjihuuy Dios ytiy'ajtp, per ca' huaad mdunipy huidi yi mmigüg ca' jäygidägy, e huin'it xyñigapxipy jibic. ¹⁷ Canan Dios jadu'n ytiy'ajtp xyñajtz'ane'miuyim huidijaty huaad njicxim n'uucim, o huidi ca' huaad njicxim n'uucim. Hue' janchtiy ti xyñajtz'ane'miuyim nej jëbi tiydudägyi ndzinaayim njugy'ajtim. Nej jëbi jotcujc n'ijtim müid ajt nmigügtijc. Nej jëbi jotcujc nayjihuiyim müid Dios ymic'ajtp ma njot nhuinma'ñ.

18 Co jadu'n nguyduunim nej Cristo ytiy'ajt ti xyñajtz'ane'miim, huin'it jäygidägiy Dios etz nañ jadu'n jäygidägiy jäy ajcxy nej anajty nduunim. 19 Tzoc panixim je huinma'ñ jadu'n nej jëbi ndzinaayim agujc jotcuyc müd ajt nmigügtijc, ca' ma ti tzip ti capxy nmiid'ajtim. Tzoc yajtuunim je huinma'ñ jadu'n nej jëbi huaad naybubejtim nidüg nidüg nej jëbi huaad nguychinaayim Dios ytiy'ajt. 20 Ca' huaad nyajtigooyim Dios ytung müd tzip capxy jadu'n nej huidi jëbi huaad ndzüdzm, etz huidibi ca' huaad ndzüdzm. Janch tiy'ajt co Dios ca' ti jicxy ti picy capx'aducy, per pen njicxim huidijaty nijëjity ajt nmigügtijc yajcoboicpy, e jadu'n nyajhuinma'ñdigoooyim ajt nmigüg, chi nmidundigooyim Dios ytiy'ajt. 21 Tiy'ajt jadu'n co ca' huaad tzüch ndzüdzm etz ca' huaad vino n'uucim, o jactijaty huidibi ajt nmigüg yajcoboicpy. Com co jadu'n ajt n'ididzm, hue' anajty ajt nmigüg nyajhuinma'ñdigoyaanim ma ymibijcin. 22 Miich ajcxy huidibi huinjihuüyb Dios ytiy'ajt co Dios ca' capx'aducy ti jicxin ti pijcin, ca' mnimiydacconaxipy müd jäy ajcxy. Dios ñejhuüyb co miich mhuinjihuüy y' ytiy'ajt. Jëbi jotcuyc mdzinähuipy pen mguychinaayb je huinma'ñ huidibi miich mnejhuüygyixyp co ytudägyity, e huin'it ca' jibic mnayjihuüyb ajcxy. 23 Tundigooyb y' migügtijc huidibi jotmetz jicxp nijëjity jicxy picy, müd co tzigüyb y' co Dios ymijotmähuüyb co ti jicxy huidi ytiy'ajt co ycobocy. Tundigooyb jadu'n com ca' ti cuyduni Dios ytiy'ajt nej ci'm ti yajnigüeje. Pen ca' nguyduunim jadu'n nej nhuinjihuüyim Dios ytiy'ajt, tundigooyim anajty.

15

Tzocix migügtijc, ca' ñaydüg mnaychogyii

1 Ich ajt huidibi tiydudägy nmibijcim etz nhuinjihuüyim Dios ytiy'ajt, copicy nmimecxtujcim ajt nmigügtijc huidibi ca'ni huinjihuüy yajxon Dios ytiy'ajt. Ca' huaad ti nduunim müd ngi'm jäygidaacin ycixpi. 2 Copicy nyajtuunim oyhuinma'ñ müd ajt nmigügtijc, jadu'n nej jëbi ajt nmigüg jäygidägy, etz jadu'n nej jëbi nbubejtim ajt nmigüg müd ymibijcin. 3 Com nañ Cristo ca' ti ytuñ müd yci'm jäygidaacin ycixpi, com jaybety jadu'n miñ ma Dios ñecy, ma je Cristo nmay Dios Teedy: “Miich mmidzip ajcxy huidibi xyñigapxp xyñi'ojiyb, xyñigapxpich xyñi'ojiybich ajcxy nañ jadu'n.” 4 Com tüg'óciy Dios y'ayuc huidibi ycojay jecy'ajty, hue' cojay müd ich ajt ycixpi, jigix jëbi Dios ytiy'ajt nbaatim. Dios ytiy'ajt xyajnejhuüyim co Dios jadu'n tzocy co nmimecxtujcim ajt nmigügtijc. Nañ Dios y'ayuc xyjot'amijmooyim, e nañ xyajnejhuüyim jadu'n jëbi njijp'ixxim pubejtin ma Dios. 5 Com Dios, y' je' huidi xypubejtim müd mecxtujcin, e nañ xyjot'amijmooyim, paady huen Dios may'ajt tunipy ma miich ajcxy mjot mhuinma'ñ, jigix jëbi mmid'idipy tú'ciy mjot mhuinma'ñ nej Jesucristo yjot yhuinma'ñ müdity, e jadu'n jëbi mnayyaj'oy'itigixy jotcuyc ca' ma tzip capxy. 6 Dios miich ajcxy xypubedipy xypudigihuipy, jigix jëbi myajtügügyixy mjot mhuinma'ñ, etz tú'ciy m'ojadajtcixipy mhuindzigügyixipy Dios Teedy etz ich ajt nHuindzin Jesucristo.

Jesucristo y'ayuc yajcapxhuäcxy ma huidibi ca' yjudiojäyity

7 Naygöb'icigix nidüg nidüg agujc jotcuyc, tim jadu'n nej Cristo xycöbijccixy agujc jotcuyc. Co mnaygöb'icigixipy nidüg nidüg agujc jotcuyc, huin'it Dios capxpaady y'idipy. 8 Janch tiy'ajt co Cristo y'oy ya naaxhuiñ, oy pubety judiojäy ajcxy, e jadu'n cuyduñ Dios ytiy'ajt huidi

yajhuinhuaniiy Abraham, Isaac etz Jacob jecy'ajty co jadu'n tuna'n ñ mïd yí' ajcxy ycixpi. ⁹ Nañ jadu'n Cristo ooy pubejty yí' huídibi ca' yjudíoáyity, jaydëbi ajcxy capxpaadípy Dios, mïd co ti ypa'ayoyii ajcxy. Com jaybety jadu'n ymiñ ma Dios ñecy, ma jadu'n David yminañ:

Com miich Huindzin Dios ti xycohua'ñich paady miich ngapxpaady ma yí' jáy ajcxy huídibi ca' yjudíoáyity. ñich miich nhuin'ñihuipy mïd himnos.

¹⁰ E nañ jaybety jadu'n ymiñ ma Dios yñecy:

Jotcujc'ajtcixy quipxy mïd Dios yjáy miich ajcxy huídibi ca' yjudíoáyity.

¹¹ E nañ jaybety jadu'n ymiñ ma Dios ñecy, ma jadu'n yminañ:

Capxpaatcix yí' Huindzin Dios miich ajcxy huídibi ca' yjudíoáyity. Capxpaatcix yí' Huindzin Dios miich ajcxy nidüg'óciy naaxhuiñjáy.

¹² E Isaías ycojay nañ jadu'n ma yí' ñecy, ma jadu'n yminañ:

Ma'xung'adamb tüg Isai' y'ap y'oc, e yí' ane'mamb yí' jáy huídibi ca' yjudíoáyity. Co yí' jáy ajcxy huídibi ca' yjudíoáyity mijpídägiipy je mij'ane'mbi, hue' ajcxy yjijp'ijxpy co möhuaanip oy'ajt.

¹³ Nmibijctzooybich Dios mïd miich ajcxy ycixpi huídijaty mibijcp Jesucristo, com njijp'ijxim co Dios xymöhuaanim oy'ajtin. Nmibijctzooybich Dios mïd miich ajcxy ycixpi co huen xyajjotcugñhuip ajcxy, e nañ co huen xyajpoocxipy mjot mhuinma'ñ. Nmibijctzooybich Dios co huen xypubejtcixy xypudigiiygixy mïd yí' yjihu'ñ ymic'ajt, jaydëbi mijjip'ixipy ajcxy co mbaadip oy'ajtin mijcajee ma Dios.

¹⁴ Miich ajcxy migügtijc, jotcujc nayjihuiñijich mïd miich ajcxy ycixpi, com nejhuñiybich co miich ajcxy mïdity oyjot oyhuinma'ñ, e nañ mhuinjihuñiyb ajcxy tüg'óciy Dios ytiy'ajt, paady jëbi mnayyaj'ixpijciyixy nidüg nidüg. ¹⁵⁻¹⁶ Jotmic'amy ti nyajjämejtzcodyich miich ajcxy nijëjity Dios ytiy'ajt ma jada necy huídibi nyajnijayñiyb ajcxy cham, com Dios may'ajt oy'ajt ti tuñ mïd ñich, e ti xyhuin'ixyich jaydëbi nduñich Jesucristo ytung ma yí' jáy ajcxy huídibi ca' yjudíoáyity. Jadu'n nduñich mïd Dios ycixpi, co ngapxhuäcxyich je oybi tiy'ajt jadu'n nej Jesucristo y'o'cy mïd jáy ajcxy ypocy ycixpi. Jadu'n Jesucristo ytuñ jigix jëbi Dios cöbigipy yí' mayjäy ca'pi yjudíoáyity huídibi ti mibicy Jesucristo etz huídibi yí' Espiritu Santo ti yajhuäch je jibicp ma ajcxy yjot yhuinma'ñ.

¹⁷ Com Jesucristo ytiy'ajt yajpaatp ma ñich njot nhuinma'ñ, paady ycixp ooy jotcujc nayjihuiñijich co nduñich mïd Dios ycixpi. ¹⁸ Jada janchtiy ñich nyajmïdmïydacy miich ajcxy je may'ajt huídibi Cristo ti tuñ co ngapxhuäcxyich yí' y'ayuc. Ca' nyajmïdmïydaaccixy huídibi Cristo ytumyb mïd jacpinjaty. Mïd co ngapxhuäcxyich Cristo y'ayuc, e nañ mijhuinma'ñ ndumybich mïd Cristo ymic'ajt, paady mayjäy ycapxymidooyb Dios huídibi ca'p ajcxy yjudíoáyity. ¹⁹ Ti ngapxhuäcxyich tüg'óciy Cristo ytiy'ajt nej jëbi ajcxy y'alma ñidzoocin paadip. Jim nyajtzondacyich Jerusalén, e ti nhuidijttäyich canaag agajp mabaad nja'tyich jim Ilirico ñaaxjot. E Dios yjihu'ñ ymic'ajt xypubejtich xypudigiiyich co ñich mijhuinma'ñ nduñich, etz Dios ytiy'ajt nyéjicbich. ²⁰ Ooy nijot'atyich co ngapxhuäcxybyich Jesucristo ytiy'ajt ma anajty ca' pin jayijp capxhuäcxyñi. ñich oga'n Jesucristo y'ayuc jim nmnicxi ma yí' jáy ajcxy huídibi ca' anajty midoy Jesucristo ytiy'ajt. Jadu'n nduñich, jigix ca'ydi njijptigiyiyich ma huingbi anajty jayijp ti capxhuäcxi Jesucristo ytiy'ajt. ²¹ Com jaybety jadu'n ymiñ ma Dios ñecy, ma Dios jadu'n yminañ:

Yi jäy ajcxy ymidohuaanip Cristo y'ayuc huidibi ca'ni anajty midoogixy. Yi jäy ajcxy yhuinjihuuhuaamyb je Cristo ytiy'ajt huidibi ca'ni anajty nejhuuygixy co yjiijity je Cristo.

Pablo huinmay co ñicxa'ñ jim Roma

²² Com ooy ndzachcapxhuäcxich Cristo ytiy'ajt canaag agajp, paady ca' nyajniباديych ñicxibyich ma miich ajcxy. ²³ Canaag jimijt ndzachni-jot'atyich anajty ñicxa'ñich ma miich ajcxy. Ixti chamni ti nhuuidjttäyich majaty anajty nhuidida'ñich. ²⁴ Paady njjip'ijxypich co jëbi nnaxihuibich ma miich ajcxy co anajty ñicxyich jim España ñaaxjot. Huäcxibaambich jim ma miich ajcxy jëbi hueeni ajcxy ngapxim nmiydaacim. Nañ hue' njjip'ijxypich co xypubedaambich miich ajcxy müd ndu'amgixpich. ²⁵ Jayjip nñicxa'ñich jim Jerusalén, chiini nñicxa'ñich ma miich ajcxy. Nmñicxaamybich jim Jerusalén hueeni meeñ huidibi nyegaamybich ma yi mibijcpidijc jim Jerusalén müd ayoobtijc ycixpi. ²⁶ Com yi mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yi ayoobtijc jim Jerusalén huidibi mijpidacp Jesucristo. ²⁷ Ooy ajcxy jotcuje ñayjihuiyii co ymigügtijc pubeda'ñ jim Jerusalén. Paatip co pubedipy ajcxy, com ma yi judiojäy ajcxy, jim ajcxy ti paady Dios ytiy'ajt, paady paatip ajcxy huidi ca' yjudiojäyity co pubedipy yi judiojäy ajcxy. ²⁸ Co anajty ti nyajcidiigydaaygixy je meeñ huidibi yi migügtijc ya Macedonia etz Acaya ti yajmujccixy müd je mibijcpidijc ycixpi huidibi yajpatp jim Jerusalén, huin'it nñicxa'ñich jim España ñaaxjot. Nnaxihuaambich ma miich ajcxy co anajty jim nñicxich. ²⁹ Nejhuuybich co anajty jim naxiyich ma miich ajcxy, je Cristo xypubedipich je ymic'ajt, e nyegipich Cristo ymic'ajt ijxpejt etz nyaj'ixpigipyich miich ajcxy je Cristo ytiy'ajt.

³⁰ Miich ajcxy nmigügtijcich, com miich ajcxy mijpidaaccixyp ich ajt nHuindzin Jesucristo, e com miich ajcxy müd Dios yjihui'ñ ymic'ajt ma m'aa mjot, e nañ xychojcpich xyjihuiybich, paady ycixp nbijctzooyich may'ajt, yajtüguygixy m'ayuc mhuinma'ñ müd ich, jëbi tú'ciy Dios nmibijctzoohuim mictägy müd ich ycixpi. ³¹ Mibijctzoogix Dios co huen xyñihua'ñich xycohua'ñich ma yi judiojäy ajcxy jim Judea naaxjot, huidibi xyca'ixaambich co ajcxy ca' mijpidägy Jesús. Nañ mibijctzoogix Dios co yi mibijcpidijc jim Jerusalén cöbigipy ajcxy oy yajxon je pubejtin huidibi ich jim ngiyegaamy. ³² Mibijctzoogix Dios co huen xypubedipy xypudigihuibich, jëbi ñicxibich ma miich ajcxy agujc jotcuje, ca' ti jotmay, pen Dios jadu'n tzojcp, etz nañ jëbi nhuäcxibipich jim ma miich ajcxy agujc jotcuje, e jim ich nhuinma'ñ nyajpocxip. ³³ Mibijctzooybich Dios müd miich ajcxy ycixpi, je Dios huidibi jotcuje'ajtin yejcp, co huen miich ajcxy xypubedipy xypudigihuiy. Jadu'n jadu'n. Amén.

16

Capxpoocxin nidüg nidüg ma pinjaty y'ixy'ajtyp

¹ Cham ich miich ajcxy nyajnibijccixy, cöbijccixy je ajt nmigüg töxyjäy je Febe co anajty ñicxy ma miich ajcxy. Yi' je' nidügti huidibi pubejtin tumb ma je mibijcpidijc jim Cencrea. ² Mdunipy may'ajt mgöbigipy Febe müd ajt nHuindzin Jesús ycixpi. Com jadu'n ycopicity co jäy huidibi mibijcp Jesucristo huen naymigüg'ajtigixy. Mbubedip mbudigihuij jadu'n nej yi' jotmay müdity. Yi Febe ti ooy mayjäy pubety, e nañ ti xypubetyich.

³ Nguejxypyich capxpooocxin ma jada necy müid yi Priscila etz Aquila huidibi ich anajty müid ooy oy nduñ co ngapxhuäcxyich Cristo ytiy'ajt. ⁴ Yi Priscila etz Aquila yojx ytooc ajcxy yjugy'ajtin müid ich ycixpi, ca'ydi n'ögyich. Nyajnajxypich jäygidaacin ma Dios müid yi' ajcxy ycixpi, co ti xy-pubetyich ajcxy. E nañ jadu'n tüg'óciy jäy ajcxy huidibi ca'pi yjudíojäyity yajnajxcixy jäygidaacin ma Dios müid yi' ajcxy ycixpi. ⁵ Nguejxypich capxpooocxin nañ jadu'n ma jada necy müid yi mibijcpidijc ajcxy huidijaty naymujccip ma Priscila etz Aquila ajcxy ytijc. Etz nañ nguejxypyich capxpooocxin ma yi Epeneto huidibi ooy ndzocyich. Yi' je' tim jayijp huidibi mijpidaac Cristo jim Acaya ñaaxjot. ⁶ Etz nañ nguejxypich capxpooocxin ma María, yi' ooy ti ytuñ müid miich ajcxy müid Cristo ycixpi. ⁷ Etz nañ nguejxypyich capxpooocxin ma yi Andrónico etz Junias. Ich n'amigüg ajcxy huidibi ti ypujxtijc ñäy quipxy müid ich. Capxpaady ajcxy y'ity müid yi apóstoltijc. Jacjayijp ajcxy mijpidacy Jesucristo ca'ydi ich.

⁸ Etz nañ nguejxypich capxpooocxin ma yi Amplias, huidibi ooy yajxon mijpidägy ajt nHuindzin Jesucristo. ⁹ Nañ nguejxypich capxpooocxin ma yi Urbano huidibi xymüidtuñich co ich anajty ngapxhuäcxyich Jesucristo ytiy'ajt. Nañ jadu'n nguejxypich capxpooocxin ma yi Estaquis huidibi oy ndzocy njihuüyich. ¹⁰ Nañ nguejxypyich capxpooocxin ma yi Apeles, huidibi ooy tiy'ajt ti yecy co yi' ymibijcyp Cristo tiydudägy. Nañ nguejxypich capxpooocxin ma yi Aristóbulo etz jac pinjaty huidibi yajpatp ma yi' ytijc. ¹¹ Nañ nguejxypich capxpooocxin ma ich n'amigüg yi Herodión. Etz nañ nguejxypich capxpooocxin ma yi Narciso yjuugy ymígüg huidibi mijpidacp ich ajt nHuindzin Jesucristo. ¹² Nañ nguejxypich capxpooocxin ma yi Trifena etz Trifosa huidijaty tumb ma ajt nHuindzin Jesús ytung. Nañ nguejxypich capxpooocxin ma Pérsida, je migüg huidi oy ndzocyich, etz nañ huidi ooy ytuñ ma ajt nHuindzin Jesucristo ytung. ¹³ Nañ nguejxypich capxpooocxin ma yi Rufo, je huidibi yi mibijcpidijc ycömaayb. Nañ nguejxypich capxpooocxin ma yi' ytaj, com jadu'n njihuüyich jadu'n nej jihuüy yi' ndaj'adyiijich. ¹⁴ Nañ nguejxypyich capxpooocxin ma yi Asíncrito, yi Flegonte, yi Hermas, yi Patrobas, yi Hermes etz ñan tüg'óciy yi mibijcpidijc huidi jim yajpatp ma yi' ajcxy. ¹⁵ Nañ nguejxypyich capxpooocxin ma yi Filólogo, yi Julia, yi Nereo etz yi' y'uch töxyjäybi, yi Olimpas, etz nañ tüg'óciy yi mibijcpidijc huidibi yajpaatp jim ma yi' ajcxy.

¹⁶ Naygapxpóocxigix xic xon nidüg nidüg. Naygimájtzigix miñ xypiy agujc jotcujc. Tüg'óciy huidibi mibijcp Jesucristo ma yi jacjaydyii capj, yquejxyp ajcxy capxpooocxin ma miich ajcxy.

¹⁷ Miich ajcxy migügtijc, may'ajt nbijctzooybich naygüend'adi' ajcxy ma yi jäy ajcxy huidibi mimiimb ayuc ca'pi ytiy'ajtiy, huidibi nigooob yjäyajtziptuna'ñ yjäybijc-huäcxa'ñ, huidibi ca' ixa'ñ yi Dios ytiy'ajt huidibi ti m'ixpijccixy. Puuhuäctüd miich yi' ajcxy. ¹⁸ Com yi jäy ajcxy huidibi ymigügtijc yajhuinma'ñy digoooyb, ca' ajcxy tuñ Jesucristo ytung. Hue' ajcxy yaj'ixpijcp huidi yci'mhuinma'ñ yci'mdzojcin. Je' ajcxy huin'ñinigixp je jäy ajcxy huidibi ca' mijcjee y'ixpicity. Yi ayuc huidibi ymihuidijtyp, jadu'n yajmidoy nej jihuüy oy ytiyity yjanchity, per ca' yi' yjanchity. ¹⁹ Com mayjäy ti xyajmidooyich jadu'n nej miich ajcxy mgapxymidoy Jesucristo, paady jotcujc nayjihuiyijich müid miich ajcxy ycixpi. Ndzojcpich co miich ajcxy mnejhuihuipy huidibi oyhuinma'ñ jaydebí mdúngixipy ajcxy etz ca' jibic-huinma'ñ mdúngixipy. ²⁰ Dios

oyhuinma'ñ etz mic'ajt ti xymooyim jëbi ndzinaayim mïid ajt nmigügtijc agujc jotcujc, ca' ma tzip capxy. Tim huington je xii je tiempo mina Dios yajcödïgoya'ñ yi mujcu' ymic'ajt, e yi' xypubedip xypudigihuiip jëbi mmimadägipy yi ca'oybi. Nmibijctzooybich Dios mïid miich ajcxy ycixpi co ñich ajt nHuindzin Jesucristo huen may'ajt oy'ajt tuñ mïid miich ajcxy jabom jabom.

²¹ Je Timoteo huidibi tumb mïid ñich co ngapxhuäcxich Jesucristo ytiy'ajt xyajniguejxp ajcxy capxpooocxin. Nañ jadu'n Lucio, Jasón etz Sosípater ñich n'amigüg ajcxy, xyajniguejxp capxpooocxin.

²² ñich Tercio huidibi cojaayb Pablo y'ayuc ma jada necy, nañ nguejxypich capxpooocxin ma miich ajcxy, com ñich nañ jadu'n nyajpaadyich ma ajt nHuindzin Jesucristo.

²³ Nañ jadu'n Gayo xyajniguejxp capxpooocxin, yi' xyajjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcip ma Gayo ytijc yquejxyp ajcxy capxpooocxin ma miich ajcxy. Erasto je cajp ytesorero etz ajt nmigüg huidibi yxi Cuarto, nañ xyajniguejxp ajcxy capxpooocxin.

²⁴ Nmibijctzooybich Dios mïid miich ajcxy ycixpi jabom jabom co ñich ajt nHuindzin Jesucristo huen may'ajt oy'ajt tuñ ma miich ajcxy. Amén.

Je capxpooocxin ma yaj'ñbaady yajcapxpaady Dios

²⁵ Tzoc cömayim Dios, tzoc ojadajtim, tzoc huin'ñhuim mïid himnos. Dios mïid ymic'ajt jëbi xypubedipy xypudigihuiipy ajcxy, jaydëbi ajcxy tiydudägy mmibigipy Jesucristo, ca'ydi mjetmetzciiygixy. Tim jadu'n nej je oybi tiy'ajt huidibi ngapxhuäcxpich tim jadu'n nej je Jesucristo ytiy'ajt huidibi jacjadyii jäy ycapxhuäcxixyp. Jada je tiy'ajt huidibi jecy'ajty ca' pin huinjihuuy huidibi Dios ti xyajnejhuuyim. ²⁶ Dios ti xyajhuinjihuuyim nej yhuimbidzimy je ayuc huidibi je profetas ajcxy ycojay jecy'ajty. Dios huidibi tzinaayb huinixii huinitiempo, ane'mb co huen yajcapxhuäcxy jada tiy'ajt oybi ma tüg'öciy naaxhuinñyäj, jigix jëbi mayjäy mijpidägip etz capxymidoohuiy Dios.

²⁷ Mïid co Jesucristo ooy mijhuinma'ñ tuñ mïid ñich ajt ycixpi, paady tzoc cömayim, tzoc ojadajtim etz tzoc huin'ñhuim mïid himnos huinixii huinitiempo yi tügajcpi Dios huidibi ñejhuuydaayb tüg'öciy. Jadu'n ngapxcixyich. Amén.

1 CORINTIOS

Yi Midügpí Necy Huidibi San Pablo Yajniguejx Je Mibijcpidijc Jim Corinto

1-2 Hich Pablo, Dios jadu'n tzojcp co Jesucristo xyajñibicyich co ngapxhuäcxibyich yi' y'ayuc. Hich etz ajt nmigüg Sóstenes nijayñybich miich ajcxy tüg'óciy huidibi jim Corinto huidibi mijpidacp Dios etz ñayyöymüjcgixy jim müd Dios ycixpi. Nijayñybich miich ajcxy huidibi Dios ti yaj'ahuimbijttäy tudägy müd Jesucristo co y'o'cy müd ajcxy mbocy ycixpi. Nijayñybich miich ajcxy huidibi Dios ti huin'ixy, jaydëbi mmüd'idipy huädz jot huädz huinma'ñ. Nañ jadu'n nijayñybich tüg'óciy je jäy huenyma'amyity huidibi Dios mibijctzoob ojadajtp müd ñch ajt nHuindzin Jesucristo yxii. ³ Ndozocypich co ñch ajt nDios Teedy etz ajt nHuindzin Jesucristo oy'ajt may'ajt tunipy müd miich ajcxy, etz xyajjotcugihuiipy ajcxy.

Oy'ajt müd Cristo ycixpi

⁴ Nyajnajxypich Dioscojuyip ma Dios jabom jabom müd miich ajcxy ycixpi, müd co Dios may'ajt oy'ajt ti tuñ müd miich ajcxy ycixpi ma Jesucristo. ⁵ Co ti mmijpidaaccixy Jesucristo, oybi ti mbaatcixy ma tüg'óciy mdzinaayin mjogy'ajtin. May'amy capxy ayuc oybi ti mbaatcixy, etz may'amy huinma'ñ oybi ti mbaatcixy. ⁶ Ma miich ajcxy mdzinaayin mjogy'ajtin etz mgapxy m'ayuc ñiguëxigipy Cristo ytiy'ajt etz ymic'ajt. ⁷ Dios miich ajcxy ti xymöy tüg'óciy ymic'ajt. Ca' ti myajtigoy'ijtcixy ma mdzinaayin mjogy'ajtin huidibi Dios ñiyejcpy, ma je' m'ahuixxcixy co Dios yajñiguëxiga'ñ jadüg'oc ya naaxhuiñ ajt nHuindzin Jesucristo. ⁸ Jesucristo miich ajcxy xyhuijtz'ijtp tudägy, ixti cooni ycixipy tigoyipy je naaxhuiñybi, e co anajty yi' tyduñ naaxhuiñyjäy ajcxy müd ypocy ycixpi, ca' miich ajcxy mbocycähuiipy. ⁹ Dios yjatytimycuydunipy yi' y'ayuc müd miich ajcxy, ca' xy'ixmadzaangixy ni mina xii, com yi' ti xyhuin'ijxcixy co müd mnaymigüg'ajtigixy yi' y'ung, ñch ajt nHuindzin Jesucristo.

Naybijc-huäcxii ma je mibijcpidijc

¹⁰ Migügtijc, ñch miich ajcxy nmünucxtacyp müd Jesucristo yxii co tungixy may'ajt nay'ayuc-huinjihuiiyigix, e ca' mnaybijc-huäcxigixy. Tzinaaygix xic xon müd tú'ciy mjot mhuinma'ñ. ¹¹ Miich ajcxy migügtijc, ti je Cloé y'amigügtijc xyajnimäyich co ooy miich ajcxy mnaychp'ijxigixy, e ca' mnay'ayuc-huinjihuiiyigixy. ¹² Müd jada ycixpi nmäna'ñich co nijëjity miich ajcxy jadu'n mänaangixy: "Hich Pablo nmijnicxpejtpyich." E nijëjity ymänaangixy: "Hich Apolos nmijnicxpejtpyich." E nijëjity ymänaangixy: "Hich Pedro nmijnicxpejtpyich." E nijëjity ymänaangixy: "Hich Cristo nmijnicxpejtpyich." ¹³ ¿Nej Cristo ti ñaybijc-huäcxiiyi? Ca'. ¿Nej Pablo yajcruudzpejti müd miich ajcxy ycixpi? Ca'. ¿Nej ti miich ajcxy mnübejtcixy müd Pablo yxii? Ca' yjadu'nity. ¹⁴ Nyajnajxypich Dioscojuyip ma Dios co ca' jac ni pin ñch ti ngayajñibety. Jëda'ajty ti nyajñibetyich Crispo etz Gayo. ¹⁵ Jadu'n ti nduñich je'gixpi co ca' huaad jäy ajcxy ymänaangixy co ti ajcxy ñibety müd Pablo yxii. ¹⁶ Nañ jadu'n ti nyajñibetyich yi Estéfano müd yi' yjuugy ymigüg ajcxy. Jac ni je' ca' njäymechich pen ti nyajñibetyich. ¹⁷ Com Cristo ca' xyquejxyich jäy

yajñi#bejtpi. Hue' janchtiy ti xyquexyich co ngapxhuäcxibich yi' y'ayuc ytiy'ajt oybi. Ca' nyajtuñich ixpicytjic y'ayuc yhuinma'ñ. Co ixypiy nyajtuñich ixpicytjic y'ayuc yhuinma'ñ, naadigi'ajt ixypiy co Cristo y'o'cy ma yi cruudz müd ajt nbocy ycixpi.

Cristo ymüd Dios ymic'ajt etz yi' y'ixpijcin etz ytiy'ajt

¹⁸ Yi jäy ajcxy huídibi y'alma tigoyam, loci huinma'ñ yi' tijcixy co Cristo y'o'cy ma yi cruudz müd ajcxy ypocy ycixpi. Per ñich ajt pinjaty y'alma nüdögam, hue' minaanim co jada ayuc tiy'ajt müd Cristo ycixpi, ymüd yi' Dios ymic'ajt. ¹⁹ Com jaybety jadu'n ma Dios ñecy, ma Dios jadu'n ymina'ñ:

Nyajtigoyaaamybich yi ixpicytjic y'ayuc yhuinma'ñ.

Njibijcibich yi cohuinma'ñjädjic ajcxy yhuinma'ñ.

²⁰ ¿Ti mic'ajt ymüd yi cohuinma'ñjädjic ajcxy? ¿Ti mic'ajt ymüd yi ixpicytjic? ¿Ti mic'ajt ymüd yi huídibi ajcxy nay'ixquipxip müd ixpijcin? Ca' ti mic'ajt müdity yi' ajcxy, com Dios ti yaj'ahuimbity yi naaxhuiñ y'ixpijcin tzuu huinma'ñ loci huinma'ñ. ²¹ Com Dios jadu'n ti tzocy co jäy ajcxy ca' padaangixy Dios ytiy'ajt ma yi naaxhuiñjäy ajcxy y'ixpijcin. Dios yjäygidacpy co jébi jäy ajcxy y'alma nüdögiipy co ajcxy mibigipy je Dios y'ayuc huídibi ngapxhuäcxypich. Je Dios y'ayuc ytiy'ajt huídibi ñich ajcxy ngapxhuäcxpy, yi' yi naaxhuiñjäy ajcxy huinjihuñyigixyp nej tzuu huinma'ñ loci huinma'ñ.

²² Yi judíojäy ajcxy ooy tzachtzojccixy co Dios tunipy iixpejt mijhuinma'ñybi. Yi griego jäy y'ixtaaygixyp ayuc huinma'ñ etz huenhuídiibity ixpijcin. ²³ ñich ajcxy ngapxhuäcxich co Cristo y'o'cy ma yi cruudz müd jäy ajcxy ypocy ycixpi. Yi maybi judíojäy ajcxy ca' mijpidägaangixy ca' cöbigaangixy ñich ajcxy n'ayuc. Etz yi maybi jäy ajcxy huídibi ca'p yjudíojäyity, hue' tijcixy co tzuu huinma'ñ loci huinma'ñ ñich ajcxy n'ayuc. ²⁴ Per yi jäy ajcxy huídibi Dios ti yhuin'ixigixy, huen yjudíojäyity, o huen ycajudíojäyity, hue' ajcxy tijcixy co je Cristo ymüd anajty Dios ymic'ajt etz ymüd anajty Dios y'ayuc ytiy'ajt. ²⁵ Co ixpicytjic tijcixy co Dios ytung, tzuu huinma'ñ loci huinma'ñ je', nigi jac'oyhuinma'ñ yi' huídibi Dios tumyb, ca'ydi huídibi jäy ajcxy ytumyb. Co ixpicytjic yminaangixy co Dios ca' ymic'ajt müdity, nigi jacmic'ajt müd yi', ca'ydi huídi jäy ajcxy ymüd.

²⁶ Migügtjic ajcxy, huinmay miich ajcxy jadu'n nej Dios ti xyhuin'ixxcixy. Ni may miich ajcxy huídibi ca' y'ixpicyity, tim nihueeni huídibi ixpicyip ma miich ajcxy. Ni may miich ajcxy huídibi ca' ti mic'ajt, ca' ti ane'min müdity. Ni hueeñ miich ajcxy huídibi mic'ajt müd etz ane'min müd. Ni may miich ajcxy huídibi oyñipinjäyity. Ni hueeni miich ajcxy huídibi y'ap yteedy rey'ajtp. ²⁷ Per Dios ti huin'ixy yi jäy ajcxy huídibi ca' y'ixpicyity co jadu'n yajtzo'yduna'ñ yi ixpicyjäy yi cohuinma'ñjäy. Dios ti huin'ixy yi jäy ajcxy huídibi ca' ti mic'ajt müdity, müd co jadu'n yajtzo'yduna'ñ yi jäy ajcxy huídibi mic'ajt müd, ane'min müd. ²⁸ Dios ti huin'ixy huídibi jäy ajcxy ca' mij'ixx mijpidaaccixy, huídibi jäy ajcxy ytiippy co ca' y'oyity. Dios jadu'n tuuñ co yajcödigoya'ñ yi huídibi jäy ajcxy mij'ixxp mijpidacp, je huídibi jäy ajcxy ytiippy co y'oyity. ²⁹ Jadu'n Dios ytuñ co ca' tzocy co ni pinjäy ca' ñaygömayñyb ci'm ma yi' yhuinduu. ³⁰ Per Dios ci'm yaj'oyñy nej jébi miich ajcxy myajpatcixy müd Cristo Jesús. Dios ci'm yaj'oyñy nej jébi ajt nbaatim ixpijcin ma Cristo. Nañ jadu'n yaj'oyñy nej jébi Cristo xyaj'ahuimbijtim tudägy, jaydëbi Dios xycöbijnim

nej tudägy jäy. Nañ jadu'n Dios yaj'oyiïy nej jëbi huaad nbaatim ajt nhuädzjot nhuädzhuinma'nñ ma Cristo. Nañ jadu'n Dios yaj'oyiïy nej jëbi Cristo xyñihuaanim ajt n'alma etz njugy'ajtin. ³¹ Paady ycixpi jaybety ymiñ ma Dios ñecy, ma jadu'n ymina'nñ: "Pinjaty naygömayaanip ci'm, huen naygömayii müid co mibicy ajt nHuindzin Dios."

2

Je y'ayuc ytiy'ajt, je Cristo huidibi cruudzpejt

¹ Per co n'oyich ma miich ajcxy jayhuin, ngapxhuäcxyich anajty Dios y'ayuc ytiy'ajt, oy'amy nyaj'ixpijcyich, ca' nyajtuñich ixpijyäjy ajcxy y'ayuc, etz nañ jadu'n ca' nyajtuñich tzipjatypi ayuc. ² Co jim n'ijtyich ma miich ajcxy jayhuin, chi nhuinma'nñbidacyich co ca' jac ti ayuc ti huinma'nñ nyajmüidmüydägaangixy, jë'yi janchtiy nyajmüidmüydägaangixy Jesucristo etz jadu'n nej je' yajcruudzpejti müid jäy ajcxy ypocy ycixpi. ³ Co jim iich anajty nyajpaadyich ma miich ajcxy, chi ooy yung naxy naybidaacich, ooy ndzigüy njihuiyich. ⁴ E co nmüidmüydaacyich miich ajcxy, co ngapxhuäcxyich Dios ytiy'ajt ma miich ajcxy, ca'pi iich miich ajcxy nyajmibicy müid ixpijtyjic y'ayuc müid tzipjatypi ayuc. Je Espiritu Santo xypubejtpich anajty co ajcxy nyaj'ijxy Dios ymic'ajt, e paady ycixpi ti ajcxy mmibijccixy Dios y'ayuc. ⁵ Jadu'n je Espiritu Santo xypubetyich anajty, jigix miich ajcxy mijpidägipy Dios, ca' nmüinaanim müid co ti mmidoogixy oyjatypi ayuc huidibi jäy ajcxy ti cojy ti macxy. Ti nmijpidaaccixy Dios com ti m'ijxcixy ti mjihuiyigixy Dios ymic'ajt.

Dios xyajnejhuüiyim yi' ytiy'ajt müid y'Espiritu Santo

⁶ Oy co ti nyajmibicyich miich ajcxy müid ayuc huidibi ca' chipjatyty, per nañ jadu'n nyaj'ixpijcyich oyjatypi ayuc tzipjatypi ayuc yi mibijcpidijc ajcxy tüibi yhuinma'nñ ymiinni ymejchni. Tigachjaty iich n'ayuc ndiy'ajt e ca' ñaybadyii müid naaxhuiñyäjy ajcxy y'ayuc ytiy'ajt huidibi ca' mibijccixy huidibi tzinaayb jugy'ajtp jadachambi xii jadachambi tiempo. Iich n'ayuc ndiy'ajt ca' ñaybadyii müid je jäy ajcxy y'ayuc ytiy'ajt huidibi ane'mb ya naaxhuiñ, yi jadu'mbi jäy yi' ajcxy yjugy'ajtin cixamb tigoyamb tüccü'yi. ⁷ Iich ajcxy nyaj'ixpijcpy Dios y'ayuc ytiy'ajt huidibi ca' ni pin jecy'ajty nejhuüy huinjhuüy, je ayuc tiy'ajt huidibi Dios ymüid coyüch, je ayuc tiy'ajt huidibi Dios ti cojy ti macxy jecy'ajty ca'ni anajty naaxhuiñybi chondacy. Dios ycoj ymacx jada ayuc, jaydëbi ajt n'alma ñidzoocim huinixii huinitiempo. ⁸ Ni tüg mij'ane'mbi huidibi tzinaayb jadachambi xii jadachambi tiempo, ca' huinjhuüy jada ayuc. Co ixypy ajcxy huinjhuüy, ca' ajcxy cayajcruudzpejty je Huindzin Dios y'ung, je huidibi müid Dios y'oy'ajtin ymij'ajtin. ⁹ Com ca' ajcxy huinjhuüy Dios y'ayuc, paady ycixpi jaybety ymiñ ma Dios ñecy, ma jadu'n ymina'nñ:

Ni tüg jäy ca' ixy, ni tüg jäy ca' midoy, ni tüg jäy ca' yhuinma'nñybaady jadu'n nej Dios ni'ixiy müidity müid je jäy ajcxy ycixpi huidibi yi' mijpidaacip yajmij'ajtip.

¹⁰ Müid co nmijpidaacim Dios, paady ycixpi Dios yaj'oyiïy nej jëbi je Espiritu Santo xyajnejhuüiyim yi' ytiy'ajt. E je Espiritu Santo yhuinjhuüydaayb ñejjihuiydaayb tüg'óciy, ixti yhuinjhuüydaayb nej Dios yhuinma'nñ ti pidägy co tuna'nñ, je huidibi ca' pin nejhuüy.

¹¹ Ca' pinjäy jëbi huinjhuüy nej jadügpä jäy yjot yhuinma'nñ müidity. Je jäy yci'mhuinma'nñ jëbi huinjhuüy nej je' yci'mjot yci'mhuinma'nñ

müidity, ca' jac pin. Nañ jadu'n ca' jac pin jëbi huinjihuüy nej Dios yjot yhuinma'n müidity. Dios yci'mjihui'n huinjihuüyb nej Dios yjot yhuinma'n müidity. ¹² Dios ca' xyaj'adigüyüm xyajjottigüyüm huingjäy yjihui'n ymic'ajt. Hue' Dios xyaj'adigüyüm xyajjottigüyüm y' yci'mjihui'n yci'mmic'ajt, paady ycixp jëbi huinjihuüyüm tüg'óciy huidibi ti xymooyüm. ¹³ Hich ajcxy nyajmüdmüydacpy müich ajcxy je ayuc tiy'ajt huidibi je Espíritu Santo xyaj'ixpijccixyich. E ca' nyajmüdmüydaaccixy je tiy'ajt huidibi ti n'ixpiyich ya naaxhuiñ huidibi jäy ajcxy ti cojy ti macxy. Nyaj'ixpijccixy Dios y'ayuc ytiy'ajt huidibi je Espíritu Santo xyajnejhuüyich. Hich ti nyaj'ixpiyich y' ajcxy huidibi müid Dios yjihui'n ymic'ajt ma y'aa yjot.

¹⁴ Pinjaty ca' müidity Dios yjihui'n ymic'ajt, ca' y' cöbigañ je tiy'ajt huidibi je Espíritu Santo xyajnejhuüyüm. Com y' ajcxy ytijp co jada tiy'ajt tzuu huinma'n loci huinma'n y'. Nañ ni ca' ajcxy Dios ytiy'ajt huinjihuüy, com ca' ajcxy müidity Dios yjihui'n ymic'ajt huidibi yajnejhuüyb Dios ytiy'ajt. ¹⁵ Je jäy huidibi ymüid'ajtipy Dios yjihui'n ymic'ajt, y' jëbi yajcüyöy yajtecyöy tüg'óciy pinjaty yjot yhuinma'n. Per ca' y' huaad pinjaty yajcüyöy yajtecyöy yjot yhuinma'n. ¹⁶ Com jadu'n Dios ymüina'n ma ñecy: "¿Pin jäy huinjihuüyb nej Dios yhuinma'ñ müidity? Ca' ni pin. ¿Pin jäy huaad Dios yaj'ixpiy? Ca' ni pin." Oy ca' pin huinjihuüy jecy'ajty nej Dios yhuinma'ñ müidity, jadachambi hich ajt huinjihuüyüm nej Cristo yhuinma'ñ müidity.

3

Je huidibi ajcxy mübijcp ytungixy ma Dios

¹ Migügtijc ajcxy, co ti n'oyich ma müich ajcxy, chi nmüdmüydaaccixy jadu'n nej jihuüy müich ajcxy mhuinma'ñ müidity nej naaxhuiñjäy ajcxy yhuinma'ñ müidity huidibi ca' ymübijccixy. E ca' anajty müich ajcxy müidity je mhuinma'n huidibi je Espíritu Santo yejcpy. Müich ajcxy nmübijcin ma Cristo jadu'n y' nipaady nej ma'xungdjic ymübijcin. ² Ti nyaj'ixpijccixy Dios y'ayuc huidibi ca' jëbi tzip mhuinjihuüygixy. Jadu'n nipaady nej jäy ajcxy yaj'ügy leche y' ma'xungdjic, müid co cacöbigañ caayin uucin huidibi jemxy cidacp ma yjot. Ca' müich ajcxy anajty ti mnayñi'ixüygixy ma mjot mhuinma'n nej jëbi mhuinjihuüygixy Dios y'ayuc y' tzipjatypi. Chambaadni ca' mnayñi'ixüyini ajcxy ma mjot mhuinma'n nej jëbi mhuinjihuüygixy y' tzipjatypi ayuc. ³ Chambaadni müich ajcxy myajtuñ mjot mhuinma'n jadu'n nej naaxhuiñjäy ajcxy müidity huinma'n ca'pi ymübijccixy, chambaad mmi'ixtinaaygix y' migügtijc, chambaad mnaychip'ixüygix naybijc-huäcxigix. Jadu'n m'idüztccixy nej jacjadyi jäy ajcxy y'idüztccixy huidibi ca' ymübijccixy. ⁴ Com nijëjity müich ajcxy müinaangixy: "Hich naygomajtzip ma Pablo." Etz nijëjity müinaangixy: "Hich naygomajtzip ma Apolos." Jada je tiy'ajt co ca' mnay'ayuc-huinjihuüygixy tim jadu'n nej jäy ajcxy ca' nay'ayuc-huinjihuüygixy huidibi ca' müidity Dios yjihui'n ymic'ajt.

⁵ ¿Pin je' je Apolos? ¿Pin je' je Pablo? Hich Pablo etz Apolos nimetz ajcxy nduñ ma Dios ytung, e hich müich ajcxy nyajmübijccixy Cristo. Hich ajcxy nduñ nidüg nidüg je tung huidibi Dios xymooyich. ⁶ Hich jayijp'aty müich ajcxy ti nyaj'ixpiyich, e Apolos jac'axam. Jadu'n müich ajcxy nipaady nej tüg moc cam huidibi hich ti nnüpy, e Apolos jac'axam ti pidägy nüi.

Per Dios ti yajyeegy je moc. ⁷ Ca' ytimyñejity p̄in ti yñ̄ipy, e p̄in ti pidägy je n̄i. Dios yì' tügpajc cop̄icyip. Com yì' yajyeecp je moc. ⁸ Yì' huidibi niip etz yì' huidibi n̄i pidacp, quipxyjaty ajcxy. Dios yegamb je oy'ajt ma nidüg nidüg jadu'n nej anajty ti ytungixy. ⁹ Com ñich etz Apolos naymüg'ájtibich ajcxy ma Dios ytung. Jadu'n miich ajcxy nipaady nej Dios ycam huidibi Apolos ti tuñ etz huidibi ñich ti nduñ.

Nañ jadu'n miich ajcxy nipaady nej tüg tijc huidibi Dios ycojpy. ¹⁰ Dios ti xyajñibicyich yì' ytung ndunipyich. Ti nyaj'ixpicyich miich ajcxy Dios y'ayuc ytiy'ajt. Jadu'n ñich nipaady nej tüg pojtzp̄i oybi huidibi ti yajtzondägy je tzaadijc poch. Chi huingjäy xyjacyaj'ixpijccixy. Jadu'n yì' nipaady nej huingbi pojtzp̄i huidibi je tzaadijc poch jacijppodz̄iyb. Cop̄icy co nidüg nidüg huidibi yaj'ixpijcp Dios ytiy'ajt yajxon yaj'ixpijccixipy. ¹¹ Dios ti pidägy Jesucristo tügpajc huidibi huaad nm̄ibijcim, e ca' huaad pidacy huingbi. Jadu'n Jesucristo nipaady nej tüg tijcpoch chondägy. ¹² Co pinjaty yaj'ixpicy Dios y'ayuc ytiy'ajt tiydudägy, chi jadu'n nipaady nej jihuïy pinjaty tijcpojtzp̄ m̄id ori, m̄id plata etz m̄id tzaa oyjatypi. Pinjaty ca' yaj'ixpicy yajxon Dios ytiy'ajt, jadu'n nipaady nej jihuïy pinjaty tijcpojtzp̄ m̄id quipy, m̄id miy, etz m̄id moc'aay. ¹³ Jiini co anajty x̄i tiempo paady mina Cristo tiyduna'ñ yì' yjāy huin'it ñiguëxigipy nej Dios ytumbi ajcxy ti ytungixy co ti yaj'ixpijccixy. Niguëxigip pen oy ti yaj'ixpijccixy Dios ytiy'ajt, o pen ca' oy ti yaj'ixpijccixy. Jadu'n nipaady nej Dios jin pidägy ma je tijc, e je quipy, je miy, etz je moc'aay tigoydāhuipy ma je jin. Etz je ori, plata etz tzaa oyjatypi ca' ytigoydāhuipy m̄id je jin. ¹⁴ Peni oy yajxon pinjaty ti yaj'ixpicy Dios ytiy'ajt, chi Cristo premio mōhua'ñ jada jāy co ooy yajxon ti yaj'ixpicy. E jadu'n yì' ytung nipaadip nej je ori, plata, etz tzaa'oyjatypi huidibi ca' ytigooy ma je jin. ¹⁵ Pen je Dios ytumbi ca' oy yajxon ti yaj'ixpicy Dios y'ayuc ytiy'ajt, chi ca' premio pada'ñ. Jadu'n yì' ytung nipaadip nej je quipy, je miy, etz je moc'aay huidibi ti ytigoy ma je jin. Jadu'n nipaadip m̄id jada jāy nej jihuïy ti ñaxy jinjoty, e ti ytigoydāy ma je jin tijaty ym̄id, je'yì' yjugy'ajtin ti yajtzögy.

¹⁶ ¿Nej ca' mnejhuïygyixy? Pen Dios yjihuï'ñ ymic'ajt yajpat ma miich ajcxy, jadu'n nipaady nej jihuïy Dios cì'm ti chinaydacp̄icy ma miich ajcxy, nej jihuïy miich ajcxy Dios xytijc'adyii. ¹⁷ Pen ji pinjaty huidibi yajhuindigoy Dios chinaydac, huin'it Dios yajtigoya'ñ jada jāy. Yì' Dios chinaydac huadz'it amay'it yì', com Dios ti chinaydacp̄icy ma miich ajcxy huidibi m̄ibijccixp.

¹⁸ Ix mnayhuin'ñnigix cì'm. Pen nidügti miich ajcxy mnaydiyii co oy ixpicyity ma naaxhuin'yjāy y'ixpijcin, cop̄icy jāydigoyipy yì' y'ixpijcin, jigix ixpigipy Dios ytiy'ajt. ¹⁹ Yì' naaxhuin'yjāy y'ixpijcin jadu'n nipaady m̄id Dios nej tzuu huinma'ñ loci huinma'ñ. Paady jadu'n yjaybetyity ma Dios ñecy ma jadu'n ymina'ñ: “Dios yajpocycāhuip yì' ixpicytijc m̄id yci'm'ayuc m̄id co chachnaygōmayii.” ²⁰ E jadu'n yjaybetyity jadüg'it ma Dios ñecy ma jadu'n ymina'ñ: “Je Huindzin Dios ñejhuïy co yì' ixpicytijc y'ayuc yhuinma'ñ ca' choobaady.” ²¹ Ni p̄in ca' huaad amij agix ñayjihuiyii, m̄id co mijnicxpety oyñipin y'ayuc. Miich ajcxy m̄id'ajttaayb tüg'óciy tijaty. ²² Miich ajcxy m̄id'ajtpy Pablo, Apolos etz Pedro. Nañ jadu'n miich ajcxy m̄id'ajtpy je naaxhuin'ybi, je tzaajp, je jugy'ajtin, je o'cin, je x̄i je tiempo huidibi ji yajpatp, etz huidibi mim cidaacp. ²³ Je Cristo m̄id'ajtpy miich je' ajcxy cì'am etz Dios ym̄id'ajtpy Cristo cì'am.

4

Je apóstoles ajcxy ytung

¹ Jëbi jadu'n co ìch etz Apolos, ìch miich ajcxy xytijcixy Cristo ytumbi huidibi Dios ti xyajñibíjccixyich, nyaj'ixpijccixyich etz nguend'ájtciixyich yí' y'ayuc ytiy'ajt huidibi jecy'ajty ca' pin nejhuiy huinjihuiy. ² Pinjaty cuend'ajtp huingjäy yje', copicy tiydudägy ytunipy, jaydëbi yí' yhuindzin yjäygidägiyb yí' ytung. ³ Per ca' ooy nduñich cuendi co miich ajcxy xyajciyöy xyajtecyöy ìch nbocy. Nañ jadu'n ca' ooy nduñich cuendi co ixypy tüg juez yajciyöy yajtecyöy ìch nbocy. Nañ jadu'n ca' nyajciyöyich nyajtecyöyich ngi'mbocyich. ⁴ Ca' nayjihuiyijich co nmundungooyich miich ajcxy. Ca' jadu'n nminañich co ca' ma ndundungooyich. Hue' ajt nHuindzin Jesucristo yí' je' xyajciyöyip xyajtecyöyip ìch nbocy, ca' jac pinjaty. ⁵ Paady ycixpi' ixmajtzcix jadu'n nej miich ajcxy xypocy'ijxcixy jayijpni ma ca'ni Jesucristo ymiñ jadüg'oc ya naaxhuiñ. Ahuixcix co Jesucristo yajniguëxigaani je jäy ajcxy ypocy huidibi cham ca' ñiguëxigy, huidibi jadu'n nipaady nej jihuiy yüch y'ity agootztuuby. Jesucristo co anajty ymiñ jadüg'oc, chi yajniguëxigipy nej jäy ajcxy yjot yhuinma'ñ müidity. E Dios nidüg nidüg jäy cömaya'ñ pen oy ti ytuñ, e ca' cömaya'ñ pen ca' oy ti ytuñ.

⁶ Migügtijc ajcxy, ci'm ti naybidägyijich müid Apolos jadu'n nej tüg ijxpejt ma jada tiy'ajt huidibi cham ti nyajnijayiygixp. Jadu'n ti nduñich müid miich ajcxy m'oy'ajtin ycixpi, jigix jëbi miich ajcxy m'ixpijccixy jadu'n nej jëbi mguydundaygixy Dios ytiy'ajt, e ca' mjactungixy huidibi Dios ycapxcödujc ma ñecy. Nañ jadu'n ìch ti nduñich müid Apolos nej tüg ijxpejt, jigix miich ajcxy ca' mnaygömayiyb ci'm, e ca' mminaangixy co mnaygomájtzigixy ma tüg Dios ytumbi, e jadüg m'ixtijcixy. ⁷ ¿Pin ti xyajnajxcixy jadu'n nej jihuiy ajcxy ooy mgömayity? Ca' ni pin. ¿Ti miich ajcxy müidity, huidibi Dios ca' ti xymooygixy? Ca' ni ti. E pen Dios ti xymooygixy tijaty ajcxy mmüidity, ¿na'amy co mnaygömáygixy ci'm, jadu'n nej jihuiy ci'm ti mganar'ajtcixy tijaty ajcxy mmüidity?

⁸ Jadu'n miich ajcxy mnaybidáacigixy nej jihuiy ti mgüxigixy, nej jihuiy ti mgomeeñygojcixy, nej jihuiy mreya'ajtcixy, e ca' mdzojccixy co nyaj'ixpigipyich. ⁹ Miich xytijcixyich nej jihuiy ìch ajcxy apóstoltijc Dios ti xypidaaccixich nej huidibi ca' ytimcapxpaadyity, nej huidibi ypocy co'ögiiyb, co ángeles ajcxy etz jäy ajcxy xyñixliccixyich xyñiyáaxcixyich. ¹⁰ Miich ajcxy xytijcixyich co ìch ajcxy apóstoltijc jadu'n nej jäy tzuu locip co ndúngixyich müid Cristo ycixpi. E miich mnaybidáacigixy co'ayuc cohuinma'ñ co ti mmibijccixy Cristo. Miich ajcxy xytijcixyich co ca' ti mic'ajt ajcxy müidityich, e miich ajcxy mnaybidaacip nej jihuiy ooy ti mmicpijccixy, nej jihuiy ooy mgömayity, e ìch ajcxy ca' nyaj'ixaangixyich. ¹¹ Chambaad ìch ajcxy nyuubögyijich etz ndidziyijich. Minaajity n'íjtciixyich ca' ìch ajcxy nhuit. Jäy ajcxy xyñi'ojiiygixich etz xyhuingojxy xyjijpcójxcixich, ni ndijc ìch ajcxy ycaca'tcixy. ¹² Ndúngixyich xuuyi müid ngi'm ngijich. Co pinjaty xyñi'ojiiygixyich, chi n'adzógixyich müid oy ayuc. Co ìch ajcxy xy'ixhuidityich xypahuidityich, ooy nmecxtújcixyich yí' tzaachypi. ¹³ Co pinjaty jibic xyñigápccixyich, chi

huinma'ñ ixtáaygixyich oy'amy miid mecxtujcin n'ihuújçixyich ngapx-huújçixyich nej jëbi y'ayuc-huinjihuiygixy. Ca' naaxhuiñjyá ajcxy xy-chójccixyich. Ixti chambaad jadu'n ajcxy xy'íjçixyich nej püx, jadu'n ñich ajcxy nipaady nej jibicpi huidibi ca' jáy ajcxy tzocy.

¹⁴ Ca' ñich miich ajcxy nyajnijayiy jada ayuc co nyajtzöydunaangixy. Hue' janchtiy jada ayuc nyajnijayiyb ajcxy co ngapxhuijáangixy. Jadu'n ndzojccixy njihuiygixy nej ndzocyich njihuiyich ngi'm'ung. ¹⁵ Oy ixyipy yjanchity co miich ajcxy miid majc mil huindzindijc huidibi xyaj'ixpijccixy Cristo ytiy'ajt. Per tügpajcpi je mhuindzin huidibi oga'n xyajmibijcy ajcxy Cristo, ca' nan canaag. ñich jadu'n oga'n ti nyaj'ixpiyich miich ajcxy Jesucristo ytiy'ajt nej jëbi ajcxy m'alma ñidzögipy. Paady ycixpi jadu'n ñich nipaady nej miich ajcxy mdeedy ma nmibijcin. ¹⁶ ñich miich ajcxy nimaayb mictägy, com ti nyajmibijccixy Cristo oga'n, paady cuydungix ajcxy Dios ytiy'ajt, jadu'n nej ñich ngu-yduñich.

¹⁷ Paady ycixp nguexyich Timoteo ma miich ajcxy. Yi Timoteo ooy ndzocyich ooy njihuiyich. Ti ñich Timoteo nyajmibicyich Cristo, e ooy xycapxymidooyich yajxon, jadu'n yi' nipaady nej ngi'm'ungich. Yi Timoteo xyajjäymedzip miich ajcxy je ayuc je tiy'ajt jadu'n nej nyaj'ixpiyich ma tüg'óciy cajp ma yi jáy ñaymújçigixy huidibi mijpidaaccixp Jesucristo. ¹⁸ Cham nije' nije' miich ajcxy amij agix mnayjihuiyii co jadu'n mīnaangixy co ca' ñicxy n'ixa'ñich miich ajcxy jadüg'oc. ¹⁹ Per ca' jadu'n mīnaangixy co ca' nnicxa'ñich ma miich ajcxy. Tzojc ñicxibich ma miich ajcxy, pen Dios jadu'n tzojcp. Co anajty jim nmechich, huin'it ca' n'amidoo'ida'ñich yi' ajcxy y'ayuc huidibi amij agix nayjihuiyip. Hue' janchtiy nejhuñhua'ñich pen ymiid yi' ajcxy Dios ymic'ajt chög'ajt. ²⁰ Pinjaty miid Dios ymic'ajt Dios chög'ajt, je' yajñiguëxícip Dios y'ane'min. Pinjaty miid oyñiti ayuc, ca' je' yajñiguëxígip Dios y'ane'min. ²¹ Co nnicxibich jim ma miich ajcxy, çti ajcxy mdzojccixyp ndunipyich? ¿Nej oy nminicxibich ma miich ajcxy tüg matz jigix ajcxy nhuójpcixipy? o ¿Mdzojccixyp co nnicxibyich ma miich ajcxy miid yungnaxy njot nhuinma'ñich, etz oy'amy ajcxy nmigapxipy, jadu'n nej jihuñy ooy ndzojccixy njihuiygixy?

5

Moy ajcxy castigo tüg jáy huidibi anajty ti ytundigooy

¹ Mayjäy nejhuñy co ma miich ajcxy jim tüg yëydijc huidibi tundigooyb miid tüg töxyjäy. Nigi yi' ytundigooy ca'ydi huñi ajcxy ca' Dios y'ayuc mijpidaci. Ti nnejhuñyich co jim tüg yëydijc huidibi miiddzinaayb ycoo'uu. ² Jim miich ajcxy miidity je mijpocytumbi, e miich ajcxy amij agixy mnayjihuiyigixy co ajcxy mdzach'ixpiyity ma Dios ytiy'ajt. Jac'oy co ixyipy mdajcixy mmaygixy. Yajpidzimgix ma miich ajcxy yi jáy huidibi jadu'n tundigooyb. ³ Ca' ytimyñejity co ca' nyajpaadyich jim ma miich ajcxy. Jadu'n nipaady nej jihuñy ñich njimity, miid co ooy njihuiyich nej miich ajcxy mjahtcixy m'ayoogixy. Paady ycixpi ti nyajpocycäyich miid Jesucristo y'ane'min yi jáy huidibi jim ooy mij ytundigooy, tim jadu'n nej ixyipy jim nyajpaadyich ma miich ajcxy. ⁴ Huomijctaaygix yi mibijcpidijc, e jadu'n nipaadipy nej jihuñy ñich njimity quipxyi miid miich ajcxy. Huin'it miich ajcxy miid'ajtcixipy ajcxy ajt nHuindzin

Jesucristo y'ane'min ymic'ajt. ⁵ Miiid je ane'min mic'ajt huidibi Jesucristo ti xymöyich, myajpidzimipy je pocytumbi ma miich ajcxy. Jadu'n mijhuin nipaadipy nej jihuiy myajcidigiiygixy je mujcu', jaydëbi yi' ñinïcx ytiгойipy, per je' y'alma nidzögip mina anajty iich ajt nHuindzin Jesús yhuimbity ya naaxhuiñ jaydëbi tiydunipy jay ajcxy miiid ypocy ycixpi.

⁶ Ca' mnaygömaayigixy ci'm miiid huidibi mdungixyp. ¿Nej ca' mnejhuuyigixy nej jay mina'ñ co levadura huidibi ca' y'oyity yajhuindigooyb tüg'ócy yi harina jich? ⁷ Jadu'n je pocytunii nipaady nej levadura huidibi ca' y'oyity, paady ycixpi yajtigooygix je pocytunii nej anajty mdundigóoygixy taabi anajty ajcxy ca'ni mmibijccixy. Jadu'n mdungixipy, jigix jëbi m'ijtcixyp huädz ca' ma pocy. Co jadu'n mdungixipy, jadu'n nipaadip miich ajcxy nej tzajcaagy oyatyp. Nejhuiybich co miich ajcxy ti mbocyñihuaatzcixy, com Cristo nayyejci huen yaj'ögyii miiid ajt nbocy ycixpi. Jesucristo jadu'n nipaady nej ajt ngöbixy mang huidibi miiid nhuindzigiiyim Dios miiid ajt nbocy ycixpi. ⁸ Tzoc tzinaayim miiid huädz njot huädz nhuinma'ñ, jadu'n nipaady nej judiojáy co ajcxy amay'ajtcixy yi pascua xii. Tzoc yajtigooyim ma ajt ndzinaayin njugy'ajtin yi jibic jot jibic huinma'ñ. Tzoc cuydunim Dios yti'ajt.

⁹ Ti nnijayiiygixy jayhuin co ca' huaad migüg'ájtigixy pinjaty huidibi tundigooyb miiid töxyjáy ajcxy. ¹⁰ Ca' nan jadu'n nmína'ñich co tücci'yi mbuhuäctútcixipy yi naaxhuiñjáy ajcxy huidibi ca' ymibijccixy, huidibi tundigooygixp miiid töxyjáydjic, huidibi ooy y'adzojccixy, huidibi ajcxy meetzp, huidibi ajcxy tzaadzech quipychech ojadajtcixp. Co ixipy tücci'yi mbuhuäctútcixipy yi naaxhuiñjáy ajcxy, copicy co ixipy miich ajcxy mbidzimgix ya naaxhuiñ. ¹¹ Jayhuin ti nijayiiygixy co ca' huaad mnaymigüg'ájtigixy miiid yi jay ajcxy huidibi naydjicigixp co ymibijccixy, je huidibi tundigooygixp miiid töxyjáydjic, huidibi ajcxy ooy adzojccixy, huidibi ajcxy ojadajtp tzaadzech quipychech, huidibi ooy ycapxtigooygixy, huidibi ajcxy amügy jáy, etz huidibi ajcxy meetzp. Nañ ni ca' huaad mgaymujccixy m'uucmujccixy miiid yi' ajcxy. ¹²⁻¹³ Com ca' yhuaadity co iich nyajciyöyipy nyajtecyöyipy yi jay ajcxy ypocy huidibi ca' mijpidaaccixy Jesucristo. Dios ci'm yajciyöyam yajtecyöyam yi' ajcxy ypocy. Hue' janchtiy copicy co miich ajcxy myajciyöyip myajtecyöyip yi mibijcpidijc ajcxy ypocy. Yajpidzimgixp yi pocytumbi ma miich ajcxy.

6

Tzip capxy ma je juez ajcxy huidibi ca' ymibijccixy

¹ Pen xymidundigooyb tüg mibijcpi, ¿nej oy mnayjihuiyii co nicxy mxäy yi mmigüg ma yi tungmiiidpi huidibi ca' mibijccixy Dios y'ayuc? ¿Cay jac'oy co myaj'abigipy je mibijcpidijc ajcxy, e jim y'oyihuipy je ayuc nej anajty ti xymidundigoy? ² ¿Nej ca' mnejhuuyigixy co yi jay ajcxy huidibi Dios ti ypocyhuinméecigixy, yi' ajcxy yajciyöyamyb yajtecyöyamyb yi naaxhuiñjáy ajcxy ypocy huidibi ca' mijpidaaccixy Dios? Pen miich ajcxy myajciyöyip myajtecyöyip yi naaxhuiñjáy ajcxy ymijpocy, ¿nej co ca' mjajticy nej ajcxy myajciyöyipy myajtecyöyipy yi mibijcpidijc ajcxy ypocy huidibi ca' ytimymij ytimycajeejity? ³ ¿Nej ca' mnejhuuyigixy co miich ajcxy myajciyöyamyb myajtecyöyamyb ixti yi ángeles ajcxy ypocy? Pen miich ajcxy myajciyöyamyb myajtecyöyamyb yi ángeles ajcxy ypocy, ñgi ca' chipity co ajcxy myajciyöyipy myajtecyöyipy yi mibijcpidijc ajcxy

ypocy huídibi tziinaayb jugy'ajtp ma jadachambi xii tiempo. ⁴ Pen miich ajcxy mnaymidundigóoyigixp, ¿nej co nicxy mbidaaccixy yi mxihuín ma yi jáy ajcxy huídibi ca' yajpaady ma miich ajcxy myöymujccixy? ⁵ Jadu'n nnimáaygixyich miich ajcxy, jaydēbi mdzöydu'njihuiiygixy miid jada ycxipi. ¿Nej ca' yajpaady ma miich ajcxy ni tüg yēydijc huivy ycuipi huídibi jēbi yaj'oyiy je capxy je ayuc ma je mibijcpidijc ajcxy? ⁶ ¿Nej ooy jada ytimycopicyity co yi mibijcpidijc ajcxy ñayxihuigixipy ma je tungmiidpi huídibi ca' mijpidaaccixy Dios?

⁷ Co miich ajcxy mnayxihuigixy ma cajp tungmiidpi, je' je tiy'ajt co ca' ajcxy mguydúngixy Cristo y'ayuc ytiy'ajt. ¿Nej cay jac'oy co mnaymimexxtújcigixipy, ca'ydi co mnayxihuigixy? ¿Nej cay jac'oy co xytigóoyigixipy tijaty, ca'ydi co mnayxihuigixy? ⁸ Ma yjapadyii ixypy mnaymimexxtújcigixy, chi miich ajcxy ac mibijcpidijc naymidundigóoyigixp, e nañ jadu'n mjanayméetzgixy ti ajcxy ymiid.

⁹ ¿Nej ca' mnejhuuygixy co yi jáy ajcxy huídibi tundigooyb, ca' ajcxy it lugar padañ ma Dios y'ane'my? Ca' mnayhuin'ingixy, ca' ajcxy it lugar padañ ma Dios y'ane'my yi jáy ajcxy huídibi migapxtigooyb töxyjäydijc, huídibi ajcxy ojadajtp tzaadzech quipychech, huídibi ajcxy migapxtigooyb ymigüg ytöxyijc, huídibi ajcxy adöxyñi'aa. ¹⁰ Ca' ajcxy it lugar padañ ma Dios y'ane'my huídibi ajcxy meetzp, huídibi ajcxy tijaty adzojcp, huídibi ajcxy amügyjäy'ajtp, huídibi ajcxy capxtigooyb, etz huídibi ajcxy ayucmihuídijtp capxmihuídijtp. Nidüg'óciy yi jáy ajcxy huídibi jadu'n tundigooyb, ca' ajcxy it lugar padañ ma Dios y'ane'my. ¹¹ Jadu'n anajty nijējity miich ajcxy mdundigooygixy jecy'ajty, per co ti mmibijccixy Cristo, chi Dios ti xyhuinmecxy ajcxy mbocy, e ti yajhuäch je jibicpi ma ajcxy mjot mhuinmañ, etz mnayyéjcigixy amumdügot ma Dios. Co miich ajcxy mmijpidaaccixy je nHuindzin Jesús yxi e xy'adigüygixy xyjottigüygixy Dios yjihuiñ ymic'ajt, paady ajcxy ti m' ahuimbijtcixy tudägy ma Dios yhuinduu.

Je tudägy'ajtin huídibi ijtp ma ajt ndzinaayin

¹² Janch tiy'ajt nej jáy ymínaangixy co jēbi huaad tungixy hueñytiijity huídibi ñijot'ajtcixyp. Per ca' tüg'óciy huídibi jáy ajcxy tuñ y'oyjäygidaacnity. Janch jadu'n jēbi pinjaty tunipy hueñytiijity, per ca' huaad ymímadägyii je huídibi ajcxy ytumyb. ¹³ Janch tiy'ajt nej jáy ymínaangixy co je jicxy picy ytungbaady ma je jáy y'aa ymōx, e je aa mōx ytungbaady miid je jicxy picy ycxipi. Per Dios yajcōdigoyamyb je jicxy picy, e nañ jadu'n yajcōdigoyañ je jáy y'aa ymōx. Per nañ tiy'ajt co Dios ca' ti yaj'oyiy je yēydijc ñinicx, co midundigooyipy töxyjäydijc. ¹⁴ Dios ti yajjugypicy jadüg'oc ich ajt nHuindzin Jesucristo co y'o'cy. Nañ jadu'n Dios miid ymic'ajt co xyajjugypigaanim jadüg'oc co anajty ti n'o'cim.

¹⁵ ¿Nej ca' mnejhuuy miich ajcxy co yi mninicx ajcxy Cristo y' yje'? ¿Nej cay Cristo anajty midundigooybich co nnicxy mñdmäyich yi töxyjäy huídibi jibic-huinmañ miid? ¡Ca' jadu'n y'óyity nimína! ¹⁶ ¿Nej ca' mnejhuuygixy co tüg yēydijc puhuäggy tüg töxyjäy huídibi jibic-huinmañ tumb, tügity ajcxy y'ijtcixy? Com jadu'n yjaybetyity ma Dios ñecy, ma Dios jadu'n ymínañ: "Nimetz y'idaangixy jadu'n nej tügpi ninicx." ¹⁷ Co tüg jáy miid y'ity yi Huindzin Jesucristo, huin'it je jáy yjihuiñ ymic'ajt etz Dios yjihuiñ ymic'ajt y'ijtcixy tú'ciy.

18 Ixmajtzciꝝ je jibic-huinma'ñydunii, ca' mdundigooygixy miið töxyjäy ajcxy jibic-huinma'ñydumbi. Yi jacjadyii pocy huidi jäy ajcxy ytumyb, ca' yi' ajcxy midundigoy ninicx. Per co ytundigooygixy miið töxyjäy ajcxy, huin'it janchtiy yci'mninicx anajty ymidundigooygixyp. 19 ¿Nej ca' mnejhuuygixy co je Espíritu Santo huidibi Dios ymooyim, ti chinaydacpicy ma miich ajcxy mjot mhuinma'ñ? Paady ycixpi miich ajcxy ca' ci'm nay'ané'migixy. 20 Tzoohui Cristo ti cojuy miich ajcxy mbocoy, paady ycixpi ooy ycopicyity co oybi mdúngxixip miið mninicx, jigix Dios cömay y'idipy miið co oy anajty ti mdungixy.

7

Capxhuijin ma je pijcin

1 Cham n'adzohua'ñich je huidibi miich ajcxy ti xyaj'amidoobich ma je necy huidibi ti xyajnigujxcixyich. Oy jadu'n co tüg yëydijc ca' ypigipy. 2 Per com may yëydijc huidibi ooy ytundigoya'ñ miið töxyjäydijc, paady ycixp jac'oy co nidüg nidüg yëydijc pigipy e miið'idipy yci'mdöxyijc. E nañ jadu'n jac'oy co nidüg nidüg töxyjäy ypigipy, e miið idipy yci'm ñäy. 3 Copicy je yëydijc chinahuipy miið ytöxyijc nej ypadyii, nan tim jadu'n je töxyjäy chinahuipy miið ñäy nej ypadyii. 4 Com je töxyjäy ca' ane'my yci'mninicx, hue' ñay'ané'migixy miñ xyipy. Nañ jadu'n je yëydijc ca' ane'my yci'mninicx, hue' ñay'ané'migixy ymiñ xyipy. 5 Ca' huaad je yëydijc nimay je töxyjäy co ca' miið mähua'ñ miið poocha'ñ. Nañ jadu'n je töxyjäy ca' huaad nimay je ñäy co ca' miið mähua'ñ miið poocha'ñ. Jëbi janchtiy minaajity ñay'ayuc-huinjihuiyigixy co amay'adaangixy co Dios mibijctzohuaangixy ycapxtägaangixy. Co Dios mibijctzoohuin myajmáygixipy, huin'it jëbi máagixni pócxixni agujc jotcujc, ca'ydi je mujcu' mimadägyii ajcxy.

6 Jada je' tiy'ajt nej jëbi yëydijc miiðdzinäy ytöxyijc, hue' jada capxhuijin, ca' jada y'ané'minity. 7 Jadu'n njadzocyich co miich ajcxy ixipy m'ijtcixy adüg jadu'n nej n'ityich adüg. Per Dios ti xymooyim nidüg nidüg ngi'mhuinma'ñ ngi'mmic'ajt. Paady ji canaagnax jäy yhuinma'ñ, e nidüg nidüg miið yci'mhuinma'ñ nej ytunaangixy, pen pigaangixp o ca' ypiigaangixy.

8 Jada ayuc nyajnimaaaybich yi adügtijc etz yi co'ögytjic ajcxy. Jac'oy co ajcxy huen tzinaaygixy adüg, jadu'n nej ñich ndzinäyich. 9 Pen ca' ajcxy mimadäga'ñ yi chinaayin adüg, etz nijot'ajtcixy co ypiigaangixy, jac'oy co ypijicixipy. Com jac'oy co ypijicixipy ca'ydi co cuydúngxixipy ninicx chojcin.

10 Jada ayuc nyajnimaaaybich huidibi ajcxy ti ypijccixy. Ca' y'oyity co töxyjäy tüg ixmach yi' ñäy. Nañ jadu'n ajt nHuindzin Jesús xymooyim jada ane'min. 11 Co tüg töxyjäy ixmach ñäy, copicy co huen tzinäy adüg, e ca' huaad ypicoy miið huingbi yëydijc. Jëbi janchtiy jadüg'oc pudigiy ñäy. Nañ jadu'n ni ca' y'oyity co tüg yëydijc ixmadzip ytöxyijc.

12 Ich jada ngi'm'ayuc jada huidibi nyajnimaaaybich je jacjadyii mibijcpidijc. Yi Huindzin Jesús ca' ti ane'min yecy miið jadayaabi ycixpi. Pen tüg yëydijc mibijcp tzinay miið tüg töxyjäy huidibi ca' mijpidägy Cristo, jac'oy co ca' ñay'ixmájtzigixipy, pen je töxyjäy jadu'n jotcujc jacmiiðdzinähua'ñ je yëydijc. 13 Nañ tim jadu'n co tüg töxyjäy huidibi mibijcp tzinay miið tüg yëydijc huidibi ca' mijpidägy Cristo, jac'oy co ca' ñay'ixmájtzigixipy pen je yëydijc jotcujc jacmiiðdzinähua'ñ je töxyjäy. 14 Je töxyjäy ñäy huidibi ca' mijpidägy Cristo, jadu'n yi' nipaady nej jäy

huidibi ypocy ti yajnihuäch müd co ytöxyjc ti mijpidägy Cristo. Nañ jadu'n je töxyjäy huidibi ca' mijpidägy Cristo, jadu'n yi' nipaady nej jäy huidibi ypocy ti yajnihuäch müd co ñäy ti mijpidägy Cristo. Pen ca' ixypy yjadu'nity, yi' ajcxy y'ung y'anäg, hue' ixypy nipaady nej jäy ajcxy y'ung huidibi ca' mibicy. Per com ti je yëydjic etz je töxyjäy yajpocyñihuächyii, nañ jadu'n je y'ung ajcxy ti yajpocyñihuächyii. ¹⁵ Per pen je yëydjic huidibi ca' mibicy Cristo ca' müddzinähua'ñ ni jadu'ñyi yi' ytöxyjc huidibi ti mibicy Cristo, huin'it jëbi ñay'ixmájtzigixy. Nañ jadu'n co je töxyjäy huidibi ca' mibicy Cristo, e ca' müddzinähua'ñ ni jadu'ñyi yi' ñäy huidibi ti mibicy Cristo, huin'it jëbi ñay'ixmájtzigixy. Com Dios jadu'n tzocy co jotcujc ñaymüddzináayigixipy. ¹⁶ Jëbi ñay'ixmájtzigixy com je töxyjäy ca' tiydudägy ñejhuïy pen mimadacy yñäy yajmibigipy Cristo. Nañ jadu'n je yëydjic ca' tiydudägy ñejhuïy pen jëbi ytöxyjc yajmibigipy Cristo.

¹⁷ Oy ixypy ñejity jada tiy'ajt cuydungixy. Copicy co nidüg nidüg müch ajcxy mdzinähuiipy mjugy'adipy jadu'n nej Dios ti xyajni'ixiygixy mdzinaayin mjugy'ajtin, e jadu'n nej anajty myajpatcixy co Dios xy-huin'ixy jëbi mmibigipy Cristo. Yi jadu'mbi ane'min nyaj'ixpijcpyich yi mibijcpidjic ma tüg tüg cajp. ¹⁸ Yi jäy huidibi ti yajtiy'ajttiy jayijp, e Dios yhuin'ixyii jac'axam, huen jadu'nity, ca' huaad yajtigoy je iixpejt nej ti yajtiy'ajttiy. E yi jäy huidibi ca'ni yajtiy'ajttiy e ti yhuin'ixyii Dios, huen jadu'n y'ity, ca' ycopicyity yajtiy'ajttihuipy. ¹⁹ Ca' ytimyñejity pen müch ajcxy ti myajtiy'ajttiy, o pen ca'ni myajtiy'ajttiygixy. Huidibi copicyip, mguyduunip ajcxy Dios y'ane'min ycötujcin. ²⁰ Nidüg nidüg mibijcpi huen ijtcixy nej anajty yajpatcixy co Dios ajcxy yhuin'ijxyi. ²¹ Pen müch anajty codoogiy tumb ma tüg jäy co Dios ti xyhuin'ixy, ca' mdajy may müd yi' ycixpi, hui'm müd mhuindzin. E pen mhuindzin a'ixiyb co mbidzima'ñ ahuätztuum, jëbi mbidzimy ma codoogiy anajty m'ity. ²² Pinjaty codoogiy ijtp ma yhuindzin co mibicy ajt nHuindzin Jesucristo, chi Jesús yi' yajnihuädzictüdyii ma yi pocy y'ane'myii. Pinjaty tungixp yci'mdung, co mibicy ñch ajt nHuindzin Jesucristo, chi jadu'n nipaady nej jihuïy codoogiy y'ity ma Cristo. ²³ Tzoohui ooy Jesucristo xycojuuyi müch ajcxy mbocy, paady ycixpi cuydungix ajt nHuindzin Jesucristo y'ayuc ytiy'ajt. E ca' mguydungixy naaxhuiñyjäy ajcxy y'ayuc ytiy'ajt huidibi ajcxy xypidägip ma pocy xy'ane'mgixy. ²⁴ Migügtjic ajcxy, nidüg nidüg mibijcpi, huen ijtcixy nej anajty yajpatcixy co Dios yhuin'ijxi ajcxy.

²⁵ Jada ayuc nyajniimaaybich yi mibijcpidjic huidibi ajcxy adüg yajpatcixp. Je Huindzin Jesús ca' ti tiy'ajt ahuing ti xymöyich müd müch ajcxy ycixpi. Hue' ajcxy nyajniimaayb ahuing je huinma'ñ huidibi nmüdich. Com Dios ti xypa'ayooyich, paady ycixpi jëbi mgöbigipy ajcxy ñch n'ayuc ñch ngapxhuijin. ²⁶ Jadu'n huinma'ñ nmüdidyich co jac'oy co nidüg nidüg mij'anäg huen jac'ijtcixy nej yajpatcixy. Müd co tzaachypí ayo'n nminajxim nyajnajxim jadachambi xii tiempo, paady ycixpi ngapx-huijyich jadu'n. ²⁷ Pen mbijcyp tüg töxyjäy, müddzina'. Pen ca' ti picy tüg töxyjäy, jac'oy co ca' mbigipy. ²⁸ Pen ti mhuinma'ñ mbidägy co mbiga'ñ, jëbi mbicy, ca' anajty mdundigoy co mbigipy. Nañ jadu'n tüg töxyjäy mutz'anägnip ca' anajty ytundigoy co ypigipy. Janch tiy'ajt jada co yi' ajcxy huidibi pijccixp ypadamyb ajcxy jotmay ma chinaayin. Paady ycixp ti nnimaaygixy co jac'oy co ca' mbijccixipy, e ca'ydi ti jotmay mbáatcixipy.

²⁹ Migügtjic ajcxy, jada njacyajniimaaygixpy. Hueeni xii tiempo

njactzinähuaanim ya naaxhuiñ. Jadu'n nej je xii je tiempo yjacnicxni miich ajcxy pinjaty ti ypicu, tzinaaygix jadu'n nej ixypy ca' mdöxijc ajcxy müidity. ³⁰ Miich ajcxy huidibi yaaxp etz ayo'n jihuiyb, tzinaaygix jadu'n nej ixypy ca' ti ayo'n müidity. Miich ajcxy huidibi xondacp, tzinaaygix jadu'n nej ixypy ca' mxondaaccixy. Miich ajcxy huidibi ajuuyb adoocp tzinaaygix jadu'n nej ixypy ca' ti ajcxy müidity. ³¹ Miich ajcxy huidibi mic'ajt comeen'ajtp, tzinaaygix jadu'n nej ixypy ajcxy ca' ti mgomeeñity.

³² Hue' ndzocyich co ca' ti jotmay miich ajcxy mmüd'adipy ma yi mdzinaayin mjygy'ajtin. Yi jäy ajcxy adügpi ymijottigooyb ajcxy je Huindzin Dios ytung, yajjäygidäga'n ajcxy je Huindzin Dios. ³³ Je tibi ajcxy ypijccixy, chi ymijottigooyb ajcxy yi' ytung ya naaxhuiñ, jadu'n nej jëbi yajjotcuje'ajtcixy ytöxyjic. ³⁴ Nañ tim jadu'n tigachjaty yhuinma'n müidity je töxy'anäg huidibi ti ypicu. Je töxy'anäg adügpi ymijottigooyb Dios ytung, etz yecy ñinicx etz yjihui'n ymic'ajt cixyot huinjot ma ajt nHuindzin Jesucristo. Per je töxy'anäg huidibi ti ypicu, hue' je' ymijottigooyb ti ga ti ya naaxhuiñ, jadu'n nej huaad jäygidägyii ñäy.

³⁵ Jada jadu'n ti nyajnimaaaygixy müid miich ajcxy m'oy'ajtin ycipi. Ca' nan tzipjaty ane'min ti nmooygixy. Jadu'n ti ngapxhuijcixy jaydëbi jotcuje mdzinaaygixy mjygy'ajtcixy, etz jaydëbi ajcxy amumdüjot mdungixy ma ajt nHuindzin Jesucristo ytung, e ca' mdungixy ametz jotmetz.

³⁶ Pen ji pin jotmay müidity müid ñix ycipi, müid co yxii yjimjt ti yujc-huäcni, jada je' ooy ytimycapxpaadyity, jëbi tuñ huidibi y'aixiib jac'oyip, jëbi ypicu, ca' yi' ypocyity. ³⁷ Pen ji pinjaty ñix yhui'ma'n jaybicy, e ca' pin ycohuanii, nañ ni pin yca'adugyii co tuñ nej tzocyin, e ñijot'ajtyp tudägy'ajt janch cixyot huinjot co yñix yhui'ma'n jaybicy, oybi anajty ytumyb. ³⁸ Je jäy huidibi yñix yajpijcp, oybi anajty ytumyb, e pinjäy yñix cayajpijcp, ñigi anajty oybi tuñ ca'ydi co ypigipy.

³⁹ Copicy co je töxyjäy müiddzinähuiipy yi' ñäy mabaad yñäy yjygy'aty. Co janch anajty yñäy y'ögy, huin'it jëbi ypigipy müid huingbi, pen jadu'n anajty najtztzögyi. Hue' janchtiy copicy co pigipy je pin mibijcp je Huindzin Jesucristo. ⁴⁰ Ooy ñigi je töxyjäy co'ögypi agujc jotcuje chinähuiipy yjygy'adipy pen ca' ypijctigach, jadu'n nmüidityich nhuinma'n, e nminaambich co naybaatip ich nhuinma'n müid je tiy'ajt huidibi je Espíritu Santo yejcp.

8

Je tzüch huidibi ajcxy yajhuindzigiyb quipychech

¹ Jadüg nax, jada ayuc ajcxy nyajnijayiiyb ma yi tzüch ymiñ huidibi jäy ajcxy yajhuindzigiyb tzaadzech quipychech. Janch tiy'ajt co nidüg'öciy ich ajt nmüd'ajtim ixpijcin. Per pen ooy maj nayjihuiyim ajt n'ixpicuity, chi amij agix nayjihuiyim. Per pen naychojim nayjihuiyim nidüg nidüg, huin'it nyajyeecim nmibijcin. ² Pen ji nidüg ma miich ajcxy ñaydijyii co y'ixpicuity, ca'ni yi' jajtäy ixpijcin huidibi jaccopicy yjadipy. ³ Co tüg jäy yajmij'aty Dios, Dios ñejhuiyb nej jada jäy yjot yhuinma'n müidity.

⁴ Jadu'n jada je tiy'ajt maabi je tzüch huidibi jäy ajcxy ti yajhuindzigiygixy tzaadzech quipychech ajcxy. Nejhuiyim co yi tzaadzech yi quipychech ca' ti juyg'ajtin müidity. Ji tügajc Dios huidibi tzinaayb juyg'ajtp. ⁵ Janch tiy'ajt co yi naaxhuiñjäy ajcxy Dios'ajtigixy canaagnax huidibi yajpatp tzajpcix etz ya naaxhuiñ huidibi ca' Diosity. Etz nañ

tiy'ajt co may yhuindzin'ajtcixy huidibi ca' yhuindzinity. ⁶ Per ñch ajt n'ojadajtm tügpajcpi Dios, je Dios Teedy. Je Dios Teedy coj macx tüg'óciy huidibi ji'ajtp. Müd yi' ycixpi ñch ajt ndzinaayim njugy'ajtm. Nañ tim jadu'n nmüid'ajtm tügpajcpi ajt nHuindzin Jesucristo, e yi' huijtz'ijtaayb tüg'óciy tijaty huidibi ji'ajtp, e nañ yi' ajt xyhuijtz'ijtm.

⁷ Janch tiy'ajt co yi' tzaadzech quipychech ca' ti mic'ajt müidity, per nije'jity mibijcpidijc ca' huinjihuüy jada tiy'ajt. Nijëjity ajcxy jecy'ajty ooy huindzigüygixy tzaadzech, ixti chambaadni tijcixy co yi' tzüch huidibi jäy müid huindzigüy tzaadzech, tzaadzech yi' yje'. Co ajcxy tzüdcixy yi' jadu'mbi tzüch, jibic nayjihuiüyigixy, nayjihuiüyigixy nejjuhuüy ti ytundigoogyixy. Ca' tiydudägy y'ijtcixy ma ymibijcin. ⁸ Ca' Dios xycöbigaanim müid je' ycixpi co ti njücxim ti ndzüdzm tijaty tzüch, o müid co ca' ti njücxim ca' ti ndzüdzm tijaty tzüch. Nañ tim jadu'n Dios ca' oybi xymöhuaanim müid je' ycixpi co ti njücxim ti ndzüdzm ti tzüch, o müid co ca' ti njücxim ca' ti ndzüdzm tijaty tzüch. ⁹ Oy Dios a'ixiy co jëbi ndzüdzm huenhuidibi tzüchity. Per müid je migügtijc ycixpi huidibi ca' tiydudägy müidity ymibijcin, tzoc naygüend'ajtm ca'ydi je' jibic yñayjihuiüyü müid huidibi ñch ajt ndunim. ¹⁰⁻¹¹ Tzoc ocpidaacim co müich ajcxy mnejhuüy je tiy'ajt, e xy'ixipy tüg migüg co mgay m'uucy ma tüg mesa jüby tügoty me je tzaadzech y'ity. Ca' jecyity co jada jäy huidibi ca' tiydudägy müidity ymibijcin, etz co xy'ixpaadipy jüby, huin'it je' cöbigañ je tzüch huidibi huindzigi'ñ'ajtp. E jadu'n yhuimbizimy co müich jibic ijxpejt ti myecy müid yi' m'ixpijcin ycixpi, com yi' mmigüg ti ytundigoy müid huidibi müich ti mduñ. E Cristo ti y'ögy müid yi' ypocy ycixpi nañ jadu'n. ¹² Co tüg mibijcpi jibic nayjihuiüyü müid co ti xy'ixy ma je caydac mdzüch je tzüch huidibi jäy ajcxy yajhuindzigüyb tzaadzech, müich anajty tundigooyb müid Cristo ytiy'ajt, müid co yi' mibijcpi jibic ñayjihuiüyü. ¹³ Paady ycixp ca' ndzüdza'ñich ni mina tzüch huidibi tzaadzech yhuindzigi'ñ'ajtp. Pen jadu'n nduñich, jibic ijxpejt anajty nyejcpyich ma nijëjity migügtijc, e chi yi' ajcxy yhuinma'ñyigoya'ñ.

9

Je tung huidibi Pablo paatip

¹ Janch janch co jëbi nduñich huentijity huidibi ndzojcpich. Nañ jadu'n janch co Jesucristo ti xyajñibicyich jada apóstol tung. Etz janch co ti n'ixyich ajt nHuindzin Jesucristo. Nañ jadu'n janch co müich ajcxy ijxpejt'ajtp ma ñch ndung, com ti ajcxy mmijpidaaccixy je nHuindzin'ajtm Jesús y'ayuc huidibi ti ngapxhuäcxyich ma müich ajcxy. ² Ca' jécyity co jacjadyü jäy ajcxy ca' xycöbigañich jadu'n nej Jesús xy'apóstol'adyijich. Per com müich ajcxy ti mmijpidaaccixy ajt nHuindzin Jesucristo, etz müich ajcxy mmibijcin nidiy'ajtp co Jesús ti xyajñibicyich jada tung, paady ycixpi copicy co ñch müich ajcxy xycöbigipyich jadu'n nej Jesús y'apóstol.

³ Jadu'n n'adzohuimbityich yi' ajcxy huidibi jibic xyñigapxip ñch ndung. ⁴ Com Jesucristo xyajñibijcich jada tung co ngapxhuäcxyich yi' y'ayuc ytiy'ajt, paady ycixpi xypatpich jadu'n co je mibijcpidijc xymöhuibich ngaayin n'uucin. ⁵ Nañ jadu'n xypatpich co nmüid'adipyich tüg ndöxyijcich huidibi mibijcp, etz huidibi nmüidhuididipyich tim jadu'n nej yi' jacjadyü apóstol ajcxy müidity, etz je Huindzin Jesús y'uch ajcxy

müddity, etz Pedro. ⁶ ¿Nej müich ajcxy mmünaangixy co üich etz Bernabé nimejtzpajc ca' üich ajcxy huaad ixmajtzcixy yi ndungich co ngapxhuäcxyich Cristo y'ayuc ytiy'ajt? ⁷ ¿Huidibi soldado yi' ma je ejercito ci'm ygasto cojuy? ¿Pin ji cam nidungüyb, e ca' jüicxipy je huidibi ti yaj'ity? Pin ychibo cuend'ajtp, ¿e ca' ügipy je chibo yleche? ⁸ Ca' müich ajcxy müna'nipy co jäy y'ayuc jada. Nañ jadu'n jaybety y'ity ma Dios ñecy tim jadu'n nej müna'ñich. ⁹ Com jaybety jadu'n ymiñ ma Moisés ñecy, ma Moisés jadu'n ymüna'ñ: "Ca' huaad huajyuub y'ajen mbüdaaci ma yam ten moody yi trigo co yajpajc'aty." ¿Nej jëyi müid huajyuub ycixpi Dios jadu'n ymüna'ñ? ¹⁰ Canan jëyi müid huajyuub ycixpi Dios jadu'n ymüna'ñ. Nañ jadu'n Moisés jaybejty jada tiy'ajt müid üich ajt ycixpi. Com yi jäy ajcxy huidibi naaxjüdzijtzp, etz yi' ajcxy huidibi trigo yajpajc'ajtp, hue' ajcxy yjip'ijxyp co padaangixy je moc täm huidibi ajcxy ti nidungiy. ¹¹ Nañ jadu'n üich ajcxy huidibi Jesús ytung tuunip, ti ngapxhuäcxyich Dios y'ayuc ma müich ajcxy, e müich ajcxy oybi ti mbaatcixy ma Dios. ¿Nej ca' jadu'n y'oyity co nbaadyich meen etz jicxy picy müid ndungich ycixpi? ¹² Pen jacjadyii Dios y'ayuccapxhuäcxi ti paatcixy meen etz jicxy picy ma müich ajcxy müid ytung ycixpi, ¿nej ca' jëbi nigi üich nbaadyich meen etz jicxy picy müid ndung ycixpi? Oy njamüdidyich je mic'ajt nej nja'ane'mgixy co xymöhuübyich ajcxy meen etz jicxy picy müid üich ndung ycixpi, per ca' jadu'n ti n'ane'mgixy. Jadu'n üich tzaachypi nyajnajxich jim ma müich ajcxy, jaydëbi jäy ajcxy cöbijccixy Cristo agujc jotcujc ca' ti adzijpin. ¹³ Mnejhuüyb müich ajcxy co yi' huidibi ajcxy tumb ma Dios ytijc, paatcixy ninigoobi caayin uucin. Nañ jadu'n yi' pin ajcxy huidibi iyujc yajhuindzigüyb Dios, paatip ajcxy je huindzigi'ñ tzüch. ¹⁴ Nañ jadu'n je Huindzin Jesucristo ane'my co huen yajcaaygixy yaj'uuccixy etz mooygixy yhuít ytucx yi' ajcxy huidibi capxhuäcxcixp yi' y'ayuc ytiy'ajt. ¹⁵ Hich ca' ti nyajtuñich jada mic'ajt jada ane'min hüidi nmüidich. Nañ jadu'n ca' jada ayuc nyajnijayüygixy, müid co ndzocy co pada'ñich tijaty ma müich ajcxy. Jacjotcujc co n'ögibich müid yuu, ca'ydi co n'ane'mibich caayin uucin ma müich ajcxy, e jadu'n tzöydu'n nbáadibych jadu'n nej cham naygömayijich, müid co ci'm nnayyajcayijich müid ndungich.

¹⁶ Com ca' huaad naygömayijich co ngapxhuäcxyich Cristo y'ayuc. Müid co Cristo xyajñibjich jada tung, paady ycixpi copicy ngapxhuäcxyich Cristo y'ayuc. Ayo'n nbadaamybich, pen ca' ngapxhuäcxcich Cristo y'ayuc. ¹⁷ Pen ngi'mdzócinich ycixpi ngapxhuäcxcich Cristo y'ayuc, njjip'ijxypich ixypy co jäy ajcxy xymijuyipyich. Per ca' yjadu'nity. Hue' janchtiy je Huindzin Jesucristo xyajñibjich jada tung, e paady nduñich yi' ytung. ¹⁸ ¿Ti muju'ñ nbáadibich müid ndungich ycixpi? Nbáadibich jotcujc'ajtin co ngapxhuäcxcibich Cristo y'ayuc jadu'ñyi, ca' ymeeñygixyity. Ca' nyajtuñich je ane'min huidibi Cristo xymóyich müid caayin uucin ycixpi.

¹⁹ Ca' ji ni pin jäy mic'ajt müidity jaydëbi xy'ane'myijich. Oy ixypy ytimyñejity ti nnaybidägyijich müid üich njot nhuinma'ñ jadu'n nej jihuüy tüg'óciy jäy ajcxy xy'ane'myich. Jadu'n nduñich jaydëbi jac mayjäy ajcxy nyajmibigipyich Cristo. ²⁰ Co ngapxhuäcxyich Cristo y'ayuc ma yi judíojäy, hue' naybidägyijich judíojäy, jaydëbi nyajmibicyich ajcxy Cristo. Co ngapxhuäcxyich Cristo ma yi judíojäy ajcxy huidibi cuydumyb yi' ajcxy ycötujcin etz ycostumbre, nañ jadu'n üich nguyduñich yi' ajcxy ycötujcin, jaydëbi nyajmibicyich ajcxy Cristo. Ooy yjanchity co ca' yi judío ycötujcin etz ycostumbre xy'ane'myich. ²¹ Co

ngapxhuäcxyich Cristo y'ayuc ma yí' ajcxy huídibi ca' yjudíojäyity, chi naybidägyiijich jadu'n nej yí' ajcxy. Ca' nan nmīnaambich co ca' nguyduñich Dios ytiy'ajt. Hue' njatytimycuydumybich Cristo ycötujcin, jaydēbi nyajmibicyich ajcxy Cristo. ²² Co ngapxhuäcxyich Cristo y'ayuc ma yí' ajcxy huídibi ca' tiydudägy ymibijccixy, chi naybidägyiijich jadu'n nej yí' ajcxy, jaydēbi nyajmibicyich ajcxy Cristo. Ma nidüg'óciy jäy ajcxy ma ngapxhuäcxyich Cristo y'ayuc, chi nbidägyich njot nhuinma'ñ nej yí' ajcxy yjot yhuinma'ñ mīdity, jaydēbi nijējity ajcxy nyajmibicyich Cristo y'ayuc ytiy'ajt. ²³ Jadu'n nduñich tüg'óciy mīd Cristo y'ayuc ycixpi, je ayuc nej jēbi jäy ajcxy y'alma ñidzooccixy. Jadu'n nduñich, jaydēbi nbaadyich je jotcujc'ajtin etz oy'ajtin huídibi nbaatim nidüg'óciy co nmijpidaacim Cristo.

²⁴ Mnejhuüygixy co jäy ajcxy ñayboyicquípigixy co premio padaangixy, huin'it nidüg'óciy ajcxy ñaymic'ijxigixy, per tügpajc huídi je premio patp. Nañ jadu'n miich ajcxy mijottigooygix cuydungix Dios y'ayuc ytiy'ajt, jaydēbi Dios xymóoygixipy ajcxy tüg premio. ²⁵ Tüg'óciy pinjaty nayñi'ixüyip co ñay'ixquipxáanigixy ma iyihuijin, ooy ñayguend'ájtigixy mic, jigix jēbi ymadaaccixy co ganar'adaangixy premio huídibi ca' huinixi ajcxy mi'ijtcixy. Pero ich ajcxy Dios y'ayuc capxhuäcxy, yí' ich ajcxy mijottigooygixy nganar'adaangixyich huídibi ca' nimīna ycixipy ytigoyipy. ²⁶ E jadu'n ich ndung mijottigooyich, ca' yhuimbizity agoodzity, jadu'n nejihuüy ngoxich e nipin ca ypegyii. ²⁷ Nnaychaachytumybich ngi'mninicxich, jaydēbi ngi'mninicx yxcapxymidooyich. Jadu'n nduñich co ti ngapxhuäcxyich Cristo ma je mayjäy ajcxy, ca'ydí nyajtigoyipyich nbremio huídibi Dios xymóhuambich.

10

Capxhuijin ma yí pin ajcxy jac-huindzigüyb quipychech

¹ Com ndzojccpich co miich ajcxy migügtjc mnejhuüygixipy co ajt nmij'ap nmijteedy mīd yhuídijty Moisés co Dios nidüg'óciy ajcxy cuend'ajttay, huinhuoy jecy'ajty mīd tüg joc. E nañ jadu'n Dios yajni-huañ yajtzoocy nidüg'óciy ajcxy ma ymidzip co ajcxy yajnajxy je tzaptz mejy cuje'amy. ² Co nidüg'óciy ajcxy panicxy je joc, e co ñidzoocay ajcxy nidüg'óciy ma je mejy, hue' nidüg'óciy ajcxy cōbijcy Moisés y'ane'min, e jadu'n nipaady nej jihuüy ni'amugí ajcxy yñibejty mīd Moisés yxñ. ³ Nañ jadu'n nidüg'óciy ajcxy caay jicxy je maná huídibi Dios anajty yejcpy, choñ je' anajty tzajpjoty. ⁴ Etz nañ jadu'n y'uuc ajcxy nidüg'óciy je ni huídibi Dios anajty yejcpy, com y'uuc ajcxy je ni huídibi yajpidzim ma je tzaa. E je tzaa hue' je' anajty Cristo, e paady Cristo ymīd'ijtpy etz ypubejtpy ajcxy anajty nidüg'óciy. ⁵ Oy ajcxy Dios ooy yjapubejti, e ni may ajcxy ooy Dios yajjotma'ty, etz jahueen ajcxy yca'öctay jim mājtiğiduum jecy'ajty, com ca' Dios jäygidacy je' ajcxy yhuinma'ñ.

⁶ Jadu'n nej je ayo'n yjajti mīd ajt nmij'ap nmijteedy jecy'ajty, je' ijxpejtíp ma ich ajt, ca'ydí n'adzojccim tijaty jibicpi, jadu'n nej je' anajty ajcxy adzojccix jibicpi. ⁷ Nañ jadu'n ca' yhuaadity ca' y'oyity co miich ajcxy m'ojadajtcixy tzaadzech quipychech jadu'n nej nijējity ajt nmij'ap nmijteedy tuñ jecy'ajty. Com jadu'n yjaybeyity ma Dios ñecy ma jadu'n ymīna'ñ: "Ixtactay je jäy ajcxy caaybi uucpi, e huin'it ajcxy ypidigiy etz ytiğiygixy iyüybi ejtzpi." ⁸ Nañ jadu'n ca' y'oyity co ndundigooyim

müid töxyjäy ajcxy jadu'n nej nijëjity nmij'ap nmijteedy tuñ jecy'ajty, e iipx tugig müil ajcxy y'o'cy tüg xüibi. ⁹ Nañ ni ca' y'oyity co njot'ijxim nhuinma'ñ'ijxim üch ajt nHuindzin Jesucristo, jadu'n nej ajt nmij'ap nmijteedy ajcxy idüch jecy'ajty, e may ajcxy tza'ñchüdz, e ytigooy ajcxy yjogy'ajtin. ¹⁰ Nañ ni ca' y'oyity co nnigapxim ni'o'jüim Dios, jadu'n nej nijëjity ajcxy idüch jecy'ajty, e müid je' ycixpi Dios y'ängel yaj'o'cy mayjäy ma y'i' ajcxy.

¹¹ Tüg'óciy yi jadu'mbi ayo'n yjajti müid ajt nmij'ap nmijteedy, e jaybety yhu'i'my ma Dios ñecy, jigix n'ijxpejt'ajtim, e jadu'n tiy'ajt nbaatim, ca'ydi ndundigooyim müid Dios, üch ajt pinjaty tziinaayb ma jadachambi xüi jadachambi tiempo huidibi janch tim huingónip ma Dios yajcixa'ñ yajtigoya'ñ jada naaxhuiñybi. ¹² Com nmüid'ajtim je tiy'ajt nej nmij'ap nmijteedy ajcxy ytundigooy, paady ycixp pinjaty yci'mhuinma'ñ pidacp co ooy mic'ajt müidity ma ymibijcin, huen naygüend'adyii, ca'ydi ytundigoy etz ypocycähüipy ma Dios. ¹³ Tüg'óciy tzaachypi ayo'n, jot'ijxin huinma'ñ'ijxin huidibi müich ajcxy mminajxyp myajnajxyp, nañ jadu'n jacjadyii müibjcpidijc ajcxy minajxcixy yajnajxcixy. Per yajmij'ajtcix jot'amij'ajtcix Dios, com Dios ca' a'ixihüip co mjacminájxcixipy mjacya-jnájxcixipy tzaachypi ayo'n anaxy huidibi ca' ajcxy mmimadäga'ñ. Co anajty tzaachypi ayo'n mminajxcixy myajnajxcixy mictägy, huin'it Dios xymöhüipy ajcxy huinma'ñ jadu'n nej jëbi mminaxtaygixy myajnax-taygixy yi tzaachypi ayo'n.

¹⁴ Paady müich ajcxy migügtijc, huidibi ooy ndzocy njhüiyich, ix-majtzcixy ca' m'ojadajtcixy tzaadzech quipychech. ¹⁵ Nyajmüidcapxy nyajmüidmüidacpy ajcxy jadayaabi ayuc, com nejhuüybich co müich ajcxy ooy oy huinma'ñ mmüidity. E jëbi ci'm huinmaaygixy pen tiy'ajt jada üch n'ayuc, o pen ca'. ¹⁶ Ma je “Santa Cena” co nyajnajxim Dioscojuyip ma Dios müid je ügy, e n'uucim. Je' je' ñidiy'ajt'ajtpy co Cristo ti xyajtügümüjcin ajt njot nhuinma'ñ co yajcruudzpejti etz ñi'py yteemy yojcy müid ajt nbocy ycixpi. Nañ jadu'n ma je “Santa Cena” co ndujchuäcxim, e ngaayim je tzajcaagy, je' je' ñidiy'ajt'ajtpy co Cristo xyajtügümüjcin ajt njot nhuinma'ñ müid ñinücx co ñaygëyeci ma ymüdzip huen yajcruudzpedyüi. ¹⁷ Oy ajt ooy njanimaayity, per nidüg'óciy üch ajt ngaayim je tügpi “Santa Cena” tzajcaagy. Jada tzajcaagy tüg yi', paady ycixpi tügpicy jäy üch ajt, e jadu'n üch ajt nipaady nej tügpi ninücx.

¹⁸ Oc-huinmaaygixy müich ajcxy yi Israel jäy ajcxy, co ajcxy tzützcixy je huidibi ajcxy yajhuindzigüyb Dios, chi ajcxy naydücmüjcgixy müid Dios ycixpi ma je Dios ojadajttac. ¹⁹ Hich nmüina'ñich co yi tzaadzech ca' ti mic'ajt müidity, e nañ jadu'n yi tzüch huidibi yajhuindzigüyb tzaadzech ca' jac nigü oy'ajtin müidity, ca'ydi jac huidibi tzüch. ²⁰ Jadu'n nmüina'ñich, co yi jäy ajcxy huidibi ca' mijpidaaccixy Dios, co ajcxy yejccixy yhuindzigüi'ñ, hue' ajcxy yajhuindzigüyb ca'oybi, e ca' Dios ajcxy yajhuindzigüy. E ca' ndzocyich co müich ajcxy migügpigipy je ca'oybi. ²¹ Co müich ajcxy m'uuccixy je ügy ma je “Santa Cena”, ca' huaad m'uuccixy je ügy huidibi ca'oybi ajcxy yhuindzigüi'ñ'ajtpy. Etz co mgaaygixy je tzajcaagy ma je “Santa Cena”, ca' huaad mgaaygixy je tzajcaagy huidibi ca'oybi yhuindzigüi'ñ'ajtpy. ²² ¿Nej tzoc yajjotma'tim yi Jesucristo? ¿Nej jacmic'ajt müid jada' üch ajt, ca'ydi yi'?

Je tzojcin huidibi tüg müibjcp i huaad tuñ müid ymüigü

²³ Janch tiy'ajt nej jay ymínaangixy co jébi huaad nduñich huentiijity huidibi nijot'ajtpyich, per ca' tüg'óciy nmigügtjicich jäygidaaccixy huidi ndumybich. Janch jadu'n jébi huaad nduñich huentiijity huidibi nijot'ajtpyich, per huidibi ndumybich ca' tüg'óciy xypubetyich ma ñich nmibijcin. ²⁴ Ca' y'oyity nnijot'ajtim ngi'm'oy'ajtin. Oy co nbubejtim nbudigiiyim nmigügtjic.

²⁵ Jébi ajcxy mdzüch huen ti tzüch huidibi yajtoocp ma je mercado. Ca' ajcxy myajtiihuipy ma je tzüch chooñ, ca'ydi jibic mnayjihuiiyigixy. ²⁶ Com Dios y'ayuc jadu'n ymina'n: "Je Huindzin Dios yi' nihuindzin'ajtp je naaxhuiñybi, etz ñihuindzin'ajttaayb tüg'óciy huidibi ji yajpatp."

²⁷ Pen jim pinjaty huidibi ca' ymibicy, xyajnihuohuyi tüg caayin uucin ma yi' ytijc, e pen ti mhuinma'n mbidägy co nicxy mgaya'n ma yi' ytijc, oy co mgaayipy mdzüdzip huentiijity huidibi ajcxy xymooyb. E ca' mnidihuipy myajtiihuipy ma je tzüch chooñ, ca'ydi jac pinjaty jibic ñayjihuiiyi müd huidibi ti mduñ. ²⁸ Per pen je jäy xyñimaayb: "Jada tzüch ti jäy yajhuindzigiy tzaadzech." Pues ca' mdzüdzip je tzüch, jigix ca' jibic ñayjihuiiyb je migüg huidibi ti xyñimäy co je tzüch ti yajhuindzigiy tzaadzech. ²⁹ Hue' nimaydacypich je mmigüg huidibi jibic nayjihuiiyb pen miich mdzu'chpyi tzüch huidibi tzaadzech yhuindzig'i'n'ajtp. Ca' nnimaydägyich nej miich ci'm mnayjihuiiyi. Ca' yjegyity co nijéjity jäy xyñimähuibich: "¿Na'amy co xycapx'adujcich tijaty nigoob müd co huingbi jäy jibic ñayjihuiiyi müd jégixpi?" ³⁰ Pen nyajnajxypich Dioscojuyp müd tijaty ycixpi huidibi ngaaybich n'uucypich, ¿na'amy co xyñigapxa'ñich xyñi'ojihua'ñich co ti ngay ti n'ügyich tijaty?" ³¹ Paady ycixp huentiijity tjugix tüg'óciy müd Dios y'oy'ajtin ymij'ajtin ycixpi. ³² Ca' mdúngixipy tijaty huidibi yi judíojäy ajcxy müd huing ñayjihuiiyi. Ca' mdúngixipy tijaty huidibi yi griegojäy ajcxy müd huing nayjihuiiyi. Etz ca' mdúngixipy tijaty huidibi yi mibijcpidjic ajcxy müd huing ñayjihuiiyi. ³³ Tüg'óciy huidibi ndumybich, hue' nduñich jigix tüg'óciy jäy jäygidägipy huidibi ndumybich. Ca' ni ti nduñich nej jébi ñich ci'm nayjäygidägijich. Hue' nduñich müd jacjadyi jäy ajcxy y'oy'ajtin ycixpi, jaydëbi ajcxy y'alma ñdzögipy.

11

¹ Jadu'n ndzocyich co miich ajcxy mdunipy jadu'n nej nduñich. E ñich tumbich jadu'n nej Cristo ytuuñ.

Nej huaad töxyjäydjic ajcxy yjäy'ajtcixy co migügtjic naymújigixy

² Miich ajcxy migügtjic, ngapxpatypich miich ajcxy, com miich ajcxy xyjatytimyjäymejtzpich, etz nañ mguydungixyp je ayuc je tiy'ajt huidibi ñich miich ajcxy ti nyaj'ixpijccixy. ³ Per ndzojcypich co mhuinjihuüyigixipy je tiy'ajt co Cristo nigohuajc'ajtpy nidüg nidüg yi mibijcpi yëydjicpi. E nañ nidüg nidüg yëydjic nigohuajc'ajty ajcxy ytöxyijc. E Dios nañ nigohuajc'ajtpy je Cristo. ⁴ Co tüg yëydjic cöjuuxy cöbe'n ñhuäcxy capxhuäcxy je tiy'ajt huidibi Dios ti ymöyii, tüg je' tzo'ydu'n anajty naymöyii. ⁵ E co tüg töxyjäy cöjuxtüdy cöbe'ndüdy ñhuäcxy capxhuäcxy je tiy'ajt huidibi Dios ti ymöyii, tüg je' anajty tzo'ydu'n ñaymöyii. Jadu'n je' nipaady nej jihuüy je' ycöme'pxity cödza'm. ⁶ Pen tüg töxyjäy ca' ñaygöbe'na'ñyii, jac'oy co huen yajcöme'pxy cödza'm. Per pen je töxyjäy cho'ydu'n jihuihuamuyb co

ycöhuay yme'pxity, o co ycöme'pxity cödza'm, jac nīgi oy co ñaygöbe'niyib. ⁷ Je yëydijctijc ca' y'oyity co ajcxy ycohuajc cöjuuxy cöbe'ñ m'i'dipy ma ajcxy Dios mibijctzoogixy o yaj'ixpijccixy Dios y'ayuc. Com je yëydijc jadu'n yi' nipaady nej Dios, e Dios yajcoj je yëydijc müd yi' y'oy'ajtin ycxipi. Per Dios yajcoj je töxyjäy müd je yëydijc y'oy'ajtin ycxipi. ⁸ Co Dios yajcoj je jayijpi yëydijc, ca' yajtuuñ je töxyjäy ycaachypajc. Hue' janchtiy co Dios yajcoj je jayijpi töxyjäy, je' yajtuuni je ñiyëydijc tüg ycaachypajc. ⁹ Dios yajcoj je töxyjäy müd je yëydijc ycxipi. E ca' nan yajcoj je yëydijc müd je töxyjäy ycxipi. ¹⁰ Paady ycxip copicy co je töxyjäy ajcxy y'ijtcixy cöbe'ñ co Dios mibijctzoogixy o najtzcaxiigixy Dios ytiy'ajt. Je' je' je tiy'ajt co yajpaady ajcxy ane'my, nañ jadu'n yi' ángeles ajcxy yajpaatcixy ane'my. ¹¹ Per ca' ñejity, iich ajt huidibi nmibijcim Cristo, ma ajt ndzinaayin je yëydijc ca' je' yajpaady naydüg, etz ni ca' je töxyjäy yajpaady naydüg, hue' ajcxy naymüddzináayigixyp. ¹² Com tiy'ajt jadu'n co Dios yajcoj je jayijpi töxyjäy müd je ñiyëydijc ycaachypajc. Etz tiy'ajt jadu'n co je töxyjäy ajcxy yajma'xung'ajtcixy je yëydijc ajcxy. Per Dios ti yaj'oyiydäy, e tüg'óciy jiihy chondäy ma Dios.

¹³ Miich ajcxy ci'm ocmínaangix oc-huinmaaygix, pen oy jadu'n o pen ca' y'oyity jadu'n co tüg töxyjäy Dios mibijctzoy jaygöbe'ñ. ¹⁴ Jëbi tiy'ajt nbaatim huenma'ámyity ya naaxhuiñ co je yëydijc huidibi ymüd ycöhuay yoñ ooy cho'ydu'n yecy. ¹⁵ E je töxyjäydijc ajcxy ooy ycomaypidzimigixy co ajcxy müdity ycöhuay yoñ. Com yi' je' huidi ycöbe'n'ajtip. ¹⁶ Pen jim pinjaty ca' mijotcujc'aty iich n'ayuc, copicy nejhuihuiy co iich ajcxy etz nañ jadu'n tüg'óciy jäy huidibi ajcxy mijpidaaccixyp Dios ma tüg'óciy cajp, cuydungixy nej ti nyaj'ixpiyich müich ajcxy, ca' pin jac huingbi costumbre müdity.

Pin tundigooyb “Santa Cenajoty”

¹⁷ Jada ayuc nyajnimähuaangixyp jadu'n nej mdungixy ma mnayyöymüjcgixy co Dios m'ojadajtcixy. Ca' ngapxpaadyich müich ajcxy, com jibic yhuimbizimy jadu'n nej mdungixy. ¹⁸ Jayijp nimähuaangixy co nijëjity migügtijc ti xyñimäyich co müich ajcxy mnaybijc-huäcxigixy co mnayyöymüjcgixy ma je nayyöymujctac. E iich nmibijcipyich ma ga ma co yjanchity nej je migügtijc ajcxy ymína'ñ. ¹⁹ Ca' yjecyity paady müich ajcxy mnaybijc-huäcxí müd ajcxy mjibic-huinma'ñ ycxipi, jaydëbi ñiguëxigy pin je' janch tiydudägy cuydumb Dios ytiy'ajt. ²⁰ Co müich ajcxy mnayyöymüjcgixy ma je nayyöymujctac, jadu'n yhuimbizimy co ca' mguydungixy nej ypadyii iich ajt nHuindzin Jesucristo ytiy'ajt co mjatungixy je “Huindzin je' ySanta Cena”. ²¹ Com co je hora paady ma yam mdungixy je “Huindzin je' ySanta Cena” nidüg nidüg müich ajcxy mgaaygixy abicyjaty, e ca' mdungix cuendi yi' jacjadyii migügtijc, paady nijëjity migügtijc ayuu y'ijtcixy, e nijëjity anaxy ycaaygixy y'uuccixy, ixti ymuucigixy nijëjity. ²² ¿Nej ca' müich ajcxy müdity mjün mdijc ma jëbi mgaaygixy m'uuccixy? Jadu'n nej müich ajcxy mdungixy ca' mmij'ijxcixy ca' mijpidaaccixy je jäy ajcxy nidüg'óciy huidibi mijpidaacp Dios. E nañ jadu'n myajtzo'ydungixy yi' ayoobi jäy huidibi ajcxy ca' ti müdity. ¿Huam iich müich ajcxy nimähuiy? ¿Nej jëbi ngömaaygixy müich ajcxy jadu'n nej mdungixy? Ca' huaad ngömaaygixy müich ajcxy co jadu'n m'iditcixy.

Jadu'n nej njäymejtzim ajt nHuindzin Jesús ma yi “Santa Cena”

23-24 Com ñich ajt nHuindzin Jesucristo ci'm xyaj'ixpijcyich je tiy'ajt huidibi ti nyaj'ixpijcyich miich ajcxy, co je huin'it coodz co agojñix ajcxy çiyeycy je nHuindzin Jesús, huin'it je' conigy je tzajcaagy, e co jayijp yajnajxy Dioscojuyip ma Dios, chi tujc-huácxy je tzajcaagy, e moy nidüg nidüg ydiscípulos ajcxy. E co ajcxy moyday, chi nimay ajcxy: "Caaygix jada tzajcaagy. Jadu'n ñich jada nninícx huidibi ngýyegaamybich ma yi o'cin mñd miich ajcxy ycixpi. Jadu'n ñich ti nduñich, jadu'n jada miich ajcxy mdunipy jäymejtziig mñd ñich ycixpi." 25 Co ajcxy ycayday, chi Jesús nañ jadu'n conigy je ügy copí'am, e yminañ: "Jada ügy je' jada je Dios y'ayuc jemybi huidibi Dios yajhui'my mñd jäy ajcxy ycixpi, je huidibi ñich nni'py ñidiy'ajt'ajtpy. Naag'oc naag'oc m'uuccixy jada ügy tungixy jäymejtziig mñd ñich ycixpi." 26 Paady naag'oc naag'oc miich ajcxy mgaaygixy jada tzajcaagy, etz m'uuccixy jada ügy, myegipy ajcxy tiy'ajt jadu'n nej Cristo y'o'cy mñd ajt nbocy ycixpi, ixti cooni anajty Jesucristo yhuimbity ya naaxhuiñ.

Nej huaad ngaayim je "Santa Cena"

27 Paady ycixp pinjaty mñd ca'oyjot ca'oyhuinma'ñ caaygixy je tzajcaagy etz uuccixy je vino'ügy, huidibi ajt nHuindzin Jesús ñinícx'ajtpy etz ñi'py'ajtpy, hue' ajcxy ymidundigooygixy ajt nHuindzin Jesús ñaaxnícx etz yi' yñi'py. 28 Paady ycixpi copicy nidüg nidüg mibijcpidijc jayijp yaj'oyñuipy yci'mjot yci'mhuinma'ñ, e huin'it jebi cayipy je tzajcaagy etz ügipy je vino ma je "Santa Cena". 29 Com pinjaty caayb je tzajcaagy etz ügy je vino ma je "Santa Cena", e ca' tuñ cuendi co je' je' ñich ajt nHuindzin Jesús ñinícx etz ñi'py, hue' je' ci'm ñaymidundigoyii, e Dios tzaachytunib mñd ypocy ycixpi. 30 Paady ycixp may miich ajcxy myuumñidity mba'mmñidity, pumäy mnayjihuiiyigixy. May miich ajcxy yuu ba'm xyaj'ayoogixy etz may ma miich ajcxy ti m'öccixy. 31 Co tiydudägy njot nhuinma'ñ nyaj'oyñiyim ci'm, ca' ajt nHuindzin Jesucristo xychaachytuunim. 32 Co ajt nHuindzin Jesucristo xychaachytuunim mñd yuu ba'm, paady ycixpi jadu'n xychaachytuunim, jigix ca'ydi nidigooyim ajt n'alma yjogy'ajtin quipxy mñd je naaxhuiñyäjy ajcxy huidibi ca' ajcxy Dios tzigiyygixy.

33 Paady ycixpi miich ajcxy migügtijc co ajcxy mgaya'nip m'üga'nip je "Santa Cena" nay'ahuñjigixy miñ xyipy, e jadu'n mgáaygixipy amugi'. 34 Pen jim pinjaty ma miich ajcxy ooy yuubögyii, jac'oy co ycaayipy y'ügipy ma yci'mdijc jacjayijp ma ca'ni ymiñ ma je nayyöymujctac. Jadu'n mdungixipy, ca'ydi Dios xychaachytuungixy mñd co ca' oy mduungixy je "Santa Cena". Yi jacjadyii ayuc huinma'ñ jim nyaj'oyñuibich co anajty nicxy ci'm n'íjxcixyich miich ajcxy.

12

Je mic'ajt huidibi Espíritu Santo yejcy ma nidüg nidüg mibijcpidijc

1 Migügtijc ajcxy, ndzojcypich co miich ajcxy mnejhuñhuipy jadu'n nej je Espíritu Santo xymooyim mic'ajt. 2 Miich ajcxy mnejhuñyb co jayijp'ajty co ca'ni anajty mmibijccixy Cristo, ooy anajty je ca'oybi xyajñidigooygixy xyajtüdigoooygixy, co m'ojadajtcixy tzaadzech quipychchch huidibi ca' ymidoy ca' ycapxy. 3 Paady ycixpi ndzojcypich co miich ajcxy mnejhuñhuipy co pinjaty yminañpy: "¡Ca' oy jäy yi Jesús!" je jäy huidibi jadu'n minamb, ca' je' anajty yajcapxyii je Dios y'Espíritu.

E pinjaty minamb: “Jesús ñch ajt nHuindzin!” je' anajty yajcapxp je Espíritu Santo.

⁴ Dios yjihui'ñ ymic'ajt yejcpy ymic'ajt canaag nax, per tügpajc jëyi je Dios yjihui'ñ huídibi mic'ajt yejcp. ⁵ Ji yajpaady canaagnax Dios ytung, per tügpajc ajt nHuindzin Jesús huídibi xyajñibijcim nije' nije' tung. ⁶ Ji yajpaady canaagnax huinma'ñ nej jëbi ndunim Dios ytung. Per tügpajc Dios huídibi xymooyim nidüg nidüg je nhuinma'ñ nej huaad ndunim Dios ytung. ⁷ Dios yajnigüëxigyp ma nidüg nidüg mibijcpidijc je tiy'ajt co ajcxy müdity yi' yjihui'ñ ymic'ajt ma ajcxy yjot yhuinma'ñ. Jadu'n Dios ytuñ müd tüg'óciy ymibijcpidijc y'oy'ajtin ycixpi. ⁸ Dios müd yjihui'ñ ymic'ajt ymooyb nijëjity mibijcpidijc ayuc huinma'ñ nej jëbi ajcxy yaj'ixpicy Dios y'ayuc. E nañ jadu'n Dios müd yjihui'ñ ymic'ajt möy nijëjity mibijcpidijc ixpijcin ma yi' ytiy'ajt, per tügpajc je Espíritu Santo huídibi mic'ajt yejcp. ⁹ E nañ jadu'n Dios müd yjihui'ñ ymic'ajt möy nijëjity jäy mibijcin, per tügpajc je Espíritu Santo huídibi mic'ajt yejcpy. E nañ jadu'n jacnaagity möy mic'ajt jaydëbi yajtzögy pa'mjäy. ¹⁰ E nañ jadu'n Dios müd yjihui'ñ ymic'ajt ymooyb nijëjity mibijcpidijc mic'ajt, jaydëbi mijhuinma'ñytúngixy milagro tungixy. E jac nijëjity ymooyb mic'ajt, jaydëbi najtzcapxiygyixy Dios ytiy'ajt. E jac nijëjity Dios ymooyb ixpijcin etz huijy'ajtin, jaydëbi ijxajpcixy je espíritu huídibi ca' tiy'ajt müdity, etz nañ jadu'n ijxajpcixy je espíritu huídibi tiy'ajt müdip. E jac nijëjity Dios ymooyb je mic'ajt, jaydëbi capxcixy huingbi ayuc, etz nañ jadu'n jac nijëjity ymooyb je ixpijcin jaydëbi yajnëguejicy je huingbi ayuc. ¹¹ Per tügpajc je Espíritu Santo huídibi ymooyb nije' nije' mibijcpidijc mic'ajt etz huinma'ñ. Ymooyb nidüg nidüg nej yi' tzocy.

Nidüg'óciy ajt nyajpaatim ma Cristo

¹² Cristo jadu'n yi' nej tüg ninícx, je ninícx ymüid canaag nax huídibi yu'cxp. Oy canaag jamüidity huídibi yu'cxp, per tügpajc ñinícx'aty. ¹³ Co nidüg nidüg ñch ajt nnübejtím, chi ñch ajt nyajpaatim nej tügpicy jäy. Com Dios yjihui'ñ ymic'ajt tügpajc yajpaady ma nidüg'óciyi ñch ajt njot nhuinma'ñ, ca' ñejity pen judíojäy ajt, o pen ca' ajt njudíojäyity; pen jäy xytumbi'ajtim o pen ndunim ngi'mdung; hue' n'ijtim nej tügpicy jäy. Dios xy'adigüyím xyjottigüyím yi' yjihui'ñ ymic'ajt nidüg'óciy ñch ajt, paady ycixpi tú'ciy nyajpaatim, com tú'ciy nmi'ijtim Dios yjihui'ñ ymic'ajt.

¹⁴ Tügpí jäy ñinícx müd canaagnax huídibi yu'cxp, huídibi midoob, huídibi ijxp. ¹⁵ Co ixypy je tecz jadu'n ymína'ñ: “Ca'p ñch ngüjity, paady ca' nyajpaadyich ma je ninícx.” ¿Nej paady ycixpi ca' yajpaady ma ninícxin? ¹⁶ O co ixypy je tädzac ymína'ñ: “Ca'p nhuinüty, paady ca' nyajpaadyich ma je ninícx.” ¿Nej paady ycixpi ca' yajpaady ma ninícxin? ¹⁷ Co ixypy tüg'óciy je jäy ñinícx y'oc-huin'aty, ¿ma ixypy müdity huíd midooyb? O co ixypy tüg'óciy je jäy ñinícx ytädzac'aty, ¿ma ixypy müdity huídibi jëbi müd tijaty xuugyii? ¹⁸ Dios ti pidaci jäy ytecy yhuin y'ahuac etz jac tijaty ma tügpí ninícx jadu'n nej yi' tzojcy. ¹⁹ Pen huiindi'ajty ixypy ninícx'ajtp, ¿ti ninícx ixypy jada? ²⁰ Dios ti möy nidüg nidüg jäy yci' ytecy, yhuin y'ahuac, yjijpput etz ytädzac, per tügpajc ñinícx'aty.

²¹ Ca' huaad je huin ixypy nimäy je ci': “Ca' ñch miich nyajmayjaty.” Nañ jadu'n ca' huaad ixypy je cohuajc nimay je tecz: “Ca' ñch miich nyajmayjaty.” ²² Tügpí ninícx copicy ca'pxy tijaty müd. Huídijaty je ninícx ymüid oy yjaquëxigy nej jihuüy ca' y'oy'ojadajtnüty, per copicy yi'.

23 Jadu'n ñich ajt njäy'ajtim. Muum ma ajt nninïcx ca' oy n'ijxim, paady nayxojaxim, jigix jac'oy quëxigip. Nañ jadu'n muum ma ajt nninïcx huïdi y'oymidzo'yduni, paady nyüdzim müid huit, jaydëbi oy quëxigity. 24 Muum ma ajt nninïcx oy n'ijxim paady ca' nyüdzim müid huit. Jadu'n Dios yaj'oyiy ajt nninïcx, jigix ma ca' oy y'ijxity, nxoxim müid huit, jigix jëbi oy quëxigy. 25 Jadu'n Dios yajcojy yaj'oyiy ajt nninïcx tú'ciy, jigix ca'ydi ñaychiptünigixy nije' nije' huïdibi yücxc ma ajt nninïcx. Tüg'óciy huïdibi nmüid'ajtim ma ajt nninïcx naybubéjtigixp miñ xyipy. 26 Pen pijcp muum ma je ninïcx, tüg'óciy je ninïcx jihuïy je pijcin. Pen muum ma ajt nninïcx ooy capxpaady y'ity, chi tüg'óciy je ninïcx jotcujc ñayjihuiyii.

27 Miich ajcxy nidüg'óciy Cristo xyñinïcx'ajtcixyp, e nidüg nidüg miich ajcxy myajpatcixy ma Cristo ñinïcx. Jadu'n nidüg nidüg ñich ajt nipaady nej huïdi yücxc ma tüg ninïcx. 28 Dios yajnïbïcjpy nije' nije' mïbijcpidïjc, jigix ajcxy yajnicxip nidüg nidüg yí' ytung. Tim jayijp yajnïbijcy je apóstol ajcxy huïdibi je miitung yajnicxip. E mimetz Dios yajnïbijcy nijëjity mïbijcpidïjc huïdibi najtzcapxïyb yí' y'ayuc, je midugigip Dios yajnïbijcy nije' nije' je mïbijcpidïjc huïdibi yaj'ixpijcp yí' ytíy'ajt. Dios yajnïbijcy mïbijcpidïjc nijëjity huïdibi mij huinma'ñ tumb. E Dios yajnïbijcy mïbijcpidïjc nijëjity huïdibi yajtzoocp pa'mjäy. E Dios yhuin'ijx huïdibi pubejtp ymigügtijc. E Dios yhuin'ijx je mïbijcpidïjc huïdibi jadip nej capxip huingbi ayuc. 29 Ca' nan nidüg'óciy mïbijcpidïjc huïdibi Dios huin'ijxyp y'apóstol'ajtcixy. Nañ ni ca' nan nidüg'óciy ajcxy najtzcapxïygixy Dios y'ayuc. E nañ ni ca' nidüg'óciy yí' ajcxy mijhuinma'ñytungixy. 30 Ca' nan nidüg'óciy mïbijcpidïjc huïdibi Dios huin'ijxip ymüid ajcxy mic'ajt cötujc yajtzögipy pa'mjäy. Nañ jadu'n ni ca' ajcxy nidüg'óciy jajtixy nej yajnïguéjixipy huingbi ayuc. 31 Pijctzoogix cixyot huinïjot ma Dios je mic'ajt etz je huinma'ñ oybi. ñich miich ajcxy nyajnïxihuipy tüg ni'aa tü'aa jac'oybi.

13

Je tzojcin je oyjäy'ajtin

1 Co ixipy ngapxyich tüg'óciy jäy ajcxy y'ayuc, etz nañ jadu'n ngapxich ángeles ajcxy y'ayuc, e ca' ndzocyich ca' njihuïyich nmigügtijcich, jadu'n yhuimbïdzimy ñich n'ayuc jadu'n nej tüg tambor o tüg platillo huïdibi nigooob ooy ñe'my. 2 E co ixipy najtzcapxïyich Dios y'ayuc, etz co ixipy njatyich tüg'óciy ixpijcin huïdibi pinjaty nejhuïy etz huïdibi pinjaty ca' nejhuïy, etz co ixipy nmïjpidägyich Dios ymic'ajt, ixti jëbi nyajpidigiyich tüg cop, pen ca' ndzocyich njihuïyich nmigügtijcich, ca' ñich ti ndzoohuity. 3 E co ixipy nmoydayich ayooobitjic tüg'óciy tijaty nmüidich, e nañ co ixipy ngïyeycyich nninïcx ma jäy ajcxy co huen nöctigoydäy, e ca' ndzocyich njihuïyich nmigügtijcich, ni ti oybi ca' nbada'ñich.

4 Yi jäy ajcxy huïdibi ooy tzocy ooy jihuiy ymigügtijc, hue' ajcxy ooy mecxtujcin müidity, nañ ooy ajcxy yung naxy yjot yhuinma'ñ. Nañ ca' ajcxy ymigüg ti yajcohuindoyii, e nañ ca' ajcxy ñaygömayii ci'm. 5 Yi mïbijcpidïjc huïdibi ajcxy tzojcp jihuiyb ymigügtijc, ca' ajcxy oyñine ycapxcixy, ca' ajcxy yci'm tzojcin adzip tungixy, nañ ni ca' ajcxy yhuindzipity, nañ ni ca' ajcxy ymigüg mijotma'tcixy. 6 Yi mïbijcpidïjc huïdibi ajcxy tzojcp jihuiyb ymigügtijc ca' ajcxy yjotcujcity co pinjaty

ytundigooy. Jotcuje ajcxy co pinjaty tudägy yjyä'ájtciixip. ⁷ Co naychojcin nayjihuiyim, huin'it yajtunim mecxtujcin, huin'it nmibijctayim huidijaty tiy'ajtip, huin'it nmibijctaayim co tüg'óciy tijaty oy yhuimbizimipy, huin'it nmechtujctayim tüg'óciy tzaachypi ayo'n.

⁸ Yi naychojcin nayjihuiyim ca' yi' ycixipy ytigoyipy ni mina. Minip je xii tiempo ma ca' y'ocyaj'ixnipy y'ocyajmidoonipy Dios ycapxy y'ayuc huidi jäy ajcxy ñajtzcapxiyigixyp, nañ ni ycayajmidoohuipy pin huingbi ayuc capxp, ni ycayajtzocy anajty ti diy'ajt. ⁹ Com ca' yca'pxity je ixpijcin huidibi ñich ajt nmüid'ajtim. Nañ jadu'n ca' yca'pxity je Dios y'ayuc huidibi ñich ajt nnajtzcapxiyim.

¹⁰⁻¹¹ Per co anajty nmüid'ajtim ca'pxy Dios y'ayuc ytiy'ajt, chi ycixipy ytigoyipy je ayuc huidibi nmüid'ajtim cham huidibi ca' yca'pxity. Co nmutz'ajtyich nbi'c'anäg'ajtyich, jadu'n anajty ngapxyich nmiydägyich n'iyiyich nejtyin pi'c'anäcin. Per co oy nmij'anäciyñich, chi n'ixmajtznich je pi'c'anäg'atypi huinma'ñ. ¹² Nañ tim jadu'n nyajnajxim jadachambi xii tiempo ca' n'ixpijctaayim, ca' nhuinjihuiydaayim Dios y'ayuc ytiy'ajt. Jadu'n nipaady nej jihuiy nay'a'ixnajxim ma tüg'ix, huidibi ti chixni ti yjibiciyñi. Co anajty Jesús yhuimbity jadüg'oc, huin'it huadz nhuinjihuiydaayim Dios y'ayuc ytiy'ajt, com naybadaanim müid Jesús ahuin ajjip. Jadachambi magama nhuinjihuiyich. Per co nnaybadiiybich müid Jesús, huin'it nhuinjihuiydähuibich nej Dios y'ixpijcin müidity, tim jadu'n nej Dios nejhuiydäy nej ñich n'ixpijcin nmüidity. ¹³ Nmibigaanim Cristo huinixii huin'tiempo, ca' n'ixmadzaanim nmibijcin ni mina. Nañ njjip'ixxim co oybi nbadaanim ma Dios huinixii huin'tiempo. Nañ jadu'n ndzojcin njhuiyim migügtijc huinixii huin'tiempo. Hue' jac ñigi copicyip co naychojcin nayjihuiyim ca'ydi jac ti.

14

Co huingbi ayuc yajcapxy

¹ Naychójcigixy nayjihuiyigixy miñ xyipy. Mijottigooygixy nej mbaatcixy Dios yjihui'ñ ymic'ajt canaagnax. Yi Dios yjihui'ñ ymic'ajt huidibi jac'oybi, yi' je' yejcpy mic'ajt jaydëbi mnajtzcapxiyigixy Dios y'ayuc ytiy'ajt. ² Yi jäy ajcxy huidibi Dios ymic'ajt müid jaydëbi capxy huing ayuc, hue' ajcxy ymigapxyp Dios, e ca' nan jäy, com yi jäy ajcxy ca' huinjihuiyigixy je' ajcxy y'ayuc huidibi capxp. Je Espiritu Santo yejcp je ayuc ma je huidibi capxp. Jadu'n nipaady nej jihuiy ameech je' ycapxy. ³ Pinjaty najtzcapxiyb Dios ytiy'ajt, yi' ycapxhuäcxyp Dios y'ayuc ma yi jäy ajcxy, jaydëbi yujcpedipy ajcxy y'ixpijcin ma Dios y'ayuc, nañ jadu'n jaydëbi ajcxy yjotmicpigipy etz yjotcugiiygixipy. ⁴ Pinjaty capxp huing ayuc, hue' ci'm naybubedyi. Pinjaty najtzcapxiyb Dios y'ayuc ma yci'm ayuc, hue' ypubejtyp tüg'óciy yi mübijcpidijc.

⁵ Huaad co ixipy nidüg'óciy müich ajcxy mgapxcixy huingbi ayuc. Per jac ñigi oy co müich ajcxy mnajtzcapxiyigixy Dios ytiy'ajt, ca'ydi co mgapxcixy huingbi ayuc. Pinjaty huidibi najtzcapxiyb Dios y'ayuc, jac ñigi oy tuñ, ca'ydi jac pinjaty huidibi capxy huingbi ayuc, pen ca' pinjaty capxticixy je huingbi y'ayuc, jigix je mübijcpidijc jotcuje'ajtin pätcixip. ⁶ Migügtijc ajcxy, co ixipy nnicxyich ma müich ajcxy, e ngapxyich ixipy huingbi ayuc, ¿ti oybi müich ajcxy mbadamyb ma ñich? Pen ca' anajty ti pubejtin nduñich ma müich ajcxy, pen ca' nyajnejhuiyigixy Dios ytiy'ajt

jemybi, pen ca' nyaj'ixpijccixy Dios ytiy'ajt o pen ca' nnajtzcapxiy'ich Dios y'ayuc, o pen ca' nyecy'ich ixpijcin.

⁷ Tzoc ocpidaacim tüg iixpejt ma je xüxy, jadu'n nej je flauti o je arpa. Pen ca' nmido'mbijcim je nota je tono nidüg nidüg, ca' nmido'mbijcim ti pieza ti xüxy yajxuxp o yajcoob. ⁸ Nañ jadu'n co soldados ajcxy chiptunaangixy, pen je trompeta ca' huädz yxüxy, ca' ni tüg soldado ñayñi'ixihua'ñiyi ma je tzip ytuna'ñiyi yjada'ñiyi. ⁹ Nañ tim jadu'n müd miich ajcxy, pen mgapxcixyp huingbi ayuc huidibi ca' pin huinjihuüy, ¿nej yajnejhuihuipy ti miich anajty mgapxyp? Jadu'n je' anajty yhuimbizimni nej nigooob mdim'ixmiydaaccixy. ¹⁰ Janch co ji yajpaady canaagnax ayuc ya naaxhuñ ac tigachjaty. Etz janch co nidüg nidüg jäy ayuc müdity e ci'm je' ajcxy huinjihuüyigixy. ¹¹ Per pen ca' nhuinjihuüy'ich je ayuc huidibi jäy xyajmigapxp'ich jadu'n iich yi' nyaj-naxy'ich nej agatz. O pen ca', yi' xyajnajxp'ich nej agatz. ¹² Paady miich ajcxy co ooy mnijot'ajtcixy Dios yjihui'ñ ymic'ajt canaagnax, yajtungix je mic'ajt huidibi pubedam yi mibijcpidijc, jigix yujcpedipy ajcxy ymibijcin etz y'ixpijcin ma Dios y'ayuc.

¹³ Paady pinjaty jaitp nej capxp huingbi ayuc, copicy co Dios mibijctzohuipy co mic'ajt ymöhuiib, jaydebi yajñiguejy je ayuc huidibi ycapxamyb. ¹⁴ Pen nmibijctzooybich Dios müd huingbi ayuc, nmibijctzooybich müd iich n'espíritu, per iich nhuinma'ñ ca' ti jäygidaacin paady. ¹⁵ ¿Ti huaad ndunipy'ich? Pues copicy nmibijctzooy'ich n'ojadaty'ich Dios müd iich njihui'ñ'ich, e nañ jadu'n nmibijctzooy'ich müd iich nhuinma'ñ'ich. N'ibadaamy'ich ngapxpadaamy'ich Dios müd iich njihui'ñ'ich etz müd iich nhuinma'ñ'ich. ¹⁶ Com pen miich mhuin'igixyp mhuingapxtaaccixyp Dios müd yi mjihui'ñ, je migüg huidibi amidoo'ijtp ca' je' huinjihuüy je huing ayuc huidibi mgapxyp, e ca' jëbi ymina'ñip "jadu'n jada, Amén." Com ca' yi' huinjihuüy ti yi' mgapxyp. ¹⁷ Ca' yjecyity co oyjaty ayuc ti myajtuñ co ti myajnaxy Dioscojuyip ma Dios, per yi mmigüg huidibi ca' huinjihuüy miich m'ayuc ca' yi' ti jäygidaacin paady. ¹⁸ Nyajnajxyp'ich Dioscojuyip ma Dios co nigü njaty'ich nej ngápxiby'ich huingbi ayuc, ca'ydi miich ajcxy nidüg'óciy. ¹⁹ Per co nyajpaady'ich ma je mibijcpidijc ti ñayyöymüjcgixy, jac'oy co ngapxy'ich migoox ayuc huidibi mibijcpidijc yhuinjihuüyigixyp, ca'ydi co ngápxibich majc mil huingbi ayuc huidibi ca' pin huinjihuüy.

²⁰ Migügtijc ajcxy, ca' ajcxy mmüd'adipy mhuinma'ñ, jadu'n nej pi'ctijc yhuinma'ñ müdity. Ma yi jibicpi huinma'ñ ymiñ naybidägi jadu'n nej ma'xungdijc huidibi ca' ti jibic huinma'ñ huinjihuüyigixy. Müd'adip miich ajcxy oyjot oyhuinma'ñ jadu'n nej mij'anäctijc huidibi yhuinma'ñ ti ymejztni ti yca'pxni. ²¹ Jaybety y'ity ma Dios ycötujcin necy ma Dios jadu'n ymina'ñ: "Nmigapxaamybich je may Israel jäy müd huingbi ayuc, e huingbi jäy najtzcapxihuamb iich n'ayuc ma yi' ajcxy, per ni jadu'n ajcxy xycatuna'ñ'ich cuendi." Jadu'n je Huindzin Dios ymina'ñ. ²² Paady je' je Dios ymic'ajt huidibi yajcapxp huingbi ayuc, yejcp Dios ymic'ajt iixpejt ma yi jäy ajcxy huidibi ca' mibijccixy Dios. Per je Dios ymic'ajt huidibi jäy ymüd co najtzcapxiy Dios ytiy'ajt, yejcp iixpejt ma yi mibijcpidijc, ca' yecy iixpejt ma yi' ajcxy huidibi ca' ymibijccixy. ²³ Ca' yjecyity jadu'n yjadip, co anajty ti ñayyöymüjcgixy je mibijcpidijc, e nidüg'óciy anajty ajcxy ytiigiigixy capxpi müd huingbi ayuc huidibi

ca' pin huinjihuüy, chi ytigihuip ma ajcxy ñayyöymugyüi nijëjity huídibi ca' ymibijccixy. ¿Ca' yí' ajcxy ymínáangixyipy co je mibijcpidijc anajty ajcxy ti y'ahuimbijtcixy loci? ²⁴ Pen nidüg'ócüy je mibijcpidijc ma je nayyöymujctac najtzcapxiygixy Dios ytiy'ajt müd yci'm ayuc, e co ytigihuipy pinjaty huídibi ca' ymibicy, e co yí' midohuipy Dios y'ayuc yjihuihuamyb ypocy. E ci'm huinmayip nej anajty ti ytundigooy müd Dios co midohuipy co nidüg'ócüy mibijcpidijc anajty najtzcapxiygixy Dios y'ayuc. ²⁵ E Dios y'ayuc yajnejhuíhuüib nej anajty ameech ti ytundigooy jotjoty huinma'ñyoty. E chi jada' ycojxtinay'ihuíhuipy, e ojadadipy Dios, e nañ jadu'n ymína'nip co janch Dios müch ajcxy xymüd'ijtp.

Tungixy tüg'ócüy müd tudägy'ajt etz yajxon

²⁶ Migügtijc ajcxy, ¿ti huaad mdúngixipy? Co mnayyöymújcigixipy, nijëjity müch ajcxy mhuin'ixipy tüg salmo, tüg ayuc huídibi yaj'ixpigamyb, tüg tiy'ajt huídibi Dios ti xyajnejhuíygixy, etz capxip huingbi ayuc, etz capxticxipy nej yhuimbídzimyb je huingbi ayuc. Tüg'ócüy jadu'n tungix, jaydëbi ajcxy jäygidägipy etz yujcpedipy ajcxy ymibijcin huídibi ti ñayyöymújcigixy. ²⁷ Pinjaty capxamb ma je naymujctac müd huingbi ayuc, huen capxy metz o tugüg jäy je'yí, e huindüg padüg huen capxcixy, ca' y'animayity. E pinjaty capxticxamb je' je' yajñigüejiip nej yhuimbídzimyb je ayuc tiibi capxcixy. ²⁸ Pen ca' yajpaady ma je nayyöymujctac tüg jäy huídibi capxticxip je huingbi ayuc, jac'oy co ca' ni ti yajcapxipy müd huingbi ayuc, jac'oy co migapxip Dios jotjoty huinma'ñyoty, e ca' capxip mayjäyoty. ²⁹ Nañ jadu'n mayjäyoty jëbi metz o tugüg jäy najtzcapxihuip Dios ytiy'ajt, e yí' jacjadyüi mibijcpidijc huídibi amido'ijtp, jëbi ajcxy huinmay pen janch Dios je' ytiy'ajt huídibi ajcxy ti najtzcapxiy, o pen ca' je' Dios tiy'ajt'adyüi. ³⁰ Pen jim mayjäyoty jadüg jäy Dios yajnejhuíyüi nej ycapxip, nej tiy'ajt najtzcapxihuipy, huen je jäy y'amonipy huídibi anajty jayijp ti ytigiy najtxcapxiyüi Dios y'ayuc ytiy'ajt. ³¹ Jëbi müch ajcxy nidüg'ócüy mnajtzcapxiygixy Dios ytiy'ajt huindüg padüg, jaydëbi tüg'ócüy je mibijcpidijc ixpijccixy Dios ytiy'ajt, e nañ jadu'n jëbi nidüg'ócüy yjotmicpijccixipy. ³² Copicy co yí' ajcxy huídibi najtzcapxiyb Dios ytiy'ajt, huen ajcxy nay'ané'migix ci'm, e huen capxcixy mina y'ahuaatzciy. ³³ Dios ca' xyajmidzojcin nicx nhuinma'ñyüigooyim, Dios chojcpy co servicio ndunim agujc jotujc.

³⁴ Jadu'n nidüg'ócüy mibijcpidijc ma canaag cajp ymínáangixy co ca' huaad töxyjäydijc ycapxcixy serviciojoty, com Dios ti capx'aducy co ajcxy ca' ycapxipy serviciojoty. Copicy co je yëydijc ajcxy ane'mip je servicio, e ca' töxyjäydijc ajcxy huaad ane'mgixy je servicio, com jadu'n Dios ycötujcin ymína'ñ. ³⁵ Pen ñejhuíhuamyb ajcxy töxyjäydijc ti ayuc ti tiy'ajt, jëbi ajcxy ñiyëydijc amidoogixy co anajty ajcxy yhuimbijtcixni ma ytiyc, com tzo'ydu'n yejcp töxyjäydijc ajcxy co ycapxcixy serviciojoty.

³⁶ Müch ajcxy hue' mdzachnaybidáacigixy nej jihuüy müch ajcxy jayijp tim nejhuíygixy Dios y'ayuc, ca'ydi jac pin. Müch ajcxy mnaybidáacigixy jadu'n nej jihuüy jimyí jadu'n yajcapxhuäcxy Dios y'ayuc, ca' yjacmaajity. ³⁷ Pen jim pinjaty ma müch ajcxy huídibi naybidaacip nejjihuíy Dios ti ymöyüi mic'ajt nej jëbi najtzcapxihuipy Dios ytiy'ajt, o ti yhuinma'ñymöyüi je Espíritu Santo tijaty tiy'ajt, hue' copicy nañ jadu'n yñejhuíhuipy co je ayuc huídibi müch müch ajcxy nyajnijayiyb, Dios jada y'ane'min ycötujcin.

³⁸ Pinjaty jim ma miich ajcxy huidibi ca' mijpidäga'n etz ni ca' cöbiga'n je ayuc tiy'ajt huidibi Dios ti xyaj'ane'myich, Dios ca' cöbiga'n yijadu'mbi jäy.

³⁹ Com ich jada ayuc nyaj'ixpijcpich, paady cham nimaaybich nmigügtijcich, co huen najtzogüygixy nej mnajtzcapxiygixy Dios ytiy'ajt, e nañ jadu'n ca' mgapx'adújccixipy yi' ajcxy huidibi capxamb huingbi ayuc. ⁴⁰ Hue' janchtiy tüg'óciy tungixy yajxon, etz müd tudägy'ajt, ca' oyñinej mdúngixipy.

15

Co Cristo yjugypijcy jadüg'oc co y'o'cy

¹ Jadügnax, migügtijc ajcxy, ndzojcpich co miich ajcxy mjäyméjtzcxipy je Jesucristo y'ayuc ytiy'ajt huidibi ti ngapxhuäcxyich ma miich ajcxy. Je' je' je ayuc tiy'ajt huidibi miich ajcxy ti mgöbijccixy etz huidi ajcxy tudägy mibijccixyp. ² Jëbi ajcxy m'alma ñüdzögipy, pen mguydumyb ajcxy ich n'ayuc huidibi ngapxhuäcypich, e pen ca' anajty ti mmibijccixy.

³ Ti ngapxnaxyich ma miich ajcxy je ayuc huidibi Dios jayijp ti xymöyich, etz ti nyajnimaaygixy huidibi jaccopicyip co Cristo y'o'cy müd ajt nbocy ycixpi, jadu'n nej Dios y'ayuc ymına'n huidibi jaybety ijtp ma yi' ñecy. ⁴ Chi ajcxy yajnaxtigüy Jesús, e codugüg xü yi' yjugypijcy jadüg'oc jadu'n nej Dios y'ayuc ymına'n huidibi jaybety ijtp. ⁵ E co je Cristo yjugypijcy, chi ñayguëxici jayijp ma Pedro, e jac'axam ñayguëxici ma yi' jacjadyii ni majmetzpi apóstol ajcxy. ⁶ Jahueeni xü tiempo yjacnicxy co je Cristo oy ñayguëxigyii nañ jadu'n ma migox nimigo'pxnaxy mibijcpidijc tügpi tiempo. E may yijadu'mbi mibijcpidijc jacjuy'ajtni chambaad, etz naagity ajcxy ti y'ó'ccixni. ⁷ Jahueeni xü tiempo yjacnicxy co Cristo ñayguëxici ma Jacobo, etz nañ jadu'n ma nidüg'óciy yi' y'apóstol ajcxy.

⁸ Jac tim axam ñayguëxici je Cristo nañ jadu'n ma ich. Jacjayijp Jesús huin'ijxy yi' jacjadyii apóstol ajcxy, etz jac'axam ich xyhuin'ijxyich. Jadu'n ich nipaady nej tüg jäy huidibi ooy ti ninajxni je tiempo co ti yma'xung'aty. ⁹ Jaccapxpaady yi' jacjadyii Jesús y'apóstol ajcxy ca'ydi ich. Nañ jadu'n ni ca' ich xypaady co jäy ajcxy xytüjibich Jesús y'apóstol, müd co ooy ti n'ixhuidityich ti nbahuidityich Dios yjäy ajcxy. ¹⁰ Ich nje'ajtpich nej nje'atyich müd co Dios may'ajt müd ich tuñ. Je mijmay'ajt je mij'oy'ajt huidibi Dios ti tuñ müd ich, ca' ñaadig'aty, ti y'oybidzimyb. Nigi mictägy ti nduñich ma Dios ytung, ca'ydi jacpinjaty. Ca' nan co ich ndzachmadägyich ma Dios ytung. Hue' Dios oy xymüid'ityich, etz ooy may'ajt tuñ müd ich. ¹¹ Paady pen ti miich ajcxy mbaady Dios ytiy'ajt ma ich, o ma yi' jacjadyii apóstol ajcxy, ca' ñejity. Je' je' je Cristo y'ayuc huidibi ich ajcxy ngapxhuäcypich, e nañ Cristo yi' y'ayuc tübi mmibijccixy.

Co öcpi ajcxy yjugypigipy ajcxy jadüg'oc

¹² Per pen ich ajcxy ayuc ngapxhuäcypich co je Cristo yjugypijcy jadüg'oc co y'o'cy, zna'amy co nijëjity miich ajcxy minaangixy co yi' jäy ajcxy tübi y'o'ccixy ca' ajcxy yjugypigaangixy jadüg'oc? ¹³ Pues pen janch ca' yjugypigaangixy tübi y'o'cy, nañ jadu'n ni Cristo ca' ycajyugypijcy jadüg'oc. ¹⁴ Co ixipy yjanchity co Cristo ca' yjugypijcy, nañ tim jadu'n je ayuc huidibi ngapxhuäcypich ca' ti mic'ajt ixipy müdity. E nañ jadu'n miich ajcxy mmibijcni ca' ixipy chobaady. ¹⁵ Pen tiy'ajt ixipy co je öcpi ca' yjugypigaangixy, huin'it je Dios y'ayuc huidibi ngapxhuäcypich ixipy yhuimbizimyb anü. Com ngapxhuäcypich co Dios yajjugypijcy Cristo

co y'o'cy, paady pen tiy'ajt ixyipy co pinjaty tibi y'o'ccixy ca' yjugypijcy. Nañ jadu'n ixyipy ca' ytiy'ajtity co Dios yjugypijcy Cristo. ¹⁶ Pen je öcpidijc ajcxy ca' jugypijccixy etz ca' ajcxy yjugypigaangixy jadüg'oc, nañ jadu'n ni je Cristo ca' ycajugypijcy jadüg'oc co y'o'cy. ¹⁷ Co je Cristo ca' ycajugypijcy jadüg'oc co y'o'cy, chi müch ajcxy mmibijcin ixyipy ca' choobaady. E ca' müch ixyipy ajcxy Dios mbocy xyhuinmecxi. ¹⁸ E pen janch tiy'ajt ixyipy co je Cristo ca' ycajugypijcy, huin'it je mibijcpidijc tibi y'o'ccixy tigoyaangixy y'alma. ¹⁹ Pen janch tiy'ajt ixyipy co mmibijcin Cristo jeyi ma jadachambi tzinaayin ya naaxhuiñ, ca' jac ni ti ixyipy njijp'ijxim co n'o'cim. Jadu'n ich ajt nipaady nej locijäy, e jäy ajcxy nigi xyñixicim xyajxicim, ca'ydi jac ni pin.

²⁰ Per janch co Cristo yjugypijcy jadüg'oc co y'o'cy, je Cristo yi' je' je jayijp jäy huidibi jugypijc jadüg'oc. Co je Cristo yjugypijcy, chi ñicxy jadüg'oc ma Dios yajpaady, e nañ jadu'n müd yi' ycixpi mayjäy yjugypigañ ajcxy co anajty ti y'öccixy, e yñicxaangixy ma Dios yajpaady. ²¹ Com müd tüg jäy, je Adán, chondacy yi' o'cin ya naaxhuiñ. Nañ tim jadu'n müd tüg jäy, je Cristo, chondacy je jugypijcin co jäy y'o'ccixy. ²² Müd jada ycixpi co Adán ytundigooy oga'n, paady nidüg'öciy jäy patcixy yi' o'cin. Müd jada ycixpi co Cristo yjugypijcy jadüg'oc co y'o'cy, paady nidüg'öciy jäy ajcxy yjugypigaangixy jadüg'oc co anajty ti y'öccixy. ²³ Nidüg nidüg jäy yjugypigañ jadüg'oc jadu'n nej anajty ñigueegiyyi. Cristo ti yjayijp'aty co yjugypijcy. Tüg'öciy yi' jacjadyi jäy ajcxy huidibi mñicxpejtixp Cristo, yi' ajcxy jugypigamb jadüg'oc co anajty Cristo yhuimbity ya naaxhuiñ. ²⁴ Co anajty je Cristo yhuimbity ya naaxhuiñ, chi ycixipy ytigoyipy je naaxhuiñybi. Cristo yajtigoyamyb tüg'öciy naaxhuiñyjäy y'ane'min, tüg'öciy naaxhuiñyjäy ycötujcin, etz tüg'öciy naaxhuiñyjäy ymic'ajt. Jesucristo ypijtähuaanip tüg'öciy naaxhuiñyjäy ajcxy y'ane'min, e pidactähuiipy ma Dios y'ane'min, e Dios Teedy je' je'ajttähuib. ²⁵ E tim copicy co je Cristo y'ane'mdähuaamyb tüg'öciy, ixti cooni Dios anajty ti mimadactäy tüg'öciy Cristo ymidzip, e ti pidactäy anajty ma Cristo y'ane'min. ²⁶ Jesús yajcixamyb yajtigoyamyb jac'axam je o'cin, ca' ni pin yjac'öcniipy. ²⁷ Com Dios ymimadactähuiip tüg'öciy je Cristo ymidzip, e pidactähuiip ma je Cristo y'ane'min. Per co Dios y'ayuc huidibi jaybety ijtp yminañ co je Cristo ti mimadactäy tüg'öciy, ca' nan hue' je' yajhuinjihuiy co Cristo ti mimadägy Dios. Com Dios yi' je' huidibi ti mimadactäy, e ti pidactäy ma Cristo y'ane'min. ²⁸ Co anajty Dios mimadactay tüg'öciy pinjaty etz tijaty huidibi mic'ajt müd, e co anajty pidactay ma je Cristo y'ane'min, chi je Dios y'ung ypidactähuiipy yi' y'ane'min ma Dios Teedy, etz ane'my yhuimañ ma Dios Teedy, je huidibi anajty ti mimadactay. Jadu'n Jesucristo tunañ, jigix jëbi Dios müd'ajttäy tüg'öciy mic'ajt etz ane'm'ajt.

²⁹ Pen ca' yjadu'nity, çna'amy co mdzachnibejtixy co öcpi tzach-codinaaygixy? Co ixyipy ca' pin yjugypigañ jadüg'oc co anajty ti y'o'cy, çna'amy co jäy ñibejtixy müd öcpi ycixpi?

³⁰ ¿E ti ycixpi co ich ajcxy nyajpatcixy ayo'nduum jabom jabom? ³¹ Migügtijc ajcxy, janch janch ich müch ajcxy nimaaygixy co ooy njäygidägyich müch ajcxy. Müd co mmibijccixy je nHuindzin Jesucristo, paady ycixpi ich müch ajcxy nimaaygixy co jabom jabom nyajpaadyich öcjijp'am. ³² Minaambich jadu'n co ooy nhuindinäy njijptinäyich nmidzip ya Efeso. Tim jadu'n nipaady nej jibic iyujc ahua'n iyujc nhuindinäy

nijiptināyich. Pen ca' yjanchity co yi öcpi ajcxy yjugypigipy jadüg'oc, naadigi'ajtp icyipy co ðich ayo'n jabom jabom nhuindināy nijiptināyich. Nig oy co icyipy nyajtüyöyim jadu'n nej ayuc y'ityin: "Tzoc caayim uucim, agujc'ajtim jotcuje'ajtim, com jabom huixtic njugy'ajtin ycixaanin müid yi o'cin."

³³ Ca' mnayyéjicigixy co pinjaty xyhuin'ingixipy. Jadu'n yjadipy nej y'ayuc y'ityin: "Yi migügtic ajcxy huidibi jibicjot jibic-huinma'n müid, yajtigooyb ajcxy je oyjot oyhuinma'n." ³⁴ Ixmajtzicix jibicjot jibic-huinma'n etz tzinaaygix tudägy ca' mbocytungixy. Nijëjity müich ajcxy ca' mnejhuigyixy Dios ytiy'ajt. Jadu'n nmīna'nich, jigix ajcxy mdzo'ydu'n mjihuigyixipy.

Nej ajcxy yi ögyipi yjugypigipy ajcxy jadüg'oc

³⁵ Ycadimjegyity co nijëjity müich ajcxy xy'amidohuipyich: "¿Ma mic'ajt pátcixipy je o'cpi ajcxy co jëbi yjugypijccixy jadüg'oc? ¿Huidibi ninicx ajcxy ymi'idamyb?" ³⁶ Ca' müich ajcxy ti mhuinjihuigyixy. Ca' mnejhuigyixy co je moc tim huidibi mniipcixyp ca' ymuxa'n ixti cooni anajty jayjip ti ypüch. ³⁷ Ca' müich ajcxy mniipcixy je mocquipy. Hue' müich ajcxy mniipcixyp je timmoc o jacjadyii huingbi tim. ³⁸ E co je tim ymuxy, chi Dios möy je ñinicx, tim jadu'n nej Dios jayjip ti huinmay ti tzocy. E Dios nije' nije' je tim möy je ñinicx tigachjaty. ³⁹ Canaagnax ninicx yajpaady ya naaxhuiñ, ca' ajcxy ytügnaxity. Tigach yi jäy ajcxy müidity ñinicx, tigachjaty iyujc ajcxy müidity ñinicx, nañ tigachjaty joon ajcxy müidity ñinicx, e nañ jadu'n tigachjaty acx ajcxy müidity ñinicx. ⁴⁰ Yi tzajpjoty tzinaayb ajcxy tigachjaty müidity ñinicx, nañ jadu'n huidibi ajcxy tzinaayb naaxhuiñ tigachjaty müidity ñinicx. Yi tzajpjoty tzinaayb ajcxy ñinicx müid tigachjaty y'oy'ajtin, ca'ydi jadu'n nej yi naaxhuiñ tzinaayb ajcxy y'oy'ajtin. ⁴¹ Yi xii ytücxin yjajin ca' ñaybadyii müid po' ytücxin yjajin, nañ tim jadu'n je po' ytücxin yjajin ca' ñaybadyii müid madza' ytücxin yjajin. Etz nije' nije' madza' müidity ytücxin ca' ñaybadyii müid jacjadyii madza' ytücxin yjajin. ⁴² Nañ tim jadu'n yjada'n müid yi jäy ajcxy tibi y'occixy co ajcxy yjugypijccixy jadüg'oc. Jäy ajcxy yajnaxtigiy je öcpi naaxnicx huidibi yhuindigooyipy, e yjugypigipy jadüg'oc müid tüg ñinicx jemybi huidibi ca' yhuindigoya'n nimina. ⁴³ Je öcpi ñaaxnicx co ñaaxtigiy, ca' ti oy'ajtin müidity, e co yjugypijcni jadüg'oc ymüid y'oy'ajtin. Je öcpi ñaaxnicx co ñaaxtigiy, ca' ti mic'ajt müidity e chi yjugypijcni mic'ajt müid. ⁴⁴ Co je öcpi ñaaxtigiy, hue' yjugypijcni, müid jemybi ninicx ca'p yaj'ixy. Pen ji yajpaady ninicx huidibi Dios ti yajcojy müid naax, nañ tim jadu'n ji yajpaady ninicx huidibi Dios yajcojpy müid yjihui'n ymic'ajt ca'p yaj'ixy.

⁴⁵ Jadu'n jaybety y'ity ma Dios ñecy ma jadu'n ymīna'n: "Je jayjip Adán ymüid anajty jugy'ajtin." Je axambi Adán (je' je' je Cristo) je' tüg espíritu huidibi jugy'ajt yejcp. ⁴⁶ Je huidibi Dios yjihui'n ymic'ajt müid ca' je' yjayjip'ajty, je' jayjip'ajt huidi Dios yajcoj müid naax; jac'axam je' huidibi Dios yjihui'n ymic'ajt müid, je' je' je Cristo. ⁴⁷ Je jayjipi jäy huidibi Dios yaj'oyiy, hue' je' yaj'oyiy müid naax (e yajpaady ya naaxhuiñ). Je mimetzpi jäy huidibi Dios yaj'oyiy, ðich ajt nHuindzin Jesucristo, hue' je' choon tzajpjoty. ⁴⁸ Je jäy ajcxy huidibi tzinaayb ya naaxhuiñ, yi' ajcxy ñinicx tü'ciy ñaybadyii müid Adán ñinicx huidibi Dios yaj'oyiy müid naax. Yi jäy ajcxy huidibi tzinaayb tzajpjoty, hue' ajcxy ñinicx tü'ciy ñaybada'ñiyii müid je Cristo ñinicx huidibi tzinaayb tzajpjoty. ⁴⁹ Jadu'n nej ðich ajt, tügnax

nguëx'icim miid Adán huidibi Dios yaj'oyiy miid naax. Nañ tim jadu'n tügnax nguëx'igaanim miid je Cristo huidibi tzinaayb tzajpjoty.

⁵⁰ Migügtijc ajcxy, hue' nnimähuaangixy co je ninicx huidibi miid yxixy etz yñi'py ca' yi' y'ida'ñ ma Dios y'ane'my. Je ninicx huidibi cixamb tigoyamb ca' pada'ñ it lugar ma yi ñinicx ajcxy ity huidibi ca' ycixa'ñ ytigoya'ñ. ⁵¹ Tungix cuendi jada ayuc, nyaj'ixpiigaamybich miich ajcxy tüg tiy'ajt huidibi ca' pin huinjihuüy. Ca' nan nidüg'óciy ñich ajt n'ögaanim, per nidüg'óciy ñich ajt Dios nninicx xyajtigadzaanim. ⁵² Co anajty Dios yajxüxy yi' ytrompeta, je huidibi anajty cogix'iyñip, chi cixipy je naax-huiñybi. Chi Dios xyajtigadzaanim ajt nninicx tim tzojcyi, tim tüg jax'igy tüg huinmipxy. Dios yajxüxamyb yi' ytrompeta, e je jäy tiñbi ajcxy y'öccixy jugypigip ajcxy jadüg'oc, e ni ca' mina ajcxy y'öccixnipy. E ñich ajt huidibi jacjy'ajtni Dios ñich ajt xyajtigadz'aaanim nninicx. ⁵³ Com ñich ajt nninicx huidibi ögam, huidibi huen tigoyamb, copicy ytigadzip, e nmüid'adaanim ninicx huidibi ca' öga'ñ ca' yhuindigoya'ñ. ⁵⁴ Co anajty ytigajtzim ajt nninicx huidibi cixamb huindigoyamb, nmüid'ajtim anajty jemybi ninicx huidibi ca' ycixa'ñ yhuindigoya'ñ nimina. Co anajty ytigajtzim ajt nninicx huidibi ögam, e nmüid'ajtim jemybi ninicx huidibi ca' y'öga'ñ, huin'it cuydunipy Dios y'ayuc huidibi jaybety ijtp huidibi jadu'n yminamb: "Co anajty ajt nHuindzin Dios mimadägy yi o'cin, huin'it cödigooñip je o'cin (ca' jacpin y'oc'o'cnip). ⁵⁵ ¿Ma yi o'cin ocjacpada'ñ mic'ajt co tijy xy'ocjactzaachytunaanim? ¿Ma yi o'cin ocjacpada'ñ mic'ajt co tijy xy'ocmimadägaanim?" ⁵⁶ Miid co ti ndundigooyim, paady ycixp o'cin nbaatim. Miid co ca' ti nguydundaayim Dios ycötujcin, paady ycixp o'cin nbaatim. ⁵⁷ Per nyajnajxim Dioscojuyip ma Dios co mijmay'ajt ti tuuñ miid ñich ajt ycixpi, e ti nmimadaacim yi o'cin co ajt nHuindzin Jesucristo y'o'cy miid ajt nbocy ycixpi.

⁵⁸ Paady ycixp, miich ajcxy migügtijc huidibi ooy ndzocy njihuüyich tiydudägy mmibijccix, ca' m'ixtigihuäccixy ma mmibijcin, ca' m'ixmajtcixy yi mmibijcin, ca' ajcxy mjotmetzcixygy. Tungix jabom jabom ma Dios ytung agujc jotucj, com mnejhuuyigixyp co ca' ñaadiği'aty ajcxy mdung ma ajt nHuindzin Jesucristo ytung.

16

Je cuejtin miid je hermano ajcxy ycixpi

¹ Jadu'n nej ymiñ yi meññ huidibi miich ajcxy myajmujccixyp miid je mibijcpidijc ycixpi huidibi jim Jerusalén. Cuydungix je tiy'ajt huidibi ti nyaj'ané'ngixyich yi mibijcpidijc huidibi canaagpicy yajpatp jim Galacia. ² Naag naag domingo, je jayijpi xi ma je semana y'ixtigiy nidüg nidüg miich ajcxy mbiidägip abicy hueeni pi'cmeen, jadu'n nej anajty ii ti mbaatcixy. Je pi'cmeenñ huidibi anajty ti myajmujccixy nguënd'ajtcixipy ooy, jigix co ñich jim njädiip ma miich ajcxy, ca' ycopicyity meññ myajmujccixipy. ³ E co anajty jim nmechich ma miich ajcxy, miich ajcxy myajñibigipy nijëjity migügtijc huidibi nicxip jim Jerusalén. E ñich nguexipyich jada migügtijc jim Jerusalén miid tüg necy etz miid je meññ huidibi anajty miich ajcxy ti myajmujccixy, jaydëbi yajcidigihuiip je mibijcpidijc jim Jerusalén. ⁴ E pen ooy ytimycopicyity co ñich nañ jadu'n nnicxibich jim Jerusalén, jëbi ajcxy ñicxy miid ñich.

Pablo huinmay co nicxa'ñ Macedonia

⁵ Co anajty ndübicyich nnicxaambich ma miich ajcxy, jayijp naxihuañich Macedonia naaxjot, com copicy jim Macedonia naxihuañich. ⁶ Ca' jecyity co nicxy nhui'myich ma miich ajcxy jecy jecy. Ca' yjecyity co nyajnaxipyich tüg'óciy je tichypo tiempo miid miich ajcxy. Co anajty ndzooñich jadüg'oc ma miich ajcxy, nnicxyich anajty muumjaty, miich ajcxy xytüjijphuohuñich ma ñich anajty nnicxañich. ⁷ Ca' nan tzojccixy n'idañich miid miich ajcxy, hue' jatytimey huäcxibaambich ma miich ajcxy jecy jecy, pen ñich ajt nHuindzin Jesús jadu'n tzojcp. ⁸ Per njac-huäcxibaambich ya Efeso ixti cooni Pentecostés xii anajty ti ñajxtäy. ⁹ Com nmüdich it lugar ya ma jébi ngapxhuäcxiyich Cristo y'ayuc, e mayjäy huidibi mijpidacp ñich n'ayuc, nañ jadu'n mayjäy ya ooy midzip'aty Jesucristo y'ayuc ytiy'ajt.

¹⁰ Co Timoteo anajty yjädy ma miich ajcxy, tungixy may'ajt mgöbñicxixy agujc jotcuyc ca' ti mhuinmaaygixy, com Timoteo tumb ma ajt nHuindzin Jesucristo ytung tim jadu'n nej ñich nduñich. ¹¹ Paady ycixp ca' huaad miich ajcxy Timoteo mga'oy'ixipy etz mdüjijphuohuñipy, jaydëbi ca' ti jotmay miid'adipy etz yjactüyöyip agujc jotcuyc, e ymedzipy ya Efeso ma nyajpaadyich. Com njijp'ijxypich co Timoteo xñijädibich quipxyi miid jacjadyii mibijcpidijc.

¹² Jadu'n nej yjajti miid ajt nmigüg Apolos. May'ajt nbijctzoohuich ma Apolos co yi' müdnicxip nijëjity jacjadyii migügtijc huidibi nicxamb ma miich ajcxy. Per ca' yi' yjotcuycity co ñicxip jadachambi tiempo. Hue' janchtiy jacjiini yñicxipy, pen yaj'ahuätzciyb anajty.

Capxpoocxin huidibi cijxnip je necy

¹³ Ni'ixi' m'idipy ajcxy ma mmibijcin. Naygüend'ájtigix ma mmibijcin. Tiydudägy ajcxy mmibigipy, ca' m'ixtigihuäccixy ma mmibijcin. Naybidaacigix huinmic jotmic ma mhuinmañ. Mic m'idipy ajcxy ma mmibijcin. ¹⁴ Tüg'óciy tijaty ajcxy mdungixy, tungixp miid tzojcin jihuiyin etz ooyäy'ajtin.

¹⁵ Migügtijc ajcxy, mnejhuñyb jadu'n nej Estéfnas miid yjugymigüg ti mibijccixy Jesucristo y'ayuc. Yi' je' jayijp ajcxy mibijcp jim Acaya, e ti yhuinmañypidaaccixy co ypubedamyb ajcxy yi' mibijcpidijc. ¹⁶ May'ajt nbijctzooybich ma miich ajcxy co myajmij'ájtixipy Estéfnas, etz jac pinjaty huidibi pubejtp je mibijcpidijc etz huidibi ajcxy tumb Dios ytung. ¹⁷ Ooy njotcúcidyich co Estéfnas, Fortunato, etz Acaico ti ymiñ ma ñich ajcxy ya Efeso. Yi' ajcxy xymüid'ijtpich, com ca' anajty y'oyiy nej nmüd'idipyich miich ajcxy. ¹⁸ E yi' ajcxy ti ooy xyajjotcugiyich, e nañ jadu'n miich ajcxy ti mjotcugiyigixy co yi' ajcxy ymiñ ma ñich. Paady ycixp copicy co miich ajcxy myajmij'adip yi' ajcxy etz jacjadyii tim jadu'n nej yi' ajcxy.

¹⁹ Yi' mibijcpidijc huidibi canaagpicy ya Asia naaxjot yquejxyp ajcxy capxpoocxin ma miich ajcxy. Aquila etz Priscila etz yi' mibijcpidijc huidibi ajcxy yöymujcip ma Aquila ytiyc yquejxp ajcxy capxpoocxin ma miich ajcxy ma ajt nHuindzin Jesucristo yxi. ²⁰ Tüg'óciy je mibijcpidijc huidibi ya Efeso yquejxp ajcxy capxpoocxin ma miich ajcxy. Nay-gapxpoócixigixy miich ajcxy xic xon.

²¹ ñich, Pablo, njaaybich miid ngi'mgi' ngi'mletra jada capxpoocxin huidibi nguejxypich ma miich ajcxy. ²² Pen jim pinjaty ca' mijpidägy ñich

ajt nHuindzín Jesucristo, huen Dios yajtigooyip ajcxy y'alma. ¡Maranata!
Huen tzojc yminiꝑy ajt nHuindzín Jesucristo.

²³ Huen ajt nHuindzín Jesucristo oy'ajt may'ajt tuniꝑy miid miich
ajcxy etz xyconuucxiꝑ ajcxy. ²⁴ Ndzojcypich njuhiiꝑbich miich ajcxy
nidüg'óciy huidibi yajpaady ma Jesucristo. Jadu'n jada. Amén.

2 CORINTIOS

Yi Mimetz Necy Huidibi San Pablo Yajniguejx Je Mibijcpidijc Jim Corinto

¹ Hich Pablo, Dios jadu'n ti tzocy, paady ycixpi Jesucristo ti xyajñibicyich co ngapxhuäcxibich yi' y'ayuc. Hich müd ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajt huidibi yajpatp jim Acaya ñaaxjot. ² Huen Dios Teedy etz hich ajt nHuindzin Jesucristo may'ajt oy'ajt tunipy müd miich ajcxy etz xyajjotcugiygixip.

Nej Pablo yajaty y'ayoy

³ Tzoc yajnajxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ayoohuim, je Dios huidibi yejcp jotcujc'ajtin. ⁴ Dios xyajjotcugiyim co nminajxim nyajnajxim tzaachypi ayo'n jigix jébi nyajjotcugiyim jacpinjaty huidibi minajxp yajnajxp tzaachypi ayo'n. Tim jadu'n nej hich ajcxy ti nbaady jotcujc'ajtin ma Dios, nañ tim jadu'n yi' ajcxy padañ jotcujc'ajtin ma Dios huidibi minajxp yajnajxp tzaachypi ayo'n. ⁵ Com tim jadu'n nej hich ajt nminajxim nyajnajxim tzaachypi ayo'n müd Cristo ycixpi, nañ tim jadu'n müd Cristo ycixpi nbaatim jotcujc'ajtin. ⁶ Paady ycixpi hich ajcxy nminajxcixy nyajnajxcixy tzaachypi ayo'n, jaydëbi miich ajcxy mbaadip jotcujc'ajtin etz nañ jadu'n ypaadip ajcxy m'alma ñidzoocin. Dios yejcpy jotcujc'ajtin ma miich ajcxy, jaydëbi miich ajcxy mbaadip jotcujc'ajtin etz nañ jadu'n ñidzögip ajcxy yi m'alma. E co ajcxy mbaadip jotcujc'ajtin etz ajcxy m'alma nidzoocin, chi jébi miich ajcxy mmimadägip etz nmecxtugip tzaachypi ayo'n, tim jadu'n nej hich ajcxy nmimadägy etz nmecxtújcixich tzaachypi ayo'n. ⁷ Jotcujc nayjihuiyijich müd miich ajcxy ycixpi, com njipp'ixypich co mmadägipy ajcxy ma mmibijcin. Com nejhuiybich co miich ajcxy mmimajxyp myajnajxypi tzaachypi, tim jadu'n nej hich ajcxy nminajxcixy nyajnajxcixy tzaachypi. E nañ jadu'n Dios yejcpy jotcujc'ajtin ma miich ajcxy, tim jadu'n nej yecy jotcujc'ajtin ma hich ajcxy.

⁸ Migütiyc ajcxy, hich ajcxy ndzojcpich co miich ajcxy mnejhuihuip jadu'n nej canagnax tzaachypi ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadägañich. Ca' anajty njipp'ixyich co nbidzimipyich juugy ma je jimbi it lugar. ⁹ Jadu'n hich ajcxy nnayjihuiyii nej jäy ajcxy huidibi yajpatcixp o'cjipp'am. Jadu'n ti njatyich, jigix jébi n'ixpicyich nej hich huaad ñigi Dios nyajmij'atyich, je Dios huidibi yajjugypigip yi jäy ajcxy tübi y'öccixy. E ca' nan ngi'm mic'ajt nmijpidaacpyich. ¹⁰⁻¹¹ Ti hich ajcxy Dios xyñihuañ xycohuañ, e xyjacnihua'naamb xyjaccohua'naambich ajcxy ma yi jäy ajcxy huidibi xyaj'ögaambich ajcxy. E co miich ajcxy xypubejtyich, copicy co jacmibijctzoogix Dios müd hich ycixpi. Njipp'ixypich co Dios yi' xyjatyimy xyñihua'naambich xycohua'naambich. E pen mayjäy Dios mibijctzoogixy müd hich ycixpi, nañ jadu'n yajnájxcixyipy ajcxy jäygidaacin ma Dios müd je may'ajt oy'ajt ycixpi huidibi Dios ytumyb müd hich ajcxy.

Ti Pablo co yhuäcxippy, ca' chojc nicxy jim Corinto

12 Jotcujc nayjihuiyijich m̄id jada ycixpi com nejhuuybich co ti ndzināyich m̄id tudāgy'ajtin etz m̄id oyjot oyhuinma'n̄ m̄id yi mayjāy ajcxy canaag agajp etz jacn̄gi ma miich ajcxy. Dios m̄id may'ajtin oy'ajtin ti xypubetyich co tudāgy ti ndzināyich, e ca' nguyduñich ngi'mjot ngi'nhuinma'n̄ich ma ndzināyich. 13 Hich miich ajcxy nyajnijayiyb je ayuc tiy'ajt huidibi miich ajcxy jēbi mgapxcixy etz mhujnihuiyigixy. E nañ jadu'n njijp'ijxypich co miich ajcxy mhujnihuihuipy ich n'ayuc tūg'ócay. 14 Jadu'n nej miich ajcxy cham cujc-huācxy mhujnihuiyigixy ich n'ayuc ndiy'ajt. Jacjiini co anajty je x̄i je tiempo ymiñ co ajt nHuindzin Jesús y'ane'ma'n̄ ya naaxhuiñ, chi miich ajcxy jotcujc m̄nayjihuihuuyb m̄id ich ycixpi. E nañ tim jadu'n nej ich ajcxy jotcujc nayjihuihuuyb m̄id miich ajcxy ycixpi.

15 Com nejhuuybich co miich ajcxy xychojcpich xyjihuiyibich, paady ycixpi nhuinma'n̄ nbidāgyich co nicxy n'ixaangixy miich ajcxy jadūg'oc, e jadu'n nyajjotcugihuaangixich miich ajcxy mejtz'oc. 16 Jadu'n nhuinma'n̄ ti nbidāgyich co nnicxa'n̄ich Macedonia. Per jayijp nnaxa'n̄ich ma miich ajcxy mgajp. E co anajty ndzooñich Macedonia, jadūg'oc nnicxa'n̄ich ma miich ajcxy. E jadu'n jēbi miich ajcxy xytūijphuhuibich co anajty nnicxyich jim Judea. 17 ¿Nej mdijy, co ich aametz jotmetz nduñich co ca' ti nnicxyich ma miich ajcxy nej anajty ti nm̄ina'n̄ich? ¿Nej mdijy, nhuinma'n̄ m̄ididyich jadu'n nej naaxhuiñyāy huidibi minamb co ñicxa'n̄, e chi ca' ñicxni? 18 Per Dios jēbi tiy'ajt yegipy co je ayuc t̄ibi nyajnimaaigixy, nguydunipyich yi'. Hich n'ayuc janch yi'. 19 Hich m̄id Silvano etz Timoteo ngapxhuācxcixyich Cristo Jesús y'ayuc, je Dios y'ung. E Cristo Jesús y'ayuc janch yi', ycuydumyb je' y'ayuc, tudāgy je' ycapxy. 20 Tūg'ócay je ayuc huidibi Dios yejc jecy'ajty m̄id ich ajt ycixpi, hue' Cristo Jesús cuydundaayb. Paady co ngapxpaatim n'ojadajtim Dios, chi nm̄inaanim. “Amén, jadu'n jada,” com Cristo Jesús ti cuydundāy Dios y'ayuc. 21 Com je' je' Dios huidibi xyajm̄ibjicim Cristo, e Dios huidibi xyajm̄id'ijtim Cristo. Jadu'n Dios ytuñ m̄id ich ajcxy etz nañ jadu'n m̄id miich ajcxy. Je' je' Dios huidibi xyajm̄ibjicim etz xypidaacim tūgijp ma yi' ytung. 22 Dios ti pidāgy ma ajt njot nhuinma'n̄ je tiy'ajt co nyajpaatim ma Cristo Jesús. Co Dios xy'adigiym̄im xyjottiḡiyim yi' yjihuiñ ymic'ajt, chi tiy'ajt yecy co nyajpaatim ma Cristo Jesús.

23 Dios jēbi tiy'ajt yegipy co m̄id tudāgy njot nhuinma'n̄ nm̄iydacyich co ca' jadūg'oc nnicxyñich ma miich ajcxy mic'amy, jadu'n nej anajty nhuinma'n̄ ti nbidāgyich, m̄id co ca' ndzocyich nicxy n'ojcixy huin jip. 24 Ca' nnicxa'n̄ich mic'amy ma miich ajcxy, com ca' adzip nyajm̄ibigaangixy miich ajcxy huidibi copicy ajcxy mm̄ibigipy. Miich ajcxy tiydudāgy ti mm̄ibjccixy. Jēyi co nbubedaangixy jaydēbi ajcxy n̄gi jotcujc'ajt mm̄id'adipy ma ajcxy mdzinaayin mjogy'ajtin.

2

1 Paady ycixpi jadu'n nhuinma'n̄ ti nbidāgyich co ca' nnicxa'n̄ich mic'amy jadūg'oc ma miich ajcxy, m̄id co miich ajcxy nyajtajipy nyajmayipy co ngapxhuiyich m̄id ajcxy mbocy ycixpi. 2 Com pen ich miich anajty ajcxy nyajtajpy nyajmaayb, ¿pin jada' ich xyajjotcugihuibich? Pues miich ajcxy huidibi tajp mayb, miich ajcxy xyajjotcugihuibich. 3 Paady ycixpi ti nnijayiygixy jadu'n co ca' nnicxa'n̄ich mic'amy ma

müich ajcxy, com ca' jadu'n ndzocyich co üch müich ajcxy nyajtajipy nya-jmayipy. Jac'oy co üch müich ajcxy nyajjotcugühuipy. Com nejhüüybich co üch jotcujc nayjihüüyijich müid müich ajcxy ycixpi. Nañ jadu'n müich ajcxy jotcujc mnayjihüühyb co mnejhüühuipy co ti njotcugühuüich müid müich ajcxy ycixpi. ⁴ Co ti njayich je necy huidibi ti nguexyich ma müich ajcxy, ooy mij jotmay ti njihüüyich, ixti nyaaxich. Per ca' nan paady ycixpi ti njaayich je necy co nyajtajaangixy nyajmayaangixy. Hue' janchtyi ti njaayich je necy jaydëbi mnejhüüygixy co mijcajee ndzojccixy njihüüygixy.

Meecxin ma je pin anajty jibicpi ti tuñ

⁵ Per pen jim ma müich ajcxy pinjaty ti yecy tajin mayim co ti ytundigooy, pues ca' nan üch tügpajc tajin mayim jihüüybich. Nañ jadu'n müich ajcxy nidüg'óciy mjihüüygixyp tajin mayin. Jadu'n nmına'ñich co huenjaty tajin mayin müich ajcxy mjihüüygixy, jigix ca' anaxy ajcxy nyajtajip nyajmayip. ⁶ Yajhuäcxijp je tzaachypi huidibi müich ajcxy mooyb je migüg huidibi ti ytundigooy. Ti müid jadu'ñi. ⁷ Jadu'n tzocy cham co müich ajcxy meecx je migüg jadu'n nej ti ytundigooy, etz nañ jadu'n ajcxy nyajjotcugühuipy. Ca' yjegyity co je migüg anaxy oy jihüühuip tajin mayin. ⁸ Paady ycixp may'ajt nbijctzooyich ma müich ajcxy co myajniguëxigipy ajcxy co mdzocy mjihüüy ajcxy je migüg huidibi ti ytundigooy. ⁹ Üch müich ajcxy ti nijayiy jayhuin müid je migüg ycixpi huidibi ti ytundigooy, jigix jëbi nnejhüüyich, pen mguydumyb müich ajcxy üch n'ayuc, o pen ca' mguydungixy. ¹⁰ Jadachambi co pinjaty ti ytundigooy ma müich ajcxy, e müich ajcxy mhuinmecxi yi' ypocy, nañ jadu'n nhuinmeecxip üch yi' nej ytundigooy. Com üch co nhuinmeecxyich tüg nmigügich nej ti ytundigooy, jadu'n nduñich müid müich ajcxy ycixpi, com Cristo y'ijxyp ñejhüüyb tüg'óciy tijaty nduunim. ¹¹ Jadu'n nhuinmeecxim nmigüg ypocy, jigix Satanás, je mujcu', ca' xymimadaacim. Nejhüüyim yajxon nej Satanás mañ'ajt müidity.

Pablo ca'p anajty yjotcujc'aty jim Troas

¹² Co nja'tyich ma je cajp huidibi xijip Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiydac nbatyich, nej jëbi nduñich ma ajt nHuindzin Jesucristo ytung. ¹³ Per ca' anajty jotcujc nayjihüüyijich. Com ca' nmınaybatich je üch ajt nmigüg Tito jim Troas. Paady ycixp ngapxycijxyich müid je mibijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴ Nyajnaxypich jäygidaacin ma Dios co müid Jesucristo ymic'ajt jatytimy nmimadacypich jabom jabom tüg'óciy huidibi xymidzip'ajtpich ma tüg'óciy naax cajp. Nañ jadu'n Jesucristo ti xymöyich yi' y'ayuc huidibi ngapxhuäcxypich ma tüg'óciy naax cajp. Je mayjäy ma canaag cajp ooy jäygidaaccixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tüg xuucin huidibi ooy oy xuugy, e y'abojy xi ya. ¹⁵ Co ngapxhuäcxych Cristo y'ayuc ma yi mayjäy huidibi padamb ajcxy y'alma ñidzoocin ooy Dios jäygidägy. E ñañ jadu'n Dios ooy jäygidägy co ngapxhuäcxych Cristo y'ayuc ma yi jäy ajcxy huidibi ajcxy y'alma tigoyaamb. Jadu'n üch ajcxy ndung nipaady nej jihüüy nboomjójcixich jabom jabom ma Dios yhuinduu müid Cristo ycixpi. ¹⁶ Pinjaty mijpidacp Cristo y'ayuc

huidibi ngapxhuáčxypich, hue' je' y'alma nǐdzögamb. E pǐnjaty ca' mǐjpidägy Cristo y'ayuc, hue' je' y'alma tigoyaamb. Ooy chachchipity chachmǐjhuinma'ñity ñich ajcxy ndung. ¹⁷ Ca' ñich ajcxy nduñ jadu'n nej jacnaagity ajcxy huidibi Dios y'ayuc mihuidijtip meeñgixy. Cixyot huinjot ñich jáy nyaj'ixpijccixy Dios y'ayuc ytiy'ajt. Com Dios ti xyajnbicyich co yi' y'ayuc ngapxhuáčxich. Miid co nyajpaatim ma Cristo, paady ycixp nduunim jadu'n nej jihuñy nyajpaatim jabom jabom ma Dios yhuinduu.

3

Je jemybi ayuc tiy'ajt huidibi Dios xymooyim

¹ Co jadu'n nmına'ñich ¿nej m'ijxcixy nej jihuñy huinjemy nyajt-zondäga'ñich ayuc co ndzachnaymayáanigixyich ci'm? ¿Nej mdzójccix co ajcxy nyaj'ixipy tüg tiy'ajt necy co nduñich ma Dios ytung? o ¿Nbijctzohuipich tüg tiy'ajt necy ma miich ajcxy, jadu'n nej nijëjity jáy ytungixy? ² Ca' ñich ajcxy ndiy'ajt necy ycopicyity. Com jëbi yi mayjáy ajcxy tiy'ajt pigipy ma miich ajcxy mdzinaayin mjugy'ajtin co tudägy ti nyaj'ixpicyich miich ajcxy Dios ytiy'ajt. Jadu'n miich ajcxy nipaady nej ñich ajcxy ndiy'ajt necy yjaayity ma ñich ajcxy njot nhuinma'ñ. E jadu'n jáy ajcxy ijxcabipy etz huinjihuñhuipy. ³ Cristo ci'm ti pidägy yi' ytiy'ajt ma miich ajcxy mjot mhuinma'ñ miid je ayuc huidibi ti ngapxhuáčxych ma miich ajcxy. Jadu'n miich ajcxy nipaady nej tüg tiy'ajt necy huidibi Cristo ti jaay. E huidibi ñich miich ajcxy ti nyaj'ijxcixy ti nyajnbimaaygixy. Miich ajcxy ca' jadu'n ocpaatni nej tüg tiy'ajt necy huidibi jáy ti jay miid tinta. Nañ jadu'n ni ca' yjëjity je tiy'ajt huidibi cojayip ma tüg tzaadzech. Hue' miich ajcxy janch nipaady nej tiy'ajt necy huidibi je Dios jugypi yjihui'ñ ymic'ajt ti jaay ma jáy ajcxy yjot yhuinma'ñ.

⁴ Nejhuñyibich tiydudägy co janch tiy'ajt nej nmına'ñich co Cristo ti xyajnbicyich jada tung miid Dios ycixpi. ⁵ Ca'p ñich ajcxy jëbi ci'm madägy ma Dios ytung. Tüg'óciy mic'ajt etz tiy'ajt jiiby nbáatcixyich ma Dios, huidibi miid jëbi nduungixich yi' ytung. ⁶ Dios ti xymóoygixyich mic'ajt co ndunipyich ajcxy ma yi' ytung. Dios ti pidägy ma ñich ajt jemybi ayuc tiy'ajt, huidibi miid xy'ane'mim. Jada jemybi ayuc tiy'ajt je Espíritu Santo pidaacp ma ajt njot nhuinma'ñ. E ca' je' yjadu'nity nej je ayuc tiy'ajt huidibi Moisés yjayhui'm jecy'ajty. Miid je Moisés y'ayuc huidibi jaybety ijtp, Dios xymooyim je o'cin. Miid je jemybi ayuc tiy'ajt huidibi je Espíritu Santo yejcpy, Dios xymooyim jugy'ajtin huidibi ca' ycixipy ytigoyipy ni mina.

⁷⁻⁸ Je Dios ycötujcin huidibi Moisés yjayhui'm hue' jaybejty oga'n ma tüg tzaa. E je huin'it tiempo ooy Moisés anajty yhuññyijp mic' y'adicxy miid Dios y'oy'ajtin. E je Israel jáy ajcxy ni ca'p je' anajty huaad y'ijxcixy Moisés yhuññyijp, co anajty ooy mic' chach'adixy. E jada Dios y'oy'ajtin huidibi Moisés ymiid, ca' jecy y'ijty. Hue' je' tigooyñip anajty ofnydägy'amy. Per pen Dios yaj'ijxip anajty yi' y'oy'ajtin co Moisés moy je jáy ajcxy je Dios ycötujcin huidibi ane'm yi' o'cin, nīgi mi'idipy Dios y'oy'ajtin je jemybi ayuc tiy'ajt huidibi je Espíritu Santo xymooyim. ⁹ Pen mij anajty oy'ajtin miidity je cötujcin huidibi tuuñ co y'ane'my ma ñich ajt nbocy n'o'cin. Nīgi mij'oy'ajtin miidity Dios y'ayuc ytiy'ajt je jemybi huidibi minaamb co Dios jëbi xyaj'ahuimbijtim tudägy. ¹⁰ Jëbi nminaanim co je jécyip cötujcin y'oy'ajtin ca' yi' ytimytiijity co nyajquipxyihuaanim miid je jac'oybi

oy'ajtin huídibi Dios y'ayuc ytiy'ajt jemybi ymüid. ¹¹ Com pen ymüid oy'ajtin je cötujcin huídibi ymic'ajt ca' y'ida'ñ huinixi huinítiempo, ñigi oy'ajtin müidity Dios y'ayuc ytiy'ajt jemybi huídibi ca' ycixipy ytigoyipy nimina.

¹² Müid co njjip'ixim je oy'ajtin huídibi Dios xymöhuaanim müid je jemybi y'ayuc, paady ycixp ngapxhuäcxim Dios y'ayuc huinmic jotmic. ¹³ Ca' jadu'n nduunim nej Moisés idüch jecy'ajty co anajty müidity yhuinñyijp huingobe'ñiy, jigix ca'ydi Israel jäy ajcxy ixu nej je' anajty ytigoy je Dios y'oy'ajtin huídibi anajty quëxícip ma je' yhuinñyijpin. ¹⁴ Per yi Israel jäy jecy'ajty ca' ajcxy yajxon huinjihuüy ti anajty Dios ytumyb müid Moisés, ixti chambaadni yi Israel jäy ajcxy ca' yajxon huinjihuüygyxy co ajcxy capxcixy je ayuc huídibi Moisés yjayhui'm. Jadu'n nipaady nejjihuüy Moisés chambaadni y'ityñi huingobe'ñiy. Co ajcxy mibigipy je Cristo, huin'it ajcxy huinjihuüipy, e jadu'n je' paadipy nej jihuüy Moisés ti ñayhuingobe'ndüdyi. Co yi Israel jäy ajcxy mibijccixipy Cristo, e ixxip ajcxy Dios y'oy'ajtin, huin'itni ajcxy huinjihuüipy Dios y'ayuc ytiy'ajt je jécyip. ¹⁵ Ixti chambaadni co yi Israel jäy ajcxy capxcixy je migooxpi libro huídibi Moisés yjayhui'm, ca' ajcxy huinjihuüy yajxon Dios y'ayuc, jadu'n nipaady nej ajcxy yhuinma'ñ ymädity. ¹⁶ Pinjaty jothuimbi-ipt, e mibicy üch ajt nHuindzin Jesucristo, oyñyñip yi' yhuinma'ñ, e yhuinjihuüipy Dios ytiy'ajt. ¹⁷ Je Huindzin Jesucristo, yi' je' Dios yjihui'ñ ymic'ajt ymüid. E ma Dios yjihui'ñ ymic'ajt yajpaady, Dios yi' yi jadu'mbi jäy ajcxy yajnihuätzictutp ma yi Dios ycötujcin je jécyip. ¹⁸ Paady ycixp tüg'óciy üch ajt jadu'n nipaady nej tüg ixx ma nni'ixim ajt nHuindzin Jesucristo y'oy'ajtin. Com ca' jadu'n patni nej jihuüy n'ijtim huingobe'ñiy. E nañ jadu'n üch ajt njacyujcpejtim n'oy'ajtin, jaydëbi nguipxyjatytüym müid Cristo. Com jabom jabom üch ajt ñigi nbaatim n'oy'ajtin ma Cristo. Jada je' huídibi je Dios yjihui'ñ ymic'ajt ytumyb ma ajt njot nhuinma'ñ. E üch ajt nHuindzin Jesucristo ti pidägy Dios yjihui'ñ ymic'ajt ma ajt njot nhuinma'ñ.

4

¹ Com Dios ti xypa'ayooyich, e ti xyajnübicyich co ngapxhuäcxibich yi' y'ayuc ytiy'ajt jemybi, paady ycixp ca' njotmetzcüyich. ² Per ooy ti njjpcodijñygixyich ti njjpcogapxñygixyich yi jäy ajcxy y'ayuc huídibi ajcxy ytungixyp etz ycapxcixpy ayüch ameech, etz huídibi oymidzöyduuni. Ca' üch ajcxy ti nduñich müid jibic-huinma'ñ. Nañ jadu'n ni ca' nyajtigájtzcixich Dios y'ayuc. Hue' janchtiy ngapxpich ajcxy huídibi janchip. Jadu'n nyaj'ixpijccixyich yi jäy ajcxy, jaydëbi ajcxy jotcuyc ñayjihuiüyigixy ma Dios yhuinduu. ³ Yi jäy ajcxy huídibi nicxy y'alma ytigoyaangixy ca'oydactuuby, ca' ajcxy huinjihuüy Dios y'ayuc oybi nej jëbi ajcxy y'alma nidzögipy. Jada je' je ayuc huídibi ngapxhuäcxipich. Pinjaty ajcxy y'alma nidzögip yhuinjihuüy ajcxy jada ayuc. ⁴ Yi' ajcxy huídibi y'alma tigoyaanip ca' mibijccixy Dios y'ayuc, com Satanás huídibi ane'mb ya naaxhuiñ ti yajmädyi ajcxy yhuinma'ñ. Ca' je' ajcxy huinjihuüy Cristo y'ayuc oybi. Cristo tú'ciy yaj'ixy, tú'ciy mic'ajt müidity, nej Dios yaj'ixy nej Dios mic'ajt müidity. E Cristo y'ayuc jadu'n nipaady nej tüg mijtcxin huídibi Satanás ti ahuijztucy ca'ydi yticxy ma je' ajcxy. ⁵ Co üch ajcxy ayuc ngapxhuäcxych, ca' üch ajcxy ngapxhuäcxy ngi'm'ayuc ngi'mdiy'ajt. Hue' üch ajcxy ngapxhuäcxyp Jesucristo y'ayuc

ytiy'ajt. Ngapxhuäcxyich ajcxy co Jesucristo ñihuindzin'ajttaayb tüg'óciy. E nañ jadu'n ngapxhuäcxyich ajcxy je tiy'ajt co ñch ajcxy jadu'n naydijiygixyich nej jihuüy miich ajcxy xytumbi'adyii müid Cristo ycixpi. ⁶ Je Dios huidibi jegy'ajty ane'm co huen tücxin jiaty huidibi codiäcxip ma ycoodzity, yi' ti xymooyim y'ayuc ytiy'ajt. Yi' y'ayuc tim jadu'n nipaady nej tüg tücxin nmüid'ajtim ma ajt njot nhuinma'ñ, jigix jëbi n'ijxim je Dios y'oy'ajtin huidibi quëxäcp ma Jesucristo yhuinñyijp.

Je jugy'ajtin co nmibijcim

⁷ Je Dios y'oy'ajtin oybi nmüid'ajtim ma ajt njot nhuinma'ñ, ñch ajt ca' ni ti mic'ajt nmüid'ajtim ma ajt ngi'mjot ngi'mhuinma'ñ. Jadu'n Dios pidägyñi yi' y'oy'ajtin ma ñch ajt, tim jadu'n nej jäy ajcxy pidaaccixy pi'cmeen ma pi'c'idzimboch. ⁸ Oy ñch ajcxy nminaxyich nyajnaxyich may ayo'n, per ca' ndajy nmayich ajcxy anaxy. Ooy nhuinmay'ahuidijtcixyich müid je tzaachypi ayo'n ycixpi, per ca' nhuinma'ñyidigóoygixyich. ⁹ Oy ñch ooy nmidzip xy'ixhuidityich xypahuidityich, per Dios ca' xy'ixmachich. Canaag'oc ñch nmidzip ti xycujy ti xyjibipyich. Per ca' ñch njugy'ajtin ti ytigooy. ¹⁰ Hueñyama'amyity nhuidityich ajcxy nmüidich je tzaachi'au ma nninïcich, ma jäy ajcxy ti xychaachtüungixich. Je' je' je iixpejt co nhuidityich o'cin jijp'am, tim jadu'n nej Jesús anajty huidity o'cin jijp'am. Ngöbijcypich jada tzaachypi, jigix tüg'óciy jäy ajcxy nejhuñhuip co Jesús xypubejtpich xypudigiäybich. ¹¹ Nami jacjugy'ajtnich ajcxy, o'cjijp'am ñch ajcxy nhuidijtcixy jabom jabom müid Jesús ycixpi, jigix jëbi tüg'óciy jäy ajcxy nejhuñhuipy co Jesús xypubejtcixyp xypudigiäygixyp. ¹² Jadu'n ndzinäyich o'cjijp'am, jigix miich ajcxy müid'adip jugy'ajtin huidibi ca' ycixipy ytigoyipy.

¹³ Jaybety ymiñ ma Dios ñecy ma jadu'n ymina'ñ: "Ti nmibicyich, e paady ycixpi ti ngapxpizimybich nej ti nmibicyich." Tim jadu'n nej Dios ñecy ymina'ñ, nañ tim jadu'n ñch ajcxy yminaangixy co nmibijccixyich Dios, e paady ngapxpizimigixyich nej nmibijccixyich. ¹⁴ Com nejhuñyim jadu'n nej Dios yajjugypijcy Jesús co y'o'cy. Nañ tim jadu'n Jesús xya-jjugypigaanim jadüg'oc müid Dios ymic'ajt co anajty n'o'cim. E quipxyi müid miich ajcxy xyajnicximip ma Dios yhuinduu. ¹⁵ Tüg'óciy tzaachypi huidibi nminaxypich nyajnajxypich, hue' nminaxyich nyajnaxyich müid miich ajcxy m'oy'ajtin ycixpi. E co anajty Dios jactuñ may'ajtin müid jacjadyii mayjäy ajcxy, nañ jadu'n mayjäy yajnajxcixipy jäygidacim ma Dios, jigix jëbi mayjäy ñbáatcixipy capxpáatcixipy Dios.

¹⁶ Paady ycixpi ni mina xi, ñch ajcxy ngajotmetzcühuaangixy. Oy ñch ajcxy nninïc xjaccöminajc'idich jabom jabom, per ñch ajcxy njot nhuinma'ñ nigi mic'ajt paady jabom jabom. ¹⁷ Je tzaachypi je ayo'n huidibi nminajxim nyajnajxim ya naaxhuiñ, ca' yi' ytimyitijty. Cixip naxip yi'. E müid co nminajxim nyajnajxim tzaachypi ayo'n, huin'it nbaatim oy'ajtin nigi ymijity y'oyity huidibi ca' ycixipy ñaxipy ni mina. ¹⁸ Ca' huaad ñch ajt nhuinma'ñ nbidaacim ma huidijaty cixamb tigoyamb. Tüg'óciy tijaty yaj'ijxp yajhuindicxp ya naaxhuiñ, cixip tigoyip yi'. Per huidijaty ca' yaj'ixy yajhuindicxy, idip yi', ca' ycixipy ytigoyipy nimina.

5

¹ Com nnejhuuïyim co n'o'cim, naaxnïcx ajt huidibi nmïd'ajtm ya naaxhuiñ cixamb tigoyamb yi'. Dios ymïd n'ixi' jiby tzejpjoty huingbi ninïcx huidibi yi' ti cojy huidibi xymöhuaanim. Je ninïcx huidibi xymöhuaanim jadu'n nipaady ma ajt n'alma nej tüg tijc huidibi tinaayb huinixi huinïtiempo. Tüg tijc huidibi Dios ti cojy, ca' nan huidibi jäy ajcxy ti cojcixy. ² Janch tiy'ajt co ca' ooy jotcuje ndzinaayim ya naaxhuiñ mïd ajt nninïcx. Ooy njipp'ijxim mina nbadaanim ajt je nninïcx huidibi nmïd'adaanim jiby tzejpjoty. ³ Je' nninïcx xyüdzim tim jadu'n nej co tüg jemyhuit nyajtigiïyim, ca'ydï n'ijtim nihuädz. ⁴ Nami njactzinaayim ya naaxhuiñ mïd ajt nninïcx, ca' ooy jotcuje nayjihuiïyim. Ooy xyajtajim xyajmayim je tzaachypi ayo'n huidibi nminajxim nyajnajxim. Ca' nan co ca' ndzojcm ajt nninïcx, o co nyajtigoyaanim ajt nninïcx. Hue' ndzojcm co nmïd'ajtm jemybi jugy'ajtm jemybi ninïcx jigix co ajt njugy'ajtm huidibi cixamb tigoyamb, ahuimbidiip yi' jemybi jugy'ajtm huidibi ca' ycixipy ytigoyipy. ⁵ Dios yi' ti yaj'oyiy je jugy'ajtm huidibi nmïd'ajtm cham, jigix jëbi nmïd'ajtm huingbi jugy'ajtm huidibi ca' ycixipy ytigoyipy ni mina. Dios ti xymoyim je Espïritu Santo je' je' tiy'ajt ma ïch ajtm co nbadaanim jemybi jugy'ajt jemybi ninïcx.

⁶ Jabom jabom ïch ajt jotcuje naybidaacim. Nejhuuïyim co nami n'jactzinaayim mïd ajt nninïcx, ca' nmïd'ajtm jemybi ninïcx, ca' nyajpaatim ma ajt nHuindzin Jesús chinäy. ⁷ Je' nninïcx xyüdzim tim jadu'n nej co tug jemyhuit nyajtigiïyim, ca'ydï n'ijtim nihuädz. ⁸ Jotcuje etz jotmic nayjihuiïyim. Niçi jotcuje ixypy nayjihuiïyim, e ooy njatzojcm co mic'amy ixypy n'ijxmajtzim jada ninïcx, jigix nicxy ndzinaydacpijcm ma ajt nHuindzin Jesús chinäy. ⁹ Paady ycixp jadu'n njacjugy'ajtm njactzinaayim jigix jëbi ajt nHuindzin Jesús jäygidägipy ajt ndzinaayin. Ca' ñejity pen njactzinaayim ixypy mïd ajt nninïcx, o pen tzojc n'ijxmajtzim ajt nninïcx ixypy, e nicxim ma Jesús yajpaady. ¹⁰ Nidüg'ócïy ïch ajt nayguëxïgaanim ma Cristo ytiydundac, e jiby nidüg nidüg paadip huidi anajty nipidzïmïp jadu'n nej anajty ti chinäy, pen oy, o ca' y'oyity.

Je ayuc tiy'ajt huidibi nicy'ajt cidägy'ajt mïd

¹¹ Com nejhuuïyim co copicy nhuindzigïyim ajt nHuindzin Jesucristo, paady ycixpi mictägy nyajmibicyich yi' mayjäy ajcxy Cristo ytiy'ajt. Dios ñejhuuïyb co tudägy ïch njot nhuinma'ñich. E nañ jadu'n ndzocyich co miich ajcxy mnejhuuïygixipy co tudägy ïch njot nhuinma'ñich. ¹² Ca'p ïch ajcxy yam naygapxpäatigixy jadüg'oc co ïch ajcxy ooy n'oyjäyity, o co ïch ajcxy ooy oy ndüngixyich. Hue' janchtiy lugar nyejcpyich, jaydëbi miich ajcxy xycapxpadipyich etz jotcuje mnayjihuiïyigixipy mïd ïch ajcxy ycixpi. Jigix jëbi miich ajcxy m'adzohuip yi' jäy ajcxy huidibi capxpatp pinjaty yhuiñyijp ooy oy yquëxïgy, e ca' ajcxy tuñ cuendi pen je' mïd oyjot oyhuinma'ñ, o pen ca'. ¹³ Pen minamb jäy ajcxy co ïch nlocity, huen xyajnäjxcixyich loci mïd Dios ycixpi. Pen jäy minangixp co oy huinma'ñ nmïdidyich, jëbi jadu'n ajcxy xyajnäjxcixyich jadu'n nej oy huinma'ñ nmïdidyich mïd miich ajcxy m'oy'ajtm ycixpi. ¹⁴ Com Cristo ooy xychojcm xyjihuiïyim, paady ycixp njatytimycapxymidoohuim Cristo. Com nnejhuuïyim ajt nidüg'ócïy tiydudägy co Cristo y'o'cy mïd ajt nbocy ycixpi, e paady ycixpi jadu'n nipaady nej jihuiïy nidüg'ócïy ïch ajt ti n'o'cim quipxyi mïd Cristo.

15 Cristo o'c miid tüg'óciy jäy ajcxy ycixpi, jigix co tüg'óciy jäy ajcxy huídibi jactzinaayb jacjugy'ajtp, ca' ajcxy yajtúngixipy yci'mjot yci'mhuinma'n ma ajcxy chinaayin. Huen ajcxy tzinaaygixy miid Cristo ycixpi huídibi o'c miid yi' ajcxy ypocy ycixpi, etz yjugypijcy jadüg'oc miid yi' ajcxy ycixpi. 16 Miid co ndzinaayim miid Cristo ycixpi, paady ycixp ca' ndunim cuendi naaxhuiñyjäy ajcxy nej ñayñigápxigixy nayñimiydáacigixy. Jayijp ca'ni anajty nmibijcim, ooy anajty ndunim cuendi nej jäy ajcxy ñayñigápxigixy nayñimiydáacigixy. Jadachambi etz yjacnicxní xii tiempo, ca' ndunim cuendi nej naaxhuiñyjäy ajcxy capxcixy miydaaccixy. 17 Com tigachjaty cham nhuinjihuiyich Cristo, paady ycixp pinjaty yajpatp ma Cristo, jemyjot jemyhuinma'n je' ymüd'ajtnip, jadu'n nipaady nej jihuiy ti ma'xung'aty huinjemy. Je jot je huinma'n huídibi anajty ymüd co anajty ca'ni mibicy Cristo, ti je' ñajxtäy, jadachambi ac jemyjot ac jemyhuinma'n ti y'ahuimbijttäy.

18 Tüg'óciy tijaty huídibi ya yajpatp, jiiby choon ma Dios, Dios yaj'oyiday. Miid huídijaty Cristo ytuun miid ñich ajt ycixpi, jotcuje n'ijtim miid Dios. E Dios xyajñibijcich co ngapxhuäcxyich Dios y'ayuc jadu'n nej jäy ajcxy jébi ajcxy jotcuje y'ijtcixy miid Dios. 19 Jadu'n nmínaaním co Dios ymüd'ijtpy Cristo. E Dios tuun quipxyi miid Cristo co yi' yaj'oyiy je tzip nej naaxhuiñyjäy ajcxy midzip'aty Dios. Dios ca' yajcomidohua'n jäy ajcxy ypocy huídibi mibijccixp Cristo, miid co Cristo ti yajpocyñihuächyíi. E Dios ti xyajñibicyich co ngapxhuäcxyich yi' y'ayuc nej jäy ajcxy jébi paadip pocyhuinmeecxin, etz nañ jadu'n paadip jotcuje'ajtin ma Dios. 20 Paady nhuidityich miid Cristo ycixpi ngapxhuäcxyich Cristo y'ayuc. Jadu'n huimbizimyb nej jihuiy miich ajcxy Dios xymínucxtaaccixy miid ñich n'ayuc jigix mmibijccixipy Cristo y'ayuc. Paady ngodinäyich Cristo co nmínucxtacypich miich ajcxy. Jothuimbijtcix nej mdundigoogyixy miid Dios ycötujcin e Dios xyhuinmeecxip ajcxy mbocy, jigix jotcuje m'idipy ajcxy ma Dios. 21 Cristo ca' ma ytundigooy, per miid ajt nbocy ycixpi Dios yajnajx je Cristo jadu'n nej tüg pocyjäy. Jadu'n Dios ytuñ miid je Cristo, jigix co ñich ajt n'ijtim ma Cristo, nbaatim je tudäy'ajtin huídibi Dios chojcpy nmüd'ajtim.

6

1 ñich ajcxy etz miich ajcxy quipxyi nduunim ma Dios ytung. Nmínucxtacypich miich ajcxy co mgöbigipy ajcxy je may'ajt je oy'ajt huídibi Dios ti tuñ miid miich ajcxy ycixpi, ca'ydi ñaadig'aty Dios ytung.

2 Com jadu'n jaybety y'ity ma Dios ñecy ma Dios jadu'n ymína'n:

Co je xii tiempo ti patni, ti ñich miich m'ayuc midoohui. Ti nbubety nbudigiyich je huin'it xii je huin'it tiempo co ti yhuaad'aty mína jäy ajcxy y'alma ñídzögipy. Jadachambi xii tiempo ti yhuaad'ajtni mína jébi Dios xyñídzocím ajt n'alma.

3 Ca' pin n'adzipyich co nduñich ma Dios ytung, jigix ca'ydi pinjaty ymína'n co ca' oy nduñich. 4 Nañ jadu'n ca' n'adziba'nich miich ajcxy. Nigi ndzocyich co ñiguëxigip tüg'óciy ñich ndung co nduñich miid Dios ycixpi. Ooy nyajtuñich mecxtujcin. Ooy nmecxtucyich ayo'n etz tzaachypi. Ooy nyajmayjatyich nhuit nducxy ngaayin n'uucín. Ooy ñich ndzinaayin chipity. 5 Ti ajcxy xyci'atyich, ti ajcxy xypidáacixyich pu-jxtigoty. Ti jäy ajcxy xymibidigyich, e ooy ajcxy yhuaangixy yjihuiyigixy. Ti tzaachypi nmínaxy nyajnaxyich ma ndungich. Mínaajty canaag xii ca'

nmäyich, e mīnaajity ayuu n'ityich. ⁶ Nyajniguëxīcipy iich ajcxy co iich ndúngixyich mīd Dios ycīxpi, mīd co huādz jot huinma'ñ nmīdīdyich ajcxy. Ca' ma jībīcpi nmīdīdyich ajcxy, mīd co n'ixpījccīxyich ma Dios ytiy'ajt. Ooy mecxtujcīn nmīdīdyich ajcxy. Ooy iich ajcxy nba'ayooyich nmīgūtījīcīch. Dios yjihui'ñ ymic'ajt yajpatp ma iich ajcxy njot nhuinma'ñ. Ooy iich miich ajcxy ndzojccīxy njihuiyigīxy cīxyjot huinijot. ⁷ Nyajniguëxīgpy iich ajcxy co ndúngixyich mīd Dios ycīxpi, mīd co ngapxhuācxīxyich Cristo y'ayuc ytiy'ajt tudāgyi, e nañ mīd co nmīdīdyich ajcxy Dios yjihui'ñ ymic'ajt, etz mīd co nmīdīdyich ajcxy ca'pxy Dios ytiy'ajt tudāgyi. Mīd yī' ytiy'ajt tudāgyi nyajmībīcyich jāy ajcxy, etz mīd yī' ytiy'ajt naygohua'ñyījīch ma nmīdzipīch. ⁸ Mīnaajity jay xycapxpāadygīxyich; mīnaajity jāy ajcxy xyñīgapxy xyñī'ojīyigīxyich; mīnaajity jāy ymīnaangīxy co oy nduūñīch; mīnaajity jāy ymīnaangīxy co jībīcī nduūñīch; mīna ngamīna jāy xytījīcīxyich co n'īndāaccīxyich; e mīnaajity jāy ymīnaangīxy co tiy'ajt ngapxpīch. ⁹ Mīnaajity jāy ymīnaangīxy co ajcxy ca' xy'ixy'ājīgīxyich; e mīnaajity jāy ymīnaangīxy co ooy oy xy'ixy'ājīgīxyich; e mīnaajity ayo'n jījp'am o'cīn jījp'am nhuidījīcīxyich. Per jactzīnaaybīch ajcxy jadu'n. Tī je tungmīdīpī xychaachytūngīxyich, per ca' iich ajcxy xyaj'o'cyī. ¹⁰ Ooy iich ajcxy njatajīcīxy njamaaygīxy, per jabom jabom jotcujcī nayjihuiyigīxyich. Ayooī iich ajcxy ca' tī meēñ etz ca' tī pidāgy nmīd'ājīcīxyich. Per nañ jadu'n mayjāy oy'ajīn pada'ñ ma Dios mīd iich ajcxy ndung ycīxpi, jadu'n jada oy'ajīn nīpaady nej meēñ etz nej pidāgy. Oy ca' meēñ etz ca' pidāgy nmīdīdyich ajcxy, per nmīdīch ajcxy tūg'ócyī huīdībī nīmīna ca' ycīxy ytiigooy.

¹¹ Mīgūtījīcī ajcxy, huīdībī yajpatp jīm Corīnto, tī nmīdīcapxcīxy tī nmīdīmīydaaccīxy ma jada necy mīd tūg'ócyī tudāgy'ajt. Tī ngapxyīch nmīydgīyīch nej njot nhuinma'ñ nmīdīdyich. ¹² Ca' iich n'ixmach nej iich miich ajcxy ndzojccīxy njihuiyigīxy cīxyjot huinijot. ¹³ May'ajt nbījctzooybīch ma miich ajcxy co xyajīmāhuībīch nej miich ajcxy mjot mhūinma'ñ mīdīty tīm jadu'n nej tī nduūñīch mīd miich ajcxy. Jadu'n may'ajt nbījctzooyīch ma miich ajcxy nej ungededytīcī ajcxy oy'amy y'ung ajcxy ihuījīcīxy capxhuījīcīxy.

Iich ajt je' ma Dios jugypī chīnaayīn

¹⁴ Miich ajcxy, ca' mdungmujccīxy m'ayoomujccīxy mīd jāy ajcxy huīdībī ca' mībījccīxy Cristo. Com ca' huaad tudāgyjāy ajcxy mīddzīnaaygīxy jāy ajcxy huīdībī ca' tudāgy huinma'ñ mīdīty. ¿Nej jēbī je huīdībī tiy'ajīp ytiy'ājīy mīd huīdībī ca' ytiy'ajīty? ¿Nej jēbī pīnjaty tiy'ajī mīd mīd'īdīpy pīnjaty huīdībī ca' tiy'ajī mīdīty? Je huīdībī tiy'ajī mīd jadu'n nīpaady nej chīnāy ma jīn ytīcxīn. E je huīdībī ca' tiy'ajī mīdīty ñīpatp nej jīhuīy chīnāy agootztuuby. ¹⁵ ¿Nej jēbī Cristo etz Satanās ñay'ayuc-huīnjihuiyigīxy? ¿Nej jēbī tūg mībījcpī yajtūgīy yhuīnma'ñ mīd tūg huīdībī ca' ymībīcy? ¹⁶ Ca' nī nej jēbī tzaadzech quīpychech y'īdīpy ma Dios ytījīcī. Com yī' ajcxy huīdībī tzaadzech ojadajīp ca' ajcxy yhuīnma'ñ ytūgīy mīd Dios ytiy'ajī. Je Dios juugypī ymīd chīnaydac ma iich ajt njot nhuinma'ñ, paady ycīxp jadu'n iich ajt nīpaady nej Dios ytījīcī. Com jaybety y'ity ma Dios jadu'n ymīna'ñ:

Ndzīnaydac nbīdāgaamybīch ma yī' ajcxy. Huīdīdaamybīch ma yī' ajcxy yajpaady. Yī' ajcxy iich xyDios'adaanīp. E iich ajcxy yī' njāy'adaanīp.

17 Paady nañ jadu'n ajt nHuindzin Dios yminañ:

Copicy co miich ajcxy m'ixmadzipy yi jacjadyii jäy ajcxy, e tzinaaygix abicy. Ca' ajcxy mnijot'adipy je jibicpi, huin'it ñich miich ajcxy ngöbigipyich.

18 Ñich miich ajcxy xymiid'adipyich jadu'n nej jihuiy ñich miich ajcxy xyTeedy'adyii. E jadu'n miich ajcxy m'idipy nej ñich nmang n'anäg. Jadu'n je mijpi Dios yminañ.

7

1 Miich ajcxy huídibi ooy ndzocy njihuiyich, com Dios jadu'n yminañ co tzinaydac pidäga'ñ ma ajt njot nhuinma'ñ, paady ycixp tzoc yajhuatzim ajt njot nhuinma'ñ, etz ma ajt n'espíritu, e jadu'n Dios nhuindzigiyim etz nyajmij'ajtim cixyot huinjot.

Co ajcxy jothuimbijt ma Dios huídibi ajcxy jim Corinto

2 Tungix may'ajt xycöbigipich miich ajcxy cixyot huinjot. Ca' ñich ajcxy ni pin ti nmidundigóoygixyich, nañ jadu'n ca' ni pin ñich ajcxy ti nyaj'ixpíccixyich jibic-huinma'ñ. Nañ jadu'n ni ca' ñich ajcxy pin ti nhuin'ñich. ³ Ca' jadu'n nmína'ñich miid co nyajpocycähua'ñich miich ajcxy. Com jadu'n jacjayip ti mina'ñich co ooy ndzocy njihuiyich miich ajcxy, tú'ciy ajcxy ndzinaayim, e tú'ciy ajcxy n'ócimipy. ⁴ Ooy ñich miich ajcxy njot'amij'adyiijich. Ooy ñich miich ajcxy ngömaaygixy. Ooy jotcuyc nayjihuiyijich miid miich ajcxy ycixpi. Oy njayajpaadyich tzip agujc ayo'n agujc, per co njäyechich miich ajcxy, jotcuyc nayjihuiyijich.

⁵ Nej ñich ajcxy nja'ty ya Macedonia, ca' njotcuyc'ájtixyich. Hue' nyajpaadyich ajcxy tzip agujc capxy agujc huen ma'ámyity. Jäy ajcxy xymidzip'ajtpich, etz nañ jadu'n tzigiybich jotjoty huinma'ñyoty. ⁶ Per Dios je huídibi yajjotcugiyb yajjotmicpijcp pinjaty tajp mayb, yi' ti xyajjotcugiyich co Tito yja'ty ya ma ñich nyajpaady co jim choñ ma miich ajcxy. ⁷ Ca' nan ti njotcugiyich miid tim jëyi co Tito ti xyñijädych. Hue' ti njotcugiyich co yi' ti xyñimäyich jadu'n nej yi' jotcuyc'ajtn ti paady ma miich ajcxy. Yi' ti xyajmídmíydägyich jadu'n nej miich ajcxy tajin mayin mjihuiyigixy miid mbocoy ycixpi. E nañ jadu'n nej mhuinmaaygixy nej nyajpaadyich. E miid jada ayuc ñigi ti njotcugiyich.

⁸ Ñich ca' ndajy nmayich miid co ñich miich ajcxy ti nyajtajcixy ti nyajmaygixy miid je necy huídibi ajcxy nyajniguejx. Oy anajty ti njajihuiyich jotmay co nnejhuíyich co miich ajcxy ooy mdajy may tüg xii mejtz xii miid ñich nnecy ycixpi. ⁹ Jadachambi ooy jotcuyc nayjihuiyijich. Ca' nmínaaním miid je tajin je mayin ycixpi huídibi miich ajcxy anajty miid jotcuyc'ajtpich, com co je tajin je mayin ajcxy ti xyajjothuimbijtcixy, Dios ti jäygidägy jadu'n nej miich ajcxy ti mmímadaaccixy je tajin mayin. E ca' ñich ti ndundigooyich ma miich ajcxy co ajcxy njotmaymoy. ¹⁰ Com Dios yjäygidacpyi co jäy njothuimbijtcixy, miid co taj may ñayjihuiyigixy miid ypocoy ycixpi. E co ajcxy yjothuimbijtcixy, huin'it ajcxy je y'alma nídzoocin paadipy. E ca' je' huaad nidajim nimaayim co ajcxy y'alma ñídzögy. Co jäy ajcxy nidajcixy nimaaygixy huídi yajpat ya naaxhuiñ, e ca' yjothuimbijtcixy, jadu'ñi nicxy je o'cin nipatcixy. ¹¹ Miid je tügpi jäy ypocoy ycixpi ti mbaatcixy je tajin mayin. Miich ajcxy jadu'n ti nmecxtujccixy je tajin mayin jadu'n nej Dios jäygidägy. Tungix cuendi jada' cham nej ti yhuimbizimy. Tiydudägy janch cham ti mdiyungixy

müid je pocy ycixpi. Ti xyajjotma'tcixy, e ti xy'adzigüygixy, e ni'ixiy miich anajty m'ijtcixy co mdzaachytunaangixy je huidi ti ytundigooy. E müid jada ycixpi ti miich ajcxy myajnguëxüccixy, co ca' müich ajcxy ti pocy mmüidity ma jadayaabi huinma'ñ. ¹² Co üich miich ajcxy jayhuin nijayiy, ca' nmüinanüm müid je' ycixpi hüidibi anajty ti ytundigooy. Nañ ca' nmüinanüm müid je hüidibi anajty ti yajmüidundigooy. Nijayüyich miich ajcxy, jigix jëbi mnejhuüygixy je tiy'ajt nej Dios tzocy co nduüñich müid miich ajcxy m'oy'ajtin ycixpi. ¹³ Com müich ajcxy ti mmüjottigooyb Dios ytiy'ajt, paady ycixpi müich ajcxy ti mbaatcixy jotcuje'ajt, e nañ jadu'n üich ajcxy ti nbaatcixyich jotcuje'ajt müid miich ajcxy ycixpi. Nañ jadu'n ooy ti njotcugüyich ajcxy müid co Tito ooy chachjotcuje'ity. Oy'amy müich ajcxy ti mgöbijccixy Tito, paady yi' ooy ti yjotcugüy müid miich ajcxy ycixpi.

¹⁴ Co ti nmümayich Tito co njot'amij'adyüijich miich ajcxy, ca' ti tzo'ydu'n ti nbaadyich, co yi' oy ti xyco'ixüygixy. Nigi oy ti yhuimbüdzimy müid co tüg'öciy ayuc hüidibi üich miich ajcxy ti nyajnimäy ti yhuimbüdzimy co yjanchity. Nañ jadu'n ti yhuimbüdzimy co yjanchity jadu'n nej ti nmüiydacyich miich ajcxy müid Tito co njot'amij'adyüijich miich ajcxy. ¹⁵ Jadu'n nej co Tito oy müich ajcxy xycogapxüy, yi' ooy nigi xychojccixy xyjihüüygixy co yi' nejhuüy jadu'n nej miich ajcxy mmüjottigooygixy üich n'ayuc, jadu'n nej mgapxymidoohuaangixy. E nañ jadu'n co yi' ijxy nej miich ajcxy yi' mgöbijcy müid tzigü'ñ jihü'ñ. ¹⁶ Ooy jotcuje nayjihüüyüijich, ooy njot'amij'adyüijich miich ajcxy.

8

Ycüejtcixy müid oyjot oyhuinma'ñ

¹ Jadügnax, miich ajcxy migügtijc, nyajnejhuühuaamybich nyajmüidmüydägaamybich miich ajcxy, jadu'n nej Dios may'ajt oy'ajt tuñ müid je mübijcpüidijc ajcxy hüidibi xü ya yajpatp Macedonia. ² Je mübijcpüidijc hüidibi ya yajpatp ti ooy ajcxy minaxy yajnaxy tzaachypi etz ayo'n. Per ca' ñejity, ooy ajcxy jotcuje yajpatcixy. Nañ ayoobi ajcxy, per ti ajcxy may meëñ yajmujccixy, jadu'n nej jihüüy ajcxy ycomeëñity. ³ Üich testigo co je migügtijc müid yci'm tzojcin meëñ yejccixy, nej jëbi ajcxy ymadaaccixy müid meëñ, ixti anaxy ajcxy yejccixy. ⁴ Ooy xymünuxtägyich ajcxy co n'a'ixühuibich ajcxy co jëbi ajcxy meëñ yajmujccixy hüidibi müid pubedaangixy jacjadyüi je mübijcpüidijc. ⁵ Nigi anaxy ajcxy ooy meëñ yajmujcy ca'ydi jadu'n nej anajty njüj'ixyich. Jayijp ajcxy ñayyejci ma ajt nHuindzin Jesucristo, e huin'it ajcxy ñayyëjcgixy ma üich ajcxy jadu'n nej Dios tzocy. ⁶ E chi jada' üich ajcxy ooy nmünuxtacy Tito co huen nicy jadüg'oc ma müich ajcxy. Huen nicy yajcixy yajmay hüidibi ti yajtzondägy ma müich ajcxy. Co huen je meëñ yajmujctäy hüidibi cixyjot huinjot müid mbubedaangixy je mübijcpüidijc ajcxy hüidibi yajpatp jim Jerusalén. ⁷ Miich ajcxy nigi ooy mmadaaccixy, ca'ydi jacpinjaty ma tüg'öciy Dios ytung. Ooy mij mübijcin miich ajcxy müidity. Ooy myaj'ixpüjccixy Dios ytiy'ajt. Ooy mmüjottigooygixy mguydunaangixy üich n'ayuc. E nañ jadu'n ooy miich ajcxy xychojccixy xyjihüüygixyich. Nañ ooy ndzocyich co miich ajcxy nigi pubejtin myegyipy ma je mübijcpüidijc hüidibi jim Jerusalén.

⁸ Ca' jadu'n n'ane'myich co mbubéjtcixipy je migügtijc hüidibi jim Jerusalén. Hue' ndzocyich co miich ajcxy mnejhuühuipy jadu'n nej yi

jacjadyii mibijcpidijc yhuinma'n bidaaccixyp ci'm co pubedaangixy je ymigügtijc jim Jerusalén. Jadu'n mdunipy ajcxy jigix jébi nnejhuühuihich pen janch tiy'ajt jadu'n co mdzojccixy mjihuiygixy yi jacjadyii mibijcpidijc. ⁹ Com miich ajcxy mnejhuühuiygixy jadu'n nej ajt nHuindzin Jesucristo mijmay'ajt mij'oy'ajt tuñ miid ich ajt ycixpi, jadu'n Jesús nipaady nej tüg mijcomeeñybi jiiby tzajpjoty, miid co yi' xchojccim xyjihuiyim mijcajee, chi yi' ixmajtztay yi' y'oy'ajtin jiiby tzajpjoty co ycidacy ya naaxhuiñ etz y'ayooy ya. Miich ajcxy ca' anajty ti miidity jiiby tzajpjoty, per jadachambi mbadaangixyp mij'oy'ajtin jiiby tzajpjoty.

¹⁰ Miid miich ajcxy m'oy'ajtin ycixpi, ma jada necy nmooybich miich ajcxy ngapxhuijin jadu'n nej jébi huaad mdungixy ojjäy'ajtin. Jac'oy co miich ajcxy myajcixipy je huidibi ajcxy myajtzondac jadöjimijt. Miich ajcxy jacjayijp ca'ydí jac ni pinjaty ti myajtzondaaccixy meen' yajmugii huidi miid mbubedaangixy je mibijcpidijc huidibi yajpatp jim Jerusalén. Nañ jadu'n miich ajcxy jacjayijp ca'ydí jacpinjaty mijottigooygixy co mbubedaangixy jacjadyii mibijcpidijc. ¹¹ Jadachambi tiempo jactungix pubejtin, meen' yajmujccix cixyjot huinjot jadu'n nej ti myajtzondaaccixy ixti mabaad myajmaygixy je meen' yajmugii. Nidüg nidüg yejccix nej ajcxy ii miidity. ¹² Pinjaty y'ofrenda yejcp janch cixyjot huinjot Dios ycöbicip yi' je' y'ofrenda, jadu'n nej ii miidity. Dios ca' yi' pijctzoy huidibi ajt ca' nmiidity.

¹³ Ca' nmina'nich co oy jadu'n co mbubéjtcixip jacjadyii mibijcpidijc ixti mabaad mnayyajhu'i migixy ayo'ndumb. ¹⁴ Hue' yajmina'n co quipxyjaty mdzinaaygixy, ni pin cayajconaxipy e ni pin cayajmayjadipy. Jadachambi tiempo miich ajcxy nmiidity ca'pxy je huidibi mnidzinaaygixip, ixti mich ajcxy conajxpi, paady ycixp jébi mbubéjtcixipy migügtijc huidibi yajmayjajtp. Jadüg tiempo miich ajcxy myajmayjadipy, e jacjadyii migügtijc jébi xypubéjtcixipy, e jadu'n yhuimbizimipy co mnaybubéjtigixy quipxyjaty miñ xyipy. ¹⁵ Com jadu'n jaybety y'ity ma Dios ñecy ma jadu'n ymina'n: "Pinjaty anajty may'amy miid, ca' yajconajxy. E pinjaty anajty hueeni miid, ca' yajmayjajty."

Tito miid ymigügtijc ajcxy

¹⁶ Per nyajnajypich jäygidaacin ma Dios, com Dios ti pidägy ma Tito yjot yhuinma'n co mijottigooy miich ajcxy m'oy'ajtin, tim jadu'n nej ich nmijottigooyich miich ajcxy m'oy'ajtin. ¹⁷ Co may'ajt nbijctzooyich ma Tito co nicxipy jadüg'oc ma miich ajcxy, agujc jotcuje cöbicy, com ti anajty jayijp yhuinma'n pidägy ci'm co ñicxa'n jadüg'oc ma miich ajcxy. Jadachambi Tito nicxip ma miich ajcxy miid ci'mdzojcin.

¹⁸ Quipxyi miid Tito nguexy ich ajcxy yam tüg nmigüg huidibi ooy chachcapxpaadyity majaty mibijcpidijc, co ooy oy ytuñ capxhuäcxi Jesús y'ayuc ytiy'ajt nej huaad jäy ajcxy y'alma nidzoocin paady. ¹⁹ Ca' nan jéyi co je mibijcpidijc yi' ycapxpadyii. Nañ jadu'n ti yhuinixyii mibijcpidijc ajcxy co jébi yhuidity miid ich ajcxy, e tunipy pubejtin miid je may'ajtin oy'ajtin huidibi ich ajcxy ndumybich miid je migügtijc ycixpi jim Jerusalén. Jadu'n nduunich jaydëbi jäy ajcxy capxpaadip ajt nHuindzin Jesucristo. Etz nañ jadu'n jaydëbi ñiguëxyg co ich ajcxy nbubeda'nich ajt nmigügtijc cixyjot huinjot. ²⁰ Ooy ngüend'atyich je meen' huidibi je mibijcpidijc ti yajmujccixy, jigix ca'ydí pin huaad xyñigapxy xyñi'ojiyich, jadu'n nej ich ajcxy meen' nyajmújccixyich.

21 Jadu'n ñich ajcxy nhuinma'ñ nbidägy co tudägy ndunáangixyich ca' nan jëyi ma ajt nHuindzin Jesús yhuinduu, nañ jadu'n ma je mayjäy ajcxy yhuinduu.

22 Nañ jadu'n nguejxypich müd yi' ajcxy jadüg ajt nmigüg, je huidibi oy ti ytuuñ ma Dios ytung quipxyi müd ñich ajcxy e nejhuiybich co tudägy ytuñ cixyot huinijot. E yi' müich ajcxy ooy xyjot'amij'adyii, e oy ytuna'ñ müd müich ajcxy ma Dios ytung. 23 Pen jim pinjaty nidiy yajtiy je Tito, nimaaygix co ñich yi' nmigüg, e yi' müd nduuñich ma Dios ytung ma müich ajcxy. E nañ jadu'n pen jim pinjaty nejhuihua'ñ pinjäy ajcxy yi', yi' jacjadyiibi huidibi ajcxy nicxp müd Tito. Nimaaygix co je mibijcpidijc ajcxy ya Macedonia ti quexy ajcxy, ytungixy müd Cristo ymij'ajtin ycixpi. 24 Paady ycixp müich ajcxy yi' mdzójccixipy mjihuüygixyipy je migügtijc ajcxy huidibi mimb müd Tito, jigix jëbi je mibijcpidijc ma nidüg nidüg cajp ya Macedonia nejhuihuipy co müich ajcxy yi' mdzójccixy mjihuüygixy je mibijcpidijc tiydudägy. E paady ycixp jëbi ñich jotcuje navyihuüijich müd müich ajcxy ycixpi.

9

Je cüeitin müd je mibijcpidijc ajcxy ycixpi

1 Nañ ca' yjaty ycopicyity co ñich müich ajcxy njacnijayüygixyipy co je mibijcpidijc huidibi xii ya pubejtin tunaangixyp ma Dios yjäy huidibi ajcxy jim Judea. 2 Com nejhuiybich co müich ajcxy nañ jadu'n mbubedaangixy cixyot huinijot Dios yjäy huidibi ajcxy jim Judea. Paady ycixp jotcuje ñich jadu'n nnimäyich je mibijcpidijc ya Macedonia jadu'n nej müich ajcxy jim Acaya mhuinma'ñ pidacy jidöjimijt co mbubedaangixy je mibijcpidijc huidibi jim Judea. E müd co müich ajcxy jayijp mhuinma'ñ ti mbidaaccixy co mbubedaangixy je mibijcpidijc huidibi ajcxy jim Judea, paady ycixp may mibijcpidijc ya Macedonia yhuinma'ñ pidaaccixy co ypubedaangixy nañ jadu'n. 3 Paady nguejxypich Tito müd jacjadyii migügtijc ma müich ajcxy, jaydëbi xypubéjtcixyipy ma je meeñ yajmugüi, jadu'n nej ti mbidaaccixy huinma'ñ. E ñich ca' ti tzo'ydu'n nbáadibich müd müich ajcxy ycixpi ma jada pubejtin huidibi ajcxy mguexamyb jim Judea. Com ñich ti nnimäyich mayjäy co müich ajcxy ni'ixi' m'lijtcixy müd mbubejtin. 4 Ca' yjegyity co nijëjity mibijcpidijc huidibi tzinaayb ya Macedonia ñicxa'nip ajcxy müd ñich co anajty nnicxyich jim ma müich ajcxy. E co anajty ñich ajcxy jim nmejtzcixy, e chi ajcxy nbáatcixyipy ca' anajty ajcxy mni'ixijity. Pues chi ooy tzo'ydu'n njihuühuibich, com ti anajty ooy njot'amij'ajtigixy. Nañ jadu'n müich ajcxy tzo'ydu'n mjihuühuip. 5 Paady ycixp huinma'ñ nbidägyich co oy jadu'n co nijëjity migügtijc nicxy jayijp xycogapxüygixy, e huen xypubejtcixy ma yi' meeñ yajmugüi jadu'n nej jidöjimijt ti mgapxytungixy. E co anajty nmechich jim ma müich ajcxy, chi ni'ixi' anajty ajcxy müdity yi' m'ofrenda, e jëbi jäy ajcxy nejhuihuip co yi' m'ofrenda ti myejcixy cixyot huinijot, ca'ydi jäy yminaangixy co ñich müich adzip ajcxy ti n'ane'mgixy co m'ofrenda nyajmújccixyipy.

6 Jäymetz müich ajcxy jadu'n nej ayuc y'oc'ity: Pinjaty hueni niip, nañ jadu'n hueeni ycosecha yajpidägy. E pinjaty mij niip, nañ jadu'n mij ycosecha yajpidägy. 7 Nidüg nidüg mibijcpi yegipy y'ofrenda jadu'n nej anajty ci'm yhuinma'ñ ti pidägy co yega'ñ. E ca' yegipy ametz jotmetz. E nañ jadu'n ni yca'adzip yca'a'écity. Com Dios chojcpy yjihuüyb pinjaty

cixyot huinijot y'ofrenda yejcp. ⁸ Dios jëbi may'ajt oy'ajt tunipy müd miich ajcxy mijcajee, e miich ajcxy mbáatcixipy tüg'óciy tijaty conuucxin, e ıxti mmüid'adipy tüg'óciy huidibi myajmayjajtcixy, e nañ jadu'n conaxpi naadigibi nej huaad jacjadyii mibijcpidijc mbubejtcixy, e mdungixipy canaagnax oyjäy'ajtin. ⁹ Jadu'n jaybety ymiñ ma Dios ñecy, ma jadu'n ymina ñ:

Yi oyjäydijc ajcxy, yi' ajcxy nimooyb ayoobitijc huidibi ajcxy yajmayjajtpy. Yi oyjäydijc ajcxy co oyjäy'ajtin tungixy, yejccixyp ijxpejt oybi huidibi y'idipy huinixi.

¹⁰ Dios yejcpy je tim hidibi jäy ajcxy ñiipy, nañ jadu'n Dios yejcpy je jicxy picy hidibi nidzinaayim nijugy'ajtim. E jadu'n co miich ajcxy oyjäy'ajtin mdungix mijcajee, je m'oyjäy'ajtin ajcxy ñipaadip nej jihuiy mgosecha myajpidiccixy may'amy. ¹¹ E jadu'n miich ajcxy müd'adipy tüg'óciy jugy'ajtin comeñ'ajtin, jaydëbi m'ofrenda myejccixy mij'amy. E mayjäy ajcxy Dioscojuyip yajnaxipy ma Dios müd je m'ofrenda ycixpi, co anajty nyecyich miich ajcxy m'ofrenda ma yi' ajcxy hidibi yajmayjajtp. ¹² Co icxh ajt pubejtin nyejcim ma jacjadyii migügtijc, canan jëyi co nbubejtim müd tijaty yajmayjajtcixyp. Nañ jadu'n yi' ajcxy jëbi yajnajxcixy Dioscojuyip canaag'oc. ¹³ Yi' ajcxy capxpadamb Dios müd co je m'ofrenda hidibi ajcxy ti myejccixy, yi' je' tiy'ajtip co miich ajcxy mgapxymidoogixy Cristo y'ayuc ytiy'ajt. Paady ycixp may mibijcpidijc ajcxy Dios ojadátcixipy e nañ jadu'n Dios iibáatcixipy capxpáatcixipy müd je pubejtin hidibi miich ajcxy anajty myejcpy müd yi' ajcxy ycixpi, etz nañ jadu'n müd jacjadyii mibijcpidijc ycixpi. ¹⁴ E ci'm yi' ajcxy Dios ojadadipy mibijctzohuipy müd miich ajcxy ycixpi, etz xychóccixip xyjihuiyigixip ooy müd co Dios je mijpi conuucxin ti yecy ma miich ajcxy. ¹⁵ Dioscojuyip yi' Huindzin'ajtim Dios müd yi' ymijconuucxin hidibi ti yecy ma icxh ajtin, ni pin canejhuıy nej jëbi yajnajtzcaxıy.

10

Pablo müdity cõtujcin co y'apóstol'adyii

¹ Ich Pablo nmigapxypich miich ajcxy müd yungnaxy njot nhuinma'ñ, jadu'n nej jihuiy Cristo miich ajcxy xymüdmıydaaccixy. Com Cristo yungnaxy jot huinma'ñ müdity. Nijëjity miich ajcxy yminaangix co ooy yungnaxy naybidägyiijich co n'ityich müd miich ajcxy, e jadachambi co jigüegy nyajpaadyich, hue' n'ahuimbityich ahua'ñ, ndunaamybich ti ndunaamybich. ² May'ajt nbijctzooybich co anajty icxh miich ajcxy nicxy n'ijxcixy, ca' jadu'n ndzocyich co copicy n'ahua'ndägibich müd nijëjity miich ajcxy hidibi xyñihuambejtpich, co nduñich etz ngapxyich ngi'mtzojcin tim jadu'n nej huenpin naaxhuiñjäy ytungixy etz ycapxcixy müd yci'mtzojcin. Janch ni'ixi' n'ityich, co anajty jim nmechich, chi müd nnayhuindinähuıybich yi' ajcxy hidibi jadu'n xyñihuambejtpich. ³ Janch tiy'ajt co ndzinaayich jadu'n nej naaxhuiñjäy chinaaygixy. Per ca' ndzip-tuñich nej jäy ajcxy chiptungixy. ⁴ Ca' icxh ajt nyajtunim naaxhuiñjäy ymic'ajt co nnaygohuaanım ma je jibicpi hidibi xymidzip'ajtim. Hue' nyajtunım Dios ymic'ajt, hidibi jëbi müd nmımadaacım tüg'óciy hidibi ca'oybi müd. ⁵ Jadu'n icxh ajcxy ca' nyajtzobadängıyich je ayuc tiy'ajt hidibi ca' yjanchity, etz je' ayuc pin amıj agıx naybıdaacıp co Dios y'ayuc ytiy'ajt adujci. Tüg'óciy naaxhuiñjäy y'ayuc ytiy'ajt nbıdáaccıyich ma

Cristo, jigix tüg'óciy jäy ajcxy capxymidohuip Cristo. ⁶ Co anajty miich ajcxy mhuinma'ñybiadaaccixy co huädz ngapxymidohuaangixy tüg'óciy Cristo y'ayuc ytiy'ajt, pinjaty cacapxymido, hue' ni'ixi' n'ijtcixich co yajmöhua'ñ castigo pinjaty cacapxymidoo.

⁷ Miich ajcxy yi' mdzachuenditungixy jäy ajcxy nej yjäy'ajtcixy. Pen jim pinjaty ñayjihuiyii janch agujc jotcujc co Cristo yhuin'ixyii müid ytung ycixpi, huen huinjihuiyigixy jotjoty co Cristo ti xyhuin'ijxcixyich nañ jadu'n müid yi' ytung ycixpi. ⁸ Hich ca' ti tzo'ydu'n jihuiyich müid co ci'm nnyagömayiijich hueeni müid co Jesucristo xymooygixyich ane'min cötujcin. Com ñich ajt nHuindzin Jesucristo ti xymöoygixyich jada cötujcin, jigix ñich miich ajcxy nyajyeecip mmibijcin, canan nyajtigoyip ajcxy mmibijcin. ⁹ Ca' jadu'n ndzocyich co yquëxigipy jadu'n nej jihuiy n'adzigihuaangixy müid je necy huidibi nyajniguejxypich miich ajcxy. ¹⁰ Yminaangixy co ñich nnecy ooy tzaachyjaty chach chaach. E yminaangixy co ma jäy ajcxy yhuinduu yung naxy njäy'aty, e ngapxin nmüydáacinich ca' pin jäygidägy. ¹¹ Per yi' jäy ajcxy huidibi jadu'n mīnaangixp, copicy ajcxy nejhuñhuipy co jadu'n nej ñich ngapxin necyjoty co nijayiygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

¹² Ca' huaad n'ocnay'ijxquipxim o nyajtügüiyim müid yi' ajcxy ytung huidibi tzach naygömayaanip ci'm. Tzuu huinma'ñ locihuinma'ñ ajcxy ytungixy, co pin jadu'n nay'ixquipxip naymidogüipxip müid yci'm'ayuc yci'mhuinma'ñ huidi ii yjajtpy ñejhuñyb. ¹³ Ca' ñich ci'm naygömayiyb ma ycapadyii, huidibi ñich ajcxy ca' xypátcixyich. Dios ñich ajcxy xya-jnejhuñybich nije' nije' it lugar ma yi' tzocy ndungixibich. E Dios jadu'n tzojc co nicxy ndungixy jim Corinto ma miich ajcxy myajpatcixy. ¹⁴ Paady ycixpi ndungixyich jeyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy ñich jayijp ti n'ityich ma miich ajcxy. Pues ñich tim jayijp ngapxhuäcx Dios y'ayuc ma miich ajcxy, e ca' jac ni pin. ¹⁵ Pen huingbi jäy je Dios ytung yajtzondaacip ma tüg cajp, pues ca' ñich huaad jim nduñich, jadu'n nej jihuiy ñich ti nyajtzondägyich je tung. Ca' jadu'n nduñich, hue' njijp'ijxypich co miich ajcxy myajyeegip mmibijcin, huin'it jebi njactunipich ma miich ajcxy, jadu'n nej Dios tzocy co ndunipyich. ¹⁶ Co anajty jadu'n ti njactuñich ma miich ajcxy, huin'it xii ya n'ihuäcxa'ñich ngapxhuäcxa'ñich Cristo y'ayuc ytiy'ajt ma je it lugar jactim jiguemjatyp ma miich ajcxy. Per ca' nduna'ñich ma huingbi ti yajtzondägy je tung.

¹⁷ Ooy ycopicyity ngömayim nyajmij'ajtim ajt nHuindzin Jesucristo, e ca' y'oyity co naygömayim ci'm. ¹⁸ Com Dios ca' jäygidägy pinjaty ci'm naygömayip. Hue' Dios yjäygidacyp pinjaty ajt nHuindzin Jesucristo capxpatp.

11

Pablo etz je' ajcxy huidibi y'ayuccapxhuäcxp müid anii

¹ Huaad co miich ajcxy ixypy xy'ocmimexxtujcich hueeni ñich nloci huinma'ñ huidibi ngapxaamybich. Oy ixypy ñejity mīmexxtuccich. ² Ooy ndzocy ooy njihuiyich miich ajcxy. Dios ti xymöyich je tzojcin jihuiyin huidibi nmüidich müid miich ajcxy ycixpi. Ndzojcyipich co caxyjot huinjot miich ajcxy mmijpidaaccixy Cristo. Co miich ajcxy yajmij'adip Cristo cixyjot huinjot, huin'it jadu'n miich ajcxy nipaadipy

nej tũg tũxy'anãg pi'cnip huiðibi pijcp miid tũg yẽyðijc. ³ Nðzigũybiçh co huingbi jã yxajhuinma'nydigoyaangixy miid ixpicytije y'ayuc huiðibi ca' ytiy'ajtity. E miich ajcxy m'ixmadzaangixy jadu'n nej cixyot huinijot ti mmijpidaaccixy Cristo. Tim jadu'n nipada'ñ miich ajcxy mjadaangixy nej yjajty jecy'ajty je Eva co tza'ñ yhuin'iini. ⁴ Com miich ajcxy mgõbijccixy huingbi jã huiðibi tigachjaty yaj'ixpijcp Jesús ytiy'ajt, ca' yjadu'nity nej iich ajcxy nyaj'ixpicyich. Etz nañ jadu'n miich ajcxy jotcuje mgõbijccixy huingbi espíritu, ca' yjẽjity je Espíritu Santo huiðibi ti mgõbijccixy jayijp'aty. Etz nañ jadu'n mgõbijccixy tigachjaty ayuc tiy'ajt, e ca' y'ocjẽjiñ huiðibi ajcxy m'alma xyajniðzoocip. Ca' y'ocjẽjiñ huiðibi ti mmidoogixy ma iich ajcxy. Miç'amy mdzachmijpidaaccixy huingjã y'ayuc. ⁵ Ca' jadu'n ytiy'ajtity co yi huindzindijc ajcxy huiðibi nayðijigixp Jesús y'apóstol huiði jim ma miich ajcxy, co jac miç'ajt miid ajcxy etz yjacmiid ajcxy ixpijcin ma Dios ytiy'ajt, ca'ydi iich. ⁶ Oy iich jada' ca' njatyich nej yajxon ngãpxibich, ca' ooy ngo'ayúcigich. Per ca' ñejity com yajxon njatyich nnejhuũyich Dios ytiy'ajt. E ti nyaj'ijxcixy nyajnejhuũyigixy co n'ixpicyigich ma Dios ytiy'ajt miid je ayuc huiðibi ngãpxhuãcxiçh ma miich ajcxy etz je mijhuinma'ñ huiði nduunich co jim n'ijtyich ma miich ajcxy.

⁷ ¿Nej tundigoyich jada' co ngãpxhuãcxyich Jesucristo y'ayuc ma miich ajcxy e ca' nbijctzooyich meeñ miid ndungich ycixpi? Jadu'n nnayyajnajxich anajty nej tũg midumbi jigix miich ajcxy jac'oy jacjotcuje mdzinãhuip. ⁸ Ti ngõbicyich meeñ huiðibi jacjadyii miibijcpidijc ti xymõyich huiðibi tzinaayb ma huingbi cajp. Yi' ajcxy ymeeñ nyajtuunich co nyaj'ixpijcyich miich ajcxy. ⁹ Co n'ijtyich miid miich ajcxy jadõjimijt jadõhuix'am ca' nbijctzooyich ma miich ajcxy huiðibi nyajmayjajtpyich anajty. Ca' n'adzijpyich ni pin. Yi migũgtijc huiðibi ajcxy tzoon Macedonia, yi' ajcxy xymooyich huiðibi anajty nyajmayjajtpyich, paady ycixp ca' anajty meeñ nbijctzooyich ma miich ajcxy, ca' n'adzijpich miich ajcxy. E jadu'n njactuna'ñich jadu'n nej nduunich miid miich ajcxy co n'ijtyich jim jadõjimijt. ¹⁰ Nejhuiũyibich co yjanchity co nmíðidyich Cristo ytiy'ajt, nañ tim jadu'n nnejhuũyich co ci'm nbaadyich huiðibi miidnay'ixyijich. E ca' pin ma tũg'óciy je Acaya naaxjot xycapíjciðich jada jotcuje'ajtin. ¹¹ ¿Na'amy co jadu'n nmína'ñich? ¿Je' co iich miich ajcxy ca' ndzojccixy? Ca' yjadu'nity. Dios ñejhuũyib co ndzocy njihuũyich miich ajcxy.

¹² Per njacyajtũyõyaamybich je ndungich huiðibi ndumybiçh, e ca' meeñ nbijctzohua'ñich miid iich ndung ycixpi jigix co yi jacjadyii huindzindijc huiðibi yaj'ixpijccixp ma miich ajcxy, ca' jẽbi y'iindaaccixy co yi' ajcxy tú'ciy ytungixy jadu'n nej iich nduunich. ¹³ Yi' ajcxy ymínaangixy co Cristo ti yajniðijcigixy co ajcxy yi' y'apóstol'adyii, e ca' yjanchity, niçoob ajcxy huin'iingixy yi miibijcpidijc. Nayyajnáxigixy ci'm nej jihuiy Cristo y'apóstol'ajtigixy, e ca' yjanchity. ¹⁴ Nañ ni ca' oy nhuinmaayich co jadu'n iditzcixy, com nañ jadu'n je Satanás ñayyajtigachyii ñayyajnaxyii nej Dios y'ángel huiðibi tiy'ajt miid, e ca' yjanchity. ¹⁵ Paady ycixp nmibijcpich co yi jã ajcxy huiðibi tumb miid je mujcu' nañ jadu'n nayyajnaxyii jadu'n nej jã tudãgypi, e ca' yjanchity. Per Dios chaachytunamyb ajcxy jadu'n nej ypadyii miid je jibicpi ycixpi huiðibi ajcxy ytumyb.

Je tzaachypi je ayo'n huiðibi Pablo yjajtyp co y'ayuccãpxhuãcxy

16 Jadüg'oc ñch miich ajcxy nnímaaygíxy: Ni pin ycamína'nípy co ñch locíjity. Per pen nijéjity jadu'n ymínaangíxy, ca' ñejity. Miich ajcxy amído'o'íjtcix ñch n'ayuc, jigix jébi naygómayíijich ci'm. 17 Ca' ñch ajt nHuindzin Jesucristo xycótuycmóyich, co jadu'n jébi ngapxyich jadu'n nej cham ngapxa'ñich. Hue' ngapxa'ñich jadu'n nej tüg loci jáy co naygómaya'ñyíijich ci'm. 18 Mayjáy ajcxy ooy ci'm chachnaygómayaánigíxyp mïid huidibi ti tungíxy mïid yci'm mic'ajt ya naaxhuiñ. Nañ jadu'n ñch nnaygómaya'ñyíijich ci'm. 19 Miich ajcxy mdzachcöbijccixyp loci jáy ajcxy y'ayuc, je' co mdzachnayyajnaxáanigíxy jadu'n nej jihuíy ajcxy ooy mdzachcohuinma'ñity. 20 Mgöbijcyp miich ajcxy co jáy ajcxy xytumbi'adüyb nej tim tzojccixy, huidibi ajcxy xyhuinjicxp xyhuimbijcp xyhuimmeetzp, e huidibi ajcxy xy'ane'mgíxyp, xycamij'íjxcixy xycamijpidaaccixy, ixti mgöbijccixyp co xycojxcixy ma ajcxy mhuiñyijp. 21 Oy njatzo'ydu'njihuíyich co nmína'ñich co ca' jadu'n nmïididyich je jotmic'ajtin, jigix jébi ñch miich ajcxy nduuñich jibic, jadu'n nej yi' jadu'mbi huindzindijc ti xytungíxy.

Per jadu'n nej yi' ajcxy ñaygapxpadyii ci'm, nañ jadu'n naygapxpada'ñyíijich ci'm. Ca' ñejity pen capxpích jadu'n nej tüg loci jáy. 22 Pen hebreojáy yi' ajcxy, hebreojáy ñch nañ jadu'n. ¿Conaax cogajp ajcxy Israel? ñch nañ jadu'n. ¿Abraham ajcxy ymij'ap'ajtpy ymijteedy'ajtpy? ñch nañ jadu'n. 23 ¿Nej tumb ajcxy mïid Cristo? Nígi nduñyich mïid Cristo, ca'ydi yi' ajcxy. Ca' ñejity oy ngapxyich jadu'n nej tüg loci jáy. Jac mic ti nduuñich mïid Cristo ca'ydi yi' ajcxy. Canaag'oc codungdijc xychaachytuñich. Ti nyajc'atyich mïid matz etz mïid coochac janch canaag ci' janch ycamacho'ñity. Canaag'oc codungdijc xypidaacyich pujxtigoty, e yi' ajcxy ca'. Canaag'oc o'cin jíjp'am ti nyajpaadyich, e yi' ajcxy ca'. 24 Mígoox'oc judíoáy ajcxy ytungmïidpi xyci'ajtyich mïid cochac iipx majmocx mídaax ci'. 25 Tügüg'oc xychaachytuñich mïid matz. Tügtecy ajcxy xychaagächich. Tügüg'oc je barco yquiñ mejy'agujc je huidibi ñch anajty nyajnicxüyb. Co je barco yquiñ tügtecy, chi tüg tzuum etz tüg xii n'íjtyich ma je mejy anajty ooy ypidígy. 26 Ooy viaje nduuñich canaag'oc, e o'cjíjp'am n'íjtyich ma mïjnïgom yjadyii, e nañ jadu'n ooy anajty may meetzpi yajpaady ma anajty nhuidityich. Nmïigogajpich, yi' judíoáy, xyjayaj'ögaanich ajcxy. Ti ayo'n nbaadyich ciudadjoty etz ma yuugjot etz mejyjoty. E nañ ti ayo'n nbaadyich mïid jáy ajcxy huidibi naybidaacip ajcxy nej ñch ajt nmïgüg, e ca' anajty yjanchity. 27 Mínaajity ooy mic njihuíyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxïnaxyich mïid yuu tidzibi. Janam jatzojc n'ayu'atyich. Mínaajity ooy njihuíyich je tüchypi, etz nyajmayjatyich nhuit nducxyich.

28 Mïid jada ycixpi etz mïid jac-huidijaty, nañ jadu'n jabom jabom ooy mic njihuíyich jadu'n nej yajpaady je mïbijcpidijc nidüg'óciy canaag picy xi ya. 29 Pen nijéjity mïbijcpidijc yajpaady amutz ma ajcxy ymïbijcin, nañ jadu'n ñch nayjihuíyíijich amutz. Pen nijéjity mïbijcpidijc ypocytungíxy, ñch ndzo'ydu'n njihuíybich etz jibic nayjihuíyíijich mïid yi' ajcxy ypocy ycixpi. 30 Pen naygómayaanibich ci'm, naygómayaanibich co amutz njihuíyíijich. 31 Je Dios ñch ajt nHuindzin Jesucristo yTeedy, je huidibi huaad n'ojadajtim n'íbaatim ngapxpaatim huinixi huinítempo, yi' ñejhuíyb co tiy'ajt jadu'n nej ngapxyich. 32 Jecy'ajty co n'íjtyich jim Damasco, je gobernador huidibi anajty tumb mïid je rey huidibi

yxii Aretas, ypidac soldados ajcxy ma jadyii mijtu' ycajptigiy, jigix jebi xyajnicxyich mach. ³³ Per je mibijcpidijc ajcxy xycodiyñajxich naaxcixy mijcachjoty ma tüg ventana aguu ma je mijpoch huidibi je cajp müd yjöbojtz'ahuidityity. E jadu'n ndzoocyich ma je gobernador yci'am.

12

Huidibi Pablo yhuin'ijx etz nejhuüy

¹ Ni ti ycajapaady ycajajganar'aty co ci'm ndzachnaygömaayim ndzachnayñigapxim ndzachnayñimiydaacim. Per ca' y'ocnejity nimiydägaamybich ti nhuin'ijxypich cumäyjoty, je huidibi je Huindzin Jesucristo xyajhuin'ijxpich xyajni'ixiiybich. ² N'ixy'ajtypich tüg yëydijc huidibi mibijcp Cristo. Cham majmactz jimijt ma Dios yajpättigiyii tzajpjoty ma je midugügpi tzajp. E ca' nejhuüyich pen hue' yajpättigiyii müd ñinix o pen ca'. Dios tügpajc nejhuüyb. ³⁻⁴ Jadüg'oc nmina'ñich co Dios ti yajpättigiy je yëydijc ma je oybi it. E ca' nnejhuüyich pen janch ti ypättigiy müd ñinix o pen ca'. Dios tügpajc nejhuüyb. E jiiby ma je oybi it midoy capxy ayuc huidibi ca' huaad ni pin jäy capxy miydägy nimina. ⁵ Ooy ich amij agix nayjihuihua'ñiyijich müd je jadu'mbi yëydijc jadu'n nej jëjin huidibi Dios yajpättigiy tzajpjoty. Per ca' ich ci'm nayñimiydäga'ñiyijich naygömaya'ñiyijich. Hue' janchtiy nayñimiydägaanibich ci'm nej nduñ n'ayooyich ma ich ndzinaayin. ⁶ Oy ixypiy ich ci'm njanayñimiydäga'ñiyijich janch oy nej nduuñ n'ayooyich, ca'p je' anajty ngapxtigooyich, com je' anajty ngapxpich je janchypi. Per ca' jadu'n naygömaya'ñiyijich, com ca' ndzocyich co jäy ajcxy nicxy xycömaayich ñigi anaxy. Huaad jadu'n co ajcxy müd miydacy je migügtijc huidibi ajcxy ijxcixp huidibi ndumybich o huidibi ayuc ajcxy ymidoogixp huidibi ngapxpich.

⁷ Je capxy ayuc huidibi Dios xyajnejhuüyich jiiby tzajpjoty, ooy anajty chach y'oyity. Paady ycixpi Dios pidacy jadu'n nej jihuiy tüg apy ma ich nninix, jigix ca'ydí amij agix nayjihuiyijich. E je apy jadu'n nipaady nej mujcu' xyajtzaachiyich. ⁸ Tugüg'oc Dios ti nmibijctzooyich co huen xyajpidzimich je huidibi xyajtzaachiybich. ⁹ Per je Huindzin Jesús xyñimaayich: "Jëbi jadu'n co may'ajt ndunipich müd miich ycixpi. Co pinjaty pumäy ñayjihuiyii, huin'it ñigi ñiguëxigy ich nmic'ajt." Paady ycixpi njotcugiyich co pumäy nayjihuiyijich, jigix ñiguëxigipy Cristo ymic'ajt ma ich ndzinaayin. ¹⁰ Paady ycixpi ooy njotcúcidyich co pumäy nayjihuiyijich, co jäy xyñigapxy xyñi'ojijich, co ti nyajmayjatyich, co jäy xy'ixhuidityich xpahuidityich, co tzaachypi nyajnaxyich müd Cristo ycixpi. Co nayjihuiyijich pumäy, chi ñigi mic nayjihuiyijich müd Cristo ymic'ajt ycixpi.

Pablo ca' yjotcujc'aty nej je mibijcpidijc ajcxy jim Corinto ytungixy

¹¹ Co ich jadu'n ci'm naygapxpadyijich, tim jadu'n nipaady nej jihuiy ich tüg loci jäy. Adzip miich ajcxy jadu'n xytuuñich co copicy naygapxpadyijich ci'm. Hue' yjapaadyii miich ixypiy ajcxy xycömaaybich xycapxpatpich. Ich ca'p ich ti ndzoohuity. Oy ixypiy ich ca' ti mic'ajt nmüdidyich, per jatytimy ñigi mic'ajt nmüdidyich, ca'ydí yí huindzindijc huidibi ma miich ajcxy, huidibi ajcxy naydijp apóstol, e ca' yjanchity. ¹² Ma je tung huidibi nduuñich müd mecxtujcin ma miich ajcxy, ti ooy

ñiguëxïgy mïid canaag iixpejt, mijhuinma'ñ etz milagros, co ïich janch Cristo xy'apóstol'adyiïjich. ¹³ Ca' jadu'n ytiy'ajtity co mmïnaangixy co ñigï oy ti nduunïich ma yï jacjadyï mïbïjcpïdiïc ma jacjadyï cajp, ca'ydi jadu'n nej ti nduunïich ma miïch ajcxy. Pen ti ndundïgooyich co ca' ti nbïjctzooyich meeñ mïid ïich ndung ycïxpi ma miïch ajcxy, jadu'n nej jacjadyï ajcxy ytungïxy, pues tungïx may'ajt meexcïch ajcxy.

¹⁴ Jadachambi ni'ixi' n'ityich co nñicxa'ñich midugïg'ocpi jïm ma miïch ajcxy. Ca' ti pubejtïn nbïjctzohua'ñich ma miïch ajcxy mïid ndungïch ycïxpi. Ca' ndzocyïch miïch ajcxy mmeëñ. Hue' ndzocyïch co miïch ajcxy xymïjnïcxpedïpyïch. Jac'oy co ïich miïch ajcxy nbubedïpy, ca'ydi co miïch ajcxy xypubedïpyïch. Jadu'n ïich nipaady mïid miïch ajcxy nej tüg ungedeedy. Je ungedeedy ypubejtpy y'ung, e ca' nan je un pubejtyp yteedy. ¹⁵ ïich jotcujc nyajtundähuïbïch ma miïch ajcxy tüg'ócïy tijaty nmïidich, ixti ngi'mmic'ajtich tüg'ócïy nyajtunaamybïch mïid miïch ajcxy ycïxpi, jigïx jëbi nbubedïpyïch miïch ajcxy. Oy janiguëxïgy co ïich miïch ajcxy njadzojccïxy njajihuïïgyïxy, e miïch ajcxy ca' xychóccïxyïch xyjihuiïgyïxyïch.

¹⁶ Nijëjity miïch ajcxy mmïnaangixy co janch tiy'ajt co ca' ti pubejtïn ti nbïjctzooyich ma miïch ajcxy, nijëjity ymïnaangixy co janch nhuinma'ñ ti nyajcägyïxyïch ma tüg trampï mïid anïi. ¹⁷ ¿Nej ti ïich miïch ajcxy nhuin'ïngïx mïid je migügtïjc huïdibi ajcxy nyajñigüeïx? ¹⁸ Nbïjctzohuïch may'ajt ma Tito co huen ñicxy xycogapxïïgyïxy jadüg'oc. E nyajpuguexïïgyïch jadüg ajt nmïgüg huïdibi mïid ñicxy quïpxyï. ¿Nej ti miïch ajcxy Tito xyhuïn'ïngïxy? ¿Nej ca' yjanchity co ïich etz Tito quïpxyïaty ïich ajcxy nhuinma'ñ nmïidity, e tú'cïy ndúngïxyïch?

¹⁹ Ca' yjegyity co miïch ajcxy mhuinma'ñybidáaccïxy co ïich ajcxy ndzachnayñïgapxtúutïgyïxy ma miïch ajcxy. Ca' yjadu'nity. Ngápxcïxpïch nmïydáaccïxpïch ma Dios yhuïnduü je ayuc tiy'ajt huïdibi Cristo xymóoygïxïch. E tüg'ócïy huïdibi ndúngïxpïch, hue' ndúngïxïch jigïx yeegïp miïch ajcxy mmïbïjcin. ²⁰ Com tzigïïybïch co anajty ñicxy n'ïjxcïxyïch miïch ajcxy, ca' jegyity co nbadaamybïch je tiy'ajt co miïch ajcxy ca' mhuinma'ñymïdity jadu'n nej jëbi njäygidägyïch yï mhuinma'ñ ajcxy. E miïch ajcxy nañ jadu'n ca' mjäygidáaccïpy nej ïich nhuinma'ñ mïididyïch. Tzigïïybïch co miïch jada' ajcxy mnyachiptúnïgyïxy, ca' mny'ixáanïgyïxy nidüg nidüg, mnyamïjotmá'tïgyïxy; mnyañi'ojïïgyïxy, e mbiïtzcapxcïxy; co ooy amïj agïx mnyajihuïïgyïxy, e ca' mny'ayuc-huïnjuhuiïgyïxy, ca' oy m'ïjtcïxy. ²¹ Tzigïïybïch co jadüg'oc ñicxy n'ixyïch miïch ajcxy, chi ajt nDios xyajjihuihuïbïch tzo'ydu'n mïid miïch ajcxy ycïxpi, etz njihuïhuïbïch tajïn mayïn mïid miïch ajcxy mbocy ycïxpi, e com ca'ni mjothuïmbïjtcïxy mjäygidägyïxy je mjibïc-huinma'ñ jadu'n nej nmïgapxtïgooyïxy e mmïdundïgooyïxy huïngbï töxyjäydiïc, etz jadu'n nej mmïdundïgooyïxy migüg ytöxyïjc, etz jadu'n nej jibïc-huinma'ñ miïch ajcxy mmïdity.

13

Ane'mïn capxhuijin etz capxpoocxin huïdibi cïjxnïp je necy

¹ Jada je' ymidugïg'oc co ïich miïch ajcxy ñicxy ngo'ixïhuaangïxyp. Pen miïch ajcxy mxïhuaangïxyp tüg migüg ma ïich co ti ytundïgooy mïid Dios ytiy'ajt, hue' tzocy mïid metz o tugïg testigos. ² Co je mïmejt'ocpi ïich

miich ajcxy oy ngo'ixiŷy, chi nnimaayich yi' ajcxy huidibi ti ytundigooygixy anajty, e nañ jadu'n nnimaayich je huidibi jacytungixp co ñich anajty jadüg'oc nicxy miich ajcxy n'ijxcixy, ca' nyajtunañich mecxtujcin ma yi huidibi ajcxy pocytungixp. E cham co nyajpaadyich jiguëgy ma miich ajcxy, nnügapxpejtpyich ma jada necy co jadüg'oc nicxy n'ixañich miich ajcxy, ca' nmimecxtugañich yi' ajcxy huidibi pocytungixp. ³ E jadu'n miich ajcxy mmüid'adipy tiy'ajt co ngapxnajxich Cristo y'ayuc. E Cristo ca' je' yjadu'nity nej tüg jäy huidibi ca' mic'ajt müidity. Hue' je' yajniguëxigyp ymic'ajt ma miich ajcxy. ⁴ Janch tiy'ajt co jadu'n ajcxy yajcruudzpejty Jesucristo nej jihuŷy ca' anajty mic'ajt müidity. Per jadachambi Jesucristo jugy'ajtp müid Dios ymic'ajt. Nañ tim jadu'n co n'ijtim müid Jesús, jadu'n yquëxigy nej jihuŷy ca' mic'ajt nmüid'ajtim. Per co n'idañich müid miich ajcxy, nmüid'adaañibich Dios ymic'ajt müid co nyajpaadyich ma Cristo.

⁵ Ci'm naydiy'ajtpjicigix nidüg nidüg, pen janch tiydudägy mmüibijccixy Cristo. Ci'm huinmaaygix ma ajcxy mgimdzinaayin, pen janch mmüibijccixy. ¿Nej ca' mdimjihui'mybijccixy, pen müid ajcxy Cristo ma mjot mhuinmañ? Pen ca' yjadu'nity hue' anajty Cristo mmüibijccixy nügixy cohuajc. ⁶ Per njjip'ijxypich co miich ajcxy mnejhuŷiipy co yjanchity co Cristo ti xyajñibicyich yi' ytung, e ca' n'ündägyich. ⁷ Dios nmüibijctzooybich müid miich ajcxy ycixpi, jigix ca' ti jibic-huinmañ mdüngixipy. Canan co ñich ajcxy ndzachcömaybidzimmäängixyich, o co ñich ajcxy nigi nmüidity Dios ytiy'ajt ca'ydi jac ni pinjaty. Jadu'n ndüngixyich, jigix miich ajcxy mdunipy oybi. Ca' ñejity oy jadu'n yquëxigipy nej jihuŷy ñich ajcxy ca' oy mij n'ixpicycigich. ⁸ Com ca' huaad ni ti nej ndunim huidibi ca' yjanchity huidibi ca' ytiy'ajtity. Hue' tzocy co tüg'óciy huidibi ndunim, naybadüib müid Dios ytiy'ajt. ⁹ Paady jotcujc ñich ajcxy co nyajpáatcixyich nej jihuŷy ca' ñich ajcxy mic'ajt nmüidity, jigix miich ajcxy mic'ajt mmüid'adipy ma mmüibjcin. Nmüibijctzoohuaamybich ajcxy Dios müid miich ajcxy ycixpi, jigix ajcxy mmüibjcin mi'ljtcixipy ca'pxy. ¹⁰ Jada necy ñich jayijp nguexamyb ma miich ajcxy, ma yam ca'ni nicxy n'ijxcixyich miich ajcxy jadüg'oc, jigix ca'ydi adzip ahua'n anajty nyajtuuñ ñich n'ane'min ma miich ajcxy. ñich ajt nHuindzin Jesucristo ti xymöyich mic'ajt, jigix jëbi ñich miich ajcxy nyajyeegipy ma mmüibjcin. Ca' nyajtigoyaañich miich ajcxy yi' mmüibjcin.

¹¹ Migügtijc ajcxy, capxcijxpich müid miich ajcxy, huen Dios xypubéjtcixipy xypudigüygixyipy. Mijottigooygix cuydunaangix tüg'óciy Dios ytiy'ajt ma mdzinaayin. Jotcujc'ajtcix. Chinaaygix müid tú'ciy mjot mhuinmañ. Naymüid'ljtigixy agujc jotcujc. Huen ajcxy Dios xymüid'ljtcixy. Je Dios huidibi jotcujc'ajtin yejcp, e nañ jadu'n Dios xychojctääygixipy xyjihuidääygixipy. ¹² Naygapxpóocxigix xic xon. ¹³ Tüg'óciy Dios yjäy huidibi ya, yquejxyp ajcxy capxpóocxin ma miich ajcxy.

¹⁴ Huen ajt nHuindzin Jesucristo may'ajt oy'ajt tunipy müid miich ajcxy ycixpi. Huen Dios xychojccixy xyjihuiygixy. Huen Dios yjihuiñ ymic'ajt ity ma nidüg'óciy miich ajcxy mjot mhuinmañ. Jadu'n ngapxycixyich. Amén.

GÁLATAS

Yi Necy Huidibi Pablo Yajniguejx Je Mibijcpidijc Jim Gálatas

¹ Hich Pablo, Jesucristo xyquejxich co ngapxhuäcxibyich yi' y'ayuc. Ca' nmínaaním jáy ajcxy xyajñibicyich jada tung. Jesucristo etz Dios Teedy ajcxy ti xyajñibicyich jada tung. Je' je' je Dios huidibi yajjugypijc Jesucristo co y'o'cy. ² Hich etz tüg'óciy migügtijc ajcxy huidibi ya yajpatp ma ñich nyajniguejxpich jada necy ma nidüg'óciy pinjaty mijpidacp Jesucristo, huidijaty naymujcip ma nidüg nidüg cajp jim Gálatas naaxjot. ³ Nmibijctzooybich Dios Teedy etz ñich ajt nHuindzin Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugihuij ajcxy. ⁴ Hich ajt nHuindzin Jesucristo ti nayyoxyii ti naydogyii ci'm anajty ma yi o'cin mñid ñich ajt nbocy ycixpi. E jadu'n ti xyñihuaaním ma je jáy ajcxy huidibi jibic huinma'ñ ymñid huidibi tzinaayb ajcxy ma jadachambi xii tiempo. Jadu'n Jesucristo tuñ mñid ñich ajt ycixpi, com ñich ajt nDios Teedy jadu'n tzojcp. ⁵ Ooy y'oyity co Dios Teedy huen mij etz cómay y'idipy huinixii huini'tiempo! Jadu'n jada. Amén.

Ca'p ji huingbi tiy'ajt huidibi jáy y'alma yajnñdzocp

⁶ Ooy ndzachhuinmaayich jadu'n nej tim tzojcy ti mjijpyöyducixy je Huindzin Dios ytiy'ajt. Dios xyhuin'ijxcixy jigix jébi nmibijccixy je oy'ajt je may'ajt huidibi Jesucristo ytuun mñid miich ajcxy ycixpi. E miich ajcxy ti mhuinma'ñ myajtigajtzcixy, e ti nmibijccixy huingbi jáy ajcxy y'ayuc, jadu'n nej ca' jébi m'alma nñdzocin padaangixy. ⁷ Ca' nmínaaním co ji jadügnax Dios ytiy'ajt. Hue' je'nijéjity jáy ajcxy ti xyajhuinma'ñyidigooygixy, ooy ajcxy yajtigadzaangixy je Dios y'ayuc ytiy'ajt nej Jesucristo xyajnñdzogaani ajcxy m'alma. ⁸ Co ixypy ñich, o co ixypy nidüg ñich ndiscípulo, o co ixypy tüg ángel huidibi tza-jpjtoty tzomb capxhuäcx ixypy ma miich ajcxy ayuc tiy'ajt tigachjaty huidibi ca' ñaybadyii mñid je tiy'ajt huidibi nyaj'ixpijc ajcxy oga'n'aty, ca' mgöbijccixipy yijadu'mbi ayuc huidibi ajcxy xyajnñdigoyaangixy xyajtüdigoyaangixy, Dios tzaachytunñb yi' ajcxy y'alma. ⁹ Ti jayijp nyajñimay, e cham jadüg'oc nìgapxpetyich, pen ji pinjaty capxhuäcxy ma miich ajcxy tiy'ajt tigachjatytypi, huidibi ca' ñaybadyii mñid je tiy'ajt je tiibi miich ajcxy m'ixpijccixy, copicy Dios chaachytunipy jada jáy mñid ypocy ycixpi huidibi xychachyajnñdigooygixp xychachyajtüdigooygixp.

¹⁰ Co jadu'n nmína'ñich, ¿nej mdijy co ndzocycich co jáy ajcxy xyjäygidägipy o co Dios xyjäygidägipy? ¿Nej ndzachyajjot'adaanich jáy ajcxy? Ca' huaad nduunñich huidibi jáy ajcxy chojcpy, yi' janchtiy ndumybich huidibi Dios chojcpy. Co ixypy nduunñich huidibi jáy ajcxy yjäygidacpy, ca' ixypy nguyduunñich Cristo ytiy'ajt.

Nej Pablo oy paady je apóstol'at

¹¹ Paady ndzocycich migügtijc co mnejhuñhuij ajcxy jada co je Dios y'ayuc ytiy'ajt huidibi ngapxyhuäcxpich anajty ma miich ajcxy jadu'n nej jébi ajcxy m'alma nñdzögipy, ca' yi' ayuc'adyii tiy'ajt'adyii huidibi jáy ci'm ti cojicy ti maacxcixy. ¹² Com je Dios y'ayuc ytiy'ajt huidibi nmñidich, ca'

ti nbaadyich ma jäy ajcxy, nañ ca' nminaanim jäy ajcxy ti xyaj'ixpicyich. Jesucristo ci'm ti xyajhuinjhuüyich jada tiy'ajt.

¹³ Com miich ajcxy mnejhuüygixp jadu'n nej jecy'ajty ich ti ndzinäyich, co ich anajty nmijpidägyich yi judíojäy ajcxy ycostumbre. E mnejhuüygixp jadu'n nej jecy'ajty n'ixhuidijtyich nbahuidijtyich mictägy je jäy ajcxy nidüg'óciy huidijaty anajty mijpidaaccixp Dios ytiy'ajt. ¹⁴ Nigi ich anajty n'ixpicyidyich ma yi judíojäy ajcxy y'ixpjcín ca'ydi jac pinjaty judíojäy, ca'ydi jac pinjaty nmigügtjicich huidibi tügnax yjimjt müd ich. Com ooy anajty nigi ndzachmijpidägyich n'ap ndeedyich y'ayuc. ¹⁵ E Dios xyhuin'ijxich jayijpni ca'ni anajty ma'xung'atyñich co ndúnibich yi' ytung. Müd co Dios ooy ti xychocyich ti xyjhuüyich, paady xyhuooyich müd ytung ycixpi. ¹⁶ Dios xyajnejhuüyich yi y'ung y'ayuc ytiy'ajt, jigix ngapxhuäcxibich yi' y'ayuc ma yi jäy ajcxy ca'pi yjudíojäyity ajcxy. Ca' pinjaty n'ixtaayich huidibi jébi xyaj'ixpicyich Dios ytiy'ajt, hue' Dios ci'm xyaj'ixpicyich yi' ytiy'ajt. ¹⁷ Nañ jadu'n ni ca' nbättigüyich jim Jerusalén ma yajpaady y'apóstoles ajcxy huidibi anajty ajcxy Dios ti yhuin'ixyii. Chi tiy'ni nnicxyich jim Arabia ñaaxjot. Co ich jim hueeni n'ijtyich, chi nhuimbijtyich jim Damasco.

¹⁸ Cooni tugüg jimjt nhuäcxijpyich huin'itni nbättigüyich jim Jerusalén. Chi n'oyich ma Pedro anajty yajpaady, e chi jim nmüd'ijtyich jéyi majmoxc xii. ¹⁹ E ca' nminaybaattich yi jacjadyii apóstoles. Jéyi ich müd naybaati je Jacobo, je Huindzin Jesús y'uch. ²⁰ Je huidibi cham ich miich ajcxy nijajjayüygixp, tiy'ajt yi'. Y'ijxyp ñejhuüyb Dios co ca' n'indägyich.

²¹ Co ndzooñich Jerusalén, chi nnicxyich Siria naaxjot etz jim Cilicia naaxjot. ²² Je huin'it tiempo yi Cristo yjäy ajcxy huidibi nayoöymujcíp cajt cajt jim Judea naaxjot, ca' ajcxy anajty xy'ix'adyiijich huingíxy jipcixy. ²³ Jéyi ajcxy nejhuüy anajty co jäy chachmínaangixy: "Yi jäy huidibi anajty xychach'ixhuidijtim xychachpahuidijtim, cham yi' tzachcapxhuäcxxy je Cristo ytiy'ajt, je tiy'ajt huidibi anajty ytimyyajcödigoyamyb." ²⁴ Co je mibijcpidijc oy jadu'n tiy'ajt nejhuüyigixy, chi ajcxy yajnajxy Dioscojuyip ma Dios müd ich ycixpi.

2

Jacjadyii Jesús y'apóstoles ajcxy cöbijccixy yi Pablo

¹ Co majmactz jimjt, chi jadüg'oc nnicxyich jim Jerusalén quipxyi müd Bernabé. Nañ jadu'n Tito xypanicxyich. ² Dios jadu'n ti xyajnejhuüyich co copicy nícxibich jadüg'oc jim Jerusalén. Chi jim nyajmüdmíydacyich nijéjity jäy huidibi Jesús ti yhuin'ixyii ajcxy, je huidibi ajcxy nigohuajc'ajtp anajty je mibijcpidijc. (Ahuingujc ich ajcxy nxiicmujcy ngapx-mujcy, ca'ydi ymayjäy'agujcity.) Nyajmüdmíydaactaayich je Dios y'ayuc ytiy'ajt huidibi ngapxhuäcxypich ma yi jäy ajcxy ca'p yjudíojäyity. Jadu'n ngapxtícxxyich n'ayucich ndiy'ajtich, jigix ca'ydi ajcxy xycapx'aducyich, e ti anajty jadu'ñyi ñaadig'aty ich ndung huidibi jayijp ti nduüñich etz huidibi njactunaamybich anajty. ³ Je jäy ajcxy huidibi nigohuajc'ajtp anajty je mibijcpidijc jim Jerusalén yjäygidac ajcxy ich n'ayuc jadu'n nej ngapxtícxxyich, e nañ ni ca' ajcxy yminañ adzop co copicy yajtiy'ajttihuipy je Tito huidibi xypa'oyich jim, com griegojäy je' anajty, paady ca' yajtiy'ajttiy anajty. ⁴ Ca' ixxyip pin huaam ycaminañ jim Jerusalén co Tito ca' yajtiy'ajttiy, co ca' nijéjity mibijcpidijc ycatigüy ayüch ameech huidibi

ca' ymibijccixy cixyot huinjot Cristo ytiy'ajt. Hue' ajcxy amido'ijtcixy n'ayucich nej huaad xyjijpcogapxiygyixyich. Ca' ajcxy yjotcuicity co ngapxhuäcxyich co nmibijcim Jesucristo, e ca' copicy nguydunim judíojäy ycostumbre. Yi' ajcxy adzip xyajnihuidzaambich yi' judíojäy ycostumbre, jadu'n nej jäy codoogiyi' ajcxy adzip ytuungixy ma yhuindzin ytung. ⁵ Ni catügjaxigy ajcxy xycamimadacyich, e ni xycayaj'amoñ iich ajcxy, com hue' ndzocyich co huen Dios y'ayuc ytiy'ajt oybi ity huädz ma miich ajcxy ca' ma anii.

⁶ Yi apóstoles ajcxy huidibi Jesús ti yhuin'ijxigixy huidibi ajcxy nigohuajc'ajtp yi mibijcpidijc, ca' ajcxy ni ti tiy'ajt xyjacmöyich jemybi huidibi ca' jayijp nnejhuüyich. (Peni capxpaady ajcxy o peni ca' ycapxpaadyity, ca' nduufich cuendi. Com Dios ca' huin'ixpety jäy ajcxy tyduñ.) ⁷ Co oy ajcxy nejhuüy co Dios ti xyquexyich ngapxhuäcxyich yi' y'ayuc ytiy'ajt ma yi jäy ajcxy huidijaty ca' yjudíojäyity, tim jadu'n nej ti quexy Pedro co capxhuäcxi yi' y'ayuc ma yi judíojäy ajcxy, ca' iich yi' ajcxy anajty n'ayucich xyjijpcogapxiyich, ooy ajcxy jäygidacy yi' n'ayucich ndiy'ajtich. ⁸ Yi Dios huidibi Pedro quejx huen yi' y'ayuc capxhuäcxy ma yi judíojäy ajcxy, nañ jadu'n iich xyquejxich co yi' y'ayuc ngapxhuäcxiyich ma yi jäy ajcxy ca'p yjudíojäyity.

⁹ Je Jacobo, je Pedro etz Juan ajcxy, je huidi nigohuajc'ajtcixp yi mibijcpidijc, co ajcxy nejhuüy jadu'n nej anajty Dios may'ajt oy'ajt ti tuuñ müd iich, chi ajcxy xycöbicyich agujc jotcujc Bernabé etz iich. E chi iich ajcxy müd nay'ayuc-huinjihuüyiyi co jébi iich etz Bernabé nícxibich ma yi ca'p yjudíojäyity ajcxy, etz jébi yi Jacobo, Pedro etz Juan ajcxy ñicxcixy ma yi judíojäy ajcxy. ¹⁰ Jéyi ajcxy may'ajt pijctzoy ma iich etz Bernabé co jadu'n pa'ayo'n ndunipyich ma yi judíojäy ayoobitijc. E chi iich ngo'adzoy co ndunamybich jadu'n agujc jotcujc.

Pablo ogy yi Pedro jim Antioquía

¹¹ E jadu'n anajty müd ti n'ocnay'ayuc-huinjihuüyibich ixti coon Pedro ycidacy jim Antioquía. Chi jim nnimaayich huinjijp co ti anajty jim Dios ytiy'ajt midundigooyi co puhuäctuatni je huidibi ca' yjudíojäyity, ca' y'ocmüdcaymujcni. ¹² Com co ca'ni anajty ymiñ jim Antioquía je judíojäy ajcxy huidibi anajty tzomb ma Jacobo jim Jerusalén, chi Pedro müdcaymujcni je jäy ajcxy ca'p judíojäyity. Co ajcxy ymiñ chooñ Jerusalén, chi Pedro oy puhuäctuatni je huidibi ca'p yjudíojäyity, ca' y'ocmüdcaymugaani anajty. Com Pedro tzigüyb anajty co ñi'ojihuüyb je judíojäy huidibi minamb co ooy ycopicyity yajtiy'ajttihuüpy tüg'óciy jäy ajcxy huidibi mibijccixp Jesucristo. ¹³ Co Pedro jadu'n oy y'idich, chi je jacjadyii judíojäy ajcxy huidi anajty jimip nañ tim jadu'n oy y'idütcixy. Oy ajcxy janejhuüy tiy'ajt, e huädz cuydungixy. Ixti Bernabé nañ jadu'n y'idüch nej Pedro, com ca' anajty yjotmücity. ¹⁴ E co iich jadu'n oy n'ixyich co ca' ajcxy cuydungixy yajxon Jesucristo ytiy'ajt, chi iich nnimaayich Pedro mayjäy'agujc: “Peni miich judíojäy, e ti m'ixmajtzní judíojäy ycostumbre co ti mibicy Jesucristo, e ti m'occuydumyib je huinmañ huidibi judíojäy ca' cuydungixy, ¿nej tijy cham co adzip mdzachminaandägy co yi' ajcxy huidibi ca'p yjudíojäyity, copicy cuydúngxipy judíojäy ycostumbre, huidijaty miich ti m'ixmajtzní?”

Yi judíojäy ajcxy quipxyjaty müd jacpinjaty

15 Jadu'n njacnimaayich Pedro: "Iich etz miich judíojäy #ch ajt, huídibi ndaj'ajtm ndeedy'ajtm nañ judíojäy. E ca' #ch ajt njadu'nity nej jäy ajcxy ca'pi yjudíojäyity, huídibi ca' cuydungixy Dios ycötujcin je jecyip huídibi Moisés yjayhui'm. 16 Miich Pedro #ch ajt nnejhuüyim co jäy ajcxy ca' jëbi Dios yajpocyñihuächyii müid tim jëyi co ajcxy cuydungixy Dios ycötujcin je jecyip huídibi Moisés yjayhui'm. Co yi jäy ajcxy mibijccixy Jesucristo, huin'it janchtiy Dios yajpocyñihuaätz#yb ajcxy. Nañ tim jadu'n #ch ajt, ti nmibijcim je Cristo jigix jëbi Dios xyajpocyñihuaatzim. E ca' jëbi huaad Dios xyajpocyñihuaatzim ajt müid tim jëyi co ti nguyduunim Dios ycötujcin je jecyip. Ca' ni tüg jäy huídijaty jëbi Dios yajpocynihuaächyii, müid tim jëyi co cuyduuni Dios ycötujcin je jecyip."

17 Co ajt nhuinma'ñ nbidaacim co nmibijcim Cristo jigix Dios jëbi xyajpocyñihuaatzim, huin'it je judíojäy ymínaangixy co jibic-huinma'ñ nyajtuunim co ca' njaccuyduunim yi' ajcxy ycostumbre. ¿Nej mdijy je Cristo xyajtundigooyim jadu'n nej judíojäy ymínaangixy? Ca' yjadu'nity. Ca' jëbi huaad je Cristo xyajtundigooyim. 18 Co ixypy nmijpidaacim jadüg'oc Dios ycötujcin je jecyip, je huídibi ti n'ixmajtzim, jada ixypy ijxpejt'ajtp co ndundigooyim ma Cristo ytiy'ajt. 19 Jecy'ajty co nguyduunich anajty Dios ycötujcin je jecyip, huin'it ca' anajty nbaadyich tiy'ajt nej jëbi huaad Dios xyajpocyñihuaachich, e jadu'n nipaady nej jihuiy ti n'ögyich. Paady ycixpi ti n'ixmachich je jecyip cötujcin, e ti nmijpidägyich Jesucristo ytiy'ajt jigix jëbi njactzinäyich müid Dios ycixpi. 20 Jadu'n nayjihuiyijich jadu'n nej jihuiy ti n'oc'o'cpich, jadu'n nej jihuiy ti ngruudzpetyich quipxyi müid Cristo. Jadachambi ca' n'octzinaayñich müid ngi'm jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma #ch njugy'ajtin. E jadu'n nej cham njactzinäyich müid #ch nninix, jactzinaaybich müid Dios y'ung ycixpi, nmijpidacypich Dios y'ung. Dios y'ung ti xychocyich ti xyjihuiyich, e ti nayyoxyii naydogyii ma yi o'cin müid #ch nbocy ycixpi. 21 Ca' nniyajtigoya'ñich je may'ajtin je oy'ajtin huídibi Dios ti tuuñ müid #ch ycixpi. Co ixypy jëbi Dios xyajpocyñihuaatzim müid co ajt nguydunim Dios ycötujcin jëyi, huin'it ixypy ti ñaadig'aty je Cristo co y'o'cy müid ajt nbocy ycixpi.

3

Je ycötucin huídibi Moisés yejc o je mibijcin

1 Janch loci miich ajcxy migügtijc huídibi tzinaayb jim Gálatas naaxjot. Ti jäy ajcxy xyajhuinma'ñyidigoogyixy müid jibic-huinma'ñ. Paady ycixp mdzach'ixmadzaangixy je Dios ytiy'ajt. Iich oy njacapxhuächyich ma miich ajcxy mhuinduu je tiy'ajt jadu'n nej Cristo yajcruudzpejti müid #ch ajt nbocy ycixpi. 2 Yi' nyaj'amidooyb: ¿Nej ti mbaatcixy Dios yjihui'ñ ymic'ajt müid co mdzachcuyduuni Dios ycötujcin je jecyip? o ¿Nej ti mbaatcixy Dios yjihui'ñ ymic'ajt müid co ti mmidoogyixy Jesucristo y'ayuc e ti mmibijccixy? Hue' janchtiy ti mbaatcixy Dios yjihui'ñ ymic'ajt co ti mmibijccixy Jesucristo, ca' nmínaanim co ti nguydungixy Dios ycötujcin je jecyip. 3 Co Dios oga'n yjihui'ñ xy'adigiygixy xyjottigiygixy, chi nguychinaaygixy Jesucristo ytiy'ajt nej Dios yjihui'ñ xyhuinma'ñymoogyixy. ¿Nej co cham miich ajcxy mloci huinma'ñ mdzachtungixy? Jadachambi jadüg'oc mdzachtunaangixy ngi'mhuinma'ñ. 4 ¿Nej naadig'ixpi miich ajcxy tzaachypi ti mminajxcixy ti myajnajxcixy müid Cristo ytiy'ajt ycixpi? Janch naadigi' jadu'n tzaachypi ti mminajxcixy ti myajnajxcixy, pen janch

tüccäyî ti m'ixmâjtzcxîni Cristo ytiy'ajt. ⁵ Jada nyaj'amidoogixyp: ¿Nej ti Dios yjihui'ñ ymic'ajt xy'adigiiygixy xyjottigiiygixy etz tuñ mîjhuinma'ñ ma miich ajcxy miid co ti mguydungixy Dios ycötujcin je jecyîp? Ca' yjadu'nity. Hue' Dios xy'adigiiygixy xyjottigiiygixy etz tuñ mîjhuinma'ñ miid miich ajcxy miid co ti mmidoogixy Jesucristo ytiy'ajt etz ti mmibijccixy.

⁶ Jadu'n ymiñ cojay ma Dios ñecy co Abraham mibijcy Dios, e co yî mijpidacy Dios y'ayuc jadu'n nipaady nej jihuiy Dios yhuinmecxi ypocy, jigix jêbi y'ity tudägy ma Dios yhuinduu. ⁷ Jadu'n yjajty miid Abraham. Je' ymibijc Dios, e yajpocyñihuaatzî Dios, jêbi ñaydiyîi tudägy jäy ma Dios yhuinduu. ⁸ Dios jecy'ajty yajnihuinmayîy co yajpocyñihuaadza'ñ je jäy ajcxy huïdibi ca' yjudíojäyity, jêbi ajcxy ñaydiyîi tudägy jäy ma Dios yhuinduu, miid co ajcxy mijpidägipy je may'ajt huïdibi Dios ytunamyb miid yî' ajcxy ycixpi. Paady ycixpi jaaybety ymiñ ma Dios ñecy co jadu'n Dios miidmiydac Abraham jecy'ajty co yî huïdibi ca' yjudíojäyity ypaadipy ajcxy y'alma nîdzocin, com jadu'n Dios yminañ: "Miid miich tûg m'ap m'oc may'ajt oy'ajt nduna'ñich miid naaxhuiñyây ajcxy ycixpi." ⁹ Paady ycixpi jadu'n nej jäy ajcxy tûg'ócîy pinjaty mibijcp Dios, Dios may'ajt tunamb miid yî' ajcxy ycixpi co mibijccixy, tim jadu'n nej may'ajt tuun miid Abraham.

¹⁰ Dios chaachytunamy jäy ajcxy miid ypocy ycixpi, pinjaty huinma'ñ tzachpidacp co y'alma nîdzocin padaangixy miid co cuydungixy Dios ycötujcin je jecyîp. Com jadu'n jaybety ymiñ ma Dios ñecy: "Dios chaachytunamyb jäy ajcxy miid ypocy ycixpi, pinjaty ca' mijpidägy tûg'ócîy Dios ycötujcin, etz nañ jadu'n pinjaty ca' cuydundäy jada cötujcin."

¹¹ Jadachambi miid je ayuc huïdibi ti nyajnijayiiygixy ma jada necy, jêbi miich ajcxy mnejhuihuip co ca' ni pin jäy jêbi Dios yajpocyñihuaächyîi miid huïdijaty ti tungixy co cuydungixy Dios ycötujcin je jecyîp. Com jadu'n ymiñ jaybety ma Dios ñecy ma Dios jadu'n yminañ: "Yî jäy ajcxy pinjaty mibigip iich n'ayuc, yî' ajcxy nyajpocyñihuaadzaamybich jêbi ajcxy y'alma paadip nîdzocin." ¹² Dios ca' jadu'n ymina'ñ ma yî' ycötujcin huïdibi Moisés yjayhui'm co jêbi nmijpidaacim, e huin'it Dios xyajpocyñihuaatzim. Hue' je' ymina'ñ ma ycötujcin co jêbi xychaachytunim miid ajt nbocy ycixpi. Com jadu'n ymiñ jaybety ma Dios ñecy: "Yî jäy ajcxy pinjaty cuydumb Dios ycötujcin huïdibi Moisés ycojay, copicy cuydundähuip, ni ma ycatundigoyîpy."

¹³ Cristo xyñihuaanim xyyajtzoocim ma anajty Dios xychaachytunanim miid co ca' nguydundaayim Dios ycötujcin je jecyîp. Cristo ci'm ti yajnicxy je tzaachypi huïdibi Dios ajt xymöhuaanim anajty. Com jadu'n jaybety ymiñ ma Dios ñecy: "Pinjaty anajty yajmijxotzpejtp ma tûg cruudz, hue' anajty je' yco'ayooyb ypocy tiibi tuñ." ¹⁴ Cristo o'c je' miid iich ajt nbocy ycixpi, jigix Dios jêbi cuyduñ yî' y'ayuc jadu'n nej yaj'ahuanîy Abraham jecy'ajty, co may'ajt tuna'ñ miid yî' jäy ajcxy ycixpi huïdibi ca' p yjudíojäyity, etz nañ jadu'n may'ajt tuna'ñ miid iich ajt ycixpi, jigix jêbi iich ajt nbaatim je Dios yjihui'ñ co nmibijcim je Cristo.

Je cötujcin huïdibi Moisés yejc etz huïdibi Dios y'ahuanîy

¹⁵ Migügtijc ajcxy, ngapxtîcxaamybich jadu'n nej Dios ti tuñ miid tûg ijxpejt nej jäy ajcxy ytuñ. Co ixypy tûg jäy necy yajcojtäy je necy, e chi firmijîy, e nañ jadu'n je testigo ajcxy yfirmijîy, huin'it ca' huaad pinjaty nixîgy yajxîgy

jada tiy'ajt, e nañ jadu'n ni ca' huaad yaj'ung'iy. ¹⁶ Cuenditungixy Dios y'ayuc ytiy'ajt, Dios ma yi' y'ayuc yaj'ahuaniiy Abraham etz tüg yi' y'ap y'oc co may'ajt tunañ müid yi' ajcxy jëyi. Ca' nminaanim Dios y'ayuc yminañ co Dios yaj'ahuaniiy Abraham co may'ajt tunañ müid tüg'óciy yi' y'ap y'oc. Hue' je'Dios y'ayuc yminañ co may'ajt tunañ müid tügpajc yi' y'ap y'oc, je' je' je Cristo. ¹⁷ Dios ca' yi' nixig'y yajxig'y ytiy'ajt huidibi jayijp ymoy Abraham co yajnigüe'jxy ycötujcin yi' Moisés. Co Abraham y'o'cy, ti anajty ñajtzniñicxiiyñi midaax migo'px ja'iipxmajc jimijt, chiini oy Dios möy Moisés yi' ycötujcin. Tim jadu'n nej ca' huaad yajtigach je jäy ñecy ma nigapxy jadu'n nej ypidägy yajhui'mañ, nañ tim jadu'n ca' huaad Dios yajtigach y'ayuc huidi yajnimay Abraham jadu'n nej may'ajt tunañ müid naaxhuiñyäjy ajcxy ycixpi. ¹⁸ Dios y'ahuaniiy yi' ytiy'ajt ma Abraham jecy'ajty co may'ajt tunañ müid yi' y'ap y'oc ycixpi etz müid tüg'óciy naaxhuiñyäjy ajcxy ycixpi. Co ixypy jëbi jäy padaangixy y'alma ñidzoocin müid huidibi ajcxy ytumyb co ajcxy cuyduuni Dios ycötujcin je jecyip, ca' ixypy may'ajt ti tuñ co ti quexy je Cristo ya naaxhuiñ co jäy yajnihuädzip.

¹⁹ ¿Ti ycixpi Dios co moy Moisés je cötujcin huidibi ycojay? Hue' je' Dios moy jada cötujcin jigix jëbi niguëxig'y co jäy ajcxy ca' ycapxymidoogixy. Tunamb anajty Dios ycötujcin huidibi Moisés ycojay mabaad ti quexy ya naaxhuiñ yi' y'ung, je' je' je Cristo, je Abraham y'ap y'oc huidibi yajpocyñihuätzp jäy ajcxy. Dios ycötujcin hue je' yajnigüe'jx Moisés müid ángeles ajcxy. E chi Moisés capxnajxy ma ymügü'tijc ajcxy. ²⁰ Co Dios ti quexy yi' oybi y'ayuc ya naaxhuiñ müid y'ung, paady ycixpi Dios ca' tzocy co huingbi capxnaxipy yi' y'ayuc. Dios etz Dios y'ung tú'ciy yi'.

Tigixpi Dios je Moisés cötujcin yejc

²¹ ¿Nej mdijy ca' ñaybadyii yi' Dios ycötujcin huidibi Moisés ycojay, müid je ayuc huidibi Dios yajnimay Abraham? Naybaatip ajcxy y'ayuc. Co ixypy cayejcy Dios cötujcin ma jëbi jäy ajcxy y'alma ñidzoocin padaangixy, huin'it ixypy jëbi nbocyñihuaatzim co ixypy nguyduunim yajxon jada cötujcin. ²² Ca' yjanchity co jëbi Dios xyajpocyñihuaatzim müid co tijaty nduunim. Com ma Dios y'ayuc ymiñ cojay co nidüg'óciy jäy ajcxy ti ytundigooy, ac pocy ymiid ajcxy. Jadu'n Dios y'ayuc yminañ, jigix jëbi Dios yajpocyñihuaäch tüg'óciy pinjaty mijpidacp Jesucristo, jadu'n nej yajnimay Abraham jecy'ajty co jadu'n tunañ.

²³ Ca'ni anajty Cristo ymiñ ya naaxhuiñ, huin'it anajty Dios ycötujcin ytuñ, yajpocycäy jäy ajcxy, e ca' Dios yajcomidooy jäy ajcxy ypocy. Jadu'n nej jihuiy jäy ixypy ypujxtijc'iñaaygixy e ahuijxcixy mina je juez ytiydunáanigixy. Jadu'n anajty n'ijtim jadu'n nej jihuiy nbujxtijc'iñaayim, ixti cooni Jesucristo ymiñ ya naaxhuiñ yajpocyñihuaatzp. ²⁴ Jadu'n anajty Dios cuend'aty yi' judío'jäy anajty müid ycötujcin huidibi Moisés ycojay. Tim jadu'n nej jäy cuend'aty huingjäy y'ung. Jadu'n anajty Dios cuend'aty judío jäy ajcxy ixti cooni Jesucristo ymiñ ya naaxhuiñ jëbi yajpocyñihuaäch jäy ajcxy. ²⁵ Jadachambi co Jesucristo ti y'oy ya naaxhuiñ, e ti nmibijcim (tzojcingix) yi' ytiy'ajt, paady ycixpi cham ca' n'oc'ijtim cuend'aty müid Dios ycötujcin huidibi Moisés ycojay.

²⁶ Com miich ajcxy ti mmijpidaaccixy Jesucristo ytiy'ajt, paady ycixp jëbi nidüg'óciy miich ajcxy naydijigixy Dios y'ung. ²⁷ Tüg'óciy miich ajcxy huidijaty ti mnübejtciy, ti mnübejtciy jigix jëbi mdügmu'jccixy

m̄id Cristo, jadachambi n̄iducy m'ijtcixy m̄id Cristo. ²⁸ Nidüg'óc̄iy miich ajcxy ti mgöb̄ijccixy Jesucristo jadu'n nej ajcxy mHuindz̄in. Jadu'n miich ajcxy judíōj̄y etz nañ jadu'n ca'pi yjudíōj̄ȳity, nañ jadu'n miich ajcxy midumbid̄ijc etz miich ajcxy huidibi ci'm nay'ane'm̄ip, miich ajcxy ȳeyd̄ijct̄ijc etz miich ajcxy töxyj̄äyd̄ijc; tú'ciy miich ajcxy myajpattaaygixy ma mHuindz̄in Jesucristo. ²⁹ Huenp̄inity miich ajcxy co mm̄ijp̄idaaccixy Jesucristo, huin'it j̄ebi ajcxy mnayd̄ij̄iyb Abraham y'ap y'oc, e huin'it j̄ebi mb̄aat̄cix̄ipy t̄zinaydac j̄iiby tzajp̄joty, je huidibi Dios yaj'ahuan̄iy Abraham, Abraham y'ung y'anäg etz Abraham y'ap y'oc.

4

¹⁻² Cha jadüḡ ijxpejt̄ nyaj̄n̄im̄äyich miich ajcxy huidibi capxt̄icxp̄ Dios yt̄iy'ajt. Tüḡ comeeñȳj̄y ymang hue' anajty mutz̄ni pi'cni je' anajty j̄edaan̄ip yteedy ypid̄ägy. E chi yteedy tüḡ j̄y yaj̄n̄ibicy huidibi j̄ebi cuend'aty je pid̄ägy etz je pi'c'anäḡ mabaad paady je tiempo m̄ina ȳc̄id̄iḡihūigy je pid̄ägy. Je comeeñȳj̄y y'ung com co anajty ca'ni yeegy, ane'my anajty y'ity, tim jadu'n nej ane'my y'ity je j̄y huidibi midumb. ³ Tim jadu'n nej je comeeñȳj̄y y'ung anajty y'ity ane'my, nañ tim jadu'n iich yi judíōj̄y ajcxy ane'my anajty n'ijtcixyich co anajty ca' tiydudägy nayd̄ij̄iygixyich Dios y'ung. ⁴⁻⁵ Co oy Dios yajhuaad'ajtni, chi oy quejx̄ni y'ung ya naaxhuiñ. Yi' y'ung ma'xung'ajt̄ judíōj̄y, jigix̄ j̄ebi codin̄äy j̄y ajcxy ma Dios ȳc̄ötujctac. Nañ jadu'n yi' ma'xung'ajt̄ judíōj̄y jigix̄ j̄ebi yajpocyñ̄ihuäch̄ yi j̄y ajcxy huidibi ti yajpocyc̄ahūigixy Dios ȳc̄ötujc̄in huidibi Moisés ycoj̄ay. Dios ti quexy y'ung jigix̄ j̄ebi xycodinaayim m̄id̄ ajt̄ nbocy ȳc̄ixpi, e jadu'n Dios j̄ebi xycöb̄ij̄ci jadu'n nej j̄ihūȳ xyci'm'ung'ajtm̄.

⁶ Jadachambi m̄id̄ co nayd̄ij̄im̄ Dios y'ung, paady ȳc̄ixp̄ Dios ti xy'adiḡiyim̄ ti xyjottiḡiyim̄ yi' ȳj̄ihuiñ̄ ymic'ajt̄, paady ȳc̄ixp̄ ajt̄ m̄inaanim̄ co Dios ajt̄ nDeedy'ajtm̄ etz nm̄inaanim̄: “¡Padre Nuestro!” ⁷ M̄id̄ co miich ajcxy ti mm̄ib̄ijccixy Jesucristo, jadachambi ca' ane'my m'oc'ijtcixyñ̄i ma Dios ȳc̄ötujc̄in je jecȳip, jadu'n nej je j̄y ytumbid̄ijc m̄id̄ity ane'my. Paady ȳc̄ixp̄ j̄ebi Dios xymóoygix̄ipy jugy'ajtn̄ huidibi ca' ȳc̄ix̄ipy yt̄igoȳipy, jadu'n nej Dios m̄id̄ity jugy'ajtn̄. Jadachambi miich ajcxy Dios xy'ung'ajt̄, etz j̄ebi mb̄aat̄cix̄ipy pid̄ägy ma Dios.

Pablo yjotmaybaady m̄id̄ je mib̄ijcp̄id̄ijc ȳc̄ixpi

⁸ Jecy'ajty ca' anajty mnejhūiygixy Dios yt̄iy'ajt̄ tiydudägy, ooy anajty m'ojadajtcixy oyñ̄iti huidibi ca' ymic'ajt̄ m̄id̄ity. E ca' anajty m'ojadajtcixy je Dios tzajp̄jotyp huidibi mic'ajt̄ m̄id̄ity. ⁹ Jadachambi ti mnejhūiygixy Dios yt̄iy'ajt̄ etz Dios ti xycöb̄ijccixy. ¿Nej co jadüg'oc̄ mdzachnihuimbidaangixy yi judíōj̄y ȳc̄ötujc̄in, ca'p̄ ti mic'ajt̄ m̄id̄ity, huidibi ti m'ijxmajtcixy? E jadüg'oc̄ xy'ane'mygixy je judíōj̄y ȳc̄ötujc̄in. ¹⁰ Jadachambi mdzachcuydunaangixy judíōj̄y ȳcostumbre, jadu'n nej ajcxy myajm̄ij'ajtcixy xīibo' xīij̄im̄ij̄t. ¹¹ Huinmaaybich ooy m̄id̄ miich ajcxy ȳc̄ixpi co naadiḡī ti nyaj'ix̄p̄icyich miich ajcxy. Ninigoob̄ ayoohuañ̄ iich ndunḡ ma miich ajcxy.

¹² Migǖgt̄ijc̄ ajcxy, cham may'ajt̄ nb̄ijctzooyich ma miich ajcxy. Yajt̄üḡiygix̄ yi mhuinmañ̄ jadu'n nej iich̄ n̄huinmañ̄. Iich̄ ti nyajt̄üḡiyich̄ n̄huinmañ̄ m̄id̄ miich ajcxy mhuinmañ̄ co ti n'ixmachich̄ yi judíōj̄y ȳcostumbre. Je taab̄ anajty n'ityich̄ m̄id̄ miich ajcxy, ca' miich anajty

ajcxý ðch n'ayuc xyjijpcogapxiiyi. ¹³ Miich ajcxý mnejhuuðyb co anajty n'ityich ma miich ajcxý, pumäy ðch anajty nyajpaady müd yuu pa'm ycixpi, paady ycixp ðch jim jecy nhuäcxijpyich, ngapxhuäcxýich Jesucristo ytiy'ajt je jayijp'aty. ¹⁴ Müd ðch nba'm ycixpi ooy n'adzijpy miich ajcxý ma mjiin mdijc, e miich ajcxý ca' ti xy'ixtijy e ni ca' müch ajcxý xymidzijpich. Jadu'n ðch miich ajcxý xycöbijcy agujc jotcuyc, tim jadu'n nej ixypý ti mgöbijccixy Jesucristo ci'm. ¹⁵ Jadachambi ¿ti ti ytunyii ti yjadyii co ca' mmijotcuyc'ajtcixy ðch n'ayuc? Com nyejcich tiy'ajt co je taabi anajty oga'n jim n'ityich ma miich ajcxý co janch xypubedaambich miich ajcxý. Ixti mgi'm huiin anajty ajcxý mjayajpidzimaangixyp etz xymöhuaangixýich anajty co ðch ngaa'a'ixiy. ¹⁶ ¿Nej ðch ti n'ahuimbityich miich ajcxý mmidzip müd co ti nyajnimaaygixy huidibi janchip?

¹⁷ Yi huindzindijc jim ma miich ajcxý huidibi xychachyaj'ixpijccixp huidibi ca' ytiy'ajtity, ca' ajcxý oyhuinmañ müdity. Hue' ajcxý tzachtzocy co miich ajcxý m'ixmájtzcixip ðch n'ayuc ndiy'ajt. Hue' ajcxý tzachtzocy co miich ajcxý yi' mgömayipy. ¹⁸ Hch njajotcuycich jadu'n co huingbi huindzin ajcxý jëbi xyaj'ixpijccixy. Nigoobi co ixypý jëbi ajcxý m'oy'ajtin mbaatcixy. Ca' oy copicyti co ðch ci'm miich ajcxý nmüd'ijttihuiipy. ¹⁹ Migügtijc huidibi ooy ndzocy njihuüyich jadu'n nej jihuiy ngi'm'ung'ajtigixy, ooy tzaachypi ndzachjihuiyich müd miich ajcxý ycixpi jadüg'oc. Jadu'n tzaachypi njihuüyich jadu'n nej ungdaj tzaachypi jihuiy co y'ung yajma'xung'adañ. Njihuihuaamybich tzaachypi ixti cooni miich ajcxý anajty Cristo mhuinmañ xyaj'oyiiyi. ²⁰ Ooy ðch njanay'ixpadañyii ma miich ajcxý cham cham. Njamüdcapxaangixy njamüdmüydägaangixy, chi ixypý tiy'ajt njacyajnimaaygixy jac huädz. Ooy ðch ndajy nmayich müd miich ajcxý ycixpi, nej n'ocjacnimaaygixyipy.

Je Agar etz Sara y'ixpejt

²¹ Miich ajcxý huidibi mdzachcuydunamyb Dios ycötujcin je jecyip. Nmimaaygixy ajcxý, ¿nej ca'ni ajcxý midoogixy huidibi Dios ycötujcin nigapxyipi? ²² Com Dios y'ayuc huidibi jaybetyip jadu'n yminañ co Abraham ymüd anajty metz ymang. Tüg je'anajty ytaj'ajtip huidibi ypödumb'ajtpy. Je jadügpí ymang anajty ytaj'ajtip huidibi ytimyötöxijc'ajtpy. ²³ Je huidibi je pödumbi y'ung'ajti, hue' je' ypi'c'ajty jadu'n nej pi'ctijc jadyii yma'xung'ajtcixy. Je huidibi Abraham ytöxyijc y'ung'ajti Dios je' müd ymic'ajti ypi'c'ajty, Dios ycuyduun y'ayuc huidibi yajhuinhuaniy Abraham. ²⁴ Jada jihuibit ayuc jadu'n yhuimbizimyb: jada Abraham ytöxyjäy ajcxý metz iixpejt'ajtp jadu'n nej Dios ti ytuñ müd yi' yjäy. Je ypödumbi huidi anajty yxi Agar, yi' müd yquipxíy yi Dios ycötujcin huidibi Dios ymoy Moisés ma je cop huidi yxi Sinaí. E tüg'ócay jäy ajcxý huidibi cuyduungixp Dios ycötujcin huidibi Moisés ycojay, ane'my ajcxý je' yaj'idyii, tim jadu'n nej tüg comeeñyjäy ane'my yaj'ity yi' ytumbi ajcxý. ²⁵ Agar yi' nigix'ajtp je cop Sinaí jim Arabia ñaaxjot ma Dios moy Moisés je cötujcin. Agar je töxyjäy huidibi anajty pödumb, je' müd yquipxíy yi judíojäy huidibi tzachcuyduungixp Moisés ycötujcin, etz nañ yquipxíy müd Dios y'it ya naaxhuiñ jim Jerusalén. Yi judíojäy etz y'ung y'anäg ajcxý huidibi tzach cuyduungixy Moisés ycötujcin je jecyip, ane'my ajcxý y'ity ma jada cötujcin, tim jadu'n nej jäy ajcxý huidibi tumb ma comeeñyjäy, e y'ane'my ajcxý y'ijtcixy. ²⁶ Je Sara huidibi Abraham

ytöxyijc'ajtpy, yi' m'iid yquixp'iy ñich ajt huudibi cuydumb je Cristo ytiy'ajt, e je Cristo yi' yajpatp tzajpjoty. ²⁷ Com jaybetyity ymiñ ma Dios ñecy co mayjäy paada'ñ oybi ma Dios, com Dios jadu'n ym'ina'ñ:

Jotcugi' jadüg'oc miich Sara huudibi ca' y'ungbaady. Xic yäx miich m'iid jotcujc'ajtin, miich huudibi ca' ungmoy. Nigi ymay'ihua'ñ miich m'ap m'oc ca'ydi Hagar y'ap y'oc.

²⁸ ñich ajt huudibi nmijpidaacim Jesucristo tüg'iyim m'iid Abraham ymang Isaac. Com jadu'n nej Dios cuyduuñ y'ayuc huudibi yajhuinhuan'iy Abraham co Isaac yma'xung'ajty, nañ tim jadu'n Dios cuyduuñ yi' y'ayuc m'iid ñich ajt co je Cristo y'oy ya naaxhuiñ. ²⁹ Tim jadu'n nej Abraham ymang Ismael jecy'ajty midzip'ajty Abraham ymang huudibi Dios yajhuinhuan'iyi Abraham; nañ tim jadu'n yi' jäy ajcxy huudibi tzachcuydungixp Dios ycötujcin je jecyip, ooy ajcxy tzach midzip'adyii yi' jäy ajcxy huudibi mibijcp Jesucristo. ³⁰ Oc-huinmay miich ajcxy nej jaybetyity ymiñ ma Dios ñecy co jadu'n Dios nimay Abraham:

Yajpidzim ma mdijc je mbödumbi m'iid ymang. Com ca' jadu'n ytiy'ajty co je pödumbi ymang paadipy miich mbidägy. Yi' je' padamb je mbidägy huudibi miich mdöxyijc ymang'ajtpy.

³¹ Migügtijc ajcxy, ca' ñich ajt n'ocjadu'niñ nej je pödumbi y'ung y'anäg ajcxy huudi ane'my ijtp. Jadu'n ñich ajt nipaady nej Abraham ytöxyijc y'ung y'anäg huudibi ca' y'ane'my y'ity.

5

Cristo ti xyajñihuaatzim ma je cötujcin huudibi Moisés yejc

¹ Je Cristo ti xyajpidzimim ma Dios ycötujcin je jecyip ma anajty n'ijtim y'ane'my, jigix jëbi tzojcingix nguyduunim yi' ytiy'ajt. Mibijccixy tiydudägy Cristo ytiy'ajt, ca' m'ixmajtzicxy. Ca' mni'ahuimbijtcixipy jadüg'oc Dios ycötujcin je jecyip ma anajty m'ijtcixy tim jadu'n nej comeñyäjy ytumbi ajcxy y'ijtcixy ane'my.

²⁻³ Amidoo'ijtcix ñich n'ayuc. Jadachambi ñich Pablo m'inaambich pen miich ajcxy mgöbigamyb jada ayuc co copicy myajty'ajtihiipy, huin'it ñaadiği'ada'ñ co mmibijccixy Jesucristo ytiy'ajt. Ca' Jesucristo may'ajt tuna'ñ m'iid miich ajcxy pen jadu'n m'ididza'ñ. Jadüg'oc nm'ina'ñich co pinjaty jadu'n ycuydunamyb tüg Dios ycötujcin, copicy ycuydundähiipy tüg'óciy. ⁴ Pen mjijp'ijxyp ajcxy co Dios xyajpocyñihuátzaangixy m'iid co mguyduungixy tüg Dios ycötujcin, jadu'n nipaady nej jihuüy ti m'ixmajtzicxni Cristo y'ayuc ytiy'ajt. Pen ca' mmijpidaaccixy je may'ajt oy'ajt huudibi Cristo ti tuñ ninigoob m'iid miich ajcxy ycipxi, huin'it ca' Dios xyajpocyñihuátzicixipy. ⁵ Njijp'ijxim co Dios xyajpocyñihuädzaanim jigix jëbi naydijim tudägy ma Dios yhuinduu m'iid co nmibijcim Cristo etz m'iid co je Espíritu Santo xypubejtim. ⁶ Co nmibijcim ajt Jesucristo, Jesucristo ca' cuendituñ pen ti nyajty'ajttiyim o pen ca'. Jëyi yi' tzocy co naychojcin nayjihuiyim nidüg nidüg, e jada je' je ijxpejt co nmibijcim yi' ytiy'ajt.

⁷ Jayijp'aty oy yajxon anajty m'ocuydungixp Jesucristo ytiy'ajt. ¿Pin ti xy'agapxiygyxy co ca' mgapxymidohuaangixy tiy'ajt? ⁸ Yi' jäy ajcxy huudibi ti xy'agapxiygyxy ca' ajcxy tiy'ajt patcixy ma je Dios huudibi ti xyhuin'ijxim jigix jëbi nmibijcim Cristo. ⁹ Miich ajcxy mnejhuuiyb co jäy pidaaccixy levadura ma harina jich je levadura yajtiyiydaayb je jich.

Nañ tim jadu'n jada anñ huidibi jáy ajcxy ti pidaaccixy ma miich ajcxy yajtigiydähuamyb miich ajcxy mjot mhuinma'ñ. ¹⁰ Com ñich nmibijcpich co ajt je nHuindzin Jesucristo oyhuinma'ñ xymöhuipy ajcxy, paady ycixp njijp'ijxypich co miich ajcxy mmibigaamyb ñich ngapxy ñich n'ayuc. Dios chaachytunipy je jáy ajcxy huidibi ti xyajhuinma'ñyidigoogyxy. Oy ooy yjamij yjanchity ajcxy, ca' ytimyñéjity, Dios yí' ajcxy tzaachytunib.

¹¹ Migügtijc ajcxy, co ixypy yjanchity co ñich ngapxhuäcxyich co copicy nidüg'óciy jáy yajtiy'ajttihuipy, ¿nej co je'ni chambaad judíojáy xychach'ixhuidityich xychachpahuidityich? Pen ca' ixypy xy'ixhuidityich xypahuidityich jadu'n nipaady nej jihuy nyaj'ixpicyich co je Cristo ca' y'o'cy miid ñich ajt nbocy ycixpi. ¹² Yí' huidi ajcxy xyajhuinma'ñyidigoogyxyp, ooy ixypy y'oyity co ixypy ajcxy xypuhuäctuatni tüccíi.

¹³ Dios miich ajcxy ti xymijhuoogyxy ma yí' ytiy'ajt jemybi jigix jébi m'ixmájtzcixni je Dios ycötujcin je jécyip, etz tzojcingix mijpidägipy Cristo ytiy'ajt. Dios ti ajcxy mdü'aa xy'ahuaatzi, per ca' huaad mdungixy je jibicpi huidibi mjot mhuinma'ñ chachñijot'ajtcixpy. Hue' a'oy naymi'oyjäy'ajtigix nidüg nidüg, naybubéjtigix miñ xyipy. ¹⁴ Dios y'ayuc ymína'ñ: “Mi'oyjäy'adipy mmijin mmidijc, tim jadu'n nej miich ajcxy mdzocy co mmijin mmidijc xymi'oyjäy'adipy.” Co jadu'n ajcxy mnaymi'oyjäy'adiyb miñ yxipy, ytimyñipaty jadu'n nej jihuy ti mguydundäy tüg'óciy je Dios ycötujcin. ¹⁵ Pen miich ajcxy mnaymidundigooyip etz mnaymijotma'tip miñ xyipy, ca' yjetyity co ci'm anajty jadu'n mdzachnayyajhuinma'ñyidigóogyixy miñ xyipy.

Je jugy'ajt huidibi yí' Espíritu Santo yejcpy

¹⁶ Jada capxhuijn ñich miich ajcxy nyajnijayñyb. Cuychinaaygix je Dios ytiy'ajt jadu'n nej je Espíritu Santo xyhuinma'ñymoogyxy ajcxy. Ca' mguyduungixy je jibic-huinma'ñ huidibi mdzachnijot'ajtcixyp ci'm. ¹⁷ Je jibic-huinma'ñ huidibi mdzachnijot'ajtcixyp, hue'ymidzip'ajtpy je oybi huinma'ñ huidibi je Espíritu Santo xymoogyxyp. Dios y'ayuc obyí ca' ñaygodigíyí miid miich ajcxy mjibic-huinma'ñ. Paady ycixp miich ajcxy ooy mjacuydunaangixy Dios y'ayuc, e ca' ajcxy mmimadäga'ñ ñicxy mguydundaaygixy. ¹⁸ Pen tzojcingix mguyduungixy je Cristo ytiy'ajt huidibi Dios yjihui'ñ xymooyb ajcxy, huin'it ca' copicy mguydüngixipy Dios ycötujcin je jécyip.

¹⁹ Com nnejhuíydaayim jadu'n nej jáy ajcxy yjot yhuinma'ñ tzachnijot'ajtcixy jibicpi. Jadu'n nej yéydijctijc tzachmigapxtigoyaangixy töxyjäydijc; e nañ jadu'n nej töxyjäydijc ajcxy ooy yéydijctijc tzachmiid'ügangixy etz miid'edzaangixy etz ma yjiibi ji ajcxy yhuinma'ñyidigoogyxy. ²⁰ E nañ nnejhuíyim jadu'n nej jáy ajcxy tzach'ojadajtcixy tzachhuingoxtinaaygixy je huidibi jáy ajcxy ci'm ti yajcojy, etz nej jáy ajcxy tzach'ojadajtcixy tzachyajtunaangixy caxpojcpidijc, nej jáy ajcxy ymigüg tzachmijotma'tcixy; nej jáy ajcxy ca' tzip yjot'ambijccixy miid yinjaty huenjaty ayuc; nej jáy ajcxy tzachmidzip'ajtcixy ymigügtijc; nej jáy ajcxy tzachyajca'oy'ijxcixy ymigüg co tijaty miidity; nej jáy ajcxy chachnaybijc-huäcxáanigixy, huidibi abicy tzachmiid'adamb yjáy. ²¹ E nañ nnejhuíyim jadu'n nej jáy ajcxy abijctigíhuaangixy tijaty ymigüg ymiid; nej jáy ajcxy ymigüg yaj'o'ccixy; nej jáy ajcxy nijot'ajtcixy ügii etz adzuuhuididii

agoodzhuididi, etz yi jäy ajcxy huídibi tzachnijot'ajtcixp yi jadu'mbi huinma'ñ. ðich miich ajcxy cham njacyajniimaaygixy jadu'n nej ðich jayjip'aty ti n'ocni gapxpich, co yi jäy ajcxy huídibi yi jadu'mbi jibic-huinma'ñ chachnijot'ajtcixp jadu'n nej cham ti nijayiygixy, ca' ajcxy tzinaydac paadaangixy ma Dios y'ane'my.

²² Hue' ajt jadachambi nejhuiydaayim je oybi huinma'ñ huídibi Espíritu Santo yejcy. Co yi jäy ajcxy huídibi ymüid Dios yjihu'iñ ymic'ajt ma yjot yhuinma'ñ, hue' ytungixyp ajcxy yi ojjäy'ajtin müid ymigügtjic; müid ajcxy xondaacin etz müid ajcxy jotcuje'ajtin; etz ymímecxtujcixyp ymigügtjic; etz chojccixyp yjihuiygixyp ymigügtjic; etz ytungixp oybi; etz tudägy yjäy'ajtcixyp, ²³ nicy xeemy yjäy'ajtcixy ma ymigügtjic; etz ci'm yajxon ñay'ané'migixy ma yi oybi. Ca' ji huingbi cötujcin huídibi jada oybi huinma'ñ jipcogapxihiy. ²⁴ Tüg'óciy jäy ajcxy pinjaty Jesucristo Huindzin'ajtp, mímadacy ajcxy yi jibic-huinma'ñ huídibi ci'm nijot'ajtcixyp müid Cristo ymic'ajt. ²⁵ Müid co nmüid'ajtim je Espíritu Santo ymic'ajt ma ajt ndzinaayin njugy'ajtin, paady ycixp tzoc tzinaayim jadu'n nej xy'ane'mim xyhuinma'ñymooyim je Espíritu Santo.

²⁶ Ca' huaad amij agix ndzachnayjihuiyim, etz nañ jadu'n ca' huaad nmigügtjic nyajjotma'tim; etz ca' huaad ni ti nyajca'oy'ixim.

6

Naybubéjtigixy miñ xyipy

¹ Migügtjic ajcxy, pen mbatpy tüg migüg huídibi jibic-huinma'ñ ti ymímadägyii, miich ajcxy huídibi mímadacy yi jibic-huinma'ñ müid Dios ymic'ajt mbubéjtcixipy jada migüg, e co mbubéjtcixipy jada migüg, niigi jotmic mmigapx müid oy gapxy oy ayuc. Naygüend'adii ajcxy ci'm, ca'ydi jibic-huinma'ñ xymímadaaccixy. ² Naybubéjtigix nidüg nidüg pinjaty ayo'n jotmay müid. Co jadu'n mdúngixipy, hue' anajty ajcxy mgyudungixyp Cristo ycötujcin huídibi ti xymooyim ajt.

³ Pen ji pin ñayjihuiyii amij agix etz chach naygömaya'ñyii ci'm co chach y'oyjäyity, ca' je' choobaady ma Dios yhuinduu. ⁴ Jébi nidüg nidüg jäy ñayjihui'ñybigyii nej chinäy yjugy'aty, pen oy o peni ca'y'oyity. Peni ycuchinaayb yajxon Dios ytiy'ajt oybi, jotcuje ñayjihuihiyib je' ci'm e ca' huaad jajquipxixy chinaayin müid huingbi. ⁵ Nidüg nidüg jäy ci'm chinaayin jébi yajnicxy nej Dios jäygidägy. Ca' huaad ni'ijxtüdy nej ymigüg jibic-huinma'ñ müidity.

⁶ Yi jäy ajcxy pinjaty ti ixpicy Dios y'ayuc ytiy'ajt, copicy co möhiyipy tijaty yajmayajtpy je huindzin tibi yaj'ixpyyii.

⁷ Ix ajcxy ci'm mnayhuin'ingix com Dios ca' yi' ni pin huaad niixigy yajxigy. Com pen miich ajcxy jibic-huinma'ñ mdumyb, Dios xychaachytunip ajcxy. Pinjaty oybi tuumb, nañ ypaadipy oybi, e pinjaty jibicpi tumb, nañ jibicpi ypaadipy. ⁸ Pinjaty jibic huinma'ñ tum jadu'n nej jibicpi tzachnijot'aty, co y'ögipy yi' y'alma ñicxip ayoodactuuby. Pinjaty cuydumb Dios ytiy'ajt jadu'n nej je Espíritu Santo huinma'ñ ymöyii, co y'ögipy yi' y'alma huingbi jugy'ajtin ypaadamyb huídibi nimina ycaacixy ycaatigooy huídibi je Espíritu Santo möhuib. ⁹ Peni nduunim jabom jabom oy huinma'ñ ca' huaad ndzjipim, jébi nmecxtujcin ixti cooni anajty nbaatim oybi ma Dios. E ca' huaad njotmetzciiyim. ¹⁰ Tzoc oojäy'ajtin tuunim ma nidüg'óciy jäy ajcxy, jadu'n nej Dios xyhuinma'ñymooyim. Niigi tzoc pubejtim nmigügtjic huídibi mibijcp mijpidacp Cristo.

Ane'min, capxhuijin etz capxpoocxin huudibi cijxnip je necy

¹¹ Ijxcix huindixcix jada letra mijjatypí huudibi ñich cí'm njaayb, com ndzojcpýich co mnejhuñyigixipy nej yam nijayñyigixy. ¹² Yi jáy ajcxy huudibi mibijcp co Cristo o'cy ma yi cruudz mñd ajt nbocy ycixpi etz nañ jadu'n mijpidacp yi tiy'ajttíhuñi, hue' ajcxy tzach ñaygömayaanigixy ma yi judíoñyáj ajcxy, jigix ca' pin y'ixhuudidíyib ypahuididíyib. ¹³ Yi huudi ajcxy tzach mijpidacp tiy'ajttíhuñi, nañ ni ca' ajcxy cuydundäy tüg'óciy jada Dios ycótujcin je jecyip. Hue' yi' ajcxy tzojccixy co miich ajcxy myajtiy'ajttíhuip jigix ajcxy jébi ñaygömáayigixy mñd co miich ajcxy ti myajtiy'ajttíyigixy. ¹⁴ Yi jáy ajcxy huudibi jim yaj'ixpijcp añi, cí'm ajcxy chach ñaygömayaanigixy. Per ñich ca' jadu'n naygömaya'ñyijich mñd huudibi ndumybich huudibi nyaj'ixpijcpýich. Hue' janchtiy ngapx-padaamybich ñich ajt nHuindzin Jesucristo ytiy'ajt, jadu'n nej yajcru-udzpejtí mñd ajt nbocy ycixpi. Co ti nmibicyich Cristo Jesús, huin'it ti n'ixmachich je naaxhuiñyáj yjibic-huinma'ñ. E paady cham ni nga'ocnijot'ajtnich yi jibic-huinma'ñ. ¹⁵ Co nmibijcin Jesucristo, oyixyipy ti nyajtiy'ajttíyim o oyixyipy ca' ti nyajtiy'ajttíyim, ca' ma choobaady. Huudibi tzoubatp yi' je' co nmibijcin Jesucristo, etz co nmñd'ajtm jemybi jot huinma'ñ. ¹⁶ Huen Dios xyajjotcugíhuipy etz xypa'ayoohuipy, etz nañ jadu'n yajjotcugíhuipy etz pa'ayoohuipy nidüg'óciy jáy huudijaty cuydumb Cristo ytiy'ajt, tüg'óciy Dios yjáy janchypi tiydudägpyi.

¹⁷ Jadu'n nej jadachambi, etz jadu'n nej xi tiempo jacmiimb jaccidaacp, ca' ñich pin huaad xyjac'amayiyich, com nmñdich je tiy'ajt ma nninixich jadu'n nej jáy ajcxy ti xyhueenduñich ti xychaachytuñich mñd co ti nduñich mñd Jesucristo ycixpi.

¹⁸ Migügtijc ajcxy, huen ñich ajt nHuindzin Jesucristo tunipy nigi may'ajt oy'ajt ma miich ajcxy. Jadu'n jada ngapxycixyich. Amén.

EFESIOS Yi Necy Huidibi San Pablo Yajniejx Je Mibijcpidijc Jim Efeso

¹ Hich Pablo, Dios jadu'n tzojcp co Jesucristo ti xyajniejxich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtip, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ² Huen ajt nDios Teedy etz ajt nHuindzin Jesucristo may'ajt oy'ajt tunipy mäd miich ajcxy etz xyajjotcugihuij ajcxy.

Nej je Espíritu Santo conucxy Cristo yjäy

³ Tzoc ñbaatim capxpaatim Dios ñich ajt nHuindzin Jesucristo yTeedy. Mäd co nyajpaatim ma Cristo, paady Dios ti xyconuucxim mäd tüg'óciy huidijaty tzomb tzajpjoty. ⁴ Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jëbi nyajpaatim ma Cristo, etz jigix jëbi nyajpaatim ma Dios yhuinduu huädz oy njot nhuinma'ñ, ca' ti bocy nmäd'ajtim. ⁵ Mäd co Dios ooy xychojxim xyjihuiyim, paady ycixp yi' capxcödujcy jecy'ajty, ca'ni anajty naaxhuiñybi yajcojy yaj'oyi, co xycöbigaanim nejjihuiy yci'm y'ung. Co Dios jadu'n quejxy je Cristo ya naaxhuingixy, chi yi' yaj'oyi nej jëbi xycöbixim nej yci'm y'ung, e jadu'n xymäd'adaanim tzajpjoty. Dios jadu'n ytuñ jadu'n nej yi' anajty tzocyin. ⁶ Tzoc ñbaatim capxpaatim Dios ooy mäd co mijmay'ajt mij'oy'ajt tuuñ mäd ñich ajt ycixpi, co quejxy y'ung ya naaxhuiñ mäd ñich ajt nbocy ycixpi, jigix jëbi nyajpaatim ma yi' y'ung, je' y'ung huidibi ooy tzocy jihuiy. ⁷ Mäd co Dios ooy xychojxim xyjihuiyim paady ycixpi yi' y'ung ñi'py teemy yojcy co y'o'cy mäd ajt nbocy ycixpi, ti ajt n'alma xyajniejzocim etz nbocy ajt ti xyhuinmeecxim. Co jadu'n ytuuñ, chi Dios mijmay'ajt mij'oy'ajt tuuñ mäd ñich ajt ycixpi. ⁸ Co Dios jadu'n mijmay'ajt mij'oy'ajt tuñ mäd ñich ajt ycixpi, ti xyajhuinjihuiyim ti xyajnejhuiyim yi yti'ajt yi yhuinma'ñ. ⁹ Dios yjäygidacpy jadu'n co ti xyajnejhuiyim nej anajty mädity capxcöducy huidibi ca' pin jecy'ajty huinjihuiy. Nañ jadu'n Dios ti xyajnejhuiyim nej ti yhuinma'ñypidacy jecy'ajty nej ytuna'ñ anajty mäd Cristo. ¹⁰ Je huidibi Dios jecy'ajty ti yajniehuinmayiy co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajniehuinmayiy anajty co pidäga'ñ tüg'óciy huidi yajpatp tzajpjoty etz tüg'óciy huidibi yajpatp ya naaxhuiñ ma tüg ane'min, e je Cristo je' ane'mamb nigohuajc'adamb tüg'óciy.

¹¹ Tüg'óciy tijaty tuni yjajti jilby tzajpjoty etz ya naaxhuiñ Dios jayijp capxcödujcy. Hich ajt huidibi nyajpaatim ma Cristo, Dios ti xyhuin'ijxim jecy'ajty co oga'n je naaxhuiñybi chondacy jigix jëbi nbaatim tüg'óciy huidibi Dios xymöhuaanim. E tüg'óciy jada nicxy yjaty tim jadu'n nej Dios jayijp capxcödujcy, e Dios ytumyby jadu'n nej yi' tzocy etz nej jäygidägy. ¹² Jadu'n Dios cuydumyby mäd ñich ajt ycixpi, huidibi jayijp ti nmibijcim ti nmijpidaacim Cristo, jigix jëbi nguydunim ma ajt ndzinaayin Dios yti'ajt, e jadu'n mayjäy capxpaadip etz ojadadip Dios mäd yi' ymij'ajtin etz yi' y'oy'ajtin ycixpi. ¹³ Nañ jadu'n miich ajcxy co mädooy je ayuc tiy'ajt nej jëbi m'alma ñidzögipy ajcxy, e ti mmibijccixy Cristo, huin'it ajcxy

myajpaatcixy ma yí', e je Dios yjihuí'ñ ymic'ajt huidibi miich ajcxy mñid ma mjot mhuinma'ñ, je' nidíy'ajt'ajtp co myajpaatcixy ma Dios. Jada je' je Espíritu Santo huidibi Dios y'ahuaníy jecy'ajty co xymöhuaanim. ¹⁴Jada Dios yjihuí'ñ ymic'ajt jada je' nidíy'ajt'ajtp co nbadanim it lugar ma Dios y'it. Dios xymöhuaanim it lugar ma yí' y'it co anajty xii tiempo yhuaad'ajtni huin'it Dios nihua'na'ñ yajnídzoğa'ñ pínjaty yjáy'ajtip ajcxy. Jada'n Dios tuna'ñ, jigix jébi ñich ajt n'ñbaatim ngapxpaatim Dios mñid y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cujc'ajt

¹⁵⁻¹⁶ Com ti nnejhuíyich jadu'n nej tiydudägy miich ajcxy ti mmibijccixy ñich ajt nHuindzin Jesús, e nañ jadu'n ti nnejhuíyich jadu'n nej mdzojccixy mjihuíyigixy tüg'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidaacin ma Dios mñid miich ajcxy ycixpi. ¹⁷Mibijctzooybich Dios, nHuindzin Jesucristo yTeedy, je mijpi Dios Teedy, co yí' xymöhuij ajcxy je huinma'ñ je ixpijcin huidibi je Espíritu Santo yejcpy, etz nañ jadu'n xyajnejhuíhuipy xyajhuinjihuíhuipy ajcxy jac'oy yí' y'ayuc, e tüg'óciy nej yí' ti ytuuñ. ¹⁸Dios nmibijctzooybich mñid miich ajcxy ycixpi, co xyaj'aníyip ajcxy mjot mhuinma'ñ mñid yí' ytiy'ajt, jigix jébi mnejhuíyigixipy tijaty huidibi ajcxy m'ahuijxyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jébi mnejhuíyigixy nej ymijity yjanchity je pidägy huidibi Dios yegamyb mñid tüg'óciy ajcxy huidibi Dios yjáy'ajtip. ¹⁹⁻²⁰Dios nmibijctzooybich jigix jébi ajcxy mnejhuíhuipy jadu'n nej Dios ymic'ajt mñidity. Je' ymic'ajt ca' ycixipy ytigoyipy, e ni pin ca quipxipy. Etz yí' ymic'ajt tumb ma ñich ajt njot nhuinma'ñ nidüg nidüg co ajt nmibijcim. Dios ti xyajnejhuíyim yí' ymic'ajt huidibi ymñid may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jüby tzajpjoty. Yí' ññaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxyi mñid Dios. ²¹Cristo jac mij'ane'min ymñid, jac mic'ajt mñid, ca'ydi jacpinjaty huidibi jayajpatp tzajpjoty, etz huidibi jayajpatp ya naaxhuiñ, huidibi cham tzinaayb etz huidibi jacjiini tzinähuaamni. Jesucristo cómay y'ity ñigi, ca'ydi jac pin huidibi cham tzinaayb, etz huidibi jacjiini tzinähuaamni. ²²Dios ti pidägy tüg'óciy ane'min ma Cristo jébi ane'mdäy. Jadu'n nipaady nej jihuíy Cristo ñihuäcpejttäy tüg'óciy ane'min. E nañ jadu'n Dios ti pidägy Cristo jigix jébi nigohuajc'adipy tüg'óciy mibijcpidijc. ²³Je mibijcpidijc jadu'n nipaady nej Cristo ñinicx, paady ycixpi yí' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcixtaayb yajca'pxtaayb tüg'óciy tijaty ji ajtp.

2

Dios chojcpy yjihuíyib jäy ajcxy, paady ñidzoocixy y'alma

¹ Ca'ni miich anajty ajcxy mmibijccixy Cristo, ooy anajty mdundigooygixy mñid Dios ytiy'ajt, ooy anajty ajcxy mbocymñidity, e jadu'n nipaady nej jihuíy ti m'o'ccixy mñid mbocy ajcxy ycixpi etz Dios xyajjugypijccixy huinjemy mñid jemybi jugy'ajtin. ² Co ca'ni anajty miich ajcxy mgöbijccixy mmijpidaaccixy Cristo, ooy anajty mguydungixy naaxhuiñyäjy ajcxy ytiy'ajt, etz nañ mgapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma yí' jäy ajcxy yjot yhuinma'ñ huidibi ca' capxymidoogixy

Dios. ³ Ma je tiempo tiibi ñaxy, nañ jadu'n anajty ndzinaayim jadu'n nej yi jacjadyii naaxhuiñyäjy ajcxy huidibi capxymidoob yi ca'oybi. Ngapxymidoohuim anajty nninix chojcin. Ndundigooyim anajty miid ngi'mjot ngi'mhuinmañ. Nguipxyiyim anajty miid yi jacjadyii naaxhuiñyäjy ajcxy huidibi Dios tzaachytunaanip miid ypocy ycixpi, etz nañ jadu'n nmihuaad'ajtim co Dios xychaachytuunim miid ajt nbocy ycixpi. ⁴⁻⁵ Oy ixypy ich ajt mihuaadity tzaachyp miid ajt nbocy ycixpi, per Dios mij ooy ti xypa'ayoohuim, e mij ooy ti xychojcin ti xyjihuiyim, paady ycixp tuuñ may 'ajt miid ich ajt ycixpi co yajjugypijcy je Cristo. E jadu'n quipxy miid Jesucristo ich ajt nbaatim jemybi jugy'ajtin huidibi ca' ycixpy ytigoyipy ni mina. Jadu'n Dios may'ajt tuuñ miid ich ajt ycixpi co anajty nbadaanim o'cin miid ajt nbocy ycixpi. Miid co Dios may'ajt oy'ajt tuuñ miid miich ajcxy ycixpi, paady miich ajcxy ti mbatcixy jemybi jugy'ajtin huidibi ca' ycixpy ytigoyipy ni mina. ⁶ Com jadu'n nipaady nej Dios xyajjugypijcin quipxy miid Jesucristo, paady ycixp Dios xymohuaanim it lugar jibby tzajpjoty quipxy miid Jesucristo. ⁷ Jadu'n nej xii tiempo mimb cidacp Dios jadu'n oy tuñ jigix jebi tiy'ajt nmuid'ajtim jadu'n nej Dios xychojcin xyjihuiyim etz xypa'ayoohuim mijcajee, etz mijmay'ajt mij'oy'ajt tuun miid ich ajt ycixpi co nyajpaatim ma Cristo. ⁸ Miid co Dios miich ajcxy ti xychojccixy ti xyjihuiygixy, paady ycixp yi m'alma ajcxy ti patcixy nidzoocin co ti mmibijccixy Jesucristo. Ca' nminaanim co tijaty ti mdungixy, paady ycixp yi m'alma ajcxy ti patcixy nidzoocin. Hue' janchtiy Dios ti xymooygixy ninigoob ajcxy m'alma ñidzoocin. ⁹ Ca' nminaanim huin'it jäy ajcxy y'alma nidzoocin paadip co oybi tungixy. Hue'janchtiy Dios jadu'n ci'm ti yaj'oyiy ninigoob nej jäy ajcxy jebi patcixy y'alma ñidzoocin, jigix ca' pin jebi huaad amij agix ñayjihuiyi. ¹⁰ Com Dios ci'm ti oyduñ ich ajt njemybi tzinaayin jugy'ajtin miid je may'ajt huidibi Cristo ytuun co y'o'cy miid ajt nbocy ycixpi. Jadu'n Dios tuuñ miid ich ajt ycixpi, jigix jebi nduunim ojjäy'ajtin ma ajt ndzinaayin. Dios, jecy'ajty ca'ni naaxhuiñybi anajty chondacy, cojy macxy je tiy'ajt jadu'n nej yi' tzocy co nduunim ojjäy'ajtin.

Jotcuje cham n'ijtim miid Dios, com Cristo xyajpocyhuaatzim

¹¹ Jadu'n miich ajcxy ocjäymejtzcodiñ nej miich ajcxy anajty myajpatcixy co anajty ca'ni mmibijccixy Jesucristo. Ca' miich anajty ajcxy mjudiojäyity, e ni ca' miich anajty ajcxy myajtiy'ajttiygixy nej huaad mnaydijigixy Dios yjäy. Paady ycixp yi judiojäy ajcxy yminañ co Dios je' yjäy ajcxy, e miich ajcxy ca', miid yida'ajty co miich ajcxy ca' myajtiy'ajttiygixy. ¹² Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judiojäy xycöbijccixy, etz ni ca' anajty mbadaangixy huidibi Dios y'ahuanüy ma yi judiojäy ajcxy, etz ni ca' anajty ti mjijp'ijxcixy ma Dios, etz ni ca' miich anajty ajcxy myajpatcixy ma Dios. ¹³ Jadachambi, miich ajcxy huidibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo miid co yi' ñi'py teemy yojcy miid miich ajcxy mbocy ycixpi. ¹⁴ Jesucristo ci'm yaj'oyiy je tzip je capxy nej anajty ich ajcxy judiojäy etz miich ajcxy huidibi ca' yjudiojäyity nymidzip'ajtim, e cham jotcuje n'ijtim. Jesucristo ci'm yajtigoy je judiojäy ycötujcin huidibi anajty tzip-cojp capxycojp ma ich ajcxy etz ma miich ajcxy. Jesucristo yajtügmuje judiojäy, etz huidi ca' yjudiojäyity. ¹⁵ Jesús miid yci'm ninix yajtigoy

je jecy'ajtypi cõtujcin co oy yaj'ögyii cruudzcíxy. Co Jesús y'o'cy, huin'it yajtügmujcy judíojäy etz huidibi ca' yjudíojäyity. Huin'it oy yaj'ahuimbity tügpicy jäy jemybi huidibi Dios yjäy'ajtip. E jadu'n ajcxy yajcixy yajmay je tzip capxy. ¹⁶ Co Cristo oy yaj'ögyii cruudzcíxy, huin'it yajcixy yajnaxxy je tzip capxy jadu'n nej yi judíojäy anajty midzip'adyii yi' ajcxy huidibi ca' yjudíojäyity. Etz nañ huin'it Cristo yajtügmujcy yi judíojäy müid huidibi ca' yjudíojäyity. Paady ycixp Dios ycöbiga'nyii judíojäy ajcxy etz huidibi ajcxy ca' yjudíojäyity agujc jotcujc.

¹⁷ Je Cristo miin anajty ya naaxhuiñ etz capxhuäcxy oybi tiy'ajt jadu'n nej jébi ajt nbaatim jotcujc'ajtin ma Dios. Ycapxhuäcxy anajty ma miich ajcxy huidibi ca' yjudíojäyity, huidibi ca' anajty müidity Dios ytiy'ajt. Etz nañ jadu'n ycapxhuäcxy Dios ytiy'ajt anajty ma iich ajcxy judíojäy huidibi jamüid anajty Dios ytiy'ajt. ¹⁸ Müid co Cristo may'ajt ti tuuñ co xy'adigiim xyjottigiim Dios yjihuñ'ñ ymic'ajt, paady ycixp nidüg'óciy iich ajt nyajpaatim ma Dios jadu'n nej tügpicy jäy, tanto judíojäy etz nañ jadu'n huidibi ca' yjudíojäyity. ¹⁹ Paady ycixp miich ajcxy jadachambi myajpaady ma Dios. Jadu'n miich ajcxy myajpaady ma Dios tim jadu'n nej je jäy ajcxy huidibi tzinaayb ma yci'mgajp, ca' yjadu'nity nej adzinaaybi ajcxy. Paady ycixp tú'ciy miich ajcxy mnaygomajtzigixy ma Dios müid judíojäy ajcxy. Jadu'n miich ajcxy etz judíojäy ajcxy nipaady cham nej jihuñy ajcxy mdügiuugy mdügmigüg. ²⁰ Miich ajcxy ti mmijpidaaccxy je tiy'ajt huidibi Jesús y'apóstol ajcxy ti capxhuäcxy etz je tiy'ajt huidibi Dios y'ayucnajtzcaxxiybi ti capxhuäcxcixy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huidibi jaccopicyip ma je poch'ijx chondägy. ²¹ Dios jadachambi tiempo ycojyp ymacxyp jadügpicy jäy huidibi yjäy'adaanip huidibi tügiijp mijpidaaccxy Cristo, huidibi tú'ciy ijtcixyp müid Cristo. Jadu'n jadaaabi tügpicy jäy nipatcixy nej tüg tijc ma jäy ajcxy Dios ojadajtcixy. ²² Miich ajcxy myajpatp ma Cristo quipxyi müid nidüg'óciy yi mayjay ajcxy huidibi mijpidacp Dios etz huidijaty mü'ijtp je Espíritu Santo ma ajcxy yjot yhuinma'ñ, jadu'n miich ajcxy mjogy'ajtin nipaady nej Dios chinaydac.

3

Pablo yi' je' müid cõtujcin co capxhuäcxy Dios y'ayuc ma pin ca' yjudíojäyity

¹ Iich Pablo, nyajpatpich pujxtigoty müid co nduuñich ma Jesucristo ytung ma miich ajcxy huidibi ca' yjudíojäyity. Paady ycixp nmibijctzooybich Dios müid miich ajcxy m'oy'ajtin ycixpi. ² Mnejhuñiyb ajcxy com Dios mijmay'ajt ti tuuñ müid miich ajcxy ycixpi, paady yi' ti xyajñibicyich ngapxhuäcxibich ma miich ajcxy yi y'ayuc ytiy'ajt. ³ Dios ti xyajnejhuñiyich yi' ytiy'ajt huidibi jecy'ajty yüch y'ijt. Jada tiy'ajt yinjaty hueeñjaty iich miich ajcxy ti nnijayiygixy jayijp'aty. ⁴ Co miich je necy mgapxip, huin'it ajcxy mnejhuñiipy co iich nnejhuñiyich je Cristo ytiy'ajt huidibi ijtp yüch. ⁵ Jada tiy'ajt maabi Jesucristo, Dios ca' ni pin yajnejhuñiy jecy'ajty. Jadachambi xii tiempo Dios müid je Espíritu Santo yajnejhuñiy Jesucristo ytiy'ajt je Jesús y'apóstoles ajcxy etz je Dios y'ayuc najtzcaxxiybi ajcxy. ⁶ Jada je' je tiy'ajt huidibi jecy'ajty yüch anajty ijtp, co yi' jäy ajcxy huidibi ca' yjudíojäyity ypadamyb ajcxy Dios y'oy'ajtin quipxyi müid yi judíojäy ajcxy, etz nañ jadu'n yi' ajcxy yajpaady ma

Dios tú'ciy m̄id yí judío'jāy ajcxy, etz nañ jadu'n yí' ajcxy padaangixy oybi huidibi Dios jecy'ajty yajnimay yí judío'jāy co mōhuaangixy pinjaty m̄ibijccixp Jesucristo.

⁷ Dios mijmay'ajt ti tuñ m̄id ñich ninigoob co ti xyajñibicyich jada tung, e xymōyich mic'ajt co ngapxhuācxibich Jesucristo y'ayuc ytiy'ajt oybi ma yí jāy ajcxy huidibi ca' yjudío'jāyity. ⁸ ñich jactimmudzip ma yí maybi m̄ibijcpidijc ca'ydi jacpin, per ca' ñejity. Dios may'ajt oy'ajt ti tuuñ ma ñich, e ti xypidāgyich ma yí' ytung co ngapxhuācxych jada oybi tiy'ajt ma jacjadyi jāy ajcxy jigix jēbi ajcxy patcixy ma Cristo Jesús mij'oy'ajtin, huidibi ca' pin huinjihuñy jadu'ñy ymijity. ⁹ Dios ti xyajñibicyich co ngapxtcixibich ma tūg'óciy jāy ajcxy je Dios y'ayuc ytiy'ajt oybi huidibi yūch anajty ijtp. Yí' je' je ayuc huidibi Dios ti cojy ti macxy jecy'ajty, jadu'n nej yí' tunañ je oybi m̄id tūg'óciy jāy ajcxy. Yí' je' Dios huidibi ti yajcojtāy tūg'óciy tijaty ya naaxhuñ etz jūby tzajpjoty yajpatp. ¹⁰ Jadu'n Dios capxcōdujcy co je tzajpjoty tzinaaybi ajcxy huidibi ane'min etz mic'ajt m̄id, tiy'ajt padaangixy ma yí m̄ibijcpidijc jadu'n nej Dios mijhuinmañ canaagnax tuñ m̄id jāy ajcxy nidūg'óciy huidibi m̄ibijccixp Cristo Jesús. ¹¹ Jadu'n Dios ti cuyduuñ m̄id ajt nHuindzin Jesucristo jadu'n nej jecy'ajty capxcōdujcy. ¹² M̄id co nyajpaatim ma Jesucristo paady ycixp agujc jotcujc nmigapxim nmihungonim Dios. M̄id co nm̄ibijcim Jesucristo paady ca' ndzigūyim ndzo'yduunim ma Dios yhuinduu. ¹³ Paady ycixp may'ajt nbijctzooyich m̄id miich ajcxy co ca' ñigi m'ixtigūhuāccixy ma ajcxy nm̄ibijcin. Etz ca'ajcxy xyñidajipy xyñimayipyich co tzaachypi nm̄inaxyich nyajnaxyich m̄id miich ajcxy ycixpi. Com m̄id co ti nyajnaxyich tzaachypi m̄id miich ajcxy ycixpi, paady jēbi miich ajcxy oy'ajtin mbatcixy.

Cristo chojcpy yjihuiñyb jāy ajcxy

¹⁴ Com Dios mijmay'ajt ti tuuñ m̄id judío'jāy etz m̄id huidibi ca' yjudío'jāyity, paady njatyhuingoxtinaaybich Dios, ñich ajt nHuindzin Jesucristo yTeedy, e nm̄ibijctzooybich Dios m̄id miich ajcxy ycixpi. ¹⁵ Tūg'óciy tzajpjoty tzinaayb etz tūg'óciy naaxhuñy jāy huidibi m̄ibijccixp Dios, jēbi nidūg'óciy ym̄inaangixy: “Dios ñich ajt nDeedy.” ¹⁶ Paady nm̄ibijctzooybich Dios Teedy m̄id miich ajcxy ycixpi, co Dios je huidibi mic'ajt etz oy'ajt ym̄id mijcajee, co xymōhuipy mic'ajt ma ajcxy nm̄ibijcin m̄id yí' yjihuiñ ymic'ajt huidibi yajpatp ma ajcxy mjot mhuinmañ. ¹⁷ Dios nm̄ibijctzooybich m̄id miich ajcxy ycixpi co Cristo ymic'ajt yajpaadip ma miich ajcxy mjot mhuinmañ m̄id co nm̄ibijccixy Cristo. Jadu'n Cristo ymic'ajt yajpaadip ma ajcxy mjot mhuinmañ, jigix jēbi miich ajcxy huidibi nm̄ibijccixp Cristo, jēbi mdzójcixipy mjihuñyigixipy mijcajee huinixi huin tiempo je m̄ibijcpidijc etz tūg'óciy jacjadyi jāy. ¹⁸ Nañ jadu'n Dios nm̄ibijctzooybich m̄id miich ajcxy ycixpi co miich ajcxy etz tūg'óciy m̄ibijcpidijc mnejhuñyigixipy jadu'n nej Cristo xychojcin xyjihuiñyim mijcajee. E yí' chojcin yjihuiñyim jadu'n nipaady nej tūg' tije huidibi jac cixip jac mijip, jac yooñip jac cixyip ca'ydi ni huidi tije. ¹⁹ Nm̄ibijctzooybich Dios co xyajnejhuñyigixyip xyajhuinjihuñyigixipy nej Cristo xychojcin xyjihuiñyim mijcajee nidūg'óciy ñich ajt, ixti ca' huaad nhuinjihuiydaayim jadu'n nej Cristo xychachchojcin xychachjihuiñyim. Nm̄ibijctzooybich Dios co xypubéjtcixip, ixti mabaad m̄id'ajttaaygixy Dios y'oy'ajtin.

²⁰ Jadachambi, cōmay Dios y'ity huídibi mic'ajt m̄id, etz huídí yejcp mijcajee jac'anaxy ca'ydi nej njapijctzoohuim etz nej njahuinmaayim, m̄id je ymic'ajt ycixpi huídí tumb ma ñch ajt. ²¹ Huen tūg'óciy mibijcpidijc ajcxy jāymejtzcixy ojadájtzcixy Dios etz Cristo Jesús jabom jabom huínixi huínitiempo. Jadu'n jada. Amén.

4

Tú'ciy n'ijtim m̄id Espíritu Santo ycixpi

¹ Nyajpatpich pujxtigoty m̄id ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzináaygixipy jadu'n nej mihuaad jāy chinaaygixy huídibi Dios ti yhuin'ijxigixy, com Dios miich ajcxy ti xyhuin'ijxcixy. ² Pidaaccix mjot mhuinma'ñ yung naxy, nicy xeemy jāy'ajtcixy, naymecxtújcigix miñ xyipy, naymi'oyjāy'ájtigixy, jigix ñiguëxigip co mnaychójcigixy mnayjihuiyigixy miñ xyipy. ³ M̄id'adipy ajcxy mjot mhuinma'ñ tú'ciy m̄id je Espíritu Santo ypubejtin jigix jēbi mdzinaaygixy jotcujc ca' ma tzip capxy. ⁴ Nidūg'óciy mibijcpidijc tú'ciy yajpatcixy ma Cristo etz tūgpajc Espíritu Santo huídibi yajpaady ma ajt njot nhuinma'ñ. Dios ti xyhuin'ijxim, jigix jēbi quipxyjaty njijp'ijxtaayim je oybi huídibi nbadaanim jūiby tzajpjoty. ⁵ Ji yajpaady tūgpajc ajt nHuindzin Jesucristo, etz tūgpajc je ayuc tiy'ajt huídibi jēbi nmijpidaacim, etz tūgpajc nnūbejtim m̄id Jesucristo yxi. ⁶ Ji yajpaady tūgpajc Dios Teedy huídibi cuendi'ajtp yajtzinaayb nidūg'óciy mibijcpidijc. Yí' je' huídibi nihuindzin'ajttaayb. Yí' je' huídibi may'ajt tumb m̄id nidūg'óciy ajcxy, etz yí' ymic'ajt yajpatp ma nidūg'óciy ajcxy yjot yhuinma'ñ.

⁷ Dios may'ajt oy'ajt ti tuñ m̄id nidūg' nidūg' ñch ajt co Cristo xymooyim mic'ajt, jigix jēbi nidūg' nidūg' tuunipy Dios ytung nej ypadyi. ⁸ Paady ycixp jaybety ymiñ ma Dios jadu'n ymina'ñ:

Co Cristo ypättigiy tzajpjoty, chi ym̄idpättigiy may machjāy, e nañ jadu'n Cristo moy jāy ajcxy mic'ajt (dones).

⁹ ¿Nej co jadu'n Dios y'ayuc ymina'ñ co je Cristo ypättigiy tzajpjoty? Hue' je' jadu'n ymina'ñ m̄id co je Cristo jayijp ycidacy etz ooy ayooy ya naaxhuiñgixy. ¹⁰ Je Cristo yí' je' huídibi cidaac ya naaxhuiñ chooñ tzajpjoty, nañ jadu'n ypättigiy jadūg'oc tzajpjoty jactim'o'c'am. E yí' je' ymic'ajt yajpatp ma tūg'óciy huídijaty jūiby tzajpjoty etz tūg'óciy huídijaty ya naaxhuiñ. ¹¹ Je Cristo ymooygixyp nidūg' nidūg' yí' ytumbi mic'ajt. Nijējity mooygixy mic'ajt jēbi nidiy'ajt'ájtigixy co je' je' je' Cristo. Nijējity mooygixy mic'ajt jēbi najtzcapxhuygixy Dios y'ayuc. Nijējity mooygixy mic'ajt jēbi capxhuäcxcixy yí' y'ayuc. Nijējity mooygixy mic'ajt jēbi capxhuijcixy yí' mibijcpidijc m̄id Dios ytiy'ajt. Nijējity mooygixy mic'ajt jēbi yaj'ixpijccixy Dios ytiy'ajt. ¹² E jadu'n je Cristo mic'ajt moydaaygixy yí' yjāy, e jadu'n yajni'ixiydaaygixy m̄id ytung ycixpi. E m̄id yí' ajcxy ytung yjacyujcpedipy yí' mibijcpidijc y'ixpijcin, ixti mabaad jac m̄id'adipy ajcxy Cristo y'oy'ajtin. ¹³ Jadu'n Cristo mic'ajt xymooyim, jigix jēbi nidūg'óciy ñch ajt ytūgūyim nmibijcin, etz nañ jadu'n quipxyjaty n'ixpijctaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot nhuinma'ñ, nmi'ijtim Jesucristo ytiy'ajt cixy ca'pxy. ¹⁴ Ca' n'idaanim m̄id ajt nhuinma'ñ nej pi'ctijc yhuinma'ñ ym̄idity. Je pi'ctijc ajcxy janam jadojoc yhuinma'ñ ytigajtzcixy. Jadu'n ajcxy nipaady nej je miy huídibi je poj yajpojmiy

yajpojxijpy. Co cixy ca'pxy nmüid'ajtm Cristo ytiy'ajt, ca' pinjaty xy-huin'inim müid huing ayuc oymibijcniþ huidibi ca' yjanchity. ¹⁵ Hue' janchtiy ngapxim je tiy'ajt tiybi müid tzojcin jihuiyin, jaydëbi njacyeecom ajt nmibijcin etz njacnejhuiyim tüg'óciy Cristo ytiy'ajt jadu'n nej ytuuñ ya naaxhuiñ, je Cristo huidibi nigohuajc'ajtp tüg'óciy mibijcpidijc. ¹⁶ Cristo etz je mibijcpidijc nipatp nej tüg ninücx. Cristo ñipatp nej je ninücx cohuaajc huidibi ane'mb etz mic'ajt mooyb je ninücx. Etz yi mibijcpidijc ñipatp ajcxy nej je ninücx huidibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huidibi yajtügiiyip ajcxy ymibijcin etz nañ jadu'n yaj'jtigixy tügmuycy. Nidüg nidüg mibijcpi ymic'ajt patcixy ma Cristo, jëbi tungixy Cristo ytung nej ypadyii. E jadu'n yeecixy nidüg'óciy ma ajcxy ymibijcin, etz nañ jadu'n yajyeecixy chojcin yjihuiyin müid ymigügtijc.

Je jemybi jugy'ajt huidibi nbaatim ma Cristo

¹⁷ Paady ycixp nnimäyich müich ajcxy etz nyajniþijccixy müid ajt nhuindzin Jesucristo ycötujcin, co ca' huaad mdungixy loci huinma'ñ huidibi ca' choubaady ma Dios, jadu'n nej jacjadyii jäy ytungixy huidibi ca' mijpidaaccixy ajt nHuindzin Jesucristo. ¹⁸ Ca' huaad mdzinaangixy jadu'n nej jacjadyii jäy ajcxy chinäy müid loci huinma'ñ. Ca' ajcxy yajpaady ma Dios, je huidibi jugy'ajtin yejcp huinixiibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. ¹⁹ Ca' ajcxy ti tzo'ydu'n jihuiy co ytundigooygixy. Ooy ajcxy minicxnajcixy yi jibic-huinma'ñ. Ooy ajcxy nijot'ajtcixy mijcajee co túngixipy tüg'óciy tijaty jibic-huinma'ñ. ²⁰ Per müich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy Cristo ytiy'ajt, ²¹ pen janch müich ajcxy ti mmidoogixy yi' y'ayuc, pen ti m'ixpijccixy je tiy'ajt huidibi yajpatp ma Cristo. ²² Ti müich ajcxy m'ixpicy co copicy m'ixmájtzcixipy yi jibic-huinma'ñ nej anajty mnijot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy müid je jibicpi huidibi anajty ajcxy mnijot'ajtcixyp, ci'm anajty mnayhuin'inigixy. ²³ Ixmajtcix jibicjot jibic-huinma'ñ. Pidaaccix mjot mhuinma'ñ co mguydunaangixy Cristo ytiy'ajt jemybi. ²⁴ Müid'ajtcix jemybi jot jemybi huinma'ñ com Dios ti yajtigajch huinjemy ajcxy mjot mhuinma'ñ müid tudägy'ajtin etz huädz'ajtin.

²⁵ Paady ycixp ca'huaad m'ündaaccixy, nidüg nidüg cápccix huidibi janchip müid migügtijc, müid co quipxyjaty nyajpaatim ma Jesucristo.

²⁶ Pen müich ajcxy mmijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjäy digóoygixipy yi mjotmädi yajijp ca'ni anajty xi ycidacyñi. ²⁷ Ca' mnayyéjigixy ma je mujcu' co je mujcu' xymimadägyy.

²⁸ Yi jäy ajcxy huidibi meetzcixp, huen ixmajtcixy meedzi, etz ijxtähuiy ytung. Co ytunipy ma ci'mdung jëbi pubedipy ajcxy ymigügtijc huidibi yajmayajtcixp tijaty.

²⁹ Ca' mgápccixipy jibic ayuc. Cápccix oy ayuc huidibi jëbi migüg ajcxy jäygidaaccixy, huidibi pubejtp etz yajyeegy je mibijcin, huidibi yejcp oy'ajtin ma pin ajcxy amido'ijtp. ³⁰ Ca' huaad mgapccixy mmiydaaccixy ayuc huidibi yajjotmaybijcp je Espiritu Santo huidibi Dios yjë'ajtpy. Je Espiritu Santo huidibi müich ajcxy müid ma mjot mhuinma'ñ, yi' je' huidibi tiy'ajt yejcp co müich ajcxy Dios yjäy'ájtigixy, co anajty Cristo ymiñ ya

naaxhuiñ jadüg'oc huin'it mbadaangixy jugy'ajtin etz tzinaayin huidibi ca' ycixipy ytigoyipy ni mina.

³¹ Yajqueeccix yi jibicpi ma ajcxy mjet mhuinma'ñ, jadu'n nej co mjet mhuinma'ñ ta'm mjihuuyigixy, jadu'n nej co tzojc mjetma'tcootcixy, jadu'n nej co mnaymijotma'tigixy, jadu'n nej co mnayhuin'ójigixy najjip'ójigixy. Ca' huaad mmigüg mmigapxcixy mni'ojiiygixy. Ca' jibicpi mnijot'ajt'adiitcixy miid ajcxy mmigüg ycixpi. ³² Hue' janchtiy oybi mhuinmáaygixipy miid mmigüg ajcxy ycixpi. Nayba'ayóohuigixy nidüg nidüg. Nayméecxigix nidüg nidüg. Com nañ jadu'n Dios ti huinmecxy miich ajcxy mbocy miid co myajpatcixy ma Cristo.

5

Nej jëbi chinaaygixy yi Dios yjây ajcxy

¹ Com miich ajcxy ñipatpy nejjuhuüy Dios y'ung'ájtigixy, e Dios ooy xychojccixy xyjuhuuyigixy, paady copicy naychójcigixy najjuhuuyigixy miñ xyipy, jadu'n nej Dios ti xychojccixy ti xyjuhuuyigixy. ² Jabom jabom ma mdzinaayin naychójcigix najjuhuuyigix nidüg nidüg, tim jadu'n nej Cristo xychojcm xyjuhuuyim, e yjugy'ajt yejcy miid ajt nbocy ycixpi, e jadu'n Dios jáygidacy nej Cristo ytuñ.

³ Miid co miich ajcxy Dios xyjây'ájtigixy, paady tzinaaygixy miid huadz mjet mhuinma'ñ. Ca' huaad m'oc'ibáatcixyñi m'occapxpáatcixyñi yi töxyjây migapxtigoyii, etz yi jibic ayuc capxi, yi jibic-huinma'ñ nijot'adii etz yi meen' adzogi. ⁴ Miid co mDios miich ajcxy xyjây'ajtp, paady ycixp ca' huaad mgápxcixipy ayuc huidibi tzo'ydu'ñ yejc, ni ca' huaad mgápxcixipy huidi ca' y'oyjäyidaacnity, etz ni ca' huaad mguxiiccixy m'anüdaaccixy, com yi jibic ayuc ca' Dios jáygidägy. Tzoc yajnajxim jáygidacim ma Dios com Dios ti xyajhuaatzim ajt njot nhuinma'ñ. ⁵ Janch tiy'ajt jada co pinjaty tundigooyb miid huingbi töxyjây, pinjaty jibic-huinma'ñ miid, ca' ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meen' adzojcp, Dios ca' tzocy, tim jadu'n nej yi' ca' tzocy pinjaty ojadajtp tzaadzech etz quipychech. ⁶ Ca' mnayyéjicigixy co jáy ajcxy xyhuin'ingixipy miid ayuc huidibi ca' ytiy'ajtity ca'p choubaad. Miid co jáy ajcxy capxcixy ayuc huidibi ca' ytiy'ajtity, paady ycixpi Dios tzaachytuna'ñ tüg'óciy jáy ajcxy huidibi capxycómiodacp yi' y'ayuc. ⁷ Ca' huaad miich ajcxy mnaymigüg'ájtigixy, ca' miid mnayyöymújicigixy yi jadu'mbi jáy ajcxy huidibi ca' capxymidogixy Dios.

⁸ Jayjip ca'ni anajty mmibijccixy Cristo, ca'ni anajty Cristo ytiy'ajt ajcxy mnejhuuy, e jadu'n nipaady anajty nej juhuuy myajpaady ajcxy agootztuum. Jadachambi mnejhuuyigixyp Cristo ytiy'ajt, e jadu'n nipaady nejjuhuuy mdzinaaygixy ma tüg tücxin. Paady ycixp jatyim cuydungixyp Cristo ytiy'ajt ma yi mdzinaayin mjogy'ajtin ajcxy, jadu'n nej jëbi huaad quëxigy co mmibijccixy Cristo. ⁹ Co nmüd'ajtim Cristo ytiy'ajt, chi nduunim huidibi y'oyip, huidibi tudägyip, huidibi tiy'ajtip. ¹⁰ Ixpjccix je tiy'ajt huidibi Dios yjâygidacpy. ¹¹ Ca' miich ajcxy mnaymigüg'ájtigixy miid yi jáy ajcxy huidibi yajpatcixp agootztuum, huidibi tungixy huidibi Dios ca' jáygidägy. Miich ajcxy capxhuicix miid Dios ytiy'ajt yi' ajcxy huidibi agootztuum tzinaayb. ¹² Tzo'yduunim ajt co jay nigapxcixy nimiydaaccixy je jibicpi huidibi ajcxy ytumyb ayüch ameech. ¹³ Co n'ixquixim yi jadu'mbi jáy ajcxy ayuc miid Dios y'ayuc, chi niguëxigy

pen janch tiy'ajt o pen ca' ytiy'ajtiy, jadu'n nipaady nej ti nyajpidzimim je ajcxy ayuc ma yi agootztuum, etz nbidaacim ma yi tiicxin. ¹⁴ Paady ycixpi Dios y'ayuc jadu'n yminañ:

Mäyhuijip miich ajcxy huidibi jadu'n nipatp nejjihuüy mdzachmaagixyp. Jugypijccix miich ajcxy huidibi jadu'n nipaady nejjihuüy ti m'öccixy. Cristo xycodixcixipy müid yi' ytiy'ajt.

¹⁵ Paady naygüend'ájtigixy huidibi tiy'ajt yajtungixp ma yi chinaayin. Tzinaaygix jadu'n nejjihuüy mnejhuüyigixy Cristo ytiy'ajt, e ca' mdzinaaygixy jadu'n nej huidibi ajcxy ca' nejjihuüyigixy Cristo ytiy'ajt. ¹⁶ Ni'ix'i'ijtcix jabom jabom jébi mguydungixy Cristo ytiy'ajt. Jadachambi xii tiempo mayjáy ytundigooygixy müid Cristo ytiy'ajt. ¹⁷ Ca' loci huinmañ myajtungixy, per nejhuiyigixy nej Dios tzocy co mdúngixipy. ¹⁸ Ca' huaad m'ijtcixy amügy jäy, com yi jocni xyayniccixipy ayo'nduum. Nigi oy m'ijtcixy Dios yjihu'ñ ymic'ajt may'amy ma ajcxy mjot mhuinmañ. ¹⁹ Naymigápxigixy miñ xyipy müid yi salmo ayuc, müid yi himnos. Huin'igix Dios müid je iy huidibi je Espíritu Santo xymooygixyp. Huin'igix etz ojadajtcix Dios cixyot huinijot. ²⁰ Jatyim yajnajxcixy jabom jabom jäygidaacin ma ajt nDios Teedy ma ajt nHuindzin Jesús yxii, müid tüg'ócixy ycixpi nej ndunim n'ayoohuim.

Nej huaad chinaaygixy pinjaty picychinaaygixy

²¹ Müid co miich ajcxy mhuindzigiy Dios, paady ycixp miich ajcxy mnayyajmij'ájtigixy mnaygapxymidóohuigixy miñ xyipy.

²² Miich ajcxy töxyjäydijc yajmij'ajtcix capxymidoogix yi mñäy ajcxy, tim jadu'n nej myajmij'ajtcixy mgapxymidoogixy ajt nHuindzin Jesu-cristo. ²³ Com je töxyjäy ñäy nigohuajc'ajtp ma ytöxyjic ymiñ, tim jadu'n nej Cristo nigohuajc'aty ma yi mibijcpidijc ymiñ. Yi Cristo yi'je' huidibi nihuänamb yajnizdögamb yi mibijcpidijc. ²⁴ Tim jadu'n nej yi mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidóogixipy yi ñäy ajcxy.

²⁵ Nañ jadu'n tzocy co je yëydijc huen tzocy jihuüy ytöxyjic, tim jadu'n nej Cristo tzocy jihuüy yi mibijcpidijc, e paady ycixp yejc yi' yjugy'ajtin müid yi' ajcxy ycixpi. ²⁶ Cristo yejc yjugy'ajtin müid je mibijcpidijc ycixpi, jigix jébi huinmecxy ajcxy ypocy, yajhuaatzip ajcxy yjot yhuinmañ. Cristo yajhuaatzi yi mibijcpidijc ajcxy yjot yhuinmañ müid yi'y'ayuc etz co niibejt ajcxy müid ni. ²⁷ Jadu'n Cristo yajhuäch yi mibijcpidijc ajcxy yjot yhuinmañ, jigix jébi ajcxy nayguëxigüyb ma yi' yhuinduu müid huädz yjot yhuinmañ. Je mibijcpidijc ajcxy nipaady nej tüg nijen huidibi huädzip, ca' ma ytijy ymachity. ²⁸ Jadu'n tzocy co je yëydijc huen tzocy jihuüy ytöxyjic tim jadu'n nej ci'm naychogyii. Yi yëydijc huidibi tzojcp jihuüy ytöxyjic nañ jadu'n ci'm ñaychogyii. ²⁹ Ca' ji ni pin huidibi ca' ñaychogyii ci'm. Hue' janchtiy ycuend'ajtpy etz yajcüxyii yajpedyii yci'm ninicx, tim jadu'n nej jäy ajcxy cuend'ajtcixy yci'm ninicx nañ tim jadu'n Cristo ycuend'ajtpy yi mibijcpidijc. ³⁰ Jadu'n Cristo cuend'ajtpy yi' yjäy, com jadu'n ajcxy nipaady nej yi' ninicx. ³¹ Com copicy je yëydijc tzogip jihuühup ytöxyjic jadu'n nej Cristo tzocy jihuüy yi mibijcpidijc. Paady ycixp je yëydijc ixmadzipy ytaj yteedy, e ypudigihuüy ytöxyjic, e jadu'n ajcxy chinahuipy nej jihuüy ytügajcity. ³² Ooy chachmijhuinmañity jada tiy'ajt huidibi yüch anajty ijtp, e yi' iich jadu'n tijpy yi Cristo etz je

mibijcpidijc. ³³ Cuendipijccix jada tiy'ajt co nidüg nidüg miich yëydijctijc ajcxy huidibi pijccixp copicy mdzogipy mjihuühuipy ajcxy mdöxyijc, tim jadu'n nej ci'm ajcxy mnaychogyii, e nañ jadu'n copicy co nidüg nidüg töxyjäydijc yajmij'adipy ñây.

6

¹ Pi'ctijc ajcxy huidibi mibijcp Jesucristo, copicy mgapxymidoohuipy ajcxy mdaj mdeedy, com tiy'ajt jadu'n. ² Yi Dios ycötujcin huidibi minaamb: "Yajmij'ajtcix mdaj mdeedy", yi' ooy ytimycopicyity. Nañ jadu'n co nguyduunim jada cötujcin, huin'it Dios jecy xyajtzinaayim. ³ Co miich ajcxy jadu'n myajmij'adipy mdaj mdeedy, huin'it Dios xymöhuipy ajcxy jotcujc'ajtin, e nañ jadu'n xyajtzináyagixipy jecy ya naaxhuiñ.

⁴ E miich ajcxy huidibi ungededy'ajtcixp, ca' nigoo myajjotma'tcotcixy yi m'ung ajcxy. Ane'mgix yajyeccix yi m'ung ajcxy müid Dios y'ayuc ytiy'ajt, jaydëbi capxymidöogixipy ajcxy Dios.

⁵ Miich ajcxy huidibi tumbi'ajtp ya naaxhuiñ, capxymidoogix yi mhuindzin ajcxy, etz tungix müid tudägy'ajtin, etz yajmij'ajtcix etz tzigüygix. Tim jadu'n nej jihuiy mgapxymidoogixy yi mHuindzin Jesucristo.

⁶ Tungix yajxon müid ajcxy mhuindzin. Ca' janch xypaat oy mic mdungixy co ajcxy mhuindzin jim xyhuindüxcixy, e chi co je' yjihüacni, chi nigoo mhüäccixni mdináyagixni. Tungix jadu'n nej huaad jäy ytuungixy yi huidibi mijpidaaccixp Jesucristo. Tungix cixyjot huinijot jadu'n nej Dios tzocy mdüngixipy.

⁷ Tumbidijc ajcxy, tungix mdung cixyjot huinijot, tim jadu'n nej jihuiy mdungixy je Huindzin Jesucristo ytung, e ca' yjäydingity. ⁸ Mnejhuüyb miich ajcxy co ajt nHuindzin Jesucristo oybi möhua'ñ nidüg nidüg jadu'n nej ti ytuuñ, ca' ñejity pen yci'mdung ytumyby, o pen ytumb müid tüg huindzin.

⁹ Miich ajcxy huidibi nihuindzin'ajtp tumbidijc, oy'amy ane'mgix mdumbi ajcxy. Ca'm'adzigiüygixipy ca' mdzaachytungixipy. Ajihuüygixy co miich ajcxy etz nañ jadu'n mdumbi ajcxy müid ajcxy mHuindzin tzajpjoty, e yi mHuindzin tzajpjoty: quipxyjaty tiyduna'ñ nidüg'óciy miich ajcxy.

Je mic'ajt huidibi je mibijcpidijc ajcxy ypatcixyp müid Dios yjihui'ñ

¹⁰ Jadügnax, migügtijc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt müidity, paady jëbi miich ajcxy mbatcixy yi mmic'ajtin ma yi'. ¹¹ Naygohuaangixy miich ajcxy ma je mujcu' müid tüg'óciy tiy'ajt huidibi Dios xymooyim, huidi müid naygohuaanim ma je mujcu', e jadu'n ca'ydi je mujcu' xymimadaacim müid anii. Jadu'n Dios ytiy'ajt nipaady nej tujt etz pujxnijen huidibi soldados ajcxy müid naygohuaangixy tzijpjoty. ¹² Hue' janchtiy xymidzip'ajtim poj naaxhuiñ, ca'oybi, mujcu'dijc, etz tüg'óciy mic'ajt müidpi huidibi midzip'ajtp Dios ya naaxhuiñ etz jüiby tzajpjoty, ca'p üich ajt nmidzip'ajtim naaxhuiñjäy. ¹³ Paady ycixp yajtúngixy tüg'óciy mic'ajt etz tiy'ajt huidibi Dios ti xymooygixy, jigix jëbi mmimadaaccixy je ca'oybi co anajty xyajtundigoyaangixy. E jadu'n jëbi mimadaaccixy je ca'oybi müid ajcxy mmibijcin. E co anajty ti mmimadactaangixy, huin'it m'ijtcixipy mic ma ajcxy mmibijcin. ¹⁴ Ca' m'ixtigühuäccix ma ajcxy yi mmibijcin. Nayñi'ixüygix müid Dios ytiy'ajt,

jadu'n nej jāy ajcxy ñayhuindädzigixy co ytunaangixy. Nayñi'ixiiygix tim jadu'n nej soldados ajcxy ñayñi'ixiiygixy müd pujx nijen ma caach co chiptunaangixy. ¹⁵ Nayñi'ixiiygix müd Dios y'ayuc, jigix jëbi ajcxy nicxy mgapxhuäcxi Dios y'ayuc huidibi jotcuje'ajtin yejcp. Co jadu'n mdúngixipy, jadu'n nibaadip tim jadu'n nej soldados ajcxy ñayñi'ixiiygixy co yajtigiiygixy yzapato co ytüyöyaangixy. ¹⁶ Yi' huidibi jac copicyip ca'ydi jac ni ti, mibijccix tydudägy Jesucristo. Müd ajcxy yi mmibijcin jëbi mnaygohuáanigixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumyb co ñaygohuáanigix ma je tip huidibi yajnajtztübyb müdi jin. ¹⁷ Nayñi'ixiiygix müd Cristo ytiy'ajt huidibi müd ajcxy m'alma xyajnidzoocip, tim jadu'n nipaady nej soldados ajcxy ñaygohuáanigixy co pidaaccixy ypujx cöjup co chiptunaangixy. Naygohuáanigix miich ajcxy müd Dios y'ayuc huidibi jadu'n nipatp nej tüg espada huidibi je Espíritu Santo ti xymooygixy. ¹⁸ Mibijctzoogix Dios müd tüg'óciy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom müd je Espíritu Santo ypubejtin. Huijy ycuje m'ijtcixipy, ca' mjotmetzciiygixipy. Mibijctzoogix Dios müd tüg'óciy mibijcpidijc ajcxy ycixpi. ¹⁹ Nañ jadu'n mibijctzoogix Dios müd iich ycixpi, co huen xymöyich ayuc etz jotcuje'ajtin, jigix jëbi ngapxhuäcxibich huinmic jotmic yi' y'ayuc ytiy'ajt huidibi ca' pin jecy'ajty nejhuiygixy. ²⁰ Dios ti xyajnbicyich jada tung jëbi nyajnicxyich yi' y'ayuc ytiy'ajt ma je mayjäy ajcxy. Paady ycixp nyajpaadyich pujxtigoty cham. Tungix may'ajt mibijctzoogix Dios müd iich ycixpi co xyajjotmicpiyipich jigix jëbi ngapxhuäcxich yi' y'ayuc huinmic jotmic.

Capxpoochin huidibi cogixiiyñip

²¹ Ooy ndzocy njihuüyich je Tíquico, nañ jadu'n yi' ooy xypubetyich ma ajt nHuindzin Jesucristo ytung. Yi Tíquico miich ajcxy xyajmüdmüydägiipy tüg'óciy je tiy'ajt nej nyajpaadyich ya, etz tüg'óciy tung huidibi ya ndumybich. ²² Nguexaamybich Tíquico ma miich ajcxy jigix jëbi xymüdmüydägiipy ajcxy jadu'n nej nyajpaadyich ya, e müd jada tiy'ajt jëbi miich ajcxy mjotcugiiygixy.

²³ Huen Dios Teedy etz ajt nHuindzin Jesucristo may'ajt tunipy müd miich ajcxy, jigix jëbi jotcuje mdzinaaygixy, etz nañ jadu'n jëbi mnaychójcigixy mnayjihuiiiygixy miñ xyipy, etz jigix jëbi mjacmibijccixy Cristo. ²⁴ Huen Dios may'ajt oy'ajt tunipy müd miich ajcxy huidibi yajmij'ajtcixp ajt nHuindzin Jesucristo huinixi huiní tiempo. E ca' m'ixmájtzcixip nimina nej ajcxy mijpidaaccixy Jesucristo. Jadu'n jada. Amén.

FILIPENSES

Yi Necy Huidibi San Pablo Yajnigüeix Je Mibijcpidijc Jim Filipos

¹ Hich Pablo müid Timoteo tumbich ma Jesucristo ytung. Jada necy hich ajcxy nguejxpy ma tüg'óciy huidibi mibijcp Dios jim Filipos huidibi yajpaatp ma Jesucristo. Nañ jadu'n jada necy nyajnigüexyich yi' ajcxy mijtungmüdpí etz mutztungmüdpí ma Dios ytung. ² Huen hich ajt nDios Teedy etz ajt nHuindzin Jesucristo may'ajt etz oy'ajt tunipy müid miich ajcxy ycixpi etz xyajjotcugüiygixipy.

Pablo mibijctzoy Dios müd je mibijcpidijc ycixpi

³ Naag'oc naag'oc njäymechich miich ajcxy njatytimyajnajxpyich jäygi daacin ma Dios müid miich ajcxy ycixpi. ⁴ Njatytimjotcujc'ajtpich ooy naag'oc naag'oc Dios nmibijctzooyich müid miich ajcxy ycixpi. ⁵ Jotcujc'ajtpich com miich ajcxy ti xypubéjtcixyich co ngapxhuäcxich Jesucristo y'ayuc ytiy'ajt. Jadu'n ti xypubéjtcixyich maabi nyajtzondägyich ngapxhuäcxich Jesucristo y'ayuc ixti chambaad. ⁶ Nejhuüybich tiydudägy co Dios ti yajtzondägy yi oybi ytung ma miich ajcxy mjot mhuinma'ñ, etz jactunaamni ma miich ajcxy mjot mhuinma'ñ ixti mabaad Jesucristo anajty ymiñ jadüg'oc ya naaxhuiñ müid y'ane'min etz ymic'ajt. ⁷ Ooy ytudägyity co jadu'n jotcujc'ajtpich müid miich ajcxy ycixpi, com ooy ndzocy njihuüyich miich ajcxy. Dios may'ajt oy'ajt ti tuñ co ti xyajnbicyich jada tung, etz miich ajcxy myajpaady quipxy müid hich ma Dios ytung, müid co miich ajcxy xyjäymechich etz nañ xypubetyich ajcxy, huenma'amy hich nyajpaady, oy ixypy pujxtigoty, oy ixypy ma tungmüdpí yhuinduu co nnägapxpetyich Dios y'ayuc ytiy'ajt etz nañ nnägapxpetyich co yjanchity. ⁸ Dios ñejhuüyb jadu'n nej mijcajee ooy ndzocy njihuüyich miich ajcxy müd je tzojcin jihuüyin huidibi Jesucristo ti xymöyich. ⁹ Nmibijctzooybich Dios müid miich ajcxy ycixpi co xypubedipy ajcxy jigix jëbi nigi mdzogipy mjihuühiipy migügtijc, etz jigix ajcxy nigi m'ixpigipy je tiy'ajt tudägyipi, etz nañ nigi mhuinjihuühiipy tüg'óciy nej Dios tzocy co nduunim. ¹⁰ Nañ nmibijctzooybich Dios müid miich ajcxy ycixpi jigix jëbi mnejhuüygixipy, etz nañ jigix jëbi mhuin'jxcixipy huidibi jac'oy mdúnggixipy. Co oy mdúnggixipy, huin'it jëbi mdzinaaygixy müd huädz jot huädz huinma'ñ, e ca' ni ti jotmay miich anajty ajcxy mmüidñ, co anajty je xi je tiempo paady co Jesús anajty miñ ya naaxhuiñ jadüg'oc müid y'ane'min müid ymic'ajt. ¹¹ Dios nmibijctzooybich müid miich ajcxy ycixpi co ajcxy mbattähuip tüg'óciy oyjot oyhuinma'ñ, je oyjot oyhuinma'ñ huidibi Jesucristo tügpajc jëbi xymoogyixy. E jadu'n jäy ajcxy capxpaadip Dios etz nañ huin'ügixip Dios co ajcxy ixipy nej tudägy mdzinaaygixy.

Müid hich, yi njugy'ajtich, yi' yi' Cristo

¹² Ndzocpyich co miich ajcxy mnejhuühiipy co müd je tzaachypi ycixpi huidibi nminaxyp nyajnaxypich ya pujxtigoty, nigi mayjäy ti midoy Jesús y'ayuc ytiy'ajt. ¹³ Jadu'n ti yhuimbizimy co tüg'óciy soldadtijc

etz jacjadyii jāy ya ma je gobierno ymijtijc ti nejhuūydāy ajcxy co nbu-
jxtijc'iñāyich mīid co nduuñich ma Jesucristo ytung. ¹⁴ Nañ jadu'n mīid co
nbujxtijc'iñāyich, paady ycixpi yi jacjadyii mibijcpidijc ti yjotmicpijccixy
ma ajt nHuindzin Jesucristo tung, etz ycapxhuācxy'adichpy ajcxy Dios
y'ayuc ytiy'ajt, ca' ma tzigī'ñ jihui'ñ.

¹⁵ Janch tiy'ajt jada co nijējity jāy capxhuācxy je Cristo y'ayuc ytiy'ajt
mīid co ca' xyajmidzojccixy, etz nañ mīid co xyajmidzip'ajtcixy. Nañ
tiy'ajt jada co jacjadyii migūgtijc xychojcp xyjihuiyb ajcxy, e capxhuācxy
ajcxy je Cristo y'ayuc ytiy'ajt mīid ojot oyhuinma'ñ. ¹⁶ Janch tiy'ajt co
nijējity migūgtijc capxhuācxcixy Jesucristo y'ayuc mīid co ñaygōmaya'ñyii
ci'm, ca' nmīnaanīm ycapxhuācxp ajcxy cixyjot huinijot. Yi' ajcxy
y'ixtaayb nej xyajtajipy xyajmayipyich, jadu'n nej ich pujxtigoty n'ityich.
¹⁷ Yi' ajcxy huidibi xychojcpich xyjihuiybich ycapxhuācxy ajcxy Cristo
y'ayuc com ñejhuūyb ajcxy co ich yam n'ityich pujxtigoty, mīid co
ti nhuinma'ñ nbidāgyich co nnīgapxpeda'ñich Jesucristo y'ayuc ytiy'ajt.
¹⁸ Pen jāy ajcxy capxhuācxp Cristo y'ayuc mīid co ñaygōmayānigixy ci'm,
o pen ycapxhuācxy mīid ojot oyhuinma'ñ, ca' ñejity, jotcujc'ajtpich co
capxhuācxy ajcxy Jesucristo y'ayuc.

¹⁹ Com nnejhuūybich co miich ajcxy mmibijctzoogixy Dios mīid ich
ycixpi, e nañ nnejhuūybich co Jesucristo yjihui'ñ ymic'ajt xypubetyich,
paady nīgi njotcugiyich, e nañ njijp'ijxypich co nbidzima'ñich pujxtigoty.
²⁰ Ndzojcypich etz nañ njijp'ijxypich co nmīmadactāhua'ñich tūg'ócīy
ma ich mdzīnaayin, e ca' ti tzōydu'n nbāadibich ma Dios yhuinduu.
Ndzojcypich nañ njijp'ijxypich co njaccapxhuācxiibich Jesucristo y'ayuc
huinmic jotmic, jigix Jesucristo ycōmay'idipy. Ca' ñejity pen jactzīnaayb,
o pen n'o'cpich. ²¹ Ich ndzīnaayin njuugy'ajtin Cristo yi' ycixpi, e
peni n'o'cpich, ti ich anajty mij nmadāgy. ²² Pen njactzīnaaybich,
mayjāy oybi pada'ñ mīid ich ndung ycixpi. Ca' nnejhuūyich huidibi
jac'oy nhuin'ixipyich co tzojc n'ōgibich, o co njactzīnāhuibich. ²³ Ooy
chachchipy nnejhuūyibich hidibi jac'oy nhuin'ixipyich, co
n'ōgibich, o co njactzīnāhuibich. Ich ci'm nayjihuiyijich nīgi jotcujc co
ixyipy tzojc n'ōgyich, jigix ixypy mic'amy nicxy n'ityich jūiby tzajpjoty
ma Cristo yajpaady. ²⁴ Per jaccopy mīid miich ajcxy m'oy'ajtin ycixpi,
co njactzīnāhuibich. ²⁵ Com nnejhuūybich co copicy njacpubeda'ñich
miich ajcxy, paady nnejhuūybich co njactzīnāhuibich, e jigix jēbi
nbubejtcixy ma Dios ytung etz ma yi mmibijcin. E jadu'n miich ajcxy
nīgi mjotcujc'adipy ma mmibijcin. ²⁶ Miich ajcxy hidibi yajpaatp ma
Jesucristo, nīgi jotcujc m'idipy co nicxy n'ida'ñich jadūg'oc ma miich
ajcxy.

²⁷ Jēyi janchtiy co mdzīnaayin mjugy'ajtin mī'ijtcixy jadu'n nej
Cristo y'ayuc ytiy'ajt y'ane'my. Pen nicxpich anajty ci'm ma miich
ajcxy, o pen ca' nnicxyich, per ndzocypich co xypāadibich tiy'ajt co
miich mic m'ijtcixy ma mmibijcin, tū'ciy cixyjot huinijot mdungixy.
Mic mjanchmidīnaaygixy ni'amugi' yi mmibijcin, jadu'n nej ti
mmijpīdaaccixy Jesucristo ytiy'ajt, ²⁸ e ca'ajcxy mdzīgihūip co jāy ajcxy
xymīdziptzōngixipy, jada je' tiy'ajt co tigoyamb ajcxy y'alma, e nañ jada
je' tiy'ajt co miich ajcxy chōocixipy yi m'alma, e nañ jadu'n jada tiy'ajtip
co Dios y'ity mīid miich ajcxy. ²⁹ Dios may'ajt oy'ajt ti tuñ mīid miich
ajcxy ycixpi co yaj'oyūy nej jēbi miich ajcxy mibijccixy Jesucristo etz

nañ nej jëbi tzaachypi mm̄inajxcixy myajnajxcixy m̄id Jesucristo ycixpi. ³⁰ ïch etz miich ajcxy quipxyi ti nm̄inajxim ti nyajnajxim tung ayo'n m̄id Jesucristo ycixpi. Miich ajcxy ti m̄ixy ti mnejhuïy jadu'n nej ïch ndung n'ayo'n ti nm̄inaxy ti nyajnaxyich, co jim anajty n'ityich ma miich ajcxy. E nañ miich ajcxy mnejhuïyb nej ïch chambaad nm̄inaxy nyajnaxyich ndung n'ayo'nich m̄id Cristo ycixpi.

2

Cristo yung'ajt ñax'ajt etz ymij'ajt

¹ Pen Cristo miich ajcxy mjot'amijmooyb m̄id yjihu'iñ m̄id ymic'ajt, pen ti jotcuje'ajtin mbatcixy m̄id co Cristo xychojccixy xyjihuiyigixy, pen yi' yjihui'iñ ymic'ajt ijtp ma miich ajcxy, pen mdzojccixyp mjihuiyigixyp etz nañ mba'ayoogixy migügtjc, ² jotcuje'adipich m̄id co mdzinaaygixy ooy yajxon, xic xon, tügyi mnaychójcigixy mnayjihuiyigixy miñ xyipy, tzinaaygixy quipxyjot quipxyhuinma'ñ. ³ Ca' ajcxy ti mdunipy m̄id mgi'mdzojcin ycixpi. Nañ ni ca' amij agix naybidáacigixy co ti mdungixy. Tüg'óciy huidibi mdungixyp, mdunipy ajcxy m̄id yung naxy mjot mhuinma'ñ. Nidüg nidüg myajmij'adipy nigi migügtjc, ca'ydi nej miich ci'm mnayyajmij'adyii. ⁴ Ca' huaad pin naydügpajc yci'm'oy'ajt ixtäy, nañ jadu'n tzocy co migügtjc myajmidzogipy y'oy'ajt.

⁵ Pidaaccix mjot mhuinma'ñ tú'ciy jadu'n nej Jesucristo anajty yhuinma'ñ m̄idity co ya naaxhuiñ chinay. ⁶ Oy Jesucristo yjaDiosity ti yhuinma'ñypidägy co jëbi ixmach yi' ymij'ajtin huidibi anajty yjamid. ⁷ Jesucristo ahuingujc pidaactay je mij'ajt huidibi anajty ymid, e chi jadu'n chinay nej tüg tumbi co oy jadu'n ypi'aty jadu'n nej jäy. ⁸ E co jadu'n ñaybidaaci nej naaxhuiñjäy, chi yung naxy pidacy yjot yhuinma'ñ, e nañ capxymidooy Dios ixti mibaad ñayyejci, huen jäy yaj'ögyii. E ooy anajty cho'ydu'nity co jäy yaj'o'ci cruudzcixy. ⁹ Paady ycixp Dios ti cömay jacnigi Jesucristo, e ti pidäci yi' yxi jaccömay, ca'ydi jacpinjäy yxi. ¹⁰ Jadu'n Dios ti cömay Jesús, jigix jëbi tüg'óciy tzajpjoty tzinaaybi etz tüg'óciy naaxhuiñjäy, etz tüg'óciy jäy ajcxy huidibi ti ñaaxtigiy, co anajty ajcxy nidüg'óciy midoogixy co Dios capxpaatip Jesús yxi, chi ycojxtinaay'ihuiydähuipy ajcxy ma yi' yhuinduu, etz y'ojadadipy ajcxy Jesús nidüg'óciy. ¹¹ E co nidüg'óciy ajcxy cöbigipy etz yajmij'adipy Jesucristo jadu'n nej ajcxy yHuindzin, jadu'n Dios Teedy ycömay'ida'ñ.

Yi pin ajcxy Cristo mibijcp, yi' yi' ajcxy jadu'n nej tüg tucxin jain

¹² Migügtjc ajcxy huidibi ooy ndzocy njihuiyich, com Jesucristo jadu'n ijxpejtin ti yecy, capxymidoogich cham co jigüegy nyajpaadyich ma miich ajcxy, tim jadu'n nej jayhuin ïch miich ajcxy xycapxymidooy co n'ijtyich ma miich ajcxy. Naymijottigóoyigix jabom jabom mguydungixy Jesucristo yty'ajt etz mmi'ijtcix huädz mjot huädz mhuinma'ñ. Tungix Dios ytung m̄id yung naxy ajcxy mjot mhuinma'ñ, e huindzigiyigix Dios. ¹³ Com Dios yi' tumb jabom jabom ma miich ajcxy mjot mhuinma'ñ, jigix jëbi miich ajcxy mdunipy yi' ytung yi' chojcin cixyjot huinijot jadu'n nej Dios tzocy.

¹⁴ Tungix cixyjot huinijot Dios ytung, ca'y'aametzity yjotmetzity, nañ ni ca' m̄id tzip ejcin. ¹⁵⁻¹⁶ Jadu'n mdunipy ajcxy ca'ydi pinjaty yxigixy co ti mdundigooygixy. Miich ajcxy Dios xy'ung'adiib, ca' mnigix'adiyb ajcxy ti jibicpi. Tzinaaygix m̄id ojot oyhuinma'ñ ma yi' jäy ajcxy yajpaady

huidi jibic-huinmañ tumb huidibi tundigooyb ma Dios ytiy'ajt. Co miich ajcxy myajhuäcxy Dios y'ayuc ytiy'ajt huidibi alma yjygy'ajtn mooyb ma jibicjäydijc ajcxy, jadu'n nipaady nej tüg madzä ytiicxy coodz. Pen jadu'n mdungixy, co anajty Cristo ymiin jadüg'oc ya naaxhuiñ, jotcuyc'adipich co anajty nnejhuüyich co ca' ich ndung etz nxii ndiempo yñadigi'aty co n'ijtyich ma miich ajcxy. ¹⁷ Co n'ögibich miid Cristo ytung ycixpi, jadu'n nipaady nejjuhuüy ich nni'py ti ndem ti nyocyich miid miich ajcxy ycixpi co ti ngapxhuäcxyich Dios y'ayuc ma miich ajcxy. E co miich ajcxy ti mmijpidaaccixy ich n'ayuc, jadu'n nipaady nejjuhuüy miich ajcxy ti myoxy ti mdoogy yi mjygy'ajtn ma Jesucristo. Jotcuyc'ajtpich jadu'n co miich ajcxy mjygy'ajtn ti myoxy ti mdoogy ma Jesucristo. ¹⁸ Nañ jadu'n miich ajcxy mjotcuyc'adipy quipxy miid ich.

Timoteo etz Epafrodito

¹⁹ Pen ich ajt nHuindzin Jesús tzojcpy, njjy'ijxypich co jëbi nguexipyich Timoteo ma miich ajcxy, jaydëbi njotcuyc'adipyich co anajty yi' xyajnimiiñich tiy'ajt nej miich ajcxy myajpaady. ²⁰ Timoteo tügpaic huidibi huinmañ tú'ciy miid jadu'n nej ich nhuinmañ nmüdidyich, etz nañ huidibi janch naybidaacip miid miich ajcxy m'oy'ajtn ycixpi. ²¹ Yi jacyyii migügtijc huidibi yajpatp ma ich, yajcopijcpy ajcxy yci'm'oy'ajtn, e ca' ajcxy yajcopicy Jesucristo ytung. ²² Miich ajcxy mnejhuüy jadu'n nej Timoteo tudägy ytuñ miid ich co ngapxhuäcxyich Jesucristo y'ayuc ma miich ajcxy, tim jadu'n nej tüg ung ytuñ miid yteedy. ²³ Paady ycixp njjy'ijxypich co jëbi nguexyich Timoteo ma miich ajcxy mina anajty nnejhuüyich nej ycixipy ich njotmay huidibi nmüdich ya. ²⁴ Nañ nmübijcypich ajt nHuindzin Jesucristo co yaj'ahuädzip ich nni'a ndü'a co jëbi ich ci'm nicxy tzojc n'ixyich miich ajcxy.

²⁵ Nañ jadu'n nhuinmaayich co copicy jadüg'oc nguexipyich ajt nmigüg Epafrodito ma miich ajcxy, yi' huidibi xypubejtpich ma ndung n'ayo'nich ya. Yi' huidibi miich ajcxy ti mguexy ma ich, jëbi xypubetyich ma tüg'óciy huidijaty nyajmayajtpich. ²⁶ Epafrodito ooy nijot'aty co jëbi nicxy y'ixaangixy miich ajcxy nidüg'óciy. Ooy yi' ytajy ymaay co miich ajcxy ti mnejhuüy co ypiyyii. ²⁷ Janch tiy'ajt co Epafrodito ooy ti ypiyyii, jago jago ti yca'ögy. Per Dios ti pa'ayoy Epafrodito, e nañ jadu'n ti xypa'ayooyich, jigix ca'ydi nigü ayo'n jotmay nbaadyich. ²⁸ Paady ycixp nigü ndzocyich co jëbi nguexipyich Epafrodito ma miich ajcxy jadüg'oc, jigix miich ajcxy mjotcugihup co m'ixipy. E nañ jadu'n jëbi yquëgy ich ndajin mayin miid yi' ycixpi. ²⁹ Cöbijccix Epafrodito jotcuyc, jadu'n nej tüg migüg huidibi yajpaatp ma ajt nHuindzin Jesús. Yajmüj'ajtcix tüg'óciy migügtijc huidibi yjygy'ajtn yojxp toocp miid Jesucristo ytung ycixpi, jadu'n nej yi' ti ytuñ. ³⁰ Com jago jago Epafrodito ti yca'ögy miid Cristo ytung ycixpi. Tzip tzaach yjygy'ajtn ti minaxy ti yajnaxy co ti xypubetyich ya. Com miich ajcxy ca' ci'm jëbi xypubejtcixyich ya, paady yi' miich ajcxy ti xycodinäy.

3

Je tudägy'ajt je janchypi

¹ Jadügnax, migügtijc ajcxy, jotcuyc'ajtcix co myajpatcixy ma ajt nHuindzin Jesucristo. Ca' ti adzijpin njihuüyich co nnigapxpetyich jada tiy'ajt jadüg'oc huidibi jayhuin ti nyajnijayiygixy. Jadu'n nduñich miid miich ajcxy m'oy'ajtn ycixpi. ² Naygüendi'ajtigix miid yi' ajcxy y'ayuc

huidibi ajcxy tundigooyb co ajcxy yajcopijcy yi tiy'ajt huidibi pidacp ma jäy ñinícx müd tzujc. Jibic jäy yi' ajcxy, jadu'n ajcxy nipaady nej uc. ³ Yi jäy ajcxy huidibi tiydudägy mibijcp Dios, ca' nminaanim je' yi' ajcxy huidibi tiy'ajttiyip ñinícx. Yi Dios yjäy ajcxy janchypi, yi' ajcxy cixyot huinjot mibijcp mijpidacp Dios tiy'ajt jadu'n nej iich ajt. Iich ajt n'ojadajtm Dios müd ajt n'espíritu, etz müd ajt njot nhuinmañ. Jotcujc'ajtm com je' co nyajpaatim ma Cristo Jesús, e ca' nyajcopijcim tijaty tiy'ajt huidibi jäy ajcxy ytumyb. ⁴ Co ixypiy ytiy'ajttity yi jadu'mbi huinmañ, jëbi ixypiy naygömayijich ci'm, com jecy'ajty ca' anajty ni pin huidibi ñgi cuyduun yi jadu'mbi tiy'ajt ca'ydí iich. ⁵ Co nductujcxijiyich ma anajty ti nma'xung'atyich, chi oy nyajtiy'ajttiyich. Raza hebreá iich, Benjamín nmij'ap'ajtpyich nmijteedy'ajtpyich. Nma'xung'ajtich hebreojäy. Iich ndaj ndeedy hebreojäy ajcxy anajty. Nañ nmijpidaacich fariseo y'ixpijcin, jadu'n nej ajcxy yajnigüeey judíojäy ycötujcin. ⁶ Iich janchmictägy anajty nguyduñich ngi'mhuinmañich, ixti mabaad anajty n'ixhuidity nbahuidityich mictägy yi jäy ajcxy huidibi anajty mijpidacp Jesucristo. Ti nguydundäyich tüg'óciy judíojäy ycötujcin. Ni pin ca' huaad yxiyich co ti ndundigooyich ma yi' ajcxy ycötujcin. ⁷ Tüg'óciy yi judíojäy yhuinmañ huidibi ti nyajcopicyich anajty, jadachambi ca' ytimyochabaady müd iich, co ti nmijpidägyich Cristo ytiy'ajt. ⁸ Jadachambi janchtiy, huidijaty anajty nyajcopijcpiyich, ti nnajtz'ixiidyäyich, jigix jëbi nnejhuñhuibich etz nguydunipich yajxon ajt nHuindzin Jesucristo oybi y'ayuc ytiy'ajt. Müd co ti nmijpidägyich Jesucristo, paady nna-jtz'ixiidaayich tüg'óciy huidibi anajty nyajcopijcpiyich, yi jadu'mbi huinmañ cham ca' chobaady müd iich, jadu'n nipaady nej püx. Jadu'n nduñich müd Jesucristo ytiy'ajt oy'ajt yciipi. ⁹ E jadu'n nduñich jigix jëbi nyajpaadyich ma Jesucristo. Jadu'n ti nnajtz'ixiidyäyich je tudägy'ajtin huidibi ti nbaadyich co ti nguyduñich Moisés ycötujcin je jecyip. Nañ jadu'n nduñich jigix jëbi nbáadibich je tudägy'ajtin huidibi Dios yejcpi co nmibijcim nmijpidaacim Jesucristo. ¹⁰ Ndzojcpiyich co njacnejhuñhuibich Cristo y'ayuc ytiy'ajt. Nañ ndzójcpiyich co njacnejhuñhuibich Cristo ymic'ajt, jadu'n nej yjugypijcy co y'o'cy. Nañ ndzójcpiyich co njacminaxipyich njacyajnaxipyich tzaachypi jadu'n nej Jesús minaxy yajnaxy tzaachypi, ixti mabaad jadu'n njatyich jadu'n nej Cristo yjajty co y'o'cy. ¹¹ E paady yciipi njijp'ijxpyich co n'ögibich njugypigipyich jadüg'oc co anajty Dios yajjugypicy yi jäy ajcxy tiibi y'öccixy.

Naymic'ixim jigix nbaatim huidibi Dios ti xyaj'ahuaniiyim

¹² Ca' nminaanim jadu'n nminañich co ti nmimadactäyich nej Cristo ti mimadactäy. Nañ ni ca' jadu'n nminañich co iich njot nhuinmañ ti nyajhuätztäyich. Njactumnich, jigix jëbi Cristo y'oy'ajtin nbáadibich. Com Jesucristo ti xyhuin'ixyich jayijp, jaydëbi jada oy'ajtin nbáadibich. ¹³ Migügtijc ajcxy, ca' iich ci'm naygömayijich, co ti nmimadactäyich Cristo y'oy'ajtin. Jada janchtiy ndumbyich, njäy digoydaaybich tüg'óciy huidibi ti ñaxy, e mictägy nduñich jëbi nbáadibich je oy'ajtin huidibi Dios jiiyby tzajpjoty xymöhuaambich müd co nyajpaadyich ma Jesucristo. ¹⁴ Mictägy nduñich müd tüg'óciy nmic'ajtich, jigix jëbi nbáadibich je oy'ajtin huidibi Dios jiiyby tzajpjoty xymöhuaambich. Jadu'n nipaady nejhuñ müd pin nayboyicquipxyijich co nbadañich tüg premio.

¹⁵ Hich ajt ti nhuinma'nñ ycixni yca'pxni, tzoc panicxim je ixpijcin huidibi nmü'd'ajtim. E pen nidügti miich ajcxy tigachjaty huinma'nñ mü'dity, Dios xyajnejhuühüp ajcxy je tiy'ajt. ¹⁶ Jada janchtiy, je tiy'ajt huidibi ti nbaatim copicy nguydundaayim, ca' n'ixmajtzim.

¹⁷ Migügtijc ajcxy, panicxcix ich n'ixpejt jadu'n nej ti ndzinäyich ma miich ajcxy. Nañ jadu'n miich ajcxy ixpejt mbigipy ma yi' ajcxy chinaayin huidibi ixpejt ti patcixy ma ich. ¹⁸ Canaag'oc ti nnimaaygixy, e nnimaaygixy jadüg'oc mü'd tajin mayin co may nmigügtijc chinaaygixy jadu'n nej jihuüy midzip'ajtcixy je Cristo huidibi o'c cruudzcixy mü'd ajt nbocy ycixpi. ¹⁹ Dios yajtigoyip je'ajcxy y'alma. Yi' ajcxy ypidacpy yhuinma'nñ ma yi' caayin uucin jicxy ypicxy, ma yjapadyii huen yjot yhuinma'nñ pidaaccixy ma Dios. Yi' ajcxy chachñaygömáayigixy ci'm ma yjapadyii tzo'ydu'n jihuüyigixipy. Hue' pidaaccixy yhuinma'nñ ma naaxhuiñ jäy chinaayin. ²⁰ Hich ajt hue' nyajpaatim njäy'ajtim tza-jpjoty, e njijp'ixim co ich ajt nHuindzin Jesucristo miinaamb ya naaxhuiñ jadüg'oc, chona'nñ tza-jpjoty, je huidibi xyajnidzögaanim ajt n'alma. ²¹ Jesucristo xyajtigadzaanim ajt nninix pocymü'dpi, e xymöhuaanim tüg ninix jemybi oybi, tim jadu'n nej yi' ñinix mü'dity. Cristo xyajtigadzaanim ajt nninix mü'd yi' ymic'ajt huidibi mü'd ane'mdäy mimadactäy.

4

Jotcujc'ajtcixy ajcxy ma je mHuindzin Jesús

¹ Com Jesús xyajtigadzaanim ajt nninix, paady ycixpi migügtijc huidibi ooy ndzocy njihuüyich, tiydudägy mibijccix ajt nHuindzin Jesucristo, ca' m'ixtigihuäccixy ma mmibijcin. Migügtijc ajcxy huidibi ooy nicxy nja'ixa'ñich, ooy jotcujc'atyich mü'd miich ajcxy ycixpi. Mü'd miich ajcxy ycixpi nbada'ñich n'oy'ajtin ma Dios.

² Nbijctzooybich may'ajt ma Evodia etz ma Síntique co huen ajcxy ixmajtcixy yi' tzip etz huen naymigügpíjigixy jadüg'oc, com hue'ajcxy yajpaady mibijcpi ma Cristo. ³ Miich migüg'oc huidibi ti xypubetyich ma Cristo ytung, may'ajt nbijctzooybich ma miich co mgapx'oyihuüpy je tzip ma ajcxy je metzpi töxyjäy. Yijiibi metzpi töxyjäy tumb anajty ajcxy quipxyi mü'd ich co ngapxhuäccyich Jesucristo y'ayuc ytiy'ajt. Yi' ajcxy xypubejtich quipxyi mü'd Clemente etz yi' jacjadyii huidibi anajty tumb quipxyi mü'd ich. Jada metzpi töxyjäy ajcxy yxi ycojayiy ymiñ ma Dios ñecy, je necy ma Dios mü'dity cojay je jäy ajcxy yxi huidibi padamb jugy'ajtin huinixibi.

⁴ Jotcujc'ajtcix huinixii, mü'd co myajpatcixy ma ich ajt nHuindzin Jesucristo. Jadüg'oc nügaxpetyich co huen jotcujc'ajtcixy. ⁵ Jadu'n tzinaaygix jadu'n nej jébi jäy ajcxy nejhuüyigixy co miich ajcxy myajtungixy mecxtujcin ma mdzinaayin. Com huington je xii je tiempo mina ymiina'nñ ich ajt nHuindzin Jesucristo jadüg'oc.

⁶ Ca' ni ti mnidajcixy mnimaygixy. Capxpídzimdaaygix ma Dios tüg'óciy ti jotmay miich ajcxy mmü'd. Mibijctzoogix Dios, e nañ yajna-jxcix jäygidaacin ma Dios. ⁷ Co Dios mmibijctzöogixipy, huin'it ajcxy yi' xymöhüp jotcujc'ajtin mijcajee, e mayñaaxhuiñjäy ajcxy ooy yhuinmay ahuididipy mü'd miich ajcxy m'oy'ajtin ycixpi. Co myajpaady ajcxy ma

Cristo Jesús, paady ycxipi Dios xyajtzinähuiipy ajcxy jotcuje etz xymöhuip ajcxy huinma'n tudägypi.

Tzojccix nijot'ajtcix huidibi oyip

⁸ Jadügnax, migügtijc ajcxy, pidaaccix mhuinma'n ma tüg'óciy tiy'ajt huidibi janchip, tüg'óciy tiy'ajt huidibi jébi nyajmij'ajtim. Pidaaccix mhuinma'n ma tüg'óciy tiy'ajt huidibi tudägypi. Pidaaccix mhuinma'n ma tüg'óciy huinma'n huidi huädzip etz tüg'óciy huinma'n huidi oy jäygidacni. Pidaaccix mhuinma'n ma tüg'óciy huinma'n huidibi jébi yajcapxpaady. Huinmaaygix tüg'óciy jada oybi huinma'n etz huidibi huaad njäygidacim.

⁹ Yajtungix je tiy'ajt huidibi ti nyaj'ixpijciy, etz je cötujc huidibi ti nmooygixy, etz je ayuc huidibi ti mmidoogixy co ti ngapxyich. Etz nañ tungix je ijxpejt huidibi ti nyecyich. Cuydungix jada tiy'ajt, huin'ti yi Dios yajpaadipy ma miich ajcxy etz xyajjotcuje'idipy ajcxy.

Filipenses ajcxy y'ofrendi müd Pablo ycxipi

¹⁰ Ich ajt nHuindzin Jesucristo ti ooy xyajjotcugiyich co je tiy'ajt xypaadyich co miich ajcxy xyjäyamechich jadüg'oc. Ca' nmīnaanīm nmīna'nich co miich ajcxy ti xyjäydiyogyaaynich. Hue' anajty ycanibidzimy nej jébi xypubejtcixyich. ¹¹ Ca' nmīnaanīm jadu'n nmīna'nich co ooy ti jaty nyajmayjajtnich. Com ti nhuinma'n nbidägyich co njotcuje'adipyich müd tijaty nmīdich, oy tim mīnaaxi tim mīnaatiempo. ¹² Com ich ci'm nejhuuybich nej jay ajcxy y'ayoy yjottigooy, e nañ nejhuuybich nej jäy ajcxy chinäy co müd'aty tijaty may'amy. Ti nnejhuuydäyich nej jébi ndzinäyich, nej jébi nyajnajxich xi tempo; pen cu'xyi ngaayich, o pen ca' cu'xyi ngayich, pen nmīdich conax, o pen ca' ti nmīdidyich. ¹³ Jébi ndzinähuibich jotcuje huenti huennejty, com Cristo xymic'ajtmooybich. ¹⁴ Ooy oy ti mdungixy co ti xypubéjtcixyich ma ich n'ayo'n njotmay.

¹⁵ Jadu'n nej miich ajcxy huidi jim Filipos mnejhuuyb ajcxy, je taabi nyajtzondacyich co ngapxhuäcxyich Jesucristo y'ayuc ytiy'ajt, co ndzooñich jim Macedonia miich ajcxy ti xymiyoxyich, e jac tigati ti mguejxcixy ma ich. E miich ajcxy jim Filipos huidibi mibijcp Jesús, miich ajcxy tügpajc xypubejtich ca' jac ni pin. ¹⁶ Co n'ijtyich jim Tesalónica miich ajcxy xyajniejxyich pubejtin metz'oc tugüg'oc, e jadu'n miich ajcxy xypubejtyich müd huidibi anajty nyajmayjajtpich. ¹⁷ Ca' nmīnaanīm ooy ndzachjijp'ixynich pubejtin, jada janchtiy ndzojcpyich co miich ajcxy nig'i oy'ajtin mbaadipy co anajty mmejtzcixy ma Dios yhuinduu. ¹⁸ Ti ooy yhuaadäy yi mbubejtin ixti nyajconajxpich. Müd je pubejtin huidibi ti myajmiguejxcixy Epafrodito cham nmīdidyich ca'pxy, ca'ti n'ocyajmayjajtnich. Müd jada pubejtin huidibi miich ajcxy ti xymöyich, ti ooy njäygidägyich, tim jadu'n nej Dios jäygidacy je poomjoc huidibi yajhuindzigiyi. ¹⁹ Ich nDios miich ajcxy xymöhuip tüg'óciy huidibi miich ajcxy myajmayjajtpy. Mijcajee yi' miich ajcxy xymöhuip yi oybi mijpi oy'ajtin huidibi yi' ymūd ma yi Jesucristo. ²⁰ ¡Huen ich ajt nDios Teedy cōmay'idipy huinixi huinītiempo! Jadu'n jada. Amén.

Capxpocxin huidibi cijxnip je necy

²¹ Tungix may'ajt capxpooxcix miid ich yixpi tüg'óciy miügütijc huidibi yajpatp ma ajt nHuindzin Jesucristo. Je miügütijc huidibi yajpatp miid ich nañ jadu'n xyajnigüeijxcixy capxpooxcin. ²² Tüg'óciy je mibijcpidijc huidibi yajpatp ya cajpjoty xyajnigüeijxp ajcxy capxpooxcin, yi' ooy ytimyjajijpity huidibi ajcxy yajpatp ma je mij ane'mbi César ycötujctac xyajnigüeijxyp ajcxy capxpooxcin.

²³ Huen ich ajt nHuindzin Jesucristo may'ajt oy'ajt tunipy miid tüg'óciy miich ajcxy. Jadu'n ngapxycíxyich. Amén.

COLOSENSES

Yi Necy Huidi San Pablo Yajniejx Je Mibijcpidijc Jim Colosas

¹ Hich Pablo, Dios jadu'n tzojcp, paady Jesucristo ti xyajniñicyich jëbi ngapxhuäcxyich yi 'y'ayuc. ² Hich müd ajt nmigüg Timoteo cham nguexyich jada necy ma müch ajcxy huidibi tzinaayb jim Colosas. Hue' nguexyich jada necy ma müch ajcxy huidibi Dios yjäy'ajtíp e mmibijccixy yi Cristo. Huen hich ajt nDios Teedy etz ajt nHuindzin Jesucristo may'ajt oy'ajt tunipy müd müch ajcxy etz xyajjotcugüigixip.

Pablo mibijctzoy Dios müd mibijcpidijc ycixpi

³ Jabom jabom co hich ajcxy Dios nmibijctzoy, chi nyajnaxich jäygidacín ma Dios, nHuindzin Jesucristo ajt yTeedy, müd müch ajcxy ycixpi. ⁴⁻⁵ Ti nnejhuüyich jadu'n nej müch ajcxy ti mmibijccixy Cristo Jesús, e nañ jadu'n nej mdzojccixy mjihuüygixy tüg'óciy migügtijc. Müd co müch ajcxy mjijp'ixy co Dios müdity tujaty yujcpiy tzajpjoty huidibi müch ajcxy mbadamyb, paady ycixpi ajcxy mmibijccixy Cristo Jesús, e paady ycixpi mdzojccixy mjihuüygixy migügtijc. Co jayhuin migügtijc capxhuäcxy Jesucristo y'ayuc ytiy'ajt ma müch ajcxy, huin'it ti mnejhuüygixy co Dios müdity tzajpjoty huidi njijp'ixyp mbadaangixp. ⁶ Jadayaabi tiy'ajt huidibi migügtijc ti capxhuäcxy ma müch ajcxy, nañ yajcapxhuäcx'adiitzi ma tüg'óciy naax cajp etz mayjäy mijpidaaccixy. Müch ajcxy ti mmibijccixy jadu'n nej oga'n yajnimiydacy e chambaadni co Dios may'ajt ti tuñ müd jäy ajcxy ycixpi, e nañ müch ajcxy mnejhuüyb tiydudägy Dios ytiy'ajt. ⁷ Jada tiy'ajt ti xyajnejhuüygixy je Epafras, hich ajt nmigüg huidibi ooy ndzocy njihuüyich, huidibi tudägy tumb ma Dios y'ayuc quipxy müd hich. Epafras ti xycodinäyich ma müch ajcxy, e tiydudägy müch ajcxy xyaj'ixpijcy Cristo ytiy'ajt. ⁸ Epafras ti xyajnejhuüyich tiy'ajt jadu'n nej müch ajcxy myajpatcixy, etz jadu'n nej je Espíritu Santo ymic'ajt xymooygixy, jigix ajcxy mdzogipy mjihuühuipy tüg'óciy migügtijc.

⁹ Müd jada ycixpi hich ajcxy jabom jabom Dios nmibijctzooyich müd müch ajcxy ycixpi, jadu'n nduunich chondacy co oga'n nnejhuüyich co müch ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhujnhuühuipy mnejhuühuipy tüg'óciy Dios chojcín. Dios nmibijctzooybich co yi' Espíritu Santo müch ajcxy xyaj'ixpijcy xyajnejhuühuipy ajcxy tüg'óciy yi' ytiy'ajt etz yi' chojcín. ¹⁰ Dios nmibijctzooybich jaydëbi mguyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jäygidägy yajxon ajcxy mdzinaayin mjugy'ajtin. E nañ jaydëbi ajcxy mdunipy oyjäy'ajtin. E nañ jaydëbi jabom jabom yjacyujcpejtcixy yi m'ixpijcín ma Dios. ¹¹ Dios nmibijctzooybich jigix yi' xymöhuipy ajcxy mic'ajt jadu'n nej yi' müdity ymic'ajt mijpi, jigix jëbi müch ajcxy jotcujc myajnaxipy etz mecxtujctähuiip tüg'óciy tzaachyp etz ayo'n. ¹² Dios nmibijctzooybich co müch ajcxy agujc jotcujc myajnaxipy Dioscojuyip ma Dios Teedy, com Dios Teedy ajt xyajpocynühuaatzim, e jadu'n ti xyñi'ixiyim jëbi nbaatim tüg'it lugar tzajpjoty

quipxyi m̄id t̄ug'óciy m̄ibijcp̄idijc h̄uidibi tiydudägy tzinaaygixp m̄id Dios ytiy'ajt, jadu'n nipaady nejihuïy nej miich ajcxy mdzinäy ma je t̄icxin. ¹³ Ti Dios xyajnihuädziçtuutim ma yi jibic-huinma'n̄ ma je mujcu' xy'ane'mim, jadu'n nipaady nejihuïy ti xyajpidzimim agootztuum. Ti Dios xypidaacim ma y'ung y'ane'my, je' y'ung h̄uidibi yi' ooy tzocy ooy jihuïy. ¹⁴ Dios y'ung ti xyajnihuädziçtuutim ma yi jibic-huinma'n̄ co ñi'py temy vojcy ma yi cruudz m̄id ajt nbocy ycixpi, e ti xypocyhuinmeecxim.

Co Cristo y'o'cy m̄id ajt nbocy ycixpi, chi jotcuyc n'ijt̄im m̄id Dios

¹⁵ Ca' pin ti icy Dios. Pinjaty ti icy Dios y'ung, jadu'n nipaady nej ti icy Dios. Dios y'ung yi' je' anajty tim jayjip ma anajty Dios ca' ti yaj'oyiñi. ¹⁶ Dios y'ung ti cojtay t̄ug'óciy tijaty yajpaatp jilby tzajpjoty etz ya naaxhuiñgixy. Dios y'ung cojtay t̄ug'óciy h̄uidibi jēbi huaad n'ijxim etz nañ cojtay h̄uidibi ca' huaad pin icy. Dios y'ung pidaactay t̄ug'óciy y'ane'min t̄ug'óciy mic'ajt ya naaxhuiñ, etz nañ jadu'n pidactay ane'min m̄id yi tzajpjoty tzinaaybi. Dios y'ung ti yajcojtäy ti yaj'abad̄iydäy tijaty m̄id yigixp. ¹⁷ Je Cristo jayjip y'ane'm'ajt ymic'ajt ti paady, ca' jac ni pin. Je Cristo yaj'ijtpy t̄ug'óciy h̄uidijaty ya yajpatp huijt̄ijttaayb. ¹⁸ Je Cristo ñihuindzin'ajttaayb ñigohuajc'ajttaayb, etz y'ane'mdaayb t̄ug'óciy jäy h̄uidibi m̄ibijcip mijpidaacip. Je Cristo yajtzinaayb yajjugy'ajtpy t̄ug'óciy m̄ibijcp̄idijc, com yi' je' h̄uidibi jayjip ti yjugypicy co y'o'cy. Paady ycixp yi' cõtujcin mijpi m̄idity. ¹⁹ Dios hue' tzojcy co t̄ug'óciy yi' ymic'ajt etz ymij'ajt yajpaadip ma yi' y'ung. ²⁰ Je naaxhuiñjäy etz je tzajpjoty tzinaayb ajcxy ca'oy'ijtcixy m̄id Dios m̄id je mijpocy ycixpi. Dios oy jäygidägy ooy jotcuyc najjihuïyi co y'ung y'o'cy cruudzcixy m̄id je mijpocy ycixpi e jadu'n oyii nej jēbi je naaxhuiñjäy etz je tzajpjoty tzinaaybi ajcxy oy'ijtcixy m̄id Dios.

²¹⁻²² Miich ajcxy co anajty ca' mm̄ibijccixy je Cristo, ca' anajty oy m'ijtcixy m̄id Dios. E jadu'n anajty m'ijtcixy nej t̄ug midzip ma Dios, m̄id co jibicpi anajty mdungixy, etz m̄idity ajcxy jibic ma mjot mhuinma'n̄. Per jadachambi je Cristo ti capx'oyi miich ajcxy je mdzip m'ejc̄in h̄uidibi ajcxy m̄id Dios, co ti chinäy ya naaxhuiñ m̄id ñin̄icx, e nañ co ti y'ögy m̄id miich ajcxy mbocy ycixpi. M̄id co Cristo y'o'cy m̄id miich ajcxy mbocy ycixpi, jaydēbi myajpáatcixipy ma Dios yhuinduu janch oyjäy, janch huätzjäy, ca' ti pocy mm̄idity, ca' ti xihuin yjac-hui'my ma Dios m̄id miich ajcxy ycixpi. ²³ Pen myajcopijccixyp tiydudägy je Cristo y'ayuc ytiy'ajt h̄uidibi ti mm̄idoogixy, jadu'n nej mjijp'ijxcixy co je Cristo xyajniðzogaani ajcxy yi' m'alma. Je ayuc h̄uidibi miich ajcxy ti mm̄idooy, je' je' h̄uidibi migügtijc ti capxhuäcxy etz ycapxhuäcx'ad̄ichñi ma t̄ug'óciy naax cajp, jadu'n nej jēbi jäy ajcxy y'alma yajniðzögipy. Nañ jadu'n ñich, Pablo ngapxhuäcxypich jada ayuc quipxy m̄id nmigügtijcich.

Pablo cõtujcmoy co ytunipy ma m̄ibijcp̄idijc ajcxy

²⁴ Jotcuyc nnayjihuiñijich co tzaachypi nminaxy nyajnaxyich m̄id nnin̄icxich m̄id miich ajcxy ycixpi e jadu'n njacyajcixy njacyajca'pxich je tzaachypi h̄uidibi Cristo yajtzondac co yi' tzaachypi minaxy yajnaxy m̄id je m̄ibijcp̄idijc ycixpi e je m̄ibijcp̄idijc ni paady nej Cristo ñin̄icx. ²⁵ Dios ti xyyajniñicyich co ndunipyich m̄id yi jäy ajcxy h̄uidibi mijpidaacip. Dios ti xypidägyich ma jada tung, jigix ngapxhuäcxibich t̄ug'óciy Dios y'ayuc ytiy'ajt ma t̄ug'óciy jäy ajcxy. ²⁶ Jecy'ajty canaag jimijt ti ñaxy co Dios ca'ni anajty yajniñigüexigy yi' ytiy'ajt. Cham Dios ti yajniñigüexigy yi'

ytiy'ajt ma yi jäy ajcxy huídibi yi' yjäy'ajtipy. ²⁷ Dios oy nihuinmayiy co anajty yajnejhuíhua'ñ yi jäy ajcxy nidüg'óciy je oybi ayuc tiy'ajt huídibi jecy'ajty ca' pin nejhuíy. Yi' je' je tiy'ajt co Cristo yajpaady ma miich ajcxy mjot mhuinma'ñ, paady ycixpi jëbi miich ajcxy mbaadip oy'ajtin jiiyby tzajpjoty.

²⁸ Ich ajcxy ngapxhuäcxypich Cristo y'ayuc, n'ihuijpyich ngapxhuijpyich, nyaj'ixpijpyich yajxon yi Cristo ytiy'ajt ma tüg'óciy jäy ajcxy, jaydëbi nyajquëxigibich ma Cristo yhuinduu nidüg nidüg mibijcpidijc ca'pxy yhuinma'ñ. ²⁹ Mïd jada ycixpi nduñich mictägy mïd tüg'óciy je nmic'ajtich huídibi Cristo xymooybich jabom jabom.

2

¹ Ndojcpyich co miich ajcxy mnejhuíhuipy jadu'n nej mictägy nduuñich mïd tajin mayin mïd miich ajcxy ycixpi, etz mïd yi mibijcpidijc huídi jim Laodicea ycixpi, etz nañ tüg'óciy mibijcpidijc ycixpi huídibi ti xy'ixyich ahuin ajijp. ² Mictägy nduuñich jaydëbi yi mibijcpidijc paadipy jotcuje'ajtin ma y'ay yjot, etz jaydëbi ajcxy ñaychójcigixipy ñayjihuíyigixipy mabaad jëbi m'ijtcixy yjot yhuinma'ñ tú'ciy. Mictägy nduuñich jaydëbi je mibijcpidijc m'ijtcixy mij jotcuje'ajtin co ajcxy huinjihuíydáhuíib Dios ytiy'ajt, je tiy'ajt huídibi jecy'ajty anajty ca' pin nejhuíy, je Dios ytiy'ajt maabi Cristo Jesús. ³ Ma je Cristo jim tüg'óciy tiy'ajt janchypí etz ixpijcin janchypí yajpaady. Jadu'n yi' ytiy'ajt etz y'ixpijcin nej tüg jugy'ajtin. ⁴ Jadu'n nimaaygixy jigix ca' pin oy cohuin'ini e midigihuipy oy ayuc ma miich ajcxy ooy ymibijcni, e ca'yjanchity. ⁵ Ooy ñch ngadim jimity, ixna' guëxna' ma miich ajcxy myajpatcixy. Ich njot nhuinma'ñ ca' yi' jim ytigoy'ity ma miich ajcxy myajpatcixy. Jotcuje nayjihuíyijich co n'ijxcixy yajxon myajtüoygixy tüg'óciy etz mic yi mmibijcin mïdity ajcxy ma Cristo.

⁶ E mïd jada ycixpi jadu'n nej miich ajcxy ti mgöbijccixy je Huindzin Jesús oga'n'aty, jadu'n ajcxy jactzinaaygix jacjugy'ajtcix ma yi'. ⁷ Je tiy'ajt etz je mic'ajt jim yi' mbaatcixy ma Cristo. Yjacyujcpedipy ajcxy yi m'ixpijcin ma Cristo ytiy'ajt jabom jabom. Ca' m'ixtigíhuäccixy ma yi mmibijcin. Jacmibijcix jadu'n nej anajty ti nyaj'ixpijccixy Cristo ytiy'ajt. Jatytim myajnájxcixipy jäygi daacin ma Dios cixyjot huinjot jabom jabom.

Je jemybi jugy'ajtin huídibi Cristo xyajni'ixiyim

⁸ Ooy naygüend'ájtigix, ca' myajhuin'ingixy, co huingjäy xyajhuinma'ñytigóoygixipy mïd huingbi ayuc huingpi ixpijcin huídibi jäy ci'm ti cojy ti macxy, huídi ca' choobaady, huídi nigoo xychachhuin'ingixp mïd canaag ayuc huinma'ñ jadu'n nej poj naaxhuíñ huinma'ñ. Yi jadu'mbi ixpijcin huídibi jäy ti cojy ti macxy ca' ajcxy paady ma Cristo.

⁹ Tüg'óciy nej Dios yajpaady nañ jadu'n yajpaady ma Cristo. ¹⁰ Com je Cristo ñihuindzin'ajttaayb tüg'óciy ane'min ya naaxhuíñ, etz nañ jadu'n tzajpjoty, paady ycixpi co miich ajcxy myajpaady ma Cristo, miich ajcxy mïd'ajttaayb tüg'óciy huídi Cristo ymïd. ¹¹ Co anajty Cristo miich ajcxy xyjäy'adyii, chi y'pidacy ma ajcxy mjot mhuinma'ñ je tiy'ajt co myajpatcixy ma Dios. Hue' je' yajtigooyb yi pocytuní huinma'ñ. Jada je' je tiy'ajt huídi Cristo Jesús ypidac, ca' miich ajcxy xyjäy'adyii. Ca' miich ajcxy mdiy'ajttiy ma mninücx. Tigach Jesús ytuuñ mïd miich ajcxy, ca'

yjadu'nity nej judíojäy ajcxy tiy'ajt pidaaccixy ma ñinīcx mīid tzujc. ¹² Co ti mñiḥbejtcixy mīid Cristo yxii, jadu'n nipaady nejihuīy ti mnaaxtigīyigixy quipxyi mīid Cristo co yi' ñaaxtigīy. Co ti mmijpidaaccixy Dios ymic'ajt jadu'n nipaady nejihuīy quipxyi mīid Cristo ti mjugypijccixy co Dios yajjugypijcy y'ung co y'o'cy. ¹³ Co ca' anajty miich ajcxy Dios xyjäy'adyii, mīid miich anajty ajcxy pocytunī huinma'ñ jadu'n miich anajty m'ijtcixy nej öcpi. E co ti mmijpidaaccixy Cristo, Dios ti xyhuinmееcxi ajcxy tüg'óciy mbocy, e jadu'n nipaady nejihuīy Dios ti xyajjugypijccixy quipxyi mīid Cristo. ¹⁴ Co Cristo y'o'cy ma yi' cruudz mīid ajt nbocy ycixpi, jadu'n nipaady nejihuīy Dios ti xyjödzim xīhuin huīdi anajty xychaachytunaanim. Co Dios anajty yajtigooy ḥch ajt nxīhuin, jadu'n nipaady nejihuīy ti mijxojtzipety je xīhuin necy ma Jesús ycruudz. ¹⁵ Co Cristo y'o'cy cruudzcixy, chi ycödigooy je ca'oybi ymic'ajt, etz je poj naaxhuiñybi ymic'ajt. Chi je Cristo yajtzo'yduñ je ca'oybi etz je poj naaxhuiñybi co yajcixy yajnaxy ma jāy yhuinduu.

Tzojccix nijot'ajtcix tüg'óciy huīdijaty tzomb ma Dios tzajpjoy

¹⁶ Ca' mdungixy cuenti co pīnjaty ajcxy xy'agapxīhuīpy etz xyñimāhuīpy:

—Amay'at jada jīcxy pīcy, etz amay'at jada xii, etz amay'at je jemybo', etz amay'at yi Sábado xii. ¹⁷ Jecy'ajty jāy jadu'n ti yajtuñ yjadu'mbi huinma'ñ, jayijpni ca' anajty Jesucristo ymīiñi ya naaxhuiñ. Jadachambi xii tiempo Jesucristo ytiy'ajt tūgpajc yi' je' ooy ycopīcyity. ¹⁸ Ca' huaad yi jāy ajcxy xypijci je Cristo y'oy'ajtin huīdibi ajcxy mbadamyb. Yi' ajcxy huīdi oygohuin'iniḥ naybidaacip jadu'n nejihuīy ooy yung naxy ajcxy yjāy'ajtcixy, e ca' yjanchity. Yi' ajcxy yi' y'ojadajtpy ángeles. Yi' ajcxy naygōmayip co ti tiy'ajt patcixy ma cumāy, ninigoob ajcxy amij agix ñayjihuiñyigixy mīid co tzachmijpidaaccixy yci'mhuinma'ñ etz ñinīcx chojcin. ¹⁹ Yi' jadu'mbi jāy ca' ajcxy yajpatcixy ma Cristo, je huīdibi nigohuajc'ajtp tüg'óciy mībijcpidijc. Je mībijcpidijc Cristo yajyeecp ma ajcxy ymībijcin jadu'n nej Dios tzocy, e yi' ajcxy patcixy tüg'óciy mic'ajt etz tiy'ajt ma yi'. Mīid co Cristo nigohuajc'aty je mībijcpidijc, paady ajcxy y'ijtcixy tūgpicy, jadu'n ajcxy nipaady nej tūg jāy ñinīcx mīid ycohuajc huīdi ane'm je ñinīcx etz mīid emy huīdibi yajyücxtaayb je ninīcx.

²⁰⁻²¹ Co miich ajcxy ti mmībicy Cristo, jadu'n nipaady nejihuīy ti m'öccixy quipxyi mīid Cristo, e nañ ti mbīdzimgixy ma yi' naaxhuiñyājy yhuinma'ñ xyaj'ane'mgixy. ¿Na'ámy co chambaad mjactzinaaygixy jadu'n nej jihuiy yi' naaxhuiñyājy yhuinma'ñ xy'ane'mgixy? ¿Na'amy co mjaccuydungixy yi' jāy ajcxy ycötujcin huīdibi minaamb co ca' huaad mgonīgy jada, ni ca' huaad mjīcxy jada, ni ca' huaad nīdoñ yijimbī? ²² Tüg'óciy huīdibi ngonīcim, njīcxim, e nnīdonim, co ytundāy, chi ytigoydāy. Yi' jadu'mbi huinma'ñ ci'm jāy ajcxy cojcixy macxcixy, e nañ ci'm jāy ajcxy yaj'ixpijccixy huīdibi ca' yajpaady ma Cristo. ²³ Yi' jadu'mbi cötujcin jadu'n yquēxīgy nej ooy y'oyity ooy y'oymībijco'cnity, e ca' yjanchity. Co jāy ajcxy cuydungixy ooy ajcxy ñaybidāacīgixy tudāgy, etz nañ chaachtungixy ñīcx ycohuajc. Yi' jadu'mbi cötujcin ca' ti mic'ajt mīidity, com co ca' jadu'n jēb yajtigoy jībic-huinma'ñ yi' jadu'mbi cötujcin.

3

¹ Miich ajcxy huidibi ti mmibicy je Cristo jadu'n nipaady nejihuïy ti mju-gypijccixy quipxyi mïd Cristo, e jemybi jugy'ajtin ti myajtzondaaccixy. ² Ixtaaygix je tiy'ajt huidibi tzomb tzajpjoty ma je Cristo yajpaady ma Dios ymijc a'oy'amybi, e yi' je' je mij'ane'mbi. ³ Co ti mmibijccixy je Cristo jadu'n nipaady nejihuïy co ti m'o'ccixy mïd yi', etz ma je Cristo jemybi jugy'ajtin miich ajcxy ti mbaady. Jadachambi yi mjogy'ajtin Cristo mïd c'am, e yi' yajpaatp ma Dios. ⁴ Co anajty je Cristo ñayguëxigyii jadüg'oc ya naaxhuiñ, huin'it xii miich ajcxy mnaybada'ñyii mïd yi' jiiy tzajpjoty ma yi oybi it.

Je jecy jugy'ajt etz je jemybi jugy'ajt

⁵ Yajtigooygix je jibic-huinma'ñ huidibi miich ajcxy mïd, huidibi naax-huiñyäjy ajcxy yhuinma'ñ'ajtip. Ca' huaad mïdcapxtigoyipy töxyjäydijc. Ca' huaad jibic-huinma'ñ mdunipy. Ca' huaad mdungixy ninicx chojcïn, etz huidibi ca'p y'oyhuinma'ñity. Ca' huaad m'adzogipy comeeñ'adii, com ñipaaty jadu'n nej ajcxy huidibi tzaadzech quipyech ojadajtp. ⁶ Mïd co jäy ajcxy jadu'n ytundigooygixy, paady ycixpi jacjiini Dios tzaachytunip jäy ajcxy huidibi ca' ycapxymidoogixy yi' ycötujcïn. ⁷ Nañ jadu'n miich ajcxy jayijp co ca'ni anajty mmijpidaaccixy je Cristo, mdzinaaygixy anajty mïd jibic-huinma'ñ quipxy mïd je jacjadyii naaxhuiñyäjy co anajty mguydungixy yi jäy ycötujcïn huidibi ca' ytiy'ajtity. ⁸ Jadachambi ixmajtcix miich ajcxy yi jibic-huinma'ñ jadu'n nej co migüg mmijotma'tcixy, jadu'n nej co ooy mjot'ambijccixy, jadu'n nej co jibic mdungixy, jadu'n nej co migüg mnigapxcixy ni'ojiiygixy, jadu'n nej co jibic ayuc mgapxcixy. ⁹ Ca' huaad mnayhuin'iiinigixy miñ xyipy. Co ti mmibijccixy Cristo ti m'ixmajtcixy je jibicjot je jibic-huinma'ñ huidi anajty ajcxy mïd. ¹⁰ Jemybi jot jemybi huinma'ñ ti mbatcixy e Dios yjacejcy p jemybi jot jemybi huinma'ñ jabom jabom ma miich ajcxy co m'ixpijccixy yi' ytiy'ajt. Jadu'n Dios tzocy co mjot mhuinma'ñ mbidáaccixipy jadu'n nej Cristo jot huinma'ñ mïdity, je Cristo huidibi ti yaj'oyiy je jemybi jot jemybi yhuinma'ñ. ¹¹ Co jäy ajcxy mijpidägy Cristo, chi tú'ciy ajcxy yajpaady ma Dios, ca' ñejity co nijëjity ajcxy mïd griegojäy y'ixpijcïn etz jacjadyii mïd judíojäy y'ixpijcïn, ca' ñejity pen ti myajtiy'ajttiy o ca' mdiy'ajttiyity. Ca' ñejity co nijëjity ajcxy jiguëgy chooñ, e ca' y'ixpiyity, etz jacjadyii ooy adzip ahua'n ñaybidáacigixy. Ca' ñejity co nijëjity ajcxy moso'ajtp etz jacjadyii huidibi ci'm naymiduunip. Nidüg'óciy ajcxy tú'ciy ñaybidäguyii co ajcxy mijpidägy Cristo. Nidüg'óciy mibijcpidijc tú'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'óciy ajcxy yjot yhuinma'ñ.

¹² Com Dios miich ajcxy ti xyhuin'ixy, e ti xychojccixy ti xyjihuiygixy, e Dios ti xyajhuädzi ajcxy mjot mhuinma'ñ, paady ycixpi pidaaccix mjot mhuinma'ñ co mba'ayoohuaangixy migügtijc. Pidaaccix mjot mhuinma'ñ co oyjäy'ajtin mdunaangixy etz co nicy xemy mnaybidägaangixy. Pidaaccix mjot mhuinma'ñ yung naxy etz mímecxtujccixy migügtijc ajcxy. ¹³ Naymímecxtújcigix nidüg nidüg. Co mmigüg ajcxy xymidundigooyipy jëbi mhuinmeecxipy tim jadu'n nej iich ajt nHuindzin Jesucristo ti mecxy miich ajcxy mbocy. Com Cristo ti xyhuinmeecxcixy, paady copicy miich ajcxy meecxy yi migüg huidibi ajcxy xymidundigooyb. ¹⁴ Mnaychócgix mnayjihuiygix nidüg nidüg.

Co mnaychójcigixipy nayjihuiyigixipy, chi jëb huaad mdzinaaygixy mïd mjet mhuinma'ñ tú'ciy. ¹⁵ Je jotcujc'ajtín huidibi Dios xymooyim, huen ajcxy xy'ane'mi mjet mhuinma'ñ. Dios ti xyajníbjccixy, jaydëb tú'ciy m'ijtcixy mïd mjet mhuinma'ñ. Mjatytim yajnaxipy ajcxy jäygidaacin ma Dios jabom jabom.

¹⁶ Naybidáacigix co je Cristo y'ayuc ytiy'ajt yajtigüydähuamby ajcxy mjet mhuinma'ñ. Nayyaj'ixpíjcigix etz nay'ihuijigix naygapxhuíjigix mïd je Cristo y'ayuc ytiy'ajt, jadu'n nej Dios ixpíjcín yecy. ñigix Salmo etz ñigix himno etz yi iy huidibi je Espíritu Santo ypidägip ma mjet mhuinma'ñ, e jadu'n jäygidaacin mi'ijtcixy ma ajcxy mjet mhuinma'ñ mïd Dios ycixpi. ¹⁷ Huen ti ayuc huidibi ajcxy mgapxyp, huen ti tung huidibi ajcxy mdumby, hue' capxcix tungix mïd ajt nHuindzin Jesús yxi. Etz jatytim yajnaxcixy Dioscojuyip ma Dios Teedy ma Jesucristo yxi.

Je mibijcpidijc ajcxy chinaayin ma ypijccinaaygixy

¹⁸ Miich töxyjäydijc ajcxy, capxymidoogix mñäy ajcxy com jadu'n ñich ajt nHuindzin Jesucristo tzocy co mgapxymidohuipy ajcxy mñäy. ¹⁹ Miich yëdijctijc ajcxy, tzojccix jihuiygix ajcxy mdöxyijc, ca' ejcín mmi'ídiipy mïd mdöxyijc. ²⁰ Miich ajcxy ung anäg, mgapxymidohuipy ajcxy mdaj mdeedy mïd tüg'ócíy. Jadu'n Dios jäygidägy co ung anäg ajcxy capxymidooy ytaj yteedy. ²¹ Miich ajcxy ungdeedy ca' oyñinej mmigapxcixy m'ung m'anäg ajcxy. Co jadu'n oyñinej m'ojipy m'ung ajcxy, ca' yjecyity co nicxy ajcxy taj may chinaaygixy yjugy'ajtcixy. ²² Miich ajcxy tumbidijc, capxymidoogix yi mHuindzin, ca' janch xypaat oy mic mdungixy co mhuindzin jim xyhuindicxcixy, e chi co je' yjihuaäni, chi nigoo mhuäccixni mdinaaygixni. Hue' janchtiy oy tungixy mïd oyjot oyhuinma'ñ, com je' je' je' tiy'ajt co Dios mhuindzigüygixy. ²³ Je tung huidibi mdungixyp, tungix cixyjot huinjot. ²⁴ Com miich ajcxy mnejhuuyb co Cristo xymöhuaangixy it lugar tzajpjoty, paady ycixpi oy tunggix jigix Cristo jäygidägipy huidibi ajcxy mdumby. ²⁵ Dios chaachytunipy pinjaty tundigooyb. Ca' Dios huin'ixpety tzaachytunipy jäy.

4

¹ Miich ajcxy yajtumbidijc, yajtungix mdumbi nej ypadyii etz nej ytudägyity, com miich ajcxy mnejhuuyb co nañ mïd miich ajcxy tüg mHuindzin jüby tzajpjoty.

² Jabom jabom Dios mibijctzoogix, ca' m'ixmajtzcixy Dios mibijctzoohün. Huiy ycuje m'idiipy ajcxy etz jatytim yajnaxcixy jäygidaacin ma Dios co anajty mgapxtaaccixy. ³ Nañ jadu'n miich ajcxy tun may'ajt mibijctzoogix Dios mïd ñich ajcxy ycixpi. Mibijctzoogix Dios co huen it lugar xymöhuiyich ma jëbi ngapxhuäcxyich Dios y'ayuc ytiy'ajt. Ngapxhuäcxyñich je Cristo ytiy'ajt huidibi jecy'ajty anajty ca' pin nejhuuy. Mïd co ngapxhuäcxyich Cristo ytiy'ajt, paady ycixp nyajpaadyich pujxtigoty. ⁴ Mibijctzoogix Dios mïd ñich ycixpi, jigix jëbi ngapxhuäcxyich je Cristo ytiy'ajt huadz oy, nej jäy ajcxy jëb huadz huinjihuiygixy, jadu'n nej ypadyii ngapxhuäcxyich.

⁵ Tiydudägy mdzinaaygixipy mïd yi jäy ajcxy huidibi ca' mibijccixy Cristo. Yajnguëxíccix miich ajcxy Dios ytung jabom jabom, ca' huaad xii tiempo myaj'ayoogixy. ⁶ Yi mgapxin yi mmiydaacin yajtungix oy'amy huindzigi'ñ'amy nej jëbi huaad jäy ajcxy jäygidaaccixy. Copicy mhuinmayipy ajcxy jayijp nej jäy huaad m'adzoogixy.

Je capxpoocxin huídibi cogixiyñip je ñecy

⁷ Tíquico co ñicxipy jim ma miich ajcxy, yi' xyajmídmíydáaccixipy tüg'óciy nej ytunyí yjadyí ma ñich. Ooy ndzocy njihuíyich ñich ajt nmígüg Tíquico. Yi' ooy tudägy ytuuñ quipxyí míd ñich ajcxy ma ajt nHuindzin Jesucristo ytung. ⁸ Paady yam nguexyich Tíquico ma miich ajcxy jigix ajcxy xyajmídmíydägípy nej yam ñich ajcxy nyajpaatcixy, etz nañ jigix xyjotmicmígápxcixipy. ⁹ Quipxyí míd Tíquico yam nguexyich Onésimo, tüg ajt nmígüg huídibi ooy ndzocy njihuíyich, huídibi tudägy ti ytuuñ míd ñich ajcxy. Onésimo miich ajcxy yi' mmígogajp. Tíquico y Onésimo xyajmídmíydägípy ajcxy tüg'óciy tijaty tuunip jajtípy yam ma ñich ajcxy.

¹⁰ Je Aristarco, huídibi pujxtíjc iñaayb quipxyí míd ñich, cham quexy capxpoocxin ma miich ajcxy. Marcos, je Bernabé y'uch, cham quexy capxpoocxin nañ jadu'n ma miich ajcxy. Ti ñich ayuc nguexyich jayhuin ma miich ajcxy co ixipy ñicxy Marcos ma miich ajcxy, mgöbigípy ajcxy agujc jotcujc. ¹¹ Nañ jadu'n je Jesús huídibi jäy ytíjpy Justo, cham quexy capxpoocxin ma miich ajcxy. Yi' Aristarco, Jesús etz Marcos yi' ajcxy ni tugígpajc, judíojäy huídibi tumb míd ñich ma Dios ytung co ngapxhuäcxyich Dios y'ane'mín. Yi' nidugígpi ñich ooy ti xyajjotcujc'atyich. ¹² Je Epafras, miich ajcxy mmígogajp je Cristo ytumbi, nañ jadu'n cham quexy capxpoocxin ma miich ajcxy. Je Epafras jabom jabom Dios mibíjctzoy míd miich ajcxy ycixpi. Yi' mibíjctzoob Dios co miich ajcxy cuydunda' tüg'óciy je Cristo y'ayuc ytiy'ajt, etz co nayyéjigix amumdügjot ma Dios, e jadu'n ajcxy mguydunípy nej Dios tzocy. ¹³ ñich jébi tiy'ajt nyecyich co Epafras ooy jotmay jihuíy míd miich ajcxy ycixpi, etz nañ ooy nidajy nimay míd yi' ajcxy ycixpi huídibi tzinaayb jim Laodicea etz jim Hierápolis. ¹⁴ Je Lucas, je doctor, huídibi je mibíjcpídjic ooy tzojccixy ooy jihuíyigixy etz Dimas nañ cham ajcxy quexy capxpoocxin ma miich ajcxy.

¹⁵ Yajnajxcix ñich ngapxpoocxin ma yi' mibíjcpídjic jim Laodicea. Nañ yajnajxcix ñich ngapxpoocxin ma yi' Ninfas etz ma yi' mibíjcpídjic huídibi yöymujccixp ma yi' ytiyc. ¹⁶ Co anajty jada necy ti mgapxtaaygixy, tungix may'ajt quejxnajxcix jada necy ma yi' mibíjcpídjic ajcxy jim Laodicea. Huen ajcxy nañ jadu'n capxcixy jada necy, nañ jadu'n miich ajcxy capxcix je necy huídibi ti nquexyich jim Laodicea. ¹⁷ Tungix may'ajt mnímähuípy je Arquipo co huen cuydundäy je tung huídibi ñich ajt nHuindzin je Cristo ti yajnibedyí.

¹⁸ ñich Pablo, ñich cí'm njaaybich jada capxpoocxin ma miich ajcxy. Ca' ajcxy mjäydgoyípy co ñich nbujxtíjc iñäy. Huen Dios may'ajt oy'ajt tunípy míd miich ajcxy ycixpi. Jadu'n ngapxcíxyich. Amén.

1 TESALONICENSES

Yi Jayijp Necy Huidi San Pablo Yajniguejx Je Mibijcpidijc Jim Tesalónica

¹ Ich Pablo mid Silvano etz Timoteo cham nguexyich jada necy ma miich ajcxy jim Tesalónica huidibi yajpaatp ma Dios etz ma ajt nHuindzin Jesucristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy mid miich ajcxy etz xyajjotcugiygixip.

Je mibijcin huidibi anajty yejcpy ijxpejt

² Jabom jabom ich ajcxy nyajnaxyich jäygiidaacin ma Dios mid tüg'óciy miich ajcxy ycixpi. Jabom jabom ich ajcxy Dios nmibijctzooyich mid miich ajcxy ycixpi nidüg'óciy. ³ Co Dios Teedy nmibijctzooyigixyich, chi njäymeichich jadu'n nej miich ajcxy ti mmibijccixy Jesucristo, etz jadu'n nej oy mdungixy ma yi' ytung. Nañ njäymeichich jadu'n nej oyjäy'ajtin mdungixy etz jadu'n nej mdzojccixy mjihuuygixy mmigügtijc. Nañ jäymejtzpich jadu'n nej miich ajcxy mjijp'ixy jabom jabom co ich ajt nHuindzin Jesucristo xymöhuaangixy it lugar jilby tzajpjoty, e ca' mjetmetzcuygixy. ⁴ Migügtijc ajcxy, ich ajcxy nejhuuyb co Dios xychojccixy xyjihuuygixy, e nañ ich ajcxy nejhuuyb co Dios ti xyhuin'ijxcixy. ⁵ Co ich ajcxy jayhuin ngapxhuäcxy Jesucristo y' ayuc ytiy'ajt ma miich ajcxy, chi ca' jëyi Dios y'ayuc ngapxhuäcxiich, nañ nduunich mjihuinma'n mid Dios yjihuin'ñ ymic'ajt. Jotcujc nduunich ma miich ajcxy. Miich ajcxy mnejhuuyb co tudägy nduunich jigix jëbi mmijpidáaccixipy Jesús y'ayuc ytiy'ajt.

⁶ Oy anajty ooy mjayaj'ixhuidijtcixy mjayajpahuidijtcixy co Dios y'ayuc ytiy'ajt jemybi ajcxy ti mgöbijccixy, e chi ajcxy ti mbadüdigiygixy ich je n'ijxpejt, e nañ jadu'n ajt nHuindzin Jesús y'ijxpejt. ⁷ Co tzaachypi ti mminajxcixy ti myajnajxcixy mid Jesucristo ycixpi, chi tiy'ajt ti myejccixy ma tüg'óciy mibijcpidijc jim Macedonia naaxjot etz jim Acaya naaxjot jadu'n nej jëbi ajcxy nañ jadu'n mijpidaaccixy Jesucristo y'ayuc ytiy'ajt. ⁸ E jadu'n miich ajcxy ti myejccixy je ijxpejt mid Jesús y'ayuc ytiy'ajt, canan jëyi jim Macedonia etz Acaya, nañ ti myejccixy ijxpejt ma canaag'it naaxcajp. Je mayjäy ti nejhuuidäy jadu'n nej miich ajcxy ti mmibijccixy Jesús y'ayuc ytiy'ajt, paady ycixpi ca' ycopicyity nicxy ich ajcxy njacyajnimäy je mayjäy jadu'n nej miich ajcxy ti mmibijccixy. ⁹ Je mayjäy ma canaag'it naaxcajp ooy ñaymidmydáaccigixy jadu'n nej ich oy ngogapxiyich miich ajcxy, etz nañ jadu'n nej ich miich ti xycöbijccixyich e nañ je mayjäy ñaymidmydáaccigixy jadu'n nej ti m'ixmajtcixy yi tzaadzech ojadadi, e ti mbadüdigiygixy je Dios juugypi janchypi etz tudägy. ¹⁰ Nañ jadu'n je mayjäy ajcxy ñaymidmydáaccigixy jadu'n nej miich ajcxy m'ahuijxcixy mjijp'ijxcixy co Jesús, Dios y'ung, yhuimbida'n ya naaxhuin, chona'n tzajpjoty. Je huidibi Dios ti yajjugypic co ti y'ögy. Yi' je' je Jesús huidi ti xycohuaanim ma yi mijpi tzaachypi huidibi Dios yquexamyb mid co jäy ajcxy chach pocytungixy.

2

Pablo ytung huibidi anajty ymid jim Tesalónica

¹ Migügtijc ajcxy, mnejhuüyb ajcxy co ca' ñaadig'aty, co ñich oy ngapxhuäcxy Dios y'ayuc ytiy'ajt ma miich ajcxy. ² Miich ajcxy mnejhuüyb co jayijp ca'ni anajty nmechich ma miich ajcxy ñich ajcxy ooy tzaachypí etz ayo'n ti nyajnajxcixy jim Filipos. Ti jäy xyhuin'ojoy xyjijp'o'yich. Co nmejchich ma miich ajcxy, ca' ñejity co tzaachypí ti nminaxyich ti nyajnaxyich jayijp, chi Dios ti xyajjotmicpicyich, jigix huinmic jotmic ngapxhuäcxbich Jesús y'ayuc ytiy'ajt. Ti ngapxhuäcxyich Dios y'ayuc ma miich ajcxy, oy ñich jäy anajty xyca'ixa'ñ xycatzoga'ñ. ³ Ca' ñich ngapxhuäcxyich anii, ni jibic ayuc, e ni ngamiydägyich jibic ayuc jibic huinma'ñ nej huaad nhuin'ingixy. ⁴ Ca' ti nhuin'ingixy. Dios ti xyajnbicyich co ngapxhuäcxbich yí' y'ayuc ytiy'ajt, e jadu'n nguyduuñich. Ca' nduuñich co huen jäy ajcxy jäygidägy ñich ndung. Jada janchtiy ndumybich jigix Dios jäygidägyipy ñich ndung. Com Dios yí' ñejhuüyb nej jäy tüg'óciy yjot yhuinma'ñ müdity. ⁵ Miich ajcxy mnejhuüyb co ca' nyajxondaaccixy müd ayuc oyjatypí huidi ca' choobaady. Nañ ni ca' ñich ajcxy nhuinma'ñ 'ijxtäy nej jëbi ñich ajcxy nmeefnybaat. E Dios nañ ñejhuüyb co yjanchity jada. ⁶ Nañ ni ca' ñich ajcxy njijp'ixy co jäy ajcxy xycómayipyich, ni miich ajcxy etz ni jac-huingbi jäy. Com je Cristo ti xyquexayich co ngapxhuäcxbich yí' y'ayuc, paady ycixp jëbi ixypy n'ane'myich co ixypy miich ajcxy xyajmij'atyich etz xypubetyich, per ca' jadu'n ti nduuñich. ⁷ Oygíxy oy'amy ti nduuñich ma miich ajcxy, jadu'n nej tüg undaj müdity y'ung y'anäg müd ojot oyhuinma'ñ. ⁸ Ti ñich miich ooy ndzojccixy njihuüygixy, canan jëyi Dios y'ayuc ytiy'ajt ti nmooygixy, nañ naygíyegáanibich anajty ma yí' o'cin müd miich ajcxy ycixpi. ⁹ Co jayhuin ngapxhuäcxyich Dios y'ayuc ma miich ajcxy, mjäymejchpy miich ajcxy jadu'n nej ñich ajcxy nduuñ n'ayooyich anajty xim tzuum müd ñich ajcxy ngaayin n'uucin ycixpi. Ca' anajty n'adzibaangixy, paady ñich ajcxy nduuñ n'ayooyich xim tzuum müd ñich ajcxy ngaayin n'uucin ycixpi.

¹⁰ Miich ajcxy huídibi mibijcp mnejhuüyb ajcxy, e nañ ñejhuüyb Dios, co ñich ajcxy ndzinaayich ma miich ajcxy tudägy, huädz ñich anajty ajcxy njot nhuinma'ñ müdidyich. Ca' ma ndundigooyich ajcxy nej pin xy'ocnihuambepiyich ajcxy. ¹¹ Mnejhuüyb miich ajcxy nej n'ihuüjcixy ngapxhuüjcixy etz njotmicmigapxcixy nidüg nidüg, tim jadu'n nej tüg undeedy ñhuijy capxhuijy y'ung y'anäg. ¹² Ti ngapxhuüjcixy co ooy chach copicyity co mdzinaaygixipy nej Dios jëbi jäygidägyipy yí' mdzinaayin. Com yí' miich ajcxy ti xyhuin'ijxcixy jëbi mdigíygixipy ma yí' chinaaydac, ma yí' müdity y'oy'ajtin ymij'ajtin.

¹³ Paady ycixpi nyajnajxpich jäygidaacin ma Dios jabom jabom, jadu'n nej miich ajcxy anajty ti mmido'mbijccixy etz ti mgöbijccixy Dios y'ayuc ytiy'ajt huidi ngapxhuäcxbich ma miich ajcxy. Ti mmibijccixy anajty co ñich ajcxy ti ngapxhuäcxy Dios y'ayuc ytiy'ajt. Canan je' ti ngapxhuäcxyich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy mjot mhuinma'ñ, miich ajcxy huídibi mibijcp. ¹⁴ Migügtijc ajcxy, jadu'n ti mjaajtcixy jadu'n nej yjajty müd je judíojäy huídibi anajty tzinaayb jim Judea co ajcxy mijpidägy Dios y'ayuc ytiy'ajt, chi je ymígogajp ajcxy ooy y'ixhuüidijti ypahuüidijti. ¹⁵ Je judíojäy ymidziptoon ñich ajt nHuindzin Jesús, e chi yaj'o'cy ajcxy, tim jadu'n nej ajcxy y'ap yteedy yaj'o'cy huüidijaty anajty Dios y'ayuc najtzcapxhiyip jecy'ajty. Etz nañ jadu'n ajcxy xyajpidzimyich jim ma ajcxy judíojäy

chinäy. Dios ca' jadu'n jäygidägy jadu'n nej ajcxy ytundigooy, nañ ooy ajcxy ymijotmädyi tüg'óciy jäy. ¹⁶ Yi judíojäy ajcxy ti capx'adujccixy co ca' huaad ngapxhuäcxyich je Cristo ytiy'ajt ma yi jäy ajcxy huidibi ca' yjudíojäyiy, nej huaad ajcxy y'alma ñidzóoccixipy. Co jadu'n ajcxy ytundigooy, chi ajcxy ooy nigi ypocy ñibety ma Dios. Per Dios ti ooy chip y'ejcín pidacy ma judíojäy müd ajcxy ypocy ycixpi.

Pablo ñijot'ajtp co nicxy cogapxihuaangixy yi mibijcpidijc

¹⁷ Migüctijc ajcxy, cham hueeni xii tiempo ti ñaxy ma ca' n'oc'ijxcixni ajcxy, per ca' ñich müich ajcxy njäydigoy. Ooy ñich ajcxy nja'nicxa'ñ ma müich ajcxy jadüg'oc, e ca' y'oyi nej ñich ajcxy nicxyibich ma müich ajcxy. ¹⁸ Ooy ñich ajcxy njanicxa'ñ anajty ma müich ajcxy. E ñich, Pablo, ci'm anajty njanicxa'ñich mejtz'oc tugüg'oc, e je mujcu' nnii'aa ndü'aa ti xy'adujcich. ¹⁹ ¿Ti mij'ajt müich ajcxy mdiy njijp'ijxpich? ¿Ma mdiy ajcxy nbada'ñich njotcuje'ajtin n'oy'ajtin? Co anajty ajt nHuindzin Jesucristo yhuimbity ya naaxhuiñ, nbadaamybich jotcuje'ajtin etz oy'ajtin mij'ajtin müd je tübi nduuiñich ma müich ajcxy co ti mmijpidaaccixy Dios y'ayuc ytiy'ajt. ²⁰ Müd müich ajcxy ycixpi nmüdich jotcuje'ajtin etz xondaacin.

3

¹⁻² Müd jada tajin mayin co ñich anajty ca' nmimadäga'ñ müd müich ajcxy ycixpi, paady ñich ajcxy nhuinma'ñ nbidägy co jëbi nhui'ma'ñich naydüg jim Atenas, etz jëbi nguexyich ñich ajt nmigüg Timoteo ma müich ajcxy. Timoteo nañ jadu'n ytuñ ma Dios ytung quipxyi müd ñich co ngapxhuäcxyich je Cristo y'ayuc ytiy'ajt oybi. Yi Timoteo ñigapxpedipy ñich n'ayuc etz xyjotmicmigapxip ajcxy, jigix jac mic ajcxy myajpaadip ma mmibijcin. ³ Jadu'n Timoteo ytunipy ma müich ajcxy jigix ca' nhuinma'ñytigooogixip müd je tzaachypi huidibi ajcxy mminajxyp myajnajxyp. Müich ajcxy mnejhuüyb co copicy myajnajxyp ajcxy tzaachypi müd Jesucristo ycixpi. ⁴ Co oga'n n'ijtyich ma müich ajcxy, chi ñich müich ajcxy nnimaayich co tzaachypi mminájxcixipy myajnajxcixipy müd Jesucristo ycixpi. E müich ajcxy cham mnejhuüygixyp co janch tiy'ajt jadu'n nej nnimaaygixy, müd co cham tzaachypi mminajxcixy myajnajxcixy. ⁵ Com nejhuüybich co tzaachypi mminajxyp myajnajxyp ajcxy, paady ycixpi tajpich maybich müd müich ajcxy ycixpi. E com ca' nmimadäga'ñich je tajin je mayin, paady ycixp ti nguexyich Timoteo ma müich ajcxy jaydëbi tiy'ajt xypaadibich pen tiydudägy miich ajcxy mmibicy. Tzigüybich anajty co ndiy je mujcu' ti xyajhuinma'ñytigoogixy, etz jadu'n anajty ñaadig'i'ada'ñ ñich ndung ma müich ajcxy.

⁶ Jadachambi Timoteo ti xyñihuimbityich, choon ma müich ajcxy jim Tesalónica, etz ti xyajnejhuüyich jadu'n nej müich ajcxy mmüdity mmibijcin, etz nañ ti xyajnejhuüyich jadu'n nej mnaychójcigixy mnayjihüüygixy nidüg nidüg. Timoteo nañ jadu'n xyñimaaybich jadu'n nej müich ajcxy xyjäymechich etz xychocy xyjihüüyich, etz nañ ooy müich ajcxy xyja'ixaangixyich jadüg'oc, jadu'n nej ñich müich ajcxy nañ jadu'n ooy nja'ixaangixy. ⁷ Migüctijc ajcxy, ooy capxy agujc ayuc agujc naypaadyich. E co Timoteo ti mimiñ je oybi ayuc tiy'ajt jadu'n nej müich ajcxy mjacpanicxy tiydudägy yi mibijcin, chi mij ooy ti njotcugiyich. ⁸ Jadachambi jëbi njactzinäyich jotcuje, com ti nnejhuüyich co müich

ajcxy ca' m'ixtigihuaccixy ma mmibijcin. ⁹ Nyajnajxpich jäygidacın ma Dios yhuinduu mïd miich ajcxy ycixpi, mïd co janch jotcujc nayjihuiyijich co miich ajcxy ca' m'ixtigihuagy ma mmibijcin. ¹⁰ Xim tzuom nmibijctzooyich Dios mïd tüg'ócıy njot nhuinma'ñich, jigix Dios xyaj'ahuáatzibich nni'aa ndü'aajich, jëbi nnicxyich cı'm ma miich ajcxy, jaydëbi njacyaj'ixxpigipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmibijcin ma mjacyajtigoy'ijtcixy.

¹¹ Njijp'ixypich co Dios Teedy cı'm etz ajt nHuindzin Jesús xyaj'ahuáatzibich nni'aa ndü'aa jigix nicxy n'ijxcixy jadüg'oc. ¹² Hich ajcxy ndzojcpy co ajt nHuindzin Jesucristo xyjacmóoygixipy tzojcin jihuıyın, jigix nigi ajcxy mnaychogıyb mnayjihuihuıyb miñ xyıpy, e nañ nigi mdzócxıpy mjihuıygıxıpy tüg'ócıy je mayjäy, tim jadu'n nej ich miich ajcxy ndzocy njihuıy. ¹³ Hich ajcxy ndzojcpy co Dios xyaj'ijtip ajcxy mjot mhuinma'ñ tücci'y ma Jesucristo ytiy'ajt, e ca' m'ixtigihuaccixy, jigix co anajty ich ajt nHuindzin Jesús ymiñ jadüg'oc ya naaxhuiñ mïd tüg'ócıy je mibijcpıdjic huıdibi mïd huádz yjot yhuinma'ñ, jëbi miich ajcxy mnayguëxigıyb ma Dios Teedy yhuinduu mïd huádz mjot mhuinma'ñ, ca' ti xihuın ma Dios mïd miich ajcxy.

4

Je tzinaayın jugy'ajtin huıdibi Dios yjäygidacyp

¹ Jadüg nax, migügtıjc ajcxy, jadachambi may'ajt nbijctzooyich, e nyajnibijccixy mïd ajt nHuindzin Jesucristo ycixpi co ajcxy mjac-cuychinahuıpy Dios y'ayuc ytiy'ajt, jadu'n nej ti nyaj'ixpıcyich miich ajcxy, etz mjactzinahuıpy ajcxy jadu'n nej jëbi Dios jäygidägy ajcxy mdzinaayın, jadu'n nej ti mdungıxy.

² Miich ajcxy mnejhuıyb je cötujcin huıdibi ti nyaj'ixpıccixy. Jada cötujcin ich ajt nHuindzin Jesucristo ti xyajniбіcyich. ³ Miich ajcxy mnejhuıyb je cötujcin jadu'n nej Dios tzocy co huádz jot huádz huınma'ñ myajtüngıxıpy ma yi mdzinaayın mjogy'ajtin. Ca' huaad mmıgapxtıgooyıxıpy tüg töxyjäy. ⁴ Miich ajcxy mnejhuıyb Jesús ycötujcin co copıcy nidüg nidüg yëydıjc pigıpy tüg töxyjäy etz yajmıj'adıp ytöxyıjc, etz nañ mıddzinahuıpy mïd oyjot oyhuınma'ñ. ⁵ Ca' Dios jadu'n tzocy co je yëydıjc nijot'aty töxyjäy mïd jıbic-huınma'ñ, jadu'n nej yi jäy ajcxy y'idıch huıdibi ca' nejhuiy Dios ytiy'ajt. ⁶ Ca' huaad ni pin mıgapxtıgooyı ymıgüg ytöxyıjc, com Dios yi' tzaachytunıb mıcjajee pinjaty mıgapxtıgooyb ymıgüg ytöxyıjc. Jada cötujcin ti nyajni'ixıygıxy jayhuın. ⁷ Com Dios jadu'n ti xyhuın'ıxım jigix oyjot oyhuınma'ñ ndunım, canan co ndunım jıbic jot jıbic-huınma'ñ. ⁸ Co tüg jäy ytundıgooy mïd huingbi töxyjäy huıdibi ca' töxyıjc'adyıı, hue' je' ñixııcpy yajxiıcpy Dios ycötujcin, canan jäy ycötujcin ñixııcpy yajxiıcpy, e nañ ñixııcpy yajxiıcpy je Espıritu Santo huıdibi Dios ti quexy ma ich ajt.

⁹ Miich ajcxy mnejhuıyb je cötujcin co copıcy mdzogıpy mjihuıhuıpy ajcxy mmıgügtıjc huıdibi tzinaayb jım Macedonia ñaaxjot. Migügtıjc ajcxy, may'ajt nbijctzooybich co jacnaychócgıxı jacnayjihuiıygıxı. ¹⁰ Janch tiy'ajt jadu'n co miich ajcxy mdzocy mjihuıy tüg'ócıy je migügtıjc huıdi tzinaayb jım Macedonia ñaaxjot. Nmıgügtıjc ajcxy, may'ajt nbijctzooybich co jacnaychócgıxı nayjihuiıygıxy etz mnayyajmıj'ajtıgıxy mıj cajee. ¹¹ Jatyım tzinaaygıxı nıcy xeemy, aguıjc

jotcuyc. Pidäg ajcxy mjot mhuinma'ñ ma mgi'mdzinaayin, etz nañ jatytim naymidúunigix. Jada tiy'ajt ti najtzcapxiiyi ajcxy jayhuin. ¹² Tungix mgi'mdung, jigix yi jäy ajcxy huidibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³ Migügtijc ajcxy, ndzojcpich co miich ajcxy mhujnhuuihuip je tiy'ajt ma je' yajpaady y'alma je migügtijc tiibi y'öccixy, jigix ca' mdájcixipy mmáygixipy, jadu'n nej je jäy ajcxy nidajcixy nimaygixy huidibi ca' mibijccixy co Jesús yajjugypiga'ñ jadüg'oc je tiibi ajcxy y'o'ccixy. ¹⁴ Jadu'n nej iich ajt nmibijcim co Jesús yjugypicy co y'o'cy, nañ jadu'n Dios yajjugypijctähua'ñ je öcpidijc huidijaty ajcxy mibijc Jesús.

¹⁵ Paady ycixpi iich miich ajcxy nnimaaygixy co ajt nHuindzin Jesús tiy'ajt ti yecy co iich ajt huidibi jacjy'ajtp co anajty Jesús yhuimbity ya naaxhuiñ, tügmucy xyajnicxaanim müd yi mibijcpidijc tiibi y'o'ccixy. Ca' iich ajt njayijp'adaanim yi tiibi y'o'ccixy, yi' ajcxy jayijp'adamb. ¹⁶ Iich ajt nHuindzin Jesús ci'm yhuimbida'ñ ya naaxhuiñ chona'ñ tzajpjoty müd ycötujcin, müd ymic'ajtin, e yi' mic capxamb ane'mamb. Huimbida Jesús quipxy müd tüg ángel mjtungmüdpí huidibi nañ jadu'n mic capxamb ane'mamb. E co anajty yhuimbity, chi Dios yajxuxa'ñ yi' ytrompeta, e tim huin'itiy Jesús xyajpidictähuaanim ya naaxhuiñ, e chi ajt naybadaanim müd Jesús jocjoty. ¹⁷ E chi iich ajt huidijaty anajty jactzinaayim, naybadaanim müd ajt nHuindzin Jesús jocjoty quipxy müd je'ajcxy huidibi anajty ti yjugypicy jadüg'oc. E jadu'n ndzinähuaanim huinixi huinitempo müd ajt nHuindzin Jesús. ¹⁸ Müd jada ayuc tiy'ajt nayyajotcugiiyigix miñ xyipy.

5

¹ Migügtijc ajcxy, ca' ycopicyty njacnijayiiygixipy jadu'n nej je xii je tiempo yca'pxa'ñ. ² Miich ajcxy mnejhuuiyb co iich ajt nHuindzin Jesucristo yhuimbida'ñ ya naaxhuiñ tzaachytuna'ñ yi mayjäy müd ypocy ycixpi. Jesús miinaamb mina anajty je mayjäy ca' ti ocjijp'ixjni. Jadu'n ymiina'ñ jadu'n nejjihuuy tüg meetzpi ymiñ coodz co ymeedza'ñ. ³ Co anajty je mayjäy yminaangixy: "Cham ooy jotcuyc ndzinaayim, ca' ma tzip capxy", chi timitiina jotcömoñi Dios yajtigoya'ñ je naaxhuiñybi. Timitiina ayo'n ñimiinüyb jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'ñ. E ni pin huaad cacöguëgipy je tzaachypi co Dios anajty ymiñ ya naaxhuiñ yajtigoydähua'ñ yi mayjäy. ⁴ Per migügtijc ajcxy müd miich ajcxy Dios ytiy'ajt, paady miich ca' jadu'n myajpaatcixni nejjihuuy mdzinaaygixy agootztuuby. Ca' ajcxy mgixipy mgüedípy mina anajty Jesús miñ jotcömoñi, jadu'n nej jäy nigooobi ycixy ycuency co ti ymeechyii. ⁵ Com tüg'öciy miich ajcxy Dios y'ayuc ytiy'ajt mhujnhuuiygixy, jadu'n nipaady jadu'n nejjihuuy ti mgoximiiygixy ti mgodixcixcixy. Iich ajt ca' njacyajpaatim agootztuuby. ⁶ Paady ycixpi ca' huaad njäy digooyim Dios ytiy'ajt, ca' huaad nmi'öctigooyim jadu'n nej yi jacjaydyii jäy ajcxy huidibi ca' cuendituñ Dios y'ayuc ytiy'ajt, jadu'n yi' ajcxy nipaady jadu'n nejjihuuy ajcxy ti ymi'öctigoy. Ijtcix ni'ixi müd tüg'öciy Dios y'ayuc ytiy'ajt. Mi'ijtcix huivy cuyc mjot mhuinma'ñ. ⁷ Yi jäy ajcxy huidibi maab, coodz ajcxy ymäy. Yi jäy ajcxy huidibi muucip, coodz ajcxy ymúucigixy. ⁸ Iich ajt

huidibi nnejhuuyim Dios ytiy'ajt, copicy huijy ycuje ajt ndzinaayim, e nañ copicy nmibijcim Jesucristo e nañ naychójcigix nayjihuiyigix miñ xyipy, jadu'n nipaady nej soldadtjic ñaygohuáanigixy miñd pujx huidibi ymiñd ma ycaach. E miñd co njijp'ijxim co Dios xyajniñdzogaanim ajt n'alma, jadu'n nipaady nejihuuy soldadtjic ñaygohuáanigixy miñd ypujxcópur.⁹ Com Dios xyajjuggy'ajtim co yxhaachytunaanim xyajtigoyaanim, Dios xyajjuggy'ajtim nej n'alma jëbi paatim niñzoocin co nmijpidaacim iich ajt nHuindzin Jesucristo.¹⁰ Jesucristo ti y'ögy miñd ajt nbocy ycixpi, jigix jëbi huaad ndzinaayim jiiy tzajpjoty quipxyi miñd yi', ca' ñejity pen ti anajty n'o'cim o pen jini anajty njugy'ajtim co anajty Jesucristo yhuimbity ya naaxhuiñ.¹¹ Paady ycixpi jacnayjotmicmigápxigix, e nañ jacnaybubéjtigix nidüg nidügti, tim jadu'n nej cham mdungixy.

Pablo capxhuijy yi mibijcpidijc ajcxy

¹² Migügtjic ajcxy, may'ajt nbijctzooybich co yajmij'ajtcixy ajcxy yi migügtjic huidibi tumb ma miich ajcxy miñd Dios y'ayuc ycixpi. Yi' ajcxy huidibi xyajni'ixiyyb Dios y'ayuc ytiy'ajt, yi' ajcxy xycapxhuijip miñd ajt nHuindzin Jesucristo y'ayuc ytiy'ajt.¹³ Copicy myajmij'ajtcixipy ooy, etz nañ mdzójcixipy miñd je Dios ytung ycixpi huidibi ajcxy ytumyb ma miich ajcxy. Tzinaaygix jotcuje ca' ma tzip capxy.

¹⁴ Nañ jadu'n, migügtjic ajcxy, nyajnbijcipy ajcxy co myaj'ojip yi migüg ajcxy huidibi ca' ti dung tuna'ñ, etz nañ mjotmicmigapxip huidibi ajcxy tajp maayb, etz nañ mbubedipy ajcxy huidibi hueeni miñd ymibijcin, etz yajtungix mecxtujcin miñd tüg'óciy migügtjic.

¹⁵ Iich miich ajcxy nimaayb co ca' ni pin huaad yaj'ahuimbidiy jibic ma ymigüg huidibi ti ymidundigoyii. Nañ jadu'n nimaaygixy co naymi'oyjäy'ajtigix nidüg nidügti. Nañ jadu'n oyjäy'ajtin mdunipy ajcxy miñd tüg'óciy naaxhuiñjyäy.

¹⁶ Jatytim miñd'ajtcix jotcuje'ajtin jabom jabom.¹⁷ Capxtaaccix etz mibijctzoogix Dios jabom jabom.¹⁸ Yajnajxcix jäygidaacin ma Dios pen ji ajcxy mjajtcixy ayoogixy nejaty, com Dios ooy yjotcuje'ajtcixy co je migügtjic huidibi mibijcp Cristo Jesús yajnaxy ajcxy jäygidaacin ma yi' jabom jabom miñd tüg'óciy huidibi tuunip jajtíp ma yi' ajcxy.

¹⁹ Capxymidoogix je Espíritu Santo, co ngacapxymidoohuim je Espíritu Santo huin'it nyajtigooyim Dios yjihui'ñ ymic'ajt huidibi yajpatp ma iich ajt.²⁰ Yajjotcuje'ajtcix huenpinity pin Dios y'ayucpidzimb ma miich ajcxy.²¹ Jëyi janchtiy m'ixipy peni quipxyiyyb miñd Dios y'ayuc huidibi ajcxy ycapxyp. Mijpidaaccix je ayuc tiyybi.²² Ixmajtcix tüg'óciy jibic ayuc jibic-huinma'ñ.

²³ Dios nmibijctzooybich, je Dios huidibi yejcpy jotcuje'ajtin, co ajcxy xyajhuaatzaayip mjot mhuinma'ñ ma yi' jibicpi. Dios nmibijctzooybich co yi' ci'm xycuendi'ajtip huádz oy yi' m'alma ajcxy, etz yi' mjihui'ñ, etz mnix mgohuajc, ca' ma pocy yquëxgy, ixti mabaad anajty iich ajt nHuindzin Jesucristo ymiñ ya naaxhuiñ.²⁴ Je Dios huidibi ti xyajmibijccixy, tudägy yi', e ycuydunipy yi' y'ayuc miñd miich ajcxy.

Capxpooocxin huidibi cijxnip je necy

²⁵ Migügtjic ajcxy, mibijctzoogix Dios miñd iich ajcxy ycixpi.

²⁶ Naygapxpóocxigix xic xon nidüg nidüg miñd oyjot oyhuinma'ñ.

²⁷ Nhuindzin Jesucristo ajt ti xyajnbicyich jada tung, paady nyanjibijccixy co jada necy mgápxcixipy ni' abidzimy ma tüg'óciy mibijcpidijc.

²⁸ Dios nmibijctzooybich co #ch ajt nHuindzin Jesucristo xyconuucxip
ajcxy. Jadu'n jada. Amén.

2 TESALONICENSES

Yi Mimetz Necy Huidi San Pablo Yajnigiejx Je Mibijcpidijc Jim Tesalónica

¹ Ich Pablo muid Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma ich ajt nDios Teedy etz ajt nHuindzin Jesucristo. ² Huen ich ajt nDios Teedy etz ich ajt nHuindzin Jesucristo may'ajt oy'ajt tunipy muid miich ajcxy etz yajjotcugiygixip.

Dios tñyduñpy yi pocyjädijc ajcxy co anajty Cristo ymiñ jadug'oc

³ Migügtijc ajcxy, njatytimyajnajxypich jabom jabom jäygidaacin ma Dios muid miich ajcxy ycixpi. E jadu'n copicy nyajnaxyich jäygidaacin ma Dios, com miich ajcxy mibijcipy Jesucristo nigí jabom jabom, etz nañ nigí jabom jabom naychójcigixy najjihuñyigixy nidüg nidüg. ⁴ Com miich ajcxy ooy nuucxy meecxy m'ijtcixy ma yi tzaachypí etz ayo'n huidibi ajcxy mmínajxyp myajnajxyp, e nañ ooy mmijpidaaccixy Jesucristo, paady ycixpi ngapxpaadyich miich ajcxy ma yi migügtijc huidibi mijpidaacp Dios majaty tüg tüg cajp. ⁵ Miich mmibijcin etz mmecxtujcin yi' je' iixpejtíp co Dios ytudägyity muid ajcxy ytiyduunin, e xycöbijccixy co jëbi mdigügyigixipy ma yi y'ane'mdac muid mmibijcin ycixpi. Muid jada ycixpi miich ajcxy mmínajxcixy myajnajxcixy tzaachypí ayo'n.

⁶ Muid co Dios ytudägyity, yi' tzaachytunamb yi jäy ajcxy huidibi miich ajcxy xy'ixhuidijtp xypahuidijtp. ⁷ E nañ yi' ajcxy xymöhuipy jotcuje'ajtin tim jadu'n nej xymöhuáangixyich jotcuje'ajtin je huin'it xi co anajty ajt nHuindzin Jesucristo ñayguexigiyi co anajty miiñ ya naaxhuiñ jadüg'oc choon anajty tzajpjoty. Nañ je ángeles ajcxy mic'ajt muidpi miinaamb quipxy muid Jesucristo. Miinaamb Jesús muid ane'min cötujcin e yajtigoydáhua'ñ pocyjädijc, tim jadu'n nej tüg mijjin yajhuindigoydäy huen ytiijity. ⁸ Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidägy ajt nHuindzin Jesucristo y'ayuc ytiy'ajt oybi. ⁹ Yi jäy ajcxy huidibi miich ajcxy xy'ixhuidijtp xypahuidijtp, Dios yi' tzaachytunaanip ajcxy y'alma huinixi huinítiempo. Dios ypidägaanip yi' ajcxy y'alma jiguëgy ma ni camínaxi ajcxy ixcixyp je nHuindzin Jesucristo etz yi' y'oy'ajtin etz ymic'ajtin. ¹⁰ Jadu'n yjadipy je huin'it xi huin'it tiempo co anajty ajt nHuindzin Jesús miiñ ya naaxhuiñ, Jesús je mibijcpidijc yajmij'ada'ñ etz huindzigihua'ñ, e nañ jadu'n miich ajcxy myajmij'adipy etz mhuindzigihuiipy muid co anajty y'ayuc ajcxy ti mmibijcci, je ayuc huidibi ti ngapxhuäcxyich ma miich ajcxy.

¹¹ Paady ycixpi jabom jabom Dios nmibijctzooyich muid miich ajcxy ycixpi, jaydëbi tudägy ajcxy mdzinähuipy, e Dios huidibi ti xyhuin'ijxcixy yjäygidägipy yi' miich ajcxy mdzinaayin. Nañ jadu'n Dios nmibijctzoogixy muid jada ycixpi co yi' cuydunipy huidibi miich ajcxy mbijctzooyb m'amidooyb muid oyjot oyhuinma'ñ. E nañ ycuydunipy yi' huidibi miich ajcxy mdumyb muid mmibijcin. ¹² Com Dios jadu'n tunamb ma miich ajcxy mjot mhuinma'ñ, paady ycixpi ajt nHuindzin Jesucristo yxi capxpaady y'idipy ma miich ajcxy mdzinaayin etz nañ jadu'n miich

ajcxy capxpaady m'idipy ma Jesucristo. Jadu'n yjadipy com ñch ajt nDios etz ajt nHuindzin Jesucristo may'ajt oy'ajt tuñ ma miich ajcxy.

2

Je jibic jäy huidibi huin'ñmb mayjäy

¹⁻² Migügtijc ajcxy, cham nyajmñdmñydaaccixy je xñ je tiempo co anajty ajt nHuindzin Jesucristo huimbidaanì jadüg'oc ya naaxhuiñ, etz naybadaanim mñid yì'. Nminucxtaacpyich miich ajcxy, ca' mhuinma'ñyitigooygixy co pinjaty ymñna'ñ co Jesucristo ti yhuimbity. Ca' mmñbijccixy, ca' jada ayuc yjanchity. Ca' mdungixy cuendi yì jäy ajcxy y'ayuc huidibi mñamb co tüg espíritu ti yajnejhuñyigixy co yjadu'nity, o co muum a'ijxnaxy amidoonaxy capxy ayuc, o co muum ijxpidzimy jada ayuc ma tüg necy huidibi ajcxy ytiypy co ñch nnecy'adyii. ³ Ca' myajhuin'ñngix janch ni nej. Jayijp ca'nì anajty je xñ je tiempo yhuaad'atyñi ma anajty Jesucristo ymiina'ñ jadüg'oc ya naaxhuiñ, mayjäy ajcxy midziptzona'ñ Dios tiydudägy co ñayguëxigiyb tüg jibic jäy mic jäy huidibi Dios yajcödigooyamy tücci'yì. ⁴ Jada jibic jäy ymidziptzonamyb tüg'óciy tijaty huidibi jäy Dios'ajtpy, e nañ ymidziptzonamyb huidibi jëbi yaj'ojadaty. E nañ yì naybidägiib amij agix jadu'n nejhuñ yjacmijity ca'ydi Dios. E nañ yì ypidägamb y'ane'mdac ma Dios ytiyc, e naybidägaanip nejhuñy Diosity.

⁵ ¿Nej ca' mjäymejtzcixy co jadu'n nimiydacyich tüg'óciy jada tiy'ajt jayhuin je taab anajty n'ityich ma miich ajcxy? ⁶ Jadachambi miich ajcxy mnejhuñy pñ yajhuäcxijp jada mic jäy jada jibic jäy, jigix ca'ydi ñayguëxigyii jayijpni ma ca'nì tiempo yhuaad'atyñi mña Dios a'ixhuip co ymiinipy. ⁷ Je mic jäy je jibic jäy cham ñi'ixiyb ameech je jibicpi huidibi ytunamyb, jëyi ytigoy'ityñi mña je tü'aa y'ahuächyii, je huidibi yajhuäcxijp. ⁸ Co anajty je jibic jäy ytü'aa y'ahuäch, chi ajt nHuindzin Jesús yajcödigooyipy mñid tüg puxujin. Jesús yajcödigooyipy je jibic jäy mñid yì y'oy'ajtin etz ymij'ajtin co anajty yhuimbity ya naaxhuiñ. ⁹ Je jibic jäy, yì je' ymñid je mujcu' yhuinma'ñ etz ymic'ajt, e ytunamyb mijhuinma'ñ etz ijxpejt huidibi anijp. ¹⁰ Je jibic jäy ytunamyb tüg'óciy tijaty jibic-huinma'ñ jigix jëbi huin'ñinip yì jäy ajcxy huidibi y'alma tigoyipy, mñid co ca' ajcxy cöbijccixy, e nañ ca' tzojccixy Dios y'ayuc ytiy'ajt huidi mñid jëbi y'alma ñidzooccixy. ¹¹⁻¹² E je' ycixpi co ca' ajcxy cöbiga'ñ Dios ytiy'ajt, paady Dios y'ixmadzáanigixy huen yajhuin'ñngixy, huen mñbijccixy je mujcu' y'anñ, e mñid jada ycixpi jëbi Dios yajtigooyi yì ajcxy y'alma nidüg'óciy huidibi ca' mñbiga'ñ Dios ytiy'ajt. Jacjotcujc ajcxy co jibic-huinma'ñ tungixy.

Je jäy ajcxy tñbi Dios yhuin'ixyii jigix ypocyñihuädzipty

¹³ Migügtijc ajcxy huidibi ajt nHuindzin Jesucristo ooy tzocy jihuñy, jabom jabom nyajnaxyich jäygidaacin ma Dios mñid miich ajcxy ycixpi, mñid co Dios ti xyhuin'ijxcixy oga'n'aty, jigix jëbi m'alma ñidzooccixy mñid Dios yjihui'ñ ymic'ajt, etz nañ mñid Dios y'ayuc ytiy'ajt huidibi ti mmñbijccixy. Je Dios yjihui'ñ ymic'ajt xyajhuaatzip ajcxy mjibicjot mjibic-huinma'ñ. ¹⁴ Paady ycixpi Dios ti xyhuin'ijxcixy, e nañ xyajmñbijccixy mñid yì y'ayuc ytiy'ajt huidibi ñch ajcxy ngapxhuächxyp, jigix jëbi mbáatcixipy oy'ajtin ma ñch ajt nHuindzin Jesucristo.

15 Paady migügtijc ajcxy, mibijccix tiydudägy, ca' m'ixtigihuaäccixy, e ca' mjäydigooygixy je tiy'ajt huidibi ñch ajcxy ti ngapxhuäcxy ma miich ajcxy, etz jadu'n nej ti nñimaaygixy necyjoty. 16-17 Huen ñch ajt nHuindzin Jesucristo ci'm etz ajt nDios Teedy may'ajt oy'ajt tunipy mïd miich ajcxy, e xyajjotmicprijccixipy etz xyajmibijccixipy tiydudägy, jigix oybi ayuc mgäpccixipy etz mdunipy ajcxy tüg'óciy oybi huinma'ñ. ñch ajt nDios Teedy etz ñch ajt nHuindzin Jesucristo xychojcim xyjihuiyim, e ti xymooyim jotcuje'ajtin huinixñibi, e nañ ti tuñ may'ajt oy'ajt mïd ñch ajt ycixpi, jaydëbi njijp'ixxim oy'ajtin jilby tzajpjoty.

3

Mibijctzoogix Dios mïd ñch ajcxy ycixpi

1 Jadügnax, migügtijc ajcxy, tungix may'ajt mibijctzoogix Dios mïd ñch ajcxy ycixpi, jigix jëbi ngapxhuäcxiwich huinmic jotmic Jesús y'ayuc ytiy'ajt huingnaax huinggajp. E nañ mibijctzoogix Dios jëbi yi jäy ajcxy mijpidägipy Jesús y'ayuc ytiy'ajt oybi, tim jadu'n nej miich ajcxy ti mmijpidaaccixy. 2 Nañ mibijctzoogix Dios mïd ñch ajcxy ycixpi, jigix ñch ajcxy Dios xyñihua'nipy xychohua'nipy ma yi jäy ajcxy huidibi jibic-huinma'ñ ymiid, huidibi jibic ñch ajcxy xytunamb, com mayjäy ca' mijpidägy Jesús y'ayuc ytiy'ajt. 3 ñch ajt nHuindzin Jesucristo tudägy yi', e xypubedip xypudigihuij ajcxy jigix miich ajcxy ca' mjotmetzcihuiipy ma yi mmibijcin, e nañ xypubedip ajcxy, jigix ca' xymimadaäccixipy je jibicjäy huidibi Dios ca' capxymidoy. 4 ñch ajt nHuindzin Jesús jotcuje'ajtin ti xymóoygixyich mïd miich ajcxy ycixpi. Nmibijcipyich co miich ajcxy mguydumyib je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. 5 Com ca' ñch njaty nej njijpcogapxihiwich, chi nguejxyich cogapxy, nnejhuihua'ñich nej anajty ajcxy myajpatcixy ma yi mibijcin, tzigüyb ñch anajty co nicxy mujcu' xypidaaccixy jibictuum, chi ñch anajty ajcxy ndung ti ñaadigi'aty.

Ooyycopicyity co nduunim ma ajt ndung

6 Migügtijc ajcxy, mïd ajt nHuindzin Jesús yxi etz ymic'ajt jada ane'min ajcxy nyajñibijcipy, co copicy ajcxy m'ixmadzipy yi mmigüg huidibi ca' ytuna'ñ ma yci'ndung, etz huidibi ca' cuyduñ Dios ytiy'ajt jadu'n nej ñch tiy'ajt ti nyecy. 7 Miich ajcxy mnejhuiyb jadu'n nej ñch ti ndzinäyich ti njugy'atyich co ti n'ityich ma miich ajcxy. E jëbi tiy'ajt ajcxy mbigipy ma ñch ndzinaayin nej jëbi miich ajcxy mdzinaaygixy. Co anajty ñch njimity ma miich ajcxy, ca' ñch n'ixmajch ngi'ndung. 8 Tüg'óciy ñch ajcxy ngaayin n'uucin ngojuuyich. Nduñ n'ayooyich anajty xim tzuum, co anajty ca' n'adziba'ñich ni tüg. 9 Dios ti xymöyich mic'ajt ane'min co ixypy ajcxy mbubejtin ti nbijctzoohui o ti nbijctzoohui ixypy ajcxy mgaayin m'uucin, per ca' ñch ajcxy jadu'n ti ndungixyich, jigix iixpejt ajcxy mbigipy ma ñch ajcxy. 10 Com co anajty n'ityich ma miich ajcxy jada cötujcin ajcxy nyajñibijc co pinjaty ca' ytuna'ñ, ca' ajcxy myajcayipy myaj'ügipy. 11 Jadu'n ñch ti nnejhuiy co nijëjity miich ajcxy ca' mdunaangixy mgi'ndung, jëyi myöygixy mnajxcixy jäyjin jäydijc. 12 Yi jadu'mbi jäy ajcxy nyajñibijcipyich mïd ñch ajt nHuindzin Jesús yxi co huen tungixy jabom ma yci'ndung, ca' huaad pin adzijpcix anajxcix jigix jëbi paadip ajcxy ycaayin y'uucin.

13 Miğügtijc ajcxy, oybi jatym tungixy jabom jabom, ca' mjotmetzcíygyixipy. 14 Pen nidügti ma miich ajcxy ca' tuñ cuendi jada ayuc huidibi ajcxy nyajnijayıyb, ijxcix pın je', e chi ca' mjactúngixip cuendi, e ni ca' miid myöymujc mnaxmújcixipy, jigix chöydunipy. 15 Ca' ajcxy huaad midzip'ajtcixy yi jäy ajcxy huidibi ca' yajxon cuyduñ Dios ytiy'ajt. Hue' janchtiy mgapxhuijcix oy'amy jadu'n nej tüg mibijcpi.

Capxpoocxin huidibi cijxnip je necy

16 Huen ñch ajt nHuindzin Jesucristo huidibi jotcujc'ajtin yejcp, ci'm xyajjotcugıygyixipy jabom jabom oytım mınaaxıjity oytım yma'ámyity. Huen je Huindzin Dios xypubejtcixy xypudıgygyixy.

17 ñch, Pablo, jada capxpoocxin ci'm njaayıch. Jadu'n nfirmajıyıch tüg'ócıy ñch nnecy, e jadu'n miich ajcxy mnejhuıhuiipy co ñch jada necy'adyii. 18 Huen ñch ajt nHuindzin Jesucristo may'ajt oy'ajt tunıpy miid tüg'ócıy miich ajcxy. Jadu'n jada. Amén.

1 TIMOTEO

Yi Jayijpi Necy Huidibi San Pablo Yajniguejxy Timoteo

¹ Hich Pablo, Cristo Jesús xyaj'apóstol'ajtpich. Yi Dios huidibi xyñihuaanim xyyajñidzoocim ajt n'alma, etz Cristo Jesús huidibi xymöhuaanim jugy'ajtin huinixibi, yi' ajcxy ti xyajñibicyich co yi' y'ayuc ngapxhuäcxibich. ² Cham hich miich nijayiy Timoteo. Jadu'n njihuiy nej hich miich ngi'm'ung'adyii, co miich Dios ytiy'ajt ti mbaady ma hich. Huen Dios Teedy etz Cristo Jesús hich ajt nhuindzin may'ajt tunipy mhid miich, huen xypa'ayoohuipy etz xyajjotcugihuipy.

Nijëjity jäy yaj'ixpicy huidibi ca' ytiy'ajtity

³ Hui'mi' miich jim Efeso, jadu'n nej nimay je taabi anajty ndzona'nich jim Efeso nnicxa'nich anajty Macedonia. Hui'mi' jim, jigix mgapx'adugipy je jäy huidibi najtzcaxiyb je ayuc ca'p ytiy'ajtity. ⁴ Mgapx'adugipy je nigooobi y'ayucity. Mgapx'adugipy yi' ajcxy huidibi tzachnigapxp tzachnimäydacpy yi' judiojäy ajcxy y'ayuc jadu'n nej huidibi ñi'ap'ajtpy ñideedy'ajtpy ajcxy. Yi jadu'mbi ayuc nigooob yajhuinma'ñy digoy pinjaty ixpijcp Dios ytiy'ajt.

⁵ Jadu'n Dios tzocy co huen jäy ajcxy naychojctäy yii mhid oyjot oy-huinma'n. Huen ajcxy Dios yajmij'aty janch cixyot huinjot. Co pin yajmij'aty Dios janch cixyot huinjot, ooy ajcxy oy ñayjihuiyigixy. ⁶ Nijëjity jäy ajcxy ti ixmajtzn je Dios ytiy'ajt, ti ajcxy jiptigiyñi je ayuc huinma'n huidibi ca'p choobaady. ⁷ Ooy yi' ajcxy jayaj'ixpiga'n yi Dios ycötujcin, ni ca' huinjihuiyigixy huidibi ycapxcixyp, ni huidibi ajcxy ñgapxpejtpy.

⁸ Hich ajcxy nnejhuuyim co yi Dios ycötujcin oy yi' pen nyajtunim nej ypadyii nej ytiy'ajtity. ⁹ Nejhuuyim co yi Dios ycötujcin ca' yi' tzaachytuñ oyjäydijc, jëyi tzaachytuñ pin ca' capxymidoy Dios, pin midundigooyb Dios ycötujcin. Je Dios ycötujcin chaachytumyb jäy huidibi ca' cuydungixy, jäy ajcxy huidibi ca' ytuädgyity, jäy huidibi ca' capxymidoogixy Dios, jäy huidibi pocytungixy, jäy huidibi ca' huindzigi'n yajtungixy mhid Dios, jäy ajcxy huidibi capxtigooyb, huidibi ytaj yteedy yaj'öccixy, huidibi jäy yaj'öccixy. ¹⁰ Je Dios ycötujcin chaachytumyb pin migapxtigooyb töxyjäydijc etz yëydijctjc, huidibi miyëydijc ymahua'n. Dios nañ chaachytumyb je jäy huidibi jäy majtzc etz toognaxy, chaachytumyb indaacpidijc etz nihuambejtpidijc. Je Dios chaachytumyb jacjadyii jäy huidibi y'ayuc ca' ytiy'ajtity nej Dios tiy'ajt mhidity. ¹¹ Jadayaabi tiy'ajt huätzpi oybi tüguyb mhid Jesucristo y'ayuc ytiy'ajt oybi huidibi hich nDios, je conuucxy yTeedy, ti xyyajñibicyich co ngapxhuäcxibich.

Pablo yjäygidacpy co Dios may'ajt ti tuñ mhid yi'

¹² Ooy njäygidägyich co hich ajt nhuindzin Cristo Jesús ti xyajmicpicyich, yi' ti xy'ijxtiyyich, yi' ti xyajñibicyich Dios y'ayuc co ngapxhuäcxpich. ¹³ Hich jecy'ajty jibic anajty nigapxy ni'ojiiyich Jesús. N'ixhuidijty nbahuidijtyich Jesús yjäy. Hich yi' ajcxy nmidundigooyich. Ti yi Dios xypa'ayooyich com hich jadu'n anajty ti n'adich mhid co nganejhuiyich je tiy'ajt, ngamibicyich Jesús ngamijpidägyich Jesús. ¹⁴ Paady ycixpi hich ajt nHuindzin Dios

may'ajt oy'ajt ti tuñ mijcajee müid ñich, co ti xyajmibicyich Jesús. E Jesús ti xymöyich tzojcin jihuiyin müid yí' yjáy ycixpi.

¹⁵ Ooy jada yjanchity, e nidüg'óciy jáy ajcxy jëbi mibijccixy co Cristo Jesús miñ ya naaxhuiñ co yajpocynihuádza'ñ pocyjáydiyc. E ñich ñigi pocy nmüdidyich ca'ydi ni pinjáy. ¹⁶ Müid jada ycixpi Dios ti xypa'ayooyich ti xymimecxtucyich, jigix co jáy ajcxy iixip nej Dios ti ytuñ müid ñich, huin'it ajcxy mijpidágyi yí' y'ayuc etz ypaadipy jugy'ajtin huinixibi ma Jesús. ¹⁷ Paady chojpcy co ngömayim Dios, je rey huidibi ane'mb huinixii, huidibi niminaa yca'o'cy, etz nipin ca'ixy. Je Dios tügpajc huidibi Dios'ajtp huen ycömay'idipy cham etz tüg'óciy xii tiempo huidibi mimb cidacp.

¹⁸ Timoteo, ooy ñich müich ndzocy njhuiy. Jada ayuc ñich müich nyajnimaydaayb. Mihuindinähuiip Dios y'ayuc ca' mhuinma'ñyidigoyipy. Mgyudunipy jadu'n nej Dios y'ayucnajtzcaxxiyb i xy'ñhuijy xycapxhuijy co mdung mnimajch. ¹⁹ Mihuindinähuiip Dios y'ayuc ytiy'ajt, huin'it ca' jibic mnayjihuihuiyb, jadu'n nej ajcxy jadyii huidibi nejhuiyb je tiy'ajt, e ca' cuydungixy, e jadu'ñyi yhuinma'ñyidigooyixy. ²⁰ Jadu'n nej Himeneo müid Alejandro ajcxy jaty, huidibi ñich ti nyajcidigiygixy je mujcu', jigix ajcxy yhuinma'ñymedzipy, ca'ydi yajjotma'tcixy Dios.

2

Jadu'n nej jëb Dios nmibijctzoohuim

¹ Yi' njatyajnimayyb co ooy ycopicyity capxtaaccixy mibijctzoogixy Dios etz yajnaxcixy Dioscojuyip müid tüg'óciy jáy ajcxy ycixpi. ² Copicy nnibijctzoohuim ma Dios: reydiyc, ane'mbidijc etz codungdiyc, jigix jëbi jotcuyc ndzinaayim, ca' ma tzip. Co jadu'n nduunim, yí' anajty ngoduunim Dios y'ayuc, etz huin'it tiydudägy ndzinaayim. ³ Com yí' jadu'mbi huinma'ñ ooy yí' y'oyity, e Dios huidibi ñich ajt n'alma yajnñdzooop, oy yí' jáygidägy. ⁴ Dios chojpcy co tüg'óciy je jáy ajcxy huen y'alma nñdzooocixy, huen ixcixy nejhuiygixy Dios y'ayuc ytiy'ajt. ⁵ Tüg je' je nHuindzin'ajtim Dios, etz tüg je' je huingapxpi huidibi jëbi ytiyiy ma Dios müid ñich ajt ycixpi, etz huidibi jëb Dios y'ayuc capxnajxy ma ñich ajt: je huingapxpi, je' je' je jáy, je Cristo Jesús. ⁶ Cristo Jesús nayyojxi naydooci müid ñich ajt nbocy ycixpi, ñaygyejci huen jáy yaj'ögyii, jigix jëb ñich ajt nbidziimim ma je mujcu' anajty ci'am xymüd'ajtim. Jadu'n nej Dios cham jáy yajnejhuiy co je tiempo yhuaad'ajtni, ⁷ paady Dios ti xyajmibicyich ngapxhuäcxibich y'ayuc ytiy'ajt, etz Jesús xy'apóstol'adyiijich. Je tiy'ajt jada ngapxpich, ca' n'indägyich. Ti xyajmibicyich jada tung nej jëb huaad nyaj'ixpicyich, nej jëb huaad mibijccixy Dios, etz nyaj'ixpicyich Dios ytiy'ajt ma yí' jáy ajcxy huidibi ca' yjudiojáyity.

⁸ Ndzojpcyich co yí' yëdijctijc huen mibijctzoogixy ojadajtcixy Dios ma tüg'óciy naymujctac müid oyjot oyhuinma'ñ, ca' y'adzip y'ahuan'nity, ca' y'ametz yjotmetzity. ⁹ Nañ jadu'n ndzoycypich co yí' töxyjáydiyc huen yhuít yxojx yajtungixy nej ypadyii, huidibi quipxpaady ajcxy paatip. Huen yhuít yxojx pidaaccixy nej töxyjáydiyc huidib tudägyip. Huen ycöhuay cüdigy caaxigy nej ypadyii, ca' ymügütiyc huinnaxtugipy müid yhuít yxojx, ca' nayxójxigixy müid oori, müid perla, e müid tijaty ooy choohuity. ¹⁰ Ca' huaad töxyjáydiyc ñaygömáygixy müid yhuít yxojx, huen janch yajcömaygixy müid y'oyjáy'ajtin, jadu'n nej je jáy ajcxy tungixy huidibi ti ñaygyéjcgixy cixyjot huinijot ma Dios. ¹¹ Co jáy ajcxy

yaj'ixpicy Dios y'ayuc ma je naimujctac, huen töxyjäydijc ajcxy amoyñi amidoo'ijtcixy müd yungnaxy yjot yhuinma'ñ. ¹² Yi töxyjäydijc ca'p niducyich yaj'ixpigipy jäy ajcxy ma je naimujctac. E ni ca' ypadyii nicxy yëydijc ane'my. Huen ajcxy amoyñi y'ity. ¹³ Dios jayijp yajcojy Adán, jac'axam Eva, paady ycopicy yi yëydijctijc huen ane'my yi töxyjäydijc. ¹⁴ Adán ca' yajtzu'ijxy. Eva yajtzu'ijx, je' ca' Dios capxymidoy. ¹⁵ Paady yi töxyjäydijc ca' ypadyii nicxy nigohuajc'aty yi mibijcpidijc. Dios jotcujc ñayjihuiyii müd co jëyi y'ung'ijxcixy, etz yajmij'ajtcixy Dios, etz tzojctaa'ygixy ymügügtijc, etz huen ajcxy cuydungixy Dios y'ayuc ytiy'ajt, etz huen tudägy jäy'ajtcixy müd oyjot oyhuinma'ñ.

3

Nej jëbi ytungixy huidibi ajcxy nigohuajc'ajtp

¹ Tiy'ajt jada nej jäy ymınaangixy. Pen ji pin najtzogiy nigohuajc'ada'ñ yi mibijcpidijc tüg yi' oybi anajty ytunamyb. ² Pin nigohuajc'ajtp yi mibijcpidijc ooy ycopicyity je' jadu'n naydijib huidibi ca' ti tundigoy, huidibi tüg töxyjäy müd ca'p ycanaagity, huidibi huijycujc jäy'ajtp, huidibi müd oybi yhuinma'ñ etz tudägy pi yhuinma'ñ, huidibi oyjäy'ajtin tumb, huidibi jajtp nej jäy ajcxy yaj'ixpigipy. ³ Pin nigohuajc'ajtp chojcpy tüg jäy huidibi ca' y'amügity, huidibi ca' yhuindzipity, huidibi yajtumb mex-tujcin, huidibi ca' chipcapxy y'ahua'ngapxy, huidibi ca' ti adzocy. ⁴ Pin nigohuajc'ajtp chojcpy tüg jäy huidibi tiydudägy tzinaayb ma yjin ytijc, huidibi y'ung y'anäg yajtzinaayb nicy yxeemy. ⁵ Pen ca' jaty nej y'ung y'anäg migapx ane'mip ma yjin ytijc, ¿nej oc'ane'ma'ñ yi mibijcpidijc? ⁶ Nañ ca'p yjéjity huidibi namni mibicy Dios y'ayuc ytiy'ajt. Ycadimjecyity nicxy ooy amij agix ñayjihuiyii, e nicxy camadägy je ane'min, e yjadipy jadu'n nej Satanás yjajty co jibic tumb ñayyajhui'mi müd Dios. ⁷ Chojcpy tüg jäy huidibi nidüg'óciy je mayjäy oy iixip. Pen ca' yjadu'nity nicxy pin yxiyii, e chi jada anajty je mujcu' ti ymımadägyii co jäy jibic ñigapxiyb.

Yi mutz tungmüd nañ chojcpy huidibi oyjot oyhuinma'ñ müd

⁸ Yi mutz tungmüd huidibi yajpat ma mibijcpidijc chojcpy jäy tudägy pi, huidibi nicy xeemy jäy'ajtp, huidibi ca' jäy'aty aguejtmñ aguejtxipy, huidibi ca' y'amügity, huidibi ca' y'adzocy ca' y'ameeñity. ⁹ Huen naybidaacigixy cixyjot huinijot ma je tiy'ajt janchypi. Je tiy'ajt huidibi je mayjäy ca' huinjihuüy. Je tiy'ajt huidibi ñch ajt nmibijcim. Je' chojcpy pinjaty huidibi ca' ti jibicpi jot'adyii huinma'ñ'adyii. ¹⁰ Pinjaty mutztung yajnicxamb, jayijp jot'ix huinma'ñ'ix pen tudägy yhuinma'ñ. Huin'it jëbi mdungmöy. ¹¹ Yi mutz tungmüdpi ytöxyijc chojcpy co huen tudägy jäy'aty, huidibi ca' ñigapx ñi'oñy ymügü, huidibi nicy xeemy jäy'ajtp, huidibi cuydundaayb tüg'óciy. ¹² Yi jäy huidibi mutztung yajnicxamb chojcpy tüg jäy huidibi picy chinaayb, huidibi ca'p müdity metz o tugüg töxyjäy, huidibi y'ung y'anäg yajtzinaayb nicy xeemy, huidibi tiydudägy tzinaayb ma yjin ytijc. ¹³ Yi mutz tungmüdpi huidibi yajxon ytung cuydungixy, cömay yi' ajcxy idipy ma mibijcpidijc. Nañ ñigi ajcxy xpijcdich Cristo y'ayuc.

Dios mijhuinma'ñ tuun müd ñch ajt yci xpi

¹⁴ Jada necy ñch müch nyajñigüe'jxyp. Njijp'ijxypich co tzojc nnicxa'ñich jim ma müch. ¹⁵ Pen ca' y'oyiy nej tzojc nnicxibich ma müch,

ti yam nyajnijayïy je janchypi. Mïd jada necy huaad jëbi nidüg nidüg mibijcpi yjây'ajtigixy ma yi mibijcpidijc huidibi mijpïdacp Dios juugypi, je Dios huidibi huijtz'ijtaayb etz cohuandaayb je tiy'ajt janchypi. ¹⁶ Janch tiy'ajt jada co mij yi' yi Dios y'ayuc ytiy'ajt huidibi ti xyajnejhuïïyim, je huidibi jecy'ajty ca' pin nejhuïy. Je tiy'ajt huidibi xyajnejhuïïyim co quexy y'ung ya naaxhuiñ.

Dios y'ung hue' je' yaj'ijxy mïd ñinicx. Tudägy nayguëxici mïd Dios yjihuiñ ymic'ajt. Je Dios y'angeles ajcxy ti ixyii. Ti yajnijapxy yajnimïydägy Dios y'ung ma huidibi ca' yjudiojäyity nañ ti jäy yajmij'ajtcixy Dios y'ung ya naaxhuiñybi. E ti ycöbigyïi tzajpjoty ma yi oybi it.

4

Mayjäy ixmadza'ñ yi Dios ytiy'ajt

¹ Yi Espiritu Santo minaan co anajty je xii tiempo ycixa'ñ, mayjäy ixmadzaangixy yi Dios y'ayuc ytiy'ajt. Mijpïdaaccixy anajty jäy ajcxy y'ayuc huidibi yi huin'ïmbi etz ca'oybi ytiy'ajt mïd. ² Jada jäy ajcxy mïd anii anajty naybidáacigixy nej ytudägyity, e ca' anajty yjanchity. Ca' ajcxy nej ñayjihuiïi co ajcxy ytiy'ajty anii daacpi. Ti jadu'n yhuinma'ñypïdaaccixy janch mic. ³ Yi' ajcxy ymina'ñ co ca' huaad jäy ypijccixy, etz ca' huaad caaygixy nijëjity caayin uucin. Yi caayin uucin Dios yi' ti conucxy jigix jëbi jäy ajcxy huidibi mibijccixy etz huinjihuïïygixy je tiy'ajt, jëbi yajnajxcixy Dioscojuyip ma Dios etz cöbigipy ajcxy agujc jotcujc je caayin uucin. ⁴ Tüg'óciy huidibi Dios ti yaj'oyïy, oy yi'. Ca' huaad pin ymina'ñ co ca' y'oyity. Agujc jotcujc ngöbïjcm, jëyi nyajnajxim Dioscojuyip ma yi'. ⁵ Dios ymina'ñ co huen huidibi caayin huidibi uucin ooy y'oy yi'. Jëyi co nyajnajxim Dioscojuyip, e huin'it Dios conuucxy je caayin uucin.

Ca' ajcxy mmijpïdägip yi nigoobi'ayucity

⁶ Pen miich ajcxy jada ayuc jada tiy'ajt myajnimaaayb yi migügtijc, oy anajty mduñ ma Cristo ytung. Co jadu'n myaj'ixpicy Dios y'ayuc janch cixyjot huinjot, chi anajty myajyeeey yi mmibijcin. Ca' mjâydigoyipy yi oybi ayuc huidibi nyajnimaaayb, huidibi ayuc mbanicxyp mbayöpy. ⁷ Ca' mmijpïdägy yi nigoobi'ayucity huidibi ca' choobaady ma Dios. Panicxi' payöyi' Dios ytiy'ajt. ⁸ Jac'oy co n'ixpijcm Dios y'ayuc, ca'ydi co ninicx ymic'ajt nbaatim. Co yajyujctäy jäy ñinicx, chi ñinicx ymic'ajt paady jëyi. Co n'ixpijcm nguyduunim Dios ytiy'ajt, chi tiy'ajt nbaatim nej ya naaxhuiñ ndzinaayim, etz nañ jadu'n nbaatim jadüg jugy'ajtin ma Jesús co anajty n'o'cim. ⁹ Jada tiy'ajt huidibi ti nyajnimäy, janch tudägy jada, jëbi ngöbïjctaaayim, e nidüg nidüg jëbi mibijccixy. ¹⁰ Paady nduunim n'ayoohuim oy pin xyca'ixaanim. Njijp'ijxim co je Dios huidibi jugy'ijtp xyajnidzögaanim n'alma. Jëyi yajnidzögipy ajcxy y'alma huidibi mijpïdaacip Dios y'ayuc.

¹¹ Yajnimä' yi migügtijc huen cuydundaaygixy jada ayuc. Yaj'ixpic jada tiy'ajt. ¹² Huen jäy ajcxy m'ayuc xymijpïdaaci, oy miich mutz anäcinity. Myegipy ijxpejt ma migügtijc nej jëb huaad ycapxcixy ymiydaaccixy, nej jëb huaad ytungixy, jadu'n nej jëb huaad oyjäy'ajtin tungixy, jadu'n nej jëb huaad mibijcin yajtungixy ma Dios, jadu'n nej jëb huaad huädz yhuinma'ñ mïd'ajtcixy. Co jadu'n mdunipy, huin'it ajcxy mijpïdägipy miich m'ayuc. ¹³ Mabaad ich anajty nicxy ma miich, capx Dios ñecy ma yi

naymujctac, capxhuäcx etz yaj'ixpic yi tiy'ajt. ¹⁴ Yajtun yi huij'ajt cujc'ajt huiidibi Dios xymoy je taabi je mibijcpidijc miltungm#d#p# xyc#ñixajy, e xy'ayucmoy xymic'ajtmoy ajcxy müd je Espíritu Santo ymic'ajt.

¹⁵ Naybidäg#i yajcopijc tüg'óc#y huiidibi ti nyajnimäy, e niguëx#ig#ipy mayjäyduum co ti yajxon m'ixpicy je tiy'ajt. ¹⁶ Nayguend'adi# miich ooy ci'm, nañ jadu'n nayguend'adi# ma yi Dios ytiy'ajt, ca' m'ixmach Dios y'ayuc. Co miich jada mdunipy ci'm anajty nayyajn#dz#ögyii, nañ jadu'n anajty myajn#dz#oocixy huiidibi anajty ajcxy amidoo'ijtp miich m'ayuc.

5

Nej jëbi huaad migügtijc m'ihuijipy mgapxhuijipy

¹ Ca'p huinjip m'ojip mij'anäctijc. Oy'amy #huijicy capxhuijicy jadu'n nej jihuiy mdeedy'adyii. Nañ jadu'n yi yujcyeecytijc #huijicy capxhuijicy oy'amy jadu'n nej jihuiy mg#mjuugy mg#mmigüg. ² Yi mij'anäctijc ajcxy töxyjäybi nañ jadu'n oy'amy m'ihuijicy capxhuijicy, jadu'n nej jihuiy yi' ajcxy mdaj'adyii mdz#tz'adyii. Yi töxy'anäctijc ajcxy mutz'anäcnip m#d'ijtcixy m#d tudägyi mjot mhuinma'ñ.

³ Huen yi mibijcpidijc ajcxy yajmij'adipy etz pubedipy yi töxyjäydijc ajcxy co'ögyp#i, huiidibi janch ni ypin ycaca'ty. ⁴ Pen jim töxyjäydijc co'ögyp#i huiidibi müd y'ung etz y'oc'ung, huen ajcxy jaty nej ytaj ñambiid yajmij'adipy, huen oybi yajhuimbidity müd ytaj etz ñambiid. Com yi jadu'mbi huinma'ñ Dios yjäygidacpy. ⁵ Je töxyjäy co'ögyp#i ca'p pin tim müdity, yi' yjip'ijxyp co Dios ypubed#y#b etz Dios ymibijctzooyb y'ojadajtpy jabom jabom x#m tzuum. ⁶ Je co'ögy töxyjäy huiidibi tzinaayb müd mayñax xondaac#n, jadu'n Dios yajnaxyii jadu'n nej jihuiy y'ögity ytigoyity. ⁷ Yajnima' ajcxy huen cuydungixy Dios ytiy'ajt, jigix ca' jibic ajcxy yajnigapxy. ⁸ Pen ji pin huiidibi yajmij'ajtp Dios, e ca' pubeda'ñ y'amigüg, pen ca' y'ung ytöxyijc yajxon icy may'aty, ca' yi' cuyduni Dios y'ayuc ytiy'ajt. N#gi anajty yj#bicity nej ti y'id#ch ca'ydi jadu'n nej huiidibi ca' ymibicy.

⁹⁻¹⁰ Yi töxyjäy co'ögyp#i ajcxy tübi ytugi'px jimijty, jëbi mgojay#iyi yx#i ma yi lista huiidibi yi mibijcpidijc ypubedamyb. Yi mibijcpidijc ypubedamyb pen tüg ñäy anajty m#ddz#näy, pen oyjot oyhuinma'ñ ym#d, pen ti y'ung yajxon yajyeegy, pen ti migügtijc m#oyjäy'aty, pen ti may'ajt tuñ müd Dios yjäy, pen ti pa'ayooy huiidibi ayooob huiidibi jottigooyb, pen ti yajtüyöy yajxon nej ytiy'ajty.

¹¹ Yi co'ögy töxyjäy mutz'anäcnibi ca' mgojay#iyipy yx#i ma yi lista huiidibi yi mibijcpidijc ypubedamyb. Pen capxytumb co tuna'ñ müd Cristo ycixpi tijaty tung ma naymujctac, yajecyity co je oybi anajty yam y'octumy, chi nijot'ajtni yp#gaani, chi ytung ixmajtznip. ¹² Co yi mibijcpidijc ajcxy ca' jäygidac#i yi' ytung, chi jibic ñayjihuiy#i co ca' cuyduñ y'ayuc nej ti ycapxytuñ müd yi Cristo Jesús. ¹³ Jadügnax ca' ytung yajcopicy, jëyi yhuidijtni jayjin jaydijc, e ca' yi'yity, nañ jadu'n ymigüg nigapxn#i ni'oj#y#ñ#i, capxn#i miydaacni huiidibi ca' y'oyity. ¹⁴ Ndzojcpyich co yi töxyjäy co'ögy mutz'anäcnibi huen pijccixy, huen tzinaaygixy jugy'ajtcixy yajxon, huen ung'ijxcixy anäc'ijxcixy, huen yajxon cuend'ajtcixy yjin ytijc, jigix ca' ajcxy ni#huambed#y#b ni'oj#huiy#b huiidibi ca' Dios y'ayuc ixaani midohuaani. ¹⁵ Nijëjity töxyjäy ajcxy

co'ögypi ti ixmajtzicxni Dios y'ayuc ytiy'ajt, e ti ajcxy jiptigiy'iygixni yi mujcu yhuinma'ñ.

¹⁶ Pen ji mibijcpidijc yëydijcpi o töxyjäybi müidity y'ajuugy y'amigüg co'ögypi, yi' je' paatip ixipy may'adipy je y'ajuugy y'amigüg co'ögypi, e ca' yaj'idipy ma yi mibijcpidijc nigixp. E jadu'n je' huaad je mibijcpidijc ajcxy pubejticy co'ögypi ca'p ti tim müidity.

¹⁷ Yi' ajcxy huidibi nigohuajc'ajtp yi mibijcpidijc huidibi yajxon tumb capxpaady y'idipy. Nigi ajcxy capxpaady y'idipy huidibi Dios y'ayuc capxhuäcxip etz yaj'ixpicy. ¹⁸ Jadu'n yjaybetyity ma Dios y'ayuc: "Ca' huaad huajyuub y'ajen nbidaacim ma yam ten moody trigo müy co yajpajc'ada'ñ yi trigo tim." Nañ jadu'n jadüg'it yjaybetyity: "Yi huidibi tumb paatip yi' ymujun'ñ." Jadu'n jada ayuc yhuimbizimy: Yi' huidibi yaj'ixpijcp Dios y'ayuc paatip huen yajmujuy.

¹⁹⁻²⁰ Ca' mic'amy mdiydunipy pin tungmüdpí ma yi mibijcpidijc pen tügpajc huidibi xihuip. Ca' mdiydunipy pin tungmüdpí ixti cooni metz o tugüg testigo yquëxigipy pen janch ti ytundigooy. Pen ytundigooy yi huidibi nigohuajc'ajtp, capxpizim mayjäydumb jigix jacjadyii chigi'ñ pijccixipy. ²¹ Jada tiy'ajt miich nyajniimaayb, Dios Cristo Jesús etz yi' y'angeles ajcxy huidibi Dios ti huin'ijxcixy ñidiy'ajt'ajtcixy co yjanchity jada ayuc. Co mbanicxip jada tiy'ajt, ca' huin'ixpety mdiydunip mdzaachytunip mibijcpidijc. ²² Ca' mic'amy mgin'ixajipy co myajtungbiga'ñip jäy huidibi ca' m'ixy'adyii. Ycajeyty ypocytunipy, e tú'ciy mbocycähuaangixy miich müd yi'. Miich nayguend'adü jigix ca' mbocycähuiipy.

²³ Miich Timoteo, pen pijcp mjot, tzo'y'adü hueen vino, com jac'oy yi' ca'ydi co m'ügipy huädz nü.

²⁴ Jadyii jäy huidibi jibic-huinma'ñ müd yajnejhuihuipy yi' ajcxy yjibic-huinma'ñ ma anajty ca'ni yajtiydungixy. Jacjadyii jäy ca' yajnejhuüy yjibic-huinma'ñ ixti cooni yajtiydungixy. ²⁵ Nañ jadu'n jadyii jäy yajnejhuihuip co oyjäy'ajtin anajty ti tungixy, jacjadyii jäy ca' mic'amy yajnejhuihuipy co oyjäy'ajtin ti tungixy. Yi' oyjäy'ajtin ca'p yi' yhuimäpy coyüch.

6

¹ Tüg'óciy tumbidijc huidibi ajcxy mibijcp hidibi ajcxy ijtp cojuuyi codoogiy, huen yajxon yajmij'ajtcixy yhuindzin. Pen ca' jadu'n tungixy, chi je huingjäydijc jibic nigapxaani ni'ojihuaani yi Dios etz yi' ytiy'ajt. ² Pen yi' tumbi müd yhuindzin hidibi yajmij'ajtp Dios, ca' y'oyty co nixigipy yajxigipy yhuindzin. Huen ajcxy nigi yajxon yajmij'ajtcixy, com hue' je' Dios yjäy. Yi' hidibi nihuindzin'ajt ypadamyb je oybi hidibi je' ytumbi ytung'ajtpy. Jada tiy'ajt yaj'ixpic etz capxhuäcx.

Jotcujc'ajtin nbaatim ma Dios ytiy'ajt

³⁻⁴ Pen ji pin huingbi tiy'ajt yaj'ixpicy hidibi ca' ñaybadyii müd je Huindzin Jesucristo y'ayuc ytiy'ajt, e ni ycanaybadyii müd je tiy'ajt hidibi ñch ajt nmijpidaacim, hue' jada nej tüg jäy hidibi amij agixip hidibi ca' ni ti nejhuüy. Chachnijot'aty tzip capx, e jadu'n yhuimbizimy jada tzip capxy co migüg ca' yaj'oy'ixy, chi ñaymidziptzoongixy nühuambejticy etz jibic nigapxcixy ymigügtijc. ⁵ Yi' jadu'mbi jäy hidibi ca' mijpidägy Dios ytiy'ajt cojpy ymacxpy tzip capxy hidibi ca' yciy ytigoy. Yhuinma'ñyidigoy ajcxy, ca' huinjihuüyigixy tiy'ajt. Hue' ajcxy

yaj'ixpicy Dios y'ayuc müd co ycomeñ'adaangixy. Puhuäctuat miich jadu'mbi jäy ajcxy. ⁶ Co Dios y'ayuc ytiy'ajt nguydunim, huin'it jotcuje ndzinaayim, etz nbaatim oy'ajt mijpi. ⁷ Ni ti iich ajt ya naaxhuiñ ca' ti nmimiinim co nma'xung'ajtim, nañ ni ti ngaminicxim co n'o'cim. ⁸ Pen nmüd'ajtim caayin uucin huit tucxy, jëbi njotcuje'ajtim müd yi'yi. ⁹ Je' ajcxy huidibi ooy nijot'aty comeñ'adii, hue' je' ajcxy jibic tumb ajcxy ycähua'ñ. Je' ajcxy chachtunamyb huidibi ca' oyhuinma'ñity, huidibi nayjotmayduunip. Ayo'n ajcxy ypadamyb, tigoyamb ajcxy y'alma. ¹⁰ Yi meeñy'adzojcän yi' je' yi jibic-huinma'ñ cop'ajtip. Müd yi meeñy'adzojcän may yi jäy huidibi jäy digoy Dios ytiy'ajt. Hue' je' ajcxy nayjotmayduunip.

Timoteo, tiydudägy mdzinähuipy miich

¹¹ Timoteo, Dios yjäy, cöguëg yi jäy huidibi müd yi jadu'mbi jibic-huinma'ñ. Tiydudägy mdzinähuipy, cuyduni Dios y'ayuc ycötujcän, mijpidäg Dios y'ayuc ytiy'ajt, tun oyjäy'ajtin, mihuindina' yi tung, müd'at mjot mhuinma'ñ yung naxy. ¹² Mic mjot mhuinma'ñ pidäg ma Dios ytiy'ajt, ca' mjotmetzcäy. Tun jadu'n nej jäy huidibi nayboyicquixigixy naymic'ixigixy. Nijot'at cixyot huinijot yi jugy'ajtin huidibi m'alma ypadamyb ma Dios. Dios xyajñibicy jigix mgapxhuäcxip jada tiy'ajt. Ti miich mgapxypidzimy nej mmibicy mayjäyjoty. ¹³ Dios je huidibi yajjugy'ajtaayb tüg'óciy, yi' nidiy'ajt'aty co ooy ycopicyity jada ayuc jadu'n nej cham nyajñimaayb. Nañ jadu'n je Cristo Jesús je huidibi tiy'ajt capxypidzim ma Poncio Pilato ñidiy'ajt'ajt co oy ycopicyity jada ayuc jadu'n nej cham nyajñimaayb. ¹⁴ Copicy cuydun jada ayuc ane'min. Huädz mguydundähuipy, huädz myaj'ixpigipy je tiy'ajt jigix ca' pin jibic ni'ojihuipy Dios ytiy'ajt. Jadu'n mdunipy ixti cooni iich ajt nHuindzin Cristo Jesús ñayguëxigiyb ya naaxhuiñ jadüg'oc. ¹⁵ Dios yajñiguëxigamyb Cristo Jesús mina anajty je tiempo yhuaad'aty. Dios je' je mij'ane'mbi, je mijpi rey, etz je mijpi huindzin. Yi' je' je Huindzin Dios huidibi ane'mdaayb. ¹⁶ Yi' je' tügpajc je jugy'ajt cop ymüd. Yi' ijtp ma je tiicxin je jajin huidibi ca' pin huaad ninej mihuingoñ. Janch ni tüg jäy ti ca' ixy, e ni ca' ixa'ñ. Yi' je' cömay'idipy etz yi' ane'mdaayb tüg'óciy. Amén. Jadu'n jada.

¹⁷ Yi comeñydijc huidibi jadachambi tiempo tzinaayb jugy'ajt, nima' miich yi' ajcxy co ca' huaad amij agix ñayjihuiyigixy, ni ca' ñigi adzojccixy anaxy yi meeñ huidibi jadu'ñyi tigoydaayb. Huen ajcxy mijpidägy yi Dios huidibi xymooyim tüg'óciy mijmay mijcajee jigix njotcuje'ajtim. ¹⁸ Huen yi comeñydijc oybi tungixy, jigix ajcxy cömay ypidzimipy co oyjäy'ajtin tungixy. Huen ajcxy pa'ayoogixy ymigügtijc huidibi ca' ti müdity müd oyot oyhuinma'ñ. ¹⁹ Co ajcxy jadu'n tungixy, chi padaangixy je oybi huidibi miimb gidaacp. Ypadamyb ajcxy je jugy'ajtin huinixibi.

Timoteo, mijpidäg jada tiy'ajt

²⁰ Timoteo, mijpidäg jada ixpjcän huidibi ti myajñibic'aty. Ca' mmijpidägipy yi nigooobi y'ayucity, yi huidibi ca' Dios huindzigäy. Ca' mmijpidägipy yi jäy huidibi ajcxy naybidaacip jadu'n nej jihuiy ooy ycohuinma'ñity, e ca' yjanchity, huidibi midzip'ajtp Dios ytiy'ajt. ²¹ Jadu'n nej nije' ajcxy panixcixy jada ca'pi ytiy'ajity, e jadu'ñi ñitigoy.

Huen Dios je oy'ajtin tuñ müd miich. Amén. Jadu'n jada.

2 TIMOTEO

Yi Mimetzpi Necy Huidibi San Pablo Yajniguejx Timoteo

¹ Ich Pablo, Dios ti xyajñibicyich huen Cristo Jesús xy'apóstol'adyiijich. Yi' ti xyquexyich co yi' y'ayuc ngapxhuäcxibich. Dios ti yajhuinhuaniiygixy yi jäy co pin mijpidägipy Cristo Jesús yajjugypigipy co anajty ti y'ögy. ² Ooy ich miich ndzocy njihuüy nej ngi'm'ung'adyii. Dios Teedy etz ich ajt nHuindzin Cristo Jesús huen tuñ oy'ajt may'ajt müd miich, huen xypa'ayooy, huen xyyajjotcugiy.

Pablo jotcujc co Timoteo ti mijpidägy Dios y'ayuc

³ Nyajnajxypich Dioscojuyip ma Dios co miich ti mmijpidäg yi' y'ayuc. Nmibijctzooybich Dios müd miich ycixpi jabom jabom xim tzuum. Janch cixyjot huinjot nyajmij'atyich Dios, paady ooy oy nayjihuiiyiijich. Nañ jadu'n n'ap ndeedy jecy'ajty janch cixyjot janch huinjot yajmij'ajty Dios. ⁴ Ooy miich nicxy njaco'ixihuañ jigix njotcugihuibich. Ooy njajäymejtcoodyiijich nej miich mjiiy myaax müd ich ycixpi je taabi jim ndzooñich. ⁵ Njäymejtzipich jadu'n nej miich mmijpidägy yi Dios janch cixyjot huinjot co xymiid'ityich. Nañ njäymejtzipich co jayijp mnambiid Loida etz yi mdaj Eunice mijpidacy Dios janch cixyjot huinjot. Minambich co chambaad miich mmijpidägy Dios janch cixyjot huinjot.

⁶ Jada nyajjäymejtcootpy: Nijot'at yi mic'ajtin huidibi Dios ti xymöy, je taab anajty Dios ytung mnimadzaani co ngi'nixajy, jigix Dios ytung jacyajxon mduunipy. ⁷ Dios ca' xyajhuindzigy'aty, hue' xyajjotmic'ajtp. Müd Dios ymic'ajt jeb mnaychójcigixy mnayjihuiiyigixy, jeb oyjot oyhuinmañ myajtuungixy. ⁸ Paady ca' mmidzöyduniiyb ich ajt nHuindzin Cristo Jesús ytiy'ajt. E nañ ca' xymidzöyduniiybich co ti nbujxtijc inäyich müd ich ajt nHuindzin Cristo Jesús ytiy'ajt ycixpi. Mecxtuc yi ayo'n yi tzaachypi huidibi myajnajxpy co mgapxhuäcxy yi Cristo Jesús ytiy'ajt. Dios xyajjotmicpigipy. ⁹ Canan paady ti xyajñidzoocim n'alma co ajt ndzach'oyjäyity. Com Dios jadu'n ti yajnihuinmayiy tunañ oy'ajtin müd ich ajt ycixpi co quejxy Cristo Jesús ya naaxhuiñ. Dios jayijp ti huinmay co quexañ je Cristo Jesús ca'ni anajty pin ya naaxhuiñ. ¹⁰ Dios ti cham jada oy'ajtin yajnigüexigy co yaj'ijxy ya naaxhuiñ ich ajt nnihuambi nyajñidzoocpi, je Cristo Jesús, huidibi ti yajcödigoy yi o'cin. E ti yajnejhuüy yi jäy müd yi' ytiy'ajt nej jeb huaad ndzinaayim huinixii ma yi Dios y'it oybi.

¹¹ Dios ti xyajñibicyich co y'ayuc ngapxhuäcxich, etz xy'apóstol'adyiijich jigix nyaj'ixpigipyich yi huidibi ajcxy ca' yjudiojäyity. ¹² Paady ycixpi tzaachypi nbaadyich. Per ca' ndzo'yduñich, com ich nejhuüyb pin nmijpidacyich, nejhuüybich co yi' ymüd cötujcin etz mic'ajt jeb xy-cuend'adipyich, ixti huin'it xii minaa Cristo Jesús tiydunañ yi naaxhuiñjäy.

¹³ Mijpidäg je tiy'ajt tiydudägypi huidibi ti nyaj'ixpicy, jada je' tiy'ajt ijxpejt nej jeb mbanicxy mbayöy. Yajmij'at Cristo Jesús, ca' m'ixmajtzi yi' ytiy'ajt, mdunipy oyjäy'ajtin jadu'n nej yi' tzocy. ¹⁴ Mihuidina' yi oybi

ayuc tiy'ajt huiðibi ti nyaj'ixpicy. Huen je Espíritu Santo huiðibi miich müð jotjoty huiñma'ñjoty xypubedipy xypudigihuiipy.

¹⁵ Ti jada' mnejhuïy co tüg'óciy yi mibijcpidiyc jim Asia naaxjot ti ixmach je tiy'ajt jadu'n nej ti nyaj'ixpicyich. Yi Figelo etz Hermógenes etz jacjadyii jadu'n ajcxy ti y'adihtzcixy. ¹⁶ Yi Huindzin Jesús yi' pa'ayoohuiipy yi Onesífero yjuugy ymígü, com ooy ñch mij xypa'ayooyich etz xypubejtyich, ca' xymidzo'yduñyijich co nmach'ññäyich. ¹⁷ Co Onesífero oyja'ty ya Roma, chi mictägy xy'ixtaayich cooni xypatyich. ¹⁸ Huen yi Huindzin Dios ypa'ayoohuiigy Onesífero co anajty Cristo Jesús tiyduna'ñ naaxhuiñjyây. Huädz miich mnejhuïy nej yi Onesífero xypubejtyich jim Efeso.

2

Huen Cristo Jesús may'ajt tunipy müð miich Timoteo

¹ Miich Timoteo, jadu'n njihuïy nej ngi'm'ung ngi'm'anäg. Huen Cristo Jesús may'ajt tunipy ma müch, huen xyajjotmicpigipy. ² Müch ti müðoy may'ayuc tiy'ajt huiðibi ti nyaj'ixpicy. Jada ayuc mayjäy müðoy e jëb ajcxy nidiy'ajt'ajtcixy. Jada tiy'ajt müch mgapxnaxipy mgapxhuäcxipy ma jacjadyii yëydijctjyc huiðibi oyhuinma'ñ ymüð, jigix yi' ajcxy nañ jadu'n capxnaxipy ma jacjadyii jäy.

³ Müch mimadäg yi ayo'n yi tzaachypi huiðibi mminajxyp myajnajxyp, jadu'n nej tüg Cristo Jesús ysoldado huiðibi oy tumb. ⁴ Yi soldado huiðibi soldad'ajtp ca' huaad huingbi tung nicxy tuñ, jigix je' yjotcujc'adipy pin anajty ti ypidägyii soldado, nañ jadu'n müch adügijp Dios ytung mdunipy. ⁵ Pin jäy nayboy'cquipxip ca' yi' premio pada'ñ, oy ti yjamadägy, pen ca' cuyduñ yi tiy'ajt. Nañ tzocy co müch mguydunipy yi tiy'ajt. ⁶ Je jäy huiðibi tumb ma ycam ytu' je' jayijp huiðib huen yajpidigy yi ujtztim huiðibi ti y'ity. Nañ jadu'n müch co Dios ytung mduunip mbaadip yi oy'ajtin. ⁷ Yajxon mhuinmayipy huiðibi nyajnimaaayb, yi Huindzin Cristo Jesús xyajnejhuïydähuipy tüg'óciy je' ytiy'ajt.

⁸ Jäy metz jadu'n nej Jesucristo, yi David y'ap y'oc, y'o'cy, chi Dios yajjuygypijcy jadügtecy. Jada je' je' ayuc tiy'ajt oybi huiðibi nnajtzcapxixyibich. ⁹ Müð yi' ycixpi n'ayooyich etz tzaachypi nyajnajxyich. Nbuixtijc ññäyich jadu'n nej jihuiy njibicjäyich. Oy njapujxtijc ññäyich ca' ñejty, Dios y'ayuc ca' yi' mach y'ity, yajcapxhuäcx'adihtzp nigi. ¹⁰ Paady ñch tüg'óciy jada tzaachypi ngöbijctäy nmecxtujctäy, jigix jëbi je jäy ajcxy huiðibi Dios ti yhuin'ixixy chinähuipy ajcxy huinixii ma yi' y'it oybi, Cristo Jesús yajnidzögüib yi' ajcxy y'alma.

¹¹ Tiy'ajt jada ayuc:

Pen ti ñch ajt n'o'cim müð Cristo ycixpi, yi' müð ndzinaayim tzajpjoty.

¹² Pen nyajnajxim tzaachypi ayo'n müð Jesús ycixpi, nañ quipxyi müð yi' n'ane'maanim. Pen ca' ya Jesús y'ayuc ngöbijcim, nañ ca' jiiib tzajpjoty xycöbiganim.

¹³ Oy ñch ajt nyajmij'ajtim Cristo Jesús o ngayajmij'ajtim, Dios ycuydun-daayb yi' y'ayuc. Com ca' huaad yci'm ayuc yajxigy.

Naybidägü cixyjot huinijot ma Dios ytiy'ajt

¹⁴ Yajjäy metzcood yi mibijcpidiyc jada tiy'ajt huiðibi ti nyajnimäy. Nima' je jäy ajcxy co je Huindzin Dios ca' oy'ixy tzip capxy ayuc huiðibi

ca' choobaady. M̄id yī tzip capxy ca' ni ti oybi nbaatim, jēyi yajhuinma'ñydigoy huidibi amidoo'ijtp. ¹⁵ Naybidāḡii cixyot huin̄jot ma Dios y'ayuc ytiy'ajt, nej jēb huaad cōmay mbidzimy ma Dios, jadu'n nej Dios ytumbi huidibi ca' ni ti midzōydunyii, huidibi Dios y'ayuc ytiy'ajt yajxon yajhuinjihuydaayb ym̄igūgtijc. ¹⁶ Ca' mgōbigipy yī ayuc huidibi ca' ytiy'ajitity, yī nigoob ayuc huidibi yajtūyōyp mayjāy ajcxy, yī tiy'ajt huidibi ca' Dios ytiy'ajt'adyii. ¹⁷ Yī huidibi ajcxy y'ayuc ca' ytiy'ajitity yajhuinma'ñydigooyb ym̄igūgtijc. Yī' ajcxy m̄id jibic ayuc yajhuinma'ñydigoy yī mayjāy ajcxy, jadu'n nej pūtzpa'm huidibi nin̄icx jicxp oñydāgy. Jadu'n nej ti yjaty m̄id Hemeneo etz Fileto co ajcxy yhuinma'ñydigooy. ¹⁸ Yī' ajcxy anajty Dios y'ayuc cuyduuni, chī oyhuinma'ñydigooñi. Chī ajcxy yminaangixni co je t̄ibi y'ōccixni, ti ajcxy je' yjugypicy, e jadu'n ajcxy yajhuinma'ñydigoy nijējity jāy. ¹⁹ Huidibi Dios ti cojy ti macxy, niminax̄ii ycacixy ycatigooy, com yī' ytiy'ajt ijtp yī' huin̄ix̄ii. Tiy'ajt jada co yī Huindzin Dios y'ijxcap̄y pinjaty yjāy'ajtpy. Tūg'ōciy pin mijpidacp yī nHuindzin Jesucristo y'ayuc, huen jiphuāctūdy yī jibic-huinma'ñ yī jibic-tung.

²⁰ Ma tūg mij comeñydic̄ jim oori taasi, oori texy, etz oori cuchara, etz tijaty oyjatypi. Nañ ym̄id jim naax taasi, naax texy, quipy cuchara etz jactijaty ca'p y'oyjatyity. Yajtuñ yī oori taasi etz oori texy ma tūgi caayin uucin oybi. Yajtuñ yī naax taasi etz naax texy oyñiminaa. ²¹ Jadu'n yī' pin jāy jibic-huinma'ñ ixmajtzp etz tuñ oyhuinma'ñ, jadu'n yī' nej oori taasi oori texy. Cōmay'idip yī' ma yī Dios. Huād̄z yī' yjot yhuinma'ñ, jēbi nHuindzin'ajtim Dios yajtunipy ma tūg'ōciy oybi tung.

²² Ixmatz miich yī yujcyeec'anāg ajcxy yjibic-huinma'ñ. Tudāgy mdzināhuipy. Yajm̄ij'ajtcix Dios cixyot huin̄jot. Mdunipy oyjāy'ajtin. Ixmatz yī tzip. M'ojadadipy yī Huindzin Dios m̄id oyjot oyhuinma'ñ. ²³ Ixmatz yī nigoobi'ayucity yī loci huinma'ñ, ca' yī' y'oyity. Mnejhūiyb co yī nigoobi'ayuucity tzipcojp capxycojp yī'. ²⁴ Yī Huindzin Dios ca' yī' tzocy co yī' ytumbidijc nicxy tzip capxy yajtzondāgy. Hue' janchtiy tzocy huen jāy'ajtcixy yung naxy m̄id tūg'ōciy jāy etz pe'cy y'idipy m̄id yaj'ixpijcin. Nañ chojcy co mimecxtugipy ym̄igūgtijc ajcxy. ²⁵ Miich m̄id yaj'ung naxy njot mhuinma'ñ capxhuij je jāy huidibi midzip'ajtp je tiy'ajt. Ycadim-jecyity co Dios ytiy'ajt nijothuimb̄ijtcixipy, e nejhūiygixyipy je tiy'ajt oybi. ²⁶ Co anajty ajcxy ti ymejtzcixy yhuinma'ñ, chī ajcxy ycōguēḡiyb je mujcu' huidibi ajcxy ycapxymidooyb ma anajty ym̄id'ajtcixy cijoty etz ycapxymidoogixpy yī Dios.

3

Jāy jotmay m̄id y'idaangixy

¹ Miich mnejhūiyb ma je x̄ii tiempo anajty ycixaani jadaanip ayo'n, je jāy ajcxy jotmay m̄id y'idaangixy. ² Ji adipy jāy huidibi adzojcp, huidibi amij agix nayjihuiyip, jāy huidibi ameeñ, jāy huidibi ci'm naygōmayib, huidibi oyñinej capxtigooyb ma Dios, jāy huidibi ca' capxymidohua'ñ ytaj yteedy, jāy huidibi ni ti ca' jāygidāga'ñ, jāy huidibi ca' yajmay'aty Dios. ³ Co anajty tiempo ycixaani, ji adipy jāy huidibi ca' ym̄igūḡ ixa'ñ tzoga'ñ, jāy huidibi ca' pa'ayo'n m̄idity, jāy huidibi ym̄igūḡ n̄ihuambejtp, jāy huidibi oy ahua'nity, jāy huidibi midzip'ajtp yī oybi. ⁴ Ji adipy jāy huidibi ym̄igūḡ agojix̄ midundigooyb, jāy huidibi ytunamyb ti ytunamyb, ca' ajcxy tuñ cuendi capxhuijin, jāy huidibi amij agix nayjihuiyip, huidibi

tzachnijot'ajtcixy mayñaxy xondaacin, e ca' cuyduna'ñ Dios ytiy'ajt. ⁵ Ji adipy jäy huidibi naybidáacigixp jadu'n nej jihuüy ajcxy mijpidaaccixp Dios ytiy'ajt e ca' yjanchity. Chi ma ajcxy chinaayin ma ajcxy yjugy'ajtin ñiguéxícp co ca' tiy'ajt yajtuñ. Cöguég yi jadu'mbi jäy. ⁶ Ma yi jadu'mbi jäy ajcxy jim chooñity huidibi coyöyib conaxib ma je töxyjäy huidibi ca' ytudägity, huidibi oy ypocyjäyity, huidibi jibic-huinma'ñ nijot'ajtp. ⁷ Yi jadu'mbi töxyjäy ajcxy panixp payöyp canaagnax huinma'ñ, e niminaa ajcxy cahuinjihuihuipy yi Dios ytiy'ajt. ⁸ Jadu'n nej Janes etz Jambres midziptzoon je Moisés, yi jadu'mbi yéydijc ajcxy nañ jadu'n midziptzoonip yi tiy'ajt. Jibicjot jibic-huinma'ñ ajcxy ymüid. Ñaybidägüib ajcxy jadu'n nej jihuüy cuydungixy yi tiy'ajt, e ca' cuydungixy. ⁹ Ca' ajcxy mimadägipy nej huin'ñnipy Dios yjäy. Niguéxigipy yi' ajcxy yjibic-huinma'ñ jadu'n nej Janes etz Jambres yjajty.

Tüg'óciy Dios ñecy Dios ci'm ti huinma'ñymöy je huidibi jaay

¹⁰ Miich ti mhuinjihuidäy nej üch ti nyaj'ixpicy Dios y'ayuc nej njäy'atyich, nej nhuinma'ñ nduüñich, nej Dios nmijpidägyich cixyot huinjot, nej üch jäy nmimecxtucyich, nej oyjäy'ajtin nduüñich, nej ti nmihuindinäyich Dios ytung. ¹¹ Miich m'ixxyp mnejhuüy nej ti nyaj'ixhuidityich nej ti nyajpahuidityich, miich mnejhuüy je ayo'n je tzaachypí huidibi ti nminaxyich ti nyajnaxyich jim Antioquia, jim Iconio, etz jim Listra. Jadu'ñyibaad yi ayo'n tübi nbaadyich Dios ti xyñihua'ñ ti xycohua'ñich. ¹² Huen pin huidibi yajxon cuydumb Dios ycapxy y'ayuc jadu'n nej Cristo Jesús ti xyyaj'ixpicyich, nañ tim jadu'n ajcxy yaj'ixhuididipy yajpahuididipy. ¹³ Yi jibic jäydijc huidibi naybidáacigixp jadu'n nej jihuüy cuydungixy yi tiy'ajt, e ca' yjanchity, ñigi jibic y'ididzaangixy. Huin'ñnaangixy ymigügtijc ajcxy, e ñayhuin'ñnaanigixy ci'm.

¹⁴ Miich Timoteo, ixmatz yi jadu'mbi jäy ajcxy etz panix yi tübi m'ixpicy, yi tübi myajñibic'aty. Mnejhuüy co üch ti nyaj'ixpicyich je tiy'ajt. ¹⁵ Com miich pi'cni mutzn ti mjaty ti mnejhuüy yi Dios ñecy. Jada necy ti xyajnejhuüy nej huaad mijpidägy yi Cristo Jesús, e ñigi jadu'n jëb huaad yi m'alma nidzoocin paady. ¹⁶ Tüg'óciy Dios ñecy Dios ci'm ti huinma'ñymöy je huidibi jaay. Paady jëbi nyajtuunim co jäy nyajni'ixüyim nyaj'ixpicim. Jëb nyajtuunim co njijpcogapxiyim huidibi ca' ytiy'ajtity, etz co n'ñhuijim ngapxhuijim. Jëb nyajtuunim co nyaj'ixpicim nej jëb huaad tiy'ajt nbanicxim, ¹⁷ jigix yi jäy ajcxy huidibi mijpidacp Dios ytiy'ajt, jëb ni'ixi' y'idipy, tunipy tüg'óciy oybi huinma'ñ oybi tung.

4

¹ Ooy ycopicyity mido'mbic jada ayuc jadu'n nej cham üch miich nijayiy. Dios etz üch ajt nHuindzin Cristo Jesús tiy'ajt yejc co copicy jada ayuc. Cristo Jesús ytiydunamyb yi jäy ajcxy juugypi etz yi jäy ajcxy tübi y'o'ccixy, e chi yajjugypigipy jadüg'oc ajcxy. Yi' yajtiydunamb ajcxy co anajty ymiñ ya naaxhuñ pidäga'ñ y'ane'min. ² Nyajñibjcpy mgapx-huäcxip Dios y'ayuc ytiy'ajt hueñytimyminaajity, oy pin midoohua'ñ o camidoohua'ñ. Copicy co mijpcogapxihuipy huidibi ca' ytiy'ajtity, capx-huij pin yinjaty huenjaty camadacp, ñhuij capxhuij yi jäy ajcxy müid Dios y'ayuc ytiy'ajt. Mimecxtuc etz yaj'ixpic yi jäy ajcxy. ³ Minip je xii je tiempo ma jäy ajcxy ca' cöbiga'ni oybi tiy'ajt. Nijëjity müid yci'mdzojcin

m̄id yci'm-huinma'ñ ixtāhuip ajcxy yhuindzin huidibi yaj'ixpiḡib nej ajcxy jāygidāgy, oy ca' ytiy'ajtity. ⁴ Chi ajcxy anajty jiphuāctūtciḡni camidoohuāḡiḡni je Dios y'ayuc ytiy'ajt. Mijpidaacni anajty ajcxy ḡiḡi yi ḡigoobi'ayucity. ⁵ Miich huijy ycujc m'idipy. Mecxtujcta' nej jāy ajcxy xy'ixhuidity xypahuidity. Yajnima' jāy ajcxy Dios ytiy'ajt, jēb ajcxy mijpidāḡipy etz jothuimbidity ajcxy Dios. Yaj'ixpiḡ Dios y'ayuc ytiy'ajt nej ypadyii.

⁶ Jadu'n miich cham njacnimāy, je' co ti yhuaad'ajtni je tiempo m̄inaa ndzonaanich ya naaxhuiñ xyaj'ōgaamich jāy, ti nayxoxyiijich naydogyiijich m̄iid Cristo Jesús yciḡpi. ⁷ Ti iich ooy mic nmihuindināy Dios y'ayuccapxhuācxi ma anajty ypadyii. Ti nyajciḡy nyajmayich je tung huidibi anajty xypatpich. Ooy ti nyajmij'atyich Cristo Jesús, ni ca' ti n'ixmajchich yi' y'ayuc ytiy'ajt. ⁸ Cham njijp'ijxypich co Cristo Jesús je tiydumbi tudāḡy xycōmayipyich jiiḡy tzajpjoty, m̄id co tiydudāgy ti ndzināyich ti njugy'atyich.

Pablo pijctzoy may'ajt ma Timoteo co tzojc yminiḡy ma yi'

⁹ Tun may'ajt tzojc yminiḡy ma iich. ¹⁰ Yi Demas ti iich yam xycōgueecni co yjactzojcpy yi mayñax xondaacin ya naaxhuiñ. Hue' ti ḡicxy jim Tesalónica. Crescente nañ hue' ti ḡicxni Galacia. Yi Tito ti ḡicxy Dalmacia. ¹¹ Jēyi naydūḡpajc Lucas yam m̄iid iich. Co mminiḡy, m̄idminiḡy Marcos, com ooy ti yxhachpubetyich ma Dios ytung. ¹² Yi Tíquico ti nguexyich jim Efeso. ¹³ Je jocxhuit huidibi nyajhui'māyich jim Troas ma Carpo ytiḡ m̄iminiḡy. Nañ jadu'n m̄imindāhuipy je necy. Je' ooy ytimycopicity yi pergaminu necy.

¹⁴ Alejandro je ca'tzpi ti yi' ooy mij xymidundigooyich. Yi nhuindzin'ajtim Dios paatip nej yajmidzogyii. ¹⁵ Nayḡüend'adḡi ca' miich yi' mmijyöybedipy, com ooy mic ti jipcogapxy Dios y'ayuc huidibi iich ajcxy nyaj'ixpiḡy.

¹⁶ Co yi' oga'n xyxiyich ma je mij tungm̄idpi, naydūḡ ayuc nmihuindinaayich. Nipin xycapubetyich, ḡiḡi ajcxy xycōgueectaayich. Huen Dios ocmeecxy nej ajcxy ti y'iditziḡy. ¹⁷ Ca' y'ocnejity Dios ti xypubetyich ti xypudigiyich. Dios ti xyyajotmicpiḡyich, jigix ngapxhuācxtāhuibich ytiy'ajt ma tūḡ'óciy jāy. Jēb tūḡ'óciy jāy huidibi ca' yjudiojāyity huen mido'mbijtaayḡy Dios ytiy'ajt. Dios ti xyñihua'ñich ti xycohua'ñich ma yi' o'cin. ¹⁸ Yi Huindzin Dios yi' xyñihua'ñ xycohua'ñibich ma tūḡ'óciy jāy huidibi ajcxy jibic-huinma'ñ m̄id. Zi'xycuend'adipich, ca' ni ti xyjadipyich, cooni anajty njādyich jiiḡy tzajpjoty ma y'ane'my. ¡Huen Dios cōmay idipy janch huinixii huinitempo!

Pablo ym̄igūḡtjic capxpoox̄in yajniguexy

¹⁹ Yajnax iich ngapxpoox̄in ma yi' Prisca etz ma Aquila etz ma Onesífero yjuugy ym̄igūḡ. ²⁰ Erasto ti je' yhui'my jim Corinto. Je Tróximo com pijcip anajty, iich je' n'ixmajch jim Mileto. ²¹ Tzojc m̄jatyminiḡy ma ca'ni tiichpy ymiini. Yquejxyp ajcxy capxpoox̄in ma miich, je Eubulo, je Pudente, je Lino, je Claudia etz jacjadyii m̄igūḡtjic.

²² Huen je Huindzin Cristo Jesús xypubedipy xypudigihuipy. Huen Dios tuñ may'ajt m̄id miich ajcxy. Amén. Jadu'n ngapxciḡyich.

TITO

Yi Necy Huidibi San Pablo Yajniguejx Tito

¹ Hich Pablo, Dios jada miid nduunich, Jesucristo xy'apostol'ajtpich. Yi' ti xyquexyich ma yi jäy ajcxy huidibi Dios ti yhuin'ixyii, jigix ajcxy mibigipy yi' ytiy'ajt. Nañ nyajnimähuibich nej jëb ajcxy cuyduuni Dios ytiy'ajt. ² Jadu'n nduunich jigix co anajty y'o'ccixy, chi jadüg'oc yjuygypijccixipy e tzinäaygixipy huinixii. Dios yajhuinhuaniiy je jäy ajcxy je jugy'ajtin huinixiibi, ca'ni anajty naaxhuiñybi chondägy. Jada tiy'ajt jëb nmijpidaacim com Dios ca' yi' y'aniiidägy. ³ Jada jugy'ajtin huidibi ijtp huinixii, Dios ti yajnejhuüy je jäy ajcxy cham co je tiempo ti yhuaad'ajtni, miid yi' y'ayuc huidibi ngapxhuäcxibich. Je Dios huidibi xyajnidzocim iich ajt n'alma ti xyajniibicyich co yi' y'ayuc ngapxhuäcxpyich. ⁴ Miich Tito, cham nijayiy jadu'n nej jihuüy nijayiyich ngi'm'ung. Com tú'ciy nmij'ijxim nmijpidaacim Dios. Huen Dios iich ajt nDeedy tzajpjotpy etz Cristo Jesús iich ajt nihuambi yajtzoocpi tuñ may'ajt oy'ajt miid miich, huen xypa'ayooy etz xyajjotcujc'adipy.

Myajniibigipy yëydijc huidibi jëb nigohuajc'aty ymigügtijc

⁵ Paady iich miich jim Creta ñaaxjot nyajhui'my, jigix mjacyajniixihuipy je migügtijc jadu'n nej iich ca' ti nyajni'ixiydäyich ajcxy. Tügpi cajp nidüg nidüg myajniibigipy yëydijctijc huidibi nigop'adiib nigohuajc'adiib yi mibijcpidijc, jadu'n nej ti nyajnimäy. ⁶ Yi' myajniibigipy yi huidibi ca' ti tundigoy; huidibi tüg töxyjäy miid, ca'p ycanaagity; huidibi y'ung ajcxy ca' nijot'aty mayñaax tzinaayin; huidibi y'ung ajcxy ycapxymidooyb. ⁷ Copicy huidibi nigohuajc'adamb yi mibijcpidijc huen jäy'aty tiydudägy, ca' huaad ti tundigoy; huen yajxon cuend'adipy huidibi Dios yje'ajtpy; jäy huidibi ca' ycöjuuñity; huidibi ca' yhuindzipity; huidibi ca' y'amügity; huidibi ca' chip'ixtäy; huidibi ca' y'adzocy. ⁸ Yi' jëbi myajniibigipy huidibi oyjäy'ajtin tuñ miid hueñyitimypinity; huidibi ooy y'amigügity; huidibi huijycujc; huidibi tiydudägy yhuinma'ñ; huidibi huindzigiib Dios; huidibi ci'm yajxon naygüend'ajtip. ⁹ Huen cixyjot huinijot naybidäacigixy ma je ayuc tiy'ajt huidibi ti ixpijccixy, jigix jëbi ajcxy jot'amijmöhuiipy jacjadyii jäy ajcxy miid tiy'ajt janchypi, e capxjotcidägipy ajcxy je pin ajcxy ca' ixa'ñ Dios y'ayuc.

¹⁰ Com ji may judíojäy huidibi ca' ycapxymidoogixy, huidibi nigoobi tijaty ayuc tzachnimiydacp; huidibi ajcxy huin'imb ymigügtijc, jadu'n nej yi' ajcxy huidibi minamb co copicy tüg'ócay mibijcpi huen yajtiy'ajtiy ymang ajcxy, jadu'n nej judíojäy tungixy. ¹¹ Copicy co mgapxadugipy yi' ajcxy huidibi ymigügtijc yajco'iniiyb tüg jün tüg tijc; huidibi ajcxy yaj'ixpijcp mujuy; huidibi ca' tiy'ajt yaj'ixpijccixy.

¹² Nidüg yi' ajcxy cohuinmañybi nigapxy ymigügtijc ymina'ñ co yi' Creta jäy ooy ajcxy y'aniiity, ooy ajcxy huinducity, ooy ajcxy ñuuxity, ooy ajcxy ycaaxity. ¹³ Tiy'ajt jadu'n nej jada cohuinmañyjäy ymina'ñ. Yaj'oj ajcxy miictägy, huen huinjihuuygixy yajxon Dios y'ayuc. ¹⁴ Ca'p ajcxy mijpidaacipy yi judíojäy ycostumbre etz ni ca' ajcxy mijpidaacip yi y'ane'min huidibi jäy ci'm ti nihuinma'ñ'aty, huidibi ajcxy ti jijpyöyduutni Dios y'ayuc ytiy'ajt.

¹⁵ Pın jäy huädz yjot yhuinma'n mïd, oy ti jacuyduñ costumbre, o oy ca' ti cuyduñ, Dios yjäygidacpy yi' co oyjot oyhuinma'n müidity. Pın jäy ca' huädz yjot yhuinma'n müidity, oy ti jacuyduñ costumbre, Dios ca' jäygidägy yi' com jibic ajcxy yjot yhuinma'n müidity, ca' ajcxy nej ñayjihuiyigixy. ¹⁶ Yi jadu'mbi jäy hue' ñaybidáacigixy jadu'n nej jihuiy nej ooy Dios ytiy'ajt ajcxy mijpidaaci, chi ma huidibi ajcxy ytumyb ji yajniguëxcixy co ca' ajcxy cuydungixy Dios ytiy'ajt. Dios ca' yi' oy iix ajcxy yhuinma'n, ca' ajcxy capxymidoogixy Dios, ca' ajcxy Dios ytung mihuaadity.

2

Nej jëb huaad chinaaygixy yjugy'ajtcixy

¹ Miich huädz myaj'ixpigipy yi migügtijc nej jëb huaad cuydungixy Dios ytiy'ajt. ² Miich m'ihuijip mgapxhuijip yi mijjäydijc huen ca' ajcxy y'amügyjäy'adipy; huen huijycujc jäy'ajtcixy; huen müd'ajtcixy oyjot oyhuinma'n; huen mijpidaaccixy Dios ytiy'ajt cixyot huiñijot; huen oyjäy 'ajtın tungixy müd huentımpınjäyity; huen ajcxy mecxtujcın yajtungixy ma yi chinaayın. ³ Nañyımıyjadu'n mijjäydijc ajcxy töxyjäybi huen ajcxy jadu'n jäy'ajtcixy nej huidibi ajcxy Dios yajmij'ajtp; ca'p ajcxy ymigügtijc nigapxip ni'o'jihuiy, ni ca' ajcxy nihuambedipy; nañ ni ca' ajcxy y'amügyjäy'adipy; huen ymigügtijc ihuijicixy capxhuijicixy müd ayuc oybi tudägyı. ⁴⁻⁵ Yi mijjäydijc ajcxy töxyjäybi huen ihuijicixy capxhuijicixy yi mutz'anäg töxyjäydijc ajcxy nej jëb huaad chinaaygixy yjugy'ajtcixy; nej jëb huaad ytijc ñäy yajmij'ajtcixy; nej jëb huaad tzojccixy jihuiyigixy y'ung y'anäg; nej jëb huaad oyjot oyhuinma'n yajtungixy. ihuij capxhuij yi töxyjäy mutz'anäcpi co huen tiydudägy chinaaygixy, ca' ti jibic-huinma'n ajcxy mibidzimipy. Huen ihuij capxhuij ajcxy nej jëb huaad yjin ytijc cuend'ajtcixy yajxon; nej jëbi y'amigüg'ajtcixy, nej jëb huaad capxymidoogixy ñäy. Pen jibic-huinma'n anajty ajcxy ytumyb, chi anajty Dios ytiy'ajt yajnigapxy yajni'o'jıy.

⁶ Miich Tito, nañ jadu'n jaty ihuij jaty capxhuij yujyeeepidijc etz anäctijc nej jëb huaad oyjot oyhuinma'n yajtungixy, ca' huaad ytundigooygixy ycapxtigooygixy. ⁷ Tito, tiydudägy mdzinähuiy, oyjot oyhuinma'n myajtunipy. Jim yi migügtijc iixpejt pigipy ma miich, nej jëb huaad ytungixy. Huädz ajcxy myaj'ixpigipy yi tiy'ajt, huijycujc m'idipy. ⁸ Tito, m'ihuijip mgapxhuijip yi migügtijc müd oy'ayuc oyhuinma'n, jigix co pınjäy jıpcogapxıhuaanıp miich m'ayuc, chi tzo'ydu'n jihuihua'n, e jadu'n ca' jadipy nej jibic xyñigápxcixıpy xyñi'o'jıyigıpy.

⁹⁻¹⁰ Je tumbidijc huidibi ijtp cojuyıy codoogıy, huen yhuindzin imidoogixy capxymidoogixy nej ypadyı. Huen tungixy nej huaad yhuindzin jäygidägy, ca' adzo'nmay yjäy'adipy. Ca' meedzip tijaty yhuindzin yjë'ajtpy, huen yajmij'adipy yajxon yhuindzin, huen yajxon ytung tundaayı. Pen jadu'n ajcxy yhuindzin midungixy yajxon, huiñıt cömay y'idipy yi Dios ytiy'ajt, je Dios huidibi xyajñdzoocım ajt n'alma.

¹¹ Cham n'ixxim nnejhuıym nej Dios may'ajt ti tuñ müd tüg'ócıy jäy ajcxy ycıxpi, co ti yaj'oyıy nej jëb huaad hueñyıpınity pınjaty mijpidaacıp yi' y'ayuc, ypadamyb ajcxy y'alma ñıdzoocım co anajty y'o'ccixy. ¹² Dios cham ti xyajnejhuıym pen tzögamb iich ajt n'alma, chojcpy co n'ixmajtım je jibic-huinma'n huidibi Dios ca' jäygidägy. Ca'

huaad ooy nijot'ajtm yí mayñaxpi tzinaayin ma jadachambi xii tiempo yjacyöy. Copicy ndzinaayim huijycujc etz tudägy, e nguydunim Dios y'ayuc ytiy'ajt. ¹³ Njijp'ijxim mina Jesucristo, je huidibi xy'ane'mdaayim, ymiinañ ya naaxhuiñ jadüg'oc müd ich ajt ycixpi. Njotcugüiyim ich ajt co n'ijxim ymiñ müd y'oy'ajtm ymic'ajtm, yí Dios huidibi yajndzögam ich ajt n'alma. ¹⁴ Yí Cristo Jesús ti ñayyoxyii ti ñaydoogyii co y'o'cy ma yí cruudz müd ich ajt ycixpi. Yí ti xyjuybidzimim ma anajty yí mujcu' c'í'am xymüd'ajtm, co anajty ti nbocytuunim. Yí ti xyajpocyñihuätztaayim nidüg'óciy, jigix Dios xyjäy'ajtmip müd huädz jot huädz huinma'ñ, jeb nduunim oyjäy'ajtm cixyjot huinjot.

¹⁵ Tito, jada tiy'ajt migügtijc myajnimaydähuipy. M'ñhuijip mgapxhuijip ajcxy yajxon. Dios ti xymöy cötujcin co m'ojipy pinjaty xycapxmidoob, jeb ajcxy yí m'ane'min xyajmij'ajtip.

3

Huen mijnicxpejticy yí gobierno ytungmüdpí

¹ M'ñhuijip mgapxhuijip yí migügtijc huen capxymidoogixy yí gobierno ytungmüdpí etz cajpjäy ytungmüdpí. Huen capxymidoogixy jadu'n nej y'ane'myii ajcxy. Huen tungixy huidibi tiydudägyip huidibi ajcxy yaj'ane'mip. ² M'ñhuijip mgapxhuijip yí migügtijc ajcxy ca'p ajcxy ni pin nigapx ni'ojihuip, nañ ni ca' tzipcaapy ajcxy ixtähuip, huen ñaybidáacigixy amigüg, huen mimecxtujtaagyixy yí ymigügtijc ajcxy, huen nicy yeemy jäy'ajtcixy müd yí mayjäy ajcxy.

³ Jecy'ajty ma ca'ni anajty nmijpidaacim Cristo Jesús, hue' anajty nyajpaatim müd jibic-huinma'ñ. Ca' anajty n'ñmidoohuim ngapxmidoohuim. Je mujcu' anajty ti xyhuin'ñnim, paady anajty nnidigooyim ndüdigooym. Ndzachnijot'ajtm mayñaxpi tzinaayin, ni ngajajtm anajty nej n'ixmajtm yí jadu'mbi huinma'ñ. Jibic-huinma'ñ nduunim. Jadu'n njäy'ajtm nijot anajty n'idäztim, nga'oy'ijxim anajty nmigügtijc. Paady jäy anajty xymüddziptzoonim, chi naymijotma'tcootim miñ xyipy. ⁴ Jadu'n anajty nduunim ixti cooni Cristo Jesús ñayguëxigüyb ya naaxhuiñ, etz nnejhuüyim jadu'n nej Dios ich ajt nihuambi yajtzoocpi may'ajt oy'ajt ti tuñ müd tüg'óciy jäy ajcxy ycixpi. ⁵ Yí xyajndzooxim ajt n'alma canan co ich ajt ndzach'oyjäyity. Hue' je' jadu'n ti tuñ müd co pa'ayo'n ti yajtuñ müd ich ajt ycixpi. Ninigoob ti tuñ may'ajt oy'ajt müd ich ajt ycixpi. Chi yaj'oyüyñi ajt njot nhuinma'ñ huinjemy müd je Espíritu Santo huidibi xyajtigüiyim njot nhuinma'ñ, e jadu'n ajt njugy'ajtm ndzinaayin chondaacni huinjemy. ⁶ Dios ti yecy yí Espíritu Santo janch mijcajee ma ich ajt njot nhuinma'ñ. Jadu'n Jesucristo xytuunim, je huidi ich ajt nihuaanim yajtzoocim. ⁷ Yí ti xyaj'ahuimbijtm tudägy müd je may'ajtm oy'ajtm huidibi ti tuñ co yí ti y'ögy müd ich ajt ycixpi. Jéyi cham y'oy'ahuixnity mina anajty nbadaanim je jugy'ajtm huidibi Dios müd huidibi ca' ycixipy ni minaa xii.

⁸ Jada ayuc jada tiy'ajt ndzojcpyich co miich mnigapxpedipy. Ooy ycopicyity co yí ajcxy huidibi mijpidacp Dios huen oyjäy'ajtm tungixyp. Ooy y'oyity co oyjäy'ajtm tungixyp ajcxy. Yjäygidägyipy yí jäy ajcxy müd je oyjäy'ajtm huidibi anajty ajcxy ytumyeb etz ypaadipy ajcxy oy'ajt. ⁹ Ixmatz yí jäy ajcxy huidibi nigapxy nimiydägy yí nigoobi'ayucity, yí huidibi ca' choobaady. Nañ jadu'n yí ajcxy huidibi nigapxp nimiydacp huidibi ñi'ap'ajtpy ñideedy'ajtpy. Ca' mijjptigiyihuipy yí tzip capxy ma yí judiojäy

ycötujcïn huidibi ajcxy ypanicxyp. Yi jadu'mbi tzip capxy ninigoob yi', ca' yi' ni ma choobaady, ca' jugy'ajt müidity.

¹⁰ Yi jadu'mbi jäy huidibi tzip capxy ixtaayb, müid tüg'oc mejtz'oc myaj'ojipy pen ca' ycapxcöbicy, tim ix'oj, huen nicxy. ¹¹ Mnejhuiyb co yi' jadu'mbi jäy ajcxy ti ixmajtcixy je tiy'ajt, tundigooyb yi' ajcxy, ci'm jadu'n naysajpocycähüiygixy.

Pablo nimay Tito co müid naybadaanip

¹² Nyajniguexipich nidüg, aver huidibi ich anajty n'ocquejxyp yi' Artemas o yi' Tíquico. Co yi' jim yjadipy, chi müich xyjatyñiminipyich mic'amy jim Nicópolis com jim nyajnaxa'ñich yi' tich poj tiempo. ¹³ Co yi' Zenas, yi' huingapxi, etz Apolo ajcxy jim yjadipy, quejxnajxcix müich yi', e mooygixy ytu'amgixpi ca'ydi ti yajmayajtcixy tü'am. ¹⁴ Huen yi' nmigügtijc'ajt ixpijccixy nej jäy y'oyjäy'aty, huen pubejtcixy pin tijaty yajmayajtp. Pen ca' jadu'n tungixy, Dios ca' yi' jäygidaacip yi' ajcxy yhuinma'ñ.

Pablo ycapxcixy müid Tito

¹⁵ Yi migügtijc ajcxy huidibi ya yquejxyp ajcxy capxpocxin ma mi-ich. Nquejxpich ngapxpocxin ma tüg'óciy yi' nmigügtijc ajt huidijaty jim yajmij'ajtp Cristo Jesús. Huen Dios mij may'ajt tunip müid müich ajcxy ycixpi. Amén. Jadu'ñyi ngapxcixyich.

FILEMÓN

Yi Necy Huidibi San Pablo Yajniguejx Filemón

¹ Hich Pablo etz Timoteo, iich ajt nmigüg, nijayiybich miich Filemón huidibi ooy ndzocyich, huidibi quipxyi müd nduunim. Nmachiñäyich müd co nyajmij'atyich Cristo Jesús. ² Nañ jadu'n nijayiybich yi Apía, iich ajt nmigüg töxyjäybi, etz yi Arquipo, huidibi capxhuäcx Dios y'ayuc tú'ciy müd iich ajcxy, etz tüg'óciy yi migügtijc huidibi naymújciixp ma miich mdijc Dios ojadajtcixy. ³ Huen Dios Teedy etz yi Huindzin Jesucristo tuñ may'ajt oy'ajt ma miich ajcxy etz xyajjotcugiygixipy.

Pablo capxpaady Filemón co mijpidägy Dios

⁴ Nyajnajxpyich Dioscojuyip ma Dios müd miich ajcxy ycixpi. Njatyimjäymejtzcich miich ajcxy jabom jabom co Dios nmibijctzooyich. ⁵ Ti iich ayuc nmidoj jadu'n nej miich mdzocy mijhuüy yi Huindzin Jesús etz tüg'óciy pinjaty yajmij'ajtp Jesús. ⁶ Nañ jadu'n nmibijctzooybich Dios müd miich ajcxy ycixpi, huen oyjä'ajtin mdunipy müd je migügtijc, jadu'n nej Dios ti xyajnejhuüy yi tiy'ajt jigix ajcxy tiy'ajt paadipy ma miich nej jeb ajcxy cuyduñ Cristo y'ayuc. ⁷ Hermano, ti iich ooy njotcugiyich müd yi m'oyjä'ajtin huidibi miich mdumyb co ti mbubety yi Dios yjäy.

Pablo pijctzoy tüg may'ajt ma Filemón müd Onésimo ycixpi

⁸⁻⁹ Njapijctzoohuamybich tüg may'ajt ma miich. Oy njamüdidyich cötujcin huidibi Jesús xymooyich jeb nja'ane'my co miich mgöbigipy Onésimo oy'amy. Per ca' jadu'n n'ane'mañ müd co ooy ndzocy ooy njihuüyich miich. Paady cham may'ajt nbijctzooyich ma miich co mgöbigipy yi Onésimo oy'amy. Hich Pablo, ti nmijjäyiyñich. Cham jäy ti xypidägyich pujxtigoty müd co ngapxhuäcxich Jesús y'ayuc ytiy'ajt. ¹⁰ Cham may'ajt nbijctzooyich ma miich co mba'ayoohuipy yi Onésimo. Jadu'n njihuüyich nej n'ung'adyiijich müd co yi' ti mijpidägy Jesús ya ma iich nbujxtijc'iñäyich co ti nyajnimäyich Dios y'ayuc.

¹¹ Tiibi xii tiempo ñaxy co yi Onésimo ca' yi' ti xy'imidoj ti xycapxymidoj. Jadachambi janchtiy capxymidoohuam jadu'n ma miich etz jadu'n ma iich. ¹² Cham nyajnigüexy Onésimo. Ooy njajihuüyich co yam nguexyich. ¹³ Ooy iich yam njayaj'ida'ñich ma iich jigix ixypy yam xymüdtuñich. Ytimyñipaaty ixypy jadu'n nej miich xymüdtuñich ma yam nbujxtijc'iñäyich müd co ngapxhuäcxych je jemybi oybi ayuc nej Jesucristo yjaty ayoo. ¹⁴ Per ca' iich n'a'ixiyich nicxy nyajhu'myich, pen ca' miich jadu'n mina'ñ. Ca'p ndzocyich adzip ahua'ñ tijaty miich mdunipy. Jeyi ndzocyich co miich oy'amy xypubedipyich. ¹⁵ Ca' yjecyity paady ycixpi ti xycöguëgy jebi mijpidägy Jesús. Hueeni xii tiempo ti y'ity ya, e cham co yhuimbidity ma miich, müd y'idipy jim huinixii. ¹⁶ Ca' jadu'n m'ocmüd'ajtnip cham jadu'n nej jac'oyñipin cojuyiy codoogiy tumbi. Hue' je' mmü'adip jadu'n nej Jesús yjäy huidibi ooy mdzocy mijhuüy. Pues ooy iich yi' ndzocy njihuüyich. Jac nigü cham miich mdzogipy njihuüipy müd co yi' cham y'oyjäyity, etz co cham mijpidägy yi Huindzin Jesús.

¹⁷ Pen janch miich xymigüg'adyiijich cöbic yi Onésimo jadu'n nej iich miich ixypy xycöbicyich. ¹⁸ Pen ti yi' yinjaty huenjaty xymidundigoy o

xymínucx'adyii ðich miich nmigüedipy. ¹⁹ ðich Pablo, ðich miich njaaybich nfirmajyich müdich ngi'mgi' ngi'mletra. Hermano, nmigüedipyich nej Onésimo xymínucx'adyii. Oy ðich yam ca' n'ibaady ngapxpaady co müich xymínucx'adyiijich müid co Dios ytiy'ajt ti mbaady ma ðich. ²⁰ Xypubedipich müid Onésimo. Yi nHuindzin'ajtim Jesús yjäygidägi py pen jadu'n mduñ. Mdunipy may'ajt müid Onésimo müid Jesús ycixpi, e jadu'n ðich jëb huaad n jotcujc'atyich.

²¹ Nnejhuuybich co ooy m'ðmidoy mgapxmidooy, e jadu'n nej yam njacnijayy, jac'anaxy mduna'ñ. ²² Nañ jadu'n yam nimäy. Tun may'ajt ni'ixi tüg jättac. Njijp'ijxypich co nbujxtijcpidzimipyich tzojc müid co müich ajcxy Dios mibijctzoogixy müid ðich ycixpi, e jadu'n jëbi nicxibich ma müich.

Pablo ycapxycijxy müid Filemón

²³ Nañ nbidacpyich necyjoty yam. Xycapxpoocx Epafras ðich nmibujxtijc jäy müid Cristo Jesús ycixpi. ²⁴ Nañ xycapxpoocx Marcos, Aristarco, Demas etz Lucas. ðich yi' ajcxy xypubejtp ya. ²⁵ Huen yi nHuindzin'ajtim Jesucristo may'ajt oy'ajt tunipy ma müich ajcxy, jëb müich ajcxy oy m'ity. Amén. Jadu'n ngapxcixyich.

HEBREOS

Yi Necy Huidi Pinjaty Yajnigüejax Je Hebreo jäy

¹ Jecy'ajty Dios ayuc yejcy ma ajt nmij'ap nmijteedy canaag'oc etz canaagnax müid je yprofetas ajcxy, je' ajcxy huidibi najtzcapxiy Dios y'ayuc. ² E jadachambi ma xii tiempo yhuingooni co je naaxhuiñybi ycixani, Dios ayuc yecy ma ich ajt müid je' y'ung. Dios müid y'ung yaj'oyiye je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadziydäy tüg'óciy. ³ Dios y'ung ymüid Dios y'oy'ajtín, yi' je' Dios yt#cxin'ajtpy yjajin'ajtpy. Yi' je' codinaayb etz yajnigüexigy nej je' je Dios. Dios y'ung huijtz'ijtaayb tüg'óciy müid je' y'ayuc etz ane'min mic'ajt müidpi. Co Dios y'ung ti xyajhuaatzim ajt nbocy, chi cöbijcy je mij'ane'min jiihy tzajpjoty, jadu'n nej jihuüy y'ixtacy a'oy'amy ma je mijpi Dios ymijc jiihy tzajpjoty.

Dios y'ung jacmij yi'ca'ydi ángeles ajcxy

⁴ Je Dios y'ung jac mij je' ymic'ajt y'ane'min müidity, ca'ydi je ángeles ajcxy. Com yi' je' Dios y'ung, paady ycixpi mic'ajt müidity jaydëbi ane'my huidibi Dios yje'ajtpy, e ca'ydi yi' ángeles ajcxy yi' jadu'mbi mic'ajt müid.

⁵ Com Dios ca' yi' ni tüg ángel nimay:

ich müich n'ung'ajtpy. ich müich ti nyajpi'c'aty jadachambi xii.

Nañ jadu'n ca' Dios ni tüg ángel nimay:

Müich xyteedy'adibich, ich müich n'ung'adibiyb.

⁶ Co Dios y'ungoob oy quexy ma naaxhuiñjyay chinäy, chi yi' ane'min pidacy:

Huen je ángeles ajcxy nidüg'óciy huindzigihuiipy pa'tjihuihuiipy je' y'ung.

⁷ E müid je ángeles ycixpi, Dios ymina'nñ:

Yi ángeles jadu'n yi' ajcxy nej poj. Yi' ajcxy huidibi tzajpjoty tzinaayb, jadu'n yi'ajcxy nej huidzuc, nej jiiñye'n.

⁸ Jadu'n Dios ymina'nñ müid y'ung ycixpi:

Müich, Dios'ajtp, müich m'ane'min huinixii huinitiempo yi' y'idipy. Müid mdudägy'ajtin müich m'ane'mipy.

⁹ Ti mdzocy je tiy'ajt tiybi, e ca' ti m'ixa'nñ je jibicpi. Paady ycixpi Dios, müich mDios, ti xyhuin'ixy, e ti yejctäy nigi ma müich je jotcujc'ajtin je xondaacin, ca'ydi ma yi' mmi'ane'mbidijc.

¹⁰ Dios nañ jadu'n ymina'nñ:

Müich, Huindzin Dios, oga'n'aty mbidac nej naaxhuiñybi chondacy, e müid müich mmi'ajt myaj'oyiye je tzajp.

¹¹ Cijxtähuiy yi' naaxhuiñybi etz yi' tzajp, per müich huimip huinixii huinitiempo. Jadu'n yi' naaxhuiñybi etz yi' tzajp y'amijydähuiipy nej huit.

¹² Jadu'n müich yi' naaxhuiñybi etz yi' tzajp m'anëgipy nej tüg huit yaj'anëgyin. Jadu'n müich yi' naaxhuiñybi etz yi' tzajp myajtigadzipy nej jäy ajcxy yajtigach yhuít. Chi müich je'n' m'idipy, je mxii mjimijt ni mina ycacixipy ycatigoyipy.

¹³ Ni camina Dios canimay ni tüg je ángeles ajcxy:

Hña' ma ich nmijc a'oy'amy, ixti mabaad ich müich je mmidzip nmimadactäyich, jadu'n yi'ajcxy nipaadiipy nej yi' müich mdecypocpejt'adyii.

14 Tüg'óciy je ángeles ajcxy ac espíritu yi' ajcxy, e ytungixy ma Dios, yquexyöygiy jigix pubedipy je jäy ajcxy huidibi ajcxy y'alma padam ñidzoocin.

2

Ca' n'ijxnajx nmidonajxim nigoo yi pocyhuinmeecxin

¹ Mïid jadayaabi tiy'ajt ycixpi, oy co yajxon n'ocjäyugüiyim Dios ytiy'ajt huidibi ti nmidoohuim, jigix ca' njijpyöyduutim je Dios ytiy'ajt huidibi jadu'n nipatp nej tü'aa oybi. ² Pen je ayuc tiy'ajt huidibi ángeles ajcxy yejc jecy'ajty, hui'm je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii müid ypocy ycixpi. ³ ¿Nej tijy iich ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jëbi xyajñidzoocim ajt n'alma? Yi Huindzin Jesús jayjip'aty ci'm nigapxy Dios ytiy'ajt jadu'n nej jëbi Dios xyajñidzoocim ajt n'alma. E jac'axam je discipulos ajcxy nañ jadu'n najtzcapxíy Jesús y'ayuc, e nigapxpejy ajcxy co yjanchity je Jesús y'ayuc, e chi capxnajxy ajcxy jada tiy'ajt ma iich ajt. ⁴ Jadu'n anajty capxhuäcxixy Jesús y'ayuc ma iich ajt, chi Dios yajniguëxícip Jesús y'ayuc co yjanchity co tuñ ijxpejt, mijhuinmañ etz milagro. E co Dios xymooyim je yjihuiñ ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ymigü

⁵ Dios ca' yi ángeles ajcxy ti cötujcin möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi iich ajt nnimiydaacim. ⁶ Hue' janchity ji tüg'it yjaybetyity ma Dios ñecy, ma ymïnañ:

Miich Dios, ¿ti yi' je naaxhuiñyjäy, co miich yi' ajcxy mjäymedziyb? ¿Ti yi' je naaxhuiñyjäy, co miich je' ajcxy mjetmay'adyii?

⁷ Janch con xii tiempo miich ti mmöy yi naaxhuiñyjäy ajcxy e nañ ti mmöy jacminacy ymic'ajt y'ane'm'ajt ca'ydí yi ángeles ajcxy. Per jac'axam miich mmöhuañ naaxhuiñyjäy ajcxy nigí ymic'ajt y'ane'm'ajt, ca'ydí je ángeles ajcxy. Tüg'óciy huidijaty miich ti myaj'oyíy anajty ti mbidactähuiip yi' ma yi naaxhuiñyjäy ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuiñ tüg'óciy tijaty huidibi ti myaj'oyíy, y'idipy ma yi' ajcxy ytecpa't.

E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixypy ca'ni cham n'ijxim co tüg'óciy tijaty ya naaxhuiñ etz tzajpjoty ca'ni amugi' ycapxycöbigyii. ⁹ Dios ti xyaj'ijxim co Jesús müid mij'ajt ane'm'ajt. Je ángeles ajcxy nigí mic'ajt oy'ajt anajty müidity, ca'ydí Jesús co yi' chinay ya naaxhuiñ. Jadu'n Dios tuñ jaydëbi Jesús y'ögy müid jäy ajcxy ypocy ycixpi. Jadachambi Dios ti möy Jesús mij oy'ajtin, etz mij ooy ti cömay müid je tzaachy'o'cin huidibi ypaat.

¹⁰ Tüg'óciy huidijaty ya yajpatp, ji'ajtp yi' müid Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuun co yajca'pxi Jesucristo y'oy'ajtin müid je tzaachypí huidibi ti minaxy ti yajnaxy. Müid co Jesucristo tzaachypí ti minaxy ti yajnaxy, paady ycixp jäy ajcxy padaangixy Cristo y'oy'ajtin. ¹¹ Müid co Jesucristo, je huidibi jäy ajcxy yajpocyñhuaatzp, jii by mic'ajt ti paady ma Dios Teedy, paady ycixp yi' ajcxy huidibi patcixp pocyñhuaatzin nañ jim mic'ajt patcixy ma Dios Teedy. E müid co Jesucristo etz yi' yjäy mic'ajt patcixy ma Dios Teedy,

paady ycixp Dios y'ung je Jesucristo ca' ti tzo'ydu'n jihuïy co yí' ymína'ñ co je mibijcpidijc jadu'n nipaady nej yí' yjugytijc ymigügtijc. ¹² Paady je Cristo ymína'ñ ma yjaybetyity:

Miich Dios, ñich miich ngaxpadipyich ma nmigügtijcich. N'ñhuipyich iy müd miich ycixpi ma je jäy ajcxy ti nayoöymújcgixy.

¹³ Nañ jadu'n Cristo ymína'ñ ma yjaybetyity:

Nmijpidägibyich Dios.

E jadüg'oc ymínaanip:

Cha ñich, müd je ung anäg ajcxy tiibi Dios xymöyich.

¹⁴ Ma jäy ajcxy tügquëx'ajtcixy, tügpi yxiixy, tügpi ni'py je' ajcxy. Nañ jadu'n Jesús ymüid je' anajty yxiixy ñi'py jadu'n nej jäy ajcxy ymüidity jigix jëbi y'ögy, e jadu'n je' yajhuindigoydähuipy je huidibi anajty jamic'ajtmüid co jäy yaj'ögnyb, je' je' je' mujcu'. ¹⁵ E jadu'n je' Cristo yajnihuädzictuty tüg'óciy pinjaty anajty cojuyiy codoogiy y'ijtp ma je' mujcu', müd co tzignygixy yí' y'o'cin. ¹⁶ Janch co Jesús ymüiñ ya naaxhuiñ, ca' nmínaanim co pubeda'ñ je' ángeles ajcxy, je' janchtiy ypubedamyb Abraham y'ap y'oc. ¹⁷ E müd jada ycixpi, Jesucristo jadu'n anajty müidity ñinícx etz yjugy'ajtin tú'ciy müd je' jugytijc ymigügtijc ninícx etz jugy'ajtin, jigix jëbi yí' naydügpajc codináy naaxhuiñyjäy ajcxy ma Dios yhuinduu müd tudägy'ajt etz pa'ayoohuñ. Etz nañ jadu'n jigix jëbi huindzigiy Dios müd yci'm ñinícx müd jäy ajcxy ypocy ycixpi, e jadu'n yajpocyhuaatzähuip yí' mayjäy ajcxy. ¹⁸ Com Jesucristo ci'm tzaachypi minajx yajnax, etz nañ jadu'n je' mujcu' Jesucristo jot'ijxy huinma'ñ'ijxy, paady ycixp Jesucristo jëbi pubety pinjaty jadu'n tzaachypi minajxp yajnaxp, etz ma yjot'ixyii yhuinma'ñ'ixyii je' mujcu'.

3

Jesús jacnīgi mijity yí' ca'ydí Moisés

¹ Müd co Jesucristo jadu'n ti tuñ, paady ycixp miich ajcxy migügtijc huidibi cixyot huinijot mijpidacp Jesucristo, je' huidibi ajcxy Dios ti xyhuin'ijxcixy co xyje'adánigixy. Pidaaccix mhuinma'ñ yajxon ma je' Cristo Jesús, je' huidibi nejhuiyim co Dios ti quexy ya naaxhuiñ, je' huidibi tügpajc mijtungmüid ma Dios, huidibi tügpajc xycodinaayim ma Dios. ² Jesús tudägy yí' ti y'ity ma Dios yhuinduu, je' Dios huidibi ti yajnibigyii je' mijtung, tim jadu'n nej Moisés y'ijty tudägy ma je' ytung müd tüg'óciy jäy huidibi anajty ti cöbijccixy Dios ycötujcin ma Moisés. ³ Jesús ymíhuaad nīgi huindzigí'ñ etz cömayin, ca'ydí Moisés. Tim jadu'n nej pin tüg tijccoip je' je' ijtp cömay, ca' nmínaanim je' tijc ijtp cömay. ⁴ Tüg tüg tijc jim je' pin cojp. Per Dios yí' ti yajcojtäy yaj'oyidyäy tüg'óciy huidibi ji'ajtp. ⁵ E jadu'n je' Moisés tudägy je' ytuñ müd tüg'óciy jäy huidibi ti paady Dios ycötujcin ma yí'. Je' Moisés je' ytung'ajti yejcy je' tiy'ajt huidibi anajty Dios jac'axam yegamyb. ⁶ Je' Cristo tudägy ytuñ müd tüg'óciy ñich ajt huidibi mijpidacp Dios, tim jadu'n nej tüg jäy y'ung tudägy ytuñ ma yteedy ytijc yteedy ypidägy. Jadu'n ñich ajt nbaady nej Dios ytijc, e Cristo tudägy ytuñ müd ñich ajt, pen tudägy nmibijcim Dios y'ayuc, ca' n'ixmajtzim ajt nmibijcin. Pen nmijpidaacim Dios agujc jotucujc ixti mabaad n'o'cim müd je' ycixpi huidibi njijp'ijxim ma Dios.

Dios yjäy ajcxy ypooxin

⁷ Paady ycixp jadu'n yjaybetyity ma Dios ñecy ma je Espíritu Santo jadu'n yminañ:

Jadachambi pen midooyb miich ajcxy nej Dios ymina'ñ,

⁸ ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huidibi mibidigy Dios jecy'ajt (co ajcxy y'ijty jim migtigiduum). Je xii je tiempo jecy'ajty co ajcxy jot'ijxy huinma'ñ'ijxy Dios.

⁹ Chi Dios ymina'ñ:

Miich ajcxy mmij'ap mmijteedy ajcxy jim migtigiduum xyjot'ijx xy-huinma'ñ'y'ijxich ajcxy jecy'ajty. Ca' ajcxy jäymech co ajcxy y'ijxy anajty canaag mjhuinma'ñ huidibi ndumybich anajty müd y' ajcxy ycixpi huixchiguïpx jimijt.

¹⁰ Paady njotma'tyich müd miich ajcxy mmij'ap mmijteedy jecy'ajty, e nmınaañich: "Nüdigoy tüdigoy ajcxy jabom jabom ma yjot yhuinma'ñ. E ca' ajcxy nejhuñhuaangixy anajty ñch nni'aa ndü'aa."

¹¹ Paady y' ajcxy nmijotma'tyich, e janch janch nniimaayich ajcxy, e ca' n'iindägyich, co ca' ajcxy ytigihuipty ma ñch nbocxtac.

¹² Migütiyc, naygüend'äjtigix nidüg nidüg co ni tüg miich ajcxy mgamüd'adip jibicjot jibic-huinma'ñ, e ni mga'ixmájtzcixipy Dios juugyp' y'ayuc, müd co ca' mmibijccixy. ¹³ Hue' janchtiy nayjot'amijmóoyigixy miñ xyipy jabom jabom nami xii tiempo yjacnicxñi. Jadu'n miich ajcxy mdunipy, ca'ydi ajcxy y' pocytunii xyhuin'ingixy, e chi anajty mnaybidáacigixy jotjuuñ. ¹⁴ Pen nmibijcim nmijpidaacim Cristo y'ayuc tiibi nbaatim oga'n'aty, e ca' n'ixtigihua'cim mabaad n'o'cim, chi jébi n'ijtim müd Cristo.

¹⁵ Je' je' je' huidibi jaybetyity ma Dios y'ayuc:

Cham, pen midooyb miich ajcxy nej Dios ymina'ñ, ca' ajcxy m'ijtcixy jotjuuñ, jadu'n nej je' anajty ajcxy huidibi Dios mijotma'tp anajty müd co ajcxy mibidigy Dios.

¹⁶ ¿Pinjaty ajcxy huidibi jecy'ajty midou Dios y'ayuc e mibidigy Dios? Nidüg'óciy je' ajcxy huidibi tzomb Egipto naaxjot jecy'ajty müd Moisés.

¹⁷ ¿Pinjaty je Dios ymijotma't jadu'n huixchiguïpx jimijt? Je huidijaty ajcxy tundigoy müd Dios ytiy'ajt, e je' ajcxy cijx y'öctaaygixy jim migtigiduum. ¹⁸ ¿Pinjaty Dios ñimay co ni camina ytigihuipty ma je Dios y'it ylugar ma jébi ypoocxcixy müd y'it? Je' ajcxy huidibi ca' ycapxymidou.

¹⁹ Paady nnejhuñyim co janch ca' ajcxy jajty nej ytigiygixyipy ma Dios y'it ylugar müd co ajcxy ca' mibijcy Dios y'ayuc.

4

¹ Com nmüdni ajt Dios y'ayuc, jadu'n nej ti xyaj'ahuaniyim co ndigiyim ma y' chinaydac yjugy'ajttac, e nboocxim müd y'it. Paady ooy tzocy co ndzigiyim Dios. Ca' jecyity co nidüg miich ajcxy ca' mdigihuipty müd co ca' mmibijccixy Dios y'ayuc. ² Nañ jadu'n ti ñch ajt nmidoohuim je Dios y'ayuc oybi, tim jadu'n nej y'it ajcxy jecy'ajty ti midooy. Per ca' Dios y'ayuc ma ti ypubedyii ajcxy co ti jamidoogixy je tiy'ajt. Com hue' ajcxy ymidou, e ca' ajcxy mijpidady. ³ ñch ajt com ti nmibijcim je Dios y'ayuc oybi, ñch ajt je' tigiyimip ma je it huidibi Dios ti tijy ma jébi nboocxim müd y'it. Com Dios jadu'n yminañ:

Paady yi' ajcxy nmijotma'tyich, e nnimäyich ajcxy, n'ïbaadyich ngapx-paadyich n'ayuc, co ni camina xii yi' ajcxy y pocxtac capaadipy ma ïich.

Tüg'óciy huidibi Dios yajcojy yaj'oyïy, hue' ti yajcojy ti yaj'oyïy jayijpni ca'ni anajty naaxhuiñybi chondacy. ⁴ Com ma yjaybetyity je tiy'ajt jii by muumity nigapxy je mihuixtujcxïibi ma jadu'n ymïna'ñ:

Dios ypoocxy je mihuixtujcxïibi müd je' ytung ycixpi tiibi anajty tuñ.

⁵ E jadüg it yjaybetyity ma Dios ñecy ma jadu'n ymïna'ñ:

Ca'p yi' ajcxy ytigïygixipy ma ïich nbocxtac.

⁶ Hue' janchtiy Dios yjacmïd'ajtyñi it lugar ma y pocxtac ma jëbi pinjaty ytigihuiip. Yi' ajcxy huidibi tzinay jecy'ajty huidibi jayijp midou Dios y'ayuc, ca' je' ajcxy ytigïy ma Dios y pocxtac, müd co ajcxy capxycomidoodacy Dios. ⁷ Paady ycixpi Dios ti pidägy tüg xii tüg tiempo mina jëbi pinjaty tigihuiipy ma yi' y pocxtac. Je' jadachambi xii tiempo Dios ti pidägy. Dios ti xyñimaayim nej David ymïna'ñ tzach com jecy, nej miiñ jaybetyi hidibi ti yajnigapxy co jadu'n ymïna'ñ:

Jadachambi pen midooyb müich ajcxy nej Dios ymïna'ñ, ca' ajcxy mnybidäacigixy jotjuuñ.

⁸ Co Josué je Israel jäy ajcxy camoy je poccxin, ca' Dios canigapxy huingbi xii mina ytigihua'ñ ajcxy ma Dios y pocxtac. ⁹ Paady ycixp, jadu'n yjac-hui'myñi jadüg xii tiempo mina Dios yjäy ytigihua'ñ ma Dios y pocxtac.

¹⁰ Com pinjaty tigïyb ma Dios y pocxtac hue' je' y pocxy müd je' ytung ycixpi tiibi anajty tuñ, tim jadu'n nej Dios ypoocxy je mihuixtujcxïibi müd je' ytung ycixpi tiibi anajty tuñ. ¹¹ Hue' tzocy co naymic'ijxim nej huaad ndigïyim ma je Dios y pocxtac, ca' yjecyity co nijëjity müich ajcxy mbaduunipy nej ajcxy y'idïich hidibi ajcxy ca' mibijcy Dios y'ayuc, e ca' mdigïygixipy ma Dios y pocxtac.

¹² Com yi' Dios y'ayuc ijtp yi' huinixï huinïtiempo, e ymïd mic'ajt. Nigi yajtigïyñajxtäy ninïcx, jot almi, ca'ydi tüg espada hidibi mejtz'adu'm'amy jijpïp etz yjijpxu'ñity. E Dios y'ayuc nejhuïydaayb nej jäy ajcxy yjot yhuinma'ñ müdity, e tüg'óciy tijaty ajcxy ñijot'ajtcixyp. ¹³ Ca' ji ni ti hidibi Dios ti yajcojy ñicxy ñayyüchyii ma yi' yhuinduu. Tüg'óciy nej ajt njot nhuinma'ñ nmüdity ñiguëxictähuiip yi' ma Dios, je Dios ma ïich ajt nguendi ngïyegaanim, yi' ijxtaayb ajt njot nhuinma'ñ.

Jesús yi' je' je mihuingapxpi ma Dios

¹⁴ Jesús, je Dios y'ung, yi' je' tügpaic jacmijtungmïd hidibi xycodinaayim ma Dios müd ajt nbocy ycixpi. E Jesús ti ytigïy ma Dios yhuinduu, paady ycixp tzoc ijtim tudägy ma ajt nmibijcin. ¹⁵ Pues com Jesu-cristo, je hidibi tügpaic mijtungmïdip ma Dios, je hidibi xycodinaayim etz xhuingapxim ma Dios, com Cristo tzaachypi etz ijxta'ni canaagnax ti yajnaxy, tim jadu'n nej ïich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jëbi Cristo ajt xypa'ayoohuim co ajt nyajnajxim tzaachypi etz ijxta'ni. ¹⁶ Tzoc agujc jotcuje nmihuingoonim je Dios y'ane'mdac e n'ojadajtim nmibijctzoohuim Dios, jaydëbi co anajty jotmay nmïd'ajtim, chi Dios may'ajt oy'ajt tunipy müd ïich ajt ycixpi.

5

¹ Tüg tüg mijtungmïdipi hidibi huingapx jäy ajcxy ma Dios, hue' je' yajhuin'ijxp ma yëydijctijc, etz yajnigapxpejty, jaydëbi yhuingapx jäy ajcxy ma Dios etz yajnaxipy Dioscojuyip müd jäy ajcxy ma Dios, etz

yegipy huindzigi'ñ ma Dios müd jäy ajcxy ypcy ycixpi. ² Je mjtungmüidpi jäy ajcxy yajñibjic huidibi huingapxp jäy ajcxy ma Dios, jëbi yi' ajcxy pa'ayooy huenpinity huidibi pocy ymüid, com nañ jadu'n yi' ajcxy pocy jihuiy. ³ E müid yci'mbocy ycixpi copicy yegipy huindzigi'ñ ma Dios etz müid jacjadyii jäy ajcxy ypcy ycixpi.

⁴ Ni pin huaad ci'm ycanaymöyii je jadu'mbi tung co yhuingapxity ma Dios. Dios yhuin'ijxpy pinjaty huingapxp ma yi' müid jäy ajcxy ycixpi, tim jadu'n nej Dios huin'ijxy Aaron jecy'ajty etz yajñibjicy yi' jadu'mbi tung. ⁵ Jadu'n yjajty müid je Cristo, ca' ci'm nayñibjictzoohuiyi ma yi' jadu'mbi tung. Dios yajñibjicy co huingapxp müid jäy ajcxy ycixpi, e ti ymöyii je mij'ajt jadu'n nej anajty ti nimäy:

Miich je' iich n'ung. Hich miich mjugy'ajt ti mmöy cham.

⁶ Nañ jadu'n ymina'ñ jadüg'it ma Dios ñecy:

Miich je' mhuingapxyp je jäy ajcxy ma Dios huinixi huin'tiempo, tim jadu'n nej Melquisedec ytuuñ.

⁷ Co Cristo chinay ya naaxhuiñ, chi ooy mijuydägy minucxtägy Dios, chi ooy mibjictzoy janch mic je Dios huidibi jëbi ycohua'ñyii ma je o'cin. Müid co ooy mibjicy ooy huindzigiy Dios müid yung naxy yjot yhuinma'ñ, paady Dios ymidoohui. ⁸ Je Cristo oy je' anajty Dios ja'ung'adyii, yjajty nej ycapxymidoohuipy Dios, müid je' ycixpi nej anajty ti y'ayoy ya naaxhuiñ.

⁹ Co Cristo yajca'pxy yi' y'oy'ajtin müid je tzaachypü huidibi yminajxy yaj-najxy, chi ni'ixi' anajty y'ity jëbi cop'adyii alma nidoocin huinixi, jaydëbi tüg'óciy pinjaty capxymidoob Cristo, ypaadip ajcxy y'alma nidoocin.

¹⁰ Dios jadu'n yajñibjicy Jesús co yajnicxip je jac mijpi tung ma yi' co huingapxp jäy ajcxy ma Dios, tim jadu'n nej Melquisedec ytuñ jecy'ajty.

Je ayo'n co njijpyöyduutim yi mibijcin

¹¹ Ooy iich miich ajcxy mij nmüidmüydäga'ñ ma jadyaabi tiy'ajt, per ooy chachchip nimüydaacnity, com ca' miich ajcxy mic'amy mhuinijihuihuipy Dios ytiy'ajt. ¹² Jadu'n nej jada xii tiempo ti yjejni ma miich ajcxy oga'n ti mmibicy. Hue' miich ixypy ajcxy mniyaj'ixpijcin Jesucristo ytiy'ajt je tzipjatypi. Per miich ajcxy mdzojcyñi co myajnajtzcapxihuipy huinjemy je Dios y'ayuc huidibi ca' chipity. Ti miich ajcxy m'ahuimbijttaaygixy ca' mic majaa ma mmibijcin. Hue' jëyi miich ajcxy jadu'n nipaady nej pi'ctijc huidibi leche uucp, e ca' jadu'n paady nej mij'anäctijc huidibi caagy caayb. ¹³ Pinjaty yajpatp ma jada ixpijcin huidibi ca' chipity, jadu'n yi' nej ma'xungdijc com ca' jajtcixy je ayuc tiy'ajt tiybi. ¹⁴ Je' tzipjatpyi tiy'ajt je je' winjihuiygixp, je' huidibi ymibijkin mij may mid'ajtkixpin, jidu'n nej je' je' huidibi y'aa ytiitz jim ajkixyin je' titzpi jich kaagy je' ykaaygixpy, je' ko yjajtkixpy je' nej winjiwiygixichin je' huidibi oy, etz je' huidibi ka'oyin.

6

¹ Paady tzoc ñigi yajyujcpejtim n'ixpijcin ma Dios ytiy'ajt, tzoc ajt yajyeecim nmibijcin, jigix jadu'n nipaadip jadu'n nej jäy tiibi yhuinma'ñ yca'pxtaayñi. Ca' n'agapxiyo'cim canaag'oc jabom jabom je tiy'ajt huidibi ti nbaatim co oga'n nmibijcin Cristo. Ca' janam jatzojc n'ixpijco'cim huidibi oga'n ti n'ixpijcin jadu'n nej co njothuimbijtim nej anajty ndunim jibicpi huidibi xyajnicxim ma yi' o'cin, e jadu'n nej nmibijcin Dios oga'n. ² Ca' jadüg'oc n'ixpijco'cim je ixpijcin müid je iibejtin ycixpi, etz jadu'n nej yajcinixay je mibijcpidijc jaydëbi paadip ajcxy je Dios yjihui'ñ

ymic'ajt, etz jadu'n nej yi öcpi ajcxy yjugypigipy co anajty ti öccixy, etz jadu'n nej Dios tzaachytuna'n huinixi pocyjäydijc. ³ Chi njac'ixpijcin Dios y'ayuc je tzijjatypi, pen Dios jadu'n tzojcpy.

⁴ Com pinjaty ti huinjihuüy Dios y'ayuc ytiy'ajt, e jäygidägy huidibi Dios yejcpy, etz müidity Dios yjihui'n ma y'ay yjot, jadu'n je' nipaady nejihuüy chinay ma jin ytixcin. ⁵ Etz ti ajcxy jäygidägy Dios y'ayuc ytiy'ajt, e ti jihuiygixy Dios yjihui'n ymic'ajt huidibi yajtzinaayip ajcxy y'alma ma je xii je tiempo huidibi mümb cidacp. ⁶ Yi jadu'mbi jäy, pen tundigooyb ajcxy jadüg'oc müid Dios ytiy'ajt, e ixmach ajcxy nej anajty ti mübijccixy Jesucristo, ca'p jäbi jadüg'oc jothuimbijtcixy ma Dios müid pocy ycixpi e pijctzoogixy pocyhuinmееcxin jadüg'oc. Co ixypy jadu'n ajcxy tuñ, chi huimbizimy nej ajcxy jadüg'oc yajcruudzpejticy je Dios y'ung müid ajcxy ypocy ycixpi, e nixiiccixy yajxiiccixy nej Jesucristo y'o'cy müid ajcxy ypocy ycixpi. ⁷ Jadu'n yi' ajcxy nej naax ni'uuctich naag'oc naag'oc ytu'y. E pen je naax yejcpy ooy cosecha ma pin ti nüpy ti ytuñ, Dios je' anajty yconuucxin ymüid. ⁸ Pen actim apy etz actim jibic ujtz ypidzimy ma je naax, ca' je' ti tzoohuity, e Dios je' yajtigoyamb etz nöctähüp ma je mij jin. (Jada naax jadu'n jada' nipaady jadu'n nej jäy huidibi ti ixmach ymübijcin.)

Yi huidibi nmübijcin yi' xyhuijtz'ijtim tudägy

⁹ Migügtijc ajcxy huidibi ooy ndzocyich, oy ich ajcxy jadu'n njamüdmüydägyich müich ajcxy, janch nejhuüybich co ca' ajcxy ti m'ixmach yi mübijcin, etz nejhuüybich co oybi conuucxin mbaadaangixyp ma Dios etz m'alma ajcxy nidzoocin paadaangixy. ¹⁰ Com Dios ooy yi' ytudägyity, e ca' yi' jäydgoy huidibi müich ajcxy mdumyb müid yi' ycixpi, jadu'n nej oyyäy'ajtin ti mdungixy müid jacjadyii mübijcpidijc, e chambaad jadu'n mdungixy. ¹¹ Hue' ich ajcxy ndzocyich co müich ajcxy nidüg nidüg mnixondaaccix tungix oyyäy'ajtin ixti mabaad m'öccixy, jigix mbaadipy ajcxy tüg'öciy huidibi ajcxy mjijp'ijxyp ma Dios. ¹² Ca' ich ajcxy ndzojccixy co müich ajcxy m'ahuimbidity nuux. Padungix müich ajcxy jadu'n nej ajcxy ytungixy huidibi mübijcp Jesucristo etz huidibi yajtungixp mecxtujcin, jaydëbi mbaatcixy tiibi Dios xyaj'ahuanüygixy.

¹³ Co jecy'ajty Dios moy Abraham je' y'ayuc, ci'm je' nigapxpejty y'ayuc, com ca'anajty ji jac mijpi pin nigapxpedipy je' y'ayuc. ¹⁴ Chi Dios Abraham nimay: "Janch co ich müich ngonucxip, e nmöhüipy may m'ap'ung m'apmang." ¹⁵ E jadu'n Abraham y'ahuixy müid mecxtujcin, e jadu'n ycidigüiyi huidibi anajty Dios ti yaj'ahuanüyii. ¹⁶ Co ajcxy jäy ycapxcixy co yjanchity, jim je' pin nigapxpejtp je' y'ayuc, je pin jacmijp, je' nigapxpejtpy jada ayuc. E co nigapxpety je' y'ayuc, chi je ayuc y'ity, e ca' huaad pinjaty ymina'n co ca' yjanchity. ¹⁷ Paady ycixpi Dios nigapxpejty yci'm'ayuc, müid co anajty yajnejhuühua'n je jäy ajcxy co cuyduna'n y'ayuc tiibi ahuanüy. ¹⁸ Ji yajpaady mejtnax Dios y'ayuc huidibi ca' huaad capxtigach, e Dios ca' y'aniidägy nimina. E co Dios jadu'n tuñ, chi xyajjotcugüiyim mij, ich ajt huidibi n'ixtaayim e ndzojcin yi' ypubejtin. E ti nmüjpidaacim yi' y'ayuc jadu'n nej jip'ijxim co xymöhuaanim ajt n'alma jugy'ajtin huidibi ca' ycixipy ytigoyipy ni mina. ¹⁹ E müid co njip'ijxim co Dios xymöhuaanim ajt n'alma jugy'ajtin huidibi ca' ycixipy ytigoyipy, paady ajt n'alma jotcujc ijtim ca' ma tzigi'n jihui'n. Jadu'n Dios y'ayuc nipaady müid ich ajt ycixpi nej tüg pujx huidibi je barco huon'ijtp mejyjoty, ca'ydi nej yjaty je barco.

İch ajt njjp'ijxım co ndig'ihuaanım ma Dios y'it tzajpjoty, tim jadu'n nej je judıo sacerdote mįjtungmıdpi ytig'iy anajty jecy'ajty ma Dios y'it ma je Dios ytıjc, je it huıdibi anajty adıyducyıp mıd huit. ²⁰ Tig'ihuaanım ĩch ajt ma je Dios y'it tzajpjoty ma Jesúś ytig'iy mıd ĩch ajt ycıxpı, Jesúś ti yaj'ahuäch nej jębi ndig'iyım ma Dios y'ıt. E jadu'n Jesúś naydügpajc huıngapxy etz codınäy mayjäy ma Dios yhuınduu huınixı huınıtiempo. Jesúś ytung tim jadu'n nıpaady nej Melquisedec ytuñ jecy'ajty.

7

Yı Jesúś tim jadu'n ymıjıty nej Melquisedec

¹ Je Melquisedec hue' je' anajty rey'ajtp ma je cajp huıdi yxı Salem, e je' anajty huıngapxp ma je mįjpi janchypi Dios tzajpjoty. Co anajty Abraham yhuımbıty co anajty oy ti chıptuñ, ma anajty je reydıjc oy ti yajqueec-huächtäy ti mımadactäy, chi Melquisedec chooñ oy jıjpcoyöyıy Abraham, e chi ooy Dios mıjuydacı mınucxtacy mıd Abraham ycıxpı. ² Huıdibi anajty Abraham ti paady ma anajty oy ti chıptuñ, chi je' pıjc-huächxy majpcıcy, chi pugooñ tüg-pıcy mooy je Melquisedec. Melquisedec yxı hue' yhuımbıdzımy “rey tudägypi”. E com co anajty yrey'aty jım Salem, hue' Salem yhuımbıdzımy “jotujc'ajtin”, paady jębi nmınaanım jadu'n, “je rey huıdibi jotujc'ajtin yejcp”. ³ Je Melquisedec ca'p anajty yajnejhuıy ytaj yteedy, ni y'ap yteedy. Ni ycayajnimıydgıy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tüg huıdibi huıngapxp jäy ajcxy ma Dios huınixı huınıtiempo.

⁴ Occuendıtungıxy mııch ajcxy nej je Melquisedec anajty ooy ymıjıty. Je Abraham, ĩch ajt nmıj'ap nmıjteedy cı'm mooy Melquisedec je tüg pıcyı huıdibi anajty ti pıjci je rey ajcxy ma oy chıptuñ. ⁵ Nej Moısés ycötujcın y'ane'my je' anajty ajcxy yhuıngapxy ma Dios ytıjc je pınjaty Levı y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc mıd co jäy ajcxy yajcuend'adıpy tügpıcy je majc-pıcyı huıdibi xı diezmo. Oy je' anajty ajcxy ja'ajugy'adyıı ja'amıgüg'adyıı, com hue' anajty ajcxy Abraham y'ap y'oc nıdüg'ócy. ⁶ Per Melquisedec oy je' anajty ca' Levı ap'adyıı teedy'adyıı, yajcuejt je Abraham tügpıcy je majc-pıcyı. Je' je' anajty huıdibi cıdig'ıyı tııbi anajty Dios yaj'ahuanıyıı. Jadu'n Melquisedec yajpuhuanıy Dios je Abraham. ⁷ Ni pın ycamına'nıp co ca' yjanchıty co je pın conuucxın yejcp, jac mıj je', ca'ydı je pın yajconuucxp. ⁸ Ya ma ĩch ajt, pın cıdig'ıyıp tügpıcy je majc-pıcyı (diezmo), hue' je' ajcxy jäy huıdibi öcp. Per jadu'n nej anajty Melquisedec, jadu'n ymına'nı ma yjaybetyıty co je' yjactzınaaynı. ⁹ E jębi yajmına'nı co je Levı etz jadu'nıybaad je y'ap y'oc huıdibi ajcxy huıngapxp ma Dios, e yajcuejtıcyı Israel jäy huıdibi Dios patıp, nañ jadu'n nıpaady nej jıhuıy ymıgüety je' ajcxy je Melquisedec huın'ıt co Abraham ymıgüejtı. ¹⁰ Jadu'n nıpaady nej jıhuıy Abraham nıgıx'ajtyñı y'ap'ajtin yteedy'ajtin Levı etz jacjadyıı je huıdibi anajty ajcxy ca'ni ypi'c'atyñı yma'xung'atyñı co oy Melquisedec yjıjpcobadıyıı.

¹¹ Je Israel cajp yajcıdig'ıyı je' je Dios y'ane'mın ycötujcın je Levıta ajcxy huıdibi anajty huıngapxp je mayjäy ma Dios, je' je' anajty ajcxy Aaron y'ap y'oc. Chi jada' co jada ajcxy janch ca'ocyaj'ahuımbıjtıy tudägy pınjaty anajty je Dios ycötujcın payöyb, ca'p tim je' anajty ycopıcyıty co ycajacquęxıgy jadüg huıdibi codınähııp je mayjäy ma Dios, ca' y'ocje'jıñ

ma ymiñ Aarón y'ap y'oc. Je jadügpí huídibi codināhuamyb je mayjäy ma Dios, hue' copicy co tú'ciy naybadiiyb müd Melquisedec. ¹² Co ytigadzipy pinjaty huingapxp ma Dios, nañ jadu'n ytigadzip je tiy'ajt je cötujcin. ¹³ Ich ajt nHuindzin Jesucristo, je huídibi ñimiydacy ma Dios ñecy co huingapxa'ñ je mayjäy ma Dios, huingbi ap huingbi Teedy je' anajty, ca' y'ocLevíjin. E ni tüg yi' y'amigüg ca' yhuingapxy ma Dios. ¹⁴ Huädz yajnejhuüy co ich ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimiydacy pinjaty anajty huingapxp je mayjäy ma Dios ytijc.

¹⁵ Jacniguëxíc p jada ooy co jadüg ytigüiy huídibi tumb ma Dios, huídibi tú'ciy naybaatip müd Melquisedec. ¹⁶ Ca'p Jesucristo yajtungbijci co huingapxip je mayjäy ma Dios müd je cötujcin huídibi minaamb co yi' y'amigügtijc pátip yi' jadu'mbi tung, je huídibi ajcxy yjugy'ajtin cixip tigoyip. Hue' je Jesucristo chinaayin yjugy'ajtin ca' ycixipy ytigoyipy ni mina, paady ycixp Jesucristo yajtungbijci huingapxip je mayjäy ma Dios. ¹⁷ Com müd je' ycixpi jadu'n Dios tiy'ajt yejcy co jadu'n ymina'ñ:

Miich je' cham mhuingapxyp je mayjäy ma ich. Tüg nax miich mhuingapxin nej Melquisedec anajty yhuingapxy.

¹⁸ E jadu'n je oga'nbi je ane'min cötujcin huídibi Moisés yejc, ca' y'octuni cham, ca' jac ti mic'ajt müdity co jaydëbi yajtzögipy jäy ajcxy y'alma. ¹⁹ Je Dios ycötujcin huídibi Moisés jayhui'm jecy'ajty, ca'p je' ni ti yaj'oybidzimy yajhuätzpidzimy. Müd je huingapxpi ycixpi huídibi nmüd'ajtim cham jac'oy yi' huídibi njjp'ijxim ma Dios.

²⁰ Co Dios Jesucristo yajtungbijcy, chi nigapxpejty yci'm ayuc co yjanchity. ²¹ Jacjadyii ajcxy huídibi anajty tungixp ma Dios ytijc, hue' je' ajcxy tungmooyi, e ca' Dios nigapxpejty yi' ajcxy y'ayuc. Per co Jesucristo ytungbijcy, chi Dios nigapxpejty yci'm ayuc. Com jaybety jadu'n ma Dios ñecy ma jadu'n ymina'ñ:

Je Huindzin Dios ti nigapxpejty yci'm ayuc, e ni mina ycajotmetzcihuipy.

Jadu'n Dios nimay y'ung:

Miich mhuingapxamyb etz mgodināhuamyb je mayjäy ma ich huinixii huinitiempo. Jadu'n miich mdunipy nej Melquisedec ytuuñ.

²² Com Dios ñigapxpejty yci'm ayuc co yjanchity co Jesucristo ytungbijcy, paady yi' Jesús yi' je' majamoy mic'ajtmoy je jemybi ayuc huídibi yajhui'm müd jäy ajcxy ycixpi, je jac'oybi cötujcin. ²³ Jacjadyii huídibi anajty yhuingapxcixy ma Dios ytijc, nimay anajty ajcxy ooy. Com co tüg y'o'cy, chi huingbi ytigiy ma je' ytung.

²⁴ Jesús com ca' yi' yjugy'ajtin ycixipy ytigoyipy ni mina, paady ca' ytung ixmach, etz ca' yi'ytungmöy ni pin.

²⁵ Müd je' ycixpi Jesucristo mic'ajt müdity jaydëbi yajnüzooçipy jäy ajcxy y'alma huinixii huinitiempo, pinjaty mibijctzooyb Dios ma Jesucristo yxi. Jesucristo jëbi tunipy jadu'n, com yi' yjugy'ajtin ca' ycixipy ytigoyipy ni mina. E yi' Dios mibijctzodüib müd jäy ajcxy ycixpi jabom jabom huinixii huinitiempo.

²⁶ Je Jesús je' je' tügpajc je mijtungmüdpí ma Dios, huídibi ich ajt nyajmayajtim, je huídibi müd huädz yjot huädz yhuinma'ñ, e ca' je' müdity ni ti jibicpi ni ti pocy. Je' ca' tügnax y'ity müd pocytumbidijc. Nigi je' ymijity ycixity, ca'ydí jac ti huídibi yajpat tzajpjoty. ²⁷ Ca' Jesús yjadu'nity nej ajcxy jacjadyii huídibi tun ma Dios ytijc jecy'ajty, co yaj'öccixy iyujc, e je' ajcxy yejcpy huindzigi'ñ jabom jabom, midüg co je' ajcxy ñayyajpocyñihuächyii, e chí jada' müd jäy ajcxy ypocy ycixpi. Jesús

tügtecypajc je' yejc huindzigi'ñ mïid mayjäy ycixpi, co je' ci'm ñayyejci ma yi' o'cin jadu'n nej tüg huindzigi'ñ. ²⁸ Je Dios ycötujcin huïdibi Moisés yjayhui'm jecy'ajty, hue' y'ane'my co huen tungmöy jäy ajcxy huïdibi pocy mïid, co mïitungmoy ma Dios ytijc. Chi jac'axam Dios yajhui'my jemybi ayuc jemybi cötujcin, e nügapxpejty yci'm'ayuc co yjanchity. E mïid je jemybi ayuc Dios tungmoy yci'm'ung, huen yajnicxip je mïjpi tung ma yi' y'it, je Dios y'ung huïdibi ijtp huinixi ca' ti bocy mïidity.

8

Jesús yi' je' je mïjhuingapxpi ma yi' Dios y'ayuc jemybi

¹ Huïdibi ooy nügi ycopicyity, huïdibi yajnimiydaacp, co ñich ajt nmïid'ajtim pin xycodinaayim ma Dios, je' je' je Cristo, je huïdibi jiiy ijtp mïj'ane'mbi tzajpjoty, jadu'n nipaady nej jihuïy yi' y'ñäy a'oy'amy ma Dios ymïjc. ² Jiiy je' ytuñ ma je janchypi Dios y'it ylugar, je amaaybi, huïdibi oyhuindzigi'y ijtp. Je it huïdibi Dios yajcoj, e ca' nmïinaanim jäy ajcxy yajcoj. ³ Tüg'óciy pinjaty huingapxpi ma Dios, yajñibicy je' paady, e copicyity co cïyegipy ofrenda etz tijaty huindzigi'ñ ma Dios mïid jäy ajcxy ypocy ycixpi. Paady ooy ycopicyity nañ jadu'n co Jesucristo yegipy ofrenda etz huindzigi'ñ ma Dios mïid jäy ajcxy ypocy ycixpi. ⁴ Co Jesucristo ixypiy ya y'ocyaipaady naaxhuiñ, ni ycahuingapxy ixypiy mayjäy ma Dios. Com jiini ya yajpaady pin huingapxip ma Dios ytijc, pin yejcp ofrenda etz huindzigi'ñ jadu'n nej Moisés ycötujcin y'ane'my. ⁵ Jadayaabi huingapxpi ajcxy ytungixy ma Dios ytijc ya naaxhuiñ. Je' je' tüg ijxpejt nej Dios y'it jiiy tzajpjoty, jadu'n yi' nipaady nej tüg anepi huïdibi tzomyb jiiy tzajpjoty. Co Moisés jecy'ajty Dios ytijc je' coji mïid huit, chi Dios ñimaayi: "Cuenditun yajxon co anajty mgojy je tijc tügnax jadu'n nej je ijxpejt huïdibi nyaj'ijx jim copixy." ⁶ Per je mïitung huïdibi Jesús ytumyb ma Dios mïid jäy ajcxy ycixpi, jac'oydung yi' ca'ydi je tung huïdibi je jäy ajcxy ytumyb huïdibi mïitung mïid ma Dios ytijc ya naaxhuiñ. Com jemybi etz jac'oy etz jacmic'ajt mïid je cötujcin huïdibi Dios ymoy Jesús, ca'ydi je cötujcin huïdibi Dios ymoy Moisés jecy'ajt. Com hue' je' jac'oy alma nidzoocin Dios yaj'ahuanïy jäy ajcxy ma je jemybi cötujcin.

⁷ Co je jayjip'atypi cötujcin huïdibi Moisés ymooyi cayaj'oyiydaayi jäy ajcxy ypocy mïid Dios, ca' yi' ixypiy ycopicyity je mïmetzpi cötujcin huïdibi Dios ymoy jäy huinjemy. ⁸ Per Dios y'ijx co je jäy ajcxy ca' yajxon cuydungixy je cötujcin huïdibi Moisés ymoy, jadu'n nej ymïna'ñ ma yjaybetyity ma Dios ñecy mïid je' ajcxy ycixpi, ma jadu'n ymïna'ñ:

Jadu'n je Huindzin Dios ymïna'ñ: "Mïmb xii tiempo ma huingbi cötujcin nmöhuibich yi' Israel jäy etz Judá jäy ajcxy.

⁹ Ca' y'ocjadu'niñ nej ñich ngötujcin huïdibi nmooyich je' ajcxy y'ap yteedy jecy'ajty, je huin'it tiempo taabi nyajtzoönich ajcxy jim Egipto naaxjot. Ca'p je' ajcxy cuyduñ je cötujcin huïdibi ajcxy nmooyich, e paady ca' nduunich cuendi yi' ajcxy." Jadu'n ymïna'ñ je Huindzin Dios.

¹⁰ Jadu'n je Huindzin Dios ymïna'ñ:

Je cötujcin huïdibi nyegaamybich ma Israel jäy ajcxy co anajty yijadu'mbi xii tiempo ti ñaxy, jadu'n je'. Nbidägibich ngötujcin ma yi' ajcxy yhuinma'ñ, e jadu'n nipaady nej jihuïy ti njayich n'ayuc ma ajcxy y'ay yjot. E ñich yi' ajcxy xyDios'adiib, e yi' ajcxy njäy'adiybich.

- 11 Tüg'óciy ajcxy nejhuñhuipy pín ñch. Ni pín ji cayaj'ixpigipy pín je' je Huindzin Dios, ni pín, ni ymígüg, ni ymijñ ymádjic, ni pi'ctijc ni mij'anáctijc. Com nidüg'óciy ajcxy nejhuñhuipy pín ñch; ypi'city ymutzity, ymijjáyity, etz ymij'anácity.
- 12 E ñch yí' ajcxy nmeecxip yjibicjáy'ajtin, ni camina ngajac'ajihuñhuíybich ajcxy ypocy. Jadu'n Dios ymína'ñ.
- 13 Co Dios je' ycötujcín jemybi nimiydágy, je' je' co yaj'amijñyñi je jayijp'atpyi cötujcín. Je huidibi amijñyñip ca' je' y'octuunip, tzojc yí' yaj'ijxtigoyaani.

9

Je Dios ytijc huidi ya naaxhuiñ etz Dios y'it huidi tzajpjoty

¹ Je Dios ycötujcín jayijp'atpyi ymáid je' anajty ñidiy'ajt nej huaad ytuñ ma Dios ytijc ya naaxhuiñ, ma jāy ajcxy huindzigíhuipy Dios. ² Je Dios ytijc jadu'n je' ycojity. Je jayijpi cuarto hue' anajty xiijity Lugar Santo, jilby anajty y'ity je candelero etz je mesa ma tzaecaagy y'ity ma Dios yhuinduu. ³ Jixci'py'amy ma je mímetzpi huit y'agiyducyity jilby jadüg'it huidibi xiijip Lugar Santísimo (ma Dios ni'ixcidágy je jāy). ⁴ Jilby anajty tüg mij mesa ac tím ori je' anajty ma ajcxy ypoomjojccixy, e ma je' jim anajty y'ity tüg cajoon ac ori je' anajty yñinícx huidityi. Jilby cajoonjoty anajty y'ity tüg tu'tz ac ori huidibi anajty máid je jicxy ijxpejt huidibi Dios Israel jāy ajcxy ymooy jecy'ajty. Etz jilby anajty Aarón ytajc huidibi huip huam. Etz jilby anajty je tzaa y'ity ma je' anajty ycixjayity Dios y'ane'mín. ⁵ Ma je cajoonnícx jim anajty je querubines ñgojtúdyity huidibi Dios y'oy'ajtin máid. Je querubines anajty codinaayb Dios, e je' anajty ajcxy yajnídigooyb máid yqueec je cajonnícx ma ajcxy je huindzigí'ñ ñi'py ypidacy máid jāy ajcxy ypocy ycixpi. Ca' huaad yjacyajnimiydacy mijcajee jadachambi tijaty huidibi anajty yajpatp jilby ma Dios ytijc.

⁶ Jabom jabom co anajty jadu'n y'ijttāy ni'ixi', chi je huingapxi ytiñyigixy ma Dios ytijc ma je jayijpi cuarto, je Lugar Santo, tuñ ajcxy huindzigí'ñ etz cuydungixy yí' ajcxy ytiy'ajt máid Dios ycixpi. ⁷ Jimijt jimijt ma je mímetzpi cuarto huidibi je huit adiydujcp, jilby ytiñy tūgtecypajc je huingapxi huیدی jacmijtungmáid ma Dios ytijc. E co jilby ytiñy, chi midigiy huaj ñi'py, huیدی máid huindzigíy Dios máid yci'mbocy ycixpi etz máid tūg'óciy jāy ajcxy ypocy ycixpi etz máid ajcxy ypocy ycixpi co ca' nejhuñyigixy co ytundigooygixy. ⁸ Máid jada ycixpi je Espiritu Santo xyajnejhuñyim co je tungmáidpi huیدی huingapxi je mayjāy ma Dios, ma ajcxy jacyajtungixy anajty je jayijp cuarto ma Dios ytijc, chi ca'ni je' anajty y'ahuächñi nej jēbi pinjaty ytiñy ma je it lugar Santísimo ma Dios yhuinduu. ⁹ Je Dios ytijc huیدی ijtp anajty ya naaxhuiñ ca' je' yjējity je janchypí. Hue' je' anajty ijxpejt'ajtp huیدی Dios y'it'ajtpy tzajpjoty. Jilby je tungmáidpi huindzigíy Dios máid ofrendas etz máid huindzigí'ñ. Per jada huindzigí'ñ ca' yajtigoy je pocytuní ma je jāy ajcxy yjot yhuinma'ñ. ¹⁰ Je judío jāy ytiy'ajt huیدی tuun ma Dios ytijc jecy'ajty, hue' je' ñigapxy caayin uucín, etz jadu'n nej ajcxy ñayajpocyñíhuáatzigixy máid ní etz canaag costumbre huیدی ajcxy cuydumyb. Jadu'n ajcxy ytuñ ixti cooni Dios yajtigajztay tūg'óciy yí' ycötujcín.

¹¹ Per ti y'oy ya naaxhuiñ je Cristo, e yí' je' cham ijtp jacmijtungmáidpi ma Dios, yí' ti mimiñ jemybi cötujcín jac'oybi. E yí' je' codinaayb je mayjāy

ma Dios y'it tzajpjoty, je it jac'oybi jacmijpi, jacca'pxypi, ca' nmīnaanim jāy ti cojy, e ca' yaajity naaxhuiñ. ¹² Cristo ti ytigīy ma je Dios y'it, je lugar Santísimo. Ca' ti ytigīy mīd co jīby yajquēxiga'ñ pi'cchivo ñi'py o toro ñi'py, hue' yci'mni'py jīby yejcpy ma Dios. Jadu'n ti ytigīy tūgtecy tigīy huinixi huiniempo, etz xyajnidzoocim ajt n'alma huinixi. ¹³ Ooy yjanchity co yi toro ñi'py etz je chivo ñi'py etz yi cuyjam co ajcxy nōccixy huaj ñix ma je Dios ojadajttac, co ajcxy je pocyjāy yajnihuāxcixy je ni'py etz yajnixidujtcixy je cuyjam ymīd mic'ajt co yajpocyhuātzigixy ñinīcx, per jotjoty ca' yajhuāch. ¹⁴ (Je huingapxpi huidibi tumb ma Dios ytiyc ya naaxhuiñ ca' ymadāgy co jāy yajpocyhuādzipy mīd toro ñi'py), Jesucristo nīgi ti ymadāgy yajpocyhuāch jāy ajcxy mīd yci'mni'py. Com Jesucristo ymīd je Dios yjihui'ñ ymic'ajt huidibi ca' ycixipy ytigoyipy ni mīna, chi ñaygīyejci ci'm ma Dios mīd Dios yjihui'ñ ymic'ajt, jadu'n nej tūg huindzigi'ñ huātzpi, com ca' ni ma ni ti tundigoy. E mīd yci'mni'py Jesucristo xyajhuaatzim je jibicpi ma ajt njot nhuinma'ñ, ca'ydi ndunim huidibi Dios ca' jāygidāgy, e jadu'n ajt huaad ndunim ma je Dios juugypy ytung.

¹⁵ Paady yi Jesucristo yi' je' huingapx'ajtp ma Dios mīd iich ajt ycixpi mīd je jemybi ycōtujcin huidibi Dios yajhui'm. Yi Jesucristo co y'o'cy, yi' ajt je' nbocy xymeeccim tiibi ndundigooyim ma je jayjip'atyp cōtujcin huidibi Moisés jayhui'm. E jigix pinjaty Dios ti yhuin'ixyii, jēbi ajcxy ycidigīyii je tzinaydac ma jēbi n'ijtm huinixi. Je tzinaydac huidibi Dios ti xy'ahuanīyim. ¹⁶ Co tūg jāy jījp'ixy y'o'cin, e yajcojy tūg testamento, ooy ycopicyity co yajnejhuīhuīpy pen janch je' ti y'ōgy je pin yajcoj je tiy'ajt jigix je' ytigīhuīpy tumbi je tiy'ajt. ¹⁷ Co tūg jāy jījp'ixy y'o'cin e yajcojy tūg testamento, ca' je' ti mic'ajt mīdity je testamento pen jugy'ajtni pin je' anajty ti yajcojy. Huin'itni janchity co anajty ti y'ōgy, huin'it je testamento mic'ajt mīdity. Je jemybi tiy'ajt huidibi Dios xyajhui'my jadu'n yi' nipaady nej jāy testamento yajcojy co anajty jījp'ixy je y'o'cin, e co Jesús y'o'cy, huin'it mic'ajt moy je Dios ytiy'ajt je jemybi. ¹⁸ Paady ycixpi jecy'ajty co Dios Moisés moy cōtujcin, yajtzoobaat je' mīd iyujc ñi'py. ¹⁹ Moisés je' capxhuācx je Dios ytiy'ajt ma tūg'ōciy mayjāy. Chi jada' huijtzīgy tūg lana tzaptzpi mīd tūg quipy aacx huidibi ooy oy yxuugy. Je' yajxooc ma huaj mang ñi'py etz chivo ñi'py teemhuidity mīd nī, chi Moisés yajnihui'ch je libro mīd je ni'py, je libro huidibi anajty ti capxy etz nañ jadu'n jāy ajcxy yajnihui'ch je ni'py. ²⁰ Co Moisés jadu'n ytuuñ, chi ymīnañ: "Jada je' je ni'py huidibi yajtzoobatp je ane'min je tiy'ajt huidibi Dios ti yecy ma miich ajcxy." ²¹ Moisés nañ jadu'n ñi'pyñihui'ch je cochac tiyc ma anajty yDios ojadajtcixy, e tūg'ōciy tumbejt huidijaty jīby tumb. ²² Dios ycōtujcin, je jecyip, ymīna'ñ co tūg'ōciy huidijaty yajtungixyp co Dios ojadajtcixy, copicy yajhuādzipy mīd ni'py. E pen ca' ajcxy teemy yocy ni'py, Dios ca' huinmecxa'ñ yi' ajcxy ypocy.

Co Cristo y'o'cy mīd ajt nbocy ycixpi, yi' yajnicxy ajt nbocy

²³ Ooy jada anajty ycopicyity iyujc ñi'py huindzigi'ñ, jigix yhuādzip huidijaty tumb ma Dios ytiyc ya naaxhuiñ, je huidibi iixpejt'ajtp anajty nej Dios y'it jīby tzajpjoty. Per je Dios y'it huidibi jīby tzajpjoty chojcpy jac'oybi huindzigi'ñ ca'ydi huidi ya naaxhuiñ. ²⁴ Com Cristo ca' je' ytigīy ma Dios ytiyc huidibi jāy ajcxy ti cojy. Je tiyc huidibi jāy ajcxy ti cojy, je' je' ñigojtuutin je it lugar janch janchypi huidi jīby tzajpjoty. Cristo

tigüy ma je Dios y'it ylugar jiiyby tzajpjoty, ma je' cham xycodinaayim ma Dios yhuinduu. ²⁵ Je judío mįjtungmįdđpi huıdibi huıngapxp ma Dios ytıjc, huınjımiđtity ytıgıy ma je Dios ytıc co yecy ni'py huıdibi ca' ci'mni'py'adyii. Cristo ca' yi' ñay'ahuaniyii y'ögıpy canaag'oc, jeyi tügtecypajc ytıgıy ma Dios y'it müđ yci'mni'py. ²⁶ Co ıxyıpy ca' yjadu'nıty, canaag'oc Cristo ıxyıpy patni chaachy'öcin maabi naaxhuiñybi chondagy. Per jadachambi ma xii tiempo ycıxaani ytıgoyaani, Cristo tügtecypajc ñayguëxici ya naaxhuiñ, jigix codınahuıpy tüg'öciy jäy ma Dios müđ ajcxy ypocy ycıxpi. Jadu'n Cristo tuuñ jigix yajtıgoyıpy pocytunıi. ²⁷ Dios ane'mın pidac ya naaxhuiñ co nidüg nidüg jäy paadıp yi o'cin tügtecypajc. E Dios ti pidägy je xii je tiempo mına tiyduna'ñ nidüg nidüg jäy müđ ypocy ycıxpi. ²⁸ Je Cristo jotcuyc tügtecypajc nayyejci ma je o'cin co yajpocyñıhuaatztäy je mayjäy. Chi jada' ñayguëxıga'ñyii je mımejtz'ocpi ya naaxhuiñ, e ca' nmınaanim co yajpocyñıhuaatzaanıp jadüg'oc je mayjäy, hue' je' nihua'namyb ycohua'namyb tüg'öciy pınjaty jıjp'ıjxıp cıxyjot huınjıjot co je' miına'ñ müđ yi' ajcxy ycıxpi.

10

¹ Je Dios ycötujcin huıdibi Moısés jayhui'my jecy'ajty, hue' je' anajty ñıdıy'ajt je oybi huıdibi miınamb. Ca'p je' anajty yjējıty je oybi. Paady je cötujcin huıdibi Moısés yjayhui'm ca' je' jėbi huädz yaj'ahuımbity pınjaty pocy ytumb, pınjaty mįjhuäcp anajty ma Dios müđ je ıyujc huıdibi ajcxy Dios yajhuındzigıyıyb, huıdibi ytun'ahuımbıjtıcxyp jımiđt jımiđt. ² Co ıxyıpy je cötujcin y'ocmadägy huıdibi Moısés yjayhui'm yaj'ahuımbity ıxyıpy huädz ajcxy je pocy ytumbı, ca' ıxyıpy je jadu'mbi huındzigı'ñ y'ocyajtuunı jımiđt jımiđt. Com pın je jadu'mbi huındzigı'ñ yejcp, co ıxyıpy je' ypocy yajnicxtäy, ca'p je' ma ñayjihuihuıyib ti bocy müđity jadüg'oc. ³ Co jadu'n yaj'öccıxy je ıyujc müđ ypocy ycıxpi, je' je' je' tiy'ajt co ajıhuiygóotıgıxy ypocy jımiđt jımiđt. ⁴ Com yi' huaj mang ñı'py etz yi' chıvo ñı'py ca' mic'ajt müđity co pocyajnicxtähuıpy nimına.

⁵ Paady co Cristo ymiıñ ya naaxhuiñ, chi nimay je Dios:

Ca' müich ni ti huındzigı'ñ mdzojcnı ma ymiıñ ıyujc'ögy, ti müich xyñı'ıxııyich tüg ninıcx.

⁶ Ca' m'ocjäygıdaacni huındzigı'ñ ıyujc huıdibi yajno'cp. Ca' müich m'ocjäygıdaacni co jäy xyajhuındzigıy ıyujc müđ ypocy ycıxpi.

⁷ Chi nmına'ñıch: “Dios, cha nmiıñıch jigix müich mdzojcnı yajcuydunıpy, jadu'n nej yjaybetyıty ma müich mnecy müđ ıch ycıxpi.”

⁸ Tım jayıjpp, Cristo ymına'ñ co Dios ca' octzojcnı, ni cajäygıdägy je ıyujc ögy huıdibi yajhuındzigıyıyıp, ni je huıdibi yajno'cp, jigix je pocyñıcxthııpy, oy yi' yajējıty huıdibi ñıgapxy yajtunıpy ma je Dios ycötujcin huıdibi Moısés yjayhui'm. ⁹ Chi jada' jadüg'ıt yjaybetyıty co Cristo jadu'n ymına'ñ: “Cha ıch nmiıñ, jigix müich mdzojcnı yajcuydunıpy, müich huıdibi Dios'ajtp.” Hue' mınaanim, yajtıgoy je cötujcin huıdidi ane'mb co jäy ajcxy huındzigıy ıyujc müđ ypocy ycıxpi, etz mic'ajt mo' je jemybi cötujcin huıdibi Jesucristo xymooyım. ¹⁰ Dios jadu'n ti xyajhuaatzım ajt nbocy, com Jesucristo ti tuunı Dios chojcin co ci'm ñınicx tügtecypajc yejcy ma yi o'cin müđ tüg'öciy jäy ypocy ycıxpi.

¹¹ Tüg'öciy judıo sacerdotı huıdibi tungmüđ ma Dios ytıjc jabom jabom jadu'n tun'ahuımbıjtıcxıy tügpi huındzigı'ñ, huıdibi ni camına yajnicxtaayı jäy ajcxy ypocy. ¹² Yi' Jesucristo tügtecypajc yi' yejcy ñınicx ma

yi o'cin huinixi huinítiempo, chi jada' y'ixtacy a'oy'amy ma Dios ymiç ma ane'mdäy tüg'óciy. ¹³ Jiiby tzajpjoty Jesucristo cham y'ahuixy, ixti cooni Dios yi' ymidzip mímadaactaayip, e jadu'n ajcxy nipaadiipy nej jihuüy Jesucristo yteycopcxpejt. ¹⁴ Míid tügpajc je huindzigi'ñ huidibi Jesucristo yejc, tudägy yaj'ahuimbijttäy huinixi huinítiempo pinjaty ti ypocyhuäch. ¹⁵ Yi Espiritu Santo nidiy'ajtp ma ich ajt jadu'n nej Cristo ti tuñ. Com jaybety miñ ma Dios ñecy ma Dios jadu'n ymína'ñ:

¹⁶ Je huin'it xi je huin'it tiempo nyajmihui'maamybich je Israel jäy jemybi ayuc jemybi tiy'ajt. Nbidägibich ngötujcin ma ajcxy yjot, e njayamybich ngötujcin ma ajcxy yhuinma'ñ.

¹⁷ Chi jac'axam Dios ymína'ñ:

Ni camina njäy medzaanich ajcxy ypocy, etz jadu'n nej ajcxy ytundigooy.

¹⁸ Co je pocy ti yajhuinmecxtäy, ca'p ycopicyity yjacyajtunipy tijaty huindzigi'ñ míid pocyhuinmeecxin ycixpi.

Chojcpy nmihuingoonim yi Dios

¹⁹ Paady miich ajcxy migügtijc, jëbi ich ajt ndigiiyim agujc jotcujc ma Dios yajpaady míid co Jesucristo ti temy ti yocy ñi'py míid ich ajt nbocy ycixpi. ²⁰ Cristo ti yaj'ahuäch je nií'aa je tü'aa míid ich ajt ycixpi míid yci'm ninicx, je nií'aa tü'aa jemybi oyi'bi huidibi tigiiyb ma Dios y'it. E je' yñinicx jadu'n nipaady nej je huit huidibi anajty adujcp je Lugar Santísimo ma Dios ytijc ya naaxhuiñ, je huit huidibi cüchhuäch co Cristo y'o'cy. ²¹ Jesucristo yi' je' je' je' migtungmíidpi huidibi xycodinaayim ma Dios ytijc jiiby tzajpjoty. ²² Paady ycixpi jëbi nmihuingoonim Dios míid oyjot oyhuinma'ñ, etz míid je mibijcin janchypi. Cristo ajt ti xyajhuaatzim njot nhuinma'ñ co ñi'py temy yojcy míid ajt nbocy ycixpi jigix ca'ydi nayjihuiyim pocymíid, jadu'n nej jihuiy ti ndziihuim míid huädz nií. ²³ Tzoc tudägy n'ijtim ma nmibijcin, ca' nyajtigajtzim nmibijcin, com Dios cuydunipy yi' tiibi xyaj'ahuaniiyim. ²⁴ Tzoc nhuinma'ñypidaacim co njot'amijmooyim ajt nmigügtijc, jaydëbi naychojcim nayjihuiyim miñ xyipy, e nduunim oyjä'ajtin. ²⁵ Ca' n'ixmajtzim je nayyöymugii, jadu'n nej ajcxy nijëjity costumbre mädity co ca' ajcxy yöy ma naymujctac. Niçi tzoc nayjot'amijmooyim, e jadu'n nej cham yaj'ixni co yhuingooni ma je Huindzin Jesucristo ymiinaani jadüg'oc ya naaxhuiñ, chona'ñ tzajpjoty.

²⁶ Pen ich ajt jacpocytunim tzojcingixy ma anajty ti nejhuuiyim Dios ytiy'ajt, ca'p ji huingbi huindzigi'ñ huidibi xyajpocyhuaatzim. ²⁷ Je' janchtiy njacijp'ixim míid tzigi'ñ jihui'ñ je tzaachypi co anajty Dios xytiydunim, e xypidaacim mijjinjoty huidibi yajhuindigoydähuamb Dios ymidzip. ²⁸ Co pin cacuyduun Dios ycotujcin huidibi Moisés yjayhui'm, e jim metz o tugüg testigo co yjadu'nity, yajmoy je' y'o'cin ca' míid'ajty ti pa'ayoohuin. ²⁹ ¿Nej miich ajcxy míinaangixy? ¿Nej cay jac'öctiy je tzaachypi mihuaad'ajtcixy? Je pinjaty ca' ixa'ñ Dios y'ung etz nixiici yajxiici Cristo ñi'py huidibi yajpocyñhuaatzp, jadu'n nej je jemybi ayuc ymína'ñ huidibi Dios yajhui'm. Etz nañ jadu'n ajcxy ni'ojiiygixy Dios yEspiritu huidibi may'ajt oy'ajt tumb míid je' ajcxy. ³⁰ Nejhuuiyim co je Huindzin Dios ymína'ñ: "Ich xypatp ndzaachytunipyich jäy ajcxy míid ypocy ycixpi. Ich yi' nyajcomidohuiipy ajcxy ypocy." Etz nañ jadu'n yjaybetyity ma Dios ñecy: "Yi Huindzin Dios yi' yjäy tiydunipy." ³¹ ¡Ooy chach mij y'ayo'nity pen je Dios juugypi xychaachytunim míid ajt nbocy ycixpi!

³² Per ajihuiyigixy miich ajcxy je xii je tiempo tiibi ñaxy, je taabi miich anajty ajcxy ti xycidigiiygixy je tiy'ajt janchypi, ñipaty je' anajty nej tüg tiicxin jain ajcxy müdity. Ti ooy mhuindinaaygixy mjiptinaaygixy tzaachypi ayo'n müd yi mmibijcin ycixpi. ³³ Nijëjity miich ajcxy ti myajhuingapxnajxcixy, e ti myaj'ojcixy mayäyduum. Nañ jadu'n jacjadyii ti abaaticxy tzaachypi jadu'n nej je tiibi ajcxy ooy yajtzaachtungixy. ³⁴ Ti miich ajcxy myajtungixy pa'ayo'n ma pinjaty anajty pujxtigotyip, e janch agujc jotcujc ajcxy ti myajtungixy mecxtujcin co ajcxy xypijci tijaty anajty ajcxy müd. Nejhuuyim co jiiby tzajpjoty miich ajcxy müdity ti jaty jac'oybi huidibi huinixii huini'tiempo ijtp. ³⁵ Jacmijpidaaccixy Dios, ca' mjetmetzciiygixy. Co mmijpidáaccixipy Dios, huin'it ajcxy mbaadipy oybi may'amy ma Dios. ³⁶ Chojcxy co miich ajcxy myajtungixipy mecxtujcin co mguydunaangixy nej Dios tzocy, e Dios xyajcidigiiygixip huidibi yi' ti ahuanÿ. ³⁷ Jaybety jadu'n ma Dios ñecy ma jadu'n yminañ: Tzojc, janch tzojc ymiina'ñ je huidibi tzonamb tzajpjoty, e ca'p je' jecyñty. ³⁸ Jadu'n Dios ymina'ñ:

Pinjaty iich ti ngöbicy co ytudägyäyity, tzinähuip je' müd ymibijcin. E pen ixtigihua'cp ma ymibijcin, ca' jadu'n njotcujc'adipyich müd je'.

³⁹ Ca'p iich ajt njëjity huidibi ixtigihua'cp ma nmibijcin, e ytigoy y'alma, je' iich ajt pin mibijcp, e jadu'n n'alma paadipy nãzoozin.

11

Yi mibijcin

¹ Jotcujc nayjihuiyim jadu'n co huidibi nmibijcin janch yi', oy co ca' n'ijxim. Je huidibi nmibijcin je' xymooyim jotcujc'ajtin müd huidibi njijp'ijxim ma Dios. Je huidibi nmibijcin nejhuuyim co janch janch jadu'n, oy ca' n'ijxim. ² Com müd co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyäy.

³ Müd ajt nmibijcin ycixpi nejhuuyim co Dios oyduñ tüg'ócicy huidibi jii'ajtp müd y'ayucti'ajty, jigix huidibi cham n'ijxim je' yi' yaj'oyiy huidibi ca' yaj'ixy.

⁴ Müd co Abel mibijcy Dios, paady Abel ymoy Dios huindzigi'ñ jac'oybi ca'ydi Caín, e Dios cöbijci Abel yhuindzigi'ñ, e müd je' ycixpi Abel ooy ycömaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuiy yjacmiydägyñi chambaad. Com müd je mibijcin huidibi anajty ymüd yejc ijxpejt ma iich ajt.

⁵ Müd co Enoc mibijcy Dios paady yajnicxi jadügpit ztinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n ymina'ñ ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinaayin." ⁶ Pen ca' nmüd'ajtim mibijcin ni jadu'ñyi, ca' Dios jäygidägy ajt ndzinaayin. Com co nmihuingonaanim Dios, hue' tzocy co nmibijcin co Dios yjiijity, e co yaj'ahuimbidity oybi müd pin mibijcip.

⁷ Müd co Noé mibijcy Dios, paady Dios ñimaayi jayijp co ytuna'ñyii yjada'ñyii mijnigom huidibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg ñigomdzögipy. Müd co anajty Noé müdity mibijcin, paady yajpocycäy je naaxhuiñyjäy ajcxy ca'pi ymibicy. Chi Dios cöbijcy Noé jadu'n nej tudägyäy müd co mibijci Dios y'ayuc.

8 Míid co Abraham anajty Dios mibicy, paady Dios yhuin'ijxi e ycapxymidouhui. Chi je' chooñ ma ñaax ycajpin ñicxy ma je it lugar huidibi Dios anajty möhuaanip co je'adñiyb. Choñ, ni ca' anajty nejhuüy ma ñicxy. 9 Míid co Abraham mibijcy Dios, paady chinaydacpijcy nej tüg huingjäy ma je naax huidibi Dios yaj'ahuanñiyi, huidibi ca' yjējity. Chinay ma huittijc, nañ jadu'n ajcxy y'idñich Isaac etz Jacob huidibi ajcxy nañ jadu'n Dios yaj'ahuanñiyi je naax. 10 Abraham je' anajty y'ahuijxyp mina jēbi chinaydacpijcy ma Dios y'it ylugar huidibi jadu'n nipatp nej tüg cajp huidibi míid y'ijx ta'tzpijcy y'oyduñity, je huidibi Dios ñihuinmayñy, je huidibi Dios yajcojy yaj'oyñiyb.

11 Sara hue' anajty pumäy, ti anajty ymijäyñiyi, ti ñajxni tiempo mina jēbi y'ung'ixy. Per míid co mibijcy Dios y'ayuc huidibi ti ñimaayi co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tiibi ahuanñiy. 12 Míid tūgpj jäy, je Abraham, ti choondacy tūgpjcy y'amigūgtijc huidibi oy ti ymayñiy. Abraham, oy anajty je' ti yjahuingoni mina y'ōgaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

13 Tūg'ōciy je jäy ajcxy huidibi ya yajnimaydacp, öctay ajcxy ni ycaçidigñiyi je tzinaydac huidibi anajty Dios ti yaj'ahuanñiyi. Míid co ajcxy mibijcy Dios, paady nejhuüy ajcxy co jacjiini Dios ymöhunñiyb je huidibi ti yaj'ahuanñiyi. Com ymibijc ajcxy Dios, paady jotcuje ñayjihunñiyi co Dios möhua'ñiyi jacjiini huidibi ti yaj'ahuanñiyi. Yminañ ajcxy co anajty y'adzinaaygixy ya naaxhuiñ. 14 Pinjaty jadu'n minamb co adzinaaybi ajcxy yajpaady, hue' yajhuimbizimy co chinaydac yjugy'ajttac ajcxy y'ixtaayb. 15 Co ixypiy ajcxy jäymejtz'ōcigixy je naax ma anajty ti choongixy, janch ycahuimbijty ajcxy jim jadüg'oc. 16 Per je' ajcxy ñigi anajty nijot'ajtcixy it lugar jac'oybi, je' je' je' tzejpjtoty. Míid jada ycixpi Dios ca' yi' cho'yduñ co ñaydijyii Dios ma je' ajcxy. Com ti ni'ixñiyi ajcxy chinaydac jiiy tzejpjtoty.

17 Abraham mibijcy Dios, e co Dios Abraham y'ijxmajtzj, chi yajmiiñ Isaac co anajty yajhuindzigiñhua'ñ Dios. E janch cixyot je y'ung tūgpajc anajty yecy, je y'ung huidibi Dios ti yaj'ahuanñiyi anajty. 18 Dios ñimay Abraham co míid Isaac míid'ada'ñ may y'ap y'oc. 19 Abraham yhuinmaayb anajty ooy co Dios tūgpajc cōtujcmñidip yajjugypigipy öcpiy. Paady jēbi ñich ajt nmīnaanīm co Abraham yçidigñiyi jadüg'oc y'ung co anajty ti yjugypicy co anajty ti y'ōgy.

20 Isaac mibijcy Dios, paady Isaac Dios mibijctzoy míid Jacob etz Esau ycixpi co huen ajcxy oybi paadip ma je tiempo huidibi mim cidacni. 21 Jacob ymibijcy anajty Dios, paady co anajty y'ōgaani, chi ahuanñiy conuucxin ma nidüg nidüg José y'ung y'anäg. E jadu'n Dios ooy huindzigiñy ojadajty yam ñaygodajc'adyii míid ytajc co anajty ooy ti ymijäyñiyi. 22 José co anajty Dios mibicy ma anajty y'ōgaani, yminañ co Israel jäy ajcxy anajty ypidzimaangixy comjegy jim Egipto, chi yajhu'i'my tiy'ajt nej ypac ytunñiyb co anajty choñ ajcxy jim Egipto.

23 Míid co anajty ajcxy mibicy Dios, paady co Moisés yma'xung'ajty, chi ytaj yteedy yützi tugñg po'. Com co ajcxy ijxy co anajty ooy y'oyity je ma'xung, ca' ajcxy anajty tzigñy je rey y'ane'min co anajty yaj'ōctāhua'ñ tūg'ōciy ungma'xung yēydijcpi. 24 Míid co Moisés mibijcy Dios, paady co

oy ymij'anäccojni, ca' tzojcy co ñaydijiiyb co rey ñiix y'ung'adiib. ²⁵ Hue' janchtiy Moisés ñigi nijot'ajty co ayo'n tzaachypi minaxipy yajnaxipy quipxy müd Dios yjây, ca'ydi co nixondägipy je jugy'ajtin ma je rey ytiyc huidibi Dios ca' jäygidägy. ²⁶ Moisés ñigi ñayjihuiiyi jotcuyc co tzaachypi ayo'n anajty minaxy yajnaxy müd Cristo yciixpi, ca'ydi co müd'ajttähuiipy jugy'ajt comeñ'ajt jim Egipto. Com Moisés ti anajty yhuinma ñypidägy co Dios yega'ñ je oybi. ²⁷ Müd co Moisés mibicy anajty Dios paady choñ jim Egipto, ni catzigiy co anajty rey yjotmädy, jadu'n y'ijty tudägy nej jihuüy ixy je Dios ca'pi yaj'ixy.

²⁸ Müd co mibicy Dios paady Moisés tuuñ je pascuaxii, chi ni'ane'mdiiy co huen tijc'aguu tüg tüg yajni'pyiy, jigix co je ángel huidibi yaj'öcp, ca'p je' je israelitajây y'ungoob yaj'o'cipy. ²⁹ Müd co ajcxy mibicy Dios paady je israelitas ajcxy yajnaxxy je tzaptz mejy jadu'n nej jihuiy ñajxcixy huindítzuuy, e co ajcxy je Egipto jäy nañ jadu'n yjanaxañ, cijx ajcxy ñi'o'ctäy.

³⁰ Müd co ajcxy mibicy Dios, paady ycidäday je poch ma je Jericógajp, taab anajty je israelitas ajcxy ti juhuidijtcixy huixtuc xi. ³¹ Müd co Rahab, je töxyjäy jibic tzinaaybi, mibicy Dios, paady ca' y'o'cy quipxyi müd je huidibi anajty ca' capxymidoogixy Dios. Com co je' yajjättacy ma ytiycin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajciyögyixy yajtecyögyixy Canaán naaxjot.

³² ¿Ti njacmiydägbich? Nyajtigoy'idaamybich tiempo co nimiydägbich Gedeón, Barac, Sansón, Jefé, David, Samuel, e jacjadyii Dios y'ayucnajtzcaxiiybi. ³³⁻³⁴ Müd co ajcxy mibicy Dios, paady ymimadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuaniiygixy. Yaj'adujc ajcxy caa y'ahuac, yajxeem ajcxy jin huidi anajty ooy ymijity, tzooc ajcxy co anajty yaj'ögaangixy müd espada. Pinjaty anajty pumäyip ypaat je' ajcxy ymic'ajt ymijaa, mij je' ajcxy ooy y'ijtcixni ma chiptungixy, e ymimadactay ajcxy maymidzip. ³⁵ Jim anajty töxyjäy yjätigixy huidibi ajcxy cidigiiyi y'ung juugy huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nidzoocin. Jadu'n ajcxy paty o'cin, jaydëbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcaxiiybi ooy ñixiici yajxiici, yajci'ajty, etz tzumy mach ypujxtijc'iñäy. ³⁷ Jadyii Dios y'ayucnajtzcaxiiybi y'o'cy ajcxy tzaagögäch, jadyii yaj'ajidiy ajcxy janch tim cup y'ijxmajtzi ajcxy, jadyii yaj'o'ci müd espada. Ymiñ xyijpy xi yaa yhuuidijtcixy ymüd ajcxy ñinicx yüch müd cöbixy'ac etz müd chivo'ac, ayoob jäy ajcxy, jotmay müd, yajtzaachtungixy yajca'oydungixy. ³⁸ Yi jadu'mbi Dios y'ayucnajtzcaxiiybi ajcxy ni je naaxhuiñyjäy anajty camihuaadity. Müd ymidzip pahuidijtcixy, paady yhuuidijtcixy anajty titznaaxtuum etz yuugjoty, chinaagyixy naaxpa'tci'py etz majaty ang. ³⁹ Nidüg'ócay je' ajcxy oy cömay ajcxy yjanaxxy müd co mibicy ajcxy Dios, ca' ajcxy paty tiibi anajty Dios y'ahuaniy. ⁴⁰ Com Dios jac'oybi je' anajty yegamyb müd iich ajt, paady ca' ajcxy paty je oybi tiibi Dios y'ahuaniy. Ti anajty Dios nihuinmayiy co yajca'pxaani yi' ajcxy ytudägy'ajtin quipxyi müd iich ajt co Cristo y'o'cy müd iich ajt nbocy yciixpi.

Tzoc ñch ajt nhuinma'ñybidaacim ma Jesús

¹ Com nmïid'ajtm canaag iixpejt nej jây jecy'ajty mibijcy Dios, paady ñch ajt jadu'n nipaady nej jihuïy huinduy jajñxcipy nmïid'ajtm jây huidibi ti yajniguëxigÿ ymibijcin. Paady ycixp tzoc ahuing pidaacim je huidijaty xy'adzijpm ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñydiigooyim, e tzoc naymic'ixim cuydunim yi tiy'ajt mïid mecxtujcin ma ajt ndzinaayin, jadu'n nej jây ñaymic'ixigixy co nayboyicquïpxigixy. ² Tzoc nhuinma'ñybidaacim ma Jesús. Jim iixpejt nbaatim ma Jesús nej jëbi nmibijcim Dios. Jesús yi' je' ti xyajnejhuïyim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuïyb anajty co jadu'n y'oc'ayoohuipy, chi ypaadipy jotcujc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'ixpejt, nej pocyjâydjic chaachytuungixy etz ñi'ojüygixy, etz ca' y'ixaani, paady ca' mdzïjpcigixy ni mgamijotmetzcüygixy. ⁴ Ca'ni miich ajcxy ayo'n tzaachypi myajnaxy mabaad ni'py ajcxy mxñbidiyi jadu'n nej Cristo yjajty. ⁵ ¿Nej ti miich ajcxy mjâydiigooygixy je capxhuijin huidibi Dios ti xymooygixy nej jihuïy yci'm'ung? Jadu'n ymina'ñ ma Dios ñecy:

Miich n'ungich, ca' mbidägy nej jihuïy ca' ytim ytiijity je tzaachypi huidibi Dios mïid xycapxhuijy, ni ca' mjotmetzcühuipy co xyaj'ójipy.

⁶ Dios ycapxhuijpy yi' pinjaty chojcpy yjihuiyb. Dios chaachytumby yi' ajcxy co ytundigooy, pinjaty yi' ti cöbicy nej jihuïy yci'm'ung.

⁷ Mimadaaccix miich ajcxy je castigo, com Dios jadu'n yi' xymidity ajcxy nej jihuïy yci'm'ung. ¿Nej ji jada' tüg ung, e ca' yteedy chaachytunüyb co ytundigooy? ⁸ Pen ca' miich ajcxy Dios ti tzaachypi xymooygixy, jadu'n nej yi' moy castigo tüg'ócÿ y'ungdjic y'anäctijc, ca' miich ixypy ajcxy Dios xy'ung'adyi tiydudägy. Jadu'n miich ajcxy m'idipy nej tüg pi'c'anäg huidibi yteedy ca' y'ixa'ñy. ⁹ Jadüg nax, taabi anajty ajt nbi'cnity, ñch ajt ndeedy ya naaxhuiñ xy'ñhuijim xycapxhuijim anajty, e xychaachytuunim co ca' ngapxymidoohuim nhuindzigüyim ajcxy. ¿Nej co ca' huaad n'ijtm ane'my ma ajt ndeedy huidibi tzajpjoty yajpatp? E jadu'n jëbi nbaatim je jugy'ajtin huidibi ca' ycixipy ytigoyipy nimina. ¹⁰ ñch ajt ndeedy ya naaxhuiñ xy'ñhuijim xycapxhuijim anajty mïid jada conbi jugy'ajt ycixpi, jadu'n nej je' anajty ajcxy oy'ixy. Nañ jadu'n Dios ñch ajt xychaachytuunim mïid ajt n'oy'ajt ycixpi etz jigix nmïid'ajtm huädz jot huädz huinma'ñ nej Dios ymïidity huädz yjot huädz yhuinma'ñ. ¹¹ Oy yjanchity co ca' ti tzaachypi ndzöjcm ma yam nbaatim je tzaachypi, com ooy ndzachjihuiyim je tzaachypi, e ca' jotcujc nayjihuiyim. Per pinjaty ixpijcpï Dios chojcin mïid je tzaachypi ycixpi, chi je' yhuimbïdzimüygixy tüg jugy'ajtin tädägy etz jotcujcpi.

Je huidibi ayo'ngojp co Dios y'ayuc ngacöbigaanim

¹² Paady miich ajcxy jotmicpijccix ma mmibijcin, jadu'n nipaadip nej jihuïy myajpidiccixy mgi' tibi y'anucxüyñi, etz mgoxcohuajc mic'ajt paady huidibi anajty ca' mic'ajt mïidity. ¹³ Ixtaaygix nñ'aa tü'aa tiybi ma mdzinaayin, jadu'n nipaadip nej jihuïy yi' mdecy huidibi mädipti chögy, e camina jadüg'oc yhuuidip.

¹⁴ Tzinaaygix mïid oyjot oyhuinma'ñ mïid nidüg'ócÿ jây. Ca' mdúngixipy ti tzïp. Mïid'ajtcix tüg tzinaayin huätzpi, pen ca' jadu'n

mdungixy, ni pin ca'ixipy je Huindzin Jesucristo. ¹⁵ Ooy cuenditungixp co ni pin cajjpyöydüdiipy je pubejtin huidibi Dios ti ahuaníy, jigix nañ jadu'n ni pin ycayajpaadipy janch mät yjot yhuinmañ, e yajhuindigoydäy yajmättäy jacjadyii ymügügtijc, tim jadu'n nej tüg ujtz ta'mbi ypa'mduñ. ¹⁶ Ni tüg miich ajcxy ca' huaad ti ayuc müid'aty müid huingbi töxyjäy huidibi ca' miich mdöxyijc'adyii. Ca' nañ jadu'n m'ixtijipy je ayuc huidibi Dios yajhui'my müid miich ajcxy ycixpi, jadu'n nej y'idüch Esaú. Müid tüg caayin uucin Esaú toocnax je huidibi anajty möhuaanip yteedy co y'unggoobity. ¹⁷ Miich ajcxy mnejhuüyb co Esaú tocy huiidi anajty paatip co japadañ je conuucxin huidibi anajty yteedy möhuaanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinmañ nej jyothuimbidity müid je' ycixpi tiibi anajty tuñ.

¹⁸ Ca' miich ajcxy ti mjaty ti m'ixy, nej jecy'ajty yi israelitas ajcxy yjajty etz y'ixy co ajcxy mihuingoñ je cop Siná ma anajty Dios ti pidägy mij jin, ma anajty ooy yhuizucy yjidity etz mijpoj mäjtiyoy ñaxy, ma anajty ooy y'agoodziy anaxy. ¹⁹ Ni mgamidoy ajcxy je trompeta ni je Dios y'ayuc huidibi anajty ajcxy je' migapxi. Pinjaty je' midou je ayuc ypijctzou ajcxy may'ajt co ca' huaad yjacmügápxigixy com ooy anajty chigüygixy. ²⁰ Je' je' anajty ycixpi co anajty ca' mimadägaangixy je ane'min cötujcin huidibi anajty minamb: "Pin anajty ytecy pidacp ma yi cop, hue' yi' y'oyaj'o'cnity cögäch müid tzaa o müid quipyjixpu'ñ, oy ixipy y'iyujcity." ²¹ Oy chigüyñi huidibi anajty yaj'ixp, Moisés ci'm minaan: "Tziyuuybich yam müid tzig'iñ."

²² Per miich ajcxy jadu'n nipaady nej jihuiy ti mmihuingoongixy yi cop huidibi yxi Sión etz je Dios juugypi ycajp. Je' je' je Jerusalén tzajpjoty pi ma canaag mil je ángeles ajcxy yömujccixy. ²³ Ti miich ajcxy mmihuingoongixy ma ti yömujccixy je jaccömaaybi jäy huidibi ajcxy yxi cojaay ma Dios ñecy jüby tzajpjoty, je huidibi ajcxy huin'ib huingapxtacp Dios. Ti miich ajcxy mihuingoongixy Dios je huidibi nijuez'ajtp tüg'ócixy. Nañ jadu'n ti miich ajcxy mihuingoongixy je' ajcxy je oyjäydijc y'espíritu huidibi Dios ti yaj'ahuimbijttäy tudägy. ²⁴ Miich ajcxy ti mihuingoñ yi Jesús, yi huidibi xycodinaayim ma Dios müid je jemybi cötujcin huidibi Dios yajhui'my müid üch ajt ycixpi. Yi Jesús huidibi mic'ajtmoy je Dios y'ayuc jemybi, co ñi'py teemy yojcy müid ajt nbocy ycixpi. Yi Jesús co ci'm ñi'py teemy yojcy müid jäy ajcxy ypocy ycixpi, nig'i oy yi' ca'ydí co Abel iyujc ñi'py teemy yojcy müid ypocy ycixpi.

²⁵ Paady ycixp ooy cuenditungix miich ajcxy, ca'ydí yaj'ixtij Dios, je pin ti xyajmihui'mim jemybi y'ayuc. Je jäy ajcxy huidibi tzinay jecy'ajty, ca'p je' ajcxy chocy co ajcxy ixtij Dios co jecy'ajty yjamigapxi ajcxy ya naaxhuiñ. O'ctíy üch ajt ca' ndzoocim, pen nmooyim ajt njix je Dios, je pin y'ayuc xyajmihui'mim huiidi tsoon tzajpjoty.

²⁶ Co Dios y'ayuc yecy jecy'ajty, chi yajtziyuuy ooy naax. Jadachambi Dios ymínañ: "Jadügtecypajc nyajtziyuyañich je naax, e ca' nmínaaním naaxti'ajty, nañ jadu'n nyajtziyuyañich je tzajp." ²⁷ Co jadu'n Dios ymínañ: "Jadügtecypajc nyajtziyuyañich je naax." Hue' yajhuinjihuüy co ytigoydähuiipy huidijaty yücxp huidibi Dios yaj'oyiy, e je' hui'mip je huijijaty ca' yu'cxy. ²⁸ Paady je Jesucristo ycötujcin huidibi Dios xyajmihui'mim, ca' yi' huaad ytigoy. Tzoc yajnajxim Dioscojuyip müid Jesús y'ayuc ycixpi, e nyajmij'ajtim n'ojadajtim Dios müid tudägy'ajt etz

müid huindzig'iñ nej je' jäygidäyın. ²⁹ İich ajt nDios jadu'n yi' nej tüg jıñ huıdibi nöctaayb tüg'óciy.

13

Nej jëbi nyajjäygi daacim Dios

¹ Miich ajcxy huıdibi mibijcp Jesucristo, ca' mjäydigooygixy co ajcxy mnaychójcigixipy miñ xyipy nej jihuıy ajcxy mdügquëxyity. ² Ca' ajcxy mjäydigóoygixipy co oyjäy'ajtin mdúngixipy müid pinjaty ajcxy xycojädıyib. Müid co oyjäy'ajtin ajcxy tuuñ, chi nijëjity ajcxy yajjättacy ángeles ajcxy, ni ca' ajcxy huınjihuıy co ángeles anajty ti yajjättaacıxy.

³ Mjäymedzip ajcxy pinjaty tzumy'iñaaıyb mach'iñaaıyb jadu'n nej jihuıy miich ajcxy nañ jadu'n mdzumy'iñaaıygixy mmach'iñaaıygixy quıpxy müid je' ajcxy. Jäymedzip miich ajcxy pinjaty tzaachypı ayo'n minajxp yajnaıxp, com nañ jadu'n miich ajcxy müidity je ninıcx huıdibi jëbi y'ayoy.

⁴ Huen nidüg'óciy jäy huindzigıygixy yajmıj'ajtcıxy je pijcin casada'ajtin. Huen je yëydıjc etz je ytóxyıjc naymüdtzináayıgixy yajxon, com Dios yi' tzaachytunıpy pinjaty tundıgooyb müid huingbi töxyjäy.

⁵ Ca' m'adzojccıxy meeñ. Mıjotcujc'ajtcıxy ti ajcxy ii müid. Dios ti je' ymına'ñ: "Camına xıı İich miich ajcxy n'ixmadzipy, ni İich miich ajcxy ngajäydgoyıpy." ⁶ Jadu'n jëbi nmınaanim aguıjc jotcujc: "Yı Huindzin Dios yi' xypubejtpıch, ca' ndzigıhua'ñıch jäy nej xyjatuna'ñıch."

⁷ Jäymejtıcx miich ajcxy je pinjaty ti xyñıgohuajc'ajtcıxy, je pinjaty ti xyajmüdmıydaaccıxy Dios y'ayuc ytıy'ajt. Huınmaaygıx nej je' ajcxy anajty ytudäy'aty, padungıx nej je' anajty ajcxy müidity ymıbjıcin.

⁸ Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'ñ huınıxıı huınıtiempo, ca' yi' yajtıgadzip yı yhuınma'ñ ni mına. ⁹ Ca' miich ajcxy myajhuın'ıngıxy müid canaag İxpıjcin huıdibi ca' ytügnaxıty müid Jesucristo ytıy'ajt. Nıgi oy co ajt nbıdaacım nhuınma'ñ ma je Dios y'ayuc, nej yi' xychojım xyjihuııyım, nej yi' may'ajt tuñ müid İich ajt. Ca' mbıdaacım mhuınma'ñ ma je cötujcin huıdibi adujcp nijëjity caayın uucın. Ni ti jotcujc'ajt ajcxy capaty pinjaty panıcxp yı jadu'mbı cötujcin.

¹⁰ Je judıo tungmıdıpı huıdibi huindzig'iñ tumb anajty ma Dios yhuıttıjc je jecyıp, ca' yi' jëbi yjactuuni ma İich ajt nmıbjıcin jadu'n nej Jesucristo tuñ huindzig'iñ müid İich ajt ycıxpı. ¹¹ Je judıo mıjtungmıdıpı ma Dios ytıjc ypidac İyujc ñı'py ma je Lugar Santıssımo nej tüg huindzig'iñ huıdibi yajpocyıñıhuaatzp je mayjäy. Je İyujc ögy ñınıcx jıguem je' yajnögy, ca' jıbyıty cajpjoty ma je Dios anajty huindzigıygıxy. ¹² Tim jadu'n nej je judıo sacerdote yajnögy je huindzig'iñ İyujc ñınıcx cajp nınaxy, nañ tim jadu'n Jesús paty tzaachy'o'cin cajp nınaxy jıgıx müid je' ycı'mnı'py pocyıñıhuaádzıp je mayjäy. ¹³ Tzoc mıjıpıdaacım je Jesús tıbi y'ögy cajp nınaxy müid İich ajt nbocy ycıxpı. Tzoc minajxım yajnajxım je canayajmıj'adıı je canay'ıxa'nıı, tim jadu'n nej Jesús minajx yajnajx je canayajmıj'adıı je canay'ıxa'nıı. ¹⁴ Ya naaxhuıñ ca' ya ajt nmüidity tüg ciudad ma jëbi n'ıjtim huınıxıı huınıtiempo, je' İich ajt njıj'ıjxım je tzınaayın huıdibi mıımb cıdaacp. ¹⁵ Paady ycıxp chojcpı co Dios n'ojadajtim nmıbjıctzoohuım jabom jabom huınıxıı müid Jesucristo yxıı. Co jadu'n n'ojadajtim nmıbjıctzoohuım Dios jadu'n nıpaady nej tüg huindzig'iñ nmooyım. Tzoc İı mıbjıctzoohuım, tzoc ojadajtim müid ajt ngı'm'ahuac ngı'm'ayuc. ¹⁶ Ca' mjäydigóoygıxıpy co oybi mdúngıxıpy etz

naybubéjtigix naybudigíyigix miñ xyipy. Co jadu'n mdúngixipy jadu'n nipaady nej tüg huindzigi'ñ ti myejccixy ma Dios huidibi yi' ooy jáygidägy.

¹⁷ Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtip yi m'alma. Nejhuüiyim co ciyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb müd yi' ajcxy, jotcuje ajcxy ñayjihuihuiyb. Pen jibic miich ajcxy mduñ müd yi' ajcxy, tajip mayip ajcxy. E pen yi' ajcxy tajp maayb, chi miich ajcxy ca' ni ti jotcuje'ajt mmüd'adipy.

¹⁸ Mibijctzoogix Dios müd ñch ycixpi etz je pinjaty xymüdhuidijtpich. Jatytim naymic'ijxibich tudägy nduüñich ma tüg'óciy ñch ndung, paady ycixp jotcuje nayjihuiyijich. ¹⁹ May'ajt nbijctzooybich ma miich ajcxy co Dios mmibijctzoogix müd ñch ycixpi, jigix Dios a'ixihuiipy co nicxibich tzojc ma miich ajcxy.

Oy'ajt etz capxpooxín huidibi cogixíyñip je necy

²⁰ Dios nmibijctzooybich müd miich ajcxy ycixpi. Je Dios huidibi yajjugypijc jadüg'oc ñch ajt nHuindzin Jesucristo co y'o'cy, je huidibi cuend'ajtp je maymibijcpidijc. Co Jesucristo ñi'py teemy yojcy, chi mic'ajt moy je jemybi cötujcin huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymibijcpidijc. Jadu'n yi' nipaady nej tüg cöbixy cuend'ajtpi huidibi cuend'ajtp may ngöbixy.

²¹ Je Dios huidibi xyajjotcuje'ajtim je' huen xyaj'ahuimbijtcixy huadz etz oyjäy ma tüg'óciy ajcxy mmibijcin etz ma tüg'óciy ajcxy mdzinaayin, jigix ajcxy mdunipy nej yi' tzocy. Dios huen tuñ ma ñch ajt njot nhuinma'ñ müd Cristo ymic'ajt nej yi' tzocy. ¡Huen Cristo y'idipy mij cömay huinixii huinitio! Amén. Jadu'n jada.

²² Nmigügtijc, nbijctzooybich may'ajt yajtungixy mecxtujcin ma jada ayuc capxhuijin. Ti ajcxy ii con nijayiygixy. ²³ Nejhuüiygix miich ajcxy co ajt nmigüg Timoteo y'ity ahuätztuum. Pen tzojc yjädy ya ma nyajpaadyich, chi yi' xymüdnicxibich co ñch anajty miich ajcxy nicxy n'ijxcixy.

²⁴ Nguejxpyich ngapxpooxín ma nidüg'óciy pin ajcxy xyñigohuajc'ajtp etz je migügtijc ajcxy huidibi mibijccixyp. Je migügtijc huidibi ajcxy yajpatp ya Italia yquejxyp ajcxy capxpooxín ma miich ajcxy.

²⁵ Dios ajcxy xyconuucxip nidüg'óciy miich ajcxy. Amén. Jadu'n jada.

SANTIAGO Yi Neczy Huidi Santiago Yajniguejx Je Judío Mibijcpidijc

¹ Ich Santiago, ndzojcingix ich nduñ ma Dios etz je Huindzin Jesucristo ytung. Cham jada neczy nyajniguesyich yi Israel jäy huidi ajcxy yajmij'ajtp Dios, huidi ajcxy xim yam yajpatp cajp cajp müd co yqueecpidzimy ajcxy Judea naaxjot co ymidzip ajcxy chach'ixhuididyii chachpahuididyii ajcxy.

Je tiy'ajt huidib tzoon ma Dios

² Migügtijc ajcxy co yi mmidzip ajcxy xychach'ijxmadzaangixy nej müch ajcxy mjot mhuinma'ñ müdity, co yi' ajcxy xy'ixhuidijtcixy xypahuidijtcixy, co xyñigapxcixy xyñi'ojiiygixy, co xyajhuinma'ñdigoyaangixy, ca' mdajipy mmayipy ajcxy, jotcuyc ajcxy mnayjihuihuib. ³ Müch ajcxy mnejhuibygixyp co jadu'n mmimecxtujccixyp je tzaachypí ayo'n huidibi mminajxcixyp myajnajxcixyp müd co ti mmijpidaaccixy Jesucristo, huin'it mbáatcixipy mic'ajt, jigix jébi mimadactaygixy tüg'óciy jibic-huinma'ñ. ⁴ Copicy müch ajcxy mimadactáaygixipy tüg'óciy jibic-huinma'ñ, ca' ma mdundigóoygixipy, e huin'it huädz mjot mhuinma'ñ mmüd'adipy ajcxy, ca' ti myajtigoy y'idipy ajcxy.

⁵ Pen nidüg müch ajcxy myajmayajty oyhuinma'ñ, co jäy ajcxy xychach'ijxmadzaani mjot mhuinma'ñ nej müdity, mibijctzou Dios huen xymöy je oyhuinma'ñ, com yejcpy yi' oyhuinma'ñ müd tüg'óciy jäy co pijctzoy. Ca' yi' cohuindugyüi, ca' huaad xy'ojim co nbijctzoohuim oyhuinma'ñ. ⁶ Copicy pijctzohui Dios huijy'ajt cujc'ajt cixygot huinijot, ca' y'ametz yjotmetzity. Pinjaty ametz jotmetz Dios mibijctzoob, ca' tú'ciy müdity yjot yhuinma'ñ, janam jatzojc yajtigach yhuinma'ñ jadu'n nej je mejy co ypidigy y'ixtägy müd je poj. ⁷ Co jäy ajcxy ametz jotmetz mibijctzoogixy Dios, Dios ni ti jadu'n cayecy. ⁸ Yi jadu'mbi jäy ajcxy ametz jotmetzpi canaagnax yhuinma'ñ ajcxy müdity, ca' tügijp yhuinma'ñ pidaaccixy ma Dios.

⁹ Yi ayoobitijc huidibi mijpidaaccixyp Dios, ooy jäygidägaangixy co Dios ypubediyb ypidigihuiyb. ¹⁰ Yi comeñyjäy ajcxy huidibi mijpidaaccp Dios, ooy jotcuyc ajcxy ñayjihuihua'nyii co ajcxy ymeeñ ytíctähuiipy jadu'ñyi. Com yi' ajcxy ymeeñ tigoyamb yi' jadu'n nej tüg pijy co ñiicxni müd xii an. ¹¹ Co xii ypejtni, chi ooy y'andaacni mic, e chi je jinboj ypidzimy, chi je pijyquipy ytích, chi yhuingädaayñi je pijy, e jadu'ñyi ytigoydäy je pijy oy'ajtin. Jadu'n nej yjaty yi pijy, ñan tim jadu'n yjada'ñ comeñydijc ajcxy, jadu'ñyi ñitigoyaangixy yjugy'ajtin.

Co yjot yhuinma'ñ chach'ijxmadza'ñyii

¹² Jotcuyc pinjaty mimecxtujctaayb jadu'n nej ajcxy yjot yhuinma'ñ chach'ijxmadza'ñyii. Co jadu'n mimecxtujctáaygixipy, Dios möhuib ajcxy jugy'ajtin huinixibi, huidibi yajhuinhuanüy tüg'óciy jäy ajcxy huidijaty Dios tzojcp yajmij'ajtp. ¹³ Co pin nijot'aty co tuna'ñ ti jibicpi, ca' ymina'niy co Dios anajty jadu'n yajtundigoyaanip. Dios ca' ti jibicpi tuñ müd jäy ajcxy. E nañ ni pin ca' huaad ijxmach Dios nej yjot yhuinma'ñ

ymiidity. ¹⁴ Ci'm ajcxy jadu'n ñaydunyii, co tzachnijot'ajtcixy canaagnax jibic-huinma'ñ. ¹⁵ Co jäy ajcxy nijot'ajtcixy jibic-huinma'ñ, pocy anajty ytungixy. Ti ajcxy anajty ooy ypocyñibejtni co ñicxy y'ó'ccixni.

¹⁶ Migügtijc ajcxy, huidibi ooy ndzocy njihuüyich, ca' mnayhuin'ñinigixy. ¹⁷ Ich ajt nDios Teedy huidibi tzajpjoty tzinaayb, yi' huidibi yajcojtaay xii madza' huidibi jajp tixxp, yi' je' vejtaayb tüg'ociy tijaty oybi, tüg'ociy yhuinma'ñ huidibi ich ajt nmüid'ajtm. Dios ca' yi' yjot yhuinma'ñ yajtigach jadu'n nej yi xii madza' yjajin ytiicxin ytigach. ¹⁸ Dios y'oydumyb huinjemy ich ajt njot nhuinma'ñ müid yi' y'ayuc ytiy'ajt, jigix jëbi ich ajt nmi'ijtm oyjot oyhuinma'ñ. Yi jäy ajcxy huidibi yajmij'ajtcixp Jesucristo, Dios ñigi tzocy ajcxy ca' jac ti huidibi oyduñ.

Je tiy'ajt tiydudäcyp

¹⁹ Migügtijc huidibi ich ooy ndzocy njihuüyich, mnejhuihuipy miich ajcxy jada co ooy ycopicyity mmido'mbijctähuipy ajcxy Dios y'ayuc ytiy'ajt, ca' mjäydigóoygixipy, ca' mgapxmayiygixipy, pen mjotmätcotp ajcxy ca' anajty mguydungixy Dios ytiy'ajt. ²⁰ Je jäy huidibi jotma'tp, ca' je' tuñ huidibi Dios yjäygidacyp. ²¹ Ixmajtztaaygix yi jibic ayuc, ca' mnijot'ajtcixy yi jibic-huinma'ñ. Cöbijccix müid oyjot oyhuinma'ñ yi Dios y'ayuc ytiy'ajt, yi huidibi Dios ti yajnicödugiy, huin'it jëbi ajcxy m'alma nüzoozin paady.

²²⁻²⁴ Cuydungix ajcxy Dios y'ayuc ytiy'ajt, ca' ajcxy mjotcujc'adipy müid yi'yi co m'amidoo'ijtcixy, hue' anajty ñigoo mnayhuin'ñinigixy. Peni ñigoob Dios y'ayuc m'amidoo'ijtcixy, e ca' mmijpidaaccixy ca' mguydungixy, naadigi' anajty m'amido'ijtcixy. Jadu'n miich ajcxy nipaady nej pin yhuin'yijp aa'ijxnajxp ma tügi iix. Co ñay'aa'ijxnajxtäyii, chi yjihuägy, e mic'amy jäydigoydäy nej yhuin'yijp ti ixy. Naadigi' anajty ti ñay'aa'ijxnaaxyii. ²⁵ Pen miich ajcxy yajxon m'ixpijxyp Dios ytiy'ajt, je tiy'ajt huidibi yaj'oyihuip ajcxy mjot mhuinma'ñ, pen mmijpidaaccixyp, pen mguydungixyp Dios y'ayuc, e ca' mjäydigóoygixy, chi jada' Dios xyconuucxip ajcxy müid jëgixpi huidibi anajty mguydungixyp.

²⁶ Pen ji pin ñayjihuüyii co cuyduni Dios ytiy'ajt, e ca' ñay'ahuijtzigyii, ci'm anajty ñayhuin'ñinyii, tundigooyb anajty, e ca' yjanchity co mijpidaaci Dios ytiy'ajt. ²⁷ Pen miich ajcxy huädz mijpidaaccixy Dios etz mguydungixy yi' ytiy'ajt jadu'n nej jëbi Dios jäygidägy, hue' tzocy co mbubéjtcixipy mba'ayóogixipy co'ögy'ungdijc, etz co'ögy y'töxyjäydijc ma ayo'n jotmay ajcxy patcixy. E ca' huaad jibic-huinma'ñ mjactungixy, jadu'n nej jadyii naaxhuin'yjäy y'iditczixy, huidi ca' mijpidaaccixy Dios.

2

Ca' huin'ijxpety migüg myajmij'ajtcixipy

¹ Migügtijc ajcxy, co m'ojadajtcixy co mmijnicxpejtcixy ich ajt nHuindzin Jesucristo, yi huidibi tzajpjoty ane'm, ca' ajcxy huin'ijxpety migügtijc myajmij'ajtcixipy. ² Pen jim jäy ytigiy ma mnayyöymújcgixy comeenybi müid oori cjiijit, etz müid yhuit yxojx tanch oybi, etz pen nañ tigüyb tüg jäy ayooib huidibi yhuit ytuicy cütz jue nibüdy ixpüdy. ³ Chi miich ajcxy je' jac ñigi myajmij'ada'ñ je comeenybi huidibi oyxoxy, e chi mnimähua'ñ: "Iña' miich ya ma jada oybi iñaaybejt." E je ayooib jäy mnimähuaangixy: "Iña' naaxcixy o jim jadu'n tina." ⁴ Co jadu'n m'iditzip

ajcxy, ca'p anajty jadu'n ytiy'ajity. Mdundigooygixy anajty ma Dios ytiy'ajt co huin'ijxpety ajcxy migüg mdzogipy. Hue' anajty myajtungixyp jibic-huinma'n co jadu'n m'ixtjicixipy jäy huidibi ayoob.

⁵ Migügtjic ajcxy, Dios ti huin'ixy yi ayoobitjic, jëbi ajcxy mijpidägy Dios etz jëbi ajcxy paadipy it lugar ma Dios y'it tzajpjoty. Jadu'n Dios yajhuinhuaniy pinjaty tzojpic jihuiyip co it lugar möhua'n jilby tza-jpjoty. ⁶ Myajtzo'yduungixyp miich ajcxy ayoobitjic. ¿Nej cayi comeeñjyäj ajcxy huidibi miich ajcxy xychachxip ma cötujctac, e xyajnicxcixy ma tungmüdp yhuinduu, oy ajcxy mdzocy mgatzocy? ⁷ ¿Nej ca yjëjty ajcxy huidibi jibic nigapxp ni'ojyib Jesucristo, je oyjäy huidibi miich ajcxy myajmij'ajtcixyp?

⁸ Pen janch miich ajcxy mguydungixy je tiy'ajt huidibi jaybety ma Dios ylibro: "Mdzogipy mjihuihuipy mmigügtjic hueñtyimypinity, jadu'n nej miich ajcxy ci'm mnaychogyüi mnayjihuiyüi." Pen jadu'n anajty mdungixy, tüg anajty oybi mdungixyp. ⁹ Pen huin'ijxpety ajcxy anajty jäy myajmij'ajtcixy jadu'n nej yhuit yxoxy ajcxy müdity, mdundigooygixp, e ti anajty mnayajpocycähuigixy ma Dios ytiy'ajt. ¹⁰ Pen tüg jäy cuy-dundaayi Dios ycötujcin, co nicxy tüg cacuyduñ, jadu'n nipaady nej jihuiy anajty janch ni tüg cötujcin ti cacuyduñ. ¹¹ Je Dios je cötujcin ti pidägy co ca' huaad mmigapxtigooyipy töxyjäydjic, etz nañ ti cötujcin pidägy co ca' huaad njäyajo'cim. Pen mmigapxtigooy töxyjäydjic, oy ca' ti mjäyaj'ögy, ti anajty mdundigooy mij ma Dios ytiy'ajt. ¹² Capxcix müydaccix, tungix nej jëbi huaad jäygidägy iich ajt nHuindzin Jesucristo nej je' cuyduñ yi' ytiy'ajt. ¹³ Ca' ti pa'ayoohuin paadipy ma Dios, pin ca' tuñ ti pa'ayoohuin ma ymigügtjic. Pin pa'ayoohuin tumb ma ymigügtjic, je' capxpaady y'idip co anajty Dios tiyduñ yi' yjäy.

Je mibijcpi etz je oyjäy'ajtin

¹⁴ Migügtjic ajcxy, ni ti m'alma capada'n pen miich mmänaamb co myajmij'ajtyp Dios, e pen ca' myajnigüexigy ni ma co oybi mduñ. Ca' Dios yajnidzöga'n yi m'alma müd co nigoob mmäna'n co Dios mmijpidägy, e ca' mguyduni yi' ytiy'ajt. ¹⁵⁻¹⁶ Pen miich ajcxy müd tüg migüg yëydjicpi o töxyjäybi huidibi yajmayajtp yhuit ytucxy caayin uucin, e chi nigoo miich ajcxy mnämähuiy: "Nicx agujc jotcujc, Dios xypubedipy xypudigihuiy, ca' mdüch'ögipy ca' myuu'ögipy." E miich ca' anajty ti ti mmöy huidijaty yajmayajtpy. ¿Ti oyjäy'ajtin anajty ti mduñ? ¹⁷ Pen miich mänamb co myajmij'ajtyp Dios, e ca' oyjäy'ajtin mduñ müd mmigügtjic, ytimyñipatyp jadu'n nej ixipy ca' mmibicy yi Dios ytiy'ajt.

¹⁸ Ca' yjegyty co tüg jäy xyñämähuibich jadu'n: "Miich mdzachmijpidacpy yi Dios ytiy'ajt, e iich ndumybich oybi." Iich n'adzohuipyich yi jadu'mbi jäy co ca' jadu'n ytiy'ajity nej miich mäna'n. Pen ca' miich mmijpidägy Dios y'ayuc, ca' mjadipy nej mdunipy oybi jadu'n nej Dios huaad jäygidägy. Co iich oybi nduñ, jadu'n ñigüexigy co nmijpidägyich Dios. ¹⁹ Miich mmibijcpy co Dios ji tügpajc, e oy jadu'n co mmibicy. Nañ jadu'n yi ca'oybi ajcxy mibijcp etz chigüyb ajcxy Dios. ²⁰ Loci miich, ca' mhuinjihuñhua'n je tiy'ajt. Co pinjaty mibicy Dios, e ca' yajnigüexigy co oybi tuñ, ca' tydudägy mibicy Dios. ²¹ Je Abraham yejc tüg ijxpejt nej jëbi huaad ngapxymidoohuim Dios co jecy'ajty je' ymang Isaac çyeycy nej tüg huindzigi'n ma Dios. ²² Je Abraham ymibijc co Dios yjiijity etz nañ ycapxymidou nej Dios ñämaayi. Paady nejhuiyim

co yjanchity co Abraham mijpidacy je' Dios mïid co cuyduuñ jadu'n nej Dios ñi:maayi. ²³ E jadu'n oy cuydundäy nej yjaybetyity ma Dios ñecy: "Yi Abraham ymijpidac Dios, paady Dios ymecxtaayi ypocy, e ycöbïjci jadu'n nej jihuïy ca' anajty ytundïgoy." Paady ycïxpi Abraham oyñaydiyïi: "Co Dios minaymigüg'adyii."

²⁴ Cham nejhuïygïx co Dios ycöbïjcpy jäy huidibi cuydungïxpi yi' ytiy'ajt, e ca' nminaanïm mïid jëyi co ymïbijccïxy. ²⁵ Tim jadu'n nej Abraham yjayty, nañ tim jadu'n yjayty mïid je töxyjäy huïdi anajty yxï Rahab, huïdibi anajty ooy ti ytundïgoy mïid mayyëdyïjc. Je Rahab ycoyüdzy ma ytiyc nimetz jäy huïdibi anajty Israel jäy yaj'ïjx'ïjtyp, e chi yajqueegïy ma huïngbi tü'aa, e jadu'n ajcxy yajtzoocy ma ymïdzip. Mïid co jadu'n ooyjäy'ajtin tuñ mïid je Israel jäy, chi Rahab oy paady je nïdzoocïn ma Dios. ²⁶ Je ninïcx huïdibi ca' alma mïidity, ca' ni ti mic'ajt mïidity. Nañ tim jadu'n pinjaty mïbijcp co Dios yjiijity, e ca' cuyduñ Dios ytiy'ajt, yi' ymïbijcïn ca' Dios cuendïpicy.

3

Co pinjaty nigapxy ni'ofïy ymigüg

¹ Migügtïc ajcxy, huïnmaygïx yajxon pen janch mnajtztzogïygïxy co ajcxy mnihuïndzin'adaangïxy Dios y'ayuc. Com ñch ajt huïdibi nyaj'ïxpïcïm Dios y'ayuc, pen tundïgooyïm nïgi mij nyajtydunaanïm. ² Nidüg'ócïy ñch ajt ndundïgooyïm mïnaajity. Pen ji pin ca' y'ïdïgooy ycapxtïgooy, yi' tiydudägy anajty yjäy'aty, jëbi ñaygüend'adyii yajxon, e ca' huaad y'ocjactundïgooyñi. ³ Ypidacpy jäy freno ma cohuay y'ahuac jigïx jëbi ane'my je cohuay nej tzocy. Nañ jadu'n tzocy co jäy ajcxy huen y'ahuac ahuijtzcïxy jadu'n nej jäy cohuay ane'my mïid freno. ⁴ Nañ jadu'n yi barco oy mabaad ooy yjamïjity, per ooy poj ytiiminyii ytiixïbyïi. Je barco yaj'ane'm yajxon mïid tüg pi'c pujx yindi'cni huïdib xïjïp tímón. Yajxon ytüyöy je barco ma je' timdzocy je huïdibi ane'mïp. ⁵ Nañ jadu'n yjaty mïid yi tootz, janch tim yindi'cni yi', per ooy mij cajee tuñ jïbicpi, jëbi y'ïdïgooy ycapxtïgooy mij cajee. M'ïjxyp miïch ajcxy nej tim yindi'cni jïin mij ooy nögy quipychara miy'ujtz. ⁶ Yi jäy ajcxy y'ahuac nañ tim jadu'n nej pi'c jïin, mïid nhuïn n'ahuac mijcajee n'ïdïgooyïm ngapxtïgooyïm. Co jadu'n n'ïdïgooyïm ngapxtïgooyïm, chi jëbi mijcajee mïdundïgooyïm mayjäy. Co n'ïdïgooyïm ngapxtïgooyïm, etz nayyajpocycähuïm, chi ñïguëxïgy canaagnax jïbic-huïnma'ñ huïdibi nmïd'ajtim. Jada jïbic-huïnma'ñ jim yi' nbaatim ma je mujcu' huïdibi tzïnaayb ma yi inferno. ⁷ Yi naaxhuïñyjäy ti mïmadaaccïxy yi' iyujc animal huïdibi queegïcp queec-huïdijtp, naag iyujc ahua'nbi, etz iyujc nïjotyp. Ti ooy yajmaxïygïxy yajxon iyujc huïndzïcypï etz ahua'ñibi. ⁸ Yi naaxhuïñyjäy oy ti mïmadaaccïxy yi' iyujc animal, per nitüg ycaca'ty pïn yajxon y'ahuac ahuijtzïgïpy, ac'ïdïgooygïxpi capxtïgooygïxpi ajcxy. Pïn ymigüg nigapxy ni'ojïyb, huïn'it je ymigüg ooy jïbic ñayjihuïhua'ñyïi, jadu'n nej jihuïy veneno ti möy ymigüg. ⁹ Mïid jada' nhuïn n'ahuac ajt ngapxpaatim ñch ajt nHuïndzin Jesucristo etz ñch ajt nDios Teedy. Nañ jadu'n mïid nhuïn n'ahuac nigapx ni'ojïyïm nmïgügtïjc. Dios ti yajcojy yi' jäy mïid oyjot oyhuïnma'ñ jadu'n nej yi' oyjot oyhuïnma'ñ mïidity, paady ca' y'oyity co n'ïdïgooyïm ngapxtïgooyïm. ¹⁰ Mïid nhuïn n'ahuac ajt mïid ngapxïm oybi ayuc etz jïbic ayuc. Mïid nhuïn n'ahuac yi'

m̄id ngapxpaatim etz ni'oj̄iim̄ nm̄igũgt̄ijc. Ca' jadu'n y'oyity co jadu'n n'ad̄iit̄zim. ¹¹ ¿Nej j̄ebi jada' ma tũg n̄igop yp̄idzimy n̄i p̄ac̄pi etz n̄i ta'mbi'? ¹² Migũgt̄ijc ajcxy, ¿nej j̄ebi jada' y' higueri yt̄im'aty aceituna etz y' muuxy'aadz yt̄im'aty higos? Nañ tim jadu'n ma n̄i ym̄uxy tamt̄zpi, ca' jim ypidzimy n̄i p̄ac̄pi. Paady yc̄ixp ca' y'oyity co j̄ay ajcxy capxcixy oybi etz j̄ibicpi.

Je tiy'ajt janchyp̄i

¹³ Pen miich ajcxy huijycujc mnayjihuiȳi, pen oyhuinmañ ajcxy mm̄id, yajtungix m'oyhuinmañ ma mdzinaayin mjugy'ajtin. Ca' huaad c̄i'm ñaygõm̄aayigixy. M̄id je oyj̄ay'ajtin huidibi ajcxy mdumyb huen j̄ay c̄i'm nejhuiȳigixy co oyhuinmañ miich ajcxy m̄id'ajtcixyp. ¹⁴ Pen ta'm m̄jot mhuinmañ mjihuiȳigixy, pen mga'oy'ijxcixyp ym̄igũgt̄ijc, pen mhunnaxtugaangixyp ym̄igũgt̄ijc, pen jadu'n mjihuiȳigixy mhuinmaayigixy, huin'it ca' huaad mnaygõm̄aayigixy c̄i'm co mdzachcuydungixy Dios yt̄iy'ajt, com ca' yjanchity, nigoo m'an̄idaaccixy. ¹⁵ Jada j̄ibic-huinmañ ca' jada chooñ ma Dios huidibi tzinaayb tzajpjoty. Ya naaxhuiñ jada j̄ibic-huinmañ yajpaady, m̄id co j̄ay tzachnijot'ajtcixy j̄ibic-huinmañ. Y' mujcu' yejcpy jada j̄ibic huinmañ, e ca' nm̄inan̄im co Dios yecy jada j̄ibic-huinmañ. ¹⁶ Paady yc̄ixp co j̄ay ajcxy ycanay'ixañȳi, co huinnaxaangixy ym̄igũg, chi ca' oy y'ijtcixy, oy ajcxy ñaymidundigõoyigixy mijcajee. ¹⁷ Je huijy'ajt cujc'ajt huidibi Dios yejcpy, ooy y'. Y' Dios huidi tzinaayb tzajpjoty oyhuinmañ ym̄id. Pen nyajtuunim je tiy'ajt huidibi Dios ti xymooyim, chi jotcujc ndzinaayim, ca' ma tzip capxy, etz nm̄imecxtujcim nm̄igũgt̄ijc, etz yung naxy jot huinmañ nm̄id'ajtim, etz nba'ayoohuim nm̄igũgt̄ijc, etz nduunim oyj̄ay'ajtin, etz tudägy nhuinmañ nm̄id'ajtim. E ca' nigoo naybidaacim jadu'n nej jihuiȳ nm̄ijpidaacim Dios, e ca' yam yjanchity. ¹⁸ Co nyajtuunim je huijy'ajtin cujc'ajtin huidib Dios yejcpy, chi jotcujc ndzinaayim m̄id tudägy njot nhuinmañ, jadu'n nej j̄eb Dios j̄aygidägy.

4

Co pinjaty nijot'ajtcixy mayñax tzinaayin

¹ ¿Ma'amy ajcxy mdijy chooñ je tzip capx huidibi yajpatp ma miich ajcxy? Tũg'õciy y' jadu'mbi j̄ibicpi yajpatp ma ajcxy m̄jot mhuinmañ, paady yc̄ixp mganay'ayuc-huinjihuiȳigixy, e tzipcapxy myajcoj̄cixy myaj'abadiȳigixy. ² Ooy miich ajcxy tijaty m̄jatzoj̄cixy, e ni ti mga-paatcixy, e huin'it mj̄ayaj'õccixy. Ooy m'adzoj̄cixy tijaty migũg yj̄è'ajtyp, paady yc̄ixpi mdziptungixy, etz mganay'ixáanigixy. Ca' ti jotcujc'ajtin mbaatcixy, com ca' ajcxy mbijctzoogixy ma Dios. ³ Co mjam̄ibijctzoogixy Dios, chi ca' ti mbaatcixy, m̄id co mbijctzoogixy m̄id j̄ibic-huinmañ. Mbijctzoogixyp co myajtunaangixy ma ca' ypanyi. ⁴ Mdundigooyb ajcxy. ¿Nej ca' mnejhuiȳigixy co Dios ca' j̄aygidägy pen mdzachnijot'ajtyp ajcxy y' mayñax tzinaayin? Pinjaty nijot'ajtcixyp y' mayñaxpi tzinaayin, jadu'n y' ajcxy nej y' jacjadyi j̄ay ya naaxhuiñ huidibi ca' yajm̄ij'ajtcixy Dios yt̄iy'ajt. Hue' je' ajcxy y'ahuimbity Dios ym̄idzip. ⁵ Nej miich ajcxy mdijy, naadigi' ymiñ jaybety ma Dios yñecy: "Je Espíritu Santo huidibi Dios ti xy'adigīyim ti xyjottigīyim ooy xychoj̄cim xyjihuiȳim mijcajee." ⁶ Dios ninigoobi may'ajt oy'ajt tuuñ m̄id ñch ajt yc̄ixpi, paady yc̄ixpi ym̄inañ ma Dios ñecy co ca' y' oy'ixy pinjaty am̄ij agix

nayjihuuyip. Dios yejcy may'ajt oy'ajt ma yi jäy ajcxy huidibi yung naxy jot huinma'n müdity. ⁷ Naybidáacigix cixyot huinjot ma yi Dios. Mic mühuindinaaygix yi mujcu', e jihuägipy yi' ma müich ajcxy. ⁸ Ojadajtcix Dios müid oyot oyhuinma'n, e Dios xypubedipy xypudigihuiipy ajcxy. Müich ajcxy pocyjäydijc, ixmajtzcix yi jibic-huinma'n. Yajhuaatzcix yi mjot yi mhuinma'n müich ajcxy huidibi ametz jotmetz mübijcp. ⁹ Tajcix maygix, amutzcüygix. Huen yi mxiiçin yi mxondaacin ahuimbity jüyin yaaxin. E yi mjotcujc'ajtin huen ahuimbity tajü mayi. ¹⁰ Pidaccix yung naxy yi mjot yi mhuinma'n ma yi mHuindzin Dios, e yi' may'ajt oy'ajt tunipy müid müich ajcxy ycixpi.

Ca' huaad nigapxcixy ni'ojüygixy ymigügtjc

¹¹ Migügtjc ajcxy, ca' mnayñigápxigixy mnayñi'ojüygixy müñ xyipy. Pen mnigapxyp mni'ojüyb mmigügtjc, hue' mnixicpy myajxiicpy Dios ytiy'ajt huidibi minamb co myajmij'adipy yi mmigüg jadu'n nej mnayyajmij'adyii c'i'm. Pen mnixigamyb myajxigamyb Dios ytiy'ajt, ca' anajty mguyduñ yi tiy'ajt, e jadu'n yhuimbüdzimyb nej ixypy müich minañ co Dios ytiy'ajt ca' yi' y'oyity. ¹² Dios tügpajc huidibi ane'min pidägy, e yi' je' tügpajc huidibi tiydunamb pocyjäy. Yi Dios tügpajc huidibi yajtögip o yajtigoyip jäy ajcxy y'alma. Paady ycixpi müich ajcxy ca' ypanyi nicxy migüg mnigapxcixy mni'ojüygixy.

Dios tügpajc nejhuü nej je jabombi mimb cidacp

¹³ Tungix cuendi üch n'ayuc müich ajcxy huidibi minamb: "Cham o jabom nnicxim ma yijimbi naax cajp, e jim nyajnajxim jimijt agujc jotcujc, jim negocio nduunim, ooy mücajee nbaatim." ¹⁴ E müich ajcxy ni mganejhuüygixy ti je' anajty je jabombi mimb cidacp. Je jugy'ajtin ni pin ca' nejhuü nej pin chinähua'n yjugy'ada'n. Jadu'n müich ajcxy mjogy'ajtin nej joc co y'ocquëxigy cham, e tim tügjaxigy ti ñitigooyñi. ¹⁵ Jac'oy ajcxy mmäna'ip: "Pen Dios jadu'n tzojp, pen xymooyim jugy'ajtin, jëbi cham o jabom nduunim tijaty." ¹⁶ Müich ajcxy c'i'm mdzachyajnihuinmaaygixy ti mdunamyb, c'i'm mdzachnaygömayyii ajcxy. Ca' jadu'n y'oyity co c'i'm mnaygömayygixy; co c'i'm mnaybidáacigixy amij agix, ni Dios mgamibjccixy. ¹⁷ Pin janejhuüyb je oybi, e ca' tuñ, pocytumb anajty.

5

Je comeñyjäy yjugy'ajtin nitigoyam

¹ Comeñydijc, oc'amüdoo'ijtcix nej cham nmäna'ñich. Amutzcüygix, tajcix maygix co xyñiminaangixy ayo'n. ² Müich ajcxy mmeëñ etz ajcxy mjogy'ajt ñitigoyamb yi', müich ajcxy mhuit mduçy ti uucxyting yjicxtäyüi. ³ Müich ajcxy m'oori, ajcxy mplata, ajcxy mmeëñ naadigi' ti myujpjjccixy ti m'amay'ajtcixy. Ti ixypy myajtungixy müid oyjäy'ajtin. Co ti myujpjjccixy ti m'amay'ajtcixy ji jadu'n je tiy'ajt co mdundigooygixy ma Dios. Müid co yi mmeëñ ca' ti myajtungixy müid oyjäy'ajtin, paady ycixpi ayo'n mbadaangixy müid je xü tiempo huidibi mimb cidacp, minä Dios tiydunaangixy pocyjäydijc. Nitigoyamb müich ajcxy m'oy'ajtin. ⁴ Mdundigooygixyp co ca' ca'pxy ti mmujuuygixy mdumbüdjic huidibi ti myajtungixy ma ajcxy mgamdu'. Yi mdumbüdjic cham ooy müich ajcxy xiy ma Dios. Yi Dios, je Huindzin müjpi, huidi ane'mdaayb tüc'óciy jüib tzajpjoty etz ya naaxhüñ, yi' ñejhuüyaayb nej müich mdumbi ajcxy ymänaangixy. ⁵ Ti müich ajcxy agujc jotcujc mdzinaaygixy ya

naaxhuiñ miid mayñax xondaacín. Ti miich ajcxy mgüxyii mbedyii, ti ajcxy mjotcujc'ajtcixy. Cham m'ahuijxcixyp yi tzaachypi yi ayo'n huidibi ajcxy mbadamyb ma Dios, jadu'n nej huaj nïcxpi ahuixy co jäy ajcxy chüda'ñyii. ⁶ Miich ajcxy comeñyjäydijc ti miich ajcxy mxigixy mñihuambejtcixy, mdzaachytungixy ti myaj'öccixy jäy ajcxy tudägyi, e ca' yi' ajcxy xymiñuimbijty.

Je mecxtujcín etz je capxtägii

⁷ Migügtijc ajcxy, yajtungixy mij yi mecxtujcín mabaad anajty je Huindzin Jesús ymiñ jadügtecy ya naaxhuiñ. Tim jadu'n nipaady nej naymidumbidijc ahuijxcixy je tiibi nidungiiygixy, ahuijxcixy miid mecxtujcín je oga'n tuu etz je poj tuu huidi miid je' ypidägy yhuindiñuipy. ⁸ Miid'ajtcix nañ jadu'n ooy mecxtujcín, etz ca' mjotmetzciiygixy, com huingomb je tiempo mina ymiina'ñ je Huindzin Jesús ya naaxhuiñ jadügtecy. ⁹ Migügtijc ajcxy, ca' jadüg jadüg mnayñigápaxigixy nayñi'ojiiygixy. Pen jadu'n mdungixy Dios miich ajcxy xyajpocycähuipy, com tim huigonip je xii je tiempo mina Dios tiyduna'ñ jäy ajcxy miid ypocy ycixpi. ¹⁰ Migügtijc ajcxy, pijccix je iixpejt jadu'n nej tzaachypi minajxy yajnaxxy je profetas ajcxy huidibi ajcxy iñhuäcxp capxhuäcxp je Huindzin Dios y'ayuc. ¹¹ Minaanim jadu'n, miid co ajcxy ooy mimecxtucy nej jäy jibic ytuuñ miid yi' ajcxy, e chi jotcujc cham yajpaady ma Dios. Ti jada' mjatymidoogixy je ayuc nej Job ayo'n tzaachypi minajxy yajnaxxy, e ymimecxtujc je'. Miid co ooy anajty mijpidägy Dios, paady Dios pa'ayoy Job, e conuucx mijcajee.

¹² Migügtijc ajcxy, co tijaty ayuc m'adzohuimbidiipy, tiydudägy ajcxy m'adzohuipy: "Janch jadu'n o ca' yjadu'nity", ca' ajcxy m'iindägipy. Ca' Dios nigoo m'iibaadipy mgapxpaadipy. Ni ca' m'iibaadipy mgapxpaadipy yi naaxhuiñybi o tijaty ya naaxhuiñ. Huin'it ca' mnayyajpocycähuuyb ma Dios.

¹³ Pen ji pin ma miich ajcxy ti ayo'n müdity, huen mibijctzoogixy Dios miid yi jäy ycixpi huidibi ayo'n miid. Pen miich ajcxy jotcujc nayjihuuyip, huen huin'igixy Dios. ¹⁴ Pen ji pin nidügti ypigyii ma miich ajcxy, huoomiingix yi' huidibi ajcxy nigohuajc'ajtp yi mibijcpidijc, jigix ajcxy mibijctzoohuipy Dios miid je pa'mjäy ycixpi, etz pidägy huenei aceite ma je jäy ycohuajc etz capxpaadipy yi Huindzin Jesús yxii. ¹⁵ Miid co mich ajcxy mmijpidaaccixy e mmibijctzoogixy Dios, paady ycixpi tzögipy yi pa'mjäy. Chi je Huindzin Dios yejcnip mic'ajt oy'ajt, etz ymexptaayipy yi' ypocy huidibi anajty ti tuñ. ¹⁶ Capxpizim yi mbocy nidüg nidüg. Ñayñibijctzoohuuyigix nidüg nidüg ma Dios, jigix ajcxy mdzögipy. Pen tüg tudägyi jäy ymibijctzooyb yi Dios cixyjot huinjot, madägipy yi' miid y'oración. ¹⁷ Elías nañ tim jadu'n anajty yjothuinma'ñ müdity nej iich ajt. Janch cixyjot huinjot mibijctzooy Dios ca'jity ytüy, e ca' je' jadu'n ytuuy tugüg jimijt ja tudujc po'. ¹⁸ Chi jadüg'oc Elías mibijctzoy Dios co huen tüy, chi Dios yajtuuy, e chi ya naaxhuiñ yhuindiñy je jäy ajcxy ypidägy.

¹⁹⁻²⁰ Migügtijc ajcxy, pen ji miich ajcxy nidüg ñüdigoy ytüdigoy ma yi Dios ytüy'ajt, e huin'it tüg quëxigipy pin ymigüg yajhuimbidiipy ma Dios ytüy'ajt, nejhuuyigix miich ajcxy co pin huidi yajhuimbijtp ymigüg ma Dios ytüy'ajt, huidibi ti ñüdigooy ti ytüdigooy, ti je' anajty tüg alma yajtzögy ma yi o'cín, e ti anajty yajpocynñhuatztäy.

1 PEDRO

Yi Necy Huidibi San Pedro Yajniguejx Je Judio Mibijcpidijc

¹ Ich Pedro, Jesucristo ti xyajñibicyich ngapxhuäcxbich yi' y'ayuc. Jada necy nyajniguejxyp miich Israel jäy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ² Miich ajcxy migügtijc Dios Teedy ti xyhuin'ijxcixy, jayijp Dios ti nejhuiy co xyjäy'ada'ñyii ajcxy. Dios ti yajtigiyiy yi' yjihui'ñ ymic'ajt ma miich ajcxy mjot mhuinma'ñ, huen oyjot oyhuinma'ñ myajtunipy ajcxy jadu'n nej Dios huinma'ñ xymoogyixy. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem kuj miid miich ajcxy ycixpi. Pidaaccix mhuinma'ñ co mgapxymidohuaangixy Dios jadu'n nej jecy'ajty je Israel jäy ytuñ, je taab anajty Moisés yaj'ögy iyujc etz yajñixidicxy ajcxy nidüg nidüg je n'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcujc mdzináaygixipy.

Jijp'ijxcix jugy'ajtin huinixibi

³ Yi Dios, ich ajt nHuindzin Jesucristo yTeedy, huen capxpaady y'ity, miid co may'ajt oy'ajt ti tuñ miid ich ajt co ti oyduñ huinjemybi ich ajt njot nhuinma'ñ, jebi n'ijtim Dios yjäy. Jadachambi ooy njijp'ijxim je jugy'ajtin huinixibi, miid co Jesús yjugypijcy huinjemy ma anajty ti y'ögy. ⁴ Nañ ooy njijp'ijxim tijaty Dios xymöhuuanim jiiy tzajpjoty, huidibi ca' yhuindigoy, huidibi ca' yjibicxy, etz huidibi ca' ycixy ytigoy. ⁵ Dios xycuend'adip ajcxy miid yi' ymic'ajt, ixti jini co anajty ajcxy je m'alma nüdzoocin padaangixy, co anajty je naaxhuiñ ycixy ytigoy. Mbadaangixy m'alma nüdzoocin miid co ti mmijpidaaccixy Dios ytiy'ajt.

⁶ Paady miich ajcxy ooy jotcujc'ajtcixp. Oy cham tzaachypi m'ocminajxcixy m'ocyajnajxcixy miid co jäy tzach'ijxmadza'ñ miich ajcxy mjot mhuinma'ñ. Nigi ooy jotcujc nayjihuiyigixy co ajcxy yi' m'alma nüdzoocin pada'ñ. ⁷ Dios y'ixamyb ñejhuihuamyb pen janch miich ajcxy cixyjt huinjot mmijpidaaccixy yi' y'ayuc. Paady miich ajcxy ayo'n tzaachypi mmajnajxcixy myajnajxcixy jebi nigi myajhuaatzcixy mjot mhuinma'ñ, tim jadu'n nej jäy yajhuaatzcixy yi' oori miid jini. Dios nigi tzocy miich ajcxy huidib yi' ytiy'ajt mijpidaaccip, ca'ydi oori. Pen tudägy miich ajcxy mhuinma'ñ, pen ca' mhuinma'ñytigajtzcixy co tzaachypi mmajnajxcixy myajnajxcixy, chi capxpaady ajcxy m'idipy etz mbaadipy ajcxy jotcujc'ajtin co anajty Jesús ñayguëxigyyi jadügtecy ya naaxhuiñybi.

⁸ Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtip ajcxy yi' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy mnayjihuiyii nigi jotcujc anaxy. Je jotcujc'ajtin huidib mmid Dios je' yejcp. ⁹ Paady ycixpi ti mmijpidaaccixy Jesucristo co ajcxy m'alma xyajñidzogaani.

¹⁰ Jadu'n nej Jesucristo xyajñidzogaani miich ajcxy m'alma je Dios y'ayuc najtcapxixybi ooy anajty jecy'ajty janejhuihuaangixy nej Dios y'ayuc ñiguejy, e ca' ajcxy huinjihuiy, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'ñ miid miich ajcxy

ycixpi. ¹¹ Je Dios y'ayucnajtzcaxpiybi jecy'ajty ooy ajcxy jahuinmay, ooy ajcxy jahuinjihuuhuaañ nej yhuimbizimy je ayuc huidibi ajcxy ymüd jotjoty huinmañyoty, je ayuc huidibi Jesucristo yajmiguejx yí yihui'ñ ymic'ajt, je Espiritu Santo, jadu'n nej ajcxy najtzcaxpiy co je Cristo tzaachypí minaxa'ñ yajnaxa'ñ, etz co ñicxa'ñ jadüg'oc tzajpjoty. ¹² Dios yajnejhuuyi yí y'ayucnajtzcaxpiybi co je' huidib ajcxy ycapxhuäcx jiini je' ytunañyii yjadañyii, ca' ajcxy ixa'ñ. Migügtjic ajcxy, Dios ti yajtuunyii ti yajjadyii ma miich ajcxy je mxii mdiempo nej anajty je' y'ayucnajtzcaxpiybi najtzcaxpiy jecy'ajty je tiy'ajt. E jadachambi jadu'n nej Dios ti yajtuñyii ti yajjadyii ti jäy capxhuäcxtäy ma iich ajt nidüg'öciy. Je jäy huidibi capxhuäcx je tiy'ajt ymüd anajty ajcxy je Dios yihui'ñ ymic'ajt huidibi Dios anajty yajniguejxip, chooñ tzajpjoty. Ixti je ángeles huidibi ajcxy tzajpjoty tzinaayb yjanejhuuhua'ñ nañ jadu'n nej Dios ti yajtuñyii ti yajjadyii ma miich ajcxy, e ni ca' ajcxy nejhuüy.

Chojcpy Dios co tudägy ndzinaayim

¹³ Paady ycixp ni'ixi pidaaccix mjot mhuinma'ñ. Huijy ycuje ajcxy mdzinähuij. Jijp'ijxcix je may'ajtín oy'ajtín huidibi Dios tunamyb müd miich ajcxy ycixpi co anajty Jesucristo yhuimbity ya naaxhuñ. ¹⁴ Capxymidoogix Dios jadu'n nej pi'c'anäg capxymidoogixy ytaj yteedy. Ca' huaad m'octundigóoygixni jadu'n nej anajty mdundigooygixy co anajty ca'ni mnejhuuyigixy Dios ytiy'ajt. ¹⁵ Oyjot oyhuinma'ñ ajcxy myajtunipy jadu'n nej Dios oyjot oyhuinma'ñ yajtuñ, je huidibi ti xyhuin'ixy ajcxy. ¹⁶ Com jadu'n ymiñ jaybety ma Dios ñecy, jadu'n Dios migapxy je' yjây: "Mi'idip ajcxy oyjot oyhuinma'ñ jadu'n nej iich nmi'ityich oyjot oyhuinma'ñ."

¹⁷ Miich ajcxy m'ojadajtpy je Dios Teedy. Dios ca'p tzaachytunañ yí jäy ajcxy huin'ixpety. Hue' je' chaachytunipy ajcxy nidüg nidüg jadu'n nej ajcxy yhuinma'ñymüidity, pen jibic-huinma'ñ ymüd, chi tzaachytunipy ñigi. Paady ycixp tiydudägy ajcxy mdzinähuijpy. Tzigiyigix Dios. ¹⁸ Je Dios canan hue' ti xyajpocyñihuaatzim co ti cojuy iich ajt nbocy müd oori o plata, jadu'n nej anajty nbocytuunim co nmijpidaacim n'ap ndeedy y'ayuc ytiy'ajt huidibi ca' ytiy'ajity. ¹⁹ Hue' janchtiy Dios ti xyajpocyñihuaatzim müd Cristo co y'o'cy cruudzcixy, e chi ñi'py teemy yojcy müd iich ajt nbocy ycixpi. Jadu'n nej anajty Israel jäy ñayajpocyñihuaatzigixy co yaj'ögy tüg boregi ung, huidibi ca' anajty ti jibicpi müdity, e chi ñi'py teemi cuji. ²⁰ Jadu'n nej Cristo y'o'cy müd iich ajt nbocy ycixpi, Dios jayijpni jadu'n yajnihuinmayiy co jadu'n tuna'ñ, ca'ni anajty naaxhuiñybi chondägy. Jecy'ajty ca'ni anajty pin nejhuüy, e jadachambi Dios ajt ti xyajnejhuuyim. ²¹ Paady ycixp miich ajcxy mijpidägy Dios. Dios yajjugypijc huinjemy je Cristo co y'o'cy, e Cristo cömay ooy ypidzimy jiiby tzajpjoty. Yajmij'ajtcix Dios etz jijp'ijxcix co Dios xyajnidzögaanip ajcxy m'alma.

²² Ti myajhuaatzicixy mjot mhuinma'ñ co ti mmijpidaaccixy Dios ytiy'ajt. Naychöjigix nayjihuiyigix nidüg nidüg cixyot huinjot, ca' y'ametz yjotmetzity. ²³ Com ti Dios oyduñ miich ajcxy mjot mhuinma'ñ huinjemybi müd yí y'ayuc ytiy'ajt, co ti mmijpidaaccixy je tiy'ajt huidibi tudägyip, je huidibi ca' ycixy ytigoy, huidibi huinixii ijtp, je tiy'ajt huidibi jugy'ajt yejcpy. ²⁴ Jadu'n ymiñ jaybety ma Dios y'ayuc:

Je jāy ninīcx nidīgooyb yī' etz je ninīcx y'oy'ajtīn nidīgooyb yī'. Tīm jadu'n nej tūg pījy co ñīdecy y'tītzni, chi je pījy jadu'ñyī yca'ni, e chi jadu'ñyī je pījy y'oy'ajtīn y'tīgooy.

²⁵ Dios y'ayuc y'tiy'ajt huinīxī y'ity, ca' ycīxy y'tīgooy nīmīna.

Jada je ayuc je tīy'ajt huīdībī Dios yjāy ycapxhuācxyp ma miīch ajcxy.

2

¹ Paady ycīxp cocīcy co m'ixmājtzcīxīpy yī jībīc-huīnma'ñ nej mīgūg ajcxy jībīc mñīgapxcīxy. Ca' m'aniīdáaccīxīpy. Ca' ajcxy mnaybīdāgīyīb jadu'n nej jīhuīy ooy m'oyjāyīty, e ca' yjanchīty. Ca' mmīgūg ajcxy tī myajca'oy'ixīpy. Ca' ajcxy m'īdīgoyīpy mgapxtīgoyīpy. ² Jadu'n nej yī ma'xungdījc tzocy chīdz, nañ tīm jadu'n miīch ajcxy tzojccīxy jot'ajtcīxy Dios y'ayuc y'tiy'ajt, jīgīx jēbī ca'pxy yī mhuīnma'ñ m'īdīpy ajcxy mīd je īxpījcīn huīdībī Dios xymooygīxp, e chi ajcxy m'alma paadīpy nīdzocīn. ³ Nīdzōgīp miīch ajcxy m'alma, penī janch tī mmījpidāaccīxy je Huīndzīn Jesucristo y'ayuc, etz tī mnejhuīyīgīxy nej Dios may'ajt oy'ajt tī tuñ mīd miīch ajcxy ycīxpi.

Cristo je tūgpajcpi jaccopīcyip

⁴⁻⁵ Yajmīj'ajtcīx yī Huīndzīn Jesucristo. Dios tī yhuīn'ixyī jēbī yHuīndzīn'aty ma naaxhuīñyāy etz ooy tzocy. Yī naaxhuīñyāy ca' ajcxy tī tuñcuend, tīm jadu'n nīpaady nej tūg tzaa huīdībī pojtzpidījc nīnīgoob ca' yajtuna'ñ ma yī tzaadījc ycojy. Yajmīj'ajtcīx miīch ajcxy je Huīndzīn Jesucristo. Dios yaj'oyī huamyb mīd miīch ajcxy tūgpīcy jāy huīdībī yī' yjāy'adaanīp, huīdībī ojadadaangīxp Dios, huīdībī Dios ytung tunaangīxp. ⁶ Jadu'n yjaybetyīty ma Dios ylibro, Dios jadu'n ymīna'ñ:

Jīm ma Israel jāy nbidāgībīch tūg mīj'ame'mbī huīdībī tī nhuīn'ixyīch, huīdībī ooy ndzocyīch, e pīnjaty je' mījpidācp ooy njāygīdāgībīch. Je mīj'ame'mbī jadu'n je' nīpaady nej tūg tzaa oybī huīdībī tīgīhuamb ma tījctaatz co tzaadījc ycojy.

⁷ Miīch ajcxy huīdībī mījpidācp Jesús, mīd miīch ajcxy je mīj'ame'mbī ooy je' ymījīty yjanchīty. Per yī' ajcxy ca' mījpidāgy Jesús, je' yī' ajcxy ycuydumyīb nej ymīna'ñ ma jaybetyīty:

Pīnjaty ca' capxymīdohua'ñ Dios, ca' ajcxy īxaangīxy je Cristo, e jadu'n ajcxy nīpaady nej pojtzpidījc huīdībī ca' yajtunaangīxy tūg tzaa oybī co tzaadījc cojcxīy. Yī Cristo yī' je' je mīj'ame'mbī huīdībī ane'mdāhuamb tūg'ócy.

⁸ Nañ jadu'n yī' ajcxy huīdībī ca' mījpidāgy Jesús cuydumyīb nej ymīna'ñ ma yjaybetyīty:

Jadu'n je Cristo nīpaady nej tūg tzaa ma jāy ajcxy ycōnejpcīxy etz ycīdaagīxy.

Je jāy ajcxy huīdībī ca' mījpidāgy Jesús, jadu'n nīpaady nej jīhuīy ycōnejpcīxy ma tūg tzaa co ajcxy ca' tungīxy cuendī Jesús y'ayuc, paady ycīxpi padaangīxy tzaachypī mīd ypocy ycīxpi, jadu'n nej Dios tī ya-jcōducy.

Je huīdībī Dios yjāy'adyī

⁹ Miīch ajcxy huīdībī yajmīj'ajtp Jesucristo, ca' miīch ajcxy mjadu'nīty nej yī' ajcxy huīdībī ca'capxymīdoy Dios. Dios miīch ajcxy tī xy-huīn'ījxcīxy. Je rey Jesús je' miīch ajcxy ytung mduunīp. Oyjot oy-huīnma'ñ miīch ajcxy myajtumyīb. Dios miīch ajcxy xyjāy'ajtp. Miīch

ajcxy je' xypaat mndiy'ajt'adipy jadu'n nej Dios ti xyajpidzimgixy ma anajty mdundigooygixy, e ti xyajhuinjihuuygixy je' ytiy'ajt nej jeb huaad mguydungixy. Jadu'n nipaady nej jihuuy Dios ti xyajtzoongixy agootztuuyb, e ti xyajtiguygixy ma yticxy yjajy. ¹⁰ Co anajty ca'ni mmijpidaaccixy Jesucristo, ca' anajty Dios xytungixy cuendi. Cham co ti mmijpidaaccixy Jesucristo, Dios ti xypa'ayoogixy. Dios miich ajcxy xyjajy'ajtp cham.

Yajtungix Dios y'ayuc ma mdzinaayin

¹¹ Migugtjic ajcxy huidibi ooy ndzocy njihuuyich, jada nyajnimaaaygixyp, jadu'n nej tug adzinaaybi huidibi ca' chinay ma ycajp, huidibi nihuidijtp, ca' tug it mdzinaaygixy, copicy co ca' mnijot'adipy ajcxy yi jibic-huinma'n, jadu'n nej je jay ajcxy ma m'adzinaaygixy nijot'ajtcixy jibic-huinma'n. Je jibic-huinma'n ca' naygodiguyigixy miid oyhuinma'n. ¹² Tiydudagy mdzinahuiipy ajcxy, yajtungix oyhuinma'n miid je jay ajcxy ma miich ajcxy m'adzinaaygixy, je jay ajcxy huidibi ca' nejhuuygixy Dios ytiy'ajt. Oy ajcxy ca' xy'ixaangixy etz jibic xyngapxcixy xynt'ojuygixy, miid co oyjajy'ajtin mdungixyp, chi ajcxy jaygidagipy, etz miich y' ajcxy xycapxpaticixipy ma Dios, mina anajty Dios ninmiñyii ajcxy.

¹³ Miid je Huindzin Jesucristo ycixpi, capxymidoogixy tug'ociy gobierno tungmiidpi etz cajp tungmiidpi y'ane'min ycotujcin, nañ capxymidoogixy jadu'n nej je mij'ane'mbi y'ane'my. ¹⁴ Nañ capxymidoogix tungmiidpi ajcxy huidibi je mij'ane'mbi yquejxyp jigix tzaachytunipy je' ajcxy huidibi tundigooyb etz capxpaadipy je' ajcxy huidi oyhuinma'n ytumyb. ¹⁵ Dios chojcyp co tiydudagy mdzinaaygixipy, jigix jebi je jay ajcxy huidibi ca' huinjihuuygixy Dios ytiy'ajt, huidibi tzuu huinma'n miid, ca' ajcxy mihuinma'nybaady nej jibic xyngapxip.

¹⁶ Tzinaaygix jadu'n nej jay chinay huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytiyity. Pen mmidundigooyb ajcxy tunmiidpi y'ane'min ycotujcin, ca' huaad mnaybidaacigixy jadu'n nej jihuuy Dios xylugarmooygixy jigix jebi mdundigooygixy. Copicy mdzinahuiipy ajcxy jadu'n nej Dios ytumbi huidibi oy tumb. ¹⁷ Migug'adii ajcxy tug'ociy jay. Naychocigix nayjihuyigix nidug nidug huidijaty yajmij'ajtp Dios. Yajmij'ajtcix Dios. Capxymidoogix yi mij'ane'mbi.

Jadu'n nej Cristo tzaachypiyajnajx

¹⁸ Tumbidijc ajcxy, imidoogix capxymidoogix mhuindzindijc. Pen oyjajy yi mhuindzin huidibi yung naxy yjot yhuinma'n miidity, o pen ahua'njay jibicjajy, ca' ynejity, capxymidoogix. ¹⁹ Yjagydagipy Dios pen mmecxtujtaaygixyp nej jay ajcxy xychaachtungixy miid co oyhuinma'n miich ajcxy mmidity. ²⁰ Pen ti anajty mdundigooygixy, e paady anajty myajtzaachtungixy, ca' pin xycomaaygixipy xycapxpadygixipy, oy ti mjamecxtujtaaygixy huidijaty tzaachypi. Pen ooy mdungixy etz tzaachypi mbaatcixy, chi janchtiy Dios jaygidagipy nej mmimecxtujtaaygixy. ²¹ Dios chojcyp co mmecxtujtaaygixipy je tzaachypi huidibi mmajajxyp myajnajxcixyp miid co oybi mdungixy. Paady ycixpi je Cristo tzaachypi ayo'n minajxy yajnajxy miid ich ajt ycixpi, e yejc ijxpejt jadu'n nej jebi huaad mmajajxcixy myajnajxcixy tzaachypi ayo'n, nañ nej jebi huaad mbanicxcixy mbayogixy yi y'ijxpejt. ²² Je Cristo ca' je' ma ytundigooy, e nañ ca' pin huin'ihñ. ²³⁻²⁴ Je Cristo co jay ajcxy y'oji, ca' je' y'adzouhuimbijty; e co jay ajcxy chaachytuuni, ca'

mijotmäthuimbijty je jäy ajcxy, nigi Dios yajpuhuaniiy. Com Dios je' paatip nej chaachytuna'n huidi ajcxy tundigooyb. Je Cristo ci'm yajnicx iich ajt ndzaachypi co y'o'cy cruudzcixy. E miid co jadu'n y'o'cy cruudzcixy miid ajt nbocy ycixpi, chi jëbi n'ixmajtzim jibic-huinma'n etz tudägy jëbi ndzinaayim. Miid co Cristo je tzaachypi minajxy yajnajxy miid iich ajt nbocy ycixpi, paady nidzoocim ajt n'alma. ²⁵ Miich ajcxy jecy'ajt mndigooyb mdüdigoooyb anajty ajcxy ma Dios, mgi'mhuinma'n anajty ajcxy myajtumyb nidüg nidüg, jadu'n nej jäy yborregi nndigoy ytüdigoy ma yuugjot. Cham miich ajcxy ti mnijothuimbijtcixy Dios, ti ajcxy mhuinma'nymech ti mmijpidaaccixy Jesucristo je huidibi xycuend'ajtp ajcxy.

3

Nej huaad chinaagyixy pinjaty ti pijccixy

¹⁻² Jadu'n nej tumbidijc capxymidooy yhuindzin, nañ tim jadu'n miich ajcxy töxyjäydijc capxymidoogixy mñäy. Pen mñäy ca' capxymidooy Dios, ca' mijpidäga'n Jesucristo, miid co miich oyjot oyhuinma'n myajtunipy miid yi', ycadimjetyity huin'it mñäy yhuinma'nymedzip etz mijpidägiy Jesucristo, co y'ixipy nej miich mmidity tudägy'ajtin. ³ Töxyjäydijc ajcxy, ca' mnaygömayiyyb miid mhuit mxojx oyjatpyi tzoujatpyi, miid oori cjiit etz oori taatztiy, miid co mgöhuay mdzachcüdigy miid cüd oyjatyp. ⁴ Hue' janchtiy jäy miich ajcxy xycömayip miid co oyjot oyhuinma'n anajty myajtungixy, miid co yung naxy mjot mhuinma'n ajcxy miidity. Co jadu'n mdungixipy jada je' oy jäygidaacni ma Dios huinixii. Yi mhuit yi mxojx etz oori taatztiy cixip tigoyip yi'. ⁵ Nañ tim jadu'n anajty jecy'ajty je töxyjäydijc huidibi anajty ajcxy cömay ijtp, yajtuuñ anajty ajcxy oyjot oyhuinma'n, ymijpidacyp anajty ajcxy Dios, nañ ycapxymidooyb anajty ajcxy ñäy. ⁶ Jadu'n nej Sara capxymidooy Abraham. Sara xigoyäxy Abraham: "Iich nhuindzin." Pen myajtumyb miich ajcxy oyjot oyhuinma'n jadu'n nej Sara, jadu'n miich ajcxy anajty nej jihuüy Sara ajcxy xy'ung'adyii, pen ooybi mdunipy ajcxy, ca' ti ajcxy mdzigihupy.

⁷ Nañ jadu'n miich ajcxy yëydijctijc, yajtungix pa'ayo'n miid mdöxyijc, yajmij'ajtcix. Com jac mic miich ajcxy ca'ydi yi töxyjäydijc. Dios may'ajt ti tuñ tú'ciy miid miich ajcxy, paady ycixpi copicy yajxon naymiddzináayigix jigix Dios cuendipigipy etz xymöhuipy tijaty ajcxy myajmibijctzooyb.

Co pinjaty xymidundigooy, ca' myaj'ahuimbidity

⁸ Jada ayuc cham njacyajnimaydaayb nidüg'óciy miich ajcxy. Tú'ciy mjot mhuinma'n mi'ijtcix, naymigüg'ajtigix yajxon, naychójcigix nayjihuiyigix nidüg nidüg, nayba'ayouhuigix nidüg nidüg, pidaaccix yung naxy mjot mhuinma'n. ⁹ Co ajcxy migüg xymidundigoyipy, ca' myaj'ahuimbidity jadu'n nej anajty ti xytuñ. Co ajcxy migüg xyñi'ojihupy, ca' myaj'ahuimbidity jadu'n nej anajty ti xyñi'ojy. Nigi nibijctzohui' ma Dios miid yi' ajcxy ycixpi, nigi mi'oyjäyat mmigüg. Huin'it nigi Dios xyconuucxip. ¹⁰ Com jiiby ymiñ jaybety ma Dios ñecy: Pinjaty jotcuje tzinahuamb e yajnaxa'n xi tiempo aguje jotcuje, nay'ahuiztigiib ca'ydi y'ndigooy ycapxtigooy, ca'ydi y'anidägy.

¹¹ Huen jihuägy ma je jibicpi e huen oyjä'ajtin tuñ. Huen ixmach tüg'óciy tzipcapxy, ca' tzipcapxy ixtähuipy.

12 Je Huindzin Dios ycuend'ajtpy yi' je jäy huidibi tiydudägy tziinaayb etz ypubejtcixyp ypudigiygixyp migügtijc co tijaty mibijctzoy. Dios ymijotma'tpy je jäy ajcxy huidibi jibic-huinma'n tumb.

13 Pen mdumyby oyjot oyhuinma'n ajcxy, huin'it ca' pin ajcxy xymijotmädiy. 14 Co oyjot oyhuinma'n myajtunipy ajcxy e huin'it jäy xychaachtungixy, huin'it Dios xyconuucxip ajcxy, e ca' mdzigiigyigixipy, ni ca' mhuinma'nydigooogixipy. 15 Mijpidaaccix yi' Jesucristo iich ajt nHuindzin Dios cixyjot huinjot. Pen ji jäy xy'amidoogixy: ¿Ti co mdzachmijpidaaccixy Jesucristo? Tiydudägy m'adzouhuipy m'id yung'ajt nax'ajt jadu'n nej mijp'ijxcixy co Jesucristo xyajnidzögaani ajcxy yi' m'alma. 16 Ca' mgapxipy ajcxy je ayuc huidibi xyajtzo'yduunip. Pen jäy ajcxy xymi'idigoogixp xymigapxtigoogixp, chi ajcxy jihuihuamyb tzo'ydu'n m'id co ca' yjanchity nej ajcxy ymina'n com oybi anajty ti mdungixy. 17 Pen Dios miich ajcxy jadu'n xyajnijot'ajt co tzaachypi mminajxcixipy myajnajxcixipy, jac'oy co tzaachypi mminajxcixipy myajnajxcixipy m'id yi' m'oyjäy'ajtin ycipi, e ca' anajty tzaachypi mminajxcixy myajnajxcixy m'id co anajty ti mdundigoogixy.

18 Je Cristo nañ jadu'n tzaachypi minajxy yajnajxy co y'o'cy cruudzcixy m'id jäy ajcxy ypocy ycipi. Oy je' anajty ca' tibocy m'idity, chi je' ti codinäy je jäy ajcxy ypocy, e jadu'n iich ajt ti naymi'oyiiyim m'idi Dios. Oy je Cristo ninicx y'o'cy, per je' y'alma ca' je' y'o'cy, jugypijcy je' jadügtecy m'id jemybi ninicx. 19 Huin'it co Cristo y'o'cy, chi je' y'alma ñicxy, e capxhuäcxy yi' y'ayuc ma jäy y'alma ajcxy huidibi jibictuuyb ijtp. 20 Je jäy ajcxy je' jiiy y'alma ijtp jibictuuby huidibi anajty ca' capxymidoy Dios. Je taab Noé yajcojy je mij barco, ooy Dios ajcxy jecy ymimectujci, huen tijy cayjothuimbijty ajcxy. Jeyi niductujc je jäy choocy ma je mijtuu je mijnigom. Je' co je jacjadyi ca' ajcxy yjothuimbijty. 21 Jadu'n nej je niductujcpi ajcxy mijpidacy Dios y'ayuc, e chi ajcxy choocy, nañ tim jadu'n iich ajt co nniibejtım je' iich ajt ndiy'ajt'ajtim co nmijpidaacim Jesucristo je huidibi co y'o'cy jugypijc m'id jemybi ninicx, etz ti xyajhuaatzim njot nhuinma'n jigix ooy oy nayjihuiiyim, etz nañ jadügtecy co anajty n'o'cim xyajjugypijcim m'id jemybi ninicx. Co nniibejtım, je' je' je tiy'ajt co Dios ti xyajhuaatzim njot nhuinma'n. 22 Je Cristo ti je' ñicxy tzajpjoty. Jiiby je' cham y'ity mij'ane'mbi ma Dios, yi' je' ane'mb je angeles ajcxy huidi tzajpjoty tungm'id etz huidijaty mic'ajt m'id tzajpjoty.

4

Yajtungix je mic'ajt huidibi Dios ti xymoogixy

1 Je Cristo ayo'n tzaachypi minajx yajnajx co yhuidijty ya naaxhuiñybi, e chi yajtuuñ oyjot oyhuinma'n m'id jäy ajcxy ycipi. Paady ycipi copicy miich ajcxy myajtunipy oyjot oyhuinma'n m'id migügtijc jadu'n nej Cristo yajtuuñ. Pen miich ajcxy mminajxyp myajnajxyp tzaachypi m'id co oyjot oyhuinma'n myajtuuñ, chi ca' mjacnijot'ajtip ajcxy jibic-huinma'n. 2 Jadu'n nej ajcxy mjactzinähua'n mjacjugy'ada'n, ca' huaad mjacnijot'ajtcixy je jibic-huinma'n. Hue' janchtiy mdunipy ajcxy jadu'n nej Dios tzocy. 3 Jecy'ajty co anajty ca'ni mnejhuiiygixy Jesucristo ytiy'ajt, jibic-huinma'n anajty ajcxy myajtumyby ma mdzinaayın mjogy'ajtin, jadu'n nej jäy ajcxy jacjadyi huidibi ca'ni nejhuiiygixy Dios ytiy'ajt. Chi anajty myajtungixy canaagnax je jibic-huinma'n, ooy ajcxy mni-jot'ajtcixy maynax jibic-huinma'n. Ooy anajty anaxy mdzach'üccixy

vino, huin'it anajty ooy ajcxy ymügyii. Ooy anajty mnixondaaccixy coodz huiidii, huin'it anajty ooy m'uuccixy anaxy. Ooy mnijot'ajtcixy xii, ooy anajty m'ojadajtcixy tzaadzech quipychech huiidibi Dios ca' jäygidägy. ⁴ Paady ycixpi je jäy ajcxy huiidibi ca' nejhuiiygixy Dios ytiy'ajt, ca' ajcxy jäygidägy co ca' miich ajcxy cham jadu'n m'idich jadu'n nej yi' ajcxy y'idich, chi ajcxy jibic xyñigapxcixy xyñi'ojiiygixy. ⁵ Ca' mdungixy cuendi yi' ajcxy, com Dios paatip nej ytiyduna'n ajcxy. Je Dios je' tiydunamb nidüg'óciy jäy ajcxy huiidibi cham jugy'ajtp, etz tiibi y'öccixy. ⁶ Paady ycixpi ti yajnimäy Jesucristo ytiy'ajt je jäy tiibi y'öccixy jigix yajtiydunipy ajcxy müid Dios ytiy'ajt jadu'n nej yajtiyduna'n yi' ajcxy huiidibi jacjugy'ajtp cham. Jëbi huaad ajcxy yjugypjccixy jadügtecy etz y'idipy ajcxy jadu'n nej Dios y'ity.

⁷ Ti ytimyhuingoni je xii je tiempo mina ycixaani ytigoyaani tüg'óciy tijaty ya naaxhuiñybi. Paady ycixp tzocy co tiydudägy etz huijy-cujc mdzinaygixipy, etz tzocy co mjac'ojadadipy mjacmibijctzoohuipy ajcxy Dios. ⁸ Ooy ycopicyity co jacnaychójicigix jacnayjihuiiyigix nidüg nidüg. Müid co mnaychójicigixy, paady ycixpi jëbi mnayméecxigixy. ⁹ Naym'oyjäy'ájtigix nidüg nidüg agujc jotcujc, ca' y'ametz yjotmetzity. ¹⁰ Yajtungix müid je migügtijc jadu'n nej Dios xymooygixy ixpijcin nidüg nidüg. Naybubéjtigix naybudigiiygix miñ xyipy jadu'n nej jäy ajcxy huiidibi yajxon Dios ytiy'ajt padungixp. ¹¹ Pen Dios ti xymooygixy ixpijcin jigix jëbi capxhuäcxy yi' y'ayuc, yajxon Dios y'ayuc mgapxhuäcxi. Pen miich xypaat pujiigi jëdzigi, yajxon mdunipy ajcxy jadu'n nej Dios huinma'n ti xymooygixy. Co yajxon Dios ytiy'ajt mgyduunipy, huin'it Dios cömaya'n miich ajcxy, müid co ti mmijpidaaccixy Jesucristo. Je Jesucristo je' cömay'idip etz ane'mip huinixii huini'tiempo.

Mimecxtujccixy tzaachypi ayo'n

¹² Migügtijc ajcxy huiidibi ooy ndzocy njihuñyich, ca' ooy mhuin-may'ahuidijtcixy co jäy xy'ixhuidijtcixy xypahuidijtcixy, co jäy xy-chaachytunaangixy jigix jëbi ñiguëxigipy pen janch mmibijccixy Jesucristo. ¹³ Ca' ajcxy mdajipy mmayipy, jotcujc ajcxy mnayjihuihuiyb jigix jëbi nañ jadu'n tzaachypi mminajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxigyii ya naaxhuiñ müid ymic'ajt y'oy'ajt, jëbi ajcxy jotcujc mnayjihuihuiib. ¹⁴ Pen xymi'iidigooyb xymigapxtigooyb jäy ajcxy, müid co miich ajcxy ti mmijpidaaccixy Jesucristo, jotcujc mnayjihuihuiipy, müid co miich ajcxy müid je Dios yjihui'ñ etz Dios ymic'ajt ma mjot mhuinma'n. ¹⁵ Pen nidüg miich ajcxy ayo'n tzaachypi mbaatcixy, oy ca' anajty ti mjäyja'öccixy, oy anajty ca' ti mmeetzcixy, oy anajty ca' ti mdundigooygixy, oy anajty ca' ti mnaybidáacigixy ma huingjäy ti ytundigooy, ¹⁶ pen miich ajcxy tzaachypi mminajxyp myajnajxp müid co ti mmijpidaaccixy Jesucristo, ca' ti tzo'ydu'n mjihuñuipy, ñigi Jesucristo cömay'idipy.

¹⁷ Ti xii tiempo tim paatni mina Dios tiyduna'n je jäy ajcxy huiidibi cuydumb je' ytiy'ajt. Pen Dios ñich ajt huiidi nmibijcim xytiyduunim e nbaatim hueeni tzaachypi, ñigi tzaachypi padaangixy ajcxy huiidibi ca' mijpidaaccixy Dios. ¹⁸ Pen je jäy huiidibi oyjot oyhuinma'n müid mic tzaach padaangixy je' y'alma nidzocin, ¿ti jada ytunaangixy pinjaty jibic-huinma'n müid, pinjaty pocytungix? ¹⁹ Pen tzaachypi mminajxyp myaj-najxyp ajcxy müid co Dios jadu'n chojcyp, ca' ajcxy mjotmetzcihuipy, ñigi

ajcxy panicxcix payöygix oyhuinma'ñ, ñigi cixyot huinijot mijpidägiipy ajcxy Dios; com yi' miich ajcxy xyajcoj, e yi' xycuend'ajtcixp; com Dios yi' je' tudägy etz ñidinaayb je' y'ayuc.

5

Pedro capxhuijp je mibijpidijc

¹ Jada iich miich ajcxy yajñimaayb huidibi nigohuajc'ajtp je mibijcpidijc, iich nañ jadu'n nigohuajc'ajtpyich mibijcpidijc. Iich n'ijxyich co je Cristo ayo'n tzaachypi minajxy yajñajxy. Nañ jadu'n iich yi' nmüd'daamybich jadüg'oc co anajty ymiñ ya naaxhuiñ müd y'oy'ajtin ymij'ajtin. ² Jada iich miich ajcxy nyajñimaayb: yaj'ixpijccix etz cuend'ajtcix Dios yjäy agujc jotcujc. Ca' myaj'ixpijccix ajcxy ametz jotmetz, cuend'ajtcix Dios yjäy, tim jadu'n nej jäy ycöbixy cuend'aty. Ca' meeñgixy myaj'ixpijccix ajcxy. Müd oyjot oyhuinma'ñ myaj'ixpijccixy. ³ Ca' adzip ahua'n m'ane'mipy Dios yjäy. Hue' janchtiy ijxpejt oybi yejccix. Cuydungix Dios ytiy'ajt. ⁴ Co anajty Jesucristo, je huidibi nihuindzin'ajttaayb tüg'óciy, ñayguëxigyii ya naaxhuiñ jadüg'oc, chi cömay miich ajcxy mbidzimipy. Tim jadu'n nej jäy ajcxy co y'iyiygixy e co ymadaaccixy, chi cömay ypidzim ajcxy. Miich ajcxy cömay nañ jadu'n m'idipy huinixii.

⁵ Myajmij'adipy anäctijc ajcxy, je' ajcxy huidibi nigohuajc'ajtp je mibijcpidijc. Ooy ycopicyty co nidüg'óciy miich ajcxy mnayyajmij'ajtigixipy miñ xyipy müd oyjot oyhuinma'ñ. "Dios ca' je' jäygidägy pinjaty amij agix jäy'ajtigixy. Dios ypubejtyp müd y'oyjot pinjaty yung naxy yjot yhuinma'ñ müd." ⁶ Mgapxcöbigipy ajcxy tydudägy Dios, je mij'ane'mbi, chi Dios xycömayipy mina anajty. ⁷ Mibijctzougix Dios müd tüg'óciy tijaty jotmay ajcxy müd'ajtyp, chi jëbi Dios xypubedipy xypudigihuiipy ajcxy.

⁸ Huijycujc m'idipy ajcxy. Nixi' m'idipy ajcxy. Com je mujcu' huidibi xymüdzip'ajtim, ooy je' xy'ix'ixxim xypa'ixxim. Hue' xya-jhuinma'nydigoyaanim, tim jadu'n nej je caa co ixtay ti chüdzaamyb. ⁹ Huindina' jijptina' ajcxy je mujcu'. Yi jacjadyii jäy huidibi mijpidaaccixy Jesucristo, nañ yminajxcixyp yajnajxcixyp tzaachypi nañ jadu'n. ¹⁰ Co anajty ajcxy hueeni tzaachypi ti m'ocyajnaxy, huin'it Dios xyaj'oyiyipy ajcxy yi mjot yi mhuinma'ñ, xyajmibigip ajcxy yi' ytiy'ajt, xyajtotmicpigip ajcxy. Com Dios yi' je' huidibi may'ajt ti tuñ mijcajee müd nidüg'óciy jäy ajcxy. Yi' je' huidibi ti yaj'oyiy nej jëbi cömay huinixii n'ijtim müd Jesucristo jii by tzajpjoty. ¹¹ Huen Dios y'oy'ajtin etz ymij'ajtin idipy huinixii.

Capxpooxin yajnajxp

¹² Jada necy nyajñiguejxy ajcxy müd Silvano iich ajt nmügüg huidibi ndijpyich co ooy yajmij'aty Jesucristo. Hueeni jada ayuc huidibi nyajñijayiyb, nañ ti nbidägyich necyjoty capxhuijin etz ti nbidägyich necyjoty yi Dios ytiy'ajt tudägy, nej Dios may'ajt oy'ajt tuuñ müd miich ajcxy ycixpi. Mijpidaaccix ñigi Dios ytiy'ajt, ca'ydi mhuinma'nydigooogyixy.

¹³ Je jäy huidibi ya Babilonia huidibi ajcxy yajmij'ajtcixp Jesucristo, je jäy ajcxy huidibi Dios ti huin'ixy, xyajñiguejxp ajcxy capxpooxin. Nañ jadu'n Marcos iich nmügüg, je huidibi njihuiybich nej jihuiy ngi'm'ung'adyiijich xyajñiguejxp capxpooxin nañ jadu'n.

14 Naygapxpóocxigix xĩc xon nidüg nidüg miñ xyipy. Je' je' je tiy'ajt co mnaychójcigixy mnayjihuíyigixy miñ xyipy.

Jotcuje mnayjihuíhuıyb ajcxy nidüg'ócıy huidib yajmij'ajtp Jesucristo. Amén.

2 PEDRO

Yi Mimetzpi Necy Huidibi San Pedro Yajnigujx Yi Mibijcpidijc

¹ Hich Simón Pedro, tumbich ma Jesucristo ytung. Yi' xy'apóstol'ajtpich etz ngapxhuäcxpyich yi' y'ayuc. Cham hich miich ajcxy jada necy nyajnyajayhygixy huidibi ajcxy ti mbaatcixy mibijcin janch oybi, tim jadu'n nej hich ajcxy ti nbaatcixyich mibijcin janch oybi. Hich ajt nDios je Jesucristo huidibi xyajnidzoocim ajt n'alma tudägy je', e tudägy ytuñ miid hich ajt nidüg'óciy. ² Huen Dios mijmay'ajt tunipy miid miich ajcxy, etz jotcujc'ajtin xymöhuipy mijcajee, miid co tiy'ajt ti mbaatcixy ma Dios etz ma je Jesús hich ajt nHuindzin.

Je mibijcpidijc chinaayin jugy'ajtin

³ Dios miid je' ymij'ajt ti xymooyim tüg'óciy huidibi nyajmayajtim ma ajt njugy'ajtin, nej huaad nguyduunim yi' ytiy'ajt etz nej yi' huaad nyajmij'ajtim. Dios jadu'n mijmay'ajt tuun miid hich ajt ycixpi co ti xyajnejhuuyim Jesucristo y'ayuc ytiy'ajt. Je Jesucristo ti xyhuin'ijxim jigix jébi nmiid'ajtim yi' ymij'ajtin y'oy'ajtin, etz jigix jébi nduunim oyjäy'ajtin nej Jesucristo tuuñ. ⁴ Dios ti xymooyim huidibi janch oydi'cni e janch copicyip jigix jébi miich ajcxy mbaatcixy Dios yjihui'ñ ymic'ajt huidibi xyajtzinaaygixy miid huädz jot huinma'ñ, etz jigix jébi miid jada ycixpi tibi xyaj'ahuanuyim, miich ajcxy mijjpyöyduutcixy je jibicpi huidibi naax-huiñjyäy ajcxy ñijot'ajtcixyp. ⁵⁻⁷ Com Dios miid ymic'ajt ti xymooyim huidibi nyajmayajtim, paady ycixp miich ajcxy naymic'ijxigixy co ajcxy mmibijcin mjacyajmijtigihyigixipy tudägy'ajtin; e miid mdudägy'ajtin mjacyajmijtigihyigixipy ajcxy Dios y'ixpijcin; e miid je Dios y'ixpijcin mjacyajmijtigihyigixipy yi' Dios yjihui'ñ ymic'ajt ma ajcxy mjot mhuinma'ñ huidibi miid mmimadägyipy ajcxy yi' jibicjot jibic-huinma'ñ; e miid je mic'ajt ma ajcxy mjot mhuinma'ñ jacyajmijtigihyipy ajcxy mecxtujcin; e miid je mecxtujcin mnejhuuyigixipy nej jéb huaad myajmij'ajtcixy etz mdzigihyigixy Dios; e miid je mecxtujcin mjacyajmijtigihyigixipy je tzojcin je jihuyim miid migügtijc; e nañ mijtigihyipy nañ jadu'n je mibijcin nej jéb huaad Dios myajmij'ajtcixy etz nej jéb huaad cixyot huinjot mjacyajtungixy oyjäy'ajtin.

⁸ Pen ma miich ajcxy mdzinaayin mjugy'ajtin yajpattäy e ymijiy ymayiy, yi' mjugy'ajt ajcxy ca' yi' ñaadigi'aty; nañ ca' anajty ajcxy naadigi' ti mmibijccixy hich ajt nHuindzin Jesucristo, ti mnejhuuyigixy yi' y'ayuc ytiy'ajt. ⁹ Pin jada ca' capxymidooy tüg'óciy jadyaabi capxhuijin ma yjugy'ajtin, jadu'n yi' nipaady nej tüg huintzpi o huidibi y'ijxin con, ti jäydigoy co Jesucristo ti yajpocyñhuaatzp. ¹⁰ Paady ycixp miich ajcxy migügtijc, naymic'ijxigixy tungix tüg'óciy jada jigix mnejhuihyipy ajcxy tiydudägy co Dios ti xyajmibijccixy e ti xyhuin'ijxcixy. Pidaaccix mhuinma'ñ co jada tiy'ajt huen copicy, huen tictztigiy ma miich ajcxy mjugy'ajtin. E pen mdumyb ajcxy jadu'n, nimina mgapocycägixipy. ¹¹ E jadu'n miich ajcxy myajmöhuyipy tiydudägy tigiydac mijpi ma hich ajt nHuindzin Jesucristo y'ane'my, je huidibi xyajnidzoocim ajt n'alma. E yi' y'ane'min ca' ycixipy ytiyoyipy nimina.

¹² Paady ycixp ñich miich ajcxy jatyimy yajjäymejtzcoodaangixy jada tiy'ajt. Oy miich ajcxy jada tiy'ajt mjajajtcixy mjanejhuñygyxy, e tudägy ajcxy mmibijccixy etz mmi'ijtcixy je tiy'ajt huidibi miich ajcxy cham müd. ¹³ Minaambich co yjanchity nami njactzinaayñich co ñich miich ajcxy nmöhuipy capxhuijin. ¹⁴ ñich ajt nHuindzin Jesucristo ti xyajnejhuñyich co tzojc n'ixmadzipyich jada njugy'ajtin (n'ögibich). ¹⁵ Paady ycixp naymic'ixyijich mictägy ma miich ajcxy co ngapxhuijicixy jigix co anajty n'ögyich mjäymetzñyb ajcxy tüg'öciy jada tiy'ajt.

Yi' ajcxy huidibi y'ijxy je Cristo ymij'ajtin y'oy'ajtin

¹⁶ ñich miich ajcxy ti nyaj'ixpicy je tiy'ajt maabi nHuindzin Jesucristo, jadu'n nej Dios ymij'ajt müdity, e jadu'n nej je' yhuimbida'ñ jadüg'oc ya naaxhuiñ. E ca' ñich ajcxy nyaj'ixpicy nigoo'ayuc anñ'ayuc huidibi ci'm ti ngojyich ti nmacxyich. Müd ñich ngi'mhuiin ti n'ijxcixyich je Huindzin Jesús ymij'ajtin. ¹⁷ N'ijx ñich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: "Jada je' ñich n'ung huidibi ooy ndzocyich njihuñyich, e ooy jotcuyc nayjihuñyijich müd yi' ycixpi." ¹⁸ ñich ajcxy nañ jadu'n ci'm ti nmidöogixyich je ayuc huidibi anajty tzomb tzajpjoty. Jim ñich ajcxy anajty quipxy müd je Huindzin Jesús ma je amay gop.

¹⁹ Nañ jadu'n müd'ajtim je ayuc jac'oybi jactñybi. Je' je' je tiy'ajt je ayuc huidibi ajcxy yjay je Dios y'ayucnajtzcaxñybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huidibi jadu'n nipaady nej tüg jin ñicxp agootztuum etz jadu'n nipaady nej je xii co yximiydäy, etz jadu'n nipaady nej je mijmadza' jayhuixtujcpi co ypidzimy. Jada tiy'ajt xycodñcxip ajcxy mjot mhuinma'ñ. ²⁰ Cuendtungix miich ajcxy jada: tüg'öciy je tiy'ajt, huidibi Dios ytiy'ajtmüdpjeyc huidibi ijtp jaybety ma Dios ylibro, ca' huaad pin yajnñgejip müd yci'mhuinma'ñ. ²¹ Com je Dios y'ayucnajtzcaxñybi camina je' ajcxy ayuccapxhuäcxy müd yci'mdzojcin yci'mhuinma'ñ. Dios anajty ajcxy huiñ'ixyip jëbi ayucapxhuäcxy müd Dios ycixpi com je Espíritu Santo anajty ajcxy mooyip ayuc huidibi ajcxy ycapxhuäcxp.

2

Yi' ajcxy huidibi yaj'ixpijcp anñ

¹ Per nañ ji anajty nañ jadu'n ayucnajtzcaxñybi huidibi anajty ajcxy anñdaacp ma je Israel jäy. E nañ jadu'n yji'adipy ayuccapxhuäcxpi huidibi anñ yaj'ixpigipy ma miich ajcxy. Je' ajcxy ayüch ameech yaj'ixpigipy yci'm'ayuc yci'mhuinma'ñ huidibi ajcxy yajhuinma'ñyidigooyipy je mibijcpidijc. Ymina'ñ ajcxy co ca' yjanchity je Huindzin Jesús y'ayuc, je huidibi yajnidozoc ajt n'alma, e jadu'n ci'm ñay'ayo'nmdöoyigixy müd Dios mic'amy. ² Mayjäy ooy panicxa'ñ je jibicpi huidibi ajcxy ytungixyp, e müd je' ajcxy ycixpi yajnigápxipy yajnimiydägipy ajcxy jibic je huidibi ajcxy cuydumb je ñybi ayuc, je Jesucristo y'ayuc oybi. ³ Müd co anajty tzach'adzojccixy meñ, chi anajty xyhuimbijccixy xyhuimmeetzixy müd ajcxy y'ixpijcin ca'p yjanchity. Per je pocycähuin ajcxy ahuijxip, ca' ma ñidzooy. Ti yjejcni maabi ajcxy ypocycan'i ma Dios. Dios tzaachytunñb ajcxy müd ypocy ycixpi.

4 Dios ca' je' huinmecxxy je ángeles ajcxy huidibi tundigooygixp. Hue' janchtiy ycötijnaxtaayb ayoodactuuyb etz yajhui'my agootztuuyb, cadeniñy y'ijtcixy cuend'aty, ixti cooni anajty paady xii tiempo co anajty yajtiydunañ naaxhuiñyñy müid ypocy ycixpi. 5 Nañ ni ca' Dios huinmecxxy je naaxhuiñyñy müidibibi tundigooy jecy'ajty. Chi quejxy ayo'nduu etz mññügom ma je jibicjäydijc. Jëyi yajtzoocy je Noé huidibibi capxhuäcx je tiy'ajt. Quipxy müid Noé yajtzoocy jahuixtujc y'amigügtijc. 6 Dios nañ jadu'n tzaachytuñ müid ypocy ycixpi etz yajhuindigoy müid jñn metz cajp, Sodoma etz Gomorra, ixti cooni yajhui'my accuyjam jigix y'idipy je ijxpejt ma je jibicjäydijc huidibibi ajcxy jac'axam jactzinähuam jacjugy'adam. 7 Dios yajtzooc je Lot, hue' je' anajty janch oyjäy, e janch ymüid anajty jotmay co anajty je jibicjäydijc ajcxy ijxi chinaayin yjugy'ajtin janch jibic. 8 Jabom jabom anajty je Lot, je jäy oyjäybi huidibibi anajty tzinaayb quipxyi müid je jibicjäydijc, ni ca' anajty yjotcujc'aty co anajty ixxy midoy nej anajty ytundigooygixy je jäy ajcxy ca'pi ytudägyity. 9 Dios müid mic'ajt jëbi nihuañ yajtzögy pinjaty mibijccixp cixyot huinijot co je mujcu' yjot'ixxigixy huinma'ñ'ixxigixy. Nañ jadu'n Dios mic'ajt müidity jigix jëbi yaj'ijtcixy je jibicjäydijc müid tzaachypy ayo'n, huidibibi ymöhuamy co anajty naaxhuiñyñy tyduñ müid ypocy ycixpi.

10 Dios ymüid mic'ajt jëbi tzaachytunipy pinjaty tumb jibic-huinma'ñ nej ñinixc nijot'ajtcixy, e ca' ixaangixy je Huindzin Jesús y'oy'ajtin ymij'ajtin. Amij agix etz jotmic ajcxy nayjihuiyii. Ytumb ajcxy yci'mjot yci'mhuinma'ñ. Ni ycatzigiiygixy co oyñinej ajcxy ni'ojiiygixy pinjaty mic'ajt müid ma Dios ytung. 11 Oy je ángeles ajcxy müidity mijcötujcin etz ane'min, ca'p je' ajcxy yjot yhuinma'ñ müidity nicxy ni'ojiiygixy ma Dios yhuinduu pinjaty mic'ajt müid ma Dios ytung.

12 Per jadayaab jibicjäydijc ajcxy jadu'n ajcxy yi' nej iyujc, ca' yhuinma'ñ; nigooob ytimyhuidity etz yma'xun'ajtcixy jigix jäy ymadzñyib etz yaj'ögiiyb. Ñixiicpy yajxiicpy ajcxy yi' huidib ca' huinjihui'y. Per nañ tim jadu'n ajcxy y'ögipy nej iyujc y'ögy ytigoy. 13 Cobadihuaangixy jadu'n nej ti ytundigooygixy. Hue' nayjihuiiiygixy capin yjadu'nity, yxondaaccixy tüg jaxicyjaty. Jadayaab jäy ajcxy pocy ypa'tcipy ajcxy yi' chinaaygixy yjugy'ajtcixy. Tüg tzo'ydu'n co ajcxy nañ jadu'n xymijyöybejtcixy ma m'amugiiygixy.

14 Co ajcxy huindiixcixy töxyjäydijc, chi ajcxy ooy nijot'ajtcixy co müid tundigoya'ñ. Ca'p ajcxy chíjpigixy y'anucxiiygixy müid pocy-tunñ. Yajtundigooygixy pinjaty amútzp ma mibijcin, ooy ajcxy yhuijity ycuicity ycohuinma'ñity ma meeñ'adzoogii. Dios yajtigoyiib ajcxy y'alma. 15 Tigoyjäy yi' ajcxy, je' co ti ññidigajtcixy ti ytüdigajtcixy ma je tiybi je janchypy tiy'ajt. Je' ajcxy ypanicxy ypayöyp je profeta Balaam y'ijxpejt, je Beor y'ung, co ooy ymeeñybadañ anajty müid yjibic-huinma'ñ. 16 Chi Balaam oy yaj'ojyii ypocy tüg töxyburro, ycapxy jadu'n nej tüg jäy, e jadu'n je' yajhuäcxijpy je profeta Balaam müid je' ylochuinma'ñ.

17 Com jada jäy ajcxy ca' panicxcixy je janchypy tiy'ajt, paady ycixp jadu'n ajcxy nipaady nej tüg ñipozojut ca'pi ññ müidity, etz jadu'n ajcxy nipaady nej joc huidibibi poj yajyöyip (ca' ytu'y). Dios möhuñb ajcxy tzaachypy müid ypocy ycixpi, idam ajcxy agootztuuyb huinixii huini'tiempo. 18 Com ycapxyp ajcxy ayuc huidibibi ca' choubaad. E müid je jibic-huinma'ñ ycixpi huidibibi ajcxy chachnijot'ajtpy yajtundigooygixy pinjaty tiibi choongixy ma je huidibibi ajcxy tzinaayb müid jibic-huinma'ñ.

19 Yi' ajcxy yaj'ixpijcp je mayjäy co jëbi tungixy huentim ti huidibi ajcxy ñijot'ajtpy. Per yi' ajcxy huidib jibic-huinma'ñ yaj'ixpijcp, ci'm ajcxy ñay'ijtigixy pocypa'tcipy, je pocy tzach'ane'mb ajcxy yjot yhuinma'ñ, ixti jadu'n nipaady nej jihuïy ajcxy ane'my y'ity. ²⁰ Pinjaty ti ymibijccixy ti ñejhuïygixy je Huindzin Jesucristo ytiy'ajt huidibi yajnidzoocp ajcxy y'alma, e jadu'n ti yjihuäccixy ma je naaxhuiñyây yjibitczinaayin yjibicjogy'ajtin, pen jadüg'oc anajty y'ayöyiyñip ma je jibicpi, e je jibicpi ymimadägyii ajcxy, o'ctiy anajty ñigi yhuï'mgixy ca'ydi nej je jayijp'atypi. ²¹ Ñigi oy co ixypy je' ajcxy ca' ytimnejhuïygixy je janchypí tiy'ajt. Com ti ocnejhuïygixyp, e chi jada' y'ixtigihuäccixy ma je huätzpi Dios ycötujcin huätzpi Dios ytiy'ajt tiibi anajty y'ocjamóoyigixy. ²² Per je' yi' ajcxy ytimcuydumy nej je ayuc y'ity: “Je uc yci'm'ich ñihuimbijtpy, e je idzim huidibi namdziidaayb, nicxy je' yajtznip yquitnïp mo'ntzjoty jadüg'oc.”

3

Je Huindzin Jesús huimbidaamb ya naaxhuiñ

¹ Miich ajcxy migügtijc huidibi ñich ooy ndzocyich ooy njihuïyich, jada je' je mimetzpi necy huidibi ajcxy nyajnijayiyb. Ma jada metzpi necy hue' ñich ndzoga'ñich co nyajhuinma'ñymedzip ajcxy ma Dios ytiy'ajt mïd jada capxhuijin huidibi ti njaayich. ² Ti nnijayiygixy jigix m'ajihuïhuïyb ajcxy je ayuc huidibi ajcxy pa'tcipy'aty ñajtzcapxiy je Dios y'ayucnajtzcapxiybi ajcxy huidibi huädz yhuinma'ñ anajty ymïd. Nañ ajihuïygixy je Huindzin Jesucristo je' y'ane'min huidibi yajnidzoocp ajt n'alma, je ane'min huidibi apóstoltijc miich ajcxy xyajnimaaayb.

³ Nejhuïygixy miich ajcxy jada jayijp ma yam ca'ni yhuaad'ajtni mina naaxhuiñ ycixipy, miinip jäy ajcxy huidibi nixigip yajxigip huidibi Dios yje'ajtpy. Chinaaygixy yjugy'ajtcixy anajty mïd jibic-huinma'ñ huidibi ci'm ñijot'ajtcixyp. ⁴ Chi ajcxy ymina'nip: “¿Ti co mdzachmibijccixy co Cristo yhuimbida'ñ jadüg'oc ya naaxhuiñ? Nej ajcxy je' y'o'ctay je mij'ap je mijteedy, je'ni y'ijttây tüg'óciy jadu'n nej naaxhuiñybi chondacy. Paady ca' yjanchity co je Cristo yhuimbida'ñ jadüg'oc ya naaxhuiñ,” jadu'n yminaangixy. ⁵ Yi' ajcxy ca' huinjihuïhuaangixy cuendtunaangixy co mïd Dios y'ayuc yi' tzajp ji'ajtp anajty yi' tzachjegyip, e mïd Dios y'ane'min huin'it je naax oy yguëxigy huidibi ijtp anajty ñijoty. ⁶ Nañ jadu'n mïd Dios y'ayuc je jecy'ajtpy naaxhuiñyây y'ayo'nbaty, ñijicxtay nidüg'óciy e ytigoyday ñijoty. ⁷ Per Dios mïd yi' y'ayuc yaj'ijtpy jada naaxhuiñybi etz tzajp huidibi cham ji'ajtp ixti coon yajtigoydähuïpy mïd jin. Je jin huin'it je' nöctähua'ñ co anajty yhuaad'ajtni ma Dios tiyduna'ñ je camadacpidijc je jibicjäydijc, etz yajtigoya'ñ ajcxy y'alma.

⁸ Jadügnax miich ajcxy migügtijc huidibi ooy ndzocy njihuïyich, ca' mjäydgooygixy co ma yi' Huindzin Dios, tüg xii jadu'n yi' nej tüg mil jimijt, e tüg mil jimijt jadu'n yi' nej tüg xii. ⁹ Ca' nmïnaanin co yi' Dios yajhuäcxibaamyñi yi' mina cuyduna'ñ huidibi yi' ti ahuanïy, jadu'n nej nijëjity jäy a'ixiygixy. Dios yajtumyb mecxtujcin mïd miich ajcxy, com hue' yi' tzocy co ni tüg jäy ayo'n paadipy. Yi' chojcpy co nidüg'óciy jäy huen jothuimbijtcixy etz ixmajtzcixy pocytunii.

¹⁰ Co anajty je Huindzin Jesús ymiiñ jadüg'oc ya naaxhuiñybi chaachytunipy je' tüg'óciy jibicjäydijc, hue' je' ytunïyb yjadïyb ma anajty ca' pin

jijp'ixy, jadu'n nej tüg meetzpi ymiñ coodz co meedza'ñ tijaty. Huin'it je tzajp yhuindigoydähuiipy müid tüg ne'min jidijtin oychigiyñip. E tüg'óciy huidibi müid ndzinaayim njugy'ajtim toydähuiip yi' müid jin, yi naax toydähuiip yi', etz tijaty yajpatp ya naaxhuiñ toydähuiip nañ jadu'n.

¹¹ Com tüg'óciy tijaty huidibi ji'ajtp yhuindigoydähua'ñ müid jin, paady ycixpi nigí copicy miich ajcxy co mdzinaaygixp tudägy e myajmij'ajtcixyp Dios. ¹² Ahuijxcix ajcxy je xii tzuu mina Dios anajty yajhuaad'aty co yajhuindigoya'ñ je naaxhuiñybi. Naymic'ijxigix co tzojc yminipy yi jadu'mbi xii tzuu. Co yhuaad'ajtnip huin'it xii, je tzajp yhuindigoydähuiip müid jin; je xii po', je pojx xemembi, je tuu enee jadu'ñyi yticxtähuiipy yjyidähuiipy jinjoty. ¹³ Per ich ajt n'ahuijxim je jemybi tzajp jemybi naax huidibi Dios ti xyaj'ahuaniiyim, tüg tzinaaydac janch'oybi ma ca' ti jibicpi.

¹⁴ Paady ycixp miich ajcxy migügtijc huidibi ich ooy ndzocyich njihuiyich, nami m'ahuijxyp miich ajcxy co Dios yajhuindigoyaanip jada naaxhuiñ, naymic'ijxigix ma tüg'óciy ajcxy yi mdzinaayin co mguydunipy ajcxy Dios ytiy'ajt jigix ajcxy Dios xypaadipy, ca' ajcxy ti tzip ti gapxy, ni ti jibicpi, e ni ti pocy, ac huadz jot huadz huinma'ñ anajty müid'ajtcixy. ¹⁵ Cuenditungix je mecxtujcin huidibi ich ajt nHuindzin Jesucristo yajtumyb müid ich ajt jigix jébi xyajnidzoocim ajt n'alma. Nañ jadu'n yi', ich ajt nmigüg Pablo huidibi ooy ndzojcim, ti miich ajcxy xyñijayiiygixy, jadu'n nej ixpijcin Dios ti ymöyii ma yi' y'ayuc. ¹⁶ Ma tüg'óciy Pablo ñecy tiibi xyajniguejxcixy, jada tiy'ajt ti xyajmüidmydaaccixy. Nijëjity Pablo ñecy ooy chachchiphuinjihuiyñity, e nijëjity jäy ajcxy tigach ajcxy huinjihuüy Pablo y'ayuc, ca' ajcxy huinjihuüy nej Pablo yjamina'na'ñ. Huingjaty ajcxy nigüej Pablo y'ayuc, e ci'm ñayyajhuinma'ñyidigöoyigixy.

¹⁷ Paady ycixp miich ajcxy migügtijc huidibi ooy ndzocy njihuiyich, miich mnejhuiydaaygix jada tiy'ajt. Nayguend'ájtigix ca'ydi jibicjäydijc müid y'ani xyajnidigajtzcixy xyajtüdigajtzcixy, e ca'ydi m'ixtigihuäccixy ma ajcxy mmibijcin jadu'n nej tiydudägy ti mmibijccixy. ¹⁸ Huen ich ajt nHuindzin Jesucristo huidibi yajnidzoocp ajt n'alma nigí may'ajt oy'ajt tunipy müid miich ajcxy, e nañ nigí yujcpedipy ajcxy yi m'ixpijcin ma yi' ytiy'ajt. Huen Jesucristo cömay y'idipy etz mi'idipy oy'ajtin mij'ajtin jadachambi xii tiempo etz jadu'n nej xii tiempo miimb cidacp. Jadu'n ngapxycixyich. Amén.

1 SAN JUAN

Yi Jayijpi Necy Huidibi San Juan Yajniguejxy Je Mibijcpidijc Nidüg'óciy

¹ Dios y'ayuc jiiyim anajty co naaxhuiñybi chondacy. E tiy'ajt nyej-cypich jadu'n nej nmidooyich ci'm yi' y'ayuc, jadu'n nej n'ixyich müid ngi'mhuinich, jadu'n nej nhuindicxyich yi' ci'm, e nañ jadu'n nej nnidoñich müid ngi'mgijich. Nyajnijayiybich miich ajcxy jada necy jadu'n nej je Cristo je Dios y'ung yjugy'ajtin yegañ huidibi ca' cixañ tigoyañ niminaabi. ² Ti ñayguëxigyii ya naaxhuiñ je Dios y'ung huidibi ymüid jugy'ajtin huidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyëccixyich co ti ñayguëxigyii ya naaxhuiñ, etz ti n'ixyich jigix jëbi nyajnimaaygixy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huidibi jilby ijtp ma Dios Teedy, nayguëxici je' ma ñch ajcxy. ³ Je huidibi ñch ajcxy n'ixxich nmidohuich, cham müich ajcxy nyajnimaaygixy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je' y'ung. ⁴ Paady ycixp jada tiy'ajt nyajnijäyiy ajcxy jigix ajcxy jotcuyc'ajtin mbattäaygixipy müid jada ayuc tiy'ajt.

Dios yi' je' je tiicxin jájin

⁵ Jadayaabi Dios y'ayuc ytiy'ajt Jesucristo ti xyajnimäyich e nañ cham ñch müich ajcxy nyajnimaaygixy. Dios huädz ytiy'ajt müidity, ca' ma Dios aniidägy. Jadu'n Dios nipaady nej tüg jin ytücxxy ma tüg it e ni ca' ni mina ypich. ⁶ Co nminaanim co Dios ajt müid n'ijtim tú'ciy, e ca' yjanchity, ca' anajty ajt Dios ytiy'ajt nyajtuunim, jadu'n nipaady nej jihuüy ndzinaayim agootztuum. Nigoo n'ñindaacim, ca' anajty ajt nguyduunim Dios ytiy'ajt. ⁷ Co nguyduunim Dios ytiy'ajt jadu'n nej yi' ytiy'ajt müidity, jadu'n nipaty nej jihuüy ndzinaayim ma jin ytücxxy. Huin'it jëbi ajt n'ijtim tú'ciy miñ xyipy, e Dios xyajpocynihuaatztaayim co Jesucristo y'o'cy etz ñi'py teemy gujy müid ñch ajt nbocy ycixpi.

⁸ Co ixypy nminaanim co ca' nbocytuunim, nigooob nayhuin'ñinim ci'm, e ca' jadu'n Dios ytiy'ajt yajpaady ma ñch ajt njot nhuinmañ. ⁹ Pen ngapxypidzimim ajt nbocy ma Dios, yi' ññinaayb yi' y'ayuc huidibi ti xyajnimaayim co ymecxamy ajt nbocy, e nañ tudägy ytuñ müid ñch ajt ycixpi. Dios xyhuinmeecxim ajt nbocy etz xyajhuaatzim njot nhuinmañ jëbi n'ixmajtzim jibic-huinmañ. ¹⁰ Co ajt nminaanim co ca' nbocytuunim, hue' anajty Dios nyajnajxim anii, e ca' anajty ti ngöbijcim cixyot huinijot yi' ytiy'ajt.

2

Cristo, ñch ajt nhuingapxpi ma Dios

¹ Müich ajcxy migügtijc huidibi ooy ndzocy njihuüyich jadu'n nej ixypy ngi'm'ungich ngi'm'anäcich, cham jada tiy'ajt nyajnijayiygixy, jigix ca' ajcxy mdundigöoygixipy. Pen ji nidügti müich ajcxy huidibi tundigöoyb, jada migüg huidibi tundigöoyb huen mibijctzoy Dios ma Jesucristo yxi müid ypocy ycixpi. Jesucristo yi'je' huingapxp ma Dios Teedy müid ajt nbocy ycixpi. Tudägy je', e jëbi xyhuingapxim ma Dios Teedy. ² Com

Jesucristo ti y'ögy müid ñich ajt nbocy ycixpi, paady ycixp jëbi capx'oyïy ma Dios müid ñich ajt ycixpi e xycapx'oyïiyim ñich ajt nbocy etz nañ capx'oyïyip tüg'öciy naaxhuiñy jäy ajcxy ypocy, yi jäy ajcxy pinjaty yi' y'ayuc ytiy'ajt mijpidaacip.

³ Co Jesucristo ytiy'ajt nguyduunim yajxon, huin'it nejhuïiyim tiydudägy jadu'n nej Dios may'ajt oy'ajt ti tuñ müid ñich ajt ycixpi. ⁴ Co ixypiy pinjaty ymina'ñ co ñejhuïiyi Jesucristo ytiy'ajt e ca' cuychinaayi yi' ytiy'ajt hue' yi' tzach anüdaacpi, e ca' müidity Dios ytiy'ajt. ⁵ Yi jäy ajcxy pinjaty cuychinaayb cuyjugy'ajtp yajxon Jesucristo y'ayuc ytiy'ajt, janch tiydudägy anajty yajmij'aty Dios. Co nguychinaayim nguyjugy'ajtim yajxon Jesucristo ytiy'ajt, huin'it jëbi nejhuïiyim co nyajmij'ajtim Dios. ⁶ Yi jäy ajcxy pinjaty minamb co ymüid Jesucristo y'ayuc ytiy'ajt ma je' y'ay yjot, copicy ajcxy chinäaygixyipy jugy'ajtcixyipy tim jadu'n nej Jesucristo chinay jugy'ajty.

Je jemybi ane'min

⁷ Miich ajcxy migügtijc huidibi ooy ndzocy njihuïiyich, ca' nmïnaanım jemybi tiy'ajt ajcxy nyajnimähuamy ma jada necy. Je' jada je tiy'ajt huidibi jecy'ajty ti mnejhuïiyigixy co oga'n ajcxy mmijpidacy Jesucristo. Jada tiy'ajt jecyip jada je' huidibi cham ajcxy mmidooyb jadüg'oc. ⁸ Nañ jemy jada tiy'ajt nañ jadu'n huidibi nyajnimäygyxyp ma jada necy. Jada je'je tiy'ajt huidibi Jesucristo ymüid ma yjot yhuinma'ñ etz nañ ñich ajt nmüid ma ajt njot nhuinma'ñ. Yi jecyip ayuc huidibi ca' ytiy'ajtiy, ti yi' ñaxy e cham Dios ytiy'ajt tiydudägy nyajtuunim, jadu'n nej jihuïy je coodzpı ti ñaxy e cham ti yxiimiy.

⁹ Yi jäy ajcxy huidibi minam co Dios y'ayuc ytiy'ajt ajcxy cuyduuni e ca' ixäänigixy ymigügtijc, ca' yi' ajcxy tiydudägy Dios y'ayuc yajtuuni, jadu'n yhuimbizimy jadu'n nej jihuïy agootzuuy ijtcixy. ¹⁰ Yi jäy ajcxy pinjaty tzojcp jihuïy ymigügtijc hue' yi' yajpaatcixy müid Dios ytiy'ajt ma ajcxy yjot yhuinma'ñ, jadu'n nipaady nej jihuïy y'ijtcixy ma xii ytiicxy, ca' ajcxy ñüdigoy ytüdigoy ma Dios ytiy'ajt. ¹¹ Yi jäy ajcxy pinjaty ca' ymigüg ixaangixy, ca' yi' ajcxy Dios ytiy'ajt ajcxy yajtuuni, jadu'n nipaady nej jihuïy agootzuuby y'ijtcixy, ca' ajcxy chinaaygixy nej Dios ytiy'ajt yja'ané'migixy, ca' ajcxy nejhuïiygixy huidibi tiy'ajt jëbi yajtungixy, com jibic-huinma'ñ chachtuumyb ajcxy huidibi ca' Dios tiy'ajt'adyii.

¹² Miich ajcxy migügtijc huidibi ooy ndzocy njihuïiyich ajcxy jadu'n nej ixypiy ngi'm'ung ngi'm'anächich, com Dios ti miich ajcxy mbocy xy-huinmecxtayı co Jesucristo y'o'cy müid ajcxy mbocy ycixpi, paady ycixp cham nnijayïygixy. ¹³ Cham nnijayïygixy miich ajcxy mij'anächtijc, com ti mmijpidaaccixy Jesucristo huidibi jii'ajt co naaxhuiñybi oga'n choondacy etz chambaad yjii'atyñi. Cham nnijayïygixy miich ajcxy anächtijc, com ti mmimadaaccixy je ca'oybi.

Cham nnijayïygixy miich ajcxy pi'ctijc mutztijc com ti mmijpidaaccixy Dios Teedy. ¹⁴ Cham nnijayïygixy miich ajcxy mij'anächtijc, com ti mmijpidaaccixy ajcxy Jesucristo huidibi jii'ajt co naaxhuiñybi oga'n chondacy etz yjii'atyñi chambaad. Cham nnijayïygixy miich ajcxy anächtijc, com mic mjot mhuinma'ñ müidity ajcxy etz Dios ytiy'ajt yajpatp ma ajcxy mjot mhuinma'ñ, paady ycixp ajcxy ti mmimadaaccixy yi' ca'oybi.

¹⁵ Migügtjic, ca' anaxy m'adzóccixip yi huidibi miid ndzinaayim ya naaxhuiñ. Yi jäy ajcxy huidibi adzojctaayb anaxy yi huidi miid ndzinaayim, ca' ajcxy Dios Teedy yajmij'ajtcixy. ¹⁶ Ca' anaxy m'adzojtähuiipy ajcxy tüg'óciy huidijaty ya naaxhuiñ yajpatp, jadu'n nej njot nhuinma'ñ tzojcm, jadu'n nej tijaty n'ixxim, jadu'n nej huidibi amij agix miid ndzachnayjihuiyim. Com yi jadu'mbi huinma'ñ ca' yajpaady ma Dios Teedy, hue' yi' yajpaady ya naaxhuiñ. ¹⁷ Huidijaty ya naaxhuiñ yajpatp cixipy tigoyipy yi', nañ jadu'n ytigoya'ñ huidijaty yi huinma'ñ y'adzojcpy. Yi jäy ajcxy pinjaty Dios ytiy'ajt yajtuunip jadu'n nej Dios tzocy, jugy'adipy ajcxy e co y'ó'ccixipy, ca' ajcxy y'alma ytigóoygixipy.

Je tiy'ajt etz je anii

¹⁸ Miich ajcxy migügtjic huidibi ooy ndzocy njhuiyich nej ixipy ngi'm'ung ngi'm'anäcich, tim cijxnip tiempo ya naaxhuiñ. Ti jada mnejhuüyigixy co miinaam jäy ajcxy huidibi naysajnaaxaanip nej Cristo' e ca' yjanchity. Miid co cham ji mayjäy ajcxy huidibi naysajnajxip jadu'n nej Cristo, paady nejhuiyim co tim cijxnip yi tiempo miid ich naaxhuiñyjäy ajt ycixpi. ¹⁹ Yi jäy ajcxy huidibi naysajnaaxaanip jadu'n ixipy nej Cristo, naybije-huäcxaanip yi' ajcxy miid ich ajt, ca' anajty ajcxy ytügüy yi' ajcxy yhuinma'ñ miid ich ajt nhuinma'ñ, tügmucy ixipy ajt xymiid'ijtim. Ji jadu'n ñiguëxigüy co ca' ytügüy yhuinma'ñ miid ich ajt nhuinma'ñ co ti ajcxy xypuhuäctuatim.

²⁰ Ti miich ajcxy xy'adigüy xyjottigüy Dios yjihui'ñ ymic'ajt, paady miich ajcxy mhuiñjihuiy tüg'óciy Dios y'ayuc ytiy'ajt. ²¹ Ca' nminaanim paady miich ajcxy nijayüygixy co ca' mhuiñjihuiyigixy Dios ytiy'ajt. Paady nnijayüygixy miich ajcxy jigix mnejhuüyigixyip Dios ytiy'ajt etz mnejhuüyigixyip co yi jäy ajcxy huidibi indaacp, ca' yi' ajcxy Dios ytiy'ajt mhidity.

²² Yi' je' indacp huidibi minamb co Jesús ca' yi' yjëjity je Cristo huidibi Dios yquejx. Yi indacpi je'midzip'ajtp Jesucristo etz ca' mibicy Dios Teedy etz nañ ca' mibijci Dios y'ung. ²³ Je jäy ajcxy huidibi indacp minam co Jesús ca' yjëjity je Cristo, e nañ ca' ajcxy miidity Dios Teedy ytiy'ajt. Yi jäy ajcxy huidibi minam co Jesús yjëjity je Cristo je Dios y'ung, nañ ymiid ajcxy Dios Teedy ytiy'ajt.

²⁴ Je ayuc tiy'ajt huidibi miich ajcxy mmidou co oga'n ajcxy mmijpidacy Jesucristo, jada ayuc tiy'ajt mguydüngixyipy e ca' mjäy digóoygixipy. Pen mmi'ijtcixp yi ayuc huidibi Dios yjäy oga'n ajcxy xyaj'ixpijc, huin'it jëbi miich ajcxy myajpatcixy ma Dios y'ung etz je' yajpaady ma Dios Teedy. ²⁵ Dios ti xyajhuinhuanüyim co xyajzinähuaanim ajt n'alma huinixii huinitio.

²⁶ Jada tiy'ajt ajcxy nyajnijayüyb jigix ca' mmijpidáaccixipy yi' ajcxy y'ayuc huidibi xyajhuinma'ñy digoyaam ajcxy. ²⁷ Yi Dios yjihui'ñ ymic'ajt huidibi ti xy'adigüyigixy ti xyjottigüyigixy ijttüib yi' ma miich ajcxy mjot mhuiñma'ñ. Paady ycixp ca' myajmayajtcixy pin xyaj'ixpigip ajcxy com je Espiritu Santo xyaj'ixpigip ajcxy. Je Espiritu Santo xyajni'ixiydaayb ajcxy tüg'óciy Dios ytiy'ajt, tiydudägy yi', ca' yi' y'anüjity. E jadu'n nej je' xyajni'ixiyigixy, jadu'n mguydünyipy ajcxy. Mi'ijtcix Dios yjihui'ñ ymic'ajt ma mjot mhuiñma'ñ ajcxy.

²⁸ Miich ajcxy migügtjic, mi'idipy ajcxy Jesucristo ytiy'ajt ma mjot mhuiñma'ñ jigix co ñaysajniuguëxigüyb Jesucristo ya naaxhuiñ jadüg'oc,

huin'it jotcujc ajt nnayjihuiyım etz ni ca' jibic nayjihuiyım co anajty xyñimiinim. ²⁹ Ti mnejhuiygıxy co yi Jesucristo tiydudägy ytuñ, e ti mnejhuiygıxy nañ jadu'n co tüg'óciy yi jäy huidibi tiydudägy tumb, yi' je' ajcxy Dios y'ung'ajtıp.

3

Dios #ch ajt xy'ung'ajtim

¹ Jihui'ñybijccix tüg'óciy je mijpi may'ajt Dios Teedy ti tuñ mıid #ch'ajt ycıxpı jigix jébi naydijım Dios y'ung. Yi naaxhuiñjäy ajcxy huidibi ca' mijpıdaaccıxy Jesucristo ca' ajcxy nejhuiygıxy huinjihuiygıxy Jesucristo ytiy'ajt, paady ycıxp ca' ajcxy nejhuiy huinjihuiy co Dios xy'ung'ajtim. ² Miich ajcxy migügtıjc huidibi ooy ndzocy njihuiyich, jadachambi Dios #ch ajt xy'ung'ajtim. Jadachambi ca'p y'ocniguëxıgyñi nej #ch ajt jüni n'idaanim. Co anajty Jesucristo ymiñ jadüg'oc ya naaxhuiñ, huin'it nguipxyjatıyım mıid je', com n'ixaanim ajt Jesucristo jadu'n nej je' yajpaady. ³ Tüg'óciy jäy ajcxy huidibi jıjp'ıjxp co Jesucristo ymiina'ñ jadüg'oc ya naaxhuiñ, copıcy yajhuädzıpy ajcxy yjot yhuinma'ñ. Huen mi'ıjtıxy ojot oyhuinma'ñ jadu'n nej Jesucristo mi'ity ojot oyhuinma'ñ.

⁴ Tüg'óciy jäy ajcxy huidibi pocytumb, hue' ajcxy ymidundıgooyb Dios ycötujcin. Co ajcxy ytundıgoy, ca' ajcxy ymadägy nej cuydunıpy Dios ycötujcin. ⁵ E mnejhuiyb miich ajcxy co yi Jesucristo ti ñayguëxıgyii ya naaxhuiñ jigix jébi xyajpocynıhuaatzım. Jesucristo ca' anajty ti pocy mıidity, ca' anajty ma ti ytundıgoy. ⁶ Tüg'óciy jäy ajcxy huidibi cuydundähuam Jesucristo ytiy'ajt, ca' huaad pocytuñ. Yi jäy ajcxy huidıjaty pocytundıib, ca'ni ıxy ajcxy yi Jesucristo, nañ ca'ni ajcxy huinjihuiyı yi' ytiy'ajt. ⁷ Miich ajcxy migügtıjc huidibi ooy ndzocy njihuiyich jadu'n nej ngı'm'ung ngı'm'anächıch, ıx ni pin xycahuin'ıngıx. Yi jäy ajcxy huidibi ojot oyhuinma'ñ yajtumb, tiydudägy yi' ajcxy chinäy yjugy'ajty, tim jadu'n nej Jesucristo tiydudägy chinay yjugy'ajty. ⁸ Yi jäy ajcxy huidibi tzachpocytundıibni, yi' ajcxy mujcu' yjäy'ajtıp. Com jadu'n nej chondacy je naaxhuiñybi oga'n yi mujcu' jeni anajty jadu'n chachpocytuñ. Paady ycıxp Dios quejxy y'ung ya naaxhuiñ co je mujcu' yhuinma'ñ yajcödıgoyaani.

⁹ Yi jäy huidibi Dios ajcxy ti ymöyii jemybi jot jemybi huinma'ñ, ca' ajcxy ypocytundııy com je'co tú'ciy ajcxy yjot yhuinma'ñ mıidity, jadu'n nej anajty Jesucristo yjot yhuinma'ñ mıidity, ca' huaad ajcxy ypocytundııy com Dios ti ymöyii ajcxy jemybi jot jemybi huinma'ñ. ¹⁰ Paady ycıxp yñıguëxıgy yi jäy ajcxy pinjaty Dios y'ung'ajtıp etz pinjaty mujcu' ung'ajtıp. Yi huidibi ajcxy ca' tiydudägy cuydungıxy Dios ytiy'ajt etz ca' ajcxy ıxa'ñ ymigügtıjc, etz ca' ajcxy tzocy jihuiy ymigügtıjc, hue' ca' ajcxy Dios ymöyii jemybi jot jemybi huinma'ñ, mujcu' ajcxy y'ung'ajtıp.

Naychojım nayjihuiyım miñ xyıpy

¹¹ Jada je' je ayuc tiy'ajt huidibi miich ajcxy ti mmıidoogıxy co oga'n ajcxy mmıjpidacy Jesucristo co copıcy naychojım nayjihuiyım nidüg nidüg. ¹² Ca' huaad jadu'n n'ıdıtızım nej Caın y'ıdıch co anajty mujcu' huinma'ñ mıidity, chí y'uch yaj'o'cy. ¿Nej co y'uch yaj'o'cy? Je' co anajty je' jibic-huinma'ñ yajtuñ, e je' y'uch oyhuinma'ñ anajty yajtumy b paady ycıxp je y'uch yaj'o'cy.

13 Miich ajcxy migügtijc, ca' ooy mdzachhuinmaay ajcxy co ca' yi naaxhuiñyäjy ajcxy xy'ixa'ñ, huidibi ajcxy ca' Dios y'ayuc mijpidaaci. 14 Com ñich ajt nnejhuüiyim co je nmigügtijc ajcxy ndzojcim njihuüiyim co n'o'cim, huin'it njugypigaanim e ndzinähaanim jiiby tzajpjoty huinixii huin'itempo. Yi jäy ajcxy pinjaty ca' ymigügtijc ixa'ñ ajcxy co ajcxy y'ögipy, huin'it ca' ajcxy chinähua'ñ jiiby tzajpjoty. 15 Huenpinjäyity huidibi ca' ymigüg ixa'ñ, nipatpy nej ytundigoy jadu'n nej jäyyaj'o'cpi ytundigoy e nañ jadu'n nejhuüiyim, co je' y'ögipy, ca' chinähua'ñ jiiby tzajpjoty. 16 Ya ixypy jëbi ñich ajt ijxpejt nbjicim nej huaad migügtijc ndzojcim njihuüiyim, jadu'n nej Jesucristo ijxpejt yejcy co ñayyojxi ñaydooci co y'o'cy müd ñich ajt nbocy ycixpi. Paady ycixp ñich ajt jëbi huaad ndzojcim njihuüiyim nmigügtijc, oy jada ndimco'ögüiyim. 17 Janch pinjaty yjamüd ymadaacin, e yja'ijxpy co ymigüg tigati yajmayjaty, e amij agix ñayjihüiyii, ca' pa'ayo'n müdity, ca' pubeda'ñ ymigüg, ca' je' anajty tzocy jihüiy ymigüg jadu'n nej Dios chogyii yjihüiyii. 18 Miich ajcxy migügtijc huidibi ooy ndzocy njihuüiyich jadu'n nej ixypy ngi'm'ungich, müd oyjäy'ajtin etz müd Dios ytiy'ajt tzoc yajxon naychojcim nayjihüiyim miñ xyipy. Ca' nminaanim nigoo ngapxim nmiydaacim ahuac aguuy.

Cixyjot huinjot naybidaacim ma Dios

19 Co nyajtuunim oyjäy'ajtin müd ñich ajt nmigügtijc, huin'it nejhuüiyim co Dios ytiy'ajt nguyduunim e jotcuyc nayjihüiyim co Dios n'ojadajtim. 20 Co jibic njot nhuinma'ñ ajt njihuüiyim, müd co ca' oyjäy'ajtin nduunim, jac nigü Dios jibic ñayjihüiyii com yi' jacmijhuinma'ñ müd, ca'ydi ñich ajt, e yi' nejhuüydaayb tüg'óciy tijaty ajt nduunim. 21 Miich ajcxy migügtijc huidibi ooy ndzocy njihuüiyich, co ca' ti jibicpi njihuüiyim ma ajt njot nhuinma'ñ müd co oybi nduunim, huin'it jotcuyc ajt n'ijtim müd Dios. 22 E huentimtiijity huidibi ñich ajt Dios nyajmibijctzoohuim, yi' xymooyim müd co yi' y'ayuc nguyduunim, e nduunim je huidibi yi' yjäygidacpy. 23 Dios jada ti xyajnajtz'ane'müiyim co tzoc mibijcim mijpidaacim yi' y'ung Jesús etz tzoc naychojcim nayjihüiyim miñ xyipy, jadu'n yi' ti xyajnajtz'ane'müiyim. 24 Yi jäy ajcxy pinjaty cuydumb Dios ytiy'ajt, yajpatp ajcxy ma Jesucristo e nañ Jesucristo yajpatp ma je'ajcxy. Nejhuüiyim co Jesucristo ytiy'ajt yajpaady ma ñich ajt müd co je Dios yjihüi'ñ ymic'ajt ti xy'adigüiyim xyjottigüiyim.

4

Dios yjihüi'ñ ymic'ajt etz je ca'oybi yjihüi'ñ

1 Miich ajcxy migügtijc huidibi ooy ndzocy njihuüiyich, ca' ajcxy mmibijctähuipy tüg'óciy jäy huidibi Dios y'ayuc capxhuäcxip. Mido'mbijccixy jayijp peni janch ajcxy müdity Dios yjihüi'ñ ymic'ajt. Com ji mayjäy ya naaxhuiñ huidibi minam co Dios y'ayuccapxhuäcxi yi' ajcxy e ca' yjanchity. 2 Jada je' je tiy'ajt ma huaad mjihüi'ñybijccixy pen janch müdity ajcxy Dios yjihüi'ñ ymic'ajt, yi' ajcxy huidibi Dios y'ayuccapxhuäcxip: tüg'óciy jäy huidibi capxhuäcxp co Jesucristo yma'xung'ajty ya naaxhuiñ müd ñinix, Dios yi' ytiy'ajt ymüd. 3 E tüg'óciy jäy ajcxy huidibi ca' ñigapxpety ajcxy co Jesucristo chinäy ya naaxhuiñ müd ñinix, ca' yi' Dios ytiy'ajt müdity. Ti miich ajcxy ayuc midoogixy oga'n co miinaam yi' naaxhuiñyäjy ajcxy müd je mujcu' yjihüi'ñ ymic'ajt, huidibi midzip'ajtp Jesucristo. E ti je'du'n ajcxy ymiingixy. Jada je'du'n

ajcxy huidibi ca' nġapxpejtcixy co Jesucristo yma'xung'ajty ya naaxhuiñ mġid ñinġcx.

⁴ Miġġtjġc huidibi Dios yjihui'ñ ymic'ajt ti xy'adigġyġixy ti xyjottigġyġixy, e ti miġch ajcxy nmġmadaaccixy yi huidibi ajcxy nġapxpejtp co Jesucristo ca' ma'xung'ajty ya naaxhuiñ mġid ñinġcx. Com Dios huidibi miġch ajcxy xy'ane'mb, jac miġ yi' ca'ydġ je mujcu', paady miġch ajcxy ti nmġmadaaccixy je mujcu'. ⁵ Je huġdi ajcxy jadu'n jamġnaamb co Dios y'ayuc capxhuăcxġ e ca' yjanġhty ya naaxhuiñ ajcxy tiy'ajt ti patcixy ma je mujcu', paady ycġxp yi naaxhuiñ yhuijy'ajtin ajcxy tzachcapxhuăcx, e yi naaxhuiñjăy tzachmiġpġdaaccixy etz amidoo'ġti ajcxy y'ayuc. ⁶ Hġh ajt tiy'ajt ti nbaatim ma Dios. Tġg'ôciy jăy ajcxy huidibi Dios ytiy'ajt huġnjihuġyġp, y'amġdoo'ġtġp ajcxy ġch ajt n'ayuc. Yi jăy ajcxy huidibi ca' Dios ytiy'ajt miġdġty, ca' ajcxy amidoo'ġtġcixy ġch ajt n'ayuc, paady ycġxp n'ġxcajpim je jăy ajcxy huidibi tudăġyġp, etz je jăy ajcxy huidibi nġgoob tzach'anġdaacp.

Dios ooy xychojġim xyjihuiġyim

⁷ Miġch ajcxy miġġtjġc huidibi ooy ndzocy njihuġyġch, tzoc oy yajxon naychojġim nayjihuiġyim miñ xyġpy. Dios ti yecy ymic'ajt ma ajt njot nhuġma'ñ jġgġx jġbi ajt naychojġim nayjihuiġyim miñ xyġpy. Tġg'ôciy jăy huidibi ymiġġtjġc chojġcixyp yjihuiġyġixyp, ti Dios yjihui'ñ y'adigġyġixy yjottigġyġixy etz ñejhuġyġp yhuġnjihuġyġp ajcxy Dios y'ayuc ytiy'ajt. ⁸ Pinjaty ca' ymiġġg tzocy jihuġy, ca' yi' nejhuġyġ huġnjihuġyġ Dios ytiy'ajt, com Dios tġg'ôciy yi' tzojġtăy. ⁹ Jada je'je tiy'ajt co Dios ajt xychojġtaayim co je y'ung huidibi tġgpajcpi ymiġd, quejxy ya naaxhuiñ jġgġx ġch ajt nbaatim Dios yjihui'ñ ymic'ajt mġid yi' ycġxpi. E Dios yjihui'ñ ymic'ajt ca' ycġxa'ñ ytġgoya'ñ nimġna, paady ġch ajt njugy'ajtin ca' ycġxa'ñ ytġgoya'ñ. ¹⁰ Dios ti xychojġim ti xyjihuiġyim, paady quejxy y'ung ya naaxhuiñ jġgġx jġbi xycodinaayim ma yi' Dios ycôtuġctac mġid ġch ajt nbocy ycġxpi. Ca' nmġnaanim mġid co Dios ti ndzachmiġpġdaacim ooy miġcajee, hue' janġhty yi' ninġgoob may'ajt tuñ mġid ġch ajt ycġxpi.

¹¹ Miġch ajcxy miġġtjġc huidibi ooy ndzocy njihuġyġch, mġid co Dios jadu'n ajt ti xychojġim ti xyjihuiġyim miġcajee oġa'n, paady ycġxp tzoc ġch ajt naychojġim nayjihuiġyim miñ xyġpy. ¹² Ni mġnaabi pin ca' ixyñi Dios. Co naychojġim nayjihuiġyim miñ xyġpy, huġn'it Dios yjihui'ñ ymic'ajt ġttġy ma ġch ajt njot nhuġma'ñ. Jadu'n Dios yjihui'ñ ymic'ajt xypubeġtim xypudigġyim, jġbi nġġi naychojġim nayjihuiġyim nidġg nidġg jadu'n nej Dios jăyġidăġy. ¹³ Nejhuġyim ġch ajt co nyajpatim ma Dios, e nañ jadu'n Dios yajpaady ma ġch ajt, mġid co yi' yjihui'ñ ymic'ajt ti xy'adigġyim ti xyjottigġyim. ¹⁴ E ġch ajcxy, ti ġch ajcxy yi' Jesucristo n'ġxyġch, paady ġch ajcxy nidy'ajt'ajtyġch co je Dios Teedy quejxy y'ung ya naaxhuiñ co yajnġdôġa'ñ tġg'ôciy naaxhuiñjăy co anajty Dios nbocy ajt xyaj-comġdoohuaanim. ¹⁵ Tġg'ôciy jăy huġdibi nġapxp co Jesús je' yi' Dios y'ung, Dios yajpatp ma yi' e nañ yi' yajpatp ma Dios.

¹⁶ Hġh ajt nnejhuġyim etz nmġpġdaacim jadu'n nej Dios ajt xychojġim xyjihuiġyim nidġg'ôciy. Dios chojġtaayb yi' nidġg'ôciy yi' jăy. Pinjaty tzojġcġxp jihuiġyġp ymiġġtjġc, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷ Mġid co yajxon nmġpġdaacim Dios paady jotcujc nmġnaanim ma Dios ycôtuġctac, mġna anajty xyajcomġdohuġim ajt nbocy. Com tġ'ciy ġch ajt nyajpaatim ya naaxhuiñ, tim jadu'n nej yi' Jesucristo.

¹⁸ Co nmijpidaacim Dios, huin'it ca' ajt nmidzigiiyim nmidzo'yduunim. Peni yajxon nmijpidaacim Dios, huin'it jëbi tzig'iñ nyajqueecim. Yi jây ajcxy huidibi tzigiiyb etz tzo'ydum, ca' ajcxy Dios mijpidägy yajxon.

¹⁹ Com Dios jayijp ti xychojcm ti xyjihuiiyim, paady ycixp tzoc ajt naychojcm nayjihuiiyim nidüg nidüg etz nañ nmijpidaacim Dios. ²⁰ Yi jây ajcxy pinjaty jadu'n minamb co mijpidaaccixy Dios, e ca' ymigüg tzogaangixy ixaangixy, hue' je' ajcxy anüdaacp. Com peni ca' jajtciy nej tzóccixipy jihuihuüiyigixipy yi ymigügtjic huidibi ajcxy ix'y'ajtpy, ca' ajcxy jadip nej mijpidáaccixipy Dios huidibi ca' ix'y'ajtigixy. ²¹ E Dios hich ajt xyñajtz'ane'miiyim co pin Dios mibijcp mijpidacp, huen nañ jadu'n ymigügtjic tzocy jihuiy.

5

Yi pin huidibi ca' ixañ midohuañ Cristo y'ayuc

¹ Tüg'óciy jây huidibi mibijccixp co Jesús je' je' je Cristo huidibi Dios yquejx ya naaxhuiñ, Dios ajcxy y'ung'ajtip. Tüg'óciy jây huidibi mibijccixp mijpidaaccixp Dios Teedy, nañ jadu'n huen tzojccixy yjihuiiyigixy je' ajcxy huidibi Dios y'ung'ajtip. ² Co ndzojcm njihuiiyim huidibi Dios y'ung'ajtip, je' jada je' je ijxpejt co nañ jadu'n jëbi nmijpidaacim Dios etz jëbi nguyduunim nej xyñajtz'ane'miiyim. ³ Co nmijpidaacim Dios, huin'it nguyduunim jadu'n nej Dios xyñajtz'ane'miiyim e yi' y'ayuc ca' ooy chipity co nguyduunim. ⁴ Com tüg'óciy yi jây ajcxy huidibi Dios ti y'adigiyii ti yjottigiyii yjihuiñ ymic'ajt, ymihuindinaayb ajcxy yi jibic-huinmañ ya naaxhuiñ. Co nmibijcm Dios, huin'it jëbi nmihuindinaayim yi jibic-huinmañ ya naaxhuiñ. ⁵ Yi jây ajcxy pinjaty mibijcp co Jesús Dios je' y'ung, yi' ajcxy mihuindinaayb yi jibic huinmañ ya naaxhuiñ.

Je ayuc huidibi nidiy'ajt yi Dios y'ung

⁶ Yi Jesucristo je' je' huidibi miin ya naaxhuiñ, je' je' huidibi nübejt etz ñi'py teemy gujy co y'o'cy müd jây ajcxy ypocy ycixpi. Ca' nmänaanim jëyi anajty ti nübety, hue' nañ jadu'n ti y'ögy müd ajt nbocy ycixpi. ⁷ E yi Espiritu Santo yi' tiy'ajt yejcp co Dios Jesús y'ung'adyii, com je Espiritu Santo yi' Dios ytiy'ajt ymiid. ⁸ Ji tugügnax huidibi tiy'ajt yejcp co Dios Jesús y'ung'adyii: je Espiritu Santo, je nübejtin, etz Jesús ñi'py co teemy cujy müd hich ajt nbocy ycixpi. E jadu'n nidugüg ñaybáatigixy tügñax, e tügñax ytiy'ajt yejccixy. ⁹ Mijpidaacim hich ajt jây y'ayuc co Dios Jesús y'ung'adyii, nigí copicy co nmijpidaacim Dios ytiy'ajt huidibi ti yecy müd y'ung ycixpi, com jac mic'ajt müd yi' ca'ydí jây ajcxy. ¹⁰ Yi jây huidibi mijpidaaccixp Dios y'ung, ymi'ijtpy ajcxy je tiy'ajt ma yjot yhuinmañ. Yi jây ajcxy huidibi ca' mibijccixy mijpidaaccixy je Dios y'ayuc ytiy'ajt, hue' ajcxy yajnajxcixy Dios nej anüdügyin co ca' mibijccixy yi Dios ytiy'ajt co y'ung nigapxy. ¹¹ Jada je' tiy'ajt co Dios ti xymooyim ajt n'alma yjugy'ajtin huidibi ca' ycixipy ytigoyipy nimina. Dios y'ung ca' y'alma ycixipy ytigoyipy nimina, paady yi' ti yaj'oyiy nej jëbi ajt n'alma y'ijtim huinixi huinitempo. ¹² Pinjaty ti mijpidaaccixy Dios y'ung, yi' ajcxy y'alma ca' ycixipy ytigoyipy nimina. Pinjaty ca' mijpidägy Dios y'ung, yi' ajcxy y'alma cixipy tigoyipy co y'ögipy.

Capxycijxin etz capxhuijin

¹³ Jadayaabi ayuc ajcxy nyajnijaynygixp ma jada necy jigix jëbi mijpidaaccixipy Dios y'ung, etz jëbi mnejhuinygixy tiydudägy co mjugyijccixipy jadügtecy co anajty ti m'oc'cixy e ca' ajcxy m'alma ycixipy ytigoyipy.

¹⁴ Jada jotcujc'ajtin ich ajt nmüd'ajtim co nmibijctzoohuim Dios jadu'n nej Jesucristo xyñajtz'ane'miyyim, yi' ich ajt jëbi xymidouhuim. ¹⁵ Müd co nnejhuinyim co yi' ajt xymidouhuim ma tijaty Dios nyajmibijctzouhuim, paady ycixp nejhuinyim co nmüd'ajtim tijaty anajty ti nyajmibijctzou.

¹⁶ Co pinjaty icy co ymigüg ypocytuñ huidibi huaad jëbi Dios meecxy, huen mibijctzooyi Dios müd yi' ycixpi, e Dios yajtzinähuiyb pen ca' anajty ooy ymijpocyty je tübi anajty tuñ. Com ji tüg mijpocy huidibi Dios ca' huinmecxy. Pen ti mijpocytuñ ca' huaad Dios ocjacmibijctzooni com ca' yi' y'oc-huinmexaani. ¹⁷ Tüg'óciy jibic-huinma'ñ huidibi jäy ytumyb, pocy yi', per ji jibic-huinma'ñ huidibi jäy ytumyb, huidi jëbi Dios huinmecxy e ca' y'alma ytigoyip.

¹⁸ Nejhuinyim co tüg'óciy pinjaty Dios ti ymöyii jemybi jot huinma'ñ, ca' yi' y'ocpocytuni. Yi Dios y'ung, huidibi ti ymóoyigixy jemybi jot huinma'ñ, cuend'ajtip yi' ajcxy, ca'ydi je mujcu' xyajhuinma'ñydidigóoyigixy.

¹⁹ Nejhuinyim ich ajt co Dios jadu'n xy'ane'mim njot nhuinma'ñ etz nejhuinyim co tüg'óciy jacjadyii naaxhuiñyjäy huidibi ca' mijpidaaccixy Dios, je mujcu' jadu'n yjot yhuinma'ñ y'ane'mip ajcxy.

²⁰ E nejhuinyim co yi Dios y'ung ya y'oy naaxhuiñ e ti xyajnejhuinyim yi' y'ayuc yty'ajt, jigix jëbi nejhuinyim huinjihuinyim yajxon je Dios janchypi tudägyipi. Nmi'ijtim ma ich ajt ndzinaayin je janchypi je tudägyipi je Dios y'ung je Jesucristo. Jada jëdu'n je tiydudägyipi Dios, etz je Dios yjugy'ajtin caminaabi ycacixy ycatigoy. ²¹ Müich ajcxy migügtijc huidibi ooy ndzocy njihuïyich jadu'n nej icyipy ngi'm'ung ngi'm'anäcich, ca' nigoo mdzachDios'ajtigixy tijaty huidibi ca' ni ti mic'ajt müdity, jadu'n nej Dios Teedy tzajpjotypi ymic'ajt müdity.

2 SAN JUAN

Yi Mimetzpi Necy Huidibi San Juan Yajniejx Tüg Mibijcpi Töxyjäybi

¹ Hich Juan huidibi nigohuajc'ajt Dios yjäy. Nyajniejxpih miich töxyjäy jada necy, miich Dios xyjäy'ajtp, e ti mmijpidägy Jesucristo. Nañ nyajniejxpih jada necy tüg'óciy miich m'ung m'anác ajcxy. Ooy ndzocy njihuüyich miich ajcxy. Ca' nminaanim ich naydügpajc ndzojcy njihuüybich miich ajcxy, nañ jadu'n tüg'óciy jäy ajcxy, huidibi huinjihuüygixp Dios ytiy'ajt, xychojccixp xyjihüüygixp ajcxy. ² Hich miich ajcxy ndzojccixyp njihuüygixyp com Dios ytiy'ajt yajpatp ma ich ajt njot nhuinma'ñ, etz yi' ijtp huinixi ma ich ajt. ³ Huen Dios Teedy etz ich ajt nHuindzin Jesucristo, yi Dios y'ung oy'ajt may'ajt tuñ miid miich ajcxy, huen xpa'ayoogixy huen xyajjotcugüygixy miid co mguydungixy yi' ytiy'ajt etz mnaychójcigixy mnayjihüüygixy miñ xyipy.

⁴ Ti nminaybadyijich nijejity miich m'ung m'anác, e ooy njotcugüyich miid co tiydudägy ajcxy payöy Dios ytiy'ajt, jadu'n nej Dios Teedy ajt ti xyñajtz'ane'müyim. ⁵ Cham njacnimäyich miich ajcxy co jëbi ajcxy mnaychójcigixy mnayjihüüygixy miñ xyipy. Ca' nminaanim huinjemy jada tiy'ajt huidibi cham nyajnijayüygixipy. Je' jada je ayuc huidibi oga'n'aty ti nbaatim co ti nmibijcim Jesucristo. ⁶ Co ndzojcm njihuüyim nmigügtijc, jada je' tiy'ajt co nguyduunim nej Dios ajt ti xyajnajtz'ane'müyim. Jada huidibi Dios ti xyajnajtz'ane'müyim huidibi miich ajcxy ti mbaatcixy, co oga'n ti mmibijccixy Jesucristo, copicy co ajcxy mnaychójcigixipy mnayjihüüygixipy.

Yi jäy ajcxy huidibi anüdaaccixp

⁷ Com ji mayjäy ya naaxhuiñ huidibi huin'ümb yi jäy ajcxy. Yi' ajcxy ti puhüäctüdy mibijcpidijc, yaj'ixpijcp ajcxy co Jesucristo ca' ñayguëxiçi ya naaxhuiñ miid ñinix. Jadayaabi jäy ajcxy yhuin'ümyb yhueñpinity etz Jesucristo ymidzip'ajtyp ajcxy. ⁸ Naygüendi'ájtigix ci'm. Ix mgamijpidaaccixy yi' ajcxy y'ayuc. Co ajcxy myajhuin'üngixipy, huin'it anajty myajtigoogixy je oy'ajt huidibi mbadaangixyp ma Cristo. Co mguydüngixipy Jesucristo ytiy'ajt, huin'it mbáatcixipy tüg oy'ajt ca'pxyipi jiiyb tzajpjoty.

⁹ Tüg'óciy jäy huidibi ca' cuydungixy je Jesucristo y'ayuc ytiy'ajt, ca' ajcxy müdity Dios ytiy'ajt ma ajcxy yjot yhuinma'ñ. Je jäy ajcxy huidibi cuydundüib je Cristo y'ayuc ytiy'ajt, ymiid ajcxy Dios Teedy etz je y'ung ytiy'ajt ma ajcxy yjot yhuinma'ñ. ¹⁰ Peni ji pinjaty ñicxy ma miich ajcxy huidibi yaj'ixpijcp huidibi ca' ytiy'ajtity, ca' ajcxy mgöbiguipy ma mdijcin, e ni ca' ajcxy mjijp'ixihuipy. ¹¹ Com Dios yjäy pinjaty anajty jijp'ixiyb je jäy ajcxy huidibi yaj'ixpijc huidibi ca' ytiy'ajtity, hue' je' tundigooyb ma Dios ytiy'ajt. Hue' je' anajty paady jadu'n nej jihüy ti jijptigüyñi ajcxy je huingbi ixpijcin huidibi ca' ytiy'ajtity.

Capxyçixin

¹² Oy ich ooy mij may miich ajcxy njamüdmüydägaangixy per ca' miich ajcxy jadu'n nijayihuaangixy necy'am. Hue' janchtiy njijp'ixyich co ci'm

nninixxaangixy jim, e nm#d miydägaangixy au'am jigix ajcxy ooy jotcujc
mnayjihuiyigixipy.

¹³Je mdzi' y'ung ajcxy huidibi ya yajpatcixp xyajnigujxp ycapxpocxin,
je huidi ajcxy Dios nañ jadu'n ti yhuin'ljixigixy. Jadu'n ngapxycixyich m#d
miich. Amén.

3 SAN JUAN

Yi Necy Huidibi San Juan Yajniguejx Gayo

¹ Señor Gayo:

Nguejxypich capxocxin ma miich. Iich miich nyajniguejxyp jada necy. Nnigohuajc'ajtypich ma je mibijcpidijc. Ooy ndzocy njihuüyich miich.

² Miich migüg, ooy nmigüg'adyii. Dios nmibijctzooybich müd miich ycixpi, huen agujc jotcujc mdzinähuiipy etz mmic'idipy m'oy'idipy. Nejhuüyibich co oy m'ity ma Dios. ³ Com oy ti njotcugiyich co je mibijcpidijc ajcxy ymiñ ya huidibi jim tzoon ma miich ajcxy, e yi' ajcxy xytiy'ajtmooyich jadu'n nej tiydudägy mdzinäy e nañ jadu'n nej yajxon mguyduni Dios ytiy'ajt. ⁴ Ooy njotcújcidyich jac nigi co tiy'ajt nbaadyich jadu'n nej nmigügtijcich cuydungixy Dios ytiy'ajt.

⁵ Miich migüg huidibi ooy ndzocy njihuüyich, ooy njäygidägyich co ooyjäy'ajtin mduñ müd je migügtijc. Nigi oy co ooyjäy'ajtin mduñ müd je migügtijc huidibi ca' m'ixy'adyii. ⁶ Yi mibijcpidijc, huidibi ti chooñ ma miich ajcxy, ti tiy'ajt yejccixy ma je mibijcpidijc ya jadu'n nej miich ooyjäy'ajtin mdzachtuñ. Ooy oy mduñ co nmöy yi migügtijc yi ytü'amgixpi e mguejxnaxy yajxon jadu'n nej Dios jäygidägy. ⁷ Yi jadu'mbi jäy huidibi mguejxnajxyp anajty hue' Dios y'ayuc ycixpi yhuidity, e ca' yi' ajcxy ti pijctzoy ma je jäy ajcxy huidibi ca' Dios ytiy'ajt nejhuüiyi. ⁸ Copicy nbubejtim ajcxy je mibijcpidijc ajcxy huidibi Dios y'ayuc ycixpi yhuidity. Co jadu'n nbubejtim, chi jadu'n paady nej jihuüy tú'ciy nduunim müd yi' ajcxy ma Dios y'ayuc capxhuäcxii.

Je Diótreres yjibic-huinma'ñ

⁹ Ti nnijayiyich jayhuin je mibijcpidijc huidibi nayyöymújcgixp jim. Jim yajpaady tüg jäy huidi xii Diótreres huidibi ca' cöbiga'ñich n'ayucich etz ngötújcinich. Amij agix jada jäy chachñayjihuüyii, yi' ci'm tzach'ane'mam ma miich ajcxy. ¹⁰ Paady ycixp co nnícixbich jim ma miich ajcxy nyajnimähuary ajcxy tüg'óciy yi jibic-huinma'ñ huidibi Diótreres ytumyib, jadu'n nej jibic xyñigapxy xyñi'ojiyich etz jadu'n nej anii yaj'ixpicy. E nañ ni yi' ca' mmüidity jotcujc'ajtin jadu'n nej chach'idich. Nigi ytundigoy co ca' yajjättäga'ñ ajt nmigügtijc huidibi Dios müd ycixpi yhuidity. E co iich ajt nmigüg pinjaty yajjättäga'ñ, chi yi' capx'aducy e yajpidzimy je mibijcp hidibi jäy yajjättäc, e ca' je' cöbiga'ñ ma miich mnayyöymujctac.

¹¹ Miich hermano, huidibi ooy ndzocy njihuüyich, ca' mguydunipy jada jibic-huinma'ñ. Cuydun janchtiy yi oybi huinma'ñ. Yi jäy ajcxy huidibi oybi tungixp, yi' ajcxy ymüd Dios ytiy'ajt ma yjot yhuinma'ñ. Yi jäy ajcxy huidibi jibic tungixp, ca' yi' ajcxy Dios ytiy'ajt nejhuüiyi.

Je Demetrio tüg y'ijxpejt oybi

¹² Yi jäy, huidibi yxii Demetrio, tüg'óciy jäy ajcxy yminaangixy co ooy y'oyjäyity, e janch yajpaady ma Dios ytiy'ajt. Iich nañ jadu'n nmina'ñich co ooy y'oyjäyity yi Demetrio, e miich mnejhuüyib co iich ajt ndiy'ajt janch janch yi'.

Capxycijxin

¹³ Ooy #ch anajty miich mijcajee ayuc njayajm#dm#ydäga'ñ. Per ca' nijay#hua'ñ necy'am. ¹⁴ Hue' janchtiy nj#p'ixy#ch co nn#cx#ha'ñ#ch tzojc ma miich ajcxy, e nm#dm#ydäga'ñ#ch miich ajcxy ci'm.

¹⁵ Jotcuje'ájt#ci#x. Yi m#b#ij#cp#i#di#jc ajcxy hui#di#bi ya yajpatp yajnajxpy ajcxy capxrocxin ma miich ajcxy. Tun may'ajt yajnáx#ig#ich ngapxrocxin ma nm#ig#ü#gt#i#jc#ich jim nidüg nidüg etz x#i#bety x#i#bety. Cham ngapxyc#í#y#ich, Juan je Apóstol.

SAN JUDAS

Yi Neczy Huidibi Judas Nijayiy Je Huidibi Dios Ti Huin'ijxigixy

¹ Hch Judas, tumbich ma Jesucristo ytung, Jacobo xy'uch'ajtpich. Nijayiybich miich ajcxy nidüg'óciy huidibi Dios Teedy ti huin'ijxcixy jëbi mibijccixy yi' y'ayuc huidibi jëbi xyajpocyñihuaatzcixy. Nijayiybich miich ajcxy tüg'óciy huidibi Jesucristo ycuend'aty ymüid. ² Huen Dios miich ajcxy mijcajee xypa'ayoogixy etz xyajjotcugüygixy etz chojccixy xyjihuiygixy.

Yi' ajcxy huidibi yaj'ixpijcp anü

³ Miich ajcxy migügtijc huidibi ooy ndzocyich njihuiyich, müid je nïdzocin ycixpi müid ajt n'alma huidibi miich ajcxy etz üch cham nmüid'ajtim, ooy chachycopicity co nijayihuibich miich ajcxy müid yi mibijcin ajcxy ycixpi, e ngohuanüyb ajcxy co jëbi mic m'ijtcixy ma ajcxy yi mibijcin e ca' m'ixtigihua'ccixy ma yi ayuc tiy'ajt huidibi Dios yejc ma tüg'óciy naaxhuiñyäj. ⁴ Naagity jäy ajcxy ti ytigüygixy ma miich ajcxy ayüch ameech müid anü. Jecy'ajty Dios tiy'ajt yejcy ma yi' y'ayuc co yi jadu'mbi jäy tigoyam ajcxy y'alma müid ypocy ycixpi. Hue' yi' ajcxy jibic jäy huidibi ca' huindzigüygixy Dios. Anüdaacp yi' ajcxy co yminaangixy co Dios ti xypa'ayoohuim etz ti xyhuinmeecxim ajt nbocy paady ycixpi jëbi nduunim huen tiijity huidibi nijot'ajtim. Ca' cöbijccixy je Dios huidibi nHuindzin'ajtim, etz ca' cöbijccixy üch ajt nHuindzin Jesucristo.

⁵ Oy miich ajcxy ti mjanejhuйдаaygixy jada tiy'ajt, per nyajjäymetzcodamy ajcxy jadu'n nej Dios jayijp yajpidzimy jecy'ajty jim Egipto je Israel jäy ajcxy, e jac'axam tzaachytuun müid o'cin je huidibi anajty ajcxy nijëjity ca' ymibijccixy. ⁶ Je ángeles huidibi ajcxy ca' yhuim'y ma Dios ytung huidibi ajcxy capxycömidodacy Dios, y'ixmajtztay ajcxy y'it chinaydac. Dios je' cham müid'ajtp ajcxy ahuing. Mach ajcxy y'ity agoodztuuby huinixü huiniempo ixti cooni je mij xü anajty Dios ti yajhuaad'aty, mina anajty tiyduna'n naaxhuiñyäj ajcxy müid ypocy ycixpi. ⁷ Jadu'n nej Sodoma etz Gomorra etz jacjadyii mij cajp huinduy agonbi ytundigoyday ajcxy ma jejimbi cajp ycuudungixyp ñinücx chojcin, naygüyejci ajcxy ma je jibic-huinma'n. Yëdyijctijc ytundigooygixy müid huingbi yëdyijc. Je' jadu'n huim'ixpejt ma tüg'óciy jäy co je tzaachypi ajcxy paatcixy.

⁸ Jim yajpaady ma miich ajcxy jäy huidibi nejhuiyb co Dios jecy'ajty tzaachytuun ángeles ajcxy etz cajp jäy huidibi ajcxy tundigooy. Yi' ajcxy chinaayin jadu'n yi' nej tüg cumäy. Yajjibicüygixy je ñinücx müid pocytunü. Jijpcogapxüygixy je Dios ycotujcin, nigapxcixy ni'ojüygixy je huidibi ajcxy Dios mooyip mij'ajtin. ⁹ Je arcángel, Miguel, je ángel huidibi mij'ane'min müid, co anajty ychiptuñ müid je mujcu', yajcapxyoongixy yaj'ayucyoongixy je Moisés ñinücx, ca'p je' müid'ajty huinma'n nicxy yajpocycäy je mujcu' müid nay'ojü. Jëyi janch co nimay: "Yi Huindzin Dios miich xy'ix'ojip." ¹⁰ Per jada jäy ajcxy jibic ooy nigapxcixy huidibi ca' nejhuiygixy. Tügüyb ajcxy yhuinma'n müid iyujc animal yhuinma'n,

etz iyujc animal ca' ajcxy miidity huinma'n tiydudägyi. Ci'm jada jäy ajcxy ñayyajhuinma'ñyidigoooyigixy, e jadu'n ajcxy y'alma yajtigoyaangixy.

¹¹ Ypadamyb ajcxy tzaachypi mijcajee miid pocy ycixpi com je' yi' ajcxy ypadumyb nej Cañ y'idiiich. Miid co meen' tzach'adzojccixy, paady ñiidigooyigixy ytüdigoooyigixy jadu'n nej Balaam ñiidigoy ytüdigoy jecy'ajty, e jadu'n ajcxy y'ayoogixy jadu'n nej Coré, co y'o'cy co yacapxymidohuañ anajty co Moisés oy y'ayucjijpcogapxiiyi. ¹² Yi' jadu'mbi jäy tzo'ydu'n yejcp ma miich ajcxy co mgaaygixy m'uuccixy tügmucy miid yi' ajcxy, e jadu'n ijxpejt yejccixy co mnaychójcigixy. Caaygixp uuccixp tügmucy miid miich ajcxy agujc jotcuyc per ni ca' ajcxy miidity huindzigi'ñ miid ymigügtijc. Jadu'n ajcxy nipaady nej cöbixycuend'ajtpi huidibi ci'm ñaygüend'ajtigixyp, e ca' tungixy cuendi je cöbixy. Jadu'n ajcxy nej joc huidibi ca'pi ni miidity, huidibi je poj yajhuidijtip. Jadu'n ajcxy nej quipy huidibi ca' ytim'aty mina yjapadyii, jayijp y'ocniicxy, e chi jada ytich, e ytimypidigy miid ñidictz. ¹³ Yi' ajcxy ytundigoyii ooy cho'ydu'n yecy, tim jadu'n nipaady nej je meyy y'oobigy co ypidigy. Jadu'n ajcxy nipaady nej madza' huidibi ytu' ti yajtigach. Hue' y'ijtcixy pocypa'tci'py huinixii huiniitempo, mij'agootztuuyb y'idipy ajcxy.

¹⁴⁻¹⁵ Nañ jadu'n Enoc, je mihuixtujcpi co anajty Adán ti yjayijp'aty, yminañ co Dios yhuinma'ñymooyi miid jada ycixpi, e yminañ: "N'ijxich je Huindzin Dios co anajty ymiiñ miid janch canaag mil je huidibi ajcxy tudägyity etz huätzip. Co anajty tiyduna'ñ ajcxy tüg'óciy naaxhuiñyjäy miid ypocy ycixpi, chi yajpocycähua'ñ je jibic jäydijc ajcxy jadu'n nej ajcxy ti ytundigooyigixy miid yjibicjäy'ajt etz miid jibic ayuc tiibi miid nigapxcixy ni'ojiygixy Dios." ¹⁶ Jada jibic jäydijc ca' ajcxy ni ti mijotcuyc'ajtcixy, ooy nigapxcixy ni'ojiygixy ymigügtijc. Jëyi ajcxy yci'm jotcuyc'ajt itxaaygixy. Ycapxcixy amij agix. Ooy oy nigapxcixy nijëjity jäy miid co ti oybi padaangixy ma je' ajcxy.

Judas capxhuijp je' ymigügtijc ajcxy

¹⁷ Per miich ajcxy migügtijc huidibi iich ooy ndzocy, jäymejtzcix je ayuc huidibi jécyip ti najtzcaxxiygixy je Huindzin Jesucristo y'apóstoles ajcxy. ¹⁸ Je apóstoles miich ajcxy xyñimay: "Ma anajty xii tiempo ycixaani, ji'adip jäy ajcxy huidibi nixigipy yajxigipy huidibi Dios yje'ajtpy, e chináaygixipy jadu'n nej yi' ajcxy ci'm tzachnijot'ajtcixy jibic-huinma'ñ." ¹⁹ Je' ajcxy yajnaybjic-huäcxiiib miibijcpidijc co ca' ajcxy miidity je Dios yjihui'ñ ymic'ajt.

²⁰ Per miich ajcxy migügtijc huidibi ooy ndzocyich njihuüyich, ijtcix miich ajcxy tudägy ma yi' mmibijcin. Jäymejtzcix miibijctzoogix Dios miid je Espiritu Santo ypubejtin. ²¹ Naygüend'ajtigix jigix jëbi Dios xychojccixy xyjihuiygixy ajcxy, e ahuijxcix je xii mina anajty iich ajt nHuindzin Jesucristo xymöhuaanim je jugy'ajtin huidibi ca' ycixipy ytigoyipy ni mina miid co ti xypa'ayoohuim.

²² Capxjotcidaaccix pinjaty ca' ti mijpidägy janchypidägy. ²³ Yajmiidmiydaaccix jacjadyii migügtijc jigix ajcxy jëb paatcixy nañ jadu'n nidzoocin miid ajcxy y'alma. Jadu'n anajty paady nej jihuiy myajpidzimgixy jünjoty. Yajtungix pa'ayo'n miid jacpinjaty pocytumbi. Naygüend'ajtigix ma yi' ajcxy ypocytunii, ca' mbocytungixy nañ jadu'n. Jadu'n yi' ajcxy ypocytunii nipaady nej huit huidibi ti yjibicci'y.

Judas capxycixy miid je' ymigügtijc

24-25 Je Dios tügpajcpi, je Dios huidibi xyajñidzoocim ajt n'alma, je huidibi yjajtaayb ñejhuiydaayb, ymüid je' mic'ajt etz cõtujcin jëbi müich ajcxy xycuend'adipy jigix ca' mbocycägixipy, etz je' ymüid mic'ajt jigix jëbi xyajja'tcixy agujc jotujc ma Dios yhuinduu, ma yi' yajpaady müid y'oy'ajtin ymij'ajtin ca' ti mbocymüidity ajcxy. Yi' paatip je oy'ajtin etz mij'ajtin etz mic'ajt etz cõtujcin müid nHuindzin Jesucristo ycixpi, tüyip etz cham etz huinixü. Amén. Jadu'n ngapxycíxyich.

EL APOCALIPSIS O Je Huidibi Dios Yajhuin'ijx San Juan

¹ Jayhui'my ity ma jada necy je Jesucristo y'ayuc ytiy'ajt huidibi ca' pñin nejhuiy huinjihuüy jecy'ajty. Dios moy Jesucristo jada tiy'ajt jigix yajni'ixiydähuipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiba'ñ mina ytuna'ñyii yjada'ñyii. Jesucristo yquejxy jada ayuc tiy'ajt müid tüg ángel ma Juan. E je ángel yajhuin'ijxy Juan jada y'ayuc etz ijxpejt. ² E Juan yejcy tiy'ajt janchypi tüg'óciy jadu'n nej anajty ti huin'ixy ti huinmidoy. E Juan ñidiy'ajt'ajtpy jada Dios y'ayuc etz nañ jadu'n nidiy'ajt'aty je ayuc tiy'ajt huidibi Jesucristo yajnejhuüyi.

³ Janch jotcuyc je' pñnjaty capxp jada necy etz pñnjaty mido'mbije jada Dios y'ayuc huidibi Juan nidiy'ajtpy etz ñajtzcapxiiyb. E jotcuyc je' pñnjaty cuydumb tüg'óciy huidibi jaybety ma jada necy, com je xii je tiempo huingooniñ je' mina ytuna'ñyii yjada'ñyii.

Juan nijayüy huixtujc'itpi mibijcpidijc

⁴ Ich Juan nijayüybich yam je mibijcpidijc huixtujcpicypí huidibi yajpatp jim Asia naaxjot. Huen Dios etz je huixtujcpi espíritu huidibi yajpatp ma je' y'ane'mdac may'ajt oy'ajt tunipy müid müich ajcxy etz xymóoygixipy jotcuyc'ajtin. Dios je' huidibi cham ijtp, je huidibi jecy'ajty ijt, etz je huidibi miinaamb. ⁵ Huen Jesucristo may'ajt oy'ajt tunipy müid müich ajcxy etz xymóoygixipy jotcuyc'ajtin. Jesucristo je huidibi tiydudägy Dios ytiy'ajt yejci, je jayijpi jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pñnjaty jugypigip jadüg'oc co anajty ti y'öccixy. Jesucristo nigohuajc'ajtp etz ane'my tüg'óciy reydiyc huidibi ane'mb ya naaxhuiñ. Je Cristo, huidibi xychojcim xyjihuiyim, ti xyñihuaanim müid ñi'py ma je tzaachypi huidibi mihuaad'ajtim müid ajt nbocy ycixpi. ⁶ Jesucristo ti xycötujcmooyim etz ti xytungmooyim müid Dios Teedy, huidi yi' yteedy'ajtpy. Jadu'n ich ajcxy ndung etz ngötujcin nipaady nej je tung etz cötujcin huidibi reydiyc etz teedytjic ajcxy ymüid. Huen Jesucristo y'idipy cömay huinixii huinitiempo etz huen yi' y'ane'min cötujcin y'idipy huinixii huinitiempo. Jadu'n jada. Amén.

⁷ Cuendtungix ich n'ayuc, icristo miinaamb jocjoty e tüg'óciy je mayjäy y'ixa'ñyii! E y'ixamyb je' ajcxy huidijaty Cristo yaj'ayoo yajtzaachypijc. Tüg'óciy naaxhuiñjy yjihuihua'ñ yäxa'ñ ytaja'ñ ymaya'ñ müid je'ycixpi. Jadu'n jada. Amén.

⁸ Jadu'n je mijpi Dios huidibi tüg'óciy mic'ajt müid ymina'ñ:

—Ich je' huidibi yajtzondacp je naaxhuiñybi, je tzejp etz je huidibi jaccogixiiyb. Jadu'n ich nej letra A huidibi yajtzondacp je alfabeto etz je letra Z huidibi cogixiiyb ma je alfabeto. Ich je' huidibi cham'ijtp, etz huidibi jecy'ajtyp ijt etz huidibi miinaamb.

Juan ijxy yi Cristo oybi ymijity

⁹ Ich Juan, müich ajcxy mmigüg, quipxy müid müich ajcxy nmäxxy nyajnaxych ayo'n tzaachypi. Quipxy müid müich ajcxy ndzinäyich ma Dios y'ane'my. Etz quipxy müid müich ajcxy nyajtuñich je mecxtujcin ma ndzinaayin huidibi Jesucristo ti xymooyim. Jim ich anajty mach n'ityich ma je naax huidibi mejy agujc, huidibi xii Patmos, müid Dios y'ayuc

yt'iy'ajt ycixpi, je ayuc tiy'ajt huidibi Jesucristo xyajnejhuuyim. ¹⁰ Jadu'n tügtecy ti njatyich, hue' anajty tüg domingo xii co iich Dios n'ojadajtyich, e Dios yjihui'ñ ymic'ajt ti anajty xymimadactayich njot nhuinma'ñich. Chi nmidooyich nej jixci'py'amy tüg huidibi mic capx, jadu'n yi' ycapxin nmidooyich nej tüg trompeta yxüxy. ¹¹ Chi je huidibi xymigapxpich anajty yminañ:

—Iich je' huidibi yajtzondacp etz je huidibi yajcogixiib tüg'óciy tijaty ya naaxhuiñybi etz tzajpjoty. Jadu'n iich nej je letra A huidibi yajtzondacp je alfabeto etz je letra Z huidibi yajcogixiib je alfabeto. Cojaay miich ma tüg libro huidibi mhuin'ijxyp, e quex je necy jim Asia naaxjot ma je huixtujc picypí mibijcpíidijc ma je huixtujcpí cajp: Efeso, Esmirna, Pérgamo, Teatira, Sardis, Filadelfia etz Laodicea.

¹² Chi n'ijxhuimbityich n'ixa'ñich pin iich anajty xymigapxpich. Co nnayji'ijxich, huin'it nhuin'ijxyich huixtujc candelero ac tim oori. ¹³ E cujc'amy ma je huixtujcp candelero nhuin'ijxyich tim jadu'n nej je jáy huidibi tzoon tzajpjoty (je Cristo), yxoxyity müd tüg huit yjády anajty mabaad ytecy, e yhuññity ma ycaach müd tüg oorihuñ. ¹⁴ Yi' ycohuajc etz ycohua y janch poob, jadu'n nej lana huidibi janch poob, jadu'n nej nieve ypoobity, e je yhuñ jadu'n nej jünye'n. ¹⁵ Je' ytecy tim jadu'n nej latón huidibi janch oy, nej jihuñ jünjoty ornojoty yam ypidzimy. E je ymiydaacin janch mic, tim jadu'n nej canaag münñi y'a'ñich y'agimimy. ¹⁶ E ymüd anajty ma a'oygi' huixtujc madza'. E ypidzimy ma y'ahuac tüg espada mejtz'adu'm'amy yjipity. E yhuññijp jadu'n anajty nej xii janch mic y'añ.

¹⁷ Co je' nhuin'ijxyich, chi janch ögy oy ngidägyich ma ytecy ymijc, chi xycñixajyich müd y'a'oygi', chi xyñimaayich:

—Ca' mdzigiy; iich je' huidibi jayijp'ajtp ya naaxhuiñ etz tzajpjoty etz iich je' je' je' je' je' cogixihuamb. ¹⁸ Jugy'ajtpich; ti n'ögyich, e ti njugypicyich jadüg'oc, e jugy'adipich huinixii huinítiempo. Nmüdich mic'ajt jigix ane'mibich yi o'cin etz je it ma je öcpi ajcxy y'alma ity. Jadu'n nipaady nej jihuñ nmüdidyich je öcpi it ahuaazti. ¹⁹ Cojay cham tijaty mhuin'ijxpy mhuinmidooyb, jadu'n nej huidibi tunaanip jadaanip jadachambi xii tiempo, etz huidibi tunaanip jadaanip jacjiini. ²⁰ E jadu'n yhuimbizimy je tiy'ajt janchypí huidibi ca' pin nejhuñ maabi je huixtujcpí madza' tiibi mhuin'ixy ma iich n'a'oygi', etz je huixtujcpí oricandelero. Je huixtujcpí madza', je' je' je' je' je' ángeles ajcxy huidibi cogapxy'ajtp müd Dios ycixpi ma je huixtujcpicypi mibijcpíidijc. E je huixtujcpí candelero huidibi ti m'ixy, je' yi' je huixtujcpicypi mibijcpíidijc.

2

Je ayuc huidi yajmoy yi mibijcpíidijc jim Efeso

¹ Nijayi' miich je ángel huidibi cogapxy'ajtp jim ma je huidibi ajcxy mibijcp jim Efeso: “Nima' ajcxy co jadu'n yminañ je huidibi huixtujc madza' müd ma y'a'oygi', je huidibi jim yajpatp agujc'amy ma je huixtujcpí candelero, je' jadu'n minamb: ² Iich nejhuñybich tüg'óciy ti miich ajcxy mdumy, jadu'n nej mictägy mdungixy ma Dios ytung, etz jadu'n nej mmimecxtujccixy migügtijc. Nejhuñybich co ca' m'ocmimecxtugaani ajcxy jibicjäydijc, e ti m'ijxmajtcixy je ajcxy huidibi naydijp co Cristo ti huin'ijxigixy, per ca' je' ajcxy ytudägyity, e miich ajcxy ti mnejhuñ co ajcxy ooy y'aniidaaccixy. ³ Nejhuñybich co ooy

ayo'n mij miich ajcxy mminajxcixy myajnajxcixy miid ich ycixp, etz ooy mij mecxtujcin ajcxy myajtungixy, etz ooy janch mic mdungixy miid ich ycixp, e ca' ti mmidzjpigixy ich ndung. ⁴ Per nejhuiybich ma miich ajcxy mdundigoy. Ca' miich ajcxy xyajmij'atyich mijcajee, jadu'n nej anajty xyajmij'atyich ajcxy mijcajee co oga'n ajcxy mibijcy. ⁵ Miid jada ycixpi jäymetz miich ajcxy ma oy m'agänajxcixy. Jothuimbijtcix, e tungix nej anajty m'octungixp co oga'n ajcxy mmibijcy. Pen ca' ajcxy jadu'n mdungixy, chi tzojc nixibich ma miich ajcxy, chi huingbi nbidägibyich ma miich ajcxy xyjapaady, tim jadu'n nipaady nej jihuïy nbicyich yi mgandelero. Jadu'n ndunipyich pen ca' anajty mjothuimbity ajcxy. ⁶ Per njäygidaacypich jadu'n nej miich ajcxy m'ijxtigoydaaygixy mijäydgoydaaygixy je jibicjäydijc ajcxy yhuinma'n. Nej je nicolaïtas ajcxy ytungixy, miich ajcxy ca' mjäygidaaccixy e nañ jadu'n ich ca' njäygidägyich. ⁷ Pinjaty ytäzacc miid huen amidoo'ity nej je Espiritu Santo ymina'n ma je mibijcpidijc huidibi yajpatp xi ya. Pinjaty madacp ma ymibijcin, ich yi' nmöhuipy tzinaayin jugy'ajtin ma Dios y'ane'my, jaydeb jotcujc chinähuipy ma Dios y'it, jadu'n nipaady nej jihuïy ajcxy jicxy je quipytim ma Dios y'it huidibi jugy'ajtin yejcp."

Je ayuc huidi yajmoy yi mibijcpidijc ajcxy jim Esmirna

⁸ Nijayi' je ängel, je cogapxy'ajtpi huidibi yajpatp ma je mibijcpidijc jim Esmirna: "Jadu'n ymina'n je huidibi yajtzondac je naaxhuiñybi etz tzajp etz huidibi cogixihuip, je huidibi o'c e yjugy'aty jadüg'oc: ⁹ Ich nejhuiybich tüg'óciy ti miich ajcxy mdumyb. N'ijxcajpyich nnejhuïybich je m'ayo'n mjetmay ajcxy, jadu'n nej ti myaj'ixhuidijtcixy ti myajpahuidijtcixy. Nejhuiybich co ayooob jäy miich ajcxy, per miid miich ajcxy Dios y'oy'ajtin, e jadu'n nipaady miich ajcxy nej comeñydijc. Nejhuiybich co nijëjity jäy miich ajcxy xyñigapxyp xyñi'ojuyb. Ñaydiyii ajcxy co yjudíojäyity, e ca' yjanchity. Hue' ajcxy miid y'ijtcixy je mujcu'. ¹⁰ Ca' ni ti mdzigiy miich ajcxy nej mjadaangixy m'ayoohuaangixy. Yi mujcu' miich ajcxy nijëjity xyajpujxtijccähuamb, m'ocyaj'ijxmadzangixy pen janch miich ajcxy nidüg'óciy myajpatcixy ma Dios. Jadu'ny miich ajcxy m'ayohuipy majc xi. Ijtcix tudägy mabaad ajcxy m'öccixy. E ich miich ajcxy je jugy'ajtin huinixibi nmöhuipy jadu'n nej premio co ti mmadaaccixy ma mmibijcin. ¹¹ Pinjaty miid ytäzacc, huen mido'mbijccixy nej je Espiritu Santo nimäy je pinjaty mibijcp Dios. Pinjaty mímadaacp cuyduñ Dios y'ayuc ytiy'ajt, ca' je' y'alma ayoohuipy ayoodac-tuuyb, ca' y'öga'n mímajtz'ocpi."

Je ayuc huidi yajmoy yi mibijcpidijc jim Pérgamo

¹² Nijayi' je ängel huidibi cogapxy'ajtp jim ma je mibijcpidijc ajcxy jim Pérgamo: "Nijayi' je ayuc co jadu'n ymina'n je huidibi y'espada miid mejtz'adu'm'amyb yijpity: ¹³ Ich nejhuydaaybich jadu'n nej miich ajcxy mdzinaaygix mjugy'ajtcix. Nejhuiybich co miich ajcxy mdzinaaygixy mjugy'ajtcixy ma tüg cajp ma je mujcu' y'ane'my. Per mi'ijtyñi je nxijich, e ca' m'ixmach je mmibijcin ma ich. Ni mga'ixmajch je mmibijcin je huin'it xi co Antipas yaj'o'ci jim ma miich ajcxy, tüg ich nmigüg, je tudägypi testigo, jim je' y'o'cy ma mujcu' chinäy. ¹⁴ Nmüdich tigati huidibi ca' n'oy'ixyich ma miich ajcxy huidibi mdumyb ajcxy jim Pérgamo. Nijëjity miich ajcxy ca' m'ixmadza'n je Balaam y'ixpijcin,

je huidibi yaj'ixpijc jecy'ajty co huen jüxcixy je huidibi anajty tzaadzech quipychech ti yajhuindzigüygixy. E nañ jadu'n yaj'ixpic co huen tundigooygixy müd huingbi töxyjäy. ¹⁵ Nañ jadu'n müch ajcxy mmüidity nije' jäy huidibi ajcxy ca' ixmadzaangixy nicolaítas y'ixpijcin, je ixpijcin huidibi üich ca' ndim'ixa'ñich. ¹⁶ Paady jothuimbijtcixy müch ajcxy, yajtigajtzn ajcxy mjot mhuinma'ñ. Pen ca' jadu'n mdunipy, nícxibich jim tzojc ma müch ajcxy. Chi jada' ndziptunipyich müd yi' ajcxy huidibi midundigooyb üich ngötujcin huidibi ngapxpich. Hich n'ayuc jadu'n nipaady nej espada. ¹⁷ Pin ytádzac müd, huen mido'mbicy je ayuc huidibi je Espíritu Santo ñigapxyp ma je huidibi ajcxy Dios y'ayuc ytiy'ajt mibijcip. Pin jada' tiydudägy mimadacp cuyduunni Dios ytiy'ajt, üich yi' nmöhuipy oy'ajtin huidibi Dios yjè'ajtpy. Jada oy'ajt jadu'n nipaady nej maná huidibi yüch ijtp ma Dios chinaydac. Nañ jadu'n üich yi' nmöhuibich tüg pi'pooftzaa, e ma je pooftzaa jim yjaayity tüg xü jemybi huidibi ca' ni pin ijxcabipy, jëyi janchtiy ijxcabip je xü pin anajty cöbijcp je tzaa."

Je ayuc huidi yajmoy yi mibijcpidijc jim Tiatira

¹⁸ Nijayi' je ángel huidibi cogapxy'ajtp ma je mibijcpidijc jim Tiatira: "Ñima' ajcxy, jadu'n je Dios y'ung ymína'ñ, je huidibi yhuin müd jadu'n nej jihuiy jünye'n, e ytecy jadu'n müdity nej bronca tübi ytoyhuäch ma jin: ¹⁹ Jadu'n yi' ymína'ñ: Nejhuüybich tüg'óciy ti ajcxy mdumyb. Nejhuüybich jadu'n nej müch ajcxy mijcajee myajmij'ajtcixy Dios etz mdzocixy mjihuüygixy ymügütiyc; jadu'n nej mmübijcixy mmijpidaaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcin ma mdzinaayin; etz nejhuüybich co cham nigi mdungixy ma Dios ytung, ca'ydí jadu'n ajcxy nej myajtzondacy. ²⁰ Ji tüg huidibi müch ajcxy mdumyb huidibi üich ca' n'oy'ixyich. Mdzachmímecxtujccixy yi töxyjäy Jezabel huidibi naydijp co ycapxyp Dios y'ayuc e ca' yjanchity. Je' yajnüdigooyb yajtüdigooyb üich ndumbi müd anü. Jadu'n je' ymína'ñ co jëbi huingbi töxyjäy migapxtigooygixy e co jëbi caaygixy jüxcixy je huidibi ajcxy yajhuindzigüyb quipychech tzaadzech. ²¹ Ti üich je Jezabel nmöy tiempo co ixypy yothuimbity, per yi' ca' ixmadza'ñ yjibic-huinma'ñ. ²² Jadachambi nyajcähua'ñich je Jezabel cijx'am müd pa'm, e jadu'n ajcxy nmöhua'ñich ayo'n je yëdijc ajcxy huidibi müd chachtundigoy. Jadu'n ndunipyich pen ca' ajcxy yothuimbijtcixy nej ajcxy chachpadungixy je jibic-huinma'ñ huidibi je Jezabel ymü. ²³ E nyaj'öctähuibich tüg'óciy ajcxy pinjaty panixp cixyot huinjot je Jezabel y'ixpijcin jigix nidüg'óciy je mibijcpidijc ajcxy nejhuüydähuipy co üich je' nejhuüydaayb tüg'óciy jäy ajcxy yjibic-huinma'ñ. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴ Per jacjadyi müch ajcxy jim Tiatira ca' mbanicxcixy mbayöygixy Jezabel y'ixpijcin, e ni ca' mmijpidaaccixy huidibi ajcxy ytiypy mujcu' y'ixpijcin huidibi tzip huinjhuüyb. Hich müch ajcxy nimaayb co ca'p üich müch ajcxy huingbi ixpijcin njacmóoygixipy. ²⁵ Mi'ijtcixy je Dios ytiy'ajt huidibi müch ajcxy müd, ixti cooni anajty nhuimbityich. ²⁶ Pin madacp ma ymibijcin etz pin cuydumb üich ndiy'ajt mabaad anajty je' y'ögy, üich je' nmöhuibich je cötujcin, jaydéb ane'my naaxhuünyjäy ajcxy. ²⁷ Hich je' nmöhuipy je ane'min cötujcin ma naaxhuünyjäy huidibi Dios Teedy, üich nDeedy, ti yymöyich. E je' ane'mipy müd Dios ymic'ajt. E je' yajhuindigoydähuipy

naaxhuiñyäjy y'ane'min, tim jadu'n nej jäy püy pochtu'tz müd pujxtajc. ²⁸ Nañ jadu'n ich je' nmöhuipy ich nmic'ajt huidibi nipaady nej je madza' jayhuixtujc. ²⁹ Pin ytádzac müd, pin midoohuamb, huen midoy nej je Espíritu Santo ymina'n ma yi mibijcpidijc nidüg'óciy."

3

Je ayuc huidi yajmoy yi mibijcpidijc jim Sardis

¹ Nijayi' je ángel huidibi cogapx'ajtpi ma yi mibijcpidijc ajcxy huidibi yajpatp jim Sardis: "Jadu'n ymina'n je pin müd je huixtujcpi Dios y'espíritu, huidibi müd je huixtujcpi madza': Ich nejhuiybich ti mdumyb. Nejhuiybich co cömay ajcxy m'ijtcixy co mmüdity yjugy'ajtin huinixibi e ca' yjanchity. Jadu'n miich ajcxy nipaady nej öcpi. ² Cuenditungix miich ajcxy yi mmibijcin, com jago jago ajcxy mgayajtigoydäy yi mmibijcin. Jayajmicpijccixy yi mmibijcin huidibi ajcxy mjacmüdity. Ti ich n'ixy co huidibi ajcxy mdumyb ca' yi' yhuädzity ytudägyity ma Dios yhuinduu. ³ Jáymejtzcootcixy je Cristo ytiy'ajt je tiibi m'ixpijccixy, je tiibi mmidoogixy. Panicxcix Cristo ytiy'ajt e jothuimbijtcixy ma yi oybi. Pen ca' mgüendtungixy yi mmibijcin, nicxibich ma miich ajcxy jadu'n nej tüg meetzpi, ni mganejhuihuüyigixipy anajty nnicxyich. ⁴ Miich jacmüdni mibijcpi ajcxy jim Sardis huidibi ca'ni ajcxy ymibijcin yajtigooygixy, ca'ni ajcxy ytundigooygixy, tim jadu'n nipaady nej jihuüy ajcxy müdity poob huit huidibi ca' yjibicüy. Yi' ajcxy xymüd'idipich müd huädz jot huädz huinma'n, tim jadu'n nipaady nej ypoob huit ajcxy müdity, com ajcxy ypadyii jadu'n. ⁵ Pin mimadacp cuyduñ etz mijpidägy Dios y'ayuc ytiy'ajt, ymüd'adipy ajcxy je huätzpi jot huinma'n, huidibi jadu'n nipatp nej poob huit ajcxy müdity. E ni ca' ajcxy yxi yajjödzip ma je libro ma ycojaayity je tudägyi jäy ajcxy yxi. E ich yi' ajcxy ngapxquëxícixy yxi ma nDeedyich yhuinduu, e nañ jadu'n ma nDeedyich y'angeles yhuinduu ajcxy. ⁶ Pin midoohuamb, pin ytádzac müd, huen midoy nej je Espíritu Santo ymina'n majaty je huidibi ajcxy Dios y'ayuc ytiy'ajt mibijcip."

Je ayuc huidi yajmoy yi mibijcpidijc jim Filadelfia

⁷ Nijayi' je ángel huidibi capxy'ajtp ma je mibijcpidijc jim Filadelfia: "Jada ayuc tiy'ajt ñigapxyp je tügpajcpi huätzpi, tügpajcpi janchypi, huidibi ane'my Dios yjäy jadu'n nej David ane'my Dios yjäy jecy'ajty. Je huidibi yaj'ahuaatzp e co yaj'ahuäch ni pin ca' huaad yaj'aducy. Je huidibi yaj'adujcp e co yi' yaj'aducy, ni pin ca' huaad yaj'ahuäch: ⁸ Cuenditungix nej nmina'nich: Ich nejhuiybich nej mdungixy. Ti nyecyich mic'ajt ma miich ajcxy huidibi nipaady nej tüg tigiydac ahuätzpi ma miich mhuinduu, huidibi ni pin ca' huaad yaj'aducy. Nejhuiybich co hueeni Dios yjihu'iñ ymic'ajt miich ajcxy müdity. Per ti mguydungixy ich n'ayuc, e ca' nxijich xycoyützi. ⁹ Cuenditungix nej nmina'nich. Yi' ajcxy huidibi mijpidacp Satanás y'ayuc, je huidibi anüdacp ajcxy co ñaydijigixy judíojäy, e ca' yjanchity. Ich yi' ajcxy nmimadägibich jigix yi' ajcxy miich xyhuingoxtinähuiipy xyajmij'adipy. E chi nejhuihuip ajcxy co ich miich ajcxy ti ndzocy. ¹⁰ Müd co ti myajtungixy mecxtujcin ma mdzinaayin, ti mguydungixy ich n'ayuc n'ane'min. Paady ich nihua'nip yajtzögip miich ajcxy ma anajty jäy ajcxy mictägy xyjot'ijxcixy xyhuinma'n'ijxcixy ajcxy. Miinipy je xii je tiempo mina je mjucu' jot'ixipy huinma'n'ixipy tüg'óciy je mayjäy huidibi yajpatp ya naaxhuiñ. ¹¹ Ich tzojc nnicxa'nich

jiby naaxhuingixy. Mi'ijtcixy yi Dios y'ayuc huudibi miich ajcxy miid jigix ni pin xycapijcip ajcxy mbremio, huudibi ti mganar'ajtcixy ma Dios. ¹² Pin mimadacp cuyduñ Dios y'ayuc yti'ajt etz cuyduñ yajxon, ich yi' nbidagibich mij'ane'mbi ma ich nDios y'it, jadu'n yi' nipaadip nej tüg pilar huudibi midinaayb jemxypi ma Dios yti'c. E yi' ni camina ypidzimipy ma Dios y'it, e njayiyibich ma yi' ñin'cx ich nDios yxi, e nañ jadu'n njayibich je ich nDios ycajp yxi, je Jerusalén jemybi huudibi tsoon tzajpjoty ma Dios yajpaady. E nañ jadu'n njayibich nxi jemybi ma yi' ñin'cx. ¹³ Pin ytádzac miid huen midoy ti je Espiritu Santo ñigapxyp ma tüg'óciy je mibijcpidijc.”

Je ayuc huudi yajmoy yi mibijcpidijc jim Laodicea

¹⁴ Nijayi' je ángel huudibi cogapxy'ajtpi ma je mibijcpidijc jim Laodicea: “Jadu'n ymina'ñ je huudibi janchip tudägyip, je huudibi tudägy yejcp Dios yti'ajt e ca' yajtigach y'ayuc, je huudibi yajtzondac tüg'óciy tijaty huudibi Dios ti oyduñ: ¹⁵ Nejhuuybich nej mdungixy. Nejhuuybich co miich ajcxy mibijccixy huenjaty, ca' myajtigoydaygixy yi mmibijcin, e ni ca' ooy mij mmibijccixy. Jadu'n miich ajcxy nipaady nej ni huudibi ni ca' ytichity, e ni ca' y'anity. Jac'oy ixypy co ooy mij mmibijccixy, o co ca' ixypy mdimmibijccixy. ¹⁶ Miid co tim yinjaty tim huenjaty ajcxy mmibijccixy, ca' ooy mmibijcin ymijity ajcxy, e ni ca' ajcxy mmibijcin ytigoydaaygixy, miid jada ycixpi ich miich ajcxy nijpcogapxihiipy miid je ndzip n'éjcinich, tim jadu'n nej jäy ajcxy ixtzuju huudibi y'ahuac yca'tzojcpy. ¹⁷ Miich ajcxy minamb co ooy ajcxy mgomeeñity, ooy ajcxy mij mdzinaayin mjogy'ajtin mmidity, e ca' ti ajcxy myajmayajtcixy, e ni ca' miich ajcxy nejhuuygixy co ayo'nduum myajpatcixy. Jadu'n miich ajcxy nipaady nej ayoobitijc, nej huiintzpi, nej huudibi nihuädz ixhuädz huudijtp. ¹⁸ Paady ich miich ajcxy nimaaygixy co copicy ajcxy mbaadip ma ich Dios yti'ajt janchypi, huudibi jadu'n nipaadipy nej jihuïy ajcxy mjuuygixy huädz oori ma ich, huudibi ti y'oybidzimy miid jin jigix mgomeeñ'ajtcixip. Nañ jadu'n ich miich ajcxy nnimaaygix co copicy ajcxy mbaatcixip pocyhuinmeecxin ma ich, huudibi jadu'n nipaady nej jihuïy huit oyjaty'poojaty'p mjuuygixy ma ich, jigix mxóxcixipy mnin'cx ca'ydi tzo'ydu'n mbáatcixipy. Nañ jadu'n ich miich ajcxy nnimaaygix co mbaadip tiy'ajt ma ich nlibro, huudibi jadu'n nipaady nej jihuïy huindzooy mjuuygixy, jigix mdzoydúngixipy mhuin e huin'it ajcxy m'ljxcixipy huädz. ¹⁹ N'ojypich etz ndzaachytumyb tüg'óciy pinjaty ndzocpyich njhuuybich, paady ycixpi miich ajcxy mhuindina'mjijptina' mic ich ndiy'ajt etz jothuimbijtcix nej mbocytungixy. ²⁰ Cuenditungix nej cham nnimaaygix. Jadu'n nipaady nej jihuïy ndinayich ma nidüg nidüg jäy yti'c'agu e ngojxnojcich ajcxy yti'c agi'. Nbijctzooybich co xyajtigihuibich ajcxy ma yti'cin. Pinjaty xyöcmidoobich, e yaj'ahuäch yti'c, tigihibich ma yi', e cayipich miid yi', e yi' miid ich. ²¹ Pinjaty cuydundaayb Dios y'ayuc yti'ajt, ich je' nmöhiipy it lugar tzajpjoty quipxyi miid ich ma ich n'ane'mdac. Ti nguydundaayich Dios y'ayuc, e nm'idich it lugar ma ich nDeedy y'ane'mdac, paady ycixp jëbi nmöhibich miich ajcxy it lugar ma nyajpaadyich. ²² Pin ytádzac miid, pin midoohuamb, huen midoy huudibi je Espiritu Santo ycapxyp majaty mibijcpidijc huudibi canaagpicy yajpatp.”

4

Hibaatcixy capxpaatcixy yi Dios huudibi tzajpjoty tzinaayb

¹ Co jada jadu'n yjajti, chi nhuindicxyich tzajpjoty, e nhuin'ijxyich tüg tije aguu ahuädz jüby tzajpjoty. E nmidooyich tüg ayuc janch tim jadu'n nej tüg trompeta yxüxy huudibi ich anajty jayijp ti xy'ocmigapxpi, xyñimäyich:

—Pet ya ma ich, cham nyajni'ixihua'ñ tijaty copicy tunaanip jadaanip co anajty jadayaabi xi tiempo ñaxy.

² Chi Dios yjihui'ñ ymic'ajt xymimadactaayich njot nhuinma'ñich, e nhuin'ijxyich tüg ane'mdac jüby tzajpjoty. E ma je ane'mdac jim anajty tüg iñäy. ³ E je huudibi anajty jim iñaayb ma je ane'mdac, jadu'n anajty yquëxigü nej tüg tzaa janch oybi janch adicxp. E jühuidity ma je ane'mdac je Dios yhuätz'ajt quëxigü nej tüg i'ñch janch oycolor huudibi janch adicxp nej tüg tzaa tzuxjatypi. ⁴ Nañ jadu'n jühuidity ma je ane'mdac jüby anajty iipx madaax silla, e ma je silla iñäy iipx madaax mijjäy, ac poob huit mäd. E ymüd anajty ajcxy ma ycohuajc coroni ac tim oori. ⁵ Ma je ane'mdac anajty ypidzimy huizuc, e ooy anajty enee yjidjtin ñe'my. E ma je ane'mdac huinduu jüby anajty Dios yjihui'ñ ymic'ajt je huixtujcpi, huudibi quëxigü nej huixtujc tzinhuaty huudibi ooy mic yticxy. ⁶ E je tigot ma je ane'mdac huinduu jadu'n quëxigü nej vidrio mejy, janch huädz janch adicxp.

E cujc'amy jühuidity ma je ane'mdac madaax iyujc huudibi mäd may-huiin jahuinduuy jajixcipy. ⁷ Je midügpi iyujc tim jadu'n anajty nej tüg jamгаа. Je mimetzpi iyujc tim jadu'n nej tüg huajmang. Je midügügp i tim jadu'n anajty yhuiñyijp nej jäy. Je mimaaxpi tim jadu'n nej me'ty yqueec-huidityin. ⁸ Je nimadaaxpi iyujc ymüd anajty ajcxy nidüg nidüg tudujc yqueec, e ymüd anajty ajcxy yhuiin queecnigixy etz queecpa'tcipy. E ca' anajty ajcxy ypocxy xim tzuum, chachminaangixy: Santo, Santo, Santo, je Huindzin Dios huudibi tüg'óciy nejhuydaayb, huudibi tüg'óciy mic'ajt mäd, je huudibi anajty ji'ajtp, je huudibi cham ji'ajtp, etz je huudibi miinaamb.

⁹ Je iyujc ajcxy huin'igixy etz huindzigüygixy etz yajmij'ajtcixy Dios, etz yajnajxcixy Dioscojuyipy ma Dios je huudibi anajty iñaayb ma je ane'mdac, je huudibi tzinaayb jugy'ajtp huinixi huini'tiempo, e ni camina y'ögipy. ¹⁰ Co je iyujc ajcxy jadu'n ytuñ, chi je iipx madaaxpi mijjäy ycojxtinaydaaccixy ma je' yhuinduu huudibi anajty iñaayb ma je ane'mdac. E ooy anajty huindzigüygixy je huudibi tzinaayb huinixi huini'tiempo. Pidaaccixy anajty ajcxy ycorona ma je' yhuinduu, cham chachminaangixy:

¹¹ Miich, ich ajt nHuindzin, ich ajt nDios, miich mihuaad co mmüidity tüg'óciy oy'ajtin mij'ajtin etz mic'ajtin, mihuaad co miich nyajcomayip, mihuaad co miich müd'ity tüg'óciy mic'ajt etz mij'ajt. Jadu'n miich mihuaad, com miich ti myajcojy, ti myaj'abadïy tüg'óciy huudibi ji'ajtp. Com miich jadu'n ti mdzocy, paady ycixpi tüg'óciy tijaty ji'ajttäy.

5

Je libro etz je Dios y'ung, je Cordero

¹ Chi jada' nhuin'ijxyich ma je huídibi anajty iñaayb ma je ane'mdac miídity anajty ma y'a'oygi' tüg libro abugucy, yjaayity jotjoty'amy etz nigixy'amy, yco'aducyity miíd huixtujc selli. ² Chi nañ jadu'n nhuin'ijxyich tüg ángel huídibi mij cõtujcin miíd, yajty miíd ycapxin janch mic:

—¿Pín jada' janch tudägyip co yaj'ahuädzip jada libro etz migüdzzydähuipy yi yseli?

³ Ni tzajpjoty, ni naaxhuiñ, ni naaxpa'tci'py ycacá'ity pín tudägyip huídibi mihuaad je libro co yaj'ahuädzip, o oy nigoodi'ajty ja'ixaanip.

⁴ Ich janch yaaxpich miíd tajin mayin anajty, com ca' anajty yajpaady pín je libro mihuaad co yaj'ahuädzip, o oy nigoodi'ajty huindücxip. ⁵ Chi nidüg je mijjäy xyñimaayich:

—Ca' myäxy. Chi je' je mic'ajt miídpi ma yi judíojäy, je David y'ap y'oc huídibi nípatp nej tüg ama'ycaa, yi' ti mimadactäy tüg'óciy jibicpi. Yi' mihuaad yi libro yaj'ahuädzip, etz miguejyidähuipy je huixtujcpi yseli.

⁶ Chi nhuindücxpejtyich, e agujc'amy ma je ane'mdacin, etz agujc'amy ma je midaaxpi iyujc, etz agujc'amy ma je mijjäydjc ajcxy, jim anajty ytinäy je Dios y'ung, je Cordero. Ooy anajty ñiguëxigy chaachi'au nej anajty ayo'n tzaachypí ti yajnaxy. Ymiíd anajty huixtujc ymu'n, e huixtujc yhuin, je' je' je huixtujcpi Dios yjihui'ñ ymic'ajt huídibi yquejx huindu'my naaxhuiñ. ⁷ Chi je Cordero, je Dios y'ung, ninicxy je huídibi anajty iñaayb ma je mij'ane'mdac, e chi oy cicychoy je libro huídibi je mij'ane'mbi anajty ymiíd ma je a'oy'amybi yci'. ⁸ Co je' anajty ti cicychoy je libro, chi je midaaxpi iyujc etz je iipxmidaaxpi mijjäy yco-jxtinay'ahuyiday ajcxy ma je Dios y'ung, je Cordero, yhuinduu. Ymiíd anajty ajcxy nidüg nidüg y'arpa etz oori copi ujtzyty miíd poom, je' je' anajty nipaady nej ajcxy chajpcapxy capxy je huídibi ajcxy miibijcp Dios. ⁹ Janch y'iyb anajty ajcxy iy jemybi, ymínaangixy:

Miich mihuaad co mgiyigy yi libro, e mmiguejyidaayi je huixtujcpi yseli.

Com miich ti myaj'ogyii, ti mgojuy jäy ajcxy ypocy ma Dios miíd mg'i'mni'py. Ti mgojuy ma Dios nidüg'óciy jäy ajcxy ypocy, huen huídibi razity, pinjaty capx huen huídibi ayucity, pinjaty tzomb huen huídibi cajpity huen huídibi nacióñity.

¹⁰ Miich ti xymóogyixyich ane'min etz je tung mijpi nej huaad ich ajcxy n'ojadajtcixy nmibijctzoogixy Dios, jigix jébi ich ajcxy n'ane'mgixy yi naaxhuiñyjäy etz n'ojadajtcixy nmibijctzoogixy Dios miíd jäy ajcxy ycixpi.

¹¹ Chi ich oy nhuin'ixyich e nhuinmidooyich may ángeles ajcxy ycapxin ymydaacin jühuidity ma je ane'mdac, ma je iyujc ajcxy yajpatcixy, etz ma je mijjäy ajcxy yajpatcixy. E janch canaag millon je ángeles anajty ajcxy.

¹² Janch mic je' anajty ajcxy chachmínaangixy:

Je Dios y'ung, je Cordero, je huídibi öc miíd jäy ajcxy ypocy ycixpi, yi' mihuaad paadip ane'm'ajtín, comeeñ'ajtín, ixpijcin, mic'ajt, cömayín, oy'ajt mij'ajt, etz huin'ihuin huinyaaxin.

¹³ E tüg'óciy iyujc animal je huídijaty Dios ti yajcojy ti yaj'abadíy huídibi jiihy tzajpjoty, etz huíbi ya naaxhuiñ etz naaxpa'tci'py, huídibi jiihy mejjoty, nhuinmidooyich co tüg'óciy ajcxy chachmínaangixy:

Tzoc huin'ihuin tzoc cömayim, tzoc mooyim oy'ajtín etz mij'ajtín huinixii huinitempo je Dios y'ung, je Cordero, etz je huídibi iñaayb ma je ane'mdaacin.

14 Je mídaaxpi iyujc anajty chachmínaangixy:

—Jadu'n huen tuñyí jadyí. Amén.

Chi nañ jadu'n je iipxmídaaxpi je mijjáy ajcxy ycojxtinaygidactay, chi ajcxy ooy huindzigíy patjihuíy je huídibi huínixí huínitiempo tzínaayb.

6

Je huixtujcpi selli

¹ Huin'it nhuin'ijxyich je Dios y'ung, je Cordero, quejtzciich tüg selli ma je huixtujcpi chi nmídooyich, co nidüg je mídaaxpi iyujc ycapxy, jadu'n nmídooyich nej enee yjidity, chi ymínañ:

—Min ya, e chi m'ixipy.

² Chi nhuindixpejtyich, chi nhuin'ijxyich tüg poob cohuay. E je huídibi yaj'íñaayb je poob cohuay ymajtz'ijtpy anajty tüg tip ma yci'. Chi je' yajmoy tüg coroní co yrey'adipy. Chi jada' choñ tziptunaangixy jigix jacmímadägípy ymidzip.

³ Co je Dios y'ung, je Cordero, yaj'ahuaach je mímetzpi selli ma je necy, huin'it nmídooyich je mímetzpi iyujc ma je mídaaxpi ymínañ:

—Min ya, e chi m'ixipy.

⁴ Chi ypidzimy jadüg cohuay tzaptzpi ycolor. E huídibi yaj'íñaayb je cohuay chaptzpi, ycidigíyí cötujcín co je naaxhuiñjáy canayya-jjotcujc'adib ajcxy, e ñayaj'öcigixipy miñ xyipy. E yajmooy tüg espada mijpi.

⁵ Co je Dios y'ung, je Cordero, agíttzuudy je midugígpí selli ma je necy, chi nhuinmídooyich je midugígpí iyujc ma je mídaaxpi, ymínañ:

—Min ya, e chi m'ixipy.

Chi nhuindixpejtyich, chi nhuin'ijxyich tüg cohuay tzixypi. E je huídibi anajty yaj'íñaayb je cohuaychixy, ymíid tüg pujxtzim ma yci'.

⁶ Huin'it nhuinmídooyich tüg ayuc choñ ma je mídaaxpi je iyujc ajcxy yajpaatcixy, ymínañ:

—Tüg denario meeñ chohuíy tüg libra trigo; nañ jadu'n tüg denario meeñ chohuíy tudujc libra cebada, ca' myaj'ayoohuípy aceite etz vino.

⁷ Co je Dios y'ung, je Cordero, yaj'ahuaach je mímadaaxpi selli ma je necy, chi nhuinmídooyich co je mímadaaxpi iyujc ma je madaaxpi ymínañ:

—Min ya, chi m'ixipy.

⁸ Huin'it nhuin'ijxyich tüg cohuay nitzuxy pu'tz, e je huídibi anajty yaj'íñaayb je cohuay, hue' anajty yxí öcpi. Axam anajty ymíiñ je huídibi ane'mb je it ma je öcpi ñimucy. Chi ajcxy yajmoy cötujcín je huídibi yaj'íñaayb je cohuay, jigix yaj'óccixipy je tügpícyipi ma je madaaxpicypí naaxhuiñjáy ajcxy. Chi yaj'ögíp ajcxy míid tzíp, míid yuuba'm, etz míid iyujc ahua'nbi huídibi ya naaxhuiñ.

⁹ Co Dios y'ung yaj'ahuaach je mímigooxpi selli ma je necy, chi nhuin'ijxyich pa'tci'py'amy ma y'ane'mdac yhuinduu, je' ajcxy y'alma huídibi ajcxy yaj'öcpat míid Dios y'ayuc ycíxpi, huídibi anajty ajcxy capxhuäcxíxp etz nidíy'ajt'ajtcíxp Dios y'ayuc. ¹⁰ Je' anajty ajcxy huídibi yaj'ögy patp míid Dios y'ayuc ycíxpi chachmínaangixy janch mic:

—Huindzín, janch mijpi janch huätzpi, huídibi cuydundaayb yí m'ayuc huídibi meyejc ma íich ajcxy. ¿Jadu'ñyí jada' mjac-huäcxíba'ñ mína anajty yí jáy ajcxy mdiydunaangixy mdzaachytunaangixy míid ypocycíxpi huídibi xyaj'o'c íich ajcxy, yí' ajcxy huídibi tzínaayb naaxhuiñyígíxy?

¹¹ Huin'it ajcxy yajmoy nidüg nidüg poobhuit, e yajnimay ajcxy co huen jacpooxcixy jayinjaty jahuenjaty, ixti cooni anajty yajca'pxy je mibijcpidijc micho'n, je' ajcxy huidibi quipxy müid miich ajcxy tumb ma Dios ytung, je' ajcxy huidibi yaj'ögy paadipy müid Dios y'ayuc ytiy'ajt ycixpi, tim jadu'n nej müich ajcxy ti mbaatcixy yaj'ögy.

¹² Chi n'ijxyich co je Dios y'ung, je Cordero, yaj'ahuaach je midudujcpi selli ma je necy, huin'it ooy naax yhuiñyxijty, chi je xii yjajty janch tzixy, jadu'n nej tzixyhuit huidibi co'ögytjic ypidacpy, e je po' y'ahuimbijty nej ni'pyin. ¹³ Chi madza' ooy yca'y naaxcixy tim jadu'n nej piidztim tzuxpi ycäy co micpoj mixidiy. ¹⁴ Chi je tzajp yjihuacni jadu'n nej tüg libro'abidity. Tüg'öciy tungop huidibi naaxhuiñgixy etz huidibi mejy'agujc, cixj chondägy ypidictäy ma anajty y'ity. ¹⁵ Huin'it ñayyützaayi je reydiyc, je mijtungmüdpidijc, generaltjic, comeeñydic, pinjaty ymic'ajt müid, je tumbidijc etz je midumbidijc ñayyützaayi ajcxy nidüg'öciy majaty tzaajut tzaa'ang. ¹⁶ Tzachnimaaygixy anajty tungop tzaajot:

—Nigägootcich nigägootcich, ca'ydi iich ajcxy njac'ixi yhuiñyjip je huidibi ñaayb ma Dios y'ane'mdac, e nañ ca'ydi nbáatcixyich je tzaachypí ayo'n huidibi yegamyb Dios y'ung, je Cordero.

¹⁷ Com ti je xii je tiempo yhuaad'ajtni mina Dios etz Dios y'ung y'ahua'ndägaangixy etz tzaachytunaangixy naaxhuiñjäy. ¿Pin je' ocmimadägip ajcxy chip y'ejin?

7

Huidibi anajty ajcxy tiy'ajtmüid ma je Israel jäy ajcxy

¹ Chi co jadu'n yjajti, chi nhuin'ijxyich madaax ángeles ajcxy ytinaaygixy ma madaax'itpi naaxhuiñybi ytatzcäy. Adujccixy anajty je madaax'it poj ca'ydi ypojp ya naaxhuiñ, ni ma mejy, ni ma quipy. ² Chi nhuin'ijxyich jadüg ángel ymiinüy anajty xibidizimy'amy, müidity ma yci' je Dios juugypi yseli. Jadayaabi ángel ooy mic miyaaxy je jamidaaxpi ángeles ajcxy huidibi anajty ajcxy ti ycidigüygixy je mic'ajt je cötujcin nej huaad yajhuindigooygixy tijaty ya naaxhuiñ etz ma nii mejy.

³ Chi je ángel ymina'ñ:

—Ca' ti ayo'n mdungixy naaxhuiñ, ni ma mejy, ni ma quipy chaa, ixti cooni anajty Dios ytiy'ajt y'ijxpejt nbidaacim ma je' ajcxy yhuimbocin, je tiibi ajcxy huin'ixy huidibi tungixp ma Dios ytung.

⁴ Chi nmidooyich jadu'ñyi je' tiibi anajty ajcxy Dios ytiy'ajt y'ijxpejt ti ymóoyigixy. Migo'px jahuixchigüipx madaax mil je' ñaybaati huidibi anajty ajcxy tiy'ajt müid ma yhuimboc ma nidüg'öciy Israel jäy ajcxy. ⁵⁻⁸ Majmetz mil anajty ajcxy tiy'ajt y'ijxpejt müidity je Judá jäy, majmetz mil je Rubén jäy, majmetz mil je Gad jäy, majmetz mil je Aser jäy, majmetz mil je Neftalí jäy, majmetz mil je Manasés jäy, majmetz mil je Simeón jäy, majmetz mil je Levi jäy, majmetz mil je Isacar jäy, majmetz mil je Zabulón jäy, majmetz mil je José jäy, etz majmetz mil je Benjamín jäy.

Je mayjäy ajcxy huidibi yxoxip müid poob huit

⁹ Chi jada' nhuin'ijxyich janch mayjäy chooñ ma canaag nación, hue' ajcxy canaagnax raza'adyii, e capxy ajcxy canaagnax ayuc, etz chooñ ajcxy ma canaag cajp. Hue' je mayjäy ytinay'ahuiyday ma je mij'ane'mdac huinduu, etz ma Dios y'ung, je Cordero yhuinduu. Janch mayjäy ñimujcy ma je Dios y'ung yhuinduu, ni pin je' anajty huaad

camichoudäy ajcxy. Ac poob huit anajty ajcxy müd yxoxyity, e ymüd anajty ajcxy tüxy'aay ma yci'. ¹⁰E janch mic anajty ajcxy miyaaxcixy Dios, chachmínaangixy:

Hich ajt nDios yi' je' tügpajc huídibi xyajpocyhuaatzim. Hich ajt nDios yi' je' huídibi ane'mdaayb tüg'ócíy, e nañ jadu'n yi' y'ung, je Cordero.

¹¹E nidüg'ócíy je ángelestijc anajty ajcxy ytinaaygixy jühuidityi ma je Dios y'ane'mdac. E cham je mijjáy ajcxy etz je mídaaxpi iyujc huíjoj'ihuüy ajcxy ma je ane'mdac huinduu, huindzigüygixy yajmij'ajtcixy je Dios.

¹²Chachmínaangixy:

Jadu'n jada. Amén. Hich ajt nDios, je' mihuaad huinixi huinitiempo tüg'ócíy je hüün, je xondaacín, je oy'ajtin, je ixpijcin, je jäygdacín, je cómayín, je ane'mín, je mij'ajtin. Amén. Jadu'n jada.

¹³Huin'it nidügti je mij jäy ycapxy, e xy'amidooyich:

—¿Pín jada ajcxy jada' huídibi poob huit müd yxoxyity, e ma yi' jada' ti choongixy?

¹⁴Chi hüch je' n'adzooy:

—Huindzinich, miich mnejhuüyb.

Huin'it je' xy'adzooyich:

—Jada je' ajcxy tübi je mij ayo'n minajxcixy yajnajxcixy, e ti ypocyhuaatzcixy müd je Dios y'ung, je Cordero ñi'py, tim jadu'n nej jihuüy yhuit ti yajhuaatzcixy janch poob ma Dios y'ung ñi'py. ¹⁵Paady yi' ajcxy yajpaady ma Dios chinaydac yjugy'ajttac, e ytungixy xim tzuum ma Dios ytijc tzajpjoty. E yi' Dios y'ung huídibi iñaayb ma je mij'ane'mdac, yi' yi' mi'ijttaayb cuend'aty ma yi' yhuinduu. ¹⁶Ca'p ajcxy jacjihüüygixipy yuu tidzibi, ni xü'an ycajacnögüyb ajcxy, ni anbi ycajacyajtzibüyb ajcxy. ¹⁷Com je Dios y'ung, je Cordero, huídibi cujc'amy yajpatp ma je Dios y'ane'mdac, je' yi' cuend'ajtp ajcxy, jadu'n nej jihuüy cöbixy cuend'aty, e yajnicxip ma je nü huätzpi ymuxy huídibi yejcp jugy'ajtin. Dios yajquégipy yi' ajcxy ytajin ymayín jigix ca' yjacjüygixipy yjacyáaxcixipy müd tajin mayín.

8

Je mihuixtujcpi selli etz je poomjogi'ñ ac oori

¹Co Dios y'ung, je Cordero, yaj'ahuaach je mihuixtujcpi selli, huin'it y'ijty oy jahuengi cup hora amoñi jüby tzajpjoty. ²Chi nhuin'ijxyich Dios y'ángeles huixtujc ajcxy ytinaaygixy anajty ma Dios yhuinduu, e yajmoy ajcxy huixtujc trompeta. ³Huin'it jadüg ángel müñ, chi je' ytinaay'ihuüy ma mesi huinduu ma je Dios ojadajttac. Je ángel ymüd anajty tüg poomjogi'ñ ac oori. Chi ymooyi poom may'amy huídibi jojcp. E je poomjoc tigüyb ma Dios yhuinduu quípxi müd juydacín nuuxtacín huídibi je jäy ajcxy ytumyb huídibi Dios ti huin'ixy ajcxy. ⁴Ma je ángel yci'am jim je poomjoc chooñ ñicxy ma Dios yhuinduu quípxyi müd je oración huídibi ajcxy ytumyb je tübi ypocyhuaatzcixy. ⁵Huin'it je ángel majch je poomjogi'ñ, chi yaj'ujch müd jünbajc huídibi anajty jim ma je Dios ojadajttaacín, chi najtzjibibüy naaxcixy, huin'it ooy yajmidooy jidijtin micpi etz huídizuc e je naax ooy yüxcy.

Je maytrompeti

⁶Je huixtujcpi ángeles ajcxy huídibi anajty müd je huixtujcpi trompeti, ñayni'ixüyi ajcxy co yajxüxaangixy.

7 Je midügpi ángel yajxuuxy je ytrompeti, e huin'it ooy eneediitz yca'y mihuididi jün etz ni'py. Chi oy ycäy naaxcixy. E jahueengi cujc-huäcxy oy nögy je naax, je quipy etz je aay ujtz tzuxjatypi etz nöctay miy.

8 Je mimetzpi ángel yajxuuxy ytrompeti, chi ooy ycäy mejyjoty jadu'n nej tüg mijcop janch tooyb anajty müd jün, e jahuengi cujc-huäcxy je mejy oy y'ahuimbity ni'py. 9 E jahuengi cujc-huäcxy oy y'ögy huidijaty anajty tzinaayb ma je mejy. E je maybarco huidijaty anajty ma je mejy, nañ jadu'n jahuengi cujc-huäcxy oy ytimyhuindigoydäy.

10 Chi je midügpi ángel yajxuuxy je' ytrompeti, e huin'it oy tüg madza' mijpi ycäy. Je madza' jadu'n nipaady nej tüg mijjün huidibi nayyaj-codixim. Je madza' oy ycäy ma jahuen cacujc-huäcxy mijni, etz ma ni müxy. 11 Je madza' hue' je' anajty xii'adyii ta'm'ujtz. E je ni jahuen cacujc-huäcxy oy yjajtni ta'm, jadu'n yta'mity nej ta'm'ujtz, e ooy jäy may y'o'cy müd je ni ycipi co anajty ti y'ahuimbity ta'm.

12 Je mimadaaxpi ángel yajxuuxy je' ytrompeti, e huin'it jahuen cacujc-huäcxy je xii oy yhuindigooy, e nañ jadu'n je po' etz je madza' jahueng cacujc-huäcxy oy yhuindigooy. E müd jadu'n ycipi je po' etz je madza' yhuimigixy jahuen cacujc-huäcxy agootz, e jahuen cacujc-huäcxy ytiixin ocyejcni ajcxy xim tzuum.

13 Chi nhuin'ijxyich tüg me'ty anajty yqueec-huidity cuptzajp, e nmidooyich co ymina'n janch mic:

—¡Ay! ¡Naaxhuiñjyäj ajcxy ayoobidijc! co anajty trompeti yajxüxy je jatugpi ángeles ajcxy, huin'it ayo'n ypada'n je naaxhuiñjyäj ajcxy, ayo'n ypadamy ajcxy, ayo'n ypadamy ajcxy.

9

1 Chi je migooxpi ángel yajxuuxy je' ytrompeti, chi nhuin'ijxyich tüg madza' anajty ti ycäy naaxcixy. E chi je madza' yajmoy je ahuaasti huidibi müd yaj'ahuädzip je ayoodac ma Dios cuend'aty müdity je ca'oybidijc.

2 Chi je ángel yaj'ahuaach je jut ma je ayoodac, e ma je jut jilby ypidzimy jadu'n nej jünjoc huidibi pidzim ma tüg horni. 3 E ma je joc ypidzimy ooy maymu' naaxhuiñyigixy chachqueec-huidijtcixy ooy, e je mu' ajcxy ymooyi mic'ajt, jadu'n nej ca'ty müdity ytijp. 4 Chi je' ajcxy yajcötujcmoy co ca' ni ti aay ni ti ujtz yajhuindigooygixipy huidibi yajpatp naaxhuiñ, ni ujtz ni quipy. Jëyi janchtiy ycötujcin mooyi co huen yajtzaachihuiipy je jäy ajcxy huidibi ca' müdity Dios ytiy'ajt y'ijxpejt ma yhuimboc. 5 Ca' ajcxy yajcötujcmoy co yjajyaj'ó'ccixipy, jëyi co janchtiy ayo'n ajcxy yegipy migoox po'. E je ayo'n huidibi anajty ajcxy yejcpi jadu'n je' nej co ca'ty jäy yajtzaachiy müd ytijp. 6 Je huin'it xii je huin'it tiempo jäy ajcxy ooy anajty o'cin ja'ixtaaygixy e ni ca' pátcixipy. Ooy anajty janijot'átcixy o'cin, e cöguëhib ajcxy je o'cin.

7 Je maymu' jadu'n je' anajty yquëxigy nej maygohuay huidibi ni'ixi'ijtcixp co yajnicxáanigixy ma tzip ytuna'nyii. Ymüd anajty je maymu' ma ycohuajc jadu'n anajty quëxigy nej oori coroni. E je maymu' yhuiñyijp jadu'n yquëxigy nej jäy yhuiñyijp. 8 Je maymu' ymüd anajty ycöhuay jadu'n nej töxyjäy ycöhuay, e ytiitz jadu'n nej jamгаа ytiitz. 9 E je maymu' ymüd anajty ajcxy jadu'n nej pujx huidibi müd ñinixc cohuangixy. E co ajcxy queec-huidity, ooy ajcxy yqueec yaj'amüy jadu'n chachne'miy nej je carro huidibi cohuay ajcxy yjugujcpi co ñicxixy

ma tzip ytuñyii. ¹⁰ Je maymu' ymïid anajty ajcxy ypïxy tím jadu'n nej ca'ty ypïxy, e ma ajcxy ypïxy ymïid anajty ytïp. E ma ajcxy ypïxy mïidity anajty je mic'ajt co jây ajcxy yajtzaachihuiipy migoox po'. ¹¹ E je maymu' je' ajcxy yrey'ajtpy je ángel huidibi nigohuajc'ajtp je ayoodac, hue' xii'adyii hebreo'amy Abadón, e griego'amy yxiiijity Apolión, hue' je yxii yhuimbïdzimy: je huidibi yajhuindigooyb.

¹² Najx je' je ayo'n jayijpi, e ytigoy'ity je jametzpi ayo'n co je jayijpi ti y'ocjadyii.

¹³ Je midudujcpi ángel yajxuuxy je ytrompeti, chi nmïdooyich tüg ayuc chooñ ma je mïdaaxpi huaj mu'n ity ma je altar ac óoribi, huidibi anajty ijtp ma Dios yhuinduu. ¹⁴ Je ayuc ymïna'ñ:

—Nïma' je midudujcpi ángel huidibi anajty trompeti mïid: “Najtzmazdi' yi mïdaaxpi ángeles huidibi ajcxy coxoch ijtp ma Eufrates mijniiba'.”

¹⁵ Huin'it oy yajcoguejttuutcixy je mïdaaxpi ángeles, jigix yjâyaj'o'ccixipy jahuen cacujc-huäcxy huidibi yajpatp ya naaxhuiñ. Je mïdaaxpi ángeles ni'ixi' je' anajty y'ijtcixy, je huin'it hori, je huin'it xii, je huin'it po', je huin'it jimijt co anajty yaj'ögaangixy jahuen cacujc-huäcxy je naaxhuiñybi jây ajcxy. ¹⁶ E nmïdooyich co ajcxy michoy je soldadtïc huidibi anajty ajcxy cohuaygïx. E hue' mejtz mïgo'px millón anajty ajcxy ñaybattáayigixy je soldados ajcxy.

¹⁷ Jadu'n nhuin'ijxyich je cohuay ajcxy, e mïid je ñijây ajcxy huidibi anajty yaj'iñaayb. E je ñijây ymïid anajty ajcxy pujx ma ycaach, je' mïid ñiniïcx cohuaangixy. E je pujx hue' anajty ycolor tzaptz, azul etz pu'tz. Je cohuay ajcxy jadu'n anajty ycohuajc nej jamгаа ycohuajc, e ma ajcxy y'ahuac ypidzimy nej jïin, nej jïinjoc, etz nej azufre. ¹⁸ E mïid jada jahueng cacujc-huäcxy naaxhuiñyjay chach'o'cy ajcxy mïid je jïin, je jïinjoc etz je azufre ycixpi huidibi anajty pidzimb ma je cohuay ajcxy y'ahuac. ¹⁹ Je cohuay ajcxy ymïid anajty mic'ajt ma y'ahuac etz ma pïxy. Com je' ajcxy ypïxy jadu'n je' anajty nej xoox mïid ycohuajc, e je cohuay ajcxy chach'ahua'ndaaccixy mïid ypïxy.

²⁰ E je jacjadyii jây ajcxy huidibi ca' y'o'cy mïid jadayaabi ayo'n, ca' ajcxy yjothuimbijty ma Dios, ca' ajcxy ixmajch je jibicpi huidibi ytungixp. E ni ca' ajcxy ixmajch nej ajcxy je ca'oybi huindzigïygixy. Nañ jadu'n ca' ajcxy ixmajch nej ajcxy huindzigïygixy huidijaty ajcxy oyduñyïp mïid plata, mïid bronce, etz tzaadzech etz quipychech. Je huidijaty ajcxy y'oydumyib etz ñidzejtztuutcixy, ni yca'ijxcixy, ni ycamidoogixy, ni yca'yöygixy. ²¹ E ni ca' je jây ajcxy yjothuimbijtcixy ma Dios, ca' ajcxy ixmajch jadu'n nej ajcxy chachjâyaj'o'ccixy, jadu'n nej ajcxy tzachaxpojccixy ymïgügtïc, jadu'n nej ajcxy huingbi töxyjây tzachmïgapxtigooygixy, etz jadu'n nej ajcxy chachmeetzcixy.

10

Je ángel mïid je mutz libro

¹ Nhuin'ijxyich co chooñ tzajpjoty tüg ángel micpi ñiducyity mïid joc, e mïidity i'ñich ma ycohuajc. Je yhuin'yijp yquëxïgy nej xii. Je' ytecy jadu'n yquëxïgy nej mijjïinye'n. ² E ma yci' mïidity tüg libro yëphuäcxy, e pidacy y'a'oydecy mejyhuingïxy, e y'anajtytecy pidacy naaxhuiñgïxy. ³ Chi je ángel oy janch mic yaaxquency jadu'n nej tüg jamгаа yäxy. E co anajty jadu'n ti yaaxquëgy, chi oy yajmïdoy huixtujc jidijtin huidibi ycapx

yci'm'ayuc. ⁴ Co je huixtujcpi jidiŋtin oy ycapxtaaygixy, chi ñch anajty njaaya'ñich huidibi ti capxy. Chi nmidooyich tüg ayuc chooñ tzajpjoty xyñimäyich:

—Mi'it jada ayuc yüch huidibi yi huixtujcpi jidiŋtin ti capxy, ca' mjaay.

⁵ Chi je ángel huidibi nhuin'ijxich co mejyhuingíxy etz naaxhuiñyíxy ytinäy, yujcxajy yci' a'oy'amybi tzajpcíxy. ⁶ Chi je ángel capxcödujcy co je Dios huidibi jugy'ajtp huinixi huinítiempo, je huidibi yajcojy je tzajp, je naaxhuiñybi, je mejy etz tüg'óciy huidibi jii by yajpattaayb; e je Dios jadu'n ymina'ñ:

—Ca' jada yjac-huäcxibani mina nguexa'ñich tzaachypi ayo'n ya naax-huiñ. ⁷ Co yhuaad'ajtnip je xi je tiempo ma anajty je mihuixtujcpi ángel yxuux yajxuxtöndägy, chi cuyduunip je Dios y'ayuc yti'y'ajt huidibi ca'pin anajty huinjihuíy, je ayuc huidibi je Dios ytumbidiŋc je profetas ajcxy ñajtzcapxíy jecy'ajty.

⁸ Je ayuc huidibi nmidoohuich, je huidibi anajty ti chooñ tzajpjoty, ycapxy je' jadüg'oc, e xyñimaayich:

—Nícx miich etz ciyíy yi libro huidibi yēphuäcxy yi ángel ymüid ma yci'. Je' je' je ángel huidibi anajty tinaayb mejyhuingíxy etz naaxhuiñyíxy.

⁹ Chi n'óyich ma je ángel nbijctzooyich co huen xymöyich je pi'clibro, chi je' xyñimaayich:

—Matz e cojicxnax, e xyajta'mmüyip mjot e ma miich m'ahuac mjihuíhuipy päg jadu'n nej ceripäg.

¹⁰ Huin'it ñch je pi'clibro ngiyígy huidibi je ángel anajty ymüid ma yci', e chi ñch je' ngöjicxnajxy. Ma ñch n'ahuac njihuíyich janch päg jadu'n nej ceripäg. Co oy ngojicxnajxtäyich, chi oy y'ahuimbijtni janch ta'm ma ñch njot. ¹¹ Chi mic'amy nyajnimäyich:

—Nícx miich capxhuäcx jadüg'oc je ayuc huidibi Dios ti xymöy, je huidibi ti mgapxhuäcxy ma je mayñaax maygajp, ma je mayñaciones, huidibi canaag ayuc capxcixp, etz ma je reydiŋc ajcxy.

11

Je metzpi testigo

¹ Chi jada' nyajmooyich tüg paxy, jahuengi jadu'n anajty yquëxígy jadu'n nej baari huidibi quipx yajhuamb. Chi ajcxy xyñimäyich:

—Pidíg e quipxta' yi Dios ytijc, nañ jadu'n quipx je mesi ma Dios yajhuindzígíy, etz nañ jadu'n michou naag jäy ajcxy jii by Dios huindzígíygy. ² Je Dios ytiba' ahuing miich je' pidäg, ca' mguipxipy. Com yi' yi' ti ycidígíyüi yi jäy ajcxy huidibi ca' yjudíoŋäyity. Yi jäy ajcxy huidibi ca' yjudíoŋäyity ymimadägamyb ajcxy je Jerusaléngajp ma Dios müidity tzinaydac etz ane'mamb ajcxy jii by huixchiguiŋp metz po'. ³ ñich metz testigo nguexipyich ma je cajp ma Dios müidity tzinaydac, e yi' ajcxy capxhuäcxamb ñch n'ayuc tüg mil jametzmiŋgo'px jatugi'px xii. Yxoxyity ajcxy müid huit nücuyjaam ixcuyjaam.

⁴ Je metzpi testigo jadu'n nipaady nej je metzpi olivo cop etz je metzpi candelero huidibi tinaaygixp ma je Dios yhuinduu, je huidibi ñaaxhuiñybi ane'mb. ⁵ Pen ji pin nej jaty midundigoya'ñ je metzpi testigo, je' ajcxy yajpidzimip je' ajcxy jii ma y'ahuac, yjicxtähuiipy yjiiñdähuiipy je' ymidzip. E jadu'n je' y'ögipy pinjaty anajty je metzpi testigo midundigooyb. ⁶ Je metzpi testigo ymüid yi' ajcxy cötujc co

ahuäctúccixity je tzajp, ca'ydi ytüy jadu'ñyi tiempo anajty ñhuäcxixy capxhuäcxixy Dios y'ayuc yti'yajt. E nañ jadu'n ymüd ajcxy cötujcín co nñ yaj'ahuimbíjtcixipy ni'py. Yi' ajcxy yajtunüib yaj'jadiib canaagnax ayo'n ya naaxhuiñ, naag'oc anajty ytimdzóccixy. ⁷ E co anajty je metzpi testigo ajcxy yajmaaygixy ytung, chi je iyujc huidibi anajty pidzim ma je ayoodac, je abismo, je' je' tziptuunip müd je metzpi testigos etz yaj'öctähuij je metzpi testigo. ⁸ Chi je metzpi testigo ñinícx ajcxy yhui'mipy mijñüguc mñjtüguc jim ma je mij ciudad ma je Huindzin Jesucristo yajcruudzpejti, je cajp huidibi tundigooy müd Dios tim jadu'n nej Sodoma etz Egipto ytundigooy jecy'ajty. ⁹ Nijëjty jäy ajcxy huidibi xi ya conaaxip cogajpíp, oy ypinjäyity, oy ti ayuc capxcixy, y'ixipy ajcxy tugüig xiijagup je metzpi testigo ñaaxnicx mñjtüguc, e ni ca'a'ixihuiipy ajcxy co yajnaaxtigihuiiyb. ¹⁰ Huidijaty ajcxy tzinaayb ya naaxhuiñ ooy yxondáaccixipy etz yjotcugüiygixipy müd je' ycixpi co je metzpi Dios ytestigos ajcxy anajty ti y'o'ccixy. Chi je mayjäy ajcxy miñ xyipy ñaymóoyigixipy tijaty, e ñayyajñigüéjxigixipy tijaty. Com je metzpi yëydijc huidibi nidiy'ajt'ajtp anajty Dios yti'yajt, ti anajty ooy ayo'n yejccixy ma naaxhuiñyäjy ajcxy. ¹¹ Codugüigxi jacup naxy, chi Dios cijx yajjugypijctäy je metzpi öcpi, e chi ajcxy jadüg'oc ypidígy, e pinjaty je' iix, ooy je' ajcxy chachchigüiy. ¹² Je metzpi testigo huidibi nidiy'ajt Dios, midoy ajcxy tüg ayuc janch mic jüly tzajpjoty anajty ñimáayigixy:

—Pejtcix yeeby cix.

Chi ajcxy ypa'ttigüy tzajpjoty ma tüg joc, e iixi ajcxy ymidziptijc. ¹³ E janch huin'itiy ooy naax yücx müd tüg mic ujx. E tüg picypí je majc picypí jäy jim Jerusalén oy ymijähuiiygixy. E müd je ujx ycixpi y'o'cy ooy mayjäy, ñaybaati je öcpi huixtujc mil yëydijc. E jacjadyii jäy ooy chigüiygixy yjihuiiygixy, e ojadajtcixy mibijctzoogixy ooy je Dios tzajpjotyti.

¹⁴ Ti ñaxy je mmetzpi ayo'n, chi tzojc ymiñ je midugüigpi.

Je mihuixtujcpi trompeti

¹⁵ Chi je mihuixtujcpi ángel yajxuxy je' ytrompeti, e huin'it oy yajmidooy may'ayuc tzajpjoty mic yminañ:

Je ane'min huidibi ya naaxhuiñ, yi' je' cham müd ajt nHuindzin Dios etz y' yCristo, e yi' je' ane'mip huinixi huinitiempo.

¹⁶ Je iipxmidaaxpi mijjäy huidibi anajty ajcxy ñaayb ma y'ane'mdac ma Dios yhuinduu, cijx je' ajcxy yhuijoj'ihuiydaaygixy, e chi ajcxy ooy Dios ñibaty capxpaty, yminaangixy:

¹⁷ Huindzin Dios, Dioscojuyip nyajnájxcixpich ma miich, huidibi jac mic'ajt müd ca'ydi jac pin. Miich tüg'ócüy mdundaayb mja-taayb mnejhuuydaayb. Miich je' huidibi ijtñaayb, e ti m'ijtnäy, e m'ida'ñyi, com miich ti m'ijxcugüy je mgötujcín, e ti mbidägy m'ane'min.

¹⁸ Mayñaax maygajp mayñaaxhuiñyäjy ooy yjotmäty ajcxy, müd co ti xii hori paady co miich mdzaachytunañ je jäy ajcxy müd ypocy ycixpi. Ti je xii je hora paady co miich mdäyduna'n je jäy ajcxy tiibi y'o'ccixy. Ti je xii je hori paady co miich mmöhuañ je mdumbidijc ypremio, je mdumbidijc huidijaty najtzcapxiy ajcxy miich m'ayuc, huidijaty tudägyajtin ti patcixp ma miich, je huidijaty miich mxii ychigüiyip, huen ymij'ana'city huen

ymutz'ana'city. Ti je xii je hora paady co miich myajtigoya'n je pinjaty yajhuindi gooygixyp naaxhuiñyäjy ajcxy.

¹⁹ Je huin'it tiempo oy Dios je ytjic y'ahuäch jii by tzajpjoty, e chi huin'ijxyich je caax ma Dios ycötujcin y'ity. Nañ jadu'n oy nhuin'ijxyich huidzuc, etz nmidooyich co ooy ñe'my, etz nmidooyich enee yjidjtin, etz njihuñyich tüg ujx, etz ooy yca'y eneediitz mijatypi.

12

Tüg töxyjäy etz je ama'y tza'n

¹ Je huin'it hora oy yquëxigy tzajpcixy tüg ijxpejt mijpi. Tüg töxyjäy ñidigooyity müid xii, jadu'n nej jihuñy müd tüg huit ñimochity, e jadu'n yquëxigy nej jihuñy anajty po' yajhuäcpety, e ymüid ma yochuajc tüg corona ac oori huidibi majmetz madza' müid. ² Jadayaabi töxyjäy hue' anajty ungmijäy'ajtp, e janch yaax tinaayb je' anajty müid je tzaachypi, müid co y'ung anajty yajma'xung'ada'n. ³ Huin'it oy yquëxigy jadüg t'y'ajt ijxpejt tzajpcixy. Tüg ama'y tza'n janch mij, tzaptz ycolor, e müidity huixtujc yochuajc, majc ymu'n, e tüg corona majaty yochuajc. ⁴ Je mij tza'n müid je' ypixy jugujcmujcy jahueng cacujc-huäcxy je madza' jim tzajpcixy. Chi je' najtzyemiyday je maymadza' naaxhuiñygyxy. Je mij tza'n oy yhuäcxipy ma je töxyjäy yhuinduu huidibi anajty ungbadamb tzojc, chi tzüdzan'ñ je pi'c'ungma'xung janch tim jëyi anajty yma'xung'aty. ⁵ Chi je töxyjäy yajma'xung'ajty tüg pi'cyëdyjc, huidibi ane'mip müid Dios ymic'ajt, ymüid y'i tüg pujxtajc huidibi ijxpejt ajt co mij ane'min müidity ya naaxhuiñ. E yajpijcy je y'ung, chi yajnicxi ma Dios etz ma je' y'ane'mdac. ⁶ Chi je töxyjäy yqueecy ñicxy mijtigiduum, ma anajty Dios ti ñi'ixiyii y'it ylugar co jim y'idipy, e jim ymöhuyb ycaayin y'uucin tüg mil jamejtzmgog'px jatugi'px xii.

⁷ Je huin'it tiempo tüg tzip yjajti tzajpjoty müid je' ycixpi. Chi Miguel huidi mij cötujcin müid, müid jadyii y'angeles ajcxy, ooy chiptuñ müid je ama'y tza'n etz y'i y'angeles ajcxy. ⁸ E ca'p je ama'y tza'n ajcxy ymadacy ma je tzip, e ca'p je' ajcxy müid'ajty tigiydac tzajpjoty. ⁹ E jadu'n Dios yajqueecy je mujcu', je ama'y tza'n mijjäybi, jii by tzajpjoty. Je' je' je ama'y tza'n huidibi xii'ajtp diablo etz Satanás, je huidibi huin'imb tüg'ocy naaxhuiñyäjy. Je mujcu', je ama'y tza'n, müid je' y'angeles ajcxy oy yajcötijnajxtäy ya naaxhuiñ.

¹⁰ Je huin'it hora nhuinmidooyich tüg ayuc janch mic tzajpjoty chooñ, yminañ:

—Ti je xii je tiempo nigoody mina Dios ti nihua'n ti yajnëdzögy jäy ajcxy ma je mujcu'; mina Dios ti yajni guëxigy y'i ymic'ajt; mina Dios ti yajni guëxigy y'i y'ane'min; etz mina Cristo ytigiy ane'mbi müid ymic'ajt. Com ti Dios cötijnaxy je mujcu' huidibi tzachxip ich ajt nmigügtjic, je mibijcpidijc. Je mujcu' anajty tzachxip ajcxy xim tzuum ma Dios. ¹¹ Ich ajcxy nhermanotjic ti y'i mimadaaccixy je mujcu' müid je Dios y'ung ñi'py, etz müid je' y'ayuc ytiy'ajt tiibi mibijccixy, je huidibi ajcxy nidiy'ajtcixp ma y'i mayjäy. Ca' ajcxy tzigiy anajty co yjugy'ajt ytigöoygixip. Niği ni'ixi y'ijtcixy anajty müid ymibijcin oy ytimy'ó'ccixipy. ¹² Jotcujc'ajtcix etz jotcugiygix huidibi jii by tzinaaygixp tzajpjoty. Ayo'n ypadamyb ajcxy huidibi tzinaayb naaxhuiñygyxy etz mejyjoty. Com je mujcu' ti je' ycidägy

ma miich ajcxy m̄id chip y'ejc̄in. Com je mujcu' ñejhuh̄iyb co tim jayinjaty jahuenjaty x̄i tiempo jacm̄idity.

¹³ Co je mujcu' ijxy co ti yajc̄otijnaxy ya naaxhuiñȳḡixy, chi ooy pahuidijttacy je t̄oxyj̄äy huidibi anajty ti yajpi'c'aty pi'cyēyd̄ijc. ¹⁴ Chi je t̄oxyj̄äy metz me'tyqueec mijpi yajmoy, jigix c̄oguēḡipy je ama'y tza'ñ, ñic̄xip agueeḡiccip mijtiḡiduum ma je ama'y tza'ñ ca' ñijād̄iiby. Jim mijtiḡiduum yajmoy ycaayin y'uucin tuḡiiḡ jimijt ja cup. ¹⁵ Chi je ama'y tza'ñ ooy n̄i yajpidzimy ma y'ahuac, jigix y'ahuimb̄idipy mij n̄i huidi je t̄oxyj̄äy paguj̄ip mij ñijoty. ¹⁶ E yi naax ooy je t̄oxyj̄äy pubejty, chi je naax y'ahuācx̄y, e uuct̄itt̄tay je n̄i huidibi anajty je ama'y tza'ñ ti yajpidzimy ma y'ahuac. ¹⁷ M̄id jada yc̄ixpi je ama'y tza'ñ ooy y'ahua'ndacy m̄id je t̄oxyj̄äy, chi ñic̄xy tziptumbi m̄id je t̄oxyj̄äy y'ap y'oc huidibi jac̄m̄ip, je' ajcxy huidibi cuydumb Dios y'ane'm̄in yc̄otujc̄in, je' ajcxy huidibi cuydumb je ayuc huidibi Jesucristo anajty capxhuācxyp.

13

Je metzpi ca'oy'iyujc

¹ E jim nd̄inay'ihuh̄iyich ma p̄ujot mejyp̄abi. Chi nhuin'ijxyich co t̄üg iyujc janch oy chiḡiñi ypidzimy mejjoty ym̄id anajty huixtujc ycohuajc, e majc ymu'n. E ma ymu'n m̄idity majc corona. E ma ycohuajc m̄idity anajty cojaay yx̄i huidibi yajjotma'tp Dios. ² Jadayaabi ca'oy'iyujc huidibi nhuin'ijxich, jadu'n anajty yquēx̄igy nej t̄üg cuuxyubijy. E ytecy jadu'n anajty yquēx̄igy nej osi ytecy, e y'ahuac jadu'n anajty yquēx̄igy nej jamgaa y'ahuac. Chi je ama'y tza'ñ oy c̄otujc möy, mic'ajt möy, mij'ane'm̄in möy, je ca'oy'iyujc. ³ E n'ijxyich t̄üg ycohuajc ma je ca'oy'iyujc co mij chaach̄ijity, nej jihuiy je' yaj'öḡiib. Chi je chaach̄i'au oy choogy, e t̄üg'óc̄iy naaxhuiñȳj̄äy ooy janch jihuiyiḡixy huinmaayḡixy m̄id jada yc̄ixpi co ti choocy. Chi je mayj̄äy ajcxy pan̄ic̄xy je ca'oy'iyujc. ⁴ Je mayj̄äy ajcxy ooy huindziḡiyḡixy je ama'y tza'ñ, je mujcu', com je' co anajty ti möy c̄otujc̄in ane'm̄in je ca'oy'iyujc. Chi ajcxy nañ jadu'n ooy huindziḡiyḡixy je ca'oy'iyujc, chachm̄inaangixy:

—¿Pin jada' ocjadu'n̄ip nej jadayaabi ca'oy'iyujc, e pin jada' octzip-tuun̄ip m̄id yi'? Ca' pin.

⁵ Chi je ca'oy'iyujc yajmooyi mic'ajt, jaydēbi am̄ij agix capx̄ip etz nigapx̄ip Dios oy jib̄ic, nej huaad Dios yajjotm̄äty. E nañ jadu'n mic'ajt moy, jaydēbi m̄id'adipy ane'm̄in c̄otujc̄in huixchigūipx metz po'. ⁶ E jadu'n je' tuuñ. Nigapxy ni'oj̄iyi ooy Dios. Nigapxi Dios yx̄i oy ca'oy, etz nigapxi ni'oj̄iyi Dios ytiyc. Nañ jadu'n nigapxy ni'oj̄iyi huidibi ajcxy j̄iiby tzinaayb tzejp̄joty. ⁷ Chi mic'ajt ymooyi, jigix chiptuun̄ip m̄id je huidijaty m̄ibijcp Dios, huidijaty m̄id ity Dios, ixti m̄ibaad m̄imadaaccixy. Nañ jadu'n mooyi c̄otujc̄in mic'ajt, jigix ane'm̄ip naaxhuiñȳj̄äy huen huidibi razaity huen huidibi cajpity, huidibi capxc̄ixp huen huidibi ayucity. ⁸ T̄üg'óc̄iy mayñaaxhuiñȳj̄äy ajcxy huidijaty janch ni ycamiñ yx̄i jaybety ma je jugy'ajt libro huidibi je Dios y'ung, je Cordero, ym̄id. Dios yhuinma'ñypidacy jayijp ca'ni naaxhuiñybi anajty chond̄ägy co y'ung y'öḡa'ñ m̄id j̄äy ajcxy yc̄ixpi, jaydēbi cijxjaayi ajcxy yx̄i ma yi jugy'ajt libro.

⁹ Pinjaty t̄adz'ac m̄id, pinjaty mido'm̄bigamb jada ayuc, huen mido'm̄bijccixy. ¹⁰ Pen Dios ti yhuinma'ñypidägy co pinjaty ym̄igüg yajnicx mach, nañ jadu'n je' ajcxy nic̄xip mach ci'm. Pinjaty ym̄igüg

yaj'öcp nañ jadu'n y'ögip jadu'n nej ymügüg anajty yaj'ögy. Paady ycixp yi' ajcxy huudijaty mibijcp Dios, huen yajtungixy müd ymügügtijc mecxtujcin etz mibijcin.

¹¹ Huin'it nhuin'ixyich jadüg ca'oy'iyujc chooñ naaxjoty, e ymüid anajty metz ymu'n, tim jadu'n nej pi'ccöbixymang ymu'n. E je' jadu'n anajty ycapxy nej je ama'y tza'ñ ycapxy. ¹² Je mimetzpi ca'oy'iyujc ymüid ane'min huudibi je jayijpi ca'oy'iyujc ti ymöyüi. Je mimetzpi ca'oy'iyujc jadu'n ane'my co je poj naaxhuiñ etz je naaxhuiñjyä huen ojadajtcixy huindzigiygixy je jayijp'atypi ca'oy'iyujc huudibi anajty je chaachi'au ti chögy. ¹³ Nañ jadu'n ooy anajty tijaty mijhuinma'ñ tuñ, ixti jin yajcödigiyb tzajpcixy, yajcäy naaxcixy ma jäy ajcxy yhuinduu. ¹⁴ E müid je mijhuinma'ñ huudibi je mimetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'ñ huudijaty ajcxy tzinaayb naaxhuiñ. Nañ jadu'n je' pidacy y'ane'min co yajniogjtúutcixipy je ca'oy'iyujc huudibi anajty tzachijp müid espada, e ca' y'ögy, jadu'n anajty jactzinäy. ¹⁵ Je mimetzpi ca'oy'iyujc yajmic'ajtmoy co yajjugy'adip je tzaadzech tibi anajty yajniogjtúutcixy, jigix je' ycapxipy etz nañ jadu'n jigix je' ane'min pidagipy co yaj'öctähuipy pinjaty ca' y'ojadadyi. ¹⁶ Chi je mimetzpi ca'oy'iyujc ane'my yi pi'ctijc, mij'anactijc, mijjäydijc, comeeñydijc, ayoobitijc, tumbidijc, midumbidijc etz jac pinjaty co huen ajcxy tiy'ajt iixpejt jadu'n pidaaccixy ma ajcxy y'aoygi', o pen ca', ma yhuimboc. ¹⁷ Jadu'n ytuñ jigix ni ca'p anajty pin huaad ti juy toogy, pen ca' je' ajcxy ymüid je ca'oy'iyujc tiy'ajt y'ixpejt, o yxi, o je' yxi ñinúmero. ¹⁸ Jadayaabi ayuc chojcpy ixpjcin, pinjaty huinjhuib jébi mihuinma'ñybaady ti número je ca'oy'iyujc müd. Je' je' je' número huudibi tüg jäy müidity. Je jäy ñinúmero hue' je' tudujc migo'px jatugipx tudujc.

14

Je nimigo'px jahuixchigüipx milbi yëydijc ajcxy y'iy

¹ Chi jada' nhuin'ixyich cumäyjoty je Dios y'ung, je Cordero, anajty ytinäy ma je cögor huudi yxi Sión. Ymüid anajty migo'px jahuixchigüipx madaax mil jäy huudibi anajty ajcxy müd cojay ma yhuimboc je Dios y'ung yxi, etz yi' yTeedy yxi, je Dios Teedy. ² Nhuinmidooyich tüg ayuc chooñ tzajpjoty, jadu'n nmidooyich nej mijñi y'a'ñich, nej enee yjidity. Hue' je' anajty nmidooyich nej mayjäy y'arpa yajcoogixy. ³ Ooy anajty ajcxy igixy tüg iy jemybi ma je mij'ane'mdac yhuinduu, ma je midaaxpi iyujc jugy'ajtmüdpí yhuinduu, nañ jadu'n ma je mijjäy ajcxy yhuinduu. Jac ni pin je' anajty ca' huaad ixpicy je iy, jéyi ajcxy je huixchigüipx madaax milbi jébi ixpjccixy je iy, je huudibi ajcxy Dios ti yhuin'ixyüi etz ti yajnidzögy ya naaxhuiñ. ⁴ Jada je' ajcxy huudibi ca' ajcxy migapxtigooygixy töxyjäydijc, huädz tudägy ajcxy yjot yhuinma'ñ müidity, ca' ajcxy pijccixy. E ypanicxyp ajcxy je Dios y'ung, je Cordero, oy tim ma'amy ñicxy. Yi' ajcxy je jayijp'atypi jäy ya naaxhuiñ huudibi Dios ti yjuybidzimy ma anajty ijtcixy codoogiy müid ypocy ycixpi. Jadu'n ajcxy nipaady ma Dios Teedy etz ma je' y'ung, je Cordero, nej je tim jayijpi je almas ajcxy huudibi ti yajpidzimy ya naaxhuiñ. ⁵ Ni ti anñ ti ycayaipaady ma je' ajcxy. Com ca' ajcxy tibocy müidity, ca' ti xihuin ajcxy müidity ma Dios y'ane'mdac.

Je nidugügpí ángeles ajcxy y'ayuc ytüy'ajt

⁶ Chi nhuin'ijxyich jadüg ángel yqueec-huidity cuptzajp, e ymñid anajty Dios ytiy'ajt jemybi oybi huidibi ijtp huinixii. Hue' je' yajcapxhuäcxip ma huidibi anajty ajcxy tzinaaygixp naaxhuiñ, huindu'my nación, huen huidibi jäyity, huidibi capxp huen huidibi ayucity, huidibi tzinaayb ma huen huidibi cajpity. ⁷ E je ángel ymina'ñ anajty janch mic:

—Tzigiiygix Dios, huin'ügix huinyaaxcix cömaygix Dios. Ti paady je xii je hori'mina Dios tiyduna'ñ yajtigoya'ñ yi' ajcxy huidibi jibic tumb. Ojadajtcix je huidibi yaj'oyiy je tzajp etz je naax, je mejy etz majaty nii ymuxy.

⁸ Co je midügpi ángel ycapxtaay, chi je mimetzpi ángel ymina'ñ:

—Ti ymic'ajt ytigoydäy je Babilonia je mijpi cajp. Yi Babilonia jäy ti yajhuinma'ñydgoydäy je naaxhuiñjäy miid yjibic-huinma'ñ, paady yi Babilonia jäy ayo'n müdity cham, com je Dios ti ymijotmättäyij ajcxy. Jadu'n Babilonia nipaady nej tüg töxyjäy huidibi huin'ñmb yëdyictjic müid anii etz jocnii.

⁹⁻¹⁰ Co je mimetzpi ángel ycapxtay, chi je midugüigpi ángel ymina'ñ janch mic:

—Pen pinjaty huindzigiiyb yajmij'ajtip je ca'oy'iyujc etz je ñügojtuutin etz nañ jadu'n cöbijccixy je ca'oy'iyujc ytiy'ajt y'ijxpejt ma yhuimboc o ma yci', hue' Dios tzaachytunib yi jadu'mbi jäy ajcxy mictägy, ypaadip ajcxy Dios chip y'ejcín. Tim jadu'n nipaady nej jihuüy Dios yaj'ügyii ajcxy je vino nii huidibi yi' ti ni'ixiy. Dios ti ni'ixiy je it ma ajcxy ayo'n pada'ñ, tim jadu'n nipaady nej je tasi ma Dios yvinonii ijtp. Chi je' ajcxy ayo'n paadipy ma ytoy je mijjin müid azufre ma je Dios y'ángeles yhuinduu etz je Dios y'ung, je Cordero, yhuinduu. ¹¹ Je jinjoc huidibi anajty pidzim ma anajty je mayjäy ayo'n paatcixy, pidzimip je' huinixii huinitempo. E ni pocxin ycaca'ty xim tzuum müid je pinjaty anajty huindzigiiyb pa'tjihuiyb je ca'oy'iyujc etz müid y'ahuinax, o pen ycöbijcipy anajty je ca'oy'iyujc yxii ycojayity ma yhuimboc o ma yci'. ¹² Com Dios chaachytunayb je jäy ajcxy huidibi ijtp müid je ca'oy'iyujc, paady ycixp copicy co yi jäy ajcxy huidibi ijtp müid Dios huen cuydungixy yajxon Dios y'ane'min ycötujcín etz huen mibijccixy mijpidaaccixy tudägy Jesús, etz nañ jadu'n yajtungixy mecxtujcín ma ajcxy chinaayin.

¹³ Nmidoohuich tüg ayuc tzajpjoty chooñ xyñimäyich anajty:

—Cojay jada ayuc: “Jadachambi etz jacnicxpi xii tiempo, jotcuyc ajcxy huidijaty öccixp co mibijccixy je Huindzin Jesús.” Je Espíritu Santo ymina'ñ co jadu'n tunamb jadamb, pocxnip ajcxy nej ytungixy, e co ajcxy yjadipy tzajpjoty, chi ajcxy nejhuihuip je' ajcxy tzajpjoty tzinaaybi jadu'n nej je mibijcpi ajcxy anajty oybi ti tungixy.

Co Jesús anajty miñ tiyduñ tzaachytuñ jibicjäydij

¹⁴ Chi jada' nhuin'ijxyich tüg joc janch poob. E ma je joc nicx iñäy tüg yquëxigý nej je jäy huidibi tsoon tzajpjoty (je Cristo). Je' ymñid anajty ma ycohuajc tüg corona ac oori, e ma yci' müdity tüg hoz janch jijpi. ¹⁵ E ypidzimy ma je Dios chinaydac jadüg ángel, je' tzachmiyäxy anajty janch mic je huidibi anajty iñayb jocnigixy, ymina'ñ:

—Pidäg yi mhoz, e yajpidig yi cosecha, com ti paady je xii je hori etz je cosecha ti chamni jibby naaxhuiñ.

¹⁶ Huin'it je' pidacy je' yhoz ya naaxhuiñ, je huidibi anajty iñayb jocnigixy, chi ya naaxhuiñ yajpidigý je ycosecha.

17 Nañ tím jadu'n huin'it jadüg ángel ypidzimy ma je Dios chinaydac jilby tzajpjoty. Nañ jadu'n je' anajty müidity yhoz janch jijp. 18 Chi jadüg ángel ypidzimy ma je Dios ojadajttac huídibi anajty cötujc müid ma je jin. Chi yaaxi janch mic je huídibi anajty je' yhoz janch jijpi müid, chi nimay:

—Pidäg yi mhoz janch jijpi ma yi muuxycha'm cosecha huídibi yajpatp jilby naaxhuiñ, com ti ooy chamni.

19 Chi je ángel yajnajxy je' yhoz naaxhuiñ, chi yajpidigy je camuuxycha'm cosecha, chi tüg'ítiy yajnidacy ma huaad yajhuinmüicy. Hue' je' yhuimbizimy co je' je' je mij ayo'n je mijzaachypi huídibi Dios yquexamyb müid jäy ajcxy ypocy ycixpi. 20 Je camuuxycha'm hue' je' oy yajhuinmüicy Jerusalén cajppa'. Ma anajty ti y'ocnidacpi ypidzimy ooy ni'py janch com, ycoody mabaad je cohuay ajcxy müidity yfreno, e ymijhuin'ajtin hue' anajty müidity tugüig migo'px kilómetro.

15

Yi ángeles ajcxy müid je huixtujcnajxpi ayo'n

1 Huin'it nhuin'ijxyich jadüg tiy'ajt ijxpejt janch mijpi tzajpjoty, e janch oy huinmaayñi. Huixtujc ángeles anajty müidity c'am je huixtujcpi tzaachypi ayo'n huídi cogixiñi, e müid jadu'n ycixañ ytigoyañ Dios chip y'ejin.

2 E nhuin'ijxyich jadu'n nej tüg mejy ac vidrio, e je vidrio mühididii jin. E jim anajty je jäy ajcxy huídijaty madac co ca' huindzigiy anajty je ca'oy'iyujc etz je' y'ahuinax, je huídijaty ca' ajcxy cöbijci je ca'oy'iyujc yxiñ ñinúmero. E jim anajty ajcxy ytinaaygixy nigixy ma je mejy ac vidrio huídibi janch adücxp ajajp anajty, ymüid ajcxy je arpas huídibi ajcxy Dios mooyi. 3 Ooy anajty igixy je Moisés y'iy, je Dios ytumbi etz nañ jadu'n anajty igixy je Dios y'ung, je Cordero, y'iy huídibi minamb:

Mij ooy, etz janch mijhuinma'ñ huídibi müich ti mduñ. Huindzin, müich Dios huídibi jac mic'ajt müidip ca'ydi jac pin. Janch tudägy mich mnü'aa mdu'aa. Müich rey'ajtp huindu'myñaaxhuiñ huinixiñ huinitiempo.

4 ¿Pin müich xyca'octzigihuamb, Huindzin? ¿Pin müich xyca'occömayaanip mxii? Tug'ócy naaxhuiñyay xyajmij'adipy xyhuindzigihuipy, com müich naydügpajc je huätzpi Dios, com müich nyaj'ijxp mgötujcin co ytudägity.

5 Co jadu'n yjajti, chi n'ijxyich co y'ahuaach je Dios y'it jilby ma Dios ytijc huídibi yajpatp tzajpjoty, ma y'ity je tzaa ma yjaybetyity Dios ycötujcin. 6 E ma je Dios yajhuindzigiy yajpa'tjihuiy, jilby ypidzimy huixtujc ángeles. Ymüid anajty ajcxy yci'am huixtujc ayo'n tzaachypi. Hue' anajty ajcxy yxoxity müid huit janch oybi janch huätzpi, e janch adücxp ajajp anajty. Ymüid anajty ajcxy oorihuñ mabaad ycaachyjijp. 7 Nidüg je midaaxpi iyujc jugy'ajtmüidpi moy je huixtujcpi y'ángeles huixtujc tasi ac tím oori, janch ujtj je tasi müid je Dios chip y'ejin. 8 E je it ma Dios yajhuindzigiy yajpa'tjihuiy yajpa'tjihuiy ujtztay je' müid je jinjoc huídibi jadu'n ñipatpy nej je Dios y'oy'ajtin etz Dios ymic'ajtin. E ni pin anajty huaad ca' jilby ytigiy ma je Dios ytijc jilby tzajpjoty, ixti cooni je' ycijxtáhuipy je huixtujcpi ayo'n, je tzaachypi huídibi je huixtujcpi ángeles ajcxy ymüid.

müid je mujcu' ymic'ajt. E oy ajcxy huoomucy huidijaty anajty rey'ajtp huindu'my naaxhuiñ, jigix je' ajcxy chiptúngixipy müid je mijpi Dios huidibi tüg'óciy mic'ajt müid, co anajty je xii je tiempo yhuaad'ajtni huidibi Dios ti yajniğödügíy. ¹⁵ Jadu'n Dios ymina'ñ:

—Cuenditúngix iich n'ayuc. Ameech nhuimbida'ñich naaxhuiñ jadu'n nej meetzpi ameex nicxy meech tijaty. Paady ycixp jotcuyc pinjaty ni'ixi xy'ahuijxpich, je huidibi ypocy ti ymecxyii, e tudägy'ajtin ti paady ma iich jigix ca' jadu'n paadip nej tüg jäy huidibi yhuit ti meeçyii, e jadu'n je' yhui'my nihuädz, e tzo'ydu'n jihuüy co jäy yhuindicxyii. ¹⁶ Chi je tugigpi ca'oybi huoomujctay ajcxy je reydijc ma tüg it huidibi yxii Hebreo'amy Armegeđón.

¹⁷ Je mihuixtucpi angel yajyojctuty je' ytasi jim pojoty, e ma je it ma ajcxy huindzigíy Dios etz ma je' y'ane'mdac tzajpjoty, jiby tüg ayuc chooñ janch micpi ymina'ñ anajty:

—Ti ytuñyii yjadyii.

¹⁸ Huin'it ooy yjaji huidzuc, ne'min micpi etz jidijtin, ooy naax yücxy müid tüg ujx janch micpi, niminaabi jadu'n ycajadyii maabi jäy chinay'itigixy naaxhuiñ. ¹⁹ Chi je mij ciudad, je Jerusalén, oy yhuäcxy tugig picy, nañ jadu'n je may ciudad huidibi huindu'myñaaxhuiñ, cijx ymijähuiydäy. Chi Dios jäymejtzcoty je Babilonia cajp nej je jäy ajcxy jim ytundigooygixy, e chi quejxy may ayo'n jim müid chip y'ejcín ycixpi. ²⁰ Tüg'óciy je naax mejy'agujcpi ytigoyday. Etz tüg'óciy tungop naax-huiñyigixy cijx je' ytigoydäy. ²¹ Nañ jadu'n ooy ycäy chooñ tzajpjoty eneediiz mijjatypi majaty jäy ajcxy, janch jempxy anajty je eneediiz, tügijaty huixchiguipxy kilo. Chi jäy ajcxy ooy oyñinej nigapxy ni'ojuy je Dios müid je eneediiz ycixpi, com ooy je' mij chachajti je ayo'n je castügi.

17

Je töxyjäy jibictzinaaybi chaachypi ycastigi

¹ Nidüg je huixtucpi ángeles huidibi anajty ajcxy müid je huixtucpi ytasi ymiiñ. Chi ajcxy ymiydacy müid iich, xyñimaaygixich:

—Min yam, miiñ nyajni'ixiy je tzaachypi huidibi ypadamyb je töxyjäy pocytumbi, huidibi iñaayb mejyhuingixy. ² Je reydijc ya naaxhuiñ ti ooy ytundigooygixy müid jada töxyjäy, e je naaxhuiñyjäy ajcxy ti ooy huinma'ñyidigooygixy müid jada töxyjäy ypocytunü huinma'ñ, jadu'n nej jihuüy ajcxy ooy ti ymúucigixy.

³ E Dios yjihui'ñ ymic'ajt xyajcumäyich e cumäyjoty xyajnicxyich je ángel mijtigíduum. E jim n'ijxyich tüg töxyjäy yaj'iñäy tüg ca'oy'iyujc huidibi ycolor tzaptz, e janch niducy müid pinjaty yxii cojaayip huidibi yajjotma'tp Dios, e ymüid anajty huixtucp ycohuajc etz majc ymu'n.

⁴ Je töxyjäy hue' anajty yxojx müidity müid huit janch oyjatypi, ycolor ucy etz tzaptz, ooy anajty yaj'oyguëxigý müid oori, müid pi'ctzaa janch oybi etz perla. Ymüid anajty ma yci' tüg tasi ac tim oori janch ujtz je' anajty müid jibic-huinma'ñ huidibi ca' y'oyjäygidaacnity, huidibi pocytunü huinma'ñ müid. ⁵ E ymüid anajty cojaay tüg xii ma yhuimboc huidibi ca' pin huinjihuüy. Je letra jadu'n ymina'ñ: “Je mijpi Babilonia, huidibi nigop'ajtip pocytunü huinma'ñ etz tüg'óciy tijaty ca' y'oyjäygidaacnity ya naaxhuiñ.” ⁶ Mic'amy iich oy nhuinma'ñ nyajmiñ nyajmech co je töxyjäy hue' je' anajty ti yaj'o'ccixy je huidibi ajcxy mibijcp Dios etz huidibi ajcxy

Jesús yjāy'ajtīp, e jadu'n nipaady nej jihuūy je tōxyjāy ti ooy ymūgyi mīd je mībījcpīdījē űi'py. Co jadu'n nhuin'ijxyich, chí ooy ngījxy ngūejtyich njihuūy nhuinmaayich. ⁷ Chi je ángel xyñīmaayich:

—¿Nej co mgīxy mgūety? Ich mīich nyajnimāhuipy nej yhuimbīdzīmy huīdībī ca' pīn huinjihuūy ma yī tōxyjāy etz ma yī ca'oy'iyujc huīdībī yaj'īñaayb, huīdībī ycohuajc huixtujc mīd etz majc ymu'n. ⁸ Yī ca'oy'iyujc huīdībī ti m'ixy, je' yī tībī chināy e cham ca'p je' ma. Chí ypidzimīpy ayoodactuuyb, jayījp ma anajty ca'ni nicxy y'ayoy ytigoy tūccī'yī. E je jāy ajcxy huīdījaty tzīnaayb naaxhuīñ, e ca'p yxī y'ity cojaay ma je jugy'ajt libro huīdībī oyīy ca'ni anajty naaxhuīñybi chondāgy. Ooy je' ajcxy huīnmāaygīxīpy jihuūygyxīpy co ījxcīxīpy je ca'oy'iyujc huīdībī jecyīp ti y'octzīnaaybi, e cham ca' je' ma, e chí jada' jadūg'oc yhuimbīda'ñ.

⁹ Ya ii tigati pīn jēbī huinjihuūy je huixtujcpi cohuajc, je' je' je huixtujcpi copjot ma je cajp y'ity. E je cajp jadu'n je' nipaady nej jada tōxyjāy pocytumbī. ¹⁰ Je huixtujcpi cop jadu'n ajcxy nej huixtujcpi rey. Ma je huixtujcpi rey migoox je' ajcxy tībī ymic'ajt ytigoogyxīy. Nīdūg je' cham y'ane'my. Je jadūgpi ca'ni je' ymīñ. E co je' ymīnīpy je huīdībī cogīxīy, ca'p je' mījcajee yhuācxībīpy. ¹¹ Je ca'oy'iyujc huīdībī jecyīp tzīnay, e cham ca' ma, je' je' je mīductujcpi rey, oy je' yjajējity nīdūg ma je nihūixtujcpi rey. Huīn'it je' ñīcxnīpy ayooobi jottigooybi tūccī'yī ayoodactuuby.

¹² Je majcpi mu'n tībī m'ixy, je' je' je majcpi rey huīdībī ca'ni ajcxy ytigīygyxīy ane'mbī. E cīdīgīhuīb ajcxy ycōtujcīn co yrey'ājtcīxīpy tūg hora quīpxy mīd je ca'oy'iyujc. ¹³ Jada majcpi rey ajcxy tú'cīy ajcxy y'ijtcīxy, tú'cīy ajcxy yhuīnma'ñ, e yegīpy ajcxy y'ane'mīn ycōtujcīn ma je ca'oy'iyujc. ¹⁴ Tzīptuunīp ajcxy mīd je Dios y'ung, je Cordero. E je Cordero ymīmadactāhuīpy je' je' majcpi rey ajcxy. Com je' je' tūgpajc Huīndzīnīp ma pīn janaydījīp huīndzīn. Je' je' tūgpajc reyīp jac mīc'ajt mīdpi ma je reydjīc ajcxy. E pīnjaty Cristo mīd y'ity, Dios je' ti huīn'ixy, e tudāgy je' panīcxy Dios y'ung.

¹⁵ Nañ jadu'n je ángel xyñīmaayich:

—Yī mejy tībī m'ixy ma je tōxyjāy pocytumbī īñāy, hue' je' jadu'n nipaady nej maygajp, nej mayñación ma mayjāy chinaygīxy huīdībī capxcīxp canaagnax ayuc. ¹⁶ Je majcpi mu'n tībī m'ixy ma je ca'oy'iyujc, je' ajcxy ca'ixa'nīp catzoga'nīp je tōxyjāy pocytumbī. Chí ajcxy ix'ījxnīp je tōxyjāy pocytumbī, yajhuī'mīpy ajcxy nīhuādz. Chí ajcxy je tōxyjāy pocytumbī ñīnīcx tzu'tzīpy, e nōccīxīpy mīd jīn. ¹⁷ Dios ti pīdāgy ma ajcxy y'aa yjot huen tungīxy nej Dios tzocy, mīd co anajty ti pīdaaccīxy tú'cīy yhuīnma'ñ. E cōtujc mōhuaangīxy ane'mīn mōhuaangīxy co yrey'adīpy je ca'oy'iyujc, ixtī coonī yajcuydundāhuīpy je ayuc huīdībī Dios anajty ti capxy. ¹⁸ Je tōxyjāy tībī mhuīn'ixy, je' je' je mīj cajp huīdībī ane'mdaayb je reydjīc ajcxy huīndu'myñāaxhuīñ.

18

Babilonia cajp oy huīndīgooy

¹ Co jada jadu'n yjajti, chí nhuīn'ijxyich jadūg ángel ycidāgy naaxhuīñgīxy, choonī tzajpjoty mīd ymīj'ane'mīn ymījcōtujcīn, e ooy je naax yaj'anīy mīd je yticīxīn yjajīn. ² Chí je ángel ooy mīc yaaxqueecy ymīna'ñ anajty:

—Ti ymic'ajt ytigooy, ti ymic' ajt ytigooy je mijpi Babilonia cajp, e hue' ti y'ahuimbity mujcu' chinaydac, etz canaagnaxpi ca'oybi ymaadac chinaydac, etz ti y'ahuimbity joonmaadac joondzinaaydac, je joon ajcxy huidibi ca' yhuädzity, huidibi ca' y'oyjäygidacnity. ³ Com ti je mayjäy huidibi tzinaayb ma tüg'ócüy nación yhuinma'ñy digooygixy müid je Babilonia yjibic-huinma'ñ pocytunü huinma'ñ. Ti je reydiyç huidibi ane'mb ya naaxhuiñ müid ytundigooygixy je Babilonia. Nañ jadu'n je ajuybi adoocpi ajcxy, huidibi ya naaxhuiñ yajpatcixy, ti oy ymeeñybatcixy müid je Babilonia pocytunü ñegocio. Je Babilonia jadu'n yi' nej tüg töxyjäy jibic-huinma'ñ müidpi.

⁴ Chi nmidooyich jadüg ayuc chooñ tzajpjoty, e ymina'ñ anajty:

—Pidzimgix ma yjibi cajp com üch müich ajcxy një'ajtpy, jigix müich ajcxy ca' m'aminmugipy ma yi' ajcxy ypocy, e ni xycapaadip müich ajcxy je ayo'n tzaachypi huidibi Dios yquexamyb ma je Babilonia cajpjäy. ⁵ Yi' jadu'mbi cajpjäy ypocy ti oy mayüñi e Dios yi' ajcxy tzachytunü müid ajcxy ypocy ycixpi. Dios yjäymejchp yi' yjibic-huinma'ñ ajcxy huidibi ti tungixy. ⁶ Dios ymoyhuimbidity je tzaachypi yi' Babilonia cajpjäy, jadu'n nej ajcxy yi' je' tzaachytuñ Dios yjäy ajcxy, Dios ymoyhuimbidity je Babilonia cajp tzaachypi mejtz jadu'ñi ca'ydi jadu'n nej yi' ti yecy. ⁷ Mo' yi' Babilonia cajp yi' tzaachypi ayo'n, tim jadu'n nej yi' ti ñaymöyü ma yi' chinaayin etz ñayjihuiyi' amij agix. Yi' ymina'ñ jotjoty huinma'ñjoty: “Üch mij'ane'mbi üch. Ca' nyajpaadyich nej tüg co'ögytöxyjäy müidity tajin mayin. Ni nga'ixipyich jüyin yaaxin.” ⁸ Müid je' ycixpi tügxüyi ymiinipy je mij'ayo'n o'cin, tajin mayin, jüyin yaaxin etz yuuba'm ma je Babilonia cajp. Chi ninöghuipy je Babilonia cajp müid jin. Com yi' Huindzin Dios ooy yi' ymijity, e yi' ti yajpocycäy yi' Babilonia cajp, huidibi nipatp nej tüg töxyjäy pocytumbi.

⁹ Je reydiyç ya naaxhuiñ huidibi jibic-huinma'ñ pocytunü huinma'ñ tungixp quipxy müid je Babilonia jäy, chi ajcxy ytäjcixipy ymäygixipy yjüygixipy yáaxcixipy co anajty ijxcixyp je Babilonia cajp jinjoty co anajty ytooybicy. ¹⁰ Jiguem ajcxy yjacmij'ljxcixipy müid co anajty chigüygixy co páatcixipy ayo'n quipxy müid Babilonia, e yminángixipy:

—iAy, müich Babilonia mij cajp, huidibi ooy mgapxpaadyity, ooy mmijity, ooy mmic'ajt müidity! Per janch tim tüg jaxigy ti xyñimüñ je' ayo'n huidibi Dios ti quexy müid mbocy ycixpi.

¹¹ Je ajuybidijc adoocpidijc huidibi ajcxy naaxhuiñ jüygixipy yáaxcixipy ajcxy müid je Babilonia cajp ycixpi, com ca'p anajty pin juuyip ajcxy yjuy ytoocy. ¹²⁻¹³ Je ajuybidijc adoocpidijc ajcxy ymüid oori, plata, tzaa oyjatypi, perla oyjatypi, lino huit oyjatypi, sedi huit oyjatypi, rey yhuít, huit color tzaptzpi, nañ jadu'n ymüid ajcxy canaagnaxpi quipy huidibi oyjaty xuucp, pajc vaso, quipy vaso oyjatypi, cobre vaso, pujx vaso, marmol vaso. Ymüid ajcxy canela, etz tijaty ooy oy xuucin müidity, poom, mirra, perfume, vino aceite, trigo tim, iyujc animal huidibi tzimy yajyöyb, cöbixy, cohuary, carreti, tumbi huidibi codoogüip, etz jacjadyi jäy juugypi. ¹⁴ Je ajuybidijc adoocpidijc ajcxy ñimähüipy je Babilonia jäy ajcxy:

—iCa' ajcxy m'ocmüidiñ je tim tza'm huidibi ajcxy mjot yjatzojcpy, ca' ma anajty y'ocyaipatni. Ti tigoydäy müich ajcxy mjogy'ajt, je mgomeeñ'ajt, etz m'ijxin huidibi anajty müich ajcxy mmüid, ca' ma ocyajpatnip jadüg'oc!

¹⁵ Je huidijaty anajty huit ixtaayb meen ixtaayb, e ti ycomeeñygojcixy ma yijmbi cajpin, jiguem ajcxy yhuimdhuiipy miid tzigiñ jihuñ, co nañ jadu'n je tzaachypi castigi padaangixy. Yaxip ajcxy etz nidáxcixipy nimáaygixipy je Babilonia cajp. ¹⁶ Chi ajcxy yminaanipy:

—¡Ay! ¡Miich mij cajp huidibi ayo'n patp! Jadu'n miich anajty nej tüg töxyjäy huidibi xoxyip miid huit oyjatypi, huidi ycolor ucy etz tzaptz, yaj'oyguëxigy miid oori, miid pi'ctzaa oyjatypi, miid perla. ¹⁷ ¡Janch tim tüg jaxigy, janch tim tüg hori, ti ycixy miich mmijjugy'ajtin mmijcomeeñ'ajtin!

Tüg'óciy pinjaty nihuindzin'ajtp barco etz pinjaty barcojoty viajettumb, marinerotijc ajcxy etz huidibi ajcxy tumb ma je mejy, ti je' ajcxy yhuimdaaygixy jiguëgy. ¹⁸ Co ajcxy ijxy nej anajty ytoy yjocy je mij ciudad, chi ajcxy yminaan:

—¿Huidibi cajp jada' ji jadu'nip nej jada anajty jadayaabi mij cajp?

¹⁹ Chi ajcxy ooy naax ñayajcöhuoogiyi miid jotmay, cham ooy yaaxcixy, ytajcixy ymaygixy, e mic chachminaangixy:

—¡Ay! ¡Je mijpi oybi cajp huidibi ayo'n patp, ma je tüg'óciy pinjaty anajty ymiid barco ma mejy, ti ycomeeñygojcixy anajty miid je'! ¡Janch tim tüg mij jaxigy, tim tüg hori, ti yhuindigoydäy miich mmijjugy'ajtin mgomeeñ'ajtin!

²⁰ Jotcugüygix miid je Babilonia cajp ycixpi, miich tzajpjoty tzinaayb ajcxy, etz miich ajcxy huidibi Dios xyhuin'ijx co jëbi m'apóstol'ajtcixy, etz nañ jadu'n miich ajcxy huidibi najtzcapxiiy Dios y'ayuc ytiy'ajt, etz nañ jadu'n pinjaty ijtp ma Dios. Com co Dios ti yajpocycäy Babilonia cajp, je' yi' ti yaj'adigach jadu'n nej ajcxy xymiidundigoy.

²¹ Huin'it tüg ángel janch mic'ajtmiidpi conigy tüg tzaa, jadu'n nej tüg molino paandzaa mijpi, chi je' cogädziy mejyjoty, e yminaan:

—Nej jada tzaa ti ytigooyin, nañ tim jadu'n je mijpi oybi Babilonia cajp ytigoydähuiipy. E janch ni mina pin cajac'ixipy. ²² E ni camina ajcxy ngajac'midohuiipy jim Babilonia co pin arpi coob etz flauta yajxuuxp trompeti yajxuuxp mijni mijtu'. E ca' jacyajpaadip pinjaty ti dung ii jajtp, ti oficio jajtp, ni mgamidohuiipy je molino paandzaa ñe'min. ²³ Ni mina ti ycatüxcixipy jadüg'oc ma je Babilonia cajp. Ni mina ycayajmidohuiipy jadüg'oc je xii je xondaacin huidibi jajtip co jäy ypicy. Oy je Babilonia ajuuybi y'adoocpi ajcxy anajty ooy yjamicjäyity ya naaxhuiñ, e ti ajcxy huin'iiñ mayñaaxhuiñjäy miid ajcxy brujerías.

²⁴ Jim ma je Babilonia cajp jim yajpaady je' ajcxy ñi'py je tiibi ajcxy Dios y'ayuc najtzcapxiiy, je huidibi ajcxy huin'ixyip ma Dios etz tüg'óciy mibijcpidijc tiibi yaj'ögyaatcixy naaxhuiñgyxy.

19

¹ Co jadu'n yjajti, chi nmidooyich may'ayuc micpi co mayjäy ajcxy ooy ycapxcixy ymiydaaccixy tzajpjoty, yminaan ajcxy:

¡Aleluya! fích ajt nDios yi' tügpajc ti xyajnidzoocim ajt n'alma. Yi' je' tügpajc mij'oy'ajt miid.

² Com janch etz tudägy Dios y'ane'min ycötujcin. Ti je' möy ycastigo je Babilonia cajp huidibi ti yajhuinmañyidigoy je naaxhuiñjäy miid je ycatudägy'ajtin ycixpi. Yi' je' ti yaj'adigach ma je Babilonia cajp je Dios ytumbi, huidibi yaj'ögy ajcxy, pat jim.

³ Chi ajcxy jadüg'oc yminaanip:

—¡Aleluya! Je jünjoc huídibí jím Babilonia co ytoy je cajp, pa'ttigíhuip tzajpcíxy huinixí huínitiempo, ca' yjün ypidzip ni mína.

⁴ E je iipx madaaxpi mijjáy etz je madaaxpi iyujc, huídibí jugy'ajt mñid ñaygojxtinaygidaaci naaxcíxy, chi ajcxy ooy Dios ojadayty huídibí anajty ane'mb ma je mij'ane'mdac, e ymínaangixy:

—¡Jadu'n jada! ¡Aleluya!

⁵ Huin'it yajmidooy jüby ma je Dios y'iñaydac ycötujctac tüg ayuc ymína'n:

Huindzigiyyigix iibatcix capxpatcix iich ajt nDios nidüg'óciy pinjaty tumb mñid yí, pinjaty yí tzigíyb, huen mutztjcity huen ymij'anáctjcity.

Je jotcuje'ajtin huídibí nbadaanim co anajty Cristo yjáy nimiñ

⁶ Nmidoohuich nañ jadu'n nej jihuíy ooy mayjáy ycapxy ymiydägy, nej canaag mijñí y'a'ich, nej enee micpi yjidity, ymínaangixy:

¡Aleluya! Ti y'ane'mdigíy jüby naaxhuíñ je Huindzin Dios huídibí tügpajc mijip.

⁷ Agujc'ajtim jotcuje'ajtim, tzoc cömaayim Dios, tzoc mooyim mij'ajt. Com ti paady je xí je tiempo mína Dios y'ung naybadáanigixp tümugáanigixp mñid yí yjáy, tim jadu'n nej jihuíy ypiga'n mñid yí ajcxy. Ti Cristo yjáy ñayñí'ixíyigixy, jaydebí ñaybáatigixip ytügmúccixip mñid yí, tim jadu'n nej tüg jáy ñayxoxyii co ypiga'n.

⁸ Dios ti a'ixíy co Cristo yjáy ajcxy ñayxoxíyb mñid yhuít oyjatypi, huídibí adiicxp ajajp.

Je huit xojx oyjatypi jadu'n nipaady nej je tudägy'ajtin huídibí je mibijcpidijc ti paatcixy ma Dios.

⁹ Chi je ángel xyñimaayich:

—Jaay jada ayuc. “Jotcuje ajcxy pinjaty huooyip ma yajhuinxíiduna'n Dios y'ung, je Cordero, co naydügmugáanigixy mñid yí yjáy ajcxy.”

Chi je ángel xyñimaayich:

—Jada je' Dios y'ayuc janchypi.

¹⁰ Chi ngojxtinay'ihuíyich ma je ángel yhuinduu co njahuindzigiñhuaañich. Chi je' xyñimaayich:

—Ca' jadu'n m'idích. Dios iich xytumbí'ajtp jadu'n nej müich etz nej jacjadyí migügtjic huídibí mijpidaaccixp cixyot huínjot je ayuc tíy'ajt janchypi huídibí Jesús ycapxhuäcx. Huindzigi' Dios.

Jadayaabi ayuc tíy'ajt janchypi huídibí Jesús ñidíy'ajt'ajt, yí je' je Dios y'ayuc huídibí je profetas ajcxy ñajtzcapxiy.

Je mij'ane'mbí huídibí poobcohuay yaj'iñayb

¹¹ Chi nhuin'ixyich tzajp'ahuädz, chi yquëxígy tüg poobcohuay, e je pin anajty yaj'iñayb hue' anajty naydijyii je tudägypi je janchypi. Je huídibí tiydumb naaxhuíñyáy mñid tudägy'ajtin etz huídibí tziptumb mñid tudägy'ajtin. ¹² E je' huídibí yaj'iñayb je poobcohuay, je' yhuin jadu'n je' nej jünye'n, e ymñid anajty ma ycohuajc maycoroní huídibí nidíy'ajt'ajtp co yrey'aty ma tüg'óciy jáy. E je' ymñid anajty tüg xí cojaay, e je' anajty naydügpajc nejhuíyb yxí ca' jac pin. ¹³ Hue' anajty yxoxiyty mñid huit y'uucyity mñid ni'py, e je' yxí hue' anajty xí'adyí Dios y'ayuc. ¹⁴ Je ángeles ajcxy huídibí soldad'ajtp tzajpjoty ypayóyí anajty ajcxy ac poobcohuaygixpi, yxoxiyty ajcxy mñid sedi huit janch oybi, poobí etz huätzpi. ¹⁵ Je huídibí yaj'iñayb je poobcohuay, ma yí y'ahuac ypidzimy anajty tüg

espada janch jippi, e je' m̄id yajtzaachihua'ñ je maynaaxhuiñyäjy. E je' ane'ma'ñ m̄id Dios ymic'ajt. E m̄id yí' y'ayuc castigi möhua'ñ je mayjyä m̄id ypocy ycixpi huidibi tzinaayb ma je may it lugar ya naaxhuiñ. Yí' y'ayuc jadu'n yí' nej tüz espada janch jippi. E yí' m̄id'adaanip je mijpi Dios chip y'ejcin, je Dios huidibi tüg'óciy mic'ajt m̄id. E mictägy tzaachypí castigi yega'ñ ma je mayñaaxhuiñyäjy m̄id ypocy ycixpi, jadu'n je maynaaxhuiñyäjy nipaady nej jihuïy Dios y'ung tenmicx uvas m̄id ytecy. ¹⁶ E ym̄id anajty cojaay ma yhuit etz ma ypu yadayaabi ayuc: “Reydijc ajcxy yrey. Huindzindijc ajcxy yHuindzin.”

¹⁷ Huin'it nhuin'ijxyich tüg ángel ytinäy xi'aguic, chi ooy janch mic miyaaxy tüg'óciy je joon huidijaty queec-huidijtp tzajpcujc yminañ:

—Miingix naymujctáayigix ma Dios adzuu'ibi yecy. ¹⁸ Miingix, jigix mdzúdzicixipy reydijc ajcxy ñinïcx, capitán ajcxy etz micjäydijc ajcxy ñinïcx, cohuay chüch etz nañ jadu'n je' ajcxy ñinïcx huidibi yaj'iñaayb. Mdzúdzip tüg'óciy jäy ñinïcx: tumbidijc midumbidijc, je huindzindijc, comeñydijc etz je ayoobidijc.

¹⁹ Chi nhuin'ijxyich je ca'oy'iyujc etz je rey ajcxy huidibi yajpatp ya naaxhuiñ m̄id tüg'óciy ypubejtpidijc ysoldadotijc ajcxy. Nhuin'ijxyich co ti ñayöymújigixy co chiptunaangixy midziptzonaangixy je huidibi poobcohuay yaj'iñaayb quipxyi m̄id je' ypubejtpidijc ysoldadtijc ajcxy.

²⁰ Chi je ca'oy'iyujc ymachycäy quipxyi m̄id je profeta ca'pi yjanchity, je tiibi anajty tuñ mijhuinma'ñ ma je ca'oy'iyujc yhuinduu. M̄id je mijhuinma'ñ ycixpi je profeta, ca'piy yjanchity, ti anajty ooy huin'ññ tüg'óciy je huidijaty ajcxy nayyejci co je ca'oy'iyujc ytiy'ajt iixpejt cöbijci ma yhuimboc etz co huindzigüiyi je ñidzejtztuutin. Jadu'n je ca'oy'iyujc etz je profeta, ca'piy yjanchity, yajcötijnajxy ajcxy ma jün ytoy m̄id azufre, jadu'n je jün nej tüg mejy huädz jün. ²¹ Jacjadyi jäy hue' ajcxy o'cin patcixy m̄id espada huidibi anajty pidzimb ma je' y'ahuac je huidibi anajty poobcohuay yaj'iñaayb. E tüg'óciy je joon etz luud huidibi ajcxy queec-huidijtp cijx je' ajcxy ytimycuuxtáayigixy ytimypejtáayigixy m̄id may öcpi chüch.

20

Je mil jimijtpi

¹ Huin'it nhuin'ijxyich tüg ángel ycidägy choon tzajpjoty m̄idity je ahuasti huidibi m̄id yaj'ahuäch je mij jut huidibi oy yciicyity, ym̄id anajty nañ jadu'n tüg mijcadena ma yci'. ² Jadayaabi ángel majch je ama'y tza'ñ huidibi yajtijp mujcu' etz Satanás, chi yajcadenitigüiy, e yajhui'my mach tüg mil jimijt. ³ Chi je ángel cötijnajxy je mujcu' ma je mij jut, chi cö'agüiy. Chi tüg selli pidacy ma je mij jut aguu. Pidacy je mujcu' ma je mij jut, ca'ydi jac-huin'ññ je mayñaaxhuiñyäjy, ixti cooni tüg mil jimijt yca'pxipy. E co jadu'n anajty mil jimijt ti ñaxy, ooy ycopicyity co yajnajtzmazdihuiipy je mujcu' tzojccixy.

⁴ Chi canaag ane'mdac nhuin'ijxyich ma anajty ajcxy iñäy tiibi ajcxy patcixy cötujcin co tiydúngixipy naaxhuiñyäjy. Nañ jadu'n nhuin'ijxyich ajcxy y'alma huidibi anajty ajcxy ti yajyöctzujcttuuticixy m̄id co ajcxy capxhuäcxy je Dios y'ayuc ytiy'ajt huidibi Jesús ñidiy'ajt'ajt. Ca'p je' ajcxy anajty huindzigüiygixy je ca'oy'iyujc, ni je' ñidzejtztuutin. E nañ jadu'n ni ca' ajcxy cöbijci je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxyi m̄id Cristo

tüg mil jimijt. ⁵ Je jacjadyii je öcpi, huídibi ca'p mijpidacy Cristo, ca' je' ajcxy yjugypigipy, ixti cooni anajty ti ñaxy tüg mil jimijt huin'itni. Co tüg'óciy je mibijcpidijc yjugypigipy jadüg'oc, jada je' je ogá'nibi tiempo mina öcpi ajcxy yjugypijccixy, e ca' y'oc'ó'ccixnñp jadügtecy. ⁶ Jotcuyc etz huádz, ca' tibocy müdity, je' ajcxy öcpidijc huídibi jugypigipy co Jesús yajjugypigipy yi tügpiy öcpi huídibi jayijp'adamb. Je mimetzpi o'cin ca' ni ti mic'ajt müdity ma je' ajcxy. Hue' janch ajcxy ytung'adiyb huingapxi ma Dios etz Cristo. E je' ajcxy Cristo quipxy müd y'ane'mip tüg mil jimijt.

⁷ Co anajty ti ñaxy je mil jimijt, huin'it je Satanás yajcoguejttüdiy ma ymach'ity. ⁸ Chi Satanás nicxy huin'itñ je mayñaaxhuiñyäj huindu'mybi ñaaxhuiñ. Je' nicxy huin'itñ Gog jäy etz Magog jäy. E yi' ajcxy y'ane'mbidijc yajmujctähua'ñ soldado ajcxy, jigix chiptungixipy müd je Dios y'ung. Jadu'n je' ajcxy soldados ymayity jadu'n nej pu' ymayity huídibi mejpá'am. ⁹ E jadu'n ajcxy ypediy ma ymijhuiinity naax, chi ajcxy yajnaadujcy je it ma chinaaygixy huídibi Dios ti huin'itxigixy etz yajnaadujccixy je ciudad huídibi Dios chojcy. Chi Dios quejxy jün huídibi tzoomb tzajpjoty, huídibi oy ñöcigixy huádz huádz je may soldados ajcxy. ¹⁰ Je mujcu', huídibi anajty ti huin'itñ je mayjäy, oy yajcötijnaxy ma je mij jün toyo müd azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jiiby je' ajcxy ayo'n tzaachypí paadipy xim tzuum huinixi huinitempo.

Je tyduunin ma je mij'ane'mbi yhuinduu

¹¹ Nhuin'itxycich tüg mij'ane'mdac janch poob, müd je huídibi anajty iñaayb ma je'. Ma je' yhuinduu naax etz tzajp queectigoyday yajxon, ni ca' y'ocyajpatni it lugar ma je naax etz tzajp y'itcixipy. ¹² Chi nhuin'itxycich je öcpi ajcxy, mij'anäcpi mutz'anäcpi, ytinaaygixy ma Dios yhuinduu. Chi yajciyhuäcxtay maylibro. E nañ jadu'n yajciyhuäcxy jadüg libro huídibi müd je jäy yxi cojay huídijaty ajcxy jugy'ajtñ huinixi müd. Chi je' ajcxy yajtyduñ je öcpi ajcxy nej anajty ajcxy ti chinaaygixy ya naaxhuiñ, jadu'n nej yjaybetyity ma je maylibro. ¹³ Je mejy yciyejctay je' je öcpi ajcxy huídibi anajty jiiby yajpatp. E je o'cin etz je öcpijut yciyejctay je' je öcpi huídibi jiiby yajpatp, e tüg'óciy je' yajtydunday nidüg nidüg nej anajty ti chinaaygixy. ¹⁴ Je o'cin etz je it ma je öcpi y'ity yajnajtzitijyday jünjoty ma je mijjün toyo. Je' je' je mimetzpi o'cin ma je mijjün toyo. ¹⁵ E huídijaty anajty ajcxy ca' yxi ymiiñ ma je libro huídibi jugy'ajtñ huinixibi müd, hue' je' ajcxy yajnajtzitijy jünjoty ma je mijjün toyo.

21

¹ Huin'it nhuin'itxycich tüg tzajp jemybi etz tüg naax jemybi, com je jayijpi tzajp etz je jayijpi naax ti je' anajty ytigoydäy, e ni ma anajty mejy yacädäy. ² Ich, Juan, nhuin'itxycich je ciudad huätzpi jemybi, je Jerusalén, ycidägy anajty chooñ tzajpjoty ma Dios yajpaady, janch oyduñ anajty, jadu'n nej tüg töxyjäy ñay'oyduñyii ñayxoxyii co ypiğa'ñ müd yëydijc. ³ Nmidoohuich tüg ayuc micpi chooñ anajty tzajpjoty, e yminañ:

—Cuenditun ich n'ayuc. Dios tzinaydac pigamb ma naaxhuiñyäj ajcxy. Yi' tzinähuiipy müd yi' ajcxy, e yi' ajcxy Dios yjäy'adiyb. E Dios ci'm idaamb müd yi' ajcxy jigix yi' ajcxy Dios'adiyb. ⁴ Dios yajquëgñb ajcxy ytajñ ymayin etz yajtidziib ajcxy yhuinni, e ca'p yjadiib o'cin ni jiyin ni yaaxin, ni jotmay, ni pin ycajihuihuip je ju'pin je pa'min. Com je huídibi anajty ijnaayb, ti je' ñaxy.

⁵ Huin'it je' ymínañ huidibi anajty iñaayb ma je mij'ane'mdacín:

—Cuenditungix ñich n'ayuc. Huinjemy ngojtigadza'ñich tüg'ócíy huidibi jii'ijtp.

Nañ jadu'n ymínañ:

—Jaay jada ayuc. Com jadyaabi ayuc ooy jada yjanchity, e ooy yi' jot'amij'ajt müidity.

⁶ Huin'it je mij'ane'mbi xyñímaayich:

—Ti tüg'ócíy ytunyí yjadyí. ñich je' nyajtzondacp tüg'ócíy tijaty, etz ñich nyajcogixíyb tüg'ócíy tijaty, tím jadu'n nej je letra A huidibi yajtzondacp je alfabeto etz je letra Z huidibi yajcogixíyb je alfabeto. Pinjaty tzojcp jemybi jugy'ajtin ñich yi' nmóhuip. Jadu'n nipaady nej jihuíy ajcxy ytidzíyigixy, e nyaj'ügich ma ymuxy je ñíí huidibi yejcp jugy'ajtin, ni ca' ajcxy mímeeñyduunip ni jadu'ñi. ⁷ Pinjaty mímadactaayb jibic-huinma'ñ etz pocytuní, yi' je' cidígíhuíyb huidibi njé'ajtpy, e ñich yi' xyDios'adíyb, e yi' ñich n'ung'adíyb. ⁸ Je huindzícytíj ajcxy, pinjaty ca' ymíbicy ñich ndiy'ajt, pinjaty tumb huidibi ca' y'oyjáygídaacnity, pinjaty jáy yaj'ócip, pinjaty migapxtígooyb tóxyjáydíj, pinjaty tumb capxpogí, pinjaty míjpidacp huiyjáy yhuinma'ñ, pinjaty huindzíyíb quipychech tzaadzech, etz pinjaty anídadcp, je' ajcxy nidüg'ócíy níbidzímíyb ñícxípy ma míjín ytoy míid azufre, huidibi quéxícp nej jínmejy. Je' je' je mímetzpi o'cín.

Yíjemybi Jerusalén

⁹ Huin'it nidüg ángel je nihuíxtujcpi huidibi anajty míid huíxtujc tasi ujtztjatypi míid je huíxtujcpi ayo'n tzaachypi huidibi jac'axam tunaaníp jadaaníp, je' xyñímaayich:

—Mín, e cham nyajní'ixíhua'ñ je míbijcpídíj huidibi tügmgugamb míid Dios y'ung, je Cordero, jadu'n nej tüg yéydíj ytügmucy míid ytóxyíj co ajcxy ypicy.

¹⁰ Je huidibi Dios yjihuí'ñ ymíc'ajt xyaj'íjxích cumáyjoty, chi je ángel cümáyjoty xyajnícxíyích ma tüg cop míjpi etz cíxpi, chi xyaj'íjxyích je míjpi ciudad santa. Je ciudad santa hue' je' yxí Jerusalén, e ycidágy anajty choón tzaíjoty jiiyb ma Dios yajpaady. ¹¹ Je míj ciudad santa janch adícxp je' anajty míid Dios y'oy'ajtin. Jim jadu'n anajty y'adícxpy nej tüg tzaa janch oybi nej mármol, janch yaj'íjxnajxp nej íjxin. ¹² Jühuidityí anajty müidity je ciudad santo ac poch janch míj etz cíxy. Je poch ymíid anajty majmetz y'aguu. E ma je majmetzpi y'aguu majmetz ángel ajcxy y'íjtcíxy, tügpi ángel ma tügíaty ciudad aguu. Etz yjaybetyíty je' ajcxy yxí je majmetzpi Israel tribu, tügpi tribu yxí yjaybetyíty ma tüg tüg poch y'aguu. ¹³ Tugígy anajty y'aguu müidity xíbidzím'amy, tugígy y'aguu ma tíchypoí ymíiníy, tugígy y'aguu ma jínboí ymíiníyín, etz jatugígy y'aguu ma xígidágy'amy. ¹⁴ Je poch huidibi anajty ymíid je cajp, ymíid anajty majmetz tzaa huidibi y'íjx'ajtip, e majmetzpi tzaa ymíid anajty cojaay je nímajmetzpi apóstoles ajcxy yxí huidibi Jesús, je Cordero, yhuín'íjx, tügpi apóstol yxí ma tüg tüg tzaa.

¹⁵ Je ángel huidibi anajty míydacp míid ñich, ymíid anajty tüg quípx ac tím oori je' anajty. Je' anajty míid quípxa'ñ je cajp, je poch y'aguu, etz je poch. ¹⁶ Je cajp, je ciudad, hue' je' anajty cuadradí; nej anajty yoñ'ajt, nañ jadu'n anajty y'agon'ajt, etz nañ jadu'n ycíx'ajt. Chi je ángel quípxy je ciudad santa míid je' yquípx. E hue' quípxy mejtz míl jamejtz mígo'px

kilómetros, y'ayoñ'ajtin ycix'ajtin etz y'agon'ajtin quipxyjaty je' anajty. ¹⁷ Huin'it je ángel quipxy je poch, hue' quipxy migo'px jahuixchiguipx mīdaax cīnuux, jadu'n nej naaxhuiñjāy ajcxy ycīnuux, huīdi je ángel yajtumyb.

¹⁸ Je poch hue' je' anajty ypochity mīd tzaa oyjaty, e je cajp hue' je' anajty ac tim oori, yguēxīgy nej iix huätzpi. ¹⁹⁻²⁰ Je tzaa huīdibi je poch y'ijx'ajtip hue' je' anajty y'oyduñity huīdi mīd y'oyguēxīgy, tzaa janch oyjaty canaagnax color. Je jayijpi poch y'ijx hue' anajty y'oyduñity mīd jaspe tzaa, je mīmetzpi poch y'oyduñity mīd safiro tzaa, je mīdugīgpi poch y'oyduñity mīd ágate tzaa, je mīmadaaxpi y'oyduñity mīd esmeralda tzaa, je mīmīgooxpi poch y'oyduñity mīd ónice tzaa, je mīdudujcpi poch y'oyduñity mīd coralina tzaa, je mīhuixtujcpi poch y'oyduñity mīd crisólito tzaa, je mītuctujcpi poch y'oyduñity mīd berilo tzaa, je mīdaxtujcpi poch y'oyduñity mīd jacinto tzaa, je mīmajmetzpi poch y'oyduñity mīd amatista tzaa. ²¹ Je majmetzpi poch'aguu hue' anajty y'oyduñity mīd tūgpi perla. E je mījtu' huīdibi najxp cajpcujc hue' y'oyñy mīd oori huätzpi, e yquēxīgy nej vidrio huätzpi yaj'ijxnajxp.

²² Ma je Jerusalén cajp jemybi ca'p nhuin'ijxyich ni tūg templo, ni tūg tijc ma jāy ajcxy Dios ojadajtcixy. Com je Huīndzin Dios, yī huīdibi tūgpajc mījip, etz je' y'ung, je Cordero, jadu'n yī' ajcxy nipaady nej tūg templo nej tūg it ma mayjāy ajcxy y'ojadājtigixy Dios etz je' y'ung. ²³ Je jemybi Jerusalén ca'p je' anajty yajmayjaty xī po' huīdibi yaj'anīhuip yajtiicxīhuip je ciudad, com je Dios y'oy'ajtin etz je' y'ung y'oy'ajtin yī' je' ajcxy nej je tiicxin jajin huīdibi amb tiicxp ma je Jerusalén jemybi. ²⁴ Je mayñāaxhuiñjāy huīdibi ti patcixy y'alma nīdzoocin naxīpy tīgīhuipy ajcxy mīd je jemybi Jerusalén ytīcxin yjajin huīdi anajty ti ymōyī. E je ane'mbidīc ajcxy ya naaxhuiñ ymīmīnīpy ajcxy mīj'ajt, oy'ajt, etz cōmay'ajt ma je jemybi Jerusalén. ²⁵ E je cajp aguu ni camīna je' agīy yca'idīpy xīm, com jim ca' jim ycoodz'idīpy, paady ni mīna yca'agi' y'idīpy. ²⁶ Jim je naaxhuiñjāy, canaag agajp, mīnīcīp ajcxy ymīj'ajt y'oy'ajt ycōmay'ajt ma je Jerusaléngajp, je jemybi. ²⁷ Ca'p jim ytīgīhuipy ni pīn huīdibi ca' y'pocyñīhuāchñī, ni pīn huīdibi tumb ca'pī y'oyjāy'gīdaacnity, etz huīdijaty jāy huin'īmb. Jēyī jim tīgīhuip pīnjaty ijtp yxī cojay ma je libro huīdibi Dios y'ung, je Cordero, ymīd, ma cojay y'ity je jāy ajcxy yxī huīdibi ymīd jugy'ajtin huinīxībi.

22

¹ Huin'it je ángel xyajni'ixīyich tūg mījnī huätzpi, je nī huīdibi yejcp jugy'ajt huīdibi ca' ycīxip ytīgoyīp. Janch huādz janch tiicx je' anajty je nī nej tūg iixin. E je nī jim anajty ymuxy ma Dios etz je Cordero y'ane'mdac. ² Jada mīj nī hue' je' anajty ñaxy cuidad mījtūgajc, etz ma je mejtz'adu'm'amybi mījnība', jim anajty je quipy huīdibi jugy'ajt mīd, huīdibi tīm'ajt majmetz'oc tūgpi jīmījt, po' po' ytīm'aty, e je quipy y'aay hue' anajty ytuñ jīgīx huaad naaxhuiñjāy choocixy. ³ Ca'p jim y'adīpy ni ti ayo'n ni ti jotmay mīd pocytunī ycīxpi. Je Dios etz je' y'ung je' jim y'ane'mdac ycōtūjtac yajpaadīpy. E je' ytumbidīc je' ajcxy jim yajmīj'adīb ojadadīb. ⁴ Y'ijxīpy ajcxy je Dios y'ung yhuīñyijp etz ymīnīcīp ajcxy je' yxī cojay ma ajcxy yhuīmboc. ⁵ Ca'p jim ycootzīhuity. E pīnjaty jim tzīnaayb ca'p ajcxy yajmayjadīpy linterna jīn, lamparajīn,

ni x̄id̄ic̄xp̄i, com Dios ñch ajt nHuindzin yí' yí' ajcxy cod̄ic̄x̄ñb. Je Huindzin Dios etz je' y'ung je' ajcxy j̄im ane'm̄ip huin̄ix̄i huin̄itiempo.

Huingoon̄ñ yi Jesucristo ym̄inaañ

⁶ Huin̄'it je ángel xyñ̄imaayich:

—Jadayaabi ayuc tiy'ajt ma jada necy, ooy jada yjanchity, e jēbi miich myajm̄ij'adipy. Je Huindzin, je Dios hūidibi ayuc moy je profetas ajcxy jecy'ajty, quejxy y'ángel j̄igix yajni'ix̄ihūipy je' ytumbid̄ijc tijaty tzojc tunaan̄ip jadaan̄ip.

⁷ Jesucristo jadu'n ym̄inaañ:

—iMiimb̄ich tzojc! Jotcujc p̄in̄jaty tumb cuendi etz cuydumb Dios y'ayuc ytiy'ajt hūidibi jaybetyip ma jada libro.

⁸ ñch Juan, nm̄idoohuich etz nhuin̄'ix̄yich, chi nhuij̄oj'ihūiyich ma je ángel ytecym̄ijc hūidibi anajty yam xyajni'ix̄iybich. ⁹ Chi je' xyñ̄imaayich:

—Ca' jadu'n m'̄id̄ich. ñch, Dios xytumb̄i'ajtp jadu'n nej miich etz jacjadyīi miḡügt̄ijc hūidibi Dios y'ayuc najtzc̄ap̄x̄iyip, e t̄üg'óciy p̄in̄jaty tumb cuendi hūidibi jaybetyip ma jada necy. Huindzigi' etz ojadat Dios.

¹⁰ Chi je' xyñ̄imaayich:

—Cap̄x̄hūac̄xi je Dios y'ayuc hūidibi ti mjay ma jada necy, ca' mȳüdz̄ip. Com ti yhuingoñ je tiempo m̄ina Dios cuydunañ yi y'ayuc hūidibi yjayhūi'm ma jada necy. ¹¹ P̄in̄jaty ca' ytūd̄ägyity, huen jadu'n jacya-jpaady m̄id̄ ycatud̄ägy'ajt. P̄in̄jaty j̄ib̄ic̄jot j̄ib̄ic̄-huinma'ñ tumb, huen n̄igi j̄ib̄ic̄jot j̄ib̄ic̄-huinma'ñ tuñ. E p̄in̄jaty tud̄ägyi tumb, huen jactuñ tud̄ägy'ajt̄in. P̄in̄jaty hūadz yjot hūadz yhuinma'ñ m̄id̄, huen hūadz yjot hūadz yhuinma'ñ jacm̄i'ity ma Dios.

¹² Chi je Cristo ym̄inaañ:

—Timetiini nhuimb̄id̄ipyich jad̄üg'oc naaxhuiñ. Co anajty ti nm̄iñ̄ich, huin̄'it nyajjotcuḡihūib̄ich p̄in̄jaty oybi ti tuñ, e ndzaachytun̄ipyich p̄in̄jaty j̄ib̄ic̄pi ti tuñ. ¹³ ñch je' ti njaȳijp'atyich ya naaxhuiñ, etz ñch je' cogix̄ihuamb, tim jadu'n nej je letra A chond̄ägy ma je alfabeto etz je letra Z ycogix̄iy ma je alfabeto. ñch ti nyajtzondacyich je naaxhuiñ etz nyajcix̄ipyich.

¹⁴ Jotcujc ajcxy p̄in̄jaty ti ypocyñ̄ihūäch, jadu'n nipaady nej ajcxy yhūit ti pujcixy e m̄id̄ ajcxy yhūit hūätzpi. Com ti ajcxy ypocyñ̄ihuaatzcixy, paady jēbi j̄ic̄xc̄ixip je ujtz tza'm hūidibi jugy'ajt yejcpy hūidibi ca' ycīx̄ipy ytīgoyipy ni m̄ina, e jadu'n jēbi ytīḡiy ma je jemybi Jerusaléngajp.

¹⁵ Dios ca' yí' ajcxy cōb̄iga'ñ ma je jemybi Jerusalén etz hūi'm̄ip ajcxy cajpa' t̄üg'óciy p̄in̄jaty hūidibi j̄ib̄ic̄-huinma'ñ m̄id̄, p̄in̄jaty ca' m̄ib̄icy Dios, p̄in̄jaty m̄ij̄pid̄acp hūijȳäy yhuinma'ñ brujo yhuinma'ñ, p̄in̄jaty ajcxy migap̄xt̄igooyb m̄idund̄igooyb t̄öxȳäyd̄ijc, p̄in̄jaty ajcxy j̄äy yaj'ōcp, p̄in̄jaty ajcxy huindzigīȳyb quipychech tzaachech, etz t̄üg'óciy p̄in̄jaty tzachnixond̄acp an̄i ayuc.

¹⁶ ñch Jesús hūidibi cap̄xp. Ti nguexyich n'ángel ma miich j̄igix jada tiy'ajt cap̄xt̄ic̄x̄ipy majaty m̄ib̄ij̄cp̄id̄ijc ma t̄üg t̄üg cajp. ñch je' ījx'ajtp cop'ajtp ma je rey David m̄iñ̄. Etz ñch je' nm̄ij'ap'ajtpyich nm̄ijteedy'ajtpyich je rey David. Jadu'n ñch nipaady nej je m̄ijmadza' hūidibi yajtijp jayx̄im.

¹⁷ Je Esp̄iritu Santo etz je m̄ib̄ij̄cp̄id̄ijc hūidibi jadu'n nipatp nej Cristo yt̄öxyijc ym̄inaangixy:

—Min ma Jesucristo.

E pin amídoo'ijtp ñich n'ayuc ymínáangixipy:

—Min ma Jesucristo.

E pin tzojcp jugy'ajtín huídibi ca' ycixipy ytigoyipy nimina, jadu'n nej jihuïy ytidziyíi e tzocy jada níi, huen miñ, e nmöhuibych jugy'ajtín, jadu'n nej jihuïy nyajni'ügich je níi huídibi jugy'ajtín miid e ni ca' mímeeñydunipy ni jadu'ñyi.

¹⁸ Tüg'óciy pinjaty amídoo'ijtp Dios y'ayuc ytiy'ajt huídibi jaybetyip ma jada libro, ñich miich ajcxy nimaaybich co pinjaty jacyaj'anajxp jada ayuc ma jada necy, Dios jac'anaxy möhuib tzaachypí ayo'n, ca'ydí huídí jaybetyip ma jada libro. ¹⁹ E pin puuhijtzp hueení jada Dios y'ayuc huídibi jaybetyip ma jada Dios ylibro, Dios yí' jötziib yxií huídí cojaayip ma je jugy'ajt libro. Nañ jadu'n ypuhúdziiyb huídí anajty japaatip ma je jemybí Jerusaléngajp, huídí jada libro ñimiydacpy.

²⁰ Yí Jesucristo huídibi jada ayuc capxp, yí' mánamb:

—Ca' ooy jecy njac-huäcxiba'ñich co nhuimbidiipyich naaxhuiñ jadüg'oc.

Jadu'n jada. Amén. ¡Min, Huindzin Jesús!

²¹ Huen je nHuindzin Jesucristo may'ajt oy'ajt tunipy miid miich ajcxy huídibi mibijcp. Jadu'n ngapxycíxyich. Amén.